


Wængongui nänö
Apänegainö



New Testament in Waorani (EC:auc:Waorani)

Wængongui nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

Mäateo	1
Mäadoco	82
Odoca	130
Wäö	216
Näni Cægainö	277
Odömänoidi	359
1 Coodintoidi	397
2 Coodintoidi	434
Gadataidi	458
Epetoidi	472
Pidipenteidi	486
Codotenteidi	495
1 Tetadönitenteidi	504
2 Tetadönitenteidi	511
1 Tımoteo	515
2 Tımoteo	526
Tito	533
Pidemöö	538
Ebedeoidi	540
Tantiago	571
1 Pegodo	580
2 Pegodo	591
1 Wäö	597
2 Wäö	607
3 Wäö	609
Codaa	611
Nänö Odömongainö	614

Itota Codito ingantedö ante Mäateo nänö watapæ ante yewæmongainta

Itota Codito wæmæidi (Odoca 3.23-38)

¹ Nē Ponguingä, ante dodäni nāni nē angaingä iñömö Itota Codito inongä ingampa. Tömengä iñömö Abadäo wodi pæingä nē ingaingä inte Awënë Dabii wodi pæingä mönö inongä ingacäimpa. Tömengä wæmæidi iimaï emongadänimpa, ante yewæmonte ongompä.

² Abadäo wodi wengä Itæca eñagacäimpa.

Ayæ wææ Itæca wodi wengä Aacobo eñagacäimpa.

Ayæ wææ Aacobo wodi wënäni Oodaa nāni caipæ eñagadänimpa.

³ Ayæ wææ Oodaa wodi Tämata ingante monte Pade tönö Dada inate tapæigacäimpa.

Ayæ wææ Pade wodi wengä Etedöo eñagacäimpa.

Ayæ wææ Etedöo wodi wengä Adäma eñagacäimpa.

⁴ Ayæ wææ Adäma wodi wengä Äminadabo eñagacäimpa.

Ayæ wææ Äminadabo wodi wengä Näatöo eñagacäimpa.

Ayæ wææ Näatöo wodi wengä Tädämöo eñagacäimpa.

⁵ Ayæ wææ Tädämöo wodi pæte Adacaba ingante möninqe Boodo ingante tapæigacäimpa.

Ayæ wææ Boodo wodi pæte Odoto ingante monte Obedo ingante tapæigacäimpa.

Ayæ wææ Obedo wodi wengä Yæte eñagacäimpa.

⁶ Ayæ wææ Yæte wodi wengä Dabii eñate pædinque awënë odeye bagacäimpa.

Ayæ wææ Dabii wodi pæte Odiya wodi nänöogængä iningä ingante möninqe Tadömöo ingante tapæigacäimpa.

⁷ Ayæ wææ Tadömöo wodi wengä Doboöo eñagacäimpa.

Ayæ wææ Doboöo wodi wengä Abiya eñagacäimpa.

Ayæ wææ Abiya wodi wengä Ata eñagacäimpa.

⁸ Ayæ wææ Ata wodi wengä Ootapato eñagacäimpa.

Ayæ wææ Ootapato wodi wengä Oodäo eñagacäimpa.

Ayæ wææ Oodäo wodi wengä Otiya eñagacäimpa.

⁹ Ayæ wææ Otiya wodi wengä Ootäo eñagacäimpa.

Ayæ wææ Ootäo wodi wengä Acadæ eñagacäimpa.

Ayæ wææ Acadæ wodi wengä Etequiya eñagacäimpa.

¹⁰ Ayæ wææ Etequiya wodi wengä Mänatee eñagacäimpa.

Ayæ wææ Mänatee wodi wengä Ämöö eñagacäimpa.

Ayæ wææ Ämöö wodi wengä Ootiya eñagacäimpa.

¹¹ İninqe Ootiya wodi quëwengäñedë idægoidi inänite babidöniaidi ponte ö æ gobæ wabæca mäodäni gogadänimpa.

Ayæ wææ Babidöniabæ nāni goyedë Ootiya wodi wënäni Eecöniya nāni caipæ eñagadänimpa.

¹² Mänii Babidöniabæ ö ænte godäni ate ayæ wææ Eecöniya wodi wengä Tadatiedo eñagacäimpa.

Ayæ wææ Tadatiedo wodi wengä Dodobabedo eñagacäimpa.

¹³ Ayæ wææ Dodobabedo wodi wengä Abiodo eñagacäimpa.

Ayæ wææ Abiodo wodi wengä Ediaquimö eñagacäimpa.

Ayæ wææ Ediaquimö wodi wengä Atodo eñagacäimpa.

¹⁴ Ayæ wææ Atodo wodi wengä Tادoco eñagacäimpa.

Ayæ wææ Tادoco wodi wengä Aquii eñagacäimpa.

Ayæ wææ Aquii wodi wengä Ediodo
ëñagacäimpa.

¹⁵ Ayæ wææ Ediodo wodi wengä
Edeadado ëñagacäimpa.

Ayæ wææ Edeadado wodi wengä
Mäatäo ëñagacäimpa.

Ayæ wææ Mäatäo wodi wengä Aa-
cobo ëñagacäimpa.

¹⁶ Ayæ wææ Ootee wodi ingante Aa-
cobo tapæigacäimpa.

Ayæ Ootee wodi ëñate pæte wææ
Itota badä ingungä ingante
Mäadiya ingante mongacäimpa.

Mäadiya ingante mongä ate
tömengä wæætë Itota ingante
mangacäimpa. Tömengä iñömö
Awënë bacæcäimpa, ante cædinque
Wængongui oginguipæ gao cæcä ate
edæ, Codito, ante nänö në pemon-
gaingä ingacäimpa.

¹⁷ Mänömaï i incæ Abadäo wodi
pæinäni wææ nänömoidi wææ,
önompo tipæmpoga wææ mem-
poga go mempoga mänimpoga nani
yebæñedë ate Abadäo wodi pæingä
Dabii ëñagacäimpa. Ayæ wææ
Awënë Dabii wodi pæinäni wææ
nänömoidi wææ, önompo tipæmpoga
wææ mempoga go mempoga
mänimpoga nani yebæñedë ate Ood-
eoidi inänite wabæca Babidöniabæ
ænte gogadänimpa. Ayæ Babidöniabæ
ænte godäni ate tömënäni pæinäni
wææ nänömoidi wææ, önompo
tipæmpoga wææ mempoga go mem-
poga mänimpoga nani yebæñedë
ate mönö Codito nänö ponguinque
ëñagacäimpa.

*Itota Codito ëñacampa
(Odoca 2.1-7)*

¹⁸ Itota Codito iïmaï ëñagacäimpa.
Wäänä Mäadiya wodi nänö baque-
cäñedë Ootee wodi tömengä ingante
do, Monguimo, angä ëñëningä inte
ayæ mönämaï iñongante Wængongui
Tæiyæ Waëmö Önöwoca angä
ëñëninque do yædëmadä bacä
adänitapa. ¹⁹ Yædëmadä ingä adinque
Ootee cöwë nö cædongä inte, Piinte
änäni wæcæ wæ, ante wædinque,

Awëmö pango cæcæboimpa, ante
pönengantapa.

²⁰ Ante önöwënenque pönëninque
möwocodë wïimöñongä Wængongui
tömengä anquedo ingante da pönongä
pöninque anquedo iñömö iïmaï an-
gantapa. “Ootee, Awënë Dabii pæimi
inömi inte bitö nänöogængä Mäadiya
ingante guïñënämaï æncæbiimpa.
Tömengä iñömö Wængongui Tæiyæ
Waëmö Önöwoca angä ëñente
beyænque ënengä adinque bitö iñömö
tömengä ingante ee moncæbiimpa.

²¹ Tömengä Wëñængä onguïñængä in-
gante mancæcäimpa. Mangä pæcä ate
tömengä iñömö, Botö guïdëmini mïni
wæquinque wënæ wënæ cæminipa,
ante adinque botö æmo beyænque
quëwencæminimpa, ante cæcæcäimpa
cæbii. Bitö tömengä ëmöwo ante,
Në Ængä inongä ingampa, ante
Itota pemoncæbiimpa,” ante anquedo
Wængongui nänö në da pönöningä
ponte Ootee ingante angacäimpa.

²² İninque Wængongui beyæ në
apænegaingä iïmaï ante nänö
yewæmongainö bai ante iinque
batimpa.

²³ “Baquécä incæ yædëmadä bad-
inque

Wëñængä onguïñængä ingante
mancæcäimpa.

Mangä ëñacä adinque tömengä
ëmöwo, Ëmänoedo, ante godö
pemoncædänimpa.”

Ante nani yewæmongainö bai
cædinque tömengä ëmöwo, “Wængongui
mönö weca quëwengampa,” ante,
Ëmänoedo, ante pemonte inongäimpa.

²⁴ Ootee mänii wïimonte ñäni
ömæmongä ate Wængongui nänö da
pönöningä anquedo nänö ämaï ëñente
cædinque oncönë ænte gocä incæte
guëa mönämaï ingadäimpa. ²⁵ Edæ
bamoncadengä ëñacä ate, Itota, ante
pemonte ate tömëna mäniñedë ate
guëa mongadäimpa.

2

*Në ëñënäni Itota weca ëñacæ
pönänipa*

1 Itota Bedëe nāni quëwëñömö ëñacā ate māniñedë edæ Edode Oodeabæ awënë odeye nānō iñedë edæ nē nō ëñënāni gobæ nænque tamönō quëwënāni inte Eedotadëe pongadānimpā. ² Ponte āninqwe,

—Oodeo Awënë Odeye iñömö ñöwocā ëñadingā iñömö æyömönō owocāā, ante ëñencæte ante wæmönipā. Edæ nænque tamönō quëwëñömöni Awënë nēmō ta ñongæ adinqwe mönitō tömengā weca ædæ wææninque edæ, Bitō Wængonguī imidō anguënë, ante watapæ apæneceæ pömöni imönipā, ānānitapā.

³ Ayæ, Wacā Awënë Odeye ëñacampā, ante tededāni ëñente wædinque māniömæ tömāmæ awënë odeye Edode wæætë pīinte bayongā Eedotadëe quëwënāni tömānāni tömengā tönō godongāmæ guñente wædānitapā. ⁴ İninqwe, Wængonguī quī, ante nē godönāni ñænænāni tönō Wængonguī nānō wææ angainō ante nē odömönāni tönō tömānāni inānite Edode añecā godongāmæ pönānitapā. Pönāni ate tömengā, Codito nāni angaingā iñömö æyömönō ëñaquingāā, ante æbānō yewæmonte öñō amīni.

⁵ Añongante,

—Oodeabæ iñömö Bedëe nāni quëwëñömö māniñömö ëñacæcāimpā, ante Wængonguī beyæ nē apæneceā incæ iīmaī ante yewæmongacāimpā, ante apænedānitapā.

⁶ “Oodabæ awënë gobedönadodoidi tæiyænāni iñönāni mīnitō adobæca Oodabæ quëwëninque Bedëe iñömö mīni quëwencabo iñömö mēa pönī imīni incæte edæ wīi önömīnique incæmīnimpā.

İñæmpā Wëñængā adocanque ëñate pædinque nē Awënë bate taodinqwe

nē aacā bai inongā inte botō guidēnāni idægoidi inānite aacæcāimpā.”

Ante yewæmongā amönipā.

⁷ Ante apænedāni ëñente wædinque Edode wæætë nē nō ëñënāni inānite

awëmö añete pönāni ate, Nëmö æyedënö mā pönī tamö amīnitawo. Añongante tömēnāni, Māniñedë tamö atamönipā, ante apænedāni.

⁸ Eñëninque Edode iñömö,

—Mīnitō wæætë Bedëe iñömö māo nē ëñadingā ingante diqui diqui minte aedāni. Tömengā ingante adinqwe wæætë adodö pöninqwe apænemīni ëñëmoedāni. Edæ mīnitō gote æbānō wëñæ ingante apænemīni bai botö adobai edæ gote ædæ wææninque edæ, Wængonguī Awënë imidō anguënë, ante watapæ apæneceæte ante āmopā, ante Edode önonque ante pönëninque apænegacāimpā.

⁹ Angā ëñëninque nēmö nē adīnāni iñömö Bedëe taadö gote æmō ayönāni edæ ado nēmö tömēnāni nænque tamönō quëwëninque nāni adimö incæ wo go adinqwe edæ tē wocæ goyönānite nēmö Wëñæ owoyömö oncōmanca tæcædæca inö næ gongæ adānitapā. ¹⁰ Adinqwe tömēnāni edæ, Mönö acæ pönongā iñömö ongongampā, ante pönëninque watapæ togadānimpā. ¹¹ Māniī nāni adincönē go guite ayönāni Wëñængā iñömö wānā Māadiyā tönō ongongā adinqwe tömēnāni Wëñængā weca ædæ wææninque,

Bitō Wængonguī Awënë imidō anguënë, ante watapæ apænedānitapā. Ayæ tömēnāni nāni ænte pönincoo wī æmpodinqwe oodo tönō oguī waa quī tönō tī nā öni pæqui tönō, Bitō quī impā, ante pædæ godönāni ængacāimpā. ¹² Idæwaa adinqwe tömēnāni möwocodë wīimöñönānite wacā ponte apæneceantapā. Mīnitō awënë Edode weca ocæ ëmænte godāmaī iedāni, angā ëñëninque tömēnāni wæætë yaatænque godinqwe tömēnāni ömæ wadæ gogadānimpā.

Ooteidi Equitobæ wodii winönānīpā

¹³ Godāni ininqwe edæ Ootee wīimöñongā Wængonguī anquedo ingante da pönongā ponte apænedinqwe, “Edode do Wëñængā ingante wænoncæte ante diqui mincæcāimpā cæbii. Ængæ gantite Wëñængā nāna

badancaya inate ö ænte Equitobæ wodii goe. Ayæ gote quëwëñömini botö ämo ate pöedäni,” angä.

14 Æñëninque Ootee tömengä nänö wïimöönæ ayaönæñëña incæ ængæ gantidique Wëñængä nana badancaya inate ö æninque edæ Equitobæ gocantapa. 15 Godinque Ootee nani wencabo iñömö Edode nänö wænguinganca quëwencæ gogadänimpa. Go quëwënäni ininque mönö Awënë Wængonguï iïmaï ante nänö apænegainö ante iinque batimpa. “Botö Wëñængä Equitobæ quëwëñongante äñebo pongantapa,” ante Wængonguï beyæ në apæñecä nänö yewæmongainö bai edæ do iinque batimpa.

Wëñænäni inänite Edode angä wænönäni wænänipa

16 Edode guiquënë, Nëmö në nö ëñënäni botö äninö ante ëñënämaï inte dæ godänipa, ante adinque edæ ænguï bacantapa. Ænguï badinque tömengä, Wëñænäni inänite mäo wænöedäni, angantapa. Äninque tömengä, Mëa wadepo iñonte nëmö ta atamönipa, ante në ëñënäni nani änimpoga ante pönëninque, Mëa wadepo ëñadinäni tönö ayæ ëñadinäni tönö Bedëë quëwënäni incæ Bedëë eyequeï quëwënäni incæ onguïñænänique inänite mäo wænöedäni, angantapa. Ininque në wænönäni wæætë awënë nänö adinänique inänite capo ado tedæ wænönäni wængadänimpa. 17 Wænäni wädäni ininque Wængonguï beyæ në apænegainö Eedëmiya wodi iïmaï ante nänö angainö bai edæ iinque batimpa.

18 “Nämaa nani quëwëñömö në Ca ca wæwënä nänä Ca ca wæpämö ëñënänitapa.

Wäänä në Yæ yæ änönä inte, Daquedä iñömö, Botö wëñænäni, ante wädä ëñënänitapa.

Dæ änäni pönente wædinque wäänä ædö cæte piyænë cæquïnää,” ante Eedëmiya wodi yewæmongacäimpa

19 Ayæ ate awënë Edode wængä ininque Ootee iñömö Equitobæ ayæ quëwëninque wïimöñongä Wængonguï anquedo ponte a ongöninque tömengä ingante apæñecantapa. 20 “Ootee ëñëmi. Wëñængä ingante wænönæcä änönäni incæ dobæ wænänipa cæbii. Ængæ gantite Wëñængä nana badancaya inate Idægobæ adodö ænte gocæbiimpa,” angä.

21 Æñëninque Ootee iñömö edæ ængæ gantidique nana badancaya inate Idægobæ adodö ænte gocantapa. 22 Mäniñedë wæmpo Edode wængä ininque, Wæætë tömengä wengä Adoquedao Oodeabæ awënë odeye bacantapa, ante tededäni ëñente wædinque Ootee iñömö, Botö Oodeabæ ædö cæte wæætë goquïmo, ante guïñente wæcantapa. Wæætë tömengä möwocodë wïimöñongä wacä angä ëñëninque Oodeabæ wodo tebæ godinque Gadideabæ gocantapa. 23 Godinque Ootee nani wencabo Näatadeta ponte quëwënänitapa. Ininque, Näatadënö ingampa, ante pemoncädänimpa, ante Wængonguï beyæ në apænegainö nänö angainö bai cædinque wädäni ñowo mönö Codito ingante, Näatadënö, ante pemonte bai apænegadänimpa.

3

Wäö önömæca ponte apæñecä ëñënänipa

(Mäadoco 1.1-8; Odoca 3.1-9, 15-17; Wäö 1.19-28)

1 Mäniñedë Wäö mönö në æpænë guidönongä inte Oodeabæ önömæca ponte apæñecä ëñengadänimpa.

2 Ponte apænedinque tömengä, “Öönædë Awënë incæ inguipoga tömämæ Awënë Odeye bacæcäimpa cæminii. Minitö wënæ wënæ cædinö ante, Ancaa wæwente awædö, ante ñimpo cædäni,” ante Wäö apæñecä ëñënänitapa.

3 Mänömainö ante në apæñecä ingantedö ante Wængonguï beyæ në apænegainö Itaiya wodi iïmaï ante do yewæmongacäimpa.

“Önömæca iñömö adocanque ogæ tedete aa pecæcäimpa.

‘Awënë nänö ponguinö ante minitö tee moncate bai cæedäni.

Taadö töinö pinonte bai cædinque minitö wënæ wënæ mini cædinö ante edæ wido cæedäni,’ ante aa pecä eñengæimpa,”

⁴ Ante Itaiya wodi nänö nē an-gaingä inte Wäö ñowo pongan-tapa. Tömengä weocoo ante cämeyo ocaguincoo nonte badonte wēñate mongæninque pacadeyænta ante æmontai badonte encadeyænongäimpa. Tömengä cænguī ante ñawäique cæninque tömengä bequī ante guīñemænque ade bete quëwënongäimpa.

⁵ Quëwëñongä, Eedotadëë quëwëñäni tönö Oodeabæ tömäo quëwëñäni tönö Oododänonga biyönæ tömäo quëwëñäni tönö tömengä weca tate bee tēninque änänitapa.

⁶ Bitö ämäi näwangä wënæ wënæ cæte quëwëmöni inte wämönipa, ante wädäni eñëninque Wäö Oododänö æpænë guidongä guidänitapa.

⁷ Ayæ Paditeoidi tönö Tadoteoidi guiquënë Wäö nänö guidöñömö pönäni adinque tömengä ayæ wæætë tömënäni inänite angantapa. “Tæntæ pæimīni bai inömini inte minitö iñömö eñënämaī cæte quëwëmīnipa. Oo pönī wænompadäni, ante æcänö wææ angä eñëninque wodii winonte pömīnii.

⁸ Iñæmpa Wængonguī Awënë gämænö minitö dicæ ocæ emænte poncæ cæminiyaa. Nö cæte pömīni ininque minitö nē ocæ emænte pönäni nāni waa cædö bai adobai waa cæedäni.

⁹ Ayæ nämä wææ äninque, ‘Mönitö adomönique docä Abadäo wodi pæimöni inte möni quëwenguinque imönipa,’ ante mini tedewënö ante pönënämaī inguënë quëwëmīnii.

Iñæmpa Wængonguī, Botö pæināni bacædänimpa, angä bai dicacoo incæ dobæ tömengä pæināni bai bacædönimpa. ¹⁰ Edæ awæ yecæte ante awænca nāni mæ yequinca eyewa pönī næænāni bai Wængonguī nänö panguinca næænte bai do edæ a

ongongampa. Tömengä wainca ante a ongöñongä ömæcawæ bai wīi pönente cædäni adinque awæncaca wægo yete godö gongapamö iya tante bai cæcæcäimpa, ante ämo eñëmaimīnipa.”

¹¹ Ayæ, “Minitö wënæ wënæ mini cædinö ante wido cæcæminimpa, ante cædinque botö minitö iminite æpænë guidömo guimīnipa. Incæte botö mänömaī cæbo ate wacä ayæ poncæcäimpa. Tömengä iñömö tæi emongä ewocadongä iñongante botö wæætë wädämo inömo inte tömengä awæncata incæ ædö cæte godö ænte nææmaimoo. Tömengä da pönongä pöninque Wængonguī Tæiyæ Waëmö Önöwoca incæ pö guidinque minitö mīmö mënongacæcäimpa. Ayæ minitö wënæ wënæ cædinö ante gonga tante bai tömengä cæcæcäimpa.

¹² Waocä, Todigo tömëmö wati wati tæñöninque botö tæñöniñömö önömancaque baquinque botö apænte æninque waiña tömämö oncönë da wencæboimpa, ante timpodæ næænte wo ææntodö wo ææntodö cædinque ontapocoo wææincoo wadæ ñëmænte wo ewengampa. Waocä mänömaī wo ewencæte ante timpodæ næængä bai mönö nē Ponguingä iñömö adobai oo pönī apænte ancæcäimpa. Todigo waiñacooque oncönë da wente nē mangä bai tömengä adobai nē waëmö inäni inänite apænte ængä ate tömënäni tömengä nempo guicædänimpa. Wæætë wadæ ñëmænte wo ewente bai cædinque tömengä nē ontapocoo wææincoo bai inäni inänite cöwë bæcoyömö iya tangä gonte wæcædänimpa,” ante Wäö apænegacäimpa.

Itota æpænë guicampa

(Mäadoco 1.9-11; Odoco 3.21-22)

¹³ Wäö ayæ apæneyongä Itota iñömö Gadideabæ quëwëninque, Wäö botö imote æpænë guidongä guicæboimpa, ante cædinque Oododänonga pongantapa.

¹⁴ Ponte, Guidömi guiboë, äñongante Wäö wæætë wææ äninque,

—Botö waëmö imopa diyæ bitö imite guidömo guiquimii. Bitö wæætë botö imote guidömi guibo bai waa incædönimpa.

¹⁵ Ante wæyongante Itota wæætë,

—Cöwë ee cæbi, ämopa. Wængongui nänö änö ante tömänö ëñente nö cæmö inguënëmö imompa.

Ante apænecä ëñëninge Wäo Ao ante ee guidongä guigacäimpa.

¹⁶ Guiite æpæ do tao gongænte æmö ayongä iñontobæ öönæ incæ wëä godömonte bayö Wængongui Önöwoca incæ equemö wææ bai tömengäa wææ pö guicä acantapa.

¹⁷ Wææ guicä ayongä edæ öönædë inö apænedingue, “Mäningä iñömö botö Wëñængä inongä inte botö në waadecä ingampa. Tömengä ingante adingue botö watapæ tobopa,” ante öönædë inö apænecä ëñengacäimpa.

4

Itota incæ wënæ wënæ cæccæcäimpa, ante wënæ cæcampa

(Mäadoco 1.12-13; Odoca 4.1-13)

¹ Ayæ mäniñedë edæ, Itota iñömö wënæ angä ëñente æbänö cæquiringä, ante Wængongui Önöwoca incæ Itota ingante önömäca mäicä æigacäimpa.

² Æi quëwëninge tömengä wantæpiyæbaï ado tedæ odömöninge awënë odeyeyidi waa pönï nani ëmönö adobaï odömongä acantapa. ⁹ Itota ingante apænedingue wënæ awënë,

—Bitö botö weca ædæ wææninge, Tatänabi bitö Wængongui Awënë bai inömi imipa, ante watapæ apænebi ëñëmoe. Mänömainö ante apænebi ëñëninge botö wæætë, Mäniömæ tömäo ongöñömæ pönömo æninge bitö tömäma Awënë babaimipa, ante wënæ incæ änewengantapa.

—Bitö Wængongui Wëmi imitawo. Näwangä i iningue dica incæ päo ämi ba cæmäimipa.

⁴ Äñongante Itota iñömö,

—“Cænguinge cænte ædö cæte quëwenguü. Wængongui nänö apænedö tömäne ëñente cædinge waocä cængui cænte bai quëwëncæcäimpaædæ wææninge tömengä ingante, Bitö Wængongui imidö anguënë, ante watapæ apænecæbiimpa. Ayæ tömengä adocanque ingante në cæbi incæbiimpa,” ante Wængongui beyæ yewæmonte ongö apa änewëë, äninge Baa angantapa.

⁵ Wënæ awënë ayæ Itota ingante Eedotadëë tæiyæ waëmö nani quëwëñömö ænte mäocä gocantapa.

Ayæ Wængongui oncö ñænæconga wænömënæca ænte mäi gönongä næ gongængantapa. ⁶ Næ gongæñongante wënæ awënë wæætë,

—Bitö Wængongui Wëmi imitawo. Näwangä i iningue bitö to wæibi ate dodäni iïmainö ante nani yewæmongainö bai iningue ba abaimpa.

“Bitö beyæ ante cædinge Wængongui tömengä anquedoidi inänite angä pöningue, tömënäni bitö imite wææ aate iñæ æmpodäni ate bitö dicaa tee tëwadämaï incæbiimpa,” ante yewæmonte ongompa cæbii.

⁷ Äñongante Itota,

—Iñæmpa godömenque ante yewæmongatimpa. “Bitö Awënë bitö Wængongui iñongante bitö wæætë edæ, ‘Ëñënamäi cæbo incæte mönö Awënë Wængongui æbänö cæquiringä,’ ante acæte ante cædämaï incæbiimpa,” ante adobaï wææ yewæmonte ongö apa änewëë, ante Itota angantapa.

⁸ Ayæ wæætë wënæ awënë Itota ingante æibæ pönï onquiyaboga mäicä æicantapa. Æi ongöñongä wënæ awënë iñömö awënë od-eye ömäcoo inguipoga tömäo ongöñömæcoo adoyömö a ongonte

—Bitö botö weca ædæ wææninge, Tatänabi bitö Wængongui Awënë bai inömi imipa, ante watapæ apænebi ëñëmoe. Mänömainö ante apænebi ëñëninge botö wæætë, Mäniömæ tömäo ongöñömæ pönömo æninge bitö tömäma Awënë babaimipa, ante wënæ incæ änewengantapa.

¹⁰ Änewëñongante Itota wæætë,

—“Bitö Awënë Wængongui weca ædæ wææninge tömengä ingante, Bitö Wængongui imidö anguënë, ante watapæ apænecæbiimpa. Ayæ tömengä adocanque ingante në cæbi incæbiimpa,” ante Wængongui beyæ yewæmongatimpa cæbii. Botö weca ongönämaï gobäwe, angantapa.

11 Angä go ate Wængongui tömengä anquedoidi pöningue Itota beyæ pönö waa cægadänimpa.

Gadideabæ ponte Itota mä apænenecampa

(Mäadoco 1.14-15; Odoca 4.14-15)

12 Ayæ quëwëñongä, Wäö ingante dobæ tee mönedänipa, ante tededäni ëñente wædinque, Itota wæætë Gadideabæ wadæ gogacäimpa. 13 Wadæ godinque tömengä Näatadeta ponte wodo pænta godinque godömenque go gäwapæ yæwedeca Tabodöoidi tönö Nempatadiidi nani owogaimæ iñömö pöningue edæ Capënaömö nani quëwëñömö ponte quëwengantapa. 14 Itota mäniñömö ponte quëwengä iñinque Itaiya wodi Wængongui beyæ nê apænenecä nänö angainö bai mäniñedë iñinque batimpa.

15 “Tabodöömæ tönö Nempatadiibæ ingaiñömö,

Gäwapæno gämænö godö,
Oododänö æmæmäa iñömö,
Gadideabæ iñömö wii oodeoidi
wadäni nani quëwëñömö impa.

16 Nê ëñënamäi inäni wëmö iñömö contayönäni,
tömënanäni weca ñäö guinæ tamö bai
adänitapa.

Tömënanäni nani wænguimämo oo iñonte
wëmö iñömö contayönäni,
mönö Codito ñäö ëmongä inte do
pongä adänitapa.”

Ante Itaiya wodi nänö yewæmongainö
bai ante cædinque Itota mäniñömö
ponte apænenecä ëñënanitapa.

17 Itota mäniñedë iimäi ante mä
apænenecä ëñënanitapa. “Öönädë
Awënë incæ inguipoga tömämæ
Awënë Odeye oo bacæcäimpa cæminii.
Minitö wënæ wënæ cædinö ante,
Ancaa wæwente awädö, ante pönente
ñimpo cædäni,” ante cöwë apænenecä
ëñengadänimpa.

*Nê gæyæ dadöwënanäni inänite Itota
aa pecampa*

(Mäadoco 1.16-20; Odoca 5.1-11)

18 Ayæ mäni pöningue Itota gäwapæ
Gadideapæ yæwedeca gote cægonte
ayongä Timönö Pegodo nani änongå

tönö Æntade nana caya inate acan-
tapa. Nê gæyæ dadöwëna inöna inte
tömëna ñowo dicamöñæ æpænë wo
guitodonte dadöwëñöna Itota gote
acantapa. 19 Tömëna inate Itota,

—Iñäna, botö miñæ edæ tee empo
pöeda, ämopa. Nê dadonte ænte
pöminä inte botö weca pöñöminäte
botö pönö cæbo ate minatö wæætë
nê apænemina badinque waodäni
inänite nê ænte pöminä bacæminaimpa,
angantapa.

20 Angä ëñëninque tömëna dicamöñæ
do ëmö cæte godinque Itota miñæ
edæ tee empo wadæ godatapa.

21 Mäniñömö ongonde wadæ god-
inque Itota wada inate Tebedeo
wëna Tantiago tönö Wäö nana caya
inate acantapa. Tömëna mämpo
tönö wipodë ongonde dicamöñæ
tadömoncöna adinque Itota tömëna
inate, Botö miñæ pöeda, angä.

22 Ëñëninque tömëna Ao äninque
Tebedeo wëna Tantiago tönö Wäö
wæmpocä ingante wæætë, Mämpo
ëñëmi, änatapa. Nê cædäni tönö
wipodë owote cæyöminite mönatö
bitö imite ëmö cæte godinque Itota
miñæ gomönapa, äninque adodaque
wadæ gogadäimpa.

*Tæiyænäni inänite Itota odömonte
apænenecä ëñënanäni*

(Odoca 6.17-19)

23 Ayæ Gadideabæ tömämæ
godinque Itota iñömö Wængongui
apænenecä nani ëñente yewæmongainta
ate odömöincönë go guite odömonte
apænegacäimpa. Öönädë Awënë
incæ inguipoga tömämæ Awënë oo
badinque waa cæte aacæcäimpa,
ante apænenecä ëñengadänimpa. Ayæ
waodäni wënæ wënæ inte nani
wæwënö ante ayæ quiëmë beyæ
wæncæ cæte wädäni incæ Itota
tömënanäni nani wädö ante pönö
cæcä ate tömänäni waa badänitapa.

24 Adinque, Itota mänömaï cæcampa,
ante Tidiabæ tömämæ gode änäni
ëñëninque waodäni pöningue nê wënæ
wënæ inte wæwënanäni inänite tömengä
weca ænte pönänitapa. Ayæ nantate

wæwēnāni tōnō wēnæ inte quēwēnāni inānite ænte pōninqe dowænte ināni tōnō cōmāināni inānite tōmengā weca ænte pōnāni adinqe tōmengā godō cæcā ate nē wēnæ wēnæ inināni inte tōmānāni waa bagadānimpa.

²⁵ Ayæ Gadideabæ quēwēnāni tōnō Decapodibæ quēwēnāni pōñōnāni wadāni Eedotadēē quēwēnāni tōnō Oodeabæ quēwēnāni ayæ Oododānō æmæmāa quēwēnāni tæiyæñāni pōninqe tōmengā miñæ tee empote gogadānimpa.

5

Itota ānanquidi æite apæñecā ēñēñānipa

¹ Tæiyæñāni pōnāni adinqe Itota iñōmō ānanquidi æi tæ contayongā tōmengā miñæ nē godāni pōnāni.

² Ate tōmengā iñæ ænete nanguī tedete iīmaī ante odōmonte apæñecā ēñengadānimpa.

Waacā iīmaī cæte watapæ tote quēwencæcāimpa, ante (Odoca 6.20-23)

³ “Waadāni, Botō waēmō ewocabopa diyæ oōnædē Awēnē weca go guiquimoo, ante nē wædāni iñōmō tōmēnāni nāni watapæ toquinque edæ oōnædē Awēnē Odeye nempo tōmēnāni quēwenguinō do ēadānipa,” angantapa.

⁴ “Nē wæwente quēwēnāni iñōmō tōmēnāni nāni watapæ toquinque wædānipa. Edæ Wængonguī tōmēnāni inānite waadete godō cæcā ate tōmēnāni wampo pōnencædānimpa.”

⁵ “Nē gānē pōnente ædæmō cæte quēwēnāni iñōmō tōmēnāni nāni watapæ toquinque edæ inguipoga tōmāmæ æninqe awēnēidi bai bacædānimpa.”

⁶ “Wængonguī nō pōnī nānō entawēnō bai adobai entawencæboimpa, ante æcānō cænguī cæinente bai wæda, æcānō tepæ gæwænte bai wæda tōmēnāni iñōmō nāni watapæ toquinque wædānipa. Edæ tōmēnāni tōmo cænte bai Wængonguī nānō nō entawēnō ænte ædæmō

entawente tocædānimpa,” ante Itota apæñecantapa.

⁷ “Wadāni quēwencædānimpa, ante nē godō waadete waa cædāni iñōmō tōmēnāni nāni watapæ toquinque cædānipa. Edæ mānōmaī nē cædāni inānite wadāni wæætē, Quēwencæminimpa, ante nāemæ apænedinqe godō waadete waa cæcædānimpa.”

⁸ “Mimō ñāō bai nē entawēnāni iñōmō tōmēnāni nāni watapæ toquinque edæ Wængonguī ingante do acædānimpa,” ante apæñecantapa.

⁹ “Guēadō guēa pīināmaī iedāni, ante nē wææ wææ ānāni iñōmō tōmēnāni nāni watapæ toquinque edæ wææ ānānipa. Tōmēnāni inānite wadāni edæ, Minitō Wængonguī wēñæmīni iminipa, ante do apænedāni ēñente tocædānimpa.”

¹⁰ “Nō cædāni beyænque wadāni piinte pānāni nē wæwēnāni iñōmō edæ tōmēnāni nāni watapæ toquinque wæwēnānipa. Tōmēnāni oōnædē Awēnē Odeye nempo nāni quēwenguinō edæ do ēadānipa.”

¹¹ “Wadāni botō beyæ pīininqe mīnitō iminite babæ ante ānānitawo. Minitō iminite edæ togænte pānānitawo. Ininqe edæ mīni watapæ toquinque impa. Ayæ, Nē wiwa cæmīni iminipa, ante wadāni piinte ānewēnāni wæmīni ininqe edæ mīni watapæ toquinque impa.

¹² Edæ, Oōnædē mōnō ænguīnō ante nanguī ongompa, ante pōnēninqe mīnitō ñōwo wadāni nāni piinte cæyedē incæ watapæ toedāni. Edæ mīnitō iminite piinte pānāni bai mīnitō ayæ dæ āñedē Wængonguī beyæ nē apænegaināni inānite adobai piinte pangadānimpa, ante toquēnē wæwēmīni,” ante Itota odōmonte apænegacāimpa.

Cati bai iminipa. Ñāō bai iminipa,

ante (Māadoco 9.50; Odoca 14.34-35)

¹³ Godōmenque apænedinqe Itota, “Minitō iñōmō inguipoga quēwēnāni beyæ cati quimonte cæi bai inte ongōminipa. Ininqe mīnitō cati bai yæpæ emonte bai inōmīni

inte wæætē edæ nongæmōnte bai badāmaī iedāni. Cati iñōmō yæpæ ēmōnāmaī nongæmōnte ba adinque edæ æbānō cæte wæætē yæpæ waa ēmonguī. Waa impa cænguīnānii anguēnē. Iñæmpa wido cæte nāni pīnā gāwate cægonquinque babaimpa,” ante odōmōnte apænecantapa.

14 Ayæ, “Ñāo bai ēmōmīni inte mīnitō iñōmō edæ inguipoga quēwēnāni beyæ tica ēnente bai cædinque, Edonque acædānimpa, ante cæmīni imīnīpa. Ānanquidi tæiyænāni mænōnte quēwēnāni iñinque edæ ædō cæte wē womōnte inguī. Edæ edonque abaimpa. 15 Waocā ædō cæte tī wodōnote godō cængænē boo cæcaquingāā anguēnē. Edæ, Mōnō quēwēncabo edonque acæimpa, ante cædinque waocā tī wodōnodinque wænōmēnæcapaa cō cæcā ate edonque bæco aquīnāni. 16 Mīnitō guiquēnē, Wadāni mōnō waa cædīnō adinque mōnō Mæmpo oōnædē nē quēwēngā ñāo bai tōmengā nānō ēmōnō ante waa ate apæneædānimpa, ante cædinque cōwē ñāo bai pōnēninque waa cæte quēwēdāni,” ante Itota odōmōnte apænecantapa.

Wængonguī nānō wææ angainō ante

17 Ayæ iīmaī ante godōmenque odōmōnte apænecantapa. “Wængonguī, Iīmaī cædāni, ante Mōitee wodi ingante angā ēñēninque tōmengā nānō wææ yewæmongainō ante ayæ Wængonguī beyæ nē apænedāni nāni yewæmongainō ante mīnitō, Mānīnō ante Itota wido cæcæte ante pongampa, ante ædō cæte pōnēmīnii. Iñæmpa wīi wido cæcæte ante pōnīmo inte botō tōmēnāni nāni angainō bai iinque cæbo bacæimpa, ante pōmo imōpa. 18 Edæ nāwangā āmōpa. Inguipoga tōnō oōnæ iinque baganca Wængonguī, Iīmaī cædāni, ante nānō wææ angainō iñōnte adodeque pōnī wē womōnte badāmaī ingæimpa. Edæ guiyā tænoncaī incæ picæ yewæmōnī incæ adodeque

cōwē wadæ cædāmaī iñōnte tōmengā nānō angainō bai tōmānō adodō iinque cæte bacæimpa. 19 Iñinque Wængonguī nānō wææ angainō ante æcānō adodeque pōnī ante ēñēnāmaī cæda iñōmō tōmengā iñōmō edæ oōnædē Awēnē Odeye nempo quēwēngā incæte oñonganque pōnī inguingānō anguēnē. Ayæ adobai Wængonguī nānō wææ angainō adodeque pōnī ante odōmōninque, Mānīne ante ēñēnāmaī cædāni, ante æcānō odōmōnte apænedā tōmengā iñōmō oōnædē Awēnē Odeye nempo quēwēngā incæte oñonganque inguingānō anguēnē. Wæætē mānīnō Wængonguī nānō wææ angainō ante nē ēñēnte cædinque æcānō adodō ante odōmōnte apænedā guiquēnē tōmengā wæætē oōnædē Awēnē Odeye nempo quēwēninque ñænængā pōnī inguingānō anguēnē. 20 Incæte mīnitō imīnite iīmaī āmōpa. Iīmaī cædāni, ante nāni wææ yewæmongainō ate nē odōmōnāni nāni cægancaque nō cæmīni incæte Paditeoidi nāni cægancaque nō cæmīni incæte mīnitō wīi godōmenque nō cæmīni iñinque mīnitō edæ oōnædē Awēnē Odeye nempo ædō cæte guīite quēwēmaīmīnii,” ante Itota odōmōnte apænecantapa.

Pūinte nāni ānō ante Itota odōmōnte apænecampā (Odoca 12.57-59)

21 Mānōmainō ante apænedinque Itota godōmenque odōmōnte apænecantapa. “Mōitee wodi iñōmō, ‘Wacā ingante godō wænōnāmaī ie. Nē wænongā nānō apænte pante wæquinque impa,’ ante dodāni inānite tōmengā nānō wææ angainō ante mīnitō iñōmō do ēñēninque Ao āmīnitawo. 22 Botō iñōmō edæ godōmenque ante nō āmōpa. Nāni caipæ iñōnāni æcānō tōmengā tōñīñacā ingante pīina iñōmō tōmengā nānō apænte pante wæquinque cæcampā. Ayæ tōmengā tōñīñacā ingante æcānō, Eñēnāmaī imīpa, āna edæ tōmengā ingante nē Apænte nāni Āincabo weca nānō panguinque ænte

gönoncædänimpa. Edæ wacä ingante æcänö, Bitö mimö ömædemi inte wii eñencædö, ante nē äna iñömö tömengä tadömengadænguipo gonga bæcoyömö nänö wido cæquinque angampa töö,” ante Itota apænegacäimpa.

²³ Ayæ, “Mänömaï beyæ bitö, Wængongui qui, ante nani iya täimoga godoncæte ante tæcæ cædinque, Æ, botö tönñacä ingante edæ wænæ wænæ cæbo pïingampa, ante pönemi inique, ²⁴ bitö godonguicoo nani iya täimoga gäänē ñönöninge bitö tönñacä weca täno gote nö apæneyömi minatö guëa piyænē cæmina ate bitö iñömö adodö ponte godöe,” angantapa.

²⁵ Ayæ, “Bitö imite nē piinte cæcä iñömö nē apænte anguinäni weca gönoncæte ante ænte idömæ goyongä bitö tömengä ingante waa apænebi eñëninge tömengä wæætē piyænē cædinque ee abaingampa. Edæ taadö godinque guëa waa apænedinque piyænē cædämaï imina inique tömengä iñömö nē awënë apænte anguingä weca ænte mäocä gobaimipa. Ayæ awënë nē apænte angä ingante pædæ godongä æninque tömengä bitö imite wæætē wææ wänongä ingante angä eñëninge tömengä wæætē bitö imite bæi ongonte do tee mönebaingampa. ²⁶ Tee mönecä inique edæ bitö godonte æinta tömanta pönï pædæ godonte tabaimipa,” ante Itota apænegacäimpa.

Näni godö towëmämo ante Itota odömonte apænegacäimpa

²⁷ Ayæ apænedinque, “Möitee wodi, ‘Bitö nänöogængä inämaï iñongante bitö godö mönämaï incæbiimpa,’ ante nänö wææ angainö ante eñëninge minitö Ao äminitawo. ²⁸ Botö godömenque apænedinque nö ämopa. Onquiyængä ingante wiwa toïnente adingä iñömö tömengä nänöogængä inämaï iñongante do godö monte bai mimö dobæ wentamö entawengampa.”

²⁹ Ayæ, “Bitö tömëmö inö incæ adinque wænæ wænæ toïnente

babi inique tömëmi adimö incæ o togæmonte bai cædinque wænæ wænæ bitö cædinö ante wido cæbi waa imaimpa. Wæætē bitö wænæ wænæ adimö wido cædämaï inique bitö baö tömäo tadömengadænguipo wido cæte baquinö anguënē. ³⁰ Adobai bitö önopoca tömëmæ inö incæ wænæ wænæ cædimi inte tömëmi cædimpo incæ aa wi æmpote bai cædinque bitö wænæ wænæ cædinö ante wido cæbi waa imaimpa. Edæ a wi æmpote wido cædämaï imi inique bitö baö tömäo tadömengadænguipo wido cæte baquinö anguënē,” ante Itota apænegacäimpa.

Näni pämcæte wædö ante Itota odömonte apænegacäimpa

(Mäateo 19.9; Mäadoco 10.11-12; Odoca 16.18)

³¹ Godömenque odömonte apænedinque Itota, “Ayæ, ‘Onquiyængä ingante æcänö pämäinena tömengä iñömö yewæmöinta ænte yewæmöninge, Bitö imite æmäwo pämämpa, ante yewæmonte onquiyængä ingante godongä æncæcäimpa,’ ante dodäni nani angainö ante do eñëninge Ao äminitawo. ³² Botö edæ wadö ante iïmaï ante nö ämopa. Onquiyængä awëmö todämaï ee quëwëñongante tömengä nänöogængä godö pämängä inique onquiyængä nē towengä nänö baquinque wacä ingante godö möwengampa. Ayæ onquiyængä pämcæte goyongä wacä onguinængä tömengä ingante godö möninge adobai nē towengä bacampa, ante apænebo eñëmaïminipa,” ante Itota apænegacäimpa.

Cöwë baquinö anguënē, ante nani anewënö ante

³³ “Ayæ wæætē edæ, ‘Botö Wængongui cöwë quëwengä bai botö änö cöwë baquinö anguënē, ante ämi inique Wængongui eñengä beyænque bitö äninö ante cöwë cædinque bitö wadö cædämaï incæbiimpa,’ ante Möitee wodi dodäni inänite angacäimpa. Minitö iñömö tömengä nänö wææ angainö ante eñëninge Ao äminitawo. ³⁴ Botö wadö ante nö

ämo eñeedäni. Edæ mäninö, Botö äno nöingä baquinö anguënë, ante änämaï iedäni. Ayæ mäninö ancæte ante mīnitö Wængongui emöwo ante apænedämaï imīni incæte mīnitö, Öönæ tæi ongö bai impa, ante apænedämaï iedäni. Iñæmpa, Öönæ, ante ämīni ininque mīnitö Wængongui öönæde waa pōni nānō contayōmō ante apænebaīmīni apa ānewēmīni. ³⁵ Ayæ Wængongui emöwo ante änämaï ininque mīnitö, Imæca cōwē ongö bai botö äno cōwē baquinö anguënë, ante adobaï apænedämaï iedäni. Iñæmpa, Imæca, ämīni ininque mīnitö Wængongui pī cæwate nānō ongōñōmō ante apænebaīmīni apa ānewēmīni. Ayæ, Eedotadē cōwē ongö bai botö äno cōwē baquinö anguënë, ante apænedämaï iedäni. Iñæmpa Eedotadē iñōmō mönō Tæiyæ Awënë Odeye ongongä apa ānewēmīni. ³⁶ Ayæ adobaï, Botö äno nöingä baquinö anguënë, ancæte ante bitö, Tömēmo ocabo tæi ongö bai impa, ante mīni ānewēnō ante änämaï ie. Iñæmpa bitö ocagui wentamō encabi ininque bitö ædō cæte adoguinque pōni godö cæbi nāāmænta baquii. Ayæ nāāmænta encabi ininque bitö ædō cæte adoguinque pōni godö cæbi wentamō baquii anguënë. ³⁷ Ininque mīnitö Ao äinēmīni inte ‘Ao’ äninque mäninque äedäni. Ayæ edæ Baa äinente wædinque ‘Baa’ äninque edæ mäninque äedäni. Godömenque äninque mīnitö edæ nē wīwa cædongä angä beyænque ämīnīpa tōö,” ante Itota odōmonte apænegacäimpa.

Näemæ wēncæ wēncæ nāni cædō ante (Odoca 6.29-30)

³⁸ Ayæ godömenque odōmonte apænedinque Itota, “Iīmaï ante dodäni nāni angainō ante eñēninque Ao ämīnitawo. ‘Bitö godö cæbi beyæ wacä awinca tæigæmongä bacä ininque tömengä näemæ cæcä beyænque bitö awinca adobaï tæigæmömi bacæbiimpa. Ayæ bitö godö cæbi beyæ wacä бага tä tobæ gogacä ininque tömengä näemæ cæcä

beyænque bitö бага adobaï tä tobæ gogacæbiimpa.’ ³⁹ Botö wæætē wadō ante nö ämo eñeedäni. Nē wīwa pōnō cæcä ingante näemæ cædämaï iedäni. Edæ wacä bitö tömempaga inö pōnō tamongä wædimi inte bitö wæætē æmæmpaga inö dadi emæmonte ee ongömi wæætē tamongæ. ⁴⁰ Ayæ wacä, Bitö imite nē apænte angä weca ænte godinque botö bitö weocoo æncæboimpa, ante cæyongä bitö mänincooque tömengä ingante pædæ godöninque wacoo bitö yabæ mongæncoo tōnō ee abi ö æncæcäimpa. ⁴¹ Ayæ wacä bitö imite, Bado, mäninganca mongænte mäobi goboe, angä eñēninque bitö tömengä nānō äninganca mäobi goyongante ayæ adoganca godömenque mongænte mäobi gocæ. ⁴² Ayæ nē, Pönömi æmoe, angä ingante godömi ængæ. Ayæ wacä, Bitö quınca pönömi ænte cæte ate wæætē pönömo æe, ante nē angä ingante bitö pæ gompodämaï incæbiimpa,” ante Itota apænegacäimpa.

Nē pūinte änāni inānite waadete cæedäni, ante

(Odoca 6.27-28, 32-36)

⁴³ Ayæ apænedinque Itota, “Mīnitö dodäni nāni angainō ante do eñēninque edæ Ao ämīnitawo. Tömēnāni iñōmō, ‘Bitö guidengä ingante waadete cæe,’ äninque edæ, ‘Nē pīingä ingante näemæ pūinte cæe,’ ante wææ änānitapa. ⁴⁴ Botö iñōmō edæ wadō ante nö ämo eñeedäni. Mīnitö imīnite nē pūinte cædäni inānite mīnitö wæætē waadete cæedäni. Ayæ mīnitö imīnite nē togænte pānāni beyæ ante Wængongui ingante apæneedäni. ⁴⁵ Mänömaï cædinque mīnitö mönō Mæmpo öönæde nē quēwengä wēñæmīni bacæmīnīmpa. Edæ nē wīwa cædäni beyæ incæ nē waa cædäni beyæ incæ Mæmpo Wængongui angä nænque tamōmpa. Ayæ nē nö cædäni beyæ incæ nē nö cædämaï ināni beyæ incæ Wængongui angä cōönæ cæpa. ⁴⁶ Mīnitö guiquënë mīnitö imīnite nē waadedänique inānite waadete pönēmīni ininque

míntō míni cædinō beyæ ante dicæ paga ænguimíniyaa. Íñæmpa odómāno awēnē beyæ nē æwēnāni incæ míntō waadete pōnenganca adoganca cædinque tōmēnāni ínānite nē waadete pōnēnānique ínānite waadete pōnēnānipa tōō. Bitō godōmenque cæbitawogaa. ⁴⁷ Ayæ míntō tōníñadānique ínānite waadete apænedinque míntō dicæ godōmenque cæmíniyaa. Íñæmpa wadāni nē, Nāmā cæte quēwenguimo, ante nē ēñēnāmaī cædāni incæ míni cædō baī adoganca cædāni apa quēwēmīni. ⁴⁸ Mōnō Mæmpo oōnædē quēwengā nē nō waa cædongā ingā baī míntō adobaī cædinque picæmīni badinque nō waa cæte quēwēedāni,” ante Itota odōmonte apænegacāimpa.

6

Æbānō cæte waa cæquī, ante Itota apænecampa

¹ Itota ayæ godōmenque ímaī ante odōmonte apænegacāimpa. “Míntō edæ, Wængonguī nānō ānō ēñente nō cæbote, ante cæmínitawo. Ínínque míntō, Waodāni botō ímote waa acædānimpa, ante ānāmaī inte wīi waodāni ayōnāni cædinque waa cæedāni. Edæ, Waodāni botō ímote waa acædānimpa, ante pōnēninque cæmīni ínínque mōnō Mæmpo oōnædē nē quēwengā íñōmō míntō cædī beyæ wæætē pōnōnāmaī ímaingampa,” angantapa.

² Ayæ, “Wadāni nē wadō ante wadō cædāni guiquēnē, Ōmaadāni inte nē wædāni quī, ante pædæ godoncæte ante cædinque, Botō æbānō waa pōnī cæboo, ante tōmānāni ponte waa acædānimpa, ante pōnente todompeta nāni ancadeca we we oōnānipa. Tōmēnāni míntō odōmōincōnē go guíte ongōninque ayæ taadō gote cægōninque, Botō waa pōnī cæbo aedāni, ante yedæ ānāni ēñente godongāmæ pōnāni ate tōmēnāni tōmānāni ayōnāni godōnānipa. Bitō íñōmō tōmēnāni nāni, Pōnō waa acædānimpa, wædō baī wædāmaī inte edæ pæ wēēnete godōe. Tōmēnāni

waodānique godō waa adāni ænínque mānínque ænānipa. Wængonguī guiquēnē waa adāmaī incæcāimpa. Nāwangā āmopa. ³ Bitō íñōmō, Ōmaadāni inte nē wædāni quī, ante godoncæte ante cædinque bitō guíidengā eyequeī pōnī ongongā incæ adāmaī incæcāimpa, ante wææ cæe. ⁴ Mānōmaī wææ cædinque awēmō godōmi æncædānimpa. Mānōmaī cæbi adínque bitō Mæmpo nē wēmō íñōmō nē acā ínongā inte awēmō bitō godōnī ante wæætē eyepæ pōnongā æncæbiimpa,” ante Itota angacāimpa.

Wængonguī ingante æbānō apænequī, ante Itota apænecā (Odoca 11.2-4)

⁵ Ayæ godōmenque apænedinque, Itota, “Wadāni Wængonguī ingante apænedinque nāmanque ante nāni cæbaī míntō íñōmō wīi adobainō ante Wængonguī ingante apæneedāni. Mānínāni guiquēnē, Botō apænebo adínque waodāni pōnō waa acædānimpa, ante pōnēwēninque míntō odōmōincōnē go guíidinque næ gongæninque Wængonguī ingante apænedānipa. Ayæ tōmēnāni nāni quēwēñōmō ñænquedæmpo íñōmō gote næ gongæninque Wængonguī ingante apænedānipa. Nāwangā āmopa. Tōmēnāni waodānique godō waa adāni ænínque mānínque ænānipa. Wængonguī guiquēnē waa adāmaī incæcāimpa. ⁶ Bitō íñōmō tōmēmi oncōnē guíte odemō tee mōnedinque mōnō Mæmpo nē awēmō quēwengā ingante apænee. Mānōmaī cæbi adínque bitō Mæmpo wēmō íñōmō nē acā ínongā inte awēmō bitō cædinō ante wæætē eyepæ pōnongā æncæbiimpa,” ante Itota odōmonte apænecantapa.

⁷ Ayæ, “Nāmā cæte quēwenguimo, ante nē ānāni ōnonque nāni tedewēnō baī tededāmaī inte míntō nō cædinque Wængonguī ingante apæneedāni. Tōmēnāni íñōmō, Wantæpiyæ tedebo beyænque Wængonguī ēñencæcāimpa, ante babæ ante pōnēninque ōnōneque tedewēnānipa cæmīni. ⁸ Míntō

iñómō edæ tōmēnāni ōnōneque tedete nāni cædō bai edæ cædāmaī iedāni. Iñæmpa mōnō Mæmpo ingante apænedāmaī iñōmonte tōmengā mōnō anguinō ante wēēnēñedē do ēñengā apa tedewēmīni. ⁹ Iñinque edæ iīmaī ante Wængonguī ingante apæneedāni.

‘Mōnitō Mæmpo nē ōönædē quēwēnōmi inte ēñēmi.

Bitō ēmōwo Tæiyæ Waēmō ēmōmi adinque mōnitō bitō ēmōwo ante waa adinque apænemōnīpa.

¹⁰ Bitō ōönædē Awēnē nē ingaīmi inte inguipoga Awēnē Odeyebi edæ bitō baquinque quingæ pōe.

Ōönædē owodāni ēñente cædāni bai inguipoga adobaī bitō ānō ante edæ ēñente cæte bacæimpa.

¹¹ Mōnitō imōnite bitō, Cænguī, ante iīmō iñō iīmō iñō bitō pōnōni ñōwoonæ incæ eyepæ pōnōmi ænte cæmōnie.

¹² Mōnitō imōnite nē waa cæquēnēnāni inte pōnō wēnæ wēnæ cædāni adinque

mōnitō godō ñimpo cæmōni quēwēnāni bai bitō nē panguēnēmi incæ adobaī cædinque

mōnitō nē waa cæquēnēmōni inte wēnæ wēnæ cæmōni adinque pōnō ñimpo cæbi quēwēmōnie.

¹³ Ayæ mōnitō wēnæ wēnæ cæinente wædō ante bitō pōnō wææ cæbi ate mōnitō taadō oda cædāmaī inte wēnæ wēnæ cædāmaī incæmōnīpa.

Edæ nē wīwa cædongā nempo ongonte wæyōmōnite bitō gā peyæmpote æmi quēwencæmōnie, āmōnīpa.

Tōmēmīque edæ Awēnē Odeye tæi pīñæmi iñōmi mōnitō bitō nempo ongōmōnīpa. Nāmā ñāō bai entawēmi inte bitō cōwē tæi ēmōmi iñōmi iñīpa.

Amēē, ante, Nāwangā impa, ante apænemōnīpa.’

Mānōmainō ante Wængonguī ingante apæneedāni,” ante Itota odomonte apænecacāimpa.

¹⁴ Ayæ godōmenque odōmonte apænedinque Itota iīmāinō ante

apænecacāimpa. “Mīnitō imīnite wēnæ wēnæ cæyōnānite mīnitō godō ñimpo cæmīni iñinque mōnō Mæmpo nē ōönædē quēwengā adobaī mīnitō wēnæ wēnæ cædinō ante pōnō ñimpo cæcā quēwēmaimīnīpa. ¹⁵ Wæætē mīnitō waodāni nāni wēnæ wēnæ cædinō ante ñimpo cædāmaī imīni adinque edæ mōnō Mæmpo adobaī mīnitō wēnæ wēnæ cædinō ante ñimpo cædāmaī inte pōnō pūincæcāimpa,” ante Itota apænecacāimpa.

Wængonguī beyæ ante cæbānō cænāmaī ī, ante

¹⁶ Ayæ odōmonte apænecantapa. “Wadō ante nē wadō cædāni guiquēnē iīmaī ante mā pōnēninque cædānīpa. Wængonguī beyæ ante ee ate cænāmaī inte botō wæwente bai ēmōmo adinque wadāni botō imote waa acædānīpa, ante awinca nāmōnānīpa. Mīnitō iñōmō Wængonguī beyæ ante cædinque ee ate cænāmaī imīni iñinque tōmēnāni nāni cæbaī cædāmaī iedāni. Wæætē nāmōnāmaī inte Wængonguī beyænque ante cænāmaī iedāni. Nāwangā mīnitō imīnite āmopa. Tōmēnāni waodānique godō waa adāni æninque māninque ænānīpa. Wængonguī guiquēnē waa adāmaī incæcāimpa. ¹⁷ Bitō guiquēnē Wængonguī beyænque ante ee ate cænāmaī inte cæbi iñinque awinca ñā mēmōnte ayæ ocabo ōni pæcate cæe.

¹⁸ Bitō ee ate cænāmaī imi iñinque, Waodāni edonque acædānīpa, ante ānāmaī inte wæætē, Mæmpoque acæcāimpa, ante mānōmaī cæe. Bitō mānōmaī cæbi adinque mōnō Mæmpo nē wēmō iñōmō quēwengā inongā inte wēmō iñōmō edonque adinque awēmō bitō cædinō ante wæætē eyepæ pōnongā æncæbiīpa,” ante Itota apænecacāimpa.

Ōönædē mīni waa pōnī manguincoo ante (Odoca 12.33-34)

¹⁹ Godōmenque odōmonte apænedinque Itota, “Tōmēmō māincoo, ante

mancæte ante wædinqe mīnitō inguipogaque cayæ cænte to tamonte iñōmō cabo tē gæte da wēnāmaī iedāni. Edæ nē ō ænāni bæ tate nāni ō ænguinque inguipogaque da wēmīni apa quēwēmīni. ²⁰ Ōönædē ongoncoo guiquēnē to tamōnāmaī impa. Cayæ guidāmaī ī inique māincoo wodāmaī ongompa. Ayæ nē ō ænguināni adobaī māniñōmō bæ tate guidāmaī ināni inique māincoo cōwē wē wodōnāmaī ee ongompa. Inique, Waadete mīni cædincoo cabo tē gæte baī cædinqe mīnitō ōönædē waa pōni incoo mīni ænte manguinque ñōwo iñōmō waodāni inānite waadedinqe ee cædāni. ²¹ Edæ waa pōni mīnitō māincoo ongōñōmō mīnitō māniñōmō adoyōmō quēwencæte ante wēmīni imīnīpa, ante adinqe botō mānōmainō ante apænetabopa,” ante Itota odōmonte apænecantapa.

Awinca wainca mōnō emōnō ante (Odoca 11.34-36)

²² Ayæ odōmonte apænedinqe, “Baonga quēwēninqe mōnō edonque adinqe cæcæimpa, ante mōnō awinca emōmompā. Inique awinca wainca emonte edonque ate baī bitō mīmōno adobaī ñāō entawēninqe, Nō cæbote, ante pōnēmi inique bitō baonga nō cæte quēwēmaīmīpa. ²³ Wæætē edæ awinca wīi wainca emōninqe adāmaī inte baī wentamō entawēmi inique bitō, Wīwa cæbote, ante mīmōno pōnēñōmite bitō baonga wīwa cæbaīmīpa. Edæ mīmō ñāō entawēñōmi wentamō ba inique bitō quēwenguīmāmo mæ māmonte baī baquīnō anguēnē,” ante Itota apænecantapa.

Wængonguī beyæ cædinqe māincoo beyæ cæqui

(Odoca 16.13)

²⁴ Ante apænedinqe Itota ayæ odōmonte apænecantapa. “Mēnaa awēnēna bayōnate waocā iñōmō mēnaa awēnēna nāna ānō ante ædō cæte ēñente cæquingāā. Inæmpa adocanque ingante pīininqe tōmengā wacā ingante waadebaingampa.

Wæætē iingā miñæ tee empo godinqe tōmengā māningā ingante edæ wīwa adinqe emō cæte gobaingampa. Mīnitō adobaī Wængonguī beyæ ante nē cæmīni inte ædō cæte māincoo beyæ ante cæte quēwenguīmīni,” ante Itota angacāimpa.

Mæmpo Wængonguī mōnō imonte aacampa, ante

(Odoca 12.22-31)

²⁵ Äninqe, Itota ayæ godongāmæ odōmonte apænedinqe, “Mānōmaī beyæ botō mīnitō imīnite iūmaī ämopa, angantapa. Mīnitō inguipogaque mīni quēwenguīmāmo ante wædāmaī iedāni. Cænguī bequī ante ayæ weocoo ante wædāmaī iedāni. Cænguī cænte beyænque mōnō dicæ quēwēmongaa. Weocooque mōnō mongænō beyænque dicæ quēwēmongaa. Mōnō quēwēmāmo iñōmō godōmenque impa. ²⁶ Ayamōidi awænæca nē cæwodāni inānite amīnitawo. Tōmēnāni dicæ tōmēmō minte pæ ate tā pete daga wente mānāniyaa. Incæte mōnō Mæmpo ōönædē quēwēnongā inte wæætē tōmēnāni inānite eyepæ godongā cænāni aedāni. Mīnitō guiquēnē ayamōidi ināmaī iñōmīnite Wængonguī mīnitō imīnite godōmenque waa adinqe eyepæ pōnongā cænte apa wæwēmīni. ²⁷ Edæ Wængonguī nānō anganca quēwenguēnēmīni inte mīnitō, Wantæ iño incæ godōmenque quēwēmote, ante wæwēmīni incæte edæ ædō cæte nāmā cædinqe godōmenque wantæpiyæ quēwenguīmīni.”

²⁸ Äninqe Itota godōmenque odōmonte apænecantapa. “Inique mīnitō, Weocoo quincodō wēñaquīi, ante pōnente quīnante wæwēmīni. Inæmpa ongaicoo omædē pæ iñōmō weocoo ante daque daque dadāmaī inte wodonte tīnāmaī tōmenque pæ aedāni. ²⁹ Incæte Awēnē Tadōmōō wodi waëmoncoo pōni ēñagaingā incæ wīi ongai baī ēñagacāimpa. Ongai iñōmō godōmenque waēmō pōni enodānīpa. ³⁰ Gaguīmæ iñōmō

īimō ate edæ gongapamō guitodonte tanguinque pæ incæte ñowoōnæ Wængonguī pōnongā waēmō wēñate ēnopa. Īinque, Waēmō ēnodō nē pōnongā inte Wængonguī mōnō īmonte godōmenque eyepæ pōnī pōnongā ænte wēñacæīmpa, ante pōnēmīniyaa. ³¹ Īinque mīnitō, ‘Quīmōnō impa cænguīmōō,’ ante, ‘Quīmænō impa bequīmōō,’ ante ayæ, ‘Quincodō impa wēñaquīmōō,’ ante pōnēninque guīñente wæwēnāmaī iedāni. ³² Mānīnō ante wadāni nē ēñēnāmaī īnāni nāni cabo nāni cabo wædāni incæte mīnitō guīquēnē, Mōnō æīnente wædō ante mōnō Mæmpo īñōmō edæ do ēñengampa, ante pōnēninque edæ guīñente wædāmaī incæmīnīmpa. ³³ Wæætē edæ, Wængonguī Awēnē Odeye nempo quēwencæboīmpa, ante nangūī cædinque mīnitō, Tōmengā nō cæte nānō waa quēwēnō baī adobaī nō cæte waa quēwencæboīmpa, ante adobaī nangūī cædāni. Mānōmaī quēwencæte ante tāno wæmīni adinque Mæmpo Wængonguī mānīnō ante do edæ eyepæ pōnī pōnongā æñōmīni mānīncooque mīni wædō ante adobaī eyepæ pōnongā æncæmīnīmpa. ³⁴ Mānōmaī ī Īinque, Īimō ate æbānō cæquīī, ante guīñente wædāmaī iedāni. Edæ īimō ate mānīnō ante pōnēninque eyepæ pōnente inguīmpa. Īinque mīnitō, Ñowoōnæque æbānō cæquīī, ante guīñente pōnēninque māninganca pōnente quēwēedāni,” ante Itota odōmonte apænægacāīmpa.

7

Wadāni īnānite apænte ānāmaī iedāni, ante

(Odoca 6.37-38, 41-42)

¹ Mānōmaīnō ante odōmonte apænedinque Itota godōmenque apænægacāīmpa. “Mīnitō wacā ingante, Wēnæ wēnæ īmīpa, ante apænte ānāmaī iedāni. Edæ mīni apænte wæquinque mīnitō wadāni īnānite apænte āmīnīpa. ² Mīnitō wadāni īnānite tee mante godōmīni

nāni ænganca wæætē adoganca pōnōnāni æncæmīnīmpa. Ayæ mīni apænte anganca adoganca apænte ānāni wæcæmīnīmpa. ³ Bitō tōñīñacā wædænque wēnæ wēnæ cæcā īñongante bitō guīquēnē nangūī bitō wēnæ wēnæ cædīnō ante pōnēnāmaī inte quīnante tōmengā ingante pīinte ānewēmīi. Tōmengā edæ awīnca guiyā mæ owo ēmongā baī entawente wæyongante bitō wæætē awæmpa wææ ēmongā baī wææ entawēmīi inte ædō cæte ate baī tōmengā ingante apænte āmīi. ⁴ Edæ tōmēmī awīnca awæmpa wææ ēmonte baī bitō wēnæ wēnæ adīmō ēmōmīi inte bitō tōñīñacā ingante, ‘Bīwī, bitō awīnca guiyangā mæ owo baī ate æ wīmōmoe,’ ante edæ abīpa diyæ æ wīmōngūīmīi. ⁵ Īñæmpa wadō tedete wadō cædōmīi inte bitō edæ tōmēmīi awīnca awæ wææ ongōmpa tāno wido cæte ate edonque adinque bitō tōñīñacā awīnca guiyā mæ owodō æmoncæbīīmpa.”

⁶ Ānīnque Itota godōmenque apænedinque, “Gūntaidī īnānite, Tōmēnāni cænguī, ante tæiyæ waēmō cænguī godōnānitawoo. Edæ godōnāmaī īnāni baī mīnitō adobaī Wængonguī nānō tæiyæ waēmō apænedō ante nē Baa ānāni īnānite apænedāmaī iedāni. Ayæ odæ wængānāidī weca woadāni wamoncoo waa pōnī ēmoncoo wææntodōnāmaī īnāni baī mīnitō adobaī Wængonguī beyæ waa pōnī nāni apænægāinō ante nē ēñente cædāmaī īnāni īnānite apænedāmaī iedāni. Edæ odæ wængānā pinā gāwa baō wānā ñænte baī cædinque tōmēnāni ēñēnāmaī inte cædinque dādī ēmænte tōmēmīni baō wangō pocænte baī pīīmāinānīpa, ante mīnitō apænedāmaī ñīne cædāni,” ante Itota apænægacāīmpa.

Pōnōmī cæmoe, ante mōnō angæīmpa, ante

(Odoca 11.9-13; 6.31)

⁷ Ayæ apænedinque Itota, “Pōnōmī æmoe, ante nē angā baī cædinque mīnitō mīni ænguīnō ante Wængonguī

ingante apæneedáni. Æyömönö ii, ante nē diqui diqui mingā bai cædinque mīnitō, Æbānō ii, ante ædæmō ēñencæte ante Wængonguī ingante wede pōnente apæneedáni. Odemō mōnitō beyæ wi ænecæimpa, ante aa pecā bai cædinque mīnitō, Æbānō cæquīmoo, ante ēñencæte ante Wængonguī ingante nangui apæneedáni. ⁸ Edæ, Pönōmi æmoe, ante nē ānāni iñōmō edæ do ænānīpa. Nē diqui diqui mīnāni adobai do adānīpa. Ayæ odemō ponte nē aa pedāni tōmēnāni nāni guiquinque edæ do wi ænete bai bacæimpa.”

⁹ Ayæ, “Bitō waobi inōmi inte ēñēmi. Bitō wēñængā cængui ante pāo angā ēñēninque bitō dicæ dicaque pædæ godōmiyaa. ¹⁰ Gæyæ angā iñinque bitō tæntæ incæ dicæ pædæ godōmiyaa. ¹¹ Mīni waocabo nē wīwa cædōmīni incæ, Quinō waa i, ante ēñēninque mīnitō wēñænāni inānite waēmoncooque godōmīni ænānīpa. Iñinque mōnō Mæmpo oönædē nē quēwengā iñōmō nē ānāni inānite waēmoncooque ante godōmenque pōnongampa,” ante Itota odōmonte apænegantapa.

¹² Ayæ, “Mīnitō, Waodāni botō imote waa cædāni æninque waa tobaimopa, ante wæmīnitawo. Iñinque mīni ante wædō bai ante mīnitō tōmēnāni inānite adobai waa cædāni. Mānīnonque ante wææ ancæte ante dodāni, Iīmaī cædāni, ante wææ angadānīpa. Ayæ Wængonguī beyæ nē apænedāni adodō ante ancæte ante yewæmongadānīpa. Iñinque botō ānō bai cædinque mīnitō tōmēnāni nāni angāinō bai do edæ cæbaimīnīpa,” ante Itota odōmoncæte ante apænegantapa.

*Odemō guiyānemō ante
(Odoca 13.24)*

¹³ Itota godōmenque odōmoncæte ante iīmaī apænegantapa. “Mīnitō guiyānemō guidinque quēwenguinō taadonque pōedāni. Wænguinō godō guiquinēmō guiquēnē yabæ inō ñænænēmō ongō adinque tæiyænāni ōnonque pō guite edæ tōmēnāni

nāni wænguinque ñænænnonque godānīpa. ¹⁴ Wæætē wædænque ināni guiquēnē diqui minte guiyānemō adinque quēwenguinō guiyānō guite pōnānīpa,” ante Itota apænegantapa.

*Awæ æbānō iwæ, ante tōmenca bete
ēñengæimpa, ante
(Odoca 6.43-44)*

¹⁵ Itota ayæ godōmenque odōmonte apænegantapa. “Pancadāniya, Wængonguī beyæ nē apænemōni imōnīpa, ante nē babæ apænedāni iñōnānite mīnitō gomō ate tōmēnāni inānite ēñēnāmaī iedāni. Tōmēnāni iñōmō edæ mēñeidi bai ināni incæ obega æmontai bai wēñate bai babæ cædānīpa. Obega ee quēwēnāni bai ee cæmōni imōnīpa, ante edæ babæ ante pōnāni tamēñedāni. ¹⁶ Edæ tōmenca adinque mīnitō, Awæ æbānō iwæ, ante tā pete bete do ēñēmīni bai, Iīnāni ædānidō inānīi, ante ēñencæte ante tōmēnāni nāni cædinō adinque edæ do ēñencæmīnīpa.”

“Yowemō æncæte ante waodāni dicæ daa mongæwāa tā pete ænānīyaa. Iigowæñeca æncæte ante waodāni dicæ wæntowāa edæ tā pete ænānīyaa. ¹⁷ Waiwæ tōmāwæ wainca incapa. Baawæ wæætē baaca incapa. ¹⁸ Waincawæ incæ ædō cæte baaca incaquīi. Wæætē wīwa iwæ incæ ædō cæte wainca incaquīi. ¹⁹ Awæ quīwæmenque wainca incadāmaī i iñinque māniwæ tōmēwæ mæ yete gongapamō guitodōnāni gonguinque ñongæmpa. Tōmēnāni adobai nāni gonte wæquinque babæ cædānīpa. ²⁰ Iñinque, Awæ æbānō iwæ, ante tōmenca adinque do ēñēnāni bai waocā nānō cædō ante adinque, Tōmengā æbānō ingāa, ante edæ do ēñencæmīnīpa,” ante Itota apænegacāimpa.

*Wū tōmānāni oönædē guiquināni,
ante
(Odoca 13.25-27)*

²¹ Ayæ godōmenque odōmonte apænedinque Itota iīmaī apænegantapa. “Botō imote, ‘Awēnē, bitō botō Awēnē imīpa,’ ante nē tededāni nāni tededō beyænque ædō cæte oönædē Awēnē

Odeye ömæ guiquinānii. Wæætē mōnō Mæmpo öönædē quēwengā nānō änō bai nē cædingā iñōmō tōmenganque guicæcāimpa. ²² Iñque bayonte pancadāniya botō imote, ‘Awēnē, Awēnē,’ āninqe, ‘Bitō beyæ apænegamōnii ae, ancædānimpa. Ayæ, Bitō emōwo apænedinqe wēnæ inte wido cægamōnii ae. Bitō emōwo apænedinqe mōnitō, Ate pōnencædānimpa, ante bamōnengæ cædinque nanguī waa cægamōnii ae,’ ancædānimpa. ²³ Eñēninqe botō wæætē, ‘Iñæmpa botō mīnitō imīnite cōwē adāmaī inte tæcæ abopa. Nē eñēnāmaī cædimīni inte botō weca ongōnāmaī gobæwedāni, ancæboimpa,” ante Itota apænegacāimpa

*Nē mænōna inate ante
(Mādoco 1.22; Odoca 6.47-49)*

²⁴ Ayæ wæætē odömōninqe Itota iīmaī apænecantapa. “Iñque edæ botō apænebo eñēninqe nē eñente cædāni iñōmō tōmēnāni waocā nē eñengā inte nānō nō eñente cæi bai cædānipa. Nē eñengā iñōmō tæēmoncaa mænongampa. ²⁵ Tæēmoncaa mænongā ate cōönæ nanguī cæ ate æpæ eyede āninqe pō tapæmpa. Ayæ woboyæ nanguī pæmænte pō incæte oncō tæēmoncaa mænonte ongō iñinqe ædō cæte cabænte bobænte guiquī. Nē eñente cædāni iñōmō māniñōmō mænongā bai inte todānipa. ²⁶ Wæætē botō apænebo eñēninqe nē eñēnāmaī cædāni guiquēnē tōmēnāni iñōmō waocā ocai ömæcacā nānō eñēnāmaī cæi bai cædānipa. Nē ömæcacā iñōmō emōnaiya aquī iñōmō mænongampa. ²⁷ Aquī iñōmō mænongā ate cōönæ nanguī cæ ate æpæ eyede ante tapæmpa. Ayæ woboyæ nanguī pæmænte pō adinqe mānincō öñonte ætæwo goquinqe edæ do acapowate bogocæ tæ go wææmpa. Nē eñēnāmaī cædāni iñōmō māniñōmō mænongā bai inte wædānipa,” ante Itota odömōnte apænegacāimpa.

²⁸ Māninganca ante iñque apænecā eñēninqe tōmānāni, Quinō bai angāā,

ante guñente wædinque, ²⁹ Wīi mōnō imonte nē odömōnāni nāni odömōnō bai tōmengā iñōmō nē angā inte bai edæ godōmenque nōingā ante odömōngā eñēmōmpa, ante tede-gadānimpa.

8

*Nē baadingā ingante Itota wadæ
caacampa*

(Mādoco 1.40-45; Odoca 5.12-16)

¹ Mānīi ānanquidi ongōninqe iñque apænete wæængā adinqe tæiyænāni tōmengā miñæ wæængadānimpa. ² Tōmengā miñæ tee empote wææ goyōnāni wacā baate eñawengā inongā inte eyepæ pō bee tēninqe Itota önōwa gāānē ædæ wææninqe apænecantapa.

—Awēnē, Bitō Ao āmi inte wadæ caabi iñinqe botō waintai baabāimopa.

³ Añongante Itota pædæ wææmpo gampo caadinque,

—Ao āmopa. Bitō waintai baacæbiimpa.

Angā iñinqe ñōmæintai nānō eñadintai dæ baadinge tōmengā waintai edæ do baacantapa. ⁴ Itota edæ tōmengā ingante,

—Botō æbānō cæboo, ante wadāni inānite māo apænedāmaī imāwe. Wæætē, Nāwangā impa, ante acædānimpa, ante cædinque bitō, Wængonguī quī, ante nē godongā weca tōingā godinqe waintai bitō baadintai odömōmi acæcāimpa. Ayæ Mōitee wodi wææ ante nānō angaincoo bai ænte pōninqe bitō waintai bitō baadi beyæ ante edæ, Wængonguī quī, āninqe nē godongā ingante pædæ godōmi æncæcāimpa, ante Itota angacāimpa.

*Capitāo ingante nē cæcā ingante
Itota cæcā waa bacampa*

(Odoca 7.1-10)

⁵ Mānīi pōninqe Capēnaömō pō guiyongā odömāno tontadoidi awēnē capitāo incæ, Itota pōnō cæcæcāimpa, ante apænecæte ante pongantapa.

⁶ Pōninqe tōmengā,

—Awënë, botimote nē cæcā iñōmō cōmāingā badinque nanguī pōni nantate oncōnē oñongampa cæbii.

⁷ Ante añongante Itota,

—Gote cæbo waa bacā ae.

⁸ Angā eñēninque,

—Awënë eñēmi. Botō waēmō imopa diyæ bitō botō oncōnē pō guiiquimii. Edæ bitō adoyōmō ongōninque āmi ininque botō imote nē cæcā waa bacæcāimpa. ⁹ Bitō iñōmō Awënë Wængonguī ingante nē eñente cædōmi imi bai botō adobai wacā awënë ingante nē eñente cæbo imopa. Ininque botō awënë ēabo inte botō awënë beyænque āmo eñēninque tontadoidi wæætē guiñente wædinque botō ānō ante eñente cædānipa. Ininque adocanque ingante botō, Goe, āmo eñēninque edæ do gocampa. Wacā ingante, Pōe, āmo eñente pongampa. Ayæ botō imote nē cæcā ingante, Cæe, āmo eñēninque edæ do cæcampa.

¹⁰ Ante tontado capitāo nanguī eñengā inte apænecā eñente wædinque Itota wæætē tōmengā miñæ tee empo pōnāni inānite apænedinque,

—Minitō iminite nāwangā āmopa. Mōnō idægocabo iñōmonte māningā wede pōnengā ingā bai adocanque incæ edæ dæ angā awædō, angantapa. ¹¹ Incæte iimainō ante apænebo eñēdāni. Mōnō wæmæidi Abadāo wodi Itæca wodi Aacobo wodi oōnædē Awënë Odeye ææmæ ponte waa beyōnāni edæ nænque tamōnō gāmænō quēwēnāni tōnō nænque guidō gāmænō quēwēnāni iñōmō idægoidi ināmai ināni incæ tæiyænāni adoyōmō pōninque mōnō wæmæidi tōnō godongāmæ becædānipa. ¹² Wæætē Wængonguī Awënë Odeye ōmæ nē guiiquēnēnāni guiquēnē tōmēnāni wēmō iñōmō, nāni guingo imonte Yæ yæ wæyōmō māniñōmō guitodonte wæquinānidō anguēnē.

¹³ Äninque Itota wæætē tontado capitāo ingante,

—Ñōwo wadæ goe. Bitō pōnēnō bai do bacæimpa.

Ante añongā adoyedē Itota nānō āniñedē incæ awënë ingā nē cæcā do waa bagacāimpa.

Pegodo nānōogængā badā ingante Itota cæcā waa bacā

(Māadoco 1.29-31; Odoca 4.38-39)

¹⁴ Ayæ Itota māniñōmō pōninque Pegodo oncōnē pō guiite ayongā Pegodo nānōogængā wānā daicawo gawæante mōimoga oñongā acantapa.

¹⁵ Adinque tōmengā ōnompō pædæ wææmpote bæi ongongā ate onquiyængā wæætē gançæ badinque ængæ gantidinque Itota beyæ pōnō cæcantapa.

Nantate wæwēnāni inānite Itota cæcā waa badānipa

(Māadoco 1.32-34; Odoca 4.40-41)

¹⁶ Māniñōnæ gāwadecæ ba ininque wēnæ tōnō quēwēnāni tæiyænāni inānite ænte pōnāni adinque adodēque āninque Itota wēnæ inte wido cæcantapa. Ayæ quiēmē quiēmē nantate wæwēnāni inānite, Waa baedāni, angā waa badānitapa. ¹⁷ Itota mānōmai cæcā ininque Wængonguī beyæ nē apænecā Itaiya wodi do iimai ante nānō angainō bai inque batimpa. “Mōnō nantate wæwēmāmo ō æninque mōnō daicawoidi teēmente gote māo wido cæte bai cædinque tōmengā teēmente wængā beyænque quēwēmō imopa,” ante Itaiya nānō angainō bai Itota cægacāimpa.

Itota miñæ nē goinēna

(Odoca 9.57-62)

¹⁸ Itota iñōmō, Tæiyænāni godāmæ gongænāni awædō, ante pōnēninque tōmengā miñæ nē godāni inānite, Gāwapæ æmæ wedeca mantamīni taoboedāni. ¹⁹ Äninque ayæ ongōñongante wacā tōmēnāni nāni wææ yewæmongainō ante nē adingā inte nē odōmongā inongā inte Itota weca pōninque,

—Awënë nē Odōmōmi eñēmi. Bitō ædōmē goyōmite botō bitō miñæ pō gocæboimpa.

²⁰ Angā eñēninque Itota wæætē edæ,

—Babæ guintaidi iñömö ontatodë monguï éadäni inänipa. Ayamöidi on-gonta éadäni inänipa. Botö Waobo éñagaïmo guiquënë monguï ömaabo imo apa poncæ ämii, ante Itota wææ apænegacäimpa.

²¹ Ayæ wacä tömengä émiñængä incæ tömengä ingante,

—Awënë éñëmi. Botö täno gote botö wæmpo wængä ate daga wente ate põmoe.

²² Äñongante Itota wæætë,

—Iñæmpa në wæwocadäni incæ tömënäni guidënäni wænäni ate ee abi daga wencädänimpa. Bitö wæætë botö miñæ ee põe, angacäimpa.

Itota angä éñente woboyæ æpæ næ gongæmpa

(Mäadoco 4.35-41; Odoca 8.22-25)

²³ Mänii tao gocæte ante wipodë guiiyongä tömengä miñæ në godäni godongämæ guiidinque tömengä tönö tao godänitapa. ²⁴ Tao wogaa goyönäni woboyæ iñontobæ nangui põni pæmæninque æpæ mængonta mængonta põninque gao gao goy-onte wipo ñänæ ñänæ æi guiden-tapa. Itota iñömö mö ñongantapa. ²⁵ Mö ñongä adinque tömengä tönö godäni iñömö tömengä weca gote, Ömæmoncæcäimpa, ante tao cædinque,

—Awënë, bete wæncæ cæmompæ cæbii.

²⁶ Ante äñönäni,

—Mïni põnegade, quimæ guiñewëmini

Äninque tömengä ængæ gan-tidinque, Woboyæ pæmænämaï imäwe. Gäwapæ incæ cädämaï næ gongæmäwe, angä éñente woboyæ pæmænämaï iñö gäwapæ incæ næ gongæninque ñancæ ñancæ gongæmænimpa. ²⁷ Äñongä tömënäni ancai guiñëninque nämäneque teded-inque,

—Æcämë inte angä éñente woboyæ incæ æpæ incæ gongæmpa, ante guiñente wægadänimpa.

Guedatabæ iñömö wënë inte në enemпода

(Mäadoco 5.1-20; Odoca 8.26-39)

²⁸ Mänii æmæmäa tao ti wæænte Guedatabæ põngä wënë inte quëwëna iñömö wao wodido quëwente põninque Itota ingante mämö bee ténatapa. Tömëna iñömö, Waodäni taadö godämaï incädänimpa, ante wææ cæcæte ante në piinte cädöna inte edæ, ²⁹ põ bee téninque ogæ tededatapa.

—Bitö Wængonguï Wëmi inömi incæ quimæ mönatö weca põwëë. Iñque bayedë möna pante wæquënëno ante põnëninque bitö ñöwo do pancæte ante põmitawo, ante wædatapa.

³⁰ Ante äñönate odæ wængänäidi nangui inäni a ongonte cænäni ad-inque, ³¹ wænæidi guiquënë Itota in-gante äninque,

—Bitö cöwë wido cæcæte ante põnëmi ininque edæ odæ wængänäidi baönë ämi gobaïmönipa.

³² Ante ancaa tedete äna éñëninque Itota,

—Gobæwedäni, angä.

Éñëninque tömënäni tao god-inque odæ wængänäidi baönë gui-iyönäni odæncato wæætë ontadäa wæænömëmö iñömö gäwapæno pogodo wæi guiite becadote capo wængadänimpa.

³³ Becadote wænäni adinque odæ wængänäidi në aadinäni guiquënë pogodo wodii winonte tömënäni quëwëñömö mäo, Itota mänömaï cæcä wæmönipa, ante tededänitapa. Ayæ, Wænæidi tönö në quëwëñina inate Itota mänömaï cæcampa, ante wæmönipa, ante apænedäni. ³⁴ Éñëninque tömænäni Itota ingante bee tencæte ante tömënäni näni quëwëñömö tate põnänitapa. Tömengä in-gante adinque, Mönitö ömæ iñömö quëwëñämaï gobäwe, ante nangui angadänimpa.

9

Në cömäingä ingante Itota angä dao dao gocampa

(Mäadoco 2.1-12; Odoca 5.17-26)

¹ Mäninö ante änäni éñëninque Itota wadæ godinque wipodë go guiidinque imæmäa tate tömengä

quëwëñömö pongacäimpa. ² Pongä adinque wadäni në cömäingä möimpataa öñöñongante edæ æmataæ æmataæ bæi ongöninge tömengä ingante næænte pönänitapa. Næænte pönäni adinque, Në næænte pönänäni tönö në cömäingä wede pönente pönänipa, ante adinque Itota iñömö në cömäingä ingante,

—Botö wëmi ëñëmi. Wënæ wënæ bitö cædimämo ante ñöwo ñimpo cætimpa.

³ Ante apænecä ëñëninge edæ në wææ odömönäni guiquënë pancadäniya nämäneque pönente tededinque, “İngä iñömö Wængongui ingampa diyæ mänömaï cæqingäa. Edæ babæ ancædö.” ⁴ Ante pönëñönäni Itota tömënäni nänäni pönëwënö ante önöwëninge do ëñëninge edæ,

—Minitö mïmöno quimæ wïwa ante pönëwëminii. ⁵ “Në cömäingä nänö wënæ wënæ cædimämo ante do ñimpo cætimpa,” ante botö Wængongui bai ämo ëñëninge mïnitö guiquënë, Wængongui ingampa diyæ mänömaï cæqingäa, ante pönëminipa. Ayæ wæætë, “Ængæ gantidinqe dao dao gocæcäimpa,” ante botö Wængongui bai cæbo adinque mïnitö edæ, Wængongui ingampa diyæ mänömaï cæqingäa, ante adobai pönëmini imäminipa, ante awædö. İñæmpa mänömainö ante pönëmini ininque mïnitö edæ æbänö cæquënëmo imo äminii. ⁶ Incæte waodäni nänäni wënæ wënæ cædimämo ante botö Waobo ëñagaimo inte inguipoga quëwëninge në ämo inte ñimpo cæbo quëwënanipa, ante mïnitö edæ ëñencæminimpa, ante botö iïmaï cæbopa.

Äninqe edæ në cömäingä ingante edæ,

—Ængæ gantidinqe bitö möimpata topo cædinque ænte tömëmi oncönë næænte goe.

⁷ Angä ëñëninge cömäingä iningä incæ edæ ængæ gantidinqe tömengä oncönë wadæ gocantapa. ⁸ Dao dao gocä ate wædinque godongämæ ongönäni iñömö, Æbänö cæcäi, ante

ëñënamäi inte guïñente wædinque, Wængongui pönö cæcä beyænque waocä ñöwo në angä badinque mänömaï cæcä amönipa, ante pönëninge, Wængongui bitö ñäö bai ëmömi inte tæi piñænte cæbi amönipa, ante watapæ apænegadänimpa.

Mäateo ingante Itota angä tee empote gocampa

(Mäadoco 2.13-17; Odoco 5.27-32)

⁹ Itota edæ mäninö godömenque gocæ cæte ayongä adocanque Mäateo iñömö, Odömäno awënë qui bacæimpa, ante godonte æinta nänäni æincönë ongonte cæcä adinque Itota guimö adinque Mäateo ingante angantapa.

—Botö miñæ pöe, angä.

Ëñëninge Mäateo edæ do ængæ gantidinqe Itota miñæ tee empote wadæ gocantapa.

¹⁰ Ayæ ate Itota tömengä miñæ në godäni tönö Mäateo oncönë go guiite cængöñönäni odömäno awënë beyæ në æwënäni tönö në ëñënamäi cædäni tönö nangui inäni ponte godongämæ cænänitapa. ¹¹ Adinque Paditeoidi guiquënë tömengä miñæ në godäni inänite äninque,

—Minitö Awënë në Odömongä iñömö odömäno awënë beyæ në æwënäni tönö në ëñënamäi cædäni tönö quimæ godongämæ cæwengäa.

¹² Änäni ëñëninge Itota,

—Në waa ingä guiquënë, Cæbi waa baboe, änämaï ingampa. Në wënæ wënæ inte wæcä guiquënë dotodo ingante, Cæbi waa baboe, ante do aa pecampa. ¹³ Pancadäniya, Nämä incæ nö entawëmo imopa, ante në änäni inänite adinque botö në dotodo bai adobai inömo inte tömënäni inänite aa pedämaï incæboimpa. Wadäni guiquënë, Nämä wënæ wënæ cæbo imopa, ante në änäni guiquënë, Wængongui gämænö poncædänimpa, ante botö tömënäni inänite aa pecæ pönömoimpa. “Baö, Wængongui qui baquimpa, ante në iya tänäni inänite wii ainëwædö, wæætë godö waadete waa cædäni inänite ainëmo imopa,” ante Wængongui angä apa

quëwënäni. Nöwo edæ godinque Wængonguï nänö änö æbänö ante angä ëñente põmäewedäni, ante Itota apænegacäimpa.

Ee ate cænämaï ingcæimpa, ante nē änäni

(Mäadoco 2.18-22; Odoca 5.33-39)

¹⁴ Mäniñedë Wäö miñæ nē godäni põninque Itota ingante äninque,

—Paditeoidi tönö Wäö miñæ möni gocabo tönö mönionque Wængonguï beyæ ante ee ate wii cæmönipa. Bitö miñæ nē godäni guiquënë quïnante Wængonguï beyæ ante cädämaï inte edæ do cænänii.

¹⁵ Änäni ëñëninque Itota wæætë,

—Onguïñængä nē monguingä nänö wente ænte nē põnäni bai inönäni inte botö miñæ nē godäni iñömö ædö cæte wæwente bai cænämaï inguinänii. Wæætë ayæ ate guiquënë, Monguingä, näni nē ängä bai iñömote wadäni ponte botö imote ö ænte gocädänimpa. Mänömaï cädäni ate botö miñæ nē godäni iñömö mäniñedë ate wæætë cænämaï inte wæcädänimpa, ante apænedinque Itota godömenque iïmaï ante apænegacäimpa.

¹⁶ “Waoçä dicæ miincoo æninque pedæncooga põnö tadömonguingä. Mänömaï cæcä iñinque edæ miincoo incæ dobæ gäni tamonte guipite ate godömenque wänä tente baquënë. Minitö, Awente bai cænämaï inte waa quëwengæimpa, ante mini änewënö guiquënë pedæncoo bai inte ëwenguincoo bai ënëpa. Codito nempo watapæ quëwengæimpa, ante botö apænedö guiquënë miincoo bai inte quëwenguïne ënëpa. Iñinque ëwenguïne tönö quëwenguïne edæ ædö cæte adoyömö ëñente cæquii.

¹⁷ Ayæ adobai yowepæ biinömæ näni ämæ müimæ æninque waodäni ædö cæte picæ æmontaicadedë godö pe ñiñænguïnänii. Edæ picæ æmontaicadedë pe ñiñænäni iñinque yedæ æninque ætæwo goquino anguënë. Wæætë edæ æmontai müincadedë pe ñiñænte ate yedæ æninque tæi æbænämaï ee ongöñö

edæ müimæ tönö æmontaicade adobai ee ongongæimpa, apa quëwëminii,” ante Itota apænegacäimpa.

Gaido wëñængä beyæ cæcæ goyon-gante

onquiyængä Itota weocoo gam-pocampa

(Mäadoco 5.21-43; Odoca 8.40-56)

¹⁸ Tömënäni inänite tæcæ apæneyongä wacä tömënäni odömöincö awënë inongä inte Itota weca ponte ædæ wææninque apænegacäimpa.

—Botö wëñængä baquëcä iñömö edæ dobæ wæncæ cæcampa cæbii. Bitö ponte tömengä ingante gampobi ate quëwencæcäimpa.

¹⁹ Angä ëñëninque Itota iñömö ængæ gantidinque tömengä tönö goyöna tömengä miñæ nē godäni godongämæ godänitapa. ²⁰ Idömæ goyönäni edæ wacä onquiyængä wantæpiyæ dote wadepo cöwë wepæ wantæ bidämaï wææ wæwëningä iñömö ñöwo Itota önöñabæ inö põninque tömengä weocoo yæwedecooque gampocantapa.

²¹ “Tömengä weocooque gampote waa bawënëmote,” ante onquiyængä nämä põnëninque gampocantapa.

²² Gampocä ate Itota dadi ëmæmonte adinque,

—Onquiyæmi, wæwënämaï ie. Bitö wede põnënö beyæ edæ wantæ bawënëmipa.

Ante äñongä do edæ wantæ bawënegacäimpa.

²³ Itota mänii godinque awënë oncönë go guite ayongä nē ööña bai öönäni tönö nanguï inäni cægonte Yæ yæ wädäni inänite adinque, ²⁴ tömënäni inänite,

—Gä goedäni, äninque, Iñæmpa iñömö wëñængä wodi wii æmæwo wængampa. Önonque edæ mö ñongampa.

Angä ëñëninque tömënäni, Angantedö amini, ante tömengä ingante badete todänitapa. ²⁵ Ayæ mänii angä taodäni adinque Itota põ guidinque wëñængä baquëcä wodi ingante pædæ wææmpo bæi ongonte töö

æmængä ate wēñængä ængæ ganti-cantapa. ²⁶ Mänömaï cæcä adinque nē adāni iñömö gode ä gode ä cædāni ate māniñömö quēwēnāni tōmānāni ēñengadānimpa.

Babetamöna inate Itota gam-pomongä waa adapa

²⁷ Itota wadæ gote godömenque goyongä babetamöna tee empo ponte aa pedinque,

—Awēnē Dabii pæimi inömi inte mönatö imönote pönö waadete waa cæbi æmönæ, ante ancaa aa pedatapa.

²⁸ Aa peyöna tōmengä edæ oncönē go guicä adinque adoyömö pö guidatapa. Guida adinque Itota tōmēna inate,

—Mina änö ante nö waa cæquimo, ante pönēmīna.

Ñongante,

—Ao. Awēnē, bitö änö bai cæcæbiimpa, ante pönēmönapa.

²⁹ Apænedä ēñēninque Itota pædæ gopo gampomöninque,

—Nē pönēmīna inīmīna inte mīna pönenganca do waa bacæmīnaimpa.

³⁰ Ante ãñongä edæ tōmēna awinca wi æmonte bai adatapa. Itota iñömö edæ,

—Botö cædinö ante apænedāmaï inguēnē quēwēmīnaa. Edæ pæ wēneyömīna ēñēnāmaï incædānimpa, ante nanguï angantapa.

³¹ Ininque wadæ godinque Itota nänö äñinö ante wīi ēñente cædinque tōmēna, Itota mänömaï cæcä waa bamontamönapa, ante tōmāmæ mao apænedä ēñengadānimpa.

Wēnæ inte wido cæyongä babetadecä iningä tedecampa

³² Wadæ goyöna edæ wēnæ tönö cæcä inte babetadecä inongä ingante Itota weca ænte pönāni. ³³ Adinque wēnæ ingante Itota wido cæyongä babetadecä iningä iñömö edæ do tedecä adinque tōmānāni ancaï guñēninque,

—Itota nänö cædö bai mönö idægocabo adocanque incæ dicæ cæcä atamongaa, ante wædānitapa.

³⁴ Paditeoidi guiquēnē,

—Wēnæidi awēnē tönö cædingä inte tōmengä wido cæcä apa anewēnāni, ante piingadānimpa.

Itota waodāni inānite waadete waa acampa

³⁵ Itota iñömö nanguï nāni quēwēñömö ayæ wædænque nāni quēwēñömö wayömö wayömö godinque Wængonguï angä nāni ēñente yewæmongainta ate odömöincönē go guii go guii cædinque odömöngä adānitapa. Ayæ, Mönö Awēnē Odeye inguipoga oo ponguñö anguēnē, ante nänö waa pönī äñinö ante apæncä ēñēnānitapa. Ayæ quiēmē daicawo cæpāmo adinque quiēmē wæncæ cæte wæwēnö adinque tōmengä godö cæcä waa badānitapa.

³⁶ Cæningancoo bai waodāni incæ bacoo ināni iñönāni nē aadingä dæ angä bai inānipa, ante acantapa. Mänömaï ināni inte babæidi wīñaate wædināni bai ængæ gantidāmaï ināni bai waodāni incæ wæwēñönāni Itota tōmēnāni tönö godongāmæ wæwente bai pönengantapa. ³⁷ Ayæ tōmengä miñæ nē godāni inānite apænedinque,

Tömemoncoo bacoo bai ināni iñönānite tā pete ināni bai nē gode änāni iñömö mēnāniya pönī inānipa cæmīni. ³⁸ Tömemoncodē gæqui angä Awēnē iñongante mīnitö tōmengä ingante apænedinque, Tömemoncodē nē gæquināni da godömi gote gæte bai ãñete poncædānimpa, ante Wængonguï ingante apæneedāni, ante Itota apænegacäimpa.

10

Itota angä ate dote ganca ināni nē gode änāni badānipa

(Mäadoco 3.13-19; Odoca 6.12-16)

¹ Ayæ ate tōmengä miñæ nē godāni önompo tipæmpoga go mēnāniya mānimpodāni iñönānite Itota añecä pönāni ate tōmengä, Botö pönö cæbo ate mīnitö nē ämīni badinque wēnæidi nē wentamö ewocadāni inānite wido cæcæmīnaimpa, angantapa. Ayæ, Quiēmē daicawo gawænāni incæ quiēmē beyæ wæncæ cæte

wæwēnāni incæ mīnitō eyepæ inte godō cæmīni ate nē wæwēnāni waa bacædānimpa, ante pōnō cægacāimpa.

² Itota nānō nē da godōnīnāni ōnompō tipæmpoga go mēnāniya mānimpodāni inānīpa, ante adīnque, Dote, ante nāni gocabo inānīpa, ante tededānīpa. Tōmēnāni iīmaī ēmōnāni inānīpa. Tānoda Timōnō Pegodo mōnō ānongā tōnō Æntade nāna caya ināpa. Ayæ Tebedeo wēna Tantiago tōnō Wāō nāna caya ināpa. ³ Pedipe tōnō Batodōmēē mēnaa ināpa. Odōmāno awēnē beyæ nē æwēningā Mäateo tōnō Tōmato mēnaa ināpa. Adepeo wengā Tantiago tōnō Tadeo ināpa. ⁴ Wacā, Mōnō ōmæ ingæimpa, ante nē nanguī cædingā incæ wacā Timōnō ingampa. Ayæ Itota ingante odōmonte nē godonguingā Codaa Icadīote mōnō ānongā ingacāimpa. Mānimpodāni Itota mīñæ nāni, Dote, ante gocabo inānīpa.

Wængonguī Awēnē ingantedō ante apæneedāni, ante Itota angā godānīpa (Māadoco 6.7-13; Odoca 9.1-6)

⁵ Inīnque Itota mīñæ nāni, Dote, ante gocabo iñōnānīte tōmengā, “Mīnitō idægoidi ināmaī ināni taadō godāmaī inte edæ Tāmadiāidi nāni quēwēñōmō go guīdāmaī iedāni, ante da godongantapa. ⁶ Edæ cæningāidi obegaidi gueogæ gote baī inōnāni inte mōnō idægocabo taadō oda cædinque tōmēnāni nāni wē womonte wænguīnō godānīpa, ante adīnque mīnitō tōmēnāni weca gote cæedāni. ⁷ Godīnque mīnitō, Ōōnædē Awēnē Odeye oo poncæcāimpa cæmīnī, ante māo apænemīni ēñencædānimpa. ⁸ Ayæ quiēmē beyæ nantate wæwēnāni adīnque godō cæmīni ate waa bacædānimpa. Do wænīnāni inānīte godō cæmīni ate ñāni ōmæmoncædānimpa. Baate ināni inānīte godō wadæ caamīni waintai baacædānimpa. Wēnæidi inte godō wido cæedāni. Botō ōnonque ānāmaī inte pōnō cæbo ænīmīni inte mīnitō botō cæbo baī adobai cædinque wadāni inānīte ānāmaī inte ōnonque

godō cæmīni æncædānimpa,” ante Itota angantapa.

⁹ Ayæ, “Mīnitō gocæ cædinque, Godonte æinta, ante tīguitamō incæ oodo incæ padata incæ edæ wente æincadedē da wente ænāmaī iedāni. ¹⁰ Edæ wadāni beyænque nē cæcā iñōmō tōmengā eyepæ ænte quēwencæcāimpa cæmīnī. Māincōo da wenguīncade ænāmaī inte goedāni, Weocoo mīni ēñacooque ēñate awæncata mīni ēwataque ēwate ongonto mīni nææntoque næænte goedāni,” angantapa.

¹¹ Ayæ apænedinque Itota tōmengā mīñæ nē godāni inānīte angantapa. “Nanguī pōnī nāni quēwēñōmō incæ wædænque ināni nāni quēwēñōmō incæ mīnitō māniñōmō go guīdīnque waocā nē nō cæcā ingante ante dīqui mīnte adīnque māningā oncōnē go guīte owodīnque wayōmō mīni go quēwenganca mānīncōnenque quēwēedāni. ¹² Mānīncōnē go guīdīnque, Iñānāni, waa quēwēedāni, æedāni. ¹³ Ayæ ānīnque, Mīnitō weca æbānō pō guīte quēwenguīmōnī, āñōmīni Ao ānāni ate mīnitō tōmēnāni weca go guīte gānē pōnēnīnque ee quēwēedāni. Wæætē nō cædāmaī ināni adīnque mīnitō edæ ee quēwēnāmaī edæ wadæ gomīni wæcædānimpa. ¹⁴ Edæ, Pōedāni, ānāmaī ināni adīnque ayæ mīnitō apænemīni ēñēnāmaī ināni inīnque mīnitō wæætē tōmēnāni oncodo tao godīnque, Mīnitō quēwēñōmō nāwate awædō, ante odōmoncæte ante cædinque ōnōwa wadæ wadæ cæwate wadæ goedāni. ¹⁵ Edæ nāwangā āmopa. Botō apænte anguīōnæ iñonte Todōmā iñōmō quēwengāināni tōnō Gōmoda iñōmō quēwengāināni tōnō nanguī pante wæwēñōnāni mīnitō imīnīte nē Baa ānāni guīquēnē godōmenque pante edæ wæwencædānimpa,” ante Itota tōmēnāni inānīte da godongā godānītapa.

Togænte pancædānimpa, ante

¹⁶ Ayæ ānīnque Itota, “Cōwā æedāni, angantapa. Mīnitō iñōmō

nē cæningæidi bai iñōmīnite botō iñōmō mēne bai ināni weca da godōmo godinque mīnitō tæntæ nāmā wææ cæcæte ante nānō ēñente cæbai adobai ēñente cæedāni. Wæætē edæ equemō nānō ee cæbai mīnitō adobai pīnāmaī inte ee cæte quēwēedāni.

¹⁷ Ayæ edæ mīnitō imīnite bæi ongōnīnque waodāni tōmēnāni nē apænte ānāni weca māo pædæ godōnāni æncædānimpa. Ayæ godōmenque tōmēnāni odōmōincōnē māo ænte godinque mīnitō imīnite tæi tæi pancædānimpa cæmīnii. Īnīnque mīnitō edæ, Æbānō cæquīnānii, ante do ēñēmīni inte edæ nāmā wææ aedāni.

¹⁸ Ayæ, Awēnēidi tōnō nē ēñēnāmaī ināni adobai ēñencædānimpa, ante cædinque botō āmo ēñēnīnque mīnitō imīnite māo pancabaa awēnēidi gobedōnadodoidi weca ayæ tōmāmæ awēnēidi odeyeidi weca gōnōnāni gongæninque mīnitō botō beyæ apænecæmīnimpa.

¹⁹ Māniñedē tōmēnāni nāni ænte māo gōnōnedē, Quīnō bai apænequīmoo, ante guīñēnete wædāmaī iedāni. Māniñedē edæ quīnō bai apænequīi, ante do ēñencæmīnimpa.

²⁰ Īñæmpa wīi nāmā pōnēnīnque apænequīmīni wæætē mōnō Wæmpo Ōnōwoca incæ apænecā ēñēnīnque apænequīmīni imīnīpa,” ante Itota apænegacāimpa.

²¹ Ayæ godōmenque apænedīnque Itota, “Māniñedē edæ nāna caya iñōnate adocanque nāēmæ pīīnīnque, Wænoncæ, ānīnque tōmengā tōniñacā ingante da godongā gocæcāimpa. Nāna wencaya iñōnate mæmpocā iñōmō nāēmæ pīīnīnque, Wænoncæ, ānīnque tōmengā wengā ingante da godongā gocæcāimpa.

Ayæ wēñænāni incæ wæmpoda īnate nāēmæ pīīnīnque māo apænedāni ēñēnīnque wadāni tōmēnāni wæmpoda īnate māmō wænōnāni wæncædaimpa.

²² Ayæ, Coditoidi imīnipææ, ante tōmānāni botō emōwo beyænque mīnitō imīnite nanguī pīīncædānimpa. Pīīnāni wæwēmīni incæ æcānō iīmæca iīnque baganca wæntædāmaī inte botō emōwo beyæ pīīnte badāmaī ingāā tōmengā ingante botō æmo beyænque

quēwencæcāimpa. ²³ Māniñedē ate waodāni togænte pancæte ante mīni quēwēñōmō pōnāni ate wædinque mīnitō iñōmō wayōmō wadāni nāni quēwēñōmō wodii winōedāni, āmopa. Edæ nāwangā āmopa. Edæ mōnō Idægobæ wayōmō wayōmō wodii winōnīnque pancayōmonga goyōmīni botō Waobo ēñagāimo inte edæ do poncæboimpa,” ante Itota apænegacāimpa.

²⁴ Ayæ, “Nē odōmongā ingante pīīnte cæyōnāni tōmengā mīñæ nē gocā ingante edæ ædō cæte pīīnte cædāmaī inguīnānii.

²⁵ Awēnē nē odōmongā wæwente quēwēñongā tōmengā mīñæ nē gocā guīquēnē ædō cæte wæwēnāmaī quēwenguingāā. Edæ nē cæcā tōmengā awēnē bai bacā iīnque idæwaa edæ imāimpa. Botō oncō ēacā bai nē Awēnē imo iñōmote wadāni, Wēnæ awēnē Beedeboobi imidō anguēnē, ante pīīnāni incæ mīnitō botō tōnō mīni quēwencabo iñōmīnite wadāni godōmenque wēnæ wēnæ ante pīīncædānimpa,” ante Itota apænecā ēñengadānimpa.

Guīñēnāmaī iedāni, ante (Odoca 12.2-7)

²⁶ Ayæ apænedīnque, “Incæte tōmēnāni inānite guīñēnāmaī iedāni. Īñæmpa, Adāmaī incædānimpa, ante quīēmē wē womonte ī incæ iīncayæ ate tōmāā wi ænete bayonte edonque pōni bacæimpa. Ayæ quīēmē awēmō cætei incæ iīncayæ ate edonque pōni acædānimpa.

²⁷ Botō wēmō iñōmō mīnitō imīnite apænebo ēñente ate mīnitō botō apænedō ante ñāō apāiyōmō apænecæmīnimpa. Ayæ godō wæntæ botō ānīnō ēñente ate mīnitō æibæ oncōmanca æidīnque ogæ tedete apænemīni ēñencædānimpa.

²⁸ Ayæ nē baonque wænōnāni inte ōnōwoca wænōnāmaī ināni inānite adīnque mīnitō tōmēnāni inānite guīñēnāmaī iedāni. Wæætē edæ baō tōnō ōnōwoca tadōmengadænguipo nē ōmæe ewēnongā ingante guīquēnē mīnitō tōmengā ingante guīñente wæedāni.”

29 Äninqe, Itota godömenque apænecantapa. “Waocä ayamöidi önompo æmæmpoque mänimpodäni beyæ tiguitamö adotamonque ante pædæ godongä aminitawo. Incæte minitö Mæmpo änämaï iñonte ayamö adocanque incæ yæipodë wæænämaï ingampa. 30 Mönö ocaguï incæ æpoguïnö encamöö, ante Mæmpo Wængonguï do ëñëninque mönö imonte aacampa. 31 Edæ, Ayamöidi bacoo põni ininqe önonque inänipa, ante në äningä inte mönö Mæmpo iñömö minitö iminite wæætë waa acä apa guïñewëminii,” ante Itota apænecäimpa.

Waadäni ëñëñönäni mönö Itota ingante Ao angæimpa, ante (Odoca 12.8-9)

32 Godömenque apænedinque Itota, “Æcänö waodäni ëñëñönäni botö imote Ao äninqe, Bitö botö Awënë inömi imipa, ante äna tömengä öönädë æiyongante botö tömengä ingante wæætë edæ Ao äninqe, Bitö iñömö botö miñæ në gogaïmi inömi imipa, ante botö Mæmpo ëñëñongä ancæboimpa. 33 Wæætë waodäni ëñëñönäni botö imote në Baa angaingä ingante guiquënë botö Mæmpo öönädë në quëwengä ëñëñongä botö tömengä ingante adobaï edæ Baa ancæboimpa,” ante Itota apænecäimpa.

Botö beyænque guëa püncädänimpa, angampa (Odoca 12.51-53, 14.26-27)

34 Ayæ apænedinque Itota, “Inguipoga quëwënëni piyænë cæte wæætedö wæætë cädämaï inte quëwencädänimpa, ante cæcæte ante Itota imæca pongaingä ingampa, ante minitö pönëminitawo. Iñæmpa yaëmë næænte bai põmo imopa. 35 Botö apænedö beyæ onguïñæna nana wæmpocaya incæ næëmæ püncädäimpa, ante põmo imopa. Onquiyæna adobaï nana badancaya incæ næëmæ püncädäimpa. Nana wæntecaya incæ næëmæ waadedämaï inte püncädäimpa, ante põmopa. Mänömaï cæbo imopa, ante

pönëminiyaa. 36 Ininqe, botö änö beyæ nani owocabo incæ næëmæ waadedämaï püncädänimpa,” ante apænecäimpa.

37 Ayæ apænedinque Itota iïmaï apænecantapa. “Edæ æcänö mæmpo tönö wäänä inate ædæmö waadedinque botö imote wæætë pönömenque waadeda iñömö tömengä iñömö botö në ëmiñængä ædö cæte baquingä. Adobaï wëñængä ingante ædæmö waadedinque botö imote pönömenque në waadecä iñömö tömengä wæætë botö në ëmiñængä ædö cæte baquingä. 38 Ayæ æcänö botö miñæ pönëna tömengä iñömö edæ, Awæ botö wænguïwæ, ante næænte ponte bai cædinque, Wænönäni wæmo incæte Itota miñæ cöwë gocæboimpa, ante poncæcäimpa. Wæætë æcänö mänömaï cädämaï ina guiquënë tömengä ædö cæte botö në ëmiñængä inguingä. 39 Æcänö nämanque pönente, Imæcaque waa quëwenguïmo, ante änaa tömengä iñömö quëwënëmaï incæcäimpa. Wæætë edæ, Wæmo incæ wæwëmo incæ botö öönädë Awënë angä ëñente cöwë cæcæboimpa, ante æcänö äna guiquënë tömengä iñömö edæ cöwë quëwencæcäimpa,” ante Itota apænecäimpa.

Në pönengä nänö waa cædinö beyæ eyepæ æncæcäimpa (Mäadoco 9.41)

40 Ayæ apænedinque, “Minitö iminite Ao äninqe waocä botö imote do edæ Ao äningä ingampa. Ayæ botö imote Ao äninqe botö imote në da pönongaingä ingante do edæ Ao äningä ingampa. 41 Wængonguï beyæ në apænecä ingante bitö, Wængonguï beyæ në apænëbi inte pöe, ämi ininqe Wængonguï beyæ në apænecä nänö paga ænganca bitö adopo æncæbiimpa. Ayæ në nö cæcä ingante, Bitö në nö cæbi inte pöe, ämi ininqe në nö cæcä nänö paga ænganca bitö adopo æncæbiimpa. 42 Näwangä ämopa. Bitö Itota miñæ në gobi inte æpæ becæbiimpa, ante bitö guiyangä ingante pædæ godömi ængä ininqe bitö godöni beyæ eyepæ

æncæbiimpa,” ante apænedinque Itota tömënäni inänite da godongä gogadänimpa.

11

Wäo tömengä miñæ nē goda inate da pönongä pönäpa
(*Odoca 7.18-35*)

¹ Ayæ tömengä miñæ nāni, Dote, ante gocabo inänite iinque apænedinque Itota wadæ godinque tömënäni nāni quëwëñömö odömoncæte ante ayæ, Eñencædänimpa, ante apæ necæte ante wayömo wayömo gocantapa.

² Mäniñedē edæ Wäo iñömö tee mönete ongöñongante wadäni tömengä weca pöninque, Mönö Codito iimaï cæcampa, ante tededäni eñente wædinque Wäo wæætē tömengä miñæ goda inate Itota weca da godongä godatapa. ³ Iinque Wäo beyæ ancæte ante pöninque tömëna iimainö ante Itota ingante apænedatapa.

–Bitö iñömö dodäni nāni, Nē Ponguingä, ante nē angaimi adobi imitawo. Wæætē tömënäni nāni nē angaimi inämaï imi iinque bitö wæætē, Wacä ponguingä, ante wänö cöedäni, ämitawoo. Æbänö mönitö cæquimönii, ante eñencæte ante wæmönipa.

⁴ Ante äñönote Itota wæætē, “Mīnatö ponte eñëñöminä botö æbänö apænebo eñëminatawo, ante ayæ, Botö æbänö cæbo amīnatawo, ante mīnatö wæætē Wäo weca gote mäo apænemina eñengæda. ⁵ Botö godö cæbo ate babetamö iñināni incæ waa bamonte adäni amīnāpa. Cömante iñināni incæ waa bate dao dao godäni amīnāpa. Baate iñināni incæ æmontai waëmontai baadäni amīnāpa. Babetamonca ināni iñönänite botö godö cæmömo ate önömonca waa bamoncate eñënäni amīnāpa. Do æmæwo wænte öñönäni iñönänite botö godö cæbo ate ñäni ömæmönäni amīnāpa. Ömaadäni inte wæyönänite botö Wængongui waa pönī nänö pönö cægainö ante apænebo eñente todäni amīnāpa. ⁶ Ayæ, Botö beyæ waocä wii piinte wadæ gocä iñömö tömengä

watapæ nänö quëwenguinque edæ oda cædämaï incæcäimpa, ante apænebo eñëninque mīnatö Wäo ingante mäo adodö ante apænemina eñengæda,” ante Itota angantapa.

⁷ Angä eñëninque Wäo beyæ nē äñina wadæ goyöna edæ Itota wæætē tömënäni inänite, Wäo æbänö ingää, ante apæ necantapa. “Mīnitö guiquënë quīnö acæte ante önömæca gomīnitapa. Cæwipa woboyæ pæmænte ate æmænö ædæ æmænö ædæ gobaingä ingante mīnitö dicæ acæ gomīnitawogaa.

⁸ Iinque edæ quingänö ingante acæte ante gomīnitapa. Waocä weocoo waëmoncoo mongænongä ingante mīnitö dicæ acæ gomīnitawogaa. Iñæmpa waëmoncoo mongængä iñömö awënë oncönë quëwengä apa quëwënänii.

⁹ Iinque edæ quīnante gomīnitawo. Mīnitö mīni nē go acæ cædongä iñömö edæ Wængongui beyæ nē apæ necä ingantawo. Nāwangä impa. Wængongui beyæ nē apæ necä Wäo ingampa. Incæte tömengä wii Wængongui beyæ nē apæ negainäni bai inongä inte godömenque nangui cæcä ingampa, ante apænebo eñëmaimīnāpa. ¹⁰ Wængongui iimaï angampa, ante yewæmongatimpa.

‘Botö beyæ nē apæ necä ingante da pönömo pöninque tömengä taadö täno beyænte bai cæcæcäimpa.

Tömengä bitö Codito imi beyæ ante taadö waa pīnonte bai waa cæcæcäimpa.’

Mänömainö ante dodäni adocä Wäo ingantedö ante pönëninque yewæmongadänimpa. ¹¹ Nöwo iñömö ämo eñëedäni. Imæca mīni eñagaincabo iñömīnīte æpænë mönö nē guidönongä Wäo adocanque ñænængä iñongante wacä tömengä bai edæ dæ angampa. Incæte öönæde Awënë Odeye nempo quëwënäni iñönäni adocanque guiyangä pönī ingä incæte Wäo pönömenque wædangä ingampa,” ante Itota apæ necantapa. ¹² Ayæ iimaï ante godömenque apæ necantapa.

“Wäo tano nänö apænedöñedē ayæ godömenque ñowo ganca tæi piñænāni pogodo pöningue, Öönædē Awēnē Odeye nempo mönō wäänē guicæimpa, ante tee tate guite bai cædinque, Mönō Awēnē incæcäimpa, ante edæ ö ænte bai cædānipa. ¹³ Edæ Wængongui beyæ nē apænegaināni tönō, İimaï cædāni, ante nē wææ angaingā tönō tömēnāni tömānāni edæ, Awēnē poncæcäimpa, ante cöwē Wäo nänö ponganca apænegadānimpā. ¹⁴ İinque, Ediya wodi ayæ poncæcäimpa, ante nāni nē ānongā Wäo iñömō adocā ingampa, ante pönēmīniyaa. ¹⁵ Eamonca ongonte eñēedāni,” angantapa.

¹⁶ Godömenque apænedinque Itota İimaï angantapa. “Ingui-pogaque ante nē quēwēnāni iñömō quingāmē bai inānipa. Quiēmē bai edæ quēwēnānipa. Wēñænāni mönō godonte æiñömō tæe contate owempodāni nāni owempodō bai edæ adobai cædānipa, ante awædō. Wēñænāni nāni owempote cæcabo incæ ææmæ cæte bai owempote cædinque wadāni inānite aa pedānipa. ¹⁷ Minitō beyæ ööña we we ööñömōni mīnitō wæætē edæ āwadāmaï imīnitapa tōö,’ ante owempodinque wēñænāni piinte tedewēnānipa. Ayæ wæætē, Waocā do wængā ate nāni wæbai ante wēñænāni nāni owempote cæcabo iñömō, ‘Mönitō Ca ca wæyömōni mīnitō wæætē edæ wædāmaï imīni wæmōnipa,’ ante piinque aa pedāni bai ñowodāni iñömō edæ adobai piinte tedewēnāni inānipa. ¹⁸ İimaï edæ impa. Wēñænāni nāni wædō bai Wäo iñömō cængui cænāmaï tepæ bedāmaï ponte quēwēñongante ñowodāni guiquēnē, Wēnæ tönō Wäo quēwengampa, ante piinānipa. ¹⁹ Ayæ wæætē botō Waobo eñagaïmo inte edæ ponte nē cænte bete quēwēmo adinque botō imotedō ante mīnitō iñömō, Cæowæobi inte cæmipa. Beowæobi inte bebipa, ante badete tomīnipa. Ayæ godömenque, Odömāno awēnē beyæ nē æwēnāni tönō nē

eñēnāmaï cædāni iñönānite bitō tömēnāni æmigo imipææ, ante botō imote piinque mīnitō wēñænāni nāni piinte aa pedō bai anewēmīnipa tōö. Incæte, Nē nō eñēnāni iñömō nō cædānipa, ante adinque, Nāwangā nō eñēnānipa, ante mönō eñengæimpa,” ante Itota apænegacäimpa.

Nē eñēnāmaï cædāni inānite Itota piingampa

(Odoca 10.13-15)

²⁰ Ayæ, Minitō quēwēñömō botō bamōnengæ nanguï cæbo adimīni incæ mīnitō wēnæ wēnæ mīni cædinō ante, Ancaa wæwente awædō, ante dicæ wæmīnitawogaa, ante piinque Itota wayömō wayömō tömengā nänö nanguï cædiñömō quēwēnāni inānite İimaïno ante mā piingantapa. ²¹ “Codatū iñömō quēwēmīni eñēedāni. Betaida iñömō quēwēmīni eñēedāni. Minitō mīni wæwenguinque eñēnāmaï cæte quēwēmīnidō anguēnē. Edæ botō mīnitō weca tæi piñænte botō cædi bai Tido nāni quēwengaiñömō Tidōö nāni quēwengaiñömō adobai cæbo bai māniñömō quēwengaināni iñömō tömēnāni dobæ wēnæ wēnæ nāni cægainō ante ñimpo cædinque weocoo gömæ emoncoo wēñadinque gönai öni pæcate Ca ca wæcægadānimpā. ²² İinque mīnitō imīnite amopa. Wængongui nänö apænte anguiönæ iinque bayonte Tido iñömō quēwengaināni tönō Tidōö iñömō quēwengaināni inānite nanguï pangā wæwēnāni incæte tömengā mīnitō imīnite godömenque pangā wæwencæmīnimpā. ²³ Ayæ Capēnaömō iñömō quēwēmīni eñēedāni. Minitō imīnite Wængongui dicæ öönædē wo ææntodongā æi gote toquimīniyaa. İñæmpa tadömengadænguipo wææntodongā guui wæcæmīnimpā. Edæ botō mīnitō weca tæi piñænte botō cædi bai Todömā nāni quēwengaiñömō adobai cæbo bai tömēnāni nāni quēwengaiñömō edæ godömenque ñowo ganca edæ mæ ongoncædōnimpā. ²⁴ İinque edæ amo eñēedāni.

Wængonguī nānō apænte anguiōnæ iinque bayonte Todōmä quēwengaināni inānite nanguī pangā wædāni incæte mīnitō imīnite godōmenque pangā wæcæmīnimpa,” ante Itota tōmēnāni inānite pīngacāimpa.

Botō weca pō guēmāedāni, angampa

(Odoca 10.21-22)

²⁵ Ayæ māniñedē Wængonguī ingante apænedinque Itota, “Mæmpo ēñēmi. Wadāni nāmā ocai encadāni tōnō nanguī adinque nē ēñēnāni tōnō mānīnō bitō ēñengainō ante ēñēnāmaī incædānimpa, ante cædinque bitō cægāinō ante wē wodonte baī pæ wēēnegabiimpa. Wæætē edæ wēñænāni nāni pōnēnō baī nē pōnēnāni inānite wæætē bitō edonque odōmōmi adinque do ēñēnānipa. Bitō oōnædē Awēnē ingāimi inte inguipoga Awēnē adobi inōmi inte edæ mānōmaī cæbipa, ante adinque botō bitō imite waa ate pōnēninque apænebopa. ²⁶ Mæmpo, bitō tōmēmi ānō baī cædinque waa cæbi adinque botō Ao āmopa,” ante Wængonguī ingante waa apænecantapa.

²⁷ Wængonguī ingante iinque apænedinque Itota godongāmæ ongōnāni inānite wæætē apænecantapa “Botō Mæmpo nō ēñengā inte pōnō odōmongā beyænque botō iñōmō tōmānō ante nē ēñēmo imopa. Ayæ, Botō tōmengā Wēñæmo iñōmote botō Mæmpoque botō imote nē againgā iñongante wadāni adāmaī inānipa. Wæætē edæ Mæmpocā ingante botō tōmengā Wēñæmo inōmo inte adoboque nē agaīmo imopa. Iinque, Botō abo baī iñānique adobaī ate baī pōnencædānimpa, ante cædinque botō mīnitō imīnite odōmōmo adinque mīnitō adobaī Mæmpocā ingante nē ate baī pōnēmīni bamīnipa.”

²⁸ “Teēmē mongænte baī nangæ batawēmīni iinque mīnitō botō weca pōmīni ate botō wæætē teēmē mongænte mīni wæwēnō ante o æmo ate mīnitō wæætē gancaē pōnente guēmancæmīnimpa. ²⁹ Edæ botō mīmōno gānē pōnēninque nāmā

beyænque ānāmaī quēwēmo adinque mīnitō botō weca pōmīni iinque botō mīnitō tōnō iñacabo cæcæboimpa. Edæ wagadada awæmpaa goti wīmoncate āāmencaque goda baī mōna guēa cæcaya bayōmōna botō nō ēñēnōmo inte pōnō odōmonte apænebo ēñēninque mīnitō onōwoca wampo pōnente guēmancæmīnimpa. ³⁰ Edæ botō tōnō āāmencaque baī cædinque bitō iñōmō oo wīmoncadimpa mongænte baī edæ do cæcæbiimpa. Botō mongæncōo wodæi iñonte bitō wæætē edæ wodæi mongænte gote baī nangæ badāmaī incæbiimpa,” ante Itota iinque apænegacāimpa.

12

Guēmanguiōnce iñonte tōmēmō tā pete ænānipa

(Māadoco 2.23-28; Odoca 6.1-5)

¹ Māniñedē guēmanguiōnæ iñonte Itota tōmēmoncodē tæcæguedencodē gocantapa. Goyongā tōmengā miñæ nē godāni guiquēnē gæwænte wædinque tōmēmō tā pe tā pe æninque tæcæ cæncæ cædāni. ² Adinque Paditeoidi guiquēnē Itota ingante wæætē,

—Bitō miñæ nē godāni æbānō cædānii, ante cōwā aquēnē. Iñæmpa, Guēmanguiōnæ iñonte mānīnō baī cædāmaī iedāni, ante dodāni nāni wææ angāinō ante ēñēnāmaī inte iñāni iñōmō do cædānipa tōō.

³ Ante pīiñōnānite Itota, —Mīnitō iñæmpa docā Dabii wodi tōnō godongāmæ godāni tōnō gæwænte wædāni iinque tōmengā æbānō cægacāi ante yewæmonte ongō incæte mīnitō iñōmō adāmaī inte baī ānewēmīni awædō. ⁴ Tōmengā iñōmō Wængonguī oncōnē go guicantapa. Mānincōnē, Wængonguī qui, ante nē godōnānique cænguī impa, ante wææ nāni angāinō baī cædinque tōmēnāni, Wængonguī qui, ante pāo ñoncaē ñoncaē cædōnānimpa. Incæte mānīi pāo wīi Dabiidi cænguī iñi incæ Dabii do cængantapa. Ayæ tōmengā tōnō cægōnāni adobaī godongāmæ cængadānimpa. ⁵ Ayæ, Wængonguī qui,

ante nē godönāni iñömö Wængongui oncönē ñænæncönē iñömö önönæque nāni cæbai guëmanguiönæ iñonte adobai cædāni incæte wentamö entawēnāmai önönque cæcædānimpa, ante Mōitee wodi wææ yewæmongacäimpa. Minitö iñömö mäninö ante adāmai inte bai ānewëminipa töö, angantapa.

⁶ “Ayæ apænebo eñeedāni. Minitö, Wængongui oncö ñænæncö waa pōni ongoncompa, ante ayömini edæ botö ñöwo minitö weca nē ongömo guiquënë wii Wængongui oncö bai ongömo inte wii önömoque ongömpa. Wæætē edæ nāmā nō cædömo inte botö iñömö edæ godömenque waa pōni ongömo apa quëwëmini. ⁷ Incæte, Wængongui iimainö ante apænecampa. ‘Wængongui qui, āninqe mīni iya tånö ante pönömenque waa adinqe botö nē waadete mīni godö waa cædö ante godömenque waa abopa,’ ante Wængongui angampa. İninqe mīnitö iñömö Wængongui nānö angainö ante eñëmini inte bai iināni wentamö mongæñāmai iñönānite, Mīni pante wæquinque mänömai cæminipa, ante apænte piināmai incædöminipa. ⁸ Botö iñömö Waobo nē eñagäimo iñömö Tæiyæ Awënë inömo imopa. İninqe botö nē guëmanguiönæ Awënë inömo inte edæ, Guëmanguiönæ iñonte edæ æbänö cæquii, ante adobo nē Ämo imopa,” ante Itota apænegacäimpa.

*Ni cömampoingä
(Mäadoco 3.1-6; Odoca 6.6-11)*

⁹ Äninqe wadæ godinqe Itota iñömö Wængongui angä nāni eñente yewæmongainta ate oodeoidi nāni odömöincönē go guigacäimpa. ¹⁰ Māniñömö nī cömampoingä a on-gongä adinqe Paditeoidi guiquënë, Itota wapiticæ cæcä ininqe mönö mao piinte angæimpa, ante nē änāni inte tömengä ingante änānitapa.

–Guëmanguiönæ iñonte wacä waa bacæcäimpa, ante cædāni, ante Wængongui wææ angantawo.

¹¹ Ante Itota ingante añönānite tömengä wæætē,

–Guëmanguiönæ iñonte waocä tömengä cæningä ontatodē goyæ guii adinqe mīni waocabo imīni incæ æcämē pædæ guipote æñāmai imaingää. ¹² Cæningä önonganque iñongante waocä iñömö waemö pōni ingampa, ante adinqe guëmanguiönæ i incæte waodāni beyæ cōwē waa cæcæimpa, ante ämo eñëmaimīnipa.

¹³ Äninqe nī cömampoingä ingante wæætē,

–Pædæ pompobi, angä.

Eñëninque tömengä pædæ gopod-inque æmæmpo bai waa empocä bacantapa. ¹⁴ Adinqe edæ Paditeoidi guiquënë wadæ godinqe, Æbänö cæte tömengä ingante wænömo wænguingää, ante godongämæ pönëninque tedegadānimpa.

Codito æbänö cæquingä, ante Itaiya nānö apænegainö

¹⁵ Tömēnāni, Wænongæimpa, ante pönente tededāni wædinque Itota iñömö wadæ gocantapa. Wadæ goyongä tæiyænāni tee empo godāni ate wædinque tömengä godö cæcä ate nē wēnæ wēnæ inte wæwēnināni tömānāni waa badānitapa. ¹⁶ Ayæ nē waa badināni inānite, Minitö, Botö æbodö imo, ante mao apænedāmai iedāni, ante wææ angantapa. ¹⁷ İninqe Itaiya wodi Wængongui beyæ nē apænecä iimainö ante nānö yewæmongainö bai inque cætimpa.

¹⁸ “Wængongui iimai ante apænecampa.

Botö imote nē cæquingä incæcäimpa, ante botö nē apænte ænongä iñömö a on-gongä aedāni.

Adocä botö nē waadedongä iñongante botö tömengä ingante adinqe watapæ tobopa.

Botö Önöwoca ingante da pönömo ænte ewocadinque botö imo nē cæcä iñömö,

Botö nō cæte apænte ancæboimpa, ante tömengä oodeoidi ināmai ināni inānite mao apænecæcäimpa.

19 Incæte tömengä wii wæætedö wæætë piincæcäimpa. Ogæ tededämaï incæcäimpa.

Waadäni taadö godinque tömengä dicæ Yæ yæ ante tedecä eñenäniyaa.

20 Cæwipa bede næænimpa wä tadämaï inäni bai waocä wæwengä iñongante tömengä adobai nē wæwengä ingante wido cædämaï ingampa.

Ayæ gongapæncade cōmencagui mini tente tēemāmoque go adinque pi ongomōnāmaï inäni bai tömengä adobai waocä wæntæye bayongante tömengä ingante godö piināmaï ingampa.

Adocä botö imote nē cædongä ingaingä inte tömengä nē Awënë nänö baganca cōwē nōingä ante apænte äninque cōwē waa cæcæcäimpa.

21 Ayæ botö imote nē cædongä nē Awënë bacä adinque wadäni oodeoidi ināmaï inäni incæ, Tömengä emōwo beyænque mönö quëwengæimpa, ante pōnencædänimpa,”

ante Itaiya wodi Wængongui beyæ nänö yewæmongainö bai Itota mönö Codito ñowo ponte waa cæcä ingampa.

Wænæ tönö cæcä imaingampa, ante wapiticæ änänipa

(Mäadoco 3.20-30; Odoca 11.14-23, 12.10)

22 Mäniñedē wacä wænæ tönö quëwënongä inte babetamongä babetadecä badingä iñongante wadäni tömengä ingante ænte mämönäni pongä adinque Itota godö cæcä ate tömengä awinca adinque nē tedecä bacantapa. 23 Cæcä waa bacä adinque tömänäni, Æbänö cæcää, ante guiñente wædinque, “Awënë Dabii wodi pæingä wabänö imaingampa,” ante pōnente wægadänimpa.

24 Mänömainö ante wædäni eñëninque Paditeoidi guiquënë, “Iñæmpa wænæidi awënë Beedeboo tönö nē cæcä inongä inte Itota

wænæidi inänite wido cæbaingampa,” ante tedewënanitapa.

25 Wapiticæ tömënäni pönëno ante eñente wædinque Itota tömënäni inänite, “Awënë odeye nempo quëwënanäni iñömö näëmæ wæætedö wæætë cædäni ininque awënë odeye nänö omædempote wæquinque tömënäni nämä ewente cæbainänipa. Ayæ adocönë owocabo incæ adoyömö godongämæ quëwëninäni incæ näëmæ wæætedö wæætë cædäni ininque tömënäni oncö woquinque näwæ gobainänipa.

26 Ayæ Tatäna nempo quëwënanäni iñömö edæ näëmæ piiniquine wæætedö wæætë cædinque tömengä ingante wido cædäni ininque Tatäna dicæ tömënäni awënë odeye imaingää.

27 Minitö, Beedeboo tönö cædinque Itota wænæidi inänite wido cæcampa, ante tedewëminipa. Mäninö mini änewënö näwangä i bai minitö miñæ

nē godäni guiquënë æcänö tönö cæte wido cædänii. Ininque minitö miñæ nē godäni incæ mini änewënö beyænque ante näëmæ piiniquine minitö iminite wæætë apænte äninque piincædänimpa anguënë. 28 Botö

iñömö Wængongui Önöwoca tönö cæte wænæidi inänite wido cæbo apa änewëmini. Mänömaï i ininque botö Wængongui Awënë Odeye inömo inte minitö weca do pömo aedäni,” ante Itota apænecacäimpa.

29 Ayæ apænedinque tömengä, “Nē tæi piñængä ingante wii goto wininque waocä ædö cæte tömengä oncönë guite mäincoo ö ænguingää. Edæ nē ëacä ingante bæi ongonte goto winte ate pö guite ö ænänäni bai botö iñömö wænæ inte nē bæi ongonte wido cæbo imopa,” angantapa.

30 Ayæ, “Botö tönö æcänö wii godongämæ cæcä iñömö tömengä iñömö edæ Baa ante botö imote piinte cæcä ingampa. Ayæ botö, Waadäni botö miñæ poncædänimpa, ante cæyömo waocä botö tönö wii cæcä iñömö tömengä wæætë botö miñæ poncæ cæyönänite tatodongä wædæ godänipa,” ante apænecantapa.

³¹ Ayæ, “Īninqe apænebo eñeedäni, angantapa. Mini waocabo wænæ wænæ cæmini incæ Mæmpo Wængongui ingantedö ante babæ ante godö wiwa ämini incæte Wængongui wæætë tömänö beyæ pönö ñimpo cæcä beyænque quëwencæminimpa. Wæætë edæ Wængongui Önöwoca ingante babæ ante godö wiwa ämini ĩninqe Wængongui mäninö ante cöwë ñimpo cædämaï incæcäimpa. ³² Ayæ botö Waobo eñagaïmo ĩñömote botö ĩmotedö ante waocä piininqe adod-eque angä incæte Wængongui godö ñimpo cæcä ate quëwencæcäimpa. Wæætë botö Tæiyæ Waëmö Önöwoca ingantedö ante æcänö piininqe babæ äna guiquënë tömengä inguipoga nänö quëwengäñedë incæ wænte ate nänö goyedë incæ Wængongui tömengä nänö wænæ wænæ äninö ante cöwë ñimpo cædämaï incæcäimpa,” ante Itota apænegacäimpa.

Awæ æbänö iwæ, ante tömenca bete eñengæimpa, ante (Odoca 6.43-45)

³³ Ayæ waomö mönö cædinö ante awæ incate bai impa, ante odömoncæte ante Itota ĩmaï ante apænegacäimpa. “Awæ æbänö iwæ, ante eñencæte ante mönö tömenca tä pete bete eñengæimpa. Awæ waiwæ iwæ ĩninqe tömenca wainca incaquiwæ impa. Wæætë awæ baawæ iwæ ĩninqe edæ tömenca baaca incaquiwæ iwæmpa, ante eñengæimpa. ³⁴ Mimönë mönö pönëmämo eyede tate bai tao goded-inque mönö mänimämoque ante pönëninque tedemompa. Īninqe minitö tæntæ pæimäni bai ĩmini ĩñömö wiwa cæte quëwëmini inte minitö ædö cæte waa ante apænequimäni. ³⁵ Ayæ waa pönä mäincoo da wente ate tadonte ænäni bai cædinque në waa cæcä ĩñömö mimönë waa pönä nänö entawëninö ante pönëninque waa pönä tedete waa cæcampa. Në wiwa cæcä guiquënë mimönë wiwa nänö entawëninö ante pönëninque wiwa tedete wænæ wænæ cæcampa.”

³⁶ “Edæ apænebo eñeedäni. Wængongui tömengä nänö apænte anguionæ ĩñonte, Mänine quinante önonque tedebitawo, ante angä eñëninque mini waocabo edonque apænequënëmini ĩminäpa. ³⁷ Īninqe mini tedepämo tömämämo ante Wængongui apænte äninqe edæ pancamäniya ĩminite ñimpo cædinque edæ pancamäniya ĩminite, Mini panguinque tedewëminäpa, ancæcäimpa,” ante Itota apænegacäimpa.

Mä cæte odömömi amönie, ante änänäpa

(Mäadoco 8.11-12; Odoca 11.29-32)

³⁸ Apæncä eñëninque në odömönäni tönö Paditeoidi pancadäniya Itota ingante apænedinque,

—Awënë në Odömömi eñëmi. Pönencædänimpa, ante mä cæte bitö odömönö ante mönitö äinente wæmönäpa.

³⁹ Äñönäni Itota wæætë,

—Mäni në wiwa cæcabo inte Wængongui ingante emö cæte pangote bai mini wadæ godincabo ĩñömö minitö, Mä cæte odömömi adinque pönëmaïmönäpa, ante ancaa ämini awædö. Näwangä ämo eñeedäni. Nöwomäni ĩminite mä cæte odömönämaï ingæimpa. Cönäö wodi beyæ nänö cægäinö ante edæ mäninque mini aquinque cæcäimpa änewëminäni. ⁴⁰ Mëönaa go adoönæque ĩñonte gæyæ cæncadë Cönäö wodi nänö ongongäi bai edæ botö adobai Waobo eñagaïmo inte edæ mëönaa go adoönæque adopoönæ wao wodido ongoncæboimpa. ⁴¹ Cönäö wodi Wængongui beyæ apæncä eñëninque Nïnebaidi wænæ wænæ nänä cægäinö ante ñimpo cædinque Wængongui gämænö pongadänimpa. Cönäö wodi wædangä ĩñongante botö në ñænæmo inte nö ante apænebo eñëninque minitö wæætë eñënämaï ĩminäpa. Īninqe Nïnebaidi Wængongui gämænö në pongäinäni incæ Wængongui në apænte angä weca pöninque mini ñöwo quëwencabo tönö godongämæ

gongænte ongöningue, Mini panguingue eñenāmaī ingamīnimpa tōö, ante apænte pīinānidō anguēnē.

⁴² “Ayæ adobaī betamonca gāmænō ömæ awēnē onquiyængä iñömō awēnē Tadömōō wodi nanguī eñente nānō apænedō ante eñencæte ante doönæ quēwēningue pongacäimpa. Tadömōō wædænque eñengä iñongante botō godömenque nanguī eñēmo inte mīnitō weca ongōñömote mīnitō iñæmpa wīi eñēmīnīpa tōö. İninque māningä onquiyængä incæ Wængonguī nē apænte angä weca pōningue mīni ñōwo quēwencabo tönō godongāmæ ongöningue, Mini panguingue eñenāmaī ingamīnimpa tōö, ante apænte pīincæcäimpa,” ante Itota apænegacäimpa.

Wēnæ waodē owote godingä inte adodō pongampa, ante (Odoca 11.24-26)

⁴³ Ayæ apænedinque Itota iīmaī ante apænegantapa. “Waocä baönē owote ate tao godinque wēnæ iñömō edæ, Quingānō baönē go guidinque edæ guēmante quēwenguimoo, ante diqui diqui minte ayongä önömæca to aminte i ate wædinque edæ, ⁴⁴ ‘Botō tao godincönē adodō go guiite quēwencæboimpa,’ ante pōnēningue adodō pongampa. Ponte ayongä waocä önonganque bayongante wacä önōwoca tōmengäa owodāmaī ingä adinque wēnæ wæætē, Æ waocä botō owodincō bai inongä inte ñōwo önonconque bai wadæ ñēmænte māincoo cabo tē gæte bai ömæwocacä ingä abopa. ⁴⁵ Ante adinque tōmengä wæætē godinque wēnæidi godömenque wīwa cædāni tiæte ganca mānimpodāni inānite ænte pongampa. Tömēnāni tōmānāni waocä baönē godongāmæ pō guiite owodāni ate waocä iñömō wēnæ yewæningue godömenque wæwengampa. Ñōwomīni guiquēnē wīwa mīni cæcabo adobaī bate wæwencæmīnimpa,” ante Itota apænegacäimpa.

Itota badä tönō tōmengä biwīidi (Mäadoco 3.31-35; Odoca 8.19-21)

⁴⁶ Itota oncönē a ongöningue nanguī ināni inānite apæneyongä tōmengä nānō biwīidi tönō tōmengä wāanā tōmengä ingante bee tente apænegæte ante oncodo ponte a ongönāni. ⁴⁷ Adinque wacä añecæ ponte apænegantapa.

—Bitō badä bitō biwīidi bitō imite apænegæte ante oncodo ponte yabæque ongönānīpa cæbīi.

⁴⁸ Añongante Itota wæætē,

—Botō badä ædānō ināā ante ämoo. Ayæ botō biwīidi ædānidō inānīi ante ämoo, ante pōnēmīnīi.

⁴⁹ Äninque, Itota tōmengä miñæ nē godāni gāmænō oo cæmōningue,

—İināni iñömō botō badāidi botō biwīidi inönāni inānīpa, ante mānōmānō ämo abaīmīnīpa. ⁵⁰ Mönō Mæmpo öönædē nē quēwengä nānō änō bai eñente æcānō cæte quēwēna māningä edæ botō biwī ingampa. Māningä botō biwinque ingampa. Mānīnā botō badä inampa, ante pōnencæboimpa, ante Itota apænegacäimpa.

13

Waocä nānō quiyadō ante odömōnte apænegampa

(Mäadoco 4.1-9; Odoca 8.4-8)

¹ Māniönæ edæ Itota oncodo tao godinque gāwapæ wedeca godinque tæ contagacäimpa. ² Tōmengä nānō tæ contate ongōñömō nanguī ināni tōmāo goto ponte ongönāni adinque tōmengä wæætē wipodē go guiite tæ contate wāi wocænte owoyongä tōmēnāni ayæ gāwapæ yæwedecaque ömaaque ongönānitapa.

³ Ayæ ömaaque ongönāni inānite apænedinque tōmengä, Wængonguī Awēnē nempo quēwēningue æbānō cæquīi, ante eñencæmīnimpa, ante botō imæca quēwēnāni nāni cædönō ante odömōnte apænebo eñēdāni.

Äninque Itota nanguī apænegantapa. “Waocä nē quiyacä iñömō quiyacæ gocampa. ⁴ Gote quiyayongä pancamonga taadō iñömō

wææmompā. Taadö wæænte eyepodimö öñöñonte ayamöidi pöningue dobæ ade cænänipa. ⁵ Pancamonga guiquenē dicamontaa onguipoi woyedömö iñömö eyepote wææmpa. Onguipoi woyedömö öñömö inte pæquināmaï quingæ tā bocate pædinque æmonga æipa. ⁶ Edæ guingo icate æmæwo nāñe wæmpa. Inique oguimento yæyæmē guiwadāmaï inte cōñe bawadāmaï iñonte nænque tī nāwāñö wānā cacadinque edæ guingo icate nāñe wæmpa. ⁷ Pancamonga guiquenē ömentacodē nänö eyepodimö iñömö pæquināmaï tā bocate gā æiyonte ömentacoo pö incootonque ganta cæca ate nāñe wæmpa. Wampo incapa pæquii. ⁸ Waëmonguipoga quiyadimö guiquenē tā bocate waa pædinque tömömö nangui pöni incapa. Incate pancawæncaa tiëë ganca, pancawæncaa tetenta ganca, pancawæncaa todëinta ganca mänimpomö incapa. Quiyacā nänö quiyadö ante edæ botö mäninque ante apænebopa. ⁹ Æamonca ongonte eñëedāni,” ante Itota apænegacäimpa.

Önömoncaque eñente pönänāmaï inänipa, ante

(Mäadoco 4.10-12; Odoca 8.9-10)

¹⁰ Ayæ tömengä miñæ nē godāni tömengä weca ponte apænedinque, Itota eñemi. Bitö tömēnāni inänite inguipoga quëwēnāni nāni cæinö ante odömöninque quinante mäninque ante odömönte apænebitawo.

¹¹ Äñönänite Itota, “Öönædē Awēne Odeye nempo æbänö quëwenguüi, ante mīni waocabo wëenēñedē mīni eñänāmaï ingainö ante botö ñowo mīnitö imīnite pönö edonque apænebo ate mīnitö adomīnique nē eñēmīni bamīnīpa. Wæætē tömēnāni inänite guiquenē botö mäninö ante godö apænedāmaï imopa. ¹² Edæ nē eacā ingante godönāni nänö godömenque æi bai botö nē eñengä ingante godö apænebo ate tömengä godömenque waa pöni eñente bacæcäimpa. Wæætē nē

ömæpocā inongä ingante wædænque nänö eadī incæ ö ænāni bai nē eñänāmaï ingä guiquenē adobai wædænque nänö eñänö incæ ö ænte bai ewente bai baquinö anguenē. ¹³ Incæte edæ awincaque adinque nē adāmaï ināni inte tömēnāni önömoncaque eñäninque nē eñänāmaï ināni inte pönänāmaï inänīpa. Inique botö, Wængonguü Awēne nempo æbänö quëwenguüi, ante eñänāmaï incädänimpa, ante cædinque imæca quëwēnāni nāni cæinonque ante odömönte apænebopa, angantapa. ¹⁴ Edæ Wængonguü beyæ apænedinque Itaiya wodi iīmaï ante nänö yewæmongainö bai ñowo quëwēnāni incæ iinque cädänīpa.

‘Nawangä eñencæte ante cædinque mīnitö önömoncaque eñäninque pönänāmaï imīni inte eñänāmaï incämīnīpa.

Nawangä acæte ante cædinque mīnitö awincaque adinque wæætē pönänāmaï imīni inte adāmaï incämīnīpa.

¹⁵ Mänināni, Wīi aīnëwædö, ante awinca mönæ guimönte bai cædinque,

Önömonca wīi eñëinëwædö, ante tee mömoncate bai cædinque,

Mīmönē wīi pönëinëwædö, ante mīmö ömædē ināni inänīpa.

Wīi mänömaï i bai tömēnāni awinca adinque

önömonca eñäninque mīmönē pönencädönänīpa.

Ayæ tömēnāni nāni waa baquinque edæ

dadi emæninque botö gämænö poncädönänīpa.’

Ante Itaiya wodi nänö angainö bai iinque cætimpa,” ante Itota apænegacäimpa.

¹⁶ Ante Itota tömengä miñæ nē godāni inänite apænecantapa. “Mīnitö guiquenē awinca do adinque önömonca do eñäninque mīni toquinque impa. ¹⁷ Nawangä ämopa. Wængonguü beyæ nē apænegaināni tönö nē nö cægaināni tönö ñowo mīni adö ante nangui

aïñente wædäni incæte adämaï ingadänimpa. Ayæ mini ñowo eñëñö ante nanguï eñëñente wædäni incæte eñëñämaï ingadänimpa,” ante Itota apænegacäimpa.

Quiyacä nänö cædö ante pönente ümaï impa

(Mäadoco 4.13-20; Odoca 8.11-15)

¹⁸ Itota ayæ tömëñäni inänite godömenque apæñecantapa. “Mänü quiyacä nänö quiyainö ante apæñedinque botö, Wængonguï Awënë ingante æbänö eñenguï, ante odömoncæte ante apæneyömo munitö ëamonca ongonte eñëedäni, angantapa. ¹⁹ Awënë Wængonguï Odeye nempo æbänö cæte quëwenguï, ante mönö apænedö ante önömoncaque eñëñinque waocä mimöno pönëñämaï ingä ininque tömengä mimöno nänö eñëñinö incæ wënæ nê wiwa cæcä inongä inte pö ö ængampa. Mäningä nê pönëñämaï ingä iñömö taadö wedeca eyepodimö bai ingampa. ²⁰ Woyedömö dicamontaa eyepodimö bai ingä guiquënë tömengä Wængonguï nänö apænedö eñëñinque quingæ Ao ante watapæ tocampa. ²¹ Ayæ ate adocä incæ tömëmö woyedömö bai oguimento yæyæmë guiwadämaï bai ingä inte wantæ iñö quëwengampa. Wængonguï nänö apænedö beyæ pünäni wæyongä tömengä ingante wënæ wënæ cæcæte ante togænäni ate wædinque tömengä guñente wædinque edæ ëmö cæte gocampa,” angantapa.

²² Ayæ, “Ömentacodë wæænte pædimö bai ingä guiquënë tömengä eñëñinque godömenque quëwëñongä inguipoga quëwente quiëmë beyænque mönö wæpämö pöñinque ayæ, Mäincoo beyænque toquimo, ante nani oda cæte wæwëmämö pöñinque ömentacoo ñancate cæ bai cæyonte Wængonguï nänö apæñedinö incæ incadämaï bai bapa. ²³ Onguipoga wainguipoga quiyadimö bai ingä guiquënë tömengä Wængonguï nänö apænedö eñente wede pönëñinque edæ tömëwæ incate bai Wængonguï beyæ nanguï cæcampa. Pancadäniya

edæ tiëë ganca incate bai nanguï cædänipa. Wadäni guiquënë tetenta ganca incate bai cædänipa. Ayæ wadäni todëinta ganca incate bai cædänipa,” ante Itota apæñecä eñëñänitapa.

Waimö tönö ömentacoo quiyate pæmö ante odömongampa

²⁴ Ayæ wæætë inguipoga quëwëñäni nani cæinö ante odömoninque Itota godömenque apænegacäimpa. “Öönædë Awënë Odeye iñömö gönea tömëmö waimö nê quiyacä bai ingampa. ²⁵ Tömengä quiyate gocä ate waodäni mö ñöñönäni wacä nê piinte cædongä inte wæætë tömengä nänö quiyadiñömö awëmö ponte, Ömentacoo pæcäimpa, ante adoyömö pönö ni quiyate wadæ gocä. ²⁶ Ate waimö tänä nä bocate waiwæ pædinque tömëmö incayö adoyömö tæcæguedë ömentacoo pæ. ²⁷ Adinque nê cædäni guiquënë nê ëacä weca pöñinque, ‘Awënë, bitö gönea quiyadiñömö tömëmö waimö minämaï imitawo. Ædönö ponte ömentacoo adoyömö pæ, ante wæmönipa.’ ²⁸ Ante äñönäni, ‘Wa. Mönö piinte äñongä cæbaingampa. Wabänö ii.’ Ante pönëñongä tömëñäni, ‘Ininque bitö ämi godinque abæ wiquimöni, ämitawo.’ ²⁹ Äñäni eñëñinque nê ëacä wæætë edæ, ‘Iñæmpa mänömaï cæmini ininque waiwæ tönö ömentacoo guëa abæ wite babaimpa. ³⁰ Ininque munitö ñowo edæ ömæ widämaï inte to amiña peganca ee amini guëa pæcäimpa. Amiñayedë edæ nê pedäni inänite botö, Ömentacoo täno tē gæte topo cæte iya täninque tömëmö waimö guiquënë tä pete mämö ñönöedäni, ancæboimpa,’ ante nê ëacä apæñecampa.” Mänömainö ante odömoncæte ante Itota apænegacäimpa.

Möotatamö guidimö ante odömonte apæñecampa

(Mäadoco 4.30-32; Odoca 13.18-19)

³¹ Ayæ wæætë inguipoga mönö adö ante odömoninque Itota godömenque apæñedinque, “Waocä möotatamö

tömömö ænte mǎo tömëmoncodë quiyacǎ bocate pǎe aminitawo. Mǎnimö guidimö inte ñǎenǎe pǎe bai Wǎngonguǐ Awënë Odeye nempo mini quëwencabo iñömö adobai yebænte pǎepa. ³² Edǎ möotatamö mini ænte quiyamö guidimö pöni i bai wamö mini quiyamö adomonque incǎ adobai guiyamö pöni i iñömö edǎ dǎ ampa. Incǎete möotatamö iñömö tǎ bocate pǎedinqwe möotatawǎe edǎ ocǎñequi doyǎe pǎewǎe bapa. Wǐi tömäa ocǎñequi mini quiyadiwǎe bai edǎ ocǎa inǎmaǐ inte möotatawǎe iñömö edǎ ñǎenǎe awǎe i adinqwe ayamöidi ponte awǎenëmǎe ongönǎnipa. Möotatamö guidimö incǎ mǎnömǎi pǎe bai Wǎngonguǐ Awënë nempo quëwënǎni iñömö wǎedænque ininǎni incǎ nanguǐ yebǎenguǐnǎni inǎnipa,” ante odömöninqwe Itota apǎenegacǎimpa.

Pǎo yedǎ æmpoquǐ da wenguǐ ante odömonte apǎnecǎ
(*Odoca 13.20-21*)

³³ Ayǎ wǎætë inguipoga quëwënǎni nǎni cǎinö ante odömöninqwe Itota godömenque iǐmaǐ ante apǎnecantapa. “Pǎo yedǎ æmpocǎimpa, ante onquiyǎngǎ ñǎenǎngade tee manguincaete ænte tee mǎninqwe ædǐna nǎni ämö ænte mempoga go adopoque da wëninque ayǎ yedǎ æmpoquǐ ænte pönö da wëninque wempo wempo ædǎemö cǎedengǎ ate pǎömo yedǎ æmpote tömäo nǎämǎenta bapa. Yedǎ æmpote ate pǎömo tömäo nǎämǎenta ba bai öönǎedë Awënë Odeye nempo mini quëwencabo iñömö tömämini nö ëñente bamǐnipa,” ante odömöninqwe Itota apǎenegacǎimpa.

Inguipoga nǎni cǎei bai impa, ante Itota odömongampa
(*Mǎadoco 4.33-34*)

³⁴ Nanguǐ inǎni mǎniñömö ongönǎni iñönǎnite Itota inguipoga quëwënǎni nǎni cǎinö ante odömöninqwe mǎninqwe ante tömënǎni inǎnite apǎnecantapa. ³⁵ Edǎ Wǎngonguǐ beyǎe në apǎnegaingǎ iǐmaǐnö ante doyedë apǎnegacǎimpa.

“Wǎngonguǐ æbǎnö cǎecǎa, ante botö inguipoga quëwënǎni nǎni cǎinö ante odömöninqwe botö iñǎe ænete apǎnecǎboimpa. Wǎngonguǐ nǎnö badongaiñedë ayǎe godömenque ñöwo ganca nǎnö wë wodonte ëñengainö ante botö ñöwo apǎnecǎboimpa,” ante docǎ nǎnö angainö bai ñöwo iñömö iinqwe cǎequinqwe Itota odömonte apǎnegacǎimpa.

Ömentacoo ante iǐmaǐ ante impa

³⁶ Ayǎ nanguǐ inǎni inǎnite ëmö cǎete godinqwe Itota oncönë pö guicǎ adinqwe tömengǎ mǐñǎe në godǎni guiquënë tömengǎ ingante mǎmö änǎnitapa. Gönea ömentacoo quiyad- incoo ante apǎnedinqwe bitö æbǎnö ante odömoncǎete ante apǎnebi. Edǎ edonque apǎnebi ëñëmönie.

³⁷ Äñönǎnite tömengǎ, “Tömëmö wǎimö në quiyadingǎ botö äningǎ iñömö botö Waobo ëñagǎimo inte mǎningǎ bai imopa. ³⁸ Gönea botö äniñömö bai iinguipo impa. Tömëmö wǎimö botö änimö bai inǎni guiquënë Awënë Odeye ingante nǎni ëñencabo inǎnipa. Ömentacoo botö änincoo bai inǎni guiquënë wënǎe inte në ëñënǎni iñönǎni ³⁹ në pǐinte quiyacǎ botö äningǎ bai iñömö edǎ wënǎeidi awënë ingampa. Amǐña bai guiquënë inguipoga iinqwe bayedë ingǎimpa. Ayǎ amǐña tǎ pete bai cǎedǎni guiquënë Wǎngonguǐ anquedoidi inǎnipa.”

⁴⁰ “Iinqwe edǎ nǎni amǐña bayedë ömentacoo të gǎete topo cǎete nǎni iya tǎi bai edǎ adobai iinqwe bayedë baquinö anguënë. ⁴¹ Mǎniñedë edǎ Waobo ëñagǎimo inte botö anquedoidi inǎnite ämo pöninqwe tömënǎni gönea iñömö ömentacoo të gǎete bai cǎecǎänimpa. Botö nempo quëwënǎni pancadǎniya oda cǎete ëñënǎmaǐ cǎedǎnipa. Iinqwe, Oda cǎecǎänimpa, ante në cǎedǎni tönö në ëñënǎmaǐ cǎedǎni tönö tömäni inǎnite botö anquedoidi iñömö abǎe wite bai të gǎete mǎo, ⁴² gongapamö nǎni ämogate Ca ca wǎyömö wido cǎecǎänimpa. ⁴³ Mǎniñedë edǎ në nö

entawëmini guiquënë mönō Mæmpo Awënë Odeye iñongä tömengä nempo nē quëwëmini iñömō edæ nænque tamō guinæ gongæ bai adobai guinæ edæ gongæncæminimpa. Ëamonca ongonte ëñëedäni,” ante Itota an-gacäimpa.

Waëmoncoo wë wodonte mäincoo, ante

⁴⁴ Godömenque odömöninque Itota iimainō ante apænecantapa. “Öönädë Awënë Odeye nempo mini quëwencabo iñömō waëmoncoo onguipodë ææ wote nani wë wodonte mäincoo bai impa. Waocä gote mäincoo adinque adodö ææ wote æninque wayömō wë wodongampa. Wodonte ate tömengä watapæ todinque tömengä ëadincoo tömancoo godonte eyepæ æninque tömengä waëmoncoo nänō wë wodönimæ æncæte ante ömæ nē ëadingä weca do godinque mänimæ tömämæ beyæ ante edæ eyepæ pædæ godöninque ængampa. Waocä mänömaï tömengä ëadincoo tömancoo nänō godöni bai cædinque öönädë Awënë Odeye iñömō, Botö nempo quëwencæminimpa, ante tömengä Wëñængä ingante eyepæ godöninque inguipoga tömäo quëwënanī inänite ængacäimpa,” ante Itota apænegacäimpa.

Wamö adomonque pönī waëmō imö ante

⁴⁵ Ayæ godömenque, “Öönädë Awënë Odeye nempo guicæte ante cæcä iñömō wamoncoo pededamō nani ämoncoo godonte æncæte ante nē diqui diqui mingä bai ingampa. ⁴⁶ Ìninque wamö pededamō nänō æinënimö adomonque waëmō pönī i ate tæcæ adinque waocä wadæ gote tömengä nänō ëadincoo tömancoo godonte eyepæ æninque wæætë mänimö wamö incæ godonte ængampa,” ante Itota odömönte apænegacäimpa.

Dicamöñæ ante odömönte Itota apænecampa

⁴⁷ “Ayæ wæætë edæ, Öönädë Awënë Odeye iñömō edæ dicamöñæ gäwapæ nani dadöi bai tömäa gæyæidi ænte bai cæcampa. ⁴⁸ Dicamöñæ eyede dadöninque yæwedeca wëa manta cönöninque tæ contate apænte adinque, Näwäaquiringä i, adinque ö æ otodë da wëninque, Baacä i, adinque wido cædäni bai Wængonguï Awënë adobai cæquiringänō anguënë. ⁴⁹ Edæ ìnque bayedë Wængonguï anquedoidi pöninque nē nō cædäni inänite apænte æninque nē wiwa cædäni inänite adinque nänënë gönongä ⁵⁰ ongöñönänite gongapamö edæ guitodongä guicædänimpa. Tömënanī edæ mäniñömō guiite ongöninque ämogate wædinque Ca ca wæcædänimpa,” ante Itota odömönte apænegacäimpa.

Waëmoncoo incæ müincoo tönö pedæncöo ante

⁵¹ Mäninö ante ìnque odömönte apænëdinque Itota tömënanī inänite, —Botö odömönte apænëdö tömänö ante edonque ëñëmïnitawo.

Äñongante,

—Ao ëñëntamönipa.

⁵² Ante apænëdäni ëñëninque tömengä apænecantapa.

—Ìninque æcänö, Öönädë Awënë Odeye æbänö cæcää, ante ædæmō ëñëninque nē odömönte apænëda i tömengä iñömō waëmoncoo nē da wente mangä bai adobai inongä inte Wængonguï nänö änö ante entawengä ingampa. Ayæ edæ nē ëacä nänö da wëincade wi ænëdinque müincoo tönö pedæncöo tadonte odömongä bai nē odömönte apænëcä iñömō adobai cæcampa. Edæ doyedë nänö ëñënö incæ ñöwo nänö ëñënö incæ mimönë waa pönī nänö entawënö ante edonque odömönte apænëcampa, ante Itota mäninque ante idæwaa apænëgacäimpa.

Näatadeta iñömö ponte Itota apænëcampa

(Mäadoca 6.1-6; Odoca 4.16-30)

⁵³ Wængonguï Awënë æbänö cæcää, ante odömoncæte ante imæca

quëwënäni nāni cæinō ante nānō odömōninō tōmānō ante iinque apænedinque Itota wadæ gocantapa. ⁵⁴ Tōmengä nānō pægaiñōmō ponte tōmēnāni odömōincōnē pō guiidinque māniñōmō quëwënäni inānite odōmonte apænecantapa. Eñēninque tōmēnāni ancai guiñēninque,

—Īngä iñæmpa, æbānō cæte nanguī eñengä ingää, änānitapa. Tōmengä edæ æbānō cæte tæi piñæninque bamōnengæ cæcää, ante eñencæte ante wæmōnipa. ⁵⁵ Īngä iñæmpa awæmpa nē timōwengä wengä ĩmaingä inte bamōnengæ mǎnōmaī cæcampa, ante awædō. Tōmengä wǎänä emōwo Mǎadiya ingampa, ante awædō. Tōmengä biwiidi önōnānique Tantiago tōnō Ootee, Timōnō tōnō Codaa ināmaī inānitawogaa. ⁵⁶ Tōmengä biwinqueidi mōnitō tōnō tōmānāni ongōnāni aedāni. Īninque tōmengä wæætē æbānō cæte nanguī eñengä badinque edæ nanguī cæcää.

⁵⁷ Ante pōnente wædinque tōmēnāni tōmengä beyæ ante piinte badānitapa. Piinte badāni adinque Itota tōmēnāni inānite angantapa.

—Īñæmpa Wængonguī beyæ nē apænecä iñōmō tōmengä tōmāmæ gote apæneyongante tōmengä ingante waa adānipa. Wæætē tōmengä nānō pægaiñōmō pōninque oncōnē pō guiite apæneyongä edæ māniñōmonque tōmengä ingante wiwa adānipa tōō, ante apænegacäimpa.

⁵⁸ Incæte, Pōnēnāmaī iñōnānite botō ædō cæte nanguī mā cæquīmoo, ante pōnente wædinque tōmengä tōmēnāni weca edæ wædænque pōni cægacäimpa.

14

Wäo æpænē nē guidōngä wængampa

(Mǎadoco 6.14-29; Odoca 9.7-9)

¹ Tōmānāni māniñedē, Itota æbānō cæcää, ante māō änāni eñēninque pancabaa awēnē Edode do eñengacäimpa.

² Tōmengä iñōmō tōmengä ingante nē cædāni inānite apænecantapa.

“Wäo wodi æpænē nē guidōngä incæ ĩngä Itota iñōmō adocä inte a ongongä awædō. Tōmengä do wænte ñāni ömæmōninque pongampa tōō. Māninō beyænque tōmengä tæi piñænte entawēnongä inte nē nanguī cæcä ingampa,” ante awædō, angantapa.

³ Wäo wodi iñōmō ĩmaī wængacäimpa. Do iñedē awēnē Edode iñōmō tōmengä biwi Pedipe manguiwēningä Ædodiya ingante ö ænte mōningä ĩngäimpa. Māningä Ædodiya Wäo ingante piingä beyænque Edode iñōmō Wäo ingante bæi ongonte goti winte tee mōnedongäimpa. ⁴ Edæ Wäo iñōmō nānō caate wænguinque Edode ingante ĩmaīnō ante do wææ āningä ĩngäimpa. “Edode eñēmi, bitō Wængonguī nānō angainō bai eñēnāmaī inte edæ māningä onquiyængä ingante manguiwēmipa tōō,” ante cōwē wææ āningä ĩngäimpa.

⁵ Angä eñente piininque Edode, Wäo ingante botō æbānō cæte wænonguīmo, ante cædongäimpa. Incæte tōmānāni, Wængonguī beyæ nē apænedongä Wäo ingampa, ante tededāni eñēningä inte Edode, Botō imote piināni wæcæ wæ, ante guiñente wædinque Wäo ingante wænōnāmaī inte ata cæpodongäimpa.

⁶ Incæte Edode nānō eñagāiönæ iinque bayō wadāni ponte godongāmæ bete ayōnāni edæ Ædodiya wengä baquēcä tode pete āwacä adinque Edode wæætē nanguī todongäimpa.

⁷ Īninque tōmengä, Wængonguī ayongä nāwangä āmopa, ante baquēcä ingante āngäimpa. Waa pōni bitō tode pete āwadi beyæ bitō quiēmē ante æinente āmi adinque botō bitō änō ante cōwē pōnōmo æncæbiimpa, āngäimpa.

⁸ Angä eñēninque baquēcä wæætē wǎänä weca gote, Æbānō anguīmoo, ante āñongä wǎänä guiquēnē, ĩmaī æe, angä eñēninque baquēcä wæætē Edode ingante,

—Īmaī pōnō cæbi æmoe. Wäo æpænē guidōngä ingante wangō

tamencate tömengä ocabo iní coyomënætaca cö cæte ænte mämö pædæ pönömi æmoe.

⁹ Angä eñente wædinque awënë odeye inömö, Æ eñente awædö. Quinö ñowo cæquimoo, ante nanguï wædongäimpa. Incæte godongämæ becönäni eñeñönänite, Wængonguï ayongä cöwë godoncæboimpa, ante nē äningä inte nē wænongä ingante tömengä, Baquecä nänö äninö bai cædäni, änogäimpa. ¹⁰ Angä eñeñinque nē wænongä tee möneincönē go guidinque edæ Wäo ingante mäo bæi ongöningue wangö tomencadongäimpa. ¹¹ Ayæ Wäo ocabo iní coyomënætaca cö cædinque baquecä weca ænte mämö pædæ pönönäni æninque baquecä wæætē wäänä inante godongä ænönäimpa.

¹² Ayæ Wäo wodi tömengä miñæ nē godinäni pöningue tömengä baö iní ænte mäo daga wëningue wæætē Itota weca pöningue, Wäo wodi mänömai wængä wæmönipa, ante tömengä ingante apænegadänimpa.

5.000 ganca inäni inänite Itota godongä cænänipa

(Mäadoco 6.30-44; Odoca 9.10-17; Wäo 6.1-14)

¹³ Wäo wodi do wængäimpa, ante apænedäni eñente wædinque Itota wæætē edæ, Önömæca gocæboimpa, ante wipodē guï contate wogaa gocantapa. Gocä ate, Mäniñömö gocæ cæcampa, ante tededäni eñeñinque tæiyænäni tömënäni nani quëwëñömö wacönē ta wacönē ta ömaaque oo pænta täno gote mæ ongönänitapa. ¹⁴ Itota inömö wipodē wogaa pö ti wæænte ayongä nanguï inäni dobæ ponte mæ ongönäni adinque, Æbänö cæte quëwenguïnänii, ante tömënäni tönö godongämæ wæte bai pönengantapa. Ayæ daicawo gawænäni inänite godö cæcä ate waa badänitapa. ¹⁵ Gäwadecæ bayö tömengä miñæ nē godäni tömengä weca pöningue,

—Ñowo wëmö bacæ cæpa cæbii, änänitapa. Ayæ, Önömæca incæ

cænguï dæ ä adinque bitö godongämæ ongönäni inänite ämi woadäni quëwëñömö gote cænguï godonte ænte cæncædänimpa.

¹⁶ Äñönänite Itota,

—Goquinäni, ante quinante äminii. Minitö wæætē godömini cæncædänimpa, ämopa.

¹⁷ Äñongante,

—Inäempa päö önompo æmæmpoque gæyæ mäa pönii. Cænguï nææmönipa diyæ godömöni cænguïnänii.

¹⁸ Ante wææ äñönäni Itota inömö,

—Mänimpodänique nææmüni incæ ænte mämö pædæ pönömini æmoedäni, angantapa.

¹⁹ Ayæ godongämæ mæ ongönäni inänite angä gaguimäa tæ contadäni ate tömengä päö önompo æmæmpoque gæyæ mäa æninque öönädē inö æmö adinque, Wængonguï, bitö waa pönömi ænte cæmönipa. Ante apænedinque päö pä æ pä æ cædinque tömengä miñæ nē godäni inänite pædæ pönongä æninque tömënäni wæætē godömenque tömänäni inänite di mæñæ di mæñæ cædäni ænte cænänitapa. ²⁰ Mänömai pönö cæcä æninque tömänäni tömo pönii cænänitapa. Cænte ate edæ tömënäni ao mæ ao mæ nani ñönöni ee öñoncoo pædæ wææmpo ö æ da da wente æninque tömengä miñæ nē godäni inömö otodē önompo tipæmpoga go mentodëa cænguï eyede da wënäni contagatimpa. ²¹ Nē cænäni inömö edæ onguïñænänique incæ tinco müido ganca mänimpodäni inönäni onquiyænäni tönö nani wencabo tönö godömenque nanguï inäni inte cængadänimpa.

Itota æpæ yædopçeno dao dao gocampa

(Mäadoco 6.45-52; Wäo 6.16-21)

²² Tömänäni inque cænäni ate Itota tömengä miñæ nē godänique inänite do angantapa. Minitö täno wipodē guï contate æmæ wedeca tao goyömini botö wæætē godongämæ ongönäni inänite ämo godäni ate ayæ poncæboimpa. ²³ Angä Ao ante tao goyönäni tömengä wæætē wadäni

inánite, Nōwo goedāni, angā wadæ godānitapa. Ayæ tōmengā Wængonguī ingante apænecæte ante ānanquidi æicantapa. Æite apænedinque wēmō bayō tōmengā adocanque a on-gongacāimpa. ²⁴ Tōmengā miñæ nē godāni guiquēnē taocæte ante cædinque edæ tæcætibæ wiyate cæwōyōnāni edæ woboyæ pæmænte nanguī pōñō edæ æpæ incæ incæ cæte mængonta mængonta cæyonte wipo wāi wocæntapa. ²⁵ Ayæ tawadiya nānō peyedē bayonte edæ Itota iñōmō æpæ yædopænoque edæ dao dao pongā adānitapa. ²⁶ Yædopæno edæ dao dao pongā gomō adinque tōmengā miñæ nē godāni edæ ancai guiñēninque,

—Quiēmē imāi. Waocā wænte babæningā wabānō cægongā, ante Yæ ante guiñente wædānitapa.

²⁷ Ante wæyōnāni edæ Itota iñōmō, —Ee piyænē cæte guiñēnāmaī iedāni. Botō imo apa guiñēwēmīnii.

²⁸ Ante añongā, Pegodo guiquēnē, —Awēnē, bitō imitawo. Nō nō imi inte bitō æpæ yædopæ bitō weca āmi pōmoe.

²⁹ Angā eñēninque, —Pōe.

Åñongā Pegodo wipodē ongōninque edæ ti wææninque yædopæno edæ dao dao gote Itota weca tæcæ obo ponte ayongā, ³⁰ woboyæ nanguī nanguī pæmæ ate wædinque ancai guiñēninque æpænē tæi guiidinque Yæ wæcantapa.

—Awēnē, æpæ bete wæncæbointaye.

³¹ Ante wæcā adinque Itota tōmengā ingante edæ quingæ pædæ gopo tōō æmæninque,

—Iñæmpa botonque iñōmote pōnēninque pōe, antabopa. Quinante wapiticæ edæ pōnēmitapa, angantapa.

³² Ayæ wipodē guiida ate woboyæ iñontobæ næ pæmænāmaī gongæ.

³³ Adinque wipodē ongōnāni wæætē Itota weca ædæ wæænte apænedinque,

—Nāwangā bitō Wængonguī Wēñæmi iñōmi imipa, ante watapæ apænedānitapa

Caate wædāni inánite Itota cæcā waa badānipa

(Māadoco 6.53-56)

³⁴ Ayæ æmæmāa taodique tōmēnāni Guēnetadete bæ ti wæænānitapa.

³⁵ Ti wæænāni adinque māniōmæ quēwēnāni guiquēnē, Tōmengā Itota ingampa, ante do adinque tōmāmæ māo gode ā gode ā cædāni eñēninque wēnæ wēnæ ināni inánite tōmānāni inánite tōmengā weca ænte māmōnāni pōnānitapa. ³⁶ Itota ingante, Bitō weocoo āmi yæwedecooque gampote waa bacædānimpa. Ānāni wædinque tōmengā Ao angā eñēninque nē gampo gampo cædāni iñōmō tōmānāni edæ waa ināni bagadānimpa.

15

Mimōno tao godi beyæcneque waocā wentamō ewocacampa

(Māadoco 7.1-23)

¹ Dodāni nāni wææ angainta ate nē odōmōnāni tōnō Paditeoidi pancadāniya Eedotadēē quēwēninque māniñedē Itota weca pōninque iīmaī ānānitapa.

² —Bitō miñæ nē godāni iñōmō dodāni nāni angainō ante quīnante eñēnāmaī inte wapiticæ cædāni wæmōnipa. Tōmēnāni iñæmpa mem-podāmaī inte wentamō nampote cænguī cænāni awædō.

³ Ante pīnāni wædinque Itota wæætē,

—Mīnitō guiquēnē dodāni nāni angainonque ante eñente cæcæte ante cædinque Wængonguī nānō wææ angainō ante edæ quīnante eñente cædāmaī imīnii. ⁴ Wængonguī, “Bitō wæmpo ingante bitō badā inante waadedinque waa cæe,” angacāimpa. Ayæ, “Wæmpocā ingante wāānā inante nē pīinte wīwa angā ingante wænōmīni wæncæcāimpa,” ante wææ angacāimpa. ⁵ Mīnitō guiquēnē iīmaī ānewēninque edæ wææ cæmīnipa. Waocā mæmpocā ingante waa cæquēnengā iñongante wāānā inante adobāi waa cæquēnengā iñongante

mīnitō wæætē wææ āninque, Waocā wæmpocā ingante wāānā

inante iimainö ante apænecæcäimpa, änewëminipa. Wæætë edæ “Mæmpo, bitö qui, ante, Badä, minö qui, ante botö pönömo mina ænguënönö incæ ñowo wæætë edæ, Wængongui qui, ante do edæ godonte impa.”⁶ Ante apænedinque waocä wæmpoda inate wii godonguëngä ingampa, ante minitö iñömö edæ wææ änewëmini awædö. Iñæmpa mänömainö ante wææ änewëninque minitö edæ dodäni nani angainonque ante cæcæte ante cædinque Wængongui nänö wææ angainö ante edæ, Önöneque impa, ante bai cæminipa töö.⁷ Minitö waa cæmini inte bai nê änewëmini iñöminite edæ ämo ëñëedäni. Mini cædö ante Wængongui iimäi ante apænecampa, ante Itaiya wodi nöngä ante yewæmongacäimpa.

⁸ “Iñäni iñömö botö imote önöneque waa apænete bai tededäni incæte,

tömënanï mimöno æmæ pönente edæ gobæ ongonte bai inäni awædö.

⁹ Ayæ botö weca ædæ wæænte waa ate bai tededinque tömënanï, Wængongui imidö anguënë, ante önöneque tedewëninque önonque edæ cædänipa.

Waadänique nani wææ änönö ante odömonte apænedänipa töö.”

Ante Wængongui piingampa, ante yewæmongacäimpa.

¹⁰ Mänömainö ante apænete ate Itota wæætë nangui ongönäni inänite aa pecä pönäni adinque apænegacäimpa.

—Botö apænebo ëñëninque ocaidë pönente ædæmö ëñëedäni, angan-tapa.¹¹ Önönë guidi beyænque waocä mimö wentamö entawënamäi ingampa. Wæætë mimönë wiwa pönëninque nänö önöne tao gode beyænque tömengä wentamö mongængampa, ante apænebo ëñëedäni.

¹² Ante apænegä ate tömengä miñæ nê godäni iñömö tömengä weca ponte änänitapa.

—Bitö mänömainö ante apænebi ëñëninque Paditeoidi iñömö guingo imonte piinäni apa änewëe.

¹³ Añönäni tömengä,

—Awæ botö Mæmpo minämaï iwæ to wite bai wido cæte bacæimpa. Paditeoidi iñömö wii botö Mæmpo quinäni inönäni inte adobai edæ wido cæte wæcædänimpa.

¹⁴ Edæ babetamönäni bai ëñënamäi inäni inte tömënanï iñömö wadäni adobai babetamönäni bai inäni inänite nê ænte mäodäni inäni apa cæminii. Tömënanï inänite gomö aedäni. Edæ babetamongä ingante wacä adobai babetamongä inongä ingante ænte mäocä gocä ininque tömëna nana babetamoncaya guëa ontatodë mongæncadæ guilibainapa.

¹⁵ Ante apænegä ëñëninque Pegodo,

—Mänömainö ante odömonte apænedinque bitö æbänö ante odömoncæte ante apænebitapa, ante apænebi ëñëmönie.

¹⁶ Añongante Itota,

—Minitö incæ ocai ömæcadäni bai inöminï inte ëñënamäi iminitawo.

¹⁷ Edæ quincoomë önöne guidi-incoo incæ cæncadë guite ate goiwaa ogä mente wido cæte ba apa änewëminii.¹⁸ Wæætë önöne waocä nänö tedewënö guiquënë mimönë nänö wiwa pönënö beyænque tao godepa. Ininque waocä önöwoca mäninö beyænque wentamö ewocacampa.

¹⁹ Edæ waocä mimönë nänö entawente taodinö beyæ wiwa ante pönengampa. Mimönë nänö piinte pönënö beyænque waocä godö wænongampa. Mimönë towëinente tömengä nänöogængä inämaï iñongante godö mongampa. Ayæ æcämenque iñongante mimönë towëinente beyænque waocä godö mongampa. Mimöno æinente wædinque wacä qui awëmö ængampa. Mimönë wiwa pönëninque wacä ingante godö babæ wapiticæ apænecampa. Ayæ wacä ingante piinte tedecampa.

²⁰ Ininque mimöno tao godi beyænque waocä wentamö ewocacampa. Wæætë mempodämaï

inte nänö cænö beyæ waocä wentamö ewocadämaï ingampa, ante edæ Itota apænegacäimpa.

Onquiyængä oodeocä inämaï inte wede pönente angampa
(Mäadoco 7.24-30)

²¹ Mäniñömö quëwente wadæ godinque Itota Tido nani quëwëñömö Tidöo nani quëwëñömö eyequeï pongacäimpa. ²² Mäniñömö ponte quëwëñongä onquiyængä Cänaämæ nē ēñate pædingä inte adoyömö quëwente tadinque tömengä weca pöninque aa pecantapa.

—Awënë bitö Awënë Dabii wodi pæïmi inömi inte ēñemi. Botö beyæ pönö waadete waa cæe. Botö wëñængä onquiyængä wënæ inte quëwente wæwengampa cæbii.

²³ Ante mänömaï aa pecä wædinque Itota pæ wëenecantapa. Pæ wëenecä adinque tömengä miñæ nē godäni guiquënë tömengä weca pöninque wææ apænedänitapa.

—Mönö miñæ tee empote Yæ yæ nē änewëngä ingante ämi gocæe.

²⁴ Ante wææ änäni ēñëninque Itota wæætë,

—Cæninäni obegaidi gueogæ gote wæwënäni bai möni idægocabo adobaï inte wë wömönte wædäni adinque Mæmpo Wængonguï, Tömënanique inänite cæquïmi goquïmi, äninque botö imote da pönongä wïï pontawoo.

²⁵ Angä ēñëninque onquiyængä iñömö wæætë Itota önöwa gäänë ædæ wææninque apænecantapa.

—Awënë, botö beyæ cæbi waa bacæe, angantapa.

²⁶ Äñongante Itota wæætë,

—Wënäni cænguï inguënë waocä dicæ guintamöidi cænguï ante wææntodonguingää. Bitö edæ wabi iñömöte botö bitö beyæ ædö cæte cæquïmoo.

²⁷ Angä ēñente wædinque,

—Awënë iñæmpa nē ëadäni nani cænte eyepodimö wæænte ænömengadæmpa inö öñöñö guintamöidi ade cæmpa.

²⁸ Äñongante Itota,

—Onquiyæmi ēñemi. Bitö nanguï pönëni iñömöte bitö änö ante do cæte impa.

Ante tæcæ apæneyongä tömengä wengä edæ do adoyedë edæ waa bagacäimpa.

Caate wædäni inänite Itota cæcä waa badäni

²⁹ Mäniñömö quëwëninque wadæ godinque Itota Gadideapæ ömaaque pö änanquidi æi tæ contacantapa.

³⁰ Tæ contate ongöñongä nanguï inäni godongämæ pöninque wënæ wënæ inte wædäni inänite ænte pönänitapa. Pæ opa pæ opa godäni tönö tente tobænte wædäni inänite babetamö inäni tönö babetade inäni inänite Itota weca ænte mämö ñö cædänitapa. Ñö cædäni ongöñönänite Itota tömänäni inänite godö cæcä ate waa badänitapa.

³¹ Godongämæ ongönäni guiquënë, Itota godö cæcä ate babetade inänäni incæ tededäni ēñëmönipa, ante guïñente wædänitapa.

Tente tobænte wædinäni incæ waa badäni amönipa. Pæ opa pæ opa godäni inänäni incæ waa bate godäni amönipa. Babetamö inänäni incæ waa adäni wæmönipa, ante guïñente wædinque edæ Wængonguï ingante apænedinque,

Möni idægocabo Wængonguï inömi inte edæ bitö adobique ñäo bai ëmömi inte edæ tæï piñænte cæbi amönipa, ante watapæ apænegadänimpa.

4.000 ganca inäni inänite Itota godongä cænänipa
(Mäadoco 8.1-10)

³² Mäniñedë Itota tömengä miñæ nē godäni inänite aa pecä pönäni ate apænecantapa.

—Iñäni botö weca ongönäni iñömö meönaa go adoönæque iñonte botö weca ongöñönäni tömënanäni cænguï ömæpodäni badäni ate wædinque botö tömënanäni tönö godongämæ wæte bai pönëmopa. Cænämaï inte gue ænente wæyönänite botö, Oncönë goedäni, ämo gote bai tömënanäni edæ idömæ godinque nangæ badinque edæ bocæ bocæ cæte wæcædönänimpa.

³³ Angä wædinqwe tōmengä miñæ nē godāni wæætē,

–Ēnodāni ināniyaa. Ōnōmæca incæ pāo impa æninqwe godōmōni cænguñānii.

³⁴ Ante wæyōnānite Itota,

–Mīnitō pāo æpodō nææmīni.

Äñongante,

–Pāo ōnōmpo æmæmpo que go mēa gæyæ guiyā pōni mēa pōni mæ on-gōmpa, ante edæ apænedānitapa.

³⁵ Itota iñōmō godongāmæ ongōnāni nanguī ināni iñōnānite angä tæ contadānitapa. ³⁶ Ininqwe pāo ōnōmpo æmæmpo que go mēa tōnō gæyæ tōnō nāni næænincōo pædæ godōnāni æninqwe tōmengä Wængonguī ingante, Bitō waa pōnōmi cæncæmōnimpa, ante apænedinqwe pā æninqwe tōmengä miñæ nē godāni inānite pædæ pōnongä æninqwe tōmēnāni wæætē wadāni inānite pædæ pædæ godōnāni ænānitapa.

³⁷ Æninqwe tōmānāni godongāmæ cæninqwe tōmo pōni cænānitapa. Idæwaa cænāni ate tōmēnāni pā ænte nāni cænte ñōnōni ee ōñoncoo wente æninqwe Itota miñæ nē godāni otodē pōnō da wēnānitapa. Ininqwe ōnōmpo æmæmpo que go mentodēa cænguī eyede contagatimpa. ³⁸ Nē cænīnāni iñōmō onguīñænānique coatodo mīido ganca iñōnāni onquiyænāni tōnō nāni wencabo tōnō tōmēnāni æpodānimē godōmenque nanguī pōni iñōnānimpa. ³⁹ Ininqwe cænāni ate Itota iñōmō, Goedāni, angä godāni ate tōmengä wipodē guī contate imæmāa Māagadabæ pongacāimpa.

16

*Mā cæte odōmōmi amōnie, änānipa
(Māadoco 8.11-13; Odoco 12.54-56)*

¹ Itota pongä adinqwe Padi-teoidi tōnō Tadoteoidi iñōmō, Mōnō amō ēñēninqwe tōmengä oda cæbaingampa, ante cædinqwe Itota ingante apænedinqwe, Bitō, Pōnencædānimpa, ante ōönædē mā cæi bai cæbi amōnie. ² Änāni ēñēninqwe tōmengä wæætē,

–Mīnitō iñæmpa gæwadecæ iñonte æmō adinqwe, “Baänæ watamō bacæ wiñadæ pōni gongæmpa,” ante do ēñēmīnīpa. ³ Ayæ ñāo bayō edæ, “Cōönæ cæcæ guinæ wepæ bai gongæmpa,” äninqwe mīnitō, Ōönæ æbānō eönæpa, ante adinqwe do edæ ēñēmīnīpa. Ininqwe, Wængonguī quīnō cæcæ cæcampa, ante quīnante wīi ēñēmīni. ⁴ Ñōwomīni iñōmō edæ nē wīwa cæmīni inte mīnitō Wængonguī ingante pangocæte bai emō cæte gomīni imīnīpa. Edæ, Mā cæte odōmōmi adinqwe pōnēmaimōnīpa, ante ancaa amīni awædō. Incæte Cōnāo wodi mā pōni nānō cægainō ante adinqwe mīnitō pōnenguēnēmīni iñōmīnite māninqwe mīni aquinqwe ante odōmonte ingæimpa.

Äninqwe Itota tōmēnāni inānite emō cæte wadæ edæ gogacāimpa.

*Wapiticæ nāni apænedō yedæ
æmpoquī bai impa, ante
(Māadoco 8.14-21)*

⁵ Tōmengä miñæ nē godāni guiquēnē tao gocæ cædinqwe pāo wīi pōnente ænāmaī inte æmæmāa tao ti wæænānitapa. ⁶ Itota iñōmō māniī pāo tōmēnāni nāni ænāmaī inō ante wīi tededinqwe wadō ante pōnente iīmaī apænecantapa.

–Pāo yedæ æmpoquī, ante Padi-teoidi tōnō Tadoteoidi nāni da wente cæi ate gomō aedāni.

⁷ Angä ēñente wædinqwe tōmengä nānō nē emīñænāni wæætē nāni caboque tededinqwe,

–Pāo ænte pōnāmaī imōimpa, ante Itota wabānō mēnōmaī beyæ ämaingampa.

⁸ Ante nāmāneque tededāni wædinqwe Itota iñōmō,

–Mīni pōnēegade. Pāo ænāmaī inte mīni pōnīnō ante quīmæ tedewēmīnī. ⁹ Awincaque adinqwe adāmaī imīnitawo. Edæ pāo ōnōmpo æmæmpo que æninqwe botō godōmo æninqwe tīnco mīido ganca ināni nāni cænīnō ante awincaque adīmīni inte mīnitō mīmōno pōnēnāmaī imīni awædō. Ayæ cænte ate nāni

wææntodönincoo wente ænte mini contadinö iñömö cænguï æpotodönö ongotawo, ante pönëminiyaa. ¹⁰ Ayæ ate botö önompo æmæmpoque go mäa päo ænte godömo æningue coatodo müido ganca inäni nāni cæninö ante adingue mīnitö iñömö edæ eñenāmaï imīnitawo. Ayæ edæ ñænæ otodē mīni wente ænte contadinö cænguï æpotodönö ongotawo, ante pönëminiyaa. ¹¹ Māninö ñowo botö, Gomö aedāni, ante wææ āninqe botö wīi päonque ante apænetabopa, ante quīnante wīi eñëminii. Incæte botö, Päo yedæ æmpoqui, ante Paditeoidi tönö Tadoteoidi nāni da wente cæi ate gomö aedāni, ante wææ āmopa.

¹² Angä eñente pönente wædinque tömënāni, Gomö aedāni, ante apænedinque Itota wīi önonque päo da wente cæinque ante wææ angampa. Wæætē edæ Tadoteoidi tönö Paditeoidi wapiticæ ante nāni odömönte apænedö ante tömengä, Gomö aedāni, ante wææ angampa, ante do eñenānitapa.

Bitö Coditobi inömi imipa, ante Pegodo angampa

(Mäadoco 8.27-30; Odoca 9.18-21)

¹³ Mānīi imæmäa tate ate Tetadea Pidipobæ eyequei pöninque tömengä miñæ nē godāni inānite apænedinque Itota,

—Botö Waobo eñagaïmo iñömöte wadāni botö imotedö ante tededinque, Æbodö imoo, ante apænedāni eñëminii.

¹⁴ Añongante tömënāni wæætē apænedānitapa.

—Bitö imitedö ante apænedinque pancadāniya, Æpænē nē guidongaingä Wäo wodi incæ Itota adocā imaingampa, ante tededānipa. Wadāni guiquënë, Ediya wodi incæ Itota inongä imaingampa, ante apænedānipa. Wadāni guiquënë, Eedēmiya wodi ingampa, ante apænedānipa. Ayæ, Wīi Eedēmiya ingä ininque Itota Wængonguï beyæ nē apænegaināni iñönānite adocā imaingä ingampa, ante tededānipa.

¹⁵ Ante tömengä miñæ nē godāni apænedāni eñëninque Itota wæætē,
—Mīnitö diyæ, Æbodö imoo, ante pönëminii.

¹⁶ Añongante Timönö Pegodo wæætē,

—Wængonguï nē quëwengä Wëmi ingaïmi inte bitö iñömö Coditobi inömi imipa.

¹⁷ Ante apænecä eñëninque Itota iñömö,

—Timönö bitö Öönata wëmi inömi inte eñëmi. Wīi waocā apænecä beyæ bitö mänömainö ante eñëmitapa. Wæætē bitö nanguï toquinque edæ botö Mæmpo öönädē nē quëwengä incæ bitö imite pönö odömönte apænecä eñëmitapa. ¹⁸ Ayæ edæ iïmaï ante bitö imite āmopa. Bitö dicamö bai inömi imipa, ante pönëninque botö bitö emöwo ante Pegodo pönö pemömo emömipa. Incæte dicabo tæimö i bai bitö nō āninö iñömö edæ tæine i iñönte botö mänimoga tæi mænönte bai pönö badömo ate mīnitö mīni pönencabo bacæminipa. Ininque mīnitö, Itota nē Codito ingampa, ante mīni pönencabo iñömö tæi emöminii badinque mänimoga tæi ongonde bai wede pönëñöminite nē tæi piñænāni tadömengadænguipo owote ta pönāni incæ ædö cæte godömenque māmö bæ taquīnānii. ¹⁹ Edæ öönädē Awënë Odeye nempo guiquinque ante odemö wi ænequï bai botö bitö imite pönömo æncæbiimpa. Æmi ate bitö nē āmi badimi inte inguipoga bitö wææ ānö incæ öönädē dobæ wææ angainö inte ongongæimpa. Ayæ bitö quiëmē inguipoga ñimpo cæbi i iñönte mānīi adobai öönädē dobæ ñimpo cæte ongongæimpa.

²⁰ Ante iinque apænedinque Itota tömengä miñæ nē godāni inānite iïmaï ante wææ angantapa. Mīnitö iñömö botö imotedö ante apænedinque, Codito inongä ingampa, ante gode ānāmaï inte edæ pæ wëneedāni, angacāimpa.

Itota, Iïmaï cædāni wæncæboimpa, ante apænecampa

(Mäadoco 8.31-9.1; Odoca 9.22-27)

21 Ayæ Itota māniñedē mā odömöninque tōmengä miñæ nē godāni inānite apænedinque, Botō cōwē Eedotadēē goquēnēmo imopa, angantapa. Gobo ate oodeoidi nē aadāni nāni Picæncabo tōnō, Wængonguī qui, ante nē godōnāni ñænænāni tōnō nē odömönāni tōnō godongāmæ cædinque botō imote wēnæ wēnæ cædāni wæwencæboimpa. Ayæ botō imote godōmenque wænōnāni wæncæboimpa. Incæte Wængonguī angä beyænque botō mēōnaa go adoönæque iñonte edæ ñāni òmæmonte quēwencæboimpa, ante apænegacäimpa. 22 Mänōmainō ante apænegacä eññōnāni Pegodo guiquēnē Itota ingante nānēnē māo godinque Itota ingante piingantapa.

—Awēnē, quīmæ wæncæ ānewēē. Wængonguī pōnō wææ aacä beyæ bitō caate wædāmaī incæbiimpa.

23 Ante wææ añongante Itota dadi emæninque Pegodo ingante nāemæ piinque,

—Bitō Tatānabi bai inōmi inte edæ botō weca ongōnāmaī wadæ gobāwe, angantapa. Bitō wīi Wængonguī nānō pōnēnō ante pōnēmi inte wæætē edæ waodānique nāni pōnēwēnō bai pōnēninque mänōmainō ante bitō botō imote ægodawaquī ñōnonte bai cædinque wææ ānewēmi awædō, angacäimpa.

24 Ayæ tōmengä miñæ nē godāni inānite apænegacantapa.

—Æcānō botō miñæ pōinēna ina tōmengä iñōmō nāmā beyæ ante pōnēnāmaī inte edæ botō miñæ tee empote poncæcäimpa. Nāmā nānō wænguīwæ mongænte ponte bai cædinque tōmengä, Botō wæmo incæ caate wæbo incæ Itota ingante cōwē tee empote gocæboimpa, ante poncæcäimpa. 25 Edæ æcānō, Nāmā wææ gom-podinque quēwencæboimpa, ante cædinque botō miñæ pōnāmaī ingä guiquēnē tōmengä iñōmō edæ quēwēnāmaī incæcäimpa. Wæætē edæ, Wænōnāni wæmo incæte botō Itota miñæ tee empote

cōwē gocæboimpa, ante æcānō āna guiquēnē tōmengä wæætē quēwencæcäimpa. 26 Edæ waocä inguipoga ongoncoo tōmancoo ò æncæte ante cædinque nāmā ònōwoca incæ pædæ godongä wē womonte ba iñinque edæ tōmengä nānō òmæwocate wæquinque æmaingampa. Iñæmpa eyepæ godongampa diyæ ònōwoca wæætē æmaingä.

27 Ante Itota iñōmō, “Edæ botō Waobo eñagaīmo inte botō Wæmpo ñāo tōmāo guinæ gongæñonte botō edæ botō anquedoidi tōnō edæ godongāmæ poncæboimpa. Ayæ pōmo ate botō tōmāmini mīnitō cægāi ganca ante eyepæ pædæ pōnōmo æncæminimpa. 28 Edæ nāwangä āmopa. Mīnitō iñōmō ongōmini pancamīniya iñōmō ayæ wænāmaī mīimīni quēwēñōmīni botō Waobo eñagaīmo inte Awēnē Odeye bate ponte a ongōmo adinque mīnitō botō nempo quēwencæminimpa,” ante Itota apænegacäimpa.

17

Itota waēmō pōni ñāo bai emongä bacä adānipa

(Mäadoco 9.2-13; Odoco 9.28-36)

1 Mäninō ante apænegacä ate Itota ònompō æmæmpoque go adoönæque iñonte Pegodo ingante ayæ Tantiago tōnō Wäo nāna caya inate mānimpodāni inānite ānanquidi mæicä adodānique æigadānimpa. 2 Æite ongōñōnāni edæ Itota awinca tōmēnāni ayōnāni edæ wīi cōwē nānō emōnō bai waēmō pōni ñāo bai edæ emongä bamongä adānitapa.

Edæ nænque tī nāwante ñāo bai bate emongä iñinque tōmengä weocoo nāāmænta ñāo incoo eñacä adānitapa.

3 Ayæ ayōnāni edæ doyedē pōni nē æigāina iñōmō Mōitee wodi tōnō Ediya wodi incæ iñontobæ a ongōninque Itota tōnō godongāmæ tedegōnāni.

4 Adinque edæ Pegodo guiquēnē Itota ingante apænegacantapa.

—Awēnē eñēmi. Iñōmō mōnō waa pōni ongonte awædō. Bitō Ao āmi iñinque botō oncontaioco mentaiya

go adotaique mænöninge bitö oncontai ante adotaique Möitee oncontai ante adotaique Ediya oncontai ante adotaique mænömaimopa.

⁵ Ante ayæ tedeyongä boguimämo waemö pöni ocabogadäni obo wææninge guinæ gongæ ayönäni boguimämodë önöpämoque apænecantapa

—İngä iñömö botö Wengä inongä inte botö nê waadegaingä inongä ingampa. Tömengä ingante adinque botö watapæ tobopa. Minitö tömengä pönö apæneca eñeedäni.

⁶ Angä wædinque tömengä miñæ nê æidäni iñömö ancai guinëninge do do wäate bai cædinque guidömëmæ tæ go wæænänitapa. ⁷ Go wæænäni adinque Itota tömënäni weca ponte godö gampodique,

—Guinënämaï inte ængæ gantiedäni, angantapa.

⁸ Ayæ æmö ayönäni Itotaque adocanque ongonä agadänimpa.

⁹ Ayæ änanquidi inö wææ pönönäni Itota tömënäni inänite angantapa.

—Minitö mä pöni botö emönö wiimonte bai mini adinö ante gode änämaï pæ wëneyömini botö iñömö Waobo nê eñagaïmo inte edæ wænte ate ñäni ömæmoncæboimpa. Ñäni ömæmömo ate minitö edæ mäniñedë ate apænecaeminimpa.

¹⁰ Angä eñente wædinque tömengä tönö nê æidinäni tömengä ingante änänitapa.

—Mänömaï i ininque, Ediya wodi täno poncæcäimpa, ante nê odömönäni iñæmpa quinante apænedänii.

¹¹ Äñönäni Itota wæætë,

—Ediya wodi näni änogä iñömö täno pongä ingampa. Näwangä impa. Pöninge tömengä, Doyedë ingäi bai ñowo wæætë adobai bacæimpa, ante badongampa. ¹² Botö wæætë iimainö ante apænebo eñeedäni. Ñowocä mönö Ediya inongä inte do pongäimpa ante aquënë. Do pöningä ingante edæ awincaque adinque, Æcänö ingää, ante eñenämaï inte cädäni guiquënë quiëmë näni cæinënö incæ edæ do

cädänipa. Ayæ adobai, Tömengä ingante näni cædi bai botö Waobo eñagaïmo iñömote botö imote adobai wænæ wænæ cädäni wæcæboimpa, ante apænebo eñeedäni.

¹³ Ante apæneca eñëninge tömengä tönö nê æidinäni iñömö edæ, Æpænë tapao guidöningä Wäo ingantedö ante apænecaimpa, ante tæcæ eñenäni inte wægadänimpa.

Itota wænæ ingante angä go ate wëñængä waa bacampa

(Mäadoco 9.14-29; Odoca 9.37-43)

¹⁴ Mänii änanquidi æidinäni inte adodö wææninge nangui pöni inäni weca pönäni adinque wacä onguiñængä Itota weca ponte da guicapodique angantapa.

¹⁵ —Awënë eñëmi. Botö wengä onguiñængä ingante waadete waa cæ ämopa. Tömengä iñömö edæ ancaa quidi quidi dowænte wæwëninge wantæ wantæ iñö gongapamö tæ wææ tæ wææ cæcampa. Ayæ æpænë tæi guii tæi guii cæcampa. ¹⁶ Ante wædinque, Botö wengä ingante pönö cæmini waa bacæcäimpa, ante botö bitö miñæ nê godäni weca ænte pömo adinque tömënäni ædö cæte cæquinänii.

¹⁷ Äñongante Itota tömënäni inänite,

—Ñowömini mini ædæmö cädämaï incabo mini pönëegade impa, angantapa. Minitö weca æpogadö quëwëmoï. Wapiticæ cæmini iñöminite æpogadö piyænë cæte wæwëmoï. Edæ wëñængä ingante iñömö botö weca ænte mämömini pongædäni, angantapa.

¹⁸ Ayæ wænæ ingante piinique Itota, Tao gobäwe, angä tao gocä ate wëñængä iñömö dobæ waa bacantapa.

¹⁹ Ayæ ate tömengä miñæ nê godäni adodänique Itota weca pöninge tömengä ingante,

—Mönitö guiquënë bitö bai wido cæcæ cædinque edæ quinante wido cädämaï intamönii.

²⁰ Ante wæyönänite,

—Wedë pönëminipa diyæ wido cæquiminii. Edæ mini pönënö

mootatamö bai guiyä pöni ewocamini inique minitö ananquidi iñomö ongonquidi adinque, Nänenë gobäwe, ante ämini bai edæ ananquidi incæ do gä gote wayömö gongæncædönimpa. Edæ quiëmë cæcæte ante ämini inique tömänö edæ do cæte babaimpa, ante näwangä apænebo eñëedäni. ²¹ Incæte mänii wænæ inte wido cæcæte ante cædinque cænguï wantæpiyæ cænämaï inte Wængonguï ingante apænete ate edæ wido cæqui impa, ante Itota apænecä eñëänitapa.

Wænönäni wæncæboimpa, ante Itota adodö ante apænecä

(Mäadoco 9.30-32; Odoca 9.43-45)

²² Mänii Gadideabæ pöninque godongämæ goyönänite Itota iimainö ante apænecantapa. Adocanque, Waocä në eñagaingä iñomö æyömönö ongongää, ante godö odömöninque botö imote woadäni nempo pædæ godongä æncædänimpa. ²³ Në ænäni wæætë botö imote wænönäni näñe wæncæboimpa. Ayæ meönaa go adoönæque iñonte edæ Wængonguï angä beyænque botö edæ ñäni ömæmonte quëwencæboimpa.

Itota mänömainö ante apænecä eñëinque tömengä miñæ në godäni wæætë edæ nanguï wæwente bagadänimpa.

Wængonguï oncö beyæ, ante Itota eyepæ godongampa

²⁴ Mänii pöninque tömënäni Itota tönö godongämæ Capënaömö näni quëwëñömö pöñönäni wadäni guiquënë Wængonguï oncö beyæ ante tigitamö didacöma näni änontamö mentamonga ante në änönäni inte Pegodo weca ponte änänitapa.

—Minitö Awënë në Odömongä guiquënë Wængonguï oncö beyæ ante didacöma tigitamö cöwë pönönämaï ingantawo.

²⁵ Äñönänite Pegodo,

—Cöwë në pönongä ingampa.

Äninqe oncönë pö wäänë guiiyongante Itota täno apænecantapa.

—Timönö, æbänö ante pönëmi, angantapa. Iimæca në quëwëmö mönö eyepæ ænte quëwengæimpa, ante imæca awënë odeyeidi iñomö edæ tömënäni nempo në quëwënäni inänite, Pönömini æmoedäni, änänitawo. Wæætë edæ wadäni inänite änänitawo. Ädänidö inänite änäni, ante pönëmi, ante Pegodo ingante Itota angantapa.

²⁶ Äñongante Pegodo,

—Wadäni inänite änänipa.

Ante apæneyongä Itota wæætë edæ,

—Mänömaï i inique edæ mönö Awënë Wængonguï nempo në quëwënömö inte wii godonguënömö imompä. ²⁷ Incæte wii piinte bacædänimpa, ante botö iimaï ämopa. Bitö gäwapäa mäo dadonte wëä tadöñömi gæyæ tänocä tacä æe.

Æninqe gæyæ önöneca wi ænete ayömi adotamonque incæ coatodo didacöma emontamö incæ edæ gæyæ önöne ongontamö adinque bitö tadonte æncæbiimpa. Mänintamö ænte mäo bitö beyæ botö beyæ eyepæ godömi æncædänimpa, angä gote Pegodo cægacäimpa.

18

Æcänö ñcænægä inte në angä inguingää, ante tededänipa

(Mäadoco 9.33-37; Odoca 9.46-48)

¹ Mäniñedë Itota miñæ në godäni tömengä weca ponte apænedinque,

—Bitö öönæde Awënë Odeye linque bayömi æcänö bitö nempo quëwëninque ñænægä pöni inongä inte në angä inguingää, änänitapa.

² Itota iñomö wëñægä guiyangä ingante edæ aa pecä pongä ate tömengä ingante tæcæguedë goncædinque tömënäni inänite wæætë apænecantapa.

³ —Nawangä ämo eñëedäni. Minitö öönæde Awënë Odeye nempo guicæte ante wapiticæ mini pönëwënö wido cædinque wëñænäni näni piyænë cæte pönönö bai pönëedäni. Mänömaï cädämaï imini inique Awënë Odeye nempo cöwë guiidämaï inte wæbäiminipa. ⁴ Incæte iingä

wēñængä, Önömoque imopa, ante pönengä bai æcänö adobainö ante pönente quëwëna guiquënë tömengä iñömö edæ öönädë Awënë Odeye nempo quëwëninque ñænængä pönï inte edæ nē angä ingampa. ⁵ Ayæ æcänö botö emöwo apænedinque mäningä bai wēñængä ingante, Pöe, ante godö waa cæcä iñömö tömengä iñömö edæ botö imote edæ do, Pöe, ante pönö waa cæcä ingampa, ante Itota apænegacäimpa.

Wacä oda cæcæcäimpa, ante nani wæquinque cædänipa

(Mäadoco 9.42-48; Odoca 17.1-2)

⁶ Itota ayæ apænecantapa. “Wadäni godö cædäni beyæ botö imote nē pönänäni incæ pancadäniya edæ dobæ oda cæte wënæ wënæ cædänipa. Ininque, Wēñængä adocanque guiyangä pönï ingä incæ oda cædämaï incæcäimpa, ante wææ cæcæte ante cædinque nē godö cæcæ cædingä ingante iïmaï cædäni ininque tömengä toquënegä imaingampa. Waodäni nani dacæ godö dacæ godö cæquinca ñænænca æninque tömengä önömenca æ wëmencadinque tömengä ingante tæcætibæ wido cædäni ininque tömengä edæ, Wënæ wënæ cædämaï inte becadote wæmo beyænque Wængongui botö imote wii godömenque pangampa, ante wædinque waa toquënegä imaingampa. ⁷ Quiëmë beyæ oda cædinque inguipoga quëwënäni nani wæquinque wënæ wënæ cædänipa. Nē pönänäni incæ pancadäniya wii eñente do oda cædänipa. Cöwë mänömaï impa. Incæte, Oda cæcæcäimpa, ante nē cæcä iñömö edæ tömengä nanguï nänö caate wæquinque cæcampa,” ante apænegacäimpa.

⁸ Ayæ, “Bitö öonmpoca cædinque wënæ wënæ cæbi ininque öonmpo aa wi æmpote wido cæte bai cædinque wënæ wënæ bitö cædinö ante wido cæbäwe. Bitö önöwa wapiticæ godinque wënæ wënæ cæbi ininque bitö önöwa aa wi æwate wido cæte bai cædinque wënæ wënæ bitö cædinö

ante wido cæbäwe. Iñæmpa inguipoga quëwëninque bitö æmæmpoque empobi incæte æmæntique entibi incæte bitö öönädë æidinque cöwë wënämaï quëwëmi ininque waa imaimpa. Edæ tipæmpoga empobi inte tipæntiya entibi inte edæ bitö gonga cöwë bæcote wæwenguïñömö wii æmæwo wido cæte wæquïmidö anguënë. ⁹ Ayæ bitö awinca wiwa adinque wënæ wënæ cæbi ininque bitö awinca oo togæmonte wido cæte bai cædinque wënæ wënæ bitö cædinö ante wido cæbäwe. Iñæmpa inguipoga quëwëninque bitö æmæmonque emömi inte bitö godömenque quëwëmi ininque waa imaimpa. Edæ wii tipæmonga emömi inte edæ bitö tadömengadænguipo gonga cöwë bæcote wæwenguïñömö wii wido cæte wæquïmidö anguënë,” ante Itota angacäimpa.

Bodego wë womonte ba, ante odömonte apænecampa

(Odoca 15.3-7)

¹⁰ Ayæ, “Iingä guiyangä iñömö önonganque ingampa, ante mïnitö adocanque ingante incæ piinte adämaï imæwedäni. Iñæmpa tömönäni inänite nē aadäni anquedoidi incæ öönädë quëwëninque botö Mæmpo nē öönädë quëwengä awinca cöwë adänipa cæminii. ¹¹ Edæ botö Waobo eñagaïmo inte edæ wë womönäni inänite diqui minte æncæte ante pömo imopa,” ante Itota apænecantapa.

¹² Ayæ, “Æbänö ante pönëmini edæ. Waocä obegaidi tiëe ganca ëacä ongöñönäni adocanque pangocæte nänënë gocä adinque nē ëacä iñömö nöobenta i nöebe ganca inäni änämænë ongöñönänite emö cæte diqui mincæ wii goquingä, ante pönëminii. Cöwë edæ diqui diqui mincæ gocæcäimpa. ¹³ Godinque nē pangocæ godingä ingante ëadente acä ininque nē ëacä waa tobaingampa. Edæ pangocæ godämaï inäni nöobenta i nöebe ganca inäni inänite adinque cöwë tocä inongä inte tömengä tæcæ

nänö adingä beyæ godömenque to-campa. ¹⁴ Minitö Mæmpo öönæde nē quēwengä adobaingä, Guiyangä wē womonte wænāmaī incæcäimpa, ante cōwē diqui diqui mingampa,” ante Itota odömonte apænegacäimpa.

Nē wēnæ wēnæ cæcä ingante pūnāmaī inte waadecäimpa (Odoca 17.3)

¹⁵ Godömenque odömöningue Itota apænecantapa. “Bitö tönĩnacä bitö imite wēnæ wēnæ cæcä wædinque bitö tömengä weca gote ämi adominaque nänēnē gote ongöeda. Ongöñöminate bitö tömengä ingante, Mänömaī cæbitapa, ante ämi ēñengäe. Mänömaī ämi ēñengä inique tömengä waadete babaingampa,” ante apænegacäimpa. ¹⁶ Ayæ godömenque apænecantapa. “Wæætē tömengä ēñēnāmaī inte waadedāmaī ingä inique bitö Wængonguī angä ēñente nāni yewæmongainö bai cæe. Waocä æbänö cæcää, ante adinque waoda mēnaa ina incæ mēnaa go adocanque ināni incæ adoyömö ante apænedāni inique tömēnāni nāni apænedö beyænque ante mönö, Nö impa, ante ēñengäimpa, ante Wængonguī beyæ yewæmongatimpa. Inique bitö, Mönö adoyömö ante apænecäimpa, ante waoda mēnaa inate ämi incæ adocanque ingante ämi incæ æcāmenque bitö tönö goda tömengä adoyömö ante nöinö ante apænecäcäimpa. ¹⁷ Ayæ apænemini ate nē wēnæ wēnæ cædingä cōwē ēñēnāmaī ingä ate wædinque bitö iñömö, Itota nē Codito ingampa, ante mīni pönencabo weca gote apænebi ēñenguināni. Ayæ tömēnāni wææ änāni ate tömengä godömenque ēñēnāmaī ingä inique tömengä, Nämä cæte quēwenguimo, ante nē ēñēnāmaī cædāni bai ingampa. Ayæ, Odömāno awēnē beyæ nē æwengä bai ingampa cæbii. Tömengä ēñēnāmaī cæcāinö anguēnē, ante bitö edæ tömengä ingante gomö ae,” ante Itota angantapa.

¹⁸ Ayæ apænedinque, “Nāwangä ämopa. Minitö inguipoga nē ämini

inte apænte ämini inique mīni apænte äninö incæ öönæde dobæ apænte ante impa. Ayæ inguipoga mīnitö apænte äninque ñimpo cæmini inique mīni cædö bai öönæde adobai do ñimpo cæte ingäimpa.”

¹⁹ Ante apænedinque Itota ayæ apænedinque, “Minitö iminite iñmaī ämopa, angantapa. Inguipoga mēmīnaa guēa adoyömö pönente apæneyömīna botö Mæmpo öönæde nē quēwengä iñömö mīna ämaī ante tömänö cæcäcäimpa. ²⁰ Edæ mēmīnaa imīna incæ mēmīnaa go adocanque imīni incæ æpomīnimē inömīni incæ mīnitö adoyömö ponte botö emöwo apænete ongöñömini edæ botö adoyömö mīnitö tönö godongämæ ongoncæboimpa,” ante Itota apænegacäimpa.

²¹ Ayæ ate Pegodo tömengä weca ponte äninque,

—Awēnē, botö tönĩnacä botö imote wēnæ wēnæ cæcä adinque botö tömengä ingante æpogadö godö ñimpo cæbo ee goquingä. Edæ önompo æmæmpoque go mempoga mänimpoga ñimpo cæbo ee goquingä, ämii.

²² Äñongante Itota,

—Iñæmpa, wīi önompo æmæmpoque go mempogaque anguīi. Edæ godömenque bitö änimpoga pūināmaī inte ñimpo cæbi ate wæætē adopoga wæætē adopoga ayæ cōwē tetenta ganca wæætē wæætē ñimpo cædinque coatodo tiento nöobenta ganca mänimpoga pūināmaī inte ñimpo cæbi goquingä. Mänömaī ante Itota tömengä miñæ nē godāni inānite, Cōwē pūināmaī inte ñimpo cæquimīni, angacäimpa.

Nē cædongä nänö waadedāmaī cædö ante odömongampa

²³ Itota ayæ apænecantapa. “Mäninö beyæ bitö änö bai cædāni wædinque imæca awēnē odeye nänö apænte ämaī öönæde Awēnē Odeye incæ tömengä ingante nē ēñēmīni iminite æbänö apænte angampa, ante odömömo aquimīni, angantapa.

24 *Ímæca awënë iñömö, Botö imote në cædäni incæ botö imote debe inäni inte eyepæ pönönäni æncæboimpa, ante cæyongä adocanque tudento ñænængade näni godonte æinta incæ diete müido ganca nänö pönongä æni beyæ wæætë pönönämaï debe ingä adinque tömengä ingante ænte mämönäni pongampa.* 25 *Pongä adinque tömengä awënë iñömö, Ömæpocä inte tömengä ædö cæte pönongä ænguimoo, ante pönente wædinque iïmaï angantapa. Wacä ingante në cædäni tömengä näni wencabo bacædänimpa, ante cædinque botö në pönönämaï ingä näna gæncaya näni wencabo tömänäni inänite bæi ongonte wacä ingante godonte eyepæ ænguimoo, angä.* 26 *Ëñente wædinque edæ në cæcä iñömö tömengä weca ædæ wææninque edæ, 'Awënë, waadete cædinque ee abi adinque botö ayæ ate botö debe inganca tömanta pönömo æncæbiimpa.'* 27 *Ante wæcä ëñëninque awënë iñömö në cæcä ingante guëa wæte bæi pönëninque, Tömää edæ godonte impa, äninque godö ñimpo cæcä abæ tawænte gocantapa.*

28 *"Incæte tömengä tönö wadäni näni godongämæ cæcabo iñönäni wacä guiquënë adocä ingante tiëë tigitamö ganca nänö pönongä æni beyæ wæætë pönönämaï debe inongäimpa. Adinque në abæ tawænte godingä incæ tömengä ingante debe ingä ingante godö yao ongonte ñimämencate cædinque, 'Do bitö æninta pönömi æmo töö.'* 29 *Ante pïingä wædinque tömengä tönö në cæcä inte në debe ingä wæætë në äningä weca da guicapodinique, 'Bitö waadete cædinque ee abi ininque botö ayæ ate pönömo æncæbiimpa.'* 30 *Ante wæyongä edæ Baa äninque tömengä, Tömanta edæ cöwë pönömi æmo ate tabaïmipa, äninque edæ tee mönecä ongongantapa."*

31 *"Adinque edæ tömëna tönö në cædäni guiquënë, Mänömaï cæcä, ante wædinque pïininque awënë weca gote, Mänömaï cæcampa, ante*

wæmönipa. 32 *Änäni ëñëninque wënæ wënæ në cædingä ingante äñecä pongä ate tömengä ingante awënë, 'Botö imo në cædimi inte në wënæ wënæ cæbitapa töö. Iñæmpa bitö nanguï ämi beyænque botö edæ, Tömanta edæ godonte impa, ante ñimpo cæbo abæ tawænte gobitapa.* 33 *Ininque botö guëa wæte pönente cæbo bæi bitö tönö në cæcä ingante bitö adobaï guëa wæte pönëmi bæi waa incædönimpa.'* 34 *Äninque awënë äingä badinique, Tömengä tömanta nänö æninta botö imote adodö nänö pönonguinganca botö, Tömengä ingante ænte pancæminimpa, ämopa. Äninque tömengä ingante tee mönete oncönë në pänäni inänite pædæ godongä ænänipa."* 35 *Mäninque ante odömonte apænedinique Itota godömenque apænegacäimpa.*

—Edæ mïni waocabo iñöminite mïnitö wacä nänö wënæ wënæ cædinö ante godö ñimpo cædämaï imini adinque awënë nänö apænte äno bæi botö Mæmpo öönæde në quëwengä iñömö adobaï mïnitö wënæ wënæ cædinö ante ñimpo cædämaï inte tömänö ancæcäimpa, ante apænegacäimpa.

19

Nänöogængä ingante näni pämcënö ante

(Mäadoco 10.1-12; Odoca 16.18)

1 *Mänii Gadideabæ quëwente ñinque apænete ate Itota Oododänö æmæmäa godinique Oodeabæ pongacäimpa.* 2 *Pongä adinque nanguï inäni tee empo goyönäni tömengä gampocä waa badänitapa.*

3 *Paditeoidi guiquënë, Godö ämö ëñëninque Itota wabänö adodeque oda cædete wæcä tocæi, ante pönëwänäni inte tömengä weca pöninique äänitapa.*

—Wængonguï æbänö ante wææ angacäi. Waocä tömengä nänöogængä ingante quïëmë beyænque pämängä ñinque edæ nö cæte intawo.

4 *Ante äñönäni Itota,*

–Minitö iñæmpa Wængongui beyæ ante nani yewæmöinta adamaï inte ämînitawo. Wëenëñedë edæ waocä ingante nê Badongaingä iñömö, “Onguïñængä ingampa, ante ayæ, Onquiyængä ingampa, ante badongacäimpa,” ante yewæmongatimpa. ⁵ Ayæ, “Mänömaï beyæ waocä mæmpocä ingante emö cæte wäänä inante emö cæte godinque onquiyængä ingante, Botö nänöogængä, ante æmæwo moncæcäimpa. İnıneq meña inına incæ tömëna nana gæncaya badinque adocanque bai bacædaimpa,” ante yewæmongatimpa. ⁶ İnıneq tömëna nana gæncaya adocanque bai badinque nanënë mënna inamaï inapa. Mänömaï beyæ Wængongui, Adocanque bai inapa, ante nana gæncaya nanö nê badongaina iñönte waocä wæætë pango cædämaï incæcäimpa.

⁷ Äñongante tömënäni wæætë,

–İnıneq, Æmæwo pämæmo goquimi, ante yewæmönıneq mäninta bitö yewæmöninta onquiyængä ingante godömi ængä ate bitö önonque pämæncæbiimpa, ante Möitee wodi quınante wææ angacäi, ante eñencæte ante mönitö wæmönıpa.

⁸ Änäni eñëñıneq İtota edæ,

–İñæmpa, Mımö ömædëmıni inömiñi inte mınitö wënæ wënæ cæinëmıni imıñıpa, ante wædinque edæ Möitee, Nänöogængä ingante pämænguimi, ante yewæmongacäimpa. Wëenëñedë iñömö edæ wıi mänömaï ingatimpa. ⁹ Wæætë onquiyængä wacä ingante godö todämaï iñongante tömengä ingante nê pämæningä iñömö tömengä dobæ nanö towen-gıneq edæ wacä onquiyængä ingante godö mongampa. Ayæ onquiyængä pämænte goyongä wacä onguïñængä tömengä ingante godö möñıneq adobaï nê towengä bacampa, ante ämo pönëmaïmıñıpa.

¹⁰ Ängä eñëñıneq tömengä miñæ nê godäni guiquënë,

–İñæmpa nana gæncaya ina inte pämænämaï ingæimpa, ante bitö äno

bai nö i inıneq edæ waocä wëmö cæcä bai waa imaimpa, ante pönente wæmönıpa.

¹¹ Ante wæyönäñite İtota,

–Wëmö cæcä, ante mıni äno bai ante waocä ædö cæte cæqingä. Wængongui nanö äñınäñıneq mänınö ante Ao ante mönämaï inäñıpa. ¹² Edæ ædänidö mönämaï inguınäñı, ante pancadäñıya guiquënë wäänä cæncädë eñayedë edæ ongænca babetamiñænäni eñagainäni inte mönämaï inäni. Pancadäñıya wæætë waodäni cädäni beyænque babetamiñænäni badinque mönämaï inäñıpa. Ayæ pancadäñıya guiquënë öönædë Awënë Odeye nempo beyæ ante nämä pönëñıneq Ao ante edæ mönämaï inäñıpa. Edæ æcänö botö äno eñente Ao äna, tömenganque mänömaï cæcæcäimpa, ante İtota odömongä eñengadäñıpa.

Wëñænäni inäñite gampo cæcadinque waa apænecampa

(Mäadoco 10.13-16; Odoca 18.15-17)

¹³ Ayæ ate, Wëñænäni inäñite İtota pönö gampo cæcadinque tömënäni beyæ Wængongui ingante apænecæcäimpa, ante cædinque wadäni tömengä weca ænte pö ænte pö cädäni adinque tömengä miñæ nê godäni guiquënë, Ænte pönämaï iedäni, äñıneq Baa Baa änäni. ¹⁴ Ate wædinque İtota iñömö edæ,

–Wëñænäni inäñite ee amıni poncädäñıpa. Edæ mänınäni nani pönëno bai adobaï pönëñıni inte edæ öönædë Awënë Odeye nempo do quëwënäni inäñıpa. İnıneq mınitö iñömö wëñænäni inäñite Baa änämaï iedäni.

¹⁵ Äñıneq wëñænäni inäñite pædæ gopo gampo cæcadinque wadæ gogacäimpa.

Mäıncoo nê nangui äcä İtota weca ponte apænecampa

(Mäadoco 10.17-31; Odoca 18.18-30)

¹⁶ Ayæ wacä İtota weca pönıneq, –Awënë nê Odömömi apænëbi eñëmoe, angantapa. Botö æbänö

waa cæbo ïinque cōwē wænāmaï wantæpiyæ quēwēmaïmoo.

¹⁷ Ante añongä Itota edæ,

–Wængonguï adocanque nē waa cæcä ingä incæte bitō botō ïmonte äninque, Æbänō waa cæquïmo, ämii. Incæte, Quēwenguïmo, ante wæbi ïinque bitō, Ìïmaï cæedäni, ante Wængonguï nänō wææ angainō ante eñente cæe.

¹⁸ Angä wædinque,

–Ædedō ante ämii.

Äñongante Itota wæætē,

–Ìïmaï. “Wacä ingante godō wænönāmaï. Bitō nänōogængä ïnāmaï ïñongante godō mönāmaï. Wacä quï awēmō ænāmaï. Wacä æbänō cæcää, ante godō babæ wapiticæ änāmaï.

¹⁹ Wæmpocä ingante wäänä ïnante waa adinque godō waa cæe. Ayæ, Nämä ante bitō waadete cæbi bai wadäni ïänite adobai godō waadete cæe.”

²⁰ Angä eñëninque edëningä ïñömō,

–Botō mäninō bitō änō bai do cæte pægaïmo ïnte botō quïnō edæ godömenque cæquïmoo.

²¹ Äñongante Itota wæætē,

–Bitō, Ædæmō nō cæbo bacæboïmpa, ämi ïinque edæ öönädē bitō waëmoncoo ænguinque edæ ñöwo godinque ïmæca bitō mänincoo tömancoo godonte æninque bitō æninta wæætē ömæpodäni ïnte wädäni ïänite tömanta godömi æncædänïmpa. Ayæ edæ botō ïmote tee empote pöe.

²² Angä eñëninque edëningä ïñömō edæ, Botō mäincoo, ante nänō nanguï éacoo ante pönente wæwente wædinque wadæ gogacäïmpa.

²³ Gocä ïinque edæ Itota tömengä miñæ nē godäni ïänite apænedinque,

–Nawangä ämo eñëedäni, angantapa. Öönädē Awënë Odeye nempo guiite quēwencæte ante cædinque waodäni ömæpodäni ïnte botō miñæ pönänipa. Mäincoo nanguï éacä guiquënë æbänō cæte ömæpocä ïnte botō miñæ ponte guiite quēwenguingää, angantapa. ²⁴ Ayæ cämeyo ïñömō guiyangä ingampa diyæ daagö guiyampite pædæ tacää.

Cämeyo ñænængade ïnongä ïnte pædæ tadämaï ingä bai nē éacä adobai ingampa. Tömengä nämä ayongä ñænængä ïnongä ïnte edæ æbänō cæte Wængonguï Awënë Odeye nempo do wäänē guiite quēwenguingää.

²⁵ Ante apæncä wædinque tömengä miñæ nē godäni wæætē ancai guïñëninque,

–Ìñæmpa mänömaï ï ïinque æcänō wäänē guiite quēwenguingää, änänitapa.

²⁶ Itota tömënäni ïänite cōwä adinque apæncantapa.

–Waomïnique incæ nämä mïni cædō beyænque ædō cæte quēwēmaïmïni. Wæætē Wængonguinque nämä tömänō do cæcä ingampa.

²⁷ Angä eñente wædinque Pegodo guiquënë,

–Mönitō ïñömō edæ möni éadincoo owæ caate bitō miñæ ömæpomöni ïnte pömöni abipa. Ömæpomöni ïmöni ïnte edæ quïnō ænguïmöni.

²⁸ Äñongante Itota wæætē tömënäni ïänite angantapa.

–Nawangä ämopa. Botō badömo ate tömancoo mïincooque ïinque bayonte botō Waobo eñagaïmo ïñömō edæ tömëmo ñäö ëmönō ëmöninque edæ pö tæ contacæboïmpa. ïinque mïnitō botō ïmote nē tee empogaimïni ïnte mäniñedē ate tömëmïni tæ containpaa tipæmpoga go mempaa pö tæ contadinque awënëidi badinque edæ idægoidi tipæmpoga go mencabodäniya ïänite apænte ancæminïmpa.

²⁹ “Ayæ godömenque ämopa. Mïnitō nawangä oncodo tao godinque mïnitō tönïñadäni ïänite ëmō cæte godinque badä ïnante mæmpocä ingante wënäni ïänite botō ëmöwo beyænque ëmō cæte pömïnitapa. ïinque ïïmaï ante nawangä ämopa. Æcänō botō beyænque mänömaï cædinque tömengä nänō éadi ömæ ëmō cæte goda ïñömō tömengä nänō ëmō cæte godincoo bai adopocoo æncæcäïmpa. Wïi adopogaque edæ æninque tömengä wæætē edæ godömenque adopocoo adopocoo

æninque tiëë ganca mänimpoga æncæcäimpa. Ayæ botö pönö cæbo æninque tömengä cöwë wantæpiyæ wænāmaï quëwencæcäimpa. ³⁰ Incæte edæ tāno yæcado ongöninäni pancadāniya wæætë yæmiñæ gote ongönäni bacædänimpa. Ayæ yæmiñæ ongöninäni inte wæætë yæcado ponte ongoncædänimpa,” ante Itota apænegacäimpa.

20

Në cædäni æbänö cædäni, ante odömonte apænecampa

¹ Itota ayæ edæ, Öönædë Awënë Odeye nempo æbänö quëwënëni, ante odömoncæte ante iïmaï apænegacäimpa. “Wacä në ömæ ëacä nänö cæbaï Öönædë Awënë Odeye incæ adobaï cæcampa. Në ëacä ñäö bayö oncodo taodique, Æcänö ñöwoönæ botö yowementacodë cæquïnaa. ² Ante adinque tömengä beyæ në cæcædäni inänite, Minitö tömäa itædë cæmïni ate botö adocanque ingante deënaio tiguitamö adotamonque pönöningue wacä ingante wacä ingante adotamonque adotamonque pönömo æncæminimpa, añongante Ao ante yowementacodë cæcæ godänipa. ³ Gote cæyönäni tömantadæ æñonte në ëacä tömënanäni nänäni godonte æiñömö gote ayongä wadäni önonque cædämaï a ongönäni. ⁴ Adinque tömengä, ‘Minitö adobaï gote cæmïni ate eyepæ godömo æncæminimpa.’ Angä ëñëningue Ao ante godänipa. ⁵ Ayæ tæcæbæcä iñonte adobaï tömengä wadäni inänite angä godäni ate wæætë ædæ wæicä iñonte adobaï taodique wadäni inänite angä godäni. ⁶ Ate edæ awæncabo wæiyongante edæ adocä tao ayongä wadäni önonque a ongönäni adinque tömengä tömënanäni inänite, ‘Quïnante tömäa itædë edæ cædämaï a ongömïni.’ ⁷ Ante añongä, ‘Iñæmpa mönitö imönite, Cæedäni, änänipa cæquïmönii.’ Änänäni ëñëningue, ‘Minitö adobaï edæ botö yowementacodë

gote cæedäni,’ angä godänitapa,” ante Itota odömonte apænecantapa.

⁸ Ayæ, “Gäwadecæ pönäni bayonte në ëacä iñömö tömengä beyæ në apænecä ingante äninque, ‘Botö beyæ në cædäni inänite aa pebi pönäni ate bitö tömënanäni nänäni cædi beyæ godömi eyepæ æncædänimpa. Awæncabo wæiyongä ñöwo pönäni gote cædinäni inänite edæ tāno godömi ænänäni ate wæætë wëenë gote cædinäni inänite edæ ayæ ate godömi æncædänimpa.’ ⁹ Angä ëñente aa peyongä awæncabo wæiyongä gote cædinäni inte tāno pönäni ate deënaio tiguitamö adotamonque adotamonque godongä ænänäni. ¹⁰ Ate adinque tāno gote cædinäni guiquënë, Mönö godömenque ængui impa, ante pönëñönäni tömengä godongä æninque edæ deënaio tiguitamö incæ adotamonque adotamonque adopo adopo ænänäni. ¹¹ Æninque tömënanäni në ëacä ingante piinte tededinque, ¹² ‘Mönitö tömäa itædë näwancate cæmöni incæ iñæmpa cæbii. Ayæ pönäni guiquënë wantæ iñö adoque ooda ganca cædäni incæ mönitö baï adopo godömi ænänäni wæmönipa töö.’ ¹³ Ante piñönäni në ëacä wæætë adocanque ingante apænedinque, ‘Iñæmpa botö bitö imite wënæ wënæ cæbogaa. Edæ, Deënaio tiguitamö adotamonque pönömo æncæbiimpa, añömo Ao änämaï imitawoo. ¹⁴ Bado, bitö qui incæ ænte goe. Edæ bitö æni baï ayæ ponte cædingä ingante adopo godonguënëmo intabopa. ¹⁵ Edæ botö éadincoo incæ, Æcänö ingante godonguïmo, ante pönente wædinque ædö cæte tömëmo incæ änämaï inguïmoo. Botö në waa cæbo iñömote bitö guiquënë edæ piinte abi awædö,’ ante në ëacä angampa.”

¹⁶ Mäniganca ante odömonte apænedinque Itota iñömö, “Mänömaï cædäni ininque botö, Tāno yæcado ongöninäni inte wæætë yæmiñæ gote ongoncædänimpa, antabopa. Ayæ, Yæmiñæ ongöninäni inte wæætë

yæcado ponte ongoncædänimpa, ante apænetabopa,” ante apænegacäimpa.

Itota, Wæncæboimpa, ante wæætē adodō ante apænegä

(Mäadoco 10.32-34; Odoca 18.31-34)

¹⁷ Mänii godinque Eedotadēē gocæ cædinque tōmengä miñæ, Dote, ante nāni gocabo inānite Itota nānēnē ænte mäodinque idōmæ goyönāni apænegantapa.

¹⁸ —Ñowo iñōmō edæ mōnō Eedotadēē iñōmō æicæimpa. Æi gote ongōmō ate adocanque, Waocä nē eñagängä æyōmōnō on-gongä, ante wadāni inānite godō odōmongä bæi ongonguināni. Ayæ, Wængongui qui, ante nē godönāni ñænænāni tōnō nē odōmōnāni nempo tōmengä botō imote pædæ godongä æninque tōmēnāni wæætē botō imote apænte äninque, Cōwē wæncæcäimpa, ancædänimpa. ¹⁹ Ayæ edæ, Awæ ñænquedimæ cædinque tōmengä ingante timpote wænōedāni, ante tōmēnāni oodeoidi ināmai ināni nempo botō imote wæætē mäo godönāni æncædänimpa. Æninque tōmēnāni wæætē botō imotedō ante badete todinque ayæ tæi tæi päninque awäa timpodāni wæncæboimpa. Nāñe wæmo ate Wængongui angä beyænque botō mēōnaa go adoönæque iñonte ñāni ömæmoncæboimpa, ante Itota apænegacäimpa.

Tantiago tōnō Wäo badä, Botō ämai ante cæe, angampa

(Mäadoco 10.35-45)

²⁰ Tebedeo wēna Wäo tōnō Tantiago iñōna tōmēna badä iñōmō tōmēnā wēna tōnō Itota weca ponte ædæ wææninque edæ, Botō ämai ante cæe, ante apænegä. ²¹ Eñēninque Itota,

—Mīnō quīnō apænegæte ante pōmii.

Äñongante,

—Bitō Tæiyæ Awēnē Odeye bate tæ contadinque edæ botō wēñæna inate ämi ate adocanque bitō tōmēmæmi inō adocanque dipæmæmi inō tæ contaquina ämopa, angantapa.

²² Eñēninque Itota wæætē,

—Iñæmpa adāmai inte mīnitō ämīni awædō. Botō nantate wæwenguimæ bai becabo bai mīnatō edæ adotaca becate bai Ao ante botō beyæ nantate wæwenguimīnaa. Edæ æpænē guite bai botō wænguimæ bai guñēnāmai imīnāpa diyæ botō beyæ wænguimīnaa.

Äñongante,

—Ao ante guñēnāmai cæcæmōnaimpa, änatapa.

²³ Itota wæætē,

—Botō nangui caate wæwēmo bai mīnatō adotaca bete bai äanque bai caate wæcæmīnaimpa. Nāwangä impa. Incæte æcänō botō tōmēmæ inō æcänō botō dipæmæ inō tæ contaquina botō edæ pōnō änāmai imopa. Wæætē botō Mæmpo do, Mäninaque mänimpaa tæ contaquina, ante nē badongängä inte tōmengä adocanque godō angä contaquina, ante Itota apænegacäimpa.

²⁴ Mänōmainō ante tededapa tōo, ante eñēninque wadāni diete ganca tōmengä miñæ nē godāni guiquēnē iñāna nāna caya inate edæ piñānitapa.

²⁵ Piñāni ininque Itota aa pecä pōnāni ate tōmēnāni inānite iīmai apænegantapa.

—Oodeoidi ināmai ināni awēnēidi æbānō cædānīpa, ante do eñēmīnīpa. Tōmēnāni iñōmō nāmā beyænque ante cædinque nangui piñte änāni wædinque tōmēnāni nempo quēwēnāni wæætē do eñente cædānīpa. Ayæ tōmēnāni weca nē ñænænāni inōnāni iñōmō, Tōmēmoque ämo eñente cædāni, ante piñte änāni wædānīpa.

²⁶ Mīnitō guiquēnē tōmēnāni nāmā beyænque ante nangui änāni bai wiī adobai cæquēnēmīni imīnīpa. Wæætē mīni cabo iñōmīni adocanque ñænängä pōni ingä bacæte ante cædinque tōmengä wæætē edæ mīnitō beyæ nē cæcä baquēnängä ingampa.

²⁷ Ayæ yæcado ongōinente wæcä iñōmō tōmengä yæcado ongoncæte ante cædinque wæætē edæ yæmiñæ pōni gote tōmānāni inānite nē cæcä badinque tōmengä nāmā beyæ ante

cædämaï inguënegä ingampa. ²⁸ Edæ Waobo eñagaïmo inte adobaï, Botö beyæ pönö cæcæðanimpa, ante wii põmo ïmopa. Wæætë wadäni beyæ godö cæcæte ante põmoimpa. Ayæ edæ nanguï inäni tee mönete bai wæwëñönäni botö wæætë, Tömënanï wibænete tacæðanimpa, ante tõmëmo wepæ incæ godoncæte ante põmo ïmopa, ante Itota apænegacäimpa.

Babetamöna iñönote Itota gampomongä waa bamönapa

(*Mäadoco 10.46-52; Odoca 18.35-43*)

²⁹ Itota mäninö godinque Eedicoo näni quëwëñömö ponte tayönäni tõmengä miñæ nanguï inäni tee empote godänitapa. ³⁰ Goyönäni onguïñæna babetamöna iñömö taadó wedeca tæ contate a ongöñöna, Itota pongampa, änäni eñëninque aa pedatapa.

—Awënë, bitö Dabii wodi pæïmi inömi inte mönatö ïmönate pönö waadete waa cæe.

³¹ Ante añöna godongämæ godäni guiquënë, Apocænë inguënë quëwënaa, änäni incæ godömenque yedæ aa pedinque,

—Awënë, bitö Dabii wodi pæïmi inömi inte mönatö ïmönate pönö waadete waa cæe, änatapa.

³² Itota iñömö næ gongæninque añecä pöna adinque,

—Mïnatö ïminate quïnö cæbo ämïnaa.

³³ Angä eñëninque,

—Awënë gampomömi awinca wi ænete bai aquimöna, ante wæmöna.

³⁴ Añöna Itota tõmëna godongämæ wæte bai pönëninque edæ pædæ gopo gampomongantapa. Gampomongä ate tõmëna waa ada badinque Itota miñæ do godatapa.

21

Itota Eedotadëe iñömö pongampa

(*Mäadoco 11.1-11; Odoca 19.28-40; Wäö 12.12-19*)

¹ Mänii gote Eedotadëe obo pöninque Odibowænquidi ontacamö goïmö Betapaguee näni quëwëñömö ganca pönönäni Itota tõmengä miñæ

në goda mënäa ïnate da godöninque angantapa. ² Tömëna ïnate,

—Mänii näni quëwëñömö ongö amïna. Tömëñömö go guïte ayömïna bodo onquiyæ näna wencaya ñäni ñæi a ongö acæmïnaïmpa. Nänï ñæi a ongö adinque mïnatö mänïna ïnate ñi cæyænte botö weca ænte pöeda. ³ Ayæ mïnatö ïminate wææ änäni eñëninque mïnatö wæætë edæ, Awënë nänö ænguënönö ante ænte gomönapa, ante apæneeda. Ayæ, Tömengä ïnque cæte ate do da pönongä æncæmïnimpa, ante apæneeda, angantapa.

⁴ Do iñömö Wængonguï beyæ në apænecä ïmainö ante nänö apænegainö ante edæ ïnque bacæïmpa, ante mänömaï cætimpa.

⁵ “Tiono iñömö quëwënäni inänite ïmai äedäni,

‘Badogaa, mïnitö Awënë Odeye ñöwo mïnitö weca pongä äedäni.

Edæ mönö mäincoo mongæwëngä bodo wengäa tæ contate mönö Awënë pongampa.

Tömengä gänë pönengä inte bodoga contate pongä äedäni,’ ante ancæmïnimpa.”

Ante docä nänö apænegainö ante ñöwo ïnque cætimpa.

⁶ Mänömainö ante angä eñente godinque tõmengä miñæ në goda iñömö Itota nänö äninö bai do cædinque, ⁷ bodo näna wencaya ïnate töi töi ænte pöninque tõmëna wecoo yabæcooquæ æidämæ wo cæyabæda ate Itota wænömënæca inö æi yiyæ tæ contacantapa. ⁸ Adinque edæ nanguï inäni, Itota nänö ponguïnö, ante tõmënanï wecoo yabæcooquæ ñö cædinque bee podöwayönäni wadäni guiquënë gönea gote yæpæma öñabo tapænte mämö bee bee podöwadäni ate tõmengä podöwainonque gocantapa. ⁹ Gocä adinque täno godäni tönö ayæ pönäni tönö godongämæ godinque nanguï inäni yedæ äninque,

—Bitö Awënë Dabii wodi pæïmi inömi inte põmi adinque, Möni quëwënguinque ïmpa, ante, Badogaa, ante tomönipa. Awënë Wængonguï emöwo beyænque põmi ïninque bitö

toquinque edæ Wængonguī bitō imite waa cæcæcäimpa. Ayæ öönædē iñömō adobaī, Badogaa, möni quëwenguinque, ante ingæimpa.

¹⁰ Ante mǎnīī cædinque pōñōnāni, Itota Eedotadēē pongā adinque mǎniñōmō quëwēnāni ancaī guiñēninque, —Wēñænāni æbānō ānāni eññēnāmaī imitawo.

—Māningā æcānō ingāā.

¹¹ Ante wæyōnāni godongāmæ pōnāni iñōmō,

—Itota ingampa. Tōmengā iñōmō Wængonguī beyæ nē apæneca īnongā inte Gadideabæ Nāatadeta quëwente pongā ingampa, ante apænegadānimpa.

Wængonguī oncō tæiyæ waēmō baccēimpa, ante cæcā

(Māadoco 11.15-19; Odoca 19.45-48; Wāō 2.13-22)

¹² Itota iñōmō Wængonguī oncō ñænæncōnē yabæcōnē pō guidinque mǎniñōmō mǎincoo mǎnāni tōnō wadāni nē godonte ænāni tōnō ongōnāni adinque tōmengā tōmānāni inānite, Oncodo taoedāni, āninque da tadongā oncodo tao godānitapa. Ayæ campio ante nāni godonte æimpa tōnō equemō godoncæte ante nē mǎnāni nāni cōnōimpa tōnō bæ tacā tōmampaa guidōmēmæ tæ go wææntapa. ¹³ Ayæ tōmēnāni inānite angantapa.

—Wængonguī beyæ iīmāinō ante yewæmongatimpa. “Waadāni botō oncōnē pō guidinque botō imote apænecaedānimpa,” ante Wængonguī angā incæte mīnitō wēnæ wēnæ cæmīni beyænque Wængonguī oncō incæ nē awēmō ō ænāni nāni womōincōnē bai wentamō bapa tōō.

¹⁴ Āninque Itota ayæ Wængonguī oncō ñænæncōnē yabæcōnē ongōñongā pæ opa pæ opa godāni tōnō babetamōnāni tōmengā weca pōnāni adinque tōmengā godō cæcā ate waa badānitapa. ¹⁵ Mǎnōmaī mā cæcā waa badāni ate wædinque, Wængonguī qui, ante nē godōnāni ñænænāni tōnō nē odōmōnāni guiquēnē piinte badānitapa. Ayæ wēñænāni Wængonguī oncō ñænæncō yabæque ongōninque yedæ āninque, “Badogaa,

Awēnē Dabii pæimi inōmi adinque möni quëwenguinque impa,” ante Yæ ānānitapa. Ānāni eññēninque nē godōnāni ñænænāni tōnō nē odōmōnāni ænguī badinque ¹⁶ Itota ingante ānānitapa.

—Wēñænāni æbānō ānāni eññēnāmaī imitawo.

Āñōnāni Itota,

Do eññēmopa. Īñæmpa mīnitō guiquēnē Wængonguī beyæ ante iīmāinō ante yewæmonte ongō adāmaī inte ānewēmīnitawo.

“Bitō tæcæ eññādāni tōnō goömæ nē gānāni inānite apænebi eññente, tōmēnāni Ao ante nō pōni tededinque, Wængonguī tæiyæ waēmō ingānō, ante watapæ apænedānīpa.”

Mǎnōmāinō ante yewæmonte ī apa ānewēmīnīi.

¹⁷ Āninque Itota edæ tōmēnāni inānite emō cæte wadæ godinque Betānia nāni quëwēñōmō gote mon-gacāimpa.

Iigowæ ömæcawæ ī adinque Itota pūingampa

(Māadoco 11.12-14, 20-26)

¹⁸ Nāō bayō Eedotadēē nāni quëwēnō gāmænō adodō pōninque Itota gæwænte wæcantapa. ¹⁹ Gomō adinque iigowæ a ongō ponte ayongā õñaboque emæ adinque,

—Ömæcabi imi cōwē incadāmaī incæbiimpa.

Āñongā iigowæ incæ guiñē wænīmpa. ²⁰ Guiñē wæ adinque tōmengā mīñæ nē godāni iñōmō,

—Quīmæ iigowæ iñontobæ guiñē wæ amōō.

²¹ Ante wæyōnāni Itota iñōmō edæ, —Nāwangā ante mīnitō imīnite apænebopa. Wīi æmæ pōnēmīni inte wede pōnēmīni īninque mīnitō iigowæ inte botō cæbaī adobaī do cæbāimīni. Ayæ godōmenque cædinque mīnitō ānanquidi ongō ate, “Ānanquidi eññēmi, āninque, Bitō cabænte wo gote gāwapænē guīie,” ante āmīni īninque edæ mīnitō āninō bai do babaimpa.

²² Wængonguī ingante wede pōnēmīni īninque quiēmē incæ ante tōmengā

ingante apænemini incæ mini
äninö tömänö æncæminimpa, ante
apænegacäimpa.

*Awënë imipa, ante æcänö änaï, ante
Itota ingante änänipa*

(Mäadoco 11.27-33; Odoco 20.1-8)

²³ Itota ayæ Wængonguï oncö
ñænæncönë yabæcönë pö guiid-
inque odömonte apænecä ëñëñönäni,
Wængonguï qui, ante nê godönäni
ñænænäni tönö oodeoidi inänite
nê aadäni, Näni Picæncabo, näni
änäni tönö tömengä weca pöninque
änänitapa.

—Æcänö nê angä inte bitö imite
angä cæbii. Iñæmpa, Nê ämi
bacæbiimpa, ante æcänö pönö äna
ëñente nê ämi inte bai cæbii, ante
ëñencæte ante wæmönipa.

²⁴ Änäni ëñëninque,

—Mïni ämaï botö adodeque ämo
ëñëninque mïnitö täno apænemini
ëñente ate mäniñedë ate botö wæætë,
Æcänö nê äna inte pönö angä cæboo,
ante apænebo ëñëmäimïnipa. ²⁵ Wäo
wodi ingante guiquënë, Bitö æpænë
guidoncæbiimpa, ante æcänö äna
ëñente guidongäi, ante pönëminii.
Wængonguï öönädë apænecä ëñente
cæcantawo. Wæætë edæ waodänique
änäni ëñente cæcantawo. Ædö ante
pönëminii.

Itota angä ëñëninque tömënäni
nämäneque wæætedö wæætë tedecöninque,
“Wa, æbänö anguiï, ante wædänitapa.
Iñæmpa, Wængonguï angä ëñëninque
Wäo cægacäimpa, ämö bai Itota
wæætë mönö imonte, ‘Quinante
pönënamäi iminitawo,’ ancædongäimpa,”
ante wædänitapa. ²⁶ Wæætë edæ,
“Waadäni tömänäni, Wængonguï beyæ
nê apænecä Wäo wodi ingacäimpa,
ante pönënanipa, ante pönente
wædinque Itota ingante nê änäni
iñömö, Wadäni piinäni wæcæ wæ,
äninque, Waodänique änäni ëñente
Wäo cægacäimpa, ante mönö ædö cæte
anguiï.”

²⁷ Ante pönëninque tömënäni Itota
ingante edæ,

—Wa, ëñënamäi imönipa.

Ante wæyönäni Itota edæ,

Iñinque botö adobai, Æcänö nê angä
inte pönö angä cæboo, ante mini äninö
ante apænedämaï incæboimpa, an-
gacäimpa.

*Mæmpocä wëna æbänö cæda, ante
odömongampa*

²⁸ Itota odömoncæte ante apænedinque,

—Mïnitö guiquënë odömonte
tedebo ate ämo ëñente apænemini
ëñëmoedäni. Iñmaï impa. Waocä
tömengä wëna mënaa iñöna ado-
canque weca godinque mæmpocä
iñömö, “Botö wëmi, bitö ñöwoönæ
yowementacodë cæte pöe.” ²⁹ Äñongä
edæ, “Wii goinëmo,” angampa.
Wæætë edæ ayæ ate pönencöninque
edæ, Botö ædö cæte Baa äninque
quëwëmoo, ante pönëninque edæ
mæmpocä nänö äninö ante ëñëninque
edæ cæcæ gocampa. ³⁰ Ayæ ate
mæmpocä wæætë wacä wengä
weca adobai mäo äñongä tömengä
edæ, “Bitö mæmpobi ämi ëñente
gocæboimpa,” ante apænecä incæte
edæ godämaï ingampa. Mäninque
ante tedebö. ³¹ Nöwo mïnitö iminite
ämopa, Mæmpocä nänö änö bai æcänö
cæcäi, ante pönëminii.

Äñongante,

—Tänocä.

Ante apæneyönäni Itota tömënäni
inänite wæætë,

—Näwangä ämopa. Mïnitö Awënë
Wængonguï Odeye nempo pö gui-
idämaï iñöminite odömäno awënë
beyæ nê æwënäni tönö onquiyænäni
mäincoo beyæ ante nê towente
quëwënäni tönö täno ponte do gui-
icædänimpa. ³² Edæ Wäo wodi
mïnitö weca ponte nö cæte töinö
ante odömöñongante mïnitö iñömö
pönëminitawogaa. Ayæ godömenque
awënë beyæ nê æwënäni incæ
mäincoo beyæ ante nê towente
quëwënäni tönö incæ do pönënanipa.
Ayæ mïnitö mänömaï cædäni
adimini incæte wæætë wënæ wënæ
mïni cædinö ante wædämaï inte
wii pönëminitapa töö, ante Itota
apænegacäimpa.

Nē aadāni inguēnēnāni incæ wīwa cædānīpa, ante

(Māadoco 12.1-12; Odoca 20.9-19)

³³ Ayæ godōmenque apænedinque Itota, “Wængonguī Awēnē æbānō cæcāā, ante eñencæminimpa, ante botō imæca quēwēnāni nāni cæinō ante odōmonte apænebo eñēedāni. Edæ iīmaī impa. Ömæ ēacā yowementacodē da da māo da caate wææ cædinque, Tömēmō ænte pīnā pīnā gāwate wæ yopænte tōmēmæ ænguīñōmō ante cædinque ææ wote badongantapa. Ayæ, Yowementacodē awēmō guidāmaī incædānimpā, ante cædinque æi wænōmēnæca gomō aquīñōmō mænongā ate nē ēacā iñōmō wabæca gocæ cædinque wadāni ömæ wite nē aate tā pedāni inānite apænecantapa. Botō yowementacodē incæ mīnitō ömæ wite aedāni. Aayōmīnite botō, Mīnitō quī, ante pancamonga pōnōmo æncæminimpa, angā Ao añōnāni wadæ gocantapa. ³⁴ Ayæ yowedepo wodo bayonte tōmengā ingante nē cædāni inānite, Mīnitō yowementacodē nē aadāni weca godinque botō yowemō incæ pancamonga āmīni ænīnque botō weca wæætē māmōmīni æmoedāni, angā godānitapa. ³⁵ Angā godinque pōnāni adinque yowementacodē nē aadāni guiquēnē nē æncæ pōnāni inānite bæi ongōnīnque adocanque ingante nanguī tæi tæi pānīnque wacā ingante godōmenque wænōnāni wængā ate ayæ wacā ingante dicaca tacadāni. ³⁶ Adinque māo apænedāni wædinque nē ēacā iñōmō wæætē godōmenque nanguī ināni da godongā gote pōnāni adinque nē aadāni guiquēnē adobaī cædāni wædānitapa.”

³⁷ Ayæ godōmenque odōmōnīnque Itota apænecantapa. “Iñinque nē ēacā iñōmō, “Tömēmō wængā ingante da godōmo gocā adinque tōmēnāni guīñente wædinque ee abainānīpa,’ ānīnque tōmengā ingante da godongā tōmangā pōnī gocantapa. ³⁸ Yowementacodē nē aadāni guiquēnē gomō ayōnāni nē

ēacā wængā dicæ pongā adinque, “Tōmengā ingampa. Wæmpocā māincoo iñi edæ iingā iñōmō nē ænguingā ingampa cæmōō. Mōnō edæ māo wænōmō wængā ate edæ mōnō quī babaimpa.’ ³⁹ Anewēnīnque tōmēnāni nē ēacā wængā ingante edæ bæi ongonte yowementacodē wææ cæte iñōmō yabæque edæ, Ömæe, ante wænōnāni wængantapa.”

⁴⁰ Ante māninganca odōmonte apænedinque Itota iñōmō tōmengā ingante nē ānīnāni inānite angantapa. “Iñinque mīnitō iñōmō, Nē ēacā pōnīnque edæ yowementacodē nē aaquēnēnāni inānite æbānō cæquingāā, ante pōnēmīni.”

⁴¹ Ante añongante tōmēnāni wæætē, —Ömæe, ante nē wænōnīnāni inānite tōmengā nāēmæ edæ, Ömæe, ante wænongā wæncædānimpā. Ayæ wæætē, Ædānidō nō cædinque yowedepo iñō yowedepo iñō tā pete pōnōnāni ænguīmoo, ante adinque awēnē, Mīnitō wæætē aacæminimpa, angā Ao ante aacædānimpā, ante apænedānitapa.

⁴² Itota ayæ tōmēnāni inānite, —Wængonguī angā eñente nāni yewæmongaintaa æbānō ongō ante mīnitō adāmaī inte āmīni awædō, angantapa.

“Dica ænte adinque, Wēnæ wēnæ inca, ante nē mænōnāni nāni wido cædinca incæ gomonga waëmonca inca iñinque tāno nāni ñōnōnīnca bæbængapa do bacapa.

Wængonguī Awēnē incæ mānōmaī cæcā adinque mōnō waocabo guīñente wædinque waa amompa,”

Ante yewæmonte impa abainīnīpa. ⁴³ Mānīnō mīni eñēnāmaī inō beyæ mīnitō Awēnē Wængonguī Odeye nempo quēwente mīni cæquēnēnō incæ ö ænte baī cæcā wæcæminimpa. Ayæ wæætē wadāni inānite tōmēmō wainca incate baī nō cædāni inānite godō angā eñēnīnque tōmēnāni wæætē tōmengā nempo quēwente waa cæcædānimpā. ⁴⁴ Botō iñōmō

mānīī dica waēmonca baī inōmo inte āmo ēñēnīnque nē wēcā iñōmō tōmengā iñōmō mānīncaā tæ go wææninque wædænque tobænte wēcā baī inongā inte botō onōwa gāānē ædæ wææncæcāimpa. Wæætē æcānō ingante Wængonguī pīinte mānīncaca tacacā inaa tōmengā guiquēnē quiēmē baī yaintai baī goquīnō anguēnē, ante pōnēmīniyaa.

⁴⁵ Ante nē aaquēnēnāni nāni cæinō ante odōmōnīnque Itota apænecā ēñēnte wædinque, Wængonguī qui, ante nē godōnāni ñænænāni tōnō Paditeoidi iñōmō, Iñæmpa mōnō imonte pīinte angā awædō, ante pōnente wædinque, ⁴⁶ Quīnō cæte tōmengā ingante bæi ongonte ō ænguīī, ante cōwā adānitapa. Incæte, Waodāni tōmānāni, Wængonguī beyæ nē apænecā Itota inongā ingampa, ante pōnēnānīpa, ante wædinque, Pīināni wæcæ wæ, ānīnque edæ ñimpo cægadānīmpa.

22

Monguimæno ante odōmonte apænecampa

(Odoca 14.15-24)

¹ Wængonguī Awēnē æbānō cæquingāā, ante ēñencæmīnīmpa, ante imæca awēnē nānō cæinō ante Itota tōmānāni inānite wæætē odōmonte apænegacāimpa.

² “Inguipoga awēnē odeye tōmengā wēñæ beyæ monguimæno ante nānō cæbaī oōnædē Awēnē Odeye iñōmō adobāī cæcampa.

³ Inguipoga awēnē iñōmō tōmengā ingante nē cædāni inānite, Wēēnē botō ānīnāni inānite wente ænte pōedāni. Angā tē tē wente ænāni ēñēnīnque edæ, Wīī pōinēwædō, ānāni. ⁴ Ēñēnte wædinque awēnē wæætē wadāni tōmengā ingante nē cædāni inānite da godōnīnque, ‘Wēēnē botō ānīnāni weca godīnque botō beyæ iīmāinō ante apænemīni ēñencædānīmpa. Botō wengā monguimæno ante wagadaidi onguīñænāni tōnō cænīnāni oguīmo pōnī ināni inānite do wænōnīnque

botō ææmænoca do eyepæ cæbopa. Botō wengā monguimæno pō beedāni, ante mæmpocā angampa, ante edæ botō beyæ apæneedāni.’ ⁵ Angā ēñēnīnque gote apæneyōnāni tōmēnāni ēñēnāmaī inte ononque wadæ godīnque pancadāniya gōnea ante goyōnāni wadāni godonte æncæte ante godānitapa. ⁶ Wadāni ayæ ongōnāni guiquēnē ēñēnāmaī inte awēnē nānō da godonte nē cædāni inānite pīinte wēnæ wēnæ cædāni wæyōnāni māo wænōnāni wænānitapa.”

⁷ “Mānōmaī cædāni ate wædinque awēnē odeye iñōmō āingā badīnque tōmengā tontadoidi inānite angā ēñēnīnque nē wænōnīnāni inānite māo capo wænōnāni. Wænāni adīnque godōmenque onconcoo tōmēnāni nāni ēadīncoo iya tānāni. ⁸ Inīnque edæ awēnē wæætē tōmengā ingante nē cædāni inānite, ‘Monguimæno do eyepæ cæte ongō incæte botō nē ānīnāni waa cædānīpa diyæ āmo bequīnānīī. ⁹ Inīnque mīnitō wæætē edæ iyænompoga iyænompoga māo godīnque æcāmenque ingante bee tēnīnque tōmēnāni tōmānāni inānite āmīni ææmæno pō becædānīmpa.’ ¹⁰ Angā ēñēnte cædinque nē cædāni taadonque pō bee bee bee tēnīnque waa cædāni incæ wīwa cædāni incæ tōmānāni inānite āñēte ænte māmōnāni pō monguimæno oncōnē pō guīdīnque eyede goto gongænte bedānitapa.”

¹¹ Ayæ, “Awēnē odeye iñōmō ēñacæ pō bedāni inānite acæ guīyongā edæ adocanque monguimæno bequī weocoo awēnē odeye nānō pōnōnīncoo incæ wēñadāmaī inte ononcooque ee mongængā. ¹² Adīnque, ‘Æmigo, bitō ædō cæte monguimæno weocoo wēñadāmaī inte ononcooque ee mongænte guībīī,’ ante āñongā edæ pæ wēēnecā. ¹³ Adīnque awēnē odeye iñōmō nē aadāni inānite ānīnque, ‘Nē monguimæno weocoo wēñadāmaī ingā ingante mīnitō goti wimpote wææ goti wēwate edæ wēmō iñōmō nāni guingo imonte Yæ yæ ante

wæyömö mǎo wido cæedāni, ante awēnē odeye angampa. ¹⁴ Mǎnōmaī nāni cædō bai adobai impa. Edæ nangui ināni inānite Wængongui, Pōedāni, angā incæte edæ wædænque ināni inānite apænte Ao ante ængampa, ante Itota apænegacāimpa.

Tæiyæ Awēnē nānō äintamō ante tededānipa

(Mäadoco 12.13-17; Odoca 20.20-26)

¹⁵ Itota mǎnōmaī apænecā eñente wædinque Paditeoidi wadæ godinque godongāmæ ponēē cōninque, Mōnō pūinte apænte anguinque ante quīnō cæmō ate Itota adodeque wapiticæ tededinque oda cæquingā. ¹⁶ Ante pōnēninque tōmēnāni nē ēmiñænāni tōnō Edodeidi inānite da godōnāni godinque Itota weca pōninque,

—Awēnē nē Odōmōmi eñēmi. Bitō nō pōnente cæbi imipa, ante do eñēmōnipa. Ayæ bitō ayōmi mōnitō tōmāmōni onōmōnique imōni adinque bitō, Waodāni æbānō anguināni, ante ayæ, Æbānō cæquīnāni, ante wædāmaī inōmi inte edæ Wængongui taadō ante guiñēnāmaī inte nō odōmonte apænebipa. ¹⁷ Ininque bitō æbānō pōnēmii. Odōmāno gobiedōno beyæ ante tæiyæ awēnē Tetædo tiguitamō nānō änintamō ante æbānō wææ yewæmonte i, ante eñencæte ante wæmōnipa edæ. Godonte edæ waa cæte intawo. Wæætē wēnæ wēnæ cæte intawo, ante apænebi eñencæmōnimpa.

¹⁸ Añōnāni Itota iñōmō tōmēnāni do, Cæmō wapiticæ tedecæcāimpa, ante nāni äninō ante do eñēninque tōmēnāni inānite wæætē edæ,

—Mīni wadō tedete wadō cæcabo iñōmō edæ quīnante botō imote, Æbānō cæmō oda cæquingā, ante cæmīni. ¹⁹ Tetædo tiguitamō nānō änintamō odōmōmīni aquīmo.

Añongā deēnadio tiguitamō adotamonque ænte pōnāni. ²⁰ Adinque tōmēnāni inānite Itota,

—Æcānō awinca bai yewæmonte badonte i. Edæ æcānō emōwo ante yewæmonte i.

²¹ Añongante,

—Awēnē Tetædo awinca bai yewæmonte badonte impa. Adocā emōwo ante yewæmonte ongō amōnipa.

Änāni eñēninque Itota iñōmō edæ, —Awēnē Tetædo quī i ininque edæ Tetædo ingante godongæimpa. Wæætē Awēnē Wængongui quī i ininque Wængongui ingante godongui i apa anewēmīni.

²² Ante Itota nānō äninō eñente beyæ, Quiēmē bai angā, ante ancai guiñente wædinque wadæ gogadānimpa.

Ædō cæte nāni omæmonguī, ante wædānipa

(Mäadoco 12.18-27; Odoca 20.27-40)

²³ Mǎniōnæ adoönæ iñonte Tado-teoidi nē, Waocā wæninque nāni omæmōnāmaī æmæwo wængampa, ante nē anewēnāni inte Itota weca pōninque, Iimainō ante eñencæte ante wæmōnipa, änānitapa.

²⁴ —Awēnē nē Odōmōmi eñēmi. Mōitee wodi mōnō beyæ ante wææ yewæmōninque iimāi ante yewæmongacāimpa. Waocā mōninque wēñæ tapæidāmaī inte wængā ate tōmengā tōniñacā wæætē owæmpoingā ingante mōninque wēñæ tapæidinque, Botō tōniñacā wodi wængā ingampa, ante pæpogacæcāimpa, ante yewæmongacāimpa. ²⁵ Nōwo iñōmō mōni cabo iñōmōnite adodāni nāni caipæ onompo æmæmpoque go mēnaa ināni iñōnāni bamoncadengā mōninque wēñæ tapæidāmaī manguiwēninque edæ nāñe wængā ate ayæmengā wæætē owæmpodingā ingante mongā. ²⁶ Ininque ayæmengā incæ adobai wēñæ omæpocā nāñe wængantapa. Ayæ wææ wacā ayæmengā adocā ingante monte ate wēñæ adobai tapæidāmaī inte edæ nāñe wængantapa. Ayæ wææ wacā adobaingā, ayæ wææ wacā tapæidāmaī inte nāñe, ayæ wææ wacā, ayæ wææ ayæmengā pōni adocā ingante mōninque wēñæ tapæidāmaī inte nāñe wængantapa.

27 Onquiyængä guiquenë owæmpote wædinque tòmangä pönï nãne wængantapa. 28 Ìninqe, Mönö ñãni òmæmonguïönæ, ante mïni äönæ ïñonte mäningä owæmpoingä ïñömö æcänö nänöogængä baquingää. Edæ tømengä ingante ïñömö edæ tømänäni manguiwengadänimpa. 29 Äñönänite Itota wæætë,

—Minitö ïñæmpa. Wængonguï angä ëñente nãni yewæmointa adämaï inte bai ämïni awædö. Wængonguï adocanque tæï piñængä inte edæ tømää cæcampa, ante pönënamäi inte edæ oda cæte ämïni awædö. 30 Edæ Wængonguï anquedoidi öönædë cöwë owodäni bai ïñönäni inte waodäni ñãni òmæmöninqe godö ñänönämaï ïnãni inte edæ mönämäi inguïñänidö anguënë. 31 Wæætë do wængainäni nãni ñãni òmæmonguïönö ante ëñencæminimpa, ante Wængonguï beyæ yewæmonte ongö adämaï iminitawo. 32 “Botö ïñömö Abadäo Wængonguïmo ingaïmo inte ayæ Itæca Wængonguïmo ingaïmo inte botö Aacobo Wængonguïmo adobo ïmo anguënë,” angacäimpa. Ante në angaingä inte edæ æmæwo wænïnãni tømënäni Wængonguingä ædö cæte inguingää. Wæætë edæ müi quëwënäni tømënäni Wængonguï ïnongä ingampa. Ìninqe edæ në wænte godïnäni incæ ayæ müinãni quëwënäni ïnänipa, ante pönenguënë änewëminii.

33 Ante apænecä ëñëninque godongämæ ëñengönäni guiquenë, Æbänö cæte Itota waa pönï odömonte apænecä ëñëmönii, ante wægadänimpa.

Wængonguï nänö wæce angaine mënea tæïneda pönï ënëpa
(Mäadoco 12.28-34)

34 Tadoteoidi guiquenë, Ædö cæte gomonga anguii, ante edæ pæ wëenedänitapa. Mänömaï Itota nänö nö äñinö beyæ pæ wëenedänipa, ante tededäni ëñëninque Paditeoidi wæætë godongämæ pönänitapa. 35 Itota æbänö cæte wapiticæ ämaingää, ante pönëñönäni adocanque idægoidi nãni

wææ angainö ante në ate ëñënongå ïñömö Itota ingante angantapa.

36 —Awënë në Odömömi ëñëmi. Wængonguï, Ìmaï cæedäni, ante nänö wææ angainecoo ante pönëninque ædedö tæïne pönï i ïñonte mönö nanguï ëñente waa cæquii.

37 Äñongante Itota ïñömö,

—Ìmäinö ante nänö wææ angaine ïñömö edæ tæïne pönï ïñonte mönö nanguï ëñente waa cæcæimpa. “Wængonguï mönö Awënë ingante bitö mïmö entawente waadedinque bitö ocai encabi inte nö pönëninque bitö önöwoca ëwocabi inte edæ tømengä ingante ædæmö waa waadete pönë.” 38 Mänine nänö wææ angainö waa pönï i ïninqe mänine täno waa cæquï impa. 39 Ayæ wade nänö angainö adobai nanguï waa ëñente cæquï impa. “Bitö nämä bitö waadete waa cædö bai adobai pönëninque wadäni ïnänite adobai waa waadete cæe.” 40 Ìmaï cæedäni, ante Möitee wodi nänö wææ angainö ayæ Wængonguï beyæ në apænëdäni nãni angainö cæcæte ante cædinque edæ mänine Wængonguï mënea nänö wææ angaine ëñente cæte beyænque edæ tømänö edæ do eyepæ cæte impa, ante Itota apænëgacäimpa.

Codito æcänö pæingä ïnongä ingää, ante apænecampa

(Mäadoco 12.35-37; Odoca 20.41-44)

41 Mänii Paditeoidi adoyömö ponte ayæ ongöñönäni Itota tømënäni ïnänite angantapa. 42 Itota ïñömö tømënäni ïnänite,

—Codito ïñömö æcänö ingää, ante pönëminii. Æcänö Wengä ïnongä ingää, ante pönëminii.

Ante äñongante Paditeoidi wæætë,
—Awënë Dabii pæingä ïnongä ingampa.

43 Äñönänite Itota edæ,

—Awënë Dabii pæingä ïnongä ïñongante edæ Dabii tømë edæ Codito ingantedö äninque quïnante, Awënë ïmipa, angacäimpa.

44 “Awënë Wængonguï incæ botö Awënë ingante apænëdinque,

Botö tömëmæ ïnō tæ contayōmi,
bitō ïmite nē püināni ïnānite bæ tabo
ate
bitō önōwa gäänē ongōñōnānite
bitō pinā gāwacæbiimpa, an-
gacäimpa.”

Ante Wængonguï Önōwoca apænecä
ēñēninque Dabii wodi yewæmongacäimpa
45 Codito nē Awënë ingampa, ante
awënë Dabii wodi nānō nē angaingä
ïnongä inte edæ adocä Codito ïñömō
ædō cæte näëmæ Awënë Dabii wodi
pæingä inguingä, ante pönenguënë
ānewēmīni.

46 Ante añongä edæ tömänāni,
Mönō ædō cæte wæætē anguū,
āninque ēñēnāmaï inte edæ pæ
wēenegadānimpa. Ayæ ïncayæ ate,
Apænebi ēñēmōnii, ante ædō cæte an-
guimoo, ante edæ tömänāni guñente
wædinque ānāmaï ingadānimpa.

23

*Paditeoidi tönō nē odömönāni
ïñānite Itota püinte angä*

*(Mäadoco 12.38-40; Odoca 11.37-54,
20.45-47)*

1 Pæ wēenedāni adinque tömengä
miñæ nē godāni godongāmæ
ongönāni nanguï ïñāni tönō ongōñōnānite
Itota tömänāni ïnānite apænegacäimpa.

2 “Nē odömönāni tönō Paditeoidi
ïñömō Möitee wodi nānō angainō
ante nē ēñēnāni inte nē nō odömōnte
apænedāni ïñānipa. 3 Mänōmaï ïñāni
adinque mīnitō ïñömō tömēnāni
āninō ante tömänō ante cōwē ēñente
cæedāni. Wæætē tömēnāni nāni
cæi bai cædāmaï ïedāni. Edæ, ïmaï
cæedāni ïmaï cæedāni, ante nāni ānō
ante tömēnāni nāmā incæ ēñēnāmaï
cædānipa. 4 Edæ mäincoo teēmencōo
mō paate wadāni önōnancapæ
cō cædancapænāni bai cædinque
tömēnāni, Wadāni guēmancædānimpa,
ante cædāmaï ïñāni inte önompogonca
adopogoncaque incæ gā ænancapænāni
ïñānipa.”

5 “Quiēmē cædāni incæ tömēnāni
cōwē, Wadāni botō ïmote waa
acædānimpa, ante cædānipa. Wadāni,
Bitō Wængonguï beyæ nāni yewæmonga
nanguï abi ïmipa, ante pönēninque
mönitō ïmōnite waa acædānimpa,
ante babæ cædinque mäninta
æmontaicate ñænæ pōni badonte
mīni tente önōncapoga wo cæte en-
capodānipa. Ayæ, Bitō Wængonguï
ingante nanguï apænebi ïmipa, ante
pönencædānimpa, ante cædinque
tömēnāni weocōo ñā cæwate ñā
doyæ pōni wēñate mongænānipa.
6 Ayæ ææmæ becæ godinque
tömēnāni, Botō tāno bete tocæboimpa,
ante wæmompaa pōni tæ contate
bete todānipa. Ayæ Wængonguï
angä nāni ēñente yewæmongainta
ate odömōincōnē pō guiidique
tömēnāni nāmanque ante pönēninque
wæmompaa pōni tæ contate todānipa.
7 Ayæ waodāni nāni godonte æïñömō
wainō pancadē goyönāni wadāni
pō bee tēninque, Nē odömōmi, bitō
ïmite waa amōnipa, ante apænedāni
ēñēninque edæ nē odömönāni
ïñömō nanguï todānipa,” ante Itota
apænecantāpa.

8 Ayæ apænedinque, “Mīnitō
guiquēnē mīnitō Awënë nē Odömōngä
adocanque pōni ïñongä mīni caipæ
ïñōmīnite wadāni, Awënë nē odömōmi
ïmipa, ante ānāmaï incædānimpa,
ante wææ cæedāni. 9 Ayæ mönō
Mæmpo adocanque pōni öönædē
quēwengä ingä adinque mīnitō waocä
ingantedō ante apænedinque, Mönō
mæmpo ingampa, ante ānāmaï ïedāni.
10 Ayæ, Mönō Awënë nē Odömōngä
ïñömō adocanque pōni Codito ïnongä
ingampa, ante ēñēmīni ïñōmīnite
wadāni, Nē āmi ïmipa, ante ānāmaï
incædānimpa, ante wææ cæedāni.
11 Ayæ edæ mīni cabo ïñōmīnite wacä
beyæ wacä nē godō cæcä ïñömō
ñænængä pōni ingä incæcäimpa.
12 Edæ nāmā ængō cæte bai cædinque
æcänō, Botō botō, āna tömengä
ïñömō edæ wææntodonte bai önōnque
bacæcäimpa. Wæætē æcänō, Botō
botō, ānāmaï inte, Önōmoque ïmopa,
āna ïñömō edæ tömengä ingante ængō
cæte bai cædāni adinque wadāni
ïñömōngä ingante waa acædānimpa,”
ante Itota tömengä miñæ nē godāni
ïñānite apænegacäimpa.

13 Ayæ nē odömönäni tönö Paditeoidi inänite Itota püinte angan-tapa. “Minitö iñömö mini pante wæquinque edæ wadö tedete wadö cæmini iminipa. Wadäni öönædē Awēnē Odeye nempo guidāmaī incædänimpa, ante mīnitö odemö tee mönete bai wææ cæminipa. Tömēmīni guidāmaī imīni inte mīnitö wadäni guicæ cæyönänite edæ tömēnāni nāni guidāmaī wæquinque edæ wææ cæminipa. 14 Nē odömömīni tönö Paditeoidi imīni mīni wadö tedete wadö cædincabo inte mīni wæquinque impa. Owæmpoīnāni oncö ö æmīni incæte mīnitö, Wantæpiyæ botö tedebö beyænque wadäni botö imote waa acædänimpa, ante Wængonguī ingante wantæpiyæ nē tedemīni inte godömenque mīni panguinque ingæimpa,” ante Itota angacäimpa.

15 Ayæ apænedinque, “Nē odömömīni tönö Paditeoidi imīni mīni wadö tedete wadö cædincabo inte mīni wæquinque. Edæ, Adocanque incæ mönitö emiñængä bacæcäimpa, ante mīnitö æpæ tömāmæ wogaa gote diqui diqui mīninque ingui-poga taadö tömänö gote diqui diqui minte ayömīni adocanque Ao angä adinque mīnitö tömengä ingante godö odömömīni. Eñēninque tömengä guiquēnē mīnitö wēnæ wēnæ goquīnō godömenque godinque gomonga nē wēnæ wēnæ cæcä badinque tadömengadænguipo nānō gomonga panguinque mīnitö miñæ tee empote gocampa töö.”

16 Ayæ, “Babetamömīni mīni wæquinque babæ ante mäomīni ate edæ oda cæte godänipa. Iñæmpa iīmaī anewēmīnipa. ‘Botö änö nöingä baquīnō anguēnē, ancæte ante æcänö, Wængonguī tæiyæ waēmö oncö tæi ongö bai impa, äna tömengä önonque tedete apænecampa, ante anewēmīnipa. Wæætē edæ, Wængonguī tæiyæ waēmö oncö odo mæ ongö bai impa, ante æcänö äna guiquēnē tömengä nö angä inte cæcæcäimpa,’ ante mīnitö iñömö babæ wapiticæ äminipa. 17 Mīni babetamö

incabo mīmö ömædē incædö. Edæ Wængonguī tæiyæ waēmö oncönē odo öñö adinque, Odo incæ godömenque waa pönī impa, ante babæ ante pönēmīnipa. Iñæmpa odo æninque, Wængonguī oncö waēmö emonguinta, ante ænte badönāni beyænque odo tæiyæ waēmö bapa, ante pönēmīniyaa.”

18 “Ayæ edæ mīnitö babæ apænedinque, ‘Botö änö nöingä baquīnō anguēnē, ancæte ante waocä, Wængonguī quī, ante baö nāni iya täimpaa tæi ongö bai impa, ante æcänö äna önonque tedecampa. Wæætē mäninö ancæte ante, Baö iya täimpaa nāni iya tanguingä bai impa, ante æcänö äna iñömö tömengä nö ante cæcæcäimpa,’ ante mīnitö babæ wapiticæ äminipa. 19 Mīni babetamö incabo ämīni eñēmoedäni. Ædö waa intawo. Nāni iya täimpaa incædö tæiyæ waēmö intawo. Wæætē edæ baö nāni iya tanguingä incæ tæiyæ waēmö intawo. Æbänö ante pönēmīni. Iñæmpa baö æninque, Wængonguī quī, ante iya tänāni beyænque baö näwäaquiringä bacampa, ante pönēmīniyaa. 20 İninque, Botö änö nöingä baquīnō anguēnē, ancæte ante waocä, Nāni iya täimpaa tæi ongö bai impa, ante æcänö äna tömengä, Iya täimpaa tönö baö nāni iya tanguingä tönö tömää beyæ, ante bai dobæ angampa. 21 Ayæ æcänö, Wængonguī tæiyæ waēmö oncö beyænque ante näwangä baquīnō anguēnē, äna tömengä Wængonguī oncö beyæ ayæ mänincönē nē owocä beyæ adobai dobæ angampa. 22 Ayæ æcänö, Öönædē beyænque näwangä baquīnō anguēnē, äna tömengä edæ Wængonguī nānō containpaa beyæ ayæ containpaa nē Contacä beyæ adobai dobæ angampa,” ante apænegacäimpa.

23 Ayæ apænedinque Itota, “Nē odömömīni tönö Paditeoidi incæ mīni wadö tedete wadö cædincabo inte mīni wæquinque impa. Tömēmīni mīni minte pædimö tönö guimö oguī wayabo tönö tömēmö mīni tä

pete ænimö tē gæte diete ganca mini cabo tē gædincoo ñö cædinque adocooque æninque, Wængongui guï, ante godöninque waa cæminipa. Incæte edæ Wængongui, Nö cæedäni, ante nänö änö ante, Godö waadete waa cæedäni, ante nänö änö ante, Wede pönente cæedäni, ante nänö änö ante mīnitö mīni wæquinque eñente cædāmaï imīnipa. Iïmaï tāno waa cæquēnēmīni inte mīnitö māincoo ayæ godömenque Wængongui ingante godöminī inguēnēmīni imīnipa. ²⁴ Babetamöminī babæ ante māomīni ate edæ oda cæte godānipa. Mīnitö, Diete ganca mīnitö māincoo ongö adinque adocooque cōwē godongui i, äninque owætaca bequīñömö guincawæ owoyö tæ wedote bai cæminipa. Wæætē edæ Wængongui nänö änö bai cædāmaï inte mīnitö edæ cāmeyo ñænængade pōni owoyö önonque ade bete bai pōnēnāmaï inte cæminipa, ante awædö,” ante Itota apænegacäimpa.

²⁵ Ayæ nē odömönāni tönö Paditeoidi inänite godömenque äninque tōmengä, “Mīni wadö tedete wadö cæcabo inte mīni wæquinque impa. Owæta tönö cængæ yabætaque ñongate bai mīnitö wadāni ayönāni nē waa cæmīni inte wæætē edæ cæncadenta inö wentaga engate bai cæminipa. Mīni wacä qui ö æinēnö ayæ nāmanque ante mīni towēnö beyæ owæta cæncadenta inö opogö tagate eyede bai impa diyæ. ²⁶ Bitö Paditeobi babetamömi eñēmi. Cæncadenta inö tāno ñā mēnongabi inique yabæta inö ñongate wainta baquīnö anguēnē,” angacäimpa.

²⁷ Ayæ, “Nē odömöminī tönö Paditeoidi incæ mīni wadö tedete wadö cædincabo inte mīni wæquinque impa. Mīnitö wao wodido bai yabæque waëmö paate bai iñonte cæncadē inö wao bayetoca ñömænte öö wayömö bai entawēmīni imīnipææ. ²⁸ Inique wadāni yabæque adinque, Mīnitö nō entawēmīni imīnipa, ante pōnēñönāni mīnitö wiwa mīni pōnēnö beyæ wadö tededinque wadö cædinque edæ

mimö wentamö entawēmīnipa,” ante Itota piingacäimpa.

²⁹ Tömēnāni inänite ayæ piinique, “Nē odömöminī tönö Paditeoidi incæ mīni wadö tedete wadö cædincabo inte mīni wæquinque. Edæ Wængongui beyæ nē apænegaināni wodido, ante mīnitö do mænönomīnipa. Ayæ, Nē nō cægaināni wodido, ante mænöninque mīnitö oncontai waëmö pōni paadomīnipa. ³⁰ Ayæ, ‘Mæmæidi nāni quēwengaiñedē quēwēmōni bai mönitö tōmēnāni tönö, Wængongui beyæ nē apænedönāni inänite māo wænönāmaï inte ee quēwencædömönimpa,’ ante äminipa. ³¹ Mänömainö ante apænedinque mīnitö, Wængongui beyæ nē apænegaināni inänite nē wænongaināni pæimōni imōnipa, ante nāmā incæ edonque pōni apænte äminipa. ³² Edæ mīnitö wæmæidi nē wænongaināni inte nāni pe ñiñængaimāmo wii eyepæ inte bai cædinque mīnitö ñöwo godömenque eyede pe ñiñænte bai capo wænömæwedāni,” ante Itota badete bai angacäimpa.

³³ Ayæ äninque, “Mīni tæntæcabo pæimīni bai imīni eñēedāni. Mīni obecabo pæimīni bai imīni eñēedāni. Mīnitö tadömengadænguipo mīni pante wæquēnēnö ante æbänö cæte aamö cæte edæ tabaimīniyaa. ³⁴ Inique Wængongui beyæ nē apænedāni tönö nē nō eñēnāni tönö nē odömönāni inänite botö ñöwo mīnitö weca da pönömo pōnānipa. Adinque mīnitö iñömö edæ pancadāniya inänite wænömīni wæncædänimpa. Pancadāniya inänite mīnitö awāa timpomīni wæncædänimpa. Ayæ pancadāniya inänite mīnitö odömöincönē bæi ongöninque tæi tæi pāmīni caate wædinque tōmēnāni wayömö quēwēnāni weca wayömö quēwēnāni weca wodii goyönāni mīnitö tee empo tee empo togænte goquimīni, ante awædö. ³⁵ Mänömaï wænæ wænæ cæyömīni edæ ñöwomīni beyænque tōmää inguipoga wepæ aa bedinque nāate baquimīnidö

anguenē. Edæ Adäo wodi wengä Abedo nē nō cægaingä wepæ tönō ayæ quēwente nē ēñente cædāni inānite godō wænönāni wængaināni tönō tömēnāni tömānāni wepæ beyæ mīnitō nāate wæcæmīnīmpa. Ayæ mīnitō Wængonguī oncō ñænæncō boyæ iya täimpaa gäänē ongōnīnque Bedequiya wengä Tacadiya ingante godō wænōmīni wængä inīnque tömengä wepæ nāate wæmīnīpa.

³⁶ Ñōwomīni mīni wepæ nāate wæquinque tömanguipo aa betinō anguēnē, ante ämo ēñēedāni,” ante Itota tömēnāni inānite idæwaa pīinte apænægacāimpa.

Eedotadēē quēwēnāni beyæ ante Itota wæcampa

(Odoca 13.34-35)

³⁷ Ayæ Eedotadēē iñōmō quēwēnāni beyæ ante pönēnīnque Itota, “Eedotadēē quēwēmīni ēñēedāni, angantapa. Wængonguī beyæ nē apænēdāni inānite mīni wænongaincabo inte ayæ Wængonguī nānō da pönönāni inānite dicaca tacamīni iñōmīnīte botō iñōmō mīnitō imīnīte waadete pönō cæinente nanguī wæbopa. Tawadiya wæmōnā iñōmō, Botō wēnāni, ante gompodīnque tæcæenēmæ wēä pönō ö ænä bai botō adobai, Botō wēnāni pōedāni, ante æpogadō añōmote mīnitō, Wīi pōinente awædō, ante Baa ämīni wætabopa. ³⁸ Ñōwo iñōmō edæ mīni quēwēñōmō önonconcooque baconcoo tamēñedāni. ³⁹ Ñōwo iñōmō edæ botō dæ añōmo mīnitō, ‘Awēnē Wængonguī emōwo beyænque pōnīnque bitō toquinque edæ waa cæcæbiimpa,’ ante mīni angūnganca mīnitō edæ botō imote adāmaī incæmīnīmpa ante ämo ēñēedāni,” ante Itota apænægacāimpa.

24

Wængonguī oncō ñænæncō bæ tate bacæimpa, ante

(Mäadoco 13.1-2; Odoca 21.5-6)

¹ Itota Wængonguī oncō ñænæncō oncodo tao gocantapa. Wadæ gocæ cæyongä tömengä miñæ nē godāni iñōmō, Wængonguī oncō ñænæncō

æbänō waa pōni mænonte iī, ante odōmoncæte ante tömengä weca pönāni. ² Ate wædinque Itota wæætē,

—Mīnitō guiquēnē mänincoo tömancoo edæ waa amīnitawo. Nāwangä ante mīnitō imīnīte apænēbopa. Mänincoo mīni acoo incæ tömanca bæ tadāni wæænca adīnque panguīmæ panguīmæ godīnque dica adocaque pōni incæ wænōmēnæca ongōnāmaī ingæimpa, ante apænægacāimpa.

Oo iinque bacæimpa, ante æbänō ate ēñenguīi, ante

(Mäadoco 13.3-23; Odoca 21.7-24, 17.22-24)

³ Māniī taodīnque Odibowænquidi pō æite tæ contate ongōñongä tömengä miñæ nē godāni adodānīque tömengä weca ponte apænēdānitapa.

—Bitō änō ante æyedēnō iinque baquīi, ante ēñencæte ante wæmōnīpa. Edæ bitō ponque æyedēnō ponguīmīi, ante ayæ mōnō inguipoga quēwēnō æyedēnō æmæwo iinque baquīi, ante ēñencæte ante wæmōnīpa. Inīnque, Æbänō mā odōmonte bai ba adīnque edæ, Oo pōni impa, ante wædinque ēñenguīmōnīi, ante ēñencæte ante wæmōnīpa.

⁴ Añönāni Itota,

—Wapiticæ odōmōñönāni mīnitō wæætē, Mōnō oda cædāmaī ingæimpa, ante nāmā wææ aquēnē quēwēmīnīi. Edæ iīmaī baquī iī ataqeedāni. ⁵ Edæ wadāni nanguī ināni botō emōwo ante babæ tedete pōnīnque, “Botō Codito inōmo imopa,” ante apænēdīnque wapiticæ māodāni godīnque edæ nanguī ināni tömēnāni miñæ oda cæte wapiticæ gocædānīmpa. ⁶ Edæ, Wabæca awēnē tönō pō bee tēnīnque wæætedō wæætē cædapa, ante tededāni ēñencæmīnīmpa. Ayæ wayōmō nāni guēadō guēa cæte wænōnō ante tededāni incæte edæ guīñente wædāmaī iedāni. Edæ mānīnō botō ānīnō bai cōwē bacæimpa. Ba incæte mōnō inguipoga quēwēnō iñōmō māniñedē wīi æmæwo iinque bacæimpa. ⁷ Adobæca quēwēnāni iñönānīte wabæca quēwēnāni ponte bee tēnīnque guēadō guēa cæquīnāni

inänipa. Adobæca awënë odeye nempo quëwëñönänite wabæca awënë odeye tömengä nänö ënempodäni mämö beë téninque guëadö guëa cæte wænonte wænguinäni inänipa. Ayæ waodäni nani cæinente wænguinque cængui incæ tömäa capo wængæimpa. Ayæ wayömö wayömö goinque pö wæcædänimpa. ⁸ Incæte mänii nani wæwënö ba ininque edæ önonque mä pönii nani wæwenguü inguinö anguënë.

⁹ Mänömainö ante Itota godömenque apænegacäimpa. “Mäniñedë edæ minitö iminite mini wæquinque ö ænte mäo godönäni wæyömüni godömenque wænönäni wæncæminimpa. Ayæ mäniñedë botö ëmöwo apænemüni beyæ tömämæ quëwënäni minitö iminite piincædänimpa. ¹⁰ Ayæ

adoyedë mini pönencabo incæ pancadäniya guingo imonte bai badinque edæ pönënämaï inte Baa anguinäni. Ayæ mini cabo incæ näëmæ piinque pancadäniya, Nänö wænguinque, ante wacä ingante näëmæ godoncædänimpa. ¹¹ Ayæ nê babæ ante apænedäni ponte, Wængongui beyæ nê apænemöni imönipa, ante odömönäni adinque pancadäniya edæ oda cæte wadö pönente baquinäni inänipa.

¹² Ayæ ëñenämaï inte nani cæpämö godömenque yebænte bai nanguü ba ate wædinque nê pönëninäni inte wodo tömänäni edæ Baa äninque waadedämaï bacædänimpa.

¹³ Edæ æcänö iimæca iinque baganca wæntædämaï inte botö ëmöwo beyæ piinte badämaï inaa tömengä edæ botö æmo beyænque cöwë wænämaï quëwencæcäimpa. ¹⁴ Ayæ edæ, Awënë Odeye nempo watapæ quëwengæimpa, ante mini pönencabo tömämæ quëwënäni inänite mäo apænemüni ëñencædänimpa. Mänömaï apænedinque iinque cæmini ate mäniñedë ate edæ iinque baquinö anguënë,” ante Itota tömengä miñä nê godäni inänite apænegacäimpa.

¹⁵ Ayæ apænedinque Itota, “Iinque, Wængongui beyæ nê apænegaingä Daäniedo wodi,

Nömæi bai öö wadö nani wo ëwenguimämo incæ Wængongui oncö tæiyæ waëmoncönë ænte mämö cö cæquinänidö anguënë, angacäimpa. Daäniedo nänö yewæmongainta adinque nê adingä iñömö tömengä do ëñëmaingampa. Incayæ ate mänömaï cö cædäni ongö adinque, ¹⁶ mäniñedë Oodeabæ quëwëmüni iñömö edæ änanquidi do wodii winonte æibæwedäni. ¹⁷ Ayæ

oncömanca ongömüni iinque mäincoo æncæte ante oncönë wæi guidämaï inte oncömancaque oncömancaque wodii winömæwedäni. ¹⁸ Ayæ

tömëmoncodë cæmini iinque yacoo æncæte ante oncönë ocæ ëmænämaï inte godömenque wodii winömæwedäni. ¹⁹ Mäniönæ iinque bayedë nê yædemadä inäni tönö goömæ nê gänönäni tönö tömënäni nani wæquimämo baquinö anguënë. ²⁰ Ayæ minitö mini wodii

winonguiönæ ante pönëninque edæ Wængongui ingante, Wüi edæ cöönædepo bacäimpa, ante ayæ, Guëmanguionæ iñonte badämaï ingæimpa, ante äedäni. ²¹ Edæ

mäniñedë waodäni nanguü nani wæwëmämo nani angä baquinö anguënë. Edæ Wængongui nänö badongaiñedë mänömaï nani wæwëmämo bai dæ äñonte ayæ godömenque ñöwo ganca dæ änompa. Ayæ

godömenque iinque baganca mänömaï nani wæwenguimämo bai dæ anguinö anguënë. ²² Edæ wantæpiyæ nani wæwenguü impa, ante adinque Wængongui, Mänimpoönæque edæ wæwencædänimpa, ante pönömenque ante änämaï ingä bai quingänö quëwenguënë dæ ancædönänimpa.

Incæte, Nê quëwenguinäni botö angainäni wüi wantæpiyæ wæwencædänimpa, ante cædinque Wængongui dobæ pönömenque äninque, Idæwaa impa, ancæcäimpa,” ante Itota apænegacäimpa.

²³ Ayæ, Iinque bayonte æbänö inguüi, ante apænedinque Itota godömenque iimäi ante apænecantapa. “Mäniñedë wadäni minitö iminite, ‘Iñömö mönö Codito ponte ongongä

tameñedäni,' ante ayæ, 'Wayömö ponte a ongongä atamönipa,' ante tededäni eñëninque mīnitō iñömō edæ eñënamaī imæwedäni. ²⁴ Wadäni māniñedē ponte a ongöninque nāmā incæ ante, Tömëmo Codito inōmo imopa, ante babæ ante tedequināni. Ayæ, Wængonguī beyæ nē apænebo inōmo imopa, ante babæ ante tedequināni. Tömënāni, Wængonguī nānō apænte ængaināni incæ æmæwo oda cædinque wapiticæ gocædānimpa, ante cædinque bamönengæ bai cædinque öönædē cæi bai cædinque nō odōmonte bai cæquināni inānipa. Incæte Wængonguī nē apænte ængaingä inte edæ ee aqingä diyæ æmæwo oda cædinque wapiticæ goquināni. ²⁵ Edæ iinque badāmaī iñonte botō ñöwo do apænebo eñëedäni. ²⁶ Iinque, pönente quëwëñömīni wadäni, 'Cōwā aedäni, önömæca mæ ongongampa,' ante änāni eñëninque mīnitō acæ taodāmaī iedäni. Ayæ, 'Oncō guimongacōnē a ongongä apa quëwëedäni,' ante änāni incæte pönënāmaī iedäni. ²⁷ Edæ nænque tamönō gämænō nāinque guiidō gämænō quingæ gote bai edæ tōmānāni edonque ayönāni botō Waobo eñagaīmo inte botō ponque poncæboimpa. ²⁸ Edæ abadæidi ñömæingāa weëo pönāni bai mīnitō tōmāmīni adoyedē iñontobæ botō weca ponguimīni imīnipa," ante Itota apænegacäimpa.

Waocä eñagaigä iūmaī pōninque cæcæcäimpa, ante

(Mäadoco 13.24-37; Odoca 21.25-33, 17.26-30, 34-36)

²⁹ Ayæ godōmenque apænedinque Itota, "Māni nāni wæwëmāmo nāni angä iinque go ate nænque iñontobæ wëmō badinque apāicā apāidāmaī ingæimpa. Nëmoncoo öönædē inō wææ tæ wææninque waa tæ waa tæ wæængæimpa. Öönædē tæi ongongaincoo incæ wancæ wancæ cæte bai wapiticæ goquinō anguënē. ³⁰ Māniñedē ate botō Waobo nē eñagaīmo inte oo pōñōmo öönædē ate bai ba adinque wabæca nāni

cabo wabæca nāni cabo tōmāmæ quëwënāni Ca ca wæcædānimpa. Wæyönāni botō Waobo nē eñagaīmo inte boguimancodē māmō pōninque botō tæi pōni piñæmo inte ñäo apāite bai waëmō emonte wææmo acædānimpa. ³¹ Māniñedē todompeta mōnō ancadeca yedæ ænete bai we ööñonte botō anquedoidi inānite da godōmo godinque tōmënāni boguimā æmænō betamonca æmænō betamonca nānō pō goinō godinque öönædē tōmāne godinque edæ Wængonguī nānō apænte ængaināni inānite añete poncædānimpa," ante Itota apænecantapa.

³² Ayæ, "Wængonguī Awënë æyedënō ponguingäa, ante botō iigowæ æbänō iwæ ante odōmonte apænebo eñëedäni. Tömëwæ mīiwæ badinque iigowæ wayabo tånā nā boca adinque mīnitō, Öñabo nānō bocañepo inte nænque nāwantedæ baquinque bocapa, ante pönëninque edæ do eñëminipa. ³³ Ayæ adobai māninō botō apænedinō bai edæ do ba adinque mīnitō, Waocä nē eñagaingä iñömō edæ do odemō pōni ongöninque edæ oo poncæcäimpa, ante eñencæminimpa. ³⁴ Nāwangä ämopa. Nōwomīni ayæ mīimīni quëwëninque wænte godāmaī iñömīni māninō botō apænedinō bai tōmānō edæ do iinque baquinō anguënē. ³⁵ Öönædē ongöñömō inguipoga tönō wo ewente bai dæ ba incæte botō angainonque guiquënē edæ dæ badāmaī inte edæ cōwë tæi ongongæimpa," angantapa.

³⁶ Ayæ, "Māniönæ æyedënō i, ante, Māñinpo ædepodō i, ante eñencæte ante mīni wædinō ante æcāmenque incæ eñënamaī ingampa. Tōmānāni eñënamaī iñönāni edæ Wængonguī anquedoidi incæ eñënamaī inānipa. Wæmpocä Wëmo incæ eñënamaī iñömote Wæmpocä iñömō tōmengä adocanque incæ edæ nē eñengä ingampa," ante Itota apænegacäimpa.

³⁷ Ayæ godōmenque iūmaī ante apænecantapa. "Waobo nē eñagaīmo inte botō ponguionæ

iinque bayedē guiquēnē Nōwee wodi Docā nāni angaingā nānō quēwēñedē dodāni nāni quēwengāī bai adobāī edæ quēwenguīnāni inānīpa. ³⁸Māniñedē æpæ ayæ ānāmaī iñedē nē quēwengāīnāni iñōmō ōnonque cænte bete, Monguingā, ante godonte ate mōninque tōmēnāni Docā Nōwee oncō bai wipo mænonte nānō guiquiōnæ iinque baganca quēwencægadānīpa. ³⁹Tōmēnāni inānīte æpæ ænte gocæ cæganca tōmēnāni, Æpæ anguīpa, ante ēñēnāmaī nāni quēwengāī bai adobāī ēñēnāmaī cæyōnāni botō Waobo ēñagāimō inte adobāī edæ iñontobæ poncæboīpa. ⁴⁰Māniñedē waoda tōmēmoncodē guēa cæyōna adocanque ingante ō ænāni goyongā adocanque wæætē a ongoncæcāīpa. ⁴¹Ayæ onquiyæna guēa apo cæyōna adocanque ingante ō ænāni goyongā adocanque wæætē a ongoncæcāīpa,” ante Itota odōmonte apænegacantapa.

⁴²Ayæ, “Awēnē æyedēnō ponguingāā, ante ēñēnāmaī imīni inte mīnitō mīmīni inte edæ cōwā aquēnē quēwēnāni. ⁴³Nē awēmō ængā æyedēnō ponguingāā, ante ēñente bai nē ēacā iñōmō, Bæ tate guīdāmaī incæcāīpa, ante wææ wānoncædongāīpa, ante ēñente quēwēedāni. ⁴⁴Wao Wēmo ēñagāimō inte botō adobāī mīnitō ēñēnāmaī iñōmīni do iñontobæ ponguīmo imo ante mīnitō botō ponguīnō ante wānō cōedāni,” ante Itota angacāīpa.

Awēnē quincoo ante nē ædæmō aacā

(Odoca 12.41-48)

⁴⁵Ayæ Itota iīmaī apænegacantapa. “Inguipoga awēnē iñōmō, Æcānō nē ēñengā inongā inte botō quincoo ante ædæmō aacā inguingāā, ānīnque, Mānōmaī inte cæcā ingante adīnque botō āmo ate tōmengā nē angā badīnque botō oncōnē quēwēnāni inānīte ædæmō aadīnque cænguī eyepæ iñonte godongā cæncædānīpa, angampa. ⁴⁶Ante awēnē wayōmō gote ponte ayongā, Nē cæcā botō ānō ante ēñente cæcampa, ante adīnque

awēnē wæætē tōmengā ingante godō waa cæcā tōmengā ingante godō waa cæcā ate nē waa cæcā iñōmō edæ waa tocæcāīpa. ⁴⁷Mīnitō imīnīte nāwangā ante apænebopa. Nē ēñente cædingā ingante awēnē, Bitō botō māincoo tōmancoo edæ nē aabi bacæbiīpa, ancæcāīpa.”

⁴⁸“Wæætē edæ tōmengā ingante nē cæcā incæ wēnæ wēnæ cæcā inongā inte mīmōno pōnēwēnīnque, Botō awēnē wabānō wantæpiyæ pōnāmaī imaingampa, ante pōnengā iinque æbānō babāī. ⁴⁹Tōmengā edæ wadāni nāni cæcabo iñōnānīte nāēmæ pīīnīnque tæi tæi pangā iinque ayæ nē tī nāmæ bete quidi quidi dowænte badāni tōnō godongāmæ cænte becā. ⁵⁰Iinque tōmengā, Æōnædō ponguingāā, ante wædāmaī iñongante, Æyedēnō ponguingāā, ante ēñēnāmaī iñongante edæ awēnē iñontobæ pongā wæbaingampa. ⁵¹Pōnīnque awēnē iñōmō ēñēnāmaī cædingā ingante baō wido wido todīnque tōmengā ingantedō ānīnque, Nē wadō tedete wadō cædīnāni nāni panguīnō gote tōmēnāni tōnō godongāmæ ongonte wæcæcāīpa. Ante cædīnque awēnē tōmēnāni nāni guingo imonte Ca ca wæyōmō wido cæcā wæcæcāīpa,” ante Itota apænegacāīpa.

25

Baquedāni nāni cæinō ante odōmongampa

¹Māninganca apænedīnque Itota ayæ godōmenque odōmonte apænegacāīpa. “Māniñedē ōnædē Awēnē Odeye nempo quēwēnāni iñōmō baquedāni diete ganca nāni cæi bai adobāī cæcædānīpa. Baquedāni iñōmō, Edēningā ñōwoōnæ monguingā, ante tica ēnēincade ænīnque tōmengā ingante bee tencæte ante tao godānīpa. ²Baquedāni incæ tōmēnāni tīnco ganca ināni nē ēñēnāni iñōnāni edæ adoganca tīnco ganca ināni nē ēñēnāmaī ināni inānīpa. ³Nē ēñēnāmaī ināni guiquēnē tōmēnāni tica ēnēincade ænīnque gongapæncade ænāmaī goyōnāni, ⁴nē

ēñēnāni guiquēnē gongapæncadedē godō pe ññānte gongapæ eyepæ ænte godānīpa. ⁵ Mānōmaī ænte gote ayōnāni nē monguingā wantæpiyæ pōnāmaī dæ angā adinque tōmēnāni tōmānāni edæ mōinente ædo ædo cædinque mō ññānīpa.”

⁶ “Mō ññōnāni ayaōnæneña pōni bayonte edæ, ‘Nē monguingā pongā ataqueedāni. Tao bee tenguenē quēwēmīni.’ ⁷ Ante aa pedāni ēñēninque edæ baquedāni tōmānāni ængæ gantidinque, Tica ēñēincade waēmō tī wodōnote bacæimpa, ante wadæ wadæ cædānīpa. ⁸ Cæyōnāni nē ēñēnāmaī ināni guiquēnē nē ēñēnāni inānite, ‘Mōnitō tica ēñēincade edæ wodo mōnæ emōmpa cæmīni. Mīnitō næænīmæ incæ pancapāa pōnōmīni æncæmōnimpa.’ ⁹ Aññōnāni, ‘Īñæmpa, mōnitō beyæ mīnitō beyæ adobaī wī eyepæ imaimpa, ante awædō. Edæ godoncæte ante nē mānāni weca gote godonte æedāni.’ ¹⁰ Anāni ēñēnte godonte æncæ goyōnāni edæ nē monguingā do pongā adinque nē ēñēnte eyepæ næænīnāni ĩñōmō monguingā tōnō godongāmæ monguimæno oncōnē becæ guidāni ĩninque edæ odemō tee mōnete intapa. ¹¹ Ayæ ate edæ wadāni gongapæ eyepæ ænte pōññōnāni do tee mōnete ĩ adinque tōmēnāni, ‘Awēnē, awēnē ēñēmi. Odemō wī ænebi guimōnie.’ ¹² Ante wæyōnāni awēnē wæætē, ‘Mīnitō imīnite nāwangā amōpa. Mīnitō æmīnidō imīni, ante botō cōwē adāmaī imōpa,’ angampa.” Māninque ante odōmoncæte ante Itota ĩmaī angantapa.

¹³ “Mīnitō guiquēnē, Æōnædō ĩ, æyedēnō ĩ, ante ēñēnāmaī imīni inte edæ wānō conte quēwēedāni,” angacāimpa.

Tadento nāni godonte cēinta ante odōmongampa

(Odoca 19.11-27)

¹⁴ Ayæ æbānō baquī, ante odōmoncæte ante Itota, Waocā nē ēacā nānō cæi baī bacæimpa, ante apænægacāimpa. “Nē ēacā wayōmō gocæte ante cædinque tōmengā

ingante nē cædāni inānite āñete māmongā pōññōnānite, Botō ēadinta incæ pōnōmo æninque mīnitō nē aamīni badinque botō beyæ godonte æncæmīnimpa. ¹⁵ Āninque nē ēacā ĩñōmō, Nē cædāni æbānō nangui cædinque aaquīnāni, ante adinque tadento ññængade nāni godonte æinta incæ adocanque ingante ōnōmpo æmæmpoque mānimpota pædæ pōnōninque wacā ingante tadento mentaa mānimpota pædæ pōnōninque wacā ingante tadento adotaque pædæ pōnongampa. Ayæ wadæ gocā. ¹⁶ Īninque tadento ōnōmpo æmæmpoque mānimpota nē æningā ĩñōmō do godinque godonte æ godonte æ cædinque ōnōmpo æmæmpota tōmengā nānō ænimpota adopota æñongā edæ tadento ōnōmpo tipæmpoga bapa. ¹⁷ Ayæ tadento mentaa nē æningā adobaī godonte æ godonte æ cædinque mentaa nānō æninta adopota wæætē æñongā edæ tadento mēa go mēa bapa. ¹⁸ Wæætē adotaque nē æningā guiquēnē tōmengā wadæ godinque onguipodē ææ wodinque awēnē godonte æinta æninque tee moncate wē wodongampa,” angantapa.

¹⁹ Ayæ, “Wantæpiyæ ate tōmēnāni awēnē adodō pōninque, Botō qui eyepæ æncæboimpa, ante cædinque tōmēnāni nāni ænte aadinta ante cōwā acantapa. ²⁰ Ōnōmpo æmæmpoque tadento nē æningā ĩñōmō edæ æmæmpota adopota nānō godonte æninta ænte pōninque awēnē ingante, ‘Awēnē, bitō botō imote, Aacæbiimpa, ante tadento ōnōmpo æmæmpoque mānimpota pædæ pōnōmi æntabopa. Æninque botō godonte ænte godonte ænte edæ nangui cædinque edæ mānimpota adopota æmæmpota dobæ æmoi ae.’ ²¹ Angā wædinque tōmengā awēnē ĩñōmō, ‘Badogaa. Botō imote nē cæbi ĩnōmi inte bitō ædæmō aabi inte ñōwo waa cæbi æmōpa. Bitō wædænque æninque cōwē ædæmō aabi adinque botō ñōwo nangui pōni botō ēadincoo pōnōmo æninque bitō wæætē edæ nē aabi bacæbiimpa.

Botö bitö awënë inömo inte watapæ tote quëwëmo iñömote bitö edæ äänömonque bai bitö watapæ tote quëwenguinque pöe, angantapa.”

²² “Ayæ mäa tadento nē æningä adobai pöningue, ‘Awënë, bitö botö imote, Aacæbiimpa, ante tadento mentaa mänimpota pædæ pönömi æningue botö godonte ænte godonte ænte edæ nanguï cædinque edæ mentaa mänimpota adopota dobæ æmoï ae.’ ²³ Angä wædinque tömengä awënë iñömö, ‘Badogaa. Botö imote nē cæbi inömi inte bitö ædæmö aabi inte ñöwo waa cæbi æmopa. Bitö wædænque æningue cöwë ædæmö aabi adinque botö ñöwo nanguï pöni botö ëadincoo pönömo æningue bitö wæætë edæ nē aabi bacæbiimpa. Botö bitö awënë inömo inte watapæ tote quëwëmo iñömote bitö edæ äänömonque bai bitö watapæ tote quëwenguinque pöe, angantapa.”

²⁴ “Ayæ ate edæ adotaque nē æningä wæætë pöningue, ‘Awënë, bitö nē waadedämaï cædömi inte bitö wii gadiñömö wayömö incæ edæ do wogaabipa. Ayæ bitö wii miñömö wayömö incæ edæ do tä pete gæte bai æmipa, angantapa. ²⁵ Æningue botö edæ ancai guiñente wædinque edæ tao godinque onguipodë ææ wote bitö tadento daga wëningue edæ wë wodontabopa. Bado, bitö qui incæ edæ do æmipa, angantapa.”

²⁶ “Angä ëñente wædinque tömengä awënë wæætë, ‘Botö imote nē cæbi inömi inte bitö wiwa pönëmi inte wæntæye cæbi abopa. Botö æbänö gadämaï iñömö do wogaabopa, ante bitö edæ do ëñëmitapa. Botö minämaï iñömö do tä pete gæbopa, ante bitö äninö edæ do ëñëniimi inte cæbitapa töö. ²⁷ Æningue mäninö ante do ëñëniimi inte bitö edæ padata botö godonte æinta æningue edæ nē godonte ænäni weca godonte ænguënëmi imitapa töö. Mänömaï cæbi bai botö ocæ ëmænte pöningue edæ botö qui do æningue wadäni näni guidöninta tönö edæ do æncædömoimpa töö.’ ²⁸ Äningue tömengä ingante nē

cædäni inänite awënë angantapa. ‘Minitö ñöwo iingä tadento adotaque tömengä nänö nææninta ö æningue edæ tadento onompo tipæmpoga nē næængä ingante pædæ godömini æncæcäimpa. ²⁹ Edæ nē ëadäni inänite tömänäni inänite godömenque godonte ingæimpa. Æningue tömënäni qui nanguï ëacædänimpa. Wæætë edæ ëadämaï inte ömæpocä ingä guiquënë tömengä nänö ëadincoo wædænque pöni i incæte edæ ö ænte dæ ba wæcæcäimpa. ³⁰ Ayæ edæ mäningä botö imote nē cædingä incæ wæntæye inongä inte cædämaï iñongante minitö wëmö iñömö näni guingo imonte Ca ca wæwëñömö tömengä ingante edæ guitodonte wido cæmini wæcæcäimpa,’ ante tömengä awënë angampa.”

Tömämæ quëwënäni inänite apænte angæimpa, ante

³¹ Itota mänömainö ante odömonte apænedinque godömenque apænegacäimpa. “Botö anquedoidi tönö godongämæ pöningue botö Waobo nē ëñagäimo inte ñäö apäite bai nē ëmömo inte poncæboimpa. Mäniñedë botö pöñedë botö Awënë tæ contaimpaa tæ contadinque edæ öönædë waa pöni ongönäni bai waa pöni ongoncæboimpa. ³² Mäniñedë tömämæ quëwënäni botö weca godongämæ ponte a ongoncædänimpa. Ayæ nē aacä tömengä cæninäni inänite apænte adinque bodegoidi æmænö cönöningue cabodaidi æmænö nänö cönönö bai cædinque botö iñömö edæ imæca quëwënäni tömänäni inänite apænte adinque pancadäniya inänite æmænö gönöningue wadäni inänite æmænö gönömo ongoncædänimpa. ³³ Obegaidi bai nē ëñente cædäni inänite botö tömëmæ inö gönöningue wæætë cabodaidi bai nē ëñënämaï cædäni inänite botö dipæmæ inö gönöncæboimpa.”

³⁴ “Gönöningue botö Awënë Odeyebo inömo inte botö tömëmæ inö nē ongönäni inänite ancæboimpa. ‘Botö Mæmpo nänö nē waademini

inte pöedäni. Tömengä inguipoga nänö badongaiñedē äninque, Awënë Odeye nempo mini quëwenguinö impa, ante do badongacäimpa. İninque Awënë Odeye nempo mini quëwenguënönö ñöwo ænte quëwëedäni. ³⁵ Edæ botö gue ænente wæyömo minitö cængui nē pönömīni cængaboimpa. Tepæ gæwænte wæbo adinque minitö nē pönömīni begaboimpa. Botö Wabo imo inte cowodē bai pömo adinque minitö, Pö guī, ämīni eñëninque minitö weca guīte eñagaboimpa. ³⁶ Ayæ ömaabo inte wæyömo minitö pönömīni wëñagaboimpa. Wënæ wënæ inte wæyömo minitö ponte nē waadete cægaimīni iminipa. Tee mönete oncönē ongonde wæwëñömete botö weca eñacæ nē pongaimīni inöminī inte minitö ñöwo wæætē edæ botö nempo guīte quëwencæminīpa, ancæboimpa.”

³⁷ “Ämo eñëninque edæ nē nō cädäni guiquënë, ‘Awënë iñæmpa æyedönö bitö gue ænente wæyömi dicæ pönömōni cæmitawogaa, ancädänīpa. Ayæ tepæ gæwæñömi dicæ pönömōni bebitawogaa. ³⁸ Æyedönö wacä incæ pömi adinque mönitö dicæ, Pö guī, antamönīyaa. Ayæ ömaabi adinque dicæ pönömōni wëñabitawogaa. ³⁹ Ayæ wënæ wënæ inte wæyömi incæ tee mönete wæyömi incæ mönitö dicæ acæ pontamönīyaa.’ ⁴⁰ Ante wæyönäni botö Awënë Odeyebo inömo inte edæ tömënäni inänite, ‘Iñæmpa botö tönīñadäni iñönänite adocanque öngonganque iñongante minitö waa cægaimīni inte edæ botö imote do waa cæte iminīpa ämo eñëedäni, ante tömënäni inänite ancæboimpa, angantapa.

⁴¹ “Ayæ botö dipæmæ inö nē ongönäni inänite botö nē Awënë inömo inte ancæboimpa. ‘Minitö nē tente wæquënēmīni guiquënë ñöwo edæ gä gobæwedäni. Edæ Wængonguī do badöninque, Wënæ tönö tömengä anquedoidi nänö nē emīñænäni tönö wantæpiyæ cöwë

wænämaī nāni bæcote wæquīñömo, ante nänö badongaiñömo minitö mänīñömo edæ gote guībæwedäni, ante edæ ancæboimpa. ⁴² ‘Edæ botö gue ænente wæbo adinque minitö edæ dicæ pönömīni cæntabogaa. Gæwænte wæyömo minitö dicæ pönömīni betabogaa. ⁴³ Ayæ Wabo imo inte cowodē bai pömo adinque minitö dicæ, Pö guīe, ämīnitawogaa. Ömaabo inte wæyömo weocoo dicæ pönömīni wëñatabogaa. Wënæ wënæ inte wæbo incæ tee mönete wæbo incæ minitö iñömo edæ dicæ eñacæ pömīnitawogaa, ancæboimpa.”

⁴⁴ “Ämo eñente wædinque nē eñënämaī inäni iñömo, ‘Awënë eñëmi. Bitö æyedönö gue ænente tepæ gæwænte wæbitawo. Ayæ wabi bai inte æyedönö pömi atamönīyaa. Weocoo ömaabi inte wæbi adinque, daicawo gawæmi adinque, tee mönete wæbi adinque mönitö bitö beyæ dicæ cädämaī intamönīyaa.’ ⁴⁵ Äñönäni botö iñömo edæ tömënäni inänite, ‘Iñæmpa wacä ingante öngonganque iñongante minitö cädämaī ingaimīni inte botö imote edæ mäninö do cädämaī ingamīnīpa. Ämo eñëmaimīnīpa, ante pīincæboimpa. ⁴⁶ İninque tömënäni nāni tente wæwenguinö incæ æmæwo wadæ gocädänīpa. Wæætē nē nō cädäni guiquënë cöwë wænämaī nāni quëwenguinö æmæwo gocädänīpa, ante Itota apænegacäimpa.”

26

Itota ingante bæi ongongæimpa, ante cädänīpa

(Mäadoco 14.1-2; Odoca 22.1-2; Wäö 11.45-53)

¹ Ayæ mäninö tömänö iinque apænete ate Itota tömengä miñæ nē godäni inänite apæncantapa.

² —Mëönaa go ate wodo pänta gogaionæ bai Patowa mönö ææmæ cænguionæ impa, ante do eñëmīnīpa. Mänionæ iñonte botö Waobo eñagaïmo iñömete botö imote bæi ongöninque edæ, Awæ ñænquedimæ cæte iingä ingante töö godöninque

daagö timpote wææ tiwadinque edæ æænö gö cæte wænöedäni, ante botö imote pædæ godönäni æncædänimpa, ante apænegacäimpa.

³ Mäniñedë, Wængongui qui, ante nê godongä ñænængä pöni Caipato oncönë godongämæ pöningue wadäni nê godönäni ñænænäni tönö oodeoidi inänite nê aadäni nani Picæncabo iñömö, ⁴ adoyömö pönëningue, Mönö æbänö babæ cæte Itota ingante awëmö bæi ongonte ænte wængongui, ⁵ ante pönënanäni incæte,

—Iñæmpa ææmæntedæ iñonte wænömö bai tömänäni ængui bate Yæ yæ ante piinte cæcædönänimpa, ante pönente wædingue mönö ædö cæte mäniñedë cæqui, ante wægadänimpa.

Itota ocaboga onquiyængä ogui wapæ gao cæcacampa
(Mäadoco 14.3-9; Wäö 12.1-8)

⁶ Itota mäniñedë Betänia godingue nê baadingä Timönö oncönë guii eñadinque cæncongantapa. ⁷ Cæncöñongä wacä onquiyængä iñömö tömengä weca pö guidingue ogui wapæ nani nangui godonte ænimæ dica adabatodo waincadedë pe niñænte nänö mänimæ incæ ñowo ænte mämö Itota ocaboga edæ gao cæcacantapa. ⁸ Mänömaï cæcä adingue Itota miñæ nani gocabo iñömö piiningue,

—Iñæmpa önonque gao guëmente bai cæcampa töö, änänitapa. ⁹ Edæ iimæ iñömö nangui pöni æninta beyæ godonte ænguënemæ imæmpa. Godonte ænte bai ömæpodäni inänite wæætë godonguënë apa.

¹⁰ Ante piinäni wædingue Itota iñömö,

—Quimæ piwëminii. Iingä onquiyængä iñömö botö imote waa pöni cæcä apa quëwëminii. ¹¹ Iñæmpa ömæpodäni ante miini äninäni minitö weca cöwë quëwëñönäni botö wæætë minitö weca wiï wantæpiyæ quëwencæboimpa. ¹² Mänimæ ogui wapæ botonga gadongadingue tömengä botö baö daga wenguingue

eyepæ iñonte edæ öni paacantapa. ¹³ Minitö iminite näwangä ante apænebopa. Waa pöni botö apænedö apænedingue tömämæ æyömömë apænedäni eñënäni mäningä onquiyængä nänö cædinö ante adobai tededäni eñente pönencædänimpa, ante Itota apænegacäimpa.

Itota ingante Codaa odömönte godoncæte ante cæcampa

(Mäadoco 14.10-11; Odoca 22.3-6)

¹⁴ Ayæ mäniñedë nani, Dote, äincabo iñönäni adocanque Codaa Icadote nani änogä iñömö, Wængongui qui, ante nê godönäni ñænænäni weca gocantapa. ¹⁵ Godingue apænecantapa.

—Botö, Itota æyömönö ongongä, ante pönö odömömo ate minitö bæi ongonte æmiini iningue æpotadö, Eyepæ i, ante pönömiini æmaimoo.

Angä eñëningue tömënanäni padata tiguitamö incæ todëinta ganca tee mampote tömengä ingante pædæ godönäni. ¹⁶ Äningä inte tömengä cöwë cöwä adingue, Äbänö cæte Itota ingante odömönte pædæ godömo ate ænguänäni, ante pönente cægacäimpa.

Päö tönö owæta Itota pædæ pönongä cænte bedänipa

(Mäadoco 14.12-25; Odoca 22.7-23; Wäö 13.21-30; 1 Coodintoidi 11.23-26)

¹⁷ Mäniñedë oodeoidi päö yedæ æmpoqui ömæmö i nani ææmæ cæte cænguionæ tæcæ ba adingue Itota miñæ nê godäni iñömö, Wodo pänta gogaiönæ bai Patowa mönö ææmæ cænguionæ impa, ante pönente wædingue tömengä weca ponte änänitapa.

—Æyömönö bitö beyæ Patowa ææmæ ante cæmöni ate cænguimii.

¹⁸ Äñönäni tömengä nänö emiñænäni mënäa inate äningue,

—Minatö waodäni nani quëwëñömö godingue onguinængä botö nê äningä ingante bee tëningue minatö iimainö ante apænemina eñengäeda. “Mönö Awënë iimaï angampa. Botö wænguionæ oo pöni bapa cæbii. Botö nê emiñænäni tönö botö bitö oncönë Patowa ææmæ ponte

cæncæmönimpa, angampa,” ante ämina eñengæda, angä.

¹⁹ Eñente wædinque tömëna Itota nänö änö bai cædinque, Patowa ææmæ cænguï impa, ante cædatapa.

²⁰ Gäwadecæ bayö Itota tönö, Dote, nani äincabo ponte godongämæ cæncæte ante ongönänitapa. ²¹ Cæncöñönani Itota,

—Nawangä ante apænebo eñeedäni. Mini cabo incæ adocanque, Encædänimpa ante botö imote odömönte pædæ godonguingä ingampa.

²² Ante apænecä eñëninque tömënäni wæwente bayönäni adocanque adocanque,

—Awënë, botö imotedö ante dicæ apænebitawogaa.

²³ Ante tedeyönäni Itota wæætë,

—Botö tönö guëa adotaca në müi cædingä iñömö tömengä botö imote në odömönte pædæ godonguingä ingampa. ²⁴ Edæ dodäni Wængonguï beyæ nani yewæmongainö bai cædinque botö Waobo eñagaimo inte cöwë wænte goquënëmo imodö angüënë. İninque edæ botö imo në odömönte godonguingä iñömö tömengä nänö wæquinque ingæimpa. Mäningä wii eñate bai waa toquëngä incædongäimpa.

²⁵ Ante apænecä wædinque Codaa iñömö Itota ingante në odömönte godonguingä iñömö edæ,

—Awënë në Odömömi eñëmi, botö imotedö ante ämitawogaa.

Ante añongante edæ Itota,

—Tömëmi nämä incæ, Botö imotedö, ante do tedebi imipa.

²⁶ Ante apænecantapa. Ayæ cæncöñönäni Itota päö bæi ongönte æninque Wængonguï ingante waa ate apænedinque päö pä æninque tömengä miñæ në godäni inänite pædæ godö pædæ godö cæcantapa.

—Botö baö bai impa, ante pædæ pönömo æninque minitö Ao ante cæedäni.

²⁷ Äninque ayæ bequimæ owætaca bæi ongönte æninque Wængonguï ingante waa ate pönente apænedinque pædæ godöninque,

—Botö wepæ bai impa, ante pædæ pönömo æninque tömämïni Ao äninque godongämæ intaca beedäni, angantapa. ²⁸ Botö wepæ iimæ bai impa. Wængonguï do apænedinque, Botö pönö cæbo ate minitö Ao ämïni İninque mönö godongämæ waa cæte quëwengæimpa, angacäimpa. Nöwo adobai müine äninque apænebopa. Botö wepæ ante Ao ämïni inte mönö godongämæ waa cæte quëwengæimpa. Edæ nanguï imïni müni wënæ wënæ cædinö beyæ ante ñä mënongaquimæ impa. ²⁹ Nawangä ämopa. Botö Mæmpo Awënë Odeye iñongä botö tömengä nempo quëwëninque minitö tönö godongämæ müimæ botö beganca mänimæ yowepæ ñöwo æmæwo bebo tamëñedäni, ante Itota apænegacäimpa.

Dicæ abogaa, ante Pegodo anguingä, ante apænecampa

(Mäadoco 14.26-31; Odoca 22.31-34; Wäö 13.36-38)

³⁰ Ayæ Wængonguï ingante ämotämïni ante tao godinque Odi-bowænquidi godänitapa. ³¹ Goyönänite Itota apænecantapa.

—Wængonguï beyæ yewæmöninque, “Në aadingä ingante tacabo dæ wängä İninque edæ cæningäidi obegaidi panguimæ goquimpa,” ante nani yewæmonte angainö bai cædinque minitö tömämïni ñöwoönæ woyowotæ incæ botö dæ ämo beyæ guingo imonte badinque edæ panguimæ goquimïni iminipa. ³² Panguimæ gomïni incæte botö edæ ñäni ömæmonte ate Gadideabæ täno gote a ongöñömo minitö ayæ pöedäni.

³³ Angä wædinque Pegodo guiquënë,

—İñæmpa dæ ämi beyæ tömänäni guingo imonte badinque panguimæ godäni incæte edæ botö guiquënë cöwë panguimæ godämaï incæboimpa.

³⁴ Äñongante Itota wæætë,

—Bitö imite nawangä ante apænebo eñëe. Nöwoönæ woyowotæ incæ tawadiya pedämaï iñönte bitö botö imotedö ante wadö ante

apænedinque, Dicæ abogaa, ante edæ mempoga go adopoque anguimi imipa.

³⁵ Angä eñente wædinque,

–Iñæmpa bitö tönö guëa wæmo incæte botö cöwë, Dicæ abogaa, ante edæ änämaï incæboimpa.

Äñongä tömengä miñæ nē godäni tömänäni adodö ante angadänimpa.

Guetëmänii iñömö Itota Wængongui ingante apænecampa
(*Mäadoco 14.32-42; Odoca 22.39-46*)

³⁶ Mänii godinque Itota yabæ incæ Guetëmänii nāni äñömö tömengä miñæ nē godäni tönö gocantapa. Mäniñömö pöinque tömengä tömēnāni inänite,

–Tæ contate ongöñömini botö godömenque godinque Wængongui ingante apænete pömoedäni.

³⁷ Äninqe Pegodo tönö Tebedeo wēna inate ænte mäocä goyönāni Itota iñömö nangui wæwente badinque ancaï guiñēninque, ³⁸ tömēnāni inänite,

–Botö wænguimāmo pönö anguēnē, ante botö önöwoca incæ pæmænte wæte wængui wæ, ante wæbo tamēñedäni. Minitö guiquēnē eamonca godongämæ wææ aacöedäni.

³⁹ Äninqe Itota wædænque godömenque godinque guidömēmæ ñongænte Wængongui ingante apænecantapa. “Botö Mæmpo, bitö Ao äninqe edæ ti nā wænguimæ bai ö ænte bai cædinque botö imote edæ, Wænāmaï incæbiimpa, ämi ininqe botö edæ waa tobaïmopa. Incæte botö änönö bai wii cædinque wæætē tömēmi änönö bai cæe,” ämopa.

⁴⁰ Ante apænecä ate tömengä miñæ nē godäni weca adodö ponte ayongä tömēnāni mö ñönāni adinque tömengä Pegodo ingante,

–Botö tönö wänö conguēnēmini incæ minitö adoque ooda incæ wii aacöminii. ⁴¹ Mimöno waa cæinēmönipa, ante ewocayömini baö aquiñö eñamini inte wæntæye baminipa. Ininqe edæ wänö cöinque

nämä beyænque ante Wængongui ingante apænedinque edæ, Wii wēnæ wēnæ cæinēmöni bacæmönimpa, ante apæneedäni.

⁴² Äninqe Itota adodö wadæ gote wæætē apænedinque, “Botö Mæmpo, botö bedāmaï iñömote bitö ö ænāmaï imi ininqe botö cöwë bitö ämaï becæboimpa.”

⁴³ Ante Wængongui ingante apænete ate ponte ayongante möwo möinente æmö cæte wædinque mö ñönāni. ⁴⁴ Adinque edæ tömengä wæætē adodö godinque ñöwo mempoga go adopoque nänö apænedinö ante adodö ante Wængongui ingante inque apænecantapa. ⁴⁵ Ayæ tömengä miñæ nē godäni weca wæætē adodö pöinque,

–Iñæmpa cöwë mömini edæ cöwë guëmāmini awædö. Aquēnē quēwēedäni. Botö Waobo eñagaïmo inte botö wænguïönæ do bayonte edæ botö imote nē wēnæ wēnæ cædäni inänite nē godö odömonguingä iñömö do godongäi ataqueedäni. ⁴⁶ Ängæ gantite mönö gocæimpa. Botö imo nē odömonte godonguingä obo pöni pongä tamēñedäni, angacäimpa.

Itota ingante bæi ongonte ænänipa
(*Mäadoco 14.43-50; Odoca 22.47-53; Wäö 18.2-11*)

⁴⁷ Ayæ apæneyongä edæ Codaa wodi tömēnāni nāni, Dote, ante gocabo adocabo iningä incæ ñöwo pongantapa. Wængongui qui, ante nē godönāni ñænænāni tönö oodeoidi inänite nē aadäni nāni Picæncabo tönö da pönönāni pöinque wadäni tæiyænāni adobaï yaēmē nææninqe canta næænāni inte Codaa miñæ pönänitapa. ⁴⁸ Doyedē iñömö nē odömonte godoncæ cæcä Codaa iñömö tömengä miñæ poncæ cædäni inänite iïmaï ante wēenēñedē apænedingä inongäimpa. “Botö odömonte queë bemömo adinque minitö wæætē, Tömengä ingampa, ante adinque tömengä ingante edæ bæi ongonte ö æedäni.”

⁴⁹ Ante do äningä inte Codaa ñowo iñömö Itota weca pöningue,

—Awënë nē Odömömi imi, bitö imi.

Äningue edæ waa cæte bai queë bemongantapa. ⁵⁰ Adinque Itota wæætë,

—Botö miñæ nē godimi eñëmi. Mäninö ante bitö ponque pö cæbawe.

Äñongä wadäni tömengä weca pöningue pædæ gopo bæi ongonte Itota ingante ænänitapa.

⁵¹ Wængonguï qui, ante nē godongä ñænængä pöni ingante nē cæcä mäniñömö ponte a ongongä adinque Itota tönö pöningä adocanque pædæ guipote yaëmë o togænte æningue mäningä nē cæcä ingante tæi päningue önömonca wangö tamoncacantapa. ⁵² Adinque Itota iñömö tömengä ingante,

—Yaëmë adodö mini tie, ämopa. Edæ yaëmë nē o togænte næænäni tömänäni inänite yaëmenca adobai tacadäni wæncædänimpa. ⁵³ Iñæmpa æbänö ante pönëmi edæ. Wængonguï anquedoidi adocabodänique tei miido ganca iñönänite botö Mæmpo ingante apænebo bai tömengä do angä ininque anquedoidi näni cabo näni cabo incæ önömpo tipæmpoga go mencabodäniya botö beyæ ponte cæbainäniya, ante pönëmiyaa. ⁵⁴ Incæte botö Codito inömo inte botö Mæmpo ingante mänömaï apænebo eñente cæcä bai dodäni, Codito iïmaï wæncæcäimpa, ante Wængonguï angä eñente näni yewæmongainö ante ædö cæte iinque bacædönimpa, ante awædö, ante apænegacäimpa.

⁵⁵ Ayæ wæætë ñowo pönäni inänite Itota apænecantapa.

—Minitö iñæmpa, Bitö nē ö ænïmi imipa, ante bai cædinque botö imote canta tönö yaëmë næænte ö æncæte ante pömïni awædö. Botö Wængonguï oncö yabæcönë iïmö iñö iïmö iñö apænecöñömo minitö botö imote yao ongönämaï ee aminitapa töö.

⁵⁶ Incæte minitö Wængonguï beyæ nē apænedäni näni yewæmongainö bai ñowo iinque baquinque cæmïni abopa.

Ante apænecä eñëningue tömengä emiñængä nē godinäni tömänäni edæ näwæ panguimæ cæte wodii winongadänimpa.

Në Apænte näni Änoncabo weca Itota ongongampa

(*Mäadoco 14.53-65; Odoca 22.54-55, 63-71; Wäö 18.12-14, 19-24*)

⁵⁷ Ayæ Itota ingante nē yao ongonte ænäni guiquënë, tömengä ingante mäo godinque edæ, Wængonguï qui, ante nē godongä ñænængä pöni inongä Caiapato weca ænte godänitapa. Mäniñömö do pöningue nē wææ ante odömönäni tönö oodeoidi inänite nē aadäni näni Picæncabo tönö do a ongönänimpa. Mäniñömö Itota ingante ænte mämönäni pongacäimpa. ⁵⁸ Pegodo guiquënë tömengä miñæ ayæ ayæ godinque, Wængonguï qui, ante nē godongä ñænængä pöni inongä oncö yacömoyæ iñömö pö guiddinque, Itota ingante æbänö cæquinänii, ante wææ wänönäni weca pöningue tæ contate waa acongantapa.

⁵⁹ Wængonguï qui, ante nē godönäni ñænænäni tönö nē Apænte näni Änoncabo tömänäni, Mönö apænte ante wænömö wæncæcäimpa, ante cædinque, Itota nänö wænguinque wænæ wænæ cæcä ingampa, ante æcänö babæ ante anguingäa, ante diqui diqui minönänimpa. ⁶⁰ Incæte nanguï inäni ponte babæ apænedäni incæte, Æcänö eyepæ babæ änaa, ante edæ dæ angä wædänitapa. Ayæ ate mënaa nē babæ wapiticæ änöna inte awënëidi weca pö guite, ⁶¹ apænedinque,

—Iingä, “Wængonguï tæiyæ waëmö oncö ongö incæte botö iñömö tæi piñæmo inömo inte godö cæbo bai wo tænguimæ wææmainpa. Ayæ mëönaa go adoönæque iñonte botö wæætë do mænömaïmopa,” angä eñentamönapa töö. ⁶² Ante apænedä eñëningue nē godongä ñænængä pöni inongä incæ ængæ gantidinque Itota ingante,

—İñæmpa pæ wëenebii. Tömëna bitö imitedö ante godö äninque nana äninö ante bitö æbänö ämii.

⁶³ Äñongä Itota cöwë änamai edæ pæ wëenecä. Adinque nê godongä ñænængä pöni inongä wæætë,

—Wængongui nê Quëwengä inte tömengä nanö ëñëñongä edæ näwangä ante apænebi ëñëmönii, ämopa. Mönö Codito iñömö Wængongui Wengä inongä ingampa. Bitö iñæmpa mänimidö inömi imitawo.

⁶⁴ Mänömai angä ëñëninque Itota wæætë,

—Tömëmi bitö äninö bai mänimodö inömo imopa. Incæte botö godömenque apænebo ëñëedäni. İncayæ ate botö iñömö edæ Waobo ëñagaimo inte edæ Wængongui nê Tæi Piñængä ingä tömëmængä inö tæ contabo adinque minitö ayæ ate botö öönædë boguimancodë pömo acæminimpa.

⁶⁵ Ante apænecä ëñente wædinque nê godongä ñænængä pöni inongä piinte badinque, Eñente awædö, ante bai cædinque edæ nämä weocoo wänä ñænte,

—Wængongui ingampa mänömai cæquingäa. Edæ tömengä nämä incæ babæ ante nê wënæ wënæ apænecä ininque idæwaa. Wacä tömengä ingantedö, Wënæ wënæ cæcä atabopa, ante nê ancæcäimpa, ante ñöwo diqui diqui minämai ingæimpa. Tömengä nämä Wængongui Wengä inte bai babæ ante nanö anewëninö ante do ëñëmini inte minitö, ⁶⁶ edæ æbänö ante pönëminii.

Ante äñongä nê apænte änäni guiquënë,

—Nänö wænguinque anewengampa töö.

⁶⁷ Ante apænte äninque edæ pancadäniya Itota tömengä awinca towæ tänömöninque tæi tæi pänänitapa. Wadäni guiquënë tömengä ingante tamöninque,

⁶⁸ tömengä ingante,

—Bitö Codito imitawo. Æcänö bitö imite awëmö nê pänaa, ante Wængongui beyænque apænedinque apænebi ëñëmönii, ante badete togadänimpa.

Pegodo incæ, Dicæ abogaa, angampa

(Mäadoco 14.66-72; Odoca 22.56-62; Wäö 18.15-18, 25-27)

⁶⁹ Ayæ Pegodo guiquënë mänü yæipodë yacömöñäa contate ongöñongä onquiyængä nê cæcä iñömö tömengä weca ponte apænedinque,

—Mäningä Gadideabæ quëwëningä Itota tönö bitö guëa cægömitapa töö.

⁷⁰ Ante apæneyongä tömänäni nani ayömö Pegodo,

—Dicæ. Bitö änö ante æbänö ämii, ante dicæ ëñëmogaa.

⁷¹ Ante äninque Pegodo yademö gäänë tao gote ongongä adinque wacä onquiyængä wæætë godongämæ ongönäni inänite apænedinque,

—Mäningä adobai Itota Näatadeta quëwëningä tönö nê cægöningä ingä aedäni.

⁷² Ante apæneyongä Pegodo wæætë,

—Wængongui ëñëñongä botö näwangä ämo ëñëedäni. İngä onquiyængä nanö nê äningä ingante botö dicæ abogaa, angantapa.

⁷³ Ayæ wantæ ate mänüñömö ongönäni Pegodo weca pöninque,

—İñæmpa Itota tömengä tedecä bai adode nê tedebi inte bitö tömengä miñæ mini nê gocabo adobi imipa töö.

⁷⁴ Äñönäni edæ Pegodo wæætë, Wængongui ëñëñongä apænedinque botö nöingä ämopa, ante Wængongui ëmöwo ante babæ tedewëninque tömënanäni inänite,

—Mïni nê angä ingante dicæ abogaa.

Mänömai ante tæcæ anewëñongä edæ tawadiya dobæ petapa. ⁷⁵ Pe wædinque tömengä, Æ Itota nanö äninö bai impa, ante wæcantapa. Itota, “Tawadiya pedämai iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguimi imipa,” angantapa. Ante Pegodo, Nöwo nanö pequinque do pecampa, ante wædinque oncodo taote edæ

guingo imonte wædinque edæ Ca ca wægacäimpa.

27

Itota ingante Pidato weca ænte mäo gönönäni

(Mäadoco 15.1; Odoca 23.1-2; Wäo 18.28-32)

¹ Ayæ ñäo bayonte, Wængonguï qui, ante nê godönäni ñænænäni tönö oodeoidi inänite nê aadäni nani Picæncabo tönö apænte äninque edæ, Itota ingante wænongæimpa, ante godongämæ Ao angadänimpa.

² Äninque tömengä ingante yao on-gonte goti winte æninque edæ odömänoidi beyæ Oodeabæ awënë gobedönadodo Pidato ingante mäo gönönäni ængacäimpa.

Codaa wodi iimaï cædinque wængampa

³ Ayæ, Itota ingante wænongæimpa, änäni eñente wædinque Codaa tömengä ingante nê godöningä guiquënë, Æ tömengä nänö wænguinque cæboinö ante pönëmogaa, ante guingo imonte wæcantapa. Ayæ, Wængonguï qui, ante nê godönäni ñænænäni tönö nê aadäni nani Picæncabo adodö æncædänimpa, ante todëinta padatamö tömënäni nani pönontamö adodö pædæ godoncæte ante gocan-tapa.

⁴ Ayæ tömënäni inänite,

—Iñæmpa cæboo. Edæ Itota wënæ wënæ cædämaï iningä iñongante botö nê godönimo inte wiwa cæbo imo ante awædö.

Ante añongante tömënäni guiquënë, —Tömëmi wënæ wënæ cædämi inte wentamö bitö entawënö ad-inque mönitö ædö cæte wæquimönii. Tömëmi edæ nê cædämi inte edæ abaimipa töö.

⁵ Änäni wædinque edæ tiguitamö incæ Wængonguï tæiyæ waëmö oncönë wo wææntodöningque Codaa oncodo tao godinque edæ nämä önömenca wëä æi goti guemencate dobæ wægacäimpa.

⁶ Mäninta wo wææntodongä ate wædinque, Wængonguï qui, ante nê

godönäni ñænænäni incæ tiguitamö yao yao ongonde æninque,

—Wepæ näadintamö adinque Wængonguï Baa ancæcäimpa, ante pönente wædinque mönö, Wængonguï qui, ante ædö cæte godonguimöö.

⁷ Ante godongämæ pönencöningque tömënäni, Oodeoidi inämaï inäni wodido bacæimpa, ante ömæ nê dai bædongä eadiömæ incæ mäniï tiguitamö godonte ængadänimpa.

⁸ Iñinque wepæ näadintamö godonte nani ænimæ ante, Wepænguipo impa, ante nani pemönimæ iñömö ñöwo ganca impa.

⁹ Iñinque do iñömö Eedëmiya wodi Wængonguï beyæ iimaï ante nänö apænegainö bai iinque batimpa.

“Idægoidi, Tömengä beyæ mänimopotamö godonte ængæimpa, ante nani änimopotamö incæ todëinta tiguitamö padatamö æninque, ¹⁰ tömënäni Wængonguï botö imote nänö äninö bai eñente cædinque edæ dai bædongä eadiömæ godonte ænänitapa,” ante Eedëmiya nänö angainö bai do iinque batimpa.

Pidato weca Itota ongongampa (Mäadoco 15.2-5; Odoca 23.3-5; Wäo 18.33-38)

¹¹ Itota iñömö awënë gobedönadodo Pidato weca a ongöñongante awënë gobedönadodo iñömö tömengä in-gante,

—Bitö oodeoidi Awënë Odeyebi imitawo.

Äñongante,

—Bitö tömëmi änö bai botö mänimodö imopa, Itota angantapa.

¹² Ayæ, Wængonguï qui, ante nê godönäni ñænænäni tönö nê aadäni nani Picæncabo guiquënë Itota in-gante äninque, Wënæ wënæ cæbipa töö, ante añönäni tömengä edæ pæ wëenecä. ¹³ Ate wædinque Pidato wæætë,

—Bitö æpogadö wënæ wënæ cæbi imipa, ante nanguï änäni eñënämaï inte bitö ædö cæte edæ pæ wëenebii.

¹⁴ Äñongante Itota iñömö tömënäni nani äninö ante adodeque ante apænedämaï ingä adinque awënë

gobedönadodo wæætē, Quiēmē bai pæ wēenecā awædō, ante wægacäimpa.

Itota wæncæcäimpa, änänipa
(*Mäadoco 15.6-20; Odoca 23.13-25; Wäo 18.38-19.16*)

¹⁵ Mänimæ awënē gobedönadodo mäninēdē wadepo iñō wadepo iñō cōwē iimaī cædongäimpa. Oodeoidi ææmæ nāni cæyedē gobedönadodo iñömō, Nē tee mönete ongönāni inänite adinque mīnitō æcänō ingante ämīni ñimpo cæbo goquingää, ante añongä änāni eñëninque tōmengä tōmēnāni nāni äningä adocanque ingante ñimpo cæcä godongäimpa. ¹⁶ Mäninēdē adocanque wēnæ wēnæ nänō cædinō beyæ tee mönete a ongongampa, ante tōmānāni do eñënönānimpa. Māningä emōwo Badabato inongäimpa. ¹⁷ Ininque nanguī ināni godongāmæ pönāni ate Pidato tōmēnāni inänite edæ,

—Æcänō ingante mīnitō beyæ ñimpo cæbo abæ tawænte gocä ænguimīni. Badabato ingante ñimpo cæbo gocä ænguimīni. Wæætē edæ Itota Codito mīni anongä ingante ñimpo cæbo gocä ænguimīni, an-gacäimpa.

¹⁸ Edæ do iñömō, Itota gomonga cæcä ate wædinque tōmēnāni tōmengä ingante piinte adönānimpa. Mäninō beyænque tōmēnāni Itota ingante bæi ongonte botō nempo ænte māmō pædæ pönönānitapa, ante Pidato do eñëngantapa.

¹⁹ Ayæ odömānoidi nāni apænte anguimpaa ayæ ongöñongä Pidato nänöogængä iñömō wacä ingante da pönongä pöninque Pidato ingante nänöogængä beyæ apænecantapa. “Botō ñowoönæ möwocodē wīlmōninque māningä nē nō cædongä beyæ nanguī wogæi wogæi cæwēnente wæbopa cæbii. Bitō tōmengä ingante gam-podāmaī inte gomō aquēnē quēwēē, ämopa,” ante bitō nänöogængä angampa, angantapa.

²⁰ Angä eñente wæyongä, Wængonguī qui, ante nē godönāni ñænænāni tönō nē aadāni nāni Picæncabo nāni äincabo guiquēnē wadāni nē godongāmæ

ongönāni inänite änänitapa. Mīnitō Pidato ingante iimaī äedāni. Badabato ingante ñimpo cæbi gocæ. Itota ingante wæætē ämi wænönāni wængæe, ante äedāni, änänitapa. Awënēidi incæ mänōmaī änāni eñëninque godongāmæ ongönāni Ao änänitapa. ²¹ Awënē Pidato iñömō tōmēnāni inänite äninque,

—Mēnaa ongōna iñōnate mīnitō æcänō ingante ämīni ñimpo cæbo goquingää.

—Añongante,

—Badabato ingante ämönipa.

²² Änāni wædinque Pidato wæætē, —Ininque Itota Codito mīni anongä ingante æbänō cæquimoo, ante ämīni.

—Añongante tōmānāni edæ,

—Awæ ñænquedimæ ämi cæte gönonte wænönāni wængæe tōö.

²³ Änāni eñëninque Pidato ayæ,

—Inæmpa quīnō wēnæ wēnæ cæcantawo.

—Añongä tōmēnāni godömenque yedæ äninque adodō,

—Ämi awāa timpote wænönāni wængæe.

²⁴ Ante ancaa anewēñönāni Pidato iñömō, Tæcæ wæætedō wæætē änāni inte tōmēnāni wēnæ wēnæ cædāni wæqui wæ, ante guñente wædinque ayæ, Ædō cæte botō godömenque cæquimoo, ante pönente wædinque edæ æpæ pi ñiñænte tōmēnāni ayönāni önompo mempodinque tōmēnāni inänite angantapa.

—Tōmengä wēnæ wēnæ cædāmaī iñongante botō, Wængongäimpa, änāmaī imo inte tōmengä wæpæ nädāmaī imo äedāni. Wæætē mīnitō guiquēnē, Wæncæcäimpa, ante nē änimīni inte edæ näate bacæminimpa, ante adinque botō mempobo äedāni.

²⁵ Angä eñëninque tōmānāni Ao äninque edæ,

—Mōni äninō beyænque mönitō incæ mönitō wēnāni incæ tōmengä wæpæ beyæ näate bai bacæmönimpa tōö.

²⁶ Änāni ate awënē gobedönadodo Pidato tōmēnāni nāni äninō ante eñente cædinque edæ Badabato

ingante ñimpo cædinque tømënäni nempo pædæ godongä ænänitapa. Wæætë edæ Itota ingante edæ Pidato angä æmontai badöimenca tæi tæi pänäni ate tømengä ingante ñænque quepote awäa nani gönonguinque edæ da godongä ænte godänitapa.

²⁷ Awënë gobedönadodo nänö wææ wänönäni guiquënë Itota ingante ænte godinque awënë gobedönadodo oncönë Podætodio nani ancönë mangui guiyongä tontadoidi bacabo Itota weca godongämæ añete pönänitapa. ²⁸ Pöninque tømënäni, Awënë ïmi inte awënë weocoo wëñacæbiimpa, ante bai cædinque badete todinque Itota weocoo gä tadongadinque wæætë opatawæ ëmoncoo pönö da wëñadinque, ²⁹ daa mongæmenca bai æninque que cædinque, Awënë poganta wencacæbiimpa, ante bai cædinque pönö daga wencadänitapa. Ayæ cæwipa ænte mämö pædæ pönonte änäni æninque tømengä tømëmæmpoca pæ mangä adinque tømënäni da guicapodinque tømengä ingante,

—Badogaa, bitö oodeo awënë odeyebi ïmpææ, ante badete togadänimpa.

³⁰ Ayæ tømengäa towæ towæ tänongadinque cæwipa æninque tæi tæi ancaa pancadänitapa. ³¹ Ayæ ïinque badete todinque tømënäni opatawæ ëmoncoo gä tadongadinque tømengä nämä weocoo daga wëñadänitapa. Ayæ edæ tømengä ingante awæ timpote wænoncæte ante töö æmænte ænte tao mäodäni gogacäimpa.

Itota ingante awäa timpodäni wængampa

(Mäadoco 15.21-32; Odoca 23.26-43; Wäö 19.17-27)

³² Ænte mäo godinque tømënäni Tidëne quëwengä Timönö ingante bee téninque tømengä ingante edæ, Bitö ægodöe, Itota ingante möni timpoquiwæ ænte mongænte goe, änäni mongænte gocantapa.

³³ Mänii Itota ingante ænte mäo godinque Godogota nani añömö

mönö tededö “Ocatainö” ïñömö mäniñömö pönänitapa. ³⁴ Mäniñömö pönäni ate wadäni, Nantate beyæ becæcäimpa, ante cædinque yowepæ biinömæ nani ämæ tönö moncapæ adoyömö wempo cædëninque pædæ pönö cæyönäni tømengä önonque yædæ bedinque edæ Baa angantapa.

³⁵ Ayæ Itota ingante awæ ñænquedimæ nani ænte pöniwäa töö godöninque pönö timpodinque wææ tiwadinque ængæ gantidënanitapa. Ængæ gantidënanäni ate wægöñongä tømënäni wæætë tømengä weocoo ïni ante, Æcänö quinsa nö ta adinque tømengä mänincoo æncæcäimpa, ante wææntodöninque adocooque adocooque ænänitapa. Mänömai cæyönäni Wængongui beyæ nani apænegainö bai ïinque cætimpa. “Botö weocoo ïni ö æninque tømënäni nani caboque wacä ingä wacä ingä nënempodänitapa. Ayæ, Æcänö quinsa nö ta adinque tømengä mänincoo æncæcäimpa, ante cædänitapa.”

³⁶ Tømënäni tæ contadinque tømengä ingante wææ aadänitapa. ³⁷ Ayæ, Itota në wænguënegä ingampa, ante quïnante änänii, ante edonque acæimpa, ante cædinque tømënäni, “Ïingä Itota ïñömö oodeoidi Awënë Odeye ïnongä ingampa,” ante yewæmöninque edæ awæmpaa tømengä ocaboca ïnö tee tinte wo cædänitapa.

³⁸ Ayæ wada në ö ænte quëwëniina ïnate adoyedë tømengä tönö adocanque tømëmæ ïnö adocanque dipæmæ ïnö godö timpote ængæ gantidëdäni wængongadäimpa. ³⁹ Ayæ wodo pænta në godäni guiquënë Itota ingante godö wënæ wënæ ante badete todinque pica pica cædinque, ⁴⁰ tømengä ingante wapiticæ apænedinque,

—Bitö ïnämpa Wængongui tæiyæ waëmö oncö incæ bæ tate wo ëwëninque edæ mëönaa go adoönæque ïñonte do mænoncæ ämitawo. Mänömai cæcæ äniinte bitö tømëmi edæ nämä incæ cæte quëwëmæwe. Bitö nö Wængongui Wëmi ïmi ïinque

edæ o togæmpote o togæwate wææe, ämönipa töö.

⁴¹ Äñönäni edæ, Wængongui qui, ante nē godönäni ñænänäni guiquenē nē odömönäni tönö ayæ oodeoidi inänite nē aadäni nāni Picæncabo tönö adobai iimaï ante edæ badete todänitapa.

⁴²—Tömengä, Wadäni quēwencädänimpa, ante waa cæcantawoo. Ñowo iñäempa ædö cæte nämä waa cæte quēwengungä. Idægoidi awenē odeye ingampa diyæ ti wæænte goquingä. Edæ ti wæænte gocä adinque mönitö wæætē edæ, Nawangä impa, ante pönemaï wædö.

⁴³ Ayæ nämä ingantedö äninque tömengä edæ, Botö Wængongui Wëmo inömo imopa, ante angämææ. Tömengä, Wængongui cöwē pönö cæcæcäimpa, ante wede pönengä iñongante Wængongui wæætē tömengä ingante edæ waa acampa diyæ ñimpo cæcä goquingä, ante badete todänitapa. ⁴⁴ Ayæ nē ö æna guiquenē tömengä tönö godongämæ timpote wægöna ininque Itota ingante piinte adobai wænæ wænæ ante badete togadäimpa.

Itota wængampa

(*Mäadoco 15.33-41; Odoca 23.44-49; Wäö 19.28-30*)

⁴⁵ Tæcæbæcä pönï bayö tömämæ iñontobæ wëmö badinque ayæ ayaönäa wæiganca mä mämonte bai inimpa. ⁴⁶ Ayæ edæ ayaönäa wæiyonte Itota nanguï pönï yedæ äninque, “Edii, Edii, nēma tabatäni,” äninque mönö tededö, “Botö Wængonguiñaa, botö Wængonguiñaa, ædö cæte botö imo emö cæte gobiya.”

⁴⁷ Ante wæcä eñëninque godämæ ongönäni guiquenē,

—Æ. Ediya ingante aa pecä apa.

⁴⁸ Äñönäni adocanque do pogodo gote önætämö ænte pöninque biinömæ bai önömænque ænte aa bedöninque næænte, Cæwipaca pædæ æænömo becæcäimpa, ante cæyongä, ⁴⁹ wadäni guiquenē,

—Ee aquenē. Ediya edæ ponte wabänö cæcä quēwengungä abäimpa, angadänimpa.

⁵⁰ Itota iñömö wæætē ogæ tededinque do wængacäimpa.

⁵¹ Ininque edæ Wængongui oncö tæiyæ waëmoncönē weocoo odemö nāni wææ wodöincoo adoyedē önönæca inö tæcæguedē pönï tænguimæ wææntapa. Ayæ goinque bayonte dica incæ tæ gämæntapa. ⁵² Ayæ wao wodido incæ wi ænote bayonte edæ Wængongui quinäni do wængainäni incæ pancadäniya ñäni ömæmöninque ⁵³ tömënäni wodido abæ tawænte godänitapa. Edæ ñowo iñömö, Itota ñäni ömæmongä ate tömënäni nē ñäni ömæmöninäni inte Eedotadëe nāni waëmö quēwëñömö ponte a ongöñönäni nanguï inäni agadänimpa.

⁵⁴ Mänii goinque do pö adinque ayæ, Æbänö cætimpa, ante tömänö adinque edæ tontado capitäo tönö wææ wänönäni tönö ancai guñëninque,

—Nawangä impa. Iingä iñömö Wængongui Wengä ingainö ante pönenguenē, angadänimpa.

⁵⁵ Do iñömö Itota Gadideabæ quēwente pönongante onquiyænäni nanguï inäni tee empote pöninque tömengä beyæ nē cædinäni inte ñowo adodäni adoyömö pö gongæninque pömö adänitapa. ⁵⁶ Mäadiya Mäagadadänä tönö wacä Mäadiya inatapa. Iinä iñömö Tantiago tönö Ootee badä inantapa. Ayæ Tebedeo wëna tömëna badä tönö wadäni adobai Itota wæñongante gobæ agadänimpa.

Itota wodi baö inï mäo daga wënänipa

(*Mäadoco 15.42-47; Odoca 23.50-56; Wäö 19.38-42*)

⁵⁷ Ayæ gæwadecæ bayonte Ootee nē nanguï eacä incæ Itota miñæ nē gocä do badingä inte Adimatea iñömö pægaingä inte pongä ingantapa.

⁵⁸ Tömengä iñömö ñowo Pidato weca godinque, Itota wodi baö inï pönömi æmoe, angantapa. Pidato Ao äninque nē cædäni inänite, Tömengä baö ee amini æncæcäimpa, angantapa.

⁵⁹ Itota wodi baö ini gämiyate päde wæænonte ænte godinque waemö weocoo ninocoo nani ancoo wini wini caadinque, ⁶⁰ Ootee, Botö wodido baquimpa, ante dicamontaa nanö wodintatodë müintatodë mäo guidö ñö cædinque daga wengantapa. Ayæ dicabo da päñæ pönö tee mönodinque wadæ gogacäimpa. ⁶¹ Iimaï cæyongä Mäadiya Mäagadadënä tönö wacä Mäadiya tönö Itota wodido obo con-tate acönatapa.

Itota wodido iñömö wææ wænönäni a ongönäni

⁶² Ayæ guëmanguïönæ bacæ cæpa, ante nani täno cæönæ iinque cædäni ate iimö ate, Wængonguï qui, ante nê godönäni ñænænäni tönö Paditeoidi guiquenë Pidato weca ponte ⁶³ tömengä ingante äninque,

—Awënë eñëmi. Mäningä nê babæ äningä iñömö tömengä müingä iñedë apænedinque, Mëönaa go adoönæque iñonte botö ñäni ömæmoncæboimpa, ante nanö äninö ante pönente wæmönipa. ⁶⁴ Ayæ tömengä miñæ nê godinäni incæ tömengä baö ini awëmö ö æmainäni ante edæ wæmönipa. Ænani iinque tömënäni, “Dobæ ñäni ömæmongäimpa,” ante godömenque babæ änäni edæ wënæ wënæ babaimpa cæbii. Ñöwo wææ wænönäni inänite ämi godinque tömënäni mäningä nanö wodintatodë tæëmö tee mönodinque mëönaa go adoönæque ganca wææ wänonte acædänimpa. Edæ wii godömenque wënæ wënæ bacæimpa, ante cæcæbiimpa, ämönipa.

⁶⁵ Äñönäni Pidato wæætë,

—Bado, wææ wænönäni mä ongönäni. Minitö tömënäni inänite ænte mäomini goyönäni minitö wæætë mini eñëninö bai do cædinque tæëmö tee mönote cædäni.

⁶⁶ Angä eñente godinque tæëmö mönodinque Itota nanö wodintatodë dai tee bædodänitapa. Ayæ, Awënë emöwo adinque wi ænodämaï incædänimpa, ante dai bæyömö aquiñedë ongontoca da guidonte awënë emöwo adimpaca yewæmante

bai bagatimpa. Ayæ wææ wænönäni inänite ænte mäo gö cædäni wææ wänongadänimpa.

28

Itota do wæningä inte ñäni ömæmante quëwengampa

(Mäadoco 16.1-8; Odoca 24.1-12; Wäö 20.1-10)

¹ Mänii guëmanguïönæ iinque go ate wacä tëmäna baquinque ñäo ba iinque Mäadiya Mäagadadënä tönö wacä Mäadiya iñömö Itota wodido acæte ante gogadaimpa. ² Awënë Wængonguï anquedo do wææ pöninque edæ dicabo wëä godö oo wi ænocantapa. Ayæ goinque nanguï ocæ ocæ cætimpa. Anquedo iñömö dicaboga tæ contacantapa. ³ Tömengä awinca näinte cæ bai emönongä inte tömengä weocoo näämänta pönii emoncoo mongænte a ongongä. ⁴ Adinque edæ nê wææ wænönäni guiquenë ancai guiñente wædinque do do wäate bai badinque æmæwo wænte bai öñönänitapa. ⁵ Mänii onquiyæna pönönate Wængonguï anquedo iñömö,

—Guiñenämaï ieda. Itota nani awäa timpodäni wæningä ingante minatö diqui diqui miminapa, ante edæ do eñëmopa. ⁶ Iñömö edæ dæ angampa. Tömengä nanö äninö bai cædinque do edæ ñäni ömæmöninque tao gocäimpa. Pö guiite aeda. Iintatodë nanö öñontatodë iñömö edæ önantatoque impa. ⁷ Ayæ nê adimäna inte edæ quingæ pogodo gote tömengä miñæ nê godinäni inänite gode ante apænedinque, “Itota dobæ ñäni ömæmongäimpa ataquedäni, äeda.” Ayæ iñömö tömengä Gadideabæ täno godinque a ongönongä minitö gote aedäni, ante minatö gode ante apæneda eñëedäni. Bado, ämo eñëminapa edæ.

⁸ Angä eñëninque tömengä wodido abæ tawænte wadæ godinque tömëna, Ancai guiñente wæte todadö, äninque watapæ todinque Itota miñæ nê godinäni inänite gode ancæ pogodo godatapa. ⁹ Goyöna edæ Itota incæ

iñontobæ mǎo bee tēninque edæ, Mīnatō, angā ēñēninque edæ iñāna tōmengā weca pōninque ōnōwaca ædæ wæænte mō ongōwate, Wængonguī Awēnē imidō anguēnē, ante watapæ apæneyōna, ¹⁰ Itota iñōmō edæ,

—Guiñēnāmaī ieda, angantapa. Ayæ, Mīnatō botō biwīidi inānite gode āninque iīmaī äeda. Mīnitō Gadideabæ godinque botō imote acæmīnimpa, ante tōmēnāni inānite äeda, ante Itota angacāimpa.

Nē wææ wānōnināni babæ ante apænedānīpa

¹¹ Onquiyæna gode ancæ goyōna Itota wodido nē wææ wānōnināni pancadāniya wæætē tōmēnāni nāni quēwēñōmō godinque, Wængonguī quī, ante nē godōnāni ñænænāni inānite apænedinque, iīmaī cætimpā, ante tōmānō ante apænedānitapa.

¹² Apænedāni ēñēninque edæ nē godōnāni ñænænāni guiquēnē nē aadāni nāni Picæncabo tōnō pōnē cōninque godongāmæ Ao āninque tontadoidi nē wææ wānōnāni iñōnānite tīguitamō padatamō bacoo godōninque, ¹³ tōmēnāni inānite iīmaī angadānimpa.

—Wadāni Itota wodi baō ante wæyōnāni edæ mīnitō ōnonque, Mō cōñōmōni tōmengā miñæ nē godīnāni awēmō ponte ō ænānitapa, ante babæ apænecæmīnimpa. ¹⁴ Ayæ mānīnō āñōmīni awēnē gobedōnadodo ēñēninque, Quīmæ mōwēmīnīi, ante pīngā adinque edæ mōnitō wæætē wææ cædinque tōmengā ingante āmōni ēñēninque tōmengā pānāmaī ñimpo cæyongā mīnitō guiñente wædāmaī incæmīnimpa.

¹⁵ Äninque nē godōnāni ñænænāni iñōmō nē wææ wānōnināni inānite nangui tīguitamō godōnāni ænānitapa. Mānintamō æninque awēnēidi babæ nāni ānīnō baī adodō ante apænedinque, Tōmengā miñæ nē godāni ō ænānitapa, ante babæ wapiticæ apænegadānimpa. İninque tōmēnāni nāni babæ apænedō ēñēninque edæ oodeoidi gode ante

tededinque godōmenque ñōwo ganca ayæ wapiticæ ante tededānīpa.

Itota, Apænecæ goedāni, angampa (Mäadoco 16.14-18; Odoco 24.36-49; Wäö 20.19-23)

¹⁶ Ōnōmpo æmæmpoque go adodānique Itota miñæ nāni godincabo guiquēnē mānīi Itota nānō ānō baī cædinque Gadideabæ godinque ānanquidi æiyōnāni ¹⁷ Itota a ongongā adinque tōmengā weca ædæ wæænte, Wængonguī Awēnē imidō anguēnē, ante watapæ apæneyōnāni pancadāniya guiquēnē, Wabānō i, ante pōnēnāmaī ingadānimpa. ¹⁸ Itota iñōmō tōmēnāni weca pōnōmenque pōninque,

—Wængonguī pōnō cæcā beyænque botō iñōmō ōönædē Tæiyæ Awēnē inōmo inte inguipoga adobaī nē Tæiyæ Awēnē badinque nāmā tæi pīñæmo inte nē āmo imopa. ¹⁹ Ante wædinque mīnitō guiquēnē inguipoga tōmāmæ quēwēnāni weca godinque, Itota miñæ gocædānimpa, ante apænemīni ēñente botō miñæ nē godāni bacædānimpa. Ayæ mōnō Mæmpo emōwo apænedinque, ayæ Wængonguī Wēmo iñōmote botō emōwo apænedinque, ayæ Wængonguī Tæiyæ Waēmō Ōnōwoca emōwo apænedinque mīnitō tōmāmæ quēwēnāni inānite æpænē guidōmīni guicædānimpa. ²⁰ Ayæ botō mīnitō imīnite botō ānīnō ante, Tōmānō ante adodō cæedāni, ante odōmōmīni ēñente cæcædānimpa. Ayæ botō edæ ñōwo incæ ayæ inguipoga iinque baganca cōwē mīnitō tōnō ongonte godongāmæ cæcæboimpa. Nāwangā inguīnō anguēnē, ante Itota angacāimpa.

**Itota Codito ingantedö
ante
Mäadoco
nänö watapæ ante
yewæmongainta**

*Wäo önömæca ponte apæneca
ëñënanipa*

*(Mäateo 3.1-12; Odoca 3.1-9, 15-17;
Wäo 1.19-28)*

¹ Ponguingä, ante nani Codito angaingä inongä inte Wængongui Wengä Itota ingantedö ante botö Mäadocobo watapæ ante yewæmömopa.

² Doyedë iñömö Wængongui beyæ apænedinque, Codito ingante Wængongui iimaï angäimpa, ante Itaiya wodi yewæmongacäimpa.

“Taadö bitö goquino waa wëwaquingä, ante bai cædinque botö, Botö beyæ nê gode änongä ingante da godömo täno beyænte gocä ate bitö ayæ gocæbiimpa, ämopa.

³ Önömæca iñömö adocanque ogæ tedete aa pecæcäimpa.

Tömengä iñömö, ‘Awënë nänö ponguinö ante minitö tee moncate bai cædinque, taadö töinö pinonte bai cæedäni,’ ante aa pecä ëñengäimpa,”

⁴ Ante Itaiya wodi nänö nê angaingä inongä inte Wäo ñowo önömæca pöningue æpænë guidongantapa. Mänömaï cædinque tömengä mänïñömö pönäni inänite apænedinque, Minitö, Idæwaa wënæ wënæ cæte awädö, ante ocæ emænte Wængongui gämænö pöningue æpænë guicæminimpa. Mänömaï cæmini adinque Wængongui minitö cædinö ante nê panguëngä incæte pünämaï inte ñimpo cæcæcäimpa. ⁵ Ante Wäo mänömaï apæneyongante Oodeabæ tömäo quëwënanäni Eedotadëë quëwënanäni tömänäni tömengä weca pö pö bee tente ëñëninque, Nawangä ämipa. Bitö ä bai ëñënamäi cæte quëwëmöni inte idæwaa wënæ wënæ cæte awädö, ante wädäni ëñëninque

Wäo Oododänö æpænë guidongä guidänitapa.

⁶ Wäo iñömö weocoo ante cämeyo ocaguincoo nonte badöincoo mongænte adobaï pacadeyænta ante æmontai badonte encadeyænongäimpa. Tömengä cængui ante ñawäique cænte tömengä bequi ante guïñëmænque ade bete nê quëwënongäimpa. ⁷ Iimaï ante apæneca ëñënanitapa. “Iincayæ ate nê Ponguingä guiquënë tömengä täi emongä ewocadongä inte nanguï cæcä ingampa. Botö guiquënë wädämo pöni inömo inte tömengä awæncata eyepæ imopa godö ñi cæquimoo. ⁸ Botö önonque æpænë guidömo guimäinipa. Tömengä wæatë da pöningä ate Wængongui Tæiyæ Waëmö Önöwoca pö guicä ewocacæminimpa,” ante Wäo mänïñedë apænegacäimpa.

Itota æpænë guicampa

(Mäateo 3.13-17; Odoca 3.21-22)

⁹ İninque Gadideabæ Näatadeta quëwente Itota mänïñedë pongä adinque Wäo Oododänö æpænë tömengä ingante guidongä guicantapa. ¹⁰ İninque æpænë guidingä inte do ää ta gongæninque Itota æmö ayongä öönæ gä godonte bayö equemö wææ bai Wængongui Tæiyæ Waëmö Önöwoca incæ tömengä wææ guicä acantapa. ¹¹ Ayæ ëñëñongante, “Bitö botö Wëmi inömi inte nê botö waadebi imipa, ate tobopa,” ante öönædë inö apæneca ëñengacäimpa.

*Itota incæ wënæ wënæ cæcæcäimpa,
ante wënæ cæcampa*

(Mäateo 4.1-11; Odoca 4.1-13)

¹² Mänïñedë Itota ingante Wængongui Önöwoca incæ, Æibawë, äninque önömæca mæicä æicantapa. ¹³ Æi quëwëninque wantæpiyæ coadenta ëönæ önömæca quëwëñongante wënæ awënë Tatäna pöningue, Wënæ wënæ cæcæcäimpa, ante Itota ingante cædongäimpa. Ayæ Itota mänömaï babæidi quëwëñömö quëwëñongante Wængongui tömengä anquedoidi inänite da pöningä

pöninge tömēnāni tömengä beyæ pönö waa cægadānimpa.

Itota Gadideabæ pöninge tæcæ mä cæcampa

(Mäateo 4.12-17; Odoca 4.14-15)

¹⁴ Mänömaï cæte ate ayæ awēne odeye Edode dobæ Wäö ingante tee mönecä ate mäniñedē Gadideabæ pöninge Itota mä Wængonguï nänö waa pönï cægainö ante iïmaï ante apænegacäimpa. ¹⁵ “Ponguingä, ante dodāni nāni angaiñedē botö Wængonguï Awēne Odeyebo inömo inte ñöwo iinque bayedē do pömopa, ante apænebo eñēedāni. Minitö wēnæ wēnæ mini cædimāmo wido cædinque waa pönï botö apænedinö mini eñēnö ante pönēedāni,” ante Itota angacäimpa.

Nē gæyæ dadöwēnāni inānite Itota aa pecampa

(Mäateo 4.18-22; Odoca 5.1-11)

¹⁶ Ayæ mänii pöninge Itota gāwapæ Gadideapæ yæwedeca gote cægonte ayongä Timönö tönö Æntade tömengä tönñacä inate acantapa. Nē gæyæ dadöwēna inöna inte tömēna dicamöñæ æpænē wo guitodonte dadöwēna acantapa. ¹⁷ Tömēna inate Itota,

—Iñāna, botö miñæ edæ tee empo pöeda, ämopa. Nē dadonte ænte pömīna inte botö weca pöñömināte botö pönö cæbo ate minātö wæætē nē apænemīna badinque waodāni inānite nē ænte pömīna bacæmīnāimpa, angantapa. ¹⁸ Angä eñēninque tömēna dicamöñæ do emö cæte godinque Itota miñæ edæ tee empo wadæ godatapa.

¹⁹ Itota iñömö godömenque gote ayongä Tebedeo wēna Tantiago tönö Wäö adobai wipodē dicamöñæ tadömoncöna acantapa. ²⁰ Adinque Itota do, Botö miñæ pöeda, angä eñēninque tömēna Ao äninque wæmpocä ingante wæætē, Mæmpo eñēmi, änatapa. Bitö nempo wipo emö cæte gomönapa, äninque adodaque wæmpocä ingante emö cæte Itota miñæ wadæ godatapa.

Itota angä eñente wēnæ incæ tao gopa

(Odoca 4.31-37)

²¹ Ayæ tömēnāni quēwēñömö Capēnaömö mämongä pönānitapa. Oodeoidi guēmanguiönæ bayonte Itota iñömö Wængonguï apænecä nāni eñente yewæmongainta ate nāni odömöincönē do pö guiidique odömonte apænecä eñēnānitapa.

²² Eñēñönāni tömengä nämä tæi piñæninque nē angä inongä inte nö odömonte apænecä eñente wædinque tömēnāni, Wadāni nē wææ odömönāni guiquēnē mänömaï odömonte apænedāni eñēmongaa. Ito-taque nämä nē eñente entawēnongä inte nö pönï odömonte apænecä eñēmönipa, ante wädānitapa. ²³ Ayæ wēnæ wentamö ewocacä inte nē quēwengä mäniñedē tömēnāni odömöincönē a ongöninge iñontobæ yedæ ante apænecantapa.

²⁴ —Bitö Itota Näatadeta quēwēnīmi inte quīnante mönatö weca pömīi. Mönatö imönate edæ æmæwo wido cæcæte ante wabānö pömitawo. Bitö æmömidö imii, ante botö do atabopa. Bitö Wængonguï Tæiyæ Waëmö Wēmi inömi imipa, ante edæ do eñēmopa.

²⁵ Ante tedeyongante Itota tömengä ingante wææ äninque,

—Apocænē quēwenguēnē tedewēē. Waocä baönē quēwēnömi inte edæ tao gobāwe.

²⁶ Angä eñēninque wēnæ nē wentamö ewocacä iñömö waocä ingante quidi quidi mäo tæ gotodö go wææñongante, Yæ yæ, äninque dobæ tao gotapa.

²⁷ Itota angä wēnæ tao gocä adinque tömānāni guiñente wædinque nāni caboque wæætedö wæætē tededinque,

—Iñgä iñömö quīnö bai ante cæcä. Tömengä nē angä inongä inte edæ mä pönï odömonte apænecampa. Edæ wēnæidi nē wentamö ewocadāni inānite tömengä angä eñente cædānipa, ante awædü.

²⁸ Ante pönente wædinque tömënäni, Itota mänömaï cæcampa, ante tededinque Gadideabæ tömäo quëwënäni inänite mäo gode ä gode ä cædäni do ëñengadänimpa.

Pegodo nänöogæ wäänä ingante Itota cæcä gancæ bacä

(Mäateo 8.14-15; Odoca 4.38-39)

²⁹ Mänüi Itota oodeoidi odömöincönë ongöinque iinque odömönte apænecä ate tömënäni tao godinque Tantiago tönö Wäo miñæ godinque Timönö tönö Æntade oncönë go guiidänitapa. ³⁰ Go guiyönänite wadäni, Timönö nänöogængä wäänä daicawo gawænte möimoga öñongampa, änäni. ³¹ Eñente wædinque Itota tömengä weca go gongæninque pædæ wææmpote bæi ongönte töö æmængä ate tömengä ængæ ganticantapa. Ayæ gancæ badinque tömengä wæætë tömënäni beyæ cæcantapa.

Daicawo gawænäni inänite Itota cæcä waa badänipa

(Mäateo 8.16-17; Odoca 4.40-41)

³² Mänionæ gawadecæ pönü nænque wëmö bayö wadäni daicawo gawænäni inänite wënæ inte quëwënäni inänite tömänäni inänite Itota weca ænte pönänitapa. ³³ Ayæ mänüñömö quëwënäni tömänäni adoyömö pöninque odemö goto gongænänitapa. ³⁴ Ayæ quiëmë beyæ wënæ wënæ inte wædäni adinque Itota nanguï inäni inänite godö cæcä waa badänitapa. Ayæ wënæidi nanguï inäni inänite wido cædinque Itota, Botö æbodö imoo, ante në adimini inte tededämaï imæwedäni, ante tömënäni inänite wææ angacäimpa.

Itota oodeoidi odömöincönë go guidinque apænecampa

(Odoca 4.42-44)

³⁵ Ayæ tæcæ oque pönente wëmö iñonte ængæ gantidinque Itota oncodö tao gote gomonga önömæca godinque Wængonguï ingante apænecantapa. ³⁶ Apæneyongante Timönöidi, Ædönö gocäi, ante tee empo tee empo gote, ³⁷ adinque,

—Dæ ämi wædinque tömänäni bitö imite ante diqui diqui minänipa cæbii.

³⁸ Ante añönänite Itota wæætë,

—Mönö wayömö gocäimpa. Eyequei nänü quëwëñömö nänü quëwëñömö mäo botö apænebo ëñencädänimpa, ante cæcæte ante tate pontabopa.

³⁹ Ante në äningä inte Gadideabæ tömäo godinque oodeoidi odömöincönë go guii go guii cædinque Wængonguï nänö apænedö ante Itota apænecä ëñengadänimpa. Ayæ wënæidi inänite wido cæcä gogadänimpa.

Në baadingä ingante Itota wadæ caacampa

(Mäateo 8.1-4; Odoca 5.12-16)

⁴⁰ Ayæ wacä cöwë baate ëñawengä inongä inte Itota weca ponte da guicapodinque,

—Bitö Ao ämi inte wadæ caabi iinque botö do waintai baabaïmopa.

⁴¹ Añongante Itota tömengä tönö guëa wæwente bai nanguï pönengä inte pædæ wææmpo gampo caadinque,

—Ao ämopa. Bitö waintai baacæbiimpa.

⁴² Angä iinque ñömæintai nänö ëñadintai dæ baadinque tömengä waintai edæ do baacantapa.

⁴³ Itota edæ tömengä ingante do da godöninque nanguï angantapa.

⁴⁴ —Eñëmi. Botö æbänö cæboo, ante edæ wadäni inänite mäo apænedämaï imæwe. Wæætë, Näwangä impa, ante acædänimpa, ante cædinque bitö, Wængonguï qui, ante në godongä weca töingä godinque waintai bitö baadintai odömömi ædæmö acæcäimpa. Ayæ Möitee wodi wææ ante nänö angaincoo bai ænte pöninque bitö waintai bitö baadi beyæ ante edæ, Wængonguï qui, äninque në godongä ingante pædæ godömi æncæcäimpa, ante Itota në baadingä ingante nanguï angantapa.

⁴⁵ Angä incæte në baadingä wæætë wadæ godinque ëñënämaï inte gode ä gode ä cædinque edæ, Itota wadæ caacä waintai baaboï aedäni, ante

māo tedecā eñēnānitapa. Mānōmaī eñēnāmaī cæcā beyænque Itota, Tömēnāni weca ñōwo ædō cæte edonque goquimoo, ante wædinque nānēnē gote önömæca gomonga cægongantapa. Incæte tömengā weca æmænō quēwēnāni æmænō quēwēnāni cōwē pō pō cægadānimpa.

2

Nē cōmāingā ingante Itota angā dao dao gocampa

(*Mäateo 9.1-8; Odoca 5.17-26*)

¹ Ayæ tæönæ quēwēninque ocæ emænte Capēnaōmō pongā adinque wadāni, Itota oncōnē ponte ongongampa. ² Ante tededāni wædinque nanguī ināni acæ pōnāni oncōnē eyede pōni guidinque odemō incæ tōmāo wææ ongōnānitapa. Mānōmaī tōmāo goto ongōnāni inānite tömengā Wængonguī nānō apænedō ante apænecā. ³ Eñēñōnāni wadāni tōnō godongāmæ pōninque mengāa go mengāa ināni incæ cōmāingā nānō möimpataa æmætæ æmætæ bæi ongonte næænte pōnānitapa.

⁴ Ponte ayōnāni wadāni Itota weca eyede pōni goto ongōnāni adinque nē ænte māmō pōnināni iñōmō, Ædō cæte guiquī. Ante wædinque oncōmāa inō æidāmæ mæi æidinque Itota önōnæca inō epæ cædāni ompite gongæñō tömēnāni cōmāingā möimpataa bæi ongōninque tömengā ingante Itota weca edæ pædæ wæænōnāni. ⁵ Wæænte ongongā adinque, Tömēnāni æbānō wede pōnente cædānipa, ante adinque Itota cōmāingā ingante,

—Botō wēmi wædāmaī ie. Wēnæ wēnæ bitō cædimāmo ante bitō ñōwo ñimpo cæte quēwencæbiimpa.

⁶ Ante apænecā eñēninque nē wææ odōmōnāni guiquēnē pancadāniya godāmæ tæ contate ongōninque nāmāneque pōnente tededinque, ⁷ “Quimæ ānewē. Īingā iñōmō Wængonguī ingampa diyæ mānōmaī cæquingāa. Edæ babæ ancædō. Waomō wēnæ wēnæ mōnō cædimāmo ante Wængonguinque nē ñimpo cæcā

ingampa.” ⁸ Ante mīmōnoque pōnēñōnāni Itota tömēnāni nāni pōnēwēnō ante önōwēnenque do eñente bai pōnēninque edæ,

—Minitō quimæ mānōmainō ante pōnēwēminii.

⁹ “Botō nē cōmāingā nānō wēnæ wēnæ cædimāmo ante ñimpo cæbo quēwencæcāimpa,” ante botō Wængonguī bai āmo eñēninque mīnitō guiquēnē, Wængonguī ingampa diyæ mānōmaī cæquingāa, ante pōnēmīnīpa. Wæætē edæ, “Ængæ gantidinque möimpata æninque dao dao gocæcāimpa,” ante botō Wængonguī bai āmo ĩninque mīnitō adobai, Wængonguī ingampa diyæ mānōmaī cæquingāa, ante pōnēmīni ĩmāimīnīpa, ante awædō. Īñæmpa mānōmainō ante pōnēmīni ĩninque mīnitō edæ æbānō cæquēnēmo ĩmo āminii. ¹⁰ Incæte botō Waobo eñagaĭmo inte inguipoga quēwēninque waomīni mīni wēnæ wēnæ cædimāmo ante nē āmo inte ñimpo cæbopa, ante mīnitō edæ eñencæmīnīmpa, ante botō ĩmaī cæbopa.

Äninque edæ nē cōmāingā ingante edæ,

¹¹ —Bitō ĩmite āmo eñēe. Ængæ gantidinque bitō möimpata topo cæte æninque edæ tömēmi oncōnē næænte goe.

¹² Angā eñēninque cōmāingā ĩningā incæ edæ tömānāni ayōnāni ængæ gantidinque möimpata topo cæte nææ nææ tao gocā adānitapa. Dao dao gocā adinque tömēnāni, Æbānō cæcāi, ante eñēnāmaī inte guñente wædinque,

—Wēēñēdē mānōmaī cædāni atamōniyaa. Ñōwo iñōmō mā pōni cæcā amōnīpa, ante pōnēninque, Wængonguī bitō ñāo emōmi inte waa pōni cæbi amōnīpa, ante watapæ apænegadānimpa.

Debi ingante Itota angā tee em-pote gocampa

(*Mäateo 9.9-13; Odoca 5.27-32*)

¹³ Itota wæætē adodō gāwapæ wedeca gocantapa. Ayæ nanguī ināni adoyōmō pō pō cædāni adinque

tömengä tömënäni inänite odömonte apæneca ëñënanitapa. ¹⁴ Ayæ

godömenque cægonte ayongä Adepeo wengä Debii iñömö, Odömäno awënë qui bacæimpa, ante godonte æinta nani æincönë awënë beyæ æncæte ante ongongä adinque Itota tömengä ingante,

—Botö miñæ pöe.

Angä ëñëninque Debii edæ ængæ gantidinque tömengä miñæ wadæ edæ gocantapa.

¹⁵ Ayæ ate Itotaidi Debii oncönë pö guite cængöñönäni odömäno awënë beyæ nê æwënäni tönö nê ëñënamai cædäni tönö nangui inäni adoyömö pö guite godongämæ cænänitapa. Edæ tæiyænäni tömengä miñæ nê godäni inönänimpa. ¹⁶ Paditeoidi inönäni inte nê odömönäni guiquënë ponte ayönäni nê ëñënamai inäni tönö awënë beyæ nê æwënäni tönö Itota godongämæ cængä adinque tömënäni tömengä miñæ nê godäni inänite änänitapa.

—Odömäno awënë beyæ nê æwënäni tönö wadäni nê ëñënamai cædäni tönö Itota quimæ godongämæ cæwengäa.

¹⁷ Äñönäni Itota wæætë tömënäni inänite,

—Nê waa ingä guiquënë, Cæbi waa baboe, änämai ingampa. Nê wënæ wënæ ingä guiquënë dotodo ingante do, Cæbi waa baboe, ante aa pecampa. Pancadäniya, Nämä incæ nō entawëmo imopa, ante nê änäni inänite adinque botö nê dotodo bai adobai inömo inte tömënäni inänite aa pedämai incæboimpa. Wadäni guiquënë, Nämä wënæ wënæ cæbo imopa, ante nê änäni guiquënë, Wængongui gämænö poncædänimpa, ante botö tömënäni inänite aa pecæ pontabopa, ante Itota apænegacäimpa.

Ee ate cænämai ingæimpa, ante nê änäni

(Mäateo 9.14-17; Odoca 5.33-39)

¹⁸ Wäo miñæ nê godäni tönö Paditeoidi tönö mäniñedë Wængongui beyæ ante ee ate cænämai inönänimpa.

Ïninque wadäni Itota weca pöninque änänitapa.

—Wäo miñæ nê godäni tönö Paditeoidi miñæ nê godäni tönö tömënäni, Wængongui beyæ, ante ee ate cænämai inänipa. Bitö miñæ nê godäni guiquënë quinante Wængongui beyæ ante cædämai inäni inte do cænänii.

¹⁹ Änäni ëñëninque Itota wæætë,

—Onguiñængä nê monguingä nänö wente ænte nê pönäni bai inönäni inte botö miñæ nê godäni iñömö ædö cæte wæwente bai cænämai inguinäni. Edæ botö tönö watapæ quëwënäni inte tömënäni ædö cæte wæwente bai cænämai inguinäni. ²⁰ Wæætë ayæ ate guiquënë, Monguingä, nani nê äongä bai iñömote wadäni ponte botö imote bæi ongöninque ö ænte gocædänimpa. Mänömai cædäni ate botö miñæ nê godäni iñömö mäniñedë ate wæætë cænämai inte wæcædänimpa, ante apænedinque Itota godömenque iïmai ante apænegacäimpa.

²¹ “Waocä dicæ müncoo æninque pedæncooga pönö tadömonguingäa. Mänömai cæcä ininque edæ müncoo incæ dobæ gäänë tamonte guipite ate godömenque wänä tente baquënë. Minitö, Awente bai cænämai inte waa quëwengæimpa, ante müni änewënö guiquënë pedæncoo bai inte ewenguine ënepa. Codito nempo watapæ quëwengæimpa, ante botö apænedö guiquënë müncoo bai inte quëwenguine ënepa. Ïninque ewenguine tönö quëwenguine ædö cæte adoyömö ëñente cæquii. ²² Ayæ adobai yowepæ biinömæ miimæ æninque waocä ædö cæte picæ æmontaicadedë godö pe ñiñængüggäa. Edæ picæ æmontaicadedë pe ñiñængä ininque yedæ ææninque ætæwo goquino angüënë. Wæætë edæ æmontai miincadedë pe ñiñænte ate yedæ ææninque tæi æbænämai ee ongongui apa quëwëmini,” ante Itota apænegacäimpa.

Guëmanguiönæ iñonte tömëmö tä pete ænänipa

(Mäateo 12.1-8; Odoca 6.1-5)

²³ Ayæ ate guëmanguiönæ iñonte Itota tömëmoncodë tæcæguedencodë gocantapa. Goyongä tömengä miñæ nê godäni tömëmö inca tæcæ tä pe tä pe ænte idömæ godäni. ²⁴ Adinque Paditeoidi guiquënë Itota ingante äninque,

—Bitö miñæ nê godäni æbänö cædänii, ante cöwä aquënë. Iñæmpa, Guëmanguiönæ iñonte mäninö bai cædämaï iedäni, ante dodäni nani wææ angainö ante ëñenämaï inte iinani ëñenämaï inte quimæ cædänii.

²⁵ Ante piññönänite Itota,

—Docä Dabii wodi tömengä nänö nê emiñænäni tönö ömæpodäni pöni inte gæwænte wædinque æbänö cægadänii, ante yewæmonte öñö incæ minitö iñæmpa adämaï inte ämïni awædö. ²⁶ Wængongui qui, ante nê godönänique cængui impa, ante wææ nani angainö bai cædinque dodäni päö, Wængongui qui, ante ñoncæ ñoncæ cædönänimpa.

Incæte Abiatade wodi nê godongä ñænængä pöni inongä nänö godöñedë mänñedë Dabii wodi Wængongui oncönë go guidinque mänii päö do ænte cæninque tömengä miñæ nê godäni inänite godömenque godongä cænänitapa, ante yewæmonte öñö apa änewëminii.

²⁷ Ante apænedinque Itota ayæ,

—Wængongui quinante, Guëmanguiönæ ante badongacäi, ante pönëmini. Guëmancædänimpa, ante cædinque Wængongui waomö beyænque ante, Minitö guëmanguiönæ, ante badongacäimpa, ante pönenguënëmini iminipa. Ædänidö mänionæ iñonte cædämaï inänii, ante pönëninque Wængongui dicæ mänionæ beyænque ante waodäni inänite badongantawogaa. Ædö cæte mänömainö ante pönëwëminii. ²⁸ Ininque botö Waobo nê ëñagäimo iñömö Tæiyæ Awënë inömo inte edæ guëmanguiönæ Awënë inömo imopa. Ayæ, Guëmanguiönæ iñonte edæ æbänö cæquii, ante adobo

nê Ämo ingäimo imopa, ante Itota apænegacäimpa.

3

Ni cömampoingä

(Mäateo 12.9-14; Odoca 6.6-11)

¹ Iincayæ ate Itota wæætë ood-eoidi Wængongui apænegä nani ëñente yewæmongainta ate nani odömöincönë go guicantapa. Mäniñömö onguiñængä ni cömampote wædongä inte a ongongantapa.

² Mäniñedë Paditeoidi pancadäniya, Itota wapiticæ cæcä ininque mönö wæætë piinte angæimpa, ante nê änewänäni inte cædönänimpa. Nöwo iñömö tömënäni, Guëmanguiönæ i incæte Itota ni cömampoingä ingante, Waa bacæcäimpa, ante cæcä ininque mönö mäo piinte angæimpa, ante babæ cæcæte ante cöwä adänitapa.

³ Ante cöwä ayönäni ni cömampoingä ingante Itota,

—Bitö ængæ gantidinque tæcæguedë pö næ gongæe.

⁴ Äninque wæætë nê piinte ancædäni inänite äninque,

—Guëmanguiönæ iñonte mönö æbänö cæquënëmö imöö, ante wææ angatii. Mönö edæ waa cæquënëmö imopa, ante pönëminitawo. Wæætë edæ, Wënæ wënæ cæquënëmö imopa, ante pönëminitawo. Quëwencædänimpa, ante mönö waa cæquënëmö imopa, ante pönëminitawo. Wæætë,

Wæncædänimpa, ante mönö wænonguënëmö imopa, ante pönëminitawo. Mänömaï ante Itota angä ininque tömënäni edæ pæ wëenedänitapa. ⁵ Adinque tömengä ængui badinque tömënäni inänite æmætæ gomö æmætæ gomö adinque edæ, Mimö ömædëinäni incædö, ante wædinque ni cömampoingä ingante,

—Pædæ pompobi, angä ëñëninque pædæ pompodinque nê cömampodingä incæ ædæmö waa empocä bapocantapa. ⁶ Adinque edæ Paditeoidi guiquënë wadæ tao godinque Edodeidi tönö bee tëninque, Mönö æbänö cæte Itota ingante wænömö

wænguingää, ante godongämæ pönëninque tedegädänimpa.

Gäwapæ wedeca nanguï inäni pönänipa

⁷ Itota iñömö tömengä nänö nē emiñænäni tönö wadæ tao godinque gäwapæ wedeca godäni adinque Gadideabæ quëwënäni nanguï inäni tee empote godänitapa. ⁸ İninque wadäni Oodeabæ, Eedotadëë, Idömeabæ, Oododänö æmæmäa, Tido eyequei, Tidöo eyequei mäniñömö quëwente tedinque, Itota mänömaï cæcampa, ante tededäni ëñente wædinque bacoo inäni mäniömæ tömäo quëwënäni inte tömengä weca pönänitapa. ⁹ Adinque Itota, Goto gongænäni wæcæ wæ, ante pönëninque tömengä miñæ cöwë nē godäni inänite, Wipo ænte pömini ate botö wipodë wäi wocænte owocæboimpa, angantapa. ¹⁰ Wëenë iñömö, Itota nanguï inäni inänite gampocä waa badänipa, ante nē adinäni inte tömënäni ñöwo, Mönö gampo cæte waa bacæimpa, ante cædinque goto gongænäni wædinque mänömainö ante änongäimpa.

¹¹ Ayæ Itota ingante adinque wënæidi nē wentamö ewocädäni incæ tömengä önöwa gäänë ædæ wææninqe,

–Bitö Wængonguï Wëmi inömi imipa töö, ante Yæ änänitapa. ¹² Eñente wædinque Itota wæætë, Botö æbodö imoo, ante cöwë änämaï inguënë quëwëminii, angacäimpa.

Itota angä ate dote ganca inäni nē gode änäni badänipa

(Mäateo 10.1-4; Odoca 6.12-16)

¹³ Ayæ änanquidi æidinqe Itota, İinäni inänite ämo poncädänimpa, ante aa pecä tömengä weca pönänitapa. ¹⁴ Pönäni ate tömengä dote ganca inäni mänimpodäni inänite, Minitö botö miñæ quëwëñöminite botö wadäni weca da godömo gote apænemini ëñencädänimpa, äninque, Botö beyæ nē gode ämini incæminimpa, angacäimpa. ¹⁵ Ayæ pönö apænebo ëñëninque minitö tæi emömini inte wënæidi inänite nē

ämïni badinque wido cæcæminimpa. ¹⁶ Tömengä dote ganca nänö apænte ænäni iñömö iimaï emönönänimpa. Tānocä Timönö emongä incæte Itota wawo Pegodo pemongacäimpa. ¹⁷ Tebedeo wodi wëna Tantiago tönö Wäo nāna caya nē yedæ tededä ina adinque Itota, “Detæbo nänömoda bai inapa,” ante, Mæmæ beyæ, ante Boänede pemongacäimpa. ¹⁸ Ayæ Æntade, Pedipe tönö Batodömëë, Mäateo tönö Tömato, Adepeo wengä Tantiago tönö Tadeo inänitapa. Ayæ, Mönö ömæ ingæimpa, ante nanguï cædongä inte wacä Timönö ingantapa. ¹⁹ Ayæ Itota ingante odömonte nē godonguingä Codaa Icadote nāni änongä ingacäimpa. Mänimpodäni inänite Itota angä nē gode änäni bagadänimpa.

Wënæ tönö cæcä imaingampa, ante wapiticæ änänipa

(Mäateo 12.22-32; Odoca 11.14-23, 12.10)

²⁰ Ayæ ate Itota oncönë pongacäimpa. Pongä adinque bacoo inäni wæætë pö pö goto gongænäni adinque wadäni guiquënë, Ito-taidi quiodö cænguñänii, ante wædönänimpa. ²¹ Ayæ, Quimæ. Ocai edæ ömædæcacä pönente baï cæcämææ, ante pönente tededönänimpa. Mänömainö ante tededäni ëñëninque Itota guidënanii guiquënë tömengä ingante bæi ongonte æncæte ante wadæ pönänimpa.

²² Ayæ nē wææ odömönäni guiquënë Eedotadëë quëwente pöninqe, “İñæmpa wënæ awënë Beedeboo tönö quëwengä inte Itota mäningä tönö cædinque wënæidi inänite wido cæcä imaingampa,” ante tedewënäni.

²³ Eñente wædinque Itota aa pecä pönäni ate, “Tatāna mīni änongä iñömö nāmā incæ ædö cæte wido cæquingää, ante ëñencæminimpa, ante botö, Inguipoga æbänö cädänii, ante odömömo aedäni. ²⁴ Awënë odeye nempo quëwënäni iñömö piinäni badinque näëmæ wæætëdö wæætë cädäni ininque awënë odeye nänö

ömædempote wæquinque tōmēnāni nāmā ēwente cædānīpa. ²⁵ Ayæ adocōnē owocabo incæ adoyōmō godongāmæ quēwēnīnāni incæ nāēmæ wæætedō wæætē cædāni īnīnque tōmēnāni oncō woquinque nāwæ gobāinānīpa. ²⁶ Ayæ Tatāna nempo quēwēnāni īñōmō edæ nāēmæ pūinte badīnque wæætedō wæætē cædīnque tōmengā ingante wido cædāni īnīnque Tatāna dicæ tōmēnāni awēnē īmaingāā,” ante Itota odōmonte apænecantapa.

²⁷ Ayæ, “Nē tæi pīñængā ingante wīi goto wīnīnque waocā ædō cæte tōmengā oncōnē guīte māincoo ō ænguingāā. Edæ nē ēacā ingante bæi ongonte goto winte ate pō guīte ō ænāni bai botō īñōmō wēnæ inte nē bæi ongonte wido cæbo īmopa,” angantapa.

²⁸ Ayæ, “Nāwangā apænebo ēñēedāni, angantapa. Mini waocabo wēnæ wēnæ cæmīni incæ wadāni īnānite godō babæ ānewēmīni incæte edæ Wængonguī wæætē tōmānō ante pōnō ñimpo cæcā beyænque quēwencæmīnīpa. ²⁹ Wæætē Wængonguī Tæiyæ Waēmō Ōnōwoca ingante waocā godō babæ ante wēnæ wēnæ apænecā īnīnque tōmengā æmæwo wentamō mongængā bagaingā īnīnque cōwē wantæpiyæ wentamō mongæncæcāimpa. Mānōmāi beyæ Wængonguī ñōwopāmo īñonte ñimpo cædāmaī inte īincayæ pōmāmo īñonte adobāi ñimpo cædāmaī inte cōwē pancæcāimpa,” ante Itota apænegacāimpa.

³⁰ Änīnque, Mīnitō botō īmote, Bitō wēnæ nē wentamō ēwocacā tōnō quēwente cæbāimīpa, āmīnitawoo. Īñæmpa, Wængonguī Tæiyæ Waēmō Ōnōwoca tōnō quēwente cæbo apa ānewēmīnīi, ante Itota apænegacāimpa.

*Itota badā tōnō tōmengā biwīdi
(Mäateo 12.46-50; Odoca 8.19-21)*

³¹ Ayæ Itota wāānā tōmengā biwīdi tōnō mānīi nāni ponque pō do pōnīnque yabæque ayæ ongōnīnque, Guīi añete tae. ³² Änāni ēñente añecæte ante ponte apænecā

ēñēnīnque wadāni Itota weca contate ongōnāni Itota ingante wæætē apænedīnque,

—Bitō badā bitō biwīdi tōnō bitō īmite ante oncodo ponte yabæque ongōnānīpa cæbīi.

³³ Ante aññōnānite,

—Botō badā ædānō īnāā ante āmoo, ante pōnēmīni. Ayæ botō biwīdi ædānidō īnānīi ante āmoo, ante pōnēmīni.

³⁴ Änīnque godāmæ contate ongōnāni īnānite adīnque,

—Īnāni īñōmō edæ botō badāidi botō biwīdi īnōnāni īnānīpa, ante mānōmāinō āmo abaīmīnīpa. ³⁵ Edæ Wængonguī nānō ānō bai ēñente æcānō cæte quēwēna māningā botō biwī ingampa. Māningā botō biwīnque ingampa. Mānīnā botō badā īnampa, āmo abaīmīnīpa, ante Itota apænegacāimpa.

4

Waocā nānō quiyadō ante odōmonte apænecampa

(Mäateo 13.1-9; Odoca 8.4-8)

¹ Wæætē gāwapæ yæwedeca gote odōmoncæ cæyongā nangūi īnāni tōmāo goto ponte ongōnāni adīnque Itota wīpodē go guīte tæ contate wāi wocænte owoyongā tōmēnāni ayæ gāwapæ yæwedecaque ōmaaque ongōnānitapa. ² Īnīnque tōmēnāni īnānite nangūi pōnī odōmōnīnque Itota, Wængonguī Awēnē nempo quēwēnīnque æbānō cæquīi, ante ēñencæmīnīpa, ante botō īmæca quēwēnāni nāni cæinō ante odōmonte apænebo ēñēedāni.

Änīnque īimāi ante odōmonte apænecā ēñengadānīpa. ³ “Apænebo ēñēedāni. Waocā nē quiyadongā īñōmō quiyacæ gocampa. ⁴ Gote quiyayongā pancamonga taadō īñōmō eyepote wææmōmpa. Taadō wæænte eyepodīmō ōññōnte ayamōidi pōnīnque dobæ ade cænānīpa. ⁵ Pancamonga guīquēnē dicamontaa onguīpoi woyedōmō īñōmō eyepote wææmpa. Onguīpoi woyedōmō ōñōmō inte pæquīnāmāi

quingæ tā bocate pædinque æmonga æipa. ⁶ Ìniquè oguimento yæyæmè guiwadāmaï inte cōñe bawadāmaï iñonte nænque tī nāwāñö wānā cacadinque edæ guingo icate nāñe wæmpa. ⁷ Pancamonga guiquenè ömentacodè nānö eyepodimö iñömö pæquīnāmaï tā bocate gā æiyonte ömentacoo pö incootonque ganta cæca ate nāñe wæmpa. Wampo incapa pæquī. ⁸ Waëmonguipoga quiyadimö guiquenè tā bocate waa pædinque tömëmö nanguï pōnī godömenque incapa. Pancawæncaa edæ todëinta ganca, pancawæncaa teitenta ganca, pancawæncaa tiëë ganca mänimpomö incapa. Quiyacä nānö quiyadö ante edæ botö mäninque ante apænebopa.”

⁹ Mänömaï impa, ante ìnque apænebopa. Èamonca ongonte edæ èñëedāni, ante Itota apænegacäimpa.

Önömoncaque èñente pönënāmaï inānipa, ante (Mäateo 13.10-17; Odoca 8.9-10)

¹⁰ Ayæ ate nanguï ongönināni dæ godāni ate Itotaidi adodānique ongöñönāni edæ, Dote, ante nāni gocabo tönö wadāni tömengä miñæ godāni tönö tömengä weca ponte änānitapa. Itota èñëmi. Bitö mäninö ante apænedinque æbānö ante odömoncæte ante apænebitawo. ¹¹ Äñönānite, “Wængonguï Awënè Odeye iñömö æbānö awëmö cæcää, ante mīni waocabo wëenëñedè èñënāmaï ininö incæte ñöwo edonque pönö apænebo ate mīnitö adomīnique nē èñëmīni bamīnipa. Gobæ ongönāni inānite apænedinque, Inguipoga quëwënāni nāni cæi bai impa, ante botö pancaa ante odömonte apænebo èñënānipa. ¹² Dodāni Wængonguï beyæ apænedinque iïmainö ante yewæmongadānimpa. Wængonguï nānö nē ñimpo cæquënänāni ināmaï ināni inte tömënāni iñömö awincaque adinque wīi ædæmö adāni inte önömoncaque èñëninque ædæmö èñënāmaï ināni inte edæ ocæ èmænte pönāmaï incädānimpa, ante

yewæmongadānimpa. Mänömaï ìnque bacæimpa, ante beyænque botö tömënāni inānite wīi edonque apænebopa,” ante Itota apænecantapa.

Quiyacä nānö cæinö ante pönente iïmainö ante èñëgæimpa (Mäateo 13.18-23; Odoca 8.11-15)

¹³ Itota ayæ tömënāni inānite godömenque apænecantapa. “Botö mäninö inguipoga nāni cæinö ante do odömonte apænebo èñëninque mīnitö èñënāmaï imīnitawo. Ìniquè ñöwo godömenque odömonte apænebo incæte mīnitö ædö cæte godömenque èñenguimīni.”

¹⁴ “Ìmaï impa. Nē apænecä iñömö tömëmö quiyate bai cædinque Wængonguï tömengä nānö apænedö ante apænecampa. ¹⁵ Pancadāniya guiquenè taadö eyepote wæænīmö bai ināni inte Wængonguï nānö apænedö ante èñëninque mīmōno pönënāmaï iñönānite ayamö ade cængä bai Tatāna incæ ponte ö ængampa. ¹⁶ Wadāni guiquenè dicamontaa woyedömö iñömö eyepote wæænīmö bai ināni inte tömënāni Wængonguï nānö apænedö èñëninque quingæ Ao ante watapæ todānipa.”

¹⁷ “Ayæ ate adodāni wantæ iñö quëwëñönānite wadāni Wængonguï nānö apænedö beyæ piñāni wädānipa. Ayæ wadāni wënæ wënæ cæcæte ante togænte pānāni wädānipa. Ìniquè oguimento yæyæmè guiwadāmaï nāñe wænte bai ināni inte tömënāni guñente wædinque èmö cæte godānipa. ¹⁸ Ayæ wadāni guiquenè ömentacodè eyepote wæænīmö bai inināni inte Wængonguï nānö apænedö èñëñönāni, ¹⁹ inguipoga quëwente quiemè beyænque mönö wæpāmo pompa. Ayæ, Mäincoo beyænque toquimo, ante nāni oda cæte wæwëmāmo pöninque wacoo wacoo nāni æinënö pöninque edæ ömentacoo ñancate cæ bai cæyonte Wængonguï nānö apænedinö incæ incadāmaï bai bapa. ²⁰ Onguipoga wainguipoga quiyadimö bai ināni guiquenè

tömēnāni Wængonguī apænedinō ēñente Ao āninqe wede pōnēnāni inte tōmēwæ incate bai Wængonguī beyæ nanguī cædānīpa. Pancadāniya todēinta ganca incate bai nanguī cæyōnāni, pancadāniya godōmenque teitenta ganca incate bai cædānīpa. Pancadāniya nanguī pōni tiēē ganca incate bai cædānīpa,” ante Itota apænecā ēñēnānitapa.

Gongapæncade ante odōmonte apænecampa
(*Odoca 8.16-18*)

²¹ Ayæ tōmēnāni inānite Itota iīmaī odōmōninqe apænecantapa. “Waomīni gongapæncade tī wodōnodinque dicæ owætadē boo cæcamīniyaa. Dicæ mōimoga ænōmengadæ inō māo concæmīniyaa. Wæætē edæ wænōmēnæcapaa concæmīni nāō bæco amīnīpa. ²² Quīnō ante wē wodonte bai i iñōmō mānīnō ante iīncayæ ate tadonte edonque ate bai ēñenguīnque ñōwo wē wodonte impa. Quīnō bee ocate bai i iñōmō mānīnō iīncayæ ate wi æncate edonque aquīnque ñōwo bee ocate impa. ²³ Ēamonca ongonte ēñenguēnē cæmīnīi,” angantapa.

²⁴ Ayæ tōmēnāni inānite godōmenque apænedinque Itota, “Önōmonca ēñēninqe ēñenguēnē cæmīnīi. Mīnitō mīni tee mante godoncade incæ adocadeca tee māninqe Wængonguī mīnitō iīmīnite adodō pōnōninqe godōmenque ayæ pōnongā æncæmīnīmpa. ²⁵ Edæ nē ēacā ingante godōnāni ængā bai nē ēñēngā ingante godō apænebo ēñente entawēninqe tōmengā godōmenque ēñente bacæcāimpā. Nē ēadāmaī ingā guīquēnē tōmengā wædænque pōni nānō māincoo iñonte mānīncoo tōmancoo ö ænāni wæcā bai nē ēñēnāmaī ingā adobaī tōmengā wædænque pōni nānō ēñente entawēnō iñonte ö ænte bai cæbo dæ ba ate wæcæcāimpā.” Mānōmaīnō ante Itota tōmengā ēmīñænāni inānite odōmonte apænecā ēñēnānitapa.

Guiyāmō pæpa, ante odōmonte apænecā

²⁶ Ñōwo iñōmō öōmaque ongōnāni inānite godōmenque odōmōninqe Itota iīmaī ante apænegacāimpā. “Waocā quiyacā ate awēmō pæ bai inte Wængonguī Awēnē Odeye pōnō cæcā ate tōmengā nempo nē quēwēnāni awēmō yebæninque baco pōni badānīpa. Apænebo ēñēedāni. Waocā gönea quiyate ate, ²⁷ woyowotæ mö ñōninqe baænæ ñāni ömæmōñongā iīmō iñō iīmō iñō tōmēmō nānō quiyadīmō incæ awēmō tā bocate pæpa. Waocā iñōmō, Ēbāmē cæte tā bocate pæpa, ante acantawogaa. ²⁸ Edæ onguipo beyænque tōmengā nānō quiyadīmō incæ tā bocate pædinque æmōnga æi cænguīmæ baate ate ayæ cænguī yagapa. ²⁹ Yaga adinque, Amīñate cænguī bapa, ante edæ pete ængampa,” ante odōmonte Itota apænegacāimpā.

Möotatamō guidīmō ante odōmonte apænecampa
(*Mäteo 13.31-32; Odoca 13.18-19*)

³⁰ Ayæ godōmenque apænedinque Itota, “Wængonguī Awēnē Odeye nempo æbānō quēwēnāni, ante mönō quīnō odōmonte ate ēñenguīi. Edæ, Inguipoga quīnō pæte yebænte bai i adinque, Mānīnāni adobaī yebænānīpa, ante ēñēngæimpā. ³¹ Iīmaī impa. Möotatamō mīni ænte quiyāmō guidīmō pōni i bai wamō mīni quiyāmō adomonque incæ adobaī guiyāmō pōni i iñōmō edæ dæ ampa. ³² Incæte möotatamō iñōmō tā bocate pædinque möotatawæ edæ ocāñequi doyæ pæwæ bapa. Wīi tōmāā ocāñequi mīni quiyadiwæ bai edæ ocāa ināmaī inte möotatawæ iñōmō edæ ñænæ awæ impa. Adinque tōmēwæ ibæñōmō ayamōidi gānē iñōmō ponte ongōnānīpa. Möotatamō guidīmō incæ mānōmaī pæ bai Wængonguī Awēnē nempo quēwēnāni iñōmō wædænque inīnāni incæ nanguī yebænguīnāni inānīpa,” ante Itota odōmonte apænegacāimpā.

*Inguipoga nāni cæi bai impa, ante
Itota odōmongampa*

(Mäateo 13.34-35)

³³ Ayæ Itota, Wængongui Awënë nempo quëwëninque æbänö cæquii, ante ëñencædänimpa, ante imæca quëwënāni nāni cæinö ante godömenque nanguipöni odömōninque godongämæ ongönāni nāni ëñenganca apænedinque idæwaa. ³⁴ Mäninonque bai odōmonte apænedinque tömënāni inänite cöwë godömenque apænedāmaï inongäimpa. Incæte tömengä miñæ nē godāni adodänique ongöñönänite Itota edonque pöni, Mänömaï impa, ante tömänö ante apænecä ëñengadänimpa.

*Itota angä ëñente woboyæ æpæ næ
gongæmpa*

(Mäateo 8.23-27; Odoca 8.22-25)

³⁵ Mänionæ gäwadecæ bayonte Itota tömengä emiñænāni inänite,
—Gäwapæ æmæmäa taocæimpa.

³⁶ Äninque ömaa ongönāni inänite emö cæte taocæ cædinque tömengä nänö apænedimpodë adopodë ayæ contayongante mantadāni taocantapa. Adinque wadāni wapodë godongämæ taodänitapa. ³⁷ Tao wogaa goyönāni woboyæ iñontobæ nanguipöni pæmæninque æpæ mængonta mængonta pöninque gao gao wipodë änëñö, ³⁸ Itota yæmiñæmpo bee podoncate mö ñongantapa. Ömæmoncæcäimpa, ante tao cædinque,

—Awënë, bete wæncæ cæmompamö ñömii.

³⁹ Änāni ëñëninque ñāni ömæmonte ængæ gantidinque,

—Woboyæ, pæmænāmaï imäwe. Gäwapæ incæ cædāmaï næ gongæmäwe.

Ante äñongä woboyæ pæmænāmaï iñö gäwapæ incæ næ gongæninque ñancæ ñancæ gongæmænimpa.

⁴⁰ Ayæ tömënāni inänite,

—Mini pönëgade, quimæ guiñewëmini.

⁴¹ Äñongä tömënāni ancaï guiñëninque nāmāneque tededinque,

—Æcämë inte angä ëñente woboyæ incæ æpæ incæ gongæmpa, ante guiñente wægadänimpa.

5

*Wënæ wentamö ewocacä tönö nē
quëwengä*

(Mäateo 8.28-34; Odoca 8.26-39)

¹ İninque Itotaidi mänii æmæmäa tao godinque Guedatabæ pö ti wæænänitapa. ² Itota mänömaï pöninque gäwapæ tao ti wæængä adinque onguiñængä wënæ wentamö ewocacä tönö nē quëwengä inongä inte edæ waodänido quëwente tao bee tengantapa. ³ Tömengä waodänido cöwë nē quëwengä ingante ædö cæte goto winguināni. Daagömenca incæ tææmö impa goto winguināni.

⁴ Æno pönö goto wimænte wææ ëno pönö goto wiwate bacæcäimpa, ante ancaa cæyönāni tömengä daagömë wangö ñæ wangö ñæ cædongäimpa. Æcämenque incæ tæi piñængä inte tömengä ingante ænguingä. Edæ dæ änongäimpa. ⁵ Itädë incæ woyowotæ incæ tömengä änanquidi æite wææ waodänido pö änanquidi æite wææ ocæ emænte pö pö cæte Yæ yæ äninque dicaca nämä incæ äwænonga äwænonga cæte wencata bai ëñate quëwënongäimpa. ⁶ İninque Itota go dibæ pongä adinque tömengä quingæ pogodo godinque Itota weca ædæ wæænininque, ⁷ ogæ tededinque,

—Itota ëñëmi, bitö nē Æibæ Quëwengä Wængongui Wëmi inömi incæ quimæ botö weca pöwë. Edæ, Ämogate wæcæcäimpa, ante botö imote cædāmaï imäwe, ante nangui angantapa.

⁸ Edæ tömengä tæcæ pö bee tëñongante wënæ ingante Itota iimaï ante äningä inongäimpa.

—Wentamö nē wentamö ewocabi inte ämo ëñë. Bitö waocä baonga guidëmi inte ñöwo tao gobäwe, ante Itota täno angä ëñente wædingä inte wënæ ñöwo, Cædāmaï imäwe, angantapa.

⁹ İninque Itota,

—Bitö æmömidö imii.

Äñongante,

—Tontadoidi tæiyænāni adinque, Deguiönö, änänipa. Mönitö adobai

tæiyæ pōni imōnīpa, ante botō emōwo adobaī Deguiōnō emōmopa.

¹⁰ Ante apænedinque ayæ, Mōnitō imōnite wabæca wido cædāmaī incæbiimpa, ante ancaa angantapa.

¹¹ Māniñōmō odæ wængänāidi nanguī ināni eyequeī ānanquidi a cængōnāni adinque, ¹² wænæidi incæ Itota ingantē,

—īi odæ wængänāidi weca āmi godinque tōmēnāni baōnē guiite quēwēmōnie.

¹³ Ante tedete añōnānite Itota Ao angā ēñente wædinque wænæidi wentamō ewocadāni iñōmō tao gote odæ wængänāidi baōnē go guidānitapa. Īnīnque odæncato dote mūido ganca ināni incæ ontacamō cægōnīnque tōmāne to wæi gāwapæno pogodo wæi guiite becadote capo wænānitapa.

¹⁴ Becadote wænāni adinque odæ wængänāidi nē aadīnāni guiquēnē pogodo wodii winonte tōmēnāni quēwēñōmō māo bee tente apænedinque idōmæ māo gode ä gode ä cæte, Itota mænōmaī cæcā wæmōnīpa, ante apænedāni ēñēnīnque wadāni, Æbānō cæcāi, ante acæte ante pōnānitapa. ¹⁵ Itota weca ponte ayōnāni wænæidi tōnō nē quēwēningā incæ ñōwo ōnonganque bate weocoo ēñacā inte tæ contate ongongā adinque tōmēnāni, Mōnō Deguiōnō ēnem pocā āningā ingampa, ante guiñente wægadānimpa. ¹⁶ Nē adīnāni guiquēnē ñōwo pōnāni inānite apænedinque, Wænæ ēnem pocā āningā ingante Itota æbānō cæcāi, odæ wængänāidi inānite Itota æbānō cæcāi, ante apænedāni. ¹⁷ Eñēnīnque tōmēnāni wæætē Itota ingante, Mōnitō weca quēwēnāmaī gobāwe, ānāni.

¹⁸ Eñente wædinque wipodē go guicæ cæyongante wænæidi inte quēwēningā iñōmō, Bitō miñæ māobi goboe. ¹⁹ Añongante Baa ānīnque Itota,

—Tōmēmi oncōnē gote, Wængonguī Awēnē wænæidi inānite wido cæcā ōnōmoque baboī aminīpa, ante bitō guidēnāni inānite māo apænebi ēñencædānimpa. Ayæ, Botō wæwente

quēwēñōmote tōmengā guēa wæwente baī pōnente pōnō cæcā waa batabopa, ante apænebi ēñencædānimpa.

²⁰ Itota angā ēñēnīnque wadæ godinque tōmengā Decapodibæ māo, Itota waa cæcā waa batabopa, ante apænecā. Eñente wædinque tōmānāni, Æ æbānō cæte mænōmaī waa bacāi, ante guiñente wægadānimpa.

Gaido wēñængā beyæ cæcæ goyongante

onquiyængā Itota weocoo gam-pocampa

(Māateo 9.18-26; Odoca 8.40-56)

²¹ Māniī wipodē guiite tōmengā imæmāa ta ti wæængā ate nanguī ināni acæte ante pō goto goto godāmæ gongænānitapa. Itota ayæ gāwapæ wedeca ongongantapa. ²² Ayæ ongōñongā wacā oodeoidi odōmōincō awēnē inongā inte tōmengā emōwo Gaido iñōmō Itota ingante adinque pōnīnque tōmengā ōnōwaca gāānē ædæ wæænīnque, ²³ tōmengā ingante,

—Botō wēñængā baquēcā iñōmō edæ dobæ wæncæ cæcampa cæbii. Bitō ponte tōmengā ingante gampobi waa bate quēwencæcāimpa, ante nanguī angantapa.

²⁴ Gaido mænōmaī angā ēñēnīnque Itota wæætē tōmengā miñæ gocantapa. Idōmæ goyongante nanguī ināni bee tente goto goto pōnāni.

²⁵ Īnīnque godāmæ ongōnāni tōnō onquiyængā adocanque wantæpiyæ dote wadepo iñonte wepæ wantæ bidāmaī cōwē wææ wæwēningā inte adobaī ponte tōmēnāni miñæ gocantapa. ²⁶ Doyedē iñōmō onquiyængā waa bawēnencæte ante cædinque tōmengā quincōo tōmancoo eyepote pædæ godongā ænīnque dotodoidi tæiyænāni cædāni caate wæcā incæte tōmengā waa bawēnēnāmaī inte godōmenque wænæ wænæ bate wædongāimpa.

²⁷ Mænōmaī quēwente wæyongante wadāni, Itota mænōmaī cæcampa, ante tededāni ēñente wædinque tōmengā ñōwo goto pōnāni tōnō pōnīnque

Itota önöñabæca inö ponte weocooque godö gampocantapa. ²⁸ Edæ, “Tömengä weocooque gampote waa bawënemote,” ante pönëningä inte, ²⁹ tömengä godö gampoyongä wepæ nänö gowete wæwënimæ wantæ bi ate tömengä, Wantæ biwënëmopa, ante önöwënenque pönengantapa. ³⁰ Itota iñömö, Æ, tæi piñænte botö entawënö incæ edæ wacä beyæ cæquinque do gotimpa, ante wæwënente awædö, äninque goto gongænäni tæcæguedë næ gongæninque dadi ëmænte cöwä adinque,

—Botö weocoo æcänö pönö gampodai, angantapa.

³¹ Äñongante tömengä nänö në ëmiñænäni guiquënë,

—Ënodäni pönänipa aquimii. Æcänö gampodai, ante ämii.

³² Wææ änäni incæte tömengä, Æcänö botö imote wede pönëninque gampodai, ante godömenque tömäo cöwä cöwä acantapa. ³³ Ayongante onquiyængä guiquënë, Wampo bawënëmopa, ante pönëningä inte nangui guiñëninque do do wäate wædinque Itota weca ponte ædæ wææncate tömänö ante töingä apæ necä ëñengantapa. ³⁴ Apæ necä ëñëninque Itota wæætë,

—Onquiyæmi ëñëmi. Bitö wede pönënö beyæ edæ wampo bawënëmipa. Ñöwo edæ wædämaï inte waa godinque nö bawënente quëwëe, angantapa.

³⁵ Ante tæcæ apæneyongä ood-eoidi odömöincö awënë Gaido oncönë quëwënäni mäniñedë pöninque edæ Gaido ingante apænedänitapa.

—Bitö wengä iñömö ñöwo æmæwo wængampa cæbii. Ñöwo Awënë në Odömongä ingante quinante godömenque anguii.

³⁶ Ante ponte äñönänite Itota tömënäni æbänö tededäni ante ëñënamäi inte bai cædinque oodeoidi odömöincö awënë Gaido ingante apænedinque,

—Guiñënamäi inte önönque wede pönëe, angantapa.

³⁷ Ayæ godongämæ ongönäni inänite, Ee ongödäni, äninque Pegodo ingante, Tantiago tönö Wäo näna caya inate mänimpodänique inänite ænte gocantapa. ³⁸ Tömënäni tönö godinque Itota tömënäni odömöincö awënë oncönë ponte ayongä mänincönë waodäni nangui cægöninque edæ Ca ca wædinque ogæ tedete Yæ yæ änäni acantapa. ³⁹ Adinque Itota oncönë guiidinque,

—Quimæ ogæ tedete cægöwëminii. Quimæ Ca ca wæminii. Iñæmpa iñömö wëñængä wodi edæ wii æmæwo wængantapa. Edæ mö ñongampa.

⁴⁰ Ante apæ necä ëñëninque tömënäni, Angantedö amini, ante tömengä ingante badete todänitapa. Itota wæætë edæ, Gä goedäni, angä oncodo tao godänitapa. Ininque wëñængä wæmpo tönö wäänä inate Itota tömengä miñæ në pöninäni tönö mänimpodänique inänite ænte manguicä wëñængä wodi nänö öñoncönë wäänë guidänitapa. ⁴¹ Wëñængä wodi ingante Itota pædæ wææmpo bæi ongonte töö æmæninque,

—Tadita cömi, äninque mönö tededö, “Wëñæmi onquiyæmi ængæ gantibi,” angantapa.

⁴² Angä ëñëninque wëñængä baquécä dote wadepo ëñadingä inte dobæ ængæ gantite dao dao gocä. Adinque tömänäni ancai guiñente wædänitapa. ⁴³ Itota wæætë, Botö æbänö cæboo, ante minitö mäo apænedämaï iedäni. Äninque edæ wëñængä beyæ cængui angä godöna cængantapa.

6

Näatadeta iñömö ponte Itota apæ necampa

(Mäateo 13.53-58; Odoca 4.16-30)

¹ Itota wadæ godinque tömengä miñæ në godäni tönö tömengä nänö pægaiñömö pongadänimpa. ² Ayæ, Guëmanguionæ impa, äninque Itota tömënäni odömöincönë go guiidinque tæcæ odömönte apæ necä ëñëninque

māniññömō ongōnāni nanguī ināni guīñente wædinque nāni caboque tededānitapa.

—Īngā iñæmpa ædō cæte nanguī ēñente apænecāā. Æbānō cæquīi, ante æcānō tōmengā ingante godō odōmongā adinque tōmengā mānōmaī bamōnengæ cæcāā, ante ēñencæte ante wæmōnipa. ³ Īngā iñæmpa mōnō awæmpa nē timōwengā imaingā inte bamōnengæ mānōmaī cæcampa, ante awædō. Edæ Māadiya wengā inongā inte tōmengā iññömō onōnānique mēmō ingampa. Tantiago tōnō Ootee, Codaa tōnō Timōnō tōmēnāni mēmō ināmaī ingantawogaa. Tōmengā biwinqueidi incæ mōnitō tōnō wīi ongōnāni atamōō.

Ante pōnente wædinque tōmengā beyæ ante piinte badānitapa. ⁴ Īninqe piinte badāni adinque Itota wæætē angantapa.

—Īñæmpa, Wængonguī beyæ nē apænecā inte tōmāmæ gote apæneyongante tōmengā ingante waa adānipa. Wæætē tōmengā nānō pægaiññömō ponte apæneyongante māniññomonque wæætē wīwa adānipa. Tōmengā nānō guīdēnāni tōnō tōmengā oncōnē owodāni tōnō mānimpodānique tōmengā ingante wīwa adānipa tōō.

⁵ Āninqe Itota adopoque adopoque gampocā waa badānitapa. Mānōmaī wædænque cædinque tōmengā, Ædō cæte gomonga cæquīmoo. ⁶ Āninqe, Mīni pōnēegade. Quīnante pōnēnāmaī imīni, ante wægacāimpa.

Wængonguī Awēnē ingantedō ante apæneedāni, ante Itota angā godānipa (Māateo 10.5-15; Odoca 9.1-6)

Ayæ wayōmō nāni quēwēñōmō wayōmō nāni quēwēñōmō māo odōmōninque Itota apænecā ēñengadāni.

⁷ Ayæ, Dote ināni, nāni ānōnāni inānite aa pecā pōnāni ininqe, Nōwo mīnitō æmænō mēmīnaa æmænō mēmīnaa goyōmīnite botō pōnō cæbo ate mīnitō awēnēidi bai badinque edæ wēnæidi wentamō ēwocadāni inānite nē āmīni incāmīnīmpa, ante da godongā

godānitapa. ⁸ Ayæ, Īmaī cæedāni, angantapa. Mīnitō taadō godinque ongontoque mīni nææntoque næænte goedāni. Cænguī incæ māincoo da wenguincade incæ ænāmaī inte godinque tīguitamō ononcamoncadēdē da wēnāmaī inte omæpomīni goedāni. ⁹ Awæncata mīni ēwataque ēwate weocoo mīni ēñacooque ēñadinque wacoo ænāmaī goedāni, angantapa. ¹⁰ Ayæ godōmenque āninqe Itota,

—Godinque æcōnēnō tāno go guimīni owodinque mīnitō wayōmō mīni go quēwenguīnganca mānincōnenque go guīi go guīi cædinque quēwēedāni. ¹¹ Æyōmōmē goyōmīnite wadāni, Pōedāni, ānāmaī inte mīnitō apænedō ante wīi ēñēnāni wædinque mīnitō wæætē tōmēnāni inānite emō cæte Īmainō ante goedāni. Mīnitō iñæmpa, Pōedāni, ānāmaī imīni adinque mōnitō gomōni tamēñedāni, ante odōmoncæte ante mīnitō onōwa wadæ wadæ cæwadinque wadæ goedāni.

¹² Āninqe Itota tōmengā emīñænāni inānite, Nōwo goedāni, āninqe da godongā godānitapa. Godinque tōmēnāni wabæca quēwēnāni inānite māo, Mīnitō wēnæ wēnæ mīni cædinō ante wæwente pōnēninque ñimpo cæedāni, ante māo apænedāni ēñēnānitapa. ¹³ Wēnæidi nanguī ināni inānite wido cædānitapa. Ayæ waodāni nanguī ināni wēnæ wēnæ inte wædāni iññōnānite oginguipæ ōni ōni paadāni ate waa bagadānīmpa.

Wāō æpcænē nē guidōnongā wængampa

(Māateo 14.1-12; Odoca 9.7-9)

¹⁴ Itota emōwo ante apænedāni ēñēninque tōmāmæ quēwēnāni do ēñēninque gode ā gode ā cæte tedeyōnāni Edode pancabaa awēnē odeye incæ, Itota æbānō cæcāā, ante ēñengacāimpa. Īninqe tōmengā iññömō,

—Æpænē nē guidōnongā Wāō wodi dobæ wænte ñāni omæmōningā inte ĩngā Itota iññömō imaingampa. Māniññō beyænque tōmengā tæi piñænte entawēnongā inte nē nanguī cæcā ingampa, ante pōnēmopa, angantapa.

¹⁵ Ayæ wadāni,

—Ediya wodi ïmaingampa.

Ante tedeyönäni wadäni wæætë,

—Wængongui beyæ nê apænegaïnäni bai tömengä adocä ïmaingampa.

¹⁶ Ante tededäni ëñëninque Edode ïñömö,

—Botö nê wangö tamencadongä Wäö wodi adocä incæ edæ ñäni ömæmonte a ongömaingampa, ante wædongäimpa.

¹⁷ Wäö wodi ïñömö ïmaï wængacäimpa. Do ïñedë awënë Edode nänö tönïñacä Pedipe ayæ müingä ïñongä Pedipe manguiwëningä Ædodiya ingante Edode ïñömö, Botö nänöogængä bacæcäimpa, ante ö ænte mongä. ïninque tömengä adocä Wäö wodi ingante bæi ongonte goti winte tee mönedongäimpa. ¹⁸ Edæ Wäö ïñömö nänö caate wænguinque Edode ingante ïmaïnö ante do wææ äningä ïnongäimpa. “Edode ëñëmi, Wængongui nänö angainö bai ëñënamäi inte bitö tönïñacä nänöogængä ingante edæ man-guiwëmpa töö.”

¹⁹ Ante wææ angä ëñëninque Ædodiya guiquënë Wäö nänö äninö beyæ cöwë pïininque tömengä ingante wænoncæ cæcä incæte ædö cæte tömengä ingante wænonguingä.

²⁰ Edæ, Wäö tæiyæ waëmö onguiñængä inte nê nö cæcä ingampa, ante do ëñëngä inte Edode ïñömö Wäö ingante edæ guiñente wædongä ïnongäimpa. ïninque tömengä ingante edæ wææ gompodongäimpa. Ayæ Wäö apænecä ëñëninque Edode, Angä ëñente æbänö cæquimoo, ante nanguï wæcä incæte tömengä ingante ëñëninque todongäimpa.

²¹ ïncayæ ate Edode nänö ëñagäionæ ïinque bayonte Ædodiya, Æönædö wænonguimoo, ante nänö äniönæ eyepæ batimpa. Edode ïñömö, Mäniönæ bai ëñagaboimpa, ante ææmæ cædinque wente ængä ate tömengä miñæ awënëidi tönö ton-tadoidi awënëidi tönö Gadide-abæ quëwënanäi awënëidi tönö tömänäni becæ pönänitapa. ²² Ponte bete cængöñönäni Ædodiya wengä

baquecä incæ tæcæguedë pö gongænte tode pete äwacä adinque awënë odeye Edode tönö godongämæ ongönäni nanguï todönänimpa. ïninque baquecä ingante Edode änongäimpa,

—Waa pönï bitö tode pete äwadi beyænque bitö quiëmë ante æinente ämi ate botö ëñente da pönömo æe.

²³ Äninque ayæ godömenque äninque, Wængongui ëñëñongä nöingä ämopa, änongäimpa. Quiëmë impa bitö æinëmi botö tömäa edæ do godömo æncæbiimpa. Edæ bitö æinente ämi ïninque botö awënë odeyebo inömo inte botö ënempodö incæ edæ tæcæ pä cæte pönömo æmaïmipa. ²⁴ Angä ëñëninque taodique,

—Badä ëñëmi, quinä anguimoo.

Äñongante wäänä edæ do,

—Botö ïmaï ämopa, änantapa. Wäö æpænë nê guidongä ocabo wangö tomencate pædæ pönömi æmoe, ancæbiimpa, ämopa.

²⁵ Änä ëñëninque awënë weca do ponte guidique baquecä wæætë,

—Wäö æpænë nê guidongä ingante wangö tomencate tömengä ocabo ïni coyomænætaca cö cæte do pönömi æmoe.

²⁶ Angä ëñente wædinque awënë odeye ïñömö, Æ ëñente awædö. Quinä ñöwo cæquimoo, ante nanguï wædongäimpa. Incæte tömengä, Botö ïñæmpa godongämæ becönäni ëñëñönänite, Wængongui ayongä cöwë godoncæboimpa, ante nê äniömo inte edæ ædö cæte ñöwo Baa anguimoo. ²⁷ Ante pönente wædinque tömengä nänö äninö, Cöwë godongui impa, ante pönëninque Edode wæætë nê wænongä ingante, Bitö godinque wangö tomencate ænte mämömi ængæ.

²⁸ Angä ëñëninque nê wænongä wæætë tee mönincönë gote guidique Wäö ingante wangö tomencacä wængantapa. Ayæ Wäö ocamö ïni coyomænætaca cö cædinque baquecä weca ænte mämö pædæ pönongä æninque baquecä wæætë wäänä inante godongä ænönäimpa.

²⁹ Mänömaï wængäimpa, ante gode änäni eñente wædinque Wäö wodi tömengä miñæ nē godināni incæ pöningue tömengä baö ini ænte mäo daga wengadänimpa.

5.000 ganca inäni inänite Itota godongä cænänipa

(Mäateo 14.13-21; Odoca 9.10-17; Wäö 6.1-14)

³⁰ Mänii Itota nē nänö da godönināni iñömö ocæ emænte ponte godämæ gongænte, Mänömaï cætamönipa. Mänömaï odömonte apænemöni eñenänitapa. ³¹ Ante apænedänitapa. Ayæ, wadäni nanguï owentædæ pänta owentædæ pänta wææ cægönāni adinque tömēnāni ædö cæte cæguinānii. Cænguï incæ ædö cæte cænguinānii. Adinque Itota,

—Minitö adomīnique botö miñæ önömæca gote wædænque guēmæedäni, angantapa. ³² Angä Ao ante tömēnāni adodänique Itota miñæ wadæ godinque önömæca gocæte ante wipodē wææ contate wogaa godänitapa. ³³ Goyönänite wadäni guiquēnē, Itotaidi incæ godänipa, ante adinque wacōnē ta wacōnē ta godinque tæiyænāni tee ta tee ta go ömaaque oo pänta pogodo gote do edæ pöningue a ongönänitapa. ³⁴ Ayæ wipodē wogaa mämö tæcæ æænoncadoyönāni Itota iñömö ti wæænte ayongä nanguï inäni do ponte a ongönāni acantapa. Tömēnāni nē aacä dæ añongä obegaidi quēwenguināmaï inäni inte adodänique ongönāni bai inäni inte wæwēnänipa, ante pönente tömengä tömēnāni tönö godongämæ wæwente bai pönengantapa. Inique nanguï odömonte apænecä eñenänitapa. ³⁵ Ayæ gäwadecæ bayö Itota miñæ nē godäni tömengä weca ponte äninque,

—Ñöwo wēmö bacæ cæpa cæbii, änänitapa. Ayæ, Önömæca incæ cænguï dæ ampa. ³⁶ Iināni inänite ämi idömæ owodäni weca godinque ayæ nanguï inäni nāni quēwēñömö godinque cænguï godonte cænguinānie.

³⁷ Añönänite Itota wæætē,

Minitö wæætē godömini cæncädänimpa, ämopa.

Añongante,

—Æ, enodäni inäniyaa. Iñæmpa ocho apäicä cæte beyæ paga æinta æninque mänimpota päö ante godonte æninque edæ wii eyepæ imaimpa. Mönitö wadæ gote mänimpota beyæ päö godonte æninque iñömö godongämæ ongönāni inänite godömöni cænguinānii, ämitawoo.

³⁸ Ante wæyönänite Itota,

—Päö æpodö nææminii. Acæ goedäni.

Angä ate pöningue,

—Päö önompo æmæmpoque gæyæ mēa pöni mæ ongompa.

³⁹ Ante apænedäni eñenīnique Itota godongämæ mæ ongönāni inänite, Ñöwo mini cabo mini cabo gaguimäa tæ contaedäni. ⁴⁰ Angä eñenīnique pancadäniya tiēē ganca nāni cabo nänēnē pancadäniya tincoenta ganca nāni cabo nänēnē tömānāni nāni cabo nāni cabo tæ contadänitapa. ⁴¹ Tæ contadäni ate päö önompo æmæmpoque gæyæ mēa æninque öönædē inö æmö adinque, Wængonguï, bitö waa pönömi ænte cæmönipa, ante apænedinque päö pä pä æ cædinque tömengä, Nanguï inäni cænguï ante ænte mäo cö cæedäni, ante tömengä miñæ nē godäni inänite pædæ pönongä æninque mäo cö cædänitapa. Ayæ gæyæ mēa iñonte adobai æninque tömengä tömānāni inänite di mæñæ di mæñæ cæcä æninque cænänitapa. ⁴² Æninque tömānāni tömo pöni cænāni, ⁴³ ate edæ tömengä emiñænāni päö tönö gæyæ nāni ao mænte ñönöni ee öñoncoo pædæ wææmpo ö æ da da wente æninque otodē önompo tipæmpoga go mentodēa cænguï eyede da wēnāni contagatimpa. ⁴⁴ Nē cænāni iñömö onguinænāni edæ tinco miido ganca mänimpodäni nanguï inäni nāni wen-cabo cængadänimpa.

Itota yædopæ dao dao gocampa
(Mäateo 14.22; Wäö 6.16-21)

⁴⁵ Itota ayæ do tömengä nänö nē emiñænāni inānite, Ægodöedāni. Minitö tāno wipodē guite æmæ wedeca Betaida tao goyömiñi botö wæætē wadāni nē cæniñāni inānite ämo godāni ate pömoedāni. ⁴⁶ Angä Ao ante tao goyönāni tömengä wadāni inānite wæætē angä godāni ate adocanque ongonte Wængongui ingante apænecæte ante änanquidi æicantapa. ⁴⁷ Ayæ wemö bayö tömēnāni tæcætibæ wogaa goyönāni tömengä adocanque ömaa ongonte ayongä, ⁴⁸ tömengä nänö emiñænāni wiyate taocæ cæyönāni edæ woboyæ nangui pæmænte pönömenque ænte pö ædö cæte goquināni. Adinque tawadiya nänö peyedē edæ tæcæpæ pöni i gäwapæ wænömēnæcapæ inö edæ Itota iñömö æpæno yædopæ dao dao obo ponte wodo pænta gocæ cæcantapa. ⁴⁹ Yædopæ edæ gocä gomö adinque tömēnāni Yæ äninque, Waocä wænte babæningä wabänö cægongä, ante wædānitapa. ⁵⁰ Edæ tömengä ingante adinque tömānāni ancaï guiñente wædānitapa. Tömengä iñömö tömēnāni inānite do apænedinque, —Ee piyænē cæte guiñēnāmaï iedāni. Botö imo apa guiñewēminii.

⁵¹ Äninque wipodē pö guicä ate woboyæ incæ næ gongæ pæmænāmaï batapa. Ba adinque tömēnāni godömenque guiñēninque, Quinante mänömaï cæ, ante wædānitapa. ⁵² Edæ, Itota æbänö iñontobæ päo nangui pöni pönö badongä, ante nē adināni incæte tömēnāni mimö ömædē ināni inte bai wii pönente wægadānimpa.

Caate wædāni inānite Itota cæcä waa badānipa
(Mäateo 14.34-36)

⁵³ Ayæ æmæmäa taodinque tömēnāni Guënetadetebæ ti wæænininque wipo ñä cæmencadānitapa. ⁵⁴ Mänömaï ti wæænte ñä cæmencayönāni mäniñömö quëwēnāni guiquēnē, Tömengä Itota ingampa, ante do adānitapa. ⁵⁵ Ante adinque mäniömæ tömäo pogodo godinque wēnæ wēnæ wæwēnāni inānite ñönæmpado ñö

cædinque, Itota æyömönö ongongä, ante eñēninque tömēñömö tömengä nänö ongöñömö do ænte pönānitapa. ⁵⁶ Ayæ wadāni nāni nangui pöni quëwēñömö incæ wædænque nāni quëwēñömö incæ idömæ incæ, Itota ædömē gocä, ante adinque wadāni wæncæ cædāni inānite mäniñömö ænte mämö taadö wedeca ñö cædāni öñönānitapa. Iināni wæætē tömengä ingante, Bitö weocoo yæwedecooque ämi gampote waa bamönie. Ante wæyönānite, Ao angä eñente nē gampo gampo cædānique tömānāni waa ināni bagadānimpa.

7

Mimöno tao godi beyænque waocä wentamö ewocacampa
(Mäateo 15.1-20)

¹ Ayæ Paditeoidi tönö nē wææ odömönāni tönö pancadāniya Eedotadē quëwente mäniñedē Itota weca ponte godongämæ gongænte ayönāni, ² Itota miñæ nē godāni pancadāniya mempodāmaï inte wentamö empote cænāni adānitapa. ³ Edæ dodāni, Önompö ædæmö mempoïnānique cæncædānimpa, ante nāni wææ angainö ante Ao äninque, Bapogabo cæte wæcæ wæ, ante Paditeoidi tönö oodeoidi tömānāni ancaa mempote ate cænönāni inānipa. ⁴ Ayæ, Ædæmö äadānique cænguñāni inānipa, ante pönēninque oodeoidi nāni godonte æiñömö gote pöninque ædæmö äate ate cænānipa. Ayæ dodāni godömenque nangui nāni wææ angainö ante pönente Ao ante cædinque tömēnāni owæta cængæ tiguicade awæmpa tömancoo ancaa mēnongate quëwēnānipa. ⁵ Iinque dodāni nāni wææ angainö ante Ao ante tömānö ante eñente cæte quëwēnāni inte Paditeoidi tönö nē wææ odömönāni ñöwo iñömö Itota ingante edæ piinte äninque,

—Bitö miñæ nē godāni iñömö quinante dodāni nāni angainö ante eñēnāmaï inte wentamö nampote cænguñi cænāni.

6 Ante pīināni wædinqe Itota wæætē,

—Mīnitō guiquēnē waa cæmīni inte bai nē ānewēmīni iñōmīnite mīni cædō ante Wængonguī iīmaī apænecampa, ante Itaiya wodi nōngā ante yewæmongacāimpa.

“Iināni iñōmō botō imote önōneque waa apænete bai tededāni incæte,

tömēnāni mīmōno æmæ pōnente edæ gobæ ongonte bai ināni awædō.

7 Ayæ botō imote waa ate bai ædæ wæænte tedinque, Wængonguīmi imidō anguēnē, ante apænedāni incæte tömēnāni botō imote önonquedō ante cædānīpa.

Waodānique nāni wææ änōnō ante odōmonte apænedānīpa tōö.”

Ante Wængonguī pīingampa, ante yewæmongacāimpa. ⁸Edæ Wængonguī, iīmaī cæedāni, ante nānō wææ angainō ante Baa ānimīni inte mīnitō waodānique nāni ānewēnō ante Ao ante cæmīnīpa tōö, angantapa.

⁹Ante apænedinqe Itota godōmenque,

—Mīnitō dodāni nāni angainonque ante eñente cæcæte ante cædinqe Wængonguī nānō wææ angainō ante wido cædinqe dicæ waa cæmīniyaa.

¹⁰Mōitee wodi, “Bitō Wæmpo ingante bitō badā inante waadedinqe waa cæe,” angacāimpa. Ayæ, “Waocā wæmpocā ingante wäänā inante pīinte wēnæ wēnæ angā iinque mīnitō tömengā ingante wænōmīni wæncæcāimpa,” ante wææ ante yewæmongacāimpa. ¹¹Incæte mīnitō iīmainō ante wææ cæmīnīpa. Waocā mæmpocā ingante waa cæquēnengā iñongante wäänā inante adobai waa cæquēnengā iñongante mīnitō wæætē wææ āninqe, Bitō wæmpocā ingante wäänā inante apænedinqe iīmaī ante apænecæbiimpa, ānewēmīnīpa. Bitō,

“Mæmpo, bitō qui, ante, Badā, mīnō qui, ante do botō pōnonguēnēnō incæ ñōwo wæætē Wængonguī ingante do edæ godonte impa,” ante, Codobānō nāni ānō impa, ante apænecæbiimpa.

¹²Äninqe mīnitō Wæmpo beyæ wäänā beyæ nē cæquēnengā ingante wææ ämīni beyæ tömengā wīi cæcampa. ¹³Mänōmai cædinqe mīnitō dodāni nāni angainō mīni Ao ante ænīnonque ante eñēninqe Wængonguī nānō angainō ante edæ, Önōneque impa, ante bai cæmīnīpa tōö. Ayæ adobai wapiticæ āninqe mīnitō wadō wadō cædinqe wēnæ wēnæ cæmīnīpa tōö, ante Itota apænegacāimpa.

¹⁴Ayæ nanguī ināni inānite Itota aa pecā pōñōnānite apænecantapa.

—Mīnitō tömāmīni imīnite apænebo eñēninqe ocaidē pōnente ædæmō eñēedāni. ¹⁵Quincoomē yabæque ongoncoo incæ waocā önōnē guidi beyænque tömengā mīmō dicæ wentamō entawenguingää. Wæætē mīmōnē wīwa pōnēninqe nānō tao godincoo beyænque mīmō wentamō mongængampa, ante apænebo eñēedāni.

¹⁶Æamonca ongonte eñēedāni.

¹⁷Ante apænedinqe Itota nanguī ongōnāni inānite emō cæte oncōnē gote wäänē guicā ate tömengā nānō nē emīñænāni guiquēnē, Mänōmainō ante odōmonte apænedinqe bitō æbānō ante odōmoncæte ante apænebitapa, ante eñencæte ante wæmōnīpa. ¹⁸Ante wæyōnānite Itota,

—Mīnitō incæ ocai omæcadāni bai inōmīni inte eñēnāmai imīnitawo. Cænguī incæ waocā mīmōnē guipa wentamō ewocaquingää. ¹⁹Edæ wīi mīmōnē guipa. Wæætē cæncadē guite goiwaa ogā mente wido cæquinque i apa ānewēmīnīi.

Mänōmainō āninqe Itota, Tömää cænguī waēmō impa, angacāimpa.

²⁰Äninqe godōmenque,

—Mīmōnē wīwa pōnēninqe nānō tao godincoo beyænque waocā wentamō ewocacampa. ²¹Edæ mīmōnē nānō entawente taodinō beyænque waocā önōwēninqe wēnæ wēnæ ante pōngampa. Mīmōnē towēinente nānō pōnēnō beyænque waocā godō towente quēwengampa. Mīmōno æinente wædinqe wacā qui awēmō ængampa. Mīmōnē

nänö piinte pönönö beyænque godö wænongampa. Nänöogængä inämaï iñongante waocä mimönë towëinente nänö pönönö beyænque godö mongampa. ²² Mimönë nanguï æinente wædinque mäincooque ante pönëwengampa. Mimönë nänö taodi beyæ wacä ingante piinte cæcampa. Mimönë pönëwëninque, Wacä edæ oda cæcædänimpa, ante babæ cæcampa. Wiwa nänö pönëwënö beyænque quingämë bai cæte quëwengampa. Mimönë nänö piinte adö beyæ waocä, Wacä bai ñænæmo pönï bacæboimpa, ante cæcampa, ayæ wacä ingante godö wënæ wënæ ante babæ angampa. Mimönë nämä ante waa ate nänö pönönö beyænque, Tömëmoque waëmö imopa, ante nämä waa acampa. Mimö ömædengä inte ëñënamäi cæte önonque quëwengampa. ²³ Mänii wiwa cæpämö tömämämo mimönë nänö pönönö beyænque waocä wentamö ëwocacampa, ante Itota apænegacäimpa.

Onquiyæ oodeo inämaï inte Itota ingante pönente angä
(Mäteo 15.21-28)

²⁴ Mäniiñömö quëwente godinque Itota Tido eyequeï gogacäimpa. Ayæ, Awëmö guiite owoyömo wadäni adämaï incædänimpa, ante pönëninque oncönë pö wäänë guiite ongongä incæte ædö cæte wii aquinäni. ²⁵ Edæ, Itota owocampa, ante do tededäni ëñëninque wacä wäänä, Botö wengä onquiyængä iñömö wënæ në wentamö ëwocacä ingante ënempocampa, ante wædinque Itota weca ponte ædæ wæænte apænecantapa. ²⁶ Itota ëñëmi. Wënæ botö wengä tönö në quëwengä ingante wido cæquïmi, angantapa. Mänii onquiyængä Tidopënitibæ në ëñagaingä inte guidiego tededö në tedecä inongä. ²⁷ Adinque Itota, Wii oodea onquiyængä inongampa, ante wædinque angantapa.

—Wënäni cænguï inguënë waocä dicæ guintamöidi cænguï ante wææntodongingää. Bitö edæ wabi

iñömite botö bitö beyæ ædö cæte cæquïmoo.

²⁸ Añongante,

—Awënë iñæmpa wëñænäni cænguï cæninque eyepodäni wæænte ænömengadæmpa inö öñöñö guintamöidi ade cæmpa.

²⁹ Ante apæneyongä Itota,

—Bitö nö apænedimi inte waa gocæbiimpa. Wënæ bitö wëñængä nänö wædö incæ dobæ edæ ëmö cæte wadæ gotimpa.

³⁰ Angä ëñëninque oncönë go guiite ayongä tömengä wëñængä önonganque bate möimoga ongongä agacäimpa.

Babetamoncacä ingante Itota waa cæcampa

³¹ Mänii Tido gote quëwëninque Itota wadæ godinque Tidöo wodo pänta gocanque go Gadideapæ wedeca poncæ cædinque Decapodibæ yaatænque pongantapa. ³² Gadideapæ wedeca pongä adinque wacä önömonca babetamoncacä inte önöne wapiticæ tedecä ingante Itota weca ænte pöninque, Gampo cæbi waa babaingampa.

³³ Añönäni Itota babetamoncacä ingante nänëne ænte godinque önömonca pædæ guipomoncanta. Ayæ nämä önompo towæ tänompodinque wapiticæ tedecä ingante godö gampo cæguënëwacantapa.

³⁴ Ayæ öönæde inö æmö adinque öö guëmante äninque babetamoncacä ingante, “Epata,” äninque mönö tededö, “Önömonca wi æmoncabäwe,” angantapa.

³⁵ Añongä edæ önömonca tee mömoncate bai inï wi ænete bai badinque önonguënëwa ñimæncæguënëwa gote bai cæguënëwadinque töö tedecantapa. ³⁶ Itota, Botö cæbo në adimäni inte gode änamäi iedäni, äninque ancaa angä incæte në adinäni iñömö godömenque nanguï gode ä gode ä cæte tededäni

³⁷ Eñente wædinque tömänäni nanguï guïñëninque, “Edæ önömonca babetamonca ininäni inänite Itota cæcä ate

önömonca eññenāni badānīpa. Öñone babetade inñāni inānite cæcā ate öñone tededāni badāni atamönīpa. Tömāā edæ waa cæcā ingampa,” ante nanguī tedete wægadānīpa.

8

4.000 ganca ināni inānite Itota godongā cænānīpa (Mäateo 15.32-39)

¹ Māniñedē wadāni tæiyæ pönī ināni ponte eññönāni tömēnāni cænguī dæ ā adinque Itota tömengā miñæ nē godāni inānite aa pecā pönāni ate,

² –Ināni botō weca ongönāni iñömō mēönaa go adoönæque iñonte botō weca ongöñönāni tömēnāni cænguī ömæpodāni badāni ate wædinque botō tömēnāni tönō godongāmæ wæte bai nanguī pönēmo imopa. ³ Cænāmaī inte gue ænente wæyönānite botō, Oncönē goedāni, ämo gote bai tömēnāni edæ idömæ godinque tepæ gæwæninque edæ nangæ badinque bocæ bocæ cæte wæcædönānīpa. Edæ pancadāniya gobæ quēwente pönāni abopa.

⁴ Ante apænecā eññente wædinque tömengā miñæ nē godāni wæætē,

–Iñæmpa önömæca incæ pāö impa æninque godömōni cænguīñāni.

⁵ Ante wæyönānite Itota,

–Pāö æpodō nææmini. Äñongante,

–Önompo æmæmpoque go mēa mæ ongompa.

⁶ Ante apæneyönāni Itota godongāmæ nanguī ongönāni inānite angā onguipoīya tæ contadānitapa. Ayæ pāö önompo æmæmpoque go mēa nāni næænincoo pædæ godönāni æninque tömengā Wængonguī ingante, Bitō waa pönōmi cæncæmönīpa, ante apænedinque pā æninque tömengā miñæ nē godāni inānite, Pædæ godō pædæ godō cæmini cæncædānīpa, ante godongā æninque wadāni inānite godāni ænte cænānitapa. ⁷ Ayæ gæyæ mēa pönī nææñānitapa. Māniñ nāni nææñī æninque Wængonguī ingante apænedinque adobaī angā pædæ godō pædæ godō cædāni.

⁸ Æninque tömo pönī cænānitapa. Ayæ idæwaa cænāni ate tömēnāni pā ænte nāni cænte ññönōi ee öñoncoo wente æninque Itota miñæ nē godāni otodē pönō da wēnānitapa. Inique önompo æmæmpoque go mentodēa cænguī eyede contagatīpa. ⁹ Nē cænāni iñömō onguīñænānique ante tee mampote coatodo müido ganca bai ināni inte ongönönānīpa. Inique cænāni ate Itota angā wadæ godānitapa. ¹⁰ Godāni ate Itotaidi do wipodē guī contate cæwodinque imæmāa pöninque Dadāmānotabæ pongadānīpa.

Mä cæte odömōmi amōnie, ante Paditeoidi änānīpa

(Mäateo 16.1-4; Odoca 12.54-56)

¹¹ Itota pongā adinque Paditeoidi ponte bee tēninque tömengā ingante, Æbānō cæbii, æbānō ämii, ante ancaa änānitapa. Ayæ, Mönō ämō eññente tömengā oda cæbaingampa, ante cædinque Itota ingante apænedinque, Bitō, Pönencædānīpa, ante öönædē mä cæi bai cæbi amōnie. ¹² Änāni eññēninque Itota, Ancaa änāni awædō, ante wæwente badinque öö öö ante guēmangantapa.

–Iñæmpa ññowomīni, Mä cæte odömōmi adinque pönēmaimönīpa, ante ancaa ämīni awædō. Nāwangā ämo eññēdāni. Ññowomīni imīnite mä cæte odömönāmaī ingæimpa.

¹³ Ante äninque tömēnāni inānite ömō cæte godinque wipodē guīte æmæmāa taocæ cæte cæwodinque wadæ gocantapa.

Wapiticæ apænedāni eññēninque gomō aedāni, angampa

(Mäateo 16.5-12)

¹⁴ Māniñ æmæmāa nāni tao gocæ cæyedē tömengā miñæ nē godāni guīquēnē pāö wīi pönente ænāmaī inte godāni inique pāö adoque pönī nāni wēenēñedē ññönōninque wipodē öñompa. ¹⁵ Itota iñömō māniñ pāö tömēnāni nāni ænāmaī inō ante wīi tededinque wadō ante pönente apænecantapa.

—Päo yedæ æmpoqui, ante Padi-teoidi tönö Edode nāni da wente cæi ate gomö aedāni. ¹⁶ Angä eñente wædinqe tōmengä nānō nē emiñænāni wæætē nāni caboque tededinqe, Päo ænte pönāmaï imōimpa, ante Itota wabānō mänōmaï beyæ ämaingampa.

¹⁷ Ante nāmāneque tededāni wædinqe Itota wæætē tōmēnāni inānite,

—Päo ænāmaï inte mīni pōnīnō ante quīmæ tedewēmīni. Botō päo ante dicæ wæbogaa. Nanguï cæbo adīmīni inte mīnitō ayæ eñēnāmaï imīnitawo. Edæ mīmō ömædēmīni inte tedewēmīnipa, ante awædō. ¹⁸ Edæ awincaque adinqe ayæ adāmaï imīnitawoo. Önōmoncaque eñēninqe eñēnāmaï imīnitawoo. Edæ botō æbānō cætabopa, ante adīmīni inte edæ wīi pōnēmīnitawo. ¹⁹ Päo önompō æmæmpoque botō pä ænte godōni incæ tīnco mīido ganca ināni nāni cænte ñōnōni ee öñōñonte æpotodēnō cænguï wente æmīni.

Äñongante,

—Önompō tipæmpoga go mentodēa.

²⁰ Ayæ päo önompō æmæmpoque go mēa guiquēnē coatodo mīido ganca ināni nāni cænte ñōnōni ee öñoncoo æpotodēnō cænguï wente æmīni.

Äñongante,

—Önompō æmæmpoque go mentodēa.

²¹ Apænedāni eñēninqe tōmengä edæ,

—Iñæmpa Tadoteoidi tönö Padi-teoidi wapiticæ ante nāni odōmonte apænedō ante botō, Gomö aedāni, ante wææ ämopa, ante mīnitō ayæ eñēnāmaï imīnitawoo, angacäimpa.

Betaida iñömö babetamongä ingante gampomongampa

²² Mānīnō godinqe Betaida iñömö pōnāni adinqe wadāni babetamongä ingante Itota weca ænte pōninqe, Gampomonguīmi. ²³ Änāni eñēninqe Itota babetamongä önompō bæi ongonte tōö æmænte tōmēnāni quēwēñömö tao yabæque ænte mäocä gocantapa. Ayæ godō towæ

tänōmonte gampo cæmōninqe, Pan-caa tæcæ abi edæ, angantapa.

²⁴ Äñongä edæ tæcæ iñæ æmonte,

—Awæ cægonte bai waodāni incæ cægōnāni abopa. ²⁵ Itota wæætē godō gampo cæmongä ate babetamongä iningä incæ ñōwo cōwä adinqe edæ waa bamōninqe tōmāo edonque pōni acantapa. ²⁶ İninqe tōmengä ingante Itota,

—Iñömö nāni quēwēñömö yaatænque wadæ godinqe tōmēmi oncōnē goe, angä gogacäimpa.

Bitö Codito inömi imipa, ante Pegodo angampa

(Mäateo 16.13-20; Odoca 9.18-21)

²⁷ Itota iñömö tōmengä mīñæ nē godāni tönö wadæ godinqe Tetadea Pidipobæ wædænque ināni nāni quēwēñömö wædænque ināni nāni quēwēñömö go go cædānitapa. Idömæ godinqe tōmengä nānō nē emiñænāni inānite Itota angantapa.

—Wadāni botō imotedō ante tededinqe, Æbodō imoo, ante apænedāni eñēmīni.

²⁸ Äñongante,

—Bitö imitedō ante apænedinqe pancadāniya, Æpænē nē guidongaingä Wäo wodi incæ Itota adocä imaingampa, ante tededānipa. Wadāni guiquēnē, Ediya wodi incæ Itota inongä imaingampa, ante apænedānipa. Wadāni guiquēnē, Wængonguï beyæ nē apænegaināni bai Itota iñömö adocä imaingampa, ante bitö imitedō ante tededānipa, änānitapa.

²⁹ Ante tōmengä mīñæ nē godāni apænedāni eñēninqe Itota,

—Ayæ mīnitō guiquēnē, Æbodō imoo, ante ämīni.

Äñongante Pegodo iñömö,

—Bitö mönō Codito inömi imipa.

³⁰ Angä eñēninqe, Botō imotedō ante, Codito inongä ingampa, ante gode änāmaï edæ pæ wēēneedāni, ämopa, ante Itota wææ angacäimpa.

Itota, İmaï cædāni wæncæboimpa, ante apænecampa

(Mäateo 16.21-28; Odoca 9.22-27)

³¹ Ayæ mäniñedē Itota tömengä miñæ nē godāni inānite iīmaī ante mä odōmonte apænegacāimpa. Botō Waobo eñagaīmo inte nanguī caate wæquēnēmo imopa. Edæ nē aadāni nāni Picæncabo tōnō, Wængonguī qui, ante nē godōnāni ñænænāni tōnō nē odōmōnāni tōnō mänināni iñōmō botō imote Baa ānāni wæquēnēmo imopa. Ayæ botō imote godōmenque wænōnāni wæncæboimpa. Incæte botō do wænōnāni wænimo inte edæ mēōnaa go adoōnæque iñonte ñāni ömæmoncæboimpa. ³² Mänōmaī ante Itota edonque apænecantapa. Apænecā eñēñōnāni Pegodo guiquēnē Itota ingante nānēnē mäocā godinque, Quimæ wæncæ ānewēē, wææ ante tæcæ pūincæ cæyongante, ³³ Itota edæ tömengä miñæ nē godāni gāmænō dadi emænte adinque Pegodo ingante nāemæ pūinque angantapa.

—Bitō Tatānabi bai inōmi inte edæ botō weca ongōnāmaī wadæ gobāwe. Wīi Wængonguī nānō ānōnō ante pōnēmi inte bitō woadānique nāni pōnēwēnonque ante pōnēninque mänōmainō ante tedebe awædō, angantapa.

³⁴ Ayæ tömengä emiñænāni tōnō nanguī ongōnāni inānite aa pecā pōnāni ate Itota tōmānāni inānite apænedinque,

—Æcānō botō miñæ pōinēna ina tömengä nāmā beyænque ante pōnēnāmaī inte botō miñæ tee empote poncæcāimpa. Nāmā nānō wænguīwæ ænte mongænte ponte bai cædinque tömengä, Botō wænguīmo incæ caate wæbo incæ Itota ingante cōwē tee empote gocæboimpa, āninque poncæcāimpa. ³⁵ Edæ æcānō, Nāmā wææ gompodinque quēwæncæboimpa, ante cædinque botō miñæ pōnāmaī ingā guiquēnē tömengä iñōmō edæ quēwēnāmaī incæcāimpa. Wæætē edæ, Wænōnāni wæmo incæte botō Itota miñæ tee empote godinque tömengä waa pōni nānō cægāinō ante apænecæboimpa, ante æcānō cæda guiquēnē tömengä edæ ayæ quēwæncæcāimpa. ³⁶ Edæ

waocā inguipoga ongoncoo tömancoo ö æncæte ante cædinque nāmā önōwoca incæ pædæ godongä wē womonte ba ininque edæ tömengä nānō ömæwocate wæquinque mäincooque æmaingampa. ³⁷ Iñæmpa eyepæ godongampa diyæ önōwoca wæætē æmaingāā. ³⁸ Nōwodāni Wængonguī ingante pāmænte godinque nē eñēnāmaī cædāni weca quēwēninque mīnitō iñōmō botō Waobo nē eñagaīmo beyæ ante guingo imonte wæmīnitawo. Botō apænedō beyæ ante guingo imonte wæmīnitawo. Iñæmpa botō Mæmpo ñāo guinæ gongæñonte anquedoidi tæiyæ waemō emōnāni tōnō dibæ pōninque botō wæætē botō beyæ ante nē guingo imonte wædingā beyæ ante nāemæ guingo imonte wæcæboimpa.

9

¹ Mänōmainō āninque Itota godōmenque,

—Botō weca ongōmīni pancamīniya iñōmō iīmaī ba acæmīnimpa, ante nāwangä āmopa. Mīnitō ayæ wænāmaī mīmīni quēwēñōmīni botō Wængonguī Awēnē Odeye inōmo inte tæi pīñænīninque Tæiyæ Awēnē babo acæmīnimpa, ante Itota apænegacāimpa.

Itota waemō pōni ñāo bai emongä bacā adānipa

(Mäateo 17.1-13; Odoca 9.28-36)

² Mäninō ante apænecā ate Itota iñōmō önonpo æmæmpoque go adoōnæque iinque go ate Pegodo ingante Tantiago tōnō Wāo inate mānimpodānique inānite ānanquidi mæicā adodānique æibæ æite ongongadānimpa. Æite ongōñōnāni edæ Itota awinca tömēnāni ayōnāni edæ wīi cōwē nānō emōnō bai waemō pōni ñāo bai edæ emongä bamongä adānitapa. ³ Tömengä weocoo ñāo pōni nāāmænta weocoo eñacā adinque tömēnāni, Ædō cæte iincoo bai nāāmænta pōni yamonte cæquīnāni, ante edæ wædānitapa. ⁴ Ayæ ayōnāni edæ doyedē pōni nē æigāina iñōmō Möitee wodi tōnō Ediya wodi incæ

Itota tönö edæ godongämæ pö gongæninque tedegöna adänitapa. ⁵ Adinque Pegodo guiquënë Itota ingante,

—Awënë nē Odömömi eñēmi. Ìñömö mönō waa pōni ongonte awædō. Bitō ämi ìninque mönitō oncontaiçoo mentaiya go adotaique mænōninque bitō oncontai ante adotaique Möitee oncontai ante adotaique Ediya oncontai ante adotaique mænōmalmōnipa, angantapa.

⁶ Edæ Wäo tönö Tantiago tönö godongämæ guiñente wædinque Pegodo, Æbänö ante tedequimoo, ante eñēnāmaï inte mäninö ante önonque tedecantapa. ⁷ Ayæ edæ boguimämo ocabogadäni obo wææninque ganta owo ìninque önöpämoque boguimämodē apænecantapa. “Ìngä ìñömö botō Wengä botō nē waadecä ingampa cæminii. Tömengä pönö apænegä ate eñēdäni,” ante apænegä eñengadänimpa. ⁸ Eñēninque quingæ gomö gomö ayönäni wada edæ do dæ goda ìñönate Itota adocanque ñowo tömēnāni weca ongongä agadänimpa.

⁹ Ayæ änanquidi ìnō wææ pōñönäni Itota tömēnāni ìnänite angantapa. Mäninö mīni adinö ante mīnitō gode änämaï pæ wēēneyōmīni botō Waobo eñagaimo inte edæ wænte ate ñäni ömæmoncæboimpa. Ñäni ömæmōmo ate mīnitō edæ mäniñedē ate apænecæminimpa. ¹⁰ Ante angä eñēninque tömēnāni gode änämaï pæ wēēnedäni incæ nämāneque, Mäninö tömengä nänö ñäni ömæmonguimämo ante æbänö ante apænecää, ante wædönänimpa. ¹¹ Ìninque Itota ingante,

—Mänömaï ì ìninque, Ediya wodi täno poncæcäimpa, ante nē odömönäni ìñæmpa quinante apænedänii.

¹² Äñönänite Itota wæætē,

—Ediya wodi nāni änogä ìñömö täno pongä ingampa. Näwangä impa. Pöninque tömengä, Doyedē ingaï baï ñowo wæætē adobaï nō pōni bacæimpa, ante badongampa. Ìninque dodäni Waocä nē eñaquingä

ingantedö ante yewæmōninque, Nanguï caate wæyongante wadäni pīininque Baa ancædänimpa, ante quinante yewæmongadänii, ante pönēmīni. ¹³ Incæte botō ìmainö ante apænebo eñēdäni. Ñöwocä mönō Ediya ìnogä inte do pongäimpa ante aquënë. Tömengä pongä adinque wadäni edæ dodäni nāni yewæmongainö baï adobaï cædinque quiemē ante nāni cæinewenö ante do cædänipa, ante Itota tömengä tönö nē æidänäni ìnänite apænecäimpa.

Itota wænæ ingante angä go ate wēñængä waa bacampa

(Mäateo 17.14-21; Odoca 9.37-43)

¹⁴ Itotaidi mänii wææninque tömengä nänö nē emiñænäni æidämaï ìnāni weca ponte ayönäni wadäni nanguï ìnāni goto gongænäni adänitapa. Nē æidämaï ìnāni tæcæguedē ongöñönänite nē wææ odömönäni guiquënë tömēnāni tönö wæætedö wæætē änäni adänitapa.

¹⁵ Itota do pongä adinque edæ goto gongænänäni tömänäni guiñente wædinque wadæ pogodo ponte bee tēninque, Bitō pōmi, änanitapa.

¹⁶ Äñönänite Itota,

—Tömēnāni tönö quinö ante apænedinque wæætedö wæætē äminii.

¹⁷ Äñongante adocanque tæcæguedē ongongä inte wæætē apænedinque,

—Awënë nē Odömömi eñēmi. Botō wengä wænæ babetadecä ingante ewocampa, ante wædinque botō tömengä ingante bitō weca ænte pontabopa. ¹⁸ Æyömömē ongöñongante wænæ pö guiidinke wēñængä ingante cōwē gotodongä tæ go wæængampa. Ìninque wēñængä wodi mäwanta tadedinque wentoquënë wentoquënë angadinque pæ opate bacampa. Mänömaï cæcä ate wædinque botō bitō mīñæ nē godäni ìnänite, Wænæ inte wido cæedäni, ämo cæquënëänäni incæ ædö cæte cæquinänii.

¹⁹ Ante apæneyongä Itota tömēnāni ìnänite,

—Ñöwomini mini pönëegade. Botö minitö weca æpogadö quëwëmoï. Pönënamai inte cæyöminite botö æpogadö piyænë cæte wæwëmoï. Edæ wëñængä ingante botö weca ænte mämömini pongäedäni, angantapa.

²⁰ Ænte pönäni ate wënæ incæ Itota ingante adinque do wëñængä ingante do do wäate bai cædinque wido cæcä tæ go wæængantapa. Ayæ mäwantabo tadedinque бага wentoquënë wentoquënë angadinque edæ pæntæmæ pæntæmæ gocä.

²¹ Adinque wæmpocä ingante Itota, —Æyedënö mänömai bacäi.

Ñongante,

—Wëñængäñedë do badingä inte quëwengampa.

²² Quëwëñongante wëñængä ingante wantæ wantæ iñö wantæ wantæ iñö, Gongapamö guitodömo gonte wæncæcäimpa, ante wënæ incæ cæcä. Ayæ, Æpænë adobai guitodömo becadote wæncæcäimpa, ante cæcampa cæbii. Näwangä tæi piñæmi inique bitö mönatö wæwënö ante pönente cæbaimipa.

²³ Æñongante, —Bitö guiquënë wabänö wede pönëmi imitawoo. Edæ wede pönëñongante edæ waocä beyæ tömää do cæte impa.

²⁴ Angä ëñente wædinque wæmpocä iñömö yedæ äninque,

—Bitö imite pönëmopa. Edæ botö æmæ pönënö ante bitö cæbi ate ædæmö wede pönente bacæboimpa, ante wæbopa.

²⁵ Ante ñongä nanguï inäni do pogodo pönäni ate wædinque Itota iñömö wënæ në wentamö ewocacä ingante piinte äninque,

—Wënæbi bitö, Babetamonca babetade bacædänimpa, ante në cæbi inömi inte ñöwo tao godinque wii adodö guiquïmi incæbiimpa, angantapa.

²⁶ Æñente wædinque nanguï Yæ yæ äninque wëñængä ingante wido cæcä do do wäate tæ go wææninque pæntæmæ pæntæmæ goyongante wënæ tao gocantapa. Gocä ate wëñængä do wænänäni bai öñongä

ate wædinque pancadäniya, Æmæwo wæmaingampa, ante wädäni. ²⁷ Æninque Itota iñömö pædæ wææmpo önompo bæi ongonte ængæ ganticantapa.

²⁸ Itota ayæ wadæ godinque oncönë pö guiyongante tömengä nänö në ëmiñænäni awëmö äninque, —Mönitö guiquënë bitö bai wido cæcæte ante cædinque quinate wido cædämai intamönii.

²⁹ Ante wæyönänite, —Wënæ mäningä bai ingante wido cæcæte ante cædinque wantæpiyæ cænämai inte Wængongui ingante nanguï apænete ate wido cæcæimpa, ante apænecä ëñengadänimpa.

Wænönäni wæncæboimpa, ante Itota adodö ante apænecä

(Mäateo 17.22-23; Odoca 9.43-45)

³⁰ Ayæ wadæ gote Gadideabæ wodo pænta godinque Itota, Wädäni adämai iñönänite ³¹ botö ëmiñænäni adodänique ongöñönänite odömönte apænëbo ëñencædänimpa, ante cæcantapa. Ayæ tömënäni inänite iimainö ante awëmö apænecantapa.

—Adocanque, Waocä në ëñagaingä æyömönö ongongä, ante godö odömöninque botö imote waodäni nempo pædæ godongä æncædänimpa. Në ænänäni wæætë botö imote edæ wænönäni nänë wæncæboimpa. Incæte mëönaa go adoönæque iñönte botö adobo incæ ñäni ömæmoncæboimpa.

³² Ante apæneyongante tömengä ëmiñænäni önömoncaque ëñëninque ëñënamai inäni inte, Æbänö ante tedebei, ante guïñente wædinque änämai pæ wëenegadänimpa.

Æcänö ñæncængä inte në angä inguingä, ante tededänipa

(Mäateo 18.1-5; Odoca 9.46-48)

³³ Mänii godinque Capënaömö iñömö ponte oncönë guiidinque tömënäni inänite Itota,

—Idömæ pöninque æbänö ante tedeminitawo.

³⁴ Æñongante edæ, Mönö cabo incæ æcänöque ñænængä pönii inongä inte në angä inguingä,

ante tedewēnināni inte guingo
imonte wædinque pæ wēenedānitapa.

³⁵ Īninque tæ contadinque Itota
iñōmō, Dote, nāni āincabo inānite,
Pōedāni, angā pōnāni ate,

—Yæcado ongōmote, ante nē ānongā
iñōmō tōmengā wæætē yæmiñængā
pōni gote ongonte tōmānāni beyæ nē
godō cæcā bate waa tobaingampa.

³⁶ Āninque Itota wēñængā guiyangā
ingante æninque tæcæguedē goncæte
pæ māninque tōmēnāni inānite wæætē
apænecantapa.

³⁷ —Æcānō botō emōwo apænedinque
māningā bai wēñængā ingante, Pōe,
ante godō waa cæcā iñōmō tōmengā
iñōmō edæ botō imote edæ do, Pōe,
ante pōnō waa cæcā ingampa. Ayæ
edæ botō imote, Pōe, ante nē waa
cæcā iñōmō tōmengā iñōmō wii botō
adoboque imote waa cæcā ingampa.
Wæætē botō imote nē da pōnōningā
ingante Wængongui ingante adobai
edæ, Pōe, ante do waa cæcampa, ante
Itota apænegacāimpa.

*Mōnō imonte æcānō pīnāmaī ina
mōnō tōnō cæcampa*

(Māateo 10.42; Odoca 9.49-50)

³⁸ Itota mānōmaī apænecā
ēñēñōnāni Wāo guiquēnē,

—Awēnē nē Odōmōmi ēñēmi. Wacā
bitō emōwo apænedinque wēnæidi
inte wido cæcā atamōnipa tōō. Ayæ,
Wii mōnō cabo ingampa, ante ad-
inque mōnitō tōmengā ingante Baa
āninque, Cædāmaī imāwe, antamōnipa.

³⁹ Ante apæneyongante Itota
wæætē,

—Ee amīni cæcædāni. Edæ æcānō
botō emōwo apænedinque oōnæde
nāni cæi bai mā cæda, tōmengā ædō
cæte botō imotedō ante do wēnæ
wēnæ anguingā. ⁴⁰ Edæ mōnō

imonte æcānō pīnāmaī ina tōmengā
mōnō cabo inongā inte bai mōnō
tōnō godongāmæ cæcā ingampa tōō.

⁴¹ Nāwangā āmopa. Bitō Codito nānō
nē emiñænōmi imi ænte bee, ante
wacā mīnitō imīnite æpæ adotacaque
pōnongā bemīni ĩninque nē pōnōningā
wæætē tōmengā nānō pōnōnīnō beyæ
eyepæ æncæcāimpa, angacāimpa.

*Wacā oda cæcæcāimpa, ante nāni
wæquinque cædānipa*

(Māateo 18.6-9; Odoca 17.1-2)

⁴² Mānōmaīnō apænedinque Itota
godōmenque apænecantapa. “Wadāni
godō cædāni beyæ botō imote
nē pōnēnāni incæ pancadāniya
edæ dobæ oda cæte wēnæ wēnæ
cædānipa. ĩninque, Wēñængā ado-
canque guiyangā pōni ingā incæ
oda cædāmaī incæcāimpa, ante wææ
cæcæte ante cædinque nē godō cæcæ
cædingā ingante iīmaī cædāni ĩninque
tōmengā toquēnengā imaingampa.
Wadāni nāni dacæ godō dacæ
godō cæquinca ñænænca æninque
tōmengā onōmenca æ wēmencadinque
tōmengā ingante tæcætibæ wido
cædāni ĩninque tōmengā edæ, Wēnæ
wēnæ cædāmaī inte becadote
wæmo beyænque Wængongui botō
imote wii godōmenque pangampa,
ante wædinque waa toquēnengā
imaingampa. ⁴³ Bitō onompoca

cædinque wēnæ wēnæ cæbi ĩninque
bitō onompo aa wi æmpote bai wido
cæte bai cædinque wēnæ wēnæ bitō
cædinō ante wido cæbāwe. ĩñæmpa
inguipoga quēwēninque æmæmpoque
empobi incæte bitō cōwē bitō
wænāmaī quēwenguinque oōnæde æibi
waa imaimpa. Edæ wii tipæmpoga em-
pobi inte edæ bitō gonga cōwē bæcote
wæwenguiñōmō wii æmæwo wido
cæte wæquimido anguēnē. ⁴⁴ Edæ
māniñōmō tadōmengadænguipo iñōmō
cængota wænāmaī gonga emōnāmaī
bæcoquinō anguēnē.”

⁴⁵ Ayæ, “Bitō onōwaca wapiticæ
godinque ēñēnāmaī cæbi ĩninque
onōwa aa wi æwate bai wido
cæte bai cædinque wēnæ wēnæ
bitō cædinō ante wido cæbāwe.
ĩñæmpa inguipoga quēwēninque
æmæwaque ewabi incæte bitō
cōwē bitō wænāmaī quēwenguinque
oōnæde æibi waa imaimpa. Edæ
wii tipæmpoga ewabi inte edæ
bitō tadōmengadænguipo wido cæte
wæquimido anguēnē. ⁴⁶ Edæ
māniñōmō tadōmengadænguipo iñōmō
cængota wænāmaī gonga emōnāmaī

bæcoquïnö anguënë.”

⁴⁷ “Ayæ ægodawate tæ go wæænte bai cædinque bitö awinca beyæ ëñënamai cæbi adinque bitö awinca cäi cæmonte bai cædinque wënæ wënæ bitö cædinö ante wido cæquimi, ämo. Edæ bitö, Botö tipæmonga ëmonte incæ tadömengadænguipo wii goïmente awædö, ante pönente wædinque edæ cäi cæmonte awinca æmæmonque ëmömi inte quëwëninque Wængongui Awënë Odeye weca æite waa tobaimipa. ⁴⁸ Edæ mäniñömö tadömengadænguipo iñömö cængota wænämai gonga ëmönämai bæcoquïnö anguënë,” ante Itota apænecantapa.

⁴⁹ Ayæ godömenque apænedinque, “Wadäni, Ööingä ñömænämai ingæimpa, ante cædinque cati ñænæ quimönique gongapamö æñö cæte biyadänipa. Waomini tömämini adobai caate wædinque ædæmö biyate bai badinque ñömænämai inguimïnidö anguënë. ⁵⁰ Cati quimonte cæi iñömö waëme inte gæpæ ëmompä. Incæte nongæmonte ba adinque mïnitö wæætë æbänö nö cæmini wæætë gæpæ ëmongui i. Ööingä waëme bacæimpa, ante quimonte cæi wëa wëa pæmönäni bai cædinque mïnitö mïni caipæ incæ piyænë cæte wacä ingä wacä ingä waa cæte quëwëedäni,” ante Itota odömonte apænecä ëñengadänimpa.

10

Nänöogængä ingante nani pämäno ante
(*Mäateo 19.1-12; Odoca 16.18*)

¹ Mänii Capënaömö ongöninque wadæ tao iguidinque Oodeabæ ganca Oododänö æmæ wedeca pongantapa. Pongä adinque nangui inäni wæætë pö pö cædäni adinque Itota cöwë nänö odömöi bai adobai odömonte apænecä ëñënanitapa. ² Paditeoidi guiquënë, Godö ämö ëñëninque Itota adodeque oda cædete wacä tocæi, ante cædinque tömengä weca pöninque, Itota ëñëmi, änänitapa.

Wængongui æbänö ante wææ angacäi. Waocä tömengä nänöogængä ingante pämengä ininque edæ nö cæte intawo.

³ Ante äñönäni tömengä wæætë,
—Möitee wodi æbänö ante yewæmöninque mïnitö imïnite wææ angacäi.

⁴ Angä ëñëninque,
—Æmæwo pämämo goquimi, ante yewæmöninque mäninta bitö yewæmöninta onquiyængä ingante godömi ængä ate bitö önonque pämäncæbiimpa, ante Möitee wodi wææ ante yewæmongacäimpa.

⁵ Ante apænedäni ëñëninque Itota,
—Iñæmpä, Mïmö ömædëmini inömini inte mïnitö wënæ wënæ cæinëmini iminipa, ante wædinque Möitee wodi, Mänömai cæedäni, ante yewæmongacäimpa. ⁶ Edæ wëenëñedë Wængongui nänö badongaiñedë tömengä,

“Onguïñængä ingampa, ayæ, Onquiyængä ingampa, ante badongacäimpa. ⁷ Mänömai beyæ waocä mæmpocä ingante ëmö cædinque wäänä inante ëmö cæte godinque onquiyængä ingante, Botö nänöogængä, ante æmæwo mongä ate tömäna nana gæncaya inöna inte möninque guëa quëwencædaimpa.

⁸ Ininque æmæwo möninque tömäna nana gæncaya incæ adocanque bai bate quëwencædaimpa,” ante Möitee wodi nänö yewæmongai bai cædinque tömäna nana gæncaya do möninque nänënë inämai adocanque bai do bacäimpa. ⁹ Mänömai beyæ Wængongui, Adocanque bai inapa, ante nana gæncaya nänö në badongaina iñönate waocä wæætë pango cædämai incæcäimpa.

¹⁰ Angä wædinque Itota tönö oncönë guuidinque tömengä miñæ në godänique, Æbänö ante ämitawo. Godömenque apænebi ëñëmönie.

¹¹ Ante äñönänite Itota,
—Æcänö näwä nänöogængä ingante pämäninque wacä onquiyængä ingante möna tömengä wiwa towengä do badinque näwä nänöogængä ingante wiwa cæcampa. ¹² Onquiyængä

guiquënë tömengä nänöogängä ingante pämwente godinque wacä ingante godö mongä ïninqwe tömengä adobai wiwa towengä bacampa, ante Itota apæwecä eñengadänimpa.

Wëñænäni ïnänite gampo cæcadinque waa apæwecampa

(Mäteo 19.13-15; Odoca 18.15-17)

¹³ Ayæ ate, Wëñænäni ïnänite Itota pönö gampo cæcadinque waadete apæwecäcäimpa, ante cædinque wadäni tömengä weca ænte pö ænte pö cædäni adinque tömengä miñæ nê godäni guiquënë, Ænte pönämaï ïedäni, äninque Baa Baa änäni. ¹⁴ Ate wædinque Itota ænguï badinque nê Baa änönäni ïnänite wææ äninque,

—Wëñænäni ïnänite ee amïni poncædänimpa. Edæ mäninäni nänï pönönö bai adobai pönänäni inte edæ Wængonguï Awënë Odeye nempo do quëwënäni ïnänipa. ïninqwe mïnitö ïñömö wëñænäni ïnänite Baa änämaï ïedäni. ¹⁵ Edæ näwangä apænebo eñëedäni. Wëñængä do pönengä inte Ao angä ingä bai Wængonguï Awënë Odeye ingante do pönëninque nê Ao änäni ïñömö tömënanique tömengä nempo guïdinque quëwënänipa. Wadäni guiquënë Wængonguï Awënë Odeye ingante Baa ante pönänämaï ïnänï guiquënë tömënanï ædö cæte tömengä nempo guïdinque quëwenguïnänï, ante Itota apæwecäcäimpa.

¹⁶ Äninque edæ wëñænäni ïnänite bæi ongonte pæ mäninque, Wængonguï mïnitö ïmïnite waadete pönö cæcäcäimpa, ante Itota gampo cæcacä gampo cæcadinque waa apæwecäcäimpa.

Mäincoo nanguï ëacä Itota weca ponte apæwecampa

(Mäteo 19.16-30; Odoca 18.18-30)

¹⁷ Ayæ godömenque gocæ cæyongä wacä edæ Itota weca pogodo ponte da guicapodinque,

—Awënë nê waa Odömömi apænebi eñëmoe. Botö æbänö cædinque cöwë wänämaï wantæpiyæ quëwëmaïmo.

¹⁸ Äñongante Itota edæ,

—Wængonguï adocanque nê waa cæcä ïñongante bitö botö ïmote, Nê waa cæbi ïmipa, ämii. ¹⁹ ïmaï cæedäni, ante Wængonguï nänö wææ angainö ante bitö tömëmi do eñëmipa. “Wacä ingante godö wänönämaï ïe. Bitö nänöogängä ïnämaï ïñongante godö guëa mönämaï ïe. Wacä qui adinque awëmö ænämaï ïe. Wacä wënæ wënæ cæcä atabopa, ante godö babæ wapiticæ änämaï ïe. Wacä qui æncæte ante cædinque babæ cædämaï ïe. Wæmpocä ingante wäänä ïnante waa adinque tömëna ïnante godö waadete cæ,” ante wææ yewæmongacäimpa, ante bitö edæ do eñëmipa, angantapa.

²⁰ Ante apæwecä eñëninque nê äningä guiquënë Itota ingante wæætë,

—Awënë nê Odömömi eñëmi. Botö mäninö bitö änö bai tömänö eñente cædinque pægaboï ae.

²¹ Apæwecä eñëninque Itota tömengä ingante cöwä adinque waadete pönëninque,

—Adodeque ayæ eñente cæquënëmi ïmipa, ante ämo eñëe. Öönädë bitö wæmoncoo ænguinque edæ ñöwo godinque ïmæca bitö mänincoo tömancoo godonte æninque bitö æninta wæætë ömæpodäni inte wädäni ïnänite tömanta godömi æncædänimpa. Ayæ edæ botö ïmote tee empote pöe.

²² Angä eñëninque, Botö mäincoo nanguï impa, ante pönente wædinque nê ëacä ïñömö nanguï wæwëninque wadæ gogacäimpa.

²³ Gocä adinque Itota godongämæ adinque tömengä nänö nê emiñænäni ïnänite,

—Wængonguï Awënë Odeye nempo guite quëwencæte ante cædinque waodäni ömæpodäni inte botö miñæ pönänipa. Mäincoo nanguï ëacä guiquënë æbänö cæte ömæpocä inte botö miñæ ponte guite quëwengingää, angantapa.

²⁴ ïninqwe tömengä miñæ nê godäni tömengä nänö apæwedö beyæ ante, Æbänö angää, ante guïñente wæyönänite Itota wæætë,

—Botö wēmīni ēñēedāni. Wængonguī tōmengä göneacoo wæætē bacoo Awēnē Odeye nempo guite quēwencæteæncæcäimpa. Incæte tōmengä ante cædinque ante waocä mäincoo ingante togænte pancædänimpa. mangä beyænque eyepæ cæcampa Ìncayæ pōmāmo bayonte botö, diyæ guiquingää. ²⁵ Edæ cāmeyo Bitö quēwenguimāmo, ante godōmo guiyangä ingampa diyæ daagö æninque tōmengä cōwē wantæpiyæ guiyampite pædæ tacää. Ìninqe, wænāmaī quēwencæcäimpa. ³¹ Incæte cāmeyo ñænængade ìnongä inte pædæ edæ tāno yæcado ongōnināni inte tadāmaī ingä bai nē éacä adobaī pancadāniya wæætē yæmiñæ gote ingampa. Tōmengä nāmā ayongä ongōnāni bacædänimpa. Ayæ ñænængä ìnongä inte edæ æbānō cæte yæmiñæ ongōnināni inte wæætē Wængonguī Awēnē Odeye nempo do yæcado ponte ongōnāni bacædänimpa, wäänē guite quēwenguingää. ante Itota apænegacäimpa.

²⁶ Ante apæ necä ēñēninqe godōmenque nanguī pōnī guñente wædinque tōmēnāni nāmāneque tededinque,

—Ìñæmpa mänōmaī ì ìninqe æcānō wäänē guite quēwenguingää.

²⁷ Ante nāmāneque tededāni ìnānite adinque Itota,

—Waomīninqe incæ nāmā mīni cædō beyænque ædō cæte quēwēmaīmīni wænguinque tāno æicampa, ante Wængonguī guiquēnē wīi wao bai wæyōnāni ayæ pōnāni guiquēnē cædongä inte nāmā incæ tōmānō do guñente wædōnänimpa. Itota ìñōmō cæcä ingampa.

²⁸ Ante apæ necä ate Pegodo tōmengä ingante äninque,

—Mōnitō ìñōmō mōni éadincoo owæ caate bitö miñæ òmæpomōni pōmōni ae.

²⁹ Tæcæ añongante Itota tōmēnāni ìnānite wæætē,

—Mīnitō botö beyæ ante pōnēninqe waa pōnī botö apænebodō beyæ ante pōnēninqe pōmīnitapa. Ìninqe edæ botö ìimaī ante nāwangä ämopa. Æcānō mänīnō beyæ tōmengä oncodo taodinque tōmengä tōññadāni ìnānite emō cædinque mæmpocä tōnō wäänā ìnante emō cæte wēñænāni ìnānite emō cæte godinque tōmengä göneacoo emō cæte owæ caate godinque botö miñæ æcānō wadæ pōna ìñōmō, ³⁰ tōmengä ìñōmō inguipoga quēwēnīncoo wēēnē nānō éadincoo bai adopocoo æninque godōmenque adopo adopo tiēē ganca mānimpoga adopo æncæcäimpa. Ayæ onconcoo æninque tōmengä tōññadāni tōmengä badäidi tōmengä wēñænāni tiēē ganca bai yebænāni bai æninque,

Wæncæboimpa, ante Itota wæætē adodō ante apæ necampa

(Mäteo 20.17-19; Odoca 18.31-34)

³² Māñī Eedotadēē ante ñōwo änāmænē æiyōnāni Itota incæ tāno beyænte æicä. Ate wædinque tōmengä emiñænāni guiquēnē, Tōmengä nānō ìmānō ñōwō wæyōnāni ayæ pōnāni guiquēnē wædōnänimpa. Itota ìñōmō tōmengä miñæ, Dote, ante nāni gocabo ìnānite nānēnē ænte māocä ongōnāni tōmengä, Botö ìmote ìimaī cædāni bacæboimpa, ante edonque apæ necantapa. ³³ Èñēñōnānite,

“Ñōwo ìñōmō mōnō edæ Eedotadēē ìñōmō æicæimpa. Māñīñōmō æi pō gongæmō ate adocanque, Waocä nē ēñagaingä æyōmōnō ongongää, ante godō odōmongä bæi ongonguīnāni. Ayæ, Wængonguī quī, ante nē godōnāni ñænænāni tōnō nē odōmōnāni nempo tōmengä botö ìmote pædæ godongä æninque tōmēnāni wæætē botö ìmote apænte äninque, Cōwē wæncæcäimpa, äninque oodeoidi ìnāmaī ìnāni ìnānite wæætē pædæ māo godōnāni. ³⁴ Æninque ìñāni wæætē botö ìmotedō ante badete todinque botonga tawimæ towæ tānongadinque æmontaimenca tæi tæi pānāni ämogate wæyōmote botö ìmote godōmenque wænōnāni wæncæboimpa. Wæætē do wænīmo ìnte botö mēōnaa go adoönæque ìñonte ñāni òmæmoncæboimpa,” ante Itota wæætē apænegacäimpa.

Tantiago tönö Wäö, Mönatö ämaï cæe, ante wædapa

(Mäateo 20.20-28)

³⁵ Ayæ Tebedeo wëna Tantiago tönö Wäö iñömö Itota weca pöninge,

—Awënë nē Odömömi eñëmi. Mönatö quiëmē ämöna cæbi waa tobaïmönapa,

³⁶ Äna eñëninge,

—Mīnatö beyæ quīnō cæbo æmīna.

³⁷ Äñongante,

—Awënë inömi inte bitö ñäö emömämöde tæ contadique mönatö imönte iïmaï cæcæbiimpa, ante ämönapa. Adocanque bitö tömëmæmi inö adocanque dipæmæmi inö ämi tæ contaquimöna.

³⁸ Ante äna eñente wædique Itota wæætē,

—Iñæmpa mīnatö eñënämaï inte mänömaï ämīna awædö. Edæ botö nantate wæwenguimæ bai becabo bai mīnatö edæ adobai adotaca becate bai Ao ante botö beyæ nantate wæwenguimīnaa. Ayæ botö wænguimämo ante mīnatö adopænē guite bai adobai Ao ante botö beyæ guiñënämaï inte wænguimīnaa.

³⁹ Ante äñongante,

—Ao ante guiñënämaï cæcæmönaimpa. Ante apæneyönte Itota,

—Botö nanguï caate wæwëmo bai mīnatö adotaca becate bai äanque bai caate wæquimīna imīnapa. Botö wænguimämo ante mīnatö adopænē guite bai adobai wænguimīna imīnapa. Näwangä impa. ⁴⁰ Incæte botö tömëmæmo inö botö dipæmæmo inö æcänö tæ contaquīna, ante wīi botö godö ämo imopa. Wæætē, Awënë containpaa mänīnaque tæ contaquīna, ante do badongangä inte Mæmpo Wængonguï iñömö tömengä adocanque godö angä contacædaimpa, ante Itota apænegacäimpa.

⁴¹ Mänömaïnö ante tededapa töö, ante eñëninge wadäni diete ganca tömengä miñæ nē godäni guiquenē Tantiago tönö Wäö inate piinänitapa.

⁴² Piinäni ate wædique Itota aa pecä

pönäni ate tömënäni inänite wæætē apænegacäimpa.

—Mīnitö, Oodeoidi inämaï inäni æbänö cædänipa, ante do eñëminipa. Tömënäni nāni, Awënëidi, ante nē änönäni iñömö nämä beyænque ante cædique nanguï piinte änäni wædique awënëidi nempo quëwënäni incæ wæætē do eñente cædänipa. Ayæ tömënäni weca nē ñænænäni inönäni iñömö, Tömëmoque ämo eñente cædäni, ante piinte änäni wædänipa.

⁴³ Mīnitö guiquenē tömënäni nämä beyænque ante nanguï änäni bai wīi adobai cæquënëmini imīnapa. Wæætē mīni cabo iñömi adocanque ñænængä pönī ingä bacæte ante cædique tömengä täno edæ mīnitö beyæ nē cæcä baquënengä ingampa.

⁴⁴ Ayæ yæcado ongöinente wæcä iñömö tömengä yæcado ongoncæte ante cædique wæætē edæ yæmiñæ pönī gote tömänäni beyæ nē cæcä badique tömengä nämä beyæ ante cædämaï inguënengä ingampa. ⁴⁵ Edæ Waobo eñagäimo inte adobai, Botö beyæ pönö cæcædänimpa, ante wīi pömo imopa. Wæætē wadäni beyæ godö cæcæte ante pömoimpa. Ayæ edæ nanguï inäni tee mönete bai wæwëñönäni botö wæætē, Tömënäni wibænete tadique quëwencædänimpa, ante tömëmo wepæ incæ godoncæte ante pömo imopa, ante Itota apænegacäimpa.

Batimeo babetamongä ingante Itota angä waa bamongä

(Mäateo 20.29-34; Odoca 18.35-43)

⁴⁶ Itota mäninö godinque Eedicoo nāni quëwëñömö pongadänimpa. Tömengä nänö nē emiñænäni tönö tæiyænäni tönö Eedicoo iñömö wodo pänta tayönäni wacä babetamongä Timeo wodi wë Batimeo iñömö taadö wedeca, Pönömi æmoe, ante änegönongäimpa. ⁴⁷ Inique wadäni, Itota Näatadeta pädingä inte pongampa, ante tededäni eñëninge tömengä ogæ tedete,

—Itota eñëmi. Awënë Dabii wodi pæimi inömi inte botö wædö ante pönente cæe.

⁴⁸ Ante tæcæ añongante godongämæ godäni pancadäniya, Apocænë inguënë quëwëe, ante änäni incæte tömengä godömenque yedæ aa pedingue,

–Awënë Dabii wodi pæïmi inömi inte botö wædö ante pönente cæe.

⁴⁹ Äninqe ancaa aa pecä ëñëninque Itota næ gongæninqe,

–Babetamongä ingante aa pemini pongæedäni.

Angä ëñëninque babetamongä ingante,

–Ængæ gantidinqe wædämaï imäwe. Bitö imite, Pöe, angä apa quëwëe.

⁵⁰ Änäni ëñëninque babetamongä incæ ayacooga gäni tadongate do ængæ gantidinqe Itota weca pongä.

⁵¹ Adinqe,

–Bitö beyæ quinö cæquimoo.

Äñongante babetamongä,

–Awënë në Odömömi ëñëmi. Cæbi waa bamonte aboe.

⁵² Angä ëñëninque Itota,

–Waa bitö bamonguinque botö imote pönëmitapa. Önonque wadæ gobäwe.

Äñongante tömengä do waa bamonte adinqe Itota miñæ taadonque gogacäimpa.

11

Itota Eedotadëe iñömö pongampa
(Mäateo 21.1-11; Odoca 19.28-40; Wäö 12.12-19)

¹ Mänii gote Eedotadëe obo pöninqe Odibowænquidi näni anquidi ontacamö goinö Betapaguee näni quëwëñömö ganca ayæ Betänia näni quëwëñömö ganca pöñönäni Itota tömengä miñæ në goda inate mënaa inate da godöninque angantapa. ² Iimaï angantapa.

–Mänii näni quëwëñömö ongö amina. Tömëñömö go guiite ayömina bodo wë picængä incæ waocä ingante mongænämaï iningä inte näni ñæingä a ongongä acæminaimpa. Adinqe ñi cæyænte ænte pöeda.

³ Wacä, Quinante ñi cæyæmïnaa, ante

wææ angä ëñëninque minatö wæætë edæ, Mönö Awënë nänö ænguënënö ante ænte gomönapa. Tömengä iinque cæte ate adodö do da pönongä æedäni, ante äeda.

⁴ Angä ëñente gote ayöna bodo wë taadö wedeca odemö awäa ñänö ñæ a ongö adinqe ñi cæyænte ænte gocæte ante cæda.

⁵ Adinqe mäniñömö ongönäni guiquënë,

–Bodo wë quimæ ñi cæyæwëmïnaa.

⁶ Äñönänite Itota nänö äniñö adodö äna ëñëninque, Ao änäni. ⁷ Eñëninque ñi cæyænte Itota weca töi töi ænte pönatapa. Ænte pöninqe tömëna weocoo yabæcooque æidämæ wo cæyabæda ate Itota wænömënæca inö æi yiyæ tæ contacantapa. ⁸ Adinqe nanguï inäni, Itota nänö ponguinö, ante tömënanäni weocoo yabæcooque pönö bee podöwayönäni wadäni guiquënë gönea gote yæpæma öñabo tapænte mämö bee bee podöwadäni ate tömengä podöwainonque gocantapa. ⁹ Gocä adinqe täno godäni tönö ayæ pönäni tönö nanguï inäni godongämæ godinqe yedæ äninque,

–Möni quëwëuinque impa, ante, Badogaa, ante tomönipa. Awënë Wængonguï emöwo beyænque pömi ininqe bitö toquinque edæ Wængonguï bitö imite waa cæcæcäimpa. ¹⁰ Mönö mëmæ Dabii wodi pæïmi inömi imipa, ante adinqe mönitö, Awënë odeye Dabii wodi nempo näni waa quëwengäi bai bitö nempo mönitö waa quëwëuinque impa. Iinque, Badogaa, ante yedæ añömöni æibæ pönäni quëwënanäni incæ, Badogaa, ancædänimpa.

¹¹ Ante yedæ añönäni Itota Eedotadëe pö ti wææninqe Wængonguï oncö ñænæncönë yabæcönë pö guidinqe mäniñömö ongoncoo tömäa acantapa. Ayæ, Gäwadecæ pönäni ba awædö, ante tömengä emiñænäni dote ganca inäni tönö wadæ tao Betänia gogacäimpa.

Iigowæ ömæcawæ i adinque Itota püingampa

(Mäateo 21.18-19)

¹² Gote Betänia monte baönæ pöñönäni Itota gæwænte wædinque, ¹³ Quinö impa cænguimoo, ante gomö ayongä iigowæ öñabo emæ incæ incate bocabaimpa, ante gote ayongä ömæcawæ acantapa. Önönepoque i beyæ incadämaï intapa. ¹⁴ Ante iigowæ inte apænedinque,

—Iigowæ eñëmi. Incaquinämaï inte bitö incaquïmi cænguïnänii.

Äñongante tömengä nänö nê emiñänäni edæ eñëe gongænänimpa.

Wængonguï oncö tæiyæ waëmö baccäimpa, ante cæcä

(Mäateo 21.12-17; Odoca 19.45-48; Wäö 2.13-22)

¹⁵ Do nani ponguënönö Eedotadëe pönänitapa. Itota iñömö Wængonguï oncö ñænæncönë yabæcönë pö guidinque mäniñömö mäincoo mänäni tönö wadäni godonte æncæte ante godongämæ pönäni tönö ongönäni adinque tömänäni inänite, Oncodo tao goedäni, ante da tadongä tao godänitapa. Ayæ campio ante nani godonte æimpa tönö equemö godoncæte ante nê mänäni nani cönöimpa tönö bæ tacä tömampaa guidömëmæ tæ go wææntapa.

¹⁶ Ayæ wadäni mäincoo mongænte yacönenque gocæte ante cæyönänite Itota, Ìncodo mongænte godämaï iedäni, äninque wææ cæcantapa.

¹⁷ Ayæ tömënäni inänite angantapa.

—Wængonguï beyæ iïmainö ante yewæmongatimpa. “Tömämæ quëwënäni botö oncönë pö guidinque botö imote apænecädänimpa,” ante Wængonguï angä incæte mïnitö wënæ wënæ cæmïni beyænque Wængonguï oncö incæ nê awëmö ö ænänäni nani womöincönë bai wentamö bapa töö.

¹⁸ Ante odömonte apæneyongante, Wængonguï qui, ante nê godönäni ñænænänäni tönö nê wææ ante odömönäni tönö eñëe gönänitapa. Wadäni önönänique guiquënë, Itota quinante waa pönï apæncä eñëmönii,

ante wädäni. Adinque awënëidi wæætë, Itota beyænque pïinäni wæcæ wæ, ante pönëninque Itota ingante guiñente wædinque, Quinö cæmö wæmaingää, ante wænoncæte ante pönente cægadänimpa. ¹⁹ Gäwadecæ bayonte Itotaidi iñömö oncodo tao godinque godömenque yabæque tao gogadänimpa.

Iigowæ ömæcawæ do guiñë wæ adänipa

(Mäateo 21.20-22)

²⁰ Baänæ ate iïmö nani pöninö adodö ponte ayönäni iigowæ yæwaguinto ætæwowate tömëwæ æi ayawæ edæ dobæ guingo iwate wænimpa, ante adänitapa. ²¹ Adinque Pegodo, Itota iïmö nänö äni bai impa, ante pönëninque,

—Awënë nê Odömömi cöwä ae. Bitö pïinte äniwæ inte iigowæ edæ dobæ guiñë wæ ataque.

²² Äñongante tömënäni inänite Itota wæætë,

—Wængonguï ingante wede pönëmæwedäni, angantapa. ²³ Ìi änanquidi iñömö ongö iñonte waocä, “Änanquidi eñëmi, äninque, Bitö cabænte wo gote gäwapænë guiie,” angä eñëninque änanquidi tömë gäwapæno do wo gote guiquï i, ante pönëmïnitawo. Edæ näwangä ante mïnitö imïnite apænebopa. Äcämenque incæ edæ æmæ pönënämaï inte, Botö änö bai do baccäimpa, ante wede pönëninque äna ininque tömengä nänö äninö bai do æmaingampa. ²⁴ Mänömaï beyæ botö mïnitö imïnite apænebopa. Mïnitö quiëmë incæ ante Wængonguï ingante apænedinque, Tömengä näwangä pönongä æncæboimpa, ante wede pönente apænemïni ininque mïnitö äninö tömänö edæ do æncæmïnimpa.

²⁵ Ayæ edæ, “Mïnitö, Wiwa cæbo incæte Wængonguï öönädë nê quëwënongå inte botö imote pönö ñimpo cæcä ininque botö waa tobaimopa, ante wæmïnitawo. Ìñæmpa, Wængonguï mänömainö cæcæcäimpa,

ante cædinqwe mīnitō tōmengä ingante apænegacæte ante ongōninqwe tāno piyænē cæte cædāni. Wacä wænæ wænæ cæcä wædōmīni inte mīnitō wæætē tōmengä ingante pōnō ñimpo cædāni, ante Itota apænegacäimpa. ²⁶ Wæætē edæ mīnitō pōnō ñimpo cædāmaī imīni ininqwe mīnitō wænæ wænæ cædinō ante mīnitō Mæmpo öönædē nē quēwengä inongä inte tōmengä adobaī ñimpo cædāmaī imaingampa,” ante Itota apænegacäimpa.

Awënë imipa, ante æcänö änaī, ante Itota ingante änānīpa

(Mäateo 21.23-27; Odoca 20.1-8)

²⁷ Eedotadēē iñōmō adodō pōnānitapa. Itota Wængonguī oncō ñænæncōnē yabæcōnē go guiite cægōñongä, Wængonguī quī, ante nē godōnāni ñænænāni tōnō nē wææ ante odōmōnāni tōnō nē aadāni nāni Picæncabo, nāni änāni tōnō tōmengä weca ponte änānitapa. ²⁸ Tōmengä ingante,

–Æcänö nē angä inte bitō imite angä cæbii, änānitapa. Æcänö bitō imite, Nē ämi imipa, pōnō äna æninqwe bitō nē ämi inte bai edæ mänōmaī cæbii. ²⁹ Ante wæyönānite Itota näemæ äninque,

–Botō mīnitō änō bai adod-eque ämo eñēninqwe mīnitō wæætē apænemīni eñēmoedāni. Apænemīni eñēnte ate, Botō cædinō ante æcänö nē angä inte pōnō äna æninqwe cæboī, ante botō wæætē apænebo eñēmaīmīnīpa.

³⁰ Wäö wodi ingante æcänö, Æpænē guidonguīmi, äna eñēninqwe tōmengä wæætē guidongäi, ante pōnēmīni. Edæ Wængonguī angä eñēnte cæcantawoo. Wæætē waodānique änāni eñēnte cæcantawoo. Æcänö Wäö ingante änaa, ante apænemīni eñēmoedāni. ³¹ Angä eñēnte wædinqwe tōmēnāni, Æbänö anguūi, ante wæætedō wæætē nāmāneque tededinqwe, “Wængonguī angä eñēnte Wäö guidongantapa, ante ämō bai Itota wæætē mōnō imonte, ‘Quīnante Wäö ingante pōnēnāmaī imīnitapa,’ ancædongäimpa.

³² Ante pōnente wædinqwe wæætē, Wængonguī beyæ nē apænegä Wäö wodi inongäimpa, ante tōmānāni pōnēnānīpa. Ante pōnēninqwe awēnēidi wæætē, Waodānique änāni eñēnte Wäö guidongantapa,” ante mōnō ædō cæte anguūi. Edæ pīnāni wæcæ wæ. ³³ Ante guīñēnte wædinqwe Itota ingante edæ,

–Wa. Eñēnāmaī imōnīpa.

Ante wæyönānite Itota wæætē,

–Ininqwe edæ, Æcänö nē angä inte pōnō äna æninqwe botō cæboī, ante mīnitō änō ante botō adobaī apænedāmaī incæboimpa, ante angacäimpa.

12

Nē aadāni inguēnēnāni incæ wīwa cædānīpa, ante

(Mäateo 21.33-46; Odoca 20.9-19)

¹ Ayæ māniñedē Itota, Wængonguī æbänö cæcää, ante eñencædānīmpa, ante imæca quēwēnāni nāni cæinō ante odōmōninqwe iīmaī apænegantapa. “Waocä yowementacodē mīninqwe wææ da da māo da caadinqwe, Tōmēmōncoo ænte pīnā pīnā gāwate tōmēmæ ontatodē wæ yopænte æñōmō, ante ææ wote badongä. Ayæ yowementacodē awēmō guīdāmaī incædānīmpa, ante æi wænōmēnæca gomō aquīñōmō mænongä. Ate wabæca gocæ cædinqwe wadāni ömæ wite nē aadāni inānite, Botō yowementacodē incæ ömæ wite aaedāni, angantapa. Aayōmīnite botō, Mīnitō quī, ante pancamonga pōnōmo æncæmīnīmpa, angä Ao añōnāni wadæ gocantapa.”

² “Ayæ yowedepo bayonte tōmengä ingante nē cæcä ingante apænedinqwe, Bitō yowementacodē nē aadāni weca godinqwe pancamonga ämi æninqwe botō weca wæætē māmōmi æmoe, angä gocantapa. ³ Angä godinqwe pongä adinqwe yowementacodē nē aadāni guīquēnē nē æncæ pōningä ingante bæi ongonte tæi tæi pāninqwe ömæpocä da tadōnāni gocantapa. ⁴ Adinqwe nē eacä iñōmō wacä

ingante tömengä ingante nē cæcä ingante angä gote pongä adinque yowementacodē nē aadäni adobaï tæi tacadäni wæyongante, Guingo imonte wæcæcäimpa, ante tömengä ingante godö wīwa cædänitapa. ⁵ Ayæ wæætē nē ēacä wacä ingante da godongä godinque yowementacodē pongä adinque nē aadäni wæætē tömengä ingante wænönäni wængantapa. Ayæ wæætē nanguï inäni inänite da godongä pönäni adinque pancadäniya inänite tæi tæi päninque pancadäniya inänite wænönäni wænänitapa.”

⁶ “Adocanque pönī nē ēacä weca ongönongäimpa. Mäningä iñömö nē ēacä wengä onguïñængä iñongante nē ēacä tömengä ingante nanguï waadedongäimpa. Ininque nē ēacä iñömö, ‘Tömëmo wengä ingante da godömo gocä adinque tömënäni guiñente wædinque ee abainäni,’ ante pönëninque tömengä ingante da godongä tömangä pönī gocantapa. ⁷ Gote dicæ pongä adinque tömënäni, ‘Tömengä ingampa. Wæmpocä mäincoo inī edæ iingä iñömö nē ænguingä ingampa cæmöö. Mönö edæ mäo wænömö wængä ate edæ mönö qui babaimpa.’ ⁸ Änewëninque tömënäni nē ēacä wengä ingante edæ bæi ongonte wænöninque tömengä baö inī yowementacodē wææ cæte yabæque edæ, Ömäe, ante wido cædänitapa. Mäninque apænebopa.”

⁹ Ante tededinque Itota apænegacäimpa. Ayæ mänii nē äninäni inänite wæætē iïmaï angantapa. “Ininque yowementacodē nē aaquënänäni inänite nē ēacä æbänö cæquingä, ante pönëmini. Tömengä edæ, Ömäe, ante do pöninque nē aaquënänäni inänite godö wænöninque wadäni inänite yowementacodē godongä æninque aacædänimpa.”

¹⁰ Äninque Itota, “Minitö guiquënë dodäni nänī yewæmongainta adämaï inte botö imote äminitawo. Edæ iïmainö ante Wængonguï angä eñente yewæmongadänimpa.

‘Dica ænte adinque, Wënæ wënæ inca, ante nē mænönäni nänī wido cædinca incæ gomonga waëmonca inca ininque täno nänī ñönöninca bæbængapa do bacapa.

¹¹ Wængonguï Awënë incæ mänömaï cæcä adinque mönö waocabo guiñente wædinque waa amompa,’ Ante yewæmonte i abaiminipa.”

¹² Mänömaï apæneçä eñente wædinque awënëidi wæætē, Iñæmpa nē aaquënänäni nänī cæinö ante odömonte apænedinque Itota mönö imonte piinte angä awædö, ante pönëninque tömengä ingante bæi ongoncæ cædänitapa. Incæte, Wadäni pünäni wæcæ wæ, ante wædinque ee adinque bæi ongönämaï inte tömënäni edæ wadæ gogadänimpa.

Tæiyæ Awënë nänö äintamö ante tededänipa

(Mäateo 22.15-22; Odoca 20.20-26)

¹³ Mänii awënëidi incæ ayæ ate Paditeoidi pancadäniya tönö Edodeidi pancadäniya inänite da godöninque, Minitö gote Itota ingante äñömīni wabänö tömengä nänö pante wæquinque adodeque wapiticæ bai tedebaingampa. ¹⁴ Änäni eñëninque Itota weca wadæ pöninque,

—Awënë nē Odömömi eñëmi. Bitö nö pönente cæbi imipa, ante do eñëmönipa. Ayæ bitö ayömi mönitö tömämöni önömönique bai imöni adinque bitö iñömö, Waodäni æbänö anguinänii, ante ayæ, Æbänö cæquinänii, ante wädämaï imi inte Wængonguï taadö ante bitö guiñenämaï inte nö odömonte apænebipa. Ininque apænebi eñëmönie. Odömäno gobiedöno beyæ ante tæiyæ awënë Tetædo tigitamö nänö äintamö ante æbänö wææ yewæmonte i, ante eñencæte ante wæmönipa.

¹⁵ Godonte edæ waa cæte intawo. Wæætē wënæ wënæ cæte intawo. Ante äñönänite Itota iñömö, Waa cæte bai tedewänäni, ante do eñente wædingä inte tömënäni inänite,

—Botö imotedö ante cædinque, Æbänö cæmō ate oda cæquiringä, ante quinate cæminii. Deenadio tigitamō ænte pōmini aboedäni.

¹⁶ Angä eñente ænte pōnāni adinque,

—Æcänö awinca bai yewæmonte badonte i. Æcänö emōwo ante yewæmonte i.

Ante añongante,

—Awënë Tetædo awinca bai yewæmonte badonte impa. Adocä emōwo ante yewæmonte ongō amōnipa.

¹⁷ Ante apænedäni eñenique Itota tömēnāni inānite,

—Awënë Tetædo qui i ininque edæ Tetædo ingante godongæimpa. Wæætē Awënë Wængongui qui i ininque Wængongui ingante godongui i apa anewēminii.

Angä eñenique tömēnāni, Æ, nō pōni ante apænecampa, ante tömengä ingante waa adinque guñente wægadānimpa.

Ædō cæte ñāni ömæmonguū, ante wædānipa

(Mäateo 22.23-33; Odoca 20.27-40)

¹⁸ Ayæ Tadoteoidi nē, Waocä wæninque ñāni ömæmōnāmai æmæwo wængampa, ante nē anewēnāni inte Itota weca pōninque, Mōni änō ante ämi eñemāimōnipa, äninque,

¹⁹ —Awënë nē Odömōmi eñēmi. Mōitee wodi mönō beyæ ante wææ yewæmōninque iīmai ante yewæmongacäimpa. Waocä möninque wēñæ tapæidāmai inte wængä ate tömengä tōññacä wæætē owæmpoingä ingante möninque wēñæ tapæidinque, Botö tōññacä wodi wengä ingampa, ante pæpogacæcäimpa, ante yewæmongacäimpa.

²⁰ “Ininque wadāni iīmai cædānitapa, ante apænemōni eñēe. Edæ önompo æmæmpoque go mengäa nāni caipæ iñönānite bamoncadengä möninque wēñæ tapæidāmai manguiwēninque edæ nāñe wængä. ²¹ Wængä ininque wææ ayæmengä adocä ingante möninque wēñæ tapæidāmai

nāñe wængä. Ayæ wææ wacä adobai wēñæ tapæidāmai nāñe.

²² Ayæ wææ wēñæ tapæidāmai nāñe, ayæ wææ wēñæ tapæidāmai nāñe, ayæ wææ wēñæ tapæidāmai nāñe, ayæ wææ ayæmengä pōni adocä ingante möninque wēñæ tapæidāmai nāñe wængantapa. Onquiyængä guiquēne ancaa owæmpote wædinque tömengä pōni nāñe wængantapa. ²³ Ininque, Mōnō ñāni ömæmonguionæ, ante mini äönæ iñonte mäningä owæmpoingä iñömō æcänö nänöogængä baquiringä. Edæ tömengä ingante iñömō edæ tömānāni manguiwengadānimpa.”

²⁴ Añönānite Itota wæætē,

—Minitö iñæmpa. Wængongui angä eñente nāni yewæmōinta adāmai inte bai ämini awædö. Wængongui adocanque tæi piñængä inte edæ tömäa cæcampa, ante pōnēnāmai inte edæ oda cæte ämini awædö. ²⁵ Edæ Wængongui anquedoidi öönæde cōwē owodāni bai inönāni inte waodāni ñāni ömæmōninque godö ñänönāmai mönāmai inguinānidö anguēne. ²⁶ Wæætē do wængaināni nāni ñāni ömæmonguino ante Mōitee wodi ocāñequiya ante yewæmōninque adotaa æbänö yewæmongacäi, ante minitö adāmai inte ämini awædö. Edæ Mōitee wodi ingante Wængongui iīmai angacäimpa. “Botö iñömō Abadäo Wængonguimo ingaïmo inte ayæ Itæca Wængonguimo ingaïmo inte botö Aacobo Wængonguimo adobo imo anguēne.” ²⁷ Ante nē angaingä inte edæ æmæwo wænināni tömēnāni Wængongui ædö cæte inguingä. Wæætē edæ müi quēwēnānique tömēnāni Wængongui inongä ingampa, pōnenguēne quēwēminii. Nē wænte godināni incæ ayæ müināni quēwēnāni inānipa. Minitö edæ wadö ante tedimīni inte edæ oda cæte wapiticæ anewēminipa, angacäimpa.

Wængongui nänö wææ angaïne mēnea tæineda pōni enepa

(Mäateo 22.34-40)

²⁸ Mänōmai añönānite nō apænecä eñente wædinque adocanque nē wææ

ante odömongä iñömö Itota weca pöningue,

–Wængongui, İımaı cæedäni, ante nänö wææ angainecoo ante pönëningue ædedö tæine pöni i iñonte mönö nanguı eñente waa cæquıı.

²⁹ Añongante Itota iñömö,

–İımaıne ante nänö wææ angaine iñömö edæ tæine pöni ene iñonte mönö nanguı eñente cædinque waa cæcæimpa, angantapa. “İdægoidi, ämo eñeedäni. Wængongui mönö Awënë iñömö, tömengä adocanque inongä inte edæ näwä Awënë inongä ingampa. ³⁰ Mänömaı Awënë Wængongui ingampa, ante adinque bitö mimö entawente tömengä ingante waadedinque önöwoca ewocabi inte ædämö waadete pönencæbiimpa. Ayæ edæ bitö ocai encabi inte nö pönëningue bitö baö tæi piñænte eñabi inte edæ godö waadete cædinque tömengä ingante waa waadete pönëe,” ante nänö yewæmongaine tæine iñonte mönö nanguı eñente waa cæcæimpa. ³¹ Ayæ wade nänö angaine adobaı tæine iñonte mönö eñente waa cæcæimpa. “Nämä bitö waadete waa cædö baı adobaı pönëningue bitö wadäni inänite adobaı waa waadete cæe.” Mäninque. İımaı cæedäni, ante Wængongui nänö wææ angainö ante tæineda baı wade edæ dæ ampa.

³² Ante apænecä eñëningue nê wææ odömongä iñömö, –Awënë nê Odömömi näwangä edæ ante apænebi eñëmopa. Wacä wængongui dæ añongante adocanque mönö Wængongui inongä ingampa, ante nö ämipa. ³³ İninque tömengä ingante mimöno entawente waadedinque mönö ocai encamö inte nö pönëningue mönö baö tæi piñæmö inte godö Wængongui ingante waadete cædinque nämä mönö pönënö baı wadäni inänite adobaı waadete godö waa cæmö adinque Wængongui waa acampa. Näwangä impa. Baö bataa iya tante godömö incæ, Wængongui quı, ante mönö

ancaa godömö incæ Wængongui ayongä wædænque waa cæte impa. Wæætë mäninö bitö äninö baı cæmö adinque Wængongui godömenque waa acampa.

³⁴ Ante nê wææ odömongä nö eñente apænecä wædinque Itota edæ, –Bitö Wængongui Awënë Odeye nempo obo pöni ongömi inte gui-ibaımipa, ante awædö.

Angä eñëningue tömänäni, Mönö æbänö godömenque anguiı, ante guiñënete wædinque pæ wëenegadänimpa.

Codito æcänö Pæingä inongä ingää, ante

(Mäateo 22.41-46; Odoca 20.41-44)

³⁵ Pæ wëenedäni adinque Itota ayæ Wængongui oncö ñænæncö yabæcönë ongöninque odömonte apænecantapa.

–Dodäni näni wææ yewæmongainö ante nê odömönäni iñömö mönö Codito ingantedö ante apænedinque, Awënë Dabii wodi pæingä inongä ingampa, ante quınante änänii, ante pönëmini. ³⁶ İñæmpa Dabii wodi incæ Wængongui Tæiyæ Waëmö Önöwoca tönö apænedinque,

“Botö Awënë ingante apænedinque Awënë Wængongui incæ iımaı ante apænecäimpa.

Bitö botö tömëmæ inö tæ contate ongönömi,

Bitö imite nê piınäni inänite bæ tabo ate,

bitö önöwa gäänë ongönäni inänite pinä gäwacæbiimpa.”

Ante Awënë Dabii wodi incæ yewæmongacäimpa. ³⁷ Codito

inongä ingampa, ante awënë Dabii wodi nänö nê angaingä inongä inte edæ adocä Codito iñömö ædö cæte näëmæ Awënë Dabii wodi pæingä inguingää, ante pönenguënë änewëminii. Mänömainö ante Itota odömonte apænecä eñëningue tæiyænäni godongämæ ongönäni waa eñengadänimpa.

Nê wææ odömönäni inänite Itota püingampa

(Mäateo 23.1-36; Odoca 11.37-54, 20.45-47)

³⁸ Itota godömenque iımaı ante odömonte apænecäimpa. “Cædämaı,

ante wææ ante nāni yewæmongainta nē ate odömönāni inānite mīnitō gomō aedāni. Tömēnāni iñōmō doyaenco waëmoncoo wēñate mongænte todānīpa. Waodāni nāni godonte æiñōmō cægōñōnānite wadāni pō bee tēnīque tōmēnāni inānite, Nē odōmōmi, bitō imite waa amōnīpa, ante apænedāni ēñēnīque edæ nē odömönāni iñōmō nanguī todānīpa. ³⁹ Ayæ tōmēnāni odōmōincōnē go guīdīnīque tōmēnāni nāmanque ante pōnēnīque waëmompaa pōnī tæ contate todānīpa. Ayæ ææmæ becæ godīnīque tōmēnāni, Botō tāno bete tocæboīmpa, ante waëmompaa pōnī tæ contate bete todānīpa. ⁴⁰ Ayæ owæmpōināni oncō yo mongænte baī cædīnīque ō æwēnāni inte nē wææ odömönāni iñōmō, Botō imote waa acædānīmpa, ante cædīnīque Wængonguī ingante nōingā apænete baī cædīnīque babæ cædīnīque wantæpiyæ tededānīpa. Tömēnāni godōmenque nāni nanguī pōnī pante wæquinque mænōmaī nāmā beyænque ante cædānīpa, ante adīnīque mīnitō iñōmō ee gomō aedāni,” ante Itota wææ angacāīmpa.

Owæmpōingā incæ, Wængonguī qui, ante godongampa (Odoca 21.1-4)

⁴¹ Māniñedē Wængonguī oncō yabæcōnē iñōmō, Wængonguī qui, ante nāni wēnoncadedē da wēnōnānīmpa. Mānīncōnē pō guīdīnīque tōmēnāni nāni da wēnoncade gāānē tæ contadīnīque Itota a ongōñongā nanguī ināni adoyōmō pōnīnīque daga daga wēnāni acantapa. Pancadāniya nanguī ēadāni inte nanguī pōnī da wēnāni acantapa. ⁴² Ayæ a ongōñongā owæmpōingā ōmæpocā inte ōnontamonque incæ mentamonga ænte māmō daga wengantapa. ⁴³ Adīnīque Itota tōmēngā nānō nē ēmiñænāni inānite aa pecā pōnāni ate,

—Nāwangā ante apænebo ēñēedāni. Wadāni tōmānāni wædænque pōnī godonte baī wīī eyepæ daga wēñōnāni iingā owæmpōingā iñōmō

ōmæpocā inte wædongā incæte godōmenque nanguī godonte baī godongā abopa. ⁴⁴ Edæ mænīnāni guīquēnē nanguī ēadāni inōnāni inte, Quēwenguinta impa, ante cō cædīnīque tōmēnāni nāni wīī æīnēntaque ayæ ongōintaque godōnānīpa. Iingā ōmæpocā ingā guīquēnē tōmēngā nānō quēwenguinta incæ, Wængonguī qui bacæīmpa, ante tōmanta edæ daga wengampa, ante Itota apænegacāīmpa.

13

Wængonguī oncō ñænæncō bæ tate bacæīmpa, ante

(Mäteo 24.1-2; Odoca 21.5-6)

¹ Māniī Wængonguī oncō ñænæncō yabæcōnē ongonte iinque apænete tao goyongā tōmēngā nānō nē ēmiñængā adocanque Itota ingante, —Awēnē nē Odōmōmi ēñēmi, angantapa. Dicacoo wainca wænōmēnæca wænōmēnæca nāni mænongaincadoo waincō ongō cōwā ae.

² Äñongante edæ,

—Bitō guīquēnē, ñænængade nāni mænongaincō ongō abii. Mānīncoo mīni acoo incæ tōmanca bæ tadāni wæænca adīnīque panguīmæ panguīmæ godīnīque dica adocaque pōnī incæ wænōmēnæca ongōnāmaī ingæīmpa, ante Itota apænegacāīmpa.

Oo iinque bacæīmpa, ante æbānō ate ēñenguī, ante

(Mäteo 24.3-28; Odoca 21.7-24, 17.22-24)

³ Māniī taodīnīque Odibowænquīdi go æidīnīque tōmēnāni Wængonguī oncō ñænæncō gomō nāni ayōmō tæ contayongā Pegodo tōnō Tantiago, Wāo tōnō Æntade mānīmpodāni Itota ingante awēmō änānitapa. ⁴ Māniī bitō änīnō ante æyedēnō iinque baquī, ante ēñencæte ante wæmōnīpa. Ayæ, Iīmaī cæbo ate mīnitō, Oo pōnī impa, ante ēñencæmīnīmpa, ante Wængonguī æbānō mā cæquingāā, ante apænebi ēñēmaīmōnīpa.

⁵ Ante wæyönänite Itota, “Wapiticæ odömönänani mīnitō wæætē, Mönō oda cædāmaī ingæimpa, ante nāmā wææ aquenē quēwēmīni. Edæ iīmaī baquī ī ataquēdāni. ⁶ Edæ wadāni nanguī ināni babæ tedete pōninque botō emōwo ante, ‘Botō mānimodō inōmo imopa,’ ante apænedinque wapiticæ edæ māodāni godinque nanguī ināni tōmēnāni mīñæ oda cæte wapiticæ gocædānimpa,” ante apænecantapa.

⁷ Ayæ, “Wabæca awēnē tōnō pō bee tēninque wæætedō wæætē cædapa, ante tededāni ēñencæmīnimpa. Ayæ wayōmō nāni guēadō guēa cæte wænōnō ante tededāni incæte edæ guīñente wædāmaī iedāni. Edæ māninō botō āninō baī cōwē bacæimpa. Ba incæte mōnō inguipoga quēwēnō iñōmō māniñedē wīi æmæwo iinque bacæimpa.

⁸ Adobæca quēwēnāni iñōnānite wabæca quēwēnāni ponte bee tēninque guēadō guēa cæquināni inānīpa. Adobæca awēnē odeye nempo quēwēñōnānite wabæca awēnē odeye tontadoidi māmō bee tēninque guēadō guēa cæte wænonte wænguīnāni inānīpa. Ayæ wayōmō wayōmō goinque pō wæcædānimpa. Ayæ woadāni nāni cæinente wænguinque cænguī incæ tōmāā capo wængæimpa. Māniī wēñæ mā nantate baī wæwente bamīni incæte mīni godōmenque wæwenguinque ingæimpa.”

⁹ Ante apænedinque Itota godōmenque, “Tōmēmīni nāmā incæ wææ aedāni. Edæ mīnitō imīnite bæi ongōninque edæ nē apænte ānāni weca māo pædæ godōnāni æncædānimpa. Ayæ godōmenque tōmēnāni odōmōincōnē māo gōnōnāni gongæñōmīni mīnitō imīnite tæi tæi pancædānimpa. Ayæ botō beyænque pancabaa awēnēidi gobedōnadodoidi weca ayæ tōmāmæ awēnēidi odeyeidi weca māo gōnōnāni gongæninque mīnitō botō beyæ apænecæmīnimpa. ¹⁰ Edæ iinque bayedē botō āñedē ayæ badāmaī iñonte, Botō æmo beyænque quēwencæmīnimpa, ante waa pōni

botō apænedō ante tōmāmæ quēwēnāni doyedē ēñencædānimpa.

¹¹ Iinque māniñedē mīnitō imīnite nāni bæi ongonte ænte goyedē, Nē apænte ānāni weca ongōninque æbānō ante apænequīmo, ante wædāmaī iedāni. Edæ, Æbānō waa apænequīi, ante Wængonguī Tæiyæ Waēmō Önōwoca apænecā ēñente ate apænecæmīnimpa. Wīi nāmā pōnēninque wæætē Wængonguī nānō apænedō ēñēninque apænecæmīnimpa.”

¹² “Māniñedē edæ nāna caya iñōnate adocanque nāemæ pīininque, Wænoncæ, āninque tōmengā tōniñacā ingante da godongā gocæcāimpa. Nāna wencaya iñōnate mæmpocā iñōmō nāemæ pīininque, Wænoncæ, āninque tōmengā wengā ingante da godongā gocæcāimpa. Ayæ wēñænāni incæ wæmpoda inate nāemæ pīininque māo apænedāni ēñēninque wadāni tōmēnāni wæmpoda inate māmō wænōnāni wæncædaimpa.

¹³ Ayæ, Coditoidi imīnipææ, ante tōmānāni botō emōwo beyænque mīnitō imīnite nanguī pīincædānimpa. Pīināni wæwēmīni incæte æcānō iīmæca iinque baganca wæntædāmaī inte botō emōwo beyæ pīinte badāmaī inaa botō tōmengā ingante æmo beyænque quēwencæcāimpa,” ante Itota apænecantapa.

¹⁴ Ayæ, “Wadāni pō ñōmæi baī oō wadō nāni wo ewengulmāmo incæ tæiyæ waēmō iñōmō ænte māmō cō cæcædānimpa, ante doyedē yewæmongatimpa. Docā nānō yewæmongainta adinque nē adingā iñōmō tōmengā do ēñēmaingampa.

Iincayæ ate cō cædāni ongō adinque edæ māniñedē Oodeabæ quēwēmīni iñōmō ānanquidi do wodii wīnonte æibæwedāni. ¹⁵ Ayæ oncōmanca ongōmīni iinque māincoo æncæte ante oncōnē wæi guidāmaī inte oncōmancaque oncōmancaque wodii wīnōmæwedāni. ¹⁶ Ayæ nē gönea cæmīni iinque yacoo æncæte ante oncōnē ocæ emænāmaī inte godōmenque wodii wīnōmæwedāni.

¹⁷ Māniōnæ iinque bayedē yædēmadā

ināni tönö goömæ nē gänönāni tönö tömēnāni nāni wæquimāmo baquinō anguēnē. ¹⁸ Ayæ mīnitō mīni wodii winonguionæ ante pōnēninque edæ Wængonguī ingante, Wīi edæ cōönædepo bacæimpa, ante apæneedāni. ¹⁹ Edæ māniñedē waodāni nanguī nāni wæwēmāmo nāni angā baquinō anguēnē. Edæ Wængonguī nānō badongaiñedē mānōmaī nāni wæwēmāmo bai dæ añonte ayæ godōmenque ñowo ganca dæ ānompā. Ayæ godōmenque iinque baganca mānōmaī nāni wæwenguimāmo bai dæ anguinō anguēnē.”

²⁰ “Edæ wantæpiyæ nāni wæwenguī impa, ante adinque Wængonguī, Mānimpoönæque edæ wæwencædānimpa, ante pōnōmenque ante ānāmaī ingā bai quingānō quēwenguēnē dæ ancædōnānimpa. Incæte Wængonguī, Mānimpodāni inānite apænte æmo beyænque nē quēwenguināni inānipa, ante nānō apænte ængaināni inānite waadete pōnēninque dobæ, Mānimpoönæque wæwencædānimpa, ante cædinque pōnōmenque angacāimpa,” ante Itota apænegacāimpa.

²¹ Ayæ, iinque bayonte æbānō inguī, apænedinque Itota godōmenque iīmaī ante apænegacāimpa. “Māniñedē wadāni mīnitō imīnite, ‘Iñōmō mōnō Codito ponte ongongā tamēñedāni,’ ante ayæ, ‘Wayōmō a ongongā atamōnipa,’ ante tededāni eñēninque edæ mīnitō iñōmō eñēnāmaī imæwedāni. ²² Wadāni māniñedē ponte a ongōninque nāmā incæ ante, Tōmēmo Codito inōmo imopa, ante babæ ante tedequināni. Ayæ, Wængonguī beyæ nē apænebo inōmo imopa, ante nē babæ ante tedequināni. Tōmēnāni, Wængonguī nānō apænte ængaināni incæ æmæwo oda cædinque wapiticæ gocædānimpa, ante cædinque bamōnengæ bai cædinque oönædē cæi bai cædinque nō odōmonte bai cæquināni inānipa. Incæte Wængonguī nē apænte ængaingā inte edæ ee aquingā diyæ æmæwo oda cædinque wapiticæ

goquināni. ²³ Edæ iinque badāmaī iñonte botō ñowo do apænebo eñente cædāni. Oda cædāmaī incæboimpa, ante nāmā wææ aabæwedāni,” ante Itota angacāimpa.

Waobo eñagaimo inte botō iīmaī ponte cæcæboimpa, ante
(Mäateo 24.29-35, 42, 44; Odoca 21.25-36)

²⁴ Äninque Itota ayæ godōmenque apænedinque, “Māniñedē nāni angā iinque go ate nænque iñontobæ wēmō badinque apāicā apāidāmaī ingæimpa. ²⁵ Nēmoncoo oönædē inō wææ tæ wææninque waa tæ waa tæ wæængæimpa. Oönædē tæi ongongaincoo incæ wancæ wancæ cæte bai wapiticæ goquinō anguēnē. ²⁶ Māniñedē edæ botō Waobo nē eñagaimo inte boguimancodē pōninque tæi pōni piñæmo iinque edæ ñāo apāite bai waēmō emonte wææmo acædānimpa. ²⁷ Mānōmaī pōninque botō anquedoidi inānite āmo godinque tömēnāni æmænō betamonca æmænō betamonca boguimā nāni pō goinō godinque inguipoga tömāne godinque oönæ tömāne godinque Wængonguī nānō apænte ængaināni inānite añete poncædānimpa.”

²⁸ Ante Itota godōmenque apænedinque, “Igowæ æbānō iwæ, ante odōmonte apænebo eñēninque pōneedāni, angantapa. Tōmēwæ mīiwæ badinque iigowæ wayabo tånā nā boca adinque mīnitō, Oñabo nānō bocañepo inte nænque nāwantedæ baquinque bocapa, ante pōnēninque edæ do eñēmīnipa. ²⁹ Ayæ adobai māninō botō apænedō bai edæ do ba adinque mīnitō, Waocā nē eñagaingā do odemō pōni ongōninque inguipoga oo poncæcāimpa, ante eñencæmīnimpa. ³⁰ Nāwangā amopa. Ñowomīni ayæ mīimīni quēwēninque wænte godāmaī iñōmīni māninō botō apænedinō bai tömānō edæ do iinque baquinō anguēnē. ³¹ Edæ oönædē ongōñōmō inguipoga tönō wo ewente bai dæ ba incæte botō angainonque guiquēnē

dæ badāmaī inte edæ cōwē tæi ongongæimpa,” angacāimpa.

³² Ayæ, “Māniönæ æyedēnō ī, ante, Mānīnepo ædepodō ī, ante ēñencæte ante mīni wædinō ante æcāmenque incæ ēñēnāmaī ingampa. Tōmānāni ēñēnāmaī iñōnāni edæ Wængonguī anquedoidi incæ ēñēnāmaī inānīpa. Wæmpocā Wēmo incæ ēñēnāmaī iñōmote Wæmpocā iñōmō tōmengā adocanque incæ edæ nē ēñgā ingampa,” angantapa.

³³ Änīnque ayæ godōmenque apænedīnque Itota tōmēnāni inānite iūmaī angantapa. “Inīnque, Äyedēnō baquīī, ante ēñēnāmaī imīni inte edæ mōnāmaī mīimīni wānō cōnīnque edæ Wængonguī ingante apæneedāni.

³⁴ Botō ponguīnō iñōmō waocā ēacā nānō cæi baī impa. İngā waocā iñōmō wabæca gocæ cædinque, Botō imote nē cædāni nē ānāni badīnque botō oncō waa aacædānīmpa, ante adocanque ingante, Māninganca cæe, wacā ingante edæ, Māninganca cæe, wacā ingante, Māninganca cæe, ante odōmōnīnque odemō wææ a congā ingante, Cōwā ae, ānīnque wadæ gocā. ³⁵ Inīnque botō nē ēacā baī iñōmote mīnitō, Mōnitō Awēnē æyedēnō ponguīngāā, ante ēñēnāmaī imīni inte gāwadecæ ayaōnæñēñā tawadiya peyedē ñāō ba, æyedēmē poncæcāimpa, ante wadō congruēnē cæmīnī. ³⁶ Edæ, Wīī mō ñōmōni ponguīngā ingānō anguēnē, ante cædinque mīimīni quēwēmaīmīnīpa. ³⁷ Mīnitō imīnite botō ānō ante tōmānāni inānite adobāi, Wānō congruēnē quēwēmīnīi,” ante Itota angacāimpa.

14

Itota ingante bæi ongonte ængæimpa, ante cædānīpa

(Mäateo 26.1-5; Odoca 22.1-2; Wäo 11.45-53)

¹ Mēōnaa go ate wodo pænta gogaiönæ baī Patowa ææmæ baquīmpa, ante pōnēnīnque oodeoidi ñōwo, Pāō yedæ æmpoquī ōmæmō ī mōnō cænguīönæ inguīmpa, ante

cædōnānīmpa. Māniñedē, Wængonguī quī, ante nē godōnāni ñænænāni tōnō nē wææ ante odōmōnāni iñōmō, Mōnō awēmō cæte Itota ingante bæi ongonte ænte māo wænongæimpa, ante cædōnānīmpa. ² Oo pōnī impa, ante wædinque awēnēidi,

—İñæmpa ææmæntedæ iñonte wænōmō baī tōmānāni ænguī bate Yæ yæ ante piinte cæcædōnānīmpa, ante adīnque mōnō ædō cæte māniñedē cæquīī, ante wægadānīmpa.

Itota ocaboga onquiyængā oguī wapæ gao cæcacampa

(Mäateo 26.6-13; Wäo 12.1-8)

³ Itota iñōmō Betānia godīnque nē baadīngā Timōnō oncōnē go guīte ēñacantapa. Guīi ēñate cæncōñongā onquiyængā adoyōmō pō guīcantapa. Tōmengā oguī wapæ nāwā nāadodopæ nāni ānōmæ nānō nanguī godonte ænīmæ dica adabatodo waincadedē pe ñiñænte māningā inte ñōwo ænte māmō Itota weca pongantapa. Pōnīnque tōmengā mānīncade wencade ao mænōdīnque Itota ocaboga edæ gao cæcacantapa.

⁴ Adīnque godongāmæ ongōnāni pancadāniya ænguī badīnque nāni caboque tededīnque,

—İñæmpa oguī wapæ incæ ōnonque guēnente baī cæcampa tōō. ⁵ Edæ waocā adoque wadepo cæte beyæ paga ænīnque todetiento deēnadiota nāni ænīnta ayæ godōmenque ænīnta beyæ godonte ænguēnēmæ imæmpa. Godonte ænte baī ōmæpodāni inānite wæætē godonguēnē apa.

Ante nāmāneque tededīnque onquiyængā ingante nanguī piinte ānānitapa.

⁶ Itota wæætē,

—Quīmæ piīwēmīnīi. İngā onquiyængā iñōmō botō imote waa pōnī cæcā apa quēwēmīnīi. Ee aquēnē quēwēmīnīi. ⁷ Edæ ōmæpodāni mīni ānīnāni mīnitō weca cōwē quēwēnāni adīnque mīnitō æyedēmē tōmēnāni beyæ waa cæinēmīni inte edæ do waa cæbāimīnīpa. Botō guīquēnē

mīnitō weca wīi wantæpiyæ on-goncæboimpa. ⁸ Adinque mānīmæ oguī wapæ botonga gadongadinque tōmengä edæ botō baō daga wenguinque eyepæ iñonte òni paacantapa. Ìninqe tōmengä nānō cæganca ante do cæcä apa änewēmīnii. ⁹ Mīnitō ìmīnite nāwangä ante apænebopa. Tōmāmæ æyōmōmē wadāni nāni ēñente toquinque botō ìmotedō ante apænedāni ēñēnānii māningä on-quiyængä nānō cædinō ante adobai tededāni ēñente pōnencædānimpa, ante Itota apænegacäimpa.

Itota ingante odōmonte godoncæte ante Codaa cæcampa

(Mäateo 26.14-16; Odoca 22.3-6)

¹⁰ Ayæ māniñedē nāni, Dote, äincabo iñōnāni adocanque Codaa Icadote nāni änongä iñōmō, Itota æyōmōnō ongongä, ante odōmonte pædæ pōnōmo æncæmīnimpa, ante cædinque, Wængonguī qui, ante nē godōnāni ñænænāni weca wadæ gocantapa. ¹¹ Godinque tōmengä, Ìimai cæcæboimpa, ante apænecä ēñēninque awēnēidi nanguī todinque Ao äninque, Cæbi ate tiguitamō pōnōmōni æncæbiimpa, änāni. Èñēninque Codaa Ao äninque, Æbānō cæte godō odōmōmo ænguīnānii, ante cōwä adinque ancaa cægacäimpa.

Awēnē Itota pāo tōnō owæta pōnongä cænte bedānipa

(Mäateo 26.17-29; Odoca 22.7-23; Wäö 13.21-30; 1 Coodintoidi 11.23-26)

¹² Oodeoidi pāo yedæ æmpoqui òmæmō ì nāni cænguīönæ tæcæ ba ate tōmēnāni, Wodo pænta gogaiönæ bai Patowa mōnō cænguīönæ impa, ante pōnente cædinque, Wængonguī qui impa, ante codotedo māniönæ edæ cōwē wænōnōnānimpa. Ìninqe māniönæ ìnque ba adinque tōmengä nānō nē emiñænāni Itota ingante äninque,

–Ædōnō ämi gote mōnitō Patowa ææmæ ante cæmōni ate bitō bete cænguīmii.

¹³ Änāni ēñēninque Itota tōmengä nānō nē emiñænāna mēnaa ìnate da godōninque,

–Māniñi nanguī nāni quēwēñōmō gote taadō goyōmīnate onguīñængä incæ cadabodē æpæ iyænte næænte pō bee tengä adinque mīnatō tōmengä miñæ tee empote goeda. ¹⁴ Tōmengä æcōnēnō guicä adinque māniñi oncō nē äcä ingante äninque mīnatō, “Mōnō Awēnē nē Odōmongä ìnte ìimai angampa. Bitō oncōnē guicōnē æcōnēnō ante, Bitō oncō, ante ämi guidinque botō nē emiñænāni tōnō botō Patowa ææmæ bete cænguīmōnii, angampa.” ¹⁵ Ante äñōmīnate tōmengä æmongapaa mæi odōmōninque ñænæncō awæmpa nānō do cōnōincō odōmongä adinque mīnatō mānincōnē mōnō beyæ tōmää eyepæ cæcæmīnaimpa.

¹⁶ Angä ēñente tao godinque nāni quēwēñōmō ponte ayōna, Itota nānō äno bai tōmää do cæte ongompa, ante adinque tōmēna Patowa ææmæ ante cædatapa.

¹⁷ Gäwadecæ bayonte dote ìnāni nāni cabo Itota miñæ godongämæ pōnānitapa. ¹⁸ Ponte tæ contate cæncōñōnānite Itota,

–Nāwangä ante apænebo ēñēdāni. Mīni cabo incæ adocanque botō tōnō ñōwo godongämæ cæncongä incæ, Æncædānimpa, ante botō ìmote odōmonte pædæ godonguingä ingampa.

¹⁹ Ante apænecä ēñēninque, Wæinente awædō, ante pōnēninque tōmengä ingante adocanque adocanque äninque tōmānāni adoyōmō,

–Botō ìmotedō ante dicæ apænebitawogaa.

²⁰ Äñōnāni Itota wæætē,

–Önompo tipæmpoga go mēmīnaa iñōmīni adocanque botō tōnō guëa adotaca mi cæte cængä incæ tōmengä nē cæqingä ingampa. ²¹ Edæ dodāni Wængonguī beyæ ante nāni yewæmongai bai cædinque botō Waobo ēñagaimo ìnte cōwē wænte goquēnēmo ìmodō anguēnē. Incæte botō ìmote nē odōmonte godōnongä guiquēnē tōmengä nānō wæquinque

cæquingä ingampa. Mäningä wii ēñate bai waa toquēnengä incædongäimpa. ²² Ayæ tæcæ cæncōñönäni Itota päö bæi ongonte æninque Wængongui ingante waa ate apænedinque päö pä æninque tömēnāni inānite pædæ godö pædæ godö cæcantapa.

—Botö baö bai impa, ante pædæ pönömo æninque mīnitö Ao ante cæedāni.

²³ Äninque ayæ bequimæ owætaca bæi ongonte æninque Wængongui ingante waa ate apænedinque pædæ godöningue nēnemocä æninque tömēnāni bedānitapa. ²⁴ Beyönāni tömēnāni inānite apænedinque,

—Botö wepæ iimæ bai impa. Wængongui do apænedinque, Botö pönö cæbo ate mīnitö Ao ämīni inique mönö godongämæ waa cæte quēwengæimpa, angacäimpa. Nöwo adobai mīine äninque apænebopa. Botö wepæ ante Ao ante æmīni inte mönö godongämæ waa cæte quēwengæimpa. Edæ nangui ināni beyæ gowequimæ impa. ²⁵ Botö iñömö Awēnē Odeye badinque ocæ emænte pöninque mīimæ botö beganca mānimæ yowepæ ñowo æmæwo bebo tamēñedāni, ante Itota apænegacäimpa.

Pegodo incæ, Dicæ abogaa, apænequingä ingampa, ante

(Mäateo 26.30-35; Odoca 22.31-34; Wäö 13.36-38)

²⁶ Ayæ Wængongui ingante ämotamīni ante tao godinque Odi-bowænquidi godānitapa. ²⁷ Goyönānite Itota iimāi ante apænecantapa.

—Dodāni Wængongui beyæ yewæmöninque,

“Nē aadingä ingante tacabo dæ wængä ate cæningäidi obegaidi wæætē panguimæ goquimpa,” ante nāni yewæmōnte angainö bai cædinque botö dæ ämo beyæ guingo imonte wædinque tömāmīni edæ nāwæ goquimīni imīnīpa, ante awædö. ²⁸ Panguimæ gomīni incæte botö edæ ñāni ömæmōnte Gadideabæ tāno gote a ongöñömo mīnitö ayæ pöedāni.

²⁹ Angä ēñente wædinque Pegodo guiquēnē,

—Iñæmpa dæ ämi beyæ tömānāni guingo imonte badinque panguimæ godāni incæte edæ botö guiquēnē cōwē panguimæ godāmai incæboimpa.

³⁰ Äñongante,

—Bitö imite nāwangä ante apænebo ēñēe. Nöwoönæ woyowotæ incæ tawadiya mempoga pedāmai iñonte bitö iñömö botö imotedö ante wadö ante apænedinque, Dicæ abogaa, ante mempoga go adopoque anguimi imipa.

³¹ Angä ēñente wædinque Pegodo wæætē,

—Iñæmpa botö bitö tönö wæmo incæte māninö ante cōwē änāmai incæboimpa.

Ante nangui äñongä tömānāni adodö ante apænegadānimpa.

Guetēmānii iñömö Itota Wængongui ingante apænecampa

(Mäateo 26.36-46; Odoca 22.39-46)

³² Mānii godinque yabæ incæ Guetēmānii nāni äñömö pöninque tömengä mīñæ nē godāni inānite Itota,

—Tæ contate ongöñömini botö godömenque gote Wængongui ingante apænete pömoedāni.

³³ Äninque Pegodo Tantiago Wäö mānimpodānique inānite ænte mäocä goyönāni Itota iñömö nangui wæwente badinque guñente wæcantapa. ³⁴ Ayæ tömēnāni inānite,

—Botö wæwēmāmo entawēninque pæmænte wæte wængui wædö. Mīnitö guiquēnē tæ contadinque beganca wānö cöedāni.

³⁵ Äninque wædæ pö gote ædæ wæænte guidömēmæ ñongæninque Wængongui ingante, Bitö Ao ämi botö caate wæquintedæ wii ba ate waa tobaïmopa. ³⁶ Äninque, “Mæmpo, botö Wæmpo ēñēmi. Bitö tæi piñæmi inömi imipa. Bitö ti nā wænguimæ bai ö ænte bai cædinque botö imote edæ, Wænāmai incæbiimpa, ämi inique botö edæ waa tobaïmopa. Incæte botö änönö bai wii cædinque wæætē tömēmi änönö bai cæe,” ämopa.

³⁷ Äninqe tömënäni weca adodö ponte ayongä mö ñönäni adinque tömengä Pegodo ingante,

—Timönö edæ mömitawo. Botö tönö wänö congruënemi incæ bitö adoque oda ganca incæ wii aacömi. ³⁸ Edæ, Mimöno waa cæinëmönipa, ante ewocayömiini baö aquiiñö eñamini inte wæntæye bamïnipa. İninqe edæ mïnitö wänö cöninque nãmä beyænque Wængongui ingante apænedinque edæ, Wii wënæ wënæ cæinëmöni bacæmönimpa, ante apæneedäni.

³⁹ Äninqe Itota wæætë wadæ godinque wëenë nänö äninö bai apænedinque Wængongui ingante adodö ante apænecantapa. ⁴⁰ Ayæ adodö ponte ayongä möwo möinente ædo ædo cædinque mö ñönäni acantapa. Acampa, ante wædinque tömënäni, Æbänö anguimöö, äninque edæ pæ wëenedänitapa. ⁴¹ Itota wæætë mempoga go adopoque gote apænedinque ñöwo adodö pöninque edæ tömënäni inänite,

—Ayæ edæ guëmante mö ñöminii. Edæ idæwaa. Ñöwo iinque cætimpa. Botö Waobo eñagaïmo inte edæ botö wæwenguïönæ do edæ ba iinque nê wënæ wënæ cædäni nempo nê pædæ godömoncæ cædingä iñömö botö imote do odömonte godongäi ataqueedäni. ⁴² Ñöwo edæ ængæ gantidinque mönö gocæimpa. Botö imo nê odömonte godonguingä iñömö edæ obo pöni pongä tamëñedäni, angacæimpa.

Itota ingante bæi ongonte ænte godänipa

(Mäateo 26.47-56; Odoca 22.47-53; Wäö 18.2-11)

⁴³ Ayæ apæneyongä edæ Codaa wodi tömënäni nãni, Dote, ante gocabo adocabo iningä incæ ñöwo pongantapa. Do iñömö, Wængongui qui, ante nê godönäni ñænænäni tönö nê wææ odömönäni tönö nê aadäni nãni Picæncabo tönö wadäni inänite, Codaa miñæ goedäni, ante da godönönänimpa. Ñöwo iñömö tömënäni nãni nê da godönäni inte tæiyænäni yaëmë næænte canta næænte Codaa miñæ pönänitapa.

⁴⁴ Doyedë iñömö nê odömonte godoncæ cæcä Codaa iñömö tömengä miñæ poncæ cædäni inänite iïmaï ante wëenëñedë apænedingä inongäimpa. “Botö odömonte queë bemömo adinque mïnitö wæætë, Tömengä ingampa, ante adinque tömengä ingante bæi ongonte æninqe wææ cæte mäomini gocæcæimpa.” ⁴⁵ Ante do äningä inte Codaa iñömö ñöwo Itota weca pöninque,

—Awënë nê Odömömi imi.

Äninqe edæ waa cæte bai edæ queë bemongantapa. ⁴⁶ Mänömaï queë bemonte odömongä adinque tömengä miñæ pönäni incæ Itota ingante pædæ gopo bæi ongonte ænänitapa.

⁴⁷ Wængongui qui, ante nê godongä ñænængä pöni inongä ingante nê cæcä incæ mäniñömö ponte a ongongä adinque Itota gäänë ongongä adocanque pædæ guiipote yaëmë o togænte æninqe mäningä nê cæcä ingante tæi päninqe önömonca wangö tamoncacantapa. ⁴⁸ Adinque Itota iñömö ñöwo pönäni inänite,

—Mïnitö iñæmpa, Bitö nê ö ænimi imipa, ante bai cædinque botö imote canta tönö yaëmë næænte ö æncæte ante pömiini awædö. ⁴⁹ İñæmpa Wængongui oncö ñænæncönë yabæcönë iïmö iñö iïmö iñö apænecöninque botö mïnitö weca a ongöñömote mïnitö edæ bæi ongönämaï ee amïnitapa töö. Incæte Wængongui angä eñente nãni yewæmongainö bai iinque baquinque ante cæcæimpa.

⁵⁰ Ante apæneyongante tömännäni edæ emö cæte wodii winönänitapa. ⁵¹ Adocanque edëningä guiquënë ömacä inte yabæcooque ninocoo nãni ancooque pönö winiyate Itota miñæ gocantapa. Tömengä ingante yao ongönänitapa. ⁵² Adinque tömengä wæætë gä tadongate weocoo ömacä wodii winongacæimpa.

Nê Apænte nãni Änoncabo weca Itota ongongampa

(Mäateo 26.57-68; Odoca 22.54-55,

63-71; Wäö 18.12-14, 19-24)

⁵³ Wængonguï qui, ante nē godongä ñænængä pōni inongä weca ænte godinque Itota ingante gönönäni gongænte ongongantapa. Ayæ, Wængonguï qui, ante nē godönäni ñænænäni tönö nē aadäni nāni Picæncabo tönö nē wææ odömönäni tönö tōmānāni pō bee bee tente godongämæ ongönānitapa. ⁵⁴ Pegodo guiquënë tōmengä miñæ ayæ ayæ godinque, Wængonguï qui, ante nē godongä ñænængä pōni inongä oncö yacōmoyæ iñömö wäänē guicantapa. Māniñömö guidinque tōmengä wææ wänönäni tönö gongapamö tæ con-tate a ootocongantapa.

⁵⁵ Wængonguï qui, ante nē godönäni ñænænäni tönö nē Apænte nāni Änoncabo tōmānāni, Mönö apænte ante wænömö wæncæcäimpa, ante cædinque, Itota nänö wænguinque wænæ wænæ cæcä ingampa, ante æcänö nē adingä inte godö anguingä, ante ancaa diqui diqui miñönäni mänömainö ante nē angüenengä edæ dæ angantapa. ⁵⁶ Edæ nanguï inäni pōninque babæ apænedinque, Mänömaï cæcä atamönipa, ante apænedäni incæte adoyömö apænedämaï inäni inte wapiticæ wapiticæ änānitapa. ⁵⁷ Ayæ ate pancadäniya ængæ gantidinque, Tōmengä ingante apænte angæimpa, ante cædinque babæ wapiticæ ante äninque,

⁵⁸ –İngä iïmaï ante apænecä eñentamönipa. “İncö Wængonguï tæiyæ waëmö oncö waodäni önopoca nāni mænönincö incæte botö cæbo wo tænguimæ wæænguimpa. Ayæ mēönaa go adoönæque iñonte wacö wii önopoca mænonguincö wæætē mænoncæboimpa,” ante apænecä eñentamönipa tōö, ante tededäni.

⁵⁹ Incæte adodeque ante apænedinque adoyömö äninque tōmēnāni godömenque äninque wadö wadö wapiticæ ante apænedänitapa.

⁶⁰ Eñente wædinque, Wængonguï qui, ante nē godongä ñænængä

pōni inongä guiquënë godongämæ ongönäni tönö tæcæguedē dibæ ongonte ængæ gantidinque Itota ingante,

–İñæmpa pæ wēēnebii. Bitö æbänö cæbitapa, ante iināni nāni äninö ante bitö æbänö ämii.

⁶¹ Ante äñongante edæ Itota cōwē änämaï pæ wēēnecä. Adinque nē godongä ñænængä pōni inongä wæætē godö äninque,

–Wængonguï mönö Waëmö inongä Wengä mönö Codito inongä ingampa. Bitö iñæmpa mänimidö inömi imitawo.

⁶² Äñongante Itota iñömö,

–Ao. Mänimodö inömo imopa. İninque iincayæ ate botö Waobo eñagaïmo inte Wængonguï nē Tæï Piñængä ingä tōmēmængä inö tæ contabo adinque minitö ayæ ate botö öönædē boguimancodē pömo acæminimpa.

⁶³ Ante apænecä eñente wædinque nē godongä ñænængä pōni inongä iñömö piinte badinque, Eñente awædö, ante bai cædinque edæ nämä weocoo wänä ñæninque,

–Idæwaa, angantapa. Nöwo wacä ingante, Itota wænæ wænæ cæcä atabopa, ante nē äincædongä ingante godömenque diqui diqui minämaï ingæimpa. ⁶⁴ Tōmengä nämä Wængonguï Wengä inte bai babæ godö tedewengampa tōö. İninque edæ tōmengä babæ nänö änewönö ante do eñēmīni inte edæ æbänö ante pönēmīni.

Ante äñongante nē apænte änāni tōmānāni edæ, Nänö pante wænguinque edæ änewengampa tōö.

⁶⁵ Ante apænte änāni ate edæ pancadäniya Itota tōmengäa towæ tånongadinque tōmengä awinca weocoota pönö ñāne cæmöninque tæi tæi päninque tōmengä ingante,

–Æcänö pänaa, ante Wængonguï beyænque apænebi eñēmönie.

Ante badete toyönäni wææ wänönäni guiquënë tōmengä ingante bæi ongonte tæi tæi pangädänimpa.

Pegodo incæ, Dicæ abogaa, angampa

(*Mäateo 26.69-75; Odoca 22.56-62; Wäö 18.15-18, 25-29*)

⁶⁶ Ayæ Pegodo guiquënë yæipodë yacömöñäa guii contate ongöñongä onquiyängä, Wængonguï qui, ante nē godongä ñænängä pönï inongä ingante nē cæcä inömö adoyömö pö guicantapa. ⁶⁷ Ponte ayongä Pegodo gongapamö ootocæ cæcä adinque onquiyängä ædæmö cöwä adinque,

—Mäningä Näatadeta inömö quëwënongi Itota tönö bitö guëa cægömitapa töö.

⁶⁸ Angä ëñente wædinque,

—Dicæ. Bitö änö ante æbänö ämii, ante dicæ ëñëmogaa.

Äninque tao yabædemö gäänë gongæñongä tawadiya wëenengä petapa. ⁶⁹ Ayæ wæætë Pegodo ingante adinque onquiyängä inömö godongämæ ongönäni inänite,

—Mäningä adocabodäni iningä inte ongongä ataquedäni.

⁷⁰ Ante apæneyongä Pegodo wæætë, Dicæ bitö angänö imogaa, angantapa. Ayæ wantæ ate mäniñömö ongönäni adobai,

—Inæmpa Gadideabæ quëwëniimi inte bitö näwangä Itota tönö tee empo nē pömi imipa töö.

⁷¹ Änäni ëñente wædinque Pegodo wæætë, Botö Wængonguï ëñëñongä nöingä ämopa, ante Wængonguï emöwo ante babæ tedewëninque tömënäni inänite wæætë,

—Mini angantedö ingante dicæ abogaa. Dicæ abo ante bai änewëminipa töö.

⁷² Ante tæcæ änewëñongä inñontobæ tawadiya ayängä petapa. Ayängä pe ëñente wædinque Pegodo Itota näno äninö ante pönengantapa. Itota do inömö, “Tawadiya mempoga pedämaï inñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguimi imipa,” änogäimpa. Ante pönente wædinque Pegodo, Nöwo näno pequinque do pecampa, ante wædinque Ca ca wægacäimpa.

15

Itota incæ Pidato weca ongongampa

(*Mäateo 27.1-2, 11-14; Odoca 23.1-5; Wäö 18.28-38*)

¹ Wængonguï qui, ante nē godönäni ñænänäni tönö nē aadäni näni Picæncabo tönö nē wææ odömönäni tönö tömënäni inömö nē änäni inönäni inte oodeoidi näni nē Apænte Änoncabo inönänimpa. Ininque mänüi ñäö bayonte tömënäni, Æbänö cæquii, ante pönente wædinque godongämæ göñë cöninque Ao äninque Itota ingante goto winte töö æmænte ænte godinque odömäno awënë Pidato wodi nempo mäo pædæ godönäni ængantapa. ² Pidato guiquënë tömengä ingante,

—Oodeoidi Awënë Odeyebi bitö imitawoo. Äñongante,

—Bitö tömëmi änö bai botö mäniimodö imopa, ante Itota angantapa.

³ Wængonguï qui, ante nē godönäni ñænänäni guiquënë, Iningä Itota inömö wënæ wënæ cæcampa, ante wadö wadö ante püinque Pidato ingante ancaa änänitapa. ⁴ Änäni ëñente wædinque Pidato wæætë Itota ingante,

—Inæmpa pæ wëenebii. Bitö æpogadö wënæ wënæ cæbi imipa, ante nanguï änäni apa quëwë.

⁵ Äñongante Itota tömënäni näni äninö ante cöwë apænedämaï ingä adinque awënë gobedönadodo wæætë, Quiëmë bai pæ wëenecä awædö, ante guiñente wægacäimpa.

Itota wæncæcäimpa, änänipa

(*Mäateo 27.15-31; Odoca 23.13-25; Wäö 18.38-40, 19.1-16*)

⁶ Mänimæ awënë gobedönadodo mäniñedë wadepo inñö wadepo inñö cöwë iimaï cædongäimpa. Oodeoidi ææmæ cæyönänite gobedönadodo inñömö, Nē tee mönete ongönäni inänite adinque mïnitö æcänö ingante ämïni ñimpo cæbo goquingäa, ante änäni ëñëninque tömengä tömënäni näni äningä adocanque ingante ñimpo cæcä godongäimpa. ⁷ Doyedë wadäni

ænguī badinque, Awēnē ingante wido cæcæimpa, ante cædinque wænonte cæyönāni adocanque Badabato nāni ānongā tōmēnāni tōnō godongāmæ cædongā inongäimpa. Īninqe awēnēidi nē wīwa cædāni inānite bæi ongonte goto wināni ongōñōnāni Badabato adobaī tōmēnāni tōnō godongāmæ tee mōmænete ongōnongäimpa. ⁸ Īninqe ñōwo iñōmō wadāni tæiyæñāni Pidato weca pōninque, Cōwē bitō cædō bai ñōwo adobaī mōnitō beyæ cæquīmi ante wæmōnipa. ⁹ Änāni ēñēninque Pidato iñōmō,

—Oodeoidi Awēnē Odeye ingante pōnō ñimpo cæbo abæ tawængā ænguīmīni. Æbānō cæbo ænguīmīni.

¹⁰ Edæ do iñōmō Itota gomonga cæcā ate wædinque, Wængonguī qui, ante nē godōnāni ñænænāni incæ tōmengā ingante piinte adōnānimpa. Mānīnō beyænque tōmēnāni Itota ingante bæi ongonte botō nempo ænte māmō pædæ pōnōnānimpa. Ante pōnente wædinque Pidato, Oodeoidi Awēnē Odeye ingante ñimpo cæbo goquingā, ämīnitawoo, ante ñōwo angantapa. ¹¹ Īninqe, Wængonguī qui, ante nē godōnāni ñænænāni guiquēnē godongāmæ ongōnāni inānite apænedinque, Mīnitō Pidato ingante iīmaī äedāni, änānitapa. Änāni ēñēninque oodeoidi wæætē Pidato ingante, Wīi bitō ānongānō ante ämōnipa. Wæætē Badabato ingante ñimpo cæbi gocæe, ante änāni.

¹² Ēñēninque Pidato godō āninqe,

—Īninqe oodeoidi Awēnē Odeye mīni ānongā ingante æbānō cæquīmoo, ante ämīni.

¹³ Äñongante tōmēnāni ogæ tededinque,

—Awæ ñænquedīmæ ämi cæte wænōnāni wængæe tōō.

¹⁴ Änāni ēñente wædinque Pidato,

—Īñæmpa quīnō wēnæ wēnæ cæcantawoo.

Äñongante godōmenque yedæ āninqe adodō,

—Ämi awāa timpote wænōnāni wængæe tōō.

¹⁵ Ancaa ānewēñōnāni Pidato iñōmō, Mānīnāni piināmaī piyænē cæcædānimpa, ante cædinque Badabato nāni āningā ingante godō ñimpo cædinque tōmēnāni nempo pædæ godongā ænānitapa. Wæætē edæ Itota ingante edæ Pidato wodi angā æmontai badōimenca tæi tæi pānāni ate ñænque quepote awāa nāni gōnonguinque edæ da godongā ænte godānitapa.

¹⁶ Pædæ godongā ate nē tontadoidi tōmengā ingante tōō æmænte wadæ godinque awēnē gobedōnadodo oncōnē Podætodio nāni ancōnē mangui guiyongā tontadoidi bacabo Itota weca godongāmæ äñete pōnānitapa. ¹⁷ Pōninque tōmēnāni, Awēnē imi inte awēnē weocoo wēñacæbiimpa, ante bai cædinque badete todinque Itota ingante wæætē opatawæ ëmoncoo pōnō da wēñadinque daa mongæmenca æninqe que cædinque, Awēnē poganta, ante bai pōnō daga wencadānitapa. ¹⁸ Ayæ Yæ yæ āninqe,

—Badogaa, bitō oodeo awēnē odeyebi imipææ.

¹⁹ Ante badete todinque cæwipaca ancaa tæi tæi pancadinque tōmengāa towæ towæ tånongadinque da guicapote ædæ wææninqe, Bitō Tæiyæ Waēmō Awēnē imi amōnipa, ante bai badete todānitapa. ²⁰ Ayæ ĩnque badete todinque tōmēnāni opatawæ ëmoncoo gā tadongadinque tōmengā nāmā weocoo da wēñadānitapa. Ayæ edæ tōmengā ingante awæ timpote gōnoncæte ante tōō æmænte ænte tao māodāni gogacäimpa.

Itota ingante awāa timpodāni wængampa

(Mäateo 27.32-44; Odoca 23.26-43; Wäo 19.17-27)

²¹ Māñēdē Tidēne quēwēnongā Timōnō guiquēnē Adecantodo tōnō Odopo tōmēna wæmpo inongā inte tōmengā yabæque gote pōnongäimpa. Īninqe Itota ingante ænte godinque ayōnāni māningā Timōnō ñōwo wodo tebæ gocæ cædinque pongā adānitapa.

İnıne tontadoidi, Bitö ægodöe. Itota ingante möni timpoquiwæ ænte mongænte goe, änäni ænte mongænte gocantapa.

²² Mänömaï godınque Godogota nani añömö mönö tededö “Ocataınö” iñömö Itota ingante ænte pönänıtapa.

²³ Mäniñömö pönäni ate wadäni, Nantate beyæ becæcäımpa, ante cædıne biınömæ nani wædænque ti nämæ tönö müıdapæ nani änömæ adoyömö wempo cædıneıne pædæ pönö cæyönäni tömengä önonque yædæ bedıne edæ bedämaï ingantapa. ²⁴ Ayæ tömengä ingante awæ ñænquedımæ nani ænte pönıwäa töö godöıne pönö timpodıne wææ tiwadıne ængæ gantıdänıtapa. Ængæ gantıdänäni ate wægöñongä tömänäni wæætë tömengä weocoo ini ante, Æcänö quınca nö ta adıne tömengä mänıncoo æncæcäımpa, ante wææntodöıne adocooque adocooque ænänıtapa.

²⁵ Edæ nænque tömantadæ æñonte mäniñedë incæ tömengä ingante iıne timpote edæ ængæ gantıdänäni wægongacäımpa. ²⁶ Ayæ, Itota wæncæcäımpa, ante quınante apænte änänıi, ante tömänäni ponte adıne eñencædänımpa, ante yewæmönıne, “Oodeoidi Awënë Odeye İngä ingampa,” ante yewæmönıne awæmpaa wo cædänıtapa. ²⁷ Ayæ wada nē ö ænte quëwëniına inate adoyedë tömengä tönö adocanque tömëmæ inö adocanque dipæmæ inö godö timpote gantıdädäni wægongadäımpa. ²⁸ İne, Nē eñenämaï cädäni nani cabo tönö tömengä adocä ingampa, ante Wængongui angä eñente nani yewæmongainö bai ñöwo iıne bagatımpa.

²⁹ Ayæ wodo pänta nē godäni guıquënë Itota ingante godö babæ ante badete todıne pıca pıca cædıne,

—Bitö iñæmpa Wængongui täiyæ waëmö oncö incæ bæ tate wo ewëıne mëönaa go adöönæque iñonte do mänonguımi inte edæ,

³⁰ o togæmpote o togæwate ti wæænıne edæ quëwëmäwe.

³¹ Ayæ, Wængongui qui, ante nē godönäni ñænänäni tönö nē wææ odömönäni adobaï nani cabo nämäneque godongämæ badete todıne,

—Tömengä, Wadäni quëwencædänımpa, ante waa cæcantawoo. Ñöwo iñæmpa. Nämä beyænque eyepæ cæcampa diyæ quëwenguingää. ³² Idægoidi awënë odeye ingä iıne tömengä ti wæænte gocä adıne mönitö wæætë, Tömengä näwä Codito ingampa, ante pönëmaï wädö.

Ante badete toyönäni nē ö æna tömengä tönö godongämæ timpote wægöna incæ adobaï Itota ingante pıııne wënæ wënæ ante badete togadäımpa.

Itota wængampa
(Mäateo 27.45-56; Odoca 23.44-49; Wäö 19.28-30)

³³ Tæcæbæcä pönı bayö tömämæ iñontobæ wëmö badıne ayæ ayaönäa wæiganca mä mämonte bai iımpa. ³⁴ İne ayaönäa wæiyonte Itota nanguı pönı yedæ äıne, “Edoi, Edoi, nēma tabatäni,” äıne mönö tededö, “Botö Wængonguiñaa, botö Wængonguiñaa, ædö cæte botö imote emö cæte gobyaa.”

³⁵ Ante wæcä eñëıne godämæ ongönäni guıquënë,

—Æ. Ediya wodi ingante aa pecä apa.

³⁶ Äñönäni adocanque do pogodo gote önætämö ænte pönıne biınömæ bai önömænque æıne aa bedonte næænıne edæ, Becæcäımpa, ante cædıne cæwıpaca pædæ æænongantapa.

—Ee aquënë quëwëdäni. Ediya wabänö ponte o togænte pædæ wæænongä abäımpa.

³⁷ Angä ate Itota iñömö wæætë ogæ äıne edæ æmæwo guëmäıne wægacäımpa. ³⁸ İne edæ Wængongui täiyæ waëmoncönë weocoo odemö nani wææ wodöıncoo adoyedë önönæca inö tæcæguedë pönı tænguımæ wææntapa. ³⁹ Mänömaï

ogæ äninque do wængä adinque tontadoidi awënë capitäo guiquënë,

–Nawangä impa. İingä iñömö Wængongui Wengä ingainö ante pönenguënë, angacäimpa.

⁴⁰ Ayæ onquiyænäni Mäadiya Mäagadadänä nani änongä, Otite tönö Tantiagomö badä Mäadiya, Tadömee, mänimpodäni adobaï oo gote gomö a ongönänitapa. ⁴¹ Tömänäni iñömö Gadideabæ quëwengäñedë Itota miñæ gote pönö waa cædinäni inte ñowo pö gobæ ongöningue pömö adänitapa. Itota Eedotadëe pö æñongante wadäni onquiyænänique godongämæ tee empote pöninäni inte ñowo pöninque a ongönänitapa.

Itota wodi baö ini mäo daga wänänipa

(Mäateo 27.57-61; Odoca 23.50-56; Wäo 19.38-42)

⁴² Oodeoidi nani, Gäwadecæ ba ate guëmanguïönæ inguimpa, ante nani täno cæönæ ingatimpa. İinque gäwadecæ oo ba ate wædinque, ⁴³ Adimatea iñömö quëwëningä inte Ootee, Wængongui Awënë Odeye nempo mönö æyedönö quëwengæimpa, ante wänö conte baï quëwëngäimpa. Tömengä oodeoidi nani Apænte Äincabo adocä inongä inte ñænængä inongäimpa. Tömengä iñömö Pidato weca ñowo guiñänämaï pö guidinque, Itota wodi baö pönömi ænte wëmoe, angantapa. ⁴⁴ Angä ëñëninque Pidato, Wa. Wabänö wængäi, ante pönente wædinque awënë capitäo ingante äñete pongä adinque, Do wængäi. ⁴⁵ Äñongante edæ, Dobæ wængäimpa, ante apæ necä ëñëninque Pidato wæetë Ootee ingante, Itota wodi baö ini o togænte æmäwe. ⁴⁶ Angä ëñëninque Ootee iñömö edæ waëmö weocoo nino nani änoncoo godonte æninque Itota wodi baö ini wi æmpote wææ wi æwadinque pædæ wæænonte ænte gocantapa. Ayæ mänincoo wini wini caate dicamontaa wointatodë guidö ñö cæte daga wëninque dicabo edæ da pæñæ

pönö tee mönogacäimpa. ⁴⁷ Mänömaï cæyongante Mäadiya Mäagadadänä nani änongä tönö Otite badä Mäadiya mänimpodaque tömengä ingante nani da wëniñömö adatapa.

16

Itota do wëningä inte ñäni ömæmonte quëwengampa

(Mäateo 28.1-10; Odoca 24.1-12; Wäo 20.1-10)

¹ Tömänäni guëmanguïönæ iinque go ate Mäadiya Mäagadadänä nani änongä tönö Tantiago badä Mäadiya tönö Tadömee tömänäni iñömö, Itota wodi baö öni pæcäimpa, ante cædinque ogui waqui godonte ænänitapa. ² Ænte ate wacä tëmäna baquinque ñäo tæcæ bayonte iinäni do godinque nænque tæcæ mä awæ nänö tamöñedë Itota wodido pöninque, ³ nämäneque änänitapa.

–Dicabo nani moncadodınca æcänö tæi piñængä inte pönö da tæñæna ate mönö guiite aquii.

⁴ Ante wædinque go gongænte pömo ayönäni dicabo ñænængade pönä nani äninca incæ dobæ dicabo ñænængade pönä do da tæñæi a öñö adänitapa.

⁵ Adinque tömengä wodido wäänë guiite ayönäni edëningä baï ingä doyæncoo näämænta ëmoncoo wëñate tömëmæ inö tæ contate a ongongä adinque onquiyænäni wæætë edæ ancaï guiñente wädänitapa. ⁶ Edëningä iñömö,

–Guiñente wädämaï iedäni. Minitö, Itota Näatadeta quëwëningä ingante edæ wadäni awæ timpodäni ate në wëningä ingante edæ diqui diqui mimini awædo. Tömengä edæ dobæ ñäni ömæmonte tao gocäimpa. İñömö edæ dæ angampa. İntodë nänö öñontatodë iñömö edæ önantatoque iï ataquedäni. ⁷ Ayæ Pegodo tönö tömengä nänö në ëmiñænänäni tömänäni inänite gode ante apænedinque minitö në adimäni inte iimainö ante apæ necæminimpa. “Itota iñömö täno Gadideabæ godinque a ongöñongante minitö adoyömö godinque tömengä nänö

äninö bai godinque tömengä ingante acæminimpa,” ante gote apænedäni.

⁸ Ante apænecä eñëninque, Æbänö ante mänömaï angää, ante ancai guiñente do do wäate wædinque onquiyænäni iñömö Itota wodido abæ tawæ tao wodii winönänitapa. Guiñente wædonäni inte tömënäni wadäni inänite bee téninque apænedämaï pæ wëenegädänimpa.

Itota ingante Mäadiya Mäagadadënä acampa

(Wäö 20.11-18)

⁹ Itota tömënäni nani guëmäniönæ go ate iimö baänæque do ñäni ömæmonte pö a ongöñongante Mäadiya Mäagadadënä tänocä agacäimpa. Iingä onquiyængä iñömö wëenëñedë wënæidi tiæte ganca inäni ënempoyongante Itota wido cædongäimpa. ¹⁰ Nöwo iñömö Itota miñæ nani quëwëncabo ayæ ca wæwëñönänite Mäadiya Mäagadadënä incæ tömënäni inänite mäo apænecantapa. ¹¹ Itota ayæ miingä ingä atabopa, ante apænecä eñëninque tömënäni wii pönënanique ongongädänimpa.

Wada tömengä nänö nê ëmiñcëniina Itota ingante adapa

(Odoca 24.13-35)

¹² Mänömaï wii pönënanäni ate tömënäni nani Itota miñæ godincabo incæ mënaa idömæ gote ayöna Itota incæ wacä bai bate cægongä adatapa. ¹³ Ate wædinque tömëna wadæ godinque Itota miñæ nani godincabo wadäni inänite apænedinque, Mänömaï cægongä atamönäni, äna eñëninque edæ cöwë pönënamäi ingädänimpa.

Tömengä nänö da godöninäni inänite Itota angampa

(Mäateo 28.16-20; Odoca 24.36-49; Wäö 20.19-23)

¹⁴ Ayæ ate onte ganca inäni nani Itota miñæ godincabo cænte tedete a cöñönäni Itota pö a ongongä adänitapa. Tömengä iñömö, Minitö pönëgade impa. Wadäni, Itota do edæ ñäni ömæmonte

cægongä atamönäni, ante apænedäni eñëninque minitö mimö ömædëmini inte wii pönëminii, ante Itota pïngacäimpa.

¹⁵ Ayæ tömënäni inänite, “Wængongui nänö badongainäni inguipoga tömäo quëwënäni iñönänite minitö botö imotedö ante mäo tömänäni inänite watapæ apænemini eñencädänimpa. ¹⁶ Edæ æcänö wede pönëninque æpænë guida tömengä botö godö æmo beyænque quëwencæcäimpa. Wæætë nê pönënamäi ingä guiquënë tömengä nänö apænte pante wæquinque pönënamäi ingampa. ¹⁷ Botö cæbo ate nê pönënanäni adobai edæ iimäi mä cædäni adinque wadäni do eñencädänimpa. Botö ëmowo apænedinque tömënäni wënæidi inänite wido cæcädänimpa. Ayæ wadäni tömënäni tededö mä tedecädänimpa. ¹⁸ Ayæ tæntæ bæi ongönäni incæte wænguimæ bedäni incæte wënæ wënæ badämaï incädänimpa. Ayæ caate wadäni inänite gampodäni ate do waa bacädänimpa,” ante Itota apænegacäimpa.

Itota incæ öönædë æicampa (Odoca 24.50-53)

¹⁹ Iinque tömënäni inänite apænecä eñënanäni ate edæ Wængongui öönædë ængö cæcä æidinque Wængongui tömengä nänö tömëmæ inö mönö Awënë Itota iñömö tæ contagacäimpa.

²⁰ Iinque tömengä nänö ëmiñcëninäni wæætë edæ tömämæ wadæ godinque wabæca mäo wabæca mäo apænedäni eñënanitapa. Mönö Awënë incæ cæcä ate tömënäni mä cædäni adinque nê eñënanäni wæætë, Nö impa, ante wægadänimpa. Mäninque ante yewæmonte impa.

Itota Codito ingantedö ante Odoca nänö watapæ ante yewæmongainta

Odoca ïmo yewæmömopa, ante

¹ Ñöwodäni nanguï inäni incæ, Mönitö weca æbänö ïinque cægatimpa, ante do yewæmoncæ cædänipa. ² Doyedë quëwënäni ïñömö, Æbänö cægatimpa, ante në againäni inte mäninö ante, Näwangä impa, ante në apænedäni badinque adode beyæ ante në cædäni bagadänimpa. Tömënanäni mönitö ïmönite adodö ante pönö apænedäni ëñentamönipa. ïinque ïinäni apænedäni möni ëñenö bai ñöwodäni wæætë edæ adobai pönï ante yewæmoncæ cædäni ïinque botö ïñömö edæ, Adobainö ante yewæmoncæboimpa, antabopa. ³ Teopido bitö ñænæmi pönï inömi inte ëñëmi. Botö ïñömö, Wëenëñedë æbänö mä pönï cægatimpa, ante ayæ, Ñöwo ganca æbänö cæte ï, ante ëñencæte ante nanguï cædinque ædæmö ëñënimö inte botö edæ, Bitö Teopidobi acæbiimpa, ante adodö adodö ante yewæmömopa. ⁴ Wadäni odömonte apænedäni ëñëninque bitö wæætë, Nö intawo, ante ëñencæte ante cædinque botö yewæmöninta adinque edæ do ëñencæbiimpa. Mänömainö ante yewæmömö ae.

Wäö ëñäquingä, ante anquedo ponte apæñecampa

⁵ Wængonguï qui, ante në godönäni pancadäniya Abiyaidi nani cabo ïñönänite adocanque Tacadiya ëmongacäimpa. Tömengä ïñömö Oodeabæ awënë odeye Edode wodi nänö ingaiñedë, Wængonguï qui, ante në godongä ingacäimpa. Tömengä nänöogængä Aadöo wodi päingä Editabeti ingacäimpa. ⁶ Tömëna ïñömö nana gæncaya inöna inte Wængonguï ayongante nö cæte quëwëninque Wængonguï, ïïmai cædäni, ante

nänö wææ angainö ante ëñente quëwëñönate wadäni, Eñënamai quëwënäpa, ante ædö cæte anguinänii. ⁷ Editabeti owæntacä inte wëñæ mänämai quëwëñongante wëñæ dæ ä wædinque nana gæncaya picæna badinque quëwengadaimpa.

⁸ Dæ ä wædinque quëwëñönate Tacadiya wodi tönö godongämæ nani godoncabo nani godöñedë ba ïinque tömengä ïñömö, Wængonguï qui, ante godongantapa. ⁹ Godöñongante tömënanäni, Æcänö ñöwo guiidinke oguï waquï tanguingä, ante acæte ante cædänitapa. Tömënanäni cöwë nani cæi bai cædinque tömënanäni ëmowo wataa wataa yewæmöninke adoyömö da wëninque adotaque tadonte adänitapa. Ayönäni, Tacadiya ëmowo impa, ante adinke änäni ëñëninque tömengä Awënë Wængonguï tæiyæ waëmö oncönë guiidinke oguï waquï tangantapa. ¹⁰ Waodäni tömänäni, Ñöwo oguï waquï iya tangæimpa, ante yabæcönë godongämæ pöninke Wængonguï ingante apænegadänimpa. ¹¹ Tacadiya ïñömö tæcæ tancæ cæyongä Wængonguï nänö da pönöningä anquedo tömënanäni nani iya täimpaa gäänë tömëmæ inö pö næ gongænte a ongongä acantapa. ¹² Adinke Tacadiya, Æbänö cæquïi, ante ancai guiñente wæcantapa. ¹³ Wæyongante anquedo guiquënë,

–Tacadiya, guiñënamai ïe. Bitö Wængonguï ingante apænebi ëñëninque tömengä bitö änö ante do cæcampa. Bitö nänöogængä Editabeti ïñömö onguiñængä ingante mancæcäimpa cæbii. Mangä ëñacä adinke bitö tömengä ëmowo, Wäö, pemoncæbiimpa. ¹⁴ Wëñængä waa pönï ëñacä adinke bitö watapæ tocæbiimpa. Wadäni nanguï inäni adobai wëñængä ëñacä ate tocædänimpa. ¹⁵ Wængonguï incæ, Botö ayömo bitö wengä wadäni bai guiyä inämai ñænængä pönï ingä abopa, angä beyæ waodäni adobai tömengä beyæ ante adinke

tocædänimpa. Yowepæ biinömæ incæ wapæ incæ tömengä ti nämæ tömämæ bedämaï incæcäimpa. Wäänä cæncadë ayæ ongöñongante Wængonguï Tæiyæ Waëmö Önöwoca incæ tömengäa pö guicæcäimpa. ¹⁶ Ayæ bitö wengä picængä badinque mäo apæ necä ëñëninque idægoidi nanguï inäni Wængonguï gämænö poncædänimpa. ¹⁷ Ayæ Wængonguï Önöwoca ingante Ediya wodi nänö ewocagai bai adobai ewocadinque bitö wengä iñömö adocä nänö tæi piñængai bai adobai tæi piñængä incæcäimpa. Ìninqe tömengä iñömö mönö Awënë nänö ponguinö ante täno beyænte bai cædinque odömongä ate mæmpoidi wëñænäni inänite pönente waadete cæcædänimpa. Ayæ tömengä apæ necä ëñëninque në ëñënamäi cædäni incæ nö cæte quëwënäni nani ëñënö bai nö ëñente cæcædänimpa. Mänömaï cædinque bitö wengä adocä apæ necä ëñente cædinque waodäni mönö Awënë nänö ponguinö ante eyepæ pöni cædinque tömengä ingante ante wänö concædänimpa. Mänömainö ante anquedo Tacadiya ingante apænegacäimpa.

¹⁸ Angä ëñëninque Tacadiya wæætë anquedo ingante apænedinque,

—Ìñæmpa botö nänöögænä picænä inampa. Botö adobai picæmo imopa. Ædö cæte, Nö impa, ante ëñenguïmo.

¹⁹ Äñongä anquedo wæætë,

—Botö Gabodiedo ingaïmo imo apa anewëë. Wængonguï weca në ongömo iñömote tömengä iñömö, Botö watapæ apænedö ante bitö Tacadiya ingante apænete pöe, ante da pönongä pontabopa. ²⁰ Nöwo iñömö botö änö pönënamäi imi inte bitö babetadebi badinque tededämaï iñömite botö apænedö ante ìninqe cæbo ba ate tedecæbiimpa, ante anquedo Tacadiya ingante apæ necäntapa.

²¹ Mänömaï tedeyöna wadäni, Tacadiya taqingä, ante wänö cöninque, Wængonguï tæiyæ waëmö oncönë guiidinque æiquedö taqingäa,

ante wægadänimpa. ²² Tömengä tadinque tededämaï ingantapa. Ayæ godömenque tededämaï inte önompoque oo cæpo oo cæpo cæcä adinque tömënäni, Wængonguï tæiyæ waëmö oncönë guite ongöninque Tacadiya wïimonte bai mä pöni adingä inte ñöwo edæ babetadecä inte tacampa, ante wædänitapa.

²³ Wængonguï beyæ ante cæe, ante nani ìninqe äniönæ ganca cædinque Tacadiya wodi oncönë gocantapa. ²⁴ Mäniñedë ate tömengä nänöögængä Editabeti yædëmadä badinque edæ önompo æmæmpoque apäicä ganca oncönë wë womongantapa. ²⁵ Tömengä iñömö edæ, “Wëenëñedë, Owæntabi imipa, ante pïinäni wæbo adinque Wængonguï botö imote waadete pönö cædinque ñöwo wæætë, Pïinämäi incædänimpa, ante cæcampa,” ante pönëninque Editabeti togacäimpa.

Itota ëñaqingä, ante

²⁶ Editabeti önompo æmæmpoque go adoque apäicä yædëmadä nänö iñedë Wængonguï tömengä anquedo Gabodiedo nani änogä ingante da pönongä pöninque Gadideabæ Näatadeta nani quëwëñömö gocantapa. ²⁷ Godinque tömengä baquecä Mäadiya nani änogä weca pongantapa. Tömengä ingante Awënë Dabii wodi pæingä Ootee, Monguïmo, ante do äningä inongäimpa. ²⁸ Ìninqe anquedo Gabodiedo Mäadiya weca pö guiidinque tömengä ingante,

—Wængonguï nänö në waadebi inte ëñëe. Wængonguï bitö imite waa cæcæcäimpa. Wadäni onquiyænäni inänite Wængonguï pönömenque pönö waa cædongä inte bitö imite edæ godömenque waa pöni pönö cæcä acäimpa. ²⁹ Ante tæcæ apæneyongä tömengä ancai guïñëninque, Quinö bai i ante botö imote apæ necäa, ante wæcantapa. ³⁰ Wæyongante anquedo wæætë,

—Mäadiya, bitö guïñënamäi ie. Wængonguï incæ edæ bitö imite nanguï waadete pönö acampa.

31 Bitö ñöwo edæ yæðemadä bad-
inque bitö wëñængä onguiñængä
mancæbiimpa. Tömengä ëñacä
ate bitö tömengä ëmowo, Itota
ingampa, ante pemoncæbiimpa.
32 Tömengä iñömö edæ nanguï tæï
piñænte cæcä incæcäimpa. Ininque
tömengä ingantedö ante, Æibæ
pöni në Quëwengä Wengä ingaingä
ingampa, ante apænecæimpa. Ayæ
Awënë Wængongui incæ tömengä
ingante apænedinque, Bitö Awënë
bayömi mæmæ awënë odeye
Dabii wodi nempo dodäni nani
quëwengäi bai bitö nempo adobai
quëwencädänimpa, ante adocä Itota
ingante pönongä ænte Awënë Odeye
bacæcäimpa. 33 Ininque Aacoboidi
tömengä nempo quëwëñönänite
tömengä cöwë tömënäni Awënë Odeye
incæcäimpa. Tömengä nänö Awënë
Odeye inguimämo iñömö edæ dæ
badämaï ingæimpa, ante Wængongui
nänö da pönöningä Mäadiya ingante
angantapa.

34 Mäadiya wæætë tömengä ingante,
—Botö iñæmpa onguiñængä tönö
mönämaï inte wëñæ ædö cæte man-
guimoo.

35 Ante wæyongante anquedo
wæætë edæ,
—Wængongui Tæiyæ Waëmö
Önöwoca incæ bitö weca poncæcäimpa.
Wængongui Æibæ Quëwënongå
tömengä nänö tæï piñænö incæ wææ
owo bai cæcæcäimpa. Mänömaï
beyæ bitö Wëñængä Onguiñængä
incæ Tæiyæ Waëmö ëñacä ate,
Wængongui Wëñængä ingampa,
ante pemoncädänimpa. 36 Ayæ
godömenque apænebo ëñëe. Editabeti
bitö guidengä iñömö picængade
pöni iñongante, Owæntacä ingampa,
ante tededänitawo. Incæte tömengä
picængadecä incæ dobæ edæ önonpo
æmæmpoque go adoque apäicä
yæðemadä inte tömengä wëñængä
edæ onguiñængä ingante ënengampa.
37 Iñæmpa quiëmë ante Wængongui
nänö änönö ante tömäa edæ cöwë
cæcæcäimpa.

38 Ante anquedo angä ëñente
wædinque Mäadiya,

—Mönö Awënë beyænque në cæbo
imopa. Bitö änö bai Ao ämo bacæimpa.

Ante apænecä ëñëninque Wængongui
nänö da pönöningä incæ ëmö cæte
wadæ gogacäimpa.

*Editabeti weca Mäadiya ëñacæ go-
campa*

39 Mäniñedë ate Mäadiya wodi
wadæ godinque änämænë quingæ
æidinque Oodeabæ quëwënanäni nani
quëwëñömö adoyömonque incæ
pöninque, 40 Tacadiya oncönë pö
guiidinque Editabeti ingante, Waa
quëwëmi, angantapa. 41 Mäadiya
mänömaï apænecä ëñëninque Edit-
abeti wodi wengä cæncadë ongöninque
wogæi wogæi tocantapa. Editabeti
iñömö Wængongui Tæiyæ Waëmö
Önöwoca incæ tömengäa pö guicä
ininque ædæmö pöni ëwocacä bacan-
tapa. 42 Mänömaï badinque adocä
ogæ tededinque,

—Mönö onquiyæncabo iñömönte
bitö adobique bitö waa toquinque
impa, angantapa. Wængongui
wamöni imönite pönömenque waaded-
inque bitö iminite godömenque nanguï
waadecampa. Bitö në ënënongå
ingante Wængongui nanguï waadecä
beyæ tömengä adobai tocæcäimpa.
43 Botö önömoque iñömöte bitö iñömö
mönö Awënë badä inömi inte edæ
botö weca quinante pömii. 44 Tæcæ
edæ apænebi önömonca ëñëñömo
botö cæncadë në ongönongä incæ
wogæi wogæi watapæ tocä ae.
45 Mönö Awënë bitö imite nänö äninö
ante bitö iñömö, Tömengä cöwë
cæcæcäimpa, ante pönëninque bitö
toquinque edæ në pönëmi imitapa.

46 Editabeti mänömaï apæneyongä
Mäadiya wæætë ämotamini ante bai
iïmaï angacäimpa.

“Botö mimöno pönëninque, Mönö
Awënë iñömö edæ waa pöni
mönö inongä ingampa, ante
watapæ apænebopa.

47 Ayæ, Quëwencæbiimpa, ante botö
imote në Ængä iñongante
botö Wængongui ingante ante

pönëninque edæ watapæ tote ewocabopa.

48 Botö tömengä ingante në cædömo inte önömoque pönï iñömote tömengä wæætë botö imote waa acampa.

Ïincayæ nänömoidi wææ ïincayæ nänömoidi wææ inäni tömänäni botö imotedö ante apænedinque, Tömënä iñömö Wængonguï nänö në waadedä ingadäimpa, ante apænecædänimpa.

49 Wængonguï në Tæï Piñænongä inte botö imote pönö nanguï cæcä beyænque edæ apænecædänimpa.

Tömengä emöwo iñömö edæ Tæiyæ Waëmö emongampa.

50 Ayæ ïincayæ nänömoidi wææ ïincayæ nänömoidi wææ inäni tömengä ingante guiñente cæyönänite tömengä wæætë waadete pönö waa cæcæcäimpa.

51 Tömengä në tæï piñænongä inte tömengä önompoca cæte bai nanguï cæcantapa.

Ayæ wadäni, Tömëmoque waëmö imopa, ante önöwëninque pönënanï inänite tömengä angä näwæ godänitapa.

52 Ayæ awënëidi näni tæ containpaa ongöñönänite tömengä tömënanï inänite wido cæcä godänitapa.

Wæætë önönänique inänite ængö cæcä contadinque tömënanï wæætë awënëidi bai badänitapa.

53 Ayæ gue ænente wædäni iñönänite tömengä waa pönï cænguï godongä æninque tömënanï tömo pönï cænänitapa.

Wæætë nanguï eadäni tömënanï inänite da godongä godinque ömæpodäni inte godänitapa.

54 Mönö idægocabo iñömö tömengä ingante në cæmö iñömote tömengä mönö tönö godongämæ cæcantapa.

Ayæ, Waadete botö pönö waa cægainö bai adodö cæcæboimpa, ante pönëninque tömengä ñöwo

pönö waadete waa cæcä æmompä.

55 Abadäo wodi pæimö iñömote tömengä mönö mæmæidi inänite nänö angainö bai cædinque, cöwë ñimpo cædämaï inte pönö waadete cæcampa.”

56 Ante Mäadiya wodi ämotamini ante bai angantapa. Ayæ Editabeti weca mäa go adoque apäicä quëwente ate ayæ ate tömengä oncönë gogacäimpa.

Wäö eñacampa

57 Editabeti wodi guiquënë oo pönï enëninque tömengä wëñængä onguïñængä mangacäimpa. 58 Ayæ tömengä guidënanï tönö godongämæ quëwënanï iñömö, Æ mönö Awënë wii piingä inte Editabeti ingante ædæmö waadete waa cæcampa, ante tæcæ eñëmönipa, äninque Editabeti tönö godongämæ togadänimpa. 59 Ayæ adoque Wængonguï itädë go ate wëñængä ingante æmontaique eö togæncæ cædäni iñömö godongämæ pöninque tömengä wæmpo emöwo bai ante, Tacadiya, ante pemoncæ cædänitapa. 60 Cæyönänite wäänä Baa äninque, —Tömengä emöwo Wäö emoncæcäimpa, ante wææ angadäimpa.

61 Äñongante tömënanï wæætë, —Iñæmpa bitö guidënanï Wäö emönämaï. Dæ ämönänipa.

62 Äninque wæmpocä ingante ömö cædinque, Æmongänö emonguingä ämii, ante odömömi amönii. 63 Äñönänite tömengä tededämaï inongä inte önompocaque odömongä adinque yewæmöinta æninque pædæ pönönäni ate tömengä iñömö edæ, “Tömengä emöwo Wäö emoncæcäimpa,” ante yewæmongä adinque tömänäni edæ guiñente wægadänimpa. 64 Yewæmongä ate tömengä önonguënëwa ñimæ cæguënëwate bai baguënëwate ate edæ tömengä ogæ tededinque Wængonguï ingante, Waa pönï cæbi abopa, ante watapæ edæ apænecantapa. 65 Ìninque mäniñömö

godongāmæ quēwēnāni tōnō Ood-eabæ ānāmænē quēwēnāni tōnō tōmānāni, Mānōmaī batimpa, ante nanguī tededānitapa. ⁶⁶ Tededāni ēñēnīnque nē ēñēnāni wæætē, “Īngā wēñængā ĩñōmō æbānō nānō baquinque edæ pæquiringā,” ante tōmānāni godongāmæ wægadānimpa. Edæ tōmengā tōnō Wængonguī godongāmæ cæcā ingacāimpa.

Tacadiya āmotamīni ante angampa

⁶⁷ Wēñængā wæmpocā Tacadiya guiquēnē Wængonguī Tæiyæ Waēmō Ōnōwoca ingante ēwocadinque Wængonguī beyæ apænedinque āmotamīni ante baī apænecantapa.

⁶⁸ “Mōnō idægocabo Wængonguī ĩñōmō adocā mōnō Awēnē ĩñongante mōnō tōmengā ingante waa ate watapæ apænecāimpa.

Tōmengā ĩñōmō, Botō quīnāni bate abæ tawænte baī quēwencādānimpa, ante tōmengā do æncæ pongā acāimpa.

⁶⁹ ‘Ōnōmoncawæ wææ ēmoncate baī wææ gom pocæcāimpa,’ ante cædinque tōmengā mōnō ĩmonte nē ænguingā ingante da pōnongā pōnīnque ĩngā wæætē ængā beyænque quēwēmompā.

Wængonguī ingante nē cægaingā awēnē odeye Dabii wodi pæringā ĩnongā inte tōmengā mānōmaī cæcā beyænque quēwēmompā.

⁷⁰ Wængonguī ĩñōmō tōmengā beyæ nē apænegaināni tæiyæ waēmō ingaināni ĩñōnānite tōmēnāni tōnō apænedinque,

Cōwē cæcæboimpa, ante nānō apænegainō baī ñōwo edæ ĩnque cæcampa.

⁷¹ Mōnō ĩñōmō nē pīinte ānāni nempo ongōñōmonte tōmengā,

Pīinte cædānipa, ante adinque mōnō ĩmonte gā pe æmpote ō ængā beyænque quēwēmompā.

⁷² Mānōmaī cædinque tōmengā mōnō mæmæidi ĩnānite nānō angainō baī cædinque ñōwo waadete pōnō cæcampa.

Ayæ, Botō pōnō cæbo ate mīnitō Ao āmīni ĩnīnque mōnō godongāmæ wææ cæte quēwengæimpa, ante tōmengā tæiyæ waēmō nānō angainō ante cōwē pōnēnongā inte ñōwo ĩnque cæcampa.

⁷³ Edæ mæmæ Abadāō wodi ingante, Botō nē Quēwēmo ingaīmo inte nōingā āmopa,

ante Wængonguī ĩimainō ante nānō pōnō cæquīnō ante nō apænegacāimpa.

⁷⁴ Abadāō ēñēmi. Nē pīinte cædāni nempo wæwēñōmīnite botō gā pe æmpote ō ænīnque

pōnō cæbo ate eyepæ badinque mīnitō wæætē guīñēnāmaī inte botō Wængonguī ĩmo beyæ cæcæmīnimpa, ante Wængonguī nē pōnō cæquiringā inte apænegacāimpa.

⁷⁵ Wængonguī ĩñōmō edæ, Mīnitō tæiyæ waēmō ēwocadinque mīni quēwenganca

botō weca nō pōnī cæte quēwencæmīnimpa, ante pōnō cæcā ingacāimpa,” ante wēñængā mæmpocā Tacadiya wodi apænecantapa.

⁷⁶ Ayæ wēñængā ingante tōmengā ĩimāi ante godōmenque apænecantapa.

“Botō wēmi bitō ĩmite botō wæætē apænebo ēñēe, angantapa.

Nē Æibæ Pōnī Quēwengā beyæ bitō nē apænebi ĩnōmi ĩmipa, ante bitō ĩmitedō ante apænecādānimpa.

Mōnō Awēnē taadō pīnongæimpa, ante bitō edæ tāno beyænte gote baī cædinque,

⁷⁷ mōnō Awēnē quīnāni ĩnānite ĩimāi ante odōmonte apænecæbiimpa.

Wēnæ wēnæ mīni cædō ante Wængonguī pōnō ñimpo cæcā ate mīnitō ĩñōmō edæ,

Tōmengā ængā beyænque mōnō quēwenguī impa, ante do ēñencæmīnimpa, ante apænebi ēñencādānimpa.

78 Edæ mōnō Wængonguī incæ mōnō wēnæ wēnæ wædonō ante waadete pōnō waa cædinque, oōnædē Quēwengā ingante mōnō weca da pōnongā pōninque nænque tæcæ tamō bai ēmongā acæimpa.

79 Mānōmaī cædinque mōnō wænguīmāmē beyæ wēmō iñōmō awædō, ante wæyōmonte tōmengā ponte a on-gongā adinque mōnō nænque pāmo oo tote bai quēwēmōmpa. Ayæ, Mīnitō mīni gānē pōnente quēwenguīnō taadonque poncæmīnimpa, ante tōmengā tōō æmænte māmōngā pōmōmpa.”

Mānōmainō ante Tacadiya wodi tōmengā wēñængā ingante apænegacāimpā.
80 Wēñængā iñōmō do pædinque ōnōwoca tæī piñænte ēwocagacāimpā. Idægoidi weca tōmengā nānō ponte a ongonganca ōnōmæca quēwengacāimpā.

2

Itota ēñacampa (Māateo 1.18-25)

1 Wāō idægoidi weca nānō pōñedē iinque bayonte awēnē Tetædo Agoto iñōmō, Æpomīnidō imīni, ante acæte ante cædinque odōmāno ōmæ nē quēwēnāni inānite edæ, Mīnitō ēmōwo tōmāmīni yewæmoncæmīnimpa, angacāimpā. 2 Tidiabæ awēnē Tidēnio ingāñedē odōmāno awēnē tāno angā. 3 Ēñēninque adocanque tōmengā mæmæidi nāni quēwengaiñōmō wacā tōmengā mæmæidi nāni quēwengaiñōmō tōmānāni yewæmoncæte ante edæ go go cægadānimpa.

4 Īninque Oodeabæ Awēnē wodi Dabii wodi pæingā inongā inte Ootee iñōmō Gadideabæ Nāatadeta nāni quēwēñōmō quēwēninque adobai tōmengā mæmæ Dabii wodi nānō quēwengaiñōmō Bedēē iñōmō gogacāimpā. 5 Edæ Ootee nānōogængā inguingā Māadiya yædēmadā iñongante tōmēna nāna gæncaya inguīna guēa yewæmoncæ

godatapa. 6 Bedēē ponte quēwēñōna Wēñængā iñōmō iinque pædinque 7 bamoncadengā incæ onguīñængā inte iīmaī ēñagacāimpā. Māniñōmō monguī incōnē iñōmō māniñedē eyede pōni goti ongōnāni ate wædinque tōmēna wæætē cænēnāni cænguī oncontaidē guiyantaidē go guīda ate Wēñængā ēñacantapa. Īninque guiyantaidē ēñacā ate wāānā Wēñængā ingante weocoo wīni wīni caadinque cænēnāni cænguīncadedē ñō cædā ōñongantapa.

Obegaidi inānite nē aadāni inānite anquedoidi apænedāni

Idægoidi cænīnāni obegaidi nāni ānōnāni iñōnānite nē aawēnāni iñōmō eyepancadē adoōnæ woyowotæ a cōnōnānimpa. 9 A cōñōnāni mōnō Awēnē anquedo ponte a ongōñongā mōnō Awēnē nānō ñāō ēmōnō beyænque godongāmæ guīnæ gongæ adinque nē aadāni ancai guīñente wædānitapa. 10 Anquedo iñōmō tōmēnāni inānite, “Guīñēnāmaī imæwedāni. Mīni nanguī ēñente toquinque ante botō ñōwo watapæ apænebo ēñēedāni. Mīnitō tōnō ingui-poga tōmāo quēwēnāni adobai adode beyænque watapæ tocæmīnimpa. 11 Mōnō Awēnē Codito iñōmō, Æmo beyænque quēwencæmīnimpa, ante nē Ængā baquingā inongā inte do edæ ēñacantapa. Edæ mīnitō beyæ ante tōmengā ñōwoōnæ incæ awēnē Dabii wodi nānō quēwengaiñōmō ēñacantapa. 12 Nō impa, ante gote acæmīnimpa. Wēñængā ingante wāānā wīni wīni caadinque edæ cænīnāni cænguīncadedē ñō cædā ate a ōñongā adinque mīnitō, Nō impa, ante ēñencæmīnimpa.”

13 Ante anquedo āñongā wadāni nanguī ināni oōnædē owodāni incæ iñontobæ tontadoidi ongōnāni bai tōmengā tōnō godongāmæ ponte a ongōninque āmotāmīni ante bai āninque Wængonguī ingante iīmaī ante watapæ apænedānitapa.

14 “Wængonguī æibæ pōni quēwēnongā
inte edæ ñāō apāite bai
ēmongānō anguēnē.

Tōmengā inguipoga iñōmō waadete
pōnō cæcā beyænque mīni wao-
cabo edæ gānē pōnenguīmīnidō
anguēnē.”

15 Ante āmotamīni ante bai ānīnque
anquedoidi öönædē adodō wadæ
æite godāni ate nē aawēnāni iñōmō
nāni cabo tededīnque,

—Mōnō Awēnē mōnō īmonte
apænecā mōnō ēñēnō ante, Æbānō
cæcāi, ante mōnō Bedēē gote
ædæmō acæīmpa. 16

Ānīnque pogodo ponte ayōnāni Māadiya tōnō
Ootee a ongōñōna Wēñængā iñōmō
cænīnāni cænguīncadedē a öñongā
adānitapa. 17

Īnīnque adīnque wadæ
godīnque, Wēñængā æbānō ingāā,
ante anquedo apænecā nāni ēñēnō
ante gode ā gode ā cæte wayōmō
wayōmō quēwēnāni īnānite ted-
edāni ēñēnānitapa. 18

Ēñēnīnque tōmānāni wæætē, Nē aawēnāni
æbānō ante apænedāni, ante guīñente
wædānitapa. 19

Māadiya guīquēnē,
Wēñængā æbānō ingā ānānīi, ante
nāmā pōnēē congantapa. 20

Nē aawēnāni guīquēnē, Wængonguī ñāō
apāite bai ēmōnongā inte pōnō waa
pōni cæcā æmōnīpa. Edæ anquedo
nānō apænedō bai do cæcā amōnīpa,
ante apænedīnque eyepancadē ocæ
ēmænte gogadānīmpa.

*Bitō Wengā, ante mæmpoda
Wēñængā ingante Wængonguī oncōnē
cæte pōnāpa*

21 Ayæ, Adoque Wængonguī itædē
go ate æmontāique eō togængæīmpa,
ante idægoidi cōwē nāni cæi
bai cædīnque Wēñængā ingante
eō togænānitapa. Ayæ Māadiya
yædēmadāmaī nānō iñedē anquedo
nānō pemōnīnō bai ānīnque mæmpoda
Wēñængā emōwo ante, Itota, pemong-
adānīmpa.

22 Wānā mānīmpōnæ wepæ
nāate īnāmpa, ante Mōitee wodi
nānō angāīmpōnæ īīnque go ate
tōmēna, Wēñængā iñōmō Wængonguī

Awēnē quī ingāmpa, ante mōnō
godongæīmpa, ante tōmengā in-
gante Eedotadēē iñōmō ænte
gogadānīmpa. 23 Edæ, “Onguīñænāni
bamōncadēnāni tōmānāni tæiyæ
wæmō bacædānīmpa, ante tōmēnāni
Wængonguī Awēnē nempo pædæ
godongæīmpa,” ante Awēnē Wængonguī
nānō angāinō ante ēñēnīnque Māadiya
tōnō Ootee do cædatapa. 24 Ayæ,
Equemōna nāna gæncaya, Wængonguī
quī, ante godongæīmpa. Wīi
mānōmaī cæte tæcæ wengā wengā
pæda mēnaa īnate godongæīmpa.
Ootee tōnō Māadiya iñōmō mānōmaī
cædīnque, Wængonguī quī īmpa, ante
mēnaa īnate ænte pōnīnque pædæ
godōna ængacāīmpa.

25 Māniñedē adocānque edæ
tōmengā emōwo Timeōnō Wængonguī
beyænque ante nō cædongā inte
Eedotadēē iñōmō quēwengacāīmpa.
Idægoidi wampo pōnente quēwēncædānīmpa,
ante Wængonguī æyedēnō ædæmō
cæquīngāā, ante tōmengā wānō
cōnente quēwēnongāīmpa. Ayæ

Wængonguī Tæiyæ Wæmō Önōwoca
ingante tōmengā cōwē ewocacā
īnongāīmpa. 26

Wængonguī Tæiyæ
Wæmō Önōwoca do apænecā
ēñēnīnque Timeōnō wodi iñōmō, Botō
ayæ wænāmaī mīimō quēwēmoyedē
mōnō Awēnē Codito ingante aquīmo
īmpa, ante do ēñēningā īnongāīmpa.

27 Nōwo iñōmō Wængonguī Önōwoca
angā ēñēnīnque tōmengā Wængonguī
oncō ñænæncōnē yabæcōnē pō guī-
icantapa. Māniñedē Itota mæmpoda
iñōmō idægoidi wææ ante nāni
cægāinō bai cæcæte ante cædīnque
Wēñængā Itota ingante ænte pō
guīda. 28

Adīnque Timeōnō iñōmō
edæ Wēñængā ingante bæi on-
gonte pæ mānīnque Wængonguī
ingante, Tōmēmi waa toquīnque
mōnitō īmōnite pōnō cæbīpa, ante
apænecantapa.

29 “Bitō Tæiyæ Awēnē īnōmi inte
ēñēmi. Bitō īmite nē cæbo
iñōmote bitō doyedē, Cæbo
acæbīīmpa, angabīīmpa.

29 “Bitō Tæiyæ Awēnē īnōmi inte
ēñēmi. Bitō īmite nē cæbo
iñōmote bitō doyedē, Cæbo
acæbīīmpa, angabīīmpa.

29 “Bitō Tæiyæ Awēnē īnōmi inte
ēñēmi. Bitō īmite nē cæbo
iñōmote bitō doyedē, Cæbo
acæbīīmpa, angabīīmpa.

29 “Bitō Tæiyæ Awēnē īnōmi inte
ēñēmi. Bitō īmite nē cæbo
iñōmote bitō doyedē, Cæbo
acæbīīmpa, angabīīmpa.

29 “Bitō Tæiyæ Awēnē īnōmi inte
ēñēmi. Bitō īmite nē cæbo
iñōmote bitō doyedē, Cæbo
acæbīīmpa, angabīīmpa.

Īninqwe bitō ānīnō bai ñōwo edæ iinqwe
cæbi adīmo iñōmote bitō āmi ate
wænte goboe.

³⁰ Edæ bitō, Quēwencæminimpa, ante
nē Ænguingā ingante ñōwo da pōnōmi
ponte eñacā do abopa.

³¹ Mānōmaī cædinque bitō, Wadāni
nāni cabo wadāni nāni
cabo waodāni tōmānāni
acædānimpa,
ante cædinque bitō nē Ænguingā in-
gante ñōwo da pōnōmi ponte a
ongongā acæimpa.

³² Idægoidi ināmaī ināni incæ tōmēnāni
nāni cabo nāni cabo incæ
edonque acædānimpa, ante
cædinque bitō da pōnōmi
pōninqwe tōmengā ñāo apāite
bai a ongongā acædānimpa.

Ayæ mōni idægocabo iñōmōnīte bitō,
Wēñængā ængā beyænque
botō quīmīni iñōmō ñāo
bai waēmō pōni ēmōninqwe
quēwencæminimpa, ante pōnō
cæbi abopa.”

³³ Ante āmotamīni ante bai Tīmeōnō
wodi, Wēñængā æbānō cæquingā in-
gāā, ante tedecā eñēninqwe Wēñængā
mæmpo tōnō tōmengā badā iñōmō
guiñente wædatapa. ³⁴ Tīmeōnō
wæætē, Mīna waa toquinque iingā
Wēñængā ingante æmīnāpa, ante
apænedinqwe tōmengā badā Māadiya
ingante iīmaī ante godōmenque
apænecantapa.

–Picængā badinqwe iingā Wēñængā
cæcā beyænque idægoidi pancadāniya
tæ go wæænte bai wæyōnāni pan-
cadāniya wæætē ængæ gantite bai
quēwencædānimpa. Wængonguī
iñōmō, Wēñængā ingante ate
eñencædānimpa, ante odōmonte
cæyongā pancadāniya wæætē adocā
ingante godō pīinte tedecædānimpa.

³⁵ Ante apænedinqwe Tīmeōnō iñōmō
Māadiya ingante apænecantapa.
Mānōmaī bayonte, Nanguī ināni
æbānō ante mīmōno pōnēnāni, ante
edonque acæimpa. Bitō iñōmō yaēmē
yete bai wæwente ēwocacæbiimpa,
ante apænegacāimpa.

³⁶ Ayæ wadā iñōmō Wængonguī
beyæ nē apænedā iñōmō tōmēnā

ēmōwo Ānā adobai ongōnantapa.
Atedoidi nāni cabo iñōnāni ado-
canque Pānoedo wēnā inōnā inte
tōmēnā picængadedā ingadāimpa.
Tōmengā iñōmō baquecāñedē
mōninqwe nānōogængā tōnō onompo
æmæmpoque go mēa wadepo
quēwente ate onguiñængā guiquēnē
nāñe wængacāimpa. ³⁷ Onquiyænā
iñōmō ñōwo otenta i coatodo wadepo
nānō eñagainganca owæmpoinā
quēwēnā inte tōmēnā Wængonguī
oncō ñænæcōnē yabæcōnenque
cōwē quēwēninqwe taodāmaī inōnāimpa.
Itædē woyowotæ tōmēnā cōwē,
Wængonguī ingampa, ante waa
cædinque Wængonguī ingante
apænecæte ante wantæpiyæ cænāmaī
quēwēnā inōnāimpa. ³⁸ Tōmēnā ñōwo
eyepæ pōni māmō bee tēninqwe Itota
ingante adinqwe Wængonguī ingante
waa ate pōnēninqwe apænecantapa.
Ayæ wadāni, Mōnitō Eedotadēē
iñōmō quēwēmōni iñōmōnīte Wængonguī
æyedēnō pōnō cæcā beyæ abæ
tawænte quēwenguīmōnī, ante nē
wānō cōnāni inānīte dodā Ānā iñōmō
Wēñængā ingante do adīnā inte,
Wēñængā nē Ænguingā inte do eñate
pongā atabopa, ante cōwē apænedā
eñengadānimpa.

Nāatadeta ocæ ēmænte godānīpa

³⁹ Ayæ mānī, Awēnē Wængonguī,
iīmaī cædāni, nānō angainō ante
iinqwe cæte ate Ootee nāni wen-
cabo Gadideabæ gocæte ante
wadæ godinqwe Nāatadeta tōmēnāni
nāna quēwēniñōmō pongadānimpa.
⁴⁰ Wēñængā iñōmō edæ picængā
pædinque tæi pīñængā bacantapa.
Ayæ ocai encacā inte nanguī eñente
bagacāimpa. Ayæ Wængonguī
waadete pōnō apænecā eñente
ēwocadinque tōmengā nē waadete
pōnō cæcā ingacāimpa.

Wængonguī oncōnē Itota gote on- gongampa

⁴¹ Wodo pænta gogaiōnæ bai
Patowa mōnō ææmæ cænguīōnæ
ñōwo impa, ante pōnēninqwe idægoidi
Patowa ante Eedotadēē godinqwe

ææmæ cædönänimpa. Itota mæmpoda adobaï Patowa nāni ämæ cōwē cæyedē wadepo iñō wadepo iñō Eedotadēē goda ingadaimpa. ⁴² Iñinque Itota dote wadepo iñonte Wængonguï beyæ ante ææmæ cōwē nāni cædō bai Ootee nāni wencabo do gote cædänitapa. ⁴³ Ææmæ tömää iinque cædinque oncönē poncæte ante taadonque pöninque mæmpoda adāmaï iñönate Itota guiquenē Eedotadēē iñömō ayæ quēwengantapa. ⁴⁴ Godongämæ mönō poncabo tönō pongä imaingampa, ante pönēna inte taadō tömää itædē pöninque tömēna guidēnāni weca tömēna æmigoidi weca diqui diqui mincæ cæyōna, ⁴⁵ edæ dæ angä. Ate wædinque tömengä ingante diqui mincæte ante Eedotadēē adodō ocæ emænte gogadaimpa.

⁴⁶ Mēönaa go adoönæque iñonte diqui diqui minte ate edæ Wængonguï oncō ñænæ oncönē yabæcönē pō guite ayönate Itota iñömō nē odömönāni weca eñēē cöninque, Æbänō i, Æbänō cæquï, ante angä adatapa. ⁴⁷ Tömengä apænegä eñēninqe tömänāni, Æ tömengä iñömō ocai nē encacä waa eñengä amönipa, änänitapa. Ayæ, Itota ingante, Æbänō i, ante änāni eñēninqe tömengä wæætē nō apænegampa, ante wædinque tömänāni guñente wædänitapa. ⁴⁸ Mæmpoda iñömō mänñömō pō guite ayōna Itota mänōmaï cæcä adinque guñente wædatapa. Tömengä badä tömengä ingante,

—Botō Wēmi eñēmi. Mönatō imönate quñante mänōmaï cæbii. Iñæmpa bitō wæmpo tönō mönatō bitō imite ante ancaa diqui diqui minte wæwentamönapa.

⁴⁹ Äñongante tömengä wæætē,

—Minatō iñæmpa, Mæmpocä oncönē Itota ongonquēnengä ingampa, ante eñēnāmaï iminatawo. Quñante wayömō diqui diqui mīmīnatawo.

⁵⁰ Äñongante, Æbänō ante angää, ante ædæmō eñēnāmaï inatapa.

⁵¹ Tömengä wæætē mæmpoda miñæ gote Näatadeta pöninque tömēna nāna änō ante cōwē eñente cæcantapa. Wäänä guiquenē tömengä nänō cædinō ante nāmā pönēē congä ingacäimpa. ⁵² Itota iñömō edæ nanguï eñengä bate pædongäimpa. Picængä bayongante Wængonguï tönō waodāni adobaï tömengä ingante cōwē godömenque godömenque waadete adönänimpa.

3

Wäo æpænē nē guidongä önömæca quēwente apænegä

(Mäateo 3.1-12; Mäadoco 1.1-8; Wäo 1.19-28)

¹ Tibedio quinte wadepo tömämæ awenē nänō inöñedē Pontio Pidato wodi nāni änongä adoyedē Oodeabæ awenē iñongante Edode wæætē Gadideabæ awenē inongäimpa. Adoyedē iñömō Edode wodi nänō tönñacä Pedipe Itodeabæ Todacönitebæ awenē iñongä Ditaniato wodi adoyedē Abidēniabæ awenē inongäimpa. ² Mänimpodāni mänñömæ awenēidi iñönāni Änato wodi tönō Caiapato wodi adoyedē, Wængonguï quï, ante nē godōna ñænæna pönï inōna inönaimpa. Tömēna nāna inöñedē adoyedē edæ Tacadiya wodi wengä Wäo ingante önömæca iñömō ayæ quēwēñongante Wængonguï apænegacäimpa. ³ Wäo wodi iñömō Oododänonga ömaaque go tömāo cægöninque iïmaï apænegä eñēnänitapa. Minitō, Idæwaa wænæ wænæ cæte awædō, ante ocæ emænte Wængonguï gämænō pödäni. Ayæ, Wænæ wænæ botō cædinō ante Wængonguï pünāmaï inte pönō ata cæpocä quēwēmopa, ante edonque acäimpa, ante odömöninque æpænē guiedäni, ante Wäo angacäimpa.

⁴ Mänōmaï cædinque Wængonguï beyæ nē apænegaingä Itaiya wodi iïmaï ante nänō yewæmonte apænegainō bai Wäo adobaï cægacäimpa.

“Adocanque önömæca ongöninque iïmaï ante yedæ tedecä eñencædänimpa.

‘Awënë nänö ponguinö ante tee
monte bai cædinque,
taadö töinö pinonte bai cæedäni.

⁵ Onquiyabo incæ änanquidi incæ,
Mæmö pöni bacæimpa, ante
ææ wocæimpa.

Biyönæ iñömö tee möninqe mæmö
pöni badongæimpa.

Taadö idiquibæ iñonte töinö
pinongæimpa.

Wënæ wënæ iñonte wainö pöni taadö
badongæimpa.

⁶ Taadö mänömaï mæmö pöni ba
iñinqe tömämæ quëwënanï
incæ, Wængongui pönö ængä
beyænque mönö quëwenguinö
impa, ante edonque acædänimpa,
ancæcäimpa.”

⁷ Ante yewæmonte ongompa
cæminii, ante Wäö wodi æpænë
guicæte ante pönäni nanguï inäni
iñönänite iïmaï angantapa. “Minitö
iñömö tæntæ pæimïni bai inte
në babæ cæmini iñinqe edæ
ëñenguënë quëwëmini. Wængongui
nänö piinte panguimämo ante edæ,
Wænompadäni, ante æcänö äna
ëñëninque minitö wodii winonte
pöminii. ⁸ Wængongui Awënë
gämænö minitö ocæ emænte poncæ
cæminitawo. Nö nö pömini iñinqe edæ
në ocæ emænte pönäni wainca incate
bai waa cædäni bai minitö iñömö
edæ adobai waa cæedäni. Minitö
nämäneque pönëninque, ‘Mönitö
mæmæ Abadäo wodi pæimöni
imöni beyænque Wængongui mönitö
imönite waa acæcäimpa,’ ante nämä
wææ ancæ cæminitawo. Iñæmpa
Wængongui angä bai Abadäo wodi
pæimïni mini inö bai dicacoo
incæ dobæ adobai bacædönii apa
änewëminii. ⁹ Awæ iñömö wainca in-
cadämaï i iñinqe edæ do yete gonga-
pamö iya tangæimpa. Awæ yecæte
ante awænca eyewa næænäni bai
Wængongui nänö panguimämo iñömö
edæ oo pöni pö apa quëwëminii,”
ante Wäö apænegacäimpa. ¹⁰ Angä
wædinque godongämæ ongönäni
pancadäniya wæætë,

Mänömaï i iñinqe æbänö cæquënëmöni
imönii. ¹¹ Äñönänite Wäö,

—Weocoo mencooga në mangä
iñömö weocoo ömaacä ingante
adocooque godongä æncæcäimpa.
Cængui në ëacä adobai cængui
ömæpocä ingante godongä æncæcäimpa,
angantapa. ¹² Ayæ odömäno awënë
nänö äninta në ænäni guiquënë
adobai æpænë guicæte ante
pöninque Wäö ingante änänitapa.

—Në odömömi ëñëmi. Mönitö
iñömö æbänö cæquënëmöni imönii.

¹³ Äñönänite tömengä wæætë,

—Minitö awënë, Mänimpota, ante
nänö änimpota ante wadäni inänite
ämïni pædæ pönönäni eyepæ
æninque minitö wæætë, Tömëmöni
qui, ante godömenque änämaï iedäni,
angantapa. ¹⁴ Ayæ tontadoidi adobai
tömengä ingante,

—Mönitö guiquënë æbänö cæquënëmöni
imönii.

Äñönänite Wäö wodi iïmaï angan-
tapa.

—Minitö wacä tömengä nänö
godonte æinta ö æncæte ante
pæmënänämaï iedäni. Ayæ wacä
wënæ wënæ cædämaï iñongante
minitö, Wënæ wënæ cæbitapa, ante
babæ wapiticæ änämaï iedäni. Ayæ
minitö cædi beyæ minitö awënë
eyepæ pönongä æninque piyænë
cæte godömenque æinente wædämaï
iedäni, angantapa.

¹⁵ Äñongante godongämæ ongönäni
iñömö, Wængongui doyedë, Codito
pongingä, ante nänö në angaingä
iñömö edæ iingä Wäö wabänö
ïmaingampa, ante önöwënenque
pönënanï inte edæ, Wäö æbänö
cæquingä, ante acæte ante a
ongönänitapa. ¹⁶ Wäö wæætë
tömänäni inänite apænedinque, “Botö
guiquënë näwangä minitö imönite
æpænë guidömo guimïnipa. Iñcayæ
ate në Ponguingä guiquënë tömengä
iñömö näwangä nænængä pöni
iñongante botö guiquënë guiyämo
inömo inte tömengä awæncata incæ
ædö cæte ñi cæquimoo. Tömengä
iñömö minitonga gonga bæcote

baï cædinque Wængonguï Tæiyæ Waëmö Önöwoca ingante edæ da pönongä æncæminimpa. ¹⁷ Waocä, Todigo tömëmö wati wati tænoninque botö tænoniñömö önömancaque baquinque botö waiña tömämö oncönë da wencæboimpa, ante timpodæ nææante wo ææntodö wo ææntodö cædinque ontapocoo wææincoo wadæ ñëmænte wo ëwengampa. Waocä mänömaï wo ëwencæte ante timpodæ næængä baï mönö në Ponguingä iñömö adobaï oo pönï apænte ancæcäimpa. Edæ waëmö inäni inänite apænte æninque tömengä ontapocoo baï inäni inänite gonga cöwë bæcoyömö iya tangä gonte wæcædänimpa.”

¹⁸ Mänömainö äninque Wäo wodi godömenque wade wade apænedinque tömënäni inänite, Ämo ëñëmaïminipa, angacäimpa. Ayæ, Codito ingantedö ante watapæ apænecä ëñengadänimpa. ¹⁹ Incæte tömengä pancabaa Awënë Edode ingante, Bitö tönïñacä nänöogængä Ädodiya ingante mömii, ante püinque Edode nänö wiwa cædinö ante tömänö ante piingä adinque, ²⁰ Edode wodi guiquënë godömenque wiwa cædinque Wäo ingante tee mönecä wægacäimpa.

Itota æpænë guicampa

(Mäateo 3.13-17; Mäadoco 1.9-11)

²¹ Mänii Wäo tömänäni inänite æpænë nänö guidöñedë Itota ingante adobaï guidongä guicantapa. Guiite ate Wængonguï ingante apæneyongä öönæ wi ænete baï bayonte edæ ²² Wængonguï Tæiyæ Waëmö Önöwoca equemö wææ contate baï tömengäa edonque pönï wææ guicä ate öönædë apænedinque,

—Bitö botö Wëmi botö në waadebi imipa. Bitö imite waa adinque waa tobopa, ante öönædë apænecä ëñengacäimpa.

Itota nänö mæmæidi

(Mäateo 1.1-17)

²³ Todëinta wadepo nänö ëñagaiñedë iinque bayonte Itota mäniñedë täno cæcä ingacäimpa. Tömengä ingante në

pæpogadongä iñömö Ootee iñongante wadäni, Itota wæmpocä ingampa, ante pönënönänimpa.

Ootee wodi mæmpo wææ Edii wodi ingacäimpa.

²⁴ Edii wodi mæmpo wææ Mäatato, Mäatato wodi mæmpo wææ Debii, Debii wodi mæmpo wææ Mëedequi, Mëedequi wodi mæmpo wææ Cäna, Cäna wodi mæmpo wææ docä Ootee wodi ingacäimpa.

²⁵ Mänii docä Ootee wodi mæmpo wææ Mäatatia,

Mäatatia wodi mæmpo wææ Ämoto, Ämoto wodi mæmpo wææ Näacö, Näacö wodi mæmpo wææ Etedi, Etedi wodi mæmpo wææ Näagai ingacäimpa.

²⁶ Näagai wodi mæmpo wææ Mäato, Mäato wodi mæmpo wææ docä Mäatatia,

docä Mäatatia wodi mæmpo wææ Tëmei,

Tëmei wodi mæmpo wææ Ooteco, Ooteco wodi mæmpo wææ Oodaa ingacäimpa.

²⁷ Oodaa wodi mæmpo wææ Owäna, Owäna wodi mæmpo wææ Deta, Deta wodi mæmpo wææ Dodobabedo,

Dodobabedo wodi mæmpo wææ Tadatiedo,

Tadatiedo wodi mæmpo wææ Nëedi ingacäimpa.

²⁸ Nëedi wodi mæmpo wææ docä Mëedequi, docä Mëedequi wodi mæmpo wææ Adi,

Adi wodi mæmpo wææ Cotäö, Cotäö wodi mæmpo wææ Edëmadäö, Edëmadäö wodi mæmpo wææ Ede ingacäimpa.

²⁹ Ede wodi mæmpo wææ Ootowee, Ootowee wodi mæmpo wææ Ediyede,

Ediyedede wodi mæmpo wææ Oodii, Oodii wodi mæmpo wææ docä Mäatato ingacäimpa.

³⁰ Mänii docä Mäatato wodi mæmpo wææ docä Debii,

mānīī docā Debii wodi mæmpo wææ
 Timeönö,
 Timeönö wodi mæmpo wææ docā
 Oodaa,
 docā Oodaa wodi mæmpo wææ wacā
 docā Ootee,
 mānīī docā Ootee wodi mæmpo wææ
 Öönäö,
 Öönäö wodi mæmpo wææ Ediyaquimö
 ingacäimpa.
 31 Ediyaquimö wodi mæmpo wææ
 Mēedeä,
 Mēedeä wodi mæmpo wææ Mēna,
 Mēna wodi mæmpo wææ Mäatata,
 Mäatata wodi mæmpo wææ Näatāni
 ingacäimpa.
 32 Näatāni wodi mæmpo wææ Awēnē
 Dabii,
 Awēnē Dabii wodi mæmpo wææ
 Yæte,
 Yæte wodi mæmpo wææ Obedo,
 Obedo wodi mæmpo wææ Boodo,
 Boodo wodi mæmpo wææ Täna,
 Täna wodi mæmpo wææ Näatöö in-
 gacäimpa.
 33 Näatöö wodi mæmpo wææ
 Äminadabo,
 Äminadabo wodi mæmpo wææ
 Adämīī,
 Adämīī wodi mæmpo wææ Adöni,
 Adöni wodi mæmpo wææ Etedöo,
 Etedöo wodi mæmpo wææ Pade,
 Pade wodi mæmpo wææ wacā docā
 Oodaa ingacäimpa.
 34 Mānīī docā Oodaa wodi mæmpo
 wææ Aacobo,
 Aacobo wodi mæmpo wææ Itæca,
 Itæca wodi mæmpo wææ Abadäö,
 Abadäö wodi mæmpo wææ Tade,
 Tade wodi mæmpo wææ Näacodo in-
 gacäimpa.
 35 Näacodo wodi mæmpo wææ
 Tedogo,
 Tedogo wodi mæmpo wææ Dagao,
 Dagao wodi mæmpo wææ Pedego,
 Pedego wodi mæmpo wææ Eebedo,
 Eebedo wodi mæmpo wææ wacā
 docā Täna ingacäimpa.
 36 Mānīī Täna wodi mæmpo wææ
 Caïnäö,
 Caïnäö wodi mæmpo wææ Ada-
 pacadæ,

Adapacadæ wodi mæmpo wææ
 Temö,
 Temö wodi mæmpo wææ Docä
 Nöwee,
 Docä Nöwee wodi mæmpo wææ
 Nämeco ingacäimpa.
 37 Nämeco wodi mæmpo wææ
 Mäatotadëö,
 Mäatotadëö wodi mæmpo wææ Ēnoco,
 Ēnoco wodi mæmpo wææ Aadedo,
 Aadedo wodi mæmpo wææ Mäadadede,
 Mäadadede wodi mæmpo wææ wacā
 docā Caïnäö ingacäimpa.
 38 Docä Caïnäö wodi mæmpo wææ
 Ēnoto,
 Ēnoto wodi mæmpo wææ Teto,
 Teto wodi mæmpo wææ Adäö,
 Adäö wodi ingante nē badongaingä
 iñömö edæ mönö Mæmpo
 Wængonguī inongä ingacäimpa.
 Mānināni iñömö edæ Itota
 mæmæidi ingadänimpa.

4

*Itota wēnæ wēnæ cæccæcäimpa, ante
 wēnæ cæcampa*

(Mäateo 4.1-11; Mäadoco 1.12-13)

1 Mānīī Oododänonga quēwēninque
 Wængonguī Tæiyæ Waēmö Önöwoca
 ingante ædæmö ewocacä inongä inte
 Itota iñömö wadæ gocantapa. Goy-
 ongante Wængonguī Önöwoca tömengä
 ingante önömæca ænte mäocä
 gogacäimpa. 2 Godinque coadenta
 eönæ mānimpoönæ quēwēñongante
 wēnæ awēnē pōninque, Wēnæ wēnæ
 cæe, ante ancaa cædongäimpa. Itota
 iñömö mānimpoönæ cænāmaī iningä
 inte edæ iinque bayonte gæwænte
 wæcantapa. 3 Adinque wēnæ awēnē
 tömengä ingante,
 —Bitö näwangä Wængonguī Wēmi
 inömi inte dica incæ päö ämi ba
 cæmaīmipa.

4 Äñongante,

—“Cæntedö quēwenguī i. Iñæmpa
 Wængonguī nänö apænedö ante
 tömänö ante eñente quēwengæimpa,”
 ante yewæmonte ongö apa, äninque
 Itota edæ Baa angacäimpa.

⁵ Ayæ Itota ingante onquiyaboga ænte mæicā æite ongõñongante wënæ awënë wæætë inguipoga awënë odeyeyidi ömæ tømäo ongõñömæ adoyömö a ongonte bai adotedæ odömongä acantapa. ⁶ Odömongä ayongante Itota ingante äninque wënæ awënë wæætë,

–Awënëidi waincönë pönì ongõninque waëmoncooga mongæninque tæi piñæninque tømënäni nempo quëwënäni inänite nangui änäni ëñente do cædänipa, ante abii. Tømënäni waëmö pönì nani ëmömämo ante æcänö ëmonguingä, ante, Tæi piñænte nani ënempodö ante æcänö empoquingä, ante, botö iñömö edæ do ænte ënempogaimo inte tømëmoque në ämo inte godömo ænänipa. Ìninque bitö ìmite, Bado, godömo æe, ämopa. ⁷ Ìninque bitö mänincoo æncæte ante botö weca ædæ wææninque, Tatänabi bitö Wængongui bai inömi imipa, ämi adinque botö wæætë, Bado, bitö tømämæ Awënë babipa, ante edæ pönömo æmaimipa, ante wënæ awënë änewengantapa.

⁸ Angä ëñëninque Itota,

–Ïmaï ante yewæmongatimpa. “Awënë Wængongui weca ædæ wæænte tømengä ingante apænedinque Bitö adobique Wængonguimi imidö angüenë, ante watapæ apæncæbiimpa. Ayæ, Wængongui beyænque cæcæbiimpa, ante wææ yewæmonte ongö apa quëwëe, ante Itota angacäimpa.

⁹ Wënæ awënë ayæ Itota ingante Eedotadëe ænte mäocä goyongante Wængongui oncö ñænæ oncömäa ænte mæicä æcantapa. Æite næ gongæñongante wënæ awënë wæætë, Bitö näwangä Wængongui Wëmi imipa, ante acædänimpa, ante bitö to wæibäwe. ¹⁰ Äninque wënæ awënë godömenque apænedinque, “Ïmaï ante do yewæmonte ongompa, Bitö ìmite wææ aacædänimpa, ante cædinque

Wængongui tømengä anquedoidi inänite da pönongä

¹¹ pöninque bitö ìmite iñæ æmpodäni ìninque,

bitö dicaa tee tëwadämaï incæbiimpa,” ante yewæmongatimpa cæbii.

¹² Äñongä Itota wæætë,

–Ïñæmpa iïmaï ante ingatimpa. “Bitö, Mönö Awënë Wængongui æbänö cæquingä, ante acæte ante cædämaï incæbiimpa. Eñënämaï cæbo incæte edæ mönö Awënë Wængongui botö imote cöwë wææ aaquingä, ante acæte ante wënæ wënæ cædämaï incæbiimpa,” ante wææ yewæmonte ongö apa änewëe, Itota angacäimpa.

¹³ Ante Itota angä ate wënæ awënë incæ, Itota wënæ wënæ cæcæcäimpa, ante nänö änewënö ìinque cædinque ìincayæ ate nänö ponte cæquinque edæ wadæ gogacäimpa.

Gadideabæ godinque Itota täno cæcampa

(Mäateo 4.12-17; Mäadoco 1.14-15)

¹⁴ Itota iñömö Wængongui Önöwoca nänö tæi piñænö ewocadinque Gadideabæ adodö pongacäimpa. Do pongäimpa, ante adinque wadäni wayömö gode ä gode ä cædäni ëñengadänimpa. ¹⁵ Tømengä iñömö mäniömæ wayömö wayömö godinque tømënäni nani odömöincönë go guite go guite cædinque odömonte apæncä adinque tømänäni, Waa pönì odömonte apæncampa, ante tedegadänimpa.

Näatadeta iñömö ponte Itota apæncampa

(Mäateo 13.53-58; Mäadoco 6.1-6)

¹⁶ Wæætë Näatadeta tømengä nänö pægäiñömö pöninque tømënäni guëmanguionæ iñonte Itota nänö cöwë cæi bai ñöwo cæcantapa. Oodeoidi Wængongui apæncä nani ëñente yewæmongainta ate odömöincönë go guidinque tømengä mäninta äte apæncæte ante ængæ ganticä. ¹⁷ Adinque tømengä ingante Itaiya wodi Wængongui beyæ nänö yewæmongainta pædæ pönönäni ængantapa. Æninque, Mäniñömö

yewæmunte i, ante ñi cæpote ad-
inque, Ìimaï yewæmunte ongompa,
ante apænecantapa.

18 “Wængongui Awënë Önöwoca
botonga pö guicä ate botö
tömengä ingante ewocabopa.

Ïninqe tömengä botonga gao cæte
bai cædinque tömengä nänö tæi
piñæmämo da pönöinque botö
imote angantapa.

Bitö ömaadäni wæwänäni inänite
Wængongui Awënë waa pönö
cæcæcäimpa, ante watapæ
apænebi eñencädänimpa, an-
gacäimpa.

Në tee mönete bai wädäni inänite
bitö, Wængongui pönö wi
æneca beyænque minitö abæ
tawænte gocæminimpa, ante
godö apænebi eñencädänimpa.

Në babetamönäni inänite, Minitö
wæætë waa acæminimpa, ante
bitö godö cæcæbiimpa.

Piinte cædäni ate wæwente quëwëñönäni
bitö wæætë gä pe æmpobi abæ
tawænte bai gocädänimpa.

19 Ayæ, Wængongui Awënë nänö
waadete cæquïnepo do batimpa,
ante apænebi

eñencädänimpa, ante Wængongui botö
imote do da pönongä pömo
imopa.”

20 Ante Itaiya wodi nänö yewæmongainä
adinque adodö nä nä capodinque
mäniñömö në cæcä ingante pædæ
godöinque Itota tæ contacantapa.
Mänömaï cæcä adinque tömënäni nani
odömöincönë në ongönäni tömänäni
tömengä ingante cöwä adänitapa.

21 Ayönänite,

—Wængongui botö imotedö ante
apæneca eñëninque nani yewæmongainä
bai ñöwoönæ eñëñömini edæ do
inque ba aminipa.

22 Ante apæneca eñëninque
tömänäni, Tömengä nanguï waadete
pönö tedecampa, ante apænedinque
tömengä ingante waa adinque
guiñente wädänitapa.

—Ïngä iñæmpa Ootee wengä
ïmaingä inte bamönengæ mänömaï

cæcampa, ante awædö, ante nani
caboque tededänitapa.

23 Mänömaï ante wæyönänite
Itota tömënäni nani pönënö ante
önöwënenque eñëninque,

—Botö imote apænedinque minitö,
“Bitö dotodo bai inömi inte nämä incæ
cæte waa babæwe,” ante dodäni nani
angainö bai ante tedemini awædö.
Ayæ, “Capënaömö iñömö bitö waa
cæbi adinque tededäni eñëmönipa.
Mäniñömö bitö cædinö bai tömëmi
ëñagaiñömö adobai wii cæbii,” ante
wæmini abopa.

24 Äninqe Itota godömenque
apænedinque,

—Nawangä ämopa. Wængongui
beyæ në apæneca iñömö tömengä
quëwëniñömö ponte apæneyongante,
Wii eñëinë wædö, ante Baa änänipa.

25 Nawangä edæ ämo eñëedäni. Docä
Ediya wodi quëwengäñedë mäa go
adoque wadepo ayæ tæcæ wadepo
Itota tömënäni ömæ tömäo nani
gæwænte wægaimämo baquinque
cöönæ cædämaï ingatimpa. Mäniñedë
Idægobæ iñömö owæmpoinäni nanguï
inäni quëwëñönänite, 26 tömënäni
weca Ediya ingante da godönämaï
inte Wængongui wæætë edæ, Bitö
Tidöo eyequei gote Tadezata iñömö
quëwengä owæmpoingä weca goe,
angä gogacäimpa. 27 Adobai

Wængongui beyæ në apænegainä
Editeo wodi quëwengäñedë Idægobæ
æmontai në baadäni nanguï inäni
iñönänite Wængongui tömënäni inänite
wadæ caadämaï inte wæætë edæ
Tidiabæ quëwengä Näämäo ingante
wadæ caacä waintai baagacäimpa.

28 Ante Itota apæneca eñëninque
mänincönë ongönäni tömänäni piinte
änäni badänitapa. 29 Äinäni bad-
inque tömengä ingante tömënäni

nani quëwëñömö yabæ inö wido
cädänitapa. Ayæ tömënäni nani
mænonte quëwenquidi tömäne ænte
mäo godinque tömënäni, Bæ tamö
guidömëmæ tæ wææncæcäimpa.

30 Ante cæyönäni, Itota iñömö
tæcæguedë godinque aamö cæte
wadæ gogacäimpa.

Itota angä eñente wënæ incæ tao gopa

(Mäadoco 1.21-28)

³¹ Wadæ godinque Gadide-abæ Capënaömö nāni quëwëñömö pönninque Itota tömënāni nāni guëmanguïönæ bayonte tömënāni inānite odömönte apænecä eñënānitapa. ³² Eñëñönāni tömengä nämä tæi piñæninque nē angä inongä inte nö odömönte apænecä eñente wædinque tömënāni, Æ tömengä iñömö nö pöni odömönte apænecä eñëmönipa, ante wædānitapa.

³³ Māniñedē edæ onguiñængä wënæ wentamö ewocacä tönö nē quëwengä iñömö tömënāni odömöincönē a ongönninque iñontobæ yedæ ante aa pecantapa.

³⁴ —Quimæ quëwëë. Bitö Itota Näatadeta quëwënimi inte quinante mönatö weca pömi. Mönatö imönate edæ æmæwo wido cæcæte ante wabänö pömitawo. Bitö æmömido imii, ante botö do atabopa. Bitö Wængongui Tæiyæ Waëmö Wëmi inömi imipa, ante edæ do eñëmopa.

³⁵ Ante tedeyongante Itota wææ änninque,

—Apocænē quëwenguënē tedewëë. Waocä baönē quëwënömi inte edæ tao gobäwe.

Angä eñënninque wënæ guiquënē tömännāni ayönāni waocä ingante mäo tæ gotodö go wææñongante tömengä baonga wënæ wënæ cædāmaï inte tao gotapa. ³⁶ Itota angä wënæ tao gocä adinque tömännāni guinente wædinque nämāneque tededinque,

—Tömengä æbänö cæte nē angä ingä. Iñæmpa nē angä inongä inte tömengä tæi piñæninque wënæidi nē wentamö ewocadāni inānite angä tao godāni awædö.

³⁷ Ante pönente wædinque tömënāni, Itota mänömaï cæcampa, ante tededinque mänöömæ tömäo gode ä gode ä cædāni eñengadānimpa.

Pegodo nänöogæ wäänä ingante Itota cæcä gancæ bacä

(Mäateo 8.14-15; Mäadoco 1.29-31)

³⁸ Mänii tömënāni odömöincönē ongönte apænedinque Itota tao godinque Timönö oncönē go guicantapa. Go guiyongante wadāni, Timönö nänöogængä wäänä iñömö nanguï daicawo gawænte nangæ bacampa cæbii, änāni. ³⁹ Eñënninque Itota tömengä weca go gongænninque daicawo inte piinte bai änninque, Idæwaa impa, angä dæ batapa. Ininque tömengä gancæ badinque ængæ gantidinque tömënāni beyæ cæcantapa.

Nantate wæwënāni inānite Itota cæcä waa badānipa

(Mäateo 8.16-17; Mäadoco 1.32-34)

⁴⁰ Nænque gawadecæ bayonte nantate wæwënāni inānite Itota weca ænte pönāni adinque tömengä wacä ingante wacä ingante godö gampocä ate tömënāni waa badānitapa. ⁴¹ Ayæ waodāni nanguï ināni baönē wënæidi quëwëñönānite Itota angä eñënninque tao godinque,

—Bitö Wængongui Wëmi inömi imipa, ante Yæ änānitapa.

Ininque Itota, Botö Codito inömo imopa, ante do eñënānipa, ante wædinque wënæidi inānite, Apocænē imæwedāni, ante edæ wææ angacäimpa.

Itota oodeoidi odömöincönē go guite apænecä

(Mäadoco 1.35-39)

⁴² Ayæ baänæ ate Itota wayömo önömæca gocantapa. Gocä adinque wadāni tömengä ingante ante diqui diqui minte tömengä weca do pönninque, Mönitö imönite emö cæte godāmaï incæbiimpa, ante wææ cæcæte ante cædānitapa. ⁴³ Ate wædinque tömengä wææ änninque,

—Botö, Wængongui Awënē Odeye nempo watapæ quëwenguinö anguënē, ante cōwē apænequënemo imopa. Wængongui, Mänömaïnö ante apænecæbiimpa, ante botö imote da pönongä pönimo inte botö tömännāni quëwëñömö gote apænequënemo inte gobopa.

44 Ante Oodeabæ godinque tōmēnāni odōmōincōnē go guī go guī cædinque Itota apæ necā ēñengadānimpa.

5

Gæyæ nanguī pōni dadōwēnānīpa (Māateo 4.18-22; Māadoco 1.16-20)

1 Ayæ Itota Guēnetadetepæ wedeca gote ongōnīnque Wængonguī nānō apænedō ante apæ necantapa. Ēñencæte ante cædinque nanguī ināni godongāmæ pō goto ongonte ēñēē congadānimpa. 2 Apæ necā ēñēñōnāni tōmengā gomō ayongā gæyæ nē dadōwēnāni dicamōñæ yamoncæte ante ti wææninque tōmēnāni nāni ti wææ godimpo mēa wipo gāwapæ wedeca omædempo wāi wocæ acantapa. 3 Adinque Itota adoque wipodē Timōnō wipodē guīdinque tōmengā ingante, Tæcæpæno gāmænō eyequei wo go wāi wocæe, angā gā go wāi wocængā ininque Itota tæ contate tōmēnāni inānite odōmonte apæ necā ēñēnānitapa. 4 Tōmēnāni inānite ininque apænedinque Timōnō ingante,

—Bitō wipo tæcæpæno godōmenque ænte gobi ate mīnitō dicamōñæ wo guitodonte gæyæ dadonte æncæminimpa.

5 Āñongā Timōnō,

—Awēnē ēñēmi. Tōmāa woyowotæ gæyæ dadoncæte ante dicamōñæ ancaa guitodōñōmōni wīi datapa. Incæte bitō āmi beyænque botō Ao ante cæcæboimpa.

6 Ante māo guitodōñōnāni gæyæ nanguī pōni da ate dicamōñæ wodo wægo tengatimpa. 7 Ininque Timōnōidi wa wipodē ongōnāni ponte godongāmæ æncædānimpa, ante omō cædāni adinque wa wipo ænte pōnāni ate gæyæ mēa wipodē eyede pōni ñōnōnāni ate wipo emā guicæ cætimpā. 8 Ininque, Itota angā beyænque gæyæ nanguī pōni æmōnīpa, ante adinque Timōnō Pegodo inōmō Itota onōwa gāanē ædæ wææninque,

—Awēnē ēñēmi. Botō wēnæ wēnæ entawēmo inōmote bitō waemō pōni entawēmi inte nānēnē goe, angacāimpa.

9 Ante guīñente wæyongante nē dadōwēnāni wadāni adobai, Ēbānō cæte nanguī pōni gæyæ dadonte æmōo, ante wædinque ancai guīñēninque Timōnō tōnō godongāmæ wædānitapa. 10 Ayæ Timōnō tōnō godongāmæ gæyæ nē dadōwēna Tebedeo wodi wēna Tantiago tōnō Wāo adobai guīñente wægadaimpa. Ininque Itota inōmō Timōnō ingante,

—Guīñēnāmaī incæbiimpa. Gæyæidi gæte bitō æmaī bitō inīcayæ ate waodāni inānite gæte bai cædinque apænebi ēñēninque ponte quēwencædānimpa.

11 Angā ēñēninque wipo emōnaiya ænte māmō ñā cæcadodinque tōmēnāni māincoo tōmancoo edæ emō cædinque edæ Itota miñæ wadæ gogadānimpa.

Nē baadingā ingante Itota wadæ caacampa

(Māateo 8.1-4; Māadoco 1.40-45)

12 Inīcayæ ate Itota wadāni nāni quēwēñōmō gote quēwēñongante wacā cōwē baate ēñawēnongā inte tōmengā weca ponte guidōmēmæ ædæ wææninque angantapa,

—Awēnē, bitō Ao āmi inte wadæ caabi ininque botō waintai baabaimopa.

13 Āñongā Itota pædæ wææmpo gampo caadinque,

—Ao amopa. Bitō waintai baacæbiimpa.

Ante tæcæ āñongā ñōmæintai nānō ēñadintai edæ dæ baadinque tōmengā waintai do baacantapa. 14 Ininque Itota tōmengā ingante,

—Ēñēmi. Bitō waintai baadīmi inte wadāni inānite māo apænedāmaī ie. Wæætē, Nāwangā impa, ante acædānimpa, ante cædinque bitō, Wængonguī quī, ante nē godongā weca tōingā godinque waintai bitō baadintai odōmōmi ædæmō acæcāimpa. Ayæ Mōitee wodi wææ ante nānō angaincoo bai ænte

pöninge bitö waintai bitö baadi beyæ ante edæ, Wængongui qui, äninge nē godongä ingante pædæ godömi æncæcäimpa, ante wææ angantapa.

¹⁵ Wææ angä incæte, Itota mänömaï cæcampa, ante nanguï gode ä gode ä cædäni eñëninge nanguï inäni Itota apænegä eñencæte ante ayæ tömënanï nänï caate wædö waa bacæte ante goto pö goto pö cægadänimpa. ¹⁶ Itota iñömö wantæ wantæ iñö önömæca nänënë godingue Wængongui ingante wæætë wæætë apænegacäimpa.

Në cömäingä ingante Itota angä dao dao gocampa

(Mäateo 9.1-8; Mäadoco 2.1-12)

¹⁷ Ayæ adobai iimö iñö iimö iñö Itota cöwë odömönte apænegacäimpa. Mäniñedë oodeoidi nänï wææ angainö ante nanguï adingue nē eñënanï iñömö nē odömönäni inönänimpa. Wadäni adobai, Mönö wææ angainö ante eñente cæcäimpa, ante nanguï änäni guiquënë Paditeoidi nänï änäni inönänimpa. Inique Itota mäniñedë odömönte apæneyongä mäninänï nē odömönäni tönö Paditeoidi iñömö Gadideabæ nänï quëwëñömö ta Oodeabæ nänï quëwëñömö ta pöninge ayæ Eedotadëe iñömö ta pöninge Itota weca pöninge tæ contate a ongönänitapa. Mäniñedë wadäni wa wa badingue wënæ wënæ inte wædäni iñönänite Itota iñömö Awënë Wængongui nänö tæi piñænö entawëninge nanguï cæcä waa badönänimpa.

¹⁸ Inique wadäni nē cömäingä nänö möimpataa æmætæ æmætæ bæi ongönte nææninge, Itota weca ænte mangui ñö cæcäimpa, ante pönänitapa. ¹⁹ Ponte ayönäni wadäni eyede pönï goto ongönäni adingue nē ænte mämö pöninänï iñömö, Ædö cæte guiquiï. Ante wædinge oncömäa inö æidämæ mæi æidinge dai bæte mænönïñömö epæ cædäni ompite gongæñö tömënanï cömäingä möimpataa bæi ongönninge tömengä ingante godongämæ

ongönäni weca tæcæguedë Itota weca pædæ wæænönäni ongongantapa. ²⁰ Mänömaï cædäni adingue Itota, Näwangä wede pönente cædänipa, ante adingue,

—Æmigo, wënæ wënæ bitö cædimämo ante ñöwo ñimpo cætimpa.

²¹ Äñongä Paditeoidi tönö nē wææ odömönäni nämäneque pönente tedinge, “Wënæ wënæ cædingä ingante æcänö ñimpo cæquiringä. Ingä iñömö Wængongui ingampa diyæ mänömaï cæquiringä. Edæ babæ ancædö.”

²² Ante pönëñönäni Itota tömënanï nänï pönëwënö ante do eñëninge,

—Minitö mimöno quimæ wënæ wënæ pönëwëminii. ²³ “Në cömäingä nänö wënæ wënæ cædimämo ante godö ñimpo cæbopa,” ante botö Wængongui bai ämo eñëninge minitö guiquënë, Wængongui ingampa diyæ mänömaï cæquiringä, ante pönëminipa. Ayæ wæætë, “Ængæ gantidingue möimpata ænte dao dao gocæcäimpa,” ante botö Wængongui bai ämo eñëninge minitö adobai, Wængongui ingampa diyæ mänömaï cæquiringä, ante pönëmini imaiminipa, ante awædö. Inäempa mänömainö ante pönëmini inique minitö edæ æbänö cæquënëmo äminii. ²⁴ Incæte botö Waobo eñagaïmo inte inguipoga quëwëninge waodäni nänï wënæ wënæ cædimämo ante nē ämo inte pönö ñimpo cæbopa, ante minitö edæ eñencæminimpa, ante botö iimäi cæbopa.

Äninge nē cömäingä ingante edæ,

—Bitö imite ämo eñëe. Ængæ gantidingue bitö möimpataa topo cæte æninge tömëmi oncönë næænte goe.

²⁵ Angä eñëninge cömäingä iningä incæ edæ tömänäni ayönäni ængæ gantidingue, Wængongui ñäö bai emönongä inte pönö tæi piñænte cæcä æmopa, ante apænedingue tömengä nänö öñöninta topo cæte tao oncönë ænte gocantapa. ²⁶ Gocä ate wædinge tömänäni, Æbänö cæcäi, ante eñënamäi inte guifente wædinge, Wængongui bitö ñäö bai

ëmömi inte waa pöni cæbi amönipa, ante watapæ apænegadänimpa. Ayæ,

—Ñowo iñömö mä pöni cæcä amönipa, ante ancai guiñente wædänitapa.

Debii ingante Itota angä tee em-pote gocampa

(Mäateo 9.9-13; Mäadoco 2.13-17)

²⁷ Ayæ ate Itota tao gote ayongä odömäno awënë nänö äninta ante nê ængä Debii ingante acantapa. Tömengä iñömö Awënë nänö æimpa gäänê tæ contate ongongä adinque Itota tömengä ingante,

—Botö miñæ pöe.

²⁸ Angä eñëninque do ængæ gantid-inque Debii mänincoo tömancoo ëmö cæte Itota miñæ wadæ gogacäimpa.

²⁹ Ayæ ate Debii, Itota beyæ, ante tömengä oncönê ææmæ nanguï pöni cæcantapa. Ìninqe ææmæ becæte ante awënë beyæ nê æwënëni nanguï inäni pö tæ contate cæñönäni wadäni adobai pö tæ contate cænäni.

³⁰ Adinque Paditeoidi tönö tömënäni nê odömönäni guiquënë Itota miñæ nê godäni inänite piinte äninque,

—Odömäno awënë beyæ nê æwënëni tönö wadäni nê wënæ wënæ cædäni tönö minitö quimæ godongämæ ponte tæ contate bete cæmïni.

³¹ Ante piñönäni Itota wæætê tömënäni inänite,

—Nê waa ingä guiquënë, Cæbi waa baboe, änämai iñongante nê wënæ wënæ ingä guiquënë dotodo ingante, Cæbi waa baboe, ante do aa pecampa. ³² Pancadäniya, Nämä incæ nê nö entawëmo imopa, ante nê änäni iñönänite botö iñömö edæ nê dotodo bai adobai inömo inte tömënäni inänite aa pedämai incæboimpa. Wadäni guiquënë, Nämä wënæ wënæ cæbo imopa, ante nê änäni iñönänite botö, Tömënäni, Idæwaa wënæ wënæ cæte awædö, ante Wængongui gämænö poncædänimpa, ante cædinque tömënäni inänite aa pecæ pongaboimpa, ante Itota apænegacäimpa.

Ee ate cænämai ingæimpa, ante nê änäni

(Mäateo 9.14-17; Mäadoco 2.18-22)

³³ Itota ingante iïmai ante ayæ änänitapa. Wäo miñæ nê godäni iñömö, Wængongui beyæ, ante ee ate cænämai inänipa. Ayæ Paditeoidi miñæ nê godäni adobai ee ate cædänipa. Bitö miñæ nê godäni guiquënë do cænte bete quëwënanipa töö.

³⁴ Änäni eñëninque Itota wæætê,

—Onguïñængä nê monguingä wente ænte pönäni iñönänite minitö wæætê, Ee ate cænämai iedäni, ante edæ ædö cæte wææ anguïmïni. Monguingä nänö wente ænte nê pönäni bai inönäni inte botö miñæ nê godäni iñömö ædö cæte wæwente bai cænämai inguïnänii. ³⁵ Wæætê ayæ ate guiquënë, Monguingä, näni nê änogä bai iñömote wadäni ponte botö imote ö ænte gocædänimpa. Mänömai cædäni ate botö miñæ nê godäni iñömö mäniñedê ate wæætê cænämai inte wæcædänimpa, ante Itota apænegacäimpa. ³⁶ Ayæ, Wængongui Awënë nempo quëwëninque æbänö cæquï, ante eñencædänimpa, ante Itota imæca quëwënëni näni cæinö ante odömönte iïmai ante apænecantapa.

—Mïincoo badonte ate waocä dicæ adocoo wänä ñænte panca-cooga æninque pedæncocoo pönö tadömonguingäa. Mänömai cæcä ininque edæ mïincoo incæ do wänä tente baquënë. Ayæ pedæncocoo ëmönö bai mïincoo wü adobai ëmompä. Minitö, Awente bai cænämai inte mönö quëwengæimpa, ante mïni änewënö guiquënë pedæncocoo bai inte wote baquïne ënepä. Wængongui gämænö pöninque quëwencæmïnimpa, ante botö apænedö guiquënë mïincoo bai inte quëwenguïne ënepä. Ìninqe wote baquïne tönö quëwenguïne tönö ædö cæte mënea ante eñente cæquï. ³⁷ Ayæ adobai yowepæ biñömæ mïimæ æninque waocä ædö cæte picæ æmontaicadedê godö pe ñiñænguingäa. Ìñæmpä picæ æmontaicadedê pe ñiñængä

īnīnque edæ tæi æbæ æmæwo go-
quēnē. ³⁸ Mīimæ wæætē mīincadedē
pe ñīñængæimpa. Adobaī botō
odōmōnō mīimæ baī īñonte dodāni
nāni odōmōwēnō ædō cæte botō
odōmōnō tōnō adoyedē ēñente
cæquīi. ³⁹ Incæte, “Gōnænīmæ īñōmō
waēmepæ īmæmpa,” ante nē bedōmini
inte mīnitō mīimæ ædō cæte quingæ
bequīmīnīi, ante Itota angacāimpa.

6

*Guēmanguīōnæ īñonte tōmēmō tā
pete ænānīpa*

(Māateo 12.1-8; Māadoco 2.23-28)

¹ Ayæ ate guēmanguīōnæ īñonte
Itota tōmēmoncodē tæcæguedencodē
gocantapa. Goyongā tōmengā mīñæ
nē godāni īñōmō tōmēmō inca tā pete
æninque dacæ dacæ cædinque ade cæ
ade cæ godāni. ² Adinque Paditeoidi
guiquēnē,

—Īñæmpa, Guēmanguīōnæ īñonte
mānīnō baī cædāmaī īedāni, ante
dodāni nāni wææ angainō ante
mīnitō ēñēnāmaī inte quīmæ cæmīnīi.

³ Ante pīñōnānite Itota,

—Docā Dabii wodi tōmengā nānō
ēmīñænāni tōnō ōmæpodāni inte
gæwæante wædinque æbānō cægadānīi,
ante yewæmonte ōñō incæ mīnitō
īñæmpa adāmaī inte baī āmīni awædō.

⁴ Wængonguī quī, ante nē godōnānique
cænguī impa, ante wææ nāni angainō
baī cædinque dodāni pāō, Wængonguī
quī, ante ñoncæ ñoncæ cædōnānīmpa.
Incæte Dabii wodi Wængonguī
oncōnē go guīdinque mānīi pāō do
ænte cæninque tōmengā mīñæ nē
godāni īnānite godōmenque godongā
cænānitapa, ante yewæmonte ōñō
apa ānewēmīnīi.

⁵ Ante apænedinque Itota tōmēnāni
īnānite ayæ apænecantapa.

—Botō īñōmō Waobo nē ēñagāimo
īñōmō Tæiyæ Awēnē īnōmo inte
edæ guēmanguīōnæ Awēnē īnōmo
īmopa. Īnīnque botō, Guēmanguīōnæ
īñonte edæ æbānō cæquīi, ante adobo
nē Āmo ingāimo īmopa, ante Itota
apænegacāimpa.

Nī cōmampoingā

(Māateo 12.9-14; Māadoco 3.1-6)

⁶ Īncayæ ate guēmanguīōnæ
adobaī waōnæ īñonte Itota oodeoidi
odōmōincōnē go guīte odōmonte
apæneyongā onguīñængā ōnompō
tōmēmæ īnō nī cōmampote wædongā
inte mānīñōmō a ongongantapa.
⁷ Mānīñedē nē odōmōnāni tōnō Pa-
diteoidi guiquēnē, Itota wapiticæ
cæcā īnīnque mōnō wæætē pīinte
angæimpa, ante nē ānewēnāni
īnōnānīmpa. Ñōwo īñōmō tōmēnāni,
Ñōwoōnæ guēmanguīōnæ ī incæte
Itota nī cōmampoingā ingante, Waa
bacæcāimpa, ante cæcā īnīnque
mōnō māo pīinte angæimpa, ante
babæ cæcæte ante cōwā adānitapa.
⁸ Mānīnō, Mōnō pīingæimpa, ante
nāni pōnēwēnō ante Itota īñōmō
ōnōwēnenque edæ do ēñēninque edæ
nī cōmampoingā ingante,

—Bitō ængæ gantidinque tæcæguedē
pō næ gongæe.

Angā ēñēninque ængæ gantidinque
pō næ gongængantapa. ⁹ Īnīnque Itota
nē pīinte ancædāni īnānite,

—Āmo apænēmīni ēñēmoedāni.
Guēmanguīōnæ īñonte mōnō æbānō
cæquēnēmō īmōō, ante wææ an-
gatīi, ante pōnēmīni. Mōnō
waa cæquēnēmō īmōmpa, ante
pōnēmīnitawo. Wæætē edæ, Mōnō
wēnæ wēnæ cæquēnēmō īmōmpa,
ante pōnēmīnitawo. Guēmanguīōnæ
īñonte edæ, Quēwencædānīmpa,
ante cæquēnēmō īmōmpa, ante
pōnēmīnitawo. Wæætē mōnō edæ
ōmæe ēwenguēnēmō īmōmpa, ante
pōnēmīnitawo. ¹⁰ Āninque æmætæ
gomō æmætæ gomō edæ tōmānāni
īnānite adinque nī cōmampoingā
ingante,

—Pædæ pompobi.

Angā ēñente cædinque nē cōmampodingā
incæ pædæ æmpote edæ ædæmō waa
empocā bapocantapa. ¹¹ Īnīnque
tōmēnāni, Guēmanguīōnæ incæ
mānōmaī cæcampa, ante ænguī bad-
inque, Itota ingante mōnō æbānō

cæquīī, ante pīnīnque nāni cabo nāmāneque tedegadānīmpa.

Itota angā ate dote ganca ināni nē gode ānāni badānīpa

(Māateo 10.1-4; Māadoco 3.13-19)

¹² Māniñedē Wængonguī ingante apæneceate ante Itota ānanquidi æidinque tōmāā woyowotæ apænee congantapa. ¹³ Nāō ba adinque tōmengā miñæ nē pōnīnāni inānite aa pecā pōnāni ate tōmengā, Botō beyæ nē gode āmīni incæmīnīmpa, ante dote ganca ināni mānīmpodāni inānite apænte ængacāīmpa. ¹⁴ Tōmengā nānō nē da godōnāni baquīnāni iñōmō edæ iīmaī ēmōnōnānīmpa. Tānocā Timōnō ēmongā ingā incæte Itota wawo Pegodo pemongacāīmpa. Īngā Pegodo tōnō Æntade nāna caya, Tantiago tōnō Wāō nāna caya, Pedipe tōnō Batodōmēē, ¹⁵ Māateo tōnō Tōmato, Adepeo wengā Tantiago inōnānīmpa. Ayæ, Mōnō ōmæ ingæīmpa, ante nanguī cædongā inte wacā Timōnō inongāīmpa. ¹⁶ Tantiago wengā Codaa tōnō Itota ingante odōmonte nē godongingā ingaingā inte wacā Codaa Icadīote nāni ānongā inatapa. Mānīmpodāni inānite Itota apænte ængacāīmpa.

Tæiyæñāni inānite Itota gampocā waa badānīpa

(Māateo 4.23-25)

¹⁷ Mānīmpodāni tōnō Itota mæmō iñōmō wææninque næ gongænte ongongantapa. Māniñōmō tōmengā miñæ nē godāni nanguī ināni do ponte a ongōnōnānīmpa. Ayæ tōmēnāni tōnō wadāni Eedotadēē iñōmō quēwēnāni tōnō Oodeabæ tōmāo quēwēnāni ayæ Tido eyequeī Tidōo eyequeī gāwapæ wedeca quēwēnāni nanguī ināni do ponte a ongōnōnānīmpa. Tōmēnāni, Itota apæneceā ēñengæīmpa, ante ayæ, Wēnæ wēnæ inte wæwēmō inte mōnō waa edæ bacæīmpa, ante pōnīnque a ongōnānīmpa. ¹⁸ Ayæ wēnæidi nē wentamō ēwocadāni tōnō quēwente wæwēnāni māniñōmō ponte ongōnāni inānite Itota adoyōmō wææ pōnīnque

godō cæcā waa badānīmpa. ¹⁹ Ayæ, Itota tæī piñænte entawengā inte pōnō cæcā ate waa badānīpa, ante adinque tōmānāni tōmengā ingante gampocæte ante cædānīmpa.

Mini toquinque, ante ayæ, Mini wæquinque, ante

(Māateo 5.1-12)

²⁰ Ayæ Itota tōmengā miñæ nē godāni inānite gomō adinque apæneceā ēñēnānīmpa.

“Mīnitō, Botō waēmō īmopa diyæ Awēnē Odeye nempo guīquīmoo, ante nē wæwēmīni iñōmō watapæ mīni toquinque Wængonguī Awēnē Odeye nempo mīni quēwenguīnō edæ do ēamīnīpa,” angantapa.

²¹ “Inguīpogaque gæwænte wæmīni inte edæ mīni watapæ toquinque Wængonguī pōnongā tōmo pōni cæncæmīnīmpa,” angantapa.

“Mīnitō inguīpogaque wæwente quēwēmīni inte edæ mīni watapæ toquinque Wængonguī pōnō waadete cæcæcāīmpa,” angantapa.

²² “Botō Waobo ēñagāimo miñæ gomīni beyænque wadāni mīnitō īmīnite badete todīnque piīnte adīnque wīdo cædānītawo. Botō beyænque mīnitō ēmōwo ante, Wīwa ēmōwo awædō, ante Baa ānānītawo. Edæ mīni waa toquinque inguīpogaque mānōmaī cædānīpa.

²³ Ōōnædē mōnō ænguīnō ante nanguī ongōmpa, ante pōnēnīnque mīnitō ñōwodāni nāni piīnte cæyedē incæ watapæ toedāni. Īnāni nē piīnte cædāni wæmæidi incæ Wængonguī beyæ nē apænegāināni inānite edæ adobaī piīnte cægadānīmpa, ante toquēnē wæwēmīni. ²⁴ Wæætē edæ māīncoo nanguī nē ēamīni guīquēnē īncayæ ate mīni wæquinque edæ inguīpogaque watapæ quēwēmīnīpa,” ante Itota apæneceantapa.

²⁵ “Nē tōmo cæmīni guīquēnē īncayæ ate mīni gæwænte wæquinque edæ inguīpogaque tōmo cæmīnīpa,” ante apæneceantapa.

“Nē Ca ca tomīni adobaī īncayæ ate Ca ca mīni wæquinque edæ inguīpogaque tomīnīpa,” angantapa.

²⁶ “Minitö iminite ante tömänäni waa apænedäni inique edæ mini wæquinque ingæimpa. Iñæmpa iinäni nē waa apænedäni adodäni mæmæidi adobaï cægadänimpa. Wadäni babæ wapiticæ apænedäni incæ, Wængongui beyæ nē apænebo imopa, ante nē anewēnāni inānite iinäni mæmæidi iñömö adobaï waa apænegadänimpa,” ante Itota apænegacäimpa.

Nē pünte cædäni inānite waadete cæccäimpa, ante

(Mäateo 5.38-48, 7.12)

²⁷ Ayæ godömenque apænedinque Itota, “Minitö nē eñēmīni iñöminite ämo eñeedäni. Minitö iminite nē pünte cædäni inānite minitö wæætē waadete cædäni. Minitö iminite nē pünte adäni inānite minitö wæætē waa cæedäni. ²⁸ Wænæ wænæ bacæminimpa, ante nē änāni inānite minitö wæætē waa apænete godö cæedäni. Minitö iminite nē wænæ wænæ cædäni inānite minitö wæætē tömēnāni beyæ ante Wængongui ingante apæneedäni. ²⁹ Wacä bitö imite imæmpaga inö tamongä wædīmi inte bitö wæætē æmæmpaga inö dadi emæmonte ee ongömi tamongæ. Ayæ yogui beyæ bitö yabæcoo ö ængä adinque önöncapæncoo tönö ee abi ö ængæ. ³⁰ Mäincoo ante nē angä ingante tömengä nänö änoncoo edæ ee godömi ængæ. Ayæ bitö mäincoo nē ö ængä ingante, Wæætē adodö pönömi æmoe, änāmaï incæbiimpa. ³¹ Minitö, Wadäni botö imote waa cæcædänimpa, ante wæminitawo. Edæ mäninö ante mini wædö bai adobaï wædänipa, ante pönëninque minitö wæætē wadäni tömänäni inānite waa cæedäni,” ante Itota angacäimpa.

³² Ayæ apænedinque, “Minitö iminite nē waadedänique inānite waadete pönëminī inte wadäni inānite waadedämaï imini adinque edæ Wængongui dicæ minitö iminite waadete pönö aqingäa. Iñæmpa nē eñēnāmaï cædäni incæ nē waadete pönënanique inānite waadete pönëninque minitö cæganca do cædänipa töö. ³³ Ayæ adobaï

minitö iminite waa cædänique inānite waa cæmīni inte wadäni inānite waa cædämaï imini adinque Wængongui minitö iminite dicæ waa aqingäa. Iñæmpa minitö cædö bai nē eñēnāmaï cædäni incæ adobaï do cædäni apa cæminii. ³⁴ Ayæ, Adodö pönongä æncæboimpa, ante pönëwëninque minitö nē adodö pönonguingä ingante godöminī inte wadäni inānite godönāmaï imini adinque Wængongui minitö iminite dicæ waa aqingäa. Iñæmpa nē eñēnāmaï ināni nāni cabo incæ, Adodö pönongä æncæboimpa, ante pönëwëninque nē adodö pönonguinganque ingante godöninque minitö cædö bai adobaï cædänipa töö.”

³⁵ “Wæætē minitö iminite nē pünnāni inānite waadete pönëninque waa cæedäni. Ayæ tömēnāni nāni änö ante, Adodö pönömi æmoe, ante änāmaï inte ee godöminī æncædänimpa. Mänömaï waadete cæmīni inique minitö iincayæ ate mini waadete cægäinö beyæ nangui æmaimīnīpa. Ayæ mönö Mæmpo Æibæ pönī nē Quëwengä iñongante tömengä ingante nē waa ate pönënāmaï ināni inānite tömengä godö waadete cæcampa. Nē wiwa cædäni inānite tömengä godö waadete cæcampa. Inique minitö tömengä nänö cæi bai adobaï waadete cæmīni inique Mæmpocä waadete nänö entawënö bai minitö adobaï entawëninque tömengä wëminī imaimīnīpa. ³⁶ Mönö Mæmpo pönö waadete nänö waa cægäi bai minitö adobaï wadäni inānite godö waadete waa cæedäni,” ante Itota angacäimpa.

Wadäni inānite apænte änāmaï iedäni, ante

(Mäateo 7.1-5)

³⁷ Ayæ wæætē Itota iimaï ante apænecantapa. “Wacä ingante apænte änāmaï imini inique mönö Mæmpo wæætē minitö iminite apænte änāmaï incæcäimpa. Ayæ, Wacä nänö tente wæquinque wænæ wænæ cæcampa, ante änāmaï imini ate mönö Mæmpo wæætē, Mini tente wæquinque wænæ wænæ cæminīpa, ante apænte änāmaï incæcäimpa.

Wacä wënæ wënæ cæcä ingante mīnitō ñimpo cæmīni ee gocä ate mōnō Mæmpo adobaī mīnitō imīnite ñimpo cæcä quëwencæmīnimpa. ³⁸ Wadāni inānite ee godōedāni. Mīnitō ee godōmīni ænāni ininque wadāni wæætē mīnitō imīnite ee pōnōnāni æncæmīnimpa. Nē pōnōnāni iñōmō tōmēnāni nāni tee māincadedē da wēninque da wæænonte wancæ wancæ cædinque eyepote wæænguinque eyede pōni da wēninque mīnitō ænguincadedē pōnō wāne cædāni edæ æncæmīnimpa. Edæ mīnitō tee mante mīni godōincade incæ adocadeca tee mante baī cædinque Wængonguī mīnitō imīnite eyepæ pōnongā æncæmīnimpa,” ante Itota apænegacäimpa.

³⁹ Ayæ, Wængonguī Awēnē nempo quëwēninque æbānō cæquīi, ante eñencædānimpa, ante Itota imæca quëwēnāni nāni cæinō ante odōmōninque iīmaī apænecantapa. “Babetamongā ingante wacä babetamongā incæ ædō cæte māo odōmongā goquingā. Iñæmpa mānōmaī cædinque nāna babetamoncaya ompite adopiticæ guëa go wææ guībainapa. ⁴⁰ Nē odōmonte apænecā iñōmō nē eñengā inte odōmōñongante tōmengā nānō nē emīñængā guiquēnē dicæ godōmenque eñengā ingāa. Incæte iinque odōmonte apænecā eñēninque tōmengā nānō nē emīñængā abæ tawæninque wæætē nē odōmongā baī bacæcäimpa,” ante Itota apænegacäimpa.

⁴¹ Ayæ apænedinque, “Bitō tōniñacā wædænque wënæ wënæ cæcä iñongante bitō guiquēnē nangui bitō wënæ wënæ cædinō ante wædāmaī inōmi inte tōmengā ingante quīnante piinte ānewēmii. Iñæmpa tōmēmi awinca gāānē awæmpa wææ ongompa, ante adāmaī inte baī cæbipa tōō. ⁴² Tōmēmi awinca gāānē awæmpa wææ ongompa, ante bitō adāmaī inte bitō tōniñacā ingante, ‘Biwi, bitō awinca guiyā mæ owo baī ate æ wimōmoe,’ ante edæ abipa ænguīmii. Iñæmpa bitō nē wadō tedete wadō

cædōmi inte edæ tōmēmi awinca gāānē wææ ongompa tāno wido cæte ate edonque adinque bitō tōniñacā awinca guiyā owodō æncæbiimpa,” ante Itota angacäimpa.

Awæ æbānō iwæ, ante tōmenca bete eñengæimpa, ante

(Mäateo 7.17-20, 12.33-35)

⁴³ Ayæ godōmenque apænedinque Itota, “Waincawæ incæ ædō cæte baaca incaquīi. Wæætē wiwa iwæ incæ ædō cæte wainca incaquīi. ⁴⁴ Awæ æbānō iwæ, ante eñencæte ante mōnō tōmenca tā Pete bete eñengæimpa. Iigowæñeca æncæte ante waodāni dicæ daa mongæwāa edæ tā Pete ænāniyaa. Yowemō æncæte ante waodāni dicæ daa-camēña tā Pete ænāniyaa. ⁴⁵ Mōnō waocabo iñōmō adobaī inōmō inte cæmompā. Mīmōnē mōnō pōnēmāmo eyede tate baī tao godedinque mōnō mānimāmoque ante pōnēninque tedemompā. Waocā nē waa cæcä guiquēnē waa pōni tōmengā nānō pōnēnō ante entawēninque waa tedecampa. Nē wiwa cæcä guiquēnē tōmengā nānō wiwa pōnēnō ante entawēninque wiwa tedecampa,” ante Itota apænegacäimpa.

Nē mæñōna ante

(Mäateo 7.24-27)

⁴⁶ Ayæ godōmenque apænedinque, “Mīnitō iñōmō botō imote, ‘Awēnē, mōnitō Awēnē imipa,’ ante tedemīni incæte botō ānō ante quīnante wīi eñente cæmīnii. ⁴⁷ Nōwo iñōmō edæ apænebo eñēedāni. Botō gāmæñō ponte eñēninque waocā botō ānō ante do eñente cæcä iñōmō tōmengā iīmaī ingampa. ⁴⁸ Waocā adocanque oncō mænoncæte ante guībæ ææ wodinque dicaboga mænoncæte ante gōnongā baī nē eñente cæcä iñōmō adobaī cæcä ingampa. Tōmengā oncō tæi mænonte ongō ininque æpæ āninque quingæ pō incæte oncō ædō cæte wancæ wancæ cæquīi. Iñæmpa tæi mænonte ongompa. ⁴⁹ Wæætē waocā guībæ ææ wote gōnōnāmaī yabæque oncō mænongā ate yabæque mæñōiñōmō æpæ

āninqe pō ate oncō dobæ bogo cæte tæ wææninqe æmæwo gopa. Botō apænebo ēñēninqe waocā nē ēñēnāmaī cæcā iñōmō tōmengā nē yabæque mænongā bai inte ocāi incadāmaī inte bai ēñēnāmaī cæcampa,” ante Itota iinqe apænegacāimpa.

7

Capitāo ingante nē cæcā ingante Itota cæcā waa bacampa

(Māateo 8.5-13)

¹ Ayæ tōmēnāni inānite iinqe apænedinqe Itota Capēnaōmō nāni quēwēñōmō gogacāimpa. ² Māniñōmō quēwēninqe odōmāno tontadoidi awēnē capitāo ingante nē cæcā iñōmō wēnæ wēnæ badinqe æmæwo wæncæ cæcā ingantapa. Awēnē capitāo ingante nē cæcā iñongante awēnē wæætē tōmengā ingante nanguī waadecantapa. ³ Iinqe, Itota waa cæcā ingampa, ante māmō apænedāni ēñēningā inte tontado capitāo iñōmō oodeoidi inānite nē aadāni nāni Picæncabo inānite apænedinqe, Mīnitō Itota weca godinqe tōmengā ingante āmini ēñente pōninqe tōmengā wæætē botō imote nē cæcā ingante cæcā waa bacæcāimpa. ⁴ Angā ēñente godinqe nē aadāni nāni Picæncabo guiquēnē Itota weca pōninqe tōmengā ingante nanguī ānānitapa.

—Mōnō oodeocabo iñōmonte māningā tontado capitāo iñōmō mōnō imonte waa cæcampa, ante wædinque bitō tōmengā beyæ waa cæcæbiimpa. ⁵ Tōmengā iñōmō mōnō oodeocabo iñōmonte waadete cædinque, Wængonguī apæncā nāni ēñente yewæmongainta ate mīnitō odōmōincō impa, ante do mænonte pōnongā æmompā cæbii.

⁶ Anāni ēñēninqe Itota nē aadāni nāni Picæncabo tōnō wadæ gocantapa. Oncō obo pōñōnānite tontado capitāo iñōmō tōmengā guidēnāni inānite, Go bee tēninqe botō beyæ Itota ingante iīmaī ante apæneedāni, angantapa. “Awēnē ee ongōe. Botō waēmō imopa diyæ bitō botō oncōnē

pō guiquīmii, ante capitāo bitō imite angampa,” ante apæneedāni, angā ponte apænedānitapa. ⁷ Ayæ adobāi, “Botō wīi waēmō inōmo inte edæ bitō weca pōnāmaī intabopa. Incæte bitō adoyōmō ongōninqe āmi iinqe botō imote nē cæcā waa bacæcāimpa. ⁸ Bitō iñōmō Awēnē Wængonguī ingante nē ēñente cædōmi imi bai botō adobāi wacā awēnē ingante nē ēñente cæbo imopa. Iinqe botō awēnē ēabo inte botō awēnē beyænque āmo ēñēninqe tontadoidi wæætē guīñente wædinque botō anō ante cædānipa. Iinqe adocanque ingante botō, Goe, āmo ēñēninqe edæ do gocampa. Wacā ingante, Pōe, āmo ēñēninqe edæ do pongampa. Ayæ botō imote nē cæcā ingante, Cæe, āmo ēñēninqe edæ do cæcampa.” Mānōmainō ante Itota ingante botō beyæ ante apænemīni ēñengædāni, ante tontado capitāo iñōmō tōmengā guidēnāni inānite angā godinqe tōmēnāni wæætē capitāo nānō anō bai ante Itota ingante adodō ante apænedānitapa.

⁹ Mānōmainō ante tontado awēnē beyæ apænedāni ēñēninqe Itota wæætē, Māningā tontado awēnē iñōmō waa pōni ēñengampa, ante wædinque godongāmæ ongōnāni inānite,

—Nāwangā amopa. Mōnō idægocabo iñōmonte māningā wede pōnengā ingā bai adocanque incæ edæ dæ angā awædō, angantapa.

¹⁰ Ayæ nē bee tencæ pōnināni oncōnē wadæ gote ayōnāni capitāo ingante nē cæcā iñōmō do waa bacā agadānimpa.

Æmæwo wæningā ingante Itota angā nāni omcæmongampa

¹¹ Itota iñōmō iimō ate Nāino nāni quēwēñōmō gocæte ante goyongante tōmengā nānō nē ēmiñænāni tōnō wadāni nanguī ināni godongāmæ gogadānimpa. ¹² Māniñōmō yabædemō obo pōñongā onguiñægā æmæwo wæningā ingante næænte pōnānitapa. Tōmengā badā owæmpoingā inongā inte tōmengā wengā adocanque wængā

wædinque pongantapa. Ayæ mǎniñmō quēwēnāni nanguī ināni wāānā tōnō godongāmæ pōnāni acantapa. ¹³ Wāānā ingante adinque Itota tōmengā tōnō guēa wæwente bai pōnēninque,

—Wædāmaī iē.

¹⁴ Āninque do wæningā ingante tōmēnāni nāni daga wenguimpa gāānē ponte gampocā ate nē næænīnāni næ gongæñānitapa. Itota iñōmō,

—Edēnīmi, bitō imite āmopa. Ængæ gantie, angantapa.

¹⁵ Ēñēninque nē wæningā incæ ængæ gantidique tæcæ tedecā adinque Itota wāānā ingante pædæ godongā ængantapa. ¹⁶ Itota mǎnōmaī cæcā adinque tōmānāni nanguī guīñente wædinque Wængonguī ingante watapæ apænedinque,

—Wængonguī beyæ nē apænecā tæī ēmongā inongā inte mōnō weca a on-gongā amompa, ānānitapa.

Ayæ,

—Wængonguī quīmō iñōmonte Wængonguī incæ mōnō weca ponte godongāmæ cæcampa. Nāwangā impa, ante nanguī todānitapa.

¹⁷ Ayæ Oodeabæ tōmāo quēwēnāni inānite wayōmō gomonga quēwēnāni inānite māo gode ā gode ā cæte, Itota æbānō cæcāā, ante apænedāni ēñengadānimpa.

Wāo tōmengā miñæ nē goda inate da pōnongā pōnapa

(Māateo 11.2-19)

¹⁸ Wāo miñæ nē godāni adobai, Itota æbānō cæcā ingāā, ante ēñēninque Wāo ingante māmō apænedāni ēñengantapa. Mānīnō ante apænedāni ēñente wædinque Wāo iñōmō tōmengā miñæ nē goda mēnaa inate āñecā pōnatapa. ¹⁹ Pōna adinque Wāo tōmēna inate, Mīnatō mōnō Awēnē weca godinque botō beyæ ante iīmaī ante āeda, angantapa. Awēnē ēñēmi. Bitō iñōmō dodāni nāni, Nē Ponguingā, angāimi adobi imitawo. Wæætē tōmēnāni nāni nē angāimi ināmaī imi ininque bitō wæætē, Wacā ponguingā, ante

wānō cōedāni, āmitawoo. Æbānō mōnitō cæquīmōnii, ante botō beyæ ante ēñencæte ante āeda. Ante Wāo mēnaa inate Itota weca da godongā godatapa. ²⁰ Godinque Itota weca pōninque iīmaī ante apænedatapa.

—Wāo æpænē nē guidōnongā iñōmō mōnatō imōnate da pōnōninque bitō imite iīmaī angampa. Awēnē ēñēmi. Dodāni nāni, Nē Ponguingā, angāimi bitō iñōmō adobi imitawo. Wæætē tōmēnāni nāni angāimi ināmaī imi ininque bitō wæætē, Wacā ponguingā, ante wānō cōedāni, āmitawo. Æbānō mōnitō cæquīmōnii, ante ēñencæte ante Wāo mōnatō imōnate da pōnongā pontamōnapa, ānatapa.

²¹ Māniñedē incæ daicawo gawænāni tōnō wēnæ wēnæ inte wæwēnāni nanguī ināni inānite Itota godō waa cæcā waa badānitapa. Wēnæidi nē wīwa ēwocadāni inānite tōmengā wido cæcā ate waodāni nanguī ināni waa badānitapa. Babetamōnāni nanguī ināni inānite tōmengā gampomongā waa bamōnānitapa. ²² Ininque mǎnōmaī cæcā waa ayōnate ñōwo pōna inate Itota,

—Botō godō cæbo ate babetamō inīnāni incæ do adāni amīnapa. Cōmante inīnāni incæ waa bate dao dao godāni amīnapa. Baate inīnāni incæ ñōwo æmontai waēmōntai baadāni amīnapa. Babetamonca ināni iñōnānite botō godō cæbo ate onōmonca ēñēnāni badāni amīnapa. Do æmæwo wænte onōnāni iñōnānite botō godō cæbo ate ñāni omæmonte quēwēnāni amīnapa. Ōmaadāni inte wæwēnāni inānite botō Wængonguī Awēnē pōnō waa cæcæcāimpa, ante watapæ apænebo ēñencædānimpa. Ininque mīnatō ponte ēñēñōmīna botō æbānō apænebo ēñēmīnatawo, ante ayæ, Botō æbānō cæbo amīnatawo, ante mīnatō ñōwo wæætē Wāo weca gote māo apænemīna ēñengāeda, angantapa.

²³ Ayæ, “Botō beyæ waocā wīi piinte wadæ gocā iñōmō tōmengā nānō watapæ toquinque oda cædāmaī incæcāimpa, ante Wāo ingante māo

apænemina eñencæcäimpa,” ante Itota angantapa. ²⁴ Angä eñëninque Wäo beyæ nê änina wadæ goda adinque Itota wæætë godongämæ ongönäni inänite, Wäo æbänö ingää, ante apæ necantapa. “Minitö guiquënë quinä acæte ante önömæca gominitapa. Cæwipa woboyæ pæmænte ate æmænö ædæ æmænö ædæ gobaingä ingante minitö dicæ acæ gominitawogaa. ²⁵ Ìninque edæ quingänö ingante acæte ante gominitapa. Edæ waocä weocoo waëmoncoo mongænongä ingante minitö dicæ acæ gominitawogaa. Ìñæmpa weocoo waëmoncoo nê mongænäni ìñömö nämanque ante pönente nâni ænte mäincoo beyæ ante nê towënäni inte tömënäni ìñömö awënë oncönë quëwënäni apa quëwënänii. ²⁶ Ìninque edæ quinänte gominitawo. Minitö mini nê go acæ cædongä ìñömö edæ Wængongui beyæ nê apænecä ingantawo. Näwangä impa. Wængongui beyæ nê apænecä Wäo ingampa. Incæte tömengä wii Wængongui beyæ nê apænecä gainäni bai inongä inte godömenque nangui cæcä ingampa, ante apænebo eñëmaiminipa. ²⁷ Wængongui iimaï angampa, ante yewæmongatimpa.

‘Botö beyæ nê apænecä ingante da godömo godinque tömengä taadö täno beyænte bai cæcæcäimpa.

Tömengä bitö Codito imi beyæ ante taadö waa pinonte bai waa cæcæcäimpa.’

Mänömainö ante dodäni adocä Wäo ingantedö ante pönëninque yewæmongadänimpa. ²⁸ Nöwo ìñömö ämo eñëedäni. Ìmæca mini eñagancabo ìñöminite æpænë mönö nê guidönongä Wäo adocanque ñænængä ìñongante wacä tömengä bai edæ dæ angampa. Incæte Wængongui Awënë Odeye nempo quëwënäni ìñönäni adocanque guiyangä pönä ingä incæte Wäo pönömenque wædangä ingampa,” ante Itota apænecantapa.

²⁹ Itota mänömainö ante apænecä nê eñënäni ìñömö odömäno awënë beyæ nê æwënäni incæ wadäni incæ tömänäni Wäo nänö nê guidongainäni inönänimpa. Ìninque tömënäni, Wængongui nö cæcä ingampa, ante tömänäni apænedänitapa. ³⁰ Paditeoidi tönö idægoidi nâni wææ angainö ante nê ate eñënäni guiquënë Wäo nänö guidongainäni inämaï inönänimpa. Ìninque tömënäni guiquënë Wængongui gämænö ponguënänäni incæte edæ Baa änänitapa.

³¹ Godömenque apænedinque Itota iimaï angantapa. “Mänömaï ì ìninque inguipogaque ante nê quëwënäni ìñömö quingämë bai inänipa. Quiëmë bai edæ quëwënänipa. ³² Wëñænäni mönö godonte æññömö tæ contate owempodäni nâni owempodö bai edæ adobai cædänipa, ante awædö. Wëñænäni nâni owempote cæcabo incæ ææmæ cæte bai owempote cædinque wadäni inänite aa pedänipa. ‘Minitö beyæ ööña we we ööñömöni minitö wæætë edæ äwadämaï iminitapa töö,’ ante owempodinque wëñænäni piinte tedewënänipa. Ayæ wæætë, Waocä do wængä ate nâni wæbai, ante wëñænäni nâni owempote cæcabo ìñömö, ‘Mönitö Ca ca wæyömöni minitö wæætë edæ wædämaï imini wæmönipa,’ ante piiniquæ aa pedäni bai ñowodäni ìñömö edæ adobai piinte tedewënäni inänipa.”

³³ “Edæ iimaï impa. Wëñænäni nâni wædö bai Wäo æpænë mönö nê guidönongä ìñömö cængui cænämaï yowepæ biinömæ nâni wædænque ti nämæ bedämaï ponte quëwëñongante minitö guiquënë, Wënæ tönö Wäo quëwengampa, ante piiminipa. ³⁴ Ayæ wæætë botö Waobo eñagaimo inte tömäa cængui cænte yowepæ biinömæ bete minitö weca ponte quëwëñömote minitö guiquënë, Cæowæobi inte cæmipa. Beowæobi inte bebipa, ante badete tomäni. Ayæ godömenque, Odömäno awënë beyæ nê æwënäni tönö wadäni

nē ēñēnāmaī cædāni iññōnānite bitō tōmēnāni æmigo imipææ, ante botō imote pīlinique mīnitō wēñænāni nāni pīinte aa pedō baī ānewēmīnīpa tōō.
³⁵ Incæte, Nē nō ēñēnāni iññōmō nō cædānīpa, ante adīnque, Nāwangā nō ēñēnānīpa, ante mōnō ēñengæīmpa,” ante Itota apænegacāīmpa.

Paditeocā Timōnō oncōnē Itota go guīte ēñacampa

³⁶ Ayæ ate adocanque Paditeocā incæ Itota ingante, Botō oncōnē pō cæe, angā Ao ante Paditeocā oncōnē godīnque pō guīte cæ congantapa. ³⁷ Tōmēnāni quēwēñōmō onquiyængā nē wēnæ wēnæ cæte quēwengā īnongāīmpa. Tōmengā iññōmō, Paditeocā oncōnē Itota cæncongampa, ante tededāni ēñēnīnque oguī wapæ dica adabatodo waincadedē pe ñīñænte næænte pongantapa. ³⁸ Pō guīdīnque tōmengā Itota ōnōwaca īnō pō næ gongæīnque Ca ca wæcantapa. Ca ca wæyongā Itota ōnōwaca īnō ōmæ petæ petæ wææ aa bee adīnque onquiyængā wæætē tōmengā ocaguīncooca wadæ cæwacantapa. Ayæ queē bewadīnque oguī wapæ gao cæwacantapa. ³⁹ Mānōmaī cæcā adīnque, Pō cæe, nē āningā īnte Paditeocā iññōmō nāmāneque pōnēnīnque, “Itota iññōmō Wængonguī beyæ nē apænecā īnte baī tōmengā, Æcānō botō imote gampocāā, ante ayæ, Quīēmē baī onquiyængā īngāā, ante ēñencædongāīmpa. Īñæmpa nē wēnæ wēnæ cædongā īngampa, ante do ēñencædongāīmpa.” ⁴⁰ Ante pōnēñongā Itota wæætē,

–Timōnō, bitō imite adodeque apænebo ēñēe.

Āñongante Paditeo wæætē,

–Ao, nē Odōmōmi īmi, apænebi ēñēmoe.

⁴¹ Angā īnīnque Itota,

–Onguīñængā adocanque nē godōwengā īnte quēwēñongante onguīñæna mēnaa īnante godongā ate debe badapa. Adocanque īngante nanguī quīnīento ēmō godongā

ate nanguī debe bayongante wacā īngante wædænque tīncoenta ēmō godongā ate wædænque debe bacampa. ⁴² Nē godōningā nānō ānīmpota ōmæpoda īnte tōmēna, Ædō cæte wæætē adodō pōnonguīmōnaa, ante wæyōnate nē godōningā iññōmō edæ, Ōmæpomīna īnte mīnatō ædō cæte adodō pōnōmīna ænguīmoo, ante botō ænāmaī īnte ñīmpo cæcæboīmpa, angampa. Īnīnque Timōnō bitō imite āmopa. Mēnaa īnate ñīmpo cæte ānāmaī īngā adīnque nē godongā īngante æcānō godōmenque nanguī waadete pōnengūngāā, ante pōnēmīi.

⁴³ Āñongante Timōnō,

–Wa. Godōmenque nanguī ēmō debe īngā iññōmō tōmengā wabānō godōmenque waadete pōnengā īmaīngampa, āmopa.

Angā ēñēnīnque Itota,

–Nāwangā ante pōnēmīpa.

⁴⁴ Ānīnque Itota onquiyængā gāmænō dadi ēmænte adīnque Timōnō īngante apænedīnque,

–Īngā onquiyængā īngante edæ abi. Botō bitō oncōnē pō guīyōmote bitō, Mēwaquīmæ, ante bitō dica pōnōmīyaa. Tōmengā guīquēnē ōmæ wææmōnte aa bewadīnque tōmengā ocaguīnca wadæ cæwacā ae. ⁴⁵ Bitō guīquēnē waadedāmaī īnte queē bemōnāmaī iññōmīte tōmengā iññōmō botō pō guīyedē tāno queē bewadīnque cōwē queē bewacā ae. ⁴⁶ Bitō guīquēnē oguīngūipæ gao cæcadāmaī iññōmīte tōmengā iññōmō oguī wapæ gao cæwacā ae. ⁴⁷ Īnīnque botō, Tōmengā mānōmaī cæcampa, ante odōmōnīnque bitō imite āmo ēñēe. Edæ tōmengā nanguī wēnæ wēnæ cæcā īñongante Wængonguī godō ñīmpo cæcā ate tōmengā wæætē nanguī waadete pōnengampa. Bitō iññōmō edæ wædænque wēnæ wēnæ cæbi iññōmīte Wængonguī pōnō ñīmpo cæcā ate bitō wæætē wædænque waadete pōnēmī abopa.

⁴⁸ Ānīnque onquiyængā īngante apænedīnque Itota,

—Wēnæ wēnæ bitō cædinō ante pōnō ñimpo cæbo æe.

⁴⁹ Angä eñēninqe wadāni godongāmæ cæ cōnāni guiquēnē godō wæntæ wæntæ āninqe,

—Īngä iñōmō edæ waocä wēnæ wēnæ nānō cædinō ante, Pōnō ñimpo cæbo æe, ante nē angä iñōmō edæ æcānō ingää.

⁵⁰ Ante wædinque tedeyōnāni Itota iñōmō onquiyængä ingante,

—Bitō wede pōnēnō beyænque quēwencæbiimpa. Ñōwo edæ wædāmaī inte goe, angacāimpa.

8

Itota beyæ, ante onquiyænāni godongāmæ cædānīpa

¹ Ayæ ate Itota nanguī ināni nāni quēwēñōmō wayōmō wædænque ināni nāni quēwēñōmō wayōmō wayōmō godinque, Awēnē Wængonguī Odeye nempo watapæ quēwencæminimpa ante waa apænecä eñengadānimpa. Ayæ tōmengä tōnō dote ganca ināni mānimpodāni godongāmæ godānitapa. ² Ayæ onquiyænāni adobaī Itota miñæ godānitapa. Tōmēnāni pancadāniya wēnæidi nē wīwa ewocadāni tōnō nē quēwengaināni iñōnānite wadāni nantate wæwengaināni iñōnānite Itota cæcä ate tōmānāni do waa badīnāni inte ñōwo tōmengä miñæ tee empote godāni inōnānimpa. Adocanque Mäadiya Mäagadadēnā nāni angaingä tōmengä baonga wēnæidi tiæte ganca ināni tao godāni ĩninqe tōmengä ōnonganque badīngä inte Itotaidi tōnō godinque pōnō cæcä ĩnongāimpa. ³ Wacä onquiyængä Wäönā nānōogængä Tiota guiquēnē Edode nānō ēadīncoo nē aacä ĩnongante Wäönā iñōmō Totānā tōnō ayæ wadāni onquiyænāni nanguī ināni tōnō adobaī Itotaidi tōnō godongāmæ godinque pōnō cædōnānimpa. Tōmēnāni nāni ēadīncoo incæ ænte pōninqe Itotaidi beyæ ante pōnō cædōnānimpa.

Waocä nānō quiyadō ante Itota odōmonte apænecampa

(Mäateo 13.1-9; Mäadoco 4.1-9)

⁴ Nanguī ināni wayōmō nāni quēwencabo wayōmō nāni quēwencabo bacoo ināni godongāmæ ponte a ongōñōnānite Itota apænecantapa. Wængonguī nānō apænedō ante waodāni æbānō eñēnāni, ante eñencædānimpa, ante inguipoga quēwēnāni nāni cæinō ante ĩmāinō ante apænecantapa. ⁵ “Waocä nē quiyadongä iñōmō quiyacæ go-campa. Gote quiyayongä pancamonga taadō iñōmō wææmompā. Taadō wæænte eyepodimō ōñōñonte pinā gāwadāni ædō cæte pæquī. Ayæ ayamōidi pōninqe dobæ ade cænānīpa. ⁶ Pancamonga guiquēnē dicamontaa iñōmō wææninque pæquīnāmaī gä æidinqe oguimento guiwapa pæquī. Guiwadāmaī inte edæ guingo icadinqe tōmencaguī nāñe wæncaguimpa. ⁷ Pancamonga guiquēnē ōmentacodē nānō eyepodimō iñōmō pæquīnāmaī tā bocate gä æiyonte ōmentacoo adoyōmō pō incootonque ganta cæca ate nāñe wæmpa. Wampo incapa pæquī. ⁸ Wæmonguipoga quiyadimō guiquēnē tā bocate waa pædinque tōmēmō tiēē ganca mānimpomō nanguī pōnī incapa. Quiyacä nānō quiyadō ante edæ botō māninqe ante apænebopa.”

Mānōmāinō ante apænedinqe Itota ogæ tededinqe, “Ēamonca ongonte edæ eñēedāni,” angacāimpa.

Ōnōmonque eñente pōnēnāmaī inānīpa, ante

(Mäateo 13.10-17; Mäadoco 4.10-12)

⁹ Tōmengä miñæ nē godāni iñōmō, Itota eñēmi, ānānitapa. Mānīnō ante apænedinqe bitō æbānō ante odōmoncæte ante apænebitawo. ¹⁰ Añōnānite tōmengä, “Wængonguī Awēnē Odeye nempo æbānō quēwenguī, ante mīni waocabo wēēnēñedē mīni eñēnāmaī ingainō ante botō ñōwo edonque pōnō apænebo ate mīnitō adomīnique eñēmīni

imīnīpa. Wæætē wadāni inānite edæ botō inguipoga quēwēnāni nāni cæinonque ante odōmōnīnque apænebopa. Edæ tōmēnāni, Aw- incaque adīnque wīi ædæmō adāni inte onōmoncaque ēñēnīnque ædæmō ēñēnāmaī incædānīmpa, ante dodāni Wængonguī beyæ ante nāni yewæmongainō baī iīnque bacæīmpa, ante botō tōmēnāni inānite mǎnōmāinonque ante apænebopa,” ante Itota apænegacāīmpa.

Quiyacā nānō cæinō ante pōnente iīmāinō ante ēñengæīmpa
(Māateo 13.18-23; Māadoco 4.13-20)

¹¹ Itota ayæ godōmenque apænegacāīmpa. “Botō nē quiyacā nānō cæinō ante apænedīnque iīmāinō ante odōmoncæte ante apænetabopa. Tōmēmō quiyadīmō iñōmō Wængonguī nānō apænedō baī īmpa. ¹² Taadō wæænte onōmō botō ānōmō guiquēnē nē ēñēnāni baī īmpa. Tōmēnāni Wængonguī nānō apænedō ante tæcæ ēñēñōnānite wēnæ awēnē pōnīnque, Quēwēnāmaī incædānīmpa, ante cædīnque Wængonguī nānō angāinō ante ō ængā īnīnque tōmēnāni ōmætawēnāni inte ædō cæte pōnente quēwenguīnānīi. ¹³ Dicamontaa wæænte pædīmō baī ināni guiquēnē Wængonguī nānō apænedō ante watapæ ēñente todīnque nē Ao ānāni inānīpa. Tōmēnāni iñōmō oguīmento guīwadāmaī baī ināni inte wantæ iñō pōnēnāni ate tōmēnāni nāni pōnēnō beyæ ante wadāni pīinte cædāni ate tōmēnāni wæætē guīñente wædīnque ēmō cæte godānīpa. ¹⁴ Ōmentacodē wæænte pædīmō baī ināni guiquēnē tōmēnāni ēñēnīnque godōmenque quēwēñōnāni inguipoga quēwente quīēmē beyænque mōnō wæpāmo pō ate guīñente wædīnque pædāmaī inānīpa. Māincooque beyæ ayæ ōnonque towente nāni wædō beyæ tōmēnāni ōmentacoo incootonque ñā caate baī cæ īnīnque edæ wampo encadānīpa pæquīnānīi. ¹⁵ Onguīpoga wāinguīpoga quiyadīmō baī ināni guiquēnē tōmēnāni nō pōnente waa

cæte quēwēnāni inānīpa. Tōmēnāni iñōmō edæ Wængonguī nānō apænedō ante ēñēnīnque do bæi ongonte wede pōnēnāni inānīpa. Wæntæye ināmaī ināni inte tōmēnāni ee cædīnque tōmēwæ incate baī waa cædānīpa. Botō mǎnōmāinō tōmānō ante odōmoncæte ante nē quiyacā nānō cædō ante apænetabopa,” ante Itota apænegacāīmpa.

Gongapæncade, ante odōmonte apænegacāīmpa
(Māadoco 4.21-25)

¹⁶ Ayæ, “Gongapæncade tī wodōnodīnque waodāni dicæ owætadē boo cæcadānīyaa. Mōimoga ænōmengadæ inō dicæ concæcadānīyaa. Wæætē, Māniñōmō nē pō guīdāni acædānīmpa, ante cædīnque gongapæncade awæmpa æmongapaa concædāni ñāō bæco adānīpa. ¹⁷ Quiēmē ante wē wodonte ī iñōmō mǎnīnō tōmānō ante iīncayæ ate edonque ate baī ēñengæīmpa. Quīnō ñōwo bee ocate baī ī incæ mǎnīnō tōmānō iīncayæ ate wī æncate baī iñonte edonque acæīmpa,” ante Itota apænegacāīmpa.

¹⁸ Ayæ, “Nē ēacā ingante godōnāni ængā baī nē ēñengā ingante godō apænebo ēñente entawēnīnque tōmengā godōmenque ēñente bacæcāīmpa. Nē ēadāmaī ingā guīquēnē tōmengā, Ēabopa, ante pōnēnīnque nānō wædænque pōnī ēadīncoo iñonte ō ænāni wæcā baī nē ēñēnāmaī ingā adobaī tōmengā, Entawēmopa, ante pōnengā īnīnque wædænque pōnī nānō entawēnō iñonte edæ ō ænte baī cæbo dæ ba ate wæcæcāīmpa cæmīnīi. Ēamonca ongonte ēñenguēnē quēwēmīnīi,” ante Itota apænegacāīmpa.

Itota wāānā tōnō tōmengā biwīdi pōnānīpa
(Māateo 12.46-50; Māadoco 3.31-35)

¹⁹ Māniñedē tōmengā wāānā tōnō tōmengā biwīdi pōnīnque tōmengā weca guīcæte ante cæyōnāni wadāni goto ongōnāni ate wædīnque, Ædō cæte guīquīi. ²⁰ Ante wædāni adīnque wacā,

—Itota eñëmi. Bitö badä tönö bitö biwīidi bitö ĩmite ante oncodo ponte yabæque ongönänipa cæbii.

²¹ Ante apænecä eñëninque Itota,

—Wængongui nänö änö eñëninque nē eñente cædāni ĩñömö tōmēnāni botö badä bai botö tōniñadāni bai ĩnänipa, angacäimpa.

Itota angä eñente woboyæ æpæ næ gongæmpa

(Mäateo 8.23-27; Mäadoco 4.35-41)

²² Mäniñedē tōmengä miñæ nē godāni ĩnänite Itota,

—Gäwapæ æmæmäa taocæimpa.

Angä eñente cædinque tōmengä tönö wipodē guidinque tæcæ taocæ wogaa godänitapa.

²³ Tao wogaa goyönāni Itota wipodē näñe ñongæninque edæ mö ñongantapa. Mänömaï mö ñöñongä goyönänite woboyæ nangui pōni pæmæninque edæ æpæ mængonta mængonta pōninque wipodē baguimæ guii adinque tōmēnāni, Æpæ bete wængui wæ, ante Yæ wædänitapa. ²⁴ Itota weca gote, Ömæmoncæcäimpa, ante tao cædinque,

—Awënë, möni Awënë, eñenguënë quëwëe. Bete wæncæ cæmompæ cæbii.

Änāni ñāni ömæmonte ængæ gantidique, Woboyæ æpæ idæwaa mængonta cæbipa. Næ gongæmäwe, angä. Næ gongæninque ñancæ ñancæ gongæmæmpa. ²⁵ Ayæ tōmēnāni ĩnänite,

—Mīni pönëgade incæ quīnante wīi pönëmīni.

Äñongante tōmēnāni ancai guīñëninque, Æbänö anguimöö, ante nāmāneque tedegadänimpa.

—Īngä ĩñömö æcänö ĩngä inte mänömaï angä eñëninque woboyæ incæ æpæ incæ næ gongæmpa, ante wæmönipa, ante tedegadänimpa.

Guedatabæ ĩñömö wëncæ inte nē enemocä

(Mäateo 8.28-34; Mäadoco 5.1-20)

²⁶ Mänü Gadideabæ emö cæte godinque Itotaidi æmæmäa wogaa tao godinque Guedatabæ pö ti

wæænänitapa. ²⁷ Wipodē manta wo cæyönāni Itota ti wæænte tæcæ ömaa goyongante onguīñængä wënæidi tönö nē quëwengä ĩñömö mämö bee tengantapa. Īngä ĩñömö tōmēnāni quëwëñömö nē quëwengaingä inte ñöwo wantæpiyæ oncönē quëwënämaï inte ömaacä quëwëninque waodänidoque cōwë quëwengä ĩngäimpa. ²⁸ Itota ingante adinque tōmengä önöwa ĩnö ædæ wææninqe edæ Yæ angantapa.

—Itota eñëmi, bitö Æibæ Quëwengä Wængongui Wëmi ĩnömi incæ quimæ botö weca pōwëe. Botö ĩmote edæ, Ämogate wæcæcäimpa, ante cædāmaï ĩmäwe, ante nangui angantapa.

²⁹ Edæ tæcæ pōñongante tōmengä wentamö nänö nē ewocadongä ingante Itota, Gobäwe, ante do angä eñente wædingä inte ñöwo mänömaï angantapa. Mänü wënæ ĩñömö wantæ wantæ ĩñonte onguīñængä ingante bæi ongonte bai cædongäimpa. Īninque mäningä onguīñængä ingante waodāni daagömenca edæ eno pönö goto wimænte wææ eno pönö goto wiwadinque wææ wänönönänimpa. Incæte tōmengä daagömē wangö ñæ wangö ñæ cædongäimpa. Ayæ tōmengä ingante wënæ wæætē wæætē da godongä önömæca wodii winonte quëwëningä inte adocä ñöwo Itota weca ponte angacäimpa. ³⁰ Angä eñëninque Itota wæætē,

—Æmömidö ĩmii.

Äñongante,

—Botö emöwo Deguiönö emömopa, angantapa.

Edæ tontadoidi Deguiönö nāni änoncabo bacoo ĩnāni bai botö nē enempodāni adobai wënæidi bacoo ĩnänipa, ante adinque, Deguiönö emömopa, ante onguīñængä angantapa. ³¹ Wënæidi guiquënë Itota ingante wæætē wæætē äninque, Mönitö ĩmönite tadömengadænguipoga wido cædāmaï ĩmäwe, ancaa änänitapa.

³² Mäniñömö odæ wængänäidi nangui ĩnāni änanquidi a cængönāni adinque, Īñömö odæ wængänä baönē ämi go guite quëwënguimöni, änāni

ēñēninque Itota, Ao angä. ³³ Eñēninque waocä baönē quēwente tao godinque wēnæidi odæ wængänä baönē wæætē go guiidāni ate odæncato wæætē ontadāa wæænōmēmō iñōmō gāwapæno pogodo wæi guiite becadote capo wængadānimpa.

³⁴ Itota mänōmaï cæcä ate wædinque odæ wængänäidi nē aadināni guiquēnē pogodo wodii winonte tōmēnāni quēwēñōmō māo bee tente apænedinque idōmæ māo gode ä gode ä cæte, Itota mänōmaï cæcä wæmōnipa, ante apænedānitapa.

³⁵ Eñēninque wadāni wæætē, Æbänō cæcäi, ante acæte ante pōnānitapa. Itota weca ponte ayōnāni wēnæidi tōnō nē quēwēningä incæ ñōwo ōnonganque bate weocoo eñacä inte Itota ōnōwa gäänē eñēē congä adinque guiñente wængadānimpa.

³⁶ Wēnæ tōnō quēwēningä ingante Itota mänōmaï cæcä ante nē adināni iñōmō ñōwo pōnāni inānite, Mänōmaï cæcantapa, ante do apænedānitapa.

³⁷ Eñēninque Guedatabæ quēwēnāni tōmānāni ancai guiñente wædinque Itota ingante, Mōnitō weca quēwēnāmaï ñōwo gobāwe, änāni eñente wædinque tōmengä wipodē imæmäa poncæte ante guicä. ³⁸ Adinque wēnæidi tao godāni ate nē ōnonganque bate quēwengä iñōmō Itota ingante, Bitō miñæ māobi goboe, angä eñēninque Itota wæætē, Bitō ee quēwēmi, āninque,

³⁹ —Tōmēmi oncōnē adodō godinque, Wængonguï æbänō nanguï cæcä waa batawoo, ante māo apænebi eñencädānimpa.

Angä eñēninque oncōnē godinque tōmēnāni nāni quēwēñōmō tōmāo cægōninque tōmengä, Itota mänōmaï cæcä ate waa batabopa, ante māo apænecä eñengadānimpa.

Gaido wēñængä beyæ cæcæ goyongante

Itota weocoo onquiyængä gampocampa

(Māateo 9.18-26; Mäadoco 5.21-43)

⁴⁰ Itota imæmäa ocæ emænte pongä adinque, Æyedēnō ponguingä, ante nē wædināni inte tōmānāni tōmengä ingante waa ate togadānimpa.

⁴¹ Mäniñedē wacä oodeoidi odōmōincō awēnē inongä inte tōmengä emōwo Gaido iñōmō pō Itota ōnōwaca inō ædæ wææninque tōmengä ingante, Botō oncōnē quingæ pōe, ante nanguï angantapa.

⁴² Edæ botō wēñængä onquiyængä adocanque inongä inte dote wadepo nānō eñagai iñonte edæ wæncæ cæcampa cæbii, ante wæcantapa.

Īninque Itota tōmengä miñæ gocantapa. Idōmæ goyongante nanguï ināni goto goto pōninque wodo mō ñongæñāni wæcantapa. Wampo impa goquingä.

⁴³ Mäniñedē wacä onquiyængä pongantapa. Tōmengä iñōmō wantæpiyæ dote wadepo iñonte wepæ wantæ bidāmaï cōwē wææ wædinque waa bawēnencæte ante cædinque tōmengä quincōo tōmancoo eyepote pædæ godongä æninque dotodoidi æcāmenque incæ onquiyængä beyæ ædō cæte waa cæquinānii. ⁴⁴ Mänōmaï quēwente wædongä inte tōmengä ñōwo Itota ōnōñabæca inō pōninque tōmengä weocoo yæwedecooque godō gampo cæyongä wepæ iñontobæ edæ wantæ bitapa.

⁴⁵ Itota iñōmō edæ,

—Æcänō botō imote pōnō gampodāi.

Åñongante tōmānāni, Æcänō gampo-datawogaa, ante adoyōmō ante änāni ate wædinque Pegodoidi wæætē,

—Awēnē eñēmi. Bitō weca tōmānāni goto goto godāni apa ämii.

⁴⁶ Itota wæætē,

—Īñæmpa adocanque botō imote wede pōnēninque gampocantapa. Tæi piñænte botō entawēnō incæ edæ wacä beyæ cæquinque do gotimpa, ante wæwēnente awædō.

⁴⁷ Åñongante onquiyængä iñōmō, Ædō cæte wē womonguïmoo, ante pōnente wædinque do do wæate bai guiñēninque Itota weca ædæ wææncate tōmānāni ayōnānite apænedinque, Botō waa bawēnencæte

ante bitō ïmite pōnō gampotabopa. Tæcæ pōnō gampo cædinque waa babo ae. ⁴⁸ Ante apæ necä eñëninque Itota,

—Onquiyæmi eñëmi. Bitō wede pōnënō beyæ edæ wantæ bawënëmipa. Ñōwo edæ nō bawënëmi inte wampo pōnente waa goe, ante godō ædæmō apæ necantapa.

⁴⁹ Ante tæcæ apæneyongä oodeoidi odömōincō awënë Gaido oncōnë quëwengä mänïñedë pōninque edæ Gaido ingante apæ necantapa.

—Bitō wengä ïñōmō ñōwo æmæwo wængampa cæbii. Në Odōmongä ingante ñōwo bitō godōmenque änämaï incæbiimpa.

⁵⁰ Ante ñōwo pōningä Gaido ingante angä eñëninque Itota wæætë,

—Gaido, guiñënämaï ïe. Bitō wede pōnëmi adinque bitō wengä mïingä quëwencæcäimpa.

⁵¹ Äninque Itota godōmenque godinque awënë oncōnë pō guicæ cædinque Pegodo ingante Tantiago tönō Wäo ïnate wëñængä wæmpo tönō wäänä ïnate mänimpodänique ïnante ænte manguicä wäänë guiidänitapa. Wadäni ïnante wæætë wææ cæcä guiidämaï ïnänitapa. ⁵² Tömänäni Ca ca wædinque wëñængä wodi ingante ante pōnente wæwënäni adinque Itota tōmënäni ïnante,

—Ca ca wædämaï ïedäni. ïñæmpa ïñōmō wëñængä wodi edæ wii æmæwo wængantapa. Mō edæ ñongampa.

⁵³ Angä eñente wædinque tōmënäni, Æmæwo wænte öñongampa, ante do adinäni inte wæætë edæ, Antedö amini, ante tōmengä ingante badete todänitapa. ⁵⁴ ïninque Itota wëñængä ingante pædæ wææmpo bæi ongonte tōö æmæninque ogæ tædedinque,

—Wëñæmi, ængæ gantibi, angantapa.

⁵⁵ Äñongä tōmengä do wæningä inte ñäni ömæmonte quëwëninque ængæ ganticantapa. Itota wëñængä beyæ cænguï angä godōna cængantapa.

⁵⁶ Adinque mæmpoda, Æbänō cæte mänōmaï cæcää, ante guiñente

wædatapa. Incæte Itota wæætë, Botō æbänō cæboo, ante minatō wadäni ïnante apænedämaï incæmïnaimpa, angacäimpa.

9

Wængonguï Awënë ingantedö ante apæneedäni, ante Itota angä godänipa (Mäateo 10.5-15; Mäadoco 6.7-13)

¹ Tōmengä mïñæ në godäni, Dote ïnäni, näni änönäni ïnante Itota angä pōnäni ate, Botō në ämo inte botō tæï piñænō ante ñōwo pōnōmo ænte entawëninque mïnitō tæï piñæninque në ämïni bacæmïnaimpa. ïninque mïnitō ämïni ate wënæidi tōmänäni do gocædänaimpa. Adobaï ämïni ate wënæ wënæ inte wæwënäni waa bacædänaimpa. ² Mïnitō, Wængonguï Awënë Odeye inguipoga do pongäimpa, ante apænemini eñencædänaimpa. Ayæ wënæ wënæ ïnäni ïnante godō cæmïni waa bacædänaimpa, ante Itota mänimpodäni ïnante da godongä gogadänaimpa.

³ ïmaï angacäimpa.

—Mïnitō ömæpomini taadö goedäni. Ongonto incæ mäincoo da wenguincade incæ cænguï incæ godonte æinta incæ tōmancoo edæ ænämaï inte ömæpomini godinque edæ eñacoque eñate goedäni, angantapa. ⁴ Ayæ,

Godinque æcönënō tåno go guimïni owodinque mïnitō wayömō mïni go quëwenganca mänincönenque go guii go guii cædinque quëwëedäni.

⁵ Æyömömë goyömïnite wadäni, Pöedäni, änämaï inte mïnitō apænedö ante wii eñënäni wædinque mïnitō wæætë tōmënäni ïnante emō cæte ïmainö ante goedäni. Mïnitō ïñæmpa, Pöedäni, änämaï imini adinque mōnitō gomōni tamëñedäni, ante odōmoncæte ante mïnitō önōwa wadæ wadæ cæwadinque wadæ goedäni.

⁶ Angä godinque tōmënäni quëwëñömō wayömō tōmënäni quëwëñömō wayömō tōmäo godinque Itota nänö da godöninäni ïñōmō mōnō Awënë ingantedö ante mäo watapæ apænedäni eñënänitapa. Ayæ wënæ

wënæ inäni inänite godö cädäni ate waa bagadänimpa.

Itota æcänö ingää, ante Edode wæcampa

(Mäateo 14.1-12; Mäadoco 6.14-29)

⁷ Tömänäni mäniñedë, Itotaidi æbänö cädäni, ante tedeyönänite pancabaa awënë odeye Edode incæ do ëñengantapa. Itota iñömö æcänö ingää, ante wædinque pancadäniya, Wäö wodi do wænte ñäni ömæmönigä inte iingä Itota imaingampa, ante tededäni ëñente wædinque awënë Edode guiñente wæcantapa. ⁸ Wadäni guiquënë, Ediya wodi ponte a ongömaingampa, ante tedeyönäni wadäni guiquënë, Wængongui beyæ nê apænegaïnäni incæ adocanque docä incæ do ñäni ömæmönigä inte a ongömaingampa, ante tededäni. ⁹ Eñente wædinque Edode wæætë,

—Botö tömömo ämo ëñëninque Wäö wodi ingante wido tamencadäni wængantapa. Ininque mäningä Itota näni nê tededongä guiquënë æcänö ingää.

Ante wædinque Edode, Æbänö cæte Itota ingante aquimoo, ante nanguï cægacäimpa.

5.000 ganca inäni inänite Itota godongä cænänipa

(Mäateo 14.13-21; Mäadoco 6.30-44; Wäö 6.1-14)

¹⁰ Itota nänö da godöninäni iñömö tömengä weca adodö pöningue, Mänömaï mänömaï cætamönipa, ante nanguï tededäni ëñengacäimpa. Eñente ate tömengä tömënäni inänite nänënë Betaida eyequei ænte mäocä. ¹¹ Goyönänite wadäni do ëñëninque tee empote pönäni adinque Itota, Waa pömini abopa, ante waadete apænedinque, Minitö Wængongui Awënë Odeye nempo watapæ quëwencæminimpa, ante apænecantapa. Ayæ, Pancadäniya waa baquënëni inänipa, ante adinque tömengä godö cæcä ate waa badänitapa.

¹² Ayæ gawadecæ bayonte edæ, Dote, ante näni Itota miñæ go-cabo iñömö tömengä weca pöningue änänitapa.

—Iñömö önömæca impa cæbii. Bitö godongämæ ongönäni inänite ämi idömæ owodäni weca godinque ayæ nanguï inäni näni quëwëñömö godinque oncö eyepæ i ate cæninque moncädänimpa.

¹³ Añönänite Itota,

—Minitö wæætë godömïni cæncädänimpa. Añongante,

—Iñæmpa päö önompo æmæmpoque gæyæ mäa pöni mänimpoque nææmönipa töö. Ininque bitö wæætë, Tömänäni beyæ cængui gote ænte pödäni, ämitawoo.

¹⁴ Onguiñænänique tinco müido ganca inäni edæ mä ongönönänimpa. Incæte Itota tömengä miñæ nê godäni inänite angantapa.

—Minitö tömänäni inänite, Tincoenta ganca mini cabo nänënë tincoenta ganca mini cabo nänënë ämini tæ contacädänimpa.

¹⁵ Angä ëñëninque änäni tæ contadänitapa. ¹⁶ Itota päö önompo æmæmpoque æninque gæyæ mäa æninque öönädë æmö adinque Wængongui ingante, Bitö waa pönömi ænte cæmönipa, ante apænecantapa. Ayæ päö tönö gæyæ pä æ pä æ cædinque tömengä miñæ nê godäni inänite pædæ godongä æninque tömënäni tömänäni inänite di mäñæ di mäñæ cädäni ænte cængadänimpa. ¹⁷ Tömänäni eyepæ ænte tömo pöni cænänitapa. Ayæ ao mä ao mä cæte ñönönäni ate Itota miñæ nê godäni wæætë ao mä näni ñönöni ee öñoncoo pædæ wææmpo ö æninque önompo tipæmpoga go mentodëa cængui eyede da wënäni contagatimpa.

Bitö Coditobi inömi imipa, ante Pegodo apænecampa

(Mäateo 16.13-19; Mäadoco 8.27-29)

¹⁸ Ayæ ate Itota nänënë godinque Wængongui ingante apæneyongä tömengä miñæ nê godäni tömengä

tönö godongämæ ongönönänimpa. Tömēnāni inānite angantapa.

—Wadāni botō imotedō ante apænedinque, Æbodō imoo, ante apænedāni ēñēmīni.

¹⁹ Æñongante tömēnāni wæætē,

—Bitō imitedō ante apænedinque pancadāniya, Wäo æpænē nē guidongaingā incæ Itota adocā imaingā ingampa, änānipa. Wadāni pancadāniya wæætē, Ediya wodi ingaingā incæ Itota adocā imaingā ingampa, änānipa. Pancadāniya wæætē, Wængonguī beyæ nē apænegaingā adocanque do wængaingāna inte ñāni ömæmonte quēwēnongā incæ Itota adocā imaingā ingampa, ante tededānipa.

²⁰ —Minitō guiquēnē, Botō æbodō imoo, ante pönēmīni.

Æñongante Pegodo,

—Wængonguī nānō nē angaīmi inōmi inte bitō iñömō edæ nē Coditobi inōmi imipa, angantapa.

Itota, İmāi cædāni wæncæboimpa, ante apænecampa

(Māateo 16.20-28; Māadoco 8.30-9.1)

²¹ Pegodo mänömainō ante apænecā ēñēninque Itota wæætē angantapa. Minitō botō imotedō ante apænedinque, Codito inongā ingampa, ante gode änāmaī iedāni ämopa, ante nanguī äninque edæ wææ angacäimpa. ²² Äninque,

—Botō Waobo ēñagāimo inte nanguī caate wæquēnēmo imopa. Nē aadāni nāni Picæncabo tönö, Wængonguī qui, ante nē godönāni ñænænāni tönö nē odömönāni tönö mänināni edæ botō imote Baa änāni wæquēnēmo imopa. Ayæ botō imote godömenque wænönāni wænguēnēmo imopa. Incæte Wængonguī angā beyænque botō mēönaa go adoönæque iñonte edæ ñāni ömæmonte quēwencæboimpa, ante apænegacäimpa.

²³ Ante apænedinque Itota tömānāni inānite godömenque apænedinque

—Æcānō botō miñæ pönēna ina tömengā nāmā beyænque ante pönēnāmaī inte iimō iñō iimō iñō

botō miñæ tee empote poncæcäimpa. Nāmā nānō wænguīwæ næænte ponte bai cædinque tömengā, Botō wænguīmo incæ caate wæbo incæ Itota ingante cōwē tee empote gocæboimpa, äninque poncæcäimpa.

²⁴ Edæ æcānō, Nāmā wææ gom-podinque quēwencæboimpa, ante cædinque botō miñæ pönāmaī ingā guiquēnē tömengā iñömō edæ quēwēnāmaī incæcäimpa. Wæætē edæ, Wænönāni wæmo incæte botō Itota miñæ tee empote cōwē gocæboimpa, ante æcānō guiquēnē tömengā wæætē quēwencæcäimpa. ²⁵ Edæ waocā inguipoga ongoncoo tömancoo ö æncæte ante cædinque nāmā önöwoca incæ pædæ godongā wē womonte ba iñinque edæ tömengā iñæmpa quēwengampa diyæ mäincoo äaquiringā.

²⁶ Minitō pancamīniya botō beyæ ante botō apænedō beyæ ante guingo imonte wæmīnitawo. İñæmpa botō Mæmpo nānō emönö tönö anquedoidi tæiyæ waemö ināni nāni emönö guinæ gongæñonte botō Waobo nē ēñagāimo inte edæ nāmā ñäo apāite bai dibæ pöninque botō wæætē nē guñente wægaingā beyæ ante näemæ guingo imonte edæ wæcæboimpa. ²⁷ Nāwangā ämopa. Botō weca ongömīni pancamīniya ayæ wænāmaī edæ müimīni quēwēñömīni botō Wængonguī Awēnē Odeyebobabo ate botō nempo guicæmīnimpā, ante Itota apænegacäimpa.

Itota waemö pönī ñäo bai emongä bacä adānipa

(Māateo 17.1-8; Māadoco 9.2-8)

²⁸ Mänömainō ante apænedingā inte Itota adoque Wængonguī itæde go ate Wængonguī ingante apænecæte ante æidinque Pegodo ingante Wäo tönö Tantiago inate mänimpodāni inānite änanquidi ænte mäicā æidānitapa. ²⁹ Æite go

apæneyongā tömengā awinca iñömō edæ wii cōwē nānō emönö bai waemö pönī ñäo bai edæ emongā bamongā adānitapa. Ayæ tömengā weocoo nānō

ēñacoo iñömö edæ näinte bai ēmoncoo badingue näāmænta pōni ēñacantapa. ³⁰ Ayæ ayōnāni edæ onguiñæna mēnaa edæ Möitee wodi tönö Ediya wodi incæ iñontobæ a ongōninqe Itota tönö tededatapa. ³¹ Tömēna iñömö ñāō apāite bai ēmōna inte Itota tönö godongāmæ apænedatapa. Godongāmæ apænedinque tömēnāni, Itota æbānō ñōwo Eedotadēe godinque iñque cædinque oo wænte wadæ gocæcäimpa, ante tededānitapa. ³² Mänōmainō ante tedeyōnāni Pegodoidi guiquēnē möinente a ongōninqe ædæmō ñāni ömæmonte æmō ayōnāni Itota ñāō apāite bai ēmongā adinque tömengä tönö onguiñæna mēnaa godongāmæ adiyæ ongōnāni adānitapa. ³³ Onguiñæna iñömö Itota ingante tæcæ emō cæte gocæ cæyōna Pegodo guiquēnē,

—Awēnē ēñēmi. Iñömö mönō waa pōni ongonte awædō. Bitō āmi ate mönitō oncontaicoo mentaiya go adotaique mænōninqe bitō oncontai ante adotaique Möitee oncontai ante adotaique Ediya oncontai ante adotaique mænōmaimōnipa.

Mänōmainō ante tededinque Pegodo, Æbānō ante tedequēnēmo imoo, ante ēñēnāmaī inte önonque tedecantapa. ³⁴ Mänōmaī tedeyongä boguimancoo obo wæænte wææ owoyō adāmaī ināni inte, Boguimancoo ganta cæ wæcæ wæ, ante Pegodoidi guñente wædānitapa. ³⁵ Ayæ boguimancodē önonpāmoque apænecantapa. “Iñgä botō Wengä botō nē apænte ængaingä ingampa cæminii. Tömengä pōnō apæncä ate ēñēdāni.”

³⁶ Ante apæncä ēñente ayōnāni Itota ñōwo adocanque a ongongä adānitapa. Iñinque tömengä miñæ nē godāni nē adinānique inte pæ wēnedinque tömēnāni nāni adinō ante māniñedē wadāni inānite apænedāmaī ingadānimpa.

Itota wēncæ ingante angä go ate

wēñængä waa bacampa

(Mäateo 17.14-21; Mäadoco 9.14-29)

³⁷ Mänii ānanquidi æi iimō ate wææ pōñōnāni Itota ingante bee tencæte ante nanguī ināni pōnānitapa. ³⁸ Godongāmæ ponte nanguī ināni ongōñōnāni onguiñængä adocanque edæ ogæ tededinque,

—Nē Odömōmi ēñēmi. Botō wengä onguiñængä ingante pōnō waa æ. Tömengä adocanque botō wengä ingampa cæbii. ³⁹ Tömengä nānō nē ewocadongä inte wēnæ incæ tömengä ingante edæ bæi ongongä ate tömengä iñontobæ Yæ yæ angampa. Ayæ godō cæcä ate botō wengä edæ do do wæadinque öñōne māwanta tadecampa. Wēnæ iñömö wantæ iñō tao godinque adodō pō guite edæ cōwē quēwēninqe botō wengä ingante edæ ewencæ cæcampa cæbii. ⁴⁰ Bitō miñæ nē godāni inānite botō, Wēnæ inte wido cæedāni, ancaa āñōmo tömēnāni nē cæquēnēnāni incæ ædō cæte wido cæquīnānii, ante wæbopa.

⁴¹ Ante wæyongante Itota,

—Ñōwomīni mīni ædæmō cædāmāincabo mīni pōnēegade impa. Mīnitō weca æpogadō quēwēmoī. Wapiticæ cæyōminite botō æpogadō piyænē cæte wæwēmoī. Äninqe mæmpocä ingante apænedinque, Bitō wengä ingante botō weca ænte pōe.

⁴² Angä ēñente ænte mämongä pōñongante wēnæ incæ yæipodē bæ tacä do do wæate wæwengantapa. Tömengä wentamō nānō nē ewocadongä ingante Itota iñömö edæ, Ee æ, ante wææ angantapa. Ayæ wēñængä ingante pōnō cæcä ate tömengä wæætē önonganque bayongante mæmpocä ingante Itota pædæ godongä ængacäimpa. ⁴³ Mänōmaī cæcä adinque, Wængonguī incæ tæi piñænongä inte mænōmaī cæcampa, ante pōnēninqe tömānāni ancai guñente wægadānimpa.

Īimāi cædāni wæncæboimpa, ante adodō ante apæncä

(Mäateo 17.22-23; Mäadoco 9.30-32)

Mänömaï cæcä ate guñente wæyönäni tömengä miñæ ne godäni inänite Itota iïmaï ante apænegacäimpa.

⁴⁴—Nöwo ämo eñenguënë quëwëminii. Adocanque, Waocä ne eñagaingä æyömönö ongongää, ante godö odömöninque botö imote waodäni nempo pædæ godönäni æncædänimpa.

⁴⁵ Äninqe tömengä nänö apænedö æbänö i, ante wædänitapa. Wë womonte i ininqe tömënäni ædö cæte eñenguinänii. Ayæ, Æbänö ante ämii, ante anguënänäni incæ edæ guñenete wædinque pæ wëenegadänimpa.

Æcänonque ne angä inguingää, ante tededänipa

(Mäateo 18.1-5; Mäadoco 9.33-37)

⁴⁶ Tömengä miñæ nänö ne gocabo iñömö, Möni cabo incæ æcänonque ñænængä pönö inongä inte ne angä inguingää, ante wædinque nämä incæ wæætedö wæætë tedeyönänite ⁴⁷ Itota önöwënenque do eñengantapa. Eñëninque wëñængä adocanque ingante bæi ongöninque tömengä gäänë iñömö gö cæcantapa. ⁴⁸ Tömënäni inänite apænegacantapa.

—Waocä botö emöwo beyænque iingä wëñængä ingante, Pöe, ante waa cæcä iñömö tömengä botö imote adobai edæ, Pöe, ante do waa cæcampa. Botö imote æcänö, Pöe, äninque waa cæda tömengä adobai botö imote ne da pönongä ingante Wængongui ingante edæ adobai, Pöe, ante do waa cæcampa. Edæ mini waocabo wædämini iñöminite waocä guiyangä pönö inongä nänö entawënö bai ne entawengä iñömö tömengä ñænængä pönö inongä ingampa, ante apænegacäimpa.

Në pünte cædämaï ingä iñömö godongämæ cæcä ingampa

(Mäadoco 9.38-40)

⁴⁹ Wäö iñömö Itota ingante apænedinque,

—Awënë eñëmi. Wacä incæ mönö cabo inämaï inongä inte bitö emöwo apænedinque wënæidi inänite wido

cæcä atamönipa. Ininqe mönitö wæætë edæ, Bitö mönitö tönö gobi imipa Itota emöwo apænequimii, ante tömengä ingante edæ wææ antamönipa.

⁵⁰ Ante apæneyongante Itota,

—Iñæmpa mïnitö iminite ne pünte cædämaï ingä iñömö tömengä wæætë mïnitö tönö godongämæ cæcä ingampa cæminii. Tömengä ingante wææ änämaï incæminimpa, angacäimpa.

Tantiago tönö Wäö inate Itota wææ angampa

⁵¹ Oo pönö nänö æiquionæ bacæ cæyonte Itota, Eedotadëe iñömö botö cöwë gocæboimpa, ante gocæ cæcantapa. ⁵² Wadäni inänite tömengä, Poncæcäimpa, ante mïnitö täno beyænte goedäni, ante da godongä godänitapa. Godinque tömënäni iñömö Tämadiabæ godinque tömengä beyæ cæcæte ante Tämadiadi nänö quëwëñömö gocæ cæyönäni,

⁵³ Tämadiadi wæætë edæ, Eedotadëe gämænö Itota gocä awædö, ante adinque, Mönitö weca pönämaï incæcäimpa, ante wææ änänitapa. ⁵⁴ Iïmaï cædäni adinque Wäö tönö Santiago tömengä nänö emiñæna iñömö,

—Awënë eñëmi. Baa änäni adinque öönædë gonga ämöna wææ gonte wænguinäni, ämi, änatapa.

⁵⁵ Äñönate Itota wæætë edæ dadi emæmonte wææ ante tömëna inate, “Iñæmpa mïnatö iminate æwocadö angä eñente äminaa, ante mïnatö edæ eñënämaï imina awædö.

⁵⁶ Iñæmpa botö Waobo eñagaïmo imo iñömö edæ waodäni inänite ömæe ewencæte ante wii pongaïmo imopa. Wæætë edæ, Botö æmo beyænque quëwencædänimpa, ante pongaboimpa,” ante püingacäimpa. Ayæ wadäni nänö quëwëñömö gogadänimpa.

Itota miñæ ne goinänäni

(Mäateo 8.19-22)

⁵⁷ Taadonque goyönäni Itota ingante wacä angantapa.

—Awënë, bitö ædömë goyömite botö bitö miñæ pö gocæboimpa.

⁵⁸ Angä ëñninque Itota wæætë,

—Babæ guintaidi iñömö ontatodë monguï eadäni inänipa. Ayamöidi on-gonta eadäni inänipa. Botö Waobo ëñagäimo wæætë edæ monguï ömaabo imopa poncæ ämii, angacäimpa.

⁵⁹ Ayæ wacä ingante Itota,

—Botö miñæ pöe.

Angä ëñente wædinque tömengä,

—Awënë ëñëmi. Botö täno gote botö wæmpo wængä ate daga wente ate pömoe.

⁶⁰ Äñongante Itota wæætë,

—Iñæmpa nê wæwocadäni incæ tömënäni guidënanäni wænänäni ate ee abi daga wencædänimpa. Bitö wæætë, Wængonguï Awënë Odeye do pongäimpa, ante gote apænebi ëñencædänimpa. ⁶¹ Ayæ wacä adobaï,

—Awënë bitö imite tee empote goinëmo incæ ee ongöñömi täno gote botö guidënanäni inänite, Gobopa, ante apænete pömoe. ⁶² Äñongante Itota wæætë,

—Ömæ nê mangæ mangæ cædongä iñömö töö pönï minte pæquimpa, ante cæquënegä ingampa. Tömengä dadi ëmænte adinque töö pönï cæcampa diyæ töö minte pæquï. Ayæ adobaï Wængonguï Awënë Odeye nempo quëwëninque nê cæquënegä iñömö tömengä dadi ëmænte inguipogaque ante acä ininque Awënë beyæ ante ædö cæte cæquingä.

10

72 ganca inäni inänite Itota da godongä godänipa

¹ Ayæ ate mönö Awënë godömenque tetenta i doo ganca inäni mänimpodäni inänite iimaï angantapa. Minitö æmænö mëmïnaa æmænö mëmïnaa godinque botö nê goquiñömö ante wayömö näni quëwëñömö mäo wayömö näni quëwëñömö mäo täno beyænte gomïni ate botö ayæ poncæboimpa, äninque da godongä gogadänimpa. ² Iimaï ante da godongä godänitapa. “Nawangä

ämopa. Waocä tömencacodë do pequinca nanguï inca bai Awënë nempo nê quëwenguënenäni adobaï nanguï inäni inänipa. Incæte nê tä pedäni wædænque inäni bai nê gode änäni iñömö adobaï mënäniya pönï inänipa cæminii. Minitö Wængonguï ingante apænedinque, Awënë, bitö tömencacodë nê ëabi inte ämi ëñëninque gote apænecædänimpa, ante æedäni. ³ Nöwo minitö iñömö goedäni, ämopa. Mëñëidi weca ongöninque codotedoidi iñömö tæëmö inänipa diyæ nämä wææ aaquïnäni. Minitö iñömö codotedoidi aquïinäni bai adobaï aquïimïni iñöminite botö ämo mëne bai inäni weca edæ gomïni ataquëedäni. ⁴ Godonte minï ænguinta wente æï ænämaï inte mäincoo mongænte godämaï iedäni. Awæncata næænte godämaï iedäni. Taadö godinque wacä ingante bee tëninque apænedämaï inte goedäni. ⁵ Æcönëmenque go guiite, Mïni quëwencabo gänë pönente waa quëwëedäni, ämïni ëñencædänimpa. ⁶ Mänincönë quëwengä Ao angä ininque tömengä gänë pönente waa quëwëmaingampa. Wæætë Baa angä ininque minitö adomïnique gänë pönente waa quëwëmaïminipa. ⁷ Mänincönë minï go guidincönë quëwëñöminite mänincönë quëwënanäni pædæ pönönäni ænte cænte bete quëwëedäni. Edæ nê cæcä iñömö tömengä nänö cædi beyæ eyepæ ænguënegä ingampa. Minitö adocönenque quëwëninque wacönë wacönë godämaï iedäni. ⁸ Äyömömë goyömïni mäniñömö quëwënanäni, Pöedäni, änäni ëñente wædinque minitö tömënäni cænguï pönönäni æninque cæedäni. ⁹ Wënæ wënæ wæwënanäni inänite godö cæmïni waa bacædänimpa. Ayæ tömënäni inänite, ‘Wængonguï Awënë Odeye minitö weca oo pongä acæminimpa,’ ante apæneedäni. ¹⁰ Ayæ tömënäni quëwëñömö go guiyöminite Baa änäni ininque minitö wæætë tömënäni taadonque tao godinque tömënäni inänite, ¹¹ ‘Minitö quëwëñömö

onguipoi wadæ cæwate gomöna tamēñedāni. Incæte Wængongui Awēnē Odeye mīnitō weca oo pongā acæmīnīmpa, ante ædāni. ¹² Edæ mīnitō imīnite āmopa. Wængongui nānō apænte anguiönæ iinque bayonte Todömā iñömō quēwengaināni guiquēnē nanguī pante wæwēñōnāni mīnitō imīnite nē Baa ānāni guiquēnē godōmenque nanguī pante wæwenguīnāni inānīpa,” ante Itota angacāimpa.

Nē ēñēnāmaī quēwēnāni inānite Itota pūngampa

(Māateo 11.20-24)

¹³ Änīnque Itota nē ēñēnāmaī quēwēnāni inānite pūīnīnque iīmaī angantapa. “Codatīi iñömō quēwēmīni ēñēdāni. Betaida iñömō quēwēmīni ēñēdāni. Mīnitō mīni wæwenguīnque ēñēnāmaī cæte quēwēmīnidō anguēnē. Edæ botō mīnitō weca tæi pīñænte botō cædi bai Tido nāni quēwengaiñömō Tidōō nāni quēwengaiñömō adobai cæbo bai māniñömō quēwengaināni iñömō wēnæ wēnæ nāni cægainō ante dobæ ñimpo cædinque gōmæ ēmoncoo da wēñadinque gōnaiboga tæ contadinque Ca ca wæcægadānimpa. ¹⁴ İnīnque Wængongui nānō apænte anguiönæ iinque bayonte Tido iñömō tönō Tidōō iñömō quēwengaināni inānite nanguī pangā wæwēnāni incæte tōmengā mīnitō imīnite godōmenque pangā wæwencæmīnīmpa. ¹⁵ Ayæ Capēnaōmō iñömō quēwēmīni ēñēdāni. Wængongui mīnitō imīnite dicæ öönædē wo ææntodongā æi gote toquimīniyaa. İñæmpa tadōmengadænguipo wææntodongā guī wæcæmīnīmpa,” angantapa. ¹⁶ Änīnque Itota wæætē tetenta i doo ināni inānite apænedīnque, “Mīnitō apæneyōmīni æcānō ēñēngā tōmengā iñömō edæ botō imote do ēñēngā ingampa. Wæætē mīnitō imīnite nē Baa angā iñömō tōmengā edæ botō imote do Baa angā ingampa. Ayæ botō imote nē Baa āningā inte tōmengā botō imote nē da pönōningā

ingante do Baa angampa,” ante apænedīnque tōmēnāni inānite Itota angā godānitapa.

Tetenta i doo ināni do godināni inte ocæ emænte pönāni

¹⁷ Angā godināni inte tetenta i doo ganca ināni adodō ocæ emænte pönīnque watapæ todīnque Itota ingante apænedīnque,

—Awēnē, bitō emōwo apænedīnque mōnitō wēnæidi inānite āmōni ēñēnīnque bitō emōwo beyænque godānipa.

¹⁸ Ante todāni ēñēnīnque Itota wæætē,

—Nāinte quingæ cæ bai Tatāna iñömō wēnæ awēnē incæ öönædē inō wæængā nē agaīmo inte botō adobo āmopa. ¹⁹ Botō pönō āmo ate mīnitō iñömō nē āmīni badīnque edæ tæntæ tönō emēñe ingante pīnā gāwadāni bai adobai tæi emōmīni inte tæntæ bai nē cædāni inānite wido cæcæmīnīmpa. Ayæ mōnō imonte nē pūinte cædongā incæ tæi pīñænte cæcā incæte mīnitō iñömō godōmenque tæi emōmīni inte māningā nānō tæi pīñænte cæpāmo ante tōmāmāmo ante edæ wido cæcæmīnīmpa. Edæ æcāmenque incæ mīnitō imīnite æmæwo wido cædāmaī incæcāimpa. ²⁰ Incæte mīnitō āmīni ēñēnīnque wēnæidi do ēñēnte cædāni beyænque todāmaī iedāni. Wæætē, Mōnitō emōwo öönædē dobæ yewæmonte ongōmpa, ante adīnque mīnitō mānōmaī beyænque watapæ toedāni, angacāimpa.

Mæmpo Wængongui ingante apænedīnque Itota tocampa

(Māateo 11.25-27, 13.16-17)

²¹ Änīnque Wængongui Tæiyæ Waēmō Önōwoca ingante ewocadongā inte Itota māniñedē edæ watapæ todīnque Wængongui ingante iīmaī ante apænecantapa. “Mæmpo ēñēmi. Bitō, Wadāni nāmā ocai encadāni tönō nanguī adīnque nē ēñēnāni tönō mānīnō bitō cægainō ante ēñēnāmaī incædānimpa, ante cædinque bitō cægainō ante wē wodongabiimpa. Wæætē wēñænāni tæcæ ēñadāni bai ināni inānite bitō edonque odōmōmi

adinque do eñēnānīpa. Bitō oönædē Awēnē ingāimi inte inguipoga Awēnē adobi inōmi inte edæ mǎnōmaī cæbīpa, ante adinque botō bitō imite waa ate pōnēnīnque apænebopa. Mæmpo, bitō tōmēmi ānō bai cædinque waa cæbi adinque botō Ao āmopa, ante apænebopa,” ante Wængonguī ingante apænegacāimpa.

²² Ayæ, “Botō Mæmpo incæ, Bitō Awēnē inōmi inte aacæbiimpa, ante tōmāo iñōmō ongoncoo botō nempo pædæ pōnōnīnque tōmāo iñōmō quēwēnāni tōmānāni inānite adobai botō nempo pædæ pōnongā ænīnque botō iñōmō edæ tōmancoo ēnempodīnque tōmāo iñōmō quēwēnāni inānite nē ēnempobo imopa. Wængonguī Wēmo iñōmote, Æbodō imoo, ante Mæmpoque eñengā ingampa. Botō wæætē tōmengā Wēmo inōmo inte, Wængonguī æcānō ingāā, ante adoboque nē eñēmo imopa. Ayæ, Iñānīque nē eñēnāni incædānīmpa, ante botō nē angaināni inānite odōmonte botō apænebo eñēnīnque tōmēnāni wæætē, Wængonguī æcānō ingāā, ante nē eñēnāni badāni ate mōnitō adomōnīque ānque bai nē eñēmōni imōnīpa.”

²³ Ante apænedīnque Itota dadi emænīnque tōmengā miñæ nē godānīque inānite apænedīnque, “Nōwo mīni adīnō adinque nē emōmīni inte mīnitō mīni watapæ quēwengūnque impa. ²⁴ Iīmaī impa, ante apænebo eñēdāni. Wængonguī beyæ nē apænegaināni nanguī ināni tōnō imæca awēnēidi nanguī ināni incæ mīni adīnō bai ante ainente wægāināni incæte edæ adāmaī ingadānīmpa. Mīni eñēnīnō ante adobai eñēnīnō wægāināni incæte tōmēnāni eñēnāmaī ingadānīmpa,” ante māninganca Itota apænecā eñengadānīmpa.

Tāmadiabæ quēwengā incæ nē waa cæcā ingampa, ante

²⁵ Ayæ ate adocanque idægoidi nāni wææ angainō ante nē ate

eñengā iñōmō, Itota æbānō wapiticæ apænebaingāā, ante cædinque ængæ gantidīnque tōmengā ingante iīmaī angantapa.

—Awēnē nē Odōmōmi eñēmi. Botō æbānō cæte cōwē wænāmaī wantæpiyæ quēwengūmoo, ante wæbopa.

²⁶ Añongante Itota,

—Mōitee wodi, Iīmaī cædāni, ante wææ yewæmōnīnque æbānō ante yewæmongā ongō abii.

²⁷ Añongante nē odōmongā wæætē,

—Iīmaī ante yewæmongacāimpa. Bitō mīmō entawēmi inte Wængonguī mōnō Awēnē ingante waadedīnque bitō onōwoca ewocadīnque ædæmō waadete pōnencæbiimpa. Bitō baō tæi piñæte eñabi inte godō waadete cædinque bitō ocāi encabi inte nō pōnēnīnque waa waadete pōnēe. Ayæ adobai bitō nāmā bitō waadete waa cædō bai adobai pōnēnīnque godongāmæ quēwēnāni inānite adobai waa waadete cæe.

²⁸ Ante apænecā eñēnīnque Itota tōmengā ingante wæætē,

—Bitō nō eñēmi inte nōingā apænebitapa. Mānīnō bitō ānīnō bai cæbi inīnque bitō wænāmaī quēwēmaīmīpa.

²⁹ Angā eñēnīnque guīñente wædinque nē odōmongā iñōmō, Botō cæquēnēnō ante wīi cæbopa, ante Itota eñēnāmaī incæcāimpa, ante nāmanque ante wææ ānīnque,

—Iñæmpa wa. Godongāmæ quēwēnāni, ante bitō ānīnāni iñōmō ædānidō ināni.

³⁰ Añongante Itota wæætē, Mōnō guīdengā æcānō ingāā, ante odōmoncæte ante iīmaī apænegacāimpa.

—Onguīñengā adocanque Eedotadēe quēwente Eedicoo wæidō cægōñongante nē ō ænāni tōmengā ingante iñontobæ bæi ongonte weocoo gāni tadongadīnque tæi tæi pānāni nangæ bacā inīnque wadæ godāni. ³¹ Ate, Wængonguī quī, ante nē godongā adocanque adodō wæidō godō godīnque nē nangæ bate oñongā ingante gomō adinque ee

wodo pænta æmæ wedeca gocampa. ³² Ayæ ate Debii wodi pæināni nāni Wængonguī oncōnē cæcabo incæ adocanque adobaī adoyōmō wææ pōninqe nē nangæ bate oñongā ingante gomō adinqe ee wodo pænta gocampa. ³³ Ayæ ate wacā Tāmadiabæ nē quēwēnongā incæ ado wæidō godinqe nē nangæ oñongā weca adoyōmō ponte gomō adinqe, Tōmengā ædō cæte quēwēngūgā, ante tōmengā wædō ante baī nanguī pōnente cæcantapa. ³⁴ Īngā iñōmō nē nangæ bate oñongā weca pōninqe tæi tæi pānāni nānō æbāadiñōmō oginguipæ tōnō yowepæ ti nāmæ biñōmæ nāni amæ gao caadinqe weococa wīni caacampa. Ayæ, Tæ contate gocæcāimpa, ante adocā Tāmadiabæ quēwēngā iñōmō nāmā nānō nē mongænte goquēnengā bodo onōñabæ nē nangæ badingā ingante ængō cæcā tæ contayongante bodo ingante tōō tōō ænte gocampa. Ayæ taadō pōnāni nāni cænte guite mōincō ganca ænte māo guidinqe nē nangæ badingā ingante waa cæcampa. ³⁵ Īimō ate padata nāni godonte æinta mentaa tadōninqe mānincōnē nē aacā ingante pædæ godōninqe, Bitō nē nangæ badingā ingante waa cæe. Quiēmē æinengā adinqe bitō godōmi ængā ate botō bitō weca adodō pōninqe bitō godōnimpo adopo wæætē pædæ pōnōmo æncæbiimpa, ante gocampa. Mānōmaī cæcampa. ³⁶ Āninqe Itota tōmengā ingante nē āningā ingante godōmenque angantapa. Bitō ĩmite ñōwo āmo eñēninqe bitō wæætē apænebi eñēmoe. Nē nangæ bate oñongā weca pōnāni mengāa go adocanque ināni incæte æcānō tōmengā tōnō godongāmæ quēwēnāni baī inte waa cæcantawoo, ante pōnēmii.

³⁷ Āñongante nē odōmongā wæætē,

—Tōmengā ingante nē waadete godō waa cædongā incæ tōmengā guidengā baī cæcampa.

Ante apænecā eñēninqe Itota wæætē,

—Tōmengā nānō cædō baī bitō adobaī godinqe cæbāwe, angacāimpa.

Māadota tōnō Māadiya nāna caya oncōnē Itota eñacampa

³⁸ Ayæ taadō goyōnāni tōmēnāni quēwēñōmō pongā adinqe onquiyængā tōmengā emōwo Māadota iñōmō Itota ingante angā tōmengā oncōnē pō guite eñacantapa. ³⁹ Māadota tōniñacā Māadiya iñōmō Itota onōwaca inō tæ contadinqe tōmengā apænecā eñēē congantapa. ⁴⁰ Māadota guiquēnē nē eñādāni beyæ ante nanguī cæte wædinque Itota weca pōninqe,

—Awēnē, botō tōniñacā emō cæte gocā ate botō adoboque nanguī cæbo ate wædāmaī ĩmitawo. Edæ āmi pō cæcæe.

⁴¹ Āñongante Itota,

—Māadota, Māadota, bitō wa wa wa cæcæte ante wæwēmi awædō. ⁴² Wæætē adoque pōni cædinque edæ eyepæ impa. Māadiya do, Quinō waa cæquimoo, ante apænte pōnēningā inte botō onōwaca inō pō tæ contate eñēē congā adinqe botō wæætē tōmengā ingante, Goe, ānāmaī incæboimpa, angacāimpa.

11

Wængonguī ingante æbānō apænequī, ante Itota apænecā

(Māateo 6.9-15, 7.7-11)

¹ Itota ayæ ate wayōmō gote Wængonguī ingante apænecantapa. Īnque apænecā adinqe tōmengā nānō nē emiñængā adocanque tōmengā ingante apænedinqe,

—Awēnē eñēmi, Wāō tōmengā nānō emiñænāni inānite odōmonte, Wængonguī ingante æbānō ante apænequī, ante nānō apænedō baī bitō mōnitō ĩmōnite adobaī ante odōmonte apænebi eñēngūimōnii.

² Ante wæyōnāni Itota,

—Wængonguī ingante apænecæte ante ĩmaī ante apæneedāni, “Mōnitō Mæmpo nē oñnædē quēwēnōmi inte eñēmi.

Mönitö bitö emöwo tæiyæ waemö emömi adinque bitö emöwo ante waa adinque apænemönipa. Bitö öönædë Awënë nê ingaïmi inte inguipoga Awënë Odeyebi bitö baquinque edæ quingæ pöe. Öönædë owodäni ëñente cædäni bai inguipoga adobai bitö änö bai ëñente cæcæimpa.

³ Mönitö imönite bitö, Cænguï, ante iimö iñö iimö iñö eyepæ pönömi ænte cæmönie.

⁴ Mönitö wænæ wænæ cæmöni incæte bitö nê panguënëmi incæ pönö ñimpo cæbi quëwëmönie. Mönitö adobai edæ wadäni mönitö imönite wænæ wænæ cædäni adinque ñimpo cæmöni quëwënäni ae.

Mönitö wænæ wænæ möni cæinënö godö gocæte ante cæmöni adinque bitö wææ cæbi ate mäninö godö godämaï inte mönitö wæætë wænæ wænæ cædämaï incæmönimpa, Wæætë edæ nê wiwa ewocadongä nempo ongöñömönite bitö gä pe æmpobi quëwëmönie.”

Mänömainö ante apænete Wængonguï ingante apæneedäni, Itota angantapa.

⁵ Äninqe tömënäni inänite godömenque apænedinque Itota,

—Bitö iimaï cæbi ininque bitö æmigo æbänö cæbaingää, ante pönëedäni. Ayaönænëña incæ bitö æmigo weca godinque bitö, “Botö æmigo ëñëmi. Päömo bodogaa tänoque pönömi ænïmo inte ayæ ate botö adopo pönömo æncæbiimpa. ⁶ Edæ wacä botö æmigo incæ wayömö gocæte ante botö weca pongampa cæbii. Botö, Quinö impa diyæ godömo cænguingää, ante wædïmo inte bitö imite ämopa.” ⁷ Äñömi tömengä guicönë öñöninque, “Botö odemö ædæmö tee mönedinque botö wëñænäni tönö möimoga öñömo inte diyæ ædö cæte ængæ gantite godömo ænguïmii. Ee ae.” ⁸ Äninqe bitö æmigo incæ bitö ämi beyænque ængæ gantite pönönämaï ingampa. Incæte

wæætë wæætë äñömi tömengä, Ancaa ëñente awædö, äninque ængæ gantidinque bitö imite do pönongä æmaïmipa. ⁹ Ante apænedinque botö iñömö mönitö iminite iimaï ämopa. Pönömi æmoe, ante nê angä bai cædinque mönitö möni ænguïnö ante Wængonguï ingante apæneedäni. Äyömönö iï, ante nê diqui diqui mingä bai cædinque mönitö, Äbänö iï, ante ædæmö ëñencæte ante Wængonguï ingante wede pönente apæneedäni. Odemö mönitö beyæ wi ænecæimpa, ante aa pecä bai cædinque mönitö, Äbänö cæquïmoo, ante ëñencæte ante Wængonguï ingante nanguï apæneedäni. ¹⁰ Edæ, Pönömi æmoe, ante nê änäni iñömö edæ do ænänipa. Nê diqui diqui minäni iñömö do adänipa. Ayæ odemö ponte nê aa pedäni tömënäni nani guiquinque edæ do wi ænete bai bacæimpa.

¹¹ Ante apænedinque Itota godömenque apænecantapa.

—Wëñæ mæmpobi imi, ëñëmi. Bitö wëñængä päö ante angä ëñëninque bitö dicæ dicamö incæ godömi ængäa. Gäyæ ante angä ëñëninque bitö tæntæbo incæ dicæ godömi ængäa.

¹² Enquëmo angä ëñëninque bitö emëñe incæ dicæ godömi ængäa.

¹³ Ininque mönitö nê wiwa cædömiini incæ, Wëñængä beyæ quïnö waa i, ante ëñëmiini inte do godömiini ængampa. Mönö Mæmpo iñömö waa pönï cædongä iñongante änäni ëñëninque tömengä nê änäni inänite tömengä Tæiyæ Waemö Önöwoca ingante da pönongä æncædänimpa, ante Itota apænegacäimpa.

Wænæ tönö cæcä imaingampa, ante wapiticæ änänipa

(Mäateo 12.22-30; Mäadoco 3.20-27)

¹⁴ Ayæ wænæ nê babetadecä iñömö waocä baö do guite ongöñongante Itota tæcæ wido cæcantapa. Wænæ tao gocä ate onguïñængä tededämaï iningä incæ do tedecä ate wædinque godongämæ ongönäni wæætë guïñente wædinque waa

agadānimpa. ¹⁵ Pancadāniya guiquēnē, “Īñæmpa wēnæ awēnē Beedeboo tōnō godongāmæ cædinque Itota wēnæidi ĩnānite wido cæcā ĩmaingampa tōō,” ante tedewēnānitapa.

¹⁶ Wadāni guiquēnē, Æbānō cæmō ate Itota oda cæquiringā, ante cædinque tōmengā ingante, Bitō ōōnædē nāni cæi bai mā odōmōmi ate pōnēmaimōnīpa, ānānitapa.

¹⁷ Mānōmaī babæ cæcæte ante ānewēnānīpa, ante Itota do ēñēningā inte ĩmaī angantapa. “Awēnē odeye nempo quēwēnāni nāēmæ wæætedō wæætē cædāni ĩnīnque awēnē nānō ōmædempote wæquinque tōmēnāni nāmā ēwente cædānīpa. Ayæ adocōnē owocabo incæ adoyōmō godongāmæ quēwēnānī incæ nāēmæ wæætedō wæætē cædāni ĩnīnque tōmēnāni oncō woquinque nāwæ gobainānīpa.

¹⁸ Mīnitō, Wēnæ awēnē Beedeboo tōnō cædinque Itota wēnæidi ĩnānite wido cæbaingampa, ante ānewēmīnīpa tōō. Īñæmpa awēnē Tatāna nempo quēwēnāni ĩñōmō nāēmæ wæætedō wæætē pīināni ĩnīnque adocabodāni ĩnāmaī ĩñōnānite tōmengā dicæ tōmēnāni ĩnānite ēnempobaingā.

¹⁹ Mīnitō, Beedeboo tōnō cædinque Itota wēnæidi ĩnānite wido cæcampa, ante tedewēmīnīpa. Mānīnō mīni ānewēnō nāwangā ĩ bai mīnitō miñæ nē godāni guiquēnē æcānō tōnō cæte wido cædāni. ĩnīnque mīnitō miñæ nē godāni incæ mīni ānewēnō beyænque ante nāēmæ pīinīnque mīnitō ĩmīnite wæætē apænte ānīnque pīincædānīpa anguēnē. ²⁰ Botō ĩñōmō Wængonguī tōnō godongāmæ cædinque wēnæidi ĩnānite wido cæbo apa ānewēmīni. Mānōmaī ĩ ĩnīnque botō Wængonguī Awēnē Odeye ĩnōmo inte mīnitō weca do pōmo aedāni,” ante Itota apænegacāimpa.

²¹ Ayæ, “Īmaī impa. Nē tæi pīñængā ĩñōmō tæēmoncoo wēñate mongænīnque, Wææ godō cæinca, ante tæēmonca næænte tōmengā oncō boyæ wææ godō wææ godō cæyongā tōmengā ēadincoo ĩñōmō edæ ee ongompā. Tatāna ĩñōmō

mānōmaī ingampa. ²² Incæte wacā godōmenque tæi ēmongā inte pōnīnque māningā ingante edæ bæ tacampa. Ayæ tæēmonca, Wææ godō botō cæinca, ante māningā nānō ānīnca ñōwo pōningā ĩñōmō gā pe æmpote ō ænīnque tōmengā nānō ēadincoo adobai gā pe æmpote ō ænte māo nēnempocampa. Botō ĩñōmō nē tæi ēmōmo pōni ĩnōmo inte edæ godōmenque tæi ēmongā nānō gānā cæbai cæbopa,” angantapa.

²³ Ayæ, “Botō tōnō æcānō wīi godongāmæ cæcā ĩñōmō tōmengā ĩñōmō edæ botō ĩmote Baa ante pīinte cæcā ingampa. Ayæ botō, Wadāni botō miñæ poncædānīpa, ante cæyōmo waocā botō tōnō wīi cæcā ĩñōmō tōmengā wæætē botō miñæ poncæ cæyōnānite tatodongā wadæ godānīpa,” ante Itota apænegacāimpa.

Wēnæ waodē owote godingā inte adodō pompa, ante (Māateo 12.43-45)

²⁴ Ayæ apænedīnque Itota ĩmaī ante apænegacāntapa. “Waocā baōnē owote ate tao godīnque wēnæ wentamō nānō ēwocadingā ĩñōmō edæ, Quingānō baōnē go guiīdīnque edæ guēmante quēwenguīmoo, ante diqui diqui mīnte ayongā ōnōmæca to amīnte ĩ ate wædīnque edæ, ‘Botō tao godīncōnē adodō go guiite quēwencæboīmpa,’ ante pōnēnīnque adodō pongampa. ²⁵ Ponte ayongā waocā ōnonganque bayongante wacā ōnōwoca tōmengā owodāmaī ingā adīnque wēnæ wæætē, Æ waocā botō owodīncō bai ĩnongā inte ñōwo wadæ ñēmænte māīncoo cabo tē gæte bai ōmæwocā ingā abopa.

²⁶ Ate adīnque tōmengā wæætē godīnque wēnæidi godōmenque wentamō ēwocadāni tiæte ganca mānīmpodāni ĩnānite ænte pongampa. Tōmēnāni tōmānāni waocā baōnē godongāmæ pō guiite owodāni ate waocā ĩñōmō wēnæ yewænīnque godōmenque wæwengampa,” ante Itota apænegacāimpa.

Æbänö cæte watapæ quëwenguï, ante

²⁷ Itota tæcæ apæneyongante onquiyængä iñömö godongämæ ongönäni tönö ongöningue ogæ teded-inque,

–Bitö imite nē mangainä inte edæ tömēnä nänä toquinque impa. Bitö imi goömæ gänongainä inte edæ tömēnä watapæ nänä quëwenguinque impa.

²⁸ Ante ogæ tedecä eñëningue Itota wæætē,

–Iñæmpa Wængonguï nänö änö eñëningue nē cædäni guiquenē tömēnāni wæætē nāni watapæ quëwenguinque eñente cædänipa, ante apænegacäimpa.

Ööncädē nāni cæi bai cædinque mä cæbi amönie, änänipa

²⁹ Mäniñedē godömenque nanguï ināni pönāni adinque Itota, iimaï ante apænegantapa. “Minitö wiwa mini cæcabo iminipa. Minitö edæ, Mä cæte odömömi adinque pönëmaïmönipa, ante ancaa ämini awædö. Näwangä ämo eñëedäni. Cönäö wodi beyæ cædinque Wængonguï bamönengæ nänö cægäinö ante minitö pönënamäi iñöminite edæ mäningue mini aquinque cæcäimpa änewëminii.

³⁰ Ninebaidi pönencædänimpa, ante Cönäö wodi ingante Wængonguï angä quëwengacäimpa. Nöwomini pönencæminimpa, ante adobai cædinque Wængonguï botö Waobo eñägäimo iñömotē adobai angä quëwëmo acæminimpa. ³¹ Doyedē iñömö betamonca gämænö ömæ awenē inongä inte onquiyængä incæ awenē Tadömö wodi nanguï eñente nänö apænedö ante eñencæte ante doönæ quëwëningue pongacäimpa. Tadömö wædænque eñengä iñongante botö godömenque nanguï eñëmo inte minitö weca ongöñömotē minitö iñæmpa wii eñëminipa töö. Ininque mäningä onquiyængä incæ Wængonguï nē apænte angä weca pöninque mini nöwo quëwencabo tönö godongämæ

ongöningue, Mini pante wæquinque eñënamäi ingaminimpa töö, ante apænte piingungä ingampa. ³² Cönäö wodi Wængonguï beyæ apænegä eñëningue Ninebaidi wënæ wënæ nāni cægäinö ante wæwente pönëningue ñimpo cægadänimpa. Cönäö wodi wædangä iñongante botö wæætē nē ñænæmo inte apænebo eñëningue minitö iñömö eñënamäi iminipa. Ininque Ninebaidi incæ Wængonguï nē apænte angä weca pöninque mini nöwo quëwencabo tönö godongämæ gongænte ongöningue, Mini pante wæquinque eñënamäi ingaminipa töö, ante apænte piinänidö angüenē,” angantapa.

Mönö awinca gomö aquinemö bai emompa, ante

(Mäateo 5.15, 6.22-23)

³³ Ayæ godömenque apænegantapa. “Gongapæncade ti wodönodinque waodäni dicæ awëmö iñömö wë wodönäniyaa. Owæta boo cæcadäniyaa. Wæætē, Mäniñömö nē pö guidäni acædänimpa, ante cædinque gongapæncade awæmpa æmongapaa cö cædäni ñäö bæco adänipa. ³⁴ Mönö baö tömäo beyæ mönö awinca tica ënente bai emömompa. Mönö nö pönëningue amö ininque mönö ñäö tica ënente cægonte bai waa cæte quëwëmompa. Wæætē wiwa pönente amö ininque mönö wëmö iñömö cægonte bai inte wiwa cæte quëwëmompa. ³⁵ Mänömaï beyæ bitö, Wëmö ewocadämaï incæboimpa, ante bitö önöwoca cöwä adinque nāmä wææ cæe. ³⁶ Ininque bitö baö tömäo ñäö entawëningue bitö önöwoca adobai ñäö ewocabi ininque quïomenque incæ wëmö entawënamäi imäimipa. Gongapæncade ñäö bæco edonque abi bai edæ ñäö ædæmö entawëningue edonque adinque waa quëwëmaïmipa,” ante Itota apænegacäimpa.

Paditeoidi tönö nē wææ odömönäni inänite Itota piingä

(Mäateo 23.1-36; Mäadoco 12.38-40; Odoca 20.45-47)

³⁷ Ìnque apænecä ate adocanque Paditeocä tömengä ingante, Pö cæe, angä eñente pö guuite cæncæte ante ongongä. ³⁸ Adinque Paditeocä iñömö, Itota quĩnante mempodämaĩ inte cængää, ante guĩñente wæcä. ³⁹ Ìnque mönö Awënë tömengä ingante,

—Minitö Paditeoidi iñömö edæ owæta tönö podato cæncadë inö wentamö ënencoo ee adinque yabæque mënongate bai cæmini iminipææ. Mäincooque æinente mini wædö beyæ ayæ wiwa mini cædö beyæ edæ mimöno wentamö entawëmini iminipa. ⁴⁰ Mini eñëegadë. Në badongä iñömö yabæque badöinque cæncadë inö badönämaĩ ingantawogaa. Ìñæmpa mönö baö në badongaingä iñömö adocä mönö önöwoca badongacäi apa quëwëminii. ⁴¹ Ìnque minitö wæætë wadäni inänite ædæmö waadedinque minitö mäincoo pædæ godö pædæ godö cæmini ininque tömancoo edæ ñä mënongate bai ba adinque minitö wæætë edæ ñäö bai entawencæminipa.

⁴² Paditeoidi mini wæquinque iĩmaĩ cæminipa. Mäincoo diete ganca mänimpocoo ænte cö cædinque, Adocooque Wængonguĩ qui impa, ante mönö godongæimpa, ante cæminipa. Minitö mänömaĩ cædinque edæ öñabo mini minte pæyabo, Oguĩ waa cænguĩ, ante mini tä pete æñabo incæ edæ, Wængonguĩ qui impa, ante pancayaboga godöminipa. Mäinganca cædinque minitö waa cæmini incæte wadäni inänite nö cædämaĩ imini inte Wængonguĩ ingante waadete pönënamäi iminipa töö. Ìñæmpa mäninö öñabo godonguënëmini inte minitö godömenque waadete pönëinque nö cæquënëmini iminipa.

⁴³ Ayæ Paditeoidi mini wæquinque impa. Minitö odömöincönë go guidinque nämanque ante pönëinque waëmompaa pönĩ tæ contate tomĩni awædö. Ayæ waodäni nani godonte æimancadë godinque minitö nämanque pönëinque, Wadäni, Waa quëwëedäni, ante apænedinque

mönitö imönite waa acædänimpa, ante mini wæquinque edæ anewëminipa töö.

⁴⁴ Ayæ waocä wodido ñömæi ongö bai minitö iñömö mini wæquinque edæ wentamö entawëminipa. Mänömaĩ entawëminipa, ante eñënamäi inte wadäni edæ mini änö ante eñente cædinque edæ oda cædänipa, ante Itota piingantapa.

⁴⁵ Ìnque adocanque idægoidi nani wææ angainö ante në ate eñengä iñömö Itota ingante apænedinque,

—Awënë, mänömaĩ äninque bitö mönitö imönite adobai piinte anewëmi awædö.

⁴⁶ Äñongante,

—Minitö dodäni nani wææ angainö ante në adimini inte edæ mini adobai wæquinque impa. Edæ, Cædämaĩ cædämaĩ, ante ancaa wææ äninque minitö iñömö edæ mäincoo teëmencoo mö paate wadäni önönancapæ cö cædancapænäni bai cæminipa töö. Ayæ wæætë önompogonca adopogoncaque incæ gä ænancapænämaĩ cæte bai cædinque minitö mini wæquinque edæ, Æbänö cæte waa quëwenguĩ, ante odömönte apænedämaĩ iminipa töö, ante Itota apænecantapa.

⁴⁷ Ayæ godömenque apænedinque, “Wængonguĩ beyæ në apænëgainäni inänite minitö mæmæidi incæ në wænönäni ingadänimpa. Minitö iñömö, Në wænongainäni nänömoidi imönipa, ante bai cædinque, Wængonguĩ beyæ në apænëgainänido, ante mænönominipa töö. Mini wæquinque edæ mänömaĩ cæminipa. ⁴⁸ Ìnque, Mönitö mæmæidi wænongadänimpa, ante eñënimöni inte tömënäni wodido ante mænönomönipa, äninque minitö mæmæidi nani cægainö ante Ao äninque cæminipa töö,” ante Itota piingantapa.

⁴⁹ Ayæ iĩmaĩ ante apænecantapa. “Mänömaĩ beyæ Wængonguĩ mönö në eñëngaingä inongä incæ iĩmaĩ ante apænëgacäimpa. ‘Botö beyæ në apænedäni tönö botö në da godönäni inänite botö, Idægoidi weca gote apæneedäni, ämo gocædänimpa. Ämo

gote pönäni adinque idægoidi wæætē pancadāniya inānite wænönāni wæncædānimpa. Ayæ pancadāniya inānite togænte pänāni wæcædānimpa, ante Wængongui do apænegacāimpa.

⁵⁰ Ininque ñowo quëwëmini iñömīnite, Quinante wænömīni, ante Wængongui edæ mīnitō imīnite ancæcāimpa. Wængongui beyæ nē apænegaināni inānite tōmengā nānō badongaiñedē dodāni mā pōni wænönāni beyæ ayæ iincayæ ate ñowo ganca wænönāni beyæ ininque edæ nē wænāni tōmānāni wepæ nāni nāgainō ante, Ñowo quëwëmini mānīnāni tōmānāni wepæ nāte bai imīnīpa. ⁵¹ Edæ tōmānāni nāni wængainō ante edæ ñowomīni mīni pante wæquinque impa. Edæ mā pōni wænöninque docā Abedo wodi ingante adocanque wængōgā wængacāimpa. Iincayæ ate Wængongui oncō ñænæncō boyæ nāni iya tāimpaa gānē ongōñongante Tacadiya wodi ingante wænönāni nānō wænganca wadāni nanguī ināni inānite wænönāni wængadānimpa. Incæte Wængongui, Mīnitō mæmæidi nānōmoidi ingaimīni inte tōmēnāni nāni wængōgā beyænque wepæ nāte bai wentamō entawëñōmīnite botō wæætē ñowomīni imīnite pāmō wæcæmīnimpa, ante Wængongui angampa,” ante Itota apænegacāimpa.

⁵² Ayæ apænedinque, “Dodāni nāni wææ angainō ante nē adimīni iñōmō mīnitō nē ëñguënēmīni inte edæ mīni wæquinque nō pōnente ëñēnāmaī imīnīpa. Ayæ wadāni, Nō pōnente ëñgæimpa, ante odemō guīte bai tæcæ cædāni adinque mīnitō odemō tee mōnete yabæ wido cæte bai cædinque tōmēnāni inānite edæ wææ cæmīnīpa tōō,” ante Itota apænegacāimpa.

⁵³ Ininque apænete tao goyongā nē odōmōnāni tōnō Paditeoidi tōmengā ingante nanguī pīnte badinque, Ämōni ëñēninque apænebi ëñēmōnīi, apænebi ëñēmōnīi, ante ancaa änānitapa. ⁵⁴ Ayæ, Tōmengā wabānō

oda cæte tedecā ininque mōnō wæætē pāmō wæbaingampa, ante wææ wānonte bai cægadānimpa.

12

Wadō tedete wadō nāni cædōnō ante

¹ Māniñedē nanguī ināni æpodō mīido ganca ināni adoyōmō pō bee tē bee tē cædinque goto gongæñōnāni Itota tōmengā mīñæ nē godāni inānite tāno apænedinque, “Paditeoidi iñōmō wadō tedete wadō cæyōnāni mīnitō wæætē wadō nāni cædō ante, Pāo yedæ æmpoqui bai wodō wodō cæpa, ante gomō adinque tōmēnāni nāni cæinō bai cædāmaī iedāni. ² Adāmaī incædānimpa, ante quiēmē wē wodonte i incæ iincayæ ate tōmāā wi ænete bayonte edonque pōni bacæimpa. Ayæ quiēmē awēmō cæte i incæ iincayæ ate edonque pōni acædānimpa. ³ Wēmō iñōmō mīni tededō incæ edæ ñāō iñōmō edonque pōni ëñgæimpa. Ayæ guīcōnē mīnitō wæntæ apænedō incæ iincayæ ate oncōmanca inō æi edæ ogæ tedete edonque ëñgæimpa,” ante Itota apænecantapa.

Æcānō ingante guīñente wæquīi, ante

(Māateo 10.26-31)

⁴ Ayæ, “Botō æmigoidi ämo ëñēedāni. Waocā baonque wænönāni ate tōmengā ingante ædō cæte godōmenque cæquīnānīi. Ininque mīnitō iñōmō, Baonque wænönāni wæncæ wæ, äninque edæ guīñēnāmaī iedāni. ⁵ Wæætē edæ, Æcānō ingante guīñente wæquënēmīni imīnīi, ante botō odōmonte apænebo ëñēedāni. Waomīni imīnite wænonte ate nē angā inongā inte tadōmengadænguipo nē wido cæcā ingante iñōmō mīnitō tōmengā ingante edæ guīñēedāni. Ao. Māningā ingante guīñente wæedāni,” ante Itota apænecantapa.

⁶ Ayæ, “Wadāni ayamōidi önōmpo æmæmpoque mānimpodāni beyæ tiguitamō mentamonga ante pædæ godonte ænāni amīnitawo. Incæte ayamō adocanque ingante edæ

Wængonguī cōwē wææ aacampa. ⁷ Edæ, Ayamōidi bacoo pōnī ināni incæte ōnōnānique inānipa, ante nē āningā inte mōnō Mæmpo iñōmō mīnitō imīnite wæætē godōmenque waa acampa. Iñæmpa mōnō ocaguī incæ æpoguīnō encamōō, ante Wængonguī iñōmō edæ do ēñente aacā apa guīñewēmīnīi,” ante Itota angantapa.

Waadāni ēñēñōnāni mōnō Itota ingante Ao angæimpa, ante

(Māateo 10.32-33, 12.32; Māadoco 10.19-20)

⁸ Ayæ apænedinque, “Nāwangā āmopa, angantapa. Æcānō waodāni ēñēñōnāni botō imote Ao āninque, Bitō botō Awēnē inōmi imipa, ante āna botō Waobo nē ēñagaīmo inte tōmengā ingante wæætē Ao āninque, Bitō iñōmō botō miñæ nē gogaīmi inōmi imipa, ante Wængonguī anquedoidi ēñēñōnāni ancæboimpa. ⁹ Wæætē edæ waodāni ēñēñōnāni botō imote nē Baa angaingā ingante botō wæætē Wængonguī anquedoidi ēñēñōnāni tōmengā ingante edæ Baa ancæboimpa,” angantapa.

¹⁰ Äninque, “Botō Waobo ēñagaīmō iñōmote waocā babæ ante wīwa angā incæte Wængonguī wæætē edæ pōnō ñimpo cæcā quēwencæcāimpa. Wæætē Wængonguī Tæiyæ Waēmō Ōnōwoca ingante godō babæ ante nē ānewengā ingante Wængonguī wæætē edæ ñimpo cædāmaī inte cōwē pancæcāimpa,” ante Itota apænecantapa.

¹¹ Ayæ, “Mīnitō imīnite bæi ongonte tōmēnāni odōmōincōnē ænte godinque gö cædāni incæte mīnitō māniñedē, Æbānō ante apænequīmoo, ante wædāmaī iedāni. Awēnēidi weca incæ nē ānāni weca incæ mīnitō imīnite ænte māo goncædāni incæte mīnitō māniñedē, Pīnāni ēñente wædinque æbānō ante nāmā wææ anguīmoo, ante ayæ, Æbānō ante apænequīmoo, ante guīñente wædāmaī iedāni.

¹² Iñæmpa Wængonguī Tæiyæ Waēmō Ōnōwoca māniñedē incæ, Æbānō

wææ anguīi, ante odōmonte angā ēñēninque mīnitō wæætē māninō ante wææ ancæmīnimpa,” ante Itota apænegacāimpa.

Māincoo nāni æīnēmāmo ante

¹³ Tæcæ apæneyongā godongāmæ ongōnāni ongōninque adocanque Itota ingante,

—Awēnē, botō wæmpo wodi mangaincoo incæ mæmpo wodi ōmæ ingaīmæ incæ botō mēmō ingante tæcæguedē āmi pā cæcā æmōe.

¹⁴ Äñongante Itota,

—Botō nē apænte āmo imopa diyæ āmo pā cæquingāā.

¹⁵ Äninque godongāmæ ongōnāni inānite apænedinque,

—Wīi māincoo nanguī ænte beyænque mōnō quēwengæimpa cæmīnīi. Mīni māincoo æīnēmāmo ante edæ ñimpo cædinque ee aedāni.

¹⁶ Äninque Itota, Wængonguī Awēnē æbānō cæquingāā, ante ēñencædānimpa, ante imæca quēwēnāni nāni cæinō ante odōmōninque iīmaī apænecantapa.

—Adocanque nē nanguī ēacā inte tōmengā ōmæ wainguipoga nanguī pōnī pæ. ¹⁷ Adinque tōmengā iñōmō,

“Æbānō cæquīmoo. Botō cænguī da wenguīncō ñænæncō impa diyæ da wente manguīmoo.” ¹⁸ Äninque, “Iīmaī cæcæboimpa. Guiyancō oncō bæ tate ñænæncō wæætē mænoncæboimpa.

Mænōninque tōmēmōncoo tōnō māincoo wæætē mānincōnē tōmancoo da wencæboimpa. ¹⁹ Ayæ nāmanque apænedinque botō, Botō cænguī tōnō māincoo nanguī wadepo

ba beyæ eyepæ mānīmo inte botō guēmancæboimpa. Ōnonque cænguī nanguī cænte nanguī bete tocæboimpa,” ²⁰ Ante nāmanque pōnēñongā wæætē nē māningā

ingante Wængonguī, “Eñēnāmaī cæbipa tōō. Nōwo woyowotæ incæ edæ, Idæwaa quēwēmīpa, āmo wæncæbiimpa. Wæmi adinque

edæ bitō māincoo inī edæ æcānō māincoo baquīi,” ante Wængonguī angampa, ante Itota, Māninque

ingante Wængonguī, “Eñēnāmaī cæbipa tōō. Nōwo woyowotæ incæ edæ, Idæwaa quēwēmīpa, āmo wæncæbiimpa. Wæmi adinque

edæ bitō māincoo inī edæ æcānō māincoo baquīi,” ante Wængonguī angampa, ante Itota, Māninque

ante apænebopa, angacäimpa.
²¹ Ayæ tömönäni inänite wæætē,
 “Wængonguī mǎnōmaī angā ēñente
 wædinque mīnitō wæætē iīmaī ante
 pōnencæmīnīmpa. Æcǎnō, Tōmēmoque
 quī, ante da da wente māna
 iñōmō tömengā Wængonguī ayongā
 nē ōmæpocā bai inte ōmæwocacā
 ingampa. Nē ēacā wodi nānō wænō
 bai tömengā adobai bate wæquīnō
 anguēnē,” ante Itota apænegacäimpa.

*Tōmengā wēñcænāni inänite Wængonguī
 aacampa, ante*

(Māateo 6.25-34)

²² Itota māniñedē tömengā miñæ
 nē godāni inänite, “Īnīnque botō
 mīnitō imīnite āmopa. Inguipoga
 mīni quēwenguīmāmo ante wædāmaī
 iedāni. Quīmōnō impa cænguīmoo,
 ante, Quīncodō impa wēñaquīmoo,
 ante wædāmaī iedāni. ²³ Cænguinque
 cænīnque dicæ quēwēmongaa.
 Weocooque wēñadinque dicæ
 quēwēmongaa. Mōnō quēwenguīmāmo
 iñōmō godōmenque impa. ²⁴ Gapatai
 iñōmō cænguī ante dicæ mīnte pæ
 ate tā pete mǎnāniyaa. Incæte
 Wængonguī eyepæ godongā cænāni
 aedāni. Mīnitō guīquēnē ōōmā ēadāni
 bai ināmaī iñōmīnite Wængonguī
 mīnitō imīnite godōmenque waa ad-
 inque eyepæ pōnongā cæmīnīpa.
²⁵ Wængonguī nānō anganca quēwēnīnque
 mīnitō nanguī cædinque wantæ
 iñō incæ ædō cæte godōmenque
 quēwenguīmīnī. ²⁶ Mǎnīnō wædænque
 cæquī incæte wīī eyepæ cæmīnī
 īnīnque mīnitō, Botō quēwenguīnō
 ante wadō wadō cæcæboīmpa, ante
 quīnante wæmīnī,” ante Itota angan-
 tapa.

²⁷ Ayæ, “Ongai guīquēnē weo-
 coo ante daque daque dadāmaī
 inte wodonte tīnāmaī iñōnānīte
 Wængonguī weocoo waēmoncoo bai
 godongā waa pōnī ēnopa. Awēnē
 Tadōmōō wodi waēmoncoo ēgāingā
 incæ wīī ongai bai ēñagacäimpa.
 Ongai iñōmō godōmenque waēmō
 pōnī ēnopa. ²⁸ Gaguīmæ iñōmō iīmō
 ate edæ gongapamō nē tanguīnque
 ñōwoōnæ pæ incæte Wængonguī

waēmō pōnongā ēnopa. Īnīnque,
 Waēmō ēnodō nē pōnongā inte
 mōnō imonte godōmenque eyepæ
 pōnī pōnongā ænte ēñacäīmpa,
 ante pōnēmīniyaa. ²⁹ Mīnitō cænguī
 ante bequī ante æīnente wædāmaī
 iedāni. Edæ, Æbānō cæte ænguīmōō,
 ante wædāmaī iedāni. ³⁰ Inguipoga
 wayōmō nāni ēñēnāmaī incabo
 wayōmō nāni ēñēnāmaī incabo
 mǎnīnō ante wæyōnāni mīnitō
 guīquēnē, Mōnō ænguēnēnō ante
 mōnō Mæmpo iñōmō edæ do
 ēñengampa, ante pōnēnīnque guīñente
 wædāmaī iedāni. ³¹ Wæætē Awēnē Od-
 eye nempo quēwencæte ante nanguī
 cæyōmīnīte tömengā wæætē mīnitō
 ænguēnēnō ante do edæ eyepæ pōnī
 pōnongā æncæmīnīmpa,” ante Itota
 apænecantapa.

*Mōnō ēaquīncoo ōōnædē do ēamōmpa,
 ante*

(Māateo 6.19-21)

³² Godōmenque apænedīnque
 Itota, “Botō nē aabo iñōmote mīnitō
 botō miñæ mīni gocabo iñōmō
 wædænque pōnī imīni incæte edæ
 guīñente wædāmaī iedāni. Īñæmpa
 mīnitō Mæmpo iñōmō, Awēnē Odeye
 nempo quēwencæmīnīmpa, ante pōnō
 cædinque waa tocampa cæmīnī.
³³ Mīnitō iñōmō, Ō ænāni dæ āñōmō
 cayæ cænāmaī iñōmō botō mǎincoo
 wodāmaī inguincoo inte edæ cōwē
 mæ ongongæīmpa, ante cædinque
 ōōnædē iñōmō wo ææntodonte
 bai cæedāni. Wodāmāincadedē da
 wente bai cædinque mīnitō mǎincoo
 godonte ænīnque ōmæpodāni
 wæwēnāni inänite wæætē godōmīnī
 æncædānīmpa. ³⁴ Mīni waocabo
 iñōmō mīnitō mǎincoo ongōñōmō
 māniñōmō quēwencæte ante wæmīnī
 imīnīpa, ante adīnque botō, Ōōnædē
 iñōmō wo ææntodonte bai cæte
 māedāni, antabopa,” ante Itota
 apænecantapa.

*Tōmāā eyepæ cædinque wānō
 cōedāni, ante*

³⁵ Ayæ apænedīnque, “Wadāni,
 Awēnē beyæ ante cæcæīmpa,
 ante weocoo eyepæ wēñadinque,

Gongapæncade waëmö bæcocæimpa, ante eyepæ pōni cædāni bai mīnitō adobai eyepæ pōni cædinque, Awënë poncæcäimpa, ante wänö cōedāni. ³⁶ Edæ waodāni tōmēnāni awënë wayōmō gote ææmæ bete ocæ emænte ponte aa pecä eñēninque quingæ wi ænecæte ante wänö cōnāni bai cædinque mīnitō adobai, Awënë poncæcäimpa, ante wänö cōedāni. ³⁷ Edæ awënë ponte ayongä tōmengä ingante nē cædāni wänö cōnāni adinque tōmengä wæætē edæ pōnō waa cæcä æninque tōmēnāni iñōmō tocædānimpa. Mīnitō imīnite nāwangä ämopa. Nē wänö cōnīnāni inānite awënë pōnō angä ate tæ contadāni ate tōmengä nē awënë inongä incæ, Nanguī cæcæimpa, ante weocoo wēñadinque tōmēnāni weca pōninque edæ pōnō cæcä æncædānimpa. ³⁸ Edæ woyowotæ tæcæ bæcä incæ ayatadāa wæicä incæ pōninque tōmengä nē wänö cōnīnāni inānite waa adinque pōnō waa cæcä adinque tōmēnāni iñōmō watapæ edæ tocædānimpa. ³⁹ Wæætē oncö nē ēacä guiquēnē, Nē awēmō æncæ cædongä æyedēnō ponguingää, ante eñēninque do wææ cæcä bai nē awēmō æncæ cædongä wæætē edæ pō guite ænāmaī incædongäimpa, ante apænebo eñente pōnēedāni. ⁴⁰ Mīnitō adobai, Waocä nē eñagangä æyedēnō ponguingää, ante eñēnāmaī imīni inte edæ tōmānō eyepæ cædinque edæ wänö cōedāni,” ante Itota angacäimpa.

Awënë ingante nē cæda, ante (Mäteo 24.45-51)

⁴¹ Mänōmaī angä eñēninque Pegodo, –Mäninö odōmonte bitō apænedō ante mōnitō adomōnique eñencæmōnimpa, ante apænebitawo. Wæætē edæ, Wadāni tōmānāni eñencædānimpa, ante apænebitawo.

⁴² Äñongante mōnō Awënë wæætē odōmoncæte ante apænedinque, “Inguipoga awënë iñōmō, Æcänö nē eñengä inongä inte botō quincōo ante ædæmō aacä inguingää, äninque, Mänōmaī inte cæcä ingante adinque

botō ämo ate tōmengä nē angä badinque botō oncōnē nē cædāni inānite ædæmō aadinque cænguī eyepæ iñonte godongä cæncædānimpa, angampa. ⁴³ Ininque awënë wayōmō gote ponte ayongä, Nē cæcä botō änö ante eñente cæcampa, ante adinque awënë wæætē tōmengä ingante godō waa cæcä ate nē waa cæcä iñōmō edæ waa tocæcäimpa. ⁴⁴ Mīnitō imīnite nāwangä ante apænebopa. Nē eñente cædingä ingante awënë, Bitō botō māincoo tōmancoo edæ nē aabi bacæbiimpa, ancæcäimpa.”

⁴⁵ “Incæte nē cæcä wæætē, Botō awënë æiquedō ponguingää, ante pōnēninque tōmengä tōnō awënë ingante nāni godongämæ cæcabo onguiñænāni incæ onquiyænāni incæ tōmēnāni inānite tæi tæi pāninque cænguī nanguī cæninque ti nāmæ nanguī bete quidi quidi dowænte bacä. ⁴⁶ Ininque tōmengä, Æönædō ponguingää, ante wædāmaī iñongante, Æyedēnō ponguingää, ante eñēnāmaī iñongante edæ awënë iñontobæ pongä wæbaingampa. Ponte adinque awënë wæætē māningä nē eñēnāmaī cædingä ingante wido wido todinque nē pōnēnāmaī ināni weca māo wido cæbaingampa,” ante Itota apænecantapa.

⁴⁷ Ayæ, “Awënë ingante nē cæcä incæ awënë nänö änö ante önōmoncaque eñēninque wīi eyepæ cædinque eñēnāmaī cæcä ininque awënë iñōmō tōmengä ingante nanguī tæi tæi pancæcäimpa. ⁴⁸ Ayæ wæætē edæ, Awënë æbänö angää, ante eñēnāmaī inte emoncacä guiquēnē tōmengä nänö panguinque wænæ wænæ cæcä incæte tōmengä ingante wææcæcäimpa, ante Itota apænegacäimpa. Edæ awënë æcänö nempo nanguī pōnongä ænte næængä iñōmō tōmengä ingante Awënë wæætē, Bitō adodō nanguī pōnōmi æmoe, ancæcäimpa. Ayæ, Botō māincoo nanguī ongoncoo iñonte bitō aacæbiimpa, ante æcänö ingante awënë angää tōmengä ingante, Bitō godōmenque nanguī cæcæbiimpa,

ante awënë ancæcäimpa,” ante odömöninque Itota apænegacäimpa.

Näwæ gocædänimpa, ante cæcæte ante pömopa, angampa (Mäateo 10.34-36)

⁴⁹ Äninqe Itota godömenque apænedinque, “Botö inguipoga gonga bai tänoncæte ante pongaimo inte edæ, Do tänonte bai edæ waa tocædömoimpa. ⁵⁰ Ayæ botö nantate wæwencæte ante pongaimo inte botö nantate wæganca nantate botö wæquënönö ante iinque cæcæte ante wæbopa. ⁵¹ Minitö, Inguipoga quëwënäni piyænë cæte wæætedö wæætë cædämaï inte quëwencædänimpa, ante cæcæte ante Itota pongaingä ingampa, ante pönëminitawo. Iñæmpa wadö ämo ëñëedäni. Botö inguipoga pömo beyænque wæætedö wæætë piincædänimpa. ⁵² Iincayæ ate önompo æmæmpoque näni owocabo mänimpodäni iñönänite mengäa go adocanque inäni iñömö botö beyænque mënaa inate näëmæ piinte bacædänimpa. Ayæ wæætë mënaa ina incæ mengäa go adocanque inäni inänite wæætë näëmæ piinte bacædaimpa. ⁵³ Botö ëmöwo beyæ mæmpocä tömengä wengä onguiñængä ingante näëmæ piinte bacæcäimpa. Wëñængä wæætë mæmpocä ingante näëmæ piinte bacæcäimpa. Wäänä tömënä wengä onquiyængä ingante wæætë näëmæ piinte bacædäimpa. Wæætë wäänä ingante wëñængä incæ näëmæ piinte bacæcäimpa. Biyongä ingante nänö wæntedä incæ näëmæ piinte bacædäimpa. Nänö wæntedä inante biyongä ingante näëmæ wæætë piinte bacæcäimpa,” ante Itota tömengä miñæ në godäni inänite apænegacäimpa.

Æbänö oo baquimpa, ante ëñengæimpa, ante (Mäateo 16.1-4, 8.11-13)

⁵⁴ Ayæ godongämæ ongönäni inänite apænedinque, “Nænque guidö gämænö boguimä wentamö pö

adinque minitö, Cöönæ wentamö wocæmpa, äñömïni edæ do cæpa. ⁵⁵ Ayæ wæætë woboyæ betamonca inö pæmæ pö adinque, Ocoi näwancæ cæpa, ante tedeyömïni dobæ ocoi näwampa. ⁵⁶ Inguipoga gomö adinque öönædë æmö adinque minitö, Æbänö cæcæte ante ëmöö, ante edæ do ëñëmïnipa. Wæætë, Inguipoga wayömö wayömö æbänö cædäni, ante adinque minitö, Wængonguï oo pönï cæquingänö anguënë, ante quïnante wïi ëñëmïni. Edæ wadö tedete wadö cæmïni imïnipa töö,” ante Itota tömënäni inänite piingacäimpa.

Në piingä ingante waadete apænecæimpa, ante (Mäateo 5.25-26)

⁵⁷ Ayæ edæ, “Æbänö cæte nö cæquïi, ante minitö tömëmïnique apænte ante cæquënëmïni imïnipa. ⁵⁸ Në piinte angä iñömö bitö imite edæ, Wiwa cæbipa, ante awënë weca ænte mäocä idömæ godinque bitö guiquënë tömengä ingante waadete apænebi ëñëninque tömengä wæætë piyænë cædinque ee abaingampa. Wæætë edæ wïi waadete apænebi ininque tömengä në apænte angä weca godömenque ænte gobaingampa. Në apænte angä wæætë bitö imite wææ wänongä ingante pædæ godongä æninque wææ wänongä wæætë tee mönebaingampa. ⁵⁹ Tee mönecä ininque bitö quiëmë beyæ debe imi ininque edæ tömanta pönï di godonte ate tabaïmipa, ante ämo ëñëmaïmipa,” ante Itota apænegacäimpa.

13

Ocæ ëmcænte Wængonguï gämænö ponguënëmïni imïnipa

¹ Mäniñedë wadäni Itota weca pöninque iïmaï ante apænedäni ëñengantapa. Gadideabæ quëwënäni, Wængonguï quï, ante cæningä ingante tæcæ wænönñönänite Pidato guiquënë tömënäni inänite iñontobæ wænöninque tömënäni wepæ cæningä wepæ tönö dibæ cæcantapa. ² Ante tedeyönäni Itota wæætë, “Gadideabæ

quëwënäni wadäni pönömenque wënæ wënæ cädäni iñönäni mänimpodänique godömenque wënæ wënæ cädäni inte mänömaï wænänipa, ante mīnitō pönēmīni awædō. Iñæmpa Gadideabæ quëwënäni tōmänäni adobaï wënæ wënæ cädäni iñönäni mäninänique edæ wænänipa. ³ Wīi mänömaï impa, ämo ëñëmaïminipa. Tömënäni wīi godömenque wënæ wënæ cädinäni inte wænänitapa. Mīnitō guiquënë wënæ wënæ mīni cädinō ante wæwente pönëninque ñimpo cädämaï imīni ininque mīnitō tōmäminī adobaï wæmaïminipa,” ängantapa.

⁴ “Ayæ Eedotadëe iñömō tōmënäni nāni gomō aquincō Tidoe nāni änoncō tæ wææñonte waodäni dietiocho ganca ināni capo wænäni ininque mīnitō, Tömënäni godömenque wënæ wënæ cädäni inte wænänipa, ante pönēmīni awædō. Iñæmpa Eedotadëe quëwënäni tōmänäni adobaï wënæ wënæ cädäni iñönäni mänimpodänique edæ wænänipa. ⁵ Wīi mīnitō pönënō baï impa, ämo ëñëmaïminipa. Tömënäni wīi godömenque wënæ wënæ cädinäni inte wænänitapa. Mīnitō guiquënë wënæ wënæ mīni cädinō ante wæwente pönëninque ñimpo cädämaï imīni ininque mīnitō tōmäminī adobaï wæmaïminipa,” ante Itota apænecantapa.

Iigowæ ömæca ongompa, ante odömōnte apænecampa

⁶ Ayæ Itota, Wængonguï Awënë æbänō cæcää, ante ëñencädänimpa, ante imæca quëwënäni nāni cæinō ante odömōninque iïmaï apænecantapa. “Waocä tōmencodë iigowæ minte pæ ate tōmenca ante ponte ayongä edæ dæ ömæcawæ ongompa. ⁷ Ate wædinque tōmengä ocæ ëmænte godinque tōmencawæncō në aacä ingante apænedinque, ‘Edæ mæa go adoque wadepo tōmenca ante gote ayōmo edæ mänīi iigowæ cōwë ömæcawæ önonque wææ ongompa cæbii. Ömæcawæ wææ ongōwæ adinque wido tate æmæwo wido

cæe.’ ⁸ Äñongä tōmencawæncō në aacä wæætë, ‘Awënë, ee ongöe. Botō iigowæ önōwa gäänë ææ wodinque mämō wagada goi ænte wempo cädente tee moncabo ate wadepo ate bitō ongöñömi edæ, ⁹ do incabaimpa. Wæætë wadepo ate ayōmite ömæcawæ ate wædinque edæ æmæwo wido tate wido cæbaimpa,’ ante në cæcä angampa.” Mäninque ante odömōnte apænebopa, ante Itota apænegacäimpa.

Itota bocæ bocæ wædingä ingante cæcä ate waa bacampa

¹⁰ Guëmanguïönæ iñonte Itota oodeoidi odömōincönë go guidinque odömōnte apænecantapa. ¹¹ Onquiyængä mänñömō ongongä iñömō tōmengä dietiocho wadepo iñonte wënæ guicä ate bocæ bocæ wæwëningä inte ædō cæte adiyæ ængæ gantiquingä. ¹² Tōmengä ingante adinque Itota aa pecä pongä ate,

—Onquiyæmi, bitō bocæ bocæ wædō ante ñōwo botō ñimæncæpote baï cæbo ate bitō waa babipa.

¹³ Äninque tōmengä ingante gam-pocä ate ñimæncæpote baï badinque onquiyængä iñömō adiyæ gantidinque wæætë, Wængonguï bitō ñäö baï ëmōmi inte waa pōni pönō cæbi æmopa, ante watapæ apænecantapa. ¹⁴ Guëmanguïönæ iñonte Itota mänömaï cæcä waa bacä adinque tōmënäni odömōincō awënë guiquënë piinte badinque godongämæ ongönäni inänite,

—Quimæ quëwëminii. Önompō æmæmpoque go adoönæque mönō cæönæ iñonte mīnitō waa bacæte ante ponguënëmīni imīnīpa. Guëmanguïönæ iñonte edæ cädämaï inguënë quëwëminii.

¹⁵ Ante pūiñongante mönō Awënë wæætë,

—Mīnitō wadō tedete në wadō cädömīni inte ëñëedäni. Mīnitō cæningä iñömō wagada incæ bodo incæ gue ænente wæyongante mīnitō guëmanguïönæ i incæte cōwë ñi cæyænte æpæ wedeca

ænte mǎo gōnōmīni gongænte be-
campa. ¹⁶ Wæætē māningā on-
quiyængā iñōmō Abadāo wodi
pæingā iñongante Tatāna dietio-
cho wadepo iñonte goti winte bai
cæcā wædingā iñongante mīnitō
iñæmpa guēmanguionæ i beyænque
edæ, Tōmengā ñīmæncæpodāmaī
incæcāimpa, ante quīnante wææ
āmīnii.

¹⁷ Angā ēñente wædinque nē pīinte
ānāni guingo imonte wæyōnāni
godongāmæ ongōnāni guiquēnē,
Bamōnengæ pōni Itota waa pōni
cæcampa, ante adinque nanguī to-
gadānimpā.

*Mōotatamō guidimō ante odōmonte
apænecampa*

(Māateo 13.31-32; Māadoco 4.30-32)

¹⁸ Īnīnque Itota tōmēnāni inānite,
“Wængonguī Awēnē Odeye nempo
nāni quēwencabo iñōmō quīnō
bai inānii. Edæ, Æbānō nanguī
yebænte badānii, ante botō ingui-
poga quīnō pæte yebænte bai i ad-
inque, Mānīnāni adobai yebænānīpa,
ante ēñenguī. ¹⁹ Īmaī impa.
Wacā mōotatamō tōmēmō ænte mǎo
tōmēmoncodē quiyacā bocate pæ
īnīnque ñænæñeque bayonte ayamōidi
pōnīnque awænēmæ ongōnānīpa.
Mōotatamō guidimō incæ mānōmaī
pæ bai Wængonguī Awēnē nempo
quēwēnāni iñōmō wædænque inīnāni
incæ nanguī yebænguīnāni inānīpa,”
ante Itota odōmonte apænecāimpa.

*Pǎo yedæ æmpoquī da wenguī ante
odōmonte apænecampa*

(Māateo 13.33)

²⁰ Itota ayæ angantapa. “Wængonguī
Awēnē iñōmō tōmengā nempo
quēwēnāni inānite æbānō cæcāā,
ante odōmoncæte ante botō, Īmaī
cæcampa, ante odōmonte apænebo
ēñenguīmīnii. ²¹ Edæ Īmaī impa.
Onquiyængā ñænængade tee man-
guincade ænte tee mānīnque ædīna
nāni āmō ænte mempoga go
adopoque da wēnīnque ayæ, Pǎo
yedæ æmpocāimpa, ante adoyōmō
pōnō da wēnīnque wempo wempo

ædæmō cædengā ate pǎo mo yedæ
æmpote tōmǎo nāāmænta bapa. Yedæ
æmpote ate pǎo mo tōmǎo nāāmænta
ba bai oñnædē Awēnē nempo mīni
quēwencabo iñōmō tōmāmīni nō
ēñente bamīnīpa,” ante Itota odōmonte
apænecantapa.

Odemō guiyānemō, ante

(Māateo 7.13-14, 21-23)

²² Itota māñīnedē Eedotadēē
taadō godinque nanguī nāni
quēwēñōmō wodo pænta godinque
wædænque nāni quēwēñōmō wodo
pænta godinque wayōmō wayōmō
gote odōmonte apænecāimpa.

²³ Goyongante adocanque,

—Awēnē, bitō æmi beyænque nē
quēwenguīnāni iñōmō wædænque
inānīpa, āmitawo.

Åñongante Itota,

²⁴ —Odemō guiyānemō guicæte
ante edæ nanguī cæedāni. Edæ
nanguī ināni incæ guicæte ante
cædinque guidāmaī incædānīmpa, āmo
ēñēmaīmīnīpa. ²⁵ Īmaī impa. Oncō
nē ēacā ængæ gantidinque odemō
tee mōnecā adinque mīnitō iñōmō
tōmengā oncō boyæ gote ongōnīnque
aa pedinque, “Awēnē, wī ænebi
guīquīmōnii.” Ante wæyōmīnite
tōmengā, “Æmīnidō imīnii, ante ayæ,
Ædōnō gāmænō quēwente pōmīni
imīnii, ante botō adāmaī imopa,”
ancæcāimpa. ²⁶ Angā ēñēnīnque
mīnitō wæætē, “Īñæmpa mōnitō
bitō tōnō godongāmæ cænte becon-
gamōnīmpa. Ayæ bitō mōnitō taadō
ponte cægōnīnque odōmonte apænebi
ēñengamōni ae,” ancæmīnīmpa.

²⁷ Åñōmīni tōmengā iñōmō, “Æmīnidō
imīnii, ante, Ædōnō gāmænō pōmīni
imīnii, ante botō ēñēnāmaī imopa.
Edæ do antabopa. Ñōwo nē wīwa
cægāimīni inte edæ botō weca
ongōnāmaī. Edæ wadæ goedāni,
āmopa,” ancæcāimpa, ante Itota
apænecantapa.

²⁸ “Īnīnque mīnitō gomō ayōmīni
Wængonguī beyæ nē apænecānīnāni
tōnō dodāni Abadāo wodi Itæca
wodi Acobo wodi tōnō tōmānāni

Wængonguī Awënē Odeye ömæ godongämæ ongöñnāni mīnitō imīnite edæ yabæque wido cæcā ate wædinque mīnitō wæætē guingo imonte pīinte wædinque edæ Ca ca wæcæmīnimpa. ²⁹ Wadāni wæætē edæ nænque tamönō pönāni tönō nænque guidō pönāni ayæ beta-monca æmatæ æmatæ pönāni tönō Wængonguī Awënē Odeye oncönē ponte tæ contadinque ææmæ bete cængoncædānimpa. ³⁰ Īnīnque ayæ ate ēñēnāni incæ pancadāniya yæcado ongönāni bate toyönāni mīnitō guiquēnē do ēñēnīmīni inte yæcado ongōmīni incæte pancamīniya wæætē yæmīñæ gote ongonte wæcæmīnimpa,” ante Itota apænegacāimpa.

Eedotadēē quēwēnāni beyæ ante Itota wæcampa

(Mäteo 23.37-39)

³¹ Māniñedē Paditeoidi pancadāniya tōmengā weca pōnīnque, –Awënē Edode bitō imīnite wænoncæ angantaye. Bitō ongönāmaī wayōmō wadæ goe.

³² Ānāni ēñēnīnque Itota,

–Edode congāñe bai babæ cædongā īñongante mīnitō tōmengā weca godīnque, Itota īmaī angampa, ante apænemīni ēñengædāni. “Edode ēñēmi. Botō ñōwoönæque baönæque wænæidi inānite īnque wido cædinque īnque godō cæbo waa badāni ate īñabæ guingā īñonte botō edæ māniñedē edæ idæwaa cægaimo bacæboimpa, ante Itota apænecampa,” ante apænemīni ēñengædāni, āmopa. ³³ Incæte botō ñōwoönæ godīnque baönæ godōmenque godīnque edæ waönæ godōmenque botō goquēnēnō godīnque Eedotadēē gocæboimpa. Edæ Wængonguī beyæ nē apænegaināni incæ Eedotadēē īñōmō tōmēnāni nāni wængaiñōmō īñonte botō Wængonguī beyæ nē apænebo adobo inōmo inte edæ ædō cæte wayōmō ongonte wænguimoo.

³⁴ Ante apænedīnque Itota Eedotadēē īñōmō quēwēnāni beyæ

ante pōnente wædinque, “Eedotadēē quēwēmīni ēñēedāni, angantapa. Wængonguī beyæ nē apænedāni inānite mīni wænongaincabo inte ayæ Wængonguī nānō da pönönāni inānite dicaca tacamīni īñōmīnite botō īñōmō mīnitō imīnite waadete pönō cæinente nanguī wæbopa. Tawadiya wæmönā īñōmō, Botō wēnāni, ante gompodīnque tæcæenēmæ wēā pönō ö ænā bai botō adobaī, Botō wēnāni pōedāni, ante æpogadō āñōmote mīnitō, Wīi pōinente awædō, ante Baa āmīni wætabopa. ³⁵ Ñōwo īñōmō mīnitō onconcoo edæ önonconcooque baconcoo tamēñedāni. Ñōwo edæ botō dæ āñōmo mīnitō, ‘Awënē Wængonguī emōwo beyænque pōnīnque bitō toquinque edæ waa cæcæbiimpa,’ ante mīni anguinganca mīnitō edæ botō imote adāmaī incæmīnimpa ante āmo ēñēedāni,” ante Itota apænegacāimpa.

14

Æpæ ēñate nē wædongā ingante Itota cæcā waa bacā

¹ Itota guēmanguiönæ īñonte Paditeoidi awënē oncönē cæncæte ante go guīyongante godongämæ ponte ongönāni guiquēnē, Itota æbānō cæquingāā, ante waa agönānitapa. ² Tōmengā weca adocanque æpæ ēñate nē wædongā inte a ongongā. ³ Adīnque idægoidi nāni wææ angainō ante nē ate ēñēnāni tönō Paditeoidi inānite apænedīnque Itota īmaī angantapa.

–Wængonguī æbānō ante wææ angacāi. Waa bacædānimpa, ante guēmanguiönæ īñonte mōnō waa cæquēnēmō imōö, ante pönēmīni. Wæætē edæ, Guēmanguiönæ īñonte cædāmaī inguēnēmō imōö, ante pönēmīni.

⁴ Āñongā edæ pæ wēenedānitapa. Itota īñōmō edæ nē æpæ ēñate wædongā ingante gampocā waa bacantapa. Ayæ, Goe, angā gocantapa. ⁵ Angā gocā ate Itota wæætē tōmēnāni inānite īmaī angantapa.

—Minitō waocabo iñōminite adocanque tōmengā wēñængā onguĩñængā incæ tōmengā wagada onguĩñængā incæ æpæ ante nāni ææ wodīñōmō goyæ guicā iñinque mæmpocā iñōmō guēmanguĩñōnæ iñonte edæ dicæ tōō tadōnāmaī inguingāā. Mānōmaī goyæ guicā wædinque minitō tōmāmīni guēmanguĩñōnæ i incæte do gote nāwæ gongæninque edæ quingæ tōō tadōmaīmīnīpa.

⁶Ante Itota añongante tōmēnāni ædō cæte wæætē anguinānīi. Edæ pæ wēenedānitapa.

Monguimæno ante awēnē beyē gote nē wente ænāni, ante

⁷Ayæ Paditeo awēnē nānō nē añēdināni pōninque nāmanque ante pōnēninque, Yæcado ongōñōmote botō imote waa acædānimpa, ante cædinque waa pōnī tæ contaī iñōmō tæ contadāni Itota acantapa. Iñinque tōmengā, Wængonguī Awēnē nempo quēwēninque æbānō cæquīi, ante ēñencædānimpa, ante imæca quēwēnāni nāni cæinō ante odōmōninque iīmaī apænecantapa.

⁸—Bitō imite, Monguimæno pō bee, ante nē wente ængā ēñēninque bitō pōninque yæcado inō waēmō iñōmō tæ contadāmaī incæbiimpa. Iñæmpa wacā tōmengā nānō nē waadecā pongā iñinque ⁹mīnatō imīnate nē wente ængā iñōmō bitō weca pōninque, “Bitō gā goyōmi botō nē waadecā wæætē tæ contaquingā,” ante āmaingampa. Iñinque bitō gā godinque wīi waēmō iñōmō wæætē tæ contadinque guingo imonte wæbaīmīpa. ¹⁰Wæætē nē wente ængā ēñēninque bitō monguimæno pōninque yæmīñæ pōnī wēnæ wēnæ iñōmō tæ contaē. Edæ nē wente ængā ponte ayongā bitō wēnæ wēnæ iñōmō tæ contabi adinque tōmengā wæætē bitō imite, “Botō nē waadebi inōmi inte bitō ñōwo yæcado pōnī pō tæ contaē, āmopa,” āmaingampa. Mānōmaī angā ēñēninque godongāmæ cæ cōnāni iñōmō, Nē ēacā nānō nē waadebi bitō imi amōnīpa, ante

bitō imite waa abainānīpa. ¹¹Edæ, Botō nāmā nē waa cæbo inōmo inte edæ yæcado ongonguēnēmo imopa, ante nē cæcā iñōmō tōmengā iñōmō wææntodonte bai guingo imonte wæcæcāimpa. Wæætē edæ, Botō önōmoque imopa, ante yæmīñæ nē ongongā iñōmō tōmengā guiquēnē ængō cæte tocæcāimpa, ante Itota apænecantapa.

¹²Tōmēnāni iñānīte iñinque apænedinque nē wente æningā ingante Itota godōmenque angantapa.

—Bitō, Pō cæe, ante ææmænoca wente æninque bitō æmigoidi iñānīte wente ænāmaī iē. Bitō tōniñadāni iñānīte wente ænāmaī iē. Bitō guidēnāni iñānīte wente ænāmaī iē. Eyequeī owote māincoo nē ēadāni iñānīte wente ænāmaī iē. Edæ bitō tōmēnāni iñānīte wente æmi iñinque tōmēnāni wæætē bitō imite wente æmainānīpa, ante wææ cædinque bitō iñōmō, Botō godōnō wæætē eyepæ pōnōnāni māninque æninque oōnæde wæætē ænāmaī imaīmopa, ante wædinque edæ tōmēnāni iñānīte wente ænāmaī iē. ¹³Wæætē ææmæno ante wente æninque omæpodāni inte wæwēnāni iñānīte cōmante wæwēnāni iñānīte bee ñante wæwēnāni iñānīte babetamōnāni iñānīte wente æe. ¹⁴Mānināni iñānīte wente æninque edæ bitō toquinque ingæimpa. Tōmēnāni wæætē ædō cæte adopo pōnōnāni ænguīmīi. Edæ nē nō cædāni nāni ñāni omæmonguĩñōnæ iñinque bayonte edæ mōnō Mæmpo Wængonguī incæ bitō imite adopo pōnongā æncæbiimpa, ante Itota apænecacāimpa.

Ææmæ ante Itota odōmoncæte ante apænecampa

(Māateo 22.1-10)

¹⁵Angā ēñēninque Itota tōnō nē cængongā adocanque tōmengā ingante apænecantapa.

—Wængonguī Awēnē Odeye pongā ate tōmengā tōnō godongāmæ nē cængā iñōmō edæ tōmengā nānō watapæ toquinque cænguingā.

¹⁶Apænecā ēñēninque Itota wæætē tōmengā ingante odōmoncæte ante apænecantapa.

—Waocä ææmæno ante cædinque nanguĩĩnāni inānite māo apænedinque, Īncayæ ate āmo ate pō bete cædāni, ante cæcantapa. ¹⁷Ææmæno beyedē ĩnque bayonte tōmengā ingante nē cæcā ingante āninqe, “Īiönæ ææmæno ĩnque cætimpā. Pōedāni,” ante bitō tē tē wente ænte pōe, ante da godongā. ¹⁸Godinque wente ængā ēñēninqe do nānō nē āñēdināni wæætē, Ædō cæte ponguĩmōnii, ante tōmānāni adoyōmō wædānipa. Tānocā ĩñōmō, “Botō ōmæ ante tæcæ godonte æninqe botō acæ goquĩmo inte botō ææmæ becæ godāmaĩ ĩmopa. Incæte nē wente æningā weca adodō gote bitō botō beyæ apænebi ēñēninqe tōmengā wæætē botō ĩmote pĩnāmaĩ incæcāimpā,” angampa. ¹⁹Wacā guiquēnē, “Wagada onguĩñæna nāna goti wĩmencacaya nāna goti wĩmencacaya ōnompō æmæmpoqwe ganca mānimpodāni ĩnāni inānite godonte ænĩmo inte botō, Æbānō cædānii, ante acæ gocæ cæbopa. ĩninqe botō ææmæ becæ pōnāmaĩ ĩmo incæte awēnē ingante āmi botō ĩmote pĩnāmaĩ incæcāimpā,” angampa. ²⁰Wacā guiquēnē, “Botō tæcæ mōnĩmo inte ædō cæte ponguĩmoo,” angā. ²¹Ēñēninqe nē cæcā ĩñōmō awēnē weca adodō pōninqe tōmēnāni nāni cædōnō ante tōmāā apænecā ēñēnte wædinque nē ēacā ĩñōmō ænguĩ badinque tōmengā ingante nē cæcā ingante, “Bitō mōnō quēwēñōmō wacā taadō wacā taadō ñænænō incæ guiyānō incæ tōmāo gote adinque nē ōmæpodāni inānite, nē cōmāināni inānite, nē biyaate ĩnāni inānite, nē babetamōnāni inānite adinque ænte pōe.” ²²Angā ēñēnte cædinque nē cæcā wæætē awēnē ingante, “Awēnē, bitō ānĩnō ante do cæbo incæte bitō oncō wĩi eyede impā.” ²³Ante apænecā ēñēnte wædinque awēnē wæætē, “Ōnōmæca ĩñōmō ñænænō incæ guiyānō incæ gote diqui diqui minte wadāni inānite ate āmi pōnāni ĩninqe botō oncō eyede ponte cæncædānimpa.

²⁴Edæ bitō ĩmite āmopa, Wēēnēñedē botō wente ænĩnāni incæ bedāmaĩ incædānimpa,” ante nē ēacā angampa. Māninqe ante apænebopa, ante Itota apænegacāimpā.

Itota miñæ gocæte ante cæbānō cæquĩ, ante (Māateo 10.37-38)

²⁵Itota tōnō nanguĩĩnāni godongāmæ godānitapa. Tōmēnāni inānite apænecæte ante tōmengā dadi ēmænte adinque apænecantapa.

²⁶“Mĩnitō ĩñōmō, Itota gāmænō ponguĩmo, āmĩnitawo. Īñæmpa botō weca pōninqe waocā mæmpo tōnō wāānā ĩnate ante wædāmaĩ incæcāimpā. Tōmengā nānōogængā ingante ante wædāmaĩ inte tōmengā wēñænāni tōnō tōmengā nānō tōniñadāni inānite ante wædāmaĩ incæcāimpā. Mānimpodāni inānite pĩinte baĩ pōnēninqe tōmengā, Nāmanque ante quēwencæboimpā, ante wædāmaĩ inte pĩinte baĩ pōnēninqe botō ĩmote wæætē godōmenque nanguĩ waadete pōnenguēnengā ingampa. Mānōmaĩ ante pōnēnāni ĩñōmō tōmēnāninqe edæ botō miñæ nē godāni badānipa. ²⁷Ayæ botō miñæ poncæ cædinque waocā, Awæ botō wænguĩwæ, ante næænte ponte baĩ cædinque, Wænōnāni wæmo incæte Itota miñæ cōwē gocæboimpā, ante poncæcāimpā. Mānōmainō ante wĩi cæcā ĩñōmō tōmengā ĩñōmō edæ botō nē ēmiñængā ædō cæte baquingāā. ²⁸Æi gomō aquincō mænoncæ cædinque bitō, Æpodō godonte æninqe ĩnque mænonguĩmo. Botō eyepæ mantawo, ante tāno pōnēnāmaĩ inte edæ ædō cæte mænonguĩmii. ²⁹Tāno pōnē cōnāmaĩ ĩmi ĩninqe bitō ongonto ontowæ do nāñe ñongæninque godōmenque ænguĩ ante ōmæpobi badinque ĩnque edæ mænōnāmaĩ ĩmaĩmipa. Ayæ edæ mænōnāmaĩ ĩmi adinque godongāmæ ongōnāni wæætē, ³⁰‘Æ bitō mænoncæ cædĩmi incæ ĩnque mænōnāmaĩ ĩmipa tōō,’ ante badete tobāinānipa,” angantapa.

³¹ Ayæ, “Īmæca awënë wabæca awënë ingante guëadö guëa piinte cæcæte ante cædinque ædö cæte täno pönënamai inte cæquingää. Īimai pönente cæquënegä ingampa. Botö tontadoidi guiquënë diete miido ganca iñönänite wabæca awënë tömengä tontadoidi guiquënë bæinte miido ganca inäni awædö. Tömengä tontadoidi nangui inäni tönö piincæte ante pöñongante botö æbänö cæte edæ wææ cæquimoo, ante täno pönëë congüënë ingampa. ³² Ayæ, Botö iñömö tæi piñæmo imopa diyæ tömënanäni inänite wido cæquimoo, ante pönengä ininque tömengä edæ wabæca awënë gobæ ongöñongante mäo wææ angüënegä ingampa. Edæ, Botö æbänö cæbo ate bitö wæætë piyænë cæte ee ate gobi quëwëmoe, ante wææ angüënegä ingampa. ³³ Mini cabo adobai iminipa. Mäincooque impa, ante godonte bai cædinque minitö tömancoo emö cædinque tömännäni inänite emö cædinque botö miñæ poncæminimpa. Īñæmpa emö cædämai imini ininque minitö botö nē emiñæmini ædö cæte baquimīnii,” ante Itota angacäimpa.

*Cati incæ nongæ bapa, ante
(Mäateo 5.13; Mäadoco 9.50)*

³⁴ Ayæ apænedinque Itota, “Cati quimonte cæi iñömö waëme inte gæpæ emompa, angacäimpa. Incæte nongæmonte ba adinque minitö wæætë æbänö nö cæmini wæætë gæpæ emongüi. ³⁵ Īñæmpa gönea inguipoga cati wäne cædäni ininque tömëmö cati beyæ pædämai ingæimpa. Ayæ wagada goi tönö wempodente wäne cædäni ininque tömëmö cati beyæ pædämai ingæimpa. Īninque edæ cati nongæ ba ate wido cædänipa. Mänömai apænebo eñëninque ëamonca ongonte eñëedäni,” ante Itota apænegacäimpa.

15

*Cæningä wë womönimpa, ante
odömöninque apænegacampa
(Mäateo 18.10-14)*

¹ Odömäno awënë beyæ nē ænāni tönö Wængongui ingante eñënamai inte nē cædäni tönö tömännäni Itota apænegä eñencæte ante godongämæ pönäni inönänimpa. ² Adinque Padi-teoidi tönö nē odömönäni guiquënë Itota ingante ante piiniquë,

—Īngä iñömö, Pöedäni, äninque nē eñënamai cædäni tönö cæ congä awædö.

³ Ante piinte tededäni wædinque Itota, Wængongui Awënë nempo quëwëninque æbänö cæquii, ante eñencædänimpa, ante imæca quëwënanäni nāni cæinö ante odömöninque ĩmai apænegacantapa. ⁴ “Minitö iñæmpa. Mini waocabo iñömönite adobi iñömö bitö obegaidi tiëë ganca ëabi iñömi obega adocanque incæ wë womonte edæ dæ bacä ininque bitö iñömö æbänö cæbaimii. Edæ nöobenta i nöebe inäni ayæ ongoncoo inänite yabæque emö cæte godinque önömæca gote wë womöningä ingante bitö ædö cæte diqui diqui minämai imii. Bitö aganca cöwë edæ diqui diqui mimaïmipa. ⁵ Ayæ diqui diqui minte ëadente ate, Nöwo ëadëmopa, ante todinque önönancapæ wo ææntodöninque, ⁶ oncönë mongænte pöninque bitö guidënanäni tönö bitö æmigoidi tönö añete pönäni ate, ‘Badogaa, botö wë womö wædö dobæ ëadente i abopa. Edæ mönö watapæ to-quinque impa,’ ante nē ëabi iñömö ämaïmipa. ⁷ Öönædë quëwënanäni iñömö adobai cædänipa, ante apænebo eñëedäni. Waodäni nöobenta i nöebe ganca inäni nē nö cædönäni inte wë womönämai inte ayæ ongönäni adinque öönædë quëwënanäni wædænque todänipa. Wæætë waocä adocanque incæ nē womöningä iñömö tömengä edæ wënæ wënæ nänö cædinö ante wæwente pönëninque ñimpo cæte pongä adinque öönædë quëwënanäni iñömö godömenque watapæ todänipa,” ante Itota apænegacäimpa.

*Onquiyengä tiguitamö nänö wë
wodönintamö ante*

⁸ Godömenque apænedinque Itota odömongantapa. “Ayæ wæætē onquiyængä tigitamö diete ganca mäñongä adotamonque wē wodonte ba adinque, Nāö gongængæimpa, ante tica wodönodinque tömengä oncö tömäo wadæ ñēmæ wadæ ñēmæ cæte diqui diqui minte ængampa. ⁹ Do æninque tömengä guidēnāni tönö tömengä æmigoidi tönö añete pōñönānite, ‘Botö wē womontamö wädö dobæ ëadente abopa. Mönö edæ watapæ toquinque impa,’ angampa. ¹⁰ Ìninque mīnitö ìminite apænebopa. Adocanque incæ wēnæ wēnæ nānö cædinö wæwente pönēninque ñimpo cædinque pongä adinque Wængonguī anquedoidi incæ watapæ todānipa,” ante Itota apænegacäimpa.

Mäincoo nē ewengä ingante wæmpocä waadete pönö cæcä

¹¹ Ayæ godömenque apænedinque Itota, “Mæmpocä tömengä wēñæna mēnaa iñönote, ¹² ayæmengä iñömö wæmpocä ingante apænedinque, ‘Mæmpo, bitö ëacoo incæ æmæncooque pä cæte botö ænguēncooque pönömi æmoe.’ Angä Ao äninque wæmpocä pä cædinque wacä ingä pædæ wacä ingä pædæ godongä æna. ¹³ Ate wantæ ate ayæmengä iñömö ænte næænte wabæca godinque quingämē bai önonque towente quēwēninque wæmpocä nānö pönönincoo incæ eye cæpote ba. ¹⁴ Ate mäniömæ cænguī dæ ba ate nāni gæwænte wæpāmo pö ìninque tömengä mäincoo ænguēnengä inte wæwengä. ¹⁵ Ìninque tömengä mäniñömö quēwengä weca gote äninque, Bitö ìmi nē cæbo bacæboimpa, añongante Ao äninque, Botö ömæ odæ wængänäidi nāni cæmancadē gote nē aabi bacæbiimpa, ante da godongä. ¹⁶ Gote aadinque tömengä gue ænente ömædengä inte odæ wængänäidi nāni cæntapodē incæ cæinente wæyongante cænguī dicæ pönönāniyaa.”

¹⁷ “Ante wædinque tömengä nāmanque pönēë cöninque, ‘Ìñæmpa botö wæmpo ingante nē cædāni

iñömö öñönānique incæ eyepæ pönī cæñönāni botö iñömö edæ gæwænte wænguī wæ. ¹⁸ Botö mæmpo weca edæ wadæ gocæboimpa. Gote pöninque botö tömengä ingante, Mæmpo ëñēmi. Öönædē quēwengä ingante botö godö ëñēnāmaī cædinque bitö ayömite pönö wēnæ wēnæ cæbo iñömote, ¹⁹ bitö ñöwo edæ, Botö wēmi, ante ædö cæte anguimii. Wæætē edæ, Bitö botö ìmote, Nē cæbi bæ, ämi ate botö bitö ìmite nē cæbo bacæboimpa, ancæboimpa.’ ²⁰ Ante pönēninque wadæ godinque wæmpocä weca gocantapa,” ante apænedinque Itota godömenque odömonte apænecantapa.

“Ayæmengä mänömaī gote gobæ pönī dibæ pōñongante wæmpocä iñömö gomö adinque iñontobæ pönö waadete wæcampa. Pogodo pönī godinque tömengä wengä ingante waa waadedinque bæi ongonte queë bemongampa. ²¹ Tömengä wengä iñömö, ‘Mæmpo ëñēmi. Öönædē nē quēwengä ingante botö godö ëñēnāmaī cædinque bitö ayömite pönö wēnæ wēnæ cæbo iñömote bitö ñöwo edæ, Botö wēmi, ante ædö cæte anguimii.’ ²² Ante tæcæ apæneyongante mæmpocä iñömö nē cædāni inānite äninque, ‘Weocoo wæmoncoo quingæ ö ænte mämö daga wēñaquimīni. Öonmpo timpoi ænte pöninque godö da timpodinque awæncata ö ænte godö da wēwaedāni. ²³ Ayæ wagada wēñængä nanguī cænte oguimo pönī ìnongä inte wænonte ænömīni ate mönö cænte tocæimpa. ²⁴ Edæ botö wengä iñömö do wænte bai ìnongä incæte ñöwo mīngä pongä aedāni. Botö nē wē womongä wædongä incæ edæ ñöwo dobæ ëadente tobopa.’ Ante wæmpocä angä ëñēninque ææmæ cædinque nanguī todānitapa,” ante Itota godömenque odömonte apænecantapa.

²⁵ “Ææmæ cæte toyönāni bamoncadengä guiquēnē gönea ayæ cædongäimpa. Ìnque cæte ate obo ponte ëñēñongä ämotamīni ante äwadāni. ²⁶ Ëñente wædinque nē

cæcā ingante añecā pōñongante, Æbānō cædānii, ante wæcampa. ²⁷ Añongante, ‘Bitō biwī incæ do pongā adinque bitō wæmpo, Botō wengā mīngā ēñadente tobopa, ante adinque wagada wengā oguīmo pōnī inongā ingante do angā wænonte ææmæ cæte todānīpa.’ ²⁸ Ante apænecā ēñēnīnque bamoncadengā iñōmō edæ ænguī badinque oncōnē guidāmaī, Baa angā. Wædinque wæmpocā iñōmō oncodo taod- inque tōmengā ingante waadete apænedinque, Oncōnē pō guīe, angampa. ²⁹ Bamoncadengā wæætē, ‘Iñæmpa bitō beyæ ante wadepo iñō wadepo iñō botō ancaa cædinque bitō änō tōmānō ante do cæbo iñōmote bitō wæætē, Bitō æmigoidi tōnō cænte tocæminīmpa, ante dicæ āmiyaa. Caboda wengā incæ dicæ pōnōmi æmogaa. ³⁰ Wæætē māningā bitō wengā guīquēnē onquiyænāni māincoo beyæ ante nē towente quēwēnāni tōnō quēwēnīnque bitō ēadincoo incæ nē ēwēnengā inte pongā adinque bitō wæætē wagada wē oguīmo pōnī inongā incæ māningā beyæ do wænōmīpa, ante awædō, angantapa.”

³¹ “Ante pīiñongante wæmpocā, ‘Botō wēmi ēñēmi. Bitō iñōmō cōwē edæ botō weca ongōmi īmīpa. Botō māincoo īnī edæ bitō māincoo cōwē impa. ³² Incæte māningā bitō biwī, Do wæmaī ingampa, ante mōnō nē pōnēnongā inte ñōwo mīngā ingā pongā ae. Nē wē womōningā ingante do ēadente ate edæ ææmæ cæte toquēnē īnīmpa,’ ante bamonca- dengā ingante mæmpocā angampa.” Mānīnque ante apænebopa, ante Itota apænegacāimpā.

16

Nē aaquēnengā incæ nō cædāmaī ingampa, ante

¹ Itota tōmengā mīñæ nē godāni īnānīte godōmenque apænedinque, “Waoçā adocanque māincoo nangūi ēacā iñongante wadāni, Bitō māincoo nē aaquēnengā incæ ōnonque pōnī

wido cæcā ae. ² Ānāni ēñēnīnque nē ēacā iñōmō nē aaquēnengā ingante añecā pongā ate iīmaī angampa. ‘Bitō quīmæ cæbii, ante adinque tededāni edæ ēñēmopa. Ñōwo idæwaa botō māincoo inte nē aadīmī inte edæ abæ tawæ gocæbiīmpa. Amo ate ēñente wædinque bitō botō māincoo īnī ante edæ, Æbānō aadinque cæboo,’ ante apænebi ēñēmoe.”

³ “Ante pīinte angā ēñente wædinque nē aadingā iñōmō nāmāneque teded- inque, ‘Botō awēnē, Gobāwe, angā ēñēnīnque botō abæ tawænte gote awædō. Botō cæte ænguēnenta ñōwo ænāmaī īnīnque æbānō cæte ænte quēwēnguīmo. Botō, Wadāni beyæ onguīpoi ææ wobo ate pōnōnāni ænte quēwēncæboīmpa, ante pōnēmo baī edæ tæi pīñæmopa diyæ ææ woquīmoo. Ayæ, Ōnonque pōnōmīni æmoedāni, ante ædō cæte anguīmoo. Guīñēnete awædō. ⁴ Æ. Tæcæ pōnēmopa. Botō awēnē angā botō abæ tawænte goyōmote wadāni wæætē, Botō oncōnē pō guīe, ancædānīmpa, ante cædinque botō ñōwo iīmaī cæcæboīmpa,’ ante iīmaī cæcampa,” ante apænedinque Itota godōmenque apænecantapa.

⁵ “Wadāni iñōmō īngā awēnē pōnongā ænīnque adodō pōnōnāmaī īnāni inte debe īnōnānīmpa. Iīnāni īnānīte adocanque adocanque tōmānāni īnānīte angā pōñōnānīte nē aadingā iñōmō tāno pōningā ingante apænedinque, ‘Botō awēnē ingante bitō ayæ æpodō pōnōnāmaī īmīi.’ ⁶ Añongante, ‘Oguīguīpæ incæ botō tiēē ganca tanquebo encadedē awēnē ingante pōnōnāmaī inte debe īmopa.’ Ante apænecā ēñēnīnque ‘Mānīmpocadedē debe īmīpa,’ ante awēnē nānō yewæmōnīnta pædæ godōnīnque nē aadingā iñōmō, ‘Bado, bitō iīnta ænte pōnōmenque ante yewæmōnīnque edæ, Botō tincoenta ganca encadedē debe īmopa, ante edæ quīngæ tæ contate yewæmōe,’ angā ēñente cæcampa. ⁷ Ayæ pōningā ingante nē aadingā angantapa. ‘Bitō guīquēnē æpodō pōnōnāmaī

imii.' Añongante, 'Todigo incæ tee manguincade ñænængade pōni tiēē ganca encadedē botō debe imopa.' Ante apænecā ēñēninque awēnē nānō yewæmōninta pædæ godinque nē aadingā, 'Bado bitō iinta ænte pōnōmenque ante yewæmōninque, Otenta ganca debe imopa, ante yewæmōe,' angā cæcampa."

⁸ "Īninque nē aaquēnengā mānōmaī ōnonque wīwa cæcā wædinque awēnē tōmengā ingante, Bitō ocai nanguī encabi inte nāmanque ante pōnēwēninque cæbitapa, angampa, ante Itota nē aaquēnengā ingante ante māninque apænecantapa. Ayæ godongāmæ ongōnāni ĩnānite godōmenque apænedinque, Inguipogaque ante quēwēnāni ĩñōmō nāni caboque nanguī ēñente cæyōnāni botō ñāō ĩñōmō nē quēwēnāni nāni cabo guiquēnē wīi nanguī ēñente cædānipa," ante Itota odōmoncæte ante apænecantapa.

⁹ Ayæ, "Mīnitō ĩmīnite ñōwo āmo ēñēedāni. Māningā nē aacā ocai encate cæcā bai mīnitō ĩñōmō adobaī inguipogaque wīwa cæcæte ante nāni godonte æinta māmīni ĩninque ocai encate tōingā pōnente cæedāni. Inguipoga ĩnque bayedē māninta ĩñōmō edæ dæ bacæimpa, ante pōnente wædinque, wadāni beyænque ante godō waa cæedāni. Mānōmaī cæmīni ĩninque mīnitō ōmæpomīni inte ōōnædē nāni cōwē wantæpiyæ quēwencōnē æite godinque pōñōmīnite, Oncōnē pōedāni, āmaīnānipa," ante Itota apænecantapa.

¹⁰ Ayæ, "Wacā māincoo wædænque pōni æninque ædæmō aacā ĩninque tōmengā wæætē nanguī māincoo æninque adobaī ædæmō aaquingā ingampa. Wæætē edæ māincoo wædænque pōni aaquēnengā incæ babæ cæcā ĩninque tōmengā wæætē nanguī æninque cōwē babæ cæquingā ĩmaingampa. ¹¹ Īninque māincooque ante mīni wædoncoo æninque mīnitō ædæmō aadāmaī ĩmīni adinque mīnitō ĩmīnite, Wo

ēwēnāmaincoo aacæbiimpa, ante dicæ pōnōnāni ænguimīniyaa. ¹² Ayæ wacā mīnitō ĩmīnite, Botō qui ædæmō aaedāni, ante pōnongā ænimīni inte mīnitō ædæmō aadāmaī ĩmīni adinque, Tōmēmīni qui, ante mīnitō ĩmīnite pōnōnāmaī incædānimpa," ante Itota apænecāimpa.

¹³ Ante apænedinque Itota godōmenque apænecantapa. "Mēnaa awēnēna ĩna beyæ waocā ædō cæte cæquingā. Adocanque awēnē ingante pīninque wacā ingante waadebaingampa. Wæætē adocanque miñæ godinque wacā ingante wīi waa abaingampa. Mīnitō adobaī ĩmīni inte Wængonguī ingante nē cæmīni ĩninque māincooque ante ædō cæte cæquimīni," ante Itota angacāimpa.

¹⁴ Itota apænecā ēñēninque Pāditeoidi guiquēnē māincooque ante nē wæwēnāni ĩnōnāni inte, Quimæ ānewēē, ante badete togadānimpa.

¹⁵ Adinque Itota wæætē tōmēnāni ĩnānite, "Mīnitō ĩñæmpa, Mōnitō ĩmōnite adinque waodāni, Nē nō cædāni ĩnānipa, ante pōnencædānimpa, ante nē babæ cæmīni ĩmīnipa. Incæte Wængonguī mīnitō mīmōnē mīni entawēnō ante edæ do acampa. Waodāni nāni waa adō ante Wængonguī wæætē, Wentamō pōni ĩ awædō, ante pīingampa," ante Itota apænecantapa.

Wængonguī Awēnē nānō wææ angainō cōwē ongompā

¹⁶ Āninque Itota, "Wēēnēñedē ĩñōmō Wāō nānō ponganca dodāni Mōitee wodi nānō wææ angainō ante ayæ Wængonguī beyæ nē apænedāni nāni angainō ante apænete quēwengadānimpa. Ñōwo guiquēnē, Wængonguī Awēnē Odeye nempo guite quēwengæimpa, ante watapæ apænete impa. Īine ante ēñēninque tōmānāni Awēnē nempo guicæte ante edæ pæ pagænte cædinque da godō guidānipa," ante apænecantapa.

¹⁷ Ayæ apænedinque, "Incæte ōōnæ tōnō inguipo æmæwo edæ

dæ nāni baganca edæ Wængongui nānō wææ angainō iñōmō edæ cōwē mæ ongongæimpa. Mānīne ante yewæmōnīque dodāni nāni tænoncagai iñōmō edæ guiyā pōnī incæ cōwē wadæ cædāmaī ingæimpa,” ante Itota apænegacāimpa.

Nāni pāmænte wædō ante Itota apænecampa

(Māateo 19.1-12; Māadoco 10.1-12)

¹⁸ Ayæ godōmenque apænedīque Itota, “Æcānō nāwā nānōogængā ingante pāmænīque wacā onquiyængā ingante godō mōna iñōmō tōmengā edæ wīwa towengā do bacampa. Adobaī, tōmengā nānōogængā īningā iñongante wacā mōnīque edæ do towente bacampa,” ante apænecantapa.

Tæcæ wodi tōnō Datado, ante Itota odōmonte apæneca

¹⁹ Godōmenque odōmonte apænecæte ante Itota iīmaī ante apænegacāimpa. “Onguīñængā adocanque nē ēacā inte cæncadenco waëmoncoo wēñadinque awēnēidi nāni opatawæ ēmoncoo baī yabæque wēñadongāimpa. Tōmengā tæcæ wodi īnongā inte waēme cænguīncooque ænīque iīmō iñō iīmō iñō ææmæ cædinque nanguī todīque quēwēnōngāimpa. ²⁰ Tæcæ wodi yabædemō inō wacā tōmengā ēmōwo Datado ingante ænte māmō ñō cædāni ñongængantapa. Īngā iñōmō, Pōnōmi æmoe, Pōnōmi æmoe, ante nē ānewēnongā inte quēmoncoo tōmāo baate wædongāimpa. ²¹ Ayæ tæcæ wodi weca cænīque eyepodāni wæænte oñoncoo adīque tōmengā ænte cæncæte ante wæwēnongāimpa. Ayæ edæ tōmengā nanguī baate ñōmænte wæyongā gūntaidi incæ pō yædæ yædæ beyadōnānīpa. ²² Tōmengā nē, Pōnōmi æmoe, Pōnōmi æmoe, ante ānewēnongā inte nāñe wængā adīque Wængongui anquedoidi tōmengā onōwoca ingante Abadāo wodi weca ænte mæidāni æicantapa. Ayæ ate tæcæ wodi adobaī nāñe wængā adīque tōmengā baō īni daga wēnānitapa.”

²³ Ante apænedīque Itota tæcæ wodi ingante ante godōmenque apænecantapa. “Tōmengā onōwoca guidōmēmō taadō wææ gote mæ māmōnte baī iñōmō ongōnīque nanguī āmogate wæwēnongā inte gomō ayongā Abadāo wodi a ongongā acantapa. Datado wodi adobaī Abadāo wodi weca a ongongā acantapa. ²⁴ Adīque tæcæ wodi iñōmō Abadāo ingante aa pedīque, ‘Mæmpo Abadāo ēñēmi. Botō gonga bæcōyōmō guīte nanguī āmogate wæwēmo cæbii. Botō āmogate wædō ante pōnō waadete waa cædinque bitō Datado ingante da pōnōmi pōnīque tōmengā æpæ ada ipomencacā botō cōñe bamencaoe.’ ²⁵ Āñongante Abadāo, ‘Botō wēmi, Datado īmæcayedē wēnæ wēnæ āmogate wæwēñongante bitō māincoo waëmoncooque ænte todīque quēwēnōmiīpa. Ñōwo diyæ bitō āmogate wæwēñōmite Datado ingante wæætē ædæmō cæbo ate wampo pōnēnīque tōmengā ñōwo iñōmō watapæ quēwente tocampa. ²⁶ Ayæ godōmenque āmo ēñēe. Nānēnē ī apa ānewēē. Botō weca ongongā inte ædō cæte bitō weca goquīngāā. Wæætē bitō weca ongongā inte botō weca ædō cæte ponguīngāā. Guībæ pōnī iñōmō taadō īmpa taquīi. Edæ dæ ampa,’ ante Abadāo wodi angampa, angantapa.”

²⁷ “Angā ēñente wædinque tæcæ wodi wæætē, ‘Mæmpo Abadāo ēñēmi. Datado ingante āmi ēñente tōmengā botō mæmpo oncōnē adodō gocæcāimpa. ²⁸ Māniñōmō botō tōniñadāni onompo æmæmpoque ganca mānīmpodāni īnānīpa. Īnīque bitō Datado ingante āmi tōmēnāni weca gote, Wænompadāni, ante wææ angā ēñēnīque tōmēnāni wæætē iñōmō nanguī pōnī āmogate wæwēñōmō pōnāmaī incædānīpa.’ ²⁹ Āñongante Abadāo wæætē, ‘Mōitee wodi nānō wææ ante yewæmongainta Wængongui beyæ nē apænedāni nāni yewæmongainta do mānāni inte edæ bitō tōniñadāni

iñömö mäninta adinque, Æbänö i, ante do eñenguënänäni inänipa.’
³⁰ Ante apæneyongä tæcæ wodi wæætë, ‘Iñæmpa mæmpo Abadäo eñëmi. Wacä nê wængaingä inte ñäni ömæmonte tömënäni weca gote apænecä eñëninque botö tönïñadäni tömënäni wënæ wënæ cædinö ante wæwente pönëninque do edæ ñimpo cæbainänipa.’
³¹ Ante wæyongante, ‘Iñæmpa Möitee wodi nänö wææ angainö ante Wængongui beyæ nani apænegainö ante eñënämaï inäni inte tömënäni nê wænte ñäni ömæmöningä apæneyongante cöwë eñënämaï imainänipa,’ ante Abadäo wodi angantapa.” Tæcæ wodi ingante ante apænedinque Itota mäninque ante apænegacäimpa.

17

Wacä oda cæcæcäimpa, ante nani wæquinque cædänipa

(Mäateo 18.6-7; Mäadoco 9.42)

¹ Ayæ tömengä miñæ nê godäni inänite apænedinque Itota, “Nê pönänäni incæ pancadäniya wii eñente do oda cædänipa. Cöwë mänömaï impa. Incæte, Oda cæcæcäimpa, ante nê cæcä iñömö edæ tömengä nanguï nänö caate wæquinque cæcampa. ² Ìninque edæ, Wëñængä adocanque guiyangä pönï incæ oda cæcæcäimpa, ante nê godö cæcæ cædingä iñömö edæ, Wii cæcæcäimpa, ante mönö edæ wææ cæcæimpa. Waodäni nani dacæ godö dacæ godö cæquinca ñænænca æninque nê godö cæcæ cæcä önömenca æ wëmencadinque tömengä ingante tæcætibæ wido cædäni ininque tömengä edæ, Wënæ wënæ cædämaï inte wæmo beyænque Wængongui botö imote pänämaï ingampa, ante tömengä waa toquënegä imaingampa. ³ Mänömaï ämo eñëmini inte minitö, Oda cæcæcäimpa, ante nê cæcä bai cædämaï incæboimpa, ante edæ nämä wææ aedäni,” äninque Itota iïmaï apænecantapa.

“Wacä wënæ wënæ cæcä adinque bitö wæætë tömengä ingante, Cædämaï incæbiimpa, ante wææ äe. Ämi eñëninque tömengä wënæ wënæ nänö cædinö beyæ guingo imonte wædinque, Wiwa cætabopa, ante apænecä eñëninque bitö wæætë piyænë cædinque tömengä ingante ñimpo cæbi ee gocæcäimpa. ⁴ Tömengä wæætë adoönæque iñonte önompo æmæmpoque go mempoga mänimpoga bitö imite wiwa cædingä inte tömengä guingo imöninque, ‘Bitö imite wiwa cætabopa,’ ante adopoga apænecä eñëninque bitö wæætë tömengä ingante adopoga ñimpo cæbi ee gocæcäimpa,” ante Itota angantapa.

Mönö tæï piñcente entawenguinque wede pönëmpa

⁵ Mönö Awënë tömengä nänö nê da godöninäni iñömö tömengä ingante äninque,

–Wædænque pönëmöni iñömönite bitö pönö cæbi æninque mönitö ædæmö wede pönëmöni bacæmönimpa.

⁶ Änäni eñëninque mönö Awënë wæætë,

–Möotatamö guiyämö pönï nänö inganca minitö pönënö mäninganca wædænque pönëminitawo. Mäningancaque pönëmini incæte minitö möodedawæ nani äwæ inte apænedinque, “Awæ eñëmi. Bitö bæ wite godö gäwapæ minte pæbæwe,” ante ämini bai awæ incæ dobæ edæ eñente cæcædönimpa, ante Itota apænecantapa.

Wacä ingante nê cæcä incæ iïmaï cæquënegä ingampa

⁷ Ayæ godömenque apænedinque, “Mini waocabo iñöminite adobi nê äabi imi ininque bitö imite nê cæcä ingante edæ æbänö cæbaimii. Tömengä gönea mangæ mangæ wodinque ayæ cæninäni inänite inque aadinque pö guicä adinque bitö iñömö edæ, ‘Pö tæ contate cæe,’ ante edæ dicæ ämiyaa. Edæ nê eacä ingampa diyæ täno cænguingä. ⁸ Wæætë nê äabi inömi inte bitö, ‘Botö beyæ cængui ænöninque bitö weocoo topo

cædinqe pönömi æninqe botö cænte bebo ate bitö mänïñedë ate edæ cænte becæbiimpa,' ante cöwë ämaïmipa. ⁹ Ayæ, Cæe, ante bitö änïnö ante tömengä eñente cæcä beyænque bitö, Waa cæbi æmopa, ante dicæ anguïmii. ¹⁰ Ìninqe mönö Awënë, Cæedäni, ante nänö angainö ante eyepæ pönï cædinqe mïnitö adobaï ante pönenguënëmïni ïmïnipa. 'Mönitö në cæmönique inte önömönique ïnömöni inte wënæ wënæ cæte awædö. Mönitö tömengä nänö änonque mäniñque cæte ate tömengä beyæ ante dicæ godömenque nanguï cæmönïyaa,' ante pönente wæquënëmïni ïmïnipa," ante Itota tömengä mïñæ në godäni ïnänite apænegacäimpa.

Itota angä ate diete ganca ïnäni waintai baadänipa

¹¹ Mänï Eedotadëe ïñömö gocæte ante godinqe Itota Tämadiabæ æmætæ Gadideabæ æmætæ tæcæguedë pönï godinqe, ¹² waodäni nänï quëwëñömö tæcæ pöñongä në baate wædäni önompo tipæmpoga ïnäni pö bee tënänitapa. Pö gobæ næ gongæninque pömö adinqe, ¹³ aa pedänitapa.

—Itota në Awënë ïnömi inte eñëmi. Mönitö wædö ante pönö waadete waa cæe, ämönipa.

¹⁴ Äñönänite gomö adinqe Itota,

—Mïnitö guiquënë Wængonguï oncönë godinqe, Wængonguï qui, ante në godönäni ïnänite mïnitö æmontai mäo odömömi acædänimpa.

Angä eñente tömënäni idömæ godinqe ïñontobæ waintai baagadänimpa. ¹⁵ Ìninqe adocanque watapæ todinqe, Wængonguï bitö ñäo apäite baï ïnömi inte edæ waa cæbi æmopa, ante yedæ apænedinqe adodö pongantapa. ¹⁶ Tömengä ïñömö wabæca Tämadiabæ në quëwëningä incæ pö Itota önöwa ïnö guidömëmæ ñongæninque waa ate pönëninque, Bitö pönö cæbi ate waintai baabopa,

ante apænecä. ¹⁷ Eñëninque Itota wæætë angantapa.

—Ïñæmpa mïni cabo önompo tipæmpoga mänimpomïni ïnömïni inte edæ wïi tömämïni waintai baamïnitawo. Ìninqe wadäni önompo æmæmpoque go mënaa go mënaa ïnäni ïñömö edæ ædönö gote dæ änäni. ¹⁸ Ìngä ïñömö wabæca quëwëningä incæ adocanque Wængonguï ingante waa pönï apænecæte ante ponte quëwëñongä wadäni guiquënë tömänäni pönämaï ïnänitawo.

¹⁹ Äninqe Itota tömengä ingante,

—Bitö wede pönënö beyænque waintai baadïmi inte ængæ gantite goe, angantapa.

Ïmaï ïnque bayonte Awënë Odeye poncæcäimpa, ante

(Mäateo 24.23-28, 36-41)

²⁰ Paditeoidi Itota ingante, Wængonguï Awënë æyedënö ponte Awënë Odeye baquingäa, ante Wæyönänite tömengä wæætë, Ïñæmpa wïi waomïni ayömïni Wængonguï Awënë Odeye pongä ingampa.

²¹ Ìninqe, "Tömengä ïñömö ponte ongongampa," ante ayæ wæætë, "Tömengä wayömö gote ongongampa," ante edæ ædö cæte anguïi. Mïnitö weca në quëwëngä incæ Awënë Odeye bayongante waodäni tömengä nempo do quëwënäni apa änewëmïni, ante Paditeoidi ïnänite angacäimpa.

²² Ayæ tömënäni ïnänite ïnque apænedinqe Itota tömengä nänö në emïñænäni ïnänite wæætë apænecantapa.

—Ïncayæ ate mïnitö, Waocä në eñagaingä ingante adoönæque incæ aïnëmönipa, ante wæcæmïnipa. Wæmïni incæte adämaï incæmïnipa. ²³ Wadäni mïnitö ïmïnite, "Ïñömö ongongä tamëñedäni," äninque ayæ, "Wayömö ongongä tamëñedäni," äñönäni mïnitö acæ godämaï ïedäni. Tömënäni mïñæ edæ godämaï ïmäewedäni. ²⁴ Botö ponguïönæ ïnque bayonte botö ïñömö edæ Waobo në eñagaïmo inte edæ ñäo æmataæ æmataæ näinte baï emöninqe

edæ edonque pōni ponte a ongoncæboimpa. ²⁵ Incæte botō ñowo guiquēnē tāno nanguī āmogate wæwencæboimpa. Ayæ ñowodāni iñōmō botō imote edæ Baa āninqe wido cæcædānimpa, ante Itota apænegacāimpa.

²⁶ “Botō Waobo nē ēñagaīmo inte botō ponguīōnæ iinqe bayedē guiquēnē Nōwee wodi Docā nāni angaingā nānō quēwēñedē dodāni nāni quēwengāi bai adobāi edæ quēwenguīnāni inānīpa. ²⁷ Docā Nōwee wodi ñænæ wipoboga oncō bai mænōninqe tōmengā nānō guiganca tōmēnāni ōnonque cænte bete monte quēwengadānimpa. Monguīna, ante ñānonte quēwengadānimpa. Māniñedē edæ tōmēnāni nāni capo bedō wænguinque edæ æpæ do angatimpa. ²⁸ Dooto wodi nānō quēwengāiñedē dodāni adobāi cænte bete quēwengadānimpa. Nē mænāni godongadānimpa. Æinēnāni wæætē godonte ængadānimpa. Minte pæcæimpa, ante cædinque onconcoo mænonte quēwengadānimpa. ²⁹ Incæte Dooto wodi Todōmā iñōmō quēwente nānō tao gogaiōnæ iñonte gonga tōnō atopodemō nanguī ocoi bæcomō cōōnæ cæ bai wææninque māo bæco iinqe māniñōmō quēwēnāni tōmānāni gonte wængadānimpa. ³⁰ Botō Waobo ēñagaīmo inte edonque botō a ongōñedē māninō nāni bæco gonte wængāi bai adobāi bacæimpa, ante āmo ēñēmaīmīnīpa,” ante Itota angacāimpa.

³¹ Ayæ godōmenque apænedinque, “Māniōnæ iñonte mīnitō oncōmanca ongōninqe, Botō māincoo, ante oncōnē wæi guidinque ænāmaī inte wodii winōmāewedāni. Ayæ gōnea cædinque māincoo ante oncōnē ocæ emænte æncæ pōnāmaī imāewedāni. ³² Iñæmpa, Dooto nānōogængā wodi æbānō dadi emænte adinque edæ gonte wængacāi, ante pōnēmīniyaa. ³³ Inguipogaque cōwē quēwencæboimpa, ante nē pōnengā iñōmō tōmengā iñōmō edæ

quēwēnāmaī incæcāimpa. Wæætē edæ inguipoga mōnō guēmante quēwenguīmāmo ante nē wædāmaī ingā guiquēnē tōmengā iñōmō edæ cōwē wænāmaī quēwencæcāimpa, ante āmo ēñēmaīmīnīpa,” ante Itota apænegacāimpa.

³⁴ Ayæ, “Māniñedē woyowotæ i iinqe mēnaa āñōmonque ōñōna adocanque ingante bæi ongonte goyōnāni adocanque ingante emō cæte godāni a ongoncæcāimpa. ³⁵ Ayæ onquiyæna cænguī ante guēa dicaca dacæ dacæ cæte godō wēñōna adocanque ingante bæi ongonte goyōnāni adocanque ingante emō cæte godāni a ongoncæcāimpa.”

³⁶ “Ayæ onguīñæna gōnea guēa cæyōna adocanque ingante bæi ongonte goyōnāni adocanque emō cæte godāni a ongoncæcāimpa.”

³⁷ Ante apænegā ēñente wædinque tōmēnāni wæætē,

—Awēnē, bitō ānō æyōmōnō incæ mænōmaī baquīi.

Āñōnānite,

—Baō æyōmōmē wænte ōñōñōmonte abadæidi wē ongonte edæ do godongāmæ pōnāni bai waodāni, Mōnitō Awēnē pongampa, ante do ēñēninqe godongāmæ poncædānimpa, ante Itota apænegacāimpa.

18

Nē apænte ānongā tōnō owæmpoingā æbānō cædaī, ante

¹ Ayæ tōmengā mīñæ nē godāni cōwē Wængonguī ingante apænedinque wæntæte badāmaī incædānimpa, ante cædinque Itota inguipoga quēwēnāni nāni cæinō ante odōmonte apænegacāimpa. ² “Wayōmō nāni quēwēñōmō adocanque waodāni nāni nē apænte ānongā inte quēwēnongāimpa. Wængonguī ingante guīñēnāmaī inongā inte tōmengā iñōmō, Waodāni æbānō ānāni, ante wædāmaī inongāimpa. ³ Adoyōmō tōmēnāni quēwēñōmō onquiyængā adocanque owæmpoingā inte nē wædongā inte quēwēnongāimpa. Tōmengā guiquēnē māningā nē

apænte adongä weca wæætë wæætë pöninque, Botö imote adocanque nê pilingä iñongante bitö ämi ëñente wæætë nö cæcæcäimpa. ⁴ Ante ancaa pöninque änä ëñente wædinque nê apænte äongä iñömö edæ cöwë Baa Baa angä. Incæte ayæ ate nämäneque tedinque tömengä, ‘Onquiyängä iñömö ancaa angä awædö, äninque, Wængonguï ingante guiñenämaï imo inte botö, Waodäni æbänö änäni, ante wædämaï imo incæte, ⁵ mäningä owæmpoingä pö pö cæcä wædinque botö, Ancaa ponte angä wæcæ wæ, ante wæætë tömengä ingante waa cæcæboimpa. Tömengä ingante nê pilingä ingante botö, Nö cæe, ante wææ ämo wæcæcäimpa.’ Äninque nê Baa äningä incæte owæmpoingä beyæ do waa cæcampa. Mäninque ante odömömopa.”

⁶ Ante odömönte apænedinque mönö Awënë iñömö godömenque apænecantapa. “Nê apænte angä iñömö wîwa cæcä incæte, Tömengä æbänö apæncäa, ante mînitö ëñente pönemæwedäni. ⁷ Wængonguï nänö nê apænte ængäimîni inte mînitö itædë woyowotæ wæætë wæætë aa pe aa pe cæyömîni Wængonguï edæ ædö cæte Baa anguingäa. Wææ ämi ate nö cæcædänimpa, ante äñöminite tömengä iñömö edæ, Ìincayæ ate cæcæboimpa, ante ædö cæte anguingäa. ⁸ Wæætë quingä edæ do cæcæcäimpa. Nê piinte cædinäni iñönänite Wængonguï wææ angä ate tömënäni mînitö imînite wæætë nö cæcædänimpa, ante ämo ëñemäimînipa. Incæte Wao Wëmo ëñagäimo inte botö ponte ayömo wede pönänäni wabänö inguipoga mä ongönäni aquimoo, ante wæbopa,” ante Itota angacäimpa.

Paditeo tönö awënë beyæ nê ænongä æbänö cæda, ante

⁹ Ayæ pancadäniya, Wadäni önönänique iñönäni mönonque nö cæmö imoppa, ante pönëwëninque wadäni inänite piinte adänipa. Mänömainö ante nê änewënäni inänite

Itota, Wængonguï ingante æbänö apænequï, ante ëñencædänimpa, ante imæca quëwëna nänä apæneinö ante odömöninque apænecantapa. ¹⁰ “Waoda mënaa Paditeo tönö odömäno awënë beyæ nê æwengä iñömö Wængonguï ingante apænecæte ante Wængonguï oncö ñænæncö yabæcönë æi guiidatapa. ¹¹ Paditeo iñömö adiyæ gongæninque nämä incæ apænedinque, ‘Wængonguï ëñëmi. Wadäni bai wîi imopa. Botö iñömö godömenque wæmö imopa, ante todinque botö mänömaï beyæ bitö imite waa ate apænebopa, änewengampa. Edæ wadäni guiquënë wacä quï ö ænänipa. Wadäni inänite wîwa cædänipa. Tömënäni nänöogängä inämaï iñongante godö guëa mönänipa. Botö iñömö mäninäni bai inämaï inömo inte botö mäniñömö ongongä odömäno awënë beyæ nê æwengä bai wîi imopa, ante adinque botö Wængonguï bitö imite waa ate pönëninque apænebopa. ¹² Botö iñömö, mëönaa go mëönaa iñonte, mëönaa go mëönaa iñonte bitö imite apænecæte ante cænämaï quëwëmopa. Ayæ botö ænincoo tömancoo ate adinque botö önompo tipæmpoga mänimpocoo mä ongöñoncoo adocooque æninque, Wængonguï quï, ante cöwë pædæ pönömo æ,’ ante apænewengampa.”

¹³ “Odömäno awënë beyæ nê ænongä guiquënë guingo imöninque nämä tæi tæi yatawëninque, ‘Wængonguï ëñëmi, botö nê wîwa cæbo adinque bitö waadete pönö piinämaï incæbiimpa, ämopa,’ angä. Mäninque angampa. ¹⁴ Mänömainö ante odömoncæte ante apænedinque Itota, Nöwo ämo ëñëedäni, angantapa. Ìingä awënë beyæ nê æwengä mänömaï äñongante Wængonguï do, Botö ayömo bitö nö cæbi babipa, ante godö badongä ate tömengä edæ nö pönëngä inte tömengä oncönë gocampa. Wæætë Paditeo, Nämanque wæmö imopa, ante nê änewëningä ingante Wængonguï, Nö cæbi bacæbiimpa, ante godö

badönāmaï incæcäimpa, ante ämo ëñëmaïminipa. Edæ, Nāmanque waa cæbo ïmopa, ante nē ængö cæcä guiquënë edæ wææntodonte bai inte wæcæcäimpa. Wæætë, Nāmanque wënæ wënæ cæbo ïmopa, ante nē apænecä guiquënë edæ ængö cæte bai inte tocæcäimpa,” ante Itota apænegacäimpa.

Wëñænāni inānite gampo cæcadinque Itota waa apænecä

(Mäateo 19.13-15; Mäadoco 10.13-16)

¹⁵ Ayæ ate wadāni, Wëñænāni inānite Itota pönö gampo cæcadinque waa apænecæcäimpa, ante cædinque tömengä weca guiyānāni inānite ænte pö ænte pö cædāni adinque tömengä miñæ nē godāni guiquënë, Ænte pönāmaï iedāni, ante Baa änāni. ¹⁶ Adinque Itota wæætë wëñænāni inānite aa pecä pönönāni tömengä miñæ nē godāni inānite apænecantapa.

—Wëñænāni inānite botö weca ee amini poncædānimpa. Ìñæmpa mänināni nāni pönönö bai adobai pönänāni inte edæ Wængonguï Awënë Odeye nempo do quëwënāni inānipa. Ìninqe mīnitö iñömö wëñænāni inānite Baa änāmaï iedāni. ¹⁷ Edæ nāwangä apænebo ëñëedāni. Wëñængä do pönengä inte Ao angä ingä bai Wængonguï Awënë Odeye ingante do pönëninque nē Ao änāni iñömö tömënanique tömengä nempo guidinque quëwënānipa. Wadāni guiquënë Wængonguï Awënë Odeye ingante Baa ante pönänāmaï ināni guiquënë tömënanāni ædö cæte tömengä nempo guidinque quëwenguināni, ante Itota apænegacäimpa.

Mäincoo nanguï ëacä inte Itota weca ponte apænecampa

(Mäateo 19.16-30; Mäadoco 10.17-31)

¹⁸ Mäniñedë Itota ingante wacä awënë angantapa.

—Awënë nē waa Odömömi apænebi ëñëmoe. Botö æbänö cædinque wänāmaï wantæpiyæ quëwëmaïmoo.

¹⁹ Äñongante Itota tömengä ingante,

—Wængonguï adocanque nē waa cæcä iñongante bitö botö ïmote, Nē waa cæbi ïmipa, ämii. ²⁰ Äninqe Itota godömenque apænecantapa. Ìmaï cædāni, ante Wængonguï nänö wææ angainö ante bitö tömëmi edæ do ëñëmipa. “Bitö nänöogængä ināmaï iñongante bitö godö guëa mönāmaï ie. Wacä ingante godö wänönāmaï ie. Wacä qui adinque awëmö ænāmaï ie. Wacä wënæ wënæ cæcä atabopa, ante godö babæ wapiticæ änāmaï ie. Wæmpocä ingante wäänä inante waa adinque tömëna inate godö waadete cæe,” ante wææ yewæmongacäimpa, ante bitö edæ do ëñëmipa, angantapa.

²¹ Ante apænecä ëñëninque mäningä awënë wæætë,

—Botö mäninö bitö änö bai tömänö ante ëñente cædinque pægaboï ae.

²² Ante apænecä ëñëninque Itota wæætë,

—Adodeque ayæ ëñente cæquënëmi ïmipa, ante ämo ëñëe. Öönädë bitö waëmoncoo ænguinque edæ ïmæca bitö mänincoo tömancoo godonte æninqe bitö æninta wæætë ömæpodāni inte wädāni inānite tömanta godömi æncædānimpa. Ayæ edæ botö ïmote tee empote pöe.

²³ Angä ëñente wædinque tömengä mäincoo nanguï ëadongä inte mänincoo beyænque ante pönëninque mäningä awënë iñömö wæwente bacantapa. ²⁴ Ìninqe Itota tömengä ingante gomö adinque,

—Wængonguï Awënë Odeye nempo guiite quëwencæte ante cædinque waodāni ömæpodāni inte botö miñæ pönānipa. Mäincoo nanguï ëacä guiquënë æbänö cæte ömæpocä inte botö miñæ ponte guiite quëwenguingää, angantapa. ²⁵ Cämeyo iñömö guiyangä ingampa diyæ daagö guiyampite pædæ tacää. Ìninqe cämeyo pædæ tadāmaï ingä bai nē ëacä iñömö adobai ingampa. Tömengä nāmä ayongä ñænængä inongä inte edæ æbänö cæte Wængonguï Awënë Odeye nempo do wäänë guiite quëwenguingää.

²⁶ Mänömainö ante Itota apæneca
ēñēninqe nē ēñēnāni wæætē,

—Īñæmpa mänömaī ī ĩninqe æcānō
wäänē guite quēwengūgāā.

²⁷ Ante wæyönānite,

—Waomīni mīni, Ædō cæte cæquīi,
ante mīni wædō incæ Wængonguī
īñōmō do cæcampa, ante Itota
apæneca.

²⁸ Ēñente wædinque Pegodo,

—Awēnē ēñēmi. Mōnitō ēadincoo
owæ caate bitō miñæ tee empo
pōmōni abipa.

²⁹ Āñongante Itota tōmēnāni ĩnānite
wæætē,

—Mīnitō nāwangā oncodo tao
godinque mīnitō nānōogængā in-
gante mīnitō tōniñadāni ĩnānite
wæmpoda ĩnate wēñænāni ĩnānite
ēmō cæte botō miñæ pōmīnitapa.
Īninqe ĩmaī ante nāwangā āmopa.
Æcānō Wængonguī Awēnē Odeye
beyænque botō miñæ mänömaī pōna
īñōmō, ³⁰ tōmengā ĩñōmō inguipoga
quēwēninqe nānō ēmō cædincoo
adopocoo æninqe ayæ wæætē
godōmenque nanguī æncæcāimpa.
Ayæ ĩncayæ ate oōnædē godinque
edæ tōmengā cōwē wantæpiyæ
wænāmaī quēwencæcāimpa, ante āmo
ēñēmaīmīnīpa, angacāimpa.

*Itota, Wæncæboimpa, ante wæætē
adodō ante apæneca*

*(Māateo 20.17-19; Mādocolo 10.32-
34)*

³¹ Āninqe tōmengā miñæ, Dote,
ante nāni gocabo ĩnānite Itota
nānēnē ænte māocā goyönāni
īmaī ante apænecantapa. “Ñōwo
īñōmō mōnō edæ Eedotadēē ĩñōmō
æicæimpa. Wængonguī beyæ
nē apænegāināni ĩmaīnō ante
yewæmōninqe, Nē Waocā ĩncayæ
ate ēñate pæcā adinque tōmengā
ingante æbānō cæquīnānīi, ante
yewæmongadānīpa. Ñōwo mōnō
Eedotadēē ĩñōmō æi pō gongæmō ate
edæ mānīnō dodāni nāni angāinō baī
edæ do ĩninqe bacæimpa. ³² Botō edæ
mānīmodō ēñagāimo ĩñōmote oodeoidi
botō ĩmote ō æninqe wadāni ĩnānite

pædæ māo godōnāni ō æninqe
tōmēnāni wæætē tawīmæ botonga
towæ tånongadinque botō ĩmote badete
todinque pīininqe wīwa anguīnāni
ĩnānīpa. ³³ Ayæ æmontaimenca

tæi tæi pānāni āmogate wæyōmote
botō ĩmote godōmenque wænōnāni
wæncæboimpa. Wæætē mēōnaa
go adoōnæque ĩñonte edæ botō do
wænīmo inte edæ ñāni ōmæmonte
wæætē quēwencæboimpa,” angan-
tapa.

³⁴ Tōmengā miñæ nē godāni
īñōmō mānīnō, Tōmengā æbānō bate
wæquīngāā, ante adodeque incæ edæ
ēñēnāmaī ingadānīpa. Tōmengā
nānō apænedō edæ wē wodonte
baī ĩñonte tōmēnāni ōnōmoncaque
ēñēninqe, Æbānō ante apænecaā,
ante wīi edonque ēñēnānitapa.

*Itota angā ate babetamongā ĩningā
incæ do waa acampa*

*(Māateo 20.29-34; Mādocolo 10.46-
52)*

³⁵ Itota mānīnō godinque Eedicoo
īñōmō obo pōñongā onguīñængā
babetamō inte nē wædongā inte
taadō wedeca, Pōnōmi æmoe, ante
ānecōnongāimpa. ³⁶ Nanguī ĩnāni
cægōnāni ēñēninqe babetamongā
īñōmō, Quīnante cægōnānīi, ante
wæyongante, ³⁷ Itota Nāatadeta
quēwēningā inte edæ ñōwo wodo
tebæ gocampa, ante apænedāni.

³⁸ Ēñēninqe tōmengā ĩñōmō aa ped-
inque,
—Itota ēñēmi. Bitō Awēnē Dabii
wodi pæīmi ĩnōmi inte botō wædō
ante edæ ñōwo waadete pōnō waa
cæe.

³⁹ Āñongante tāno godāni wæætē
tōmengā ingante, Apocænē inguēnē
ānewēē, ante wææ āñōnāni tōmengā
godōmenque nanguī āninqe,

—Awēnē Dabii pæīmi ĩnōmi inte
edæ botō wædō ante pōnō waadete
waa cæe, ante wæcā.

⁴⁰ Wædinque Itota næ gongæninqe,
Tōmengā ingante ænte māmōmīni
pongædāni. Angā obo ænte
māmōnāni pōñongante Itota,

41 —Æbänö ante ämii. Bitö beyæ quinö cæquimoo.

Äñongante,

—Awënë, wëenë botö emongaï bai cæbi acæboimpa.

42 Angä eñëninque Itota wæætë,

—Wëenë bitö emongaï bai abäwe. Edæ wede pönëmi inte edæ waa bamömipa.

43 Ante nänö äñedë në ba-betamöningä do waa bamöningue Itota miñæ godinque Wængongui ingante, Bitö ñäo apäite bai emömi inte edæ waa cæbi æmopa, ante togacäimpa. Mänömaï cæcä adinque tömänäni adobaï Wængongui ingante waa adinque, Bitö ñäo bai emömi inte waa cæbipa, ante togadänimpa.

19

Itota tönö Taqueo

1 Itota mänii Eedicoo pöningue tæcæ wodo tebæ gocä ingantapa.

2 Mäniñömö adocanque Taqueo nani änogä iñömö tömengä odömäno awënë beyæ në ænani awënë inongä inte nanguï mäincoo eadongä inongäimpa. 3 Tömengä ñöwo, Itota æcänö ingää, ante acæte ante ponte ayongä wadäni nanguï inäni wææ ongönäni adinque, Botö ocäa pönï inömo inte edæ Itota ingante ædö cæte aquimoo, ante wæcantapa.

4 Adämaï inte wæyongante wadäni, Itota iinö gämænö pö wodo tebæ goquingä, ante tededäni eñëninque tömengä Itota ingante acæte ante pogodo täno gote awäa ticämodöwäa nani äwäa daëwa æi næ gongænte a ongongantapa. 5 Itota obo pöningue æmö ayongä Taqueo a ongongä adinque tömengä ingante,

—Taqueo, quingæ wææe. Nöwoönæ edæ pö bitö oncönë eñaquënëmo imopa.

6 Angä eñëninque Taqueo quingæ wææ ti wææninque, Ao, botö oncönë waa poncæbiimpa, ante wat-apæ todinque edæ tömengä oncönë mämongä pongacäimpa. 7 Itota mänömaï cæcä adinque wadäni, Æ

në wiwa cæcä weca Itota quimæ eñacæ gocää, ante tömänäni piinte tedegadänimpa. 8 Taqueo iñömö edæ tömänäni ayönäni ængæ gantite adiyæ ongöningue mönö Awënë ingante,

—Awënë eñëmi. Botö mäincoo tæcæguedencoo pä cædinque ömæpodäni inte wæwänäni inänite ñöwo godömo ænani ae. Ayæ botö wacä qui ante babæ äninque ö æmo wæcä ininque wëenëñedë botö ö ænincoo adopocoo bai incæ godömenque mempoga go mempoga godömo æncæcäimpa.

9 Ante apæncä eñëninque Itota wadäni inänite apænedinque,

—Taqueo adobaï Abadäo wodi pæingä iñongante botö në æmo inömo inte tömengä oncönë nani owocabo quëwencædänimpa, ante ñöwoönæ pontabopa. 10 Botö Waobo eñagaïmo iñömö æmo beyænque quëwencædänimpa, ante cædinque wë womonte bai inäni inänite diqui diqui mincæ pontabopa, ante Itota apænegacäimpa.

Minata nani godonte æinta ante odömongampa

(Mäateo 25.14-30)

11 Mänömaï apæncä eñënanäni inte tömänäni, Itota Eedotadëe obo pongampa, ante adinque, Wængongui Awënë Odeye nempo mönö oo pönï quëwenguinque impa, ante pönente edæ oda cædänitapa. Ininque Itota, Wængongui Awënë æbänö cæquingä, ante eñencædänimpa, ante imæca quëwänäni nani cæinö ante odömöningue apæncantapa.

12 Iimainö ante apæncantapa. “Wacä adocanque awënë odeye pæingä inongä inte, Botö gobæ wabæca gote imæca pancabaa awënë odeye bate pömoedäni. 13 Äninque tömengä ingante në cædäni diete ganca inäni inänite äñete pönäni ate tömengä oodo minata nani äinta wantæpiyæ cæte nani æinta incæ æninque adocanque ingante adotaque pædæ wacä ingante adotaque pædæ godöningue tömänäni inänite

godongä adopota adopota ænänipa. 'Minitö mäninta æninque godonte æi godonte æi cædinque, Yebængæimpa, ante botö gote pompoga cædäni.'
 14 Ante wadæ gocä adinque tömengä nempo quëwënäni guiquënë tömengä ingante piinte cædinque pancadäniya inänite äninque, Minitö tömengä miñæ godinque awënëidi inänite gode äninque, Mäningä iñömö wii mönitö awënë odeye bacæcäimpa, ante wææ ämini eñencädänimpa, ante da godönäni godänitapa," ante apænedinque Itota ayæ godömenque apænecantapa.

15 "Incæte awënëidi do änäni ate awënë odeye badinque tömengä ömæ pongantapa. Pöninque tömengä, Botö beyæ nê cædäni iñömö godonte æi godonte æi cædinque æbänö godömenque nanguï edæ ænte mänänii, ante acæte ante cædinque, Botö oodo minata nê æninäni inänite äñete pödäni, angä. 16 Äñete pönäni ate tömengä weca täno pöningä iñömö, 'Awënë eñëmi. Bitö oodo minata adotaque incæ önompo tipæmpoga mänimpota edæ ñöwo yebænte bapa.'
 17 Ante apænecä eñëninque tömengä ingante, 'Botö imote nê cæbi imi waa cæbi æmopa. Wædænque incæ ænïmi inte bitö ædæmö aate cæbipa, ante adinque botö önompo tipæmpoga nani quëwëñömö quëwënäni iñönänite bitö nempo pönömo æninque nê ämi inte aabi æmoe.' 18 Ante tömënäni awënë angä ate ayængä pöninque, 'Awënë eñëmi. Bitö oodo minata adotaque incæ önompo æmæmpoque mänimpota ñöwo yebænte bapa.' 19 Ante apænecä eñëninque tömengä ingante adobai apænedinque, 'Önompo æmæmpoque nani quëwëñömö quëwënäni iñönänite botö bitö nempo godömo ænte aabi æmoe,' angantapa," ante Itota apænecantapa.

20 Ayæ godömenque apænedinque Itota, "Awënë angä ate tömengä guiquënë pöninque, 'Awënë eñëmi, tömëmi minata æe. Botö weocodë ædæmö wini caadinque wææ aate mantabopa. 21 Äninque, Bitö wii bitö

ñönöni incæ wacä ñönöni incæ ö ænte mämi awædö. Ayæ wii bitö mimi pæ incæ wacä mingä pædi incæ tä pebi imipa, ante pönente wædinque cætabopa. Bitö tæëmö inömi imipa, ante guïñente wædinque botö oodo minata botö æninta wini caapote weocodë ædæmö wææ aabo ae.' 22 Äñongante tömengä awënë iñömö, 'Iñæmpa bitö nê wiwa cæbi imi nämä bitö tededö beyænque bitö imite apænte ancæboimpa. Botö tæëmö imo inte wii botö ñönöni incæ wacä ñönöni incæ ö æmopa. Wii botö mimo pædi incæ wacä mingä pædi incæ edæ do tä pebo imopa. Mänömaï impa, ante bitö dicæ eñënämaï imitawogaa. 23 Do eñëniimi inte bitö eñente edæ cæquënëmi imitapa töö. Botö oodo minata godonte æinta æninque edæ nê godonte ænäni weca baanco weca quïnante wii guidonte æmitawo. Mänömaï cæbi bai botö ocæ emænte pöninque edæ botö qui do æninque wadäni nani guidöninta tönö edæ do æncædömoimpa töö,' angampa."

24 "Äninque godongämæ ongönäni inänite awënë apænecantapa. 'Minitö ñöwo iingä minata nänö nææninta ö æninque edæ minata önompo tipæmpoga nê næængä ingante pædæ godömini æncæcäimpa.' 25 Angä eñëninque tömënäni, 'Awënë iñæmpa, iingä diete ganca minata do mangä apa ämii.' 26 Ante wæyönäni awënë wæætë, 'Iñæmpa nê eadäni inänite tömänäni inänite godömenque godonte ingæimpa. Wæætë edæ eadämaï inte ömæpocä ingä guiquënë tömengä nänö eadancoo wædænque pönï i incæte edæ ö ænte dæ ba wæcæcäimpa. Ante apænebo eñëmaïminipa. 27 Ayæ botö imote nê piinäni guiquënë botö imotedö ante apænedinque, Bitö wii mönitö awënë odeye bacæcäimpa, ante nê Baa änäni guiquënë, tömënäni inänite botö weca ænte pöninque botö ayömo wænömini wæncädänimpa, ämopa,' awënë angantapa. Mäninque ante odömonte apænebopa," ante Itota apænegacäimpa.

Eedotadëe iñömö Itota pongampa
(*Mäteo 21.1-11; Mäadoco 11.1-11;*
Wäo 12.12-19)

²⁸ Mäninganca apænedinque Itota Eedotadëe æicæte ante tãno gocantapa. ²⁹ Godinque Odibowænquidi nãni anquidi ontacamö goinö Betapaguee nãni quëwëñömö obo pöninque Betãnia ganca pöninque Itota tömengä miñæ né goda mënaa inate da godöninque, ³⁰ iïmai angantapa.

—Mänii nãni quëwëñömö ongö amina. Tömëñömö go guiite ayömina bodo wë picængä incæ waocä ingante mongænãmai iningä inte ñãni ñæingä a ongongä acæmïnaimpa. Adinque ñi cæyænte ænte pöeda. ³¹ Ayæ wacä minatö iminate, Quinante ñi cæyæmïnaa, ante wææ angä ininque minatö wæætë, Mönö Awënë nãno ænguënëno ante æmönapa, ante apæneeda, angantapa.

³² Tömengä nãno né da godöna wadæ gote ayöna Itota nãno äni bai bodo wë a ongö. ³³ Adinque ñi cæyæñöna bodo wë né eadäni tömëna inate,

—Bodo wë quimæ ñi cæyæwëmïnaa.

³⁴ Wææ añönänite tömëna wæætë,

—Mönö Awënë nãno ænguënëno ante æmönapa.

³⁵ Ante äna ëñëninque Ao änäni ininque awæ ñã cæyæñömö ñi cæyænte bodo ingante töi töi ænte pönatapa. Ayæ ænte pöninque tömëna weocoo yabæcooque æidämæ wo cæyabædinque äna ate Itota wænömënæca inö æi tæ contate gocantapa. ³⁶ Bodoga æi tæ contate taadonque goyongä tömengä nãno goquinö ante waodäni weocoo wæænö bee podöwadänitapa. ³⁷ Odibowænquidi wæænömëmö iñömö pönömenque pöñongante tömengä miñæ né godäni godongämæ nãni poncabo tömänäni iñontobæ nanguï todinque ogæ tededänitapa. Itota bamönengæ nanguï cæcä atamönipa, ante nãni adinö ante pönëninque Wængonguï ingante waa ate apænedänitapa.

³⁸ —Möni quëwenguinque impa, ante, Badogaa, ante tomönipa. Awënë Wængonguï ëmöwo beyænque pömi ininque bitö toquinque edæ Wængonguï bitö imite waa cæcæcäimpa. Öönädë né quëwengä pönö piyænë cæcänö anguënë. Æibæ pöni quëwëñongä iñömö ñão bai ëmongänö anguënë. ³⁹ Ante nanguï inäni godongämæ godinque ämotamïni ante bai añönäni pancadäniya Padi-teidi inönäni inte Itota ingante,

—Në Odömömi ëñëmi. Bitö miñæ né godäni inänite wææ ämi apocænë inänie.

⁴⁰ Añönänite tömengä wæætë,

—Minitö iminite näwangä ämopa. Waodäni pæ wëenedäni ininque dicacoo incæ botö imote waa ate bai edæ yedæ ämainäni, ante Itota apænegacäimpa.

⁴¹ Ayæ pönömenque pöninque Eedotadëe gomö adinque Itota mäniñömö quëwëñäni inänite ante pönëninque Ca ca wædinque, ⁴² iïmai angantapa. “Minitö iñömö edæ ñöwoönæ mïni gänë pönenguinque botö imote edonque pöni adinque Ao ämïni bai waa incædönimpa. Incæte minitö, Æbänö cæte gänë pönenguiöö, ante edæ wë wodonte bai i ininque minitö adämai iminipa. ⁴³ Incayæ ate minitö iminite né piinäni incæ minitö wææ cæinca gäänë pönö tee mongate godämæ wææ ongönäni adinque minitö edæ ædö cæte tao wodii winonguimïni. ⁴⁴ Botö minitö weca pömo incæte minitö awincaque adinque, Wængonguï ñöwoönæ ponte æncæcäimpa, ante dicæ amïniyaa. Mänömai beyænque né piinäni iñömö minitö iminite bæ tadäni tæ go wææñömïnite wænönäni wæncæmïnimpä. Ayæ wëñænäni wææ cæte iñömö quëwëñönänite tömëñäni inänite edæ wænönäni wæncædänimpä. Dica mïni mænongainca incæ bæ tadäni ate dica adocaque incæ wænömënæca inö ongönãmai ingäimpa,” ante Itota apænegacäimpa.

*Wængonguī oncō tæiyæ waēmō
baccæimpa, ante cæcampa*

(Mæateo 21.12-17; Mæadoco 11.15-19; Wäo 2.13-22)

⁴⁵ Ayæ Wængonguī oncō ñænæncönē yabæcönē go guiddinque Itota mænīñömō nē godonte æncæte ante nē mænāni inānite da tadongā tao goyönānite, ⁴⁶ Ayæ tōmēnāni inānite angantapa.

—Wængonguī beyæ iīmaīnō ante yewæmongatimpa. “Waadāni botō oncōnē pō guiddinque botō imote apænecædānimpa,” ante Wængonguī angā incæte mīnitō wēnæ wēnæ cæmīni beyænque Wængonguī oncō incæ nē awēmō ò ænāni nāni womōincōnē bai wentamō bapa tōō.

⁴⁷ Ayæ iīmō iñō iīmō iñō Wængonguī oncō ñænæncönē yabæcönē go guiddinque Itota odōmonte apænecā ēñēnānitapa. Mænīñömō, Wængonguī quī, ante nē godōnāni ñænæñāni tōnō nē odōmōnāni tōnō tōmēnāni awēnēidi guiquēnē, Itota ingante wænonte wido cæcæimpa, ante ancaa cæyōnāni, ⁴⁸ wadāni tōmānāni, Tōmengā æbānō odōmongāā, ante ēñēē cōnāni adinque awēnēidi wæætē, Tōmengā ingante mōnō ædō cæte wido cæquīi, ante wædinque ñimpo cægadānimpa.

20

*Awēnē imipa, ante æcānō ānāi, ante
Itota ingante ānānipa*

(Mæateo 21.23-27; Mæadoco 11.27-33)

¹ Iīncayæ ate Itota Wængonguī oncō ñænæncönē yabæcönē go guite waodāni inānite odōmonte apænedinque Wængonguī Awēnē ingantedō ante watapæ apænecā ēñēnānitapa. Apænecā ēñēñōnāni, Wængonguī quī, ante nē godōnāni ñænæñāni tōnō nē odōmōnāni iñömō nē aadāni nāni Picæncabo tōnō tōmengā weca ponte ānānitapa. ² Ponte apænedinque,

—Æcānō nē angā inte bitō imite angā cæbii. Bitō imite æcānō, Nē āmi babipa, āna ēñēnīnque cæbii.

³ Ante āñōnānite Itota,

—Botō wæætē mīnitō imīnite āmo ēñente apænemīni ēñēmoedāni. ⁴ Wäo wodi iñömō quīnante æpænē guidongantawo, ante pōnēmīni. Oönædē nē owocā angā ēñente cæcantawoo. Waodānique ānāni ēñente cæcantawoo. Æbānō ante pōnēmīni. Mīnitō wæætē apænemīni ēñēmoedāni.

⁵ Åñongā tōmēnāni iñömō nāni caboque tededinque, “Iñæmpa mōnō, Wængonguī oönædē inō angā Wäo ēñente cæcampa, āmō bai Itota wæætē, ‘Quīnante tōmengā ingante pōnēnāmaī imīnii,’ ante mōnō imonte pīincædongāimpa. ⁶ Ayæ wæætē, Waodānique ānāni ēñente cægacāimpa, āmo bai godongāmæ ongōnāni iñömō, Wængonguī beyæ nē apænecā Wäo wodi ingacāimpa, ante nē pōnēnāni inte tōmānāni mōnō imonte dicaca tacadāni wæncædōmōimpa.”

⁷ Ante pōnente wædinque tōmēnāni wæætē Itota ingante, Wa. Æcāmē angā ēñēnīnque Wäo wodi cægacāi, ante ēñēnāmaī imōnipa, ānāni. ⁸ Wædinque Itota wæætē,

—Botō adobāi, Æcānō nē angā inte pōnō āna ēñēnīnque botō mænōmaī cæboo, ante mīnitō imīnite apænedāmaī incæboimpa, angacāimpa.

*Nē aadāni inguēnēnāni incæ wīwa
cædānipa, ante*

(Mæateo 21.33-44; Mæadoco 12.1-11)

⁹ Ayæ godongāmæ ongōnāni inānite Itota, Wængonguī Awēnē æbānō cæcāā, ante ēñencædānimpa, ante imæca quēwēnāni nāni cæinō ante odōmōnīnque iīmaī apænecantapa. “Onguīñægā adocanque yowementacodē minte pæyonte wadāni omæ wite aate nē tā pedāni inānite, Botō yowementacodē incæ omæ wite aadāni. Aayōmīnite botō, Mīnitō quī, ante pancamonga pōnōmo æncæmīnimpa, angā Ao ānāni ate nē ēacā iñömō edæ wantæpiyæ wabæca quēwencæ gocantapa. ¹⁰ Yowedepo iīnque bayedē nē cæcā ingante nē ēacā iñömō, Bitō yowementacodē nē aadāni weca godinque pancamonga

ämi æninqwe botö weca wæætē mämömi æmoe, angä. Gote pongä adinqwe yowementacodē nē aadāni guiquēnē nē æncæ pōningä ingante bæi ongonte tæi tæi pāninqwe da tadōnāni ömæpocā inte gocantapa. ¹¹ Ayæ wæætē nē ēacā iñömö wacā tōmengä ingante nē cæcā ingante angä gote pongä adinqwe yowementacodē nē aadāni adobai tæi tæi pānāni wæyongante, Guingo imonte wæcæcäimpa, ante godö wiwa cædāni wæyongante da tadōnāni ömæpocā inte gocampa. ¹² Ayæ mēnaa īnate da godongä ömæpoda pōna adinqwe nē ēacā iñömö wacā nē cæcā ingante angä gote pōñongante tōmēnāni godö mæ yete wido cædānitapa,” ante odömōninqwe Itota godōmenque apænecantapa.

¹³ “Mänömaï cædānipa, ante eñente wædinque yowementacodē nē ēacā iñömö, ‘Botö iñömö æbānō cæquēnēmo īmo, ante wædinque, Botö edæ iīmaï cæcæboimpa. Botö wengä onguīñängä botö nē waadecā iñongante da godōmo gocæcäimpa. Tōmēmo wengä da godōmo gocā adinqwe tōmēnāni wabānō guīñente wædinque ee abaiñānipa,’ ante pōnēninqwe da godongä. ¹⁴ Gote dicæ pongä adinqwe yowementacodē nē aadāni guiquēnē, ‘Tōmengä ingampa. Wæmpocā māincoo īni edæ īngä iñömö nē ænguingä ingampa cæmöö. Mönö edæ māo wænömö wængä ate edæ mönō qui babaimpa.’ ¹⁵ Anewēninqwe tōmēnāni tōmengä ingante wææ cæte iñömö yabæque wido cædinque godōmenque wænōnāni wængantapa.”

Ante Itota, Māninqwe ante apænebopa, ante tōmēnāni īnānite angantapa. “Mänömaï cædāni adinqwe yowementacodē nē ēacā iñömö tōmēnāni īnānite æbānō cæquingä, ante pōnēmīni. ¹⁶ Tōmengä edæ do pōninqwe nē aaquēnēnāni īnānite godö wænōninqwe wadāni īnānite wæætē yowementacodē godongä æninqwe nē aadāni bacædānimpa.”

Itota mänömaï angä eñente

wædinque godongämæ ongōnāni iñömö,

—Mänömaï cædāmaï inguēnē anewēē, ante wædānitapa.

¹⁷ Īninqwe Itota tōmēnāni īnānite gomö adinqwe,

—Īñæmpa eñēnāmaï cæmīni iñōmīnite Wængonguī pānāmaï inguingä, ante pōnēmīnitawo. Īninqwe mīnitö, Īmaï ante quīnante yewæmongatimpa, ante pōnēmīni.

“Dica ænte adinqwe, Wænæ wænæ inca, ante nē mænōnāni nāni wido cædinca incæ gomonga waëmonca inca Īninqwe tāno nāni ñōnōnca bæbængapa do bacapa,”

ante yewæmongadānimpa. ¹⁸ Botö iñömö māniï dica waëmonca bai Īnōmo inte āmo eñēninqwe nē wæcā iñömö tōmengä iñömö mānīnca tæ go wææninqwe tobænte wæte bai botö önōwa gäänē ædæ wææncæcäimpa. Wæætē æcānō ingante Wængonguī piinte mānīnca tacacā īnaa tōmengä guiquēnē quīēmē bai yaintai bai go quingānō anguēnē, ante pōnēmīniyaa, ante Itota apænegacäimpa.

¹⁹ Ante nē aaquēnēnāni nāni cæinō ante odömōninqwe Itota apænecā eñente wædinque nē odömōnāni tōnō, Wængonguī quī, ante nē godōnāni ñænænāni iñömö, Īñæmpa mönō imonte piinte angä awædö, ante pōnēnānitapa. Īninqwe tōmēnāni, Mönö ñōwo pōni tōmengä ingante bæi ongongæimpa, ante cædānitapa. Incæte tæcæ bæi ongoncæ cædinque, Wadāni piināni wæcæ wæ, ante wædinque ee adānitapa.

Tæiyæ Awēnē nānō äintamö ante tededānipa

(Māateo 22.15-22; Mäadoco 12.13-17)

²⁰ Īninqwe, Mönö Itota ingante bæi ongōninqwe odömāno gobedōnadodo awēnē nempo godömö æninqwe tōmengä wæætē nē angä inte edæ Itota ingante apænte ancæcäimpa, ante ñænænāni incæ tōmengä ingante cōwä adānitapa. Ayæ wadāni

īnānite ānīnque, Mīnitō Itota mīñæ tee empote gote nōingā ante bai apænedīnque wæætē babæ cæedāni. Babæ cæmīni beyæ tōmengā adod-eque incæ wapiticæ tedecā ēñēnīnque mīnitō ocæ ēmænte ponte apænemīni ēñencæmōnīmpa, ānāni ēñente god-inque ñænænāni nāni ānīnō bai babæ cædānitapa. ²¹ Īnīnque ñænænāni nāni nē da godōnīnāni īñōmō Itota weca pōnīnque,

—Awēnē nē Odōmōmi ēñēmi. Bitō apænedō nō impa, ante do ēñēmōnīpa. Bitō ayōmi mōnō wao-cabo adoyōmō pōnī īmōnīpa, ante ad-inque bitō tōmāmōni īmōnīte adoyōmō pōnī cæbi æmōnīpa. Ayæ, Wængonguī taadō ante bitō nō pōnī odōmōmi īmīpa, ante ēñēmōnīpa. ²² Īnīnque apænebi ēñēmōnīi. Odōmāno go-biedōno beyæ ante tæiyæ awēnē Tetædo tīguitamō nānō ānīntamō ante æbānō wææ yewæmōnte ī, ante ēñencæte ante wæmōnīpa edæ. Godonte edæ waa cæte īntawo. Wæætē wēnæ wēnæ cæte īntawo.

²³ Āñōnānite Itota īñōmō, Tōmēnāni wēnæ wēnæ ancæte ante babæ cædānīpa, ante do ēñente wædīnque,

²⁴ —Deēnadio tīguitamō odōmōmīni aboedāni. Æcānō awīnca bai yewæmōnte badonte ī. Æcānō ēmōwo ante yewæmōnte ongō, ante edæ apænemīni ēñēmoedāni.

Āñongante,

—Awēnē Tetædo awīnca bai yewæmōnte badonte impa. Adocā ēmōwo ante yewæmōnte ongō amōnīpa.

²⁵ Ante apænedāni ēñēnīnque,

—Awēnē Tetædo quī ī īnīnque edæ Tetædo īngante godongæīmpa. Wæætē Awēnē Wængonguī quī ī īnīnque Wængonguī īngante godonguī ī apa ānewēmīni.

²⁶ Ante Itota tōmānāni ayōnānite nō apænecā ēñente wædīnque ñænænāni nāni da pōnōnīnāni wæætē, Mōnō ædō cæte pīnguī, ante guingo imonte wædīnque pæ wēnegadānīmpa.

Ædō cæte ñāni òmæmonguī, ante wædānīpa

(Māateo 22.23-33; Māadoco 12.18-27)

²⁷ Tadoteoidi nē, Waocā wænīnque ñāni òmæmōnāmaī æmæwo wængampa, ante nē ānewēnāni īnte Itota weca pōnīnque, Mōni ānō ante apænebi ēñēmaīmōnīpa, ānānitapa.

²⁸ —Awēnē nē Odōmōmi ēñēmi. Mōnō beyæ ante Mōitee wodi īmaī ante wææ yewæmongacāīmpa. Onguīñængā monte ate wēñæ tapæidāmaī īnte wængā īnīnque tōmengā tōnīñacā incæ owæmpoingā īngante mōnīnque, Botō tōnīñacā wodi wēnāni wæætē pæcædānīmpa, ante tapæicæcāīmpa, ante yewæmongacāīmpa.

²⁹ Īnīnque wadāni īmaī cædānitapa, ante apænemōni ēñēe. Edæ

ōnōmpo æmæmpoque go mengāa nāni caipæ īñōnānite bamōncadengā mōnīnque wēñæ tapæidāmaī mangūiwēnīnque edæ nāñe wængā. ³⁰ Ate ayæmengā wææ adocā īngante mōnīnque wēñæ tapæidāmaī īnte nāñe wængā. ³¹ Ayæ wææ wacā mōnīnque adobāi nāñe wængā, ayæ wææ wacā mōnīnque nāñe wængā, ayæ wææ wacā mōnīnque nāñe, ayæ wææ wacā mōnīnque nāñe, ayæ wææ wacā mōnīnque nāñe wængampa. Ōnōmpo æmæmpoque go mēnaa īnāni owæmpoingā īngante mōnīnque edæ wēñæ tapæidāmaī īnte edæ tōmānāni nāñe wænāni.

³² Ate onquiyængā tōmangā nāñe wængā. ³³ Īnīnque, Mōnō ñāni òmæmonguīōnæ, ante mīni āōnæ īñōnte māningā owæmpoingā īñōmō æcānō nānōogængā baquingāa. Edæ tōmengā īngante īñōmō edæ tōmānāni mangūiwengadānīmpa.

³⁴ Āñōnānite Itota,

—Inguipoga quēwēnīnque edæ mīni waocabo īñōmō do mōmīnīpa. Wacā īngante do godō ñānōmīni mongampa. ³⁵ Wæætē, Mīnguipoga bayonte īnānīque eyepæ īnte ñāni òmæmōnte oōnædē æite quēwēncædānīmpa, ante Wængonguī nānō nē angāināni īñōmō tōmēnāni

mönāmaī īnīnque wadāni īnānite godō
 ñānōnāmaī incādānimpa. ³⁶ Ayæ
 Wængonguī anquedoidi bai īnōnāni
 inte tōmēnāni Wængonguī nānō
 nē angaināni īñōmō ædō cæte
 wæætē wænguīnānii. Tōmēnāni
 nē ñāni ōmæmongaināni īnōnāni
 inte edæ Wængonguī wēñænāni
 īnānipa. ³⁷ Wæætē Mōitee wodi
 incæ ocāñeque bæcoīñeque ante
 nānō yewæmongainta adotaa
 yewæmōninque, Waodāni dobæ ñāni
 ōmæmonte quēwencādānimpa, ante
 edonque odōmongacāimpa. Tōmengā
 iīmaī ante yewæmongacāimpa.
 Mōnō Awēnē īnongā īñōmō Abadāo
 Wængonguī ingaingā inte ayæ Itæca
 Wængonguī ingaingā inte adocā
 Aacobo wodi Wængonguī ingānō
 anguēnē, ante yewæmongacāimpa.

³⁸ Īñæmpa Wængonguī īñōmō nē
 quēwēnāni Wængonguī īnongā inte
 tōmengā nē wængaināni Wængonguī
 īnāmaī ingampa. Wæætē tōmengā
 ayongante do wængaināni incæ
 tōmānāni mīināni quēwēnānipa.

³⁹ Ante apæneyongante nē
 odōmōnāni pancadāniya,
 –Awēnē nē Odōmōmi ēñēmi. Bitō
 nōingā ante apænebi awædō, ante
 apænedānitapa.

⁴⁰ Ayæ wadāni tōmānāni guīñente
 wædinque godōmenque ānāmaī in-
 gadānimpa.

*Codito æcānō Pæingā īnongā ingāā,
 ante*

*(Māateo 22.41-46; Māadoco 12.35-
 37)*
⁴¹ Ayæ tōmēnāni īnānite Itota,
 –Awēnē Dabii wodi Pæingā īnongā
 wææ Codito ingampa, ante quīnante
 ānānii, ante pōnēmīni, angantapa.

⁴² Īñæmpa Dabii wodi incæ tōmengā
 nānō āmotamīni āintaa iīmaī ante
 yewæmongacāimpa.

“Botō Awēnē ingante apænedinque
 Awēnē Wængonguī incæ iīmaī
 ante apænegacāimpa.

Bitō botō tōmēmæ īnō tæ contate a
 ongōe.

⁴³ Ongōñōmite botō bitō imite nē
 pīināni īnānite bæ tate cæbo ate,

bitō ōnōwa gāānē ongōnāni īnānite
 pīnā gāwacæbiimpa,” ante
 Awēnē Wængonguī apænegacāimpa.

⁴⁴ Codito nē Awēnē ingampa, ante
 awēnē Dabii wodi nānō nē angaingā
 īnongā inte edæ adocā Codito īñōmō
 ædō cæte nāēmæ Awēnē Dabii wodi
 Pæingā inguingāā. ante pōnenguēnē
 ānewēmīnii, ante Itota angacāimpa.

*Nē wææ odōmōnāni īnānite Itota
 pūingampa*

*(Māateo 23.1-36; Māadoco 12.38-40;
 Odoca 11.37-54)*

⁴⁵ Ayæ tōmānāni ēñēē cōñōnānite
 tōmengā mīñæ nē godānique īnānite
 Itota apænecantapa.

⁴⁶ “Cædāmaī, ante wææ ante nāni
 yewæmongainta nē ate odōmōnāni
 īnānite mīnitō gomō aedāni. Tōmēnāni
 īñōmō doyæncōo wæmoncōo wēñate
 mongænte todānipa. Waodāni
 nāni godonte æiñōmō cægōñōnānite
 wadāni pō bee tēnīnque tōmēnāni
 īnānite, Nē odōmōmi, bitō imite waa
 amōnipa, ante apænedāni ēñēnīnque
 edæ nē odōmōnāni īñōmō nanguī
 todānipa. Ayæ tōmēnāni odōmōincōnē
 go guīdinque tōmēnāni nāmanque
 ante pōnēnīnque wæmompaa pōnī
 tæ contate todānipa. Ayæ ææmæ
 becæ godinque tōmēnāni, Botō tāno
 bete tocæimpa, ante wæmompaa
 pōnī tæ contate bete todānipa.

⁴⁷ Ayæ owæmpōināni oncō yo
 mongænte bai cædinque ō æwēnāni
 inte nē wææ odōmōnāni īñōmō,
 Botō imote waa acādānimpa, ante
 cædinque Wængonguī ingante nōingā
 apænete bai cædinque babæ cædinque
 wantæpiyæ tededānipa. Tōmēnāni
 edæ nāni nanguī pōnī pante
 wæquinque mānōmaī nāmā beyænque
 ante cædānipa, ante adinque mīnitō
 īñōmō ee gomō aedāni,” ante Itota
 wææ angacāimpa.

21

*Owæmpōingā incæ, Wængonguī quī,
 ante godongampa*

(Māadoco 12.41-44)

¹ Itota Wængonguī oncōnē on-
 gonte gomō ayongā nē nanguī

ëadäni, Wængonguï qui, ante nāni wēnoncadedē pō daga daga wēnāni acantapa. ² Ayæ ayongä on-guiyængä owæmpoingä ömæpocä inte önantamonque mentamonga pō daga wengä. ³ Adinque Itota iïmaï ante apænecantapa.

—Nāwangä ante apænebo ëñëedäni. Wadäni tōmänāni wædænque pōni godonte bai wii eyepæ daga wēñönāni iingä owæmpoingä iñömö ömæpocä inte wædongä incæte godömenque nanguï godonte bai godongä abopa. ⁴ Tömēnāni nanguï ëadäni inönāni inte, Quëwenguinta impa, ante cō cædinque tōmēnāni nāni wii æinentaque ayæ ongöintaque godönānipa. Iingä ömæpocä ingä guiquenē tōmengä nānō quëwenguinta incæ, Wængonguï qui bacæimpa, ante tōmanta edæ daga wengampa, ante Itota apænegacäimpa.

Wængonguï oncö ñæncö bæ tate bacæimpa, ante

(Mäteo 24.1-2; Mäadoco 13.1-2)

⁵ Wëenëhedē Wængonguï oncö ñæncö mænöningue wadäni dicaco waëmoncoo pōni tee bædäni waa ongoncadompa. Ayæ wacoo waëmoncoo pōni ænte pöningue, Wængonguï qui impa, ante pædæ godönāni ongönompa. Nöwo iñömö Itota miñæ nē godāni pancadāniya gomö ayönāni, Dicaco tönö wadäni waa pōni nāni ænte pönoncoo waëmoncoo pōni ongö amönipa, ante tededänitapa. Tedyönānite Itota,

⁶—Mänincoo mīni acoo incæ iincayæ ate tōmanca bæ tadāni wæænca adinque panguimæ panguimæ godinque dica adocaque pōni incæ wænömēnæca ongönāmaï ingæimpa, ante apænegacäimpa.

Oo iinque bacæimpa, ante æbänö ate ëñenguï, ante

(Mäteo 24.3-28; Mäadoco 13.3-23)

⁷ Mänömaï apænecä ëñëinque tōmēnāni wæætē,

—Awënē nē Odömömi ëñëmi. Mänii bitö äninö ante æyedēnö iinque baquii, ante ëñencæte ante wæmönipa. Ayæ,

iïmaï cæbo ate mīnitö, Oo pōni impa, ante ëñencæminimpa, ante Wængonguï æbänö mä cæquingäa, ante apænebi ëñëmönie.

⁸ Äñönāni Itota, “Wapiticæ odömöñönāni mīnitö wæætē, Mönö oda cædāmaï ingæimpa, ante nāmā wææ aedäni. Edæ iïmaï baquï i ataqeedäni. Wadäni nanguï ināni ponte botö emöwo ante apænedinque, ‘Coditobo imopa,’ ante babæ ante tedequināni inānipa. Ayæ, ‘Oo pōni impa,’ ante ponte nanguï ināni tedequināni inānipa. Mänömainö ante ponte tedyönānite mīnitö wæætē tōmēnāni miñæ tee empote godāmaï imæwedäni. ⁹ Ayæ, Wabæca awënē tönö pō bee tēningue wæætedö wæætē cædapa, ante tededäni ëñencæminimpa. Ayæ, Adobæca quëwëningue incæ awënē ingante wido cæcæte ante ængæ gantidānipa, ante tededäni ëñëinque mīnitö iñömö edæ guiñenāmaï iedäni. Mänömaï edæ täno cöwē bacæimpa. Incæte iinque baönæ botö äönæ æiquedö ponguui.”

¹⁰ Ante apænedinque Itota godömenque apænecantapa. “Adobæca quëwënāni iñönānite wabæca quëwënāni ponte bee tēningue guëadö guëa cæquināni inānipa. Adobæca awënē odeye nempo quëwëñönānite wabæca awënē odeye nempo quëwënāni mämö bee tēningue guëadö guëa cæte wænonte wænguināni inānipa. ¹¹ Ayæ wayömö wayömö goinque nanguï pōni ocæ ocæ cæcæimpa. Ayæ woadäni nāni cæinente wænguinque cænguï incæ tōmäa capo wængæimpa. Ayæ quingæ nāni wodonte wënæ wënæ inte wæwenguimämo incæ edæ do pongæimpa. Edæ ancai nāni guiñenguimämo edæ pongæimpa. Öönädē iñömö nāni wo go wo go cæwënguimämo edæ ate bai bacæimpa.”

¹² Ayæ apænedinque Itota, “Mänimämo nāni guiñenguimämo tōmämämo ayæ pönāmaï iñonte mīnitö iminite togænte yao ongonte tōmēnāni odömöincönē ænte go guiidique

apænte äninque mīnitō īmīnite māo tee mōnecædānimpa. Ayæ botō ãmōwo beyæ mīnitō īmīnite tōmāmæ awēnēidi oðeyēidi weca ayæ pancabaa awēnēidi gobedōnadodoidi weca ænte māodāni gote gongæncæmīnimpa. ¹³ Mīnitō awēnēidi weca godinque gongænte apænemīni ēñēninque awēnēidi incæ, Itota æcānō ingāā, ante ēñencædānimpa. ¹⁴ Īninque mīnitō īmīnite awēnēidi weca ayæ ænte godāmaī īñedē incæ mīnitō īmaī ante nāmāneque pōnēdāni. Botō awēnē weca ongōninque æbānō ante wææ anguīmo, ante edæ wædāmaī incæboimpa, ante piyænē cædāni. ¹⁵ Īñæmpa botō pōnō nō apænebo ēñēnimīni inte mīnitō wæætē adodō ante apænecæmīnimpa. Mānōmaīnō ante apænemīni ēñēninque nē pīnāni guiquēnē nō pōni mīni apænedō ante ædō cæte wido cæquinānii. Wæætedō wæætē ædō cæte anguīnānii. ¹⁶ Mīnitō mæmpoidi incæ mīnitō tōniñadāni incæ mīnitō guidēnāni incæ mīnitō æmigoidi incæ, Īngā ingampa, ante godō odōmōninque mīnitō īmīnite wadāni nempo pædæ godōnāni ō æncædānimpa. Æninque pancamīniya īmīnite godōmenque wænōnāni wænguīmīni īmīnipa. ¹⁷ Ayæ, Coditoidi īmīnipææ, ante tōmānāni botō ãmōwo beyænque mīnitō īmīnite nanguī piincædānimpa. ¹⁸ Incæte mīnitō baō incæ ocaguī incæ adoguinque incæ æmæwo ewēnāmaī ingæimpa. ¹⁹ Īninque mīnitō botō imote pīnāmaī inte wæntædāmaī inte ee cæmīni Īninque botō æmo beyænque quēwencæmīnimpa.”

²⁰ Ante apænedinque Itota godōmenque apænegacāimpa. “Wabæca tontadoidi pōninque Eedotadēē godongāmæ wææ ongōnāni adinque mīnitō, Bæ tate nāni wido cæquīmāmo oo pompa, ante do edæ ēñencæmīnimpa. ²¹ Mānōmaī cædāni adinque Oodeabæ quēwēmīni īñōmō ānanquidi do wodīi winonte æibæwedāni. Ayæ Eedotadēē quēwēmīni īñōmō edæ yabæque

taobæwedāni. Ayæ yabæque quēwēmīni inte Eedotadēē īñōmō pō guidāmaī imæwedāni. ²² Māniñedē edæ Wængonguī nānō panguiōnæ incæ Wængonguī beyæ nāni yewæmonte angaiōnæ incæ ĩnque baquinō anguēnē. ²³ Māniōnæ ĩnque bayedē edæ yæðemadā ĩnāni tōnō goōmæ nē gānōnāni tōnō tōmēnāni nāni wæquīmāmo baquinō anguēnē. Īmæca quēwēnāni edæ māniñedē nanguī pōni caate wæquināni ĩnānipa. Īdægoidi ĩnānite edæ nanguī pōni piinte cæquinō anguēnē. ²⁴ Pancadāniya ĩnānite yaēmenca wido tadāni wænguīnāni ĩnānipa. Ayæ pancadāniya ĩnānite bæi ongonte māo wabæca ænte goquināni ĩnānipa. Wængonguī doyedē apænedinque, Oodeo ĩnāmaī ĩnāni ĩnque nāni cæpoga cæcædānimpa, angacāimpa. Īninque tōmengā nānō angaimpoga ĩnque baganca oodeoidi ĩnāmaī ĩnāni incæ Eedotadēē īñōmō pōninque nanguī cægōninque pinā gāwate bai bæ tadāni wæquīmīni ĩmīnipa, ante apænebo ēñēmaīmīnipa,” ante Itota apænegacāimpa.

Waobo ēñagaīmo inte botō īmaī ponte cæcæboimpa, ante

(Māateo 24.29-35, 42-44; Māadoco 13.24-37)

²⁵ Ayæ, “Oo pōni ĩmpa, ante edæ ēñencæmīnimpa, ante cædinque Wængonguī angā ate nænque tōnō apāicā nēmoncoo mā pōni edæ wacoo bai bacæimpa. Inguipoga guiquēnē ñænængade pōni gāwapæntibæ tadōmengadæ mængonta mængonta cædinque nanguī ā ēñente wædinque tōmāmæ quēwēnāni edæ, Æbānō cæquīmōō, ante edæ nanguī pōni guīñente wæquināni ĩnānipa. ²⁶ Ayæ woadāni æmō ayōnāni ōnædē tæi ongongaincoo incæ wanæ wanæ cæte bai wapiticæ go ate adinque tōmēnāni ancai guīñente wædinque, Inguipoga mōnō quēwēñōmō edæ quīēmē bai bacæimpa, ante wædinque ĩñontobæ nangæ bate wæcædānimpa.

27 Māniñedē edæ botō Waobo nē ēñagāimo inte boguimancodē pōninque tæi pōni piñæmo iñinque edæ ñāo apāite bai waēmō emonte wææmo acædānimpa. 28 Iñinque mǎnōmaī tæcæ ba ate wædinque mīnitō ocabo guinī æmencadinque, Badogaa, āninque edæ, Oo pōni mōnō abæ tawænte goquinque impa, ante āmæwedāni,” ante Itota apænegacāimpa.

29 Ayæ, Wængonguī Awēnē oo poncæcāimpa, ante æbānō ēñenguīi, ante ēñencædānimpa, ante Itota imæca quēwēnāni nāni cæinō ante odōmōninque iīmaī apænecantapa. “Iigowæ aedāni. Ayæ quīwæmē incæ tōmāwæ aedāni. 30 Ōñabo tǎnā nā boca adinque mīnitō iñōmō, Ōñabo nānō bocaīnepo inte nænque nāwantedæ baquinque bocapa, ante pōnēninque edæ do ēñēmīnīpa. 31 Ayæ adobaī mǎninō botō apænedō bai do edæ ba adinque mīnitō, Wængonguī Awēnē Odeye do odemō pōni ongōninque inguipoga oo poncæcāimpa, ante ēñencæmīnīpa,” angacāimpa.

32 Ayæ apænedinque Itota, “Nāwangā āmopa. Nōwomīni mīimīni quēwēninque wænte godāmaī iñōmīni edæ mǎninō botō āninō bai tōmānō edæ do iñinque baquinō anguēnē. 33 Edæ oōnædē ongōñōmō inguipoga tōnō wo ewente bai dæ ba incæte botō angainonque guiquēnē dæ badāmaī inte edæ cōwē tæi ongongæimpa,” ante apænecantapa.

34 Ayæ, “Mīnitō iñōmō edæ, Mōnō quingāmē bai wīwa quēwēmō iñinque mōnō mīmō omædēmō bate wæcæ wæ, ante nāmā wææ aedāni. Tī nāmæ bete quidi quidi dowāninque mīmō omædēmō bacæ wæ, ante nāmā wææ aedāni. Ayæ, Inguipoga quēwēmō inte quīēmē beyænque wædinque mīmō omædēmō bacæ wæ, ante nāmā wææ cæedāni. Mīmō omædēmō inte wæyōmōnte mǎniōnæ wīi iñontobæ pō wæcæimpa, ante mīmō omædēmō badāmaī ingæimpa, ante nāmā wææ cæedāni. 35 Iñæmpa waodāni tōmānāni inguipoga tōmāmæ quēwēñōnānite edæ

iñontobæ ba wæcædānimpa. 36 Iñinque woyowotæ itædē cōwē wānō cōninque mīnitō Wængonguī ingante cōwē apæneedāni. Mīnitō, Mǎninō iñinque ba adinque mōnō eyepæ inte aamō cæte wodi wīnongæimpa, ante Wængonguī ingante apæneedāni. Ayæ, Waocā nē ēñagaingā weca mōnō eyepæ gongængæimpa, ante adobaī edæ Wængonguī ingante apæneedāni,” ante Itota angacāimpa.

37 Itota māniñedē Wængonguī oncō ñænæncōnē iīmō iñō iīmō iñō yabæcōnē go guīite odōmōnte apænecā ēñēnāni ate tōmengā wæætē gāwadecæ iñō gāwadecæ iñō tao godinque Odibowænquidi æite owodongāimpa. 38 Ayæ tōmengā Wængonguī oncō ñænæncōnē yabæcōnē ongōnte apænecā ēñencæte ante tōmānāni wæætē baānæ iñō pō baānæ iñō pō bee tēnōnānimpa.

22

Itota ingante bæi ongongæimpa, ante cædānīpa

(Māateo 26.1-5, 14-16; Māadoco 14.1-2, 10-11; Wāō 11.45-53)

1 Pāo yedæ æmpoquī omæmō i nāni cænguīōnæ ante oodeoidi, Patowa mōnō wodo pænta gogaīōnæ ææmæ oo pōni bacæimpa, ante cædōnānimpa. 2 Wængonguī quī, ante nē godōnāni ñænænāni tōnō nē odōmōnāni iñōmō, Itota ingante mōnō wido cæcæimpa, ante cōwē cædōnānimpa. Incæte, Wadāni piñāni wæcæ wæ, ante guīñente wædinque tōmēnāni māniñedē, Mōnō æbānō cæte awēmō bæi ongongæimpa, ante wægadānimpa.

3 Ayæ Itota miñæ nāni, Dote, ante gocabo iñōnāni Codaa Ica diote nāni ānongā adocā inongāimpa. Tatāna māniñedē tōmengāa pō guīicantapa. 4 Iñinque nē godōnāni ñænænāni tōnō Wængonguī oncō nē wææ wānōnāni awēnēidi iñōmō godongāmæ ongōñōnāni Codaa tōmēnāni weca godinque iīmaī ante apænecantapa. Itota æyōmōnō ongongāa, ante botō æbānō odōmōnte

pædæ pönömo ate ænguimīni. Angä eñēninque tōmēnāni tōmengä tönō mäninō ante godongāmæ tede-gadānimpa. ⁵ Tōmengä, Odōmonte pædæ pönömo æncæminimpa, ante apæneyongante tōmēnāni nanguī todinque wæætē, Tiguitamō padatamō pönömōni æncæbiimpa, ante apænedāni. ⁶ Eñēninque tōmengä Ao ante wadæ godinque, Wadāni adāmaī iñōnānite botō æbānō cæte iñāni inānite awēmō odōmonte godōmo ænguīnāni, ante cōwä adinque cægacäimpa.

Awēnē Itota päö tönō owæta godongä cænte bedānīpa

(Māateo 26.17-29; Māadoco 14.12-25; Wäö 13.21-30; 1 Coodintoidi 11.23-26)

⁷ Päö yedæ æmpoqui ömæmō i nāni cænguionæ iñonte wodo pænta gogaiönæ bai i iñinque Patowa ææmæ bete cænguionæ do iñinque batimpa. Mäniönæ iñonte oodeoidi cōwē cæningä codotedo ingante wænōninque, Wængongui qui, ante godonguēnēnāni iñōnānimpa. ⁸ Iñinque Pegodo tönō Wäö inate da godōninque Itota iīmaī angantapa.

—Mīnatō inönō gote, Patowa ææmæno impa, ante ænōmīna ate mönō cængæimpa.

⁹ Angä eñēninque tōmēna,

—Æcōnēnō go guiite æænonguimōna, ämii.

¹⁰ Äñōnate tōmengä wæætē,

—Waa aeda. Mīnatō mäni nāni quēwēñōmō go guiyōmīna onguīñängä incæ cadabodē æpæ iyænte næænte gocä adinque tōmengä ingante edæ tee empote goeda. Tee empo goyōmīna tōmengä oncōnē go guicä adinque, ¹¹ mīnatō wæætē oncō nē ēacä ingante iīmaī ante äeda. “Mönō Awēnē nē Odōmongä incæ bitō imite iīmaī angampa. Bitō æcōnēnō ämi guidīnque botō nē emiñænāni tönō Patowa ææmæ ante cænguimōnii, angampa,” ante apæneeda. ¹² Mänōmainō ante apænemīna eñēninque nē oncō ēacä iñōmō æmongapaa mäi

goyōmīnate oncō ñænæncō awæmpaa do nänō cōnōincō odōmongä adinque mīnatō mänincōnē tōmäā eyepæ cæcæminaimpa, ante Itota da godongä godatapa.

¹³ Mänōmaī angä godinque apæneyōna, Itota nänō änō bai adobai tōmäā batimpa, ante adinque tōmengä nänō nē emiñænāna, Patowa ææmæno impa, ante cædatapa.

¹⁴ Iñinque ææmæno nāni cæñedē iñinque bayonte Itota awæmpaa gäänē pō tæ contayongä tōmengä nänō nē da godōnīnāni godongāmæ pō tæ contadāni. ¹⁵ Adinque Itota tōmēnāni inānite apænecantapa.

—Botō iñōmō caate wæte wænāmaī iñedē mīnitō tönō godongāmæ Patowa ante cænte tocäimpa, ante cæinente nanguī wætabopa. ¹⁶ Apænebo eñēedāni. Botō Wængongui Awēnē inōmo inte Awēnē Odeye badinque mäniñedē ate waodāni inānite æmæwo pōni ata cæpocæboimpa. Māninganca botō ata cæpoganca botō ñōwo, Wængongui Awēnē dodāni inānite ata cæpodinque wodo pænta gogacäimpa, ante Patowa ææmæno ñōwo iñinque cæncæ cæbopa.

¹⁷ Äninque ayæ Itota bequimæ owætaca bæi ongonte æninque Wængongui ingante waa ate apænedinque tōmēnāni inānite angantapa.

—Mīnitō owæta iinta æninque godongāmæ beedāni. ¹⁸ Ämo eñēedāni. Yowepæ ñōwo bedinque botō Wængongui Awēnē inōmo inte Awēnē Odeye botō baganca edæ ñōwo æmæwo bebopa.

¹⁹ Ante apænedinque Itota päö æninque Wængongui ingante waa ate pönente apænedinque pä æninque pædæ godōninque apænecantapa.

—Iī päö botō baö bai impa. Botō, Mīnitō quēwencæminimpa, ante botō baö godonte bai cædinque wæncæboimpa. Botō pä ænte pædæ pönömo bai mīnitō iincayæ ate botō imote ante pönēninque adobai cæte wacä ingä wacä ingä pædæ godonte cæedāni, angantapa. ²⁰ Mänōmaī

angä iinque cænäni ate owæta adobai ænte apænedinque tömengä,

—Botö wepæ iimæ bai impa. Wængongui do apænedinque, Botö pönö cæbo ate mīnitö Ao ämīni iinque mönö godongämæ waa cæte quëwengæimpa, angacäimpa. Nöwo adobai botö wepæ mīnitö beyæ pædæ godömo ate mīnitö Ao ante æmīni iinque mönö godongämæ waa cæte quëwengæimpa. ²¹ Incæte botö imote nē pönö odömonte pædæ godonguingä iñömö botö önompo gäänē cænguimpaa adoyömö ongö aedäni. ²² Wængongui do nänö angainö bai botö nē Waobo eñagai mo inte wænte gocæboimpa. Näwangä impa. Incæte botö imote nē pönö odömonte pædæ godonguingä iñömö edæ tömengä nänö nangui wæwenguinque edæ mänömaï cæcä ingampa töö.

²³ Ante Itota apæneyongä tömēnāni nāni caboque tededinque edæ, Æcänö ingante ante apænecää, ante wædänitapa.

Æcänö yæcado ongonguingää, ante tededänipa

²⁴ Ayæ adobai, Mönö cabo iñömönte æcänö ñænængä inte edæ yæcado ongönte bai nē angä baquingää, ante wædinque tömēnāni wæætedö wæætē äninque nangui tedewēnāni.

²⁵ Adinque Itota tömēnāni inänite, “Idægoidi inämaï inäni awēnēidi iñömö tömēnāni nempo quëwēnāni inänite, Botö ämo eñente cædäni, ante nangui piinte änewēnānipa. Incæte nē piinte änewēnāni iñönänite tömēnāni nempo quëwēnāni wæætē, Mönitö awēnēidi nē Pönö Cædäni inänipa, ante babæ ante pemöwēnānipa.

²⁶ Wæætē mīnitö guiquēnē inguipoga awēnēidi nāni cæi bai cædämaï iedäni. Mīni cabo incæ nē yæcado ongongä inte yæmiñængä bai baquēnengä ingampa. Ayæ nē angä inongä inte wacä beyæ nē cæcä bai baquēnengä ingampa.

²⁷ Æbänö ante pönēmīni. Æcänö ingante, Awēnē bai ingampa, ante

nangui waa adänii. Nē cænguimpaa gäänē tæ contate cængä ingante waa adänitawo. Wæætē awēnē beyæ ante ænte mämö pönongä ingante waa adänitawo. Iñæmpa nē contactä ingante näwangä waa adänipa. Incæte botö iñömö önömoque bai cædömo inte mīnitö weca pöninque nē ænte mämö pönongä bai inte nē pönö cædömo imopa,” ante Itota apænecantapa.

²⁸ Ayæ apænedinque, “Botö caate wæwēñömöte mīnitö iñömö botö tönö godongämæ iñacabo cædimīni iminipa.

²⁹ Iinque botö Mæmpo botö imote, Awēnē Odeye bacæbiimpa, ante nänö pönö cægaï bai botö wæætē, Botö tönö iñacabo cædimīni inömīni inte mīnitö awēnē odeyeidi adobai bacæminimpa, ante pönö cæcæboimpa. ³⁰ Ayæ,

Botö nē Awēnē Odeye bayömöte mīnitö botö awæmpaa gäänē tæ contadinque godongämæ edæ cænte becæminimpa, ämopa. Ayæ idægoidi önompo tipæmpoga go mencabodäniya iñönänite mīnitö awēnē tæ containpaa tæ contadinque tömēnāni inänite nē apænte ämīni bacæminimpa,” ante tömengä miñæ nē godäni inänite Itota apænegacäimpa.

Pegodo incæ, Dicæ abogaa, ante anguingä ingampa, ante

(Mäateo 26.31-35; Mäadoco 14.27-31; Wäö 13.36-38)

³¹ Itota ayæ,

—Timönö, eñēmi. Timönö, bitö imite ämopa. Waocä tömēmö ænte wancæ wancæ cæcä ontapo wææ bai mīnitö iminute Tatäna incæ bæi ongönte wēnæ wēnæ cæcæte ante angampa.

³² Wæætē, Bitö wede pönēninque nangæ badämaï incæbiimpa, ante botö do edæ Wængongui ingante apænetabopa. Iinque bitö iñömö edæ iincayæ ate botö gämænö ocæ emænte ponguimi imipa. Pöninque, Bitö töninadäni wæætē tæi piñænāni bacædänimpa, ante tömēnāni inänite godö töö æmænte bai cæe.

³³ Ante apænecä eñēninque Timönö wæætē,

—Awënë eñëmi. Bitö imite tee mönedäni ininque botö do bitö tönö go guilbaïmopa. Bitö imite wänönäni wämi ininque edæ botö bitö tönö do wämaïmopa.

³⁴ Ante apæ necä eñëninque Itota angantapa.

—Pegodo, bitö imite ämo eñëe. Tawadiya ñowoönæ ayæ pedämaï iñonte bitö botö imotedö apænedinque, Dicæ abogaa, ante mempoga go adopoque anguïmi imipa, ante Itota apænegacäimpa.

Botö caate wæquïmämo oo baccäimpa, angampa

³⁵ Ayæ wæætë tömënäni inänite,

—Botö wëneñedë mïnitö iminite da godöninque, Godonte æinta da wente ænguincadedë ænämaï inte goedäni, antabopa. Mäincoo da wente ænguï næænämaï inte awæncata næænämaï inte goedäni, ante botö da godömo godinque mïnitö ænguënëmini inte wæmïnitawo.

Äñongante,

—Ænguënente wädämaï intamönipa, änänitapa.

³⁶ Itota wæætë tömënäni inänite,

—Ñowo iñömö æcänö godonte æinta da wente ænguincade mäna tömengä mänincade næænte gocæcäimpa. Ayæ mäincoo da wente ænguï adobaï næænte gocæcäimpa. Ayæ yaëmë mänämaï ingä inte wecoo yacoo në mäningä wacä ingante godonte æninque wæætë yaëmë godonte æncæcäimpa. ³⁷ Iïmaï ante dodäni näni yewæmongainö bai botö imote cæcædänimpa. “Në eñënämaï näni cæcabo iñönänite tömengä adocä inongä ingampa, ante änänitapa,” ante yewæmongatimpa. Mänömaï impa, ante pönëninque botö iïmaï ämopa. Botö imote æbänö cæquïnänii, ante näni yewæmongainö bai botö imote tömänö inque cæquïnö anguënë. Botö imote ante näni yewæmongainö bai cædinque ñowo iñömö edæ eyepæ ba aedäni.

³⁸ Ante apæneyongante tömënäni,

—Awënë, yaëmë mäa mæ ongö ae. Änänitapa. Tömengä wæætë,

—Idæwaa, angacäimpa.

Guetëmänii iñömö Itota Wængonguï ingante apæ necampa

(Mäateo 26.36-46; Mäadoco 14.32-42)

³⁹ Iinque apænedinque Itota wadæ godinque cöwë nänö æidö bai æidinque Odibowænquidi go æiyongante tömengä miñæ në godäni tee empo æigadänimpa. ⁴⁰ Æi cöwë nänö æi ongöñömo pöninque tömënäni inänite,

—Mïnitö ñowo Wængonguï ingante nämä beyænque apænedinque, Mönitö wïi wænæ wænæ cæinëmöni bacæmönimpa, ante apæneedäni.

⁴¹ Äninque Itota wadæ godinque dica mönö wido cæganca mäninganca godinque da guicapodinque Wængonguï ingante apæ necantapa. ⁴² Apænedinque, “Mæmpo eñëmi. Bitö Ao äninque edæ ti nä wænguïmæ bai ö ænte bai cædinque botö imote edæ, Wænämaï incæbiimpa, ämi ininque botö edæ waa tobaimopa. Incæte botö änönö bai wïi cædinque wæætë tömëmi änönö bai cæe, ämopa.”

⁴³ Ante apæneyongä Wængonguï töönædë nänö da pönöningä anquedo Itota weca ponte a ongöninque, Tæi piñænte entawencæbiimpa, ante cædinque pönö töö æmænte bai cæcantapa. ⁴⁴ Incæte Itota iñömö edæ nanguï wæwente badinque Wængonguï ingante ancaa apæ necä ininque edæ tömengä owæmæ wepæ gowete bai tadinque onguipoiya petæ petæ wææntapa.

⁴⁵ Ayæ inque apænedinque tömengä ængæ gantite godinque tömengä miñæ në pöninäni weca ponte ayongä tömënäni nanguï wæwente wædinque mö ñönäni. ⁴⁶ Adinque edæ tömengä tömënäni inänite,

—Iñæmpa möwo mömïni. Edæ ængæ gantidinque, Wænæ wænæ cæinente badämaï incæmönimpa, ante Wængonguï ingante apæneedäni, angacäimpa.

Itota ingante bæi ongonte ænte godänipa

(*Mäateo 26.47-56; Mäadoco 14.43-50; Wäo 18.2-11*)

⁴⁷ Ante tæcæ apæneyongä nanguï inäni iñontobæ ponte a ongönänitapa. Itota miñæ nani, Dote, ante gocabo iningä incæ Codaa iñömö tano beyænte pöninge Itota ingante waa cæte bai queë bemoncæte ante pongä. ⁴⁸ Adinque Itota tömengä ingante,

—Codaa iñæmpa, botö Waobo ëñagaïmo iñömote bitö, Ìingä ingampa, ante queë bemöninge odömonte pædæ godömi ænguïnänii, angantapa.

⁴⁹ Mänömaï cæcæ cædänipa, ante adinque tömengä miñæ në godäni guiquënë,

—Awënë, yaëmenca godö tao cæquïmöni ämii, änänitapa.

⁵⁰ Wængonguï qui, ante në godongä ñænængä pöni inongä ingante në cæcä iñömö mäniñömö ponte a ongongä adinque Itota miñæ në pöningä adocanque wæætë yaëmë æninque mäningä önömonca tömëmonca inö wangö tamoncacä wæcantapa. ⁵¹ Adinque Itota wæætë,

—Idæwaa, äninque gampo cæmoncacä waa bamoncagacäimpa. ⁵² Ayæ, Wængonguï qui, ante në godönäni ñænænäni incæ Wængonguï oncö ñænæncö ante në wææ wänönäni incæ në aadäni nani Picæncabo incæ tömengä ingante æncæte ante në pöninäni iñönänite Itota tömënäni inänite, Botö miñæ në godäni tönö botö dicæ awënë ingante wido cæcæte ante cæbogaa. Incæte minitö, Në wido cæcä ingampa, ante bai cæmini awædö. Edæ canta teëmenca mini badöinca tönö yaëmë næænte botö weca pöminii.

⁵³ Ìñæmpa botö æpogadö Wængonguï oncö ñænæncönë iimö iñö iimö iñö yabæcönë go guiidique minitö weca a ongöñömote minitö wæætë bæi ongoncæte ante pædæ gopodämaï iminitapa. Edæ ñöwo wëmö mäë mämönte bai iñonte edæ mini në wënæ wënæ cæyedë impa, ante apænegacäimpa töö.

Pegodo incæ, Dicæ abogaa, angampa

(*Mäateo 26.57-58, 69-75; Mäadoco 14.53-54, 66-72; Wäo 18.12-18, 25-27*)

⁵⁴ Ìninque Itota ingante bæi ongonte ænte mäo, Wængonguï qui, ante në godongä ñænængä pöni inongä weca ænte godänitapa. Gobæ godäni ininque Pegodo iñömö ayæ ayæ gocantapa. ⁵⁵ Ñænæ oncö yacömoyæ iñömö wææ wänönäni gonga tänonte godämæ pö tæ contadäni adinque Pegodo tömënäni weca pö tæ contacä.

⁵⁶ Adinque në cæcä onquiyængä tömengä gongapamö ongongä adinque tömengä ingante cöwä adinque, —Ìingä adobai mäningä miñæ tee empo gocä ingantapa.

⁵⁷ Äñongante Pegodo, —Onquiyæmi ëñëmi. Botö mäningä ingante dicæ abogaa, angantapa.

⁵⁸ Ayæ wantæ ate wacä pöninge Pegodo ingante waa adinque, —Bitö adobai tömengä miñæ në gobi imitapa töö.

Ante apænecä ëñëninque, —Onguïñæmi ëñëmi. Botö dicæ tömengä miñæ gobogaa. Edæ wabo imopa.

⁵⁹ Ayæ wacä adobai wantæ wantæ adoque ooda go ate äninque, Ìingä iñömö Itota miñæ në godingä ingampa. Näwangä impa. Gadideabæ quëwëningä inte edæ pongä aedäni.

⁶⁰ Angä ëñëninque Pegodo, —Onguïñæmi, quiëmë bai apænebipa, ante botö ëñënämaï imopa.

Ante tæcæ mënea äñongante tawadiya iñontobæ aa aa pecantapa.

⁶¹ Itota incæ tömengä gämænö dadi ëmænte pömö acä adinque Pegodo iñontobæ, Æ, äninque, “Tawadiya ñöwoönæ pedämaï iñonte bitö botö imotedö ante wadö ate apænedinque, Dicæ abogaa, ante tededinque mempoga go adopoque anguïmi imipa,” ante Itota wëenëñedë apænecä ëñentabopa. ⁶² Ñöwo nanö pequinque do pecampa, ante pönente wædinque Pegodo oncodo tao godinque Ca ca wægacäimpa.

Itota ingante badete todinque cædänipa

(*Mäateo 26.67-68; Mäadoco 14.65*)

⁶³ Itota ingante nē wææ wänönäni iñömö tömengä ingante mäniñedē badete todinque edæ tæi tæi pänänitapa. ⁶⁴ Ayæ tömengä awinca wini cæmöninque tömēnāni,

—Æcänö bitö imite tæi tæi pänaa, ante Wængongui apænecä eñente ate apænebi eñēmönie.

⁶⁵ Ante badete todinque quiēmē bai ante godö babæ änewänänitapa.

Nē apænte änäni weca Itota ongongampa

(*Mäateo 26.59-66; Mäadoco 14.55-64; Wäö 18.19-24*)

⁶⁶ Näö bayedē, Wængongui qui, ante nē godönäni ñænænäni tönö nē odömönäni iñömö idægoidi inänite nē aadäni näni Picæncabo inönäni inte edæ godongämæ go bee tēninque tömēnāni näni apænte anguimpaa gäänē ongöñönäni Itota ingante tömēnāni weca töö æmænte ænte mäo gönönäni gongængantapa.

⁶⁷ Tömengä ingante nē apænte änäni iñömö,

—Apænebi eñēmönie, äninque, Bitö mönitö Codito inömi imitawoo.

Äñönänite Itota wæætē,

—Botö apænebo ininque mīnitö wæætē eñenämaï imäimīnīpa. ⁶⁸ Ayæ wæætē botö eñencæte ante ämo ininque mīnitö wæætē botö imote apænedämaï imäimīnīpa. ⁶⁹ Incæte ämo eñeedäni. Botö iñömö nē Waobo eñagaïmo inte iñcayæ ate Wængongui nē tæi Piñængä tömēmæ inö tæ contate ongoncæboimpa.

⁷⁰ Ante apænecä eñëninque tömänäni,

—Iñæmpa, bitö Wængongui Wëmi imitawoo.

Äñönänite,

—Botö mänimodö imopa. Tömēmīni edæ mänömaï äninque edæ nö apænemīnīpa.

⁷¹ Ante apænecä eñëninque,

—Idæwaa. Tömengä nämä incæ edæ, Wængongui Wëmo imopa, ante wænæ wænæ apænecä do eñentamompa. Ininque mönö ñöwo edæ, Wadäni,

Itota wænæ wænæ cæcampa, ante apænecädänimpa, ante quīnante godömenque diqui diqui minguii, ante wægädänimpa.

23

Pidato weca gote Itota ongongampa

(*Mäateo 27.1-2, 11-14; Mäadoco 15.1-5; Wäö 18.28-38*)

¹ Ininque mäniñömö ongönäni tömänäni godongämæ ængæ gantidinque Itota ingante awënë Pidato weca ænte gogädänimpa. ² Godinque tömēnāni, Itota iūmaï nē wænæ wænæ cæcä ingampa, ante pūininque,

—Mönitö cöwä ayömöni iingä iñömö wapiticæ odömönte apænecä eñëninque mönitö ömæ quëwēnāni oda cæte eñenämaï cædäni wæmönīpa. Edæ odömāno awënë Tetædo nänö ärinta godönāmaï iedäni, ante tömengä wææ angampa. Ayæ tömengä, Botö iñömö Awënë Odeye Coditobo inömo imopa, ante nämä ante angampa töö.

³ Ante godö pūināni eñëninque Pidato iñömö Itota ingante,

—Bitö oodeoidi Awënë Odeyebi imitawoo.

Äñongante Itota wæætē,

—Bitö tömēmi änö bai botö mänimodö imopa, angantapa. ⁴ Ininque nē godönäni ñænænäni tönö wadäni godongämæ ongöñönänite Pidato wæætē,

—Botö ayömöte iingä dicæ eñenämaï cæte wentamö mongængä abogaa, angantapa.

⁵ Ante Pidato apænecä incæte tömēnāni godömenque äninque,

—Iñæmpa tömengä Gadideabæ täno odömöninque ñöwo iñömö ganca pöninque Oodeabæ tömäo godinque odömönte apænecä eñëninque waodäni edæ pūinte badäni apa cæbii, änänitapa.

Edode weca Itota gote ongongampa

⁶ Mänömainö änäni eñente wædinque Pidato wæætē, Iingä iñömö näwangä Gadideabæ quëwëningä inte pongantawoo. ⁷ Äñongante, Mäningänö

ingampa, ante apænedāni eñëninge tōmengā, Gadideabæ nē quēwëningā inte tōmengā awënë Edode nānō nē enempodongā ingampa, ante tæcæ eñngantapa. Ayæ, Edode ñōwo Eedotadēē ponte quēwengampa, ante do eñëningā inte Itota ingante Edode weca Pidato da godongā gocantapa. ⁸ Doyedē iñōmō wadāni, Itota æbānō cæcāā, ante tededāni eñëninge Edode, Itota botō weca pōninge wabānō bamōnengæ pōni cæcā abaīmopa, ante pōnëninge tōmengā ingante wantæpiyæ aīnengā inongāimpa. Ìninqe Itota ingante ñōwo adinqe Edode nanguī togacāimpa. ⁹ Ìninqe, Apænebi eñëmoe, āmi eñëmoe, ante Edode wæætē wæætē añongante Itota iñōmō edæ pæ wënete apænedāmaī ingacāimpa. ¹⁰ Edode weca adoyōmō ongōninge nē godōnāni ñænænāni tōnō nē odōmōnāni guiquënë ænguī badinqe, Itota wënæ wënæ cæcā ingampa tōō, ante nanguī pīinte angadānimpā. ¹¹ Ayæ Edode tōnō tōmengā tontadoidi tōnō Itota ingante pīininqe, Waa cæte baī cæcantedō abi, ante badete todānitapa. Ònonque badete tocæte ante tōmënāni waēmō pōni weocoo daga wëñadinque tōmengā ingante adodō Pidato weca da godōnāni gogacāimpa. ¹² Ìninqe do nāna guëadō guëa pīincaya inīna inte edæ Edode tōnō Pidato māniōnæ edæ guëa piyænē cæte nāna æmigocaya bagadāimpā.

Itota wæncæcāimpa, änānīpa
(*Māateo 27.15-26; Māadoco 15.6-15; Wāō 18.39-19.16*)

¹³ Pidato iñōmō nē godōnāni ñænænāni tōnō awënëidi tōnō ònōnānique inānite añecā pōnāni ate tōmengā, ¹⁴ tōmānāni inānite āninqe,

—Ìngā ingante botō weca ænte pōninge mīnitō, Tōmengā wapiticæ odōmonte apænecā eñëninge wadāni oda cædinque eñënāmaī cædānīpa, ante pīimīnīpa. Incæte mīnitō edonque ayōmīnite botō, Itota æbānō cæcāā, ante eñncæte ante cōwā ayōmō edæ tōmengā wënæ wënæ

nānō cædō ante mīni ānewënō ante edæ dæ ā abopa. ¹⁵ Ayæ Edode adobaī tōmengā ingante apænte āninqe wënæ wënæ nānō cædinō ante adāmaī inte wædinque adodō botō weca da pōnongā ponte a ongongā aedāni. Edæ, Tōmengā nānō wænguinque, ante nānō cædinō edæ dæ ā apa ānewēmīnī. ¹⁶ Ìninqe

botō ònonque tæi tæi pāninqe ñimpo cæbo gocæcāimpa, ante Pidato angantapa. ¹⁷ Wadepo iñō wadepo iñō tōmënāni ææmæ nāni cæyedē, Nē tee mōnete ongongā adocanque gocæcāimpa, ante cōwē godō ñimpo cæquënegā inongā inte awënë Pidato ñōwo mānōmainō ante cæcantapa.

¹⁸ Mānōmainō angā eñëninge tōmānāni adoyōmō ogæ tededinqe,

—Itota ingante wido cædinque Badabato ingante wæætē pōnō ñimpo cæbi æmōnie, änānitapa.

¹⁹ Badabato guiquënë tōmënāni nāni quēwëñōmō awënë ingante wido cæcæte ante cædinque godōmenque waocā ingante wænōningā inte edæ ñōwo tee mōnete ongōnongāimpa.

²⁰ Pidato iñōmō, Itota ingante æbānō cæte ñimpo cæbo goquingāā, ante wædinque tōmënāni inānite wæætē aa aa peyongante, ²¹ Oodeoidi wæætē,

—Awæ ñænquedīmæ āmi cæte gōnonte wænōnāni wængæe tōō, ante wæætē wæætē adodō āninqe Yæ änānitapa.

²² Quīmæ ānewēmīnī, ante do mem-poga āningā inte Pidato ñōwo mem-poga go adopoque ānongā inte,

—Quinō wënæ wënæ cæcantawogaa, angantapa. Ìñæmpa, Quinō wënæ wënæ cæcantawo, ante cōwā ayōmō edæ dæ ampa. Ìninqe botō āmo ate edæ tōmengā ingante tæi tæi pāninqe ñimpo cædāni gocæcāimpa, āmopa, angantapa.

²³ Incæte awënëidi tōnō wadāni godōmenque Yæ āninqe, Awæ ñænquedīmæ āmi cæte gōnonte wænōnāni wæncæcāimpa, ante, Cōwē wænongæimpa, ante ancaa aa pedānitapa. Ìninqe tōmënāni nāni Yæ yæ änō beyænque Pidato

ñimpo cæcantapa. ²⁴ Ìninqe an-
caa wææ änäni eñente wædinque
tömengä, Tömënanï nani äno bai
godö cæcæboimpa, ante nämäneque
pönengantapa. ²⁵ Mäniñedë Badabato
në, Awënë ingante wido cæcæimpa,
ante cædinque në wænöningä inte
ayæ tee mönete ongönongäimpa.
Pidato ñowo, Ìngä guiquënë ood-
eoidi nani në äningä ingampa, ante
godö ñimpo cæcantapa. Itota in-
gante wæætë, Oodeoidi nani äno
bai cæcæimpa, ante cædinque Itota
ingante wæætë tontadoidi nempo
pædæ godongä ænte godänitapa.

*Itota ingante awäa timpodäni
wængampa*

*(Mäateo 27.32-44; Mäadoco 15.21-
32; Wäo 19.17-27)*

²⁶ Itota ingante ænte goyönäni
Tidënebæ në quëwengä Timönö
wayömö gote pöninque eyepæ pönï
mämö bee tengantapa. Tömengä
ingante adinque bæi ongöninque
tömënanï, Ñænquedimæ möni cædiwæ
Itota miñæ ænte goe, äninque ñö
cædancapænäni næænte gocantapa.

²⁷ Goyongante Itota miñæ nanguï
inäni godänitapa. Onquiyænäni incæ
Yæ yæ ante wo ca wo ca wædinque
tee empote godänitapa. ²⁸ Ìninqe
Itota dadi emænte adinque tömënanï
inänite,

—Onquiyæmïni, Eedotadëë quëwëmin
inte mïnitö botö beyæ ante wædämaï
iedäni. Wæætë tömëmïni nämä
beyænque ante wæedäni. Ayæ
mïnitö wëñænäni beyæ ante pönente
wæedäni, ämopa. ²⁹ Ìncayæ ate mïnitö
caate wædinque iïmaï ante wæquimïni
imïnipa. “Wëñæ në mänämaï ingä
iñömö edæ tömengä nänö waa to-
quinque. Goömæ në gänönämaï
ingä iñömö edæ tömengä nänö to-
quinque impa,” ante wæquimïni
imïnipa. ³⁰ Mäniñedë edæ, “Wadäni
iïmaï ante wæcædänimpa. On-
quiyabo onguipo æmæwo cabæñö
goyæ guimönïe. Änanquidi wææ
mönitonga capo ñongæñö wë wom-
onte bamönïe, ante wæcædänimpa,”

ante dodäni nani yewæmongainö
bai edæ baccæimpa. ³¹ Edæ awæ
müiwæ iñonte gonga wædænque wo
cædäni bai ñowo iñömö wadäni
wii nanguï wënæ wënæ cædänipa.
Wæætë awæ amimö bayonte ti
wodönoyönäni dobæ wo bæco bai
wadäni iïncayæ ate quingämë bai
cæquinäni inänipa, ante Itota mäninö
godinque apænægacäimpa.

³² Ayæ, Mäo wænongæimpa, ante
në ænte godäni iñömö mënaa në
wënæ wënæ cædina inate tömengä
tönö godongämæ ænte gogädänimpa.

³³ Ocatainö, nani äñömö ænte
pöninque awæ ñænquedimæ nani
badöniwäa Itota ingante töö godonte
timpodinque wææ tiwadinque ængæ
gantidënanitapa. Ængæ gantidënanï
ate wægöñongä tömënanï në wënæ
wënæ cædina inate adobaï Itota
tömëmæ inö adocanque tömengä
dipæmæ inö adocanque timpote
gönönäni gongænatapa. ³⁴ Mänömaï
cædäni adinque Itota,

—Mæmpo eñëmi. Tömënanï
eñënamäi inäni inte iïmaï cædänipa
cæbii. Wënæ wënæ nani cæinö
ante bitö wæætë edæ ñimpo
cæbi quëwencædänimpa ämopa, an-
gacäimpa.

Mäniñedë tömengä weocoo inï
ante, Æcänö quınca nö ta adinque
tömengä badincoo æncæcäimpa, ante
tömënanï wæntodöninque adocooque
adocooque ænänitapa. ³⁵ Wadäni,
Æbänö cæquingää, ante acæte
ante godongämæ a ongönänitapa.
Awënëidi incæ tömengä ingante ante
badete todinque,

—Tömengä, Quëwencædänimpa, ante
wadäni inänite ængä quëwënanitawo.
Ayæ Wængonguï iñömö, Codito
ingampa, äninque tömengä in-
gante ængantawo. Ìninqe tömengä
Wængonguï nänö në ængaingä
inongä inte edæ nämä aamö cæte
quëwencæcäimpa, ante badete to-
gadänimpa.

³⁶ Tontadoidi guiquënë obo
pöninque tömengä ingante badete tote
bai cædinque edæ, Yowepæ ti nämæ

becæcäimpa, ante pædæ æænöninge,
³⁷ tömengä ingante,

—Oodeoidi Awënë Odeyebi imi
 iningue bitö nämä aamö cædinque
 quëwëmawe, ante towengadänimpa.

³⁸ Ayæ, “İngä oodeoidi Awënë
 Odeye inongä ingampa,” ante
 yewæmöninque tömënäni tömengä
 dæca inö wo cædäni owotapa.

³⁹ Në wënæ wënæ cædina guiquënë
 tömengä tönö ongöñöna adocanque
 tömengä ingante godö wënæ wënæ
 ante badete tocantapa.

—Bitö iñæmpa, Codito inömo imopa,
 ämitawo. Mänimi inömi iningue bitö
 tömëmi aamö cæte gote quëwëninque
 mönatö imönte adobaï ñimpo cæbi
 aamö cæte gomönae.

⁴⁰ Äñongante wacä wææ äninque,

—İñæmpa tömëmi adobaï bitö
 wænguinque ongömi inte Wængongui
 ingante guññënamai inte ämi awædö.

⁴¹ Mönatö wënæ wënæ cæmöna
 iñömönte në apænte änäni edæ
 nöngä cæte pänäni wæmönapa.
 Mönatö wënæ wënæ cædinö beyæ
 eyepæ tente wæmönapa. Tömengä
 guiquënë wënæ wënæ cædämai
 inongä inte wængä apa änewëë.

⁴² Äninque adocä wæætë Itota in-
 gante apænedinque,

Awënë eñëmi. Bitö Awënë Odeye
 badinque botö imote pönente cæbi
 ämopa.

⁴³ Äñongante Itota,

—Nawangä ämopa. Bitö ñöwoönæ
 incæ wænte godinque do wænte
 gogainäni näni watapæ quëwëñömö
 botö tönö guëa ongoncæbiimpa, an-
 gacäimpa.

Itota wængampa

(*Mäateo 27.45-56; Mäadoco 15.33-
 41; Wäö 19.28-30*)

⁴⁴ Mäniñedë edæ tæcæbæcä iñedë
 mä mämönte bai tæcæ badinque
 ayaönäa wæiganca tömämæ iñömö
 edæ wëmö ingatimpa. ⁴⁵ Edæ nænque
 näwänämai i iningue wëmö ingatimpa.
 Ayæ Wængongui tæiyæ waëmoncönë
 odemö näni wææ wodöincoo adoyedë
 edæ önönæca inö tæcæguedë pöni

tænguimæ wææntapa. ⁴⁶ Mäniñedë
 Itota ogæ tededinque,

—Mæmpo eñëmi. Nöwo edæ botö
 önöwoca bitö önönempe pædæ pönömo
 æe.

Äninque edæ æmæwo guëmäninque
 wængacäimpa.

⁴⁷ Mänömai cæte wængä adinque
 odömäno tontado capitäo incæ,

—Nawangä impa. İngä iñömö edæ
 nö pöni cæcä inongä inte edæ wængä
 abopa, äninque, Wængongui ñäo apäite
 bai ëmönongä inte mänömai cæcä
 abopa, ante apænegacäimpa.

⁴⁸ Ayæ, Æbänö cæquii, ante
 godongämæ ponte a ongönäni iñömö
 tömänäni, Itota mänömai wængä
 awædö, ante wædinque edæ nämä
 önontawë tæi tæi tompotawëninque
 wadæ gogadänimpa. ⁴⁹ Wæætë Itota
 ingante në do adinänique iñömö
 gobæ ongönte pömö agönänitapa.
 Wëenëñedë tömengä Gadideabæ
 quëwente pöñongante onquiyænäni
 tömengä miñæ në pöninäni inte
 tömënäni ñöwo adobaï gobæ ongönte
 pömö agönänitapa.

*Itota wodi baö inï mäo daga
 wënänipa*

(*Mäateo 27.57-61; Mäadoco 15.42-
 47; Wäö 19.38-42*)

⁵⁰ Oodeoidi näni Apænte Äincabo
 iñönänite adocanque tömengä ëmöwo
 Ootee inongäimpa. Tömengä cöwë
 waa cædinque në nö cædongä
 inongäimpa. ⁵¹ Do iñömö, Itota ingante
 wæñongäimpa, ante oodeoidi näni
 Apænte Äincabo godongämæ pönente
 cæyönänite adocä Ootee iñömö edæ
 Baa ante tömënäni tönö godongämæ
 cædämai inongäimpa. Tömengä,
 Wængongui Awënë Odeye nempo
 mönö æyedönö quëwengäimpa,
 ante wänö conte bai quëwëñongä
 inongäimpa. Tömengä Oodeabæ
 Adimatea iñömö në quëwëñongä inte
 ñöwo pöningä ingantapa. ⁵² Mäningä
 Ootee iñömö awënë Pidato weca do
 gote apænedinque, Itota wodi baö inï
 pönömi æente daga wëmoe. ⁵³ Angä
 eñëninque awënë Ao angä eñente

gocantapa. Godinque tömengä Itota wodi baö ini wi æmpote wææ wi æwadinque pædæ wæænonte ænte godinque waëmö weocoo nino nani änoncoo wini wini caate dicamontaa wointatodë önantatoque iñömö daga wengantapa. Do nani wënämaï intatocæ iñonte daga wengantapa. ⁵⁴ Oodeoidi nani, Gäwadecæ ba ate guëmanguïönæ inguimpa, ante täno nani cæönæ i ïinque Ootee mänömaï täno cægacäimpa.

⁵⁵ Do iñömö Gadideabæ quëwente Itota tönö godongämæ nê pöninäni inte onquiyænäni ñowo Ootee miñæ tee empote pöninque Itota wodido adinque, Tömengä baö æbänö ñö cädänii, ante do adänitapa. ⁵⁶ Adinque tömënäni oncönë godinque ogui wapæ ogui wayabo tönö ænte ponte öni pæcæte ante cädänitapa. Incæte, Guëmanguïönæ impa, ante wædinque waönæ ate nani goquinque tömënäni Wængongui nänö wææ angainö bai cædinque täno guëmangadänimpa.

24

Itota do wæningä inte ñäni ömæmonte quëwengampa
(Mäateo 28.1-10; Mäadoco 16.1-8; Wäö 20.1-10)

¹ Ayæ guëmanguïönæ iinque go ate baänæ ate ooque pönente bayonte mäninäni onquiyænäni ogui waqui nani cædincoo ñowo ænte nææninque Itota wodido pönänitapa. ² Ponte ayönäni dicabo ñænængade pöni do da tæñæi a öñö adänitapa. ³ Ayæ ontatodë guite ayönäni edæ mönö Awënë Itota wodi baö edæ dæ antapa. ⁴ Önantatoque i awædö, ante adinque guïñente wæyönäni edënina bai ina iñömö weocoo näämænta pöni näinte bai ëmoncoo mongæna inte edæ iñontobæ tömëna weca a ongöna. ⁵ Ate wædinque onquiyænäni iñömö ancai guïñente wædinque ædæ wæænte onguipoga bigui tëmönänitapa. Edënina bai ina iñömö onquiyænäni inänite,

—Iñæmpa minitö do wæninäni weca ponte nê quëwengä ingante ante quinante diqui diqui mimini. ⁶ Tömengä iñömö edæ dobæ ñäni ömæmonte godingä inte edæ iintatodë iñömö dæ angä aedäni. Tömengä wëenëñedë Gadideabæ minitö weca nänö ayæ quëwëñedë minitö iminite iïmaï ante apæ necä ëñëmïni inte ñowo adodö ante pönëedäni. ⁷ Tömengä iñömö, Botö Waobo ëñagaïmo iñömote nê wënæ wënæ cädäni nempo odömonte mäo pædæ godönäni æninque tömënäni wæætë wænönäni wænguënëmo imopa, ante apæ necä ëñëmïnitapa. Ayæ mëönaa go adoönæque iñonte botö ñäni ömæmonte quëwenguënëmo imopa, ante apæ necä ëñëmïni inte pönenguënë quëwëedäni.

⁸ Ante edënina bai ina äna ëñente wædinque onquiyænäni iñömö, Itota æbänö angacäi, ante tæcæ pönente wædänitapa. ⁹ ïinque ontatodë tao wadæ godinque onquiyænäni iñömö Itota tömengä miñæ nê godinäni önompo tipæmpoga go adocanque inäni inänite mäo apænedinque wadäni tömänäni inänite apænedäni ëñënanitapa. ¹⁰ Mänömainö ante Itota nänö nê da godongainäni inänite nê gote apænedäni iñömö Mäadiya Mäagadadënä nani änongå tönö Wäönä, Tantiago wäänä Mäadiya ayæ wadäni onquiyænänique tönö godinque tömënäni inänite apænedäni ëñënönänimpa. ¹¹ Incæte, Mänömaï impa, ante mäo apænedäni ëñëninque, Onquiyænäni iñömö önonquedö ante tededäni awædö, ante Itota nänö nê da godöninäni iñömö edæ pönënamäi ingadänimpa. ¹² Pegodo guiquënë quingæ ængæ gantidinque pogodo godinque Itota wodido pongantapa. Ponte ædæ wææninque guimö ayongä wini wini cædincooque öñö adinque tömengä nämæneque pönëninque, Æbämë cætimpä, ante wædinque wadæ gogacäimpa.

*Ēmaodö taadö godänipa
(Mäadoco 16.12-13)*

¹³Eedotadëe ongöningue wædænque inäni nani quëwëñömö Ēmao goinö iñömö onte quidömetodo ganca mäninganca taadö impa. Mäniönæ adoönæque iñonte Ēmao iñömö gocæte ante waoda mënaa idömæ godatapa. ¹⁴Æbänö cætimpa, ante tömänö ante tedegodatapa. ¹⁵Tedegoyöna Itota incæ mämö bee téninque godongämæ gocä. ¹⁶Incæte, Tömengä æcänö ingää, ante wë wodonte bai i beyæ tömëna adämaï emöna inte ëñënämaï inatapa. ¹⁷Itota iñömö,
–Æbänö ante wæætedö wæætë tede gomïnatawoo.

Angä ëñente wædinque tömëna wæwente bai emöna inte edæ næ gongænatapa. ¹⁸Adocanque tömengä emöwo Codeopato iñömö tömengä ingante apænedinque,

–Eedotadëe quëwënäni tömänäni, Æbänö ñöwo mäniñömö cætimpa, ante ëñëñönäni bitö adobique adoyömö quëwëningue edæ ëñënämaï imitawoo.

¹⁹Äñongante Itota,

–Ædö ämïna.

Äñongä tömëna wæætë,

–Itota Näatadeta quëwëningä ingante ante tedemönapa. Wængonguï beyæ næ apænegä inongä inte mäningä onguïñængä iñömö Wængonguï ayongä ayæ waodäni ayönäni adobaï tæi piñænongä inte waa pönï apænedinque nanguï cæcä inongäimpa. ²⁰Mänömaï iñongante næ godönäni ñænænäni tönö mönö ömæ awëneidi guiquënë wadäni nempo pædæ godöninque, Itota ingante apænte äninque mäo wænömïni wængædäni, änäni ëñëninque iinäni wæætë tömengä ingante ñænquedimæ cæte timpote wææ tiwadinque edæ gönönäni wængantapa. ²¹Mönatö guiquënë, Tömengä mönö idægocabo Awënë badinque pönö ængä beyænque mönö abæ tawænte quëwenguïmö imompa, ante pönënimöna inte edæ ñöwo wæmönapa. Ayæ, Tömënäni mänomäi nani cædiönæ edæ ñöwo mëönaa go

adoönæque impa, ante edæ mönatö godömenque wæmöna ae. ²²Mänömaï i incæte möni cabo incæ onquiyænäni pancadäniya tömengä wodido gote pöninque, Iïmaï atamönipa, ante apænedäni ëñente wædinque mönatö wæætë ancai guïñente wæmönapa. ²³Tömënäni iñömö tömengä baö inï adämaï inäni inte edæ wadæ pöninque iïmaï ante apænedäni wætamönapa. Mönitö wüimonte bai Wængonguï anquedoda inate mä pönï atamönipa, änänitapa. Ayömönite anquedoda iñömö, Itota ñäni ömæmonte edæ müingä quëwengampa, ante apænedä ëñëninque edæ wadæ pömönipa, ante onquiyænäni apænedäni ëñentamönapa. ²⁴Mänömainö ante apænedäni ëñëninque möni cabo incæ pancadäniya Itota wodido gote adinque, Onquiyænäni nani äninö bai edæ näwangä impa, ante adäni incæte Itota ingante adämaï inäni wæmönapa.

²⁵Ante apænedä ëñëninque Itota wæætë tömëna inate,

–Mïnatö pönëgade i apa änewëmïnaa.

Mïmö ömædëmïna imïna inte mïnatö Wængonguï beyæ næ apænegainäni nani apænedö ante tömänö ante edæ ëñënämaï imïna awædö. ²⁶Codito iñömö edæ cöwë caate wæquënegä ingacäimpa. Ayæ wænte ñäni ömæmöninque tömengä nämä nänö ñäö iñömö æiquënegä ingacäimpa, ante pönëmïnaa.

²⁷Ayæ, Codito æbänö cæquingää, ante Möitee wodi æbänö apænete yewæmongacäi, ante täno apænedinque Itota mïmönoque pönëninque, Wængonguï beyæ næ apænedäni tömänäni æbänö apænegadänii, ante, Codito æbänö cæquënegä ingacäi, ante edonque odömonte apænegä ëñënatapa.

²⁸Mänüi tömëna nana quëwëñömö tömëna nana gocæ cæyömö pönönäni Itota wodo tebæ gocæ cæte bai cæcä.

²⁹Adinque tömëna nanguï äninque tömengä ingante edæ,

–Ñöwo gäwadecæ pönï inte wëmö ba apa. Mönatö oncönë go guiite cænte monte baänæ ate goe.

Ante ancaa añõna tõmëna oncõnë pö eñacæ guicantapa. ³⁰ Ayæ tõmëna tõnõ cæncæte ante tæ contadique tõmengä päö pä æninque Wængongui ingante waa ate pönente apænedinque tõmëna inate tæcæ pædæ godoncæ cæyongä. ³¹ Tõmëna awinca wi ænete bai bayö, Tõmengä ingampa, ante edæ tæcæ adatapa. Tõmengä iñõmõ edæ adoyedë tõmëna ayõna edæ dæ gocä. ³² Adinque tõmëna guëa tededinque,

—Nawangä intawo. Wængongui mõnõ Codito ingantedö ante apænecä eñëninque æbänö yewæmongadänimpa ante tõmengä ponte odõmongä eñëninque mõnõ mimõ edæ gonga bæco bai totamompa. Wii edæ mänõmaï intawo.

³³ Ante tededinque tõmëna adodö taadö quingæ godinque Eedotadëe ponte ayõnate edæ Itota miñæ në godinani iñõmõ onte ganca mánimpodäni iñõnani tõmënäni tõnõ wadäni godongämæ pö bee tente a ongönäni adatapa. ³⁴ Iñäni guiquënë,

—Mõnõ Awënë iñõmõ ñäni õmæmonte müngä quëwengampa. Nawangä edæ impa. Tõmengä ingante Timönõ Pegodo do acantapa, ante godongämæ tededäni adatapa.

³⁵ Mänõmainö ante tededäni eñëninque tõmëna wæætë, Mõnatö taadö goyõmõnate wacä pö bee téninque iïmaï cæcantapa, äninque, Æbänö cæcantapa, ante adodö adodö ante apænedatapa. Ayæ godõmenque apænedinque, Oncõnë go guiyõmõni tõmengä päö pä ængä adinque mõnatö, Itota ingampa, ante do eñentamõnapa, ante tõmännö ante apæneda eñengadänimpa.

Tõmengä miñæ në godinani weca Itota pongampa

(Mäateo 28.16-20; Mäadoco 16.14-18; Wäö 20.19-23)

³⁶ Mäninö ante ayæ tæcæ tedeyönäni Itota incæ edæ tõmënäni weca tæcæguedänäni do pö guiite a ongöninque,

—Guiñënamäi gänë pönëedäni.

³⁷ Angä eñëninque tõmënäni, Önõwoca badi iïmaï, ante ancai guiñente wædinque, Yæ änäni.

³⁸ Adinque Itota,

—Quinante guiñewëminii. Mímõno quinante æmæ æmæ pönente wæminii. ³⁹ Bado botö önõmpo empobo edæ aedäni. Botö önõwa ëwabo aedäni. Botö baö edæ gampo caate aedäni. Iñæmpa önõwoca badi imo bai ædö cæte baö tõnõ bamë ëaquënëmöö. Baö tõnõ bamë ëadõmo inte botö imo apa guiñewëminii.

⁴⁰ Äninque Itota önõmpo tõnõ önõwa tõmënäni inänite odõmongä. ⁴¹ Adäni incæte tõmënäni guiñente todirque wede pönënamäi iñõnänite tõmengä,

—Minitö weca cænguï æbänö mämïnii.

⁴² Äñongante gæyæ baö do awëniï ëadäni inte pædæ godönäni ⁴³ æninque tõmënäni ayönäni edæ ade cængantapa. ⁴⁴ Ayæ tõmënäni inänite apænedinque Itota,

—Botö imotedö ante Möitee wodi wææ äninque æbänö yewæmongacäi, ante botö minitö weca ayæ quëwëninque do apænetabopa. Botö imotedö ante Wængongui beyæ në apænegainäni æbänö yewæmongadänii, ayæ ämotamini äninque æbänö yewæmongadänii, ante apænetabopa. Mänine botö apænedö ante tõmännö edæ iinque baquinö anguënë.

⁴⁵ Ante apænedinque Itota, Ocai encate eñencädänimpa, ante pönö cædinque tõmënäni inänite Wængongui angä eñëninque nani yewæmongainö ante odõmonte apænecä eñëninque tõmënäni edonque edæ eñënanitapa.

⁴⁶ Ayæ godõmenque apænedinque,

—Mõnõ Codito cõwë nantate wæninque mëõnaa go adoönæque iñõnte ñäni õmæmonguënegä incæcäimpa, ante edæ edonque yewæmongatimpa. ⁴⁷ Ayæ,

Codito emõwo ante Eedotadëe iñõmõ täno apænete ate tõmämæ quëwënanäni inänite iïmaï ante apænecäimpa. Tõmënäni inänite apænedinque, Wënæ wënæ mini cædinö ante ñimpo cædinque

Wængonguī gāmænō pōedāni. Pōmīni adinque tōmengā wæætē pānāmaī inte pōnō ñimpo cæcæcāimpa, ante apænequināni incædānimpa, ante yewæmongatimpa. ⁴⁸ Mīnitō iñōmō, Æbānō cætimpā, ante nē adīmīni inte edæ nē apænequīmīni imīnipa. ⁴⁹ Ayæ edæ Wængonguī, Botō Tæiyæ Waēmō Önōwoca ingante da pōnōmo æncæmīnimpa, angacāimpa. Ìnīnque botō Mæmpo nānō nē angaingā ingante botō oo da pōnōmo æncæmīnimpa. Mānōmaī ī ìnīnque Wængonguī nānō tæi pīñænō æncæte ante mīnitō, Wængonguī Önōwoca ingante ēwocacāimpa, ante Eedotadēē iñōmō wānō cōedāni, angacāimpa.

Öönædē Itota æicampa
(*Māateo 16.19-20*)

⁵⁰ Itota ayæ tao godinque Betānia obo pōnīnque tipæmpoga pædæ æmpodinque, Mīnitō imīnite Wængonguī waa cæcæcāimpa, ante waa apænecā ēñengadānimpa. ⁵¹ Tæcæ apænecā ēñēñōnāni edæ tōmengā iñontobæ inque ingā edæ öönædē æigacāimpa. ⁵² Adinque tōmengā miñæ nē godināni iñōmō ædæ wæænte apænedinque, Nāwangā Wængonguī Wengā ñongā inte æicampa, ante watapæ apænedinque Eedotadēē wadæ godinque nanguī togadānimpa. ⁵³ Wængonguī oncō ñænæncōnē yabæcōnē iimō iñō iimō iñō pō pō cædinque Wængonguī ingante, Bitō ñāō baī emōmi inte waa pōni cæbipa, ante cōwē waa apænegadānimpa.

**Itota Codito ingantedö
ante
Wäo
nänö watapæ ante
yewæmongainta**

*Wængonguï nänö Angainö ante nē
ëmongaingä Waocä bagacäimpa*

1 Wëenëñedë pöni Wængonguï nänö mä badöñedë Wængonguï nänö Angainö ante nē ëmongaingä iñömö do ingacäimpa. Tömengä Wængonguï weca quëwengacäimpa. Ayæ adocä adobai nē Wængonguï inongä ingacäimpa. 2 Wëenëñedë pöni tömancoo badönämaï iñedë mäningä do Wængonguï weca quëwengacäimpa. 3 Wængonguï angä ëñëninge adocä tömancoo badongacäimpa. Tömengä wii badongä bai Wængonguï nänö badongaincoo tömancoo edæ dæ ancædonimpa. 4 Mäningä iñömö mönö quëwenguïno entawengacäimpa. Ayæ mönö quëwenguïno edæ entawëninge tömengä waodäni beyæ nē ñäo bai inongä ingacäimpa. 5 Tömengä nē ñäo bai ingaingä inte mönö wëmö iñömö ta tamongä ate adoyömö ñäo bai bayonte edæ mönö wëmö iñömö edæ mänüi ñäo ædö cæte mönæ ëmonguü.

6 Onguïñængä adocanque ingante Wængonguï da pönongä pöningä ingampa. Tömengä ëmöwo, Wäo, ante pëmonte ingacäimpa. 7 Tömengä iñömö Wængonguï nänö ñäo ëmömämo ante edonque pöni bacäimpa, ante nē ñäo bai ingaingä ingantedö ante apænecæte ante pongacäimpa. Adocä apænecä beyænque waodäni tömänäni tömengä nänö nē apænedongä ingante pönencædänimpa, ante pongacäimpa. 8 Incæte mäningä wii ñäo bai ingaingä ingampa. Wæætë tömengä, Wacä waodäni beyæ nē ñäo bai ingaingä ingampa, ante apænecæte ante pongacäimpa. 9 Nē nö ñäo bai nē ingaingä iñömö waodäni tömänäni

inänite tömengä nänö ñäo ëmömämo pönoncæte ante inguipoga wææ pongacäimpa.

10 Tömengä inguipoga iñömö quëwengacäimpa. Ayæ tömengä inguipoga nē badongaingä iñongante inguipogaque quëwënäni wæætë Baa äninque tömengä ingante ædö cæte ate bai pönenguïnänii. 11 Tömengä edæ tömengä quï weca pongacäimpa. Pongä ate tömengä guïdënäni incæ tömengä ingante ænämaï ingadänimpa. 12 Incæte tömengä ingante nē ængainäni iñömö tömengä ëmöwo, Codito, ante nē wede pönënäni iñönänite tömengä tömënäni inänite Ao äninque edæ, Wængonguï wënäni bacædänimpa, ante pönö cægacäimpa. 13 Ayæ Wængonguï wënäni iñömö wii waocä ëñate bai inänipa. Waocä, Botö wë manguinque, ante änämaï iñongante ëñadänipa. Wii nänöogængä angä beyænque inänipa. Wæætë Wængonguï tömenganque cæcä ate tömënäni tömengä wënäni badänipa.

14 Tömengä iñömö edæ, Wængonguï nänö Angainö, ante nē ëmongaingä inique Waocä ëñate bagacäimpa. Waocä ëñate badinge tömengä mönö weca quëwengacäimpa. Mæmpo Wængonguï Wengä adocanque inte adocä godömenque ñænængä inte nē cædongä ingä atamönipa. Adocä Mæmpo weca quëwente nē pongä iñömö tömengä nanguï waadete pönö cædongä inte nöingä änongä ingampa. 15 Wäo iñömö, Mäningä æbänö ingää, ante apænecäimpa. “Mäningä botö nē apænedongä ingantedö ante iïmaï apænetabopa. Botö täno pömo imopa. Tömengä nē ayæ Ponguingä iñömö godömenque ñænængä inte cædongä ingampa. Edæ botö ëñadämaï iñedë tömengä do ingacäimpa,” ante nanguï pöni yedæ äninque Wäo apænecäimpa.

16 Mäningä nē ayæ Ponguingä iñömö nanguï pöni waadete pönö cædinqe tömengä wæætë wæætë nänö entawënö ante pönongä æninque tomompa. 17 Edæ Wængonguï tömengä nänö wææ

angainö ante apæneca eñëninque Möitee wodi wæetë adodö ante yewæmöninque waodäni inänite godongacäimpa. Wængonguï nänö waadete pönö cægainö ante nöingä nänö angainö ante guiquënë Itota Codito beyænque eñëmompa. Itota Codito iñömö mönö nê Ponguingä ingaingä ingampa. ¹⁸ Mönö waocabo tömämö incæ Wængonguï ingante cöwë adämaï imompa. Incæte tömengä adocanque Wengä Wængonguï weca nê quëwëngä inte, Mæmpo æbänö ingaingä ingää, ante tömengä odömongä ate pönëmompa.

Wäo æpænë guidöngä, Botö wii Codito imopa, angä

(Mäateo 3.11-12; Mäadoco 1.7-8; Odoca 3.15-17)

¹⁹ Oodeoidi awënëidi Eedotadëë quëwënäni iñömö Wængonguï qui, ante nê godönäni tönö Debiï wodi pæinäni inänite da godönäni Wäo weca godänipa. Gote pöninque adodäni, Æbidö inömi imii, ante apænebi eñëmönie, añönäni Wäo iïmaï äninque ²⁰ nämä wææ änämaï inte wæetë, Botö wii Codito inömo imopa, ante edonque pönï angantapa.

—Botö wii Codito inömo imopa.

²¹ Añongante tömënäni wæetë tömengä ingante,

—Æbidö inömi imii, Ediya wodi inömi imii. Apænebi eñëmönie.

Ante änäni eñëninque tömengä,

—Wabo imopa.

Ante añongä tömënäni wæetë,

—Wængonguï beyæ nê apænebi ayæ Ponguïmi inömi imitawo.

Änäni eñëninque tömengä,

—Wabo imopa.

Ante angantapa.

²² Tömënäni iinque äninque,

—Æbidö inömi imii, ante apænebi eñëmönie töö. Mönitö imönite nê da pönöninäni weca godinque mönitö tömënäni inänite, Æbidö imii, ante ancæmönimpa. İninque bitö nämä incæ æbänö ämii.

²³ Añönäni Wäo wæetë tömënäni inänite, Itaiya wodi nê Wængonguï beyæ nê apæneca nänö angainö

baï ante iïmaï ante apænebo eñencæminimpa.

—Önömæca incæ nê aa pebo inömo inte botö tömëmo pepämo iïmaï näni eñënö impa. “Awënë nänö ponguïnö ante töinö pönonte baï tee möedäni,” ante aa pebopa, angantapa.

²⁴ Paditeoidi nê wadö tedete wadö cädäni näni cabo inönäni inte tömënäni pancadäniya inänite da godönäni Wäo weca nê godänipa.

²⁵ Gote pöninque mäninäni guiquënë,

—Bitö wii Codito inömi inte wii Ediya wodi inömi inte ayæ wii Wængonguï beyæ nê apænebi ayæ Ponguïmi inömi imipa. Bitö ædö cæte waodäni inänite æpænë guidömi imii.

²⁶ Ante añönäni Wäo wæetë,

—Botö önonque æpænë guidönömo imopa. Wæetë minitö weca adocanque a ongongä iñongante, Tömengä æcänö ingää, ante minitö eñënämaï iminipa. ²⁷ Botö täno pömo imopa. Tömengä nê ayæ Ponguingä ingampa. Botö önonque wædænque cæbo inte ædö cæte tömengä awæncata incæ ñi cæte cæbo imoo.

²⁸ Betänia näni quëwëñömö Oododänö æmæmäa Wäo æpænë nänö guidöñömö mänömaï bagatimpa.

Itota Wængonguï Codotedo

²⁹ Baänæ ate Itota bee tente pongä adinque Wäo apænecantapa.

“Aedäni, iingä Wængonguï da pönongä pönigä ingampa. Ayæ tömengä waodäni inguipoga quëwënäni näni wënæ wënæ cægainö ante æninque teëmë mongænte wænguingä ingampa,

ante Wængonguï tömengä ingante, Codotedo, ante pönö pemongacäimpa. ³⁰ Mäningä iñömö botö nê apænedongä iñongante botö iïmaï apænetabopa. ‘Botö täno pömo imopa. Onguïñængä nê ayæ Ponguingä iñömö godömenque ñænængä inte cædongä ingampa. Edæ botö eñadämaï iñedë tömengä do ingacäimpa.’ ³¹ Botö incæ adobäi, Tömengä æcänö ingää, ante eñënämaï intabopa. Mönö idægocabo iñömonte, Minitö tömengä ingante

ēñencæminimpa, ante botö æpænē guidöninge pömo intabopa.”

³² Ayæ Wäo, Tömengä ingampa, ante äninge, “Botö æmö ayömote Wængonguï Önöwoca incæ öönædē owote equemö bai wææ tömengä næ gongængä atabopa. ³³Wængonguï, Waodäni inänite æpænē guidöe, ante botö imote nē da pönöningä wii botö imo angä bai botö, Itota æcänö ingää, ante ēñēnāmaimo incädömoimpa. Incæte tömengä botö imote iimaï angantapa. ‘Wængonguï Önöwoca incæ æcänö onguïñængäa wææ næ gongængä ayömi mäningä iñömö nē æpænē guidönäni bai Wængonguï Tæiyæ Waemö Önöwoca ingante da pönongä waodäni mīmōnoque pö guiquingä, ante cæcä ingampa.’ ³⁴Mäninö botö adinö impa. Mänömaï beyæ iimaï ämopa, Mäningä iñömö Wængonguï Wengä inongä ingampa,” ante Wäo apænegacäimpa.

Itota miñæ nē täno godäni

³⁵ Baänæ ate Wäo tönö tömengä emiñæna mänaa adoyömö ongöñönäni ³⁶Itota wodo tebæ cægongä adinque Wäo angantapa.

—Aeda, tömengä iñömö Wængonguï Codotedo inongä ingampa.

³⁷ Mäninö angä ēñēninge Wäo nänö nē emiñæna inäna incæ Itota ingante tee empo godaimpa. ³⁸Itota dadi emænte ayongä tee empo pöna adinque angantapa.

—Quinante pöminaa.

Ante äñongä tömēna wæætē,

—Mäetodo, æyömönö owobi. Apænebi ēñēmōnae.

Änatapa. Mänine, Mäetodo, ante mönö tededö, Nē Odömongä, ante impa.

³⁹ Äna ēñēninge tömengä,

—Ægodöeda go aeda.

Äñongä tömengä miñæ godatapa. Goyöna ædæ wææicä intapa. Ayæ nänö owocönē gote adinque tömēna adoönæ tömengä weca a ongönapa.

⁴⁰ Wäo nänö äninö ēñēninge Itota ingante tee empo goda mänaa iñönate adocanque Äntade iñömö

Timönö Pegodo töninacä ingantapa.

⁴¹ Tömengä nänö töninacä Timönö ingante ancæte ante diqui diqui minte gote adinque angantapa.

—Mëetiya mönö änogä ingante atamönapa, angantapa. Tömengä iñömö Wængonguï nänö nē Pönongaingä Codito inongä ingampa.

⁴² Ayæ Timönö ingante Itota weca ænte mämongä pongä adinque Itota angampa.

—Bitö Wäo wē Timönömi imi abopa. Botö wæætē, Bitö tæimö dicabo bai imipa, ante bitö imite mönö tededö, Quepata, pönö pemömopa. Önonque adowo emöwo incæ guidiego tededö, Pegodo, änanipa.

Pedipe tönö Näatänaedo inate Itota angä tee empo goda

⁴³ Baänæ ate Itota, Gadideabæ ante gocæboimpa, ante pönengäimpa. Pedipe ingante adinque Itota tömengä ingante,

—Botö miñæ pöe, ämo, angacäimpa.

⁴⁴ Pedipe iñömö Äntade tönö Pegodo bai Betaida nana quëwēñömö adoyömö quëwëningä inongaimpa.

⁴⁵ Pedipe Näatänaedo weca gocä adinque tömengä ingante iimaï äninge,

—Wængonguï nänö wææ angainö ante yewæmöninque Möitee wodi nänö nē yewæmongaingä ingante mönitö atamönipa. Wængonguï beyæ nē apænegainäni adobai mäningä ingantedö ante yewæmongadänimpa. Tömengä iñömö Itota Näatadeta quëwëningä inte Ootee wengä ingampa, ante angantapa.

⁴⁶ Ante äñongä Näatänaedo wæætē,

—Näatadeta quëwēñömö adocanque waa quëwente pongä, ante mönitö dicæ ēñēmöniyaa.

Angä ēñēninge Pedipe iñömö,

—Pö ae, angantapa.

⁴⁷ Itota ayongä Näatänaedo pongä adinque tömengä,

—Iingä iñömö näwä idægocä inongä inte tömengä nē nö entawëningä inte babæ cädämaï inongä ingampa, ämopa.

⁴⁸ Angä ēñēninge Näatänaedo,

—Æbänö imoo, ante bitö æbänö cæte do eñēmī,

Ante añongä Itota wæætē tōmengä ingante,

—Pedipe iñömö bitö imite ayæ aa pedāmaī iñedē bitö iigowæncawa tæ contabi iñömite botö bitö imite do atabopa, angacäimpa.

⁴⁹ Ayæ Näatānaedo,

—Awënë nē Odömömi imi, bitö Wængonguī Wēmi inömi imipa. Idægoidi mönō cabo iñömönte bitö mönitö Awënë Odeyebi inömi imipa, ämopa.

⁵⁰ Añongä Itota wæætē,

—Bitö iigowæncawa tæ contabi iñömite botö bitö imite atabopa, ämo beyænque pönēmi imipa. Mäninö ante adinque bitö godömenque botö bamönengæ cæbo acæbiimpa, ämopa.

⁵¹ Tōmengä godömenque angantapa.

—Bitö imite näwangä ämopa. Öönädē wi ænete bayö Wængonguī anquedoidi Waocä eñagangä weca wææninque æiyönäni bitö acæbiimpa.

2

Cānaa quēwēñömö nāni monguimæno cæte bedāni

¹ Mēönaa go adoönæque iñönte Cānaa quēwēñömö Gadideabæ iñömö monguimæno ante bedānipa. Itota wäänä adoyömö ponte ongongacäimpa.

² Itota tōmengä emiñænāni tönö tōmēnāni inānite adobai, Monguimæno mīni bequinque, ante tē tē wente ænte pongadānimpa.

³ Ayæ yowepæ wædænque tī nāmæ biinömæ nāni ämæ dæ bedāni adinque Itota wäänä tōmengä Wengä ingante,

—Tōmēnāni biinömæ dæ ämæmpa.

⁴ Añongä Itota wæætē,

—Badä eñēmī. Botö cæquēnēnō tōmēmoque cæquīnō impa. Botö cæyedē wīi eyepæ impa, ämopa.

⁵ Tōmengä wäänä iñömö nē cædāni inānite,

—Mīnitö imīnite æbänö angä eñente cæedāni, angantapa.

⁶ Ayæ önompo æmæmpoque go adocadeque æpæncade dica inte badöincade iñömö cō cædāni ongongcadepa. Wængonguī weca guicæte ante waēmö bacæmöimpa, ante äate cædānipa, ante oodeoidi nāni äagaincade incadepa. Iincade pancacadea otenta ditodo næ ongongcadepa. Ayæ pancacadea tiē ditodo næ ongongcadepa. ⁷ Nē cædāni inānite Itota,

—Æpæncadecoo iñömö æpæ eyede pōni pe ñiñæedāni.

Angä eñēninque pe ñiñængadānimpa.

⁸ Ayæ tōmēnāni inānite,

—Owæta ænte wædænque mä iyænte monguimæno ante nē cædongä ingante godömiñi æncæcäimpa, ämopa.

Angä eñēninque mänömaī cægadānimpa.

⁹ Ayæ monguimæno ante nē cædongä æpæ inīmæ incæ biinömæ badimæ æninque, Æbänö imæ, ante bedinque tōmengä, Itota nänö badönimæ impa, ante eñēnāmaī inongäimpa. Nē cædönāni Itota weca æpæ pe ñiñænānique eñēnönānimpa. Ayæ monguimæno ante nē cædongä iñömö nē monguingä ingante, Nänēnē pōe, aa pecä pongä ate, ¹⁰ iūmaī angantapa.

—Wadāni tōmānāni waimæ biinömæ tāno godönāni bedānipa. Ayæ ate ææmæ becæ pönāni tōmo pōni bedāni adinque tōmēnāni biinömæ wædænque godonte nāni ænimæ wæætē godönāni bedānipa. Bitö guiquēnē ñowoyedē waimæ biinömæ bitö nänēnē concædimæ ænte pōmipa.

¹¹ Itota, Acædānimpa, ante mänömaī cædinque tōmengä Cānaa quēwēñömö Gadideabæ iñömö mänī mā nänö bamönengæ cægacäimpa. Mänī tæi piñænte bamönengæ cæcä adinque waodāni, Tōmengä waēmö pōni inte cæcampa, ante edonque agadānimpa. Ayæ tōmengä emiñænāni iñömö tōmengä ingante godömenque wede pönēnāni bagadānimpa.

¹² Ayæ ate Capēnaömö quēwēñömö Itota tōmengä wäänä tönö tōmengä biwiidi tönö tōmengä emiñænāni tönö

wææ gogadänimpa. Mäniñömö god-
inque wædænque eönæ quëwengadänimpa.

*Wængonguï oncö tæiyæ waëmö
baccæimpa, ante cæcä*

*(Mäateo 21.12-13; Mäadoco 11.15-
18; Odoca 19.45-46)*

¹³ Wodo pänta gogaiönæ, ante ood-
eoidi Patowa näni ææmæ cænguiönæ
oo pöni bayedë Itota Eedotadëe
iñömö æigacäimpa. ¹⁴ Tömengä

iñömö Wængonguï oncö ñænæncönë
yabæcönë pö guiddinque ayongä
wagadaidi obegaidi tönö equemöidi
inänite godonte æncæte ante në
mänäni inänite acantapa. Ayæ

wadäni campio næænte në godonte
ænonäni iñömö näni godonte æimpaa
tæ contayönänite tömengä acan-
tapa. ¹⁵ Yæguincamë ñænæmömo

nää wënëninque que cæte ate
æninque tömengä Wængonguï oncö
ñænæncönë yabæcönë në ongönäni
inänite tatodongä tao godänitapa.
Adobaï obegaidi tönö wagadaidi
inänite, Tao gobæwedäni, angä tao
godänitapa. Ayæ campio næænte në
godonte ænonäni tömënäni tigitamö
æninque tömengä wido cæcä gueogæ
gotimpa. Ayæ adodäni näni æimpaa
bæ tacä guidömëmæ go wææntapa.

¹⁶ Ayæ equemöidi godonte æncæte
ante në mänäni inänite Itota,

–Minitö equemöidi ænte tao
gobæwedäni. Botö Mæmpo oncönë
incæ minitö ædö cæte, Mönö godonte
æiñömö bai impa, ante cæminitapa
töo, angacäimpa.

¹⁷ Mäninö angä eñëninque tömengä
ëmiñænäni Awënë Dabii nänö
yewæmongainö ante iïmaï ante
pönente wædänipa. “Bitö oncö
ante waodäni waa acädänimpa,
ante cæcæboimpa, ante botö nan-
guï cæinente wænguï wæ,” ante
yewæmongatimpa.

¹⁸ Ayæ oodeoidi awënëidi pan-
cadäniya tömengä ingante,

–Bitö mänii tömää awënë bai
cæbi incæ æbänö bitö bamönengæ
cæte odömömi adinque mönitö,
Mäningä në angä ingampa, ante
eñencæmönimpa, ämönipa.

¹⁹ Äñönäni Itota wæætë tömënäni
inänite,

–Wængonguï tæiyæ waëmö oncö
incæ minitö iincö bæ tate ewëmini
iinique botö meönaa go adoönæque
iñö müincö mænoncæboimpa, ämopa.

²⁰ Angä eñëninque oodeoidi
awënëidi pancadäniya,

–Wængonguï tæiyæ waëmö oncö
coadenta i tei wadepo ganca
mænongadänimpa. Bitö iñömö ædö
cæte, Botö meönaa go adoönæque
iñö müincö mænoncæboimpa, ämii,
änänitapa.

²¹ Itota iñömö nämä baö incæ
ante, Wængonguï tæiyæ waëmö oncö
bai impa, ante apænecä inongäimpa.

²² Tömengä iincayæ wængä ate
Wængonguï, Ñäni ömæmöe, angä ñäni
ömæmongä ate, Æbänö angacäi, ante
tömengä ëmiñænäni pönënanitapa.
Ayæ, Wængonguï angä eñente näni
yewæmongainö nö impa, ante
pönënanäni inte ayæ Itota tömënäni
inänite nänö äninö ante adobaï
pönengadänimpa.

*Itota, Mönö waocabo æbänö imöö,
ante eñengampa*

²³ Patowa näni ææmæ cæyedë Itota
Eedotadëe iñömö ponte quëwëninque,
Acädänimpa, ante bamönengæ nan-
guï cæcä adinque waodäni tæiyænäni
iñömö, Mäningä mönö Codito
ingampa, ante pönengadänimpa.

²⁴ Itota edæ, Waodäni tömänäni
æbänö entawënäni inänii, ante do
eñënogä inte tömengä, Wabänö
pönënanii, ante tömënäni inänite gomö
adongä ingantapa. ²⁵ Edæ tömengä
waodäni näni entawënö ante do
eñënogä ingantapa. Iinique waocä
iñömö, Waodäni æbänö cädänii,
ante apænecæcäimpa, ante Itota
tömengä ingante, Bitö botö imo adodö
ancæbiimpa, ante änämaï ingacäimpa.

3

Itota tönö Niicodemö

¹ Paditeocä adocanque tömengä
ëmöwo Niicodemö tömengä iñömö ood-
eoidi awënëidi tönö në godongämæ

cæcä ingacäimpa. ² Adocä woyowotæ Itota weca pöninque,

—Awënë nē Odömömi eñēmi. Wængongui, Odömoncæbiimpa, ante bitö imite da pönongä pönimi imipa, do eñēmönipa. Edæ Wængongui waocä tönö godongämæ cädämaï ingä ininque mäningä ædö cæte bitö bai bamönengæ cæcä aquimönii.

³ Angä eñēninque Itota wæætē,

—Bitö imite näwangä ämopa. Nē mempoga eñadinganque Wængongui Awënë Odeye nempo guiite aquingä ingampa.

⁴ Äñongä Nīicodemö,

—Waocä picængä ba ate ædö cæte mempoga eñaquingää. Tömengä nänö wäänä cæncadē ædö cæte mempoga guii æidinque eñaquingää.

⁵ Angä eñēninque Itota angantapa.

—Bitö imite näwangä ämopa. Waocä æpænē guidengä iñongante Wængongui Önöwoca cæcä beyænque mempoga eñadinganque Wængongui Awënë Odeye nempo guiite quëwenguingä ingampa. ⁶ Baonga beyænque nē eñadäni iñömö edæ baonque eñate quëwënanipa. Wæætē Wængongui Önöwoca cæcä beyænque nē eñadäni iñömö Wængongui Önöwoca ingante ewocate quëwënanipa. ⁷ Botö, Bitö mempoga eñaquënëmi imipa, ante botö änö eñēninque, Æbämē impa, ante änämaï incæbiimpa. ⁸ Woboyæ nänö cægäi bai wayömö wayömö pæmænte gopa. Woboyæ nänö pæmæmämo eñēmö incæ, Ædonö pæmænte pö, ædonö pæmænte go, ante eñänämaï imoppa. Wængongui Önöwoca cæcä beyænque nē eñadäni tömänäni inänite tömengä æbänö cæcää, ante adobaï eñänämaï imoppa, ämopa, ante Itota apænecantapa.

⁹ Apænecä eñēninque Nīicodemö,

—Æbänö inguüi.

¹⁰ Äñongä Itota wæætē,

—Idægoidi inänite nē odömömi imi incæte mäninö ante ædö cæte eñänämaï imii. ¹¹ Bitö imite näwangä ämopa. Mönitö quiëmē ante eñänimöni inte mäninö ante

apænemönipa. Mönitö quiëmē ante adimöni ininque, Mänömaï impa, ante apænemönipa. Minitö guiquënë möni änö ante apænemöni eñēninque ayæ Baa ämini inte pönänämaï iminipa. ¹² Botö minitö iminite, Inguipoga quëwënanäni weca æbänö i, ante apænedimo imo incæte minitö eñänämaï iminipa. Ininque Wængongui cæcä beyænque öönädē mini quëwenguinö ante æbänö i, ante apænebo bai ædö cæte pönenguimīni, ante apænecantapa.

¹³ Ayæ apænedinque, “Wadäni tömänäni öönädē æidämaï ingadänimpa. Waobo nē eñagaïmo inte öönädē quëwente nē wææ pömo iñömö botö adoboque öönädē æibo imopa. ¹⁴ Möitee wodi önömæca tæntæ nänö badöninto æninque awäa nã cædinque gö cæcä a ongongatimpa. Waobo eñagaïmo imote adobaï awäa timpodinque tiwadinque gö cædäni wægonguënëmo imopa. ¹⁵ Mänömaï botö imote cædäni adinque botö imote ætē wede pönänäni iñömö tömänäni cöwë wænämaï quëwencædänimpa,” ante Itota apænecäimpa.

Wængongui nänö waadete pönö

¹⁶ “Edæ Wængongui incæ inguipoga quëwënanäni inänite nē waadete pönengä inte tömengä Wengä adocanque onguinængä iñongante pönongä pongacäimpa. Ininque æcänö tömengä ingante nē wede pönäna iñömö tömengä wë womönämaï inte cöwë wænämaï quëwencæcäimpa. ¹⁷ Edæ Wængongui incæ tömengä Wengä ingante inguipoga iñömö da pönongä pongacäimpa. Incæte, Inguipoga quëwënanäni nänö pante wæquinque, ante apænte ancæte ante wii pongacäimpa. Wæætē inguipoga quëwënanäni inänite tömengä ængä beyænque quëwencædänimpa, ante tömengä ingante da pönongä pongacäimpa.”

¹⁸ “Æcänö tömengä ingante nē wede pönäna iñömö Wængongui tömengä ingante, Bitö pante wæquinque cæbipa, ante apænte änämaï incæcäimpa.

Æcänö guiquënë wede pönënamai ina iñömö Wængongui tömengä ingante, Botö Wengä adocanque iñongante bitö tömengä emöwo ante pönënamai inömi inte wæcæbiimpa, ante do apænte angä ingampa. ¹⁹ Wængongui nänö apænte änö iñömö iimaï impa. Nē ñäo bai inongä iñömö, Wængongui æbänö ingää, ante inguipoga iñömö ancæte ante pongacäimpa. Incæte waodäni tömënanï nani cædimämo wënæ wënæ i beyænque wëmö iñömö ante waadete pönënanï inänipa. Wæætë nē ñäo bai inongä ingante waadedämaï inänipa. ²⁰ Nē wënæ wënæ cædonäni inte ñäo iñömö ante püinque Baa äninque, Mönö cædinö edonque pönï badämaï ingæimpa, ante ñäo iñömö pönämaï inänipa. ²¹ Waodäni Wængongui näwangä nänö ämaï nē cædonäni guiquënë, Mönö cædinö ante Wængongui mönö tönö godongämæ cæcä beyænque cætamompa, ante edonque pönï acædänimpa, ante cædinque ñäo iñömö pöninque cædänipa.”

Wäo nē guidönongä Itota ingantedö ante apænecä

²² Ayæ ate Itota tömengä emiñænäni tönö Oodeabæ wædænque nani quëwëñömö godänitapa. Gote pöninque mäniñömö tömënanï tönö wædænque quëwëninque Itota angä beyænque tömënanï waodäni inänite æpænë guidönäni guigadänimpa. ²³ Ænöö quëwëñömö æpæ nanguï mæ adinque Wäo mäniñömö guidongä guigadänimpa. Ayæ waodäni, Wäo mönitö imönite æpænë guidonguingä, ante cöwë tömengä weca pönäni inänite guidongä guidänimpa. Ænöö quëwëñömö Tadiï quëwëñömö eyequeï inimpa. ²⁴ Mäniñedë Wäo ingante ayæ tee mönedämaï ingadänimpa.

²⁵ Wäo emiñænäni pancadäniya oodeocä adocanque tönö apænedinque, Mönö oodeocabo æbänö cæte Wængongui weca guicæte ante waëmö bacæmöimpa, ante tömënanï nani pönënö ante guëadö guëa ante

tedewënanipa. ²⁶ Adodäni Wäo weca ponte apænedinque,

—Nē odömömi eñëmi. Oododänö æmæmäa bitö weca nē pöninängä ingantedö ante bitö, Mäningä ingampa, ante apænebitawo. Edæ mäningä onguiñängä iñömö adobaï æpænë guidongä guidänipa töö. Waodäni tömänäni tömengä weca godänipa, ante wædänitapa.

²⁷ Ante wædäni eñëninque Wäo,

—Wængongui öönædë quëwënongå pönö angä æninque waocä mänömaï beyæ cæcampa. ²⁸ Botö wü

Codito inömo imopa. Iñæmpa Wængongui botö imote täno da pönongä pönimo imopa. Tömengä ayæ Ponguingä, ante apænetabopa. Mänömainö ante apænebo eñënimini inte minitö tömëmini mäninö ante nē apænequënëmini iminipa.

²⁹ Monguingä iñömö mongä ate tömengä onquiyängä nänöogängä bacampa. Tömengä guidengä iñömö nē monguingä ante wänö cöninque eñëñongä monguingä apænecä eñëninque,

Monguingä apænecä eñëmopa, ante watapæ to-campa. Botö adobaï Codito apænecä eñëmopa, ante mäningä bai nanguï watapæ tobo imopa. ³⁰ Tömengä iñömö godömenque ñænängä inte cædongä baquënegängä ingampa. Botö guiquënë pönömenque wædämo inte cædömo baquënëmo imopa, ante Wäo apænegacäimpa.

Öönædë nē quëwente wææ pongä

³¹ Ayæ Wäo godömenque apænecantapa.

Öönædë nē quëwente wææ pongä iñömö tömengä iñömö wü wadäni bai wædängä inte wæætë ñænängä inte cædongä ingampa. Öönædë nē quëwente wææ pongä iñömö tömengä godömenque ñænängä inte cædongä ingampa. Inguipoga iñömö nē eñacä guiquënë waodäni bai quëwënongå inte inguipogaque ante apænecampa. ³² Tömengä Wængongui weca quiëmë adingä inte quiëmë eñëningä inte mäninö ante apænecä eñëninque wadäni wæætë, Näwangä

impa, ante änāmaī inānīpa tōō.
³³ Mānīnō ante nē Ao angā guiquēnē
 tōmēngā, Wængonguī nāwangā angā
 ingampa, ante edonque pōnī angā
 inongā ingampa. ³⁴ Edæ Wængonguī
 nānō da pōnōningā iñōmō Wængonguī
 nānō ānō ante apænecampa.
 Tōmēngā ingante Wængonguī iñōmō
 tōmēngā Ōnōwoca ingante godongā
 ænīnque tōmēngā ædæmō ewocate
 quēwēngampa. ³⁵ Mæmpo Wængonguī
 iñōmō tōmēngā Wēngā ingante
 nē waadete pōnēngā ingampa.
 Wængonguī tōmēngā ingante, Bitō
 nempo quīnō inīncoo tōmancoo
 pōnōmo ænīnque bitō awēnē
 bacæbiimpa, ante pōnō cægacāimpa.
³⁶ Æcānō Wængonguī Wēngā ingante
 nē wede pōnēna iñōmō tōmēngā cōwē
 wænāmaī quēwēncæcāimpa. Æcānō
 Wængonguī Wēngā ingante nē Baa
 ante pōnēnāmaī ina guiquēnē tōmēngā
 wīī cōwē wænāmaī quēwēncæcāimpa.
 Edæ Wængonguī tōmēngā ingante
 ænguī nānō pangūimāmo cōwē
 cædongā ingampa, ante Wäo
 māniñedē iinque apænēgacāimpa.

4

Itota Tāmadiabæ onquiyængā ingante apænecā

¹ Paditeoidi inānite iūmaī ante
 tededāni ēñēnānitapa. Itota pōnō
 cædinque æpænē guidongā guīd-
 inque tōmēngā nānō ēmiñænāni
 iñōmō wīī Wäo ēmiñænāni baī
 wædænque badāni inte nangūī
 ināni badānīpa, ante tededānitapa.
² Mānōmaī ānāni incæte wīī Itota
 nē guidongā inongāimpa. Wæætē
 tōmēngā ēmiñænāni woadāni inānite
 guidōnāni guīgadānīpa. ³ Mānīnō
 ante Paditeoidi do ēñēnānīpa, ante
 ānāni ēñēnīnque Awēnē Itota Oode-
 abæ quēwēnīnque wadæ go Gadide-
 abæ iñōmō ocæ ēmænte gogacāimpa.

⁴ Gadideabæ taadō Tāmadiabæ
 iñōmō tæcæguedē inō godō tōmēngā
 goquēnēngā inongāimpa. ⁵ Tāmadiabæ
 iñōmō godinque tōmēngā Ticada
 nāni āñōmō pongantapa. Mānīī
 Ticada quēwēñōmō eyequeī docā

Aacobo wodi tōmēngā wēngā Ootee
 wodi ingante, Pancabaa bitō ōmæ
 baquiñōmō, ante tōmēngā ingante
 nānō godongāimæ inīmpa. ⁶ Ayæ
 æpāamōnicæ Aacobo wodi nānō ææ
 wogāimōnicæ adoyōmō inīmpa. Itota
 taadō gobæ inō godinque nangæ
 badinque æpāamōnicæ iñōmō pō tæ
 contayongā māniñedē tæcæ bæcā
 bagatīmpa. ⁷ Tæ contate ongōñongā
 Tāmadiabæ quēwēngā onquiyængā
 æpæ iyænte tadonte æncæte ante
 pongā adinque Itota tōmēngā ingante,
 –Æpæ pōnōmi beboe, angan-
 tapa. ⁸ Edæ tōmēngā miñæ nē
 godāni mānīnāni quēwēñōmō cænguī
 godonte æncæ godāni inōnānīmpa.

⁹ Tāmadiaidi inānite oodeoidi cōwē
 gomō adāni inānīpa, ante ēñēngā inte
 Tāmadiabæ quēwēngā onquiyængā
 iñōmō Itota ingante,

–Bitō oodeobi iimi incæte botō
 Tāmadiabæ quēwēmo iñōmote bitō
 ædō cæte botō imote, Æpæ pōnōmi
 beboe, āmīī, āmopa.

¹⁰ Åñongā Itota wæætē,

–Bitō, Wængonguī quīnō nānō
 pōnōnī i, ante ēñēnte baī ayæ, Æbodō
 inōmo inte bitō imite, Æpæ pōnōmi
 beboe, ante apæneboo, ante ēñēnte
 baī bitō wæætē botō imote, Æpæ
 pōnōmi beboe, ancædōmiimpa. Ayæ
 botō bitō imite æpæ quēwēnguimæ
 pōnōmo becædōmiimpa, āmopa.

¹¹ Angā ēñēnīnque onquiyængā,

–Awēnē, bitō æpæ mā iyæncade
 dæ ampa. Ayæ æpāamōnicæ guīibæ
 impa. Mānīmæ æpæ quēwēnguimæ
 bitō nē apænedimæ ædōnō mā
 iyænte ænguīmīī. ¹² Mōnō docā
 mæmpo Aacobo wodi iñōmō, Botō
 æmæwo wæmo adinque botō
 æpāamōnicæ mīnitō quī bacæimpa,
 ante iimōnicæ mōnō imonte godōn-
 gacāimpa. Tōmēngā adomōnicæ æpæ
 begacāimpa. Tōmēngā wēnāni tōnō
 tōmēngā cæningāidi adobaī adopæ
 begadānīpa. Adocā mōnō docā
 wædangā iñongante bitō godōmenque
 ñænæmi inte nē cædōmi imitawogaa,
 āmopa.

¹³ Åñongā Itota wæætē,

—Æcāmenque iñōmō mānīmæ bed-
inque wæætē gæwænte bacæcāimpa.
14 Æcāmenque botō godonguimæ nē
becā guiquēnē tōmengā gæwænāmaī
cōwē quēwencæcāimpa. Wæætē
botō tōmengā ingante tōmēmo
godonguimæ godōmo bedinque
tōmengā botō quēwēnō entawente
quēwencæcāimpa. Æpāamōnicæ cōwē
cægō bai botō tōmengā mīmōno
godonguimæ beyænque tōmengā
wænāmaī nānō quēwenguinō do
æninque quēwencæcāimpa, āmopa.

15 Onquiyængā tōmengā ingante,

—Awēnē, āninque, Botō gæwænāmaī
bacæboimpa, ante mānīmæ botō
imote pōnōmi beboe, āmopa. Ayæ
māniñōmō cōwē æpæ iyæncæ
pōnāmaī incæboimpa.

16 Ante añongā tōmengā wæætē,

—Goe, bitō nānōogængā ingante aa
pedinque ænte māmōmi pongæ, an-
gantapa.

17 Añongā tōmengā wæætē,

—Botō nānōogængā dæ ampa.

Angā eñēninque Itota tōmengā in-
gante,

—Bitō, Botō nānōogængā dæ
angampa, āninque nō ante āmipa.

18 Iñæmpa bitō nānōogæidi ōnompō
æmæmpoque iñōnānite bitō tōmēnāni
inānite mōnīmi imipa tōō. Ayæ
ñōwoyedē onguinængā bitō weca
nē quēwengā iñōmō wīi bitō nāwā
nānōogængā ingampa. Īninque ñōwo
bitō ānō iñōmō edæ nāwangā impa,
āmopa.

19 Angā eñēninque onquiyængā,

—Awēnē, Bitō Wængonguī beyæ
nē apænebi imi adinque eñēmopa.

20 Mōnitō dodāni mæmpoidi wodi,
Īi onquiyabo inō gote Wængonguī
ingante, Bitō Awēnē Wængonguī imidō
anguēnē, ante ædæ wæænīnque
angadānimpa. Mīnitō nē oodeoidi
imīni guiquēnē, Wængonguī ingante
waa ate apænecæte ante Eedotadēē
quēwēñōmō māniñōmonque god-
inque ædæ wæænte apænecæimpa,
āmīnipa tōō.

21 Añongā Itota wæætē,

—Onquiyæmi eñēmi. Botō ānō
eñēninque pōnēe. Mīnitō iñōmō
ædæ wæænīnque botō Mæmpo
ingante, Bitō Awēnē Wængonguī
imidō anguēnē, ante Īi onquiyabo
inō incæ Eedotadēē māniñōmō
incæ mīnitō māniñō ante ānāmaī
anguionæ oo pōni impa. 22 Mīnitō

tāmadiadi iñōmō nē Wængonguī in-
gante, Bitō Awēnē Wængonguī imidō
anguēnē, ante ædæ wæænīnque
apænemīni incæte adocā ingante,
Æbānō ingāā, ante eñēnāmaī imīnipa
tōō. Mōnitō guiquēnē nē ædæ
wæænīnque Wængonguī ingante waa
ate apænemōni inte adocā, Æbānō
ingāā, ante do eñēmōni imōnipa.
Edæ, Nē wēnæ wēnæ cædāni wæncæ
cædināni incæ quēwencædānimpa,
ante nē Ængā iñōmō oodeocā inongā
ingā apa anewēē. 23 Botō Mæmpo

ingante, Bitō Awēnē Wængonguī imidō
anguēnē, ante ædæ wæænīnque
nāwangā ante apænedōnāni inte
apænecædānimpa. Adodāni, Nāwangā
impa, ante nō pōnente ēwocadāni
inte ædæ wæænīnque Wængonguī
ingante māniñō ante watapæ
apænecædānimpa. Māniñō ante
nāni apænequionæ iñōmō edæ oo
pōni impa. Edæ do ĩinque batimpa.
Wængonguī, Mānōmaī entawente
nō pōnēnāni bai ināni inānite diqui
diqui mīninque, Māniñānique botō
imote, Bitō Awēnē Wængonguī imidō
anguēnē, ante ædæ wæænīnque
watapæ apænecædānimpa, angampa.

24 Wængonguī Ōnōwoquake ēwocate
quēwengā ingampa. Īninque nē ædæ
wæænte tōmengā ingante watapæ
apænedāni iñōmō tōmēnāni, Nāwangā
impa, ante nō pōnente ēwocadāni inte
ædæ wæænīnque tōmengā ingante
watapæ apænequēnēnāni inānipa,
āmopa.

25 Angā eñēninque onquiyængā,

—Botō, Mēetiya nāni Codito ānongā
poncæcāimpa, ante do eñēmopa.
Tōmengā pongā ate, Æbānō inguīi,
ante mōnō imonte tōmānō odōmonte
apænecā eñencæmōnimpa.

26 Añongā Itota wæætē,

—Botö nē apænebo iñömö Codito inömo imo apa cæbii, ämopa.

²⁷ Tæcæ apæneyongante tömengä miñæ nē godäni ocæ emænte ponte ayönäni tömengä iñömö onquiyængä ingante apæneca adinque, Æbänö cæ wæmönii, ante guiñente wædänitapa. Incæte, Æbänö ämii, ante, Quinante tömengä ingante tedebii, ante adocanque incæ änämaï ingantapa. ²⁸ Ayæ onquiyængä tömengä iyæncade emö cæte nāni quëwëñömö ocæ emænte gote pöninque waodäni inänite apænedinque,

²⁹ —Ægodöedäni, onguiñængä iñömö botö imote tæcæ adinque, Botö æbänö cæboo, ante tömänö ante botö imo nē apæneca ingante pö aedäni. Mäningä wabänö mönö Codito inongä ingantawo, ante ämopa.

³⁰ Angä eñëninque tömënäni nāni quëwëñömö tao godinque tömengä weca gogadänimpa. ³¹ Onquiyængä nāni quëwëñömö tæcæ goyongä Itota nänö nē emiñænäni iñömö tömengä ingante,

—Awënë nē Odömömi imi wædænque cæe, ämönipa.

³² Ante añönäni tömengä wæætë tömënäni inänite,

—Botö cængui botö eädö ante quinö i, ante minitö guiquënë tömäa eñënamäi iminipa töö.

³³ Angä eñëninque tömengä emiñænäni godongämæ nāmanque apænedinque,

—Wabänö wacä tömengä ingante cængui ænte pongantawo.

³⁴ Añönäni Itota,

—Botö imote nē da pönongä nänö änö bai botö cædö iñömö mänii tömëmo cængui bai impa. Ayæ, Tömengä nänö cædö ante tömänö iinque cæbopa, ante botö cædö iñömö botö cængui bai adobai impa.

³⁵ Minitö iñömö, Mëa go mëa apäicä bayonte amiñayedë tömëmoncodë gæcæmönimpa, ante wii äminitawo. Botö guiquënë minitö iminite ämopa. Waodäni inänite wi æmonte aedäni. Edæ mäninäni tömëmoncoo gæyedë bai inänipa. ³⁶ Itota, Botö beyæ

ante waodäni inänite nē gædongä ingante botö, Bitö cæbipa, ante paga cædinque ñöwoyedë incæ do pönömo ængampa. Wænämaï wantæpiyæ quëwencædänimpa, ante cædinque ñöwoyedë incæ tömengä tömënäni inänite do gædongä ingampa. Iinque botö änö ante waodäni mimöno nē quiyadingä tönö nē gædingä tönö guëa tocædaimpa. ³⁷ Mänömaï wëenënedë nāni angainö ante, Waocä adocanque tömëmö quiyacä ate wacä guiquënë nē gædongä ingampa, ante nāwangä ante impa. ³⁸ Tömëmoncodë iñömö cædäni bai cædämaï imini incæte minitö tömëmoncoo gæquinäni bai bacæminimpa, ante botö, Waodäni botö quinäni inänite gæcæminimpa, ante minitö iminite da godömo gominitapa. Wadäni iñömö do mänincodë nanguï pönö quiyate cædinque botö änö ante waodäni inänite apænegadänimpa. Minitö guiquënë mini cædämaï iñömö incæ önonque gædimini iminipa, ante Itota apænegacäimpa.

³⁹ Onquiyængä guiquënë tamadiaidi mäniiñömö nāni quëwëñömö quëwëñäni inänite, “Tömengä iñömö botö imote tæcæ adinque, Botö æbänö cæboo, ante tömänö ante botö imote apænecantapa,” ante apæneca eñëninque tömënäni nanguï inäni Itota ingante pönengadänimpa. ⁴⁰ Tamadiaidi tömengä weca godinque, Bitö mönitö weca a ongöe, änäni eñëninque tömengä mëönaa iñonte tömënäni weca owocantapa. ⁴¹ Tömengä nänö owoyedë tömengä nänö änö beyænque godömenque tæiyænäni iñömö tömengä ingante wede pönente badänitapa. ⁴² Adodäni onquiyængä ingante,

—Wii bitö apænete änonque ante eñëninque pönëmöni inte mönitö tömengä apæneca adobai eñënimöni imönipa. Ayæ, Mäningä iñömö inguipoga mönö quëwencabo iñömönte tömengä nāwangä mönö imonte nē Ænongä ingampa, ante do eñëmönipa, apænegadänimpa.

Itota cæcä beyænque awënë tönö

cæcä wengä waa bacäi

⁴³ Mëönaa go ate tömengä mänĩñömö quëwëninque wadæ godinque, Gadideabæ gocæboimpa, ante gocantapa. ⁴⁴ Itota incæ wëenëñedë, İımaı impa, ante änongäimpa. Wængongui beyæ në apænecä inte tömengä nänö pægaimæ incæ mänĩñömö apæneyongä tömengä tönö pëgainäni guiquënë tömengä ingante wıi waa adänipa töö, ante änongäimpa. ⁴⁵ Tömengä mänıi Gadideabæ nänö ponque pongä adinque gadideaidi edæ Eedotadëe İñömö Patowa nani ææmæ cæyedë Itota bai mänĩñömö gote ongöñönäni, Tömengä æbänö cæcää, ante tömää adinäni inte, Bitö põmi waa amönipa, ante tömengä ingante apænëgadänimpa.

⁴⁶ Ayæ Gadideabæ godinque Itota wæætë Cänaa nani quëwëñömö, Æpæ incæ biinömæ bacäimpa, ante wëenëñedë nänö cædiñömö adoyömö gocantapa. Capënaömö nani äñömö quëwëninque adocanque pancabaa awënë tönö godongämæ cæcä İñömö tömengä wëñængä onguiñængä wënæ wënæ İnongäimpa. ⁴⁷ Adocä onguiñængä İñömö, Itota Oodeabæ quëwente Gadideabæ pongä, änäni ëñëninque tömengä Itota weca gote angantapa. Botö wëñængä onguiñængä wæncæ cæcä İñongante bitö tömengä ingante cæbi waa bacæ. Ægodöe.

⁴⁸ Itota tömengä ingante,

—Botö, Acæminimpa, ante bamönengæ Pancadäniya babetamönäni inte pancadäniya pæ opa pæ opa godönäni inte pancadäniya cömante İnönäni İnänipa. ⁴ Adodäni, Æpæ incæ gopæ, ante wänö cönönäni İnönänimpa. Edæ Wængongui anquedo wæætë wæætë, Mänimæ incæ incæ gopængæimpa, ante wææ põninque cædongäimpa. Gäwapæ incæ incæ go cæpæ adinque æcänö täno mänimænë guida inte adocä quiëmë wënæ wënæ İ waa badongäimpa. ⁵ Mänĩñömö öñönäni weca adocanque në öñönongä İñömö todëinta İ ocho wadepo ganca wënæ wënæ inte wëgaingä İnongäimpa. ⁶ Adocä mänĩñömö öñongä ingante Itota ponte ayongä wadäni,

—Bitö wëñængä waa bacäi. ⁵² Ante apænëdäni ëñëninque tömengä tömënäni İnänite, Botö wëñængä æyedënö waa bacäi, ante äñongä tömënäni wæætë tömengä ingante, —İimö ædæ gowayedë mänĩñedë tömengä gancæ bacantapa, ante apænëdänitapa. ⁵³ Ayæ wëñængä mæmpo, Bitö wëñængä quëwencæcäimpa, ante Itota botö İmote nänö äniñedë adoyedë botö wëñængä do waa bacantapa, ante wædinque tömengä tönö tömengä nani quëwencabo tömancabo Itota ingante wede pönënanäni bagadänimpa. ⁵⁴ Itota oodeoidi weca quëwente Gadideabæ ocæ ëmænte põninque tömengä mänĩñömö İi bamönengæ cædinque mempoga nänö cædö bamönengæ bagatimpa.

5*Itota cæcä beyænque pæ opa pæ opa gocä waa bacäi*

¹ Ayæ ate oodeoidi, Mönö Wængongui beyæ, ante nani ææmæ cæyedë Itota Eedotadëe İñömö æidinque ado ante gogacäimpa. ² Eedotadëe wææ cæte İñömö obegaidi nani põ guidemö gäänë gäwapæ impa. Mänimæ gäwapæ ebëdeö tededö Betadapæ nani ämæ yæwedeca önonpo æmæmpoque ñoncæcate İnoncöimpa. ³ Mänincönë wënæ wënæ İnäni tæiyænäni cöwë öñönönänimpa.

Pancadäniya babetamönäni inte pancadäniya pæ opa pæ opa godönäni inte pancadäniya cömante İnönäni İnänipa. ⁴ Adodäni, Æpæ incæ gopæ, ante wänö cönönäni İnönänimpa. Edæ Wængongui anquedo wæætë wæætë, Mänimæ incæ incæ gopængæimpa, ante wææ põninque cædongäimpa. Gäwapæ incæ incæ go cæpæ adinque æcänö täno mänimænë guida inte adocä quiëmë wënæ wënæ İ waa badongäimpa. ⁵ Mänĩñömö öñönäni weca adocanque në öñönongä İñömö todëinta İ ocho wadepo ganca wënæ wënæ inte wëgaingä İnongäimpa. ⁶ Adocä mänĩñömö öñongä ingante Itota ponte ayongä wadäni,

Mäningä wantæpiyæ mänömaï wënæ wënæ inte wægaingä ingampa, ante apænedäni eñëninque Itota tömengä ingante,

—Bitö, Waa bainëmo, ämitawo.

⁷ Ante äñongä nē wënæ wënæ ingä wæætē,

—Awënë, gäwapæ incæ incæ gopæñedē æcänö botö imote ænte guiquinaa edæ dæ angampa. Ayæ botö, Æpænē guicæboimpa, ante goyömo wacä pöningue do täno guicä.

⁸ Ante wæyongante Itota,

—Ængæ gantie, bitö bee podonte möimo ænte goe. ⁹ Äñongä onguinængä iñömö iñontobæ waa badingä inte tömengä bee podonte möimo ænte cægonde gocantapa. Oodeoidi näni guëmanguionæ iñonte Itota mänömaï cæcantapa. ¹⁰ Mänömaï beyæ oodeoidi awënëidi iñömö onguinængä nē waa badingä ingante,

—Nöwoönæ guëmanguionæ iñonte mönö æbänö cæqui, ante do wææ yewæmonte impa cæbii. Bitö bee podonte möimo næænämaï incæbiimpa.

¹¹ Ante püñönäni tömengä wæætē,

—Botö imote, Waa bae, ante nē cædingä iñömö adocä incæ, Bitö bee podonte möimo ænte goe, angä cætabopa.

¹² Angä eñëninque tömënäni tömengä ingante,

—Mäningä iñömö bitö imite, Bitö bee podonte möimo ænte goe, ante nē angä iñömö æcänö ingä. Apænebi eñëmönie, änänitapa.

¹³ Itota guiquënë do waodäni nanguï inäni ongönäni tæcæguedē go wadæ godongäimpa. Mänömaï beyæ onguinængä nē waa badingä iñömö, Nē cædingä æcänö ingä, ante eñënämaï ingantapa. ¹⁴ Ayæ ate Itota Wængonguï oncö ñænæncö yabæcönē go guidinque tömengä ingante bee téninque,

—Eñëmi, bitö wæætē waa babi imipa. Inique godömenque wënæ wënæ cädämaï incæbiimpa. Bitö mäninö wënæ wënæ bitö cægainö

ante ñimpo cädämaï imi inique wabänö bitö wæwenguinque godömenque babaimipa, ämopa.

¹⁵ Angä eñëninque onguinængä wadæ gote oodeoidi awënëidi weca pöningue angantapa. Botö imote, Waa bae, ante nē cædingä iñömö Itota ingampa, ante apæncantapa.

¹⁶ Mänömaï beyæ Itota mäninö nänö cædinö ante guëmanguionæ iñonte cæcä adinque oodeoidi awënëidi iñömö tömengä ingante togænte wënæ wënæ cädänitapa. ¹⁷ Itota tömënäni inänite,

—Botö Mæmpo nöwoönæ ganca tömengä nänö cädö ayæ cæcä ingampa. Ayæ botö adobaï cæbo imopa, ante apæncantapa.

¹⁸ Mäninö angä eñëninque tömënäni godömenque püningue, Mönö tömengä ingante æbänö cæte wænömö wængungä, ante godömenque nanguï cægadänimpa. Tömënäni, Tömengä guëmanguionæ iñonte do cæcä ingampa. Ayæ godömenque, Wængonguï botö Mæmpo inongäimpa, ante tededinque tömengä, Botö Wængonguï bai imopa, ante bai cæcampa töö, ante tömënäni godömenque piingadänimpa.

Tömengä Wengä ingante Wængonguï pönö cæcä ate Awënë bacampa

¹⁹ Itota adodäni inänite iïmaï äninque, “Botö mïnitö iminute näwangä ämopa. Botö Wængonguï Wëmo inömo incæ ædö cæte adoboque nämanque cæbo imoo. Botö Mæmpo æbänö cæcä adinque botö adodongue cæbopa. Edæ botö Mæmpo nänö cädö bai botö Wængonguï Wëmo inte adobaï cæbopa. ²⁰ Edæ Mæmpocä Wëmo iñömote tömengä botö imote waadete pönëninque tömengä nänö cädö tömänö ante botö imote odömongä abo imopa. Ayæ mïnitö, Æbänö cæcä wæmöö, ante wæcæminimpa, ante cædinque tömengä godömenque bamönengæ nänö cädö ante botö imote odömongä ate botö wæætē cæbo acæminimpa. ²¹ Edæ botö Mæmpo iñömö æmæwo wængainäni inänite,

Ñāni ömæmöninque mīnitō mīimīni quēwencæminīmpa, ante pōnō cæcā bai botō tōmengā Wēmo iñōmō adobaī cæbo īmopa. Æcānō ingante, Bitō mīi quēwencæbiīmpa, ante āinēmo inte botō tōmengā ingante pōnō cæbo ate mīingā quēwencæcāīmpa. ²² Adobaī botō Mæmpo iñōmō waodāni īnānite adinque, Æcānō waa cæcantawo, ante, Æcānō wēnæ wēnæ cæcantawo, ante apænte ānāmaī ingampa. Wæætē edæ botō tōmengā Wēmo iñōmote tōmengā, Bitō māninō ante waodāni tōmānāni īnānite apænte ancæbiīmpa, ante cægacāīmpa. ²³ Mānōmaī cædinque botō Mæmpo, Waodāni botō īmo nāni waa abaī adobaī botō Wengā ingante tōmānāni waa acædānīmpa, ante cægacāīmpa. Botō tōmengā Wēmo iñōmote nē waa adāmaī ingā iñōmō tōmengā botō Wæmpocā botō īmote da pōnongā ingante adobaī waa adāmaī ingampa tōö,” ante Itota apænegacāīmpa.

²⁴ Ayæ apænedinque, “Mīnitō īmīnite nāwangā āmopa. Waocā botō ānō ēñēninque botō īmote nē da pōnongaingā ingante nē wede pōnengā iñōmō tōmengā nānō apænte pante wæwenguīnō godāmaī incæcāīmpa. Wæætē tōmengā nānō wænāmaī quēwenguīnō gocæcāīmpa. Edæ tōmengā mōnō æmæwo wænguīnō ñīmpo cædinque wænāmaī mōnō quēwenguīnō do gocāīmpa. ²⁵ Mīnitō īmīnite nāwangā āmopa. Waodāni nē quēwēnāni incæ tōmēnāni æmæwo wængaināni bai īnōnāni inte tōmēnāni iñōmō Wængonguī Wēmo botō tedepāmo oo ēñencædānīmpa. Ñōwoönæ tōmēnāni nāni ēñenguīönæ do batīmpa. Nē ēñēnāni iñōmō tōmēnāni nāni wænāmaī quēwenguīnō gocædānīmpa. ²⁶ Wængonguī nāmā nē quēwēnongā inte tōmānāni nāni quēwēmāmo ante nē godongā ingampa. Mānōmaī beyænque botō tōmengā Wēmo adobaī nāmā nē quēwēnōmo inte tōmānāni nāni quēwēmāmo ante nē godōmo īmopa. ²⁷ Ayæ Waobo ēñagāimo iñōmote tōmengā pōnō cæcā

beyænque botō nē āmo badinque nāmā tæi pīñænte cædinque edæ, Æcānō waa cæcantawo, ante, Æcānō wēnæ wēnæ cæcantawo, ante nē apænte anguīmo īmopa. ²⁸ Botō mānōmaīnō ante apænebo ēñēninque mīnitō, Æbānō angā wæmōö, ante ānāmaī incæminīmpa. Edæ æmæwo wængaināni tōmānāni tōmēnāni nāni wodido nē oñongaināni iñōnānite edæ botō tedepāmo incæ tōmēnāni nāni ēñenguīönæ oo pōni īmpa. ²⁹ Botō tedepāmo ēñēninque tōmēnāni tōmānāni ta poncædānīmpa. Nē waa cægaināni iñōmō wænāmaī nāni quēwenguīnō nāni goquinque ñāni ömæmoncædānīmpa. Nē wēnæ wēnæ cægaināni guiquēnē nāni apænte pante æmæwo wæwenguīnō nāni goquinque ömæmoncædānīmpa cæminīi,” ante Itota apænegacāīmpa.

Æcānō āna ēñente cæbii, ante Itota ingante ānānīpa

³⁰ Ayæ godōmenque apænedinque Itota īmaī apænegacāīmpa. “Botō ædō cæte nāmanque adoboque cæbo īmoo. Wæætē Wængonguī botō īmote æbānō angā ēñēninque botō māninō ante, Æcānō waa cæcantawo, ante, Æcānō wēnæ wēnæ cæcantawo, ante apænte āmopa. Ayæ botō apænte ānō iñōmō cōwē nōinō ante īmpa. Edæ botō tōmēmo āmaī cædāmaī īmopa. Wæætē botō Mæmpo botō īmote nē da pōnongaingā nānō āmaī cæbo īmopa. ³¹ Botō nāmanque āninque, Æbānō cæboo, ante apænebo bai mīnitō, Önonquedō ante īmpa, ancædōmīnīmpa. ³² Botō æbānō cæboo, ante wacā botō beyæ ante nē apænegā ingampa. Tōmengā botō īmotedō ante nānō apænedō iñōmō edæ nō īmpa, ante ēñēmopa. ³³ Mīnitō botō īmotedō ante, Æbānō cæcāā, ante ēñencæte ante Wäö nē æpænē guidōnongā weca wadāni īnānite da godōmīnitapa. Ayæ Wäö mānināni īnānite botō īmotedō ante nō apænegā ēñēnānitapa. ³⁴ Botō æbānō cæboo, ante waodāni botō beyæ apænegacāīmpa, ante botō ānāmaī īmopa. Wæætē, Mīnitō botō

æmo beyænque quëwencæminimpa, ante cædinque botö mänömainö ante apænetabopa. ³⁵ Wäo nê æpænê guidöngä tömengä iñömö ti wodönoincade bæco bai ingacäimpa. Ayæ, Tömengä nänö angainö ñäo bai impa, ante adinque minitö wantæyö iñonte, Waa impa, ante watapæ tominitapa. ³⁶ Botö æbänö cæboo, ante Wäo nê æpænê guidöngä nänö angainö beyæ waodäni mäninö ante do ewocadäni ingadänimpa. Ayæ botö Mæmpo, Bitö iimaï cæe, ante, Tömää iinque cæcæbiimpa, ante botö imote nänö angainö bai ante do cædömo imopa. Botö Mæmpo botö imote da pöngaingä ingampa, ante wadäni botö cædinö beyæ do ëñënanimpa. ³⁷ Ayæ botö Mæmpo botö imote nê da pöngaingä iñömö adobai, Botö æbänö cæboo, ante apæncæ ëñengadänimpa. Minitö guiquënë tömengä ingante adämaï imini inte tömengä nänö tedepämo incæ cöwë ëñënamäi iminipa töö. ³⁸ Ayæ botö Mæmpo botö imote da pöngä pönimo imopa, ante minitö pönënamäi imini inte edæ tömengä nänö angainö ante entawënämaï quëwëmini iminipa. ³⁹ Wængonguï angä ëñëninque nani yewæmongainta ædæmö adömini inte edæ minitö, Mäninö nani yewæmongainta amöni beyænque mönitö wænämaï möni quëwenguinö gocæmönimpa, ante pönëmini iminipa. Iñæmpa mänintaa yewæmöninque botö imotedö ante apænedinque yewæmongadäni apa quëwëminii. ⁴⁰ Botö, Minitö wænämaï mini quëwenguinö ante pö æedäni, äñömote minitö wæætë Baa äninque botö weca pönämaï iminipa,” ante Itota apæncantapa.

⁴¹ Ayæ apænedinque tömengä, “Waodäni botö imote waa adinque apæncædänimpa, ante änämaï imopa, angantapa. ⁴² Iñæmpa, Minitö æbänö cæminii, ante botö do ëñëmopa. Wængonguï nänö waadete pönente entawënö minitö entawënämaï quëwëminipa, ante do ëñëmopa. ⁴³ Wængonguï angä

ëñëninque botö wææ pönimo adinque minitö Baa ante botö imote pönënamäi iminipa. Wacä guiquënë nämä äninque pongä ininque minitö mäningä ingante Ao ante pönëmaïminipa, ante awædö. ⁴⁴ Minitö wacä ingä wacä ingä, Botö imote waa adinque waa apæncædänimpa, ante cæmini awædö. Incæte minitö, Mönö Wængonguï nê adocanque ingaingä ingampa, ante, Tömengä mönö imonte waa adinque apæncæcäimpa, ante cædämaï iminipa. Mänömaï beyæ minitö botö imote ædö cæte pönëmini iminii. ⁴⁵ Botö Mæmpo weca ongöninque minitö iminitedö ante botö, Iñäni wënæ wënæ cædäni inänitapa, ante ancæboimpa, ante minitö pönëminitawo. Mänömainö ante edæ pönënamäi iedäni. Wæætë Möitee wodi nänö angainö ëñente beyænque mönö quëwengæimpa, ante pönëminipa. Iñæmpa adocä Möitee wodi mini nê pönëngä iñömö, Nê wënæ wënæ cæmini iminipa, ante ancæcäimpa cæminii. ⁴⁶ Minitö Möitee wodi ingante pönente bai adobai botö imote pönencædöminimpa. Edæ tömengä botö imotedö ante yewæmongacäimpa. ⁴⁷ Möitee wodi nänö yewæmongainö ante pönënamäi imini ininque minitö ædö cæte botö apænedö ante ëñëninque pönenguimiiii,” ante Itota mäniñedë iinque apænegacäimpa.

6

5.000 ganca inäni inänite Itota godongä cænänipa

¹ Mäninö iinque apænete ate wantæyö iñonte Itota wadæ godinque gäwapæ Gadideapæ nani ämæ æmæmäa tao gogacäimpa. Mänimæ Tibediapæ nani ämæ impa. ² Tömengä wogaa tao gocä adinque waodäni tæiyænäni pö tee empo godänitapa. Tömengä, Acædänimpa, ante cædinque wënæ wënæ inäni inänite bamönengæ cæte odömongä do adinäni inte godänitapa. ³ Ayæ Itota tömengä nänö emiñænäni inänite änanquidi ænte

mæicä æidinqe tōmēnāni tōmengä tōnō tæ contadānitapa. ⁴ Wodo pænta gogaïönæ, ante oodeoidi Patowa nāni ææmæ cæönæ oo pōni ingatimpa. ⁵ Itota gomō ayongä waodāni tæiyænāni tōmengä weca pōnāni adinqe tōmengä Pedipe ingante,

—Mānīnāni waodāni beyæ ædōnō gote pāo godonte æninqe godōmōni cænguīnāni, angantapa.

⁶ Edæ Itota iñōmō, Æbānō cæbaïmoo, ante do ēñēningä inte mānīnō ante, Pedipe æbānō cæquingā, ante acæte ante angantapa. ⁷ Pedipe wæætē tōmengä ingante,

—Iñæmpa pāo ante tōmānāni wædænque cæncædānimpa, ante ocho apāicä cæte beyæ paga æinta æninqe mānimpota godonte æninqe edæ wīi eyepæ imaimpa, angantapa. ⁸ Ayæ tōmengä ēmiñængä Timōnō Pegodo biwī Æntade iñōmō Itota ingante,

⁹ —Mōnitō weca nē ongongä edēningä iñōmōtebada nāni awēnēnimō guiyā pāo onompo æmæmpoque tōnō guiyā gæyæ mēa pōni næængä ingampa. Incæte mānīi cænguī tæiyænāni beyæ ædō cæte eyepæ i, ante wæbopa.

¹⁰ Angä ēñēninge Itota,

—Mīnitō tæiyænāni godongāmæ ongōnāni inānite ämīni tæ contaedāni, angantapa. Tōmengä nānō ämaï ānāni ēñēninge waodāni önōmæcaque inō nanguī gaguimæ pæyōmō do tæ contadānitapa. Onguīñænāni incæ onompo æmæmpoque mīido ganca ināni inte tæ contadāni ingadānimpa. ¹¹ Itota pāo æninqe, Wængonguī, Bitō waa pōni pōnōmi ænte cænguīmōni, ante apænedinqe tōmengä nānō ēmiñænāni inānite godongä æninqe tōmēnāni wæætē tæ contadāni inānite di mæñænāni cænānitapa. Ayæ tōmengä gæyæ æninqe adobaï cæcantapa. Tōmānāni iñōmō nāni cæinēnō ante eyepæ cængadānimpa.

¹² Tōmēnāni tōmō pōni cænāni ate tōmengä ēmiñænāni inānite tōmengä,

—Cænguī nāni ao mæ ao mæ ñōnōni ee õñoncoo wote badāmaï ingæimpa, ante pædæ wææmpo õ æedāni.

¹³ Angä ēñente cædinque nē cænāni pāo onompo æmæmpoque tebada nāni awēnēnimō nāni ao mæ ao mæ ñōnōni ee õñoncoo õ ænte da wēnāni ate edæ otodē tipæmpoga go mentodēa cænguī eyede da wēnāni contagatimpa.

¹⁴ Waodāni iñōmō Itota bamōnengæ nānō cædi adinqe,

—Nāwangä iingä iñōmō Wængonguī beyæ nē apæncä ingampa. Tōmengä inguipoga Ponguingä, ante nāni angaingä inongäimpa, ante tæcæ ānānitapa.

¹⁵ Tōmēnāni, Bitō mōnitō Awēnē Odeye bacæbiimpa, ante botō imote bæi ongoncæte ante poncæ cædānipa, ante wædinque Itota wadæ godinque adocanque ānanquidi wæætē æigacäimpa.

Itota æpæ yædopæ dao dao gocä (Mäateo 14.22-27; Mäadoco 6.45-52)

¹⁶ Gäwadecæ pōni bayō tōmengä ēmiñænāni iñōmō gäwapæ yæwedeca wæi gogadānimpa. ¹⁷ Itota angä ēñēninge māniñōmō wæi wipodē guidinque tōmēnāni, Gäwapæ æmæmāa Capēnaōmō nāni quēwēñōmō mōnō taocæimpa, ante tæcæ wogaa tao goyōnāni dobæ wēmō bayō Itota ayæ tōmēnāni weca pōnāmaï inongäimpa. ¹⁸ Ayæ woboyæ nanguī pæmænte pōñō æpæ mæ conta mæ conta cæyonte, ¹⁹ tōmēnāni wodo tinco quidōmetodo wiyate cæyōnāni Itota iñōmō wipo gāmænō pōninqe æpæ yædopæ wænōmēnæcapæ dao dao pongä adinqe ancai guññēnānitapa. ²⁰ Ancai guññēñōnānite Itota iñōmō tōmēnāni inānite,

—Botō imopa. Guññēnāmaï iedāni, angantapa.

²¹ Ante añongä tōmēnāni Ao ante tōmengä ingante wipodē æninqe tōmēnāni nāni goñēñōmō emōnaiya do tao gogadānimpa.

Waodāni Itota ante diqui diqui minte pōnāni

22 Ìimö ate tæiyænäni gäwapæ ìmæ wedeca a ongönönänimpa. Ìinque tömënäni, Wipo adoque pönì mǎniñömö wǎi wocæ incæte Itota iñömö mǎnimpodë guiidǎmaì iñongante tömengä miñæ godäni adodänique guii wadæ tao godänitapa, ante adinque wädänitapa. 23 Awënë Itota do Wængonguì ingante, Bitö waa pönì pönömi cænguimöni, ante apæneçä ate waodäni nāni pǎo cæniñömö pancadāniya ayæ ongönänimpa. Ñowo iñömö wapocoo Tibedia nāni quëwëñömö wo cæwodinque mǎniñömö tömënäni nāni cæniñömö eyequei pönāni adänitapa. 24 Ìinque Itota tönö tömengä nānō emiñænāni edæ dæ änāni wædinque tæiyænāni iñömö wipodë guiite Capënaömö godinque Itota ante diqui diqui mincæte ante wogaa gogadänimpa.

Itota, Mönö quëwenguinque, ante cænguì bai ingampa

25 Adodäni gäwapæ æmæmāa tao godinque tömengä ingä adinque,
—Awënë nē Odömömi ìmi æyedëno iñömö pömitawo, änānitapa.

26 Añönāni Itota wæætë,
—Minitö ìminite nāwangä ämopa. Minitö tömo pönì pǎo cænìmini inte botö ìmote ante diqui diqui mincæ pöminitapa töö. Wæætë edæ botö, Acæminimpa, ante bamönengæ cæbo beyæ minitö wii pömini awädö. 27 Minitö, Mönö cænguì, ante æncæte ante cæmini incæte inguipogaque mini woquïnonque ante æncæ cädāmaì quëwëedäni. Wæætë edæ, Mönö cænguì ìnque bayedë cænguì mæ öñongæimpa, ante cædinque minitö, Mönö wænāmaì quëwenguinque gocæmöimpa, ante pönente quëwëedäni. Botö nē Waobo ëñagäimo ìmo mǎni cænguì minitö ìminite pönömo æncæminimpa. Botö Mæmpo botö imotedö ante, Ìingä nō cæçä ingampa, ante odömongacäimpa.

28 Angä ëñëninque tömënäni tömengä ingante,

—Mönitö, Wængonguì nānō cæquimāmo ante cæcæte ante quinö cæquënëmöni ìmönii, ante wæmönipa.

29 Añönāni Itota wæætë,
—Botö Wængonguì nānō nē da pönongaïmo iñömote minitö botö ìmote mini wede pönënö iñömö edæ mǎniñö Wængonguì nānō cädö impa, angantapa.

30 Mǎnömaì beyæ tömënäni godömenque tömengä ingante,
—Bitö, Eñencädänimpa, ante bamönengæ bitö cädö ante æbänö cæte odömömi adinque pönëmaimönipa. Æbänö cæquimii, ante änewënänitapa.

31 Mönö wæmæidi önomæca nāni quëwëñedë cænguì mǎnāā nāni angäi cængadänimpa. Ìimainö ante yewæmongatimpa. “Tömengä, Minitö cænguì, ante tömënäni inänite öönädë inö mǎwææ godongacäimpa,” ante nāni yewæmongainö bai impa, ante apænedänitapa.

32 Itota wæætë tömënäni inänite,
—Nāwangä ämopa. Minitö ìminite öönädë mǎwææ cænguì nē pönongaingä iñömö tömengä wii Möitee wodi ingacäimpa. Wæætë botö Mæmpo iñömö tömengä minitö ìminite öönädë nāni nāwä cænguì bai pönongä cæncæminimpa. 33 Öönädë quëwente wææ pongaingä iñömö tömengä iñömö, Cænguì bai ingampa, ante Wængonguì nānō nē angaingä ingampa. Adocä inguipoga quëwënāni inänite, Mini wantæpiyæ wænāmaì quëwenguinö ante pönongä æninqwe quëwënänipa.

34 Ante Itota apæneçä ëñëninque tömënäni,
—Awënë, ñowo mǎni cænguì ìimö inö ìimö inö pönömi cæmönie.

35 Añönāni Itota godömenque apænedinque,
—Botö iñömö, Mini quëwenguinque, ante mini cænguì bai inömo ìmopa. Botö weca nē pongä iñömö cöwë cænguì gue ænënāmaì bai quëwencæcäimpa. Ayæ botö ìmote nē wede pönengä iñömö cöwë tepæ gæwænāmaì bai quëwenguingä ingampa, ante apænecantapa.

³⁶ Ayæ wæætë, Minitö iminite do botö änö bai impa. Botö imote do adimini incæte minitö ayæ wede pönënamai iminipa. ³⁷ Botö Mæmpo, Bitö quinäni bacædänimpa, ante cædinque botö imote pönongä æmo inique botö quinäni nê badäni inte tömënäni tömänäni iñömö botö weca edæ do pönänipa. Ayæ æcämenque botö weca pöna inate, Botö weca pönämaï imipa, ante cöwë änämaï incæboimpa. ³⁸ Edæ öönædë quëwëninque botö wii tömëmö ämaï cæcæboimpa, ante wææ pontabopa. Wæætë botö imote nê da pönongaingä nänö ämaï cæcæboimpa, ante wææ pontabopa. ³⁹ Ayæ botö imote nê da pönongaingä botö imo nänö angainö iñömö iïmaï impa. Waodäni bitö quinäni bacædänimpa, ante pönömo æninque bitö quinäni badinque adocanque incæ wë womonte wænämaï incæcäimpa. Wæætë inique baquiönæ iñonte bitö, Ñäni ömæmöedäni, ämi ëñëninque bitö quinäni tömänäni edæ ñäni ömæmoncædänimpa. ⁴⁰ Edæ botö Mæmpo nänö angainö iñömö iïmaï impa. Botö Wængongui Wëmo iñömote botö imote ædæmö adinäni inte edæ botö imote nê pönënanäni tömänäni cöwë wænämaï wantæpiyæ quëwencædänimpa. Mänömainö ante impa. Ayæ inique baquiönæ iñonte botö mäninäni inänite, Minitö ñäni ömæmöedäni, ämo ate ömæmoncædänimpa. Itota mänömaï apænecantapa.

⁴¹ Apænecä ëñëninque oodeoidi iñömö, Tömengä, “Botö cængui bai imopa, ante öönædë inö wææ pontabopa,” angampa, ante tömengä ingantedö ante tæcæ piinte tedewënanitapa. ⁴² Tömënäni,

–Iingä iñömö wii Ootee wengä Itota ingantawo. Tömengä mæmpo tönö wäänä wii mönö adöna inatawo. Tömengä ædö cæte, Botö öönædë quëwente wææ pontabopa, angä anewëë.

⁴³ Ante püñönäni Itota wæætë,
–Minitö nämanque godongämæ piinte tededämaï iedäni. ⁴⁴ Botö Mæmpo botö imote nê da pönongaingä

wii pönö cæcä bai æcämenque incæ botö weca pönämaï incædongäimpa. Ayæ inique baquiönæ iñonte botö weca nê pongä ingante, Ñäni ömæmöe, ämo ñäni ömæmoncæcäimpa. ⁴⁵ Wængongui beyæ nê apænegainäni näni yewæmongaintaa iïmaï ante yewæmongadänimpa. “Wængongui waodäni tömänäni inänite odömönte apænecä ëñencædänimpa.” Botö Mæmpo apænecä nê ëñënanäni iñömö tömengä nänö odömönte apænedö ante nê ëñënanäni inönäni inique tömënäni tömänäni botö weca pönänipa, ante Itota apænecantapa.

⁴⁶ Ayæ apænedinque, “Mïni wao-cabo tömämini incæ botö Mæmpo ingante cöwë adämaï iminitapa. Botonque iñömö Wængongui weca nê quëwente pömo inte botö Mæmpo ingante nê adïmo iñömö adoboque pönï imopa. ⁴⁷ Minitö iminite näwangä ämopa. Botö imote nê wede pönengä iñömö tömengä cöwë wantæpiyæ nänö quëwenguimämo do entawente quëwengä ingampa. ⁴⁸ Botö iñömö, Mïni quëwenguinque, ante mïni cængui bai imopa. ⁴⁹ Mïni wæmæidi önomæca quëwënedë cængui mänää näni angai cængainäni incæte edæ do wængadänimpa. ⁵⁰ Botö iñömö cængui bai inömo inte öönædë quëwente wææ pömo imopa. Inique waocä, Cængui cæte bai quëwengæimpa, ante botö imote pönengä inique tömengä cöwë wænämaï quëwëmaingampa. ⁵¹ Botö cængui bai imo inte öönædë quëwengaimo incæ wææ pontabopa. Æcänö cængui cæte bai botö imote pönëna tömengä iñömö cöwë wænämaï quëwencæcäimpa. Ii cængui botö godongui botö nämä baö impa. Inguipoga quëwënanäni inänite, Minitö quëwenguimïni, ante botö nämä baö incæ godoncæboimpa,” ante Itota mänömaï apænecantapa.

⁵² Mäninö angä ëñente wædinque oodeoidi nani cabo iñömö godongämæ nämanque tedinque wæætë godö wæætë godö anewënanitapa.

–Mäningä iñömö mönö imö tömengä nämä baö ædö cæte pönongä

cænguimōnii.

⁵³ Ante tedewēñōnāni Itota wæætē tōmēnāni inānite,

—Mīnitō imīnite nāwangā āmopa. Botō Waobo ēñagāimo iñōmote mīnitō botō baō cænāmaī inte botō wepæ bedāmaī imīni ininque ædō cæte Wængonguī wantæpiyæ nānō quēwenguimāmo entawēmīni inguimīnii. ⁵⁴ Botō baō nē cængā ayæ botō wepæ nē becā tōmengā iñōmō Wængonguī wantæpiyæ nānō cōwē quēwenguimāmo do entawente quēwengā ingampa. Ayæ iinque baquionæ iñonte botō māningā ingante, Bitō ñāni ōmæmōe, āmo ñāni ōmæmoncæcāimpa. ⁵⁵ Edæ botō baō nāwā cænguī baī impa. Ayæ botō wepæ nāwā bequī baī impa. ⁵⁶ Botō baō nē cængā inte ayæ botō wepæ nē becā iñōmō tōmengā botō nempo ee quēwēnongā ingampa. Ayæ adobaī tōmengā botō imote entawēnongā ingampa. ⁵⁷ Botō Mæmpo nē Quēwēnongā inte botō imote da pōnongā pōnīmo imopa. Tōmengā pōnō cæcā ate quēwēmo imopa. Botō imote nē cængā iñōmō adobaī botō cæbo beyænque quēwencæcāimpa. ⁵⁸ Botō cænguī baī imo inte ōnædē wææ pōnīmo iñōmō mānīi cænguī baī imopa. Mōnō wæmæidi cænguī mānāā nāni angāi cængaināni incæ edæ do wængadānimpa. Wæætē ñōwo wææ pōmo iñōmote, Cænguī impa, ante nē cænongā iñōmō tōmengā cōwē wænāmaī quēwencæcāimpa, ante Itota apænegacāimpa.

⁵⁹ Tōmengā mānīnō ante Capēnaōmō nāni quēwēñōmō nāni odōmōincōnē ongōnīnque tōmēnāni inānite odōmonte apænegacāimpa.

Itota nānō ānō beyænque mōnō wænāmaī quēwengæimpa

⁶⁰ Mānīnō odōmonte apænecā ēñēnīnque tōmengā ēmīñænāni nan-guī ināni,

—Tōmengā nānō odōmonte apænedīnōbitō iñōmō waadedāmainō impa. Edæ æcānō ēñēmaīnaa, ante ānānitapa.

⁶¹ Mānīnō nānō odōmonte apænedīnō ante tæcæ piinte tedewēnāni wædinque Itota tōmēnāni inānite,

—Mīnitō botō ānīnō ante oda cæmīni inte pūmīni imīnitawo, angantapa.

⁶² Ayæ godōmenque apænedīnque, Botō Waobo ēñagāimo imo ōnædē quēwente wææ pongāimo inte adodō adoyōmō æibo adīnque mīnitō æbānō ante āmaīmīnii. ⁶³ Wængonguī

Ōnōwoca pōnō cæcā beyænque waocā quēwengā ininque tōmengā baonque nānō ēñayō beyænque ædō cæte quēwēmaingāā. Botō Wængonguī Ōnōwoca tōnō apænedīnque mīnitō imīnite botō apænedīnō beyæ mīnitō ōnōwoca ēwocate quēwencæmīnimpa. ⁶⁴ Incæte mīnitō weca pancadāniya iñōmō botō imo pōnēnāmaī inānipa tōō, ante Itota apænecantapa.

Edæ tōmēnāni weca æcānō tōmengā ingante pōnēnāmaī ingāā, ante Itota do ēñēnongāimpa. Ayæ tōmengā ingante nē godō odōmonguingā æcānō imaingāā, ante tōmengā adobaī do ēñēnongāimpa. ⁶⁵ Itota godōmenque apænedīnque,

—Botō mānīi beyæ mīnitō imīnite do antabopa. Botō Mæmpo wīi pōnō cæcā baī æcāmenque incæ botō weca pōnāmaī incædongāimpa, ante apænegacāimpa.

⁶⁶ Mānīōnæ ganca tōmengā mīñæ nē godāni incæ nanguī ināni wadæ godīnque tōmengā mīñæ ayæ tee empo godāmaī ingadānimpa.

⁶⁷ Tōmēnāni wadæ godāni adīnque Itota ōnōmpo tipæmpoga go mēa ganca ināni inānite,

—Mīnitō diyæ æbānō cæquīmīnii. Mīnitō tōmēnāni baī adobaī botō imote ēmō cæte, Wadæ goinēmōnīpa, āmīnitawo.

⁶⁸ Āñongā Timōnō Pegodo wæætē,

—Awēnē, æcānō mīñæ gobāimōnii. Wacā mōnitō imōnite nē ēmīñængā iñōmō edæ dæ angampa. Wantæpiyæ wænāmaī mōni quēwenguīnō ante æbānō gocæmōnimpa, ante wæyōmōni

bitō iñōmō nē apænebi imipa. ⁶⁹ Bitō iñōmō Wængonguī nānō da pōnōnōmi inte tōmengā nānō Tæiyæ Waēmō

inömi imipa, ante pönemöni inte eñemönipa.

⁷⁰ Ante apæ necä eñëninque Itota,

–Minitö önompo tipæmpoga go mä ganca imini inte wii botö apænte ænömöni iminitawo. Incæte mini cabo incæ adocanque inñömö wënæ qui ingampa, ante apænegacäimpa.

⁷¹ Timönö Icadote wengä Co-daa ingantedö ante Itota mänömaï angacäimpa. Tömengä önompo tipæmpoga go mänaa nani cabo adocanque inongä incæte ayæ ate Itota ingante odömönte nê godongingä inongäimpa.

7

Itota biwüidi tömengä ingante pönënamäi inäni

¹ Ayæ ate Itota Gadideabæ tömämæ wayömö wayömö gocä ingacäimpa. Oodeabæ inñömö oodeoidi awënëidi botö imote wænönæ cædanipa, ante wædinque Itota, Oodeabæ wii goinëmopa, ante mäniömæ godämaï inongäimpa.

² Oodeoidi, Mönö wæmæidi oncontaicoo mænöninque quëwengadänimpa, ante pönëninque tömënäni ææmæ oo pönï ingatimpa.

³ Itota biwüidi tömengä ingante,

–Bitö emiñænäni bitö bamönengæ cæbi acædanimpa, ante cæcæte ante bitö inñömö ongönämaï inte wæætë Oodeabæ goquënëmi imipa.

⁴ Waodäni tömänäni ayönäni cæbo edonque acædanimpa, ante cæinengä inñömö tömengä wii awëmö cæcampa. Bitö mänii cædinö do cæbi inte waodäni tömänäni bitö imite edonque pönï acædanimpa, ante odömönte cæe, ämönipa.

⁵ Edæ tömengä biwüidi incæ tömengä ingante pönënamäi inäni inönänimpa.

⁶ Mänömaï beyæ Itota tömënäni inänite,

–Botö wii ñowo goquënëmo imopa. Minitö guiquënë æyedëmë gomini incæ cöwë waa impa. ⁷ Inguipogaque quëwënäni minitö iminite ædö cæte piinte badäni. Wæætë botö tömënäni inänite, Minitö wënæ wënæ cæmini iminipa, ante apænebo beyæ

tömënäni botö imo piinänipa. ⁸ Minitö ææmæ cædäni weca æite goedäni. Botö goquiönæ wii eyepæ impa, ante pönëninque botö ayæ mänimæ cædäni weca godämaï imopa.

⁹ Mäninö äninque tömengä godömenque Gadideabæ ongönte quëwengacäimpa.

Itota nani ææmæ cæyömö gote pongacäimpa

¹⁰ Incæte tömengä biwüidi ææmæ ante godäni ate tömengä adobaï godinque wii waodäni nani ayömö gocampa. Wæætë awëmö gocantapa.

¹¹ Ayæ nani ææmæ cæyömö oodeoidi awënëidi inñömö,

–Mäningä onguiñængä æyömönö ingäa, ante tömengä ingante ante diqui diqui minte wæe wänönänitapa.

¹² Tæiyænäni ponte a ongönäni godongämæ nämä tedinque tömengä ingantedö ante wæntæ wæntæ tedinäntapa. Pancadäniya, “Tömengä waa cæcä ingampa.” Äñönäni wadäni inñömö, “Baa, mäningä waodäni inänite wapiticæ mäodinque, Oda cæquinänimpa, ante cæcä ingampa,” ante apænedönänimpa.

¹³ Oodeoidi awënëidi inäni adinque guiñente wædinque wadäni tömänäni tömengä ingantedö ante waodäni eñëñönäni apænedämaï inönänimpa.

¹⁴ Tömënäni ææmæ do cæyedë Itota inñömö Wængongui oncö ñænæncönë yabæcönë æite pö guidinque waodäni inänite mä odömönte apæ necä eñengadänimpa. ¹⁵ Tömengä odömönte apæ necä eñëninque oodeoidi ancai guiñëninque,

–Æbänö cæte nanguï eñengä ingäa. Edæ tömengä ecoeda adämaï inongä ingampa.

¹⁶ Äñönäni Itota wæætë,

–Botö odömönte apænedö ante wii nämä pönëninque odömönte apænebo imopa. Wæætë Wængongui botö imote nê da pönongaingä nänö angainö ante odömönte apænebo. ¹⁷ Minitö, Wængongui nänö angainö ante Itota odömönte apæ necampa, ante pönëminitawo. Wæætë,

Nämä pönëninque Itota odömönte apænecampa, ante pönëminitawo. Iñæmpa waocä, Wængonguï nänö ämaï cæcæboimpa, ante æcänö änaa tömengä iñömö, Æcänö angä eñëninque Itota odömönte apænecäa, ante do eñencæcäimpa. ¹⁸ Nē nämä pönëninque apænecä iñömö tömengä nämä ante, Botö imo waa acædänimpa, ante aïnente apænecä ingampa. Wæætē edæ, Botö imo nē da pönongainganque ingante waa acædänimpa, ante nē aïnente cæcä iñömö tömengä edæ nē nō cæte quëwëngä ingampa. Adocä, Waodäni oda cæquïnänimpa, ante tömënäni inänite wii wapiticæ mäocä ingampa, ante Itota apænecantapa. ¹⁹ Ayæ apænedinque, “Wængonguï nänö wææ angainö ante Möitee wodi wii minitö beyæ ante yewæmongacäi. Incæte minitö tömämïni Wængonguï nänö wææ angainö adinque eñente cædämaï iminipa töö. Minitö quïnante botö imote, Wænöinëmönimpa, ante pönëninque cæminii.”

²⁰ Ante awënëidi inänite añongante nanguï inäni adoyömö ongönäni wæætē,

—Bitö wënæ tönö cæbi imipææ, ante tömengä ingante äninque, Bitö imite æcänö wænöinente cæcäa.

²¹ Ante änäni eñëninque Itota godömenque tömënäni inänite,

—Guëmanguïönæ iñonte botö adopoque bamönengæ cæbo adinque minitö tömämïni ancaï guïñente wæminipa edæ. ²² Möitee wodi iñömö, Minitö wëñængä eñacä ate önompo æmæmpo go mēönaa go adoönæque iñonte mänïönæ tömengä yabæque eö togæncæminimpa, ante minitö iminente odömönte apænecäimpa. Wii Möitee wodi mänömaï mä cæcä ingacäimpa. Wæætē wëenënedē incæ minitö wæmæidi do adodö cægadänimpa. Incæte Möitee wodi, Mänïönæ iñonte eö togæncæminimpa, ante pönö angä beyænque minitö guëmanguïönæ i incæte minitö

wëñængä onguïñængä ingante eö togæminni iminipa töö. ²³ Möitee wodi nänö wææ yewæmongainö wido cædämaï ingæimpa, ante cædinque minitö guëmanguïönæ iñonte edæ wëñængä onguïñængä ingante do eö togæminipa. Incæte edæ guëmanguïönæ iñonte botö wënæ wënæ iningä ingante ämo ate tömengä baö tömäñö waa bacä beyænque quïnante botö imote pïimïni iminii. ²⁴ Waocä wabänö nänö cædi wënæ wënæ i, ante pönëninque ædæmö eñënamäi imini inte minitö tömengä ingä, Bitö wënæ wënæ cæbi imipa, ante apænte änämaï iedäni. Wæætē, Æbänö i, ante ædæmö eñëninque nöingä ante ancæminimpa, ante Itota mänömaï apænecäimpa.

Itota iñömö Codito mönö nē Ponguingä ingampa

²⁵ Mänömaï beyæ Eedotadëe quëwënäni pancadäniya,

—Mäningä ingante wænömöni wæncæcäimpa, ante awënëidi wii änänitawo, ante mäniñedē tæcæ tedewënänitapa. ²⁶ Aedäni, tömengä iñömö edonque pönö a ongöninque waodäni inänite apæneyongä incæ mönö awënëidi tömengä ingante änämaï pæ wëenete inänipa töö. Tömënäni wabänö, Mäningä iñömö näwangä Codito mönö änongå ingampa, ante pönënanitawo.

²⁷ Iñæmpa, Mäningä onguïñængä æyömönö quëwente pongä ingäa, ante do eñëmöpa. Mönö Codito, Nē Ponguingä, ante näni angaingä iñömö æyömönö quëwente pongäa, ante mönö waocabo tömämö incæ eñënamäi inguïmö imompa, änänitapa.

²⁸ Ayæ Itota Wængonguï oncö ñænæncönë yabæcönë odömönte apænedinque aa pecantapa.

—Ao, Botö æbodö imoo, ante minitö eñëminiyaa. Ayæ botö, Æyömönö quëwente pömoo, ante minitö adobai eñëminiyaa. Botö wii nämä pönëninque pontabopa. Botö imote nē da pönongaingä näwangä inongä ingampa. Minitö, Tömengä æbänö ingäa, ante eñënamäi iminipa

töo. ²⁹ Botö wæætē edæ tömengä weca quēwēmo iñömote tömengä botö imote da pönongä pönimo inte edæ botö iñömö edæ tömengä ingante do agaïmo iñömo imopa, angacäimpa.

³⁰ Mäninö angä eñëninque tömënäni, Quinö cæte tömengä ingante bæi ongonguimönimpa, ante pönengadänimpa. Incæte tömengä nänö wænguiönæ wii eyepæ i beyæ tömengä ingante ö ænämaï ingadänimpa. ³¹ Tæiyænäni adoyömö pö ongönäni weca ongöninque nanguï inäni tömengä ingante wede pönënanitapa. Tömënäni,

—Mäningä onguïñængä iñömö nanguï bamönengæ cæcä inongäimpa. Mönö Codito iñömö tömengä pongä ate godömenque bamönengæ cæquiringä ingantawogaa.

Itota ingante bæi ongoncæte ante cædäni

³² Tæiyænäni mäniñömö ongönäni iñömö Itota ingantedö ante mänömainö ante wæntæ wæntæ tedeyönäni Paditeoidi eñënanitapa. Ayæ, Wængongui quï, ante nē godönäni ñænænäni tönö Paditeoidi iñömö Wængongui oncö ñænæncö wææ wänönäni inänite, Minitö goedäni. Tömengä weca godinque tömengä ingante bæi ongonte ænte pödäni, änänitapa. ³³ Itota godömenque apænedinque,

—Minitö weca wantæyö quēwëninque botö ayæ ate botö imote nē da pönongaingä weca ocæ emænte gocæboimpa. ³⁴ Botö ocæ emænte gobo ate minitö botö imote ante diqui diqui mimini incæte adämaï inguimini iminipa. Ayæ botö go quēwëñömö minitö adoyömö ædö cæte ponguimini iminii.

³⁵ Angä eñëninque oodeoidi awënëidi nämanque tededänitapa.

—Mäningä, Gocæboimpa, ante ædönö goyongante mönitö diqui diqui mininque adämaï inguimöni imönii. Tömengä, Edæ mönö guidënanäni do panguimæ godinque guidiegoidi weca wayömö wayömö nänäni quēwëñömö tömengä wabänö go-quiringä. Ayæ guidiegoidi mäniñömö

quēwënanäni inänite odömonte apænebo eñencädänimpa, ante apænequiringä.

³⁶ Tömengä iñæmpa, “Botö imote ante diqui diqui mimini incæte minitö botö imote adämaï inguimini iminipa, angampa töo. Ayæ, Botö go quēwëñömö minitö adoyömö dicæ ponguiminiyaa,” ante mäniñö ante æbänö ante apænecantawo, angadänimpa.

Waëmö æpæ tayömö ta gopæ mönö quēwenguimæ impa

³⁷ Ayæ tömënäni nänäni ææmæ iinque cæönæ iñonte, Ñænæ ææmæ impa, ante godömenque nanguï cæyönäni Itota iñömö ængæ gantidinque yedæ yedæ tedecantapa.

—Nē gæwænte wæcä iñömö tömengä botö weca poncæcäimpa. Ayæ botö tönö godongämæ becæcäimpa.

³⁸ Æcämenque botö imote nē wede pönengä iñömö tömengä quēwenguimæ ænte entawencæcäimpa. Ayæ waëmö æpæ tayömö ta gote cægömæ bai tömengä adobai tömengä nänö entawënö godonte bai cædinque, Wadäni bete bai quēwencädänimpa, ante godö cæcæcäimpa. Wængongui angä eñente nänäni yewæmongainö bai ante mänömainö ante impa.

³⁹ Mänömainö ante Itota iñömö, Botö imote nē wede pönënanäni inte ayæ ate Wængongui Önöwoca ingante ænte entawenguinäni inänipa, ante pönëninque mäningä Wængongui Önöwoca ingantedö ante apænegacäimpa. Edæ Itota ayæ wænämaï inte öönæde ocæ emænte æidämaï nänö iñedë Wængongui iñömö Tæiyæ Waëmö Önöwoca ingante ayæ da pönönämaï inongäimpa.

Waodäni wæætē godö wæætē godö nänäni änewënö

⁴⁰ Mäninö nänö änö eñëninque waodäni pancadäniya,

—Näwangä impa. Mäningä iñömö, Wængongui beyæ nē apænecä nē Ponguingä, ante nänäni angaingä adocä inongä ingampa.

⁴¹ Ante äñönäni wadäni guiquënë,

—Mönö Codito në Ponguingä, ante nani angaingä mäningä ingampa.

Änani eñëninque wæætë wadäni,

—Mönö Codito ædö cæte Gadideabæ quëwente pongä ingää, änänitapa. ⁴² Iñæmpa mönö Codito iñömö Awënë Dabii pæingä inguingäimpa. Ayæ Bedëë Dabii nänö quëwengaiñömö adoyömö eñaquingä ingampa, ante Wængongui angä eñente nani yewæmongainö ongö adämaï iminitawo.

⁴³ Angä eñëninque waodäni, Itota æcänö ingää, ante mänömaï wadö wadö ante pönente tedewengadänimpa. ⁴⁴ Pancadäniya, Tömengä ingante bæi ongöinëmönipa, änäni incæte tömengä ingante bæi ongonte ænämaï ingadänimpa.

Awënëidi Itota ingante pönänämaï inönäni

⁴⁵ Wængongui oncö tæiyæ waëmö oncönë wææ wänönäni iñömö, Wængongui qui, ante në godönäni ñænænäni tönö Paditeoidi weca ocæ emænte pönänipa. Ocæ emænte pönäni adinque tömënäni,

—Quinante tömengä ingante ænte pönämaï iminii.

⁴⁶ Ante añönäni wææ wänönäni wæætë,

—Mäningä onguiñængä waa apæncä bai æcänö adobai tedecä iñömö edæ dæ angampa.

⁴⁷ Änani eñëninque Paditeoidi guiquënë,

—Tömengä minitö iminite adobai wapiticæ mäocä oda cæte gobaimini baminitawo. ⁴⁸ Äninque tömënäni godömenque, Awënëidi incæ Paditeoidi incæ adocanque tömengä ingante pönengä ingantawogaa.

⁴⁹ Nanguï inäni iñömö ongönäni guiquënë tömënäni në önönänique inte Wængongui nänö wææ angainö ante eñënämaï inäni inte tömengä ingante pönänäni inänipa. Mänömaï beyæ tömënäni Wængongui nänö pangaimämo ante wæquinäni inänipa.

⁵⁰ Niicodemö iñömö wëenënedë Itota weca në godingä adobai

tömënäni bai Paditeocä inongä inte apæncantapa.

⁵¹ —Waocä, Æbänö cæboo, ante nämä beyæ wææ änämaï iñongante mönö, Tömengä ingante pangæimpa, ante ædö cæte apænte anguii. Edæ, Wææ änämaï iñongante pangæimpa, ante dicæ wææ yewæmongadäniña.

⁵² Ante añongä tömënäni,

—Bitö adobai Gadideabæ quëwente ponte bai tedebipææ. Wængongui beyæ nani yewæmongainta ae. Adinque bitö, Wængongui beyæ në apæncä wii Gadideabæ quëwente pongä ingampa, ante do eñencæbiimpa, ante angadänimpa.

Onquiyængä nänö towëno

⁵³ Mäninö änäni ate tömänäni oncönë ocæ emænte gogadänimpa.

8

¹ Itota guiquënë Odibowænquidi nani anquidi gocantapa. ² Iimö ate ñäö bayedë tömengä Wængongui oncö ñænæncönë yabæcönë wæætë pö guicä adinque waodäni tömänäni tömengä nänö ongöñömö goto pönäni adinque Itota tömënäni inänite odömönte apæncæte ante tæ contactapa.

³ Mäniñedë onquiyængä adocanque tömengä nänöogængä inämaï iñongante wacä onguiñængä tönö tæcæ godö guëa mongä adäni ate në odömönäni tönö Paditeoidi iñömö mäningä onquiyængä ingante ænte pönänitapa. Tömengä ingante tæcæguedë gö cädäni ongöñongä ⁴tömënäni Itota ingante,

—Awënë në Odömömi imi, iingä onquiyængä iñömö wacä ingante tæcæ godö guëa mongä adäni wæmönipa.

⁵ Wængongui nänö angainö ante Möitee wodi iimaï ante wææ yewæmongacäimpa. Onquiyænäni mäningä onquiyængä bai cädäni iñönänite minitö tömënäni inänite dicaca tacamini wæncädänimpa. Bitö guiquënë quinö amii.

⁶ Mäninö ante tömënäni iñömö, Æbänö apæncäa, äninque, Wabänö pancadea wapiticæ tedecæcäimpa,

ante cædänitapa. Edæ wapiticæ tedecä ïninqe mönitö, Adocä wënæ wënæ cæcä ingampa, ante ancæmönimpa, ante cædänitapa. Itota guiquënë ædæ wææninqe onguipoga tömengä önongompoga yewæmongacäimpa. ⁷ Tömënäni godömenque tömengä ingante eñencæte ante añönäni Itota ængæ gantite tömënäni ïnänite,

–Minitö weca adocanque ongöninque nê wënæ wënæ cædämaï ingä ïninqe mäningä täno onquiyængä ingante, Wænguimi, ante dicaca tacacæcäimpa, ante angantapa.

⁸ Äninqe wæætê ædæ wææninqe onguipoga yewæmongacäimpa.

⁹ Mäninö angä nê eñenäni ïñömö adocanque wadæ go wacä wadæ go wacä wadæ go tömänäni wadæ godänipa. Picænäni täno wadæ godäni ayæ wadäni wadæ godänitapa. Tömänäni dæ godäni adinque Itota adocanque ee ongöñongä onquiyængä ayæ adoyömö næ gongægantapa. ¹⁰ Itota ængæ gantidinque onquiyængä ingante,

–Æyömönö ïnänii. Bitö ïmite apænte äninque tacadämaï ïnänitawo.

¹¹ Äñongä tömengä wæætê,

–Awënë, tömänäni mänömaï cædämaï ïnänitapa.

Angä eñeninqe Itota,

–Botö adobaï bitö ïmite apænte äninque tacadämaï incæboimpa. Nöwo goe ämopa. Bitö wënæ wënæ cæte quëwënimämo ñimpo cæte waa quëwëe, angacäimpa.

Inguipoga quëwënäni beyæ Itota ñäö bai ïnongäimpa

¹² Ayæ Itota wæætê waodäni ïnänite apænedinque,

–Botö ïñömö inguipoga quëwënäni beyæ ñäö bai imodö anguënë. Æcänö botö miñæ tee empo goda tömengä wëmö ïñömö cöwë cægönämaï ingampa. Wæætê tömengä nänö quëwënö taadö edonque acæcäimpa, ante botö tömengä beyæ ñäö bai ïmopa, ante apænegantapa.

¹³ Paditeoidi guiquënë tömengä ingante,

–Bitö ïñömö nämä äninque, Æbänö ïmoo, ante apænebi ïmipa töö. Mänömaï nämänque ante apænebi beyæ bitö äninö önonquedö ante impa, ämönipa, piinänitapa.

¹⁴ Itota wæætê,

–Botö ïñömö nämä äninque, Æbänö ïmoo, ante apænebo incæ botö apænedö näwangä impa. Edæ, Botö æyömönö quëwente pömo ïmoo, ante ayæ, Ædönö gobo ïmoo, ante do eñëmopa. Minitö guiquënë, Botö æyömönö quëwente pömoo ïmoo, ante ayæ, Ædönö gobo ïmoo, ante wii eñëminipa töö. ¹⁵ Waodänique, ïmaï cæedäni, ante näni wææ ante cægäi bai minitö wacä ingante apænte ämini ïminipa. Botö guiquënë waodäni tömänäni ïnänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaï ïmopa. ¹⁶ Incæte botö mänömaï apænte ämo bai, Æbänö apænte ämoo, ante pönëninque tömëmo nö ante apænte ämopa. Edæ wii botonque apænte ämopa. Wæætê botö Mæmpo botö ïmote nê da pönongaingä ïñömö tömengä ïñömö botö tönö godongämæ cæcä ate apænte ämopa. ¹⁷ Minitö mini wææ yewæmongaintaa ïmaï ante wææ yewæmongatimpa. Mënaa onguiñæna nê adina inte tömëna nana adinö ante apænedä eñëninque minitö wæætê, Nö impa, ante eñencæminimpa. ¹⁸ Botö ïñömö nämä äninque, Æbänö ïmoo, ante apænebo ïmopa. Ayæ botö Mæmpo botö ïmote nê da pönongaingä ïñömö tömengä botö ïmotedö ante, Æbänö ingää, ante adobaï apænegä eñencæminimpa.

¹⁹ Ängä eñeninqe tömënäni tömengä ingante,

–Bitö Mæmpo æyömönö quëwengää. Äñönäni Itota wæætê,

–Minitö ïñömö, Botö incæ æbänö ïmoo, ante, Botö Mæmpo incæ æbänö ingaingä ingää, ante eñëmini ïminitawogaa. Botö æbodö ïmoo, ante eñëmini inte bai minitö, Botö Mæmpo æbänö ingaingä ingää, ante adobaï eñëmini incædöminimpa, ante apænegacäimpa.

¹⁹ Ängä eñeninqe tömënäni tömengä ingante,

–Bitö Mæmpo æyömönö quëwengää.

Äñönäni Itota wæætê,

–Minitö ïñömö, Botö incæ æbänö ïmoo, ante, Botö Mæmpo incæ æbänö ingaingä ingää, ante eñëmini ïminitawogaa. Botö æbodö ïmoo, ante eñëmini inte bai minitö, Botö Mæmpo æbänö ingaingä ingää, ante adobaï eñëmini incædöminimpa, ante apænegacäimpa.

²⁰ Itota Wængonguï oncö ñænæncönë yabæcönë go guïdinqe, Wængonguï quï, ante nãni da wencade gäänë ongonde apænedinqe mäninö ante apænegacãimpa. Incæte tömengä nãnö wænguïönæ wïï oo pönï i beyænque tömengä ingante bæi ongonde ænãmaï ingadãnimpa.

Itota, Botö goquïñömö mïnitö ædö cæte goquïmïni, angä

²¹ Itota wæætë tömënãni inãnite äninque,

—Botö wadæ goquïmo ïmopa. Gobo ate mïnitö botö ïmote ante diqui diqui minguïmïni ïmïnipa. Mïnitö wënæ wënæ cædömïni inte wæncæmïnimpa. Botö goquïñömö mïnitö ædö cæte ponguïmïni, angantapa.

²² Mäninö beyæ oodeoidi awënëidi, Tömengä ïñömö, Botö goquïñömö ante mïnitö ædö cæte ponguïmïni, ante quïnante angää. Tömengä nãmã incæ, Wængonguïmo, ante pönëninque ïmaï angantawo, ante änãnitapa.

²³ Itota godömenque,

—Mïnitö ïñömö inguïpoga quëwëmïni ïmïnipa. Botö guiquënë öönædë quëwente pömo ïmopa. Mïnitö ïñömö ïï inguïpogaque nãni quëwencabo tönö adomïni ïmïnipa. Botö guiquënë ïï inguïpogaque nãni quëwencabo tönö adobo ïnãmaï ïmopa. ²⁴ Mänömaï beyæ botö, Mïnitö wënæ wënæ cædömïni inte wæncæmïnimpa, ante mïnitö ïmïnite apænetabopa. Botö, Æbãnö ïmoo, ante ämo ëñëninque pönënãmaï ïmïni ïninque mïnitö wënæ wënæ cædömïni inte nö wæmaïmïnipa.

²⁵ Ante apænegacã ëñëninque tömënãni,

—Æbidö ïmitawo.

Ante äñönãni Itota wæætë,

—Botö do mïnitö ïmïnite, Æbodö ïmoo, ante në äñimo ïmopa. ²⁶ Botö mïnitö ïmïnitedö ante nanguï anguënëmo ïmopa. Mïnitö ïmïnitedö ante ämo bai mänïï botö änö mïni apænte anguïnque ïmaïmpa. Incæte botö ïmote në da pönongaingä ïñömö tömengä nöingä inte tömengä, Quïnö botö ïmote angää, ante botö ëñëninö ante botö adodö ante inguïpoga

quëwënãni inãnite apænebo ïmopa, angantapa. ²⁷ Incæte tömënãni, Itota tömengä Mæmpo ingantedö ante mönitö ïmönite apænegacãimpa, ante ëñënãmaï ingadãnimpa. ²⁸ Mänömaï beyæ Itota,

—Botö Waobo ëñagaïmo ïñömote mïnitö botö ïmote awäa timpodinqe tiwadinque gö cæmïni wægöñömo mïnitö mänïñedë edæ, Botö æbodö ïmoo, ante ëñencæmïnimpa. Ayæ botö nãmã pönëninque cædãmaï ïmopa. Wæætë Wæmpo nãnö odömonte apænedö ante botö ïmote apænegacã botö ëñëninö ante adodö ante apænebopa, ante mïnitö adobai mänïñedë ëñencæmïnimpa. ²⁹ Botö ïmote në da pönongaingä botö ïmote ëmö cædãmaï inte cöwë botö tönö godongãmæ ongongä ingampa. Edæ botö cöwë, Æbãnö cæbo ate tömengä waa aquingää, ante cæbopa, ante Itota apænegacãimpa.

³⁰ Mäninö äñongä nanguï inãni ïñömö tömengä ingante pönengadãnimpa.

Wënæ beyænque në cædãni

³¹ Oodeoidi pancadãniya në pönënãni ïñönãnite Itota ïñömö,

—Mïnitö cöwë botö odömonte apænedinö bai cæmïni ïninque botö miñæ nö gomïni ïmaïmïnipa. ³² Ayæ botö änö nöinö ïmpa, ante ëñencæmïnimpa. Mäninö nö botö änö beyænque mïnitö ñimpo cæte quëwencæmïnimpa.

³³ Ante äñongä tömënãni wæætë,

—Mönitö ïñömö Abadäö nãnö pæïmöni ïmöni inte mönitö cöwë waocã æcãmenque beyænque në cæmöni ïnãmaï intamönipa töö. Bitö ïñömö, Wacã beyænque mïnitö godömenque cædãmaï inte ñimpo cæte quëwencæmïnimpa, ante ædö cæte ämii.

³⁴ Äñönãni Itota wæætë,

Mïnitö ïmïnite nãwangä ämopa. Në wënæ wënæ cæcã ïñömö tömengä wacã beyænque cæte në quëwengä bai wædongä inte edæ tömengä nãnö wënæ wënæ cægãnonque ante cædinque ædö cæte aamö cæte goquingää. ³⁵ Wacã beyænque

cæte nē quēwengā iñōmō tōmengā awēnē nāni wencabo tōnō wīi cōwē godongāmæ quēwengā ingampa. Awēnē wengā guiquēnē tōmengā mæmpo tōnō nāna wencaya ina beyænque tōmengā awēnē tōnō cōwē guēa quēwengā ingampa. ³⁶ Mānōmaī beyæ Wængonguī Wengā mīnitō imīnite ñimpo cæcā inique mīnitō nō ñimpo cæte quēwēnque wacā beyænque nē cæcā bai ināmaī inte quēwenguīmīni imāimīnīpa. ³⁷ Mīnitō iñōmō Abadāo nānō pæimīni imīnīpa, ante do ēñēmopa. Incæte botō ānō ante mimōnē entawēnāmaī quēwēmīni beyæ mīnitō botō imote, Wænōmōni wæncæcāimpa, ante pōnēmīni imīnīpa. ³⁸ Botō iñōmō botō Mæmpo weca tōmēmo adīnō ante mīnitō imīnite apænebo imopa. Mīnitō guiquēnē mīni mæmpo nānō angainō mīni ēñēnīnō ante cæmīni imīnīpa.

³⁹ Ante apæneyongā tōmēnāni wæætē,

—Abadāo mōnō docā mæmpo ingaingā ingampa.

Ānāni ēñēnīnque Itota,

—Mīnitō nō Abadāo wēmīni inte bai mīnitō tōmengā nānō cægāinō bai adobaī cæcædōmīnīpa tōō.

⁴⁰ Ñōwo iñæmpa botō, Wængonguī nāwangā nānō angainō ante botō ēñēnīnō ante mīnitō imīnite nē apænebo iñōmote mīnitō, Mōnitō æbānō cæte wænōmōni wænguīgāā, ante pōnēmīni imīnīpa. Abadāo mānīi mīni cægāi bai cædāmaī ingacāimpa.

⁴¹ Mīnitō iñōmō tōmēmīni mæmpo nānō cægāi bai adobaī cædōmīni imīni awædō.

Āñongante tōmēnāni,

—Mōnitō wīi wegōwæ wēmōni imōnīpa tōō. Wængonguī incæ tōmengā adocanque mōnitō Mæmpo inongāimpa.

⁴² Ānāni ēñēnīnque Itota tōmēnāni inānite,

—Wængonguī nāwangā mīnitō Wæmpocā ingā bai mīnitō botō imote waadete pōnencædōmīnīpa. Edæ botō Wængonguī weca quēwente mīnitō weca ñōwo wææ pontabopa.

Botō wīi nāmā pōnēnīnque pontabopa. Wæætē tōmengā botō imote da pōnongā pongāimo imopa. ⁴³ Mīnitō imīnite botō quīnō apæneboo, ante mīnitō quīnante ēñēnāmaī imīnīi. Edæ botō ānō ante, Quīnō apæneboo, ante mīnitō babetamō ināni bai inōmīni inte ædō cæte ēñenguīmīnīi.

⁴⁴ Wēnæ iñōmō mīnitō mæmpo inongāimpa. Ayæ mīnitō mæmpo nānō cæinēwēnō ante mīnitō adodō ante, Mōnitō cæinēmōnīpa, ante cæmīnīpa. Wēēnēñedē inguipoga mā badōñedē tōmengā, Botō wænonguīmo, ante do entawengā ingacāimpa. Tōmengā, Quīnō nāwangā impa, ante cōwē ānāmaī ingampa. Ayæ edæ, Quīnō ānō nōinō impa, ante tōmengā entawēnāmaī inongāimpa. Adocā babæ tededinque tōmengā babæ nānō entawēnonque ante tedewengā ingampa. Edæ tōmengā nē babæ ānongā ingampa. Ayæ tōmengā iñōmō mā babæ angaingā ingampa.

⁴⁵ Incæte botō nāwangā āmo beyænque mīnitō botō ānō ante pōnēnāmaī imīnīpa tōō. ⁴⁶ Mīnitō weca ongongā iñōmō æcāmenque incæ botō imote apænte ānīnque, Bitō wēnæ wēnæ cæbi imīpa, ante, Nāwangā impa, ante odōmōnatawogaa. Botō nāwangā āmo bai mīnitō quīnante botō angainō ante pōnēnāmaī imīnīpa. ⁴⁷ Wængonguī wēnāni nē inōnāni iñōmō Wængonguī nānō angainō ante ēñēnāni inānīpa. Mīnitō guiquēnē tōmengā wēmīni ināmaī imīni beyæ, Tōmengā quīnō angāā, ante ēñēnāmaī imīnīpa, ante Itota apænegacāimpa.

⁴⁵ Incæte botō nāwangā āmo beyænque mīnitō botō ānō ante pōnēnāmaī imīnīpa tōō.

⁴⁶ Mīnitō weca ongongā iñōmō æcāmenque incæ botō imote apænte ānīnque, Bitō wēnæ wēnæ cæbi imīpa, ante, Nāwangā impa, ante odōmōnatawogaa. Botō nāwangā āmo bai mīnitō quīnante botō angainō ante pōnēnāmaī imīnīpa. ⁴⁷ Wængonguī wēnāni nē inōnāni iñōmō Wængonguī nānō angainō ante ēñēnāni inānīpa. Mīnitō guiquēnē tōmengā wēmīni ināmaī imīni beyæ, Tōmengā quīnō angāā, ante ēñēnāmaī imīnīpa, ante Itota apænegacāimpa.

Abadāo ayæ ēñādāmaī iñedē mōnō Codito do ingaingā

⁴⁸ Oodeoidi wæætē tōmengā ingante,

—Bitō Tāmadiabæ quēwēmi imipææ. Ayæ wēnæ tōnō cæbi imipææ, ante wīi nāwangā āmōni intamōnīi.

⁴⁹ Ante pīnāni ēñēnīnque Itota wæætē apænedīnque,

—Botō wīi wēnæ tōnō cædōmo imopa. Wæætē botō iñōmō, Botō Mæmpo ingante waa acæboimpa, ante cæbo imopa. Mīnitō guiquēnē

botö imote waa adämaï iminipa töö. ⁵⁰ Waodäni, Bitö waëmö imipa, ante botö imote apæ necädänimpa, ante botö cädämaï imopa. Wæætë wacä iñömö, Waodäni bitö imite apænedinque, Waëmö imipa, ante apæ necädänimpa, ante nê cæcä ingampa. Mäningä nê apænte änongå ingampa. ⁵¹ Minitö iminite näwangä ämopa. Botö angainö ante nê eñente cæcä tömengä iñömö wantæpiyæ wænämaï quëwencæcäimpa, angan-tapa.

⁵² Ante apæ necä eñëninque ood-eoidi,

—Bitö wënæ tönö cæbi imipa, ante ñowo ædæmö eñëmönipa. Abadäo wodi iñæmpa do wængacäimpa. Ayæ Wængonguï beyæ nê apænedäni adobaï do wængadänimpa. Incæte bitö, “Botö angainö ante nê eñente cæcä tömengä iñömö wantæpiyæ wænämaï quëwencæcäimpa, ante apænebi töö.” ⁵³ Mönö docä mæmpo Abadäo wodi ñænængä inte cægaingä incæte bitö iñömö edæ, Abadäo wædangä iñongante botö iñömö godömenque ñænæmo inte cædömo imopa, ämitawo. Tömengä iñömö edæ do wængacäimpa. Ayæ Wængonguï beyæ nê apænedäni adobaï do wængadäni apa änewëë. Bitö nämä äninque, Æcämë bai imoo, ante ämi.

⁵⁴ Äñönäni Itota wæætë,

—Botö nämä äninque, Waodäni, Bitö waëmö imipa, ante botö imote apæ necädänimpa, ante eñëinente wæbo bai waodäni botö imote nani waa apænedö wæætë önonquedö ante incädönimpa. Botö Mæmpo incæ minitö, Mönö Wængonguï ingampa, ante mini änongå guiquënë tömengä iñömö, Bitö waëmö imipa, ante botö imote pönö apæ necä apa quëwëminii. ⁵⁵ Minitö tömengä ingante wii adinque pönënamä iminipa töö. Botö guiquënë tömengä ingante do agaïmo inte pönëmo imopa. Botö tömengä ingante adämaï imopa, ante bai botö minitö bai babæ ante ancädömoimpa. Wæætë tömengä ingante do adinque nê pönegaïmo inte botö iñömö edæ

tömengä nänö angainö bai nê cæbo imopa. ⁵⁶ Inguipoga botö ponguïönæ ante minitö docä mæmpo Abadäo wodi incæ, Codito ponguïönæ pongä acæboimpa, ante pönëninque do edæ watapæ togacäimpa. İninque tömengä mäniönæ Codito nänö ponguïönæ adinque godömenque togacäimpa, ante Itota apæ necantapa.

⁵⁷ Oodeoidi tömengä ingante,

—Bitö eñagai iñömö tincoenta wadepo inämaï i incæte bitö ædö cæte, Botö Abadäo ingante atabopa, ante ämii.

⁵⁸ Ante püiñönäni Itota wæætë,

—Minitö iminite näwangä ämopa. Abadäo wodi ayæ eñadämaï iñedë botö iñömö edæ do quëwëmo ingaïmo imopa, ante apæ necantapa.

⁵⁹ Mäninö ante apæ necä eñëninque tömënäni iñömö tömengä ingante dicaca tacacæte ante cædinque dicacoo wææmpo ænänitapa. Incæte Itota wë womöninque Wængonguï oncö ñænæncodo tao wadæ gogacäimpa.

9

Babetamö eñagaingä incæ waa bamente acampa

¹ Itota gomonga godinque onguïñængä babetamö eñagaingä ingante acantapa. ² Tömengä emiñænäni iñömö tömengä ingante,

—Awënë nê Odömömi imi, mäningä onguïñængä incæ tömengä mæmpoda incæ æcänö wënæ wënæ cæda beyæ tömengä babetamö eñacantawo, ante eñencæte ante änänitapa.

³ Itota tömënäni inänite,

—İngä onguïñængä incæ tömengä mæmpoda incæ tömänäni wënæ wënæ cädämaï inänitapa. Wæætë tömengä babetamö eñagaingä inte quëwëñongante Wængonguï nänö cædö iñömö edonque pönö acäimpa, ante mäningä mänömaï ingacäimpa.

⁴ İñänäni eñëedäni. Botö imote nê da pönongaingä tömengä nänö cædö ante mönö müi quëwenganca mönö cæquënëmo imopa. Mönö wænguïönæ iñonte mönö ædö cæte

ayæ cæquimöö. ⁵ Botö ingui-
poga quëwënedë botö ingui-
poga quëwënäni beyæ ñäö bai inömo imopa.

⁶ Mäninö ante äninque Itota
ongui-poga towæ tänöninge wëä
wëä gopodique aquimæ bayonte
äninque babetamongä awinca öni
öni pæmongantapa. ⁷ Ayæ tömengä
ingante,

—Goe. Gäwapæ Tidoee nani
ämæ godinque bitö awinca ñäö
mëmöe, ämopa, angantapa. Tidoepæ
nani ämæ inömo mönö tededö, Da
godömæ, ante impa.

Angä ëñente godinque onguinængä
ñä mëmöninque tömengä oncönë ocæ
ëmænte pöninque do acä ingacäimpa.

⁸ Tömengä mänömaï do acä inte pongä
adinque godongämæ quëwënäni tönö
wëenënedë tömengä, Pönömi æmoe,
añongante në adinäni tönö,

—Æ, Ingå onguinængä diyæ,
Pönömïni æmoedäni, ante në
änecöningä wïi adocä ingantawo.

⁹ Änani ëñëninque pancadäniya,

—Mäningä ingampa, änänitapa.

Wadäni guiquënë,

—Wïi tömengä ingä, önonque
tömengä nänö emö bai emönongä
ingampa.

Ante tedeyönäni onguinængä
tömenganque,

—Botö mänimodö inömo imopa, an-
gantapa.

¹⁰ Ayæ tömënäni,

—Æbänö cæte bitö waa bamonte
abii.

¹¹ Äñönäni tömengä wæætë,

—Onguïnængä inömo tömengä
ëmöwo Itota inömo onguipoga towæ
tänöninge wëä wëä gopodique
aquimæ bayonte äninque botö
awinca öni öni pæmongantapa. Ayæ
botö imote, “Goe. Gäwapæ Tidoepæ
nani ämæ godinque bitö awinca ñä
mëmöe” angantapa. Angä ëñëninque
botö wadæ gote ñä mëmöninque do
waa bamonte abopa, angantapa.

¹² Tömënäni tömengä ingante,

—Ingå onguïnængä bitö änongå
inömo æyömönö ingää.

Ante añönäni tömengä wæætë,

—Botö ëñënamäi imopa, angacäimpa.

*Babetamö iningä ingante Padi-
teoidi ancaa änäni*

¹³ Ayæ Paditeoidi weca onguinængä
në babetamö ëñagaingä ingante ænte
mämönäni pongantapa. ¹⁴ Itota mänü
aquimæ badöninge babetamö iningä
awinca wi æmonte bai nänö cæönæ
inömo oodeoidi guëmanguionæ
inönimpa. ¹⁵ Mänömaï beyæ Padi-
teoidi inömo adobaï ëñencæte ante
babetamö iningä ingante edæ, Æbänö
cæte bitö waa bamonte abii, ante
añönäni tömengä wæætë,

—Mäningä inömo aquimæ äninque
botö awinca öni öni pæmongantapa.
Ayæ botö tömömo awinca ñä
mëmöninque ñöwo waa bamömo inte
abopa, angantapa.

¹⁶ Paditeoidi pancadäniya,

—Ingå onguïnængä inömo wïi
Wængongui weca quëwente pongä
ingampa. Edæ tömengä mönö
guëmanguionæ inönte guëmänämaï
inte do cæcampa, änänitapa.

Wadäni guiquënë,

—Inæmpa waocä në wënæ wënæ
cæcä inongä inte ædö cæte mänömaï,
Acæminimpa, ante mä cæquiringä,
änänitapa.

Inique tömënäni wadö wadö ante
pönente tedewengadänimpa. ¹⁷ Ayæ
tömënäni wæætë babetamö iningä in-
gante,

—Tömengä cæcä ate bitö waa abi
inte bitö edæ tömengä ingantedö ante
quïnö ämii.

Ante añönäni onguïnængä wæætë,

—Tömengä Wængongui beyæ në
apænecä ingampa, angantapa.

¹⁸ Babetamö iningä inömo, Waa
bamömo imopa, ante apænecä
ëñëninque oodeoidi awënëidi ayæ
pönënamäi inänitapa töö. Tömengä
mæmpoda inate aa pedäni ponte
apæneda ate mäniñedë pönënanitapa.

¹⁹ Tömënäni tömëna inate,

—Ingå onguïnængä edæ minatö
wengä ingantawo. Mäningä në
babetamö ëñagaingä minatö änongå
adocä ingantawo. Æbänö cæte
tömengä ñöwo waa bamonte acäi.

²⁰ Ante añönäni tömengä mämpoda wæætë, Në babetamö eñagaingä iñömö tömengä mönatö wengä ingampa, ante eñëmönäpa. ²¹ Incæte mönatö, Æbänö cæte tömengä ñowo waa bamonte acää, ante, Æcänö tömengä awinca wi æmonte bai cæcää, ante eñënämaï imönäpa. Minitö tömengä ingante eñencæte ante äedäni. Tömengä do picængä ingampa. Tömenganque apæneca eñencæminimpa, änatäpa.

²² Tömengä mämpoda oodeoidi awënëidi inänite guiñëninque mäninö ante apænedatäpa. Edæ oodeoidi awënëidi iïmaï ante do apænedönänimpa. Æcänö Itota ingante Ao ante, Mönö Codito ingampa, äna eñëninque edæ, Mönitö odömöincönë ongönämaï incæbiimpa, ante tömengä ingante da tadömöni tao gocæcäimpa, ante godongämæ pönente apænedönänimpa. ²³ Mänömaï beyæ tömengä mämpoda, “Tömengä do picængä ingampa. Minitö tömengä ingante eñencæte ante äedäni,” an-gadäimpa.

²⁴ Onguiñængä në babetamö iningä ingante wæætë aa pedäni pongä ate tömengä ingante,

—Bitö Wængongui eñëñongä näwangä ante apænee, ämönipa. Edæ iingä onguiñængä mäninö në cædingä wënæ wënæ cæcä ingampa, ante edæ do amönipa.

²⁵ Ante püñönäni tömengä wæætë,

—Mäningä wënæ wënæ cæcä incæ wii wënæ wënæ cæcä incæ botö eñënämaï imopa. Botö babetamömo inimo incæ ñowo waa bamonte abopa. Mäninque eñëmo imopa.

²⁶ Ante apæneca eñëninque tömënäni tömengä ingante,

—Tömengä iñömö bitö imite æbänö cæcantawo. Æbänö cæte bitö waa bamonte abii, änänitäpa.

²⁷ Tömengä wæætë,

—Minitö iminite do antabopa. Botö añömote minitö eñënämaï iminipa töö. Quinante wæætë adodö ante eñëinëminii. Minitö adobaï, Mönitö

tömengä emiñæmöni baquimöni, ante äminitawo, ante angantäpa.

²⁸ Ayæ tömënäni tömengä ingante piinte wënæ wënæ badete todinque,

—Bitö mäningä emiñæmi imipa töö. Mönitö guiquënë Möitee emiñæmöni imöni apa quëwëmi, änänitäpa. ²⁹ Wængongui Möitee ingante apænegacäimpa, ante do eñëmönipa. Iingä guiquënë æyömönö quëwente pongää, ante eñënämaï imönipa.

³⁰ Añönäni onguiñængä wæætë,

—Mäninö minitö äninö wiwa impa äminii. Tömengä pönö cæcä waa bamonte abo incæte tömengä æyömönö quëwente pongää, ante minitö eñënämaï iminipa. ³¹ Në wënæ wënæ cædäni iñömö Wængongui ingante apæneyönäni tömengä tömënäni inänite eñënämaï ingampa, ante do eñëmompä. Wæætë Wængongui ingante, Bitö adobique mönö Wængongui imidö angüënë, ante në apæneca iñömö tömengä Wængongui nänö angainö në eñente cædongä inte apæneyongante Wængongui tömengä ingante eñencæcäimpa. ³² Waocä në babetamö eñagaingä iñongante wacä tömengä awinca wi æmonte bai cæcä ante æyedëmenque incæ inguipoga quëwënäni dicæ änäni eñënänitawogaa. ³³ Iingä onguiñængä iñömö wii Wængongui nänö da pönongä pongaingä inte bai tömengä tömänö cædämaï incædongäimpa, angantäpa.

³⁴ Mäninö angä eñëninque tömënäni wæætë,

Bitö eñagaiñedë do wënæ wënæ cæte eñagalmi imipa. Incæte bitö mönitö imönite ædö cæte, Eñencæminimpa, ante odömönte apænebi imipa töö.

Änäni ininque tömënäni, Bitö mönitö odömöincönë ongönämaï tao gobäwe, ante tömengä ingante da tadönäni tao gogacäimpa.

Në babetamö bai inäni inänite ante Itota apænecämpa

³⁵ Tömēnāni tōmengā ingante da tadōnānīpa, ante tēdēdāni ēñēnīnque Itota tōmengā ingante ante diqui diqui minte gote adīnque.

–Bitō Waocā nē ēñagaingā ingante pōnēmitawo.

³⁶ Angā ēñēnīnque onguīñāngā,
–Awēnē, māningā æcānō īnaa. Botō tōmengā ingante pōnencæboīmpa, ante apænebi ēñēmoe.

³⁷ Ante āñongā Itota wæætē,
Bitō tōmengā ingante do abitapa. Ayæ bitō īmite nē apænebo īñōmō tōmēmo īmopa.

³⁸ Angā ēñēnīnque onguīñāngā,
–Awēnē, botō wede pōnēmo īmopa. Ayæ, Bitō Wængonguī Wēmi īmidō anguēnē, ante tōmengā Itota weca ædæ wææninque apænecantapa.

³⁹ Itota īñōmō edæ,
–Botō, Inguipoga quēwēnāni æbānō cædānīi, ante apænte ancæte ante pōnīnque īmaī cæbopa. Botō nē babetamōnāni baī īnāni waa bacædānīmpa, ante cædīnque pontabopa. Ayæ wæætē, Mōnitō waa amōnīpa, ante nē ānāni īnānīte, botō, Babetamōmīni baī īmīnīpa, ante edonque odōmoncæte ante pontabopa.

⁴⁰ Mānīnō angā ēñēnīnque Padi-teoidi pancadāniya tōmengā weca nē ongōnāni guīquēnē tōmengā ingante,

–Æbānō āmīi. Īñæmpa mōnitō adobaī babetamōmōni baī īmōnitawogaa.

⁴¹ Ante āñōnāni Itota wæætē,
–Mīnitō babetamōmīni baī īntē baī wēnæ wēnæ cædāmaī incædōmīnīmpa. Wæætē mīnitō, Mōnitō waa amōnīpa, ante nē ānōmīni īntē mīni wēntamō mongæncōo ee mongæmīni īnguīmīnidō anguēnē, ante apænegacāīmpa.

10

Nē aacā tōnō tōmengā obegaidi

¹ Itota ayæ īmaī apænecantapa. “Mīnitō īmīnīte nāwangā āmopa. Onguīñāngā obegaidi nāni wææ cæyōmō guīdemō nē guīdāmaī īntē wæætē wayōmō da ēwa æi guīcā īñōmō tōmengā īñōmō nē awēmō ō ængā īnongā īntē adobaī wadāni

ayōnāni nē pō ō ænte gocā ingampa.

² Odemō nē guīcā guīquēnē tōmengā obegaidi īnānīte nē aacā ingampa.

³ Nē aacā beyæ odemō nē wææ cæcā wī ænecampa. Wī ænecā ate nē aacā pō guīte tedeyongā obegaidi tōmengā nānō tedepāmo ēñēnīte īnānīpa. Tōmengā obegaidi īnānīte nāni ēmōwo nāni ēmōwo ante aa pecā pōñōnānīte tōmengā tōmēnāni īnānīte ænte taocampa.

⁴ Tōmengā obegaidi tōmānāni īnānīte ænte taodīnque tōmengā ōnōmæca īñōmō tāno beyænte gocā ate tōmengā obegaidi tōmengā nānō tedepāmo ēñēnīnque tōmengā ingante tee empo godānīpa.

⁵ Wacā ingante guīquēnē tōmēnāni tee empote godāmaī īnānīpa. Wæætē wacā nānō tedepāmo ēñēnāmaī īnāni īntē tōmēnāni tōmengā weca ongōnāmaī wodīi gocædānīmpa,” ante Itota apænecantapa.

⁶ Tōmengā mānōmaī tōmēnāni īnānīte odōmoncæte ante, Nē aacā æbānō cæcāā, ante odōmonte apænecā incæte tōmēnāni tōmengā nānō ānīnō ante ēñēnāmaī īngadānīmpa.

Itota mōnō īmonte nē Aacā ingā

⁷ Mānōmaī beyæ Itota wæætē ānīnque, “Botō mīnitō īmīnīte nāwangā āmopa. Botō īñōmō nē obegaidi baī īnāni nāni wææ cæyōmō, Guīcædānīmpa, ante odemō baī īmopa.

⁸ Wēēnēñedē botō ayæ pōnāmaī īñedē wadāni odōmonte apænecæ pongadānīmpa. Tōmēnāni tōmānāni waodāni īnānīte nē awēmō ō ænāni baī īnōnāni īntē adobaī wadāni ayōnāni nē pō ō ænte gogaināni baī īngadānīmpa. Incæte waodāni īñōmō nē botō obegaidi baī īnōnāni īntē nē ō æīnēnāni īnānīte wæætē ēñēnāmaī īngadānīmpa.

⁹ Botō nē odemō baī īmopa. Odemō nē guīcā baī īñōmō tōmengā botō īmote pōnengā īñongante botō æmo beyænque quēwēncæcāīmpa. Adocā nē obega baī īntē tōmēnāni nāni wææ cæyōmō guīdemō nē guīcā baī īnīnque tōmengā piyænē cæte quēwēncæcāīmpa. Ayæ tōmengā wæætē nē taocā baī īnīnque

tömengä nänö cænguī mæ öñö ad-
inque eyepæ cæncæcäimpa,” ante
Itota apænecantapa.

¹⁰ Ayæ apænedinque, “Në awëmö
ængä guiquënë tömengä iñömö
awëmö æncæte ante pongä inongä
inte adobaī wænoncæte ante wo
ewencæte ante mäninganca cæcæte
ante pongä ingampa. Botö iñömö,
Waadäni quëwencædänimpa, ante
ayæ, Tömënanäni nänäni quëwenguinque
ante watapæ pönäni quëwencædänimpa,
ante pontabopa. ¹¹ Botö obegaidi
baī inäni inänite në waa aacä baī
imopa. Në waa Aacä iñömö nämä incæ
obegaidi beyænque wæncæcäimpa.
¹² Godonte æinta ante wacä ingante
në cæcä iñömö tömengä iñömö obe-
gaidi në ëacä inämaī inongä inte në
aacä inämaī ingampa. Mänömaī beyæ
adocä iñömö mëne baī ingä pongä
adinque tömengä obegaidi inänite
ëmö cæte wodii winongampa. Tömengä
wodii winongä adinque mëne baī
ingä wæætë obegaidi weca pogodo
ponte obega ingante yao ongöinque,
Obegaidi pangocæ goquinäni, ante
cæcampa. ¹³ Godonte æintaque ante
në cæcä iñömö, Æbänö cæte obegaidi
waa quëwenguinäni, ante änämaī
inongä inte edæ wodii winongampa,”
ante Itota apænecantapa. ¹⁴⁻¹⁵ Ayæ
apænedinque, “Obegaidi inänite
waa aacä baī edæ botö iñömö në
waa Aabo imopa. Botö Mæmpo
edæ botö imote do ate pönengä baī
botö adobaī tömengä ingante do
adinque pönëmopa. Ayæ tömëmo
obegaidi baī inäni inänite do adinque
tömënanäni inänite pönëmopa. Ayæ
tömënanäni guiquënë botö imote do
adäni inte botö imote pönënanäni.
Botö nämä incæ obegaidi baī inäni
beyænque wæncæboimpa. ¹⁶ Ayæ
wadäni iñömö botö obegaidi baī
në inäni incæ wii mäniñömö wææ
cæyömö quëwënäni inänäni. Botö
mäninänäni inänite adobaī ænte mämö
ponguënëmo imopa. Adodäni adobaī
botö tedepämo, Æbänö ämo, ante
ëñenguinäni inänäni. Mänömaī beyæ
mäninänäni iñömö do botö quinäni tönö

tömënanäni adocabodänique baquinäni
inänäni. Ayæ në Aabo adoboque
iñömö tömënanäni beyæ cæcæboimpa.”
ante Itota apænecantapa.

¹⁷ Ayæ apænedinque, “Botö nämä
incæ Ao ante wæninque ñäni
ömæmoncæboimpa, ante cædinque
wæætë tömëmo mü quëwenguimo
incæboimpa. Mänömaī beyæ botö
Mæmpo botö imote waadete pönengä
ingampa. ¹⁸ Waadäni iñömö ædö
cæte botö imote wænunguinänäni. Botö
nämä incæ Ao äninque wæncæboimpa.
Botö nämä tæi piñæmo iñömö,
Wænguimo, ante në ämo inömo
imopa. Ayæ adobaī botö nämä tæi
piñænte në ämo inte botö, Ñäni
ömæmoncæboimpa, ante cædinque
wæætë tömëmo mü quëwenguimo
incæboimpa. Botö Mæmpo iñömö
botö imote nänö wææ angainö botö
ëñëninö ante ëñente cæbopa,” ante
apænecantapa.

¹⁹ Mäninö apæncä ëñëninque
oodeoidi wæætë wadö wadö
ante pönente tedewengadänimpa.

²⁰ Oodeoidi nanguī inäni iñömö,

–Tömengä wënæ tönö cæcä inte
edæ ömæcacä inongä ingampa. Ædö
cæte tömengä ingante ëñëminäni iminäni.

²¹ Äñönäni oodeoidi incæ wadäni
guiquënë,

–Tömengä wënæ tönö cæcä inte baī
tömengä iimaī nänö äninö ante wii
angä incædongäimpa. Në wënæ inte
quëwente cæcä iñömö babetamönäni
awinca wi æmonte baī cæcä waa
bamönäniyaa.

Oodeoidi Itota ingante Baa änäni

²² Yoguite tedæ iñonte waadäni
Eedotadë quëwënäni, Wængonguī
oncö tæiyæ waëmö oncö ante
dodäni mænongadänimpa, ante
pönente ææmæ cæyönäni. ²³ Itota
Wængonguī oncö ñænæcönë
yabæcönë Tadömö nänäni änoncönë
iñömö cægongantapa. ²⁴ Oodeoidi
tömengä weca pö godongämæ
gongænte änäni,

–Bitö æbänö imii, ante æpönædö
ayæ äinänäni imii. Bitö mönitö

Codito ïmi ïninqe mönitö ïmönite edonque pönï apænebi eñëmönii.

²⁵ Ante añönäni Itota wæætë,

–Minitö ïminite do antabopa. Incæte minitö pönenämaï ïminipa töö. Botö edæ botö Mæmpo emöwo ante bamönengæ cæbo adinque minitö, Botö æbänö imoo, ante eñenguënemini ïminipa. ²⁶ Minitö wii botö obegaidi bai ïnomïni inte botö imote pönenämaï ïminipa töö. ²⁷ Waodäni botö obegaidi bai nē ïnāni inte botö tedepāmo, Æbänö ämoo, ante do eñenāni. Ayæ botö tömēnāni ïnānite adinque pönemo ïñömote tömēnāni wæætë botö imote tee empote godänipa. ²⁸ Botö adodäni ïnānite wantæpiyæ nāni quēwenguinö godömo æninque quēwencädänimpa. Ayæ cöwē wænāmaï incädänimpa. Tömēnāni tömēmo önönempo ongöñönānite æcänö tömēnāni ïnānite gā pe æmpoda ïñömö edæ dæ angampa. ²⁹ Botö Mæmpo edæ adodäni ïnānite botö imote nē pönongaingä ïnongä ingampa. Tömānāni wädänāni ïñönāni tömengä ïñömö godömenque ñænængä inte nanguï cædongä ingampa. ïninqe tömengä önönempo ongöñönānite æcänö tömēnāni ïnānite gā pe æmpoda ïñömö edæ dæ angampa. ³⁰ Botö ïñömö botö Mæmpo tönö äawocaque bai ewocamöna ïmönapa, ante Itota apænegacäimpa.

³¹ Mäninö angä eñēninque ood-eoidi wæætë tömengä ingante dicaca tacacæte ante cædinque dicacoo wææmpo ænānipa. ³² Tömēnāni dicacoo wææmpo æñönānite Itota tömēnāni ïnānite,

–Botö minitö weca botö Mæmpo nänö angai bai nanguï bamönengæ odömonte cætabopa. Ædö botö bamönengæ cædinö ante adinque minitö botö imote dicaca tacacæ cæminii.

³³ Ante añongä oodeoidi wæætë,

–Mäninö bitö waa cædinö beyæ ante mönitö wii bitö imite dicaca tacacæ cæmönipa. Wæætë bitö babæ ante Wængonguï ingante godö wēnæ wēnæ ämipa, ante bitö imite tacacæ

cæmönipa. Edæ mönitö waomöni bai inte bitö adobai waobi ïmi incæte bitö, Botö Wængonguïmo ïnomo ïmopa, ante ämipa töö.

³⁴ Ante wæyönäni Itota wæætë tömēnāni ïnānite,

–Minitö mini wææ yewæmongainö wii ïmaï ante yewæmongatüi. “Minitö ïñömö wængonguïdi ïminipa, ante do antabopa,” ante yewæmongadänimpa.

³⁵ Wængonguï angä eñente nāni yewæmongainö ante waodäni ædö cæte Baa äninque wido cæquinānii. Wængonguï nänö angainö ante apænecä nē eñenāni ïñönānite tömengä, Minitö wængonguïdi ïminipa, angantapa. ³⁶ Ayæ botö Mæmpo botö imote inguipoga da pönoncæte ante, Botö adoboque quïmi ïmipa, ante botö imote apænte ængacäimpa. ïninqe edæ botö tömengä quïmo ïnomo inte tömengä nänö nē da pönongaïmo ïñömote edæ botö imote edæ æbänö anguüi. ïñæmpa botö ïñömö Wængonguï Wëmo ïnomo ïmopa, añömote edæ minitö wæætë, Bitö babæ ante Wængonguï ingante godö wēnæ wēnæ ämipa, ante quinante äminitawo. ³⁷ Botö edæ Mæmpo nänö cædö bai cædāmaï imo bai minitö māniñedē botö imote pönenämaï ïminii bai waa incädönimpa. ³⁸ Minitö botö imote pönenämaï ïmini incæte botö guiquēnē botö Mæmpo nänö cædö bai adobai cæbo ïninqe minitö, Botö æbänö cæboo, ante adinque pönencæminimpa. Mänömaï cædinque, Botö Mæmpo ingante botö ewocabo ïmopa, ante ayæ, Botö adobai botö Mæmpo nempo quēwēmopa, ante eñenguïmini inte ayæ eñēninque pönencæminimpa, ante Itota angacäimpa.

³⁹ Mäninö angä eñēninque tömēnāni wæætë tömengä ingante bæi on-goncæ cæyönāni tömengä do aamö cæte gocantapa.

⁴⁰ Ayæ Eedotadēē wadæ godinque Oododänö æmæmäa ocæ emænte taodinque tömengä Wäö wēenēñedē waodäni ïnānite æpænē nänö guidöniñömö adoyömö gote

ongongä ingantapa. ⁴¹ Ayæ tömengä mäniñömö ongöñedë waodäni nangui inäni tömengä weca goto pöningue änänitapa.

—Ate eñencæminimpa, ante Wäo wodi cöwë bamönengæ cädämaï ingä incæte tömengä mäningä Itota ingantedö ante nänö angainö tömänö näwangä ante angantapa, ante apænedänitapa.

⁴² Ayæ mäniñömö ongöningue waodäni nangui inäni Itota ingante wede pönänäni bagadänimpa.

11

Datado wængäimpa

¹ Mäniñedë wacä onguiñængä tömengä emöwo Datado wënæ wënæ badingue öñönongäimpa. Mäadiya tönö Mäadota tömengä töninada nana quëwëñömö tömengä adoyömö Betänia iñömö quëwëngäimpa.

² Ìngä Mäadiya guiquënë ayæ ate ogui wapæ ænte Awënë Itota ingante öni pädingue nämä ocagui inte tömengä önöwa amimö cæquingä adocä Mäadiya iñongä tömengä töninacä Datado ñöwo wënæ wënæ bacä ìnongäimpa. ³ Ìnningue Datado töninada iñömö, Itota ingante aa pebi pongæ, äna eñente wacä gote,

—Awënë eñemi, Bitö në waadecä iñömö wënæ wënæ ingampa cæbii, ante änapa, ante apænecantapa.

⁴ Mäninö nana änö ante apænecä eñëningue Itota,

—Mäninö wënæ wënæ inte nänö wädö iñömö wii wængui impa. Wæætë waodäni, Wængongui ñäö apäite emönongä ingampa, ante acädänimpa. Ayæ botö imote, Bitö Wængongui Wëmi adobaï ñäö apäite emönömi imipa, ante apænecädänimpa, ante mäningä wënæ wënæ ingampa, angantapa.

⁵ Mäadota tönö tömengä töninacä Mäadiya nana caya inate ayæ Datado ingante Itota tömënäni inänite waadete pönëngäimpa. ⁶ Datado wënæ wënæ ingampa, ante apænecä eñengä incæte Itota nänö ongöñömö

adoyömö meönaa ayæ ongongan-tapa. ⁷ Tömengä ayæ ate tömengä emiñænäni inänite,

—Ægodödäni, wæætë Oodeabæ mönö gocäimpa.

⁸ Äñongä tömënäni wæætë tömengä ingante,

—Awënë në Odömömi imi, wantæyö intapa oodeoidi bitö imite dicaca tacacæ cädäni incæte bitö ñöwo wæætë, Mäniñömö goquimo, ämitawo.

⁹ Ante änäni Itota wæætë,

—Ïñæmpa nænque wii tömää itädë apäitawo. Itädë në gocä mönö nænque inguipoga apäicä ate beyæ tëwadämaï gocampa. Botö iñömö itädë gocä bai adobaï müimo botö quëwenganca botö cæquënë ìnningue cæquinque gobopa.

¹⁰ Woyowotæ në gocä bai guiquënë tömengä wæætë ñäö dæ ä beyæ tëwate bai gocampa, angacäimpa.

¹¹ Mäninö angä ate tömengä godömenque tömënäni inänite,

—Mönö æmigo Datado iñömö mö ñongä. Botö ñöwo tömengä weca gote, Ñäni ömæmöe, ämo ñäni ömæmonguingä, ante apænecantapa.

¹² Tömengä emiñænäni wæætë tömengä ingante,

—Awënë Itota, tömengä mö ñongä ìnningue edæ gancæ baquingä, apænedänitapa.

¹³ Itota Datado nänö æmæwo wänimämo ante apænecä incæte tömengä emiñænäni guiquënë, Datado önonque mö ñongampa, ante Itota apænecampa, ante pönënonänimpa. ¹⁴ Mänömaï beyæ Itota tömënäni inänite,

—Datado æmæwo wængäimpa, ante edonque pönä apænecantapa.

¹⁵ Minitö pönencæminimpa, ante botö, Tömengä wæncæ cæyongä botö tömengä weca ongönämaï intabopa, ante minitö beyæ ante tobopa. Ægodödäni, tömengä weca mönö gocäimpa, angantapa.

¹⁶ Ayæ Tömato Äncadënaque nani änogä iñömö Itota emiñænäni wädäni inänite,

—Ægodödäni, äningue, Tömengä tönö godongämæ wæncæte ante

tömengä miñæ gocæimpa, an-gacæimpa.

Itota mönō ömæmonguimāmo mönō müi quëwenguimāmo ante nē pönongä ingampa

¹⁷ Ayæ Itota ponte ëñëñongä, Datado baö tömënäni nāni wod-intatodë meönaa go meönaa do daga wënānitapa, ante apænedāni ëñengacæimpa. ¹⁸ Betānia iñömō nāni taadō godō Eedotadëe nāni quëwëñömō godō eyequei inönimpa. Māniī taadō wodo tedete quidōmetodo ganca inönimpa. ¹⁹ Oodeoidi nanguī ināni iñömō Mäadota tönō Mäadiya weca pöninque, Mīnatō tōniñacā wængä ate wæwëmīna incæte piyænē cæte quëwencæmīnaimpa, ante waadete apæneccæte ante pönānitapa.

²⁰ Itota oo pōni pongampa, ante änāni ëñëninque Mäadota tömengä ingante bee tencæte ante gocantapa. Mäadiya guiquënë oncōnē ee ongongantapa.

²¹ Mäadota Itota weca pöninque tömengä ingante,

—Awënë Itota, bitō mönitō weca ongōmi bai botō tōniñacā wii wæncædongäimpa. ²² Tömengä æmæwo wængä incæte bitō ñōwo Wængonguī ingante quiëmē ante apænebi tömengä pönō cæcā ænguimi imipa, ante botō ëñëmopa, ante apæneccantapa.

²³ Angä ëñëninque Itota tömengä ingante,

—Bitō tōniñacā wodi ñāni ömæmonguimāmo,

²⁴ Ante apæneccā ëñëninque Mäadota wæætë,

—Ao, inguipoga iinque bayedë mönō ñāni ömæmōñedë tömengä do wængaingä incæte ñāni ömæmoncæcäimpa,

ante botō do ëñëmopa, angantapa. ²⁵ Itota tömengä ingante äninque,

—Botō nē ñāni ömæmonguimo inōmo inte cæbo beyænque mīnitō ñāni ömæmoncæmīnaimpa. Mīni wantæpiyæ quëwenguinque ante nē Quëwëmo inōmo imopa. Botō imote nē wede pönengä iñömō do wængä incæte ayæ ate wantæpiyæ quëwencæcäimpa. ²⁶ Ayæ nē müi quëwengä inte botō imote wede

pönengä iñömō tömengä cōwë wænāmaī quëwencæcäimpa. Bitō mäninō ante pönëmitawo.

²⁷ Angä ëñëninque Mäadota tömengä ingante,

—Awënë Itota Ao ämopa, ante apæneccantapa. Bitō mönitō

Codito inōmi imipa, ante pönëmopa. Wængonguī Wëmi inōmi inte bitō iñömō edæ, Inguipoga nē Ponguingä, ante nāni angaīmi imipa, ante pönëmopa, ante apæneccantapa.

Itota Datado wodintatodë gote wæcä

²⁸ Mänōmaī ante apænedinque Mäadota ocæ emænte gote Mäadiya ingante aa pecä pongä ate Mäadota tömengä ingante awëmō äninque,

—Mönō nē Odōmongä do pöninque bitō imite aa pecampa.

²⁹ Angä ëñëninque Mäadiya quingæ ængæ gantite tömengä weca gocantapa. ³⁰ Itota Betānia iñömō ayæ guidāmaī inongäimpa. Mäadota tömengä ingante nänō bee tēniñömō tömengä adoyömō ayæ a ongönongäimpa.

³¹ Oodeoidi Mäadiya tönō oncōnē godongämæ ongöninque, Tömengä piyænē cæcæcäimpa, ante tæcæ waadete apæneyönāni tömengä quingæ ængæ gantidinque taocä adinque tömënāni, Tömengä Datado wodi nänō wodintatodë wæcæte ante gocampa, ante pönente tömengä ingante tee empote godānitapa.

³² Itota nänō ongōñömō pöninque Mäadiya tömengä ingante adinque tömengä önōwa ædæ wæænte apænedinque,

—Awënë Itota, bitō mönitō weca ongōmi bai botō tōniñacā wii wæncædongäimpa, ante wæcantapa.

³³ Mäadiya mänōmaī wæyongä oodeoidi tömengä tönō godongämæ nē pönināni adobaī wædāni adinque Itota wæwente entawëninque wæcantapa. ³⁴ Ayæ,

—Datado wodi baö æyömönō da wëmīnitawo,

Angä ëñëninque tömënāni,

—Awënë Itota, pō ae.

³⁵ Ante añönäni Itota Ca wæcantapa.
³⁶ Tömengä mänömaï wæcä adinque oodeoidi,

—Aedäni, tömengä Datado wodi ingante nö waadete pönengä ingantapa.

³⁷ Ante tedeyönäni pancadäniya,
 —Tömengä iñæmpa nē babetamongä awinca wi æmonte bai cædingä inte adocä Datado wodi ingante cæcä bai tömengä wii wæncædongäimpa, ante wægadänimpa.

Datado nänö ñäni ömæmömämo

³⁸ Itota wæætē wæwente entawëninque Datado wodintatodē pongacäimpa. Tömengä wodido ontatodē i iñonte dicabo ñænængade da pæñæ pönö tee mönodäni. ³⁹ Adinque Itota,

—Dicabo da tæ ñæedäni, añongä Datado wodi tönïñacä Mäadota wæætē,

—Awënë Itota, eñëmi. Mëönaa go mëönaa tömengä wodido öñöninge tömengä wodi do öö wadingä ingampa.

⁴⁰ Ante wææ angä eñëninge Itota,
 —Bitö wede pönëmi ininque edæ Wængonguï æbänö ñäö apäite emönongä inte cæcää, ante bitö acæbiimpa, ante bitö imite wii antawo, angacäimpa.

⁴¹ Ininque tömënäni dicabo tæ ñænänitapa. Ayæ Itota æmö adinque,
 —Mæmpo botö apænedinö ante do eñëmitapa, ante adinque botö bitö imite waa ate pönëninge apænebopa.

⁴² Botö apænedö ante æyedemë apænebo incæ bitö cöwë eñëmipa, ante botö do eñëmopa. Wæætē edæ waodäni botö weca godongämæ gongænäni beyæ ante botö mäninö ante apænetabopa. Bitö botö imote da pönömi pontabopa, ante tömënäni pönencædänimpa, ante apænetabopa.

⁴³ Mänömainö ante Wængonguï ingante apænedinque Itota,
 —Datado ta pöe, ante yedæ aa pecantapa.

⁴⁴ Nē wæningä iñömö edæ do ta pongantapa. Tömengä önonpo weocoo inte nani wini wini cædincoo ayæ empodique önöwa nani wini wini

cædincoo ayæ ewadinque tömengä awinca weocoo nani ñäne cæmönincoo ayæ emongä inte ta pongä adinque Itota tömënäni inänite,

—Mänincoo ñi cæmini gocæe, angacäimpa.

Itota ingante bæi ongonte ængæimpa, ante tedewënäni

(Mäateo 26.1-5; Mäadoco 14.1-2; Odoca 22.1-2)

⁴⁵ Mänömaï beyæ oodeoidi nanguï inäni Mäadiya weca eñacæ nē pöninäni inte iñäni iñömö Itota mänömaï cæcä adinque tömengä ingante wede pönënäni bagadänimpa.

⁴⁶ Pancadäniya guiquënë Paditeoidi weca godinque, Itota quinö cæcää, ante adodö angadänimpa. ⁴⁷ Ininque Wængonguï quï, ante nē godönäni ñænænäni tönö Paditeoidi iñömö wæætē tömënäni ömæ nani Apænte Äincabo tömänäni inänite, Mönö godongämæ apænecæimpa, ante adoyömö pöedäni, ante añönäni pönäni adinque tömënäni,

—Iingä iñömö, Acædänimpa, ante nanguï bamönengæ cæcä ingä. Mönö quinö cæquimöö. ⁴⁸ Ante wædinque mönö tömengä ingante, Bitö mänömaï godömenque cædämaï incæbiimpa, ante wii wææ amö ininque waodäni tömänäni tömengä ingante pönëmainäni. Tömengä ingante pönënäni ininque, Itota oodeoidi Awënë bacæte ante cæcampa, ante pönente wædinque odömänoidi incæ edæ wææ cæbainäni. Ininque tömënäni pöninque mönö tæiyæ waemö oncö wo ewëmainäni. Ayæ mönö ömæ iñömö mönö quëwencabo incæ nämä nē amö iñömö tömënäni pö ö ænte bai cædinque tömënäni nē änäni babainäni, änänitapa.

⁴⁹ Tömënäni weca adocanque Caiapato mänii wadepo, Wængonguï quï, ante nē godongä ñænængä pöninongä inte tömengä iñömö,

—Minitö tömänö ante eñënämaï iminipa töö, apænecantapa. ⁵⁰ Mönö ömæ quëwencabo wii tömämö wængæimpa, ante wæætē tömëmö beyæ ante adocanque onguïñængä

wængä ïinque godömenque waa ïmaimpa, ante mïnitö eñenāmaï ïmini inte tedewëmini awædö.

⁵¹ Mänömainö ante apænedinque Caiapato mä nänö pönënonque ante wïi angacäimpa. Wæætë tömengä mänüi wadepo ïñonte, Wængonguï qui, ante në godongä ñænængä pöni ïnongä inte Wængonguï beyæ apænedinque, Itota ïñömö oodeoidi beyæ ante wæncæcäimpa, ante apænegacäimpa. ⁵² Ayæ wïi Oodeabæ quëwënäni beyæ ante wænguingä. Wæætë, Wængonguï wënäni wayömö wayömö pangote godinäni inte adodänique badinque adoyömö godongämæ poncädänimpa, ante tömengä wæncæcäimpa. ⁵³ Caiapato mäninö ante nänö äniönæ ïñonte täno godongämæ pönëninque oodeoidi ömæ nani Apænte Äincabo ïñömö, Æbänö cæte Itota ingante wænömö wænguingää, ante cöwë tedewënönänimpa.

⁵⁴ Mänömaï beyæ Itota ayæ oodeoidi weca wïi edonque gocä ïnongäimpa. Wæætë wadæ godinque tömengä önömæca eyequeï Epadaïmë nani äñömö godinque mäniñömö tömengä emiñænäni tönö ongönongäimpa.

⁵⁵ Wodo pänta gogaïönæ, ante Patowa nani cæönæ oo pöni ïnönimpa. Mäniñedë Oodeabæ wayömö wayömö quëwënäni nanguï ïnani Eedotadëë quëwëñömö pö æidinque tömënäni Patowa nani ææmæ ayæ cædämaï ïñedë dodäni angai bai cædinque, Mönö wënæ wënæ cægainö ante mönö mënongate bai waëmö bacäimpa, ante nämä incæ äacæte ante cædinque æi gogädänimpa. ⁵⁶ Adodäni Wængonguï oncö ñænæncönë yabæcönë pö guidinque adiyæ gongæninque, Itota æyömonö ingää, ante pönente gomö adinque nämäneque godongämæ apænedinque,

—Mäningä ïñömö ææmæ beyæ ante edæ pönämaï ingantawo. Æbänö ante pönëminii, ante apænedönänimpa.

⁵⁷ Wængonguï qui, ante godönäni ñænænäni tönö Paditeoidi wæætë waodäni ïnänite wææ änönänimpa. Æcänö Itota nänö a ongöñömö ante në eñengä ïñömö tömengä mönitö ïmönite angä eñëninque mönitö wæætë Itota ingante yao ongonte æmaïmönipa, ante do wææ änönänimpa.

12

Awënë Itota önöwa oguï wapæ gao cæwacampa

(Mäateo 26.6-13; Mäadoco 14.3-9)

¹ Önonpo æmæmpoque go adoönæque ate Patowa nani ämæ bacæ cæyedë Itota Betänia ïñömö pongantapa. Itota do angä ate në ñäni ömæmöningä Datado ïñömö tömengä adoyömö Betänia quëwëngäimpa.

² Itota pongä adinque waodäni mäniñömö quëwënäni, Itota ingante waa amönipa, ante tömengä beyæ ææmæ cægädänimpa. Wadäni tönö Datado adobai Itota tönö godongämæ tæ contate cæñönänite Mäadota ïñömö tömënäni ïnänite cænguï godongä cænänitapa. ³ Ayæ Mäadiya ïñömö mëedio ditodo ganca nani oguï wapæ öni pæquimæ näadodopæ nänö nanguï godonte ænimæ incæ æente mämö Itota önöwa gao cæwadinque tömengä ocaguï inte amimö cæcä ïinque oncönë tömancönë oguï waacönë ingatimpa. ⁴ Itota miñæ në gocä adocanque Codaa Icadote nani änongä ïñömö edæ, Itota ingante æncädänimpa, ante odömönte në godonguingä inte ñöwo wææ apænecantapa.

⁵ —Ïimæ nänö oguï wapæ quinante ömæpodäni beyæ ante godonte ænämaï ingantawo. Ïñæmpa waocä adoque wadepo cæte beyæ paga æninque todetiento deënnadiota nänö ænimpota beyæ mänimæ godonte ænimæ ïmæmpa, ante wæcantapa.

⁶ Tömengä dicæ ömæpodäni beyæ ante pönëninque mänömainö ante apænecantawogaa. Wæætë tömengä në awëmö ænongä inte mäninö ante apænecantapa. Tömënäni da wente æintaa næænongä inte

tömengä iñömö, Tömënäni da wëninta incæ pancataa botö qui bacæimpa, ante awëmö ænongä inte mänömaï apæñecantapa. ⁷ Itota wæætë tömengä ingante,

—Onquiyængä ingante pïinte änewënämaï incæbiimpa. Mänimæ botö daga wenguïönæ ante man-guënengä inte tömengä botö baö nani daga wenguinque ante eyepæ iñonte öni paacantapa. ⁸ Ömæpodäni cöwë mïnitö weca quëwënäni inänipa. Botö guiquënë wïi cöwë mïnitö weca quëwëmo imopa, ante apænegacäimpa.

Datado ingante wænongæimpa, ante tedewënäni

⁹ Itota Betänia ponte ongongampa, ante apænedäni ëñëninque ood-eoidi nanguï inäni tömengä weca pönäni incæte wïi tömengä beyænque pönänitapa. Wæætë adobaï Datado ingante angä në ñäni ömæmönïngä ingante acæte ante pongadänimpa.

¹⁰ Mänömaï beyæ Wængonguï qui, ante në godönäni ñænænäni iñömö, Æbänö cæte Datado ingante adobaï wænömö wænguingäa, ante godongämæ tedewënanitapa.

¹¹ Iñæmpa oodeoidi nanguï inäni, Datado beyæ mönitö imönite ëmö cæte Itota ingante pönëninque tömengä gämænö godänipa, ante wægadänimpa.

Itota Eedotadëe iñömö pongä (Mäteo 21.1-11; Mäadoco 11.1-11; Odoca 19.28-40)

¹² Iimö ate, Eedotadëe iñömö poncæte ante Itota idömæ pongampa, ante apænedäni ëñëninque ææmæ beyæ ante tæiyænäni pönänäni iñömö, ¹³ yädëmæmäa wangö tate mäo bee tente taodinqe yedæ aa pedinqe,

—Möni quëwenguinque ante, Badogaa, ante tomönipa. Bitö Awënë Wængonguï ëmöwo beyænque pömi ininque bitö toquinque edæ Wængonguï bitö imite waa cæcæcäimpa. Bitö idægoidi Awënë inömi inte bitö toquinque ingæimpa.

¹⁴ Ante yedæ äñönäni Itota iñömö bodo wengä ate æninque tömengäa æi contate pongantapa. Wëenëñedë Wængonguï beyæ iïmaï ante nani yewæmonte angainö bai iinque cædinque pongantapa.

¹⁵ “Tiöno iñömö quëwëmini iñömö edæ guiñënämaï iedäni.

Mïnitö Awënë Odeye ñöwo mïnitö weca pongä aedäni. Edæ bodo wengäa æi contate pongampa,”

ante yewæmongadänimpa. ¹⁶ Tömënäni dodäni nani angai bai cædinque Itota ingante bee tencæ taodäni adinque Itota nänö në ëmiñænäni iñömö, Æbänö cædäni, ante mäniñedë ëñënämaï inte wädönänimpa. Wæætë edæ Itota Wængonguï ñäö ëmöñömö ocæ ëmænte gocä adinque tömengä ëmiñænäni mäniñedë ate edæ, Itota ingante waodäni ñöwo nani cædonö ante dodäni wëenëñedë yewæmongadänimpa, ante pönente wädönänimpa.

¹⁷ Datado wodi ontatodë ongöñongante Itota, Ta pöe, ante aa pecä ëñëninque në wæningä incæ ñäni ömæmöninque ta pongä adinque Itota weca godongämæ ongönänäni nanguï inäni iñömö, Itota mänömaï cæcä atamönipa, ante gode ä gode ä cædonänimpa. ¹⁸ Ininque edæ, Itota mänömaï bamönengæ cæcampa, ante apænedäni ëñente beyænque waodäni tæiyænäni Itota weca bee tencæ pönänitapa. ¹⁹ Mänömaï beyæ Padi-teoidi iñömö nämanque godongämæ tedewënanitapa.

—Waodäni tömänäni æbänö tömengä miñæ tee empo godäni ante aedäni. Mänii beyæ ante, Mönö cædinö wïi eyepæ impa, ante adinque, Mönö æbänö cæte godömenque cæquimö, ante wægadänimpa.

Guidiegoidi pancadäniya Itota ingante diqui mïnäni

²⁰ Eedotadëe iñömö tömënäni ææmæ cæyedë Wængonguï ingante waa ate apæñecæte ante në pönäni pancadäniya iñömö guidiegoidi

inönänimpa. ²¹ Mäninäni iñömö Pedipe weca pöninque edæ,

—Awënë, eñëmi. Mönitö Itota ingante ainëmönipa, ante änänitapa. Mäningä Pedipe iñömö Betaida quëwëñömö Gadideabæ quëwente pongä inongäimpa.

²² Tömengä iñömö Æntade weca gote tömengä ingante guidiegoidi nani äninö ante apænecä ate tömäna wæætë Itota weca guëa godinque tömengä ingante añöna, ²³ Itota wæætë,

—Wængonguï nänö cæönæ do ba ininque tömengä pönö cæcä beyænque botö Waobo eñagäimo iñömö ñäo apäite ëmoncæboimpa. ²⁴ Minitö iminite näwangä ämopa. Tömëmö onguipo quiyadimö incæ yabæque ñömäadämaï i bai ædö cæte tä bocate pædinque tömëmö nanguï pönï imonguï. Wæætë tömëmö yabæque ñömäate ate tä bocate pædinque nanguï pönï imopa. Botö adobai wænguënëmo imopa. Botö wii wæmo bai ædö cæte waodäni tæiyænäni botö quinäni baquinäni. ²⁵ Në, Nämänque pönente quëwëmote, ante pönengä iñömö edæ tömengä nänö quëwenguimämo incæ wo ëwente bacæcäimpa. Inguipoga quëwënedë në, Wii nämanque pönente quëwëmote, ante pönengä guiquënë tömengä nänö wantæpiyæ quëwenguinö ante do ëadingä inte tömengä nänö wænämaï quëwenguinque gocæcäimpa. ²⁶ Æcänö botö imote në cæda ina tömengä iñömö edæ botö imote tee empo goquënegä ingampa. Ayæ æyömönö botö quëwëmö botö imote në cædongä adoyömö quëwencæcäimpa. Botö Mæmpo iñömö botö imote në cædongä ingante waa acæcäimpa, ante Itota apænecäimpa.

Itota, Botö wæncæboimpa, ante apænecä

²⁷ Ayæ godömenque apænedinque Itota iïmaï apænecantapa. “Botö guinëmämo entawëninque wæbo inte quinö anguimoo. ‘Botö Mæmpo eñëmi, äninque, Botö nantate wæwenguionæ oo pönï ba incæte bitö pönö ö æmi ate

wæwënämaï bacæboimpa,’ ante botö wii mänömainö ante ancæboimpa. Edæ botö wæwenguinö beyæ ante pontabopa. ²⁸ Mæmpo, Bitö æbänö ñäo apäite ëmömi imii, ante odömömi acædänimpa,” angantapa.

Äñongä öönædë inö tedepämo apænedinque, “Botö æbänö ñäo apäite ëmömo imopa, ante do odömöntabopa. Ayæ wæætë adodö cæcæboimpa,” ante apænecä eñënanitapa.

²⁹ Mäniñömö godongämæ ongönäni nanguï inäni iñömö mänimämo eñëninque edæ, Detæbo tæi tëmämo bai impa, ante wædänitapa. Wadäni guiquënë,

—Anquedo iñömö tömengä ingante apænecantapa, ante änänitapa.

³⁰ Itota iñömö wæætë,

—Mänimämo wii botö beyæ ante apænecampa. Wæætë minitö beyæ ante apænecampa. ³¹ Ñöwoyedë Wængonguï inguipoga quëwënäni inänite apænte nänö panguinö iñömö edæ oo baquinö anguënë. Inguipogaque quëwënäni awënë iñongante wënæ ingante Wængonguï ñöwoyedë, Gobäwe, angä gocæcäimpa. ³² Botö imote awäa timpodinque ængæ gantidënanäni wægömo ate botö waodäni tömänäni inänite, Minitö botö weca poncæminimpa, ante aa pecæboimpa, ante Itota apænecantapa.

³³ Mänömainö ante apænedinque tömengä, Æbänö wænguimoo, ante eñencædänimpa, ante apænecantapa.

³⁴ Eñëninque mäniñömö ongönäni nanguï inäni,

—Mönitö iñæmpa, Mönö Codito cöwë ee ongoncæcäimpa, ante dodäni nani wææ angainö ante yewæmonte ongompa, ante eñentamönipa. Incæte bitö iñömö nämanque äninque, Botö Waobo eñagäimo iñömote botö imote awäa timpodinque gö cædäni wængonguimo imopa, ante ædö cæte ämii. Äninque, Iingä Waocä në eñagaingä iñæmpa ee ongönämaï wænte goquingä.

³⁵ Ante wæyönäni Itota tōmēnāni inānite,

—Botō, Waodāni mīmōnē ñāō bai entawēninqe quēwencædānimpa, ante pontabopa. Wædænque ayæ iñō botō mīnitō weca quēwēninqe mīnitō imīnite odōmonte apænebopa. Mōnitō taadō wēmō badāmaī ingæimpa, ante mīnitō taadō ayæ ñāō iñedē goedāni. Edæ wēmō iñōmō nē gocā iñōmō tōmengā edæ, Ædōnō goboo, ante eñēnāmaī ingampa. ³⁶ Botō ñāō bai emōnōmo imopa. Ñāō iñōmō nē cægōmōni incæmōnimpa, ante bacæte ante cædinque mīnitō iñōmō botō mīnitō weca ayæ ongōñōmote botō imote pōnēedāni āmopa, angantapa.

Tōmengā iinque apænete ate wadæ godinque wē womonte ongongacāimpa.

Oodeoidi Itota ingante iūmaī cæte pōnēnāmaī inānipa

³⁷ Itota oodeoidi weca nangui bamōnengæ cæte odōmongā incæte tōmēnāni ayæ tōmengā ingante pōnēnāmaī inānitapa. ³⁸ Wængongui beyæ nē apæneca Itaiya wodi iūmaī ante do nānō angainō bai iinque baquinque tōmēnāni mānōmaī cædōnānimpa.

“Awēnē Wængongui eñēmi. Mōnitō apænemōni tōmēnāni nāni eñēnō ante edæ æcānō eñente pōnengā. Iñæmpa nē pōnengā iñōmō edæ dæ angā awædō.

Ayæ Awēnē Wængongui nānō tæi piñænte cægāinō ante æcānō ada iñōmō edæ dæ angampa.”

³⁹ Iinque tōmēnāni ædō cæte pōnenguīnāni, ante Itaiya wodi edæ wayōmō yewæmōninqe, Wængongui iūmainō ante cæcā beyæ pōnēnāni inānipa, ante yewæmongacāimpa.

⁴⁰ “Tōmēnāni botō gāmænō ocæ emænte pōnāni bai botō wæætē, Waa bacæminimpa, ante godō cæcædōmoimpa.

Incæte mānōmaī cædāmaī incæboimpa, ante Wængongui iūmaī cægacāimpa.

Tōmengā godō cæcā beyænque waodāni babetamōnāni bai adāmaī bagadānimpa.

Adobaī mīmōnē nāni pōnēnō omædē badinque eñēnāmaī bagadānimpa.

Edæ, Tōmēnāni nāni adinō ante eñēnāmaī incædānimpa, ante cædinque

ayæ edæ, Tōmēnāni nāni eñēnō ante eñēnāmaī incædānimpa,” ante wææ cægacāimpa.

ante Itaiya wodi yewæmongacāimpa.

⁴¹ Itaiya wodi Itota nānō ñāō emōmāmo æbānō ingui, ante do ate bai ingaingā inte edæ Itota ingantedō ante māninō ante doyedē angacāimpa.

⁴² Ñōwo guiquēnē oodeoidi awēnēidi tæiyænāni Itota ingante pōnēnānimpa. Incæte Paditeoidi beyæ guīñēnāni inte, Mōnō odōmōincōnē go guiyōmōnite tōmēnāni mōnitō imōnite wīi tatodoncædānimpa, ante wææ cædinque tōmēnāni nē pōnēnāni incæ waodāni eñēñōnāni pæ wēenete tededāmaī inānimpa. ⁴³ Edæ mānināni, Waodāni mōnitō imōnite waa ate apænecædānimpa, ante nangui aīnente wædāni inōnānimpa. Adodāni, Wængongui mōnitō imōnite waa ate apænecæcāimpa, ante pōnōmenque aīnente wædāni inōnānimpa.

Itota nānō änō beyænque waodāni apænte wæccædānimpa

⁴⁴ Itota yedæ āninqe aa pecantapa. “Botō imote nē pōnengā iñōmō wīi botō adoboque imote pōnēnongā ingampa. Wæætē edæ botō imote nē da pōnongaingā ingante tōmengā adobaī pōnengā inongāimpa. ⁴⁵ Adocā botō imote nē acā iñōmō tōmengā botō imote nē da pōnongaingā ingante adobaī acā ingampa. ⁴⁶ Botō imote nē wede pōnēnāni iñōnāni adocanque incæ wēmō iñōmō wīi godōmenque ee ongoncæcāimpa, ante cædinque botō iñōmō ingui poga quēwēnāni weca ñāō bai inōmo inte pontabopa.”

⁴⁷ “Waocā botō änō eñēninqe wīi eñente cæcā ingā incæte botō tōmengā ingante apænte ānāmaī imopa. Edæ botō wīi ingui poga quēwēnāni inānite apænecæte ante pontabopa. Wæætē

ingui-poga quëwënäni inänite æmo beyænque quëwencæminimpa, ante pontabopa cæminii. ⁴⁸ Botö imote nê Baa angä iñömö tömengä botö änönö ante, Dicæ pönëmogaa, angä iñongante tömengä ingante nê apænte änö incæ edæ mæ ongompa. Ingui-poga iinque baquïönæ iñonte botö äninö incæ nê apænte anguingä bai ba iinque mäningä ingante, Bitö pante wæquinque Baa angabi-impä, ante bai apænete ingæimpä. ⁴⁹ Edæ botö wii nämanque pönëninque apænetabopa. Wæætë, Botö quïnö apænequïmoo, ante, Æbänö ante apænequïmoo, ante botö Mæmpo botö imote nê da pönongaingä iñömö tömengä botö imote wææ angä ëñëninque apænetabopa. ⁵⁰ Tömengä nänö wææ angainö ëñente cæbo beyænque mïnitö wantæpiyæ cöwë quëwencæminimpa, ante do ëñëmopa. Iinque botö Mæmpo botö imote nänö angainö ante botö adodö ante apænebopa,” ante Itota mäniñedë iinque apænegacäimpä.

13

Itota incæ tömengä ëmiñcænäni önöwa mënöwacä

¹ Patowa näni ämæ wantæyö bacæimpä, ante näni cæyedë Itota iñömö, Botö ingui-poga quëwente ëmö cæte botö Mæmpo weca ocæ ëmænte æi goquïönæ do bacæimpä, ante do ëñëngäimpä. Itota ingante pönënanäni nê ingui-poga quëwënäni iñönänite tömengä tömënäni inänite waadete pönëninque ñöwoyedë, Botö æbänö nanguï waadete pönëmo imoo, ante odömongäimpä.

² Gäwadecæ bayö Itota tömengä ëmiñcænäni tönö godongämæ cæñönäni wënæ awënë cæcä beyænque Timönö wengä Codaa Icadote iñömö, Itota ingante odömonte godoncæboimpä, ante pönengä inongäimpä. ³ Itota iñömö, Quincoomë ongoncoo incæ Wængonguï pönö cæcä beyænque botö tömancoo awënë badinque nämä tæi piñænte nê ämo imopa,

ante ëñëngäimpä. Ayæ edæ Wængonguï weca quëwente wææ pönimo inte botö Wængonguï weca ocæ ëmænte goquïmo imopa, ante do ëñëngäimpä. ⁴ Mäninö ante ëñëngä incæ tömengä iinque cænte ate ængæ gantidique yabæcoo gä tadongadique wadæ caaincoo æninque önoncadeyæ inö goti padengantapa. ⁵ Ayæ ate æpæ mënongaquintadë pe ñiñæninque tömengä ëmiñcænäni tömänäni önöwa mënöwadinque wadæ caaincoo goti padëincoo inte wadæ cæwacæ tæcæ cæcantapa.

⁶ Mänömaï cædinque tömengä Timönö Pegodo weca pongä adinque adocä iñömö tömengä ingante,

—Bitö botö Awënë imi incæte botö önöwa mënöwacæ pömitawo.

⁷ Ante añongä Itota wæætë,

—Ñöwoque botö æbänö cæboo, ante ëñënamäi imipa. Incæte ayæ ate ëñencæbiimpä.

⁸ Angä ëñëninque Pegodo,

—Botö önöwa cöwë mënöwadämäi incæbiimpä, ante Baa ämopa cæbii.

Ante añongä Itota godömenque,

—Botö bitö önöwa mënöwadämäi imo bai bitö wii botö quïmi imaimipa, ante angantapa.

⁹ Mäninö angä ëñëninque Timönö Pegodo wæætë,

—Awënë, Mänömaï i iinque bitö wii botö önöwaque mënöwaquïmi. Wæætë botö önömpo adobai mënompodique botö ocabo mënönca.

¹⁰ Ante añongä Itota wæætë,

—Æpæ nê äadingä iñömö tömengä baö ëñayö tömäñö waëmö impä. Iinque tömengä önöwaque nämanque mënöwacä inte eyepæ impä. Mïnitö do mimö mënongate waëmö entawënömini iminipa. Incæte wii tömämini waëmö entawëmïni iminipa, angantapa.

¹¹ Edæ, Æcänö botö imote nê odömonte godonguingä ingää, ante tömengä do ëñëngäimpä. Mänömaï beyæ tömengä, “Mïnitö wii tömämini do mënongate waëmö entawënömini iminipa,” angantapa.

12 Ayæ tōmēnāni ōnōwa iinque mēnōwadinque tōmengā yabæcoo wēñadinque tōmengā adodō gote tæ contadinque tōmēnāni inānite,

—Botō mǎnōmaī cædinque mīnitō beyæ ante quīnō cæboo, ante ēñēmīnitawo, ante ānīnque Itota godōmenque, 13 Mīnitō botō imote, Nē Odōmōmi imipa, ānīnque ayæ adobaī, Awēnē imipa, āmīni imīnīpa. Edæ botō mīnitō Awēnē inōmo inīnque mīnitō mǎnōmāinō ante nāwangā ante āmīnīpa. 14 Botō iñōmō mīnitō Awēnē inōmo inte nē mīnitō imīnite Odōmōmo imo incæ mīnitō ōnōwa do mēnōwabo amīnīpa. Inīnque botō mǎnōmaī mēnōwabo baī mīnitō adobaī wacā ōnōwa wacā ōnōwa mēnōwaquēnēmīni imīnīpa. 15 Botō cæbo baī mīnitō adobaī cæcæmīnīmpa, ante cædinque botō mīnitō beyæ ante cæbo aedāni. 16 Mīnitō imīnite nāwangā āmopa. Awēnē ñænængā inongā iñongante tōmengā ingante nē cæcā iñōmō wīi godōmenque ñænængā ingampa. Awēnē nē da godongā ñænængā iñongā tōmengā nānō nē da godōningā wæætē wīi godōmenque ñænængā ingampa. 17 Mīnitō ñōwo mǎnīnō ante ēñēnīmīni inte edæ ado ante cæmīni inīnque mīni toquinque bacæimpa, ante Itota apænecantapa.

18 Ayæ apænedīnque, “Botō wīi tōmāmīni beyæ antabopa. Botō apænte ænīnāni ædānidō inānīi, ante botō nē ēñēmo imopa. Wængonguī angā ēñente nāni yewæmongainō baī iinque bacæimpa, ante iīmaī bacæ cæpa. ‘Botō tōnō godongāmæ nē cængongā iñōmō botō imote nē pīinte cæcā bacantapa.’ 19 Mǎnōmaī ba adīnque edæ mīnitō botō imotedō ante apænedīnque, Tōmengā mōnō Codito inongā ingampa, ante pōnencæmīnīmpa, ante cædinque botō ñōwo ayæ badāmaī iñedē mīnitō imīnite āmopa. 20 Mīnitō imīnite nāwangā āmopa. Æcāmenque botō nē da godongaingā ingante æna tōmengā iñōmō edæ botō imote adobaī ængā ingampa. Ayæ æcāmenque botō imote æna tōmengā iñōmō botō

imote nē da pōnongaingā ingante ængā ingampa cæmīnīi,” ante Itota apænegacāimpa.

Itota ingante Codaa nē godonguingā ingampa, ante

(Māateo 26.20-25; Māadoco 14.17-21; Odoca 22.21-23)

21 Mǎnīnō angā ate Itota iñōmō tōmengā nānō wæwēmāmo entawēnīnque wæcā inte, Nāwangā ante apænebo ēñēedāni. Mīni cabo incæ adocanque, Æncædānīmpa, ante botō imote odōmonte pædæ godonguingā ingampa.

22 Ante apænecā wædinque tōmengā emīñænāni, Æcānō ingante apænecāā, ante ēñēnāmaī inte godongāmæ wacā ingā wacā ingā adānitapa. 23 Itota emīñænāni adocanque iñōmō Itota nānō nē waadete pōnengaingā inongāimpa. Tōmengā iñōmō Itota tōnō āāñōmonque tæ contate ongōnāimpa. 24 Timōnō Pegodo iñōmō iingā ingante omō omō cædinque angampa. Bitō Itota ingante, Æcānō ingāā, ante āmi angā ēñente ate apænebi ēñēmōnie.

25 Angā ēñēnīnque māningā Itota tōnō āāñōmonque nē tæ contacā iñōmō,

—Awēnē, æcānō ingāā, ante apænebi ēñēmōnie, ante tōmengā ingante āñongā.

26 Itota wæætē,

—Botō iī pāo owætaca mīi cæte godōmo nē ænguingā iñōmō tōmengā nē cæquingā ingampa.

Ayæ pāo owætaca mīi cædinque Timōnō wē Codaa Icadīote ingante godongantapa. 27 Codaa pāo ængā ate Tatāna iñōmō tōmengāā do guīgacāimpa. Inīnque tōmengā ingante,

—Bitō quīnō cæcæ cæbīi edæ quingæ cæe, ante Itota angantapa.

28 Wadāni adoyōmō nē cænāni iñōmō, Itota quīnante mǎnīnō ante tōmengā ingante angāā, ante ēñēnāmaī inōnānīpa. 29 Edæ Codaa tōmēnāni da wente æīnta næænongā ingā beyæ tōmēnāni pancadāniya, Ææmæ beyæ ante mōnō cænguī wīi eyepæ ēamōni inīnque, Bitō godonte æncæbīimpa, ante Itota

angampa, ante pönönänimpa. Adobai ömæpodäni inänite, Godömi ænguänänimpa, ante Itota angampa, ante pönönänimpa.

³⁰ Codaa päö ænte ate tao gogacäimpa. Do woyowotæ inönimpa.

Itota nänö wææ änönö ante ñöwo angampa

³¹ Codaa dæ gocä adinque Itota, —Botö Waobo eñagäimo inte æbänö ñäö apäite emönömo imoo, ante ñöwo edonque bacæimpa. Botö cæquönö beyæ Wængongui æbänö ñäö apäite emongä ingää, ante edonque bacæimpa. ³² Ayæ botö cæquönö beyæ Wængongui ñäö apäite nänö emönö edonque ba ininque Wængongui cæcä ate botö ñäö apäite botö emönö adobai edonque bacæimpa. Ayæ mänömai Wængongui wantæyö cæcæcäimpa. ³³ Botö wëmini botö minitö weca wantæyö quëwëninque gobopa. Minitö botö imote ante diqui diqui minguimini iminipa. Ayæ oodeoidi inänite botö angainö bai ñöwo minitö iminite adodö amopa. Botö goquiñömö ante minitö ædö cæte ponguimini iminii. ³⁴ Botö wææ änönö ante ñöwo minitö iminite amopa. Wacä ingä wacä ingä waadete pönencæminimpa. Botö minitö iminite waadete pönönömo bai minitö adobai wacä ingä wacä ingä waadete pönenguënëmini iminipa. ³⁵ Minitö wacä ingä wacä ingä waadete pönëmini adinque wadäni tömänäni, Minitö Itota nänö nē emiñæmini iminipa, ante eñencædänimpa, ante Itota apænegacäimpa.

Pegodo incæ, Dicæ abogaa, anguingä ingampa, ante

(Mäateo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante, —Awënë, ædömë gobii.

Ante añongä Itota wæætë,

—Botö goquiñömö ante bitö ædö cæte botö imote ñöwo tee empo ponguimi imii. Ayæ ate guiquënë bitö botö imote tee empo ponguimi incæbiimpa, angantapa.

³⁷ Pegodo godömenque,

—Awënë, äninque, Botö quinante bitö imite ñöwo tee empo godämai imoo, ante wæcampa. Botö Ao äninque bitö beyæ ante nämä wænguimo imopa.

³⁸ Ante añongä Itota wæætë,

—Bitö Ao äninque botö beyæ ante näwangä wænguimi imiyaa. Bitö imite näwangä ante apænebo eñëe. Tawadiya pedämai iñonte bitö iñömö botö imotedö, Dicæ abogaa, ante mempoga go adopoque anguimi imipa, ante apænegacäimpa.

14

Mæmpo weca mönö godö ante Itota taadö bai ingampa

¹ Itota tömengä emiñænäni inänite, “Mimönë guiñente wædämai iedäni. Wæætë Wængongui ingante wede pönëedäni, angantapa. Ayæ adobai botö imote wede pönëedäni. ² Botö Mæmpo nänö quëwëñömö onconcoo bacoo pönï mæ ongompa. Mänömai impa, ante wii näwangä i bai botö minitö iminite ancædömoimpa. Minitö beyæ ante botö, Mini ponte quëwengui onconcoo ante tömää ædæmö badoncæte ante manñömö gocæboimpa. ³ Ayæ minitö quëwengui onconcoo tömää ædæmö mænoncæte ante gobo ininque botö ocæ emænte poncæboimpa. Pöninque minitö botö quëwëñömö adoyömö botö tönö godongämæ quëwencæminimpa, ante botö minitö iminite ænte mæibo æicæminimpa. ⁴ Botö goquiñömö æyömönö i, ante ayæ manñömö gocæte ante taadö godö ante minitö do eñëminipa,” ante Itota apænecantapa.

⁵ Apænecä eñëninque Tömato iñömö tömengä ingante,

—Awënë, Ædömë goquimii, ante mönitö eñënamai imöni inte mönitö mäninö bitö goquönö ædönö i, ante taadö ædö cæte eñenguimöni.

⁶ Añongä Itota wæætë,

—Botö iñömö tömëmo nē taadömo bai inömo imopa. Ayæ botö adobo nē näwangä änö bai inömo bai iñömote minitö æbänö näwangä impa, ante

ēñguimīni imīnīpa. Botō edæ nē Quēwēmo inte pōnō cæbo beyænque mīnitō quēwenguimīni imīnīpa. Botō wīi pōnō cæbo bai waocā æcāmenque incæ botō Mæmpocā weca godāmaī incædongāimpa. ⁷ Botō imote do ate pōnēmīni inique mīnitō botō Mæmpo ingante adobai ate pōnēmīni imāimīnīpa. Nōwo tōmengā ingante tæcæ ate bai pōnēmīni inte mīnitō tōmengā ingante cōwē nē agaīmīni incāmīnīpa, ante apænecantapa.

⁸ Mānīnō apænecā ēñēnīque Pedipe iñōmō,

—Awēnē, Mæmpocā ingante odōmōmi amōnie. Mānīque adīque idæwaa. Eyepæ impa.

⁹ Añongā Itota wæætē,

—Pedipe ēñēmi. Botō mīnitō weca wantæpiyæ quēwēmo incæ bitō ayæ botō imote adāmaī inte bai pōnēnāmaī imītawo. Nē botō imote acā iñōmō tōmengā adobai Mæmpocā ingante nē acā ingampa. Inique bitō iñōmō, Mæmpocā ingante odōmōmi amōnie, ante ædō cæte botō imote āmīi. ¹⁰ Wæmpocā nempo botō nē quēwēmo imopa, ante ayæ, Wæmpocā ingante botō entawēmo imopa, ante bitō pōnēnāmaī imītawo. Botō mīnitō imīnite, Æbānō apæneboo, ante wīi nāmanque pōnēnīque apænebopa. Wæætē botō Wæmpocā incæ botō tōnō nē āawocaque bai quēwēnongā inte edæ tōmengā nānō cædō ante nē cæcā ingampa. ¹¹ Tōmengā nempo quēwēmo imopa, ante ayæ, Tōmengā ingante botō entawēmo imopa, ante mīnitō imīnite apænebo ēñēnīque pōnēdāni. Wæætē edæ mīnitō botō ānō beyænque ayæ pōnēnāmaī imīni incæte botō bamōnengæ nangūi cædinō adīque mānīnō beyænque pōnēdāni. ¹² Mīnitō imīnite nāwangā āmopa. Botō imote nē wede pōnengā iñōmō tōmengā botō cæbai adobai cæcæcāimpa. Ayæ botō Mæmpocā weca ocæ emænte gobo beyæ nē wede pōnengā iñōmō edæ wīi ōnonque botō cæbai cædinque godōmenque cæquingā ingampa. ¹³ Mīnitō botō

ēmōwo ante apænedīque quēmē æncæte ante apænēmīni ēñēnīque botō Wængongūi Wēmo inōmo inte edæ, Mæmpocā nānō ñāō emōmāmo edonque pōnī acædānīpa, ante cædinque mīnitō ānō bai edæ do cæcæboimpa. ¹⁴ Mīnitō, Ænguimōni, ante quēmē beyæ ante botō emōwo ante botō imo apænēmīni ēñēnīque do cæcæboimpa, ante Itota apænecāimpa.

Wængongūi Tæiyæ Waēmō Ōnōwoca poncæcāimpa, ante

¹⁵ Ayæ godōmenque apænedīque Itota iīmaī ante apænecantapa. “Mīnitō botō imote waadete pōnēmīni inique botō wææ angainō ante ēñente cæquimīni imāimīnīpa. ¹⁶ Ayæ, Wacā botō beyæ ante mīnitō tōnō godongāmæ cæquingā, ante botō iñōmō botō Mæmpocā ingante, Da godōmi gocæ, ante apænecæboimpa. Ayæ tōmengā botō ānō ante do ēñente cædinque edæ, Tōmengā mīnitō tōnō cōwē ongonte godongāmæ cæcæcāimpa, ante cædinque adocā ingante mīnitō weca da pōnongā ponguingā ingampa. ¹⁷ Wængongūi nē nō cæcā ingampa, ante nāwangā impa, ante Wængongūi Tæiyæ Waēmō Ōnōwoca incæ nē odōmongā inongā ingampa. Incæte waodāni nē inguipogaque quēwēnāni iñōmō tōmengā ingante adāmaī ināni inte pōnēnāmaī inōnāni inte edæ ædō cæte tōmengā ingante Ao ante ænguīnāni. Wæætē edæ tōmengā mīnitō weca quēwēnongā iñongante mīnitō tōmengā ingante nē entawenguimīni inte tōmengā ingante do ate bai pōnēmīni imīnīpa,” ante Itota apænecantapa.

¹⁸ Ayæ apænedīque, “Botō wīi mīnitō nōwamīni bai mīni baquinque ante edæ emō cæte goquīmo imopa. Wæætē mīnitō weca ocæ emænte poncæboimpa. ¹⁹ Wantæ ate waodāni nē inguipogaque quēwēnāni iñōmō edæ botō imote adāmaī inguīnāni inānīpa. Mīnitō guiquēnē botō imote aquīmīni imīnīpa. Edæ botō quēwēmo beyænque

mīnitō adobaī quēwencæminimpa.
²⁰ Ayæ Wængonguī Tæiyæ Waëmō
 Ōnōwoca nānō ponguīōnæ iñonte
 mīnitō iñōmō edæ, Mōnō æbānō
 āanque bai quēwēmō imōō, ante
 ēñencæminimpa. Edæ, Botō Mæmpocā
 nempo quēwēmo imopa, ante ayæ
 edæ, Mīnitō botō nempo quēwēmini
 iminipa, ante ayæ, Mīnitō iminite
 adobaī botō entawēmo quēwēnōmini
 iminipa, ante mīnitō ēñencæminimpa.

²¹ Æcānō botō wææ angainō ō
 æninque ēñente cæda tōmengā iñōmō
 botō imote nē waadete pōnengā
 ingampa. Botō imote nē waadete
 pōnengā ingante botō Mæmpo
 nāemæ waadete pōnencæcāimpa.
 Ayæ botō adobaī māningā ingante
 waadete pōnencæboimpa. Ayæ, Botō
 æbānō imoo, ante tōmengā ingante
 odōmōmo acæcāimpa,” ante Itota
 apænecantapa.

²² Codaa iñōmō edæ wīi Codaa Ica-
 diote wacā Codaa iñōmō edæ Itota
 ingante apænecantapa.

—Awēnē iñæmpa bitō mōnitō
 imōnite apænedinque, Botō æbānō
 imoo, ante odōmōmo acæminimpa,
 āninque quīnante wæætē, In-
 guipogaque quēwēnāni inānite
 odōmōnāmaī incæboimpa, ante
 pōnēninque cæbitawo, angantapa.

²³ Itota wæætē,

—Waocā botō imote nē waadete
 pōnengā ininque tōmengā iñōmō botō
 odōmonte apænedō ante ēñente
 cædongā imaingampa. Botō Mæmpo
 adocā ingante waadete pōnenguingā
 ingampa. Ayæ mōnatō tōmengā tōnō
 cōwē godongāmæ quēwencæte ante
 tōmengā weca ponguīmōna imōnāpa.

²⁴ Botō imote nē waadete pōnēnāmaī
 ingā guiquēnē tōmengā iñōmō botō
 odōmonte apænedōnō ante ēñēnāmaī
 cædongā ingampa. Mānīnō botō
 odōmonte apænebo mīni ēñēnīnō
 iñōmō wīi botō nāmā pōnēninque
 apænedīnō impa. Wæætē botō imote
 nē da pōnongaingā nānō angainō
 impa, ante Itota apænecantapa.

²⁵ Ayæ apænedinque, “Mīnitō
 weca botō quēwēñedē botō mānīnō

ante mīnitō iminite apænetabopa.
²⁶ Botō Mæmpocā botō emōwo
 beyæ ante tōmengā Tæiyæ Waëmō
 Ōnōwoca ingante da pōnongā pongu-
 ingā inte tōmengā mīnitō tōnō
 godongāmæ nē cædongā ingampa.
 Adocā mīnitō iminite tōmānō ante
 odōmonte apænecā ēñencæminimpa.
 Ayæ botō apænedō mīni ēñēnīnō
 tōmānō ante tōmengā adodō apænecā
 wæætē pōnencæminimpa,” ante Itota
 apænecantapa.

²⁷ Ayæ apænedinque, “Botō
 pōnō cæbo beyænque mīnitō gānē
 entawente quēwēedāni, ante pōnō
 cædinque gobopa. Botō gānē
 entawēmāmo incæ mīnitō iminite
 pōnōmo æninque mīnitō gānē pōnente
 quēwencæminimpa. Botō ingui-
 pogaque quēwēnāni nāni godōnō
 bai wīi pōnōmo imopa. Nō cæte
 pōnōmo imopa. Mīnitō mīmōnē
 guīñente wædāmaī inte piyænē cæte
 quēwencæminimpa. ²⁸ Botō mīnitō
 iminite emō cæte godinque mīnitō
 weca ocæ emænte poncæboimpa, ante
 botō apænebo ēñēmīnitapa. Botō edæ,
 Botō Mæmpocā weca gocæboimpa,
 ante apænebo ēñēnīmīni inte mīnitō
 botō imote waadete pōnēmīni ininque
 botō beyæ ante watapæ tobaimīnīpa.
 Edæ botō wīi botō Mæmpo bai
 inōmo inte wædāmo inōmo imopa.

²⁹ Mānōmaī inque ba adinque mīnitō,
 Nāwangā impa, ante pōnencæminimpa,
 ante botō ñōwoque ayæ badāmaī iñedē
 mīnitō iminite apænetabopa,” ante
 Itota apænecantapa.

³⁰ Ayæ apænedinque, “Ii ingui-
 pogaque quēwēnāni awēnē iñōmō
 wēnæ inongā inte oo poncæ cæcampa.
 Ininque botō mīnitō iminite wīi
 wantæpiyæ ayæ apænebopa. Edæ
 tōmengā ædō cæte botō imote nāmā
 tæi piñænte nē angā inguingāā.

³¹ Incæte botō, Waodāni ingui-
 pogaque quēwēnāni iñōmō iīmaī
 ante ēñencædānimpa, ante cæbopa.
 Botō Mæmpo ingante botō waadete
 pōnēmopa, ante ayæ, Botō Mæmpo
 botō imo wææ angā bai botō
 adodō cæbo imopa, ante tōmēnāni

ēñgüenēnāni inānīpa,” ante Itota inque apænecāimpa.

Ayæ, “Ñowo edæ ængæ gantid-inque mōnō gocæimpa,” angacāimpa.

15

Itota nāwā yowementa bai ingampa

¹ Ayæ godōmenque apænedinque Itota iīmaī apænecantapa. “Botō nāwā yowementa bai imopa. Ayæ botō Mæmpo yowementa nē aacā bai ingampa. ² Botō imote pōnēnāni tōmānāni iī yowementa gædēmænto bai inānīpa. Æcānō wīi botō ēmiñængā bai cæda tōmengā iñōmō gædēmænto omæcato bai ingampa. Botō Mæmpo gædēmænto omæcato bai iñongante wangō topænte bai cædinque tōmengā ingante wido cæcampa. Æcānō botō ēmiñængā bai cæda guiquēnē tōmengā gædēmænto tōmenca incato bai ingampa. Gædēmænto tōmenca incato incæ godōmenque waa pædinque nanguī incacæimpa, ante wææ topæ wææ topæ cædāni bai botō Mæmpo iñōmō adobai cæcampa. Botō nē ēmiñængā wīi eyepæ cæcā adinque tōmengā ingante wadæ cæcampa. ³ Botō änō ante mīnitō imīnite botō apænedinō beyæ mīnitō mīmōnē do mēnongate quēwēmīni imīnīpa. ⁴ Mīnitō botō nempo ee quēwēnōmīni incæmīnīpa. Ayæ adobai mīnitō botō imote cōwē entawente quēwēnōmīni imīnīpa. Gædēmænto yowementa adoyōmō ibænte odæ yate bai pæte incate bapa. Edæ gædēmænto adotoque iñonte ædō cæte nāmā cædinque incaquintoo. Mīnitō iñōmō, Tōmenca incate bai mōnō nanguī cæcæimpa, ante cædinque botō nempo ee quēwēngüenēmīni imīnīpa,” ante Itota apænecantapa.

⁵ Ayæ apænedinque, “Botō yowementa bai imopa. Mīnitō guiquēnē gædēmænto bai imīnīpa. Waocā botō nempo ee quēwēnongā inte ayæ botō imote cōwē entawēnongā ingā inique tōmengā tōmenca incate bai nanguī cæbaingampa. Wæætē edæ

botō nempo quēwēnāmaī imīni inique mīnitō tōmāā cædāmaī imāimīnīpa tōō.

⁶ Nē botō nempo ee quēwēnāmaī ingā iñōmō tōmengā gædēmænto nāni wido cædinto bai ingampa. Māninto amīmō bayonte gæte māmō gongapamō ñō cædāni wo bæco bai cædinque tōmengā ingante botō Mæmpo adobai wido cæcā ingampa,” ante Itota apænecantapa.

⁷ Ayæ apænedinque, “Mīnitō guiquēnē botō nempo ee quēwēninque botō angainō ante ee entawente quēwēmīni inique mīnitō quiēmē æncæte ante äinēmīni incæ Wængonguī ingante apænēmīni inte tōmengā wæætē pōnongā æmaimīnīpa. ⁸ Mīnitō nanguī pōni tōmenca incate bai imīni inte, Mīnitō botō ēmiñæmīni imīnīpa, ante edonque pōni ingæimpa. Mānōmaī cæmīni inique, Botō Mæmpo ñāō apæite emōnongā ingampa, ante odōmonte ingæimpa. ⁹ Botō Mæmpo iñōmō botō imo waadete pōnengā ingaingā bai botō adobai mīnitō imīnite waadete pōnēmo intabopa. Botō nē waadete pōnēmo iñōmote mīnitō iñōmō botō nempo ee ongōedāni. ¹⁰ Botō Mæmpo nē waadecā iñongante botō tōmengā nānō wææ angainō ante ēñente cædīmo inte tōmengā nempo ee ongōmopa. Mīnitō adobai botō nē waadete pōnēmo iñōmote mīnitō botō wææ angainō ante ēñente cæmīni inique edæ botō nempo ee ongōmīni imāimīnīpa,” ante Itota apænecantapa.

¹¹ Ayæ apænedinque, “Botō watapæ topāmo ante mīnitō mīmōnē entawēninque watapæ tocæmīnīpa, ante ayæ, Mīni watapæ topāmo eyepæ ingæimpa, ante botō mīnitō imīnite mānīnō ante apænetabopa.

¹² Botō wææ änō iñōmō iīmaī ante impa. Mīnitō imīnite botō waadete pōnēnīnō bai mīnitō adobai wacā ingā wacā ingā waadete pōnēedāni.

¹³ Æcānō nānō æmigoidi beyæ ante, Botō Ao ānīque nāmā incæ tōmēnāni beyæ ante wænguīmo, ante cæcā iñōmō tōmengā nānō waadete pōnēmāmo wīi waodāni tōmānāni

waadete pönemämo bai impa. Tömengä iñömö edæ godömenque nangui waadete pönengä ingampa. ¹⁴ Minitö botö wææ angainö eñente cæmini inique botö guidëmini imaiminipa. ¹⁵ Minitö botö imo nê cædömini iminipa, ante botö minitö iminite godömenque apænedämaï imopa. Edæ awënë ingante nê cæcä iñömö, Awënë æbänö cæcää, ante eñënämaingä ingampa. Wæætë edæ botö Mæmpo nänö angainö ante botö eñëninö tömänö ante minitö iminite apænebo eñëmini beyæ botö, Minitö botö guidëmini iminipa, ante apænedimo imopa. ¹⁶ Minitö wii botö imote apænte ænimini iminipa. Wæætë botö iñömö, Minitö botö emiñæmini inömini inte tömenca nangui incate bai nangui cæcæminimipa, ante minitö iminite apænte ænimo imopa. Minitö botö emiñæmini inömini inte cöwë cæmini inique minitö quiëmë ante botö emöwo beyænque apænemini eñëninque Mæmpocä iñömö do pönongä æncæminimipa. ¹⁷ Botö wææ änö iñömö iïmaï ante impa. Minitö wacä ingä wacä ingä waadete pönëedäni,” ante Itota apænegacäimpa.

*Inguipogaque nê quëwënäni Ito-
taidi inänite nani pümmämo*

¹⁸ Mänömainö ante apænedinque Itota godömenque iïmaï ante apænecantapa. “Inguipogaque nê quëwënäni iñömö minitö iminite pünnäni adinque minitö guiñënämaï inte edæ, Itota ingante do püingadänimipa, ante pönëmini iminipa. ¹⁹ Waodäni nê inguipogaque quëwënäni nani cabo wacä ingä wacä ingä waadete pönënäni inänipa. Minitö inguipogaque nani quëwencabo tönö adömini imini bai tömënäni minitö iminite adobai waadete pönencædönänimipa. Wæætë minitö inguipoga nani quëwencabo tönö adömini inämaï iminipa. Iñæmpa wëenënedë minitö inguipoga quëwëñöminite botö do minitö iminite apænte æntabopa. Mänömaï beyæ nê inguipogaque quëwënäni iñömö minitö iminite pünnäni inänipa.

²⁰ Botö änö ante minitö iminite, Æbänö apæneboo, ante ñöwo wæætë pönëedäni. ‘Awënë ñænængä inongä iñongante tömengä ingante nê cæcä iñömö wii godömenque ñænængä ingampa.’ Waodäni botö imote pünnäni wæwëmo bai minitö iminite adobai pünnäni wæwëmini incæminimipa. Botö odömonte apænegainö ante eñente cædäni bai minitö odömonte apænedö ante adobai eñente cæcædänimipa. ²¹ Minitö botö quimini iñöminite edæ botö emöwo beyænque iünäni, Botö imote nê da pönongaingä, Æbänö ingää, ante eñënämaï inäni inte mänömaï edæ cæquinäni inänipa,” ante Itota apænecantapa.

²² Ayæ apænedinque, “Botö tömënäni inänite wii ponte apænebo bai tömënäni nani wentamö mongænguimämo mongænämaï incædönänimipa. Nöwo iñömö, Botö apænebo nê eñëninäni inte tömënäni nani wentamö mongæmämo do mongænänipa. Iñæmpa Itota apænegä eñënämaï imönipa, ante ædö cæte anguünäni. ²³ Botö imote nê püingä iñömö tömengä adobai botö Mæmpocä ingante püingä ingampa. ²⁴ Wacä, Botö bamönengæ botö cæbai adobai cæcä iñömö cöwë dæ angampa. Inique botö wii tömënäni weca bamönengæ cæbo bai tömënäni nani wentamö mongænguimämo mongænämaï incædönänimipa. Incæte, Botö æbänö cæboo, ante do adäni incæ tömënäni botö imote püinque botö Mæmpo ingante adobai pünnänitapa. ²⁵ Dodäni nani wææ yewæmongaintaa yewæmöninque iïmaï ante nani apænegainö bai ñöwodäni nani cædö beyæ edæ inque batimipa. ‘Botö imote önonque pünnänitapa,’ ante yewæmongadänimipa,” ante Itota apænecantapa.

²⁶ Ayæ apænedinque, “Botö edæ botö Mæmpo weca ocæ emænte gote ate minitö beyæ ante minitö tönö godongämæ cæquingä ingante da pönoncæboimipa. Mäningä iñömö Wængongui Tæiyæ Waëmö Önöwoca inongä inte edæ, Æbänö näwangä

i, ante apæ necä eñ encæ minimpa. Tömengä botö Mæmpo weca quëwente ponguingä ingampa. Pöningue tömengä, Botö æbänö cæboo, ante apæ necä eñ encæ minimpa. ²⁷ Minitö adobai wëenëñedë botö mä cæyedë do botö miñæ godimini imini inte edæ, Botö æbänö cæboo, ante apæ nequënëmini iminipa,” ante Itota tömengä nänö në emiñænani inänite apæ negacäimpa.

16

¹ Godömenque apæ nedinque Itota iimaï apæ necantapa. “Minitö oda cädämaï tæi gongænte on-goncæ minimpa, ante cædinque botö minitö iminite mäninö ante tömänö apæ netabopa. ² Minitö odömöincönë go guiyöminite wadäni, Mönitö tönö godongämæ ongönämaï iedäni, ante minitö iminite tatodönäni gocæ minimpa. Wii mäninonque cæquinänimpa. Wæætë iincayæ ate æcämenque minitö iminite në wæ nonguina ina iñömö tömengä, Botö Wængongui nänö cædo ante cæbopa, ante pönencæcäimpa. ³ Botö Mæmpo ingante wii adinque pönänämaï inäni inte ayæ botö imote adämaï inte bai pönänämaï inäni iñömö tömënäni iñömö minitö iminite mäninö cæquinäni inänipa. ⁴ Edæ mäniönæ bayonte minitö, Botö wææ angainö ante æbänö ämoo, ante wæætë pönencæ minimpa, ante botö minitö iminite mäninö ante do apæ netabopa,” ante Itota apæ negacäimpa.

Wængongui Tæiyæ Waëmö Önöwoca nänö cædo

Ayæ godömenque apæ nedinque Itota iimaï apæ necantapa. “Minitö tönö wëenëñedë godongämæ ongömo beyæ botö mäninö ante mäniñedë apæ nedämaï intabopa. ⁵ Botö imo në da pönongaingä weca botö ñowo pönï ocæ emænte goquimo incæte, Bitö æyömönö goquimi, ante minitö tömämini botö imote änämaï iminipa. ⁶ Botö mäninö ämo beyæ minitö nanguï pönï wæwëmini iminipa.

⁷ Incæte botö minitö iminite näwangä ämopa. Minitö beyæ waa ingæimpa, ante botö goquimo imopa. Botö wadæ godämaï imo bai minitö tönö godongämæ në cæquingä iñömö minitö weca pönämaï incædongäimpa. Wæætë edæ cöwë goquimo inte godinque botö tömengä ingante minitö weca da pönömo ponguingä ingampa. ⁸ Pöningue Wængongui Tæiyæ Waëmö Önöwoca cæcä beyænque inguipogaque quëwënäni, Mönö wënæ wënæ cædömö inte wentamö mongæmö awædo, ante wæcædänimpa. Ayæ tömengä cæcä beyænque, Wængongui weca æcänö nö cæte quëwëna ina, ante eñ encædänimpa. Ayæ Wængongui apænte ante pancæcäimpa, ante adobai eñ encædänimpa. ⁹ Edæ botö imote nani pönänämaï inö beyænque inguipogaque quëwënäni iñömö edæ, Mönö wënæ wënæ cædonque ante cædinque pönänämaï imopa, ante wæcædänimpa, ante adocä cæcæcäimpa. ¹⁰ Ayæ edæ, Botö iñömö botö Mæmpo weca gote quëwëñömote minitö botö imote adämaï inguimini iminipa. Inique botö Mæmpo weca gote quëwëmo beyæ Wængongui Tæiyæ Waëmö Önöwoca incæ, Æbänö nö cæte quëwenguï, ante inguipogaque quëwënäni inänite odömönte apæ necä eñ encædänimpa. ¹¹ Ayæ inguipogaque quëwënäni awënë iñongante wënæ ingante Wængongui, Botö pancæboimpa, ante do apænte angacäimpa, ante Wængongui Tæiyæ Waëmö Önöwoca godö odömönte apæ necä beyænque eñ encædänimpa,” ante Itota apæ necantapa.

¹² Ayæ apæ nedinque, “Botö minitö iminite nanguï ayæ apæ neinente wæbo incæte minitö ñowo ganca ædo cæte eñ enguimini. ¹³ Wængongui Tæiyæ Waëmö Önöwoca pongä ate tömengä iñömö, Æbänö näwangä impa, ante tömänö ante minitö iminite odömönte apæ necä eñ encæ minimpa. Adocä, Æbänö apæ nequimoo, ante wii nämä pönëninque apæ necæcäimpa.

Wæætē Wængonguī tōmengā ingante angā nānō ēñēnīnō ante Wængonguī Ōnōwoca iñōmō mānīnonque ante mīnitō imīnite odōmonte apæ necā ēñencæminimpa. Ayæ, Īncayæ ate æbānō baquīi, ante tōmengā mīnitō imīnite apæ necā ēñencæminimpa. ¹⁴ Botō æbānō ñāō apāite ēmōnōmo imopa, ante edonque pōnī bacæimpa, ante cædinque tōmengā iñōmō botō entawēnō ante mīnitō imīnite odōmonte apæ necā ēñencæminimpa. ¹⁵ Botō Mæmpo nānō ēadoncoo iñōmō edæ tōmancoo botō quincōo impa. Mānōmaī beyæ iīmaī apænetabopa. Tōmēmo entawencōo ante Wængonguī Ōnōwoca iñōmō mīnitō imīnite odōmonte apæ necā ēñencæminimpa, ante apænetabopa,” angantapa.

¹⁶ “Ayæ wantæ ate mīnitō botō imote adāmaī inguīmīni imīnīpa. Ayæ ate wantæyō iñonte botō imote wæætē acæminimpa,” ante Itota apænegacæimpa.

Mīni wæwēmāmo incæ wæætē mīni toquinque bacæimpa

¹⁷ Tōmengā ēmīñænāni pancadāniya nāmanque godongāmæ apænedinque,

—Mānīnō ānīnque tōmengā, Mīnitō wantæ ate botō imote adāmaī inguīmīni imīnīpa, ante æbānō ancæte ante apæ necāā, ante wædānitapa. Ayæ, Wantæ iñonte mīnitō botō imote wæætē acæminimpa, ante ayæ, Botō Mæmpo weca gote quēwēmo beyæ impa, ante Itota apæ necā awædō, ante apænedānitapa. ¹⁸ Tōmēnāni wæætē wæætē, Mānīnō tōmengā, Wantæyō, ante nānō ānō iñōmō edæ æbānō ante apæ necāā, ante wædānitapa. Tōmengā æbānō ancæte ante apæ necāā, ante ēñēnāmaī imōnīpa, ante wædānitapa.

¹⁹ Tōmēnāni mānīnō ante pōnēnīnque botō imote ēñencæte ante ānēnāni inānīpa, ante wædinque Itota tōmēnāni inānīte,

—Wantæ ate mīnitō botō imote adāmaī inguīmīni imīnīpa, ante botō ānō ante ayæ, Wantæyō iñonte mīnitō

botō imote wæætē acæminimpa, ante botō æbānō āmoo, ante mīnitō nāmanque godongāmæ tedemīnitawo. ²⁰ Mīnitō imīnite nāwangā āmopa. Inguipogaque quēwēnāni iñōmō watapæ toyōnāni mīnitō caate wæquīmīni inte Ca ca wæcæminimpa. Mīnitō wæwenguīmīni imīnīpa. Incæte mīni wæwēmāmo incæ mīni toquinque bacæimpa. ²¹ Onquiyængā iñōmō tōmengā wēñæ ēñacæ cæyedē nanguī nantate wæcā inte wæwengā bacā incæte tōmengā wēñæ ēñacā adīnque tōmengā, Botō wē ēñacā ingampa, ante watapæ tote beyæ tōmengā nānō wædinō ante edæ pōnēnāmaī ingampa. ²² Mīnitō tōmengā baī adobaī imīnīpa. Ñōwoyedē mīni caate wæyedē impa. Incæte botō wæætē mīnitō imīnite aquīmo imopa. Mānōmaī beyæ mīnitō watapæ tocæminimpa. Māniñedē, Mīnitō todāmaī incæminimpa, ante æcāmenque incæ wææ cædāmaī incæcæimpa.

²³ Godōmenque apænedinque Itota, “Māniñedē mīnitō botō imote, Æbānō ī, ante ēñencæte ante godōmenque ānāmaī incæminimpa. Mīnitō imīnite nāwangā āmopa. Botō Mæmpo ingante mīnitō quīēmē æncæte ante botō ēmōwo ante apæneyōmīni tōmengā iñōmō do pōnongā æncæminimpa.

²⁴ Ñōwo ganca mīnitō quīēmē æncæte ante botō ēmōwo ante apænedāmaī inīmīni imīnīpa. Ñōwo iñōmō edæ, Pōnōmi æmōnie, ante Wængonguī ingante apæneedāni. Apænemīni ēñēnīnque tōmengā pōnongā ānīnque mīnitō eyepæ pōnī mīni watapæ toquinque ænguīmīni incæminimpa,” ante Itota apænegacæimpa.

Itota nē tæi ēmōnongā ingampa

²⁵ Mānōmainō ante apænedinque Itota iīmaī apæ necantapa. “Mīnitō imīnite inguipoga quēwēnāni nāni cæbānō ante odōmonte apænedīmo incæte botō wantæyō baquīōnæ īnque bayonte mānōmainō ante godōmenque odōmonte apænedāmaī incæboimpa. Wæætē botō tōmēmo

Mæmpo ingantedö ante apænedinque minitö iminite edonque pöni apæneceba
²⁶ Mäniönæ minitö botö Mæmpo ingante botö emöwo beyænque apænequimini iminipa. İinque botö, Minitö beyæ ante botö Mæmpo ingante apænequimo imopa, ante mänömaï beyæ botö änämaï imopa.
²⁷ Edæ botö Mæmpo incæ minitö iminite waadete pönengä ingampa. Botö imo waadete pönëninque minitö inömo edæ, Wængongui weca quëwëninque Itota pongaingä ingampa, ante pönënimini beyæ botö Mæmpo adobaï minitö iminite waadete pönengä ingampa. ²⁸ Botö edæ Mæmpocä weca quëwente inguipoga inömo pönimo inte nöwo pöni inguipoga quëwëninque wadæ godinque Mæmpocä weca ocæ emænte goquimo imopa,” ante Itota apænecantapa.

²⁹ Tömengä emiñænäni,

—Nöwo inguipoga quëwënäni nani cæbainö ante odömonte apænedämaï inte bitö edonque pöni apænebi eñëmönipa. ³⁰ Bitö tömänö ante eñëmi imipa, ante nöwo eñëmönipa. İinque mönitö, Æbänö i, ante eñencæte ante bitö imite änämaï inömöni bitö inömo do nê eñëmi imipa. Mänömaï beyæ mönitö, Bitö Wængongui weca quëwente pönimi inte nê eñëmi imipa, ante do pönëmöni imönipa.

³¹ Ante añönäni Itota wæætë,

—Nöwo tæcæ pönëmini iminitawo.
³² Wantæyö bayedë inömo edæ nöwo pöni batimpa. Mäniñedë minitö botö imote emö cæte panguimæ panguimæ wodii winöninque tömëmini oncönë go guiquimini iminipa. Botö imo adoboque emö cæte gomini incæte botö inæmpa wii adoboque ongömopa. Edæ botö Mæmpo botö tönö godongämæ ongongampa. ³³ Minitö inömo botö nempo quëwëmini inte gänë pönente quëwencæminimpa, ante cædinque botö mäninö ante minitö iminite apænetabopa. İi inguipoga quëwëninque minitö caate

wæcæminimpa. Incæte mïni wængongui mïmo ante guñënämaï imopa.
 Edæ inguipogaque ante nani wënæ wënæ cædönö ante Baa äninque botö godömenque tæi emönömo inte nê gänä cægäimo imopa. Mänömainö ante Itota tömengä nänö emiñænäni inänite inque apæneceba eñengadänimpa.

17

Itota Mæmpo ingante mönö beyæ ante apænecampa

¹ Itota mänömainö ante inque apænedinque öönæde æmö adinque iïmaï apænecantapa. “Mæmpo eñëmi. Bitö, Æbänö baquii, ante bitö angainö baï do batimpa. Botö edæ, Bitö Wëmo inömo inömete bitö pönö cæbi ate botö nãö apäite baï botö emönö inömo edonque pöni bacæimpa, ante apænebopa. Mänömaï cæbi adinque botö wæætë bitö beyæ pönö cæbo ate bitö nãö emömämo edonque pöni bacæimpa. ² Bitö pædæ pönömi botö nê ængainäni inänite botö cöwë wantæpiyæ nani quëwenguinö ante godömo æncædänimpa, ante bitö botö tönö godongämæ cæbi beyænque botö waodäni tömänäni inänite nê ämo batabopa. ³ Waodäni cöwë wantæpiyæ nani wænämaï quëwenguinö ante iïmaï impa. Mæmpo, bitö adobique näwä Wængongui inömi inömete tömënäni bitö imite ate baï pönencædänimpa. Ayæ botö Itota Coditobo bitö nê da pönongäimo inömete do adinque tömënäni pönencædänimpa. Tömënäni mänömaï nani pönëno beyænque edæ cöwë wantæpiyæ nani wænämaï quëwenguimämo edæ do ëadänipa,” ante Itota apænecantapa.

⁴ Ayæ Mæmpo ingante godömenque apænedinque, “Bitö, İïmaï cæe, ante bitö angainö ante botö inguipoga quëwëninque do inque cæbo beyæ bitö nãö emömämo edonque pöni bagatimpa. ⁵ Wëenëñedë pöni inguipoga badönämaï inedë bitö weca ongöninque botö nãö emongäimo inte nöwo bitö weca ocæ emænte pömo

adinque bitö pönö cæbi ate botö adobo ñäö apäite bai emömo ate edæ edonque pönö acæimpa,” Mæmpo ingante apæncantapa.

⁶ Ayæ, “Inguipoga quëwënäni bitö quinäni inänipa, ante bitö pædæ pönömi æninqe botö wæætë, Wængonguï æcänö ingää, ante tömënäni inänite odömömo ëñënanitapa. Adodäni bitö quinäni iñönänite bitö tömënäni inänite pædæ pönömi æntabopa. Tömënäni bitö angainö ante ëñente cædinäni inänipa. ⁷ Bitö pönömi æninqe botö ewocagaincoo ante iinäni iñömö edæ, Mänincoo tömancoo edæ Mæmpocä pönongä æninqe Itota ewocacampa, ante ñöwo do ëñënanitapa. ⁸ Edæ Mæmpo bitö pönö apænebi botö ëñente ængainö ante botö adodö ante edæ tömënäni inänite godö apænebo ëñëninque tömënäni do ænanitapa. Botö bitö weca quëwente pongaimo imopa, ante ëñëninque tömënäni ædæmö ëñënanitapa. Ayæ, Bitö botö imote da pönömi në pongaimo imopa, ante pönënanitapa,” ante Itota Mæmpocä ingante apæncantapa.

⁹ Ayæ, “Mæmpo, botö tömënäni beyæ ante bitö imite apænebopa. Botö wii inguipogaque quëwënäni beyæ ante apænebopa. Wæætë edæ, Bitö në pædæ pönömi botö ængainäni iñömö edæ bitö quinäni inänipa, ante botö tömënäni beyæ ante bitö imite apænebopa. ¹⁰ Botö quinäni tömänäni bitö quinäni inänipa. Ayæ bitö quinäni tömänäni botö quinäni adobai inänipa. Tömënäni cædäni beyænque botö ñäö emömämo edonque pönö batimpa.”

¹¹ Ante apænedinque Itota godömenque apæncantapa. “Botö inguipoga iñömö godömenque ongönämaï incæboimpa. Wæætë bitö weca ocæ emænte ponguïmo imopa. Botö emiñænäni guiquënë inguipoga iñömö ayæ ongönäni inänipa. Mæmpo bitö në Tæiyæ Waëmö inömi inte ëñëmi. Bitö emöwo bitö pönö pemongaiwo beyænque botö tæi piñænte në ämo imopa. Ininque mönatö äawocaque bai ewocate quëwëmöna bai mäninäni

adobai äawocaque bai ewocate quëwencædänimpa, ante cædinque bitö tæi piñæmi inte tömënäni inänite wææ aacæbiimpa, ante bitö imite apænebopa. ¹² Mäninäni weca botö quëwëñedë botö iñömö bitö emöwo bitö pönö pemongaiwo beyænque botö tömënäni inänite wææ aatabopa. Ayæ, Wë womönämaï incædänimpa, ante adodäni inänite wææ gam-potabopa. Ininque tömënäni tömänäni wë womönämaï inänipa. Önonque adocanque iñömö æmæwo wë womonguëngä incæ tömengä iñömö edæ Wængonguï angä ëñente näni yewæmongainö bai ñöwo iinque baquinque ante edæ æmæwo wë womongantapa,” ante Itota Mæmpocä ingante apæncantapa.

¹³ Ayæ, “Botö ñöwo bitö weca ocæ emænte ponguïmo imopa. Tömënäni botö watapæ topämo tömämämo entawëninque quëwencædänimpa, ante botö mäninö ante inguipoga ayæ quëwëñedë apænebo imopa. ¹⁴ Mæmpo, bitö angainö ante botö tömënäni inänite godö apænebo ëñënanitapa. Botö inguipogaque näni quëwencabo tönö adobo inämaï imo bai tömënäni edæ adobai inguipogaque näni quëwencabo tönö adodäni inämaï inäni adinque inguipogaque quëwënäni wæætë tömënäni inänite piñänitapa. ¹⁵ Mæmpo ëñëmi. Bitö botö emiñænäni inänite, Minitö inguipoga iñömö ayæ quëwënämaï incæminimpa, ante ænte mäobi gocædänimpa, ante botö bitö imite apænedämaï imopa. Wæætë, Wënæ awënë në wiwa cædongä iñömö tömënäni inänite, Oda cæcædänimpa, ante cæyongante bitö wææ aabi ate tömënäni wæætë oda cædämaï incædänimpa, ante bitö imite apænebopa. ¹⁶ Botö inguipogaque näni quëwencabo tönö adobo inämaï imo bai tömënäni edæ adobai inguipogaque näni quëwencabo tönö adodäni inämaï inänipa. ¹⁷ Bitö änö iñömö edæ näwangä ante impa. Ininque bitö godö cæbi ate näwangä bitö änö beyænque

tömēnāni iñōmō tōmēmi cædonque ante cædinque tæiyæ waēmō ēwocate quēwēnāni incædānimpa, ante bitō imite apænebopa. ¹⁸ Bitō botō imote inguipoga iñōmō bitō da pōnōmi pōmo bai botō adobai tōmēnāni inānite inguipoga quēwēnāni weca da godōmo godānitapa. ¹⁹ Tōmēnāni iñōmō bitō cædonque ante cædinque tæiyæ waēmō ēwocate quēwēnāni incædānimpa, ante botō iñōmō edæ bitō cædonque ante Ao āninque, Botō nāmā incæ tōmēnāni beyæ ante wænguimo imopa,” ante Itota apænegacāntapa.

²⁰ “Mæmpo ēñēmi. Botō wīi botō ēmiñænānique beyæ ante bitō imite apænebopa. Wæætē tōmēnāni botō angainō ante apænedāni ēñente pōnēninque wadāni nē wede pōnenguināni iñōnānite botō iināni beyæ ante adobai bitō imite apænebopa. ²¹ Mæmpo, Bitō imite botō entawēmo imo bai ayæ botō bitō nempo quēwēmo imo bai mānināni tōmānāni adobai āawocaque bai ēwocate quēwēmainānīpa, ante cæcæbiimpa, ante bitō imite apænebopa. Ayæ inguipoga quēwēnāni iñōmō, Bitō botō imote da pōnōmi pongaimo imopa, ante pōnencædānimpa, ante cædinque bitō godō cæbi ate tōmēnāni mōnatō nempo quēwencædānimpa, ante bitō imite apænebopa. ²² Bitō pōnō cæbi beyænque botō ñāō bai entawēninque, Mōnatō āawocaque bai ēwocate quēwēmōna bai tōmēnāni adobai āawocaque bai ēwocate quēwencædānimpa, ante botō iñōmō bitō pōnōnimāmo botō ñāō entawēmāmo tōmēnāni inānite adopāmo godōmo ænte entawēnānīpa. ²³ Tōmēnāni āawocaque bai ēwocate quēwencædānimpa, ante tōmēnāni botō imote entawēnānīpa. Ayæ botō bitō imite entawēmo imopa. Tōmēnāni mānōmai āawocaque bai ēwocadāni adinque inguipoga quēwēnāni iñōmō, Bitō botō imote nē da pōnōmi pongaimo imopa, ante ēñencædānimpa, ante apænebopa. Ayæ botō imote waadete pōnengaimi imi bai bitō tōmēnāni inānite adobai

waadete pōnengaimi imipa, ante ēñencædānimpa, ante apænebopa,” ante Mæmpocā ingante Itota apænegacāntapa.

²⁴ Ayæ, “Mæmpo, Bitō pædæ pōnōmi botō nē ængaināni iñōmō botō ñāō ēmōmāmo acædānimpa, ante botō, Tōmēnāni botō quēwēñōmō adoyōmō quēwencædānimpa, ante aīnente wæbopa. Wēēñēñedē pōni inguipoga badōnāmai iñedē bitō iñōmō edæ botō imote waadete pōnēninque botō ñāō ēmōmāmo pōnōmi botō ængaimāmo tōmēnāni adopāmo acædānimpa, ante aīnente wæbopa. ²⁵ Mæmpo nē nō cædōmi imi ēñēmi. Inguipogaque quēwēnāni bitō imite wīi adinque pōnēnāmai ināni incæte botō iñōmō edæ bitō imite do ate pōnēmo imopa. Botō ēmiñænāni iñōmō, Bitō botō imote da pōnōmi nē pongaimo imopa, ante do ēñēnānitapa. ²⁶ Botō cæbo beyænque mānināni iñōmō, Bitō imite ate bai pōnēnānitapa. Botō imote bitō waadete pōnēnō ante adodō waadete pōnēnō tōmēnāni mīmōnē entawente quēwencædānimpa, ante ayæ, Tōmēnāni botō imote entawencædānimpa, ante botō ayæ cæbo beyænque tōmēnāni iñōmō, Bitō imite ate bai pōnencædānimpa,” ante Itota Mæmpo ingante iinque apænegacāimpa.

18

Itota ingante bæi ongonte ænte godānīpa

(Māateo 26.47-56; Mādoco 14.43-50; Odoca 22.47-53)

¹ Wængonguī ingante iinque apænedinque Itota tōmengā ēmiñænāni tōnō wadæ godinque Quedodō biyōnæ æmæ wedeca godānitapa. Emæ wedeca odibowæncodē nāni ancodē i iinque Itota tōmengā ēmiñænāni tōnō mānincodē pō guidānitapa. ² Itota ingante nē odōmonguingā Codaa iñōmō Itota tōmengā ēmiñænāni tōnō mānincodē wantæ iñō wantæ iñō gote ongōnāni iinque Itota ingante nē odōmonguingā Codaa iñōmō mānincodē do adingā inongāimpa. ³ Iinque tontadoidi

adocaboque inänite æninque Codaa iñömö edæ täno beyænte adocodë pongantapa. Ayæ, Wængongui qui, ante nê godönäni ñænænäni tönö Paditeoidi nani wææ wänönäni inänite Codaa nempo godönäni æningä inte tömengä tömënäni inänite tontadoidi tönö ænte mämongä pönänitapa. Pöningue tömënäni gongaticainë næænte gongapæncade ticainë nææninque yaëmë næænte Codaa miñæ pönänitapa. ⁴ Itota nämä ante, Æbänö bate wæquimoo, ante tömää ëñëongä inte awænë tao godinque tömënäni inänite,

–Æcänö ingante ante diqui diqui minte pöminii.

⁵ Ante añongä tömënäni wæætë,

–Itota Näatadeta nê quëwëningä ingante ämönipa.

Änäni ëñëninque,

–Botö tömëmo imopa, ante Itota apænecantapa.

Ayæ nê odömonguingä Codaa iñömö tömënäni weca a ongönongäimpa. ⁶ Itota iñömö, “Botö tömëmo imopa,” ante añongä tömënäni gä godinque onguipoga tæ go wæænänitapa. ⁷ Tæ go wæænäni adinque tömengä adodö,

–Æcänö ingante ante diqui diqui minte pöminii.

Ante añongä tömënäni wæætë,

–Itota Näatadeta quëwëningä ingante ämönipa.

⁸ Änäni ëñëninque Itota wæætë,

–Botö tömëmo imopa, ante do antabopa. Minitö iñömö botö imote ante diqui diqui minte pöminii bai mäninäni inänite bæi ongönämaï iedäni.

⁹ Itota Mæmpocä ingante do apænedinque, “Bitö edæ pönömi botö ængainäni inänite wææ aabo beyæ adocanque incæ wë womönämaï inänitapa,” ante nänö angainö bai ñöwo iinque bacæimpa, ante mänömaï angantapa. ¹⁰ Timönö Pegodo iñömö nê yaëmë næængä inte pædæ guipote yaëmë æninque, Wængongui qui, ante nê godongä ñænængä pönï inongä ingante nê cæcä ingante tæi päninque tömëmonca inö wangö

tamoncasantapa. Pegodo nänö nê wangö tamoncadingä ëmöwo Mäadoco ëmongä inongäimpa. ¹¹ Itota wæætë Pegodo ingante,

–Bitö yaëmë adodö da wëe, æninque, Botö wæwenguimämo ante botö Mæmpo pönongä ænimo inte wæwenguënëmo imopa, angacäimpa.

Itota ingante bæi ongöninque Änato weca ænte godäni

(Mäateo 26.57-58; Mäadoco 14.53-54; Odoca 22.54)

¹² Ayæ odömäno tontadoidi tönö tömënäni awënë ayæ oodeoidi awënëidi tönö Itota ingante bæi ongöninque ænänitapa. Æninque tömengä ingante goto wimpote cädänitapa. ¹³ Ayæ adodäni Änato nänöwäa Caiapato weca Itota ingante ænte mäo godänitapa. Edæ Caiapato iñömö, Wængongui qui, ante nê godongä ñænængä pönï inongä mänii wadepo iñonte inongäimpa. ¹⁴ Caiapato wëenëñedë oodeoidi awënëidi inänite iimaï ante nê ämongä inongäimpa. Mönö waocabo beyæ ante adocanque onguiñængä wængä ininque waa imaimpa.

Pegodo incæ, Dicæ abogaa, angampa

(Mäateo 26.69-70; Mäadoco 14.66-68; Odoca 22.55-57)

¹⁵ Itota nänö ëmiñængä wacä tönö Timönö Pegodo iñömö tömëna iñömö Itota ingante tee empo godatapa. Mäningä iñömö Itota nänö ëmiñængä iñömö, Wængongui qui, ante nê godongä ñænængä pönï nänö nê adingä inongäimpa. Ininque Itota tönö pöningue tömengä Wængongui ingante nê godongä ñænængä pönï inongä oncö yacömöñäa iñömö pö guicantapa. ¹⁶ Pegodo guiquënë odemö yabæ inö a ongönongäimpa. Wacä Itota miñæ nê gocä iñömö, Wængongui qui, ante nê godongä ñænængä pönï inongä nänö nê adingä iñömö tömengä ocæ ëmænte pöningue baquécä odemö nê wææ aacä ingante apænecantapa. Pegodo ingante ämi guicæ, angä ëñëninque

baquecä wi ænecä ate tömengä Pegodo ingante ænte manguicä guicantapa. ¹⁷ Manguicä guiyongä baquecä odemö nē wææ aacä iñömö Pegodo ingante,

—Bitö adobaï mäningä onguiñængä nänö nē emiñænömi imipa töö.

Ñongä tömengä wæætē,

—Botö wabo imopa, angantapa.

¹⁸ Yogueite ingatimpa. Ayæ nē cædonäni tönö oodeoidi awenēidi wææ wänönäni gongapamö ootoqui, ante nani tadöni gäänē adiyæ ongonte ootodönänimpa. Pegodo adobaï tömönäni tönö godongämæ adiyæ ongonte ootocantapa.

Nē godongä ñæncængä Itota ingante angampa

(*Mäateo 26.59-66; Mäadoco 14.55-64; Odoca 22.66-71*)

¹⁹ Mäniñedē Änato iñömö, Wængongui qui, ante nē godongä ñænængä pönī iñömö Itota ingante, Bitö nē emiñænäni diyæ, ängongäimpa. Ayæ Itota nänö odömönte apænegainö ante, Æbänö i, ante tömengä ingante adobaï angantapa. ²⁰ Itota wæætē,

—Waadäni eñeñönänite botö edonque pönī apænebo eñenänitapa. Botö cöwē minitö odömöincönē incæ Wængongui oncö ñænæncönē incæ oodeoidi tömänäni nani pöincönē pö guidique odömönte apænebo eñenänitapa. Botö cöwē awemö apænedämaï intabopa. ²¹ Bitö botö imote, Æbänö i, ante quinante ämi. Botö imote nē eñenänäni inänite ämi eñente apænedäni eñencæbiimpa. Edæ mäninäni ædæmö eñenäni inänipa.

²² Mänömainö angä eñenique wææ wänongä adocanque iñömö Itota gäänē ongönique tömengä ingante tæi tamönique apænecä,

—Wængongui qui, ante nē godongä ñænængä pönī inongä ingante ædö cæte mänömaï ante wæætē anewēē töö.

²³ Ante ãñongä Itota wæætē,

—Botö wænæ wænæ änimö imo bai bitö botö wænæ wænæ äninö ante, Æbänö i, ante apænebi eñemoe. Wæætē edæ näwangä ante apænebo

inique bitö quinante botö imote tæi tamömipææ, angantapa.

²⁴ Ayæ, Wængongui qui, ante nē godongä ñænængä pönī Caiapato weca gocæcäimpa, ante Änato iñömö Itota ingante ayæ goto wimpoingä iñongante angä eñenique tömengä ingante ænte gogadänimpa.

Pegodo incæ, Dicæ abogaa, wæætē angampa

(*Mäateo 26.71-75; Mäadoco 14.69-72; Odoca 22.58-62*)

²⁵ Timönö Pegodo ayæ adiyæ ootoyongante wadäni,

—Bitö tömengä emiñænömi adobaï imipa töö.

Änäni eñenique tömengä,

—Wabo imopa, angantapa.

²⁶ Wængongui qui, ante nē godongä ñænængä pönī inongä ingante nē cädäni iñönänite adocanque iñömö Pegodo nänö nē wangö tamoncad-ingä guidengä inongäimpa. Tömengä iñömö Pegodo ingante,

—Bitö tömengä miñæ odibowæncodē ongöñedē bitö imi atabopa. Bitö wii imitawo.

²⁷ Ante ãñongä Pegodo wæætē, Wabo imopa, ante tæcæ anewēñongä tawadiya dobæ pegatimpa.

Pidato weca Itota ongongä

(*Mäateo 27.1-2; Mäadoco 15.1-5; Odoca 23.1-5*)

²⁸ Tæcæ ñäö bayonte Itota ayæ Caiapato weca ongöñongante oodeoidi iñömö, Mönö tömengä ingante odömäno gobedönadodo awenē Pidato weca ænte gocæimpa, ante cædinque awenē oncö boyæ mäodäni gocantapa. Incæte tömönäni dodäni nani wææ angainö beyæ ante guiñente wædinque, Pidato oncönē guite bai mönitö mimö wentamö ewocamöni incædömönimpa. Iñæmpa mänömaï cæmöni inique mönitö Patowa mönö ææmæ cæyedē cængui ædö cæte cængui mönii, ante wædinque guidämaï inänitapa. ²⁹ Inique Pidato tömönäni weca oncö boyæ taodique tömönäni inänite,

–Īngä onguĩñængä ĩñömö quĩno wænæ wænæ cæcantawo.

³⁰ Āñongä tømænäni wæætë,

–Mäningä wii wænæ wænæ cæcä inte bai mönitö tømengä ingante wii ænte mämö pædæ godömöni æncædömiimpa.

³¹ Änani eñëninque Pidato,

–Minitö tømëmini tømengä ingante ænte godinque mini wææ yewæmongainö bai ante cædinque, Tømengä ingante pangæimpa, ante apænte äedäni.

Äñongä oodeoidi awënëidi,

–Īñæmpa minitö wææ ämini ĩñömini mönitö cöwë tacamöni wænäni möni cægainö bai ædö cæte æcämenque ingante wænömöni wænguingä, ante wædänitapa.

³² Odömänoidi mäniñedë wænæ wænæ cædäni inänite awäa töö godömænte timpodinque wææ tiwadinque godö wænönäni ĩnönänimpa.

Īninque odömänoidi inänite pædæ godöninque oodeoidi wæætë Itota, Äbänö cædäni wænguimoo, ante do nänö angainö bai ñöwo ĩnque baquinque cædänitapa. ³³ Mäninö änanäni eñëninque Pidato wæætë oncönë ñænæncönë guidinque Itota ingante añecä pongä adinque, Pidato,

–Bitö oodeoidi Awënë Odeyebi ĩmitawo.

³⁴ Angä eñente Itota wæætë,

–Bitö nämä pönëninque apænebitawo, Wabänö wacä botö ĩmotedö ante bitö ĩmite apænecä eñëmitawo.

³⁵ Ante añongä Pidato,

–Botö dicæ oodeobo ĩmogaa. Tømëmi guidënanäni tönö Wængongui qui, ante në godönäni ñænænäni ĩñömö bitö ĩmite mämö pædæ pönönäni ætabopa töö. Bitö quĩno wænæ wænæ cæbitawo.

³⁶ Äñongante Itota wæætë apænedinque,

–Wii inguipoga quëwënanäni änäni beyæ botö Awënë Odeyebö në ingaïmo ĩmopa. Botö inguipoga quëwënanäni Awënë Odeyebö inte në ämo ĩmo bai botö nempo quëwënanäni ĩñömö botö ĩmote, Bæi ongonte ænte godämaï incædänimpa, ante

wææ cædinque oodeoidi tönö guëa wæætedö wæætë cæcædönänimpa. Incæte wii inguipoga quëwënanäni änäni beyæ wæætë edæ wayömö quëwëngaïmo inte botö tømëmö nämä incæ Awënë Odeyebö në ingaïmo ĩmopa.

³⁷ Mänömainö ante Itota apænecä ĩninque Pidato,

–Īñæmpa Awënë Odeyebi bitö ĩmitawo.

Äñongante Itota wæætë,

–Bitö tømëmi änö bai botö Awënë Odeyebö ĩnömöimpa. Näwangä ämipa. Botö ĩñömö Wængongui nänö angainö ante, Näwangä ĩmpa, ante inguipoga quëwënanäni inänite apænecæte ante edæ mäniï beyænque ante inguipoga ĩñömö pö eñagaïmo ĩmopa. Wængongui näwangä ante nänö angainö ante Ao ante eñente në cædäni ĩñömö edæ tømænäni tömänäni botö ĩmote në eñënäni inänipa, angantapa.

³⁸ Äñongante Pidato,

–Æcämë näwangä angä, an-gacäimpa.

Itota wæncæcäimpa, änänipa

(Mäateo 27.15-31; Mäadoco 15.6-20; Odoca 23.13-25)

Pidato mänömaï apænedinque wæætë oodeoidi weca oncö boyæ taodinque apænecantapa.

–Īngä quĩno wænæ wænæ cæcä ingampa, ante eñënämaï ĩmopa. Īninque botö dicæ tømengä ingante apænte anguïmo ĩmogaa. ³⁹ Wadepo ĩñö wadepo ĩñö Patowa mini ææmæ cæönæ minitö, Ädänidö tee mönete ongönänii, ante pönëninque adocanque ëmöwo ante botö ĩmote apænedinque, Īngä ingante ñimpo cæbi goquingä, ante cöwë äminipa.

Īninque adocanque ingante, Īngä ĩñömö mini apænedongä ingampa, ante botö tømengä ingante ñimpo cæbo ate ænte gomini ĩnömünimpa. Īninque ñöwo diyæ. Minitö, Ood-eomöni Odeye ĩñongante pönö ñimpo cæbi abæ tawænte goguinga, äminitawo.

40 Æñongante tömënäni yedæ teded-
inque,

—Mäningä ingante dicæ ämöniyaa.
Wæætë Badabato ingante ñimpo cæbi
gocæe, ante tedewengadänimpa.

Badabato wëenëñedë wadäni tönö,
Odömäno tæiyæ awënë ingante wido
cæcæimpa, ante cædingä inongäimpa.

19

1 Ayæ Pidato angä ate Itota ingante
bæi ongonde mäo æmontaiya tæi
tæi pänänitapa. 2 Tontadoidi daa

mongæmenca æninque que que
cædinque, Awënë poganta, ante pönö
da wencadänitapa. Awënë weocoo
wëñacæbiimpa, ante badete tote bæi
cædinque Itota ingante opatawæ
ëmoncoo pönö daga wëñadänitapa.

3 Daga wëñadinque tömënäni wæætë
wæætë tömengä weca ponte äninque,

—Badogaa, bitö oodeo awënë
odeyebi imipææ.

Ante badete todinque tömengä in-
gante tæi tamönänitapa.

4 Pidato tömënäni weca oncö boyæ
adopoque ayæ tadinque oodeoidi
inänite apænedinque,
—Ïngä iñömö æbänö cæcantawo,
ante ëñencæte ante cæbo ate tömengä
wënæ wënæ nänö cædö ante dicæ
abogaa. Minitö mänömainö ante
ëñencæmïnimpa, ante botö tömengä
ingante minitö weca ænte mantabo
tacä aedäni, angantapa.

5 Itota daa mongæmenca poganta
encadinque opatawæ ëmoncoo
mongænte tayongä Pidato tömënäni
inänite,

—Ïngä onguïñængä ongongä
aedäni.

6 Tömengä ingante adinque,
Wængonguï qui, ante në godönäni
ñænænäni tönö adodäni inänite
në wææ wänönäni iñömö yedæ
tedewëninque,

—Awæ ñænquedimæ cæte ämi
wänönäni wængæe. Ämi wänönäni
wængæe.

Ante ancaa änewënäni ëñëninque
Pidato wæætë,

—Minitö iñæmpa tömengä ingante
æninque awæ ñænquedimæ cæte
wänömïni wængæe. Botö guiquënë
ïngä wënæ wënæ nänö cædö ante
dicæ abogaa.

7 Pidato Æñongä oodeoidi wæætë
ïimai tedewënanitapa.

—Mönitö wææ yewæmongainö
ante ëñente quëwëmöni imönipa.
Ïngä iñömö edæ nämä ante edæ,
Wængonguï Wëmo inömo imopa,
ante cædinque edæ mäninö möni
wææ yewæmongainö ante ëñënämaï
cæcampa. Mänömaï ëñënämaï inte
cæcä beyæ tömengä në wængüenengä
ingampa.

8 Mänömainö änäni ëñëninque
Pidato godömenque guïñente wædinque,
9 oncönë ñænæncönë adodö pö guiid-
inque Itota ingante,

—Bitö ædönö quëwente pömi imii.

Ante Æñongä Itota guiquënë pæ
wëenecä. 10 Adinque Pidato tömengä
ingante,

—Bitö quïnante botö imo tededämaï
imii. Botö nämä në tæi piñænte
ämo inömo inte ämo ininque ñimpo
cædäni gobaimipa. Botö wadö
ante ämo ininque bitö imite do
awæ ñænquedimæ cæte wänönäni
wæmaïmipa, ante ëñënämaï imitawo.

11 Æñongante Itota wæætë,

—Wængonguï bitö tæi piñænte
ämämo ante godönämaï ingä bæi bitö
tömëmi tæi ämi imi diyæ botö imote
anguimiyaa. Mänömaï beyæ bitö
imite, Wänömi wæncæcäimpa, ante
botö imote në pædæ pönöningä iñömö
edæ godömenque wënæ wënæ cæcä
ingampa, ante apænecantapa.

12 Mänömainö angä ëñëninque
Pidato, Æbänö ñimpo cæbo go-
quingä, ante cædongäimpa. Cæyongä
oodeoidi wæætë godömenque yedæ
änönänimpa,

—Bitö mäningä ingante ñimpo
cæbi bæi bitö odömäno tæiyæ
awënë Tetædo æmigo dicæ imiyaa.
Æcämenque iñömö edæ, Botö awënë
inömoimpa, ante në angä inte tömengä

iñömö Tetædo ingante nē pūnongā ingampa.

¹³ Māninō ānāni ēñēninqe Pidato iñömö, Itota ingante ænte tao godinque awēnē nānō apænte äimpaa gote tæ contacantapa. Pidato nānō tæ contayömö iñömö, Dicacoo ayadi bai nāni caayömö impa, ante nāni añömö ininque ebedeo tededö, Gabata, nāni añömö inönimpa. ¹⁴ Patowa nāni ææmæ cæyedē ininque bayö oodeoidi, Īimö ate guēmanguïönæ inguimpa, ante mönō ñöwoönæque cæcæimpa, ante nāni cæönæ inönimpa. Īionæ wodo tæcæ bæcā bayonte Pidato oodeoidi inānite,

–Īingā iñömö mīnitö Odeye inongā ingampa.

¹⁵ Āñongante yedæ āninqe tömēnāni,

–Tömengā ingante wænömi wængæ. Tömengā ingante wænömi wængæ. Awāa timpote āmi wænönāni wængæ.

Ante ancaa ānewēñönāni Pidato wæætē,

–Botö iñömö mīnitö Odeye iñongante awāa timpote āmo wænönāni wængæ, ante ānewēmīnitawo

Angā ēñēninqe Wængonguī quī, ante godönāni ñænænāni iñömö,

–Tetædoque incæ mönitö awēnē odeye inongā apa cæbii, ānewēñönānimpa.

¹⁶ Ancaa ānewēñönāni Pidato, Awāa āmo timpote wænömīni wængædāni, ante Itota ingante tontadoidi inānite pædæ godongā ængadānimpa. Ayæ tömēnāni Itota ingante ænte gogadānimpa.

Itota ingante awāa timpodāni wængäimpa

(Māateo 27.32-44; Māadoco 15.21-32; Odoca 23.26-43)

¹⁷ Itota incæ tömengā timpouquiwæ æninqe mongænte taodinque “Ocatainö” mönō añömö pongantapa. Māniñömö ante ebedeo tededö, Godogota, nāni añömö impa.

¹⁸ Māniñömö pōñongante tömēnāni awæ ñænquedimæ cædinque tömengā ingante töö godonte timpodinque

wææ tiwadinque ængæ gantidēnāni ongongantapa. Ayæ wada inate tömengā weca æmataæ inö æmataæ inö māmö adobai cæte ængæ gantidēnāni wægōñöna Itota tæcæguedē wægongā ingantapa. ¹⁹ Pidato angā yewæmöinta, Nāni ēñenguinta, ante yewæmonte æninqe ñænquedimæ iwāa wo cædānitapa.

“Itota Nāatadeta quēwēningā oodeoidi Awēnē Odeye inongā ingampa,” ante yewæmonte wo cæte ongongatimpa. ²⁰ Itota ingante nāni timpodīñömö eyequei i ininque oodeoidi nanguī ināni tömēnāni nāni quēwēñömö ta pōninqe Pidatoidi nāni yewæmöninta adānitapa. Māninta iñömö ebedeo tededö datūi tededö guidiego tededö ante yewæmonte ingatimpa. ²¹ Oodeoidi beyæ ante, Wængonguī quī, ante nē godönāni ñænænāni iñömö Pidato weca godinque tömengā ingante,

–Bitö, “Oodeoidi Awēnē Odeye inongampa,” ante yewæmönāmaī inguēnē quēwē. Wæætē tömengā nāmā nānō angainö bai, “Botö oodeoidi Awēnē Odeyebo inömoimpa, ante nē ānewēningā ingampa,” ante yewæmöe.

²² Ante ānewēñönāni Pidato wæætē,

–Botö yewæmöninö ante yewæmönimo inte botö wæætē wadö ante yewæmönāmaī incæboimpa.

²³ Tontadoidi iñömö tömengā ingante awāa timpote ængæ gantidēnāni wægōñongā tömēnāni tömengā wecoo ini æninqe mencooga go mencooga cōnōninqe adocanque adocooque adocanque adocooque æninqe tömānāni ænönānimpa. Tāno mongæincoo guiquēnē ayæ oñoncoopa. Mānincoo iñömö bæbængapaa badönāmaī incoo tömancoo adocooque da wēñaque badöi inimpa. ²⁴ Adocooque wānā ñænāmaī ingæimpa, ante adodāni godongāmæ tededinque,

–Æcānō quinca nö ta adinque tömengā mānincoo æncæcäimpa, ante wææntodönānitapa.

Edæ Wængonguī angā ēñente dodāni iīmaī ante nāni yewæmongainō bai ñowo iinque baquinque tontadoidi mǎnōmaī cædānitapa. “Edæ botō weocoo inī ō æninque tōmēnāni nāni caboque wacā ingā wacā ingā nēnempodānitapa. Ayæ, Æcānō quınca nō ta adinque tōmengā mǎnincoo æncæcāimpa, ante wææntodōninque ænānitapa,” ante nāni yewæmongainō bai tontadoidi ñowo cædānitapa.

²⁵ Itota ingā nāni ængæ gantidēñōmō tōmengā wāānā tōnō wāānā tōniñacā nāna caya ayæ Codeopato nānōogængā Māadiya tōnō wacā Māadiya Māagadadēnā mǎniñōmō pōninque eyequeī a ongōnānitapa.

²⁶ Itota iñōmō tōmengā wāānā inante acantapa. Ayæ botō tōmengā miñæ nē godīmo iñōmō tōmengā nānō nē waadebo inōmo inte tōmēnā weca ongōmo adinque Itota tōmengā wāānā inante,

—Badā ēñēmī. Māningā iñōmō mīnō wengā bacæcāimpa.

²⁷ Āninque tōmengā ēmiñænīmo iñōmote,

—Botō ēmiñænīmi ēñēmi, Māniñā iñōmō botō badā incæ bitō badā bacædāimpa, angacāimpa.

Iinque botō Itota nānō nē ēmiñænīmo inte tōmengā nānō ānōñedē tāno ænte māmōmo pōninque tōmengā wāānā iñōmō botō oncōnē cōwē owodōnāimpa.

Itota incæ wængāimpa

(Māateo 27.45-56; Māadoco 15.33-41; Odoca 23.44-49)

²⁸ Quīnō bacæimpa, ante ñowo iinque batimpa, ante nē ēñēnongā inte Itota iñōmō edæ, Wængonguī angā ēñente nāni yewæmongainō bai ñowo iinque bacæimpa, ante cædinque,

—Botō gæwænte awædō, ante apænecantapa.

²⁹ Adoyōmō biinōmæ nāni āmæ bai wædænque godonte nāni ænimæ owætadē engate ongō adinque tōmēnāni dayōmō bai æninque mǎnimænē pædæ guidonte aa beyonte wēā tadonte æninque iitopowænca nāni āwænca ongontoca

goto wencadodique Itota ōnōne pædæ æænō pæ mǎnānitapa. ³⁰ Pæ mǎñōnāni Itota oo guēmante bedinque,

—Ñowo iinque batimpa.

Ante apænedinque tōmengā ocabo ædæ wææncadinque tōmengā ōnōwoca wadæ goyōwoca do wængāimpa.

Itota betagonta inō tontado boo tæñongā

³¹ Iimō ate, Mōnō guēmanguiōnæ iñōmō Patowa inguiōnæ beyæ godōmenque waa ēōnæpa, ante oodeoidi, Ñowoōnæque cæcæimpa, ante nāni cæōnæ inimpa. Oodeoidi awēnēidi, Awāa nē ongōnāni baō mǎniwāa guēmanguiōnæ ongōnāmaī incædānimpa, ante Pidato weca godinque tōmengā ingante, Iināni nāni timpodiwāa nē ongōnāni quingæ wæncædānimpa, ante cædinque bitō tōmēnāni ōnōmēnē bamē āmi wadāni taa mænāni do wæncædānimpa. Ayæ tōmēnāni baō o togænte pædæ wæænonte āmi ænānie, ānānitapa.

³² Māniī beyæ tontadoidi pōninque Itota weca tāno nāni nē ængæ gantidēningā ōnōmēnē bamē taa mæninque edæ ayæ nāni nē timpodingā wægongā ōnōmēnē bamē taa mænānitapa. ³³ Taa mæninque Itota weca pōninque tōmengā do wængāi adinque tōmengā ōnōmēnē taa mænāmaī inōnānimpa.

³⁴ Wæætē tontado adocanque Itota betagonta inō boo tæñōñongā wepæ tōnō æpæ guī gotimpa.

³⁵ Botō mǎninō bayonte nē adīmo inte, Æbānō nāwangā batimpa, ante nō apænebopa. Ayæ, Botō ānō ante nāwangā impa, ante do ēñēmopa. Minitō adobāi ēñente pōnencæmīnimpa, ante apænebopa. ³⁶ Edæ, “Tōmengā bamē adomenque incæ taa mænte wædāmaī incæcāimpa,” ante Wængonguī angā ēñente nāni yewæmongainō bai bacæimpa, ante mǎnōmaī batimpa.

³⁷ Ayæ edæ, “Wadāni nāni nē boo tæñōningā ingante aquināni inānipa,” ante Wængonguī angā ēñente

wataa nāni yewæmongainō bai iinque bacæimpa, ante mänōmaï batimpa.

Itota wodi baö ini mäo daga wēnānīpa

(*Mäateo 27.57-61; Mäadoco 15.42-47; Odoca 23.50-56*)

³⁸ Ayæ ate Adimatea quēwengā Ootee iñōmō oodeoidi awēnēidi inānite guiñente awædō, ante awēmō Itota ēmiñæningā inongāimpa. Tömengā iñōmō Pidato Awēnē ingante, Itota wodi baö pönōmi ænte wēmoe, angantapa. Pidato Ao angā ēñēninge Ootee do pöninque Itota wodi baö timpodiwāa ongōñongante o togænte pædæ wæænonte ængantapa. ³⁹ Ayæ Nīicodemō wēenēñedē Itota weca woyowotæ ēñacæ nē pōningā iñōmō Ootee miñæ pongantapa. Tömengā miidamō nāni änōmō nanguī tī nāmō tönō aadoemō nāni änōmō nanguī oguī wamō tönō adoyōmō nāni wempo cædimō todēinta quido ganca ænte pongantapa. ⁴⁰ Ootee tönō Nīicodemō iñōmō Itota wodi baö æninque ninocoo nāni ancoo guiyancoo incæ doyæncoo mänincoo oguī wamō nāna ænte pōnimō ænte wāne cædedatapa. Ayæ oodeoidi daga wencæte ante nāni cægaï bai adobai cædinque tōmēna nāna wāne cædincoo inte tōmengā baö wīni wīni cægadaimpa. ⁴¹ Itota ingante nāni timpodīñōmō eyequei gōnea inimpa. Adodea iñōmō miintatodē nāni ææ wodiñōmō ōnantatoque inimpa. ⁴² Iimō ate guēmanguiōnæ inguimpa, ante oodeoidi, Nōwoñæque cæcæimpa, ante nāni cæōnæ impa, ante beyæ, Ontato eyequei impa, ante tōmēnāni Itota wodi baö māniñōmō daga wengadānimpā.

20

Itota nē wæningā incæ ñāni ōmæmonte quēwengā

(*Mäateo 28.1-10; Mäadoco 16.1-8; Odoca 24.1-12*)

¹ Oodeoidi guēmanguiōnæ Tabado go ate mōnō Dominco tæcæ ooque pōnente bayedē Mäadiya Mäagadadēnā Itota wodido ponte ayongā dicabo

ontato tee mōnocæte ante nāni da pæñæninca incæ do wēä godō concæi intapa. ² Botō Itota nānō nē waadedimo tönō Timōnō Pegodo iñōmō Itota miñæ mōna nē godincaya iñōmōnate Mäadiya Mäagadadēnā wæætē, Mänōmaï impa, ante adinque mōnatō weca pogodo ponte apænecantapa,

—Awēnē Itota wodi baö ontatodē ōñōñongante ænte taodique ædōnō mäo ñō cædānii, ante ēñēnāmaï iimōnīpa.

³ Ante apæneyongā Pegodo tönō botō Itota miñæ mōna nē godincaya iñōmō tōmengā wodido quingæ gote pogodo pontamōnāpa. ⁴ Guēa pogodo gomōna incæte tōmengā ēmiñænimo botonque quingæ tōmengā wodido tāno pontabopa. Pegodo ayæ pongantapa. ⁵ Māniñōmō tāno pöninque ædæ wæænte guiite ayōmo iñāna nāna wīni caadincooque ōñō abo incæte guiidāmaï intabopa. ⁶ Timōnō Pegodo botō miñæ ayæ nē pōningā Itota wodido ontatodē ponte wāänē guicantapa. Wāänē guiyongante doyæncooque iñāna nāna wīni caadincooque māniñōmō ōñō acantapa. ⁷ Ayæ Itota wodi ocabo nāna ñāni cæcadincoo adobai ōñō acantapa. Mänincoo doyæncoo tönō wīi adoyōmō ñōnonte intapa. Wæætē iincoo nāa wēnente nānēnē ñō cæte ōñō acantapa. ⁸ Iinque botō tōmengā wodido ontatodē tāno nē pōnimo incæte ñōwo tæcæ adobai wāänē guitabopa. Guiite ayōmo, Itota nānō ōñōñōmō æbānō i, ante adinque, Tömengā ñāni ōmæmonte quēwengā ingampa, ante pōnentabopa. ⁹ Edæ Wængonguī angā ēñente yewæmōninque dodāni, Mōnō Codito iñōmō do wæningā incæ ñāni ōmæmonte quēwenguēnengā incæcāimpa, ante mōnatō māniñedē ayæ ēñēnāmaï inōmōnāimpā. ¹⁰ Ayæ mōnatō tōmengā miñæ nē godimōna iñōmō wadæ godinque tōmēmōna oncōnē ocæ emænte gotamōnāpa.

Itota iñōmō Mäadiya Mäagadadēnā weca pongā

(*Mäadoco 16.9-11*)

11 Mäadiya guiquënë Itota wodo ontatodē yabæ inō a ongonte wædongäimpa. Mänōmaï wædinque tömengä, Abote, ante ædæ wæænte guite ¹² adinque Wængonguï anquedoda näämæntacoo mongæna inte Itota wodi baō öñöniñömö tæ contada ina acantapa. Adocanque Itota wodi ocabo öñöniñömö tæ contayongä wacä Itota wodi önöwa öñöniñömö tæ contate ongongä acantapa. ¹³ Tömëna iñömö tömengä ingante,

—Onquiyæmi, minö quinante wæmintawo.

Äna ëñëninque tömengä wæætë,

—Botö Awënë wodi baō ini ö ænte godäni awædö. Ädönö mäo ñö cædäni, ante ëñënämaï wæbopa.

¹⁴ Mäninö äninque Mäadiya dadi ëmænte ayongä Itota mäniñömö a ongongä adinque Itota incæcä tömengä ëñënämaï ingantapa. ¹⁵ Itota iñömö,

Minö quinante wæmintawo. Äcänö ingante ante diqui diqui mïmintawo.

Ante angä ëñëninque Mäadiya, Ìngä iñömö wabänö gönea ömæ wite nē aacä ingampa, ante önöwënenque pönëninque,

—Ëñëmi, bitö tömengä wodi baō ini wayömö ænte mäobi inte bai ædönö gote ñö cæbitapa, ante apænebi ëñëmoe. Apænebi ëñëninque botö tömengä wodi baō do gote æmaïmopa.

¹⁶ Äñongante Itota tömengä ingante,

—Mäadiya, angantapa.

Angä ëñëninque tömengä weca dadi ëmænte ebedeo tededö äninque,

—Adaböni, angantapa. Mäninö mönö tededö, “Awënë nē Odömömi ïmi,” ante impa.

¹⁷ Itota iñömö,

—Edæ botö ayæ botö Mæmpo weca ocæ ëmænte godämaï imopa, ante adinque minö botö imo pæ mänämaï iedä, angantapa. Wæætë minö botö töninadäni weca godinque tömënanï inänite iïmaï apænebi ëñëncædänimpa. Botö ñöwo botö Mæmpo weca ocæ ëmænte goquïmo imopa. Tömengä iñömö mïnitö Mæmpo

adobaï inongampa. Botö ñöwo botö Wængonguï weca ocæ ëmænte goquïmo imopa. Tömengä iñömö mïnitö Wængonguï adobaï inongampa, angantapa.

¹⁸ Itota angä ate Mäadiya Mäagadadënä iñömö Itota nänö nē ëmiñæninäni weca pöninque, Awënë Itota ingante atabopa, äninque, Tömengä iïmainö ante apænecä ëñëntabopa, ante tömënanï inänite mäo apænegacäimpa.

Itota iñömö tömengä ëmiñæninäni weca pongä

(Mäateo 28.16-20; Mäadoco 16.14-18; Odoca 24.36-49)

¹⁹ Guëmanguïönæ go ate iïmö ate wëmö bayö tömengä ëmiñæninäni adoyömö pöninque, Oodeoidi awënëidi inänite ancaï guïñente awædö, ante odemö tee mönete ongönänitapa. Itota tömënanï weca pö guite tæcæguedë a ongöninque,

—Guïñënämaï inte gänë pönencæmïnimpa, angantapa.

²⁰ Mäninö angä ate tömengä önompo odömöninque tömengä betagonta odömongä adänitapa. Ìninque mönö Awënë ingante adinque tömengä ëmiñæninäni nanguï watapæ todänitapa. ²¹ Itota wæætë adodö,

—Guïñënämaï inte gänë pönencæmïnimpa, angantapa. Botö Mæmpo iñömö botö imote nänö da pönongaïmo imo bai botö adobaï mïnitö imänite da godömo goquïmïni imïnipa.

²² Ante apænedinque tömënanï baonga woo öongate apænecä,

—Botö ñöwo pönï mïnitonga Wængonguï Tæiyæ Waëmö Önöwoca ingante pönö pönömo æedäni. ²³ Nē wënæ wënæ cæcä ingante adinque mïnitö tömengä ingante godö ñimpo cæmïni ïninque Wængonguï adobaï tömengä ingante godö ñimpo cæcä quëwëmaingampa. Mïnitö wæætë nē wënæ wënæ cæcä ingante godö ñimpo cædämaï imïni ïninque Wængonguï adobaï cædämaï inte tömengä ingante pönö ñimpo cædämaï imaingampa.

Itota ñäni ömæmonte në quëwengä ingante Tömato acä

²⁴ Itota ëmiñænïnäni adoyömö a ongöñönäni tömengä pö guite tömënäni weca tæcæguedë a ongöñongä tömengä ëmiñæningä adocanque Tömato mëwoga ëmongä Äancadënaque iñömö dæ angampa. ²⁵ Ayæ ate Itota nänö në ëmiñænïnäni wadäni iñömö,

—Mönö Awënë ingante atamönipa, ante Tömato ingante apænedäni ëñëningue tömengä wæætë,

Botö iñömö tömengä önönempo näni daagö timpodinömö, Æyömönö empocä, ante adinque önongompoca gampodique ayæ tömengä betagonta inö näni tapa tænonte codinömö botö tömëmo önongompoca gampote ate pönëmaï wädö, angantapa.

²⁶ Wacä tëmäna go ate Itota ëmiñænïnäni wæætë oncönë adoyömö pö guite a ongöñönäni Tömato tömënäni tönö godongämæ pö guite a ongongantapa. Odemö tee mönete ongö incæte Itota iñontobæ pö guite tömënäni weca tæcæguedë a ongöningue,

—Guiñënamäi inte gänë pönencæminimpa angantapa.

²⁷ Ayæ Tömato ingante,

—Bitö tömëmi önongompoca pædæ pompodique botö önompo ae. Pædæ guipote botö betagonta inö gampoe. Ayæ, Wabänö incädö, ante änämaï incæbiimpa. Wæætë pönëe.

²⁸ Ante añongä Tömato,

—Botö Awënë inömi imipa. Ayæ adobaï botö Wængonguï inömi imipa, angantapa.

²⁹ Ayæ Itota tömengä ingante,

—Botö imote ate pönëmi imipa. Wæætë në adämaï inäni incæ botö imote pönënäni ininque tömënäni näni toquinque ingæimpa, angacäimpa.

Wäö nänö yewæmongainta quïnante yewæmongacäi

³⁰ Tömengä ëmiñænïnäni weca Itota, Ëñencädänimpa, ante wadö wadö cædinque tömengä nänö bamönengæ ayæ godömenque nanguï

pöni cægacäimpa. Botö iñömö iintaa yewæmöninque mäninö tömengä nänö cægäinö ante wii tömäa yewæmontabopa. ³¹ Wæætë mäninö ante yewæmöninque botö, Itota mönö Codito inongäimpa, ante ayæ, Tömengä Wængonguï Wengä inongä ingampa, ante munitö pönencæminimpa, ante yewæmontabopa. Edæ tömengä ëmowo beyænque munitö mänömainö ante pönëningue cöwë wænämaï quëwencæminimpa, ante botö iinta yewæmömopa.

21

Itota tömengä ëmiñænïnäni 7 ganca inäni weca pongä

¹ Ayæ ate tömengä ëmiñænïnäni Tibediapæ näni ämæ yæwedeca ëmönaiboga ongöñönäni Itota iñömö tömënäni weca pöninque a ongongä adänitapa. Edæ iïmaï batimpa.

² Timönö Pegodo adocanque, Tömato Äancadënaque näni änongä tönö Gadideabæ Cänaa në quëwengä Näatänaedo mënaa, Tebedeo wëna nana caya mënaa, ayæ Itota nänö në ëmiñænina wada mënaa mänimpodäni adoyömö ongönönänimpa. ³ Timönö Pegodo iñömö tömengä tönö ongönäni inänite,

—Botö ñöwo gæyæ dadoncæ tao gobopa.

Angä ëñëningue tömënäni iñömö,

—Bitö miñæ gocæmönimpa.

Äninque, Ægodödäni gomompa, ante tao godinque wipodë godongämæ guidinque tömäa woyowotæ gæyæ dadoncæ cädäni incæte gæyæ dæ ænämaï inönänimpa. ⁴ Näö bayonte Itota iñömö ëmönaïya yæwedeca a ongongä adinque, Itota ingampa, ante tömengä ëmiñænïnäni incæ ëñënamäi inänitapa. ⁵ Ayæ tömengä tömënäni inänite yedæ aa pedinque,

—Iñänäni, gæyæ æmunitawo.

Äñongante,

—Ænämaï imönipa.

⁶ Änäni ëñëningue tömengä wæætë,

—Minitö dicamonca wipo tömëmæ inö æpænë wo guitodonte gæyæ dadonte æedäni.

Tömengä nänö ämaï cædinque tömënäni nanguï pöni gæyæ dicamonca date owo adinque ædö cæte dicamonca wëä pönonte ænguïnänii. ⁷ Itota ëmiñænimo tömengä nänö në waadebo inömo inte botö Pegodo ingante apænedinque,

—Ïngä iñömö mönö Awënë Itota ingampa.

Ämo ëñëninque Timönö Pegodo iñömö tömengä yabæcoo nänö gä tadongate cönönincoo æninque daga wëñate æpænë to go ti wææninque ömaa taocantapa. ⁸ Wadäni Itota nänö në ëmiñæninäni iñömö yæwedeca obo pöni tiëe mëetodo ganca bai iñömö wäi wocädäni ininque wipodë ayæ owodäni iñömö Pegodo miñæ wogaa godinque dicamö gæyæ eyede pöni wëä pönö pönänitapa. ⁹ Tömënäni wipodë inte pædæ æænoncado ponte ayönäni, Æænonguï, ante gonga ëmöñömö gæyæ öñö adinque adoyömö wædænque päö cö cæte öñö adänitapa. ¹⁰ Itota tömënäni inänite,

—Gæyæ mïni ñöwo æni wædænque ænte pöedäni.

¹¹ Angä ëñëninque Timönö Pegodo wipodë pö guidinque dicamö ænte ëmönaiya wëä tadongantapa. Edæ tiento tincoenta i todee ganca inäni mänimpodäni gæyæ ñænængade dicamö iñömö eyede owodäni incæte dicamö wangö tëmönämaï inimpa.

¹² Itota iñömö tömënäni inänite,

—Pö cæedäni,

Äñongante tömengä ëmiñæninäni tömänäni, Mönö Awënë Itota ingampa, ante ëñëninque, Æbidö imii, ante tömengä ingante ædö cæte ænguïnänii. ¹³ Itota gongapamö iñömö pöninque päö ænte tömënäni inänite pædæ godongä ænäni ininque tömengä ayæ gæyæ öñö æninque tömënäni inänite pædæ godongä cænänitapa.

¹⁴ Mänömaï cædinque Itota do wæningä incæ ñäni ömæmonte quëwente mempoga do ponte

a ongöningä inte ñöwo tömengä ëmiñæninäni weca mempoga go adopoque pongacäimpa.

Timönö Pegodo ingante Itota apæneca

¹⁵ Tömënäni ininque cænäni ate Itota iñömö Timönö Pegodo ingante,

—Timönö Wäo wëmi ëñëmi. Botö imo mäninäni pönömenque waadete pönëñönäni bitö iñömö näwangä botö imote godömenque waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do ëñëmipa.

Angä ëñëninque Itota,

—Wadäni iñömö botö obegaidi wënäni bai iñönänite bitö tömënäni inänite botö angainö ante odömonte apænebi ëñencädänimpa, angantapa.

¹⁶ Ayæ wæætë,

—Timönö Wäo wëmi ëñëmi. Bitö näwangä botö imote waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do ëñëmipa.

Angä ëñëninque Itota,

—Wadäni botö obegaidi bai iñönänite bitö tömënäni inänite aacæbiimpa, angantapa.

¹⁷ Itota mempoga go adopoque tömengä ingante,

—Timönö Wäo wëmi ëñëmi. Bitö botö imote waadete pönëmitawo, ante angantapa.

Itota mempoga go adopoque tömengä ingante, Bitö botö imote waadete pönëmitawo, ante angä ëñëninque Pegodo wæwente inongäimpa. Incæte Itota ingante,

—Awënë bitö tömäa ëñëmi imipa. Bitö imite botö waadedö ante bitö do ëñëmipa.

Ante wæyongä Itota wæætë,

—Wadäni iñömö në botö obegaidi bai iñönänite bitö tömënäni inänite botö angainö ante odömonte apænebi ëñencädänimpa. ¹⁸ Bitö imite näwangä ämopa. Bitö wëñæmiyedë tömëmi nämä daga wëñadinque, Ædönö goinëmo, ante bitö goinënonque do

gobi imitapa. Nöwo iñömö bitö picæmi bayedë bitö pædæ gopoyömi wacä incæ bitö imite godö daga wëñadinque bitö goinënämaï iñömö mäniñömö bitö imite mäocä gocæbiimpa.

¹⁹ Pegodo ingante mänömaïnö ante apænedinque Itota iñömö, Tömengä ingante æbänö wænönäni wæñongä Wængongui ñäö apäite bai nänö emönö edonque bacæimpa, ante odömoncæte ante apænegacäimpa. Ayæ godömenque tömengä ingante,

Botö miñæ tee empo pöe, angacäimpa.

Itota emiñæningä nänö në waadecä

²⁰ Pegodo guiquënë dadi emænte botö Itota emiñænimo nänö në waadebo iñömö tömäna miñæ tee empo pömo acantapa. Mänimo iñömö do möni cæñedë Itota tönö äänömonque tæ contadinque, “Awënë bitö imi æcänö godö odömonguinaa, apænebi eñëmönie,” ante në apænedimo inömoimpa. ²¹ Pegodo botö imo adinque Itota ingante,

—İngä iñömö në tee empo pongä diyæ æbänö tömengä beyæ bacæimpa.

²² Äñongä Itota wæætë,

—Botö ocæ emænte ponguinganca tömengä ayæ quëwencæcäimpa, ämo bai bitö wæætë ædö cæte në ämi inguimii. Botö iñömö në anguimo imopa. Bitö guiquënë botö miñæ tee empo ponguënëmi imipa, angantapa.

²³ Mänömaï beyæ pancadäniya möni tönñadäni weca godinque gode ä gode ä cædinque botö imotedö ante apænedinque, İngä iñömö cöwë wænämaï quëwengingä ingampa, ante tedewengadänimpa. Itota iñæmpa, İngä iñömö wænämaï quëwencæcäimpa, ante änämaï ingacäimpa. Wæætë, “Botö ocæ emænte ponguinganca tömengä ayæ quëwencæcäimpa, ante ämo bai bitö ædö cæte anguimii. Botö anguimo imopa,” ante mäninque angacäimpa.

²⁴ Tömänäni, İngä wænämaï quëwengä ingampa, ante nänö në apænedimo iñömö edæ botö tömengä

nänö në emiñænimo adobo imopa. Tömëmo, Æbänö batimpa, ante botö apænedö iñömö nawangä ante në apænedimo inte botö adodö ante tömänö ante në yewæmönimo imopa. Mäninö ante botö angainö iñömö nawangä impa, ante mönitö eñëmönipa.

²⁵ Itota iñömö nanguï pönï godömenque wadö wadö cægacäimpa. Æbänö cæcää, ante tömäa nänö cægainö ante adinque yewæmömöni bai mänintacoo möni yewæmönintacoo ñönongui ante edæ inguipoga tömäo incæ wii eyepæ incädönimpa, ante pönëmopa. Mäninque ante yewæmömopa.

Itota nänö da godongainäni Näni Cægainö

*Wængonguï Tæiyæ Waëmö Önöwoca
poncæcäimpa, ante*

¹ Teopido bitö acæbiimpa, ante botö do yewæmöninque, Itota æbänö mä cægacäi, ante, Itota æbänö mä odömonte apænegacäi, ante yewæmontabopa. Mänömainö ante do yewæmönimo inte botö adobo Odoca inömo inte ñöwo godömenque yewæmömo ae. ² Itota do iñömö, Iinäni botö imotedö ante nê apænequinäni inänipa, ante cædinque tömënäni inänite apænte æninque da godongacäimpa. Iinque tömengä nänö æite goquïönæ iñonte tömënäni tönö godongämæ ongöninque Itota iñömö Wængonguï Tæiyæ Waëmö Önöwoca tönö cædinque tömënäni inänite, Botö dæ gobo ate minitö iimaï cæcæminimpa, ante apænegacäimpa. Iinque apænecä ate tömengä ingante Wængonguï do ænte mäicä inque ingä æigacäimpa. Iinque mäninganca tömengä nänö cægainö ante do yewæmönimo inte botö iñömö, Bitö Teopidobi godömenque acæbiimpa, ante ñöwo wæætê yewæmömopa.

³ Itota adocä incæ nantate wægaingä inte ñäni ömæmonte ate coadenta eönæ manimpoönæ ingui-poga quëwëninque tömënäni weca mïngä inte wæætê pö wæætê pö cædinque mä pönï cædongäimpa. Iinque, Tömengä näwangä mïngä inte mänömaï cæcampa, ante adinque tömënäni ædö cæte wadö ante pönenguinänii. Ayæ tömënäni weca a ongöninque tömengä tömënäni inänite, Wængonguï Awënë Odeye nempo quëwencæminimpa, ante tömänö ante adodö adodö ante apænecä eñengadänimpa.

⁴ Tömënäni tönö godongämæ ongöninque Itota iimaï angantapa.

—Wii wayömö goedäni, Eedotadëe iñömö ee quëwëedäni, angantapa. Botö Mæmpo iñömö, Wacä ingante da pönömo æninque ëwocacæminimpa, ante do apænebo eñëmïnitawo. Tömengä, Da pönonguïmo, ante nänö nê angaingä ingante ante ænte ëwocacæte ante minitö ñöwo wänö cöedäni. ⁵ Edæ Wäö wodi iñömö æpænê guidongacäimpa. Wængonguï Tæiyæ Waëmö Önöwoca guiquënë minitö baonga wantæ iñö pö guicæcäimpa, ante Itota apænegacäimpa.

Itota öönædê æicampa

⁶ Ayæ Itota tönö godongämæ ponte ongönäni iñömö tömengä ingante änänitapa.

—Itota eñëmi. Mönö idægocabo mönö quëwengäimæ iñonte wadäni do ö ænäni incæte bitö ñöwo wæætê adobæ æninque mönitö Awënë Odeyebi oo bacæ cæbitawo. Edæ, Bitö nempo oo pönï godongämæ quëwencæmönimpa, ante cæbitawo, ante eñencæte ante wæmönipa.

⁷ Ancaa äñönäni,

—Iñæmpa minitö ante wæinö bai, Æyedënö baquïi, ante, Æpogadö baquïi, ante minitö wii eñenguënëmïni iminipa. Mæmpoque nê angaingä inte mäninö ante eñengampa. ⁸ Wæætê Wængonguï Tæiyæ Waëmö Önöwoca pö guïdinque pönö cæcä ate minitö wæætê tæi piñænte ëwocamïni edæ bacæminimpa. Iinque, Botö æbänö cægaboï, ante nê adimïni inte mäninö botö cægainö ante minitö täno Eedotadëe iñömö quëwente apænedinque ayæ Oodeabæ mäo apænedinque ayæ Tämadiabæ mäo apænedinque godömenque tömämæ mäo apænemïni eñencædänimpa, ante Itota angacäimpa.

⁹ Mänömainö ante apænecä eñente a ongöñönäni Itota mäniñömö ongonte æi boguïmancodê ingæ æicä æmö agadänimpa. ¹⁰ Öönædê æite ingæ gocä æmö ayönäni edæ onguïñæna näämænta weo-coo mongæna tömënäni weca a

ongöningue edæ, ¹¹ tömënäni inänite apænedinque,

—Gadideabæ quëwëmini inte onguĩñæmini ëñëedäni. Quĩnante æmonga a cöminii. Edæ Itota mñitö tönö ongöningue öönædë æicä amñitawo. Edæ öönædë æicä mini adĩ bai adocä Itota iincayæ ate ocæ ëmænte poncæcäimpa, ante apænedatapa.

Codaa nänö cæquënëno wacä cæccæcäimpa, ante cædäni

¹² Oodeoidi näni guëmanguiönæ cöwë näni goganca mäningancaque i inique wii gobæ i inique tömënäni Odibowænquidi näni anquidi ongöningue ocæ ëmænte wææ Eedotadëe pönänitapa. ¹³ Tömënäni ëmöwo Pegodo tönö Wäö, Tantiago tönö Æntade, Pedipe tönö Tömato, Batodömëe tönö Mäateo, Adepeo wengä Tantiago, wacä, Mönö ömæ ingæimpa, ante në änongä Timönö, Tantiago wengä Codaa. Mänömaĩ ëmönäni inte pö guidinque tömënäni näni wänoncönë æmongapaa æi guidänitapa. ¹⁴ Ayæ iinäni tönö wadäni Wængongui ingante godongämæ apænecæte ante cöwë pö pö cægadänimpa. Onquiyænäni adobaĩ Itota badä Mäadiya tönö ayæ Itota biwiidi tönö cöwë ponte apænedönänimpa.

¹⁵ Mäniñedë Itota ingante näni tee empote quëwënäni tiento bæinte ganca inäni inte ongöñönäni Pegodo tæcæguedë ængæ gantite apænecantapa. ¹⁶ “Iñänäni ëñëedäni. Nöwocä Codaa wodi Itota wodi ingante në æncædäni inänite në godö odömongä ingantawo. Edæ tömengä ingante ante Wængongui Tæiyæ Waëmö Önöwoca wëenëñedë apænecä ëñëinque awënë Dabii wodi nänö yewæmongainö bai cöwë iinque baquĩno anguënë. ¹⁷ Edæ Itota mönitö imönite apænte æninque Codaa ingante adobaĩ apænte ængacäimpa. Iinque mönö cabo mönö në cæquënëno ante Codaa wodi adocä incæ mönö

tönö godongämæ cæcä ingacäimpa.

¹⁸ Tömengä wiwa cæte tiguitamö nänö ænintamö incæ adodö godongä ænänitapa. Tömënäni wæætë tiguitamö æninque, Waodänido bacæimpa, ante ömæ godonte ænänitapa. Tömengä iñömö guidömëmæ wæænte ömengö tæi æbæ godente æmæwo wængantapa. ¹⁹ Mänömaĩ wængä ëñëinque Eedotadëe quëwënäni tömänäni, ‘Wepæ onguipo ba awædö,’ ante tömënäni näni tededö Atedämæ pemönänitapa. ²⁰ Edæ Ämotamini näni Angaintaa iimaĩ ante dobæyedë yewæmongatimpa.

‘Tömengä oncö æmæwo önonconque bacæimpa.

Wacä mänincönë cöwë quëwënämaĩ incæcäimpa.’

Ante näni Ämotamini Angainta bai do batimpa. Ayæ,

‘Tömengä në aacä bate nänö cæquënëno incæ wacä badinque cæccæcäimpa,’

ante yewæmonte ongompa,”

²¹ Ante apænedinque Pegodo godömenque iimaĩ ante apænecantapa.

“Mänömaĩ iĩ inique Codaa wodi në nänö cæquënëno incæ edæ wacä cæccæcäimpa, ante ñöwo mönö apænte angæimpa. Awënë Itota imæca mönö tönö guëa cægongäñedë wadäni godongämæ në cægöninäni inänite adinque mönö iimainö ante apænte ængæimpa. ²² Wäö wodi nänö guidöñedë cægöningue ñöwoönæ Itota nänö æite goönæ ganca æcänö æcänö mönö tönö godongämæ cægöninäni inänii, ante adinque mönö adocanque ingante apænte ængæimpa. Apænte æmö ate tömengä, Itota dobæ ñäni ömæmongantapa, ante në againgä inte wæætë mönö tönö godongämæ apænecä incæcäimpa.”

²³ Ante Pegodo angä ëñente cædinque tömënäni wæætë, Æcänö æcänö në againäni inänii, ante adinque mënaa inate apænte ænänitapa. Adocanque Ootee, Badatabato näni änongä inte tömengä mæmæ beyæ, Yoto, ante näni pemongaingä iñongante tömënäni tömengä ingante apænte æninque edæ wacä

ingante Mäatiya ingante apænte ænte gönönänitapa. ²⁴ Mänömaï apænte æningue Wængongui ingante apænedänitapa. “Awënë eñëmi. Mönitö æbänö pönëmönii, ante tömää eñëmi inte bitö iina inate adinque æcänö ingante do apænte ængabii, ante odömömi amönii. ²⁵ Edæ Codaa wodi tömengä nänö pante wænguinque oda cæcantapa. Ininque bitö ñowo wacä ingante da godömi godinque Codaa wodi nänö cæquënënte ante cæcæcäimpa, ante ämii, ante wæmönipa.”

²⁶ Ante Wængongui ingante apænedinque tömënäni, Æcänö inaa, ante eñencæte ante cædinque dicamö æningue, Wo godö wo godö cæyömö to ta wææ acæi, ante cæte ayönäni Mäatiya nänö cæ to ta wæænca adinque, Mönö imonte Itota da godongä nê godimö onompo tipæmpoga go adocanque iñomonte tömengä mönö cabo badinque godongämæ cæcæcäimpa, ante cægadänimpa.

2

Wængongui Tæiyæ Waëmö Önöwoca pongampa

¹ Tömëmö incadepo ba ate Pentecotee ææmænoca näni äönæ iñonte tömënäni näni cabo adoyömö ponte godongämæ ongönänitapa.

² Ongonte eñëñönäni woboyæ nanguï pæmænte ä bai iñontobæ öönæde pö eñëñönäni oncönë näni ongoncönë tömancönë wææ guite bai woboyæ nanguï pæmænte ä bai eñënänitapa.

³ Ayæ woadäniya incæ gonga bai onguënë onguënë bæco adänitapa.

⁴ Ayönäni Wængongui Tæiyæ Waëmö Önöwoca incæ tömänäniya pö guicä ewocadänitapa. Pö guidinque Wængongui Önöwoca pönö cæcä beyænque tömënäni wadäni näni tededö bai wadäni näni tededö bai mä apænedänitapa.

⁵ Mäniñedë oodeoidi Wængongui ingante guñente quëwënäni inte edæ wabæca wabæca tömämä quëwëninque ñowo Eedotadëe ponte quëwënönänimpa. ⁶ Iinäni iñömö

woboyæ nanguï pæmænte bai ä eñente wædinque ponte eñëñönäni Itota ingante nê pönënäni iñömö ñowo pönäni näni tededö bai tededäni eñënänitapa. Adocanque nänö tededö bai wacä nänö tededö bai tededäni eñëninque tömënäni, Æbänö cæte tömämä tededö bai tededäni eñëmönii, ante wædänitapa. ⁷ Tömënäni nämæneque apænedinque,

—Iñæmpa Gadideabæ quëwëninäni inte iinäni mänömaï tededäni awædö.

⁸ Ininque ædö cæte mönö eñagäimæ mönö tededö bai tededäni eñëmöö, ante ancaï guñente wædänitapa.

⁹ Edæ iñömö nê ongömö iñomonte pancadäniya Padatiabæ quëwente pönömö wadäni guiquënë Mëediabæ, Edämæ, Mëetopotämiabæ, Oodeabæ, Capadotiabæ, Pontobæ, Atiabæ quëwente pönäni inänipa. ¹⁰ Wadäni guiquënë Pidiguiabæ, Pampidiabæ, Equitobæ quëwente pönäni inänipa.

Wadäni guiquënë dibiabæidi inäni inte Tidëne iñömö quëwente pönänipa. Wadäni guiquënë Odömä iñömö quëwëninque eñacæ ante ponte owodänipa. ¹¹ Odömä iñömö nê quëwëninäni iñömö pancadäniya oodeoidi eñagäinäni iñönäni pancadäniya wæætë wadäni incæ oodeoidi pönënäni bai adodö pönente oodeoidi bai bagäinäni inänipa. Ayæ wadäni guiquënë codetenteidi tönö adabeidi inte pönäni inänipa. Ininque mönö wabæca wabæca quëwëninque wadäni näni tededö bai wadäni näni tededö bai nê tedemö imompa. Incæte iinäni guiquënë, Wængongui waa pönö cæcä ingampa, ante mönö tededö bai mä pönö tededinque apænedäni eñëmompa töö.

¹² Ante wædinque tömënäni näni cabo nämæneque apænedinque,

—Æbänö eñëmöö, ante wæmönipa töö.

¹³ Ante wæyönäni pancadäniya babæ apænedinque,

—Biinömæ miimæ tömo pönö bedinque dowænäni inte tededänipa, ante badete togadänimpa.

¹³ Ante wæyönäni pancadäniya babæ apænedinque,

—Biinömæ miimæ tömo pönö bedinque dowænäni inte tededänipa, ante badete togadänimpa.

Pegodo tömënäni inänite apænenecampa

14 Mänömaï tedeyönäni Pegodo iñömö önompo tipæmpoga go adocanque inäni tönö ængæ gantid-
inque nanguï tedecä eñengadänimpa.
“Oodeoidi eñeedäni. Ayæ wamini
guiquënë Eedotadëe iñömö ñowo
ponte owomini inte minitö oodeoidi
tönö tömämäni eamonca ongonte
eñeedäni. Botö, Æbänö i, ante
edonque apænebo eñencæminimpa,”
angantapa.

15 “Gäwadecæ impa diyæ ti nämæ
bete dowænte baquïnänii. Iñæmpa
nænque ayaönäa ææñongä ædö
cæte mini änö bai bete dowænte
baquïnänii. 16 Wæætë Wængongui
beyæ nê apænegaingä Ooedo
wodi do nänö angainö bai ñowo
cædänipa, ante apænebo eñeedäni.
Ooedo wodi iñömö iimainö ante
yewæmongacäimpa.

17 ‘Wængongui iimäi angampa, an-
gacäimpa.

Iinque bayedë botö Önöwoca ingante
tömänäniya ämo pö guicä
ëwocacædänimpa.

Mäniñedë onquiyænäni incæ
onguiñænäni incæ

minitö wänäni inönäni inte botö beyæ
apænecædänimpa.

Edëninäni iñömö ate bai mä pönä
acædänimpa.

Picænäni guiquënë nö wüimonte bai
acædänimpa.

18 Ayæ botö Önöwoca ingante ämo pö
guicä ëwocadinque

onguiñænäni incæ onquiyænäni
incæ

botö beyænque nê cædäni inönäni inte
botö beyæ apænecædänimpa.

19 Edæ mini ææmö ate pönenguinque
ante botö öönädë mä cæbo
acæminimpa.

Ayæ imæca adobai pönö cæbo
ate wepæ gonga täämä
nanguï mongæ adinque
eñencæminimpa.

20 Edæ nænque täno wentamö bayö
apäicä wepæ emö ba acæimpa.

Ayæ ate tömengä nänö ponguionæ
iñonte

Wængongui Awënë incæ tæi piñængä
inongä inte

ñäö apäite bai emöninque poncæcäimpa.

21 Iinque botö emöwo ante nê aa
pedäni iñömö

tömänäni botö æmo beyænque
quëwencædänimpa.’

Ante Wængongui Awënë cæcæcäimpa,
ante Ooedo wodi yewæmongacäimpa.”

22 Ante apænedinque Pegodo
godömenque iimäi ante apænecantapa.

“Idægoidi, apænebo eñeedäni. Itota
Näatadeta nê quëwengaingä näwangä
botö nê da pönongä ingampa, ante
pönencæminimpa, ante mä cædinque
Wængongui Itota tönö godongämæ tæi
piñænte nanguï cæcä ate Itota minitö
weca bamönengæ cædinque nanguï
cægacäimpa. Iinque mänömaï cæcä
nê agaimini inte minitö, Näwangä
Itota ingante Wængongui da pönongä
ponte cæcampa, ante do eñëmäniya.

23 Wængongui nämä pönëninque,
Codito ingante tömënanäni nempo
pædæ godoncæboimpa, ante do an-
gaingä inte, Minitö tömengä ingante
æninque mänömaï cæcæminimpa,
ante do eñengacäimpa. Iinque minitö
iñömö Itota ingante bæi ongonte
æninque eñente cædämaï inäni
nempo pædæ godöninque, Minitö
tömengä ingante awäa timpodinque

wææ tiwate wænödäni, ante ämini
wænönänitapa. Mänömaï önönecaque
tedete beyæ minitö tömëmini edæ nê
wænömäni bai bamäniya töö. 24 Minitö
mänömaï wadäni tönö cædinque
wænömäni beyæ Itota iñömö mönö
wænguënämämo teemë mongænte
caate wædinque wængacäimpa. Ayæ
pæ opate öñöñongante Wængongui
wæætë, Idæwaa, ante wi ænote
bai cædinque angä ate Itota ñäni
ömæmante ta pongantapa. 25 Adocä
Codito beyæ ante apænedinque
awënë Dabii wodi iimäi ante
yewæmongacäimpa.

‘Botö, Mönö Awënë cöwë botö
weca mä ongongampa, ante
atabopa.

Iinque tömengä botö tömëmæ inö
töö æmænte ongongä iinque

‘Botö, Mönö Awënë cöwë botö
weca mä ongongampa, ante
atabopa.

Iinque tömengä botö tömëmæ inö
töö æmænte ongongä iinque

botö imote ædö cæte bæ tadāni wæquimoo.

26 Mänömaï beyæ botö, Watapæ bacæimpa, ante mīmōnē pōnēmo inte botö önōneca ämotamīni ante bai nanguï tobopa.

Botö ñāni ömæmonguinque nē wæwocabo imopa, ante pōnēmo inte botö guiññate wädāmaï inte baö eñate quëwencæboimpa.

27 Wængonguï eñēmi. Botö waodāni nāni wænte ongōñōmō öñōñōmote bitö emō cæte godāmaï incæbiimpa.

Bitö imite nē cæbo inte botö tömēmi cædö ante cōwē cæbo iñōmote bitö ædæmō wææ aabi ate botö baö ñōmäädāmaï incæboimpa, ante edæ botö do eñēmopa.

28 Taadö botö quëwenguinö ante bitö do odömōmi agaboimpa.

Bitö weca æidinqe bitö awinca ad-
inque watapæ tocæboimpa,
ante awēnē Dabii wodi ämotamīni
ante bai apænegacäimpa.”

29 Ante apænedinque Pegodo godömenque apænegantapa. “Iñānāni ñōwo edonque apænebo eñenguēnē quëwēmini. Mönö mæmæ Dabii wodi do wængacäimpa. Tömengä mao do daga wengadänimpa. Edæ tömengä wodido nāni wengaiñōmō ñōwo ganca a ongö amīnipa. 30 Incæte tömengä ingante Wængonguï, Dabii eñēmi, angacäimpa. Bitö pæināni wææ pæyönāni adocanque ingante botö bitö awēnē containpaa pönö cönōmo contadinque tömengä iñōmō nē Awēnē bacæcäimpa, ante apænegä eñēninque awēnē Dabii wodi Wængonguï beyæ nē apænegaingä inongä inte edæ, Wængonguï tömengä nānō änö bai cōwē cæcæcäimpa, ante do eñengacäimpa. 31 Ayæ, Æbānō cæquingä, ante do eñengaingä inte tömengä, Mönö Codito iñōmō waodāni nāni wænte ongōñōmō öñōñongante Wængonguï emō cæte godāmaï inte wææ aacä beyænque tömengä baö incæ ñōmäädāmaï

ingæimpa, ante apænegacäimpa. Mänömainö ante apænedinque awēnē Dabii wodi, Mönö Codito ñāni ömæmoncæcäimpa, ante do apænegacäimpa. 32 Itota ingante Wængonguï, Ñāni ömæmōe, angä ñāni ömæmongantapa. Iñinque mäninö tömengä nānō ñāni ömæmongainö ante nē adimōni inte mönitö tömämōni edæ, Nawangä impa, ante nē apænemōni imōnipa.”

33 “Iñinque Wængonguï angä beyænque Itota inque ingä öönæde æidinqe Wængonguï tömëmæ inö tæ contate ongongampa. Ayæ Mæmpo Wængonguï, Botö Önöwoca ingante æncædänimpa, ante nānō nē angaingä ingante do godongä æninque Itota wæætē mönitö imōnite ñōwo da pönongä ænte ewocamōnipa. Iñinque mīnitö guiquēnē gonga bæco ate wæmīnitawo. Wadāni nāni tede bai tedemōni eñente wæmīnitawo. Edæ Wængonguï Önöwoca pönö cæcä beyænque gonga bæco amīnipa. Wængonguï Önöwoca pönö cæcä beyænque wadāni nāni tede bai tedemōni eñēmīnipa. 34 Itota öönæde inque ingä æicä bai awēnē Dabii wodi wīi adobaï æigacäimpa. Incæte tömengä godömenque apænedinque iīmaï ante yewæmongacäimpa.

‘Awēnē Wængonguï incæ botö Awēnē ingante apænedinque,
Nē Awēnē imi eñēmi. Botö tömëmæ inö tæ contayōmi,

35 botö bitö imite nē pīinte cædāni inānite bæ tabo ate bitö tömēnāni inānite pīnā gāwate bai cæcæbiimpa, ante Awēnē Wængonguï angacäimpa,” ante Dabii wodi yewæmongacäimpa.

36 Ante apænedinque Pegodo godömenque iīmaï angantapa. “Mänömaï beyæ mīni idægocabo tömāmīni, Iīmainö ante nawangä pōni impa, ante eñencæmīnimpa. Māningä Itota ingante mīnitö ñænquedimæ gönonte wænömīni nē wæningä ingante ante apænedinque Wængonguï incæ, Itota nē Awēnē inongä ingampa,

ante ayæ, Nè Codito inongä ingampa, ante edæ do cægacäimpa.”

³⁷ Ante Pegodo apæ necä eñëninque tömënäni, Æ, wënæ wënæ cæte awædö, ante ancai guiñente wædinque Pegodoidi inänite,

–Iñänäni, æbänö cæquënëmöni imöni.

³⁸ Äñönänite Pegodo wæætë,

–Iimäi cæedäni. Minitö wënæ wënæ mini cædinö ante Wængongui pönö ñimpo cæcæcäimpa, ante cædinque, Æmæwo wënæ wënæ cætabopa, ante Itota Codito emöwo ante apænedinque æpænë guiedäni. Mänömaï cæmini adinque Wængongui tömengä Önöwoca ingante da pönongä ænte ewocacæminimpa.

³⁹ Edæ minitö iminite aa pecä incæ mini wënäni inänite aa pecä incæ gobæ quëwënäni inänite aa pecä incæ ayæ ate quëwënäni inänite aa pecä incæ mönö Awënë Wængongui nänö në aa pedäni inänite apænedinque, Botö äno bai cöwë cæcæboimpa, angampa.

⁴⁰ Ante apænedinque Pegodo godömenque nanguï äninque, Eñenguënë quëwënänii, ante wantæpiyæ apæ necantapa.

–Nöwodäni iñömö nämanque näni cæinënö ante idiquibæ näni cæi bai minitö adobaï cædämaï inte nöingä cæte waa quëwëedäni.

⁴¹ Ante Pegodo ancaa angä eñëninque pancadäniya Ao äninque æpænë do guidänitapa. Iñinque edæ mäniönæ todee miido ganca inäni mänimpodäni wede pönëninque do pönengainäni tönö adocabodäni bagadänimpa. ⁴² Iinäni iñömö adocabodäni badinäni inte cöwë ñimpo cædämaï ininque godongämæ pö pö cæyönänite Itota nänö da godongainäni apænedäni eñënönänimpa. Ayæ näni pönencabo inönäni inte wacä ingä wacä ingä watapæ apænedinque päö pä ænte godongämæ cæninque Wængongui ingante cöwë apænete quëwënönänimpa.

Näni pönencabo godongämæ waa cæte quëwënänipa

⁴³ Iñinque edæ tömänäni guiñente wædinque ee quëwënönänimpa. Ayæ Itota nänö da godongainäni iñömö, Tömänäni pönencädänimpa, ante cædinque Wængongui Tæiyæ Waëmö Önöwoca tönö cædinque tömënäni näni pönëninque ante mä cædinque bamönengæ nanguï cædönänimpa. ⁴⁴ Nè pönënanäni tömänäni adoyömö pö pö cædinque tömënäni näni mänincoo incæ, Tömämö qui impa, ante në pönëninque, Wacä ingä wacä ingä mönö godongämæ godonguinque mämompa, ante cædönänimpa. ⁴⁵ Mäincoo tönö ömæ näni eädincoo incæ godonte æ godonte æ cædinque wadäni në ömaadäni inte wædäni inänite pancæ pancæ godönänimpa. ⁴⁶ I ñinque iimö iñö iimö iñö adoyömö pöninque Wængongui oncö ñænæncönë yabæcönë në guï guï cædäni inte mimöno nö pönëninque tömënäni oncönë adobaï päö pä ænte watapæ todinque godongämæ cænönänimpa. ⁴⁷ Tömënäni edæ Wængongui ingante, Waa pönï në cæbi imipa, ante ancaa äñönäni wadäni edæ tömënäni inänite waa adönänimpa. Ayæ mönö Awënë pönö cæcä ate tömënäni edæ, Itota Codito ængä beyænque mönö quëwengæimpa, ante pönëninque iimö iñö wacabomö iimö iñö wacabomö në pönënanäni badinque edæ tæiyænäni bagadänimpa.

3

Cömäwaingä ingante äna waa bawacampa

¹ Iñcayæ ate nænque ædæ wæicä ate oodeoidi näni cöwë Wængongui ingante apænedöñedë Pegodo tönö Wäö iñömö Wængongui oncönë ñænæncö yabæcönë guicæte ante æidatapa. ² Æite ayöna wadäni pöninque cömäwaingä eñate në pædingä ingante næænte mämönäni pongä adatapa. Iñgä cömäwaingä iñömö në pö guidäni inänite, Pönömi æmoe pönömi æmoe, ancæcäimpa, ante cædinque tömënäni tömengä ingante iimö iñö iimö iñö næænte pö

næænte pö cædinque edæ Wængongui oncö ñænæncö boyæ yabædemö, Wainemö, näni änemö yabæque cö cædonänimpa. ³ Ìniquè ñöwo Pegodo tönö Wäö Wængongui oncö ñænæncönè yabæcönè pö guicæ cæda adinque tömengä tömëna ìnate, Pönömina æmoeda, angantapa. ⁴ Angä èñëninque Wäö tönö tömengä ingante cöwä adinque Pegodoque apæñecantapa.

—Mönatö imönate ææmö æe.

⁵ Angä èñëninque cömäwaingä, Botö imote wabänö pönöna ænguimo, ante pönëninque ææmö ayongä ⁶ Pegodo ìñömö,

—Quinö mämopa pönömo ænguimii. Edæ oodo incæ tigitamö incæ ömæpobo imopa. Wæætè tæiyæ waëmö botö ewocadö ante bitö imite pönö apænebo ate bitö æe. Näatadeta quëwengaingä Itota Codito emöwo beyænque bitö dao dao goe, angacäimpa.

⁷ Äninque Pegodo cömäwaingä tömëmæ inö pædæ wææmpo bæi ongonte töö æmængä ate cömäwadingä önöwa tönö önöncaiwa tæi piñæwacä.

⁸ Ate ìñontobæ ængæ gantite dao dao gocantapa. Ayæ Wäö tönö Pegodo miñæ Wængongui oncö ñænæncönè yabæcönè godongämæ go guidique dao dao go togæi togæi godinque Wængongui ingante waa ate apænedinque, Wængongui, bitö cöwë waa pönö inömi inte pönö cæbi æmopa, ante nangui apæñecantapa.

⁹ Wængongui mänömai waa cæcampa, ante nangui pönöi tededinque dao dao gocä adinque edæ tömänäni,

¹⁰ Æ, ìingä ìñömö, Pönömi æmoe pönömi æmoe, ante Wængongui oncö ñænæncö boyæ yabædemö, Wainemö, mönö änemö gäänè mönö nè äñecöningä adocä ingampa. Ante adinque, Quinö bai cæte waa bacäi, ante ancai guñente wægadänimpa.

Tadömöo yabætaa ongonte Pegodo apæñecampä

¹¹ Mänii cömäwaingä ìningä incæ Pegodo tönö Wäö ìnate winimä winimä cæcä adinque wadäni tömänäni

guñente wædinque Tadömöo yabætaa näni äñömö pogodo ponte tömënäni weca guidänitapa. ¹² Guidäni adinque Pegodo, “Mini idægocabo èñëedäni. Mönatö imönate quinante waa aminii. Mänömai waa bawacä adinque edæ quinante guñente wæminii. Mönatö edæ, Tömengä dao dao gocæcäimpa, ante cædinque tæiyæ waëmöna imönapa diyæ tæi piñænte cæquimönaa. ¹³ Abadäo wodi Itæca wodi Aacobo wodi tömënäni, Mönö Wængongui inongä ingampa, ante näni nè angaingä inte Wængonguinque cæcä ate waa bawacampa. Mönö wæmæidi Wængongui incæ, Itota botö imote nè cædongä ñäö bai emöñongante tömengä ingante waa acädänimpa, ante mänömai cæcampa. Adocä Itota ingante minitö ìñömö, Wænongæimpa, äninque pædæ godöminitapa. Ayæ Pidato, Nimpö cæbo gocæcäimpa, ante apænte angä ate minitö wæætè Pidato weca ongöninque adocä ingante ante Baa äminitapa. ¹⁴ Ìniquè nè Tæiyæ Waëmö inongä inte nö cæyongante minitö Baa äninque wæætè nè wænöningä ingante ante äninque, ìingä ingante ñimpö cæbi pongæe, äminitapa töö. ¹⁵ Ìniquè mönö quëwenguimämo nè pönongä ingante Baa äninque minitö nè wænönimäni iminipa. Incæte Wængongui tömengä ingante, Näni ömæmoe, angä ñäni ömæmongantapa. Ìniquè tömengä ñäni ömæmongä nè adimöni inte mönitö, Æbänö cægacäimpa, ante adodö ante nè apænemöni imönipa. ¹⁶ Adocä Itota emöwo ante apænemöna èñente pönëninque mäningä cömäwadingä mini nè adingä ìñömö ñöwo tæi piñæwacampa. Edæ Itota pönö cæcä beyæ mänii onguiñægä nè pönengä badinque Itota emöwo beyænque ædæmö waa bawate tæi piñægä bacä aminipa,” ante Pegodo apæñecantapa.

¹⁷ Ayæ godömenque apænedinque Pegodo, “Nöwo botö tönöñämäni èñëedäni. Minitö awënëidi èñënamäi

näni cæi bai cædinque mīnitō iñōmō adobai, Æbānō nō cæquī, ante ēñēnāmaī inte cæmīnitapa, ante awædō. ¹⁸ Incæte mīnitō mǎnōmaī ēñēnāmaī cædinque Wængonguī beyæ nē apæneganāni tōmānāni nāni apænegaī bai do iinque cæmīnīpa. Tōmēnāni, Mōnō Codito caate wæte wæncæcāimpa, ante nāni angainō bai mīnitō cædi beyæ ñōwo iinque batimpa. ¹⁹ Iinque mīnitō wēnæ wēnæ mīni cædinō ante wæwente pōnente ñimpo cædinque wentamō mīni mongænō mīni ñā mēnongaquinque Wængonguī gāmænō pōedāni. ²⁰ Mōnō Awēnē weca mīni wampo pōnenguinque pōedāni. Ayæ Wængonguī, Mīnitō Codito poncæcāimpa, ante do nānō angaingā inongā inte Itota mīnitō weca poncæcāimpa, ante tōmengā gāmænō pōedāni.”

²¹ “Incæte edæ, Tōmancoo do ingai bai adobai bacoocæimpa, ante Wængonguī badoncæcāimpa, ante tæiyæ waēmō ingaināni Wængonguī beyæ doyedē apæneganāni. Wængonguī mǎnōmaī nānō badompoga Itota iñōmō mǎnimpoga oōnædē quēwencæcāimpa anguēnē. ²² Edæ Mōitee wodi, ‘Botō wænte gobo ate mīnitō Awēnē Wængonguī wæætē mīnitō beyæ cædinque mīni cabo iñōmīnite adocanque ingante apænte Ao ante æncæcāimpa. Tōmengā ingante āinque, Mōitee wodi botō beyæ nē apænecā ingaingā bai bitō adobai edæ botō beyæ nē apænebi bacæbiimpa, ancæcāimpa. Wængonguī mōnō Codito ingante mǎnōmaī angā iinque tōmengā wæætē nē apænecā bagacāimpa. Iinque mīnitō iñōmō tōmengā quiēmē ante apæneyongā ēamonca ongonte tōmānō ante ēñencæmīnīpa. ²³ Iinque edæ māningā Wængonguī beyæ nē apænecā ingante æcānō ēñēnāmaī ina iñōmō, tōmengā guidēnāni weca quēwēnāmaī edæ wæncæcāimpa,’ ante Mōitee wodi apænecāimpa,” ante Pegodo apænecantapa.

²⁴ Ayæ apænedinque Pegodo,

“Æpodānidō Wængonguī beyæ nē apæneganāni ināni. Edæ tōmēnāni Tāmoedo tōnō ayæ pōnāni tōnō tōmānāni adoyōmō apænedinque Codito ñōwoōnæ nānō cædō ante apæneganāni. ²⁵ Iinque mīnitō guiquēnē Wængonguī beyæ nē apæneganāni wēmīni inōmīni inte tōmēnāni nāni angainō ante nē ænguimīni imīnīpa. Ayæ edæ Wængonguī, Botō pōnō cæbo ate Ao āmīni iinque mōnō godongāmæ waa cæcāimpa, ante nānō angainō ante mīnitō edæ mīni quēwenguinque ēñente quēwencæmīnīpa. Abadāō wodi ingante apænedinque Wængonguī, ‘Abadāō ēñēmi. Mīnitō mīni quēwencabo tōnō wadāni tōmāmæ quēwēnāni nāni cabo nāni cabo tōnō tōmāmīni iñōmīnite bitō Pæingā pōnō waadete cæcā beyænque waa quēwēninque tocæmīnīpa,’ ante apænecāimpa. ²⁶ Wængonguī, Botō Wengā pōnō aa pecā ēñēninque mīnitō wæætē wēnæ wēnæ cæte mīni gogainō ocæ ēmænte wadæ pōninque wæætē waa quēwenguinō cægōninque waa tocæmīnīpa. Ante cædinque tōmengā tāno mīnitō beyæ ante tōmengā ingante nē cædongā mōnō Codito ingante da pōnongā pongacāimpa,” Ante Pegodo iinque apænecāimpa.

4

Pegodo tōnō Wāō awēnēidi weca gongænte apænedapa

¹ Pegodo tōnō Wāō tōmānāni inānite tæcæ apæneyōna wadāni tōmēna weca māo godongāmæ pōnānitapa. Iināni iñōmō nē, Wængonguī quī, ante godōnāni tōnō Tadoteoidi tōnō Wængonguī oncō ñænæncō ante nē wææ wānōnāni awēnē tōnō mǎnīnāni pongadāni. ² Itota ñāni ōmæmongā bai mōnō adobai ñāni ōmæmongæimpa, ante Pegodo tōnō Wāō apænedapa, ante do wædōnāni inte tōmēnāni ñōwo pīinte māmō pōnānitapa.

³ Pōninque tōmēnāni iñāna inate bæi ongōnānitapa. Ayæ wēmō ba

īnque baänæ ate nāna taquinque tōmēna īnate tee mōnedāni guīdatapa. ⁴ Incæte tōmēna āna nē ēñēnāni guīquēnē pancadāniya nanguī īnāni incæ nē pōnēnāni bagadānimpā. Īnque onguīñænāni nāni nē pōnencabo īñōmō wodo tinco mīdo ganca īnāni mānimpodāni baī bagadānimpā.

⁵ Baänæ ate oodeoidi awēnēidi tōnō tōmēnāni īnānite nē aadāni nāni Picæncabo tōnō nē odōmōnāni tōnō Eedotadēē īñōmō godongāmæ ponte ongōnānitapa. ⁶ Wængonguī quī, ante nē godongā ñænængā pōni Ānato ponte a ongōñongā tōmengā guīdēnāni Caiapato Wāō Adecantodo tōnō wadāni tōmengā guīdēnāni incæ tōmengā weca godongāmæ pō guīdānitapa. ⁷ Pō guīdinque edæ Wāō tōnō Pegodo īnate tæcæguedē māmō gōnōnāni gongæñōna ānānitapa.

—Mīnatō æcānō tōnō tæi pīñænte cæmīna ate cōmāwadingā waa bawacantawo. Edæ æcānō ēmōwo apænete cæmīnāi.

⁸ Ante āñōnāni Pegodo īñōmō Wængonguī Tæiyæ Waēmō Ōnōwoca tōnō apænedinque,

—Awēnēidi īmīni ēñēedāni, nē aamīni mīni Picæncabo ēñēedāni. ⁹ Cōmāwaingā æbānō cæte waa bawacāi, āmīnitawo. Edæ cōmāwaingā ingante mōna waa cædi beyænque mīnitō ñōwoönæ pōnō apænte āmīni awædō. ¹⁰ Īnque mīnitō tōnō idægoidi wadāni tōnō botō tōmāmīni īmīnite adoyōmō apænebo ēñencæmīnimpā. Itota Codito Nāatadeta quēwēningā ingante awæ ñænquedīmæ cæte mīni nē wænōningā ingante Wængonguī angā do ñāni ōmæmongacāimpā. Tōmengā adocā Itota ēmōwo beyænque cōmāwaingā īningā tæi pīñængā badinque mīnitō weca a ongongā apa ānewēmīni. ¹¹ Edæ wainca nē mænōnāni nāni wido cædinca incæ wacā, Tæcæ manca pōni tæi manguimpā, ante cōnongampā. Itota īñōmō māninca baī ææmonga pōni ongongampā.

¹² Īnque Itota, Quēwencæmīnimpā, ante mōnō īmonte ængā baī wacā ædō cæte adobaī ænguingā. Itota ēmōwo beyænque quēwencæmīnimpā, ante pōnō cægāingā inte Wængonguī wæætē, Wawo adobaī ī, ante dicæ pōnō cæcantawogaa. Īñæmpā inguipoga tōmāmæ īñōmō edæ æcāmenque incæ adobaī nē tæi pīñænte ēmōnongā īñōmō edæ dæ angampā, ante apænedatapa.

¹³ Ayæ Pegodo tōnō Wāō ōnōnaque īna inte nanguī adāmaī īna incæte edæ guīñēnāmaī edonque apænedapa, ante adinque tōmēnāni, Æbānō cæte edæ do ēñēnatawoo, ante wædinque, Itota mīñæ nē godīna inte do ēñēnapā. Nāwangā impā, ante wædānitapa. ¹⁴ Edæ cōmāwadingā īningā tōmēnāni weca a ongongā adinque tōmēnāni ædō cæte wadō ante tedequīnāni. ¹⁵ Īnque tōmēna īnate, Mōnitō godongāmæ Apænte Āincabo weca ongōnāmaī godōmenque goeda, ānāni goda īnque, Tōmēna īnate æbānō cæquī, ante pōnēninque godongāmæ tedecōnānitapa. ¹⁶ Īmaī ante apænedānitapa.

—Mānīna īnate quīnō cæquīmōō. Īñæmpā tōmēna tæi pīñænte bamōnengæ cædatapa, ante Eedotadēē quēwēnāni, Nāwangā impā, ante tōmānāni do ēñēnānīpa. Īnque, Waa cædāmaī īnatapa, ante mōnō ædō cæte anguī. ¹⁷ Incæte mānīnō nāni apænedō ante wadāni wīi godōmenque ēñencædānimpā, ante wææ cædinque mōnō tōmēna īnate wææ angæimpā. Mānīi ēmōwo ante mīnatō mīna wæquinque apænemīnapā. Wacā æcāmenque ingante apænedāmaī imāeweda, ante mōnō wææ angæimpā, ante nāmāneque tededānitapa.

¹⁸ Ayæ īnque tededinque Wāō tōnō Pegodo īnate āñete māmōnāni pōna adinque tōmēna īnate wæætē, Ēñenguēnē quēwēmīnaa, ānānitapa. Edæ mīna panguinque ante Itota ēmōwo ante apænemīna. Īncayæ ate tōmengā ēmōwo ante apænedinque

edæ adopoque incæ odömönämaï imäeweda. ¹⁹ Ante äñönänite Pegodo tönö Wäö wæætë,

—İñæmpa æcänö ingante ëñente cæquimöna, ante pönëminii. Minitö änö ëñëninge wæætë Wængongui nänö änö ëñënämaï inte cæmöna adingue Wængongui edæ, Nö cæmïna abopa, anguingää. ²⁰ Edæ möna adinö ante möna ëñënö ante ædö cæte apænedämaï inguimönaa.

²¹ Ante apæneda ëñente wædinque awënëidi wæætë, Mini panguingue, ante ancaa apænedänitapa. Incæte wadäni, Cömäiningä ingante Wængongui waa pönï cæcantapa, ante watapæ apænedäni ate wædinque awënëidi wæætë Wäö tönö Pegodo inate pancæte ante cædinäni inte, İñæmpa waodäni pïlnäni iningue mönö æbänö cæte panguimöö, ante guïñente wædinque pänämaï inte ñimpo cædäni godatapa. ²² Edæ waa në bawadingä iñömö do coadenta wadepo ayæ godömenque tömengä nänö ëñadi iñonte Wængongui bamönengæ cæcä waa bacä adingue tömänäni ædö cæte wadö ante pönenguinänii.

Wede pönente tæi piñænte cæcæmönimpa, ante Wængongui ingante apænedänipa

²³ Mänii ñimpo cædäni godingue Pegodo tönö Wäö iñömö tömëna tönö godongämæ pönënanï weca ponte apænedingue, Wængongui quï, ante në godönäni ñænænäni tönö në aadäni nänï Picæncabo iñömö mönatö imönate iïmaï änäni wætämönapa, ante tömänö ante adodö ante apæneda. ²⁴ Eñëninge tömënanï nänï pönencabo adoyömö pönëninge Wængongui ingante adotedæ tedete apænegadänimpa. “Awënë Wængongui ëñëmi. Tæiyæ Awënë inömi inte bitö öönæ owocoo tömancoo inguipoga tömämæ gäwapæntibæ tömämæ badöninge öönæde owodäni yæipodë quëwënanï gäwapäa owodäni æyömömë quëwënanï tömänäni inänite bitö adobique badongabiimpa. ²⁵ İningue mönitö mæmæ Dabii wodi ingante apænedingwæætë bitö, Dabii ëñëmi, Bitö botö imote në

cædömi iñömite botö Tæiyæ Waëmö Önöwoca apænecä ëñëninge bitö wæætë iïmaï ante apænecæbiimpa.

‘Wadäni në ëñënämaï inäni incæ quïnante ænguï badingue wido cæcæte ante cædänii.

Waadäni nänï cabo waodäni nänï cabo incæ idiquibæ ante quïnante pönënanitawo.

²⁶ Inguipoga awënë odeyeidi, Wido cæcæimpa, ante tæi gongænte ongönänipa.

Pancabaa awënëidi adobai, Æbänö cæquimöö, ante godongämæ pönëninge

mönö Awënë ingante ayæ tömengä nänö në öni pæcadongä Codito ingante pïinte anewënanipa töö, ante apænebi ëñëninge mæmæ Dabii wodi wæætë bitö beyæ apænegacäimpa.”

²⁷ Ante Wængongui ingante apænedingue ñöwodäni nänï pönencabo godömenque apænedänitapa. “Wængongui ëñëmi. Tömëmi Wengä bitö Tæiyæ Waëmö inongä iñongante bitö, Botö imote në cæbi bacæbiimpa, ante öni pæcagabiimpa. Näwangä impa. Incæte bitö imite në cædongä iñongante İtota bitö në öni pæcadongä ingante edæ Edode tönö Pontio Pidato tönö idægoidi tönö wadäni tönö pïinte adoyömö ponte möni quëwëñömö incæ ongöninge bitö imite në cædongä ingante, Æbänö cæte wido cæquï, ante do cædänitapa.

²⁸ Edæ bitö tæi piñæmi inömi inte nämä pönëninge edæ, İmaï baquinö angüenë, ante do angabiimpa. Tömënanï guiquenë bitö angainö bai wæætë cædinque pïinte pö gongænte cædänitapa. ²⁹ Nöwo iñömö bitö imite në cæmöni iñömönite ñöwodäni pönö pïinte änäni ate wædinque bitö wæætë pönö cæbi ate mönitö tæi piñëninge bitö änö ante guïñënämaï apænecæmönimpa.

³⁰ Ayæ në wënæ wënæ inäni inänite bitö önompoca pönö gampobi ate waa bacædänimpa, ämönipa.

Awæ bitö Wengä İtota Tæiyæ Waëmö iñongante mönitö tömengä

ëmöwo apænedinque, Wadäni pönencädänimpa, ante mä cædinque bamönengæ cæmöni adinque tömënäni guiñente wæcädänimpa ämönipa,” ante Wængongui ingante apænedänitapa.

³¹ Ìnque apænedäni ate tömënäni näni godämæ ongöñömö incæ iñontobæ ocæ ocæ cætapa. Cæyö tömänäni inänite Wængongui Tæiyæ Waëmö Önöwoca pö guicä æninque ædæmö ewocadinque tömënäni Wængongui nänö änö ante guiñenedämaï inte edonque apænegadänimpa.

Tömämö mönö quincöo impa, ante cædänipa

³² Ayæ tömänäni näni pönencabo incæ tömënäni näni ewocadö adodö ewocate bai inäni inte mimönë adodö ante pönëninque tömënäni eadincöo incæ, Botö qui impa, ante änämaï inäni inte, Tömämö mönö qui impa, ante pæ gompodämaï inönänimpa.

³³ Ayæ Itota nänö da godongainäni iñömö tæi piñænte apænedinque, Itota Codito ñäni ömæmongantapa, ante cöwë näni apænedi bai apænedönänimpa. Edæ Wængongui tömënäni inänite waadete pönö cæcä ate watapæ quëwënönänimpa. ³⁴ Ayæ tömënäni näni cabo incæ æcämenque ömæpocä i iñömö edæ dæ angantapa. Edæ ömæ näni eadi incæ godonte æninque oncö mænonte näni eadi incæ godonte æninque tömënäni näni godonte æninta ænte pöninque

³⁵ Itota nänö da godongainäni weca ænte mämö ñö cædäni æninque tömënäni wæætë ömæpodäni inänite godönäni eyepæ eyepæ ænönänimpa. ³⁶ Ìnque Itota nänö da godongainäni iñönäni adocanque Debiï wodi pæingä Ootee ingacäimpa. Tömengä iñömö, Wadäni wampo pönente quëwencädänimpa, ante në ædæmö apænedongä iñongante wadäni tömengä ingante Bedënabee ante pönö pemongadänimpa. Ìngä Ootee Bedënabee näni pemöningä iñömö Tipidebæ quëwente pöningä inte edæ, ³⁷ tömengä ömæ eadi

godonte æninque tömengä nänö godonte æninta Itota nänö da godongainäni weca mämö ñö cægacäimpa.

5

Änäniya tönö Tapidæ

¹ Mäniñedë Änäniya näni änongå tömengä nänöogængä Tapidæ tönö tömënäni näni cæi bai cædinque ömæ nana eadimæ godonte ænatapa.

² Ayæ nänöogængä eññongä tömëna godonte nana æninta incæ Änäniya iñömö pancataa pæ gompote æninque wæætë pancataa ænte mämö Itota nänö da godongainäni weca ñö cæcantapa. ³ Ñö cæcä adinque Pegodo,

—Änäniya eññemi. Tatäna ingante ædæmö entawëmi inte ömæ beyæ bitö æninta pancataa, Botö qui, ante awëmö ñö cædinque edæ pancataa ænte mämö ñö cædinque bitö, Tömanta impa, ante quimæ anewëë. Ìñæmpa, babæ cædämi inte bitö Wængongui Tæiyæ Waëmö Önöwoca ingante babæ ämipa töö. ⁴ Edæ bitö ömæ ini incæ bitö qui cöwë intapa. Ayæ ñöwo mäninta æninque, Æbänö cæquii, ante tömëmi në ämi imitapa. Ìnque edæ mimöno pönëninque quimæ wapiticæ cæbitawo. Bitö mänömaï cædinque waodäni inänite wii babæ apænedinque Wængongui ingante babæ apænebitapa töö.

⁵ Angä eññente wædinque Änäniya iñömö tæ wæænte æmæwo wængantapa. Wængä adinque tededäni eññëninque tömänäni guiñente wädänitapa. ⁶ Wængä ìnque edëninäni ponte wini caate næænte mäo daga wënänitapa. ⁷ Dobæ wængä ate todee ooda go ate tömengä æbänö wængä ante eññänämaï ìningä inte tömengä nänöogængä incæ pö guicä. ⁸ Adinque Pegodo tömengä ingante,

—Apænebi eññemoe. Minatö ömæ godöninque mänimpota æminatawoo. Äñongä,

Ao, mänimpota.

⁹ Angä eññëninque Pegodo wæætë,

Mīnatō iñæmpa edæ guëa pönëninque, Mönö Awënë Önöwoca æbänö pangüingää, ante quimæ cæminatawo. Edæ bitö nänöogængä baö ini në daga wëninäni incæ do dao dao pönäni ëñëmi. Edæ bitö baö adobai ænte gocædänimpa töö.

¹⁰ Tæcæ ante añongä onquiyængä iñömö tömengä önöwa gäänë tæ wææninque näñe wængantapa. Wængä ate mänii edëninäni pö guite ayönäni dobæ wænte a öñongä adinque tömengä baö ini æninque tömengä nänöogængä wōdido gäänë mao daga wënanitapa. ¹¹ Mänömai näñe wænapa, ante tededäni ëñëninque Coditö ingante näni në godongämæ pönencabo tönö wadäni tömänäni ancai guiñente wægadänimpa.

Ate ëñencædänimpa, ante bamönengæ nanguï cædänipa

¹² Mäniñedë Itota nänö da godongainäni iñömö Wængongui Önöwoca tönö cædinque, Ate pönencædänimpa, ante wadäni ayönäni mä cædinque bamönengæ nanguï cædönänimpa. Ayæ adoyömö pönëninque tömänäni Wængongui oncö Tadömöo yabæcönë näni änoncönë pö guii pö guii cædönänimpa. ¹³ Wadäni tömënanäni inänite adinque, Në pönënanäni waa quëwënanäni inänipa, ante pönënanäni incæte guiñente wædinque godongämæ pö guidämai gomö adönänimpa. ¹⁴ Pancadäniya guiquënë onguiñænäni tönö onquiyænäni tönö nanguï inäni mönö Awënë ingante ñowo pönënanitapa. Iñäni iñömö do pönëninäni tönö adocabodäni bacoo inäni bagadänimpa. ¹⁵ Iñinque mänii bamönengæ cædäni adinque wadäni wënæ wënæ inäni inänite ænte pöninque möimoga möincodë ñö cædänitapa. Edæ, Pegodo nænque pämo wodo pänta goyongä tömengä gänëñömö öñöninque adocanque adocanque waa bacædänimpa, ante cædinque Pegodo nänö goquino ante ænte mämö ñö cædäni öñönänitapa. ¹⁶ Ayæ adobai Eedotadëe eyequei

wayömö näni quëwëñömö wayömö näni quëwëñömö quëwëninque wadäni wënæ wënæ inäni inänite næænte mämö næænte mämö cönönäni ate tömänäni waa badänitapa. Ayæ wënæ në wentamö ewocadäni inte yewænte wæwënanäni inänite adobai ænte mämö pöninque waa badänitapa.

Itota nänö da godongainäni inänite piinte tee mönedänipa

¹⁷ Wængongui qui, ante në godongä ñænængä pöni inongä tönö wadäni tömengä tönö godongämæ cædäni incæ Tadoteoidi inönäni inte, Näni ömæmönämai ingæimpa, ante në pönënanäni inönänimpa. Iñinque Itota nänö da godongainäni mänömai waa cædäni ate wædinque awënë tönö Tadoteoidi iñömö tömënanäni inänite piinte agadänimpa. ¹⁸ Iñinque Itota nänö da godongainäni inänite yao ongonte æninque tömänäni ayönäni tee mönedänitapa. ¹⁹ Tee mönedäni wæcöñönänite Wængongui anquedo woyowotæ ponte odemö wi ænete mantacä tayönänite apænecantapa. ²⁰ “Goedäni. Wængongui oncö ñænæncö yabæcönë go guite næ gongæninque mīnitö mäniiñömö pönäni inänite apænedinque, Wængongui pönö cæcä beyænque mönö quëwengæimpa, ante ædæmö apænemini ëñencædänimpa.”

²¹ Angä ëñente cædinque tömënanäni baönæ ñäo bayonte Wængongui oncö ñænæncö yabæcönë do go guidinque odömönte apænedäni ëñënanitapa.

Mänömai do go guite apænedänipa, ante ëñënamäi inäni inte edæ, Wængongui qui, ante në godongä ñænængä pöni inongä guiquënë tömengä tönö godongämæ cædäni tönö adoyömö pö guidänitapa. Pöninque tömënanäni idægoidi inänite në aadäni Picænäni godongämæ näni Apænte Änoncabo tömänäni inänite äñete pönänitapa. Iñäni wæætë tontadoidi awënëidi inänite äninque, Mīnitö tee möneincönë gote Itota nänö da godongainäni inänite äñete mämömini poncædänimpa. ²² Änäni

tee möneincönë gote ayönāni edæ dæ änāni ante wædinque wææ wänönāni awënëidi gode ancæ pöningue, ²³ iimaï ante apænedānitapa.

—Gote ayömöni oncö ædæmö tee mönete intapa. Ayæ tontadoidi odemö pöni a ongönāni adinque mönitö go wi ænete guiyömöni edæ dæ änāni ate wædinque wadæ pömönipa. ²⁴ Ante tededāni eñëningue, Wængonguï qui, ante nê godönāni ñænænāni tönö Wængonguï oncö ñænæncö ante nê wææ wänönāni tæiyæ awënë tönö guñente wædinque, Ñöwo quiëmë bai bacæimpa. ²⁵ Ante wæyönāni wacä do pö guidinque tömënāni inānite,

—Aquënë quëwëmini. Mänināni mīni tee mönedināni incæ Wængonguï oncö ñænæncö yabæcönë go guite a ongöninque mäniñömö pönāni inānite odömonte apænedāni eñënāni ataquedāni.

²⁶ Ante apænecä eñente wædinque wææ wänönāni awënë tömengä nänö wææ wänoncabo tönö Itota nänö da godongaināni inānite æncæ godinque, Godongämæ ongönāni incæ piinte tacadāni wæcæ wæ, äninque pänāmaï inte ee ænte pönānitapa. ²⁷ Ænte pöninque nê aadāni Picænāni godongämæ nāni Apænte Änoncabo weca ænte mämö gönönāni gongæñönānite, Wængonguï qui, ante nê godongä ñænængä pöni inongä iñömö tömënāni inānite angantapa.

²⁸ —Mäningä Itota emöwo apænedinque wadāni inānite odömönāmaï imæwedāni, ante ancaa antamönipa töö. Incæte mīnitö mänine mīni odömonte änewënö ante Eedotadë tömāo odömonte apænemīnipa. Ayæ godömenque tedewëningue mīnitö, Mäningä nê wængaingä ingante awënëidi nê wënæ wënæ cædināni inānipa, ante mönitö imönitedö ante änewëminipa töö.

²⁹ Ante nê ñænængä püñongä Pegodoidi wæætë,

—Mönitö guiquënë waomīni imīnite eñënāmaï inte Wængonguï ingante eñente cæquënëmöni imönipa.

³⁰ Mīnitö Itota ingante ñænquedimæ timpote wænömīni wængä ate mönö wæmæidi Wængonguï incæ angä ñāni ömæmongantapa. ³¹ Ayæ nê ñāni ömæmöningä ingante apænedinque Wængonguï, Bitö, Quëwencædänimpa, ante nê Æmi bacæbiimpa, angacäimpa. Nê Æmi iñömite idægoidi tömänāni, Idæwaa wënæ wënæ cæte quëwente awædö, ante botö gämænö poncædänimpa, ante cæcæbiimpa. Bitö æmi beyænque botö tömënāni inānite pönö waadete ñimpo cæcæboimpa. Ante cædinque edæ Itota nänö Awënë baquinque Wængonguï æmonga ænte mäicä æidinque Wængonguï tömëmæ inö tæ contate ongongampa. ³² Itota ingante Wængonguï ænte mäicä æigacäimpa, ante nê adimöni inte mönitö mäninö ante nê apænemöni imönipa. Ayæ nê eñëmö cæmö iñömonte Wængonguï tömengä Tæiyæ Waëmö Önöwoca ingante da pönongä ænte ewocamompa. Tömengä Önöwoca adobai mönitö tönö godongämæ nê apænecä ingampa, ante Pegodoidi apænedānitapa.

³³ Mänömaï apænedāni eñëningue awënëidi ænguï badinque tömënāni inānite edæ wænoncæ cædānitapa.

³⁴ Mäniñedë adocanque Paditeocä incæ tömengä emöwo Gämadiedo tömënāni nāni wææ angainö ante nê eñengä iñongante tömänāni tömengä ingante waa adönānimpā. Ininque tömënāni nāni Apænte Äincabo wænoncæ cæyönāni mäningä iñömö tömënāni nāni nê waadecä inongä inte ængæ gantidinque, Itota nänö da godongaināni inānite oncodo mantamīni wantæ ongoncædänimpa. ³⁵ Angä dæ godāni ininque Gämadiedo wæætë awënëidi inānite apænecantapa.

—Idægoidi eñëedāni. Mänināni inānite æbänö cæquīi, ante ædæmö pönente ate edæ ee cæedāni. ³⁶ Edæ doyedë wacä Teodo adobaingä ængæ gantidinque, Botö nê nanguï cæbo imopa, ante añongante edæ tömengä miñæ coatodo tiento ganca ināni godānitapa, ante pönëedāni.

Tömengä ingante wadäni mäo wänönäni wängä ate tömengä emiñæninäni wæætē nāwæ godäni ate edæ dæ batimpa. ³⁷ Ayæ ate edæ awēnē, Minitō emōwo ponte yewæmoncæminimpa, ante nänö äniñedē wacä Gadideabæ quēweningä Oodaa adobaï awēnē ingante wido cæcæte ante ængæ gantiyongä nanguï inäni tömengä miñæ goyönäni tömengä ingante wänönäni wängä ate nāwæ adobaï gogadänimpa. ³⁸ Ìninqe, Mänömaï batimpa, ante pönente cædäni. Nöwo iñömö iinäni adobaï ængæ gantidäni adinqe mīnitō tömēnāni inänite ee ate gomö aedäni ämopa. Tömēnāni waodänique inte cædäni baï ædö cæte cæquinānii. Edæ dæ bacæimpa. ³⁹ Wæætē Wængonguï angä eñente cædäni baï mīnitō ædö cæte Baa ante wido cæquimīni. Edæ mīnitō mänömaï cædinque Wængonguï ingante pūimīni inte wæbaïminipa.

Ante wææ angä eñente wædinque Ao ante tömengä nänö änö baï cædänitapa. ⁴⁰ Itota nänö da godongainäni inänite aa pedäni pönäni ate awēnēidi, Pædäni, änäni eñēninqe nē wææ wänönäni æmontaimenca tæi tæi pänänitapa. Ayæ awēnēidi godömenque, Itota emōwo ante apænedämaï imæwedäni, ante äninqe Itota nänö da godongainäni inänite ñimpo cædäni godänitapa. ⁴¹ Nē Apænte nāni Äincabo weca ongonte tao godinque tömēnāni wæætē, Wængonguï mönō imonte adinqe, Botö Wēñængä emōwo beyæ wadäni wēnæ wēnæ änäni ate mīnitō eyepæ inte caate wæcæminimpa, ante do cæcampa, ante pönēninqe edæ nanguï togadänimpa. ⁴² Ìninqe Wængonguï oncö ñænæncö yabæcönē incæ waodäni oncönē incæ tömēnāni ñimpo cædämaï inte cōwē go guï go guï cædinque cōwē odömonte apænedinque, Itota tömengä nāwangä mönō Codito ingampa, ante watapæ apænedäni eñengadänimpa.

6

Ticete ganca inäni nē nēnempodäni badänipa

¹ Itota ingante nē tee empote quēwēnāni mäniñedē nanguï inäni badäni ate pancadäniya guidiego tededö nē tededäni iñömö ebe-deo tededö nē tededäni inänite piinte äninqe, Minitō mini cabo owæmpoinäni inänite iimö iñö iimö iñö cænguï eyepæ godöninque möni cabo owæmpoinäni inänite pönönämaï iminipa töö, ante änäni. ² Itota nänö nē da godongainäni iñömö dote ganca inäni iñönänite wadäni, Dote inänipa, ante pemonte baï apænedönänimpa. Ìinäni iñömö guidiegoidi mänömainö ante wædänipa, ante eñente wædinque wadäni Itota ingante nē tee empote quēwēnāni inänite äñete godongämæ pönäni ate tömēnāni inänite,

—Wængonguï nänö apænedö ante nē apænequēnemöni inte mönitö ædö cæte möni cæquēnēnö ante ñimpo cædinque cænguinque ante godonguimönii. ³ Ìninqe botö tönñamini eñēedäni. Mīni pönencabo nämä cōwä adinqe, Æcänö æcänö Wængonguï Önöwoca tönö äawocaque baï ewocate nö cædäni inänii, ante adinqe mīnitö tiæte ganca inäni mänimpodäni inänite apænte æedäni. Apænte æmīni adinqe mönitö tömēnāni inänite, Cænguï nē godömīni bacæminimpa, ämöni eñente cæcædänimpa. ⁴ Mönitö wæætē Wængonguï ingante cōwē apænedinque Wængonguï nänö apænedö ante godömenque odömonte apænedinque mäninonque cæte quēwencæmönimpa.

⁵ Mänömainö ante eñēninqe tömēnāni nanguï inäni inönäni inte tömänäni Ao ante edæ, Ìinäni mänömaï inänipa, ante adinqe iimäi emönäni inänite apænte ængadänimpa. Adocanque Etebä nē wede pönengä inte Wængonguï Tæiyæ Waemö Önöwoca tönö äawocaque baï ewocacä inongäimpa. Tömengä tönö Pedipe, Podocodo tönö Niicänodo, Timönö tönö Padömēna, ayæ Antioquiya iñömö nē quēweningä Niicodato.

Īingä ĩñömö oodeoidi näni pönönö bai pönengä inte do oodeo bai bacä ĩnongäimpa. Mänimpodäni ĩnänite apænte ænänitapa. ⁶ Apænte æninque Itota nänö nē da godongainäni weca ænte mämö gönönäni ongöñönänite ĩnänĭ ĩñömö, Minitö nē godömini bacæminimpa, ante cædinque tömēnāni ĩnänite gampodinque Wængonguĭ ingante apænedänitapa.

⁷ ĩnĭnque Wængonguĭ nänö apænedö ante gode ä gode ä cædinque mäo apænedäni eñēnönänimpa. ĩnĭnque Eedotadēē ĩñömö Codito miñæ nāni tee empote quēwencabo tæiyænāni yebænte bagadänimpa. Wængonguĭ quĭ, ante nē godönāni incæ adobai nanguĭ ĩnāni wede pönēninque eñente bagadänimpa.

Etebä ingante bæi ongönänipa

⁸ Etebä ĩñömö Wængonguĭ waadete pönö cæcä ate tæi piñænte ewocadongä inte bamönengæ nanguĭ cædongäimpa. Ayæ, Cæbo ate pönencædänimpa, ante mä cæcä adinque godongämæ ongönäni pancadäniya, Æbänö cæcää, ante wædänitapa. ⁹ Wadäni guiquēnē Etebä tönö guëa wæætedö wææte ancæte ante cædänitapa. ĩnänĭ ĩñömö oodeoidi ĩnönāni incæ pancadäniya Tidēnebæ quēwēnināni ĩñönāni pancadäniya Adecantodia ĩñömö quēwēnināni ĩñönāni pancadäniya Tiditiabæ quēwēnināni ĩñönāni pancadäniya Atiabæ quēwēnināni ĩnönänimpa. Tömēnāni doyedē wadäni ĩnänite nē cægaināni ĩnönāni inte ñowo abæ tawænte godināni ĩnönāni inte godongämæ pöninque adocabodäni bai badināni ĩnönänimpa. Tömēnāni odömöincö ante, Möni nē Abæ Tawænte Gocabo Odömöincö impa, ante pemönönänimpa. ĩnĭnque tömēnāni pancadäniya Etebä ingante wæætedö wææte ante cæyönāni, ¹⁰ tömengä nē nō eñēnongä inte Wængonguĭ Önöwoca tönö godongämæ apæncä eñēninque tömēnāni, Æ mönö wææte ædö cæte wææ anguĭi, ante wædänitapa.

¹¹ ĩnĭnque nē wæætedö wææte änāni adodäni incæ wadäni ĩnänite godö awēmö änänitapa. Minitö babæ ante ĩ incæte, Möitee wodi ingante ante Etebä godö wēnæ wēnæ apæncä eñentamönipa, ante önonque ædäni. Ayæ Wængonguĭ ingante adobai tömengä godö wēnæ wēnæ ante babæ apæncä eñentamönipa töö, ante incæ ædäni, ante nē abæ tawænte godināni änänitapa. Mänömainö änāni Ao ante tömēnāni nāni angainö bai cædinque Etebä ingante ante babæ ante piñänitapa. ¹² Mänömainö ante babæ ante piñāni eñēninque wadäni önönänique incæ nē aadäni nāni Picæncabo incæ nē odömönāni incæ tömänāni ænguĭ badänitapa. Mänömai ænguĭ badinque tömēnāni Etebä wodi ingante bæi ongonte nē Apænte nāni Äincabo weca ænte mäo gönönāni ongongantapa. ¹³ Pancadäniya Etebä ingante ante babæ apænedinque ĩmai änänitapa. ĩngä ĩñömö ñimpo cædämai inte cöwē Wængonguĭ oncö tæiyæ waēmö oncö ĩñonte wiwa tedewēninque tömengä godömenque Möitee wodi nänö wææ angainö ante godö wiwa ante babæ apæncä eñentamönipa. ¹⁴ ĩñömö oncö ante apænedinque adocä Etebä ĩñömö, Itota Näatadeta nē quēwēningä ĩi oncö bæ tadete wido cæcæcäimpa, ante anewengampa. Ayæ adocä Itota ĩñömö, ĩmai cædäni, ante Möitee wodi nänö wææ angainö ante Ao änāmai inte edæ, Wadö ante cæquēnemini ĩminipa, ante odömongampa, ante ĩngä Etebä ĩñömö adobai anewengä eñentamönipa töö, ante babæ apænegadänimpa.

¹⁵ Mänömai babæ apænedäni eñēninque nē Apænte nāni Äincabo incæ Etebä ingante cöwä ayönāni tömengä awinca Wængonguĭ anquedo nänö emönö bai emongä agadänimpa.

7

Etebä nämä wææ apæncampa

¹ ĩnĭnque, Wængonguĭ quĭ, ante nē godongä ñænægä pönĭ ĩnongä ĩñömö Etebä ingante äninque, Bitö

imitedö näni äninö näwangä intawoo.
² Äñongante Etebä wæætē iimāi ante nāmā wææ apæ necantapa. “Botö wæmpoidi eñeedäni. Botö tönifnamini eñeedäni. Mönö wæmæ Abadäo wodi Mëetopotämiabæ ayæ quëwëninque Cadäna iñömö ayæ quëwencæ godāmaï iñongante Wængonguï nē ñäo apāite bai emönongä inte Abadäo weca ponte a ongongä agacäimpa.
³ Ayæ Abadäo ingante apænedinque Wængonguï, ‘Bitö guidënanäni inänite emö cæte bitö omæ emö cæte godinque wabæca botö odömonguimæca æmæwo wadæ goe,’ angacäimpa.
⁴ Angä eñente cædinque Abadäo wodi mäniömæ Cadeabæ emö cæte wadæ godinque Cadäna näni quëwëñömö ganca pöninque quëwengacäimpa. Ayæ tömengä wæmpo wodi wængä ate Wængonguï tömengä ingante angä eñëninque Abadäo iimæca mönö ñöwo quëwëmæ ponte quëwengacäimpa.”

⁵ “Incæte Wængonguï, Tömëmi omæ, ante Abadäo wodi ingante cabo incæ omæ pönönāmaï ingacäimpa. Wæætē Abadäo wodi wëñængä mæmpo ināmaï iñongante Wængonguï, iimæ incæ bitö ænguimæ iñonte bitö pæināni adobæ tömäo quëwencædänimpa, ante odömongacäimpa. ⁶ Ayæ godömenque apænedinque Wængonguï, Bitö pæināni iñömö wabæca gote mänimæ quëwënanäni weca quëwëñönänite iināni wæætē bitö pæināni inänite edæ ö ænte bai cædinque, Mönitö beyænque cæedäni, ante nangui änāni wæcædänimpa. Ayæ tömënanäni nempo wantæpiyæ coatodo tiento wadepo ganca mänimpoga quëwëñönänite adodäni wënæ wënæ cædäni beyæ caate wæcædänimpa. ⁷ Ante Wængonguï godömenque apænedinque, ‘Bitö pæināni inänite nē ö ænte wënæ wënæ cædäni inänite botö wæætē apænte äninque pancæboimpa. Ayæ iincayæ ate bitö pæināni mäniömæ tömënanäni näni caate wædiömæ emö cæte wadæ pöninque iimæca wæætē pöninque botö Wængonguïmo iñömote botö

beyæ cæquināni inänipa.’ ⁸ Äninque Wængonguï, Mönö godongämæ cæcæimpa, ante pönö cæbo ate minitö wæætē Ao ante eñente cæcæminimpa. Mänömaï ante cædinque minitö onguifæminique eö togænte caate wædinque eñencæminimpa. Angä eñëninque Abadäo wodi wëñængä Itæca eñacä ate tömengä nänö eñadi adoque Wængonguï itædē go ate tömengä ingante eö togængacäimpa. Itæca wodi pæte wææ Aacobo wæmpo bagacäimpa. Aacobo wodi pæte wææ dote ganca inäni tapæicä wææ mönö wæmæidi wodi baquinque pægädänimpa.”

⁹ Ante apænedinque Etebä godömenque, “Mänināni mönö wæmæidi ingaināni iñömö tömënanäni biwi Ootee ingante ante adinque piinte wædinque tigitamö beyænque pædæ godönāni ö æninque Equitobæ ænte mäodäni gogacäimpa. Equitobæ pöninque tömënanäni godonte æncæte ante cædinque Ootee wodi ingante mäniñömö quëwängä nempo pædæ godönāni awënë beyænque cæte quëwengantapa. Mänömaï quëwängä incæte tömengä tönö godongämæ Wængonguï cöwë cægacäimpa. ¹⁰ İninque Ootee wodi ingante nangui wiwa cædäni wæyongante Wængonguï cöwë wææ aacä quëwengacäimpa. Ayæ Wængonguï pönö apæ necä eñëninque nē eñente bayongante Equitobæ tæiyæ awënë Padaönö incæ tömengä ingante waa adinque, Botö tæiyæ awënë imo bai bitö wodo adobai badinque Equitobæ wædænque awënë bacæbiimpa. Ayæ adobai botö awënë onconcoo bitö aacæbiimpa, angacäimpa.”

¹¹ Ante apæ necä eñëñönāni Etebä godömenque, “Mänifedē Equitobæ tömäo Cänämæ tömäo to aminte bayonte tepæmpo gæwænte wædönänimpa. Mönö wæmæidi cængui æncæte ante cædinque ænāmaï inönänimpa. ¹² İninque, Equitobæ cængui ayæ mæ öñompa, ante tededäni eñëninque wæmpocä Aacobo wodi mönö mæmæidi nē baquināni

inänite äninque, Botö wëmini, Equitobæ godinque cænguï ænte pöedäni, angä mä gogadänimpa. ¹³ Gote pöninque ayæ wæætë mempoga gote a ongönäni adinque Ootee wodi incæ tömengä mëmöidi inänite, Botö minitö biwimo ëñagaimö imopa, angä wægadänimpa. Ayæ, Ootee guidënanäni do pönänipa, ante tededäni ëñëninque awënë Padaönö ingante gode änäni edonque ëñengacäimpa. ¹⁴ Ayæ ate Ootee wodi tömengä wæmpo Aacobo wodi näni pæincabo tetenta i tinco ganca mänimpodäni äñecä gogadänimpa. ¹⁵ Aacobo wodi mänömaï Equitobæ gote quëwëninque wængacäimpa. Ayæ tömengä pæinänäni wææ mönö wæmæidi ingainäni inte adobai mäniñömö gote quëwente wængadänimpa. ¹⁶ Abadäo wodi wëenëñedë, Mönitö wodido, ante Caämödo wënäni näni änimpota mänimpota godonte æninque Tiquemö iñömö ömæ godonte ænongäimpa. Ante do againäni inte mönö wæmæidi ñöwo Aacobo wodi bayetoca ingai Cänäamæ ænte pöninque, ayæ iincayæ ate wææ tömengä wënäni bayetoca ingai Abadäo wodi nänö ængaimæ tömënanäni wodido ingaiñömö mämö daga wengadänimpa.”

¹⁷ Ante apænedinque Etebä godömenque apænecantapa. “Abadäo wodi ingante Wængonguï wëenëñedë nänö, Botö wantæpiyæ ate bitö pæinänäni inänite adodö ænte mämömo poncädänimpa, ante nänö angaiñedë wodo iinque bayonte tömënanäni Equitobæ quëwëninque nanguï bacoo yebænte bagadänimpa. ¹⁸ Mäniñedë wacä onguiñængä ñöwocä incæ, Ootee wodi æcänö ingacäi, ante ëñënamai inongä inte Equitobæ awënë bagacäimpa. ¹⁹ Tömengä iñömö mönö guidënanäni wodi inänite wapiticæ ante wënæ wënæ cægacäimpa. Tömengä, Minitö wëñænäni tæcæ ëñadäni inänite wido cæedäni, ante piingä ëñente wædinque mönö wæmæidi wodi incæ tæcæ ëñadäni inänite

yabæque wido yabæque wido cædäni wængadänimpa.”

²⁰ “Tömënanäni mänömaï näni cægaiñedë incæ Möitee wodi ëñate pægacäimpa. Tömengä waëmö wëñæ iñongante Wængonguï waa acampa, ante pönëninque mëa go adoque apäicä go ate tömengä ingante mæmpo oncönë pæ gom-pote pæpogada pæcantapa. ²¹ Ayæ, Wënönäni wæncæ wæ, ante guinente cædinque tömëna tömengä ingante yabæque gäwapæ yædopæ wo cæda ongöñongante awënë Padaönö wengä onquiyængä adinque, Botö wë, ante cædinque Möitee ingante ænte pæpogacä pægacäimpa. ²² Mänömaï cæcä beyæ equitoidi näni ëñengainö ante tömänö ante odömönäni ëñente pædinque Möitee wodi në angä baquinque nanguï cæcä baquinque tæi piñænongä inte pægacäimpa.”

²³ Ante Etebä godömenque apænedinque, “Ayæ æmæwo pædinque coadenta wadepo nänö ëñagaiñedë Möitee wodi, Idægoidi botö töninadäni inänite ëñacæ gobote, ante ëñacæ gocantapa. ²⁴ Gote ëñayongä, Equito onguiñængä incæ botö guidengä ingante wiwa cæcä caate wæcampa, ante adinque Möitee wodi tömengä guidengä ingante wææ cæcæte ante cædinque tiyænö tiyæ cædinque Equito onguiñængä ingante wænongä wængacäimpa. ²⁵ Edæ, Wængonguï botö imote äninque, Bitö idægoidi inänite ö ænte mäobi wadæ gocädänimpa, ante do angä ëñentabopa, ante do ëñëningä inte Möitee wodi, Idægoidi adobai ante ëñente pönencädänimpa, ante pönente cæyongä tömënanäni wæætë mäninö ante ëñënamai ingadänimpa. ²⁶ Mänömaï i iinque Möitee wodi iimö ate ponte ayongä idægoda wæætedö wæætë cæda adinque, ‘Iñäna, mina guidencaya incæ wacä ingante quimæ wënæ wënæ cæte quëwëminaa.’ ²⁷ Ante, Guëa waa waadete quëwencädäimpa, ante cæyongä adocanque tömengä guidengä ingante në wënæ wënæ

cædingä guiquënë Möitee wodi ingante bæ tadinque angantapa. 'İñæmpa, Bitö mönitö awënë inömi imipa, ante, Nē apænte āmi imipa, ante æcānō bitö imite nē ānai.' ²⁸ Edæ Equito ingante iimō bitö wænōmi bai ñōwoönæ adobai botö imote wænoncæte ante pönēmi awædö. ²⁹ Angä eñente wædinque Möitee wæætē wodii winongacäimpa. Wodii winonte wabæca Mäadiāmæ gote wadāni ömæ quëwëninque wëñæna mënaa wæmpocä bagacäimpa."

³⁰ Ante apænedinque Etebä godömenque awënëidi inänite iimāi ante apæñecantapa.

"Ayæ wæætē coadenta wadepo go ate Möitee wodi önömæca cægöninque onquiyabo Tinaiquidi gämænö gote dadi emænte ayongä ocãñequiwæ gonga bæcoyömö Wængonguï anquedo ponte a ongongä agacäimpa.

³¹ Ate wædinque Möitee wodi, Quinö bai inte bæco ante botö wiimonte bai aboo, ante acæte ante pönömenque pönongante mönö Awënë tömengä ingante iimāi ante apænegacäimpa.

³² 'Bitö wæmæidi Wængonguïmo inömo inte botö Abadäo wodi Itæca wodi Aacobo wodi Wængonguïmo inömo imopa.' Ante apænecä eñente wædinque Möitee wodi do do wäate guñente wædinque, Wii ainente awædö, ante cægacäimpa. ³³ Mänömai cæyongante mönö Awënë wæætē, 'Bitö næ gongænte ongöñömö botö adoyömö ongömo beyænque onguipoi tæiyæ waëmö impa, ante pönëninque bitö awæncata gä tadöwæ ämopa.

³⁴ Botö edæ cöwä adinque, Botö quināni inänite equitoidi æbänö wënæ wënæ cædānii, ante do abopa. Tömënanī caate ö ö wædāni do eñente wædinque botö, Nimpö cæbo ate abæ tawænte gocædānimpa, ante wææ pömo imopa. Nöwo iñömö edæ ægodöe. Botö, Equitobæ gocæbiimpa, ante bitö imite adodö da godömo gocæbiimpa, ante Wængonguï Möitee wodi ingante angacäimpa."

³⁵ Ante apænedinque Etebä iimāi ante godömenque apæñecantapa.

"Adocä Möitee ingante püinque idægoidi doyedë, 'İñæmpa, Bitö mönitö awënë inömi imipa, Nē apænte änömi imipa, ante æcānō bitö imite nē ānai,' ante änönānimpa. Nöwo iñömö Wængonguï anquedo ocãñequi iñömö pöninque tömënanī nāni nē püingängä adocä Möitee ingante, Bitö idægoidi awënë bacæbiimpa, angacäimpa. Bitö tömënanī inänite ö æninque ænte mäobi abæ tawænte gocædānimpa, ante cædinque Wængonguï bitö imite da godongä gocæbiimpa, ante Wængonguï beyæ apænedinque Wængonguï anquedo angacäimpa. ³⁶ Möitee iñömö, Ate pönencædānimpa, ante mä cædinque ayæ Wængonguï tönö bamönengæ nanguï cædinque idægoidi inänite ænte mäocä gogadānimpa. Equitobæ emö cæte wadæ pöninque gäwapæntibæ Opatawæmæ yæwedecapæ pö ongöninque adocä Möitee mantacä imæmäa pongadānimpa. Önömæca ta pöninque coadenta wadepo ganca cægöñönāni tömengä, Ate pönencædānimpa, ante mä cædinque bamönengæ nanguï cægacäimpa," ante Etebä wodi apæñecantapa.

³⁷ Ayæ, "Adocä Möitee, Idægoidi eñëedāni. Botö Wængonguï beyæ nē apænebo imo bai wacä edæ minitö töninacä incæ adobai edæ Wængonguï beyæ nē apæñecä bacæcäimpa. Tömengä ponte apæñecä eñëninque minitö tömengä ingante ædæmö eñente cæcæminimpa, ante Möitee wodi apænegacäimpa. ³⁸ Godongämæ nāni Wængonguï ingante apæneincabo tönö Möitee wodi önömæca cægönongäimpa. Mönö mæmæidi tönö cægöñönāni Wængonguï anquedo wëñëñedë Tinaiquidi nē ponte äningä incæ adocä tönö Möitee wodi önömæca cægönongäimpa. Mäniñedë mönö imonte ante pönö cædinque Wængonguï, Möitee eñëmi, angacäimpa. İncayæ quëwenguināni eñente quëwencædānimpa, ante cædinque botö, Minitö cæte quëwenguimīni, ante apænebo

ēñēninque bitō adodō ante yewæmoncæbritepæ æntinque mīnitō mīni badōninca ante apænecāimpa,” ante Etebā adoca Mōnoco mīni ānonca apænecantapa. beyæ

³⁹ Ayæ, “Mōitee wodi mǎnōmaī cæyongante mōnō wæmæidi guiquēnē ēñēnāmaī īnāni inte tōmengā ingante Baa ānīnque Equitobæ mōnō adodō gocæimpa, ante ōnōwēnenque pōnente wægadānīmpa. ⁴⁰ Mǎnōmaī nē wædōnāni inte tōmēnāni wæætē Aadōō wodi ingante apænedinque, ‘Aadōō ēñēmi. Māningā, Equitobæ nē ēmō cæte mōnō īmonte māmōningā Mōitee wodi ædōnō gote dæ angāā, ante adāmaī īmōnīpa cæbīi. Wængonguīdi īnānīpa, ante mōnō īmonte nē tōō æmæante ænte goquīnāni ante bitō badōmi æmōnie.’ ⁴¹ Ānīnque māniñedē, Mōnō wængonguī ingampa, ante cædinque tōmēnāni wagada wē baī badongadānīmpa. Ayæ, Mōnō wængonguī quī impa, ante cædinque cænīnāni wænōninque baō tōmēnāni nāni badōinca gāānē ænte māmō ñō cædinque ōnompoca nāni badōinca adīnque ææmæ baī cæte togadānīmpa. ⁴² Mǎnōmaī cædāni ate wædinque Wængonguī nāēmæ, Pōnē cæmīniyaa, ante pīngacāimpa. Ayæ, Īnāni ōōnædē owocooque ante, Wængonguīdi īnānīpa, ante oda cæcædānīmpa, ante cædinque idægoidi īnānite ñīmpo cædinque dadi ēmæninque aadāmaī ingacāimpa. Edæ mānīnō tōmēnāni nāni cægāinō baī ante pōnente yewæmōninque wacā wantæpiyæ ate Wængonguī beyæ īīmaī ante yewæmongacāimpa.

‘Idægoidi ēñēdāni. Ōnōmæca gote coadenta wadepo ganca cægōninque mīnitō,

Wængonguī quī, ante pōnoncæte ante cædinque cænīnāni wænōninque baō tōnō māincoo ænte pō ænte pō cæmīni incæte dicæ botō īmote ante pōnēninque pōnōmīni æntawogaa.

⁴³ Īñæmpa, Mōnō wængonguīdi īñōnānite ædæ wæænte apænecæimpa,

æmontaicō oncō næænte godinque wocæ wocæ cædōmīni awædō. Ayæ waca, Mōni wængonguī Adem-paō nēmō baī owocæimpa, ante mīni badōninca næænte æmonga cō cæ cō cæ cædōmīnīmpa tōō.

Ante adīnque Wængonguī, Mǎnōmaī cæmīni beyæ botō mīnitō īmīnite

Babidōnia ganca da godōninque godōmenque gobæ da godōmo gocæmīnīmpa,

angampa, ante yewæmongatīmpa.” Ante apænedinque Etebā, Mōnō wæmæidi īīmaī cægadānīmpa, ante godōmenque apænecantapa.

⁴⁴ “Wængonguī doyedē Mōitee wodi ingante apænedinque, Mīnitō æmontaicō mænonte ate botō wææ ante yewæmōninca cō cæte mancæmīnīmpa. Īīmaī mænoncæmīnīmpa, ante odōmongā adīnque Mōitee wodi wæætē mōnō wæmæidi īnānite odōmongā ate ēñēninque tōmēnāni wæætē Wængonguī nānō odōmōnō baī mǎnōmaīnonque æmontaicō mænongadānīmpa. Mǎnōmaī mænonte ate dica wææ ante Wængonguī nānō yewæmongainca incæ mānīncōnē cō cægadānīmpa.

Ayæ ōnōmæca wayōmō wayōmō gocæte ante æmontaicō capote mongænte māo wocæ wocæ cægadānīmpa. ⁴⁵ Ayæ wadāni māniōmæ nē quēwēnāni īñōnānite Wængonguī wido cæcā ate mōnō wæmæidi Ootowee wodi mīñæ

ponte ōmæ ænīnque Wængonguī oncō æmontaicō nāni ænte mongængāincō māmō wodongadānīmpa. Wodōnāni ate Awēnē Dabīi wodi nānō ēñate quēwēngūimpoga mānīncō æmontaicō incæ ayæ a owogatīmpa. ⁴⁶ Awēnē Dabīi ingante Wængonguī pōnō waa agacāimpa. Īnīnque Dabīi wæætē Wængonguī ingante apænedinque, Bitō Aacobo wodi Wængonguī īnōmi īmīpa, ante adīnque botō, Bitō quēwēngūīñōmō,

ante oncō āmi

mænonguimo, äñongante Wængongui Baa angacäimpa. ⁴⁷ Wæætē Tadömöo wodi Wængongui beyæ nē oncō mænongä ingacäimpa. ⁴⁸ Mänömaï cægainäni incæte Wængongui iñömö edæ æmonga pōni nē ongongä inte waocä nänö önopoca mænönincönē ædö cæte pönö Ao ante guite quēwenguingää. Mänömainö ante pönente wædinque Wængongui beyæ nē apænegaingä iïmai ante apænegaçäimpa.

⁴⁹ ‘Botö nē Tæiyæ Awënë inömo iñömote öönæ incæ botö Awënë tæ contaqui bai impa, inguipoga wæætē botö önöwa podöwate qui bai impa.

Mänömaï nē ongömo beyæ mīnitö botö oncō ante ædö cæte mænonguimīni.

Inguipoga æcönönö guidinque guēmanguimoo, ante Wængongui angampa.

⁵⁰ Botö iñæmpa tömömo önopoca tömäa nē badongaïmo inömo imopa, ante Wængongui Awënë angampa, ante wacä yewæmongacäimpa.”

⁵¹ Ante apænedinque Etebä godömenque iïmai ante apænecantapa. “Nöwo eñëedäni. Mīnitö mīmö ömæde imini inte wii pönencædö. Önömoncaque eñëinque wii ædæmö eñëmīni imini awædö. Mīnitö wæmæidi nāni cægainö ante eñëmīnitawo. Iñæmpa tömēnāni nāni cægai bai adobai cædinque mīnitö Wængongui Tæiyæ Waëmö Önöwoca ingante Baa äninque cöwē wææ äminipa töö. ⁵² Mīnitö wæmæidi doyedē Wængongui beyæ nē apænegaïnāni inānite togænte pāninque adocanque ingante ata cæpodāmaï inte tömānāni inānite togænte pangadānimpa. Edæ nē apænedäni, Nē nö entawēnongä inte ponguingä ingampa, ante apæneyönānite tömēnāni inānite do wænönāni wængadānimpa. Nöwo iñömö tömēnāni nāni, Ponguingä, angaingä incæ do pongä adinque mīnitö godö wænömīnitapa töö. ⁵³ Edæ,

iïmai cæedäni, ante Wængongui wææ angampa, ante Wængongui anquedoidi änāni eñëinque yewæmönāni ate mīnitö nē adöminī incæ Baa äninque eñënämaï cöwē cæminipa töö,” ante Etebä iinque apænecantapa.

Etebä ingante wænönāni wængampa

⁵⁴ Mänii awënëidi guiquenē Etebä nänö apænedö ante eñente wædinque äināni badinque бага wentoquenē wentoquenē angate piinānitapa.

⁵⁵ Etebä iñömö Wængongui Tæiyæ Waëmö Önöwoca ingante ædæmö ewocadinque öönæde inö æmö adinque Wængongui nāö apäite bai nänö emönö acantapa. Ayæ nē Waocä eñagaingä inte Itota incæ Wængongui tömëmæ inö adiyæ ongongä acantapa. ⁵⁶ Adinque,

—Badogaa, öönæde wi ænete bai ba abopa. Waocä nē eñagaingä incæ Wængongui tömëmæ inö adiyæ ongongä abopa.

⁵⁷ Ante apænecä eñente wædinque tömēnāni piinte Yæ yæ äninque eñënämaï cæcæte ante önömonca nī māmöncate cædānitapa. Godongämæ piinte quingæ tömengä weca pogodo pöninque, ⁵⁸ tömengä ingante bæi ongöninque tömēnāni nāni quēwēñömö yabæque ænte mäo dicaca tæi tacacæ cædānitapa. Tömengä æbänö angää, ante enēnīnāni inte nē apænedäni iñömö edæ tacacæ cædinque tömēnāni wecoo yabæcooque gä tadongate tæcæ æmæwo pædingä Taodo nāni änogä önöwoca inö nō cædönānimpa. ⁵⁹ Dicaca tacayönāni Etebä iñömö Wængongui ingante apænedinque, “Awënë Itota, bitö botö önöwoca æncæbiimpa.” ⁶⁰ Ante da guicapodinque yedæ äninque, “Awënë, tömēnāni nāni wænæ wænæ cædönö ante ee ae,” äninque edæ mö ñonte bai wængacäimpa.

8

¹ Etebä wodi ingante wænönacæte ante dicaca tacadäni adinque Taodo guiquenē, Waa wænömīni wængampa, ante Ao ante ongongacäimpa.

*Në godongämæ pönëināni inānite
Taodo togænte pangä*

Mäniönæ incæ mä togænte pāninqe Eedotadēē iñömö Codito ingante näni në godongämæ pönencabo inānite godömenque nangui togænte pūinte pangadānimpa. Ate wædinque Itota nānō në da godongainānique godāmai ongōñōnāni wadāni iñömö nāwæ wodii winōninque Oodeabæ Tāmadiabæ æmænō æmænō gogadānimpa. ² Māniī Etebā wodi ingante æmæwo wænōnāni wængä ate Wængongui ingante në waa adāni incæ Ca ca wædinque mǎo daga wenānitapa. ³ Taodo guiquēnē, Itota ingante në pönēnāni inānite wido cæcæimpa, ante nangui wēnæ wēnæ cædinque wacōnē pō guii wacōnē pō guii cædinque onguiñænāni tōnō onquiyænāni inānite bæi ongonte wēä mǎo tee mönegadānimpa.

*Tāmadiabæ godinque Pedipe
apæ necä eñēnānīpa*

⁴ Māniī në wodii winōnāni iñömö ædömē godinque Codito ingantedō ante cōwē watapæ apænedāni eñēnōnānimpa. ⁵ Īninque Pedipe iñömö Tāmadiā nāni nangui quēwēñōmō gote apænedinque, Mōnō Codito æbānō do ponte cægacāi, ante apæ necä eñēnānitapa. ⁶ Mānōmainō ante apænedinque tōmengä, Ate pönencædānimpa, ante mǎ cæcä adinque nangui ināni adoyōmō pönēninque, Mōnō eñengæimpa, ante cædānitapa. ⁷ Wadāni nangui ināni wēnæidi wentamō ewocadāni tōnō quēwēnāni adinque Pedipe angä eñēninque wēnæidi incæ Yæ āninque dæ tao godāni ate önōnānique badānitapa. Ayæ cōmāināni incæ cabæināni incæ tæiyænāni inānite Pedipe cæcä ate waa badānitapa. ⁸ Ante adinque māniñōmō quēwēnāni wæætē watapæ togadānimpa.

⁹ Wacä idō tōmengä emōwo Timōnō iñömō tōmengä adoyōmō quēwēninque wēnæ tōnō wantæpiyæ cæcä inongäimpa. Īninque Tāmadiabæ quēwēnāni tōmānāni, Æbānō nangui

cæcää, ante guiñente wæyōnānite tōmengä, Nē idōmo inōmo inte botō iñömō edæ nangui cæte beyæ ñæñæmo pōni imo aedāni. ¹⁰ Angä eñēninque awēnēidi incæ önōnānique incæ tōmānāni adoyōmō pönēninque, “Wængongui nānō tæi piñænō bai entawēninque ingä idō iñömō në Tæi Piñænongä ingampa,” ante pönēwēninque, Nē Ñænængä pōni inongä ingampa, ante pemongadinque tōmengä apæ necä ate ædæmō eñēnōnānimpa.

¹¹ Ayæ tōmengä wantæpiyæ wēnæ tōnō wæætē wæætē mǎ cæcä adinque tōmēnāni, Tōmengä ingante mōnō eñengæimpa, ante tee empo tee empo godōnānimpa. ¹² Mānōmai cæyōnānite Pedipe guiquēnē, Wængongui Awēnē Odeye nempo mōnō quēwengæimpa, ante watapæ apæ necä eñēnānitapa. Ayæ, Mōnō Codito iñömō tōmengä emōwo Itota emongampa, ante apænebo eñēedāni. Ante apæ necä eñēninque onguiñænāni incæ onquiyænāni incæ wede pönēninque æpænē guidānitapa. ¹³ Īninque Timōnō incæ adobai pönēninque æpænē guidinque Pedipe miñæ tee empo tee empo gocantapa. Pedipe, Ate pönencædānimpa, ante mǎ cædinque tæi piñænte nangui cæcä ate wædinque Timōnō adocä cōwē guiñente wægacäimpa.

¹⁴ Īninque, Tāmadiabæ quēwēnāni Wængongui nānō apænedō ante eñēninque do Ao ānānīpa, ante Eedotadēē ponte tedeyōnānite Itota tōmengä nānō da godongaināni incæ do eñēnānitapa. Eñēninque Pegodo tōnō Wäo inate Tāmadiabæ da godōnāni godatapa. ¹⁵ Godinque Tāmadiabæ pōninque tæcæ mǎ pönēnāni beyæ ante tōmēna Wængongui ingante iūmai ante apænedatapa. Wængongui eñēmi. Bitō Tæiyæ Waēmō Önōwoca ingante tōmēnāniya da pōnōmi pō guicä ate ewocacædānimpa, amōnāpa. ¹⁶ Edæ Awēnē Itota emōwo

apænedinque tömënäni mä æpænë guiyönänite bitö Tæiyæ Waëmö Önöwoca tömënäniya wææ guidämaï ingantapa cæbii. Nöwo ämi pö guicæcäimpa. ¹⁷ Ante apænedinque Pegodo tönö Wäö tömënäniya pönö gampote apæneyöna Wængongui Tæiyæ Waëmö Önöwoca pö tömënäni baonga guicantapa.

¹⁸ Mänömaï pönö gampoyöna Wængongui Tæiyæ Waëmö Önöwoca tömënäniya pö guicä ate wædinque Timönö guiquënë tömënäni godonte æinta pædæ pönöninque, ¹⁹ tömëna inate,

–Minatö bai botö adobai në cæbo bacæboimpa ämopa. Pönö cæmina ate botö në cæbo badinque wadäniya pönö gampobo ate Wængongui Önöwoca adobai pö guicæcäimpa, ämopa.

²⁰ Äñongante Pegodo,

–Bitö mini godonte æintaque pædæ godöninque, Wængongui Önöwoca nänö da pönönongä ingante æncæboimpa, ante pönëwëmi. Edæ tömëmi tigitamonque nææninque edæ bitö ömæe ewenguinque gobäwe.

²¹ Iñæmpa, Wængongui Önöwoca nänö da pönönongä ingante æninque godongämæ cæcæboimpa, ämitawoo. Wængongui ayongä nö pönente cæbipa ænguimii. Edæ mönatö tönö ædö cæte cæquimii. ²² Nöwo edæ mäninö bitö wiwa cædinö ante wæwente pönëninque ñimpo cæe. Ayæ mönitö Awënë ingante apænebi ëñëninque tömengä wabänö pönö waadete cædinque mïmöno bitö pönëwënö ante wadæ cædinque ñimpo cæbaingampa.

²³ Bitö nämä beyænque ante në æinëmi inte bitö mïmöne guinæmæ entawente bai quëwëmipa. Ayæ bitö tömëmi wiwa cædö beyænque ñä cæyænte bai quëwëmipa, ante awædö. ²⁴ Angä ëñëninque Timönö wæætë,

–Æ ämi awædö, äninque Pegodo ingante, Botö minatö änö bai wi bacæboimpa, ante cædinque minatö botö beyæ Wængongui ingante apæneeda, angantapa.

²⁵ Ayæ Wäö tönö Pegodo iñömö, Itota incæ mönö Codito ingaingä ingampa, ante mäninö quëwënäni inänite mönö Awënë nänö änö ante apæneeda ëñënanitapa. Inque apænedinque adodö Eedotadëe gocæte ante wadæ gote Tämadiabæ godinque tömëna wayömö wayömö mäo wædænque quëwënäni weca pö pö cædinque nanguï inäni inänite apænedinque Codito ingantedö ante watapæ apæneeda ëñënanitapa.

Etiopæ awënë ingante Pedipe bee tengampa

²⁶ Mäningä Pedipe ingante anquedo ayæ ate ponte äninque, “Bitö ægodöe, Eedotadëe wæi Gata goquinö pædæ taoquinque betamonca gocæbiimpa,” angantapa. Mäninö önömæcaque wæidö inompa. ²⁷ Mänömainö angä ëñëninque Pedipe ængæ gantid- inque wadæ godinque anquedo nänö äninonque cægonte ayongä onguinængä Etiopæ quëwëningä pö eyepæ bee tengä acantapa. Ingå iñömö Etiopæ tæiyæ awënë on- quiyængä Cantate beyæ tömënäni godonte æinta në aacä inongä inte ñænæ awënë inongäimpa. Tömengä ñöwo Wængongui weca ædæ wææninque watapæ apænecæte ante Eedotadëe æidingä inte ocæ ëmænte pöninque Pedipe ingante eyepæ mämö bee tengantapa. ²⁸ Ingå iñömö cabayo nänö wëä pönoncadea æi tæ contate ocæ ëmænte pöninque Itaiya wodi Wængongui beyæ në apænegaingä nänö yewæmongainta næænte a congantapa.

²⁹ Mänömaï a conte pönongante Pedipe ingante Wængongui Önöwoca, “Goe, Ii cabayo nänö wëä pönoncade eyepæ godinque guëa goe,” angantapa. ³⁰ Angä ëñëninque Pedipe pogodo godinque obo ponte ëñëningä Etiopæ awënë iñömö Itaiya wodi nänö Wængongui beyæ yewæmongainta adinque apænecä ëñëninque,

–Bitö ate apænedö ante ædæmö ëñëmitawo.

31 Äñongante,
—İñæmpa eñëmogaa. Botö imote
apænedänipa eñenguimoo.

Ante apænedinque Pedipe ingante,
Bitö botö weca ææ guiite tæ contae,
angä ææ gui tæ contacantapa.

32 Mäninta Wængongui angä eñente
näni yewæmongainta Etiopæ
awënë nänö aintaa iimaï ante
yewæmonte ongönönimpa.

“Codotedo ingante wænongæimpa,
ante bæi ongonte æninqe töö
godonte bai cædinque
tömengä ingante adobai wænoncæte
ante bæi ongonte ænte
godänitapa.

Obegaidi ocaguincoo eö toyönäni
wädämaï pæ wëenecä bai
tömengä adobai wädämaï inte pæ
wëenecantapa.

33 Piinte änäni wæyongante nē
apænte anguënenäni incæ,
Pangæimpa, ante cædinque
nöingä ante änämaï inänitapa.

Tömengä ingante æmæwo wænönäni
wængaingä iñongante,

Tömengä nänö pæinäni, ante ædö cæte
apænequii.”

34 Ante näni yewæmongainö ad-
ingä inte Etiopæ awënë ñowo
Pedipe ingante,

—Apænebi eñëmoe. Nē Wængongui
beyæ apænegaingä iñömö æcänö in-
gante ante nē apænegacäi. Tömengä
nämä ingante ante yewæmongantawo.
Edæ wacä ingante ante yewæmongantawo,
ante eñencæte ante wæbopa.

35 Ante äñongante Pedipe iñömö
Etiopæ awënë nänö adinta ado-
taa ate apænedinque ayæ wataa
wataa adinque Itota ingantedö
ante watapæ apænecä eñengantapa.

36 Apæneyongä taadö godinque
wapæ ganca pönatapa. Equitobæ
awënë mänimæ adinque Pedipe
ingante, Waa ae. İñömö gäwapæ
impa. Æpænē guidämaï inguimo,
ämitawoo.

37 Angä eñëninque,
—Bitö mimöno wede pönëmi ate
botö Ao ämaïmopa, angantapa.
Äñongante,

—Ao botö, Itota Codito näwangä
Wængongui Wengä inongä ingampa,
ante wede pönëmopa.

38 Äninqe Etiopæ awënë angä
cabayo næ gongæ ate Pedipe tönö
guëa æpænē ti wææna ate Pedipe
tömengä ingante æpænē guidongä
guiicantapa. 39 Ayæ æpænē gui-
ite ate tömengä tao gongæñongä

Wængongui Awënë Önöwoca Pedipe
ingante iñæ æænonte ö ængä. Ate
æmæwo adinque Etiopæ awënë
watapæ todingue oncönē goinö
gocantapa. 40 Pedipe guiquënë

Atota iñömö iñontobæ a ongöninqe
godömenque wädäni näni quëwëñömö
go apænedinque wayömö näni
quëwëñömö go apænedinque
Tetadea ganca godinque Codito
ingantedö ante watapæ apænecä
eñengadänimpa.

9

*Awënë Itota ingante Taodo
acampa*

(Näni Cægainö 22.6-16, 26.12-18)

1 Taodo guiquënë mönö Awënë
ingante nē tee empote quëwënanäni
inänite püininqe, Wænongæimpa,
ante bæi ongö bæi ongö cædinque
cöwë ñimpo cädämaï ingacäimpa.

Ñowo godömenque cæcæte ante
Wængongui oncönē gote nē godongä
ñænængä pönä inongä ingante
apænedinque, 2 Awënë eñëmi,
angantapa. Bitö Ao ämi ininqe

botö Daämaco näni quëwëñömö
gote ayömo, Onguiñænäni incæ
onquiyænäni incæ æcämenque Itota
Taadö ante nē godäni inänii, ante
adinque tömënanäni inänite bæi on-
gonte goti winte Eedotadëe ænte

pömaïmopa. İninqe bitö, Taodo
mänömaï cæcæcäimpa, ante botö
beyæ cadota ante yewæmöninqe
pædæ pönömi æninqe botö
wæætë Daämaco iñömö mäo ood-
eoidi odömöincönē awënëidi weca

gote pædæ godömo ænte adinque
tömënanäni Ao äñönäni mänömaï
cæbäimopa. 3 Äñongä awënë Ao

ante yewæmōninque pædæ pōnongä æninque Taodo Daāmaco obo gote ayongante iñontobæ öönæde inō nāinte bai cædinque tōmengä nānō ongōñōmō tōmāo guinæ gongæ. ⁴ Adinque Taodo guidōmēmæ tæ go wæængantapa. Ayæ wæænte öñōñongante tōmengä ingante, “Taodo. Taodo. Quinante botō imote togænte pāmii.”

⁵ Angä eñente wædinque Taodo wæætē, “Awënë, æmōmidō inōmi imii.” Ante eñēñongä, “Botō Itotabo inōmo inte bitō nē togænte pānimo mānimotō imopa cæbii. Iñæmpa wagada päintoca bai bitō nāmā iñæ æwate bai cædinque cowate bai edæ caate bai wæbipa tōö.” ⁶ Mānōmaī apæneca eñēninque Taodo ancai guiñente do do wæadinque, “Awënë, æbānō cæquimo āmii.” Äñongante mōnō Awënë wæætē apænecantapa. “Bitō ængæ gantidinke iñāni nāni quēwēñōmō goe. Botō, Taodo iīmaī cæcæcāimpa, ante wacä ingante Daāmaco iñōmō nē quēwengä ingante do apænebo eñengampa cæbii. Bitō Daāmaco iñōmō gote ongōñōmi tōmengä wæætē bitō imite apæneca eñente cæcæbiimpa.”

⁷ Taodo tōnō godongāmæ godāni guiquēnē waocä ingante adāmaī ināni incæte, Önonque tempa, ante pōnēninque ancai guiñente wædānitapa. ⁸ Taodo iñōmō ongui-poga ayæ a öñongä inte ængæ gantidinke awinca adāmaī ingä adinque wadāni tōmengä ingante önompo bæi ongōninque Daāmaco ganca ænte māodāni gocantapa. ⁹ Māniñōmō gote ongōninque tōmengä adāmaī inongä inte cænāmaī bedāmaī mēōnaa go adoönæque iñonte wæwengacāimpa.

¹⁰ Ayæ wacä nē pōnengä Änāniya Daāmaco iñōmō quēwengä inte mā pōni wīimonte bai ayongä mōnō Awënë, “Änāniya,” angä eñēninque, “Awënë, botō eñēe cōmopa.”

¹¹ Äñongä mōnō Awënë wæætē, “Taodo ñōwo Wængongui ingante apænecampa cæbii. Bitō ængæ

gantidinke taadō nāni Tōinō änōnō godinke Codaa oncōnē gote äninque, Tadoto nē quēweningä Taodo iñōmō owocantawo, ante acæbiimpa. ¹² Wængongui ingante ñōwo apænedinke ate bai ayongä wacä Änāniya pō guidinke, Ñōwo edonque acæbiimpa, ante gampocampa, ante ate bai Taodo wæcantapa cæbii. Tōmengä wīimonte bai adinke nānō wædō bai cædinque bitō ñōwo gote cæcæbiimpa.”

¹³ Angä eñente wædinque Änāniya wæætē, “Awënë iñæmpa botō, Māningä Taodo iñōmō quinō bai onguiñængä ingää, ante nanguī tededāni do eñēmopa. Ayæ, Eedotadēe iñōmō tōmengä bitō quināni inānite wēnæ wēnæ cæcampa, ante tededāni eñente wæbopa. ¹⁴ Ayæ nē godōnāni ñænænāni Ao ante yewæmōnāni æninque tōmengä iñæmpa nē angä badinke bitō emōwo ante nē apænemōni iñōmōnite bæi ongonte tee mōnecæte ante pongampa cæbii.”

¹⁵ Ante wæyongante mōnō Awënë wæætē Änāniya ingante, “Iñgä ingante do apænte æmo apa anewēe. Tōmengä ingante, Bitō wabæca gote wadāni inānite botō emōwo ante apænedinke ayæ tōmēnāni awēnēidi inānite botō emōwo ante apænedinke idægoidi inānite adobai botō emōwo apænebi eñencædānimpā, ante tōmengä ingante do antabopa cæbii. Ñōwo tōmengä weca gobāwe. ¹⁶ Ayæ botō nē æningä inte tōmengä æbānō botō emōwo beyæ nanguī caate wæquēnengä ingää, ante odōmōmo ate eñencæcāimpa.”

¹⁷ Angä eñēninque Taodo nānō owoyōmo go guidinke Änāniya tōmengä ingante gampomōninque,

—Taodo botō tōniñabi eñēmi. Bitō taadō pōninque Itota ingante abitawo. Tōmengä iñōmō nē Awënë inongä inte botō imote apænecantapa. Bitō Taodo weca godinke cæbi ate tōmengä wēnēñedē nānō emōnō bai adinke Wængongui Tæiyæ Wæmō Önōwoca ingante da pōnōmo æninque

ëwocacæcäimpa, ante mönö Awënë angä ëñëninque botö bitö weca pontabopa.

¹⁸ Ante Änäniya tæcæ apæneyongä Taodo tömentagæ nänö ëmönintagæ tæ wæænte iñontobæ edonque acantapa. Ayæ ængæ gantiyongante Änäniya tömengä ingante æpænë guidongä guiicantapa. ¹⁹ Ayæ cænguï cæninque tömengä baö wæætë tæi piñængä bacantapa. Ayæ Daämaco iñömö Itota ingante nê tee empote quëwënäni weca godömenque tæönæ quëwengantapa.

Daämaco iñömö Taodo apæncä ëñënänipa

²⁰ Mänñömö quëwëninque Taodo do oodeoidi odömöincönë go guï go guï cædinque, Itota Codito näwangä Wængonguï Wengä ingampa, ante apæncä ëñënänitapa. ²¹ Mänömaï apæncä ëñëninque tömengä ingante nê ëñënäni iñömö ancaï guïñëninque, “Æ. Ìngä adocä Eedotadëe iñömö Itota ëmöwo ante nê apænedäni inänite nê wido cæcä ìmaingampa. Tömengä adocä nê wido cæcä incæ adodäni inänite bæi ongonte æninque, Wængonguï quï, ante nê godönäni ñænænäni weca mäo pædæ godoncæte ante ñöwo iñömö pöninque cæcä awædö. Edæ adocä ingänö angüënë.”

²² Ante wædäni incæte Taodo godömenque tæi piñænte entawëninque iïmaï ante apæncantapa. Awënë bacæcäimpa, ante Wængonguï nänö nê gao cæcadongä iñömö mönö Codito iñömö edæ Itota adocä inongä ingampa, ante, Näwangä impa, ante nöingä pöni apæncä. Adinque Oodeoidi Daämaco iñömö quëwënäni guiquënë, Ædö cæte wadö angüi, ante wægädänimpa.

Oodeoidi wænoncæ cæyönäni Taodo aamö cæte gocampa

²³ Ìninque tæönæ go ate oodeoidi godongämæ pönente Ao äninque, Taodo ingante wænongæimpa, ante cædänitapa. ²⁴ Mänömaï ante

cæyönäni Taodo mäninö näni äninö do ëñengantapa. Tömënäni guiquënë, Mönö quëwëñömö wææ cæinemö tacä ate wænömö wæncæcäimpa, ante itædë woyowotæ wææ wänönänitapa. ²⁵ Wææ wänöñönäni tömengä ingante nê tee empote quëwënäni wæætë yabæ wææ cæte iñömö Taodo ingante woyowotæ mäi ayacö moyäa inö otodë pædæ wæænönäni ti wæænte gocantapa.

Taodo Eedotadëe ponte apæncampa

²⁶ Mänömaï godinque Taodo Eedotadëe pöninque, Itota ingante nê tee empote quëwënäni weca gobote, ante pongä. Adinque tömänäni, Näwangä Itota ingante nê pönengä ingantawogaa, ante guïñente awædö, ante pönëninque wææ adänitapa. ²⁷ Bedënabee guiquënë Taodo ingante bæi ongömænte æninque Itota nänö nê da godongainäni weca ænte mämongä pongantapa. Ayæ tömënäni inänite Bedënabee apæncantapa. Taodo ñöwo taadö godinque mönö Awënë ingante dobæ acäimpa. Mönö Awënë tömengä ingante do apæncantapa. Daämaco gote quëwëninque Itota ëmöwo ante tömengä guïñënämaï apænedingä inte ñöwo iñömö pongä apa quëwëminii. ²⁸ Bedënabee mänömaï angä ëñëninque Ao äñönäni Taodo Eedotadëe iñömö quëwëninque tao guite ta tao guite ta cædinque tömënäni tönö godongämæ cædinque mönö Awënë ëmöwo ante guïñënedämaï apæncantapa. ²⁹ Ayæ wadäni oodeoidi incæ guidiego tededö nê tededäni mänñömö quëwënönänimpa. Ìinäni inänite Pabodo mönö Awënë ëmöwo ante nangüi apænedinque wæætedö wæætë äñongante tömënäni wæætë wænoncæte ante cædänitapa. ³⁰ Mänömaï cædänipa, ante ëñente wædinque tömengä nänö tönñädäni bai badänäni inte pancädäniya Taodo ingante Tetadea ganca mäo ëmöninque, Godömenque Tadoto iñömö wodii winonte goe, ante da godönäni gogacäimpa.

³¹ Ìninqe Codito ingante näni godongämæ pönencabo incæ Oodeabæ Gadideabæ Tämadiabæ tömäo quëwëninque mäniñedë wädämaï inte guëmänänitapa. Ayæ tæi piñænte entawënäni badänitapa. Ayæ Wængongui Tæiyæ Waëmö Önöwoca ædæmö apænecä ate tömënäni wampo pönënäni badinque yebænte nanguïñäni bagadänimpa. Ayæ mönö Awënë ingante ædö cæte ëñënämaï cæquïi, ante guïñente wægadänimpa.

Ènea ingante Pegodo angä waa bacampa

³² Mänömaï tömënäni näni pönencabo nanguï yebænte bayönäni Pegodo guiquënë wayömö wayömö wodo tebæ wodo tebæ godinque Dida iñömö pöninge mönö Awënë quinäni weca ëñacæ pongantapa. ³³ Mäniñömö ponte apæneyongä wacä tömengä ëmöwo Ènea do ocho wadepo ganca möimoga cömäingä inte në ongöningä ingä. ³⁴ Adinque Pegodo tömengä ingante,

–Ènea ëñëmi. Itota Codito cæcä ate waa babipa cæbii. Ængæ gantidinque tömëmi möimo ni capoe.

Äñongä Ènea iñömö do edæ ængæ ganticä. ³⁵ Adinque Dida quëwënäni tönö Tadöo quëwënäni tönö wëenë näni pönëwengainö ante ëmö cædinque Wængongui Awënë gämænö pönänitapa.

Dodoca wodi ingante Pegodo angä näni ömæmongampa

³⁶ Mäniñedë wacä onquiyængä në pönengä Tabita iñömö Cope näni quëwëñömö quëwëngäimpa. Tömengä ëmöwo guidiego tededö Dodoca incæ mönö tededö Cowäñe ëmongä inongäimpa. Tömengä iñömö në waa cædongä inte ömæpodäni wæwënäni inänite nanguï waa cædongä inte Cope iñömö quëwëngäimpa. ³⁷ Tömengä mäniñedë nangæ badinque æmæwo wængä. Ate tömengä baö ini æpæ äadëninque wænömënæcapaa mäi ñö cædänitapa. ³⁸ Cope iñömö quëwëninque Dida wii gobæ impa,

eyequei impa. Mänömaï beyæ, Pegodo Dida iñömö ongongampa, ante tededäni ëñente wædinque Itota ingante do tee empote quëwënäni iñömö onguïñæna mënaa inate da godöninque, Cope iñömö gote Pegodo ingante, “Quingæ pöe, ante äeda.”

³⁹ Änäni gote äñete pöñönte Pegodo godongämæ pongä adinque tömengä ingante wænömënæcapaa mäidäni guite acantapa. Owæmpöinäni godongämæ pöninge doyæncoo tönö yabæcoo Dodoca müingä quëwëngäñedë nänö badongaincoo odömöninge Ca ca wädäni. ⁴⁰ Adinque Pegodo tömännäni inänite angä tao godäni adinque da guicapote Wængongui ingante apænecantapa. Ayæ dobæ wænte onguite a öñongä gämænö dadi ëmænte adinque,

–Tabita, ængæ gantibi ämo.

Äñongä Tabita wodi awinca wi æmöninque Pegodo ingante adinque ængæ gantite contacantapa. ⁴¹ Ængæ ganti contayongante tömengä önompo bæi ongöninge Pegodo töö æmængä ate ædæmö ængæ gantite adiyæ gongængantapa. Ayæ owæmpöinäni tönö mönö Awënë quinäni inänite Pegodo aa pecä pö guidäni ate müingä ingä odömongä adänitapa. ⁴² Ìninqe, Mönö Awënë mänömaï cæcantapa, ante Cope iñömö näni quëwëñömö tömäo gote tededäni ëñëninque nanguï inäni mönö Awënë ingante në pönënäni badänitapa. ⁴³ Pegodo mäniñedë æmontai në amïngä Timönö weca owodinque Cope iñömö tæönæ quëwëngäimpa.

10

Pegodo tönö Codönedio

¹ Tetadea näni quëwëñömö odömäno tontadoidi Itadiadi näni änoncabo inte quëwëngadänimpa. Ìninqe tontadoidi tië ganca näni cabo tië ganca näni cabo iñönänite adocabodäni capitäo tömengä ëmöwo Codönedio ëmongäimpa. ² Tömengä

näni wencabo näni owocabo owod-
inque, Mönö wadö pönēñōmonte
Wængonguī pangä wæcæ wæ, äninque
Wængonguī nänö änö ante ēñente
quēwēñōnānimpā. Ayæ pæ gom-
podāmaī inte Codōnedio, Ömæpodāni
wæwēnāni quī, ante pædæ godö
pædæ godö cæcä æñōnānimpā. Ayæ
Wængonguī ingante ñimpo cædāmaī
cōwē apænedongäimpa. ³ Tömengä
iñōmō ædæ wæicä ate mä pōni
wīimonte bai acantapa.

Edonque wīimonte bai ayongante
Wængonguī anquedo tömengä weca
pö guidinque, “Codōnedio bitö imi.”
⁴ Angä wædinque Codōnedio tömengä
ingante cōwä adinque ancaī guīñente
wædinque, “Awēnē, æbänö ante
ämii. Ämi ēñēmoe.” Äñongante, “Bitö
Wængonguī ingante nē apænebi
imitawo, ömæpodāni wæwēnāni inānite
nē godömi imitawo. Mäninö bitö
apænedö ante mäninö bitö godönö
ante adinque bitö imite waa abopa,
Wængonguī angampa, angantapa.
⁵ Nöwo wadāni inānite ämi Cope
iñōmō gote Timönö Pegodo näni
änongä ingante äñete poncædānimpā.
⁶ Adowo emönongä Timönö weca
Timönö Pegodo gäwapæntibæ wedeca
owocampa. Mäningä Timönö
æmontai nē amīnēnongä ingampa.”

⁷ Ante apænedingä inte Wængonguī
anquedo ingæ gocä adinque
Codōnedio wæætē tömengä ingante
nē cæda mēnaa inate aa pecä
pōnatapa. Ayæ tontadoidi incæ pan-
cadāniya tömengä ingante nē cædāni
iñōnānimpā. İninque adocanque
tontado incæ Codōnedio ingante
nē cæcä incæ Wængonguī ingante
nē ēñengä inongäimpa. Tömengä
ingante Codōnedio adobai aa pecä
pongantapa. ⁸ Mänömaī aa pecä
ate tömēnāni godongāmæ pōnāni
ate Codōnedio, Wængonguī æbänö
angantawoo, ante tömānō ante adodö
apænedinque, Nöwo Cope iñōmō
goedāni, angantapa.

⁹ Angä godinque iimö wææñö
taadö godinque Cope iñōmō

obo pōñōnāni mänīñedē incæ
tæcæbæcä incæ Pegodo guiquēnē
Wængonguī ingante apænecæte ante
oncōmanca æicantapa. ¹⁰ Ayæ ate gue
æñente wædinque wadāni inānite,
Cæinente awædö, äñongante cænguī
iñique æænōnāmaī inte cōñōnāmaī
iñōnānite tömengä wīimonte ate bai
cæwēnengantapa. ¹¹ Ate bai æmō
ayongante öönædē wi ænete bai
bayö möincoo bai ñænæncoo pōni
iñonte æmænecoo bæi æmænecoo
bæi ongōnete bai inguipoga pædæ
wæænonte bai wææ wäi wocæ
acantapa. ¹² Wäi wocæñö nē ocaguī
mongænāni incæ, nē ocaguī ömaadāni
incæ, nē öömä emænte æidāmæ
godāni incæ babæidi tömānāni weo-
coo cæncadencoo inö ongōnāni acan-
tapa. ¹³ Ayongante wacä äninque, “Pe-
godo, ængæ gantidinque wænonte
cæe.”

¹⁴ Angä ēñēninque Pegodo, “Awēnē,
ēñēmi. Öñōnānique iñōnānite botö,
Baacä awædö, äninque cōwē cænāmaī
imo apa änewēe.” ¹⁵ Äninque wæætē
ēñēñongä, “Wængonguī nänö ædæmō
mēnongadongä incæ bitö ædö cæte
baacä ämii.”

¹⁶ Äninque nē apænedingä iñōmō
wæætē adodö adodö angä ēñēninque
Pegodo wæætē, Baacä awædö, ante
Baa angantapa. Ayæ mempoga go
adopoque wæætedö wæætē adodö
äna ate ñænæncoo pōni weocoo
incæ öönædē inö wëä æænongä bai
acantapa. ¹⁷ İninque, Mänömainö ante
wīimonte bai adimo inte botö quīnö
bai cæquimoo, ante Timönö Pegodo
pönēe congantapa. Pönēe cōñongä
Codōnedio nē nänö da pönōnināni
guiquēnē, Timönö oncö æyömönö
i, ante diqui diqui minte adinque
yabædemö inö næ gongæninque,
¹⁸ Timönö Pegodo näni änongä iñōmō
owocää, ante ēñencæte ante aa
pedānitapa.

¹⁹ Pegodo wīimonte bai nänö
adinö ante ayæ pönēe cōñongante
Wængonguī Öñowoca, “Timönö ēñēmi,
bitö imite ante onguīñænāni mengäa
go adocanque diqui diqui minānipa

quëwëmii. ²⁰ Tömëmo ämo pönänipa cæbii. Bitö ængæ gantidinqe yæipodë wæidinqe tömënäni tönö ee goe,” angantapa.

²¹ Angä ëñëninque Pegodo yæipodë wæidinqe tömënäni inänite, Botö minitö nê diqui diqui minömo adobo imopa. Minitö quïnante pöminii.

²² Äñongante,

—Mönitö awënë capitäo Codönedio incæ angä pömönipa. Tömengä iñömö Wængongui ayongante nö cæcä inongä inte Wængongui ingante guiñente quëwengampa. Nê nö cæcä ingampa, ante pönëninque oodeoidi tömänäni tömengä ingante waa adänipa. Ininqe Wængongui anquedo tæiyæ waëmö inongä inte wæætë Codönedio ingante, Bitö wadäni inänite ämi gote Pegodo ingante añete poncædänimpa. Tömengä iñömö bitö weca pöninqe apænecä ëñencæbiimpa, angä ëñente wæidinqe Codönedio wæætë mönitö imönite da pönongä pömöni ae.

²³ Ante apænedäni ëñëninque Pegodo angä pö guiite tömengä weca owodänitapa. Iimö ate Pegodo tömënäni tönö tao goyongante Cope iñömö quëwente nê pönënäni incæ pancadäniya godongämæ tao wadæ godänitapa.

²⁴ Mänömaï godinqe Pegodo iñabæ wæængä Tetadea pongantapa. Codönedio guiquënë, Oo ponguingä, ante pönëninque tömengä guidënanäni tönö tömengä æmigoidi inänite do añecä ponte godongämæ ongönänitapa. ²⁵ Ininqe Pegodo iñömö oncönë pö guicæ cæyongä Codönedio wæætë oncodo tao bee téninqe, Æ, bitö Wængongui anquedo inömi imipa, ante bai cædinqe ædæ wæænte Pegodo önöwa gäänë guidömëmæ ñongængä. ²⁶ Adinqe Pegodo wææ äninque,

—Iñæmpa bitö waobi imi bai botö adobai waobo inömo imopa. Ængæ gantibi, äninque Pegodo angä ængæ ganticantapa.

²⁷ Ayæ Codönedio tönö guëa tededinqe Pegodo oncönë guiite ayongante nanguï inäni godongämæ mæ ongönäni. ²⁸ Adinqe tömënäni inänite,

—Minitö do ëñëmïnipa. Oodeoidi inömöni inte mönitö Möitee wodi nänö wææ angainö ante Ao ante ëñente cæmönipa. Ininqe, Oodeo inämaï inäni tönö godongämæ cædämaï incæminimpa, ante ayæ, Tömënäni weca go guidämaï incæminimpa, ante mönitö ëñengainö ante cæmönipa, ante minitö do ëñëmïnitawoo. Incæte Wængongui wæætë botö imote iimäi ante odömongantapa. Bitö, Baacä awædö, ante tedete bai waocä ingantedö ante tededinqe, Wentamö mongængampa, ante änämaï incæbiimpa. Ayæ, Önonganque ingampa, ante änämaï incæbiimpa, ante Wængongui botö imote do odömongä atabopa. ²⁹ Añete pönäni ate botö, Wængongui mänömainö ante odömongä atabopa, ante pönëninque ee pontabopa. Ininqe quïnante botö imote aa pemïnii, ante ëñencæte ante wæbopa.

³⁰ Äñongante Codönedio wæætë,

—Do mëönaa go mëönaa iñonte botö tömëmo oncönë cænämaï inte Wængongui ingante apænetabopa. Botö mänömaï ñöwo bai ædæ wæicä apæneyömo onguïñængä weocoo näämænta pöni mongængä ponte botö weca a ongongä atabopa.

³¹ Ayæ botö imote apænedinqe, “Codönedio, bitö Wængongui ingante apænebitawo, angantapa. Mäninö bitö apænedö ante Wængongui do ëñengantapa. Ömæpodäni wæwënäni quï, ante bitö godömitawo. Mäninö bitö godönö ante adinqe Wængongui cöwë pönengampa cæbii. ³² Ñöwo ämi Cope gote Timönö Pegodo näni änogä ingante añete poncædänimpa. Tömengä wacä Timönö æmontai nê amïnengä weca gäwapæntibæ wedeca owocampa.” ³³ Angä ëñëninque botö wæætë bitö imite ante, Añete pöedäni, antabopa. Ñöwo bitö do

pömi waa abopa. Ìninqe ñöwo ìñömö Wængonguï ayongä tömämöni godongämæ a ongöñömöni bitö, Wængonguï Awënë mönitö beyæ ante bitö ìmite æbänö angää, ante apænebi eñencæte ante ongömönipa, angantapa.

Codönedio oncönë ongöningue Pegodo apænecampa

³⁴ Codönedio mänömaï apæneca eñëningue Pegodo iïmaï ante apænecantapa.

—Wængonguï, Adoyömö pönï ìminipa, ante tömämö ìmonte pönö adoyömö pönï cæcampa, ante botö, Näwangä impa, ante ñöwo tæcæ eñëmopa. ³⁵ Ìninqe iïmæca quëwënanï incæ wayömö wabæca wabæca quëwënanï incæ æcänö Wængonguï ingante guiñente wædinque nõ cæte quëwëna ante adinque Wængonguï mäningä ingante Ao ante do ængampa. ³⁶ Mänömaï cæbopa, ante idægoidi inänite apænemini eñencædänimpa, ante Wængonguï mönitö ìmönite da godongä gote iïmaï ante apænemöni eñënanipa. Tömämæ quëwëmö ìñömonte mönö Tæiyæ Awënë ìñömö Itota Codito ingampa. Tömengä waa pönï pönö cæcä beyænque Wængonguï piyænë nänö cægainö ante wat-apæ möni apænedö impa. ³⁷ Wäo wodi, Æpænë mönö guidongæimpa, ante apæneca eñënanï ate Itota Codito ìñömö Gadideabæ ìñömö mä cædinque Oodeabæ tömäo cægonte æbänö cægacäi, ante do eñëminipa. ³⁸ Iïmaï ingatimpa. Wængonguï tömengä Önöwoca ingante angä Itota Näatadeta nê quëwengaingä baonga wææ guiigacäimpa. Wææ guiicä ate Itota tæi piñante entawëningue wayömö wayömö gote tömäo cægöningue waa cægacäimpa. Edæ Wængonguï tömengä tönö godongämæ quëwente cæcä beyæ Itota ìñömö, Wadäni wënæ angä eñëningue goti winte bai wæwënanipa, ante adinque wænæidi inänite angä tao godänitapa. Ayæ wadäni wënæ wënæ

inte wæyönänite tömengä godö cæcä ate edæ waa inäni bagadänimpa.

³⁹ Pabodo mänömainö ante godömenque apænecantapa. “Oodeoidi ömæ cægöningue ayæ Eedotadëe ìñömö quëwëningue, Itota Codito æbänö cægacäi, ante nê adimöni inte mönitö ìñömö mäninö tömänö ante nê apænemöni ìmönipa. Tömengä ingante awæ ñænquedimæ cæte godö wænönäni wængacäimpa. ⁴⁰ Incæte Itota do wæningä inte mëönaa go adoönæque öñongante Wængonguï angä ñäni ömæmonte miingä inte edonque pönï a ongongä agadänimpa. ⁴¹ Wüi tömänäni adänitapa. Pancamöniya atamönipa. Itota ñäni ömæmongä ate tömengä tönö nê godongämæ cænte bedimöni ìñömönite Wængonguï, Mänimpodänique Itota miingä ongongä ingampa, ante nê adinäni inte nê apænedäni incædänimpa, ante mönitö ìmönite apænte ængacäimpa. Mönitö adomönique tömengä ingante atamönipa. ⁴² Ayæ mönitö ìmönite äningue Wængonguï, Minitö ìñömö do eñënimini inte nê apænemini badinque waodäni inänite mänömainö ante apænedinque iïmaï ante apænecaeminipa. Mii quëwënanï inänite do wænänäni inänite Itota Codito ìñömö edæ tömänäni inänite edæ nê apænte anguingänö angüenë, ante apænemini eñencædänimpa, ante Wængonguï mönitö ìmönite angacäimpa. ⁴³ Ayæ, Mönö Codito poncæcäimpa, ante do eñengainäni inte tömänäni Wængonguï beyæ adoyömö apænegadänimpa. Tömënanï, Codito ingante nê pönënanï wënæ wënæ nänï cædö ante adocä Codito emöwo beyænque Wængonguï pönö waadedinque ñimpo cæcä quëwencædänimpa, ante doyedë apænegadänimpa,” ante Pegodo Codönedioidi inänite apæneca eñënanitapa.

Oodeoidi inämaï inäni Wængonguï Önöwoca ingante ænani

⁴⁴ Pegodo mäninö ante tæcæ apæneca eñëe cöñönänite Wængonguï

Tæiyæ Waëmö Önöwoca tömënäni tömänäni baonga wææ guicantapa. ⁴⁵ Pegodo tönö godongämæ pöninäni guiquënë nē pönënäni inäni incæte, Mönö eö togænte quëwengæimpa, ante nē änönäni ingadänimpa. Ìninqe tömënäni, Oodeoidi inämaï inäni inänite Wængonguï Tæiyæ Waëmö Önöwoca do wææ guicampa, ante adinqe edæ guïñente wädänitapa. ⁴⁶ Edæ Codönedioidi Wængonguï Önöwoca ingante ewocadinque wadäni nāni tede bai wadäni nāni tede bai iñontobæ apænedinque Wængonguï ingante waa adinqe waa todāni eñente wædinque oodeoidi mänömaï guïñente wädänitapa. ⁴⁷ Adinqe Pegodo tömengä tönö nē pöninäni inänite,

—Tömënäni mönö bai Wængonguï Tæiyæ Waëmö Önöwoca do æninäni inänite adinqe tömënäni, Æpænē guidömi guiboë, añönänite mönö ædö cæte wææ anguï. ⁴⁸ Äninqe Pegodo angä eñëninque tömënäni Itota Codito emöwo apænedinque æpænē guidönäni guiidänitapa. Æpænē nē guidënäni iñömö ayæ Pegodo ingante, Tæönæ mönitö weca quëwencæbiimpa, änäni Ao ante quëwengacäimpa.

11

Edotadëe iñömö nē pönënäni inänite Pegodo apænecä

¹ Oodeoidi inämaï inäni incæ Wængonguï nänö änö ante do Ao ante eñënänipa, ante wadäni Oodeabæ tömäo cægonde tededänitapa. Ìninqe Itota nänö da gogainäni tönö wadäni nē pönënäni tönö mäninö ante do eñënänitapa. ² Ìninqe Pegodo Eedotadëe iñömö æite quëwëñongante nē pönënäni incæ pancadäniya, Mönö eö togængæimpa, ante nē änönäni inte tömengä ingante püininqe, ³ iïmaï ante änänitapa.

—Quimæ bitö togænāmaï inäni weca incæ go guidinque cæmitapa töö.

⁴ Äñönänite Pegodo, Æbänö cæte i, ante adodö adodö ante apænecä eñënänitapa.

⁵ —Botö Cope nāni quëwëñömö gote quëwëninque Wængonguï ingante apænedinque cæwënente ongöninqe wiimonte bai atabopa. Wiimonte bai ayömote weocoo ñænæncoo möincoo bai æmænecoo yao æmænecoo yao oncönete bai öönæde inö pædæ wæænonte bai ayömote botö weca wææ wäi wocæ atabopa. ⁶ Wäi wocæñö botö acæte ante guimö ayömo babæidi bai inäni inte ocaguï mongænäni, æmontaique mongænäni, öömä emænäni yæmiñæncoo inö ongönäni bai atabopa. ⁷ Ayæ wacä botimote,

“Pegodo, ængæ gantidinqe wænonte cæe.” ⁸ Angä eñëninque botö, “Awënë eñëmi. Baacä ingä anewëe. Nāwaaqingä inämaï iñongante cöwë cænāmaï imoi ae.” ⁹ Ante wæyömote öönæde apænecä botö nē eñëningä godömenque äninqe, “Wængonguï nänö ædæmö mënongadongä ædö cæte baacä ämii.” ¹⁰ Äninqe tömengä wæætë wæætë mempoga go adopoque adodö angä ate ñænæncoo bai adodö öönæde ingæ æi atabopa. ¹¹ Mäniñedë Tetadea nē quëwengä da pönongä pöninqe onguïñænäni mengäa go adocanque botö imote ante diqui mincæte ante botö owocö boyæ tæcæ pöninqe næ gongænänitapa. ¹² Ayæ Wængonguï Önöwoca incæ botö imote angä eñëninque botö, Wadäni inänipa, ante püināmaï imo inte guïñënāmaï tömënäni tönö ee gotabopa. Ayæ botö tönö iïnäni iñömö tei ganca inäni mänimpodäni godongämæ godänitapa. Gote ayömöni, Codönedio oncö impa, ante adinqe go guitamönipa, ante Pegodo apænecantapa. ¹³ Ayæ, Go guite eñëñömönite Codönedio iñömö, Æbänö cætimpä, ante apænedinque mönitö imönite iïmaï ante apænecantapa. Botö oncönë Wængonguï anquedo a ongongä atabopa. Ayæ botö imote äninqe anquedo iñömö, “Bitö Cope iñömö

ämi wadäni gote Timönö Pegodo näni änogä ingante äñete poncädänimpa. ¹⁴Tömengä pöninque, Mini quëwencabo æbänö cæte wænämaï quëwenguimīnii, ante bitö imite apæ necä ëñencæbiimpa.” Mänömainö ante Wængonguï anquedo apæ necä ëñente cætabopa, ante Codönedio mönitö imönite apæ necä ëñentamönipa.

¹⁵ Mäninganca apænedinque Pegodo iïmaï angantapa. “Wængonguï Tæiyæ Waëmö Önöwoca mä pöninque mönitö imönite nänö guidö bai ñöwo iñömö botö tæcæ apæ necæ cæyömo adocä edæ tömënäniya adobaï wææ guicantapa. ¹⁶ Ìninqe botö, Mönö Awënë Itota æbänö angacäi, ante adodö ante pönentabopa. ‘Wäo wodi iñömö æpænë guidongacäimpa. Wængonguï Tæiyæ Waëmö Önöwoca guiquënë mīnitö baonga pö guicæcäimpa,’ ante Itota do apænegacäimpa, ante botö önöwënenque pönentabopa. ¹⁷ Ayæ, Mönö Awënë Itota Codito ingante wede pönëmöni ate Wængonguï tömengä Tæiyæ Waëmö Önöwoca ingante da pönongä æntamönipa. Ñöwo tömënäni adobaï wede pönënäni ate Wængonguï mönitö imönite nänö da pönongaingä ingante tömënäniya adobaï da pönongä ænänipa, ante pönentabopa. Mänömaï cæcampa, ante pönëninque botö, Ædö cæte Wængonguï ingante Baa anguimoo.”

¹⁸ Ante Pegodo, Æbänö cætimpä, ante tömänö ante edonque apæ necä ëñëninque tömënäni wæætë, Mönö ædö cæte godömenque piinte anguï, ante piyænë cæte apænedänitapa.

—Ñöwo idæwaa ämönipa. Wadäni oodeoidi inämaï inäni incæ mönö bai, Idæwaa wënæ wënæ cæte awædö, ante guingo imonte wädäni ate Wængonguï pönö waadete cæcä ate quëwënänipa, ante ñöwo tæcæ mä ëñëmönipa, ante todinque Wængonguï ingante edæ watapæ apænegadänimpa.

Antioquiya iñömö Itota ingante näni pönencabo

¹⁹ Mäningä Etebä wodi ingante wænöninque oodeoidi godömenque wadäni në pönënäni inänite wënæ wënæ togænte pänäni wædinque në pönënäni iñömö wodii winöninque näwæ gote Pënitia ganca Tipidebæ ganca Antioquiya ganca godänitapa. Godinque tömënäni, Itota Codito æbänö cægacäi, ante oodeoidique inänite apænedinque wadäni inänite apænedämaï ingadänimpa. ²⁰ Incæte Tipidebæ iñömö quëwënäni tönö Tidënebæ iñömö quëwënäni pancadäniya Antioquiya iñömö godinque guidiegoidi inänite adobaï Itota Codito ingantedö ante watapæ apænedäni ëñënänitapa. ²¹ Ìninqe mönö Awënë tömënäni tönö godongämæ cæcä beyænque nanguï inäni tæcæ pönëninque tömengä gämænö pönänitapa.

²² Mänömaï pönënänipa, ante tededäni ëñëninque Eedotadëe iñömö Codito ingante näni godongämæ pönencabo incæ Bedënabee ingante, Bitö Antioquiya iñömö godinque ate pöe, änäni. ²³ Mänïñömö gote pöninque Bedënabee iñömö, Antioquiya iñömö quëwënäni inänite Wængonguï waadete pönö cæcampa, ante adinque nanguï todinque tömänäni inänite, Mīnitö mīmōno wede pönëninque mönö Awënë miñæ cöwë quëwëedäni, ante nanguï angantapa. ²⁴ Bedënabee iñömö Wængonguï Tæiyæ Waëmö Önöwoca ingante ëwocadinque në wede pönengä inongä inte në waa cæcä inongäimpa. Ìninqe tömengä apæ necä ëñëninque tömënäni nanguï inäni mönö Awënë gämænö pongadänimpa.

²⁵ Bedënabee wæætë Taodo ingante diqui mincæte ante Tadoto iñömö gote, ²⁶ adinque tömengä ingante Antioquiya iñömö ænte pongantapa. Pöninque adoque wadepo quëwëninque tömënäni Codito ingante në tee empote quëwencabo tönö cöwë godongämæ ponte apænedinque

nanguï inäni inänite odömonte apænedä eññänitapa. Ayæ Antioquiya iñömö quëwënäni Codito ingante nē tee empote quëwënäni inänitedö ante apænedinque, Coditoidi inänipa, ante mä pemöninque apænedönänimpa.

²⁷ Ayæ Wængonguï beyæ nē apænedäni pancadäniya mäniñedē Eedotadē quëwëninque Antioquiya pönänitapa.

²⁸ Tömänäni näni Wængonguï beyæ apæneincabo incæ adocanque Agabo näni äongä iñömö Wængonguï Önöwoca ingante ewocate apænedinque, Mönö wacabo quëwëñömö tömämæ cænguï oo dæ ba adinque mönö gæwænte wæquimämo baquïnö angüenē, ante angacäimpa.

Ininque iincayæ ate Codaodio Awënē ingäñedē Agabo nö nänö äninö bai do batimpa.

²⁹ Ba adinque Antioquiya näni pönencabo godongämæ pönëninque, Mönö töninäädäni iñömö Oodeabæ quëwëninque edæ tepæmpo gæwænte wädänipa cämöö.

Tömänäni beyæ mönö godonte æinta pædæ godöninque adocanque eyepæ inte nänö godonganca wacä eyepæ inte nänö godonganca godongæimpa, ante godongämæ Ao äänänitapa.

³⁰ Äninque eyepæ pædæ pönöninque Bedënabee tönö Taodo inate, Ænte mäo godinque nē pönänäni inänite nē aadäni nē Picænäni nempo pædæ godöminä æncädänimpa, ante da pönönäni ænte gote godöna ængadänimpa.

12

Tantiago wængä ate Pegodo ingante tee mönedänipa

¹ Mäniñedē Codito ingante näni godongämæ pönencabo iñönänite awënē odeye Edode iñömö pancadäniya inänite wënæ wënæ cæcæte ante angä bæi ongonte ængadänimpa.

² Mänömaï cædinque tömengä angä eññëninque Wäö töninäcä Santiago ingante yaëmenca wänönäni wængacäimpa.

³ Santiago wodi

mänömaï wængä adinque oodeoidi todäni ate wædinque Edode, Godömenque cæbo ate nanguï todinque botö imote waa acädänimpa, ante cædinque Pegodo ingante adobaï bæi ongongantapa. Edæ päo yedæ æmpoquï ömæmö i näni ææmæ cæyedē mäniñedē tömengä ingante bæi ongonte ængantapa.

⁴ Mänömaï æninque Edode iñömö, Oodeoidi Patowa ææmæ iinque bedäni ate botö Pegodo ingante ænte tadonte tömänäni ayönänite apænte ancæboimpa, ante pönëninque tömengä ingante tee mönecantapa. Tee mönedinque Edode godömenque angä eññëninque tontadoidi mengäa go mengäa näni cabo pö wææ wänonte goyönäni wacabo adopodäni pö wææ wänonte godönänimpa. Mänömaï wacabo pö wacabo pö cædinque mencabodäniya go mencabodäniya wæætē wæætē ponte wææ wänonte godönänimpa.

Pegodo ingante Wængonguï incæ ñimpo cæcä gocampa

⁶ Pegodo ingante tontadoda mänaa tönö æmæncaipo æmæncaipo yaëmengö tæi goti wincapodäni wæyongante wada odemö cöwë wänö cönönaimpa. Ininque Edode tömengä nänö apænte angüönæ ado woyowotæ Pegodo mänömaï goti winte wædongä inte mö ñongantapa.

⁷ Iñontobæ Wængonguï Awënē nänö da pönöningä anquedo a ongongantapa. Tee mönete oncönē ñäo gongæntapa. Pegodo mö ñöñongante Wængonguï nänö da pönöningä iñömö æmætæ inö tao cædinque, “Pegodo, ñäni ömæmonte quingæ ængæ gantibi.” Äñongä daagömē näni tæi wini incæ tömenque ñimænca tæ wæængatimpa.

⁸ Ayæ, “Bitö weocooga pacadeyænta pacadeyænte awæncata wëwabi.” Angä eññente cæcä adinque

Wængonguī anquedo godōmenque, “Yacoo wīni caadinque botō miñæ pōe.”

⁹ Angā ēñēninque Pegodo, Awii cæmonte awædō. Anquedo dicæ ponte cæcā. Mānōmaī ponte cæcampa, ante botō wīimonte bai aboimpa, ante wawique pōnengā incæte anquedo miñæ tee empote tao gocantapa. ¹⁰ Mānōmaī tao godinque guicōnē nē wānōna ongōñōna wodo tebæ tao godinque yabæcōnē tamongademō nē wānōna ongōñōna wodo tebæ tao godinque yaēmewæ odemō tōmēnāni quēwēñōmō ante nāni tao goquīnemō ganca pōnatapa. Mānīnemō ganca ponte ongōñōna yaēmewæ odemō incæ tōmenque æ ænete bayō tao godinque taadō adodonque cægōna ate anquedo iñōmō ingæ gocā ate Pegodo guiquēnē adocanque a ongongantapa.

¹¹ Adoboque a ongōmopa, ante wædinque tōmengā wæætē nāmā pōnengā badinque, “Æ. Nāwangā incæ do tate ēñēmopa. Edode nempo wæwēninque botō oodeoidi nāni pīnō wæquēnēmo imo adinque Wængonguī angā ēñēninque tōmengā anquedo ponte botō imote gā pe æmpote ō ængā ate aamō cæbopa, ante tæcæ pōnēmopa.”

¹² Ante pōnente wædinque Pegodo wadæ godinque Wāō Māadoco nāni ānongā tōmengā badā Māadiya oncō boyæ ponte næ gongægantapa. Mānincōnē wadāni nē pōnēnāni incæ do pōninque Wængonguī ingante godongāmæ apænee cōnōnānimpa.

¹³ Pegodo iñōmō yabædemō ongonte aa peyongā baquēcā nē ēacā ingante nē cæcā inte tōmengā emōwo Adoda iñōmō ēñencæte ante pongantapa.

¹⁴ Ponte ēñēñongā Pegodo incæ aa pecā ēñēninque watapæ tote wædinque tōmengā wīi pōnēninque odemō wi ænedāmaī pogodo gote edæ wadæ guidinque, Pegodo incæ oncodo a ongongā tamēñedāni.

¹⁵ Ante apænecā ēñēninque tōmēnāni wæætē,

—Adoque antedō amīni.

Ante wæyōnāni tōmengā, Nāwangā impa, ante ancaa angā ēñēninque tōmēnāni,

—Wa. Pegodo ingante nē aacā anquedo imaingampa.

¹⁶ Ante tedeyōnāni Pegodo iñōmō ayæ aa pete ongōnongāimpa. Ayæ ponte wi ænete ayōnāni Pegodo ingante adinque ancaī guīñente wædānitapa. ¹⁷ Tōmengā wæætē, Apocænē iedāni, ante ōnompocaque compo cæcā adinque pæ wēneyōnāni tōmēnāni inānite apænecantapa. Botō tee mōnete wæyōmote Wængonguī æbānō pōnō cæcā ate tate pōmoo, ante tōmānō ante adodō ante apænedinque,

—Botō apænebo mīni ēñēnō ante mīnitō wæætē wacā Tantiago ingante apænedinque wadāni mōnō tōniñadāni inānite apænemīni ēñencædānimpa.

Āninque Pegodo wayōmō wadæ gocantapā.

¹⁸ Īimō wæñō ñāō bayonte tontadoidi guiquēnē, Pegodo ædōnō gote dæ angā, ante nanguī Yæ yæ ante cædānitapa. ¹⁹ Mānōmaī cætimpā, ante apænedāni ēñente wædinque Edode angā diqui diqui miñōnāni Pegodo ayæ dæ angantapa. Īinque nē wææ wānōnīnāni inānite Edode, Æbānō cætīi, ante ancaa angā wædinque tōmēnāni, Mōnō ædō cæte angūi, ante wæyōnānite tōmengā wadāni inānite angā capo wæñōnāni wængadānimpa. Edode tōmē Oodeabæ wadæ tao godinque Tetadea gote quēwengacāimpa.

Edode wængampa

²⁰ Tido iñōmō quēwēnāni tōnō Tidōo iñōmō quēwēnāni inānite awēnē Edode wodi māniñedē ēnagate ænguī bacā adinque tōmēnāni wæætē godongāmæ pōnente Ao āninque Edode weca apænecæ pōnānitapa. Tōmēnāni, Mōnō iñōmō awēnē odeye Edode ōmæ quēwēnāni pōnōnāni æninque mānīnonque cænte quēwēmompā, ante wædōnāni inte tōmengā ingante, Bitō pīnāmaī inte

piyænē cæbi quēwēmōnie, ante ancæte ante pōnānitapa. Pōninque tōmēnāni Edode oncōnē owodāni inānite nē aacā Bodato ingante waa cædinque tōmengā ingante ānāni Ao ante tōmengā wæætē Awēnē Edode ingante tōmēnāni beyæ apæ necā ēñengacāimpa. ²¹ Edode iñōmō, Iiōnæ ba ate botō ponte apæ necæboimpa, ante tōmengā nānō āniōnæ iinque ba ate tōmengā awēnē weocoo waēmoncoo wēñate pōninque awēnē nānō apænte ante contaimpaa tæ contadinque tōmānāni ayōnāni tōmēnāni inānite apæ necantapa. ²² Apæ necā ēñēninque tōmānāni Yæ yæ āninque, “Wii waocanque tedecā ēñēmompā. Wængonguīdi nāni tedepāmo bai tedecā ēñēmompā.” ²³ Ante Yæ āñōnāni Edode wodi wæætē, Nāwā Wængonguinque nē waa cæcampa, ante anguēnengā incæte ānāmaī pæ wēēnecā adinque tōmengā ingante Wængonguī anquedo wæætē godō cæcā ate ayago cæ æmæwo wængacāimpa.

²⁴ Incæte Wængonguī nānō angaiñō ante māniñedē wayōmō māo wayōmō māo apænedāni ēñēninque nangui ināni mōnō Awēnē ingante nē wede pōnēnāni badānitapa.

²⁵ Bedēnabee tōnō Taodo iñōmō E-dotadēē iñōmō godinque tōmēna nāna cæquēnēnō tōmānō iinque cædinque wadæ godinque Wāō Māadoco nāni ānongā ingante tōmēna tōnō æninque adodō godānitapa.

13

Wængonguī angā ēñente Bedēnabee tōnō Taodo godapa

¹ Antioquiya iñōmō Itota Codito ingante nāni godongāmæ pōnencabo inōnāni iñōmō pancadāniya Wængonguī beyæ nē apænedāni iñōnāni pancadāniya guiquēnē nē odōmonte apænedāni inōnānimpa. Bedēnabee tōnō wacā Timōnō Nēegodo nāni ānongā inōnaimpa. Tidēnebæ nē quēwēningā Dotio inongāimpa. Pancabaa awēnē Edode tōnō godongāmæ nē pædingā Mānāēnē tōnō Taodo

iñōnaimpa. Mānimpodāni ingadānimpa. ² Iinque tōmānāni godongāmæ mōnō Awēnē ingante, Tæiyæ Waēmō imipa, ante watapæ apæ necæte ante cænāmaī apæneyōnānite Wængonguī Tæiyæ Waēmō Ōnōwoca incæ iimāi angacāimpa. “Bedēnabee tōnō Taodo mīnitō tōnō nē cæda iñōnate āmīni botō beyænque cædinque nānēnē godinque botō ānīnō ante cæcædaimpa,” angacāimpa.

³ Iinque iinque cænāmaī inte apænedinque tōmēnāni Bedēnabee tōnō Taodo inate gampocadinque Wængonguī ingante apænedinque ānāni ate wadæ gogadaimpa.

Wāā tēiwænē Tipidebæ gote apænedā ēñēnāni

⁴ Bedēnabee tōnō Taodo iñōmō Wængonguī Tæiyæ Waēmō Ōnōwoca mānōmaī angā godina inte Tedeotia iñōmō wæi wipodē ñænæmpodē go guidinque wogaa godinque wāā tēiwænē Tipidebæ nāni āmæ godatapa. ⁵ Tadamīna nāni quēwēñōmō pōninque oodeoidi odōmōincōnē wacōnē go guī wacōnē go guī cædinque Wængonguī nānō apænedō ante nōingā apænedā ēñengadānimpa. Ayæ Wāō tōmēna miñæ godinque tōmēna beyæ nē cæcā inongāimpa.

⁶ Mānōmaī wāā tēiwænē tæcæguedē wodo tebæ cægōninque yæcado godinque Papo nāni quēwēñōmō ganca pōnānitapa. Pōninque tōmēnāni wacā idō tōmengā emōwo Baditota ingante māmō bee tēnānitapa. Tōmengā iñōmō oodeocā inongā inte, Wængonguī beyæ nē apænebo imopa, āninque nē babæ ānongā inongāimpa. ⁷ Tōmengā wāā tēimæ awēnē Tedeguiō Pabodo nāni ānongā tōnō godongāmæ nē cædongā inongāimpa. Awēnē Tedeguiō guiquēnē nē ocai encadongā inte Wængonguī nānō ānō ante ēñēinente wædinque Bedēnabee tōnō Taodo inate āñete māmōngā pōnatapa. ⁸ Tōmēna ponte apæneyōnate idō Baditota guiquēnē guidiego tededō Edīma nāni ānongā inongā inte edæ, Awēnē nē pōnengā badāmaī incæcāimpa, ante

wææ cæcæte ante püinte cæcantapa. ⁹ İninque Taodo Pabodo näni änongå iñömö Wængongui Tæiyæ Waëmö Önowocaque ewocadinque idö ingante gomö adinque, ¹⁰ tömengä ingante angantapa.

—Bitö iñömö wænæ awënë nänömömi bai imidö angüenë. İñæmpa, Wadäni quiëmë nö impa, ante oda cæcædänimpa, ante bitö püinte pönëwënonque entawëninque bitö në babæ cædömi imipa töö. Wængongui nänö töinö ponguinö ante idiquibæ bacæimpa, ante bitö æpogamë incæ cæbii. ¹¹ Nöwo iñömö Wængongui Awënë në piñængä inongä inte bitö imite pancæcäimpa. Tömengä pönö gampomongä ate bitö babetamömi badinque nænque ñäö tamönö wantæpiyæ tömengä nänö änimpoga adämaï incæbiimpa.

Äñongä boguimä bai do wææ ininque wëmö emöninque Edima Baditota näni änongå gampo gampo cædinque, Æcänö botö imote töö æmænte mäoda goquimoo, ante diqui diqui mingantapa. ¹² Mänömaï bacä adinque wää tëimæ awënë wæætë Wængongui Awënë ingantedö ante iñäna nana odömönte apænedö ante pönente guñente wædinque në pönengä bagacäimpa.

Pitidiabæ Antioquiya godinque cædapa

¹³ Pabodoidi iñömö Papo iñömö wadæ godinque wipodë ñænæmpodë wogaa taodinque Pampidiabæ pöninque Pedegue iñömö ti wææñönäni Wäö wæætë adodö Eedotadëe gocæte ante tömëna inate emö cæte wadæ gogacäimpa. ¹⁴ Tömëna wæætë Pedegue wadæ godinque Pitidiabæ pöninque Antioquiya näni quëwëñömö pönatapa. Ayæ tömënäni guëmanguionæ iinque bayö oodeoidi odömöincönë pö guite tæ contadatapa. ¹⁵ Tæ contate a cöñöna Möitee wodi nänö yewæmongainta adinque Wængongui beyæ në apænëgainäni näni yewæmongainta ate apænedänitapa. Ayæ mäniñömö

awënëidi iñömö tömënäni weca on-gongä adocanque ingante apænedinque,

—Bitö ñöwo pöna inate mäo äninque iïmaï apænecæbiimpa, İñäna, möni töniñamäna ëñëmäna. İñömö ongönäni wampo pönëninque tæi gongænte on-goncædänimpa, ante cædinque minatö ædæmö apænëmäna ëñenguinänii, ante ämi apænebaïnapa.

¹⁶ Änäni ëñente mäo angä ëñëninque Pabodo iñömö ængæ gantidinque önompoca compo compo cædinque tömënäni inänite apænecantapa.

—Minitö, pancamäniya idægoidi iñömöminite pancamäniya wamäni incæ, Näwä Wængongui inongä ingampa, ante në guñente wämäni iñöminite botö tömämäni iminute apænebo ëñëedäni. ¹⁷ Idægoidi, minitö iminute täno apænebo ëñëedäni. Mönö idægocabo Wængongui incæ mönö mæmæidi inänite apænte ængä ate wadäni nëmæ Equitobæ iñömö quëwëñönänite tömengä pönö cæcä ate tömënäni tæiyænäni yebængadänimpa. Ayæ Wængongui tæi piñænongä inte ingæ æmæninque töö æmænte mäocä wadæ gogadänimpa. ¹⁸ Godinque tömënäni coadenta wadepo mänimpoga önomæca cægöninque æbämë wænæ wænæ cæte quëwënäni ate wæcä incæte tömengä pänämaï inte ata cæpote ænte mäocä gogadänimpa. ¹⁹ Ayæ wadäni Cänäämæ quëwënäni önompo æmæmpoque go menca-bodäniya iñönänite wido cædinque Wængongui, Tömënäni ömæ ini minitö ömæ wæætë bacæimpa, ante mönö wæmæidi inänite pönongä ængadänimpa. ²⁰ Edæ coatodo tiento tincoenta wadepo mänimpoga wabæca quëwënäni ate mäniñedë ate Wængongui, Minitö ömæ, äninque mönö wæmæidi inänite pönongä æninque quëwengadänimpa.

Ante apænedinque Pabodo, Idægoidi dodäni æbänö cægadänii, ante godömenque apænecantapa. “Mänimæca ponte wantæpiyæ quëwënäni ate pancadäniya në

apænte änäni iñönänite Wængonguï angä ate adodäni awënëidi bai badinque wayedë wacä adocanque wayedë wacä adocanque wayedë wacä adocanque aagadänimpa. Tämöedo Wængonguï beyæ nê apæneçä nänö ponte apæneganca mäninäniçue aagadänimpa. ²¹ İncayæ ate mönitö dodäni iñömö Wængonguï ingante apænedinque, Bitö adocanque ingante ämi ate tömengä tæiyæ awënë bacæcäimpa, ante ancaä änäni ëñente wædinque tömengä wæætë Beencamïnö wodi pæingä incæ Titæ wengä Taodo ingante angä bagacäimpa. Tæiyæ awënë badinque tömengä coadenta wadepo mänimpoga iñonte aagacäimpa. ²² Ayæ ate Wængonguï wæætë, Idæwaa, ante Taodo wodi ingante wido cædinque Dabii wodi ingante wæætë angä tæiyæ awënë bagacäimpa. Adocä Dabii ingantedö ante apænedinque Wængonguï, Botö waa pöni entawëmo bai Yæte wengä Dabii iñömö adobai entawengä abopa. Tömengä iñömö botö änö bai edæ tömänö cæquingä ingampa, ante apænegacäimpa.”

²³ “Wængonguï doyedë, Codito ængä beyænque idægoidi quëwencædänimpa, ante do nänö angainö bai ñöwo cædinque adocä Dabii pæingä Itota Codito ingante da pönongä pongacäimpa. ²⁴ Itota ayæ pönämaï iñongä Wäö wodi idægoidi tömänäni İnänite apænedinque, Minitö, Idæwaa wënæ wënæ cæte awädö, ante Wængonguï gämænö wadæ pöninque æpænë guiedäni, ante apæneçä ëñengadänimpa. ²⁵ Ayæ adocä Wäö incæ, ‘Botö æbodö imoo, ante pönëmini. Minitö pönëno bai wii imopa. Botö do pönimo iñömote mini nê pönëmongä iñömö ayæ poncæcäimpa. Tömengä ingante adinque botö waëmö imopa diyæ tömengä awæncata godö ñi cæquimoo.’ Ante Wäö tömengä nänö cæquënëno wodo iinque cæyedë apænegacäimpa.”

²⁶ Ante apænedinque Pabodo godömenque apæneçantapa. “İñänäni, pancamïniya Abadäo wodi pæimini

iñömini pancamïniya wamini incæ Wængonguï ingante guïñëmïni iñömini edæ botö tömämïni iminite apænebo ëñëedäni. Mäninö, Codito ængä beyænque quëwencæminimpa, ante Wængonguï tömämö beyæ pönö apænegacäimpa. ²⁷ Eedotadëe quëwënäni tönö tömënäni awënëidi iñömö, Itota æcänö ingäa, ante pönënamäi ingadänimpa. İninqe guëmanguïönæ iñö guëmanguïönæ iñö Wængonguï beyæ nê apænegainäni näni yewæmongainta cöwë adäni incæte tömënäni, Itota nänö wænguinque wënæ wënæ cæcä ingampa töö, ante babæ ante apænte anewëninque edæ dodäni näni yewæmonte angainö bai iinque cædänitapa. ²⁸ Tömënäni, Itota nänö wænguinque æbänö wentamö mongængäa, ante cöwä ayönäni edæ dæ ampa. Ante wædinque awënë Pidato ingante apænedinque tömënäni, Itota ingante ämi wænönäni wængæe, ante ancaä änäni ëñëninque Pidato Ao angä wænönäni wængacäimpa. ²⁹ İninqe Itota ingante awäa timpote wænöninque tömënäni dodäni tömengä ingante ante näni yewæmonte angainö bai tömänö ante iinque cædänitapa. Mänömaï cædäni ate wængä ate tömënäni änäni ate tömengä miñæ godinäni wæætë tömengä nänö ongöwäa pædæ æmpodinque önompo o togæmpote wæi önöwa o togæwadinque pædæ wæænöninque edæ ænte mäo daga wengadänimpa.”

³⁰ “Incæte Wængonguï guiquënë do wæningä ingante, Näni ömæmöe, angä ñäni ömæmonte quëwengampa. ³¹ Näni ömæmöninque tömengä tæönæ iñonte pö pö cædinque a ongöñongante edæ tömengä tönö wëenëñedë Gadideabæ quëwëninque Eedotadëe iñömö nê pongainäni iñömö edæ tömengä ingante wæætë adänitapa. İninqe tömënäni iñömö nê adinäni inte waodäni inänite, Itota näwangä ñäni ömæmonte mïngä quëwengampa, ante nê apænedäni inänipa.”

³² Ante apænedinque Pabodo, “Dodäni inänite Wængongui, Minitö beyæ botö cöwë pönö cæcæboimpa, ante apænegacäimpa, ante eñëminitawo. Mäninö ante watapæ nanö apænegainö ante mönitö ñowo iimaï ante apænemönipa. ³³ Mäninö tömengä dodäni inänite nanö angainö bai ñowo tömënäni mömoidi beyæ iinque cædinque Wængongui Itota ingante, Nänï ömæmoe, angä ñäni ömæmongacäimpa. Tömengä ñowo iinque cæcampa, ante Ämotamini nänï Angainta tänota gao wæintaa Wængongui beyæ iimaï ante yewæmongacäimpa. ³⁴ Ayæ mäninö, Tömengä Wengä do wæningä iñongante Wængongui angä ñäni ömæmöninque baö ñömäadamaï incæcäimpa, ante pönëninque Itaiya wodi iimaï ante Wængongui beyæ ante yewæmongacäimpa. ‘Awënë Dabii wodi ingante apænedinque botö, Tæiyæ waëmö botö cædö bai cædinque cöwë ædæmö aate cæcæboimpa, ante nö botö angainö bai cædinque minitö iminite pönö adobai cæcæboimpa,’ ante Wængongui angampa, ante yewæmongacäimpa. ³⁵ Ayæ mäninö ante wataa adobai Wængongui ingante apænete bai Dabii wodi yewæmongacäimpa. ‘Bitö imite nê Cæcä iñömö bitö cædö ante cöwë cædongä inte wængä adinque bitö ædö cæte tömengä ingante ænämaï inte ee abi baö ñömäaquiringä,’ ante yewæmongacäimpa.”

³⁶ “Awënë Dabii wodi guiquënë Wængongui nanö änönö ante eñëninque adoyedë quëwënäni beyæ waa cædingä inte edæ nänë wæninque tömengä mæmæidi weca æiyongä tömengä baö ini ñömænte bagatimpa. ³⁷ Wæätë Wængongui, Nänï ömæmoe, angä eñente nê ömæmongaingä iñömö tömengä baö ñömäadamaï ingatimpa. ³⁸ Iinque onguiñæmini botö töninamini eñeedäni. Itota pönö

cæcä beyænque mönitö minitö iminite apænedinque, Wænæ wænæ mönö cædö ante adinque Wængongui pönö ñimpo cæcä ate quëwëmompä, ante apænemöni eñëminipa. Möitee wodi nanö wææ angainö ante eñente beyænque mönö iñömö dicæ nö cæte quëwëmö imongaa. ³⁹ Wæätë mäningä onguiñængä iñömö Itota iñömö tömengä nö pönï nanö entawënö ante pönongä ænte entawëmö beyænque mönö nê pönëmö tömämö wæätë Wængongui ayongä edæ nö cæte quëwëmö inömö imompä. ⁴⁰ Iinque Wængongui beyæ nê apænegainäni iimaï ante nänï apænegainö ante pönëninque minitö iñömö, Mönitö imönite wiï bacæimpa, ante nämä wææ aquënë quëwëedäni. Iimaï ante edæ ämotamini ante bai yewæmongadänimpa.

⁴¹ ‘Minitö nê badete towëmini inte cöwä aquënë quëwëedäni. Botö cæbo adinque minitö ancai guiñente wæcæminipa. Minitö ayæ müimini quëwëñömöni edæ botö mä pönï cæcæboimpa, ante pönëminiyaa.

Wængongui mänömaï cæcæcäimpa, ante edonque pönï apænedäni bai minitö wæätë, Babæ ancædö, ante wæcædöminimpa.’

Ante nänï yewæmongainö ante adinque edæ badete todämaï iedäni,” ante Pabodo apænecantapa.

⁴² Mänömainö ante iinque apænedinque Pabodo tönö Bedënabee tömënäni odömöincönë ongonde oncodo tao goyönate Antioquiya iñömö quëwënäni iñömö, Wacä guëmanguionæ bayonte minatö ñowoönæ mïna apænedö bai godömenque apænemina eñencæmönimpa, änänitapa. ⁴³ Ayæ godongämæ nänï ponte ongönincabo tao goyönäni oodeoidi pancadäniya ayæ oodeoidi bai nê bagainäni adobai Wængongui ingante guiñente quëwënäni nanguï inäni iñömö Pabodo tönö Bedënabee inate edæ tee empote godäni. Adinque iñäna wæätë tömënäni inänite apænedinque, Wængongui waadete

nänö pönö cædonö ante pönëninque minitö cöwë ñimpo cædamaï tæï ongönninque edæ waa quëwëedäni, ante nanguï apænedatapa.

⁴⁴ Ayæ adoque Wængonguï itædë go ate tömënäni näni guëmanguïönæ bayonte mäniñömö quëwënäni wodo tömänäni Wængonguï Awënë nänö änö ëñencæte ante godongamæ pönänitapa. ⁴⁵ Nanguï inäni mänömaï pönäni ate wædinque oodeoidi guiquënë piinte badinque, Babæ ante anewengampa, ante Pabodo ingante godö piinte tedewënänitapa. ⁴⁶ Mänömaï tedewëñönänite Pabodo tönö Bedënabee wæætë guïñenedamaï inte apænedatapa.

–Minitö oodeoidi imini inte edæ täno ëñencæminimpa, ante cædinque mönatö Wængonguï nänö änö ante edæ mä apænedinque minitö iminite täno apænequëñëmöna intamönäpa. Minitö iñæmpa mini cöwë wænämaï quëwenguïnö ante apæneyömöna mini apænte pangä wæquinque edæ Baa äminipa. Ante wæmöna inte mönatö ñöwo ëmö cæte godinque edæ oodeoidi inämaï inäni weca edæ apæneccæ gomöna tamëñedäni. ⁴⁷ Mönitö Awënë iïmaï ante mönatö imönote angacäimpa.

“Quëwencæminimpa, ante botö cægainö ante bitö inguipoga tömämæ mäo apænedinque

Oodeoidi inämaï inäni beyæ tica ënente bai cæcæbiimpa,

ante cædinque botö bitö imite da godömo apæneccæ gocæbiimpa.”

Ante në apænegaingä inte Wængonguï mönatö imönote angä ëñente apænemönäpa.

⁴⁸ Mänömainö ante apæneda ëñëninque oodeoidi inämaï inäni iñömö, Awënë nänö apænedö waa ëñëmönipa, ante watapæ apænedänitapa. Ayæ mönö Awënë doyedë apænedinque, Mänimpodäniquë wede pönëninque cöwë wædamaï quëwenguïnäni incædänimpa, ante tömengä nänö në angainänique ñöwo pönënanitapa. ⁴⁹ İninque mönö Awënë tömengä nänö apænedö ante

mäo apæneyönäni mäniömæ tömäo quëwënäni ëñënanitapa.

⁵⁰ Oodeoidi guiquënë, Pabodo tönö Bedënabee inate mönö wido cæcæimpa, ante cædinque iïmaï cædänitapa. Onquiyænäni näni në waa adäni inte Wængonguï ingante guïñente quëwënäni iñönänite tömënäni tönö onguïñænäni mäniñömö quëwënäni awënëidi bai inte ñænænäni iñönänite oodeoidi, Badogaa, ante nanguï änäni ëñënanitapa. Oodeoidi nanguï änäni ëñente cædinque mäninäni wæætë Pabodo tönö Bedënabee inate togænte päninque, Mönitö ömæ quëwënämaï, ante wido cædäni godatapa. ⁵¹ Mänömaï cædäni godinque tömëna iñömö, Mänimæ näwate awædö, ante bai cædinque piwacæ piwacæ cædinque Icönio iñömö gocæte ante wadæ godatapa. ⁵² Itota ingante në tee empote quëwënäni guiquënë watapæ todäni badinque Wængonguï Tæiyæ Waëmö Önöwoca ingante ænte ewocadinque edæ waa quëwengadänimpa.

14

Pabodo tönö Bedënabee Icönio iñömö godapa

¹ Mänüi godinque Icönio näni quëwëñömö pönninque Pabodo tönö Bedënabee cöwë nana cæï bai cædinque oodeoidi odömöincönë go guiidatapa. Go guite apæneyöna, Nö apæneda, ante pönëninque oodeoidi tönö oodeoidi inämaï inäni tönö nanguï inäni näni wede pönënguinque ëñënanitapa. ² Wæætë oodeoidi incæ pancadäniya në Baa änäni inte babæ wapiticæ apænedinque, İñäna në wënæ wënæ apæneda inate wüi ëñengæimpa. Ante tedewënäni ëñente wædinque wadäni oodeoidi inämaï inäni wæætë piinte badinque mönö tönüñada inate ante wiwa adänitapa. ³ Incæte iñäna wantæpiyæ mäniñömö quëwënninque guïñenedamaï inte mönö Awënë beyæ apænedatapa.

Apæneyöna mönö Awënë incæ, Pabodo tönö Bedënabee iñömö botö pönö waadete cægainö ante nē nō apæneda inōnapa, ante wadāni pōnencædānimpa, ante cædinque tōmēna tönö godongāmæ cæcā ate tōmēna, Ate pōnencædānimpa, ante mā cædinque bamōnengæ cædatapa.

⁴ Mänōmaī cæda incæte mǎniñömö quēwēnāni pancadāniya, Oodeoidi bai pōnēmōnīpa, āñōnānite wadāni guiquēnē, Itota da godongā nē pōna bai pōnēmōnīpa, ante pancadāniya wadō pancadāniya wadō cædānitapa.

⁵ Īnīnque oodeoidi tönö oodeoidi ināmaī ināni tönö tōmēnāni awēnēidi tönö godongāmæ pōnēnīnque, Pabodo tönö Bedënabee inate mönö piinte cædinque dicaca tacamö wæncædaimpa.

⁶ Ante Ao ante cæyōnāni Pabodo tönö Bedënabee iñömö, Mänōmaī ante cædānīpa, ante ēñente wædinque wodii wīnōnatapa. Wodii wīnōnte godinque Dicaōniabæ pōnīnque tōmēna Ditada nāni quēwēñömö Dedebe nāni quēwēñömö wayōmō wayōmō godinque, ⁷ mönö Awënë ingantedō ante watapæ māo godōmenque apæneda ēñēñōnānimpa.

Ditada iñömö Pabodo ingante tacadānīpa

⁸ Mǎniñömö Ditada iñömö edæ wacā cabæwaingā tōmengā önōwa tipæwaa wēnæ wēnæ ēwacā ēñagāingā inte dao dao godāmaingā pægaingā inte tæ contate a ongongantapa. ⁹ A ongōñongā Pabodo ponte apænecā ēñēe congantapa. Pabodo wææmō adinque önōwēnenque pōnēnīnque, Īngā nānō waa bawāquinque nē pōnengā ingampa, ante do pōnente wædinque, ¹⁰ tōmengā ingante ogæ tedete,

—Ængæ gantidinque adiyæ gongæmi āmopa.

Angā ēñēnīnque nē cabæwaingā incæ quingæ ængæ gantidinque dao dao gocantapa. ¹¹ Mǎniñömö ongōnāni guiquēnē Pabodo mǎnōmaī cæcā ate wædinque dicaōniāidi tōmēnāni tededō yedæ ānīnque,

—Īñāna iñömö wængonguīna incæ waoda bai bate mönö weca wæænte ongōna abaimpa.

¹² Ante pōnente wædinque Bedënabee ingantedō ante apænedīnque, Mōnō wængonguī Deoto ingānō anguēnē, ante Deoto pönö pemōnīnque, Īngā wæætē nē apænecā ingampa, ante pōnēnīnque Pabodo ingante, Mōnō wængonguī Edēme ingānō anguēnē, ante pemōnānitapa. ¹³ Ayæ tōmēnāni quēwēñömö yæcado tōmēnāni wængonguī Deoto oncō mænōnte ongōnīpa. Deoto quī, ante nē godongā iñömö edæ, Pabodo tönö Bedënabee nē wængonguīna inapa, ante wapiticæ pōnēnīnque, Mōnō wængonguīna quī, ante tōmānāni tönö godoncæ cæcantapa. Mänōmainō ante cædinque tōmengā nāni que cædi ongai ænte pōnīnque wagadāidi onguīñænāni inānite yabædemō ænte ponte wænoncæ cæcantapa.

¹⁴ Mänōmaī cæcā ate wædinque nē ponte apæneda Bedënabee tönö Pabodo iñömö, Wīwa cæmīnīpa, ante bai cædinque nāmā weocoo wānā ñænīnque pogodo māmō nangūi ongōnāni weca tæcæguedē næ gongæñīnque,

¹⁵ —Īñānāni, quīmæ quēwēmīnī. Mīnitō waomīni imīnīpa, mönatō mīnitō bai adobai waomōna imōna apa quēwēmīnī. Mōnatō iñæmpa watapæ möna ēñēnō ante apænecæte ante pōnīmōna inte mīnitō imīnite iīmaī ante āmōnapa. Īncoo mīni waa adincoo incæ edæ, Önoncooque impa, ante adinque mīnitō mǎnīncooque wido cædinque Wængonguī nē Quēwengā gāmænō pōedāni. Tōmengā iñömö öönæ inguipoga gāwapæntibæ nē badongāingā inte öönædē quēwēnāni tōmānāni inguipoga quēwēnāni tōmānāni gāwapāa quēwēnāni tōmānāni inānite nē badongāingā Wængonguī inongā ingampa. ¹⁶ Tōmengā wēēñēdē tōmāmæ quēwēnāni nāmā pōnēnīnque nāni goquīnonque ee acā gogadānimpa. ¹⁷ Incæte tōmēnāni inānite wīi æmæwo emō cæte gogacāimpa. Wæætē edæ, Wængonguī

æbänö ingää, ante eñencædänimpa, ante cædinque tömengä ñimpo cædämaï cöwë odömongacäimpa. Edæ minitö iminite pönö waadete cædinque Wængongui cöönæ angä inguipoga wææ ñinque incadepo incadepo cænguï eyepæ pönongä cæninque minitö watapæ todinque quëwëminipa.

¹⁸ Mänömainö ante Pabodo tönö Bedënabee wææ cæcæte ante apæneda eñëñäni incæte godongämæ ongönäni guiquënë, Minatö wængonguimäna qui, ante cöwë pönoncæmönimpa, ante wawique pönëninque cædänitapa. Wodo edæ pönöñönänite iñäna godömenque wææ äna eñëninque ñimpo cæte wii pönönänitapa.

¹⁹ Ayæ ate oodeoidi Antioquiya iñömö quëwëninque Icönio iñömö quëwëninque pö Ditada iñömö pöninque mäniñömö godongämæ ongönäni inänite, Iina onguïñæna inate mönö wii eñengæimpa, ante änäni. Eñëninque godongämæ Ao äninque Pabodo ingante dicaca tacadäni wæyongä, Æmæwo wængampa, ante pönëninque tömëñäni nani quëwëñömö yabæ inö wëä mäo wido cædänitapa. ²⁰ Incæte Itota ingante tee empote quëwëñäni godongämæ ponte æænümæ gongænte ayönäni Pabodo yabæque æmæwo wænte bai öñöningä inte ængæ gantidique adodö tömëñäni quëwëñömö pongantapa. Ayæ iimö ate tömengä Bedënabee tönö wæætë Dedebe nani quëwëñömö adodö gocæte ante wadæ godatapa.

²¹ Godinque Dedebe iñömö pöninque Codito ingantedö ante watapæ apæneda eñëninque tömëñäni nanguï inäni Itota miñæ quëwëñäni bagadänimpa. ñinque tömëna mäniñömö idæwaa apænete wadæ godinque Ditada iñömö adodö pö godinque Icönio iñömö adodö pö godinque Antioquiya nani quëwëñömö wæætë pönatapa. ²² Mänömaï wayömö wayömö godinque Itota ingante nê tee empote quëwëñäni inänite bee

tëninque Pabodo tönö Bedënabee nanguï apæneda eñëninque iñäni godömenque tæi piñænte entawëñäni badänitapa. Ayæ tömëñäni inänite, Mini pönëñö ante ñimpo cædämaï inte godömenque wede pönëninque tæi ongoncæminimpa, ante ædæmö apæneda eñëñänitapa. Ayæ waadete apænedinque, Mönö nanguï nantate wædinque Wængongui Awënë Odeye nempo guicæimpa, ante apænedatapa. ²³ Ayæ wayömö wayömö tömäo godinque Itota ingante godongämæ nani pönencabo weca go guite ongöninque Pabodo tönö Bedënabee iñömö iimäi cædatapa. Nê nö cædäni inänite adinque tömëna, Itota Codito ingante mini godongämæ pönencabo iñöminite iñänique edæ nê aadäni bacædänimpa, ante äna ate mäninänique nê Picænäni nani äñönäni badänitapa. Ayæ cænämaï inte Wængongui ingante apænete ate tömëñäni inänite iñäna, Minitö mönö Awënë ingante wede pönëminitawoo. Tömengä mini nê pönëñongä incæ minitö iminite wææ aacæcäimpa, ante apænedatapa.

Tidiabæ Antioquiya iñömö ocæ emænte godapa

²⁴ Pabodo tönö Bedënabee ayæ Pitidiabæ wodo tebæ godinque Pampidiabæ pönatapa. ²⁵ Mäniñömö ponte Pedegue nani quëwëñömö mönö Awënë nänö angainö ante apænedinque Ataya nani quëwëñömö wææ pönatapa. ²⁶ Mäniñömö pöninque tömëna imæmäa Antioquiya iñömö adodö tacæte ante ñænæ wipodë guiidatapa. Doyedë iñömö tömëna nana mäniñömö quëwente tao goyedë wadäni nê pönëñäni inte tömëna inate, Wængongui pönö waadete godongämæ cæcä ate minatö eyepæ cæcæminaimpa, ante da godongainäni inönänimpa. Nöwo iñömö tömëñäni nani äñinö do ñinque eyepæ cædina inte tömëna adoyömö nani da godiñömö ocæ emænte pönatapa. ²⁷ Mäniñömö pöninque tömëñä Itota ingante godongämæ

nāni pōnencabo inānite añete pōnāni ate tōmēnāni inānite apænedinque Wængonguī tōmēna tōnō nānō cædinō ante adodō adodō tōmānō ante apænedatapa. Oodeoidi ināmaī ināni wede pōnēninque guicædānimpā, ante Wængonguī odemō wi ænete bai cæcā ate do pōnente badānīpa, ante apæneda eñēnānitapa. ²⁸ Ayæ māniñōmō Itota ingate nē tee em-pote quēwēnāni tōnō wantæpiyæ quēwengadaimpa.

15

Eedotadēē iñōmō pōninque wæætedō wææetē ānāni

¹ Māniñedē onguīñænāni Oodeabæ quēwēnāni pancadāniya Antioquiya iñōmō wææ pōninque nē pōnēnāni inānite iīmaī ante odōmonte wææ angadānimpā. Mīnitō bagāamīni inte Mōitee wodi nānō wææ angainō bai wīi cæmīni adinque Wængonguī dicæ ængampa quēwenguimīni. ² Ante wææ ānewēnāni eñente wædinque Pabodo tōnō Bedēnabee iñōmō, Quīmæ ānewēminī, ante nāēmæ wææ ānatapa. Ininque Antioquiya iñōmō quēwēnāni guiquēnē Pabodo tōnō Bedēnabee tōnō wadāni nē pōnēnāni inānite, Mīnitō Eedotadēē godinque Itota nānō da godongaināni tōnō nē aadāni Picænāni inānite bee tēninque, Oodeabæ quēwēnāni nāni wææ ānōnō ante æbānō cæquiī, ante eñencæte ante æedāni.

³ Āninque Itota Codito ingante godongāmæ nāni pōnencabo incæ Pabodoidi inānite da godōnāni wadæ godānitapa. Ayæ godinque Pēnitiabæ wodo tebæ godinque mānimæ quēwēnāni inānite apænedinque godōmenque Tāmadiabæ adobāi wodo tebæ gote apænedinque, Wængonguī pōnō cæcā ate oodeoidi ināmaī ināni incæ mōnō Awēnē gāmænō do pōnānīpa, ante Pabodoidi apænedāni. Eñēninque mōnō tōniñadāni mānimæ quēwēnāni incæ watapæ todānitapa.

⁴ Pabodoidi Eedotadēē iñōmō pōnāni adinque Codito ingante nāni godongāmæ pōnencabo tōnō

Itota nānō da godongaināni tōnō nē pōnēnāni inānite nē aadāni nē Picænāni tōnō godongāmæ ponte ongōninque Pabodoidi inānite, Waa pōmīni amōnīpa. Ante añōnānite Pabodo tōnō Bedēnabee iñōmō, Wængonguī iīmaī mōnatō tōnō godongāmæ cæcampa, ante tōmānō ante adodō adodō apæneda eñēnānitapa. ⁵ Māniñedē Paditeoidi incæ pancadāniya nē pōnēnāni badīnāni inte ængæ gantidinque iīmaī ante apænedānitapa.

—Iñæmpa oodeoidi ināmaī ināni inānite, Cōwē eō togænguēnēmīni iīnīpa, ante mōnō wææ angæimpā. Ayæ Mōitee wodi, iīmaī cædāni, ante nānō angainō ante eñenguēnēmīni iīnīpa, ante mōnō cōwē angæimpā.

⁶ Ānāni ate Itota nānō da godongaināni tōnō nē pōnēnāni inānite nē aadāni Picænāni tōnō godongāmæ pōninque, Oodeoidi ināmaī ināni inānite mōnō æbānō anguiī, ante tedecōnānitapa. ⁷ Māniñō ante wæætedō wææetē apænedāni adinque Pegodo guiquēnē ængæ gantidinque godongāmæ ongōnāni inānite iīmaī ante apænecantapa.

—Botō mēmōidi, mīnitō iīmainō ante do eñēmīnīpa. Wængonguī do inōñedē, Oodeoidi ināmaī ināni incæ Codito ingantedō ante watapæ eñēninque edæ nē pōnēnāni bacædānimpā, ante cædinque mōnō imonte apænte æninque botō imote angā gote māniñō ante apænebo eñēnānitapa. ⁸ Da godongā gote apæneyōmo Wængonguī, Waocā æbānō mīmōno pōnengā ingāā, ante nē eñēnongā inte edæ tōmengā Tæiyæ Waēmō Ōnōwoca ingante oodeoidi ināmaī ināni inānite da pōnongā ænte ewocadānīpa. Ininque mōnō imonte pōnō cæcā bai tōmēnāni inānite adobāi cædinque tōmengā edæ, Oodeoidi ināmaī ināni inānite botō Ao ante do æmopa, ante odōmongā abaimpa. ⁹ Tōmēnāni wede nāni pōnēnō beyænque Wængonguī tōmēnāni mīmō ñā mēnongadinque, Oodeoidi ināmaī ināni incæ mīnitō bai adobāi ināni

apa änewëminii, angampa. ¹⁰ Mönö iñömö mönö mæmæidi tönö teëmë mongænte bai wædinque edæ, Möitee wodi nänö wææ angainö ante mönö ædö cæte ëñente cæquii, ante godongämæ wægamöimpa. Nöwo guiquënë Oodeoidi inämaï inäni incæ tæcæ pönëñönänite minitö iñömö teëmë cönöncapænte bai cædinque tömënäni inänite, Cædäni, ante wææ äminipa töö. Mänömaï cædinque minitö, Wængongui önonque cæcampa, ante bai cæminipa töö. ¹¹ Inäempa mönö Awënë Itota pönö waadete ængä beyænque tömënäni wænämaï inte quëwënäni bai mönö adobai mäninö beyænque wænämaï inte quëwëmompä, ante pönëmönipa. Mänömainö ante Pegodo iinque apænecä ëñënanitapa.

¹² Ayæ Bedënabee tönö Pa-bodo wæætë tömënäni inänite apæneda ëñëninque godongämæ ongönäni tömänäni edæ tededämaï inte ëñëë cönänitapa. Tömëna iñömö, Wængongui mönatö tönö godongämæ cædinque edæ, Minatö mä cæmina adinque Oodeoidi inämaï inäni incæ pönencædänimpa, ante cædinque bamönengæ wæætë wæætë cæcantapa, ante adodö adodö ante apænedatapa. ¹³ Iinque apæneda ate Tantiago wæætë tömangä apænecantapa.

—Botö biwiidi, botö ñöwo apænebo ëñëedäni. ¹⁴ Wængongui täno waadete pönö cædinque oodeoidi inämaï inäni pancadäniya inänite apænte æninque, Botö quimini bacæminimpa, ante cæcantapa, ante Timönö do apænecä ëñëntamompä. ¹⁵ Ayæ Wængongui beyæ nê apænegaïnäni incæ, Iincayæ ate Wængongui mänömaï cæcæcäimpa, ante pönëninque adoyömö ante iimainö ante do yewæmongadänimpa.

¹⁶ “Awënë Dabii nempo nê quëwengainäni nãwæ godäni adinque

botö iñömö oncö wodintai wæætë tæi mænonte bai cædinque,

iincayæ ate adodö pöninque pönö cæbo ate

nãwæ gogainäni iñömö Awënë nempo adodö pöninque quëwencædänimpa.

¹⁷ Mänömaï cæbo ate edæ wadäni tömämæ quëwëninque oodeoidi inämaï inäni incæ botö ëmöwo ante nê ewocadäni inte nãwä Awënë ingante ante diqui diqui minte acædänimpa,

¹⁸ ante mönö Awënë iñömö edæ mäninö ante nê cægaingä inongä inte, do cæcä näni ëñengainö ante apænecampa.”

¹⁹ Ante yewæmongatimpa, ante Tantiago godömenque apænecantapa. “Botö Wængongui nänö apænegaïnö ante pönente wædinque, Iimaï cæcæimpa, ante pönëmopa. Oodeoidi inämaï inäni, Idæwaa wapiticæ pönente awædö, ante wædinque ocæ ëmænte nãwä Wængongui gämænö pönönänite mönö edæ ee cædinque tömënäni taadö ganta cædedämaï ingæimpa. ²⁰ Önonque, Tömënäni acædänimpa, ante iimaï ante yewæmongæimpa, Wadäni, Wængonguïdi qui, ante cænguï näni cönöni cænämaï incæminimpa. Ayæ nänöogængä inämaï iñongante godö mönämaï incæminimpa. Ööingä ñë wëmencate wæningä ate cænämaï incæminimpa. Baö wepæ owemöingä i adinque cænämaï incæminimpa, ante mönö yewæmongæimpa, ämopa. ²¹ Edæ doyedë pönö oodeoidi näni quëwëñömö näni quëwëñömö tömää iñömö mäo Möitee wodi nänö wææ angainö ante apænedäni ëñengadänimpa. Ayæ ñöwo ganca adobainö ante guëmanguïönæ iñö guëmanguïönæ iñö mönö odömöincönë go guiite apænedäni ëñente mänömainö ante ëñente cæquënänäni inänipa. Mäninonque ante mönö yewæmongæimpa, ämopa,” ante Tantiago iinque apænecantapa.

²² Mänömainö ante apænecä ëñëninque Itota nänö da godongainäni tönö nê aadäni Picænäni tönö

Oodeoidi inämaï inäni acædänimpa, ante yewæmönänipa

²² Mänömainö ante apænecä ëñëninque Itota nänö da godongainäni tönö nê aadäni Picænäni tönö

Itota Codito ingante godongämæ näni pönencabo tōmancabo tōnō godongämæ pōnēninque, Mōnō cabo incæ mēnaa inate apænte æninque tōmēna inate, Mīnatō Pabodo tōnō Bedēnabee miñæ Antioquiya goeda, ämō gocædaimpa. Ante Ao äninque tōmēnāni, Mōnō pönencabo iñōmonte Codaa Badatabato mōnō änongä tōnō Tidato iñōmō nē äna inapa, ante adinque tōmēna inate apænte ænānitapa. ²³ Ayæ, Cadota ante ænte gocædānimpā, ante iīmaī ante yewæmongadānimpā.

Mōnitō pancamōniya Itota nānō da godongaimōni iñōmōni pancamōniya nē pōnēnāni inānite nē aamōni Picæmōni imōnipa. Mānōmaī imōni inte mōnitō mīnitō tōniñamōni imōnipa. Mīnitō oodeoidi ināmaī imīni inte Antioquiya iñōmō Tidīabæ iñōmō Tiditiabæ iñōmō quēwēninque mīni pōnencabo mīni pōnencabo iñōmīnite mōnitō, Waa quēwencæmīnimpā, ämōnipa.

²⁴ Iīmaī ante tededāni eñentamōnipa. Mōnitō, Goedāni, änāmaī iñōmōni wadāni mōni cabo incæ pancadāniya wadæ gote mīnitō weca pōninque mīnitō imīnite, Eō togæedāni, ante wææ änāni. Eñēninque mīnitō tōmēnāni nāni wææ änīnō beyænque teēmē mongænte bai, Æbānō cæquīi, ante wæmīnipa, ante tededāni eñēmōnipa. ²⁵ Mānōmainō ante tededāni eñente wædinque mōnitō godongämæ pōnēninque onguīñæna mēnaa inate apænte æninque tōmēna inate iīmaī antamōnipa. Mīnatō Bedēnabee tōnō Pabodo mōnō nē waadeda tōnō godongämæ godinque oodeoidi ināmaī ināni weca goeda, ante cætāmōnipa. ²⁶ Bedēnabee tōnō Pabodo iñōmō mōnō Awēnē Itota Codito emōwo beyænque cædinque nāna nāmā wodo wænguinque cædatapa. ²⁷ Iīninque, Iī cadota mōni yewæmōnō nāwangä impa, ante adodō ante apænecædaimpa, ante cædinque mōnitō Codaa tōnō

Tidato inate da godōmōni godinque mīnitō weca pōna aedāni.

²⁸ Edæ, mōnitō Wængonguī Tæiyæ Waēmō Önōwoca tōnō godongämæ pōnēninque, Mīnitō godōmenque teēmē mongænāmaī incæmīnimpā, antamōnipa. Iīninque, Mīnitō iīmaī cædinque idæwaa, ante pōnēmōnipa.

²⁹ Wadāni, Wængonguīdi quī, ante cænguī näni cōnōnincoo ante cænāmaī gomō aedāni. Wepæ owemōingä adinque ööingä ñē wēmencate wæningä adinque cænāmaī iedāni. Ayæ nānōogængä ināmaī iñongante godō mōnāmaī iedāni. Mīnitō māninque ante ee ate cædāmaī imīni iīninque waa quēwēmaīmīnipa. Māninque ante yewæmōmōnipa.

³⁰ Ante yewæmonte pædæ pōnōnāni ænte wadæ godinque Antioquiya iñōmō wæidinque nē pōnēnāni inānite añete godongämæ pōnāni ate Eedotadēe quēwente pōnāni tōmēnāni nāni yewæmōnīnta pædæ pōnōnāni ænte adānitapa. ³¹ Eedotadēe quēwēnāni, Mīnitō godōmenque teēmē mongænāmaī incæmīnimpā, ante nāni yewæmonte änīnō adinque oodeoidi ināmaī ināni iñōmō wampo pōninque todānitapa. ³² Codaa tōnō Tidato iñōmō Wængonguī beyæ nē apæneda inte adobaī, Tæi piñænte entawencæmīnimpā, ante cædinque ædæmō apæneda eñēninque tōmēnāni nāni pōnencabo mīmōnē gancæ batawente wede pōnēnānitapa. ³³ Iīninque tæōnæ quēwēna ate māniñōmō quēwēnāni nāni pōnencabo wæætē tōmēna inate waa apænedinque, Ñōwo gānē pōnēninque waa goeda, ante tōmēna inate nē da pōnōnāni weca wæætē adodō da godōnāni godatapa. ³⁴ Tidato guiquēnē, Iñōmō ongoncæboimpā, ante ayæ ongongantapa. ³⁵ Pabodo tōnō Bedēnabee guiquēnē Antioquiya iñōmō ayæ quēwēninque wadāni nanguī ināni tōnō godongämæ odōmōninque Wængonguī nānō änō ante watapæ

apænedā eñengadānimpa.

Pabodo ingante wæætē da godönāni gocampa

³⁶ Ìincayæ ate Bedēnabee ingante Pabodo,

—Wēēnēñedē Wængonguī nānō änō ante mōna gote apænediñōmō wæætē adoyōmō gote mōnatō tōniñadāni weca gote eñadinge, Æbānō quēwēnāni, ante acēmōnaimpa.

³⁷ Äñongā Bedēnabee Ao angantapa. Ayæ tōmengā, Wäō Mäadoco nāni ānongā ingante mōnatō tōnō godongāmæ gocæcäimpa, ante cæcantapa. ³⁸ Pabodo guiquēnē,

Ïñæmpa wēēnēñedē Pampidiabæ iñōmō pōñōmōnate iingā Mäadoco iñōmō mōnatō tōnō godōmenque cädāmaī inte edæ wadæ gocantapa, āninqe, Ñōwo wīi ænte gocæimpa, ante Baa angantapa. ³⁹ Ìninqe tōmēna wæætēdō wæætē āninqe tōmēna wadō wadō gote panguimæ godatapa. Bedēnabee guiquēnē

Mäadoco ingante ænte ñænæ gāwapāa gote wipodē ñænæmpodē guite wogaa godinque wāā tēiwænē Tipidebæ tao gocantapa. ⁴⁰ Pabodo guiquēnē Tidato ingante apænte ænte gocæ cæyongante tōmēnāni nāni pōnencabo iñōmō tōmēna inate apænedinque, Wængonguī minatō beyæ pōnō waadete cæcæcäimpa, ānāni eñēninqe wadæ godatapa.

⁴¹ Ayæ Tidiabæ tōmāo godinque Tidiabæ tōmāo godinque Pabodo iñōmō Codito ingante nāni godongāmæ pōnencabo inānite apænecā eñēninqe tōmēnāni wede pōnēninqe tæi piñænte batawengadānimpa.

16

Pabodo tōnō Tidato miñæ Tīmoteo gocampa

¹ Mānīi godinque Pabodo Dedebe iñōmō ponganque go Ditada iñōmō pongantapa. Itota ingante tee empote nē gocā Tīmoteo māniñōmō quēwengacäimpa. Tōmengā wāānā oodea inōna incæ nē ædæmō cæte pōnēnā inōnāimpa. Tīmoteo

mæmpo wæætē guidiego inongäimpa.

² Tīmoteo iñōmō Itota ingante pōnente quēwengā adinque nē pōnēnāni Ditada iñōmō quēwēnāni incæ Icōnio iñōmō quēwēnāni incæ, Tīmoteo nē waa quēwēnongā ingampa, ante adoyōmō apænedānitapa. ³ Ìninqe Pabodo, Botō tōnō Tīmoteo guēa gocæcäimpa, angantapa. Wæætē, Oodeoidi mānimæ quēwēnāni tōmānāni, Tīmoteo mæmpo guidiego ingampa, ante do eñēnāni inte piñāni wæcæ wæ. Äninqe Pabodo angā yæcadogæ eō togænāni ate Tīmoteo ingante ænte gocantapa. ⁴ Godinque Pabodoidi wayōmō nāni quēwēñōmō wayōmō nāni quēwēñōmō godinque iīmaī ante apænedānitapa. Mīnitō oodeoidi ināmaī imīni inte æbānō eñēnte cæte quēwenguimīni,

ante Eedotadēe iñōmō nē aadāni Picænāni tōnō Itota nānō da godongaināni tōnō godongāmæ pōnēninqe do ānānipa. Ante apænedinque Pabodoidi wæætē tōmēnāni nāni ānīnō ante adodō ante apænedāni eñēnānitapa. ⁵ Mānōmaī apænedāni eñēnte wædinque Codito ingante nāni godongāmæ pōnencabo iñōmō wayōmō nāni cabo wayōmō nāni cabo tōmānāni wede pōnēninqe edæ tæi piñænte badinque iīmō iñō godōmenque iīmō iñō godōmenque nanguī yebænte bagadānimpa.

Mäatedöniabæ quēwengā ingante Pabodo wūimonte acā

⁶ Pabodoidi Atiabæ gocæ cæyōnānite Wængonguī Tæiyæ Waēmō Önōwoca iīmaī ante apænecantapa. Mīnitō botō änō ante mānimæ apænecæ godāmaī incæminimpa, ante wææ angā eñēnte wædinque tōmēnāni wæætē Gadatiabæ incæ pancabaa Pidiabæ tōmāo cægōninqe godānitapa. ⁷ Mānimæ cægōnaque go Mīitiyabæ ganca pōninqe Bitiniabæ gocæ cæyōnānite Itota Tæiyæ Waēmō Önōwoca incæ, Godāmaī, Baa angā wædinque tōmēnāni māniñōmō ñimpo cæte godōmenque godāmaī inānitapa. ⁸ Mānōmaī beyæ tōmēnāni Mīitiyabæ

⁸ Mānōmaī beyæ tōmēnāni Mīitiyabæ

wodo pænta go Todoa iñömö wæi godänitapa.

⁹ Mäniñömö wæi gote ongöninge woyowotæ ba ate Pabodo wiimonte bai ayongä Mäatedöniabæ onguiñængä a ongöninge tömengä ingante iimaï ante apæncantapa. “Mäatedöniabæ pöninge bitö mönitö imönite pönö cæquimi ämönipa,” ante Pabodo ingante angä eñgantapa. ¹⁰ İnıne Pabodo, Mänömaï wiimonte bai atabopa, ante apæncä eñente wædınque mönitö wæetë, Minitö Mäatedöniabæ gote mao apænemini eñencädänimpa, ante Wængongui incæ cæbaıngampa. Ante pönente wædınque botö Odocabo tönö wadäni Pabodo tönö nê godongämæ cädäni tönö wæetë, Mönö mäniñömö gote Codito ingantedö ante watapæ apæncæımpa, ante pönëninge gocæte ante cætämönipa.

Pabodo tönö Tidato Pidipoto iñömö ponte cædapa

¹¹ Mänömainö ante pönemöni inte mönitö Todoa iñömö gäwapæ wedeca quëwëninge ñænæ wıpodë guıte wogaa tao godınque wää tēiwænē Tämotadate töıngä gote möninge iımö ate tao Nēapodi pontämönipa. ¹² Mäniñömö pö ti wæëninge taadonque godınque mönitö Pidipoto odömänoidi näni ponte quëwëñömö adoyömö pöninge tæönæ quëwentämönipa. Mäatedöniabæ incæ pancabaa quëwënäni näni yæcado quëwëñömö Pidipoto impa. ¹³ Mönitö mäniñömö ponte quëwëninge guëmanguiönæ iınque bayonte tömënäni näni quëwëñömö yabædemö tao godınque, Önö wedeca Wængongui ingante godongämæ apænebainänipa, ante önöwënenque pönëninge mäniñömö gotämönipa. Mäniñömö ponte ayömöni onquiyænäni do godongämæ ponte a ongönäni adınque mönitö tæ contadınque tömënäni inänite apænetämönipa. ¹⁴ Mäniñömö nê eñänäni tönö adodanque tömënä emöwo Didia iñömö

Tiatida quëwënönä inte weocoo awëneidi näni opatawæ emoncoo godonte ænte quëwënönäımpa. Tömënä Wængongui ingante nê waa ate pönënä inonäımpa. İnıne Pabodo apæncä eamonca ongonte eñëñönante mönö Awënë tömënä mımö wi ænete bai cæcä ate tömënä wede pönënantapa. ¹⁵ İnıne tömënä näni owocabo pönëninge godongämæ æpænë guıdäni ate tömënä iñömö mönitö imönite apænedantapa.

—Botö imote ante adınque minitö, Mönö Awënë ingante Didia ædæmö cæte pönengä ingampa, ante pönëminıtawoo. Mänömainö ante pönemini inte minitö botö oncönë ponte owoedäni, ämopa.

Ante ancaa apænedä eñente wædınque mönitö Ao ante gote owotämönipa.

¹⁶ Mäniñedë wacä onquiyængä obe badä inongä inte wadäni nempo quëwëninge tömënäni beyænque nê cæte quëwengä inongäımpa. Tömengä iñömö nê cæwëngä inte wadäni inänite, İıncayæ ate æbänö baquıı, ante yewænte tedecä inongäımpa. Tedecä eñëninge nê eñänäni wæetë tömënäni näni godonte æınta bacoo pædæ pönö pædæ pönö cädäni incæte tömengä awëneidi wæetë ö æ ö æ cädönänimpa. İnıne mäniñömö quëwëninge mönitö ayæ ate Wængongui ingante näni apæneiñömö adodö gocæ cæyömönite mäningä onquiyængä mämö bee tengantapa. ¹⁷ Mänömaï bee tëninge tömengä mönitö Pabodo tönö möni gocabo iñömönite tee empo tee empo pöninge yedæ angantapa.

—İinäni Wængongui Æıbæ pönı Quëwengä ingante nê cädäni inte minitö imınite apænedınque, Æcänö ængä beyænque quëwenguıı, ante apænedänipa.

¹⁸ Änıne tæönæ iñonte tömengä tömënäni inänite tee empote godınque Yæ yæ änewengä eñente wædınque Pabodo, Ancaa eñente awædö, ante dadi emænte wënæ ingante änıne,

—Bitö imite botö Itota Codito emöwo apænedinque, Tao gobawe, amopa.

Ante tæcæ apæneyongä wënæ incæ baquécä ingante emö cæte tao gocantapa.

¹⁹ Pabodo mänömaï angä ate tao go ate wædinque onquiyængä awënëidi guiquënë, Æ tömengä yewængä beyæ mönö æincædö incæ dæ gotimpa. Nöwo æbänö cæte nanguï ænguïmöö. Ante piïnte wædinque tömënäni, Mönö tömëna inate odömäno awënëidi weca ænte gocæïmpa, ante Pabodo tönö Tidato inate bæi ongonte wëä mäo tömënäni näni godonte æiïñömö ænte godänitapa. ²⁰ Ayæ odömäno awënëna tömënäni quëwëñömö nê apænte äna iïñönte nê piïnte cædäni mänïna awënëna weca Pabododa inate ænte mämö gö cædinque,

—Iïna iïñömö edæ oodeoda inöna inte mönitö quëwëñömö ponte wënæ wënæ apænedä eñëninque tömänäni ænguï badinque Yæ yæ änänipa. ²¹ Mönö odömänocabo mönö wïi cæquënëno ante odömönte apænedinque tömëna iïñömö, Mäninonque cædäni, ante ancaa änewënapa.

²² Ante tæcæ apæneyönäni godongämæ ongönäni iïnacabo cædinque Pabodo tönö Tidato inate piïnte cædänitapa. Ayæ odömäno awënëna iïñömö, Tömëna wecoo gä tadongate tæi tæi päedäni. ²³ Äna eñente tæi tæi pänäni wæyönate awënëna godömenque äna eñente cædinque tömëna inate bæi ongonte mäo tee mönedinque tee möneincö nê aacä ingante, Iïna inate bitö ædæmö wææ ae, änatapa. ²⁴ Iïninque mänömaï änäni eñente wædinque nê wææ wänongä wæætë Pabodo tönö Tidato inate guimongacönë mangucä guidatapa. Ayæ godömenque tömëna önöwa awæmpaa goti guidöwate tæi tee mönecä ongöñöna wadæ taocantapa.

²⁵ Ayaönænëña bayö Pabodo tönö Tidato mänömaï goti guidöwate wægöninque Wængonguï ingante apænedinque ämotamini äncöñönte

wadäni nê tee mönete ongönäni eñëe cönänitapa. ²⁶ Iïñontobæ goinque nanguï ocæ ocæ pöninque tee möneincö tæñöninca incæ wancæ wancæ cæyö odemö tömänemö wi æmænete gotapa. Ayæ tömänäni inänite näni tæi pönï yaëmengö näni ñäni ñænime incæ ñimæncæ ñimæncæ wææntapa. ²⁷ Tee möneincö nê aacä guiquënë iïñontobæ ñäni ömæmonte ayongä, Odemö dobæ wi æmænete gotimpa, ante wædinque tömengä, Æ tee mönete ongönänäni dobæ tao wodii winönänipa, ante pönente wædinque, Botö awënëidi piïnte pänäni wænguï wæ, ante pönëninque nämä wænonte wæncæte ante yaëmë o togænte ængä. ²⁸ Ate wædinque Pabodo iïñontobæ ogæ tededinque,

—Nämä wënæ wënæ cædämaï. Ee ae. Tömämöni ayæ ongömöni apa quëwëe.

²⁹ Angä eñëninque nê wææ wänongä iïñömö edæ, Tica wodönoï ænte pöedäni, angä ænte pönäni æninque tömengä pogodo pöninque ancai guïñente wædinque do do wæate wædinque Pabodo tönö Tidato önöwa inö wæængantapa. ³⁰ Ayæ ængæ gantidindinque edæ tömëna inate oncodo ænte mäocä tayönate,

—Mïnatö nê ämïna inte apænemina eñëmoeda. Botö æbänö cæte quëwënguïmoo, ante wæcä.

³¹ Eñëninque tömëna wæætë,

—Awënë Itota ingante edæ wede pönëmi ate tömengä ængä beyænque quëwæncæbiïmpa. Mïni owocabo tömämïni adobaï wede pönente quëwæncæmïnimpa, änatapa.

³² Äninque tömëna nê wææ wänongä ingante godömenque Wængonguï Awënë nänö apænëgainö ante apænedinque tömengä oncönë näni owocabo tömänäni inänite apænedä eñënanitapa. ³³ Ayæ woyowotæ incæ tömëna inate æninque nê wææ wänongä iïñömö tömëna inate tæi tæi pänäni nana æbæate wædiïñömö ñä mënongacantapa. Ayæ tömengä näni wæncabo do æpænë guïdänitapa.

³⁴ Ayæ tömengä oncönë ænte mængä

ææ guiyöna tömäna inate cænguï godongä cænatapa. Ayæ tömengä näni wencabo nē Wængonguï ingante pönēnāni badināni inte watapæ todānitapa.

³⁵ Baänæ ate odömāno awēnēna guiquēnē poditiyaidi inānite nē wææ wānongä weca da godōninque, Pabodo tönö Tidato inate ñimpo cæbi gocædaimpa, ämīni ēñengäeda, angä ēñēninque godānitapa. ³⁶ Ponte odömāno awēnēna emōwo ante apænedāni ēñēninque nē wææ wānongä wæætē Pabodo ingante apænedinque,

—Poditiyaidi ñowo ponte apænedinque, Pabodo tönö Tidato inate ñimpo cæbi gocædaimpa, ante odömāno awēnēna ānapa, ante apænedānīpa. Īninque mīnatō ñowo taote godinque piyænē cæte ee goeda.

³⁷ Angä ēñēninque Pabodo wæætē poditiyaidi inānite apænedinque,

—Mōnatō odömānomōna imōna incæte nē apænte āna weca apænedāmaï inñomōnate tömäna āna tömānāni ayōnāni edæ mōnatō imōnate tæi tæi pāninque tee mōnedānitapa tōō. Tee mōnedāni wæyōmōna ñowo wæætē mōnatō imōnate awēmō wido cæcæte ante cædānīpa tōō. Mōnatō inñampa edæ Baa amōnapa. Awēnēna incæ inñomō pōninque mōnatō imōnate ænte mādoda gocæmōnaimpa.

³⁸ Mānōmaï ante apæncä ēñente wædinque poditiyaidi tömēnāni awēnēna weca adodō godinque Pabodo nāno apænedō ante adodō ante apænedānitapa. Ayæ, Pabodo tönö Tidato odömānoda inapa, ante apænedāni ēñēninque odömāno awēnēna guiquēnē guiñente wædatapa. ³⁹ Ayæ guiñente wædinque awēnēna incæ Pabodo tönö Tidato weca ponte waadete apænedinque, Mōnatō oda cædinō ante mīnatō odömānomīna imīna inte pīinte ānāmaï ieda, ante āninque Pabodo tönö Tidato inate ænte mādoda taoda adinque tömäna inate, Nōwo mōnitō quēwēñomō emō cæte wadæ goeda, amōnapa. ⁴⁰ Äna

ēñente taodinque onquiyænā Didia oncönē go guidinque Pabodo tönö Tidato inñomō, Nē pönēnāni wampo pönēninque tæi ongoncædānimpa, ante cædinque ædæmō apænedinque wadæ gogadaimpa.

17

Tetadōnica inñomō quēwēnāni Yæ yæ änānīpa

¹ Mānīi godinque Pabodo tönö Tidato Ampipodi näni quēwēñomō wodo tebæ godaque go Apodōnia näni quēwēñomō wodo tebæ godaque go Tetadōnica näni quēwēñomō pōnatapa. Mānīñomō oodeoidi Wængonguï apæncä näni ēñente yewæmongainta ate odömōincō näni mænongaincō mæ ongō. ² Adinque Pabodo cōwē nāno cæi bai cædinque guēmanguionæ bayō guēmanguionæ bayō mēōnaa go adoönæque inñonte tömēnāni odömōincönē go guidinque edæ Wængonguï angä ēñente näni yewæmongaintaa ate adinque tömēnāni inānite, Īimaï impa quēwēmīni, ante nō apæncantapa. ³ Tömēnāni inānite edonque apænedinque Pabodo, Wængonguï beyæ nē apænegaināni iīmaï ante do yewæmongadānimpa, angantapa. Mōnō Codito ĩncayæ ate pōninque cōwē caate wæquēnengä ingampa. Ayæ adocä wænte ate cōwē ñāni omæmonte quēwenguēnengä ingampa, ante yewæmongadānimpa, ante Pabodo apæncantapa. Ayæ godōmenque apænedinque,

—Itota botō nē ānongä incæ adocä mōnō Codito inongä ingampa, ante apæncantapa.

⁴ Mānōmaï apæncä ēñēninque oodeoidi pancadāniya, Nō impa, ante pönēninque Pabodo tönö Tidato miñæ godānitapa. Ayæ guidiegoidi nanguï ināni Wængonguï ingante nē guiñēnāni inte adobai pönēninque tömäna miñæ godānitapa. Ayæ awēnēidi bai ināni onquiyænāni incæ nanguï ināni adobai pönēninque tömäna miñæ godānitapa. ⁵ Mānōmaï

pönänänpa, ante wædinque oodeoidi guiquënë piinte wædinque iimaī cædänitapa. Tömänäni näni godonte æiñömö gote ayönäni nē wiwa cædäni ongönäni adinque tömänäni inänite änäni Ao ante godongämæ pöninge oodeoidi tönö iñacabo cædinque Yæ yæ ante piinänitapa. Mänömaī yedæ änäni eñente wædinque mäniñömö quëwänäni tömänäni godongämæ piinte badinque Yæ yæ änänitapa. Oodeoidi iñömö, Mönö Yatönö oncönē guidinque Pabodo tönö Tidato inate da tadöninge nē piinte cædäni inänite da godömö æncædänimpa, ante cædinque diqui diqui mincæte ante tee gawade guidänitapa. ⁶ Wäänē guidinque tömëna inate adämaī inäni inte oodeoidi wæætē oncö nē eacä Yatönö ingante yao ongöninge wadäni nē pönänäni inänite yao ongonte wëä tadö mao tömänäni näni quëwëñömö awënëidi weca ænte godänitapa. Ayæ, ogæ tedinque,

—Iina onguñænäna iñömö tömämaē quëwänäni inänite wapiticæ nē apænedina inte ñowo wæætē iñömö pöna tamëñedäni. ⁷ Ayæ Yatönö guiquënë, Botö oncönē pöeda, ante manguicä guiddatapa. Iinäni tömänäni edæ odömäno tæiyæ awënë Tetædo nänö äninö ante Baa äninque wacä Itota näni änogä ingantedö ante, Tömengä nē Awënë Odeye ingampa, ante anewänänipa cæminii.

⁸ Ante piinäni eñente wædinque godongämæ ongönäni tönö awënëidi adobaī piinque, Quinö cæquii, ante wædinque Yæ yæ änänitapa. ⁹ Ininque Yatönöidi inänite äninque awënëidi, Minitö ñowo mänimpota pönömïni ænte mäñömöni minitö wënæ wënæ cædämaī imïni adinque mönitö iincayæ ate wæætē adodö pönömöni æmaimänipa, ante tömänäni godonte æinta änäni pædæ godönäni æninque ñimpo cædäni abæ tawænte gogadänimpa.

Bedea iñömö quëwänäni eñente pönänänipa

¹⁰ Ayæ tæcæ wëmö bayonte nē pönänäni wæætē Pabodo tönö Tidato inate, Bedea iñömö goeda, ante da godönäni godatapa. Mäniñömö gote pöninge tömëna oodeoidi odömöincönē go guiddatapa. ¹¹ Mänii Tetadönica iñömö quëwänäni nē piinte cædäni iñönänite bedeaī guiquënë piinämaī inäni inte mönö Awënë nänö apænedö ante do eñänänitapa. Ayæ eñëninge, Wængongui angä eñente näni yewæmongainö baī Pabodo nö apænecantawo, ante pönente wædinque bedeaī iñömö, Wængongui æbänö angä eñente yewæmongadänii, ante eñencæte ante iimö iñö iimö iñö mäninta æninque cöwä adänitapa. ¹² Mänömaī cædinque oodeoidi tæiyænäni wede pönänäni badänitapa. Ayæ guidiegoidi awënëidi baī inäni onquiyænäni incæ nangui inäni pönëñönäni guidiegoidi onguñænäni adobaī tæiyænäni nē wede pönänäni badänitapa.

¹³ Incæte wadäni Tetadönica iñömö godinque oodeoidi inänite apænedinque, Pabodo ñowo Bedea godinque mäniñömö quëwänäni inänite apænecä eñänänipa, ante tededäni. Eñëninge oodeoidi wæætē Bedea iñömö pöninge, Pabodo wiwa apænecä apa eñencæ quëwëminii, äninque wapiticæ tededäni eñëninge godongämæ ongönäni guiquënë ængui badänitapa. ¹⁴ Mänömaī ængui badäni adinque nē näni pönencabo iñömö Pabodo ingante æpæ yæwedeca do ænte mäodäni godinque tömengä wipodë ñænæmpodë go guidinque godömenque wogaa goyongante Tidato tönö Timoteo wæætē Bedea iñömö ayæ ongönatapa. ¹⁵ Pabodo tönö godongämæ godäni iñömö Atëna ganca mäodäni gocä ate tömengä wæætē, Minitö adodö Bedea iñömö godinque Tidato tönö Timoteo inate apænedinque tömëna eyepæ inte ate botö weca quingæ ämïni pönae, angä eñëninge tömänäni adodö Bedea iñömö godinque Pabodo nänö äninö baī iñäna inate apænedänitapa.

*Atëna iñömö Pabodo apæneca
ëñënänpa*

16 Mänömainö ante äningä inte Pabodo tömëna näna ponguinö ante ee ongongantapa. Ee ongöninge ayongä mäniñömö quëwënäni, Wængonguïdi inänipa, ante badonte näni cö cægainca bacoo mä ongö ate wædinque Pabodo wæwëwocate quëwengantapa. 17 Mänömaï beyæ oodeoidi odömöincönë go guïdinque oodeoidi inänite apænedinque ayæ guidiegoidi incæ Wængonguï ingante nê guïñënäni inänite apænedinque Pabodo, Mänömaï impa. Apænebo ëñëmaïminipa, ante apænecantapa. Ayæ tömënäni näni godonte æiñömö adobaï iimö iñö iimö iñö godinque mäniñömö ponte ongönäni inänite adobaï nö apæneca ëñënänitapa. 18 Mänömaï cæyongä wadäni Epicodeoidi, Mönö tote quëwengæimpa, ante nê änewënäni näni cabo tönö wadäni Etoicoidi, Waa iimö incæ caate wæmö incæ mönö piyænë cæte quëwengæimpa, ante nê quëwënäni näni cabo tönö tömänäni adoyömö ponte bee téninque Pabodo ingante wæætedö wææte änanitapa.

Pabodo iñömö Itota ëmowo ante apæneca beyæ ayæ Itota nänö ñäni ömæmongainö ante apæneca beyæ Epicodeoidi näni cabo tönö Etoicoidi näni cabo tönö pancadäniya guiquënë,

–Iingä iñömö önonque ante tedewëngä inte æbämë ante tedewengä.

Ante wæyönäni adodäni incæ pancadäniya guiquënë,

–Tömengä wabänö, Wabæca wængonguïdi inänite pönencæminimpa, ante cæcä iimaingampa, ante wædänitapa.

19 Iinque Pabodo ingante bæi ongonte töö æmænte æente godinque tömënäni Adeopagoidi näni änonäni näni godongämæ ëñente pönencöñömö mäodäni gocantapa. Go guïte ongöñongante,

–Mä bitö odömönte apænedö æbänö ii. Edæ apænebi ëñëmönie.

20 Edæ bitö odömönte apænedö ante

tæcæ ëñëmöni inte mönitö, Æbänö ante apænebi, ante ëñencæte ante wæmönipa, änanitapa.

21 Edæ atënaïdi tönö wadäni Atëna iñömö ñowo ponte quëwënäni tönö tömänäni wadö cædämaï inte önonque, Wadäni æbänö mä apænete pönënäni, ante wædinque mäniñonque ante tedete quëwënönänimpa.

22 Pabodo iñömö Adeopagoidi godongämæ näni ëñente pönencacabo tæcæguedë ængæ gantidinque tömënäni inänite apænedinque,

“Atënaïdi, ëñëedäni. Wængonguïdi, miini änonäni inänite waa ate bæi mïnitö nanguï pönï cæmiini abopa.

23 Botö mïnitö quëwëñömö tömäo cægonte ayömo, Wængonguïdi inänipa, ante miini waa adoncacoo nanguï ongö atabopa. Ayæ miini waa adonca adocaque iñömö miini pönö yewæmönimpaa iimaï ante yewæmonte ongö atabopa. ‘Wacä wængonguï æcämë ingää, ante mönö ëñënämaï nê inongä beyæ mönö waa adonca impa,’ ante mäniimpaa yewæmöi ongö atabopa. Mäniimpaa yewæmöi ongö adimo inte botö miini, Æcämë ingää, ante ëñënämaï inte miini waa adongä ingante ante ñowo, Æcänö ingää, ante ñowo apænebo ëñëedäni.”

24 Ante apænedinque Pabodo godömenque, “Wængonguï inguipoga nê badongaingä inongä inte tömäa iñömö ongoncoo nê badongaingä inongä inte tömengä inguipoga tömämæ Awënë inongä ingampa. Tömengä adocä iñömö öönæde Awënë ingampa. Iinque Tæiyæ Awënë inongä inte tömengä waomö önompoca mänonincönë ædö cæte guïte quëwëngüingää. 25 Ayæ waomö iñömönte tömengä mönö quëwëngüimämo pönongä æmompaa. Ayæ mönö guëmanguimämo adocä pönongä guëmämompaa. Ayæ tömengä adocä nänö pönönonque tömänö æninqe quëwëmompaa. Mänömaï nê pönönongä inte tömengä mönö waocabo iñömönte, Pönömi æmoe, ante ædö cæte angüingää. Iinque

tömengä beyæ ante mönö waomö önompoca ædö cæte cæquimöo.”

²⁶ Ante apænedinque Pabodo godömenque apænecantapa. “Wængongui waocä adocanque ingante badöninque, Tömengä nänö pæināni nangui ināni yebæninque nāni cabo nāni cabo tömancabodāni bacædānimpa, angacäimpa. Ayæ edæ, Adocanque pæināni inönāni inte mänincabodāni inömo nänēneto nänēnē godinque adocaboque wabæca wacabo wabæca godinque inguipoga tömāo go go cædinque wayömö wayömö quëwencædānimpa, ante cægacäimpa. Mänömainö ante badöninque tömengä tömancabodāni inānite ante pönēninque, Æyömönö quëwenguināni, ante cædinque, Iināni iimæca mänimpoga quëwencædānimpa, äninque, Wadāni wabæca mänimpoga quëwencædānimpa, ante doyedë angacäimpa. ²⁷ Edæ tömāmæ quëwēnāni botö imote ante diqui diqui mincædānimpa. Ayæ botö imote ante pædæ æmpo cædinque wabānö bee tenguināni, ante cædinque Wængongui mänömai badöninque angacäimpa. Incæte Wængongui mönö tömāmö weca ongöninque wii gobæque quëwengampa. ²⁸ Wængongui tömāo quëwengä inongante mönö waomö inömo inte wayömö wayömö gomö incæte tömengä nempo edæ cöwë quëwëmompā. Mini cabo incæ ämotamini ante bai nē tededāni pancadāniya, ‘Wængongui pæimö adomö imompā,’ ante do nāni änö bai edæ mänömai impā,” ante Pabodo apænecantapa.

²⁹ Ayæ, “Mänömai beyæ mönö Wængongui pæimö inömo inte edæ iimainö ante wii pönenguēnēmö imompā. Mönö, Waocä nangui pönēninque dicaa yewæmöninque waa pöni nänö badöinca bai Wængongui adobai ingampa, ante ædö cæte anewenguī. Oodo tönö padata waocä nänö badöi bai Wængongui ingampa, ante mönö wii mänömainö ante pönenguēnēmö imompā. ³⁰ Incæte wëenēnedë

mäninö nāni eñēnāmai ingainö ante adinque Wængongui pönö waadete ata cæpogacäimpa. Nöwo guiquēnē tömāmæ quëwēnāni inānite, Minitö eñēnāmai cædö ante, Ancaa wæwente awædö, ante ñimpo cædāni. ³¹ Ante Wængongui nē apænte anguingä inongä inte iimāi angampa. Iionæ iinque bayonte botö inguipoga tömāmæ quëwēnāni inānite apænte ancæboimpa, ante mänionæ æönædö i, ante do angacäimpa. Ayæ, Waocä adocanque tönö botö godongämæ cæyömo tömengä nöingä ante apænte ancæcäimpa, ante Wængongui mäningä onguinængä ingante do apænte ængacäimpa. Ayæ tömānāni, Wængongui nänö angainö bai cöwë bacæimpa, ante pönencædānimpa, ante cædinque Wængongui mäningä Onguinængä dobæ wængä ate, Nāni ömæmoe, angä ininque mäningä inömo edæ do ñāni ömæmonte quëwengampa.”

³² Ante Pabodo mäninö Itota nänö ñāni ömæmongainö ante apæncä eñēninque pancadāniya, Babæ ancædö, ante badete todānitapa. Wadāni guiquēnē,

—Iincayæ ate mäninö ante adodö apænebi eñēmönie, änānitapa.

³³ Mänömainö ante cædāni adinque Pabodo inömo tömēnāni inānite emö cæte godinque tao gogacäimpa.

³⁴ Incæte pancadāniya tömengä miñæ godinque nē pönēnāni badānitapa. Adeopagoidi nāni eñente pönēe concabo inönānite adocanque Diönitio adobai nē pönengä bacantapa. Ayæ onquiyængä tömengä emöwo Daämadi tönö wadāni adobai nē pönēnāni bagadānimpa.

18

Coodinto inömo pöninque Pabodo apænecampa

¹ Atēna inömo ongonte apæncä eñēninque mänömai cædāni ate Pabodo wædæ godinque Coodinto nāni quëwēñömö pongantapa.

² Doyedë inömo odömānoidi tæiyæ awēnë Codaodio oodeoidi inānite

püinte äninque, Mönitö quëwëñömö Odömä iñömö ñowo quëwëñämäi inte tömämüni wadæ goedäni, angä ëñente wædinque tömänäni näwæ wadæ godönänimpa. Adocanque tömengä ëmowo Aquidæ Pontobæ ëñagängä inte Itadiabæ gote mäniñedë quëwëñongäimpa. Tömengä adocä oodeocä inongä inte awënë nänö änö ante ëñente wadæ godinque tömengä nänöogängä Pidotida tönö ñowo Coodinto iñömö wadæ ponte quëwëñönainpa. İninque Pabodo ñowo Aquidæ ingante tæcæ adinque tömëna weca ëñacæ pongantapa. ³ Tömëna weca ponte ayongä tömëna tömengä nänö tadömönö bai adobaï æmontai cadopa tadömonte godonte ænte quëwëna adinque Pabodo tömëna weca ee owodinque tömëna tönö godongämæ tadömönänitapa. ⁴ Mänömaï cæte quëwëñinque Pabodo guëmanguïönæ iñö guëmanguïönæ iñö oodeoidi odömöincönë go guïidinque, Oodeoidi incæ oodeoidi inämaï inäni incæ ëñente pönencädänimpa, ante cædinque, İimaï impa ante apænebo ëñëmaïminipa, ante nanguï apæñecantapa.

⁵ Ayæ Tidato tönö Timoteo Mäatedöniabæ quëwente wadæ pöninque Coodinto iñömö nana wææ pöñedë Pabodo mäniñedë æmontaicö nänö badöninö ñimpo cædinque wæætë, Wængonguï nänö apænedö ante ëñencädänimpa, ante nanguï cæinente wædinque nanguï apænedinque mäninque cæte quëwengantapa. Mänömaï cædinque tömengä, Codito mönö në äongä incæ Itota adocä inongä ingampa, ante botö në agaïmo inte apænebo ëñëmaïminipa, ante oodeoidi inänite apæñecantapa. ⁶ Mänömaï apæneyongante oodeoidi wæætedö wæætë godö wënæ wënæ ante püinäni wædinque Pabodo wæætë, Wüi ëñëinë wædö, ante bai cædinque nämä weocoo wancæ wancæ cæcantapa. Ayæ tömënäni inänite,

–Wængonguï weca müni goquënënö

ante apænebo ëñëninque münitö pönö wææ äninque tömëmüni wænguinque wentamö mongæmüniipa. Botö wæætë münitö imünite edonque pönü apænedimo inte müni cædö wentamö mongænämäi imopa töö. İninque botö Wængonguï taadö münitö imünite idæwaa odömöninque edæ oodeoidi inämaï inäni weca ñowo wadæ gobo tamëñedäni.

⁷ Äninque Pabodo wadæ tao godinque oodeoidi odömöincö gäänë wacä oncönë go guïi go guïi cædinque cöwë apæñecantapa. Mänincö në ëacä Titio Yoto nänü äongä iñömö Wængonguï ingante në waa ate pönengä inongäimpa. ⁸ Oodeoidi odömöincönë në aacä Codipo guiquënë mönö Awënë ingante në pönengä bayongä tömengä oncönë në owodäni tömänäni pönëñänitapa. Ayæ coodintoidi nanguï inäni pö ëñëë pö ëñëë cædinque adobaï wede pönëninque æpænë guïigädänimpa. ⁹ Mäniñedë woyowotæ iñö Pabodo wüimonte bai ayongante mönö Awënë tömengä ingante apæñecantapa. “Bitö guïñënedämäi inte apænebi ëñencädänimpa. Pæ wëenedämäi incæbiimpa. ¹⁰ Coodinto iñömö botö quünäni nanguï inäni inänipa, ante cædinque botö iñömö edæ bitö tönö godongämæ cöwë cæcæboimpa. İninque wadäni bitö imüite mämö püinque wënæ wënæ cædämaï incädänimpa.” ¹¹ Ante mönö Awënë tömengä ingante apæñecä ëñëninque Pabodo adoque wadepo go tæcæ iñonte Coodinto iñömö ongöninque Wængonguï nänö apænedö ante tömënäni inänite odömonte apæñecä ëñëñönänimpa.

¹² Mäniñedë odömänoidi änäni ate Acayabæ awënë Gadiöno inongäimpa. Tömengä awënë nänö inöñedë oodeoidi godongämæ pönëninque Ao äninque Pabodo ingante quingæ mämö bæi ongonte æninque awënë Gadiöno nänö cöwë apænte änöñömö ænte mäodäni gocantapa. ¹³ Awënë weca pöninque Pabodo ingantedö ante püinte äninque,

—İngä iñömö, Mönö wadö bai cædinque Wængongui ingante waa ate apæneceäimpa, ante odömöningue mönitö awënëidi näni wææ änönö ante wido cæcampa. Mänömaï wapiticæ cædinque ancaa änewengä eñëningue tömänäni adobaï wapiticæ cædänipa cæbii.

¹⁴ Änäni ate Pabodo tæcæ apæneceä cæyongante Gadiöno oodeoidi inänite iïmaï ante wææ apæneceäntapa.

—Oodeoidi eñëedäni. Minitö botö weca ponte apænedinque, Odömäno awënë nänö wææ änö bai ingä eñënämaï cæcampa, ämini bai, Waocä ingante ædæmö wiwa cæcampa, ante ämini bai botö mini änö do eñëningue apænte ancædömoimpa. ¹⁵ Minitö iñæmpa, Tömengä tededonque ante oda cæcampa, äminipa. Minitö emöwo ante oda cæcampa, ämini. Minitö wææ angainö ante oda cæcampa, ante pïiminipa. Mäninonque ante oda cæcampa, ante ancaa tedewëmini wædinque botö wæætë tömengä ingante apænte änämaï incæboimpa. Tömëminique tömengä ingante apænte æedäni.

¹⁶ Ante piinte äninque awënë tömënäni inänite, Botö apænte äñömö ongönämaï gobæwedäni. ¹⁷ Ante wido cæcä tao godinque tömänäni oodeoidi odömöincönë në aacä Totënë ingante wæætë bæi ongonte tæi tæi pänäni incæte në apænte anguënegä incæ Gadiöno iñömö önonque adämaï inte bai ee acä pangadänimpa.

Pabodo Antioquiya ponte go-campa

¹⁸ İninque tæönæ quëwente ate Pabodo Coodinto iñömö näni pönencabo inänite, Gobopa, äninque wadæ godinque Tidiabæ gocæte ante Tencodea ganca pongantapa. Tömengä do apænedinque, Botö mänimpoga ocagui tocadämaï inte Wængongui beyænque cædinque botö tömëmo äninö ante cöwë cæcæboimpa, ante doyedë ängöäimpa. Nöwo iñömö tömengä nänö äninö bai iinque cædingä inte Tencodea iñömö pöningue ocagui eö toacantapa. Ayæ eö tocacä ate

tömengä Piditida tönö Aquidæ näna gæncaya tönö godongämæ ñænæ wipodë go guidinque tömënäni Tidiabæ gocæte ante wogaa godänitapa. ¹⁹ Mänömaï godinque Epeto iñömö go ti wæænänitapa. Tömëna näna gæncaya mäniñömö ti wæëningue tæ contayöna Pabodo iñömö oodeoidi näni odömöincönë go guidinque oodeoidi inänite, İïmaï impa apænebo eñencæminimpa, ante apæneceä. ²⁰ Eñëningue tömënäni, Bitö mönitö weca wantæpiyæ quëwenguimi, äñönäni tömengä Baa äninque, ²¹ wæætë, Gobopa, angantapa. Ayæ, “Nöwo Eedotadëe iñömö ææmæ bequinque goquënëmo imo incæte Wængongui Ao angä ate botö mönitö weca ayæ ate wæætë ocæ emænte poncæboimpa. Nöwo gobo tamëñedäni.”

Äninque Epeto iñömö ñænæ wipodë go guii tæ contadinque Pabodo wogaa gocantapa. ²² Godinque Tetadea pö ti wæëningue Eedotadëe iñömö Itota Codito ingante godongämæ näni pönencabo weca eñacæte ante æicantapa. Ayæ ate Antioquiya wæicantapa. ²³ Ayæ ate mäniñömö tæönæ quëwëningue wadæ godinque Gadatiabæ adodö godinque Pidiquiabæ tömäo wayömö wayömö cægonte godinque Itota miñæ në tee empote quëwënäni tömänäni inänite mäo apænedinque, Mönö ñimpo cædämaï inte tæi piñæte cæcæimpa, ante apæneceä eñëningue tömënäni tæi piñæte entawëningue quëwengadänimpa.

Epeto iñömö Apodo apæneceä eñënanipa

²⁴ Mäniñedë wacä oodeo tömengä emöwo Apodo iñömö Equitobæ Adecantodia näni quëwëñömö eñate pægaingä inte ñöwo Epeto näni quëwëñömö pongantapa. Tömengä iñömö nangui adinque në eñëngöngä inte Wængongui angä eñente näni yewæmongainö ante do eñëningue waa pöni apæneceä inongäimpa. ²⁵ Mönö Awënë taadö

ante apæneyönäni do eñëningä inte mäninö ante ædæmō ewocadinque tömengä, Eñencædänimpa, ante nangui apæncantapa. Ayæ Itota nänö cægainö ante nö ante odömōnte apæncä incæte Apodo iñömō Wäo æpænē nänö guidongainonque ante mäningancaque eñëningä inte mäningancaque ante töingä odömōngä eñënönänimpa. ²⁶ Tömengä ñowo oodeoidi odömōincönē go guui go guui cædinque guiñenedämaï inte apæncantapa. Pidotida tönö Aquidæ nana gæncaya guiquenē tömengä mänömaï apæncä tæcæ eñëninque edæ Apodo ingante, Mönatō weca pōe, äna pōñongante, Wængongui taadō iïmaï inōmpa, ante töingä apænedä tæcæ mä eñngantapa.

²⁷ Mänömaï cæda ate Apodo wæætē Acayabæ gocæte ante cæyongante tömēnāni nāni pōnencabo tömengä ingante, Waa goe, änānitapa. Ayæ, Acayabæ iñömō Itota ingante nē tee empote quēwēnāni acædänimpa, ante iïmaï ante cadota ante yewæmönānitapa. Minitō, Apodo pongä adinque tömengä ingante waa cæedāni, ante yewæmöninque tömengä ingante pædæ pönönāni ænte godinque mäo Acayabæ quēwēnāni inānite pædæ godongä adānitapa. Tömēnāni Wængongui waadete pönö cæcä ate nē pönēnāni iñönānite Apodo nē waa pōni apænedongä inte mäniñömō ponte apænedinque tömēnāni tönö godongämæ cægacäimpa. ²⁸ Edæ tömānāni ayönāni Apodo oodeoidi inānite nanguï wæætedō wæætē apænedinque gomonga apæncä wædānitapa. Tömengä, Mönö Codito æbänö cæquingää, ante Wængongui angä eñente nāni yewæmongainta adinque mönō eñngæimpa, angantapa. Ayæ, Itota mäninö nāni yewæmongainö bai nē cædongä inte näwangä mönö Codito inongä ingampa, ante nö apæncä eñëninque tömēnāni ædō cæte wadō ante apænequināni.

19

Epeto iñömō Pabodo ponte apæncampa

¹ Apodo ayæ Coodinto iñömō ee ongōñongä Pabodo nänö cægönimæ tæcæguedē änanquidi owēñaque pō Epeto iñömō wæængantapa. Ponte ayongä Itota ingante nē tee empote quēwēnāni pancadāniya a ongönāni.

² Adinque tömengä tömēnāni inānite, —Minitō pōnente bayömini Wængongui tömengä Tæiyæ Waëmō Önöwoca ingante da pönongä æmīnitawo.

Äñongä tömēnāni wæætē,

—Iñæmpa mäningä Tæiyæ Waëmō Önöwoca ingantedō ante apænedänipa eñnguimōnii.

³ Ante apænedāni eñëninque Pabodo wæætē,

—Iñinque æcänö emōwo ante æpænē guimīnitawo.

Äñongante,

—Wäo wodi nänö æpænē guidongainö ante guitamōnipa.

⁴ Mänömainö ante apænedāni eñëninque Pabodo wæætē,

—Wäo wodi nänö guidongainö ante guigaimini inte mīnitō, Idæwaa wēnæ wēnæ cæte awædō, ante Wængongui Awēnē gämænö ocæ emænte pongaimini iminipa. Incæte Wäo wodi, Iñcayæ ate nē Ponguingä ingante pōnencæminimpa, äninque tömēnāni inānite æpænē guidongacäimpa. Mäningä iñömō Wäo nänö, Nē Ponguingä, ängongä iñömō Itota inongä ingampa.

⁵ Ante apæncä eñente wæyönāni Pabodo wæætē mönō Awēnē Itota emōwo apænedinque æpænē guidongä guidānitapa. ⁶ Ayæ tömengä gampocä ongōñönāni Wængongui Tæiyæ Waëmō Önöwoca wææ tömēnāni baonga guicantapa. Guicä ate tömēnāni wadāni nāni tede bai mä tededinque Wængongui beyæ apænedānitapa. ⁷ Mänināni onguiñænāni æpænē nē guidēnāni iñömō önōmpo tipæmpoga go mengäa inönänimpa.

8 Pabodo apäicä mengäa go adocanque pämonque adoyömö quëwëninque oodeoidi odömöincönë go guii go guii cædinque guiñenedämaï apænedinque, Wængongui Awënë Odeye do pongäimpa, ante apænebo ëñëedani, ante nöingä ante apæneca ëñëänitapa. 9 Apæneca ëñëñönäni pancadäniya guiquënë, Wïi pönëinente awædö, ante Baa äninque Wængongui Awënë taadö ante wïwa tedewënanitapa. Mänömaï tedewënanäni ëñente wædinque Pabodo iñömö ëmö cæte godinque Itota ingante në tee empote quëwënanäni inänite ænte wadæ gocantapa. Ayæ iimö iñö iimö iñö Tidänö nänö apæneincönë go guii go guii cæte apænedinque Pabodo mäniñömö pö guidäni tönö guëadö guëa apænedänitapa. 10 Ayæ mënepoga wadepo ganca Pabodo mänömaï cæyongä oodeoidi incæ guidiegoidi incæ Atiabæ quëwënanäni tömänäni mönö Awënë nänö apænedö ante ëñëänitapa.

11 Ayæ Pabodo tönö godongämæ cædinque Wængongui tæi piñænongä inte nanguï cæcantapa. 12 Ìninqe tömänäni Pabodo weocoo wadæ cæcadoquincoo incæ padëincoo incæ æninque wënæ wënæ inäni inänite ænte mämö wo caayönäni waa badänitapa. Ayæ mänömaï cæyönäni wënæidi në wïwa ewocadäni tömänäni nani në ewëneninäni tao godänitapa.

13 Mäniñedë oodeoidi Itota ingante pönënamäi inäni incæ pancadäniya wayömö wayömö godinque wënæidi në wïwa ewocadäni inänite në wido cædäni inönänimpa. Tömänäni nämä mä pönëwëninque, Nöwo Awënë Itota ëmöwo apænedinque mönö wënæ ingante wido cæcæimpa, ante cædinque wënæidi inänite iimaï änönänimpa. Pabodo nänö në apænedongä Itota ëmöwo apænedinque botö, Wënæbi tao gobäwe ämopa, änewënonänimpa.

14 Mäniñedë oodeoidi beyæ, Wængongui qui, ante në godongä ñænængä adocanque Etequeba iñongä tömengä wënäni tiæte ganca inänitapa. Ìinäni iñömö Itota ingante

pönënamäi inäni incæte adobaï cæcæ cædänitapa. 15 Tæcæ cæcæ cæyönäni wënæ në wïwa ewocadongä incæ tömänäni inänite näëmæ tededinque, “Itota ingante do abopa. Ayæ Pabodo æcänö ingäa, ante do ëñëmopa. Wæætë minitö guiquënë æminidö iminii.”

16 Äñongä wënæ wïwa inongä ingante në ewënenngä inte wiyaëmæ tömänäni inänite to mäo yao ongöninque bæ tacantapa. Mänömaï cædinque tömänäni weocoo gä tadongadinque tæi tæi pangä ate tömänäni weocoo ömaadäni inte wepæ taate wædinque oncodo tao wodii winönänitapa. 17 Mänömaï batimpa, ante tedeyönäni Epeto iñömö quëwënanäni oodeoidi incæ guidiegoidi incæ tömänäni ëñëninque ancai guiñente wædänitapa. Ìninqe mönö Awënë Itota ëmöwo wïi önonque ante tededäni inte tömengä ëmöwo æwocæte bai cædinque, Tæi piñængä inte ëmongampa, ante wædänitapa.

18 Ayæ nanguï inäni ñöwo wede pönente badinque adoyömö pöninque tömänäni ëñëñönäni tömänäni nani wënæ wënæ cædinö ante tömänö ante edonque apænedinque, Idæwaa wënæ wënæ cæte awædö, ante wido cædänitapa. 19 Ayæ idö inte në yewænininäni incæ pancadäniya adobaï pönente badinque tömänäni nani, Æbänö cæte yewænguü, ante yewæmöninta incæ adoyömö ænte pöninque tömänäni äñönäni në tänänitapa. Mänintacoo æpodö itædë cædinque padata nani æinta beyæ godonte ænänii, ante cöwä ayönäni tincoenta müido ganca mänimpota nani godonte æninta incæ në tänäni agadänimpa. 20 Mänömaï në pönënanäni badinque waa cædäni ininqe mönö Awënë nänö änö ante godömenque wayömö wayömö mäo gode änäni ëñëninque tömengä ingante nani pönencabo incæ yebæninque tæi piñænäni bagadänimpa.

21 Mänömaï cædäni ate Pabodo önöwënenque pönëninque, Mäatedöniabæ ëñacæ godinque botö

Acayabæ eñacæ godinque Eedotadëe gocæboimpa, ante pönëninque, ayæ, Mäniñömö gote ate Odömä näni quëwëñömö cöwë goquënëmo ïmopa, angantapa. ²² Äninqe tömengä beyæ nê cädäni ïñönänite mënaa ïnate Tïmoteo tönö Edaato ïnate apænedinque, Mäatedöniabæ gote ongöñöminä botö Atiabæ wantæ quëwente pömoeda, ante da godongä godatapa.

Epetoidi nanguï Yæ yæ änänipa

²³ Mäniñedë Epeto ïñömö quëwënäni ïñömö, Itota Taadö mönö wido cæcæimpa, ante nanguï Yæ yæ änänitapa. ²⁴ Tömënäni, Mönitö wængonguinä Diänä ïnampa, ante onquiyänä ëmönö bai badöninque mäninca weca ædæ wæænte nê apænedäni ïñönänimpa. Tömënäni quëwëñömö adocanque Deëmetedio näni änogä ïñömö padata aca podonte nê badongä ïnogäimpa. Tömengä ïñömö padatagæ æninque aca podonte badöninque, Mini wængonguinä Diänä ïnante mini tæiyæ waëmö apæneincö bai impa, ante guyanconque badonte quëwënogäimpa. Mänömaï badöñongä tömengä tönö godongämæ cädäni wæætë wadäni ïnänite godonte æninque mänincoo beyæ tömënäni godonte æinta nanguï æninque quëwëñönänimpa. ²⁵ ïninqe tömengä tönö nê cädäni ïnänite ayæ wadäni adobai cädäni ïnänite äñete pönäni ate Deëmetedio ïñömö tömënäni ïnänite apænecantapa.

“Ïñänäni, do eñëminipa. Mönö badonte godöninque wadäni näni pönöninta nanguï æmompä. ²⁶ Ayæ nanguï ïnäni Epeto ïñömö quëwënäni incæ Atiabæ wodo tömämæ quëwënäni incæ ïngä Pabodo guiquënë wapiticæ apænecä eñëninque edæ oda cædinque tömengä miñæ godänipa, ante do eñëminipa. Tömengä ïñömö, Önompoca badöninca wii wængonguïdi ïnänipa, ante tedecä apa quëwëminii. ²⁷ Mänömaï tedecä beyæ mönö badönö ante wadäni

nanguï ïnäni püinte anguinäni awædö. Ayæ Diänä ñænænä wængonguinä ïñönante tömengä ingante mönö apæneincö incæ, Önonconque impa, anguinäni awædö. Ayæ godömenque, Mönö wængonguinä Diänä waa pönï wængonguinä ïnampa, ante Atiabæ tömäo quëwënäni tönö inguipoga tömäo quëwënäni näni waa adönä ïñönante wabänö wapiticæ tededinque godö püinguïnäni badänipa, ante awædö.”

²⁸ Ante Deëmetedio mänömainö ante apænecä eñëninque tömënäni ænguï badinque ogæ tededinque, “Epetoidi wængonguinä Diänä ñænænä ïnampa,” ante wæætë wæætë ancaa änänitapa.

²⁹ Mänömaï padata nê badönäni Yæ yæ änäni eñente wædinque mäniñömö quëwënäni tömänäni, Quiëmë bai cädänipa, ante acæte ante wadö pö wadö pö pogodo pönänitapa. Ponte ayönäni Mäatedöniabæ quëwente Pabodo tönö godongämæ nê pönina Gayo tönö Aditadoco a ongöna adinque tömënäni tömëna ïnate bæi ongonte quingæ mäo tömënäni näni aincönë ñænæncönë go guïdänitapa.

³⁰ Pabodo guiquënë mänömaï cädäni ate wædinque, Godongämæ ongönäni weca go guïdinque apænecæboimpa, ante cæyongante Itota ingante nê tee empote quëwënäni wæætë, Wænompä, ante, Go guïdämaï incæbiimpa, ante wææ cädänitapa. ³¹ Ayæ mänimæ awënëidi pancadäniya Pabodo æmigoidi ïnäni inte adobai mämö tömengä ingante gode äninque, Bitö ædö cæte mäniñömö go guiquïmii, ante wææ änänitapa.

³² Ïñonte godongämæ ongönäni guiquënë, Quïnante pömoï, ante wodo tömänäni eñënamäi ïnänitapa. Pancadäniya, Ïmaï cæcæimpa, äñönänite wadäni guiquënë, Wadö bai cæcæimpa, ante wæætedö wæætë ante ogæ tededinque nanguï pönï Yæ yæ änänitapa. ³³ Yæ yæ äñönäni oodeoidi guiquënë Adécantodo ingante yæcado gö cädäni ongongä adinque godongämæ

ongönäni pancadäniya tömengä ingante, İimaï cæcæimpa, änänitapa. Tömengä guiquënë tömënäni inänite wææ apæñecæte ante, Apocænë iedäni, ante bai cædinque pipo pipo cæcantapa. ³⁴ Oodeo inongä inte mänömaï cæcampa, ante wædinque tömengä ingante eñenämaï inte tömänäni adoyömö ogæ tededinque, “Epetoidi wængonguinä Diänä ñænænä inampa,” ante mäa ooda ganca adodö adodö adodö ante nanguï änänitapa.

³⁵ Ayæ ate tömënäni awënë Tequedetadio incæ ancaa tömënäni inänite angä eñente apocænë cæyönäni tömengä, “Epetoidi eñemini. Tömäo quëwënäni mänömainö ante do eñenänipa. Mönö Epeto iñömö quëwencabo mönö wængonguinä Diänä apæneincö nē aamö imompa. Ayæ tömengä awinca bai yewæmoinca öönæde mönö wæængainca adobai nē wææ cæmö imompa, ante adinque tömämæ quëwënäni do eñenänipa cæminii. ³⁶ Mäninö ante näwangä pöni impa, ante adinque, Babæ impa, ante ædö cæte anguinänii. İninqe minitö eñenämaï mini Yæ yæ anewënö ñimpo cædinque piyænë cæquënemini iminipa. ³⁷ İina mini bæi ongonte ænte pönönina iñömö mönö wængonguinä Diänä apæneincönë guiidämaï ina inte wënæ wënæ cædämaï inapa. Ayæ mönö wængonguinä Diänä inantedö ante wii wënæ wënæ ante piina apa quëwënänii.”

³⁸ “Deëmetedio padatagæ näni badoncabo incæ wacä ingante, Wiwa cæbitapa, piinte wædanitawo. Edæ nē apænte näni äincö cöwë wi ænete ongompa. Mänincönë nē apænte änäni cöwë ongönänipa. İninqe Deëmetediodi nē näni piinongä ingante mäninömö ænte gote änäni eñeninqe nē apænte änäni wæætë tömengä ingante do apænte angüenänäni inänipa. ³⁹ Ayæ apænte änäni, İionæ tömämäni godongämæ pödäni, näni änionæ bayonte minitö godömenque piinte äinemini inte

mänionæ ponte ämini eñente apænte änäni ate minitö piyænë cæquënemini iminipa. ⁴⁰ Edæ ñöwoönæ mini Yæ yæ anewëninö ante awënëidi pöninque, Quinante mänömaï cæminii, ante äñönäni wæætë, Quiëmë beyæ cætimpa, ante mönö angæimpa. Tömënäni wæætë mönö imonte äninque, Minitö awënë ingante wido cæcæte ante cæminipa, ante piinäni wæcæ wæ.” ⁴¹ Äninqe godongämæ ponte ongönäni inänite tömengä angä gogadänimpa.

20

Mäatedöniabæ godinque Pabodo Guidetiabæ gocampa

¹ Mänü Yæ yæ ante näni anewënö inque cædäni ate Itota ingante nē tee empote quëwënäni inänite wæætë äñete pönönänite Pabodo, Minitö ganca pönente godömenque cæcæminimpa, ante godö ædæmö apæñecantapa. Ayæ, Nöwo gobopa, ante Mäatedöniabæ gocantapa. ² Godinque tömengä mäninömö quëwënäni inänite, Minitö ganca pönente godömenque cæcæminimpa, ante godö ædæmö apæñecä eñenänitapa. Mänömaï nanguï apænedinque tömengä mänimæ tömäo cægöinque wayömö mäo wayömö mäo apæñecä eñenäni ate Guidetiabæ gote pongantapa. ³ Mäninömö pöninque mäa go adoque apäicä quëwengantapa.

Ayæ, Tidiabæ goquimo, ante tæcæ ñænæ wipodë guicæ cæyongante wadäni, Oodeoidi bitö imite wænoncæte ante cædänipa ataque. Ante wææ änäni wædinque tömengä, Botö wæætë adodö godinque Mäatedöniabæ wodo tebæ gocæboimpa, äninque taadonque gocantapa. ⁴ Goyongä tömengä tönö godongämæ godäni iñömö, adocanque Bedea quëwëningä inte Pidido wengä Topatede, ayæ wææ Tetadönica quëwëñina Aditadoco tönö Tegonto mënaa, ayæ wææ Dedebe quëwëningä Gayo tönö Timoteo mënaa, ayæ wææ Atiabæ quëwëñina Tiquico tönö Todopimo mënaa, mänimpodäni

inänitapa. ⁵ Tömēnāni tāno godinque Todoa näni quēwēñōmō pōninquē mōnitō wipodē ponguimōni ante ee ongōnānitapa. ⁶ Mōnitō guiquēnē oodeoidi pāo yedæ æmpoqui ōmæmō ī nāni cænguionæ iinque baganca Pidipo iñōmō quēwēninquē wipodē ñænæmpodē go guidinque wogaa godinque ōnompō æmæmpoque ēōnæ gote ate tōmēnāni weca Todoa pōninquē ōnompō æmæmpoque go mēōnaa quēwentamōnipa.

Todoa iñōmō Pabodo ponte apænecampa

⁷ Tömēnāni näni guēmanguionæ go ate mōnitō, Ñōwo gāwadecæ bayō Wængonguī itædē impa, ante pāo godongāmæ cæncæte ante æmongapaa æi wænōmēnæcapaa æi guidinque tæ contatamōnipa. Pabodo iñōmō baänæ ate gocæ cædingā inte æi guī tæ contadinque wantæpiyæ ayaōnænēña pōni ayæ apæncæ ēñentamōnipa. ⁸ Wænōmēnæcapaa mōni godongāmæ ēñengoncōnē gongapæncade bacoo ti wodōnote mæ ongōnimpā. ⁹ Adocanque edēningā tōmēngā ēmōwo Eotico ayamōnecāa tæ contate ongongantapa. Iinque Pabodo wantæpiyæ apæneyongā edēningā iñōmō mōwocodē nanguī mōinente ayæ wangæ monte wænōmēnæcapaa ongōninquē yæipodē tæ go wæængantapa. Go wæænte do wængā adinque tōmēngā ingante yao ongonte mānānitapa. ¹⁰ Nāñe wænte ōñōñongā Pabodo yæipodē wææninquē, Quēwencæcāimpa, ante cædinque wīni ænte pæ mangantapa. Ayæ nē pōnēmōni mōni caipæ imōnite apænedinque,

—Mīi quēwēngā ingampa. Guīñente wædāmaī iedāni, angantapa.

¹¹ Äninquē Pabodo wæætē adodō æmongapaa æidinque pāo ænte pā ænte mōnitō tōnō godongāmæ cæninque wantæpiyæ godōmenque apænecōñongā edæ ñāō batimpa. Ñāō ba ate Pabodo ñimpo cæte wadæ gocantapa. ¹² Ayæ, Edēningā mīingā

quēwēngampa, ante ænte wadæ godinque tōmēnāni wampo pōnēninquē nanguī togadānimpa.

Ōmaaque godinque Pabodo Mīideto ganca pongampa

¹³ Pabodo guiquēnē taadonque gocæ cædinque mōnitō imōnite apænecantapa. Mīnitō wipodē ñænæmpodē go guidinque māodāmæ wipodenque godāmæ goyōmīni, botō ōmaaque nāñe tebæ pōmoedāni. Atōnō iñōmō pō wāi wocænte owoyōmīni botō iñōmō ōmaaque pō adopodē guibo ate gocæimpa, angā Ao ante mōnitō tāno go guī tæ contadinque ōme tagamōnipa. ¹⁴ Mānōmaī godinque Atōnō iñōmō pō wāi wocænte owoyōmōni tōmēngā ōmaaque pō bee tēninquē ñænæ wipodē adopodē pō guīite tæ contactā ate mōnitō godongāmæ wogaa godinque Mīitidēne näni quēwēñōmō pontamōnipa. ¹⁵ Māniñōmō wāi wocænte monte ate ñāō ba wogaa godinque mōnitō Quiyo ganca pōninquē waōnæ ate wodo pænta godinque wæætē Tāmo iñōmō pōmōnique go Todoguidio iñōmō pōmōnique go iñabæ guingā ate Mīideto pontamōnipa. ¹⁶ Edæ, Ææmæ Pentecotee näni änōmæ botō bequinque Eedotadēē eyepæ poncæte ante quingæ goquēnēmo imopa, ante do äningā inte Pabodo ñōwo, Atiabæ wantæpiyæ ongōninquē ædō cæte Eedotadēē eyepæ pōmaīmoo. Ante pōnente wædinque, Epeto iñōmō ti wæænāmaī yaatænque gocæboimpa. Äñongā mōnitō tōmēngā tōnō Epeto wodo tebæ godinque Mīideto iñōmō pontamōnipa.

Epeto iñōmō nē Picænāni inānite Pabodo apænecampa

¹⁷ Mānīi wipo ñænæmpo Mīideto iñōmō wogaa pō wāi wocæ ate ti wææninquē Pabodo wadāni inānite da godōninquē, Mīnitō Epeto iñōmō tōmæwæ æidinque Itota Codito ingante nē godongāmæ pōnēnāni weca godinque tōmēnāni inānite nē aadāni Picænāni inānite añete

pöedäni. ¹⁸ Angä äñete pöñönänite tömengä, “Botö Atiabæ mä ponte quëwëninque botö goganca æbänö mīnitö weca waa cæte quëwënömoī, ante do ëñëminipa. ¹⁹ Edæ ood-eoidi, Wænoncæ, änäni ëñëninque nanguī guñente wæbo incæte botö, Önömoque bai imopa, ante pönëninque Wængonguī beyænque nanguī cædinque Ca ca wædinque ee cætabopa. ²⁰ Īninque botö, Mīnitö beyænque quīnö waa inguū, ante pönëninque pæ wëenedämaī inte do apænebo ëñëmīnitapa. Ayæ edæ tömänäni ayönäni odömonte apænedinque botö wacönë mäo wacönë mäo go guīdinque apænebo ëñëmīnitapa. ²¹ Ayæ pancamīniya oodeoidi ĩñöminite pancamīniya guīdiegoidi ĩñöminite botö tömäminī imīnite apænedinque ĩmaī ante apænetabopa. Mīnitö, Idæwaa wënæ wënæ cæte awædö, ante pönente wædinque Wængonguī gämænö pöninque mönö Awënë Itota Codito ingante pönencæmīnimpa, ante ämo ëñëmīnitapa. Mänömaī tömäa cætabopa, ante do ëñëminipa.”

²² “Ñöwo guiquënë Wængonguī Önöwoca angä ëñëninque Eedotadëe gocæboimpa. Mänĭñömö pöñömote quīëmë bai bacæimpa, ante pönente wædimo incæte ee gocæboimpa. ²³ Önönque botö ñöwo wayömö wayömö näni quëwëñömö pöñömote wadäni Wængonguī Tæiyæ Waëmö Önöwoca tönö apænecä ëñënäni inte do botö imote ĩmaī ante wææ änänipa. Bitö tee mönete nanguī caate wæquinque Eedotadëe gobipa, änäni ëñëninque mäninque ante ëñëmopa. ²⁴ Incæte, Wængonguī waadete pönö cædinque nänö cægainö ante wat-apæ apænedinque bitö, Nö pönĭimpa, ante apænebi ëñencædänimpa, ante mönö Awënë Itota doyedë botö imote angacäimpa. Īninque tömengä nänö anganca ĩinque cæcæte ante cæyömote wænönäni wæmo incæte botö, Godömenque ingui-poga quëwenguënëmo intabopa, ante wædämaī incæboimpa. Ayæ pogodo

gote bai botö goquīnö tömänö gocæte ante nanguī cæcæboimpa, ämopa,” ante Pabodo apænecantapa.

²⁵ Ante apænedinque tömengä ayæ godömenque apænecantapa. “Botö, Mönö Awënë Odeye do pongäimpa, ante apænedinque wayömö mäo wayömö mäo apænebo ëñëmīnitapa. Idæwaa apænebo ëñënimīni inte mīnitö ñöwo æmæwo botö awinca amīnipa. ²⁶ Mänömaī beyæ botö ñöwoönæ apænedinque mīnitö imīnite ĩmaī ämopa. Botö, Quëwencæmīnimpa, ante cædinque ancaa apænebo incæte pancadäniya tömënäni näni wū ëñënö beyænque wentamö mongænte näni wænguinque goyönäni botö wæætë mäninö beyæ wentamö mongænämaī imopa. ²⁷ Wængonguī, ĩmaī cæbo bacæimpa, ante nänö änö ante botö ĩñömö edæ pæ wëenedämaī inte mīnitö imīnite tömänö edonque pönĭ apænebo ëñëmīnitapa.”

²⁸ “Mīnitö ĩñömö edæ nämä wææ aadinque waa cæte quëwëedäni. Wængonguī Önöwoca mīnitö imīnite äninque, ĩnänī cæningäidi bai ĩnänipa, ante nänö në angainäni ĩñönänite mīnitö wæætë në aamīni ĩnömīni inte tömënäni ĩnänite ædæmö wææ aadäni. Mönö Awënë Codito ingante näni godongämæ pönencabo ĩnänite æncæte ante tömengä nämä wepæ godonte ængä ate Wængonguī quīnäni bagadänimpa cæmīni. Mīnitö tömënäni ĩnänite në aamīni inte waa aadäni. ²⁹ Edæ botö do ëñëmopa. Babæidi gæwæi ecate ade cænäni amīnipa. Edæ botö ëmö cæte gobo ate waodäni incæ babæidi cædäni mīni abai adobai wënæ wënæ cædinque mīni pönencabo ĩñöminite ata cæpodämaī incædänimpa. Tömënäni babæ wapiticæ änäni ëñëninque mīni cabo incæ pancadäniya ëñënämaī badinque wadæ godäni wæcæmīnimpa. ³⁰ Ayæ tömëmīni mīni pönencabo incæ pancadäniya, Mönitö mīñæ poncæmīnimpa, ante cædinque babæ wapiticæ odömoncædänimpa cæmīni. ³¹ Edæ wææ cæedäni. Botö, Mänömaī bacæimpa, ante

wadepo mēnepoga go adodepoque iñonte itædē incæ woyowotæ incæ ñimpo cædāmaï inte Ca ca wædinque mīnitō tōmāmīni imīnite apænebo eññenōminimpa. Mānōmainō ante pōnēedāni,” ante Pabodo apænecā eññenānitapa.

³² Äninqe tōmengä, “Iñänäni, botō mīnitō imīnite Wængonguï nempo ñowo emō cæte gobo tamēñedāni. Tōmengä waadete nänō pōnō cædinō ante möni apænedō ante eññente ewocamīni iñōmīnite tōmengä mīnitō imīnite godongämæ cæcä ate tæï piñænte bacæminimpa. Ayæ Wængonguï quimōni tōmāmōni tōnō mīnitō adocabomīni bayōmīnite tōmengä eyepæ da pōnongä ate mīnitō mönitō tōnō godongämæ æncæminimpa. ³³ Botō iñömō æbänō quēwēmoï aedāni. Edæ wacä qui tiguitamō incæ oodo incæ weocoo incæ, Botō qui bacæimpa, ante cōwē æinēnāmaï inōmoimpa. ³⁴ Edæ tōmēmo önompoca botō cædinō beyænque quiēmē ænguēnēmo ante eyepæ æninqe quēwēnōmoimpa. Ayæ botō tōnō godongämæ cædāni nāni ænguēnēnō ante adinqe adobaï botō tōmēmo önompoca cædinō beyænque æninqe tōmēnāni inānite da godō da godō cæbo æninqe quēwēnōnānimpa. Mānōmaï botō cædinō ante do eññemīnipa. ³⁵ Mōnō Awēnē Itota incæ iïmaï ante apænegacäimpa. ‘Māincoo æninqe mōnō wædænque tomompa. Wæætē wacä ingante pædæ godōninqe mōnō nanguï toquinque impa.’ Ante Itota nänō apænegainō ante pōnēninqe botō, Mānōmaï mōnō önompoca nanguï cædinque æninqe wadāni nē ænguēnēnāni inānite mōnō pædæ godongæimpa, ante mīnitō imīnite cōwē odōmonte apænebo eññemīnitapa.”

³⁶ Mānōmainō ante iinqe apænedinqe Pabodo tōmēnāni tōnō da guicapodinqe Wængonguï ingante apænecantapa. ³⁷ Ayæ tōmēnāni Ca ca wædinque, Waa goe, ancæte ante godongämæ goto pōninqe tōmengä

ingante yaagö yaagö cædānitapa. ³⁸ Tōmengä nänō, Botō imote æmæwo amīnipa, nänō äninō beyæ godōmenque nanguï wædānitapa. Ayæ tōmengä ingante ñænæ wipo ganca ænte mäodāni gogacäimpa.

21

Pabodo Eedotadëë gocampa

¹ Mönitō tōniñadāni tōnō godongämæ wægōninqe Pabodo tōnō möni goquincabo iñömō, Wipo ñænæmpo do wogaa gocæ cæpa, ante adinqe edæ, Ñowo gomōnipa, ante tōmēnāni inānite emō cæte godinqe mānimpodē go guitamōnipa. Guidinqe mönitō tōingä wogaa godinqe Coto nāni quēwēñömō ponte tōmæwæ æite monte ate iïmō ate Ododata gomōnique go Patada nāni quēwēñömō pontamōnipa. ² Patada iñömō pō ti wæænte ayōmōni, Wipo ñænæmpo Pēnitia goquimpo impopa, ante adinqe mānimpodē go guidinque wogaa gotamōnipa. ³ Wogaa godinqe dipæmæ inō gomō ayōmōni wää tēiwænē Tipidebæ a ongō adinqe tæcæpæ inō wodo tebæ wogaa gomōnique go Tidiabæ pontamōnipa. Ayæ ñænæmpo möni goimpo Tido iñömō māincoo öwäaquï impa, ante eññeninqe mönitō māniñömō adobaï ti wææntamōnipa.

⁴ Ti wææninqe mönitō tōmēnāni quēwēñömō ponte ayōmōni Itota ingante nē tee empote quēwēnāni a ongōnāni adinqe mönitō önompo æmæmpoque go mēōnaa iñonte tōmēnāni tōnō godongämæ quēwentamōnipa. Tōmēnāni guiquēnē, Wængonguï Tæiyæ Waēmō Önōwoca apænecā eññināni inte Pabodo ingante, Bitō wæquinque Eedotadëë iñömō gocæ cæbipa, ante wææ änānitapa. ⁵ Mānōmaï ante wææ änāni eññemōni incæte mönitō, Mānimpoönæque quēwēnguēnēmōni intamōnipa, ante adinqe wadæ gotamōnipa. Iñinqe tōmēnāni nāni quēwēñömō yabæ inō tōmēnāni nāni wencabo tōmānāni ænte mäodāni godinqe mönitō emōnaiya pōninqe godongämæ da

guicapodique Wængongui ingante apænetamönipa. ⁶ Apænete ate mönitö, Gomönipa, äninque go ñænæ wipodë adopodë guidique wogaa gocæ cæyömönite tömënäni wæætë, Waa goedäni, äninque ocæ emænte tömënäni oncö godänitapa.

⁷ Mönitö iñömö Tido iñömö wadæ tao wogaa godinque Todëmada iñömö pö tömæwæ æidique mäniñömö näni pönencabo inänite adinque mönitö, Pömönipa, äninque tömënäni tönö adoönæ que wentamönipa.

⁸ Iimö ate wadæ godinque Tetadea näni quëwëñömö pöninque Pedipe oncönë pö guite quëwentamönipa. Wëenëñedë Itota nänö në emiñænäni, Mönö pönencabo beyæ ante në cädäni tiæte ganca inäni incädänimpa, ante näni Tiæte änonäni iñönäni adocä Pedipe tömënäni näni pönencabo beyæ ante në cæcä inongä inte Codito waa pönä nänö pönö cægainö ante në apæneccä inongäimpa. ⁹ Tömengä wënäni baquedänique mengäa go mengäa iñönänite Wængongui Önöwoca pönö cæcä ate tömënäni Wængongui beyæ në apænedäni inönänimpa. ¹⁰ Mönitö Pedipe weca tæönæ quëwëmöni ate wacä onguiñængä tömengä emöwo Agabo Wængongui beyæ në apænedongä inte Oodeabæ quëwente wææ pongantapa. ¹¹ Mönitö weca pöninque tömengä Pabodo pacadeyænta æninque nämä onompo goti wimpote wæi önöwa goti wëwadinque iimaï ante apænecantapa.

—Wængongui Tæiyæ Waëmö Önöwoca botö imote æbänö ante apæneccä, ante apænebo ëñeedäni. Oodeoidi Eedotadëe në quëwënäni iñömö iï pacadeyænta në ëadingä ingante mänömaï goti wininque oodeoidi inämaï inäni nempo pædæ godönäni æncädänimpa, ante do apæneccä ëñëmopa, ante Agabo apænecantapa.

¹² Mänömaï apæneccä ëñëninque mönitö Tetadea quëwënäni tönö Pabodo ingante wææ wææ apænedinque adodö ante apæneccä ëñënanitapa.

Eedotadëe godämaï imäwe. ¹³ Ante wææ äñömönite Pabodo wæætë,

—Minitö iñæmpa Ca ca wæmïni ëñente wædinque wætawente awædö. Edæ Eedotadëe goyömote bæi ongonte goti winäni incæte wænönäni wæmo incæte botö iñömö ñimpo cädämaï inte mönö Awënë Itota emöwo beyænque cöwë gocæboimpa.

¹⁴ Ante mänömaï apæneccä ëñëninque mönitö ancaa wææ äñömönite Pabodo, Cöwë gocæboimpa, ante ñimpo cädämaï inte angä wædinque mönitö wæætë edæ, Wængongui nänö änö bai bacæimpa, ante adinque mönitö ee ate pæ wëenetamönipa.

¹⁵ Iinque mänimpoönæ mäniñömö quëwëninque, Nöwo mönö Eedotadëe gocæimpa, ante cædinque Pabodo tönö godongämæ ee gotamönipa. ¹⁶ Goyömöni Tetadea iñömö quëwënäni inte Itota ingante në tee empote quëwënäni pancadäniya mönitö tönö godongämæ godinque, Näatöo oncönë owocæminimpa, ante mäninganca ænte mämönäni pö guitamönipa. Tömengä iñömö wää tæiwænë Tipidebæ në quëwëningä inte dobæyedë Itota nänö në emiñængä badingä inte quëwëningäimpa.

Tantiago weca Pabodo ëñacæ go-campa

¹⁷ Tömengä oncönë pö guimömonique go Eedotadëe pöñömöni mäniñömö quëwente në pönänäni iñömö, Waa pömïni amönipa, ante todänitapa. ¹⁸ Ayæ iimö ate Pabodo tönö godongämæ möni pönencabo Santiago weca ëñacæ gotamönipa. Tömengä weca pöñömönite në pönänäni inänite në aadäni në Picænäni tömänäni adoyömö pönänitapa. ¹⁹ Adinque Pabodo, Waa quëwëmïni, äninque godömenque iimaï ante apænecantapa. Mëmöidi ëñëedäni, äninque, Botö oodeoidi inämaï inäni weca gote cæyömote Wængongui iimaï godongämæ waa cæcantapa, ante Wængongui nänö cædinö ante tömengä adodö

adodö ante apæneccä ëñënanitapa.

20 Æñëninque nê aadäni Picænäni guiquënë, Wængongui, Bitö waa pöni cæbitapa, ante godongämæ watapæ apænedänitapa. Ayæ Pabodo ingante wæætë apænedinque,

—Biwi ëñëmi. Oodeoidi æpodö miido ganca inäni ñöwo do pörente badäni abitapa. Tömënanï iñömö Wængongui nänö wææ angainö ante tömänäni ëñente cöwë cædäni abitawo. ²¹ Ayæ edæ bitö Pabodobi wënæ wënæ cædämaï iñömite wadäni bitö imitedö ante babæ wapiticæ godö oodeoidi inänite iïmaï ante tedewënäni ëñënanïpa. Tömënanï, Pabodo wayömö wayömö godinque oodeoidi wabæca quëwënäni inänite bee tente odömöninque iïmaï ante apænecampa, ante tedewënänïpa. Pabodo, Minitö wënäni inänite ëö togænämaï iedäni, äninque, Dodäni nänï angainö mini ëñëno ante ñimpo cædäni, ante änewengampa, ante tedewënänïpa. Ayæ godömenque äninque, Möitee wodi nänö wææ angainö ante wido cædäni, ante Pabodo änewengampa töö. Ante tömënanï bitö imitedö ante babæ ante tedewënänïpa. Iñæmpa bitö mänömaïno ante änämaï iñömite tömënanï oodeoidi inänite babæ ante apænedäni ëñënanïpa cæbii.

²² Æninque, Pabodo do pongäimpa, ante oodeoidi do ëñenguinänï inänïpa, ante pörente wædinque mönitö ñöwo, Æbänö cæte wææ cæquïi, ante wæmönïpa. ²³ Æninque, Pabodo nö cæcä iñongante wadäni babæ wapiticæ tededänïpa, ante oodeoidi ëñencædänïpa, ante wææ cædinque bitö iïmaï cæcæbiimpa ämönïpa.

“Pabodo ëñëmi, änänitapa. Mönitö weca onguiñænäni mengäa go mengäa inäni ñöwo ongöninque, Wængongui beyænque ante cöwë cæcæmönimpa, ante nê äninäni inte tömënanï nänï äninö bai iinque cæquïnänï inänïpa. ²⁴ Tömënanï, Mönitö äninö ante do iinque cædimöni inte wentamö mongænämaï imöni acædänïpa, ante cædinque, Wængongui

bitö iñömö mäninänï inänite ænte godinque tömënanï tönö godongämæ, Wængongui qui, ante godöe. Ayæ bitö eyepæ pædæ godömi æninque tömënanï nänï godonguëncöo godonte æninque, Wængongui qui, ante godöninque tömënanï ocagui tömanguï ocäa pöni ëö tocate incædänimpa. Bitö mänömaï tömënanï tönö iñacabo cædinque Möitee wodi nänö angainö bai cæbi adinque oodeoidi wæætë, Æ, Pabodo nö cæcä iñongante wadäni iñömö babæ wapiticæ tededänïpa, ante ëñencædänïpa,” ante nê Picænäni änänitapa.

²⁵ “Ayæ oodeoidi inämaï inäni guiquënë nê pönënanï badinque æbänö cæquënenänï inänïpa, ante pörente wædinque mönitö do godongämæ pönëninque tömënanï inänite iïmaï ante yewæmontamönïpa. Wadäni, Wængonguïdi qui, ante cænguï nänï cönönincoo ante minitö cænämaï gomö aedäni. Wepæ owemöingä adinque cæningä ñë wimencate wæningä adinque cænämaï iedäni. Ayæ nänöogængä inämaï iñongante minitö godö guëa mönämaï iedäni, ante do yewæmontamönïpa,” ante nê aadäni Picænäni Pabodo ingante apænegadänimpa.

Wængongui oncönë Pabodo ingante bæi ongönänïpa

²⁶ Iimö ate ñäö bayonte nê aadäni Picænäni nänï äninö bai ëñente cædinque Pabodo mengäa go mengäa inäni inänite ænte mäocä gote cæyönäni tömengä nänö tæiyæ wæmö baquinque ante tömënanï tönö Möitee wodi nänö wææ angainö ante ëñente cæcantapa. Mänömaï cædingä inte tömengä Wængongui oncö ñænæncö yabæcönë go guïdinque mäniñömö cædäni inänite apænedinque, Mönitö adoque Wængongui itædë go ate Möitee wodi nänö angainö iinque cæmöni ate iinänï iñömö, Wængongui qui, ante baö pædæ pönönäni æninque tancæminimpa, ante Pabodo tömënanï beyæ ante apænecantapa.

27 Ayæ önompo æmæmpo que go meönaa nänö änimpoönæ wodo iinque ba ate oodeoidi Atiabæ quëwente në pöninäni guiquënë Wængongui oncö ñænæncö yabæcönë ponte ayönäni Pabodo a ongongä. Adinque mäniñömö önonque ongönäni inänite, Mönö piinte cæcæimpa, ante änäni ëñëninque iinäni wæætë ænguï badänitapa. Ayæ Pabodo ingante bæi ongonte, 28 aa pedinque tömengä ingante në piinte änäni iñömö, “Idægoidi cöwä aedäni” ante, “Iingä ingampa cæminii. Pö godongämæ cæedäni. Tömengä inguipoga tömäo godinque tömämæ quëwänäni inänite mäo apænedinque iimainö ante tedewengampa. Idægoidi wënæ wënæ cædäni inänipa, ante cöwë änewengampa. Wængongui oncö ñænæncö incæ önonconque impa, angampa. Ayæ Wængongui nänö wææ angainö ante mönö ëñënamäi ingæimpa, ante tömengä änewengampa töö. Ayæ iñömö oncö tæiyæ waëmö oncö iñonte tömengä wæætë guidiegoidi inänite ænte mämö iincönë guidinque otænë öñö bai cæcantapa cæminii,” ante piinänitapa.

29 Do edæ wacä Todopimo iñömö Epeto iñömö quëwëningä inte Eedotadëe pöninque Pabodo tönö cægöna inönäimpa. Mänömaï guëa cægöna adinque oodeoidi, Æ, iingä oodeocä inämaï iñongante Pabodo do Wængongui oncö ñænæncö yabæcönë ænte mämongä wäänë guiibaingampa, ante wawique pönëninque mäninö ante wapiticæ apænedänitapa.

30 Mänömaï ante änewänäni ëñëninque Eedotadëe quëwänäni tömäo iñömö Yæ yæ äninque pogodo pönänitapa. Ponte Wængongui oncö ñænæncö yabæcönë mäo pö guidinque Pabodo ingante bæi ongonte æninque oncodo wëä mantao godinque odemö do tee mönedänitapa. 31 Ayæ godömenque, Wænongæimpa, ante tæcæ cæyönäni adocanque mäi odömäno tontadoidi awënë

cömantante ingante apænecantapa. Eedotadëe tömäo Yæ yæ äninque pogodo pönänipa cæbii. 32 Ante mäi angä ëñente wædinque awënë cömantante iñömö tontado capitäoidi tontadoidi inänite, Pöedäni, äninque në Yæ änäni weca pogodo wææ do pönänitapa. Iinque awënë cömantante tönö tontadoidi do wæænte pönänipa, ante adinque wadäni wæætë Pabodo ingante në tæi tæi päninäni inte ñöwo ñimpo cædinque ee adänitapa. 33 Pabodo weca pöninque awënë cömantante angä ëñëninque tontadoidi wæætë Pabodo ingante bæi ongöninque yaëmengö mëmëña goti winänitapa.

Awënë cömantante iñömö, Æcänö ingäi, ante ayæ, Quinö wënæ wënæ cæcäi. 34 Äñongante pancadäniya, iimäi cæcantapa, äñönäni wadäni wæætë, Wii iimäi wadö cæcantapa, äninque wææ wææ äñönänite tontadoidi awënë cömantante iñömö, Nöingä ante æbänö cæte ëñenguimoo, ante wædinque tontadoidi inänite angä ëñëninque Pabodo ingante tömënanäni wææ cæte iñömö ænte mëicæte ante cædänitapa. 35 Ænte godinque tæwaimpa ganca tæcæ pöñongante godongämæ ongönäni godömenque ænguï badinque wiwa cæcæ cædäni wædinque tontadoidi wæætë Pabodo ingante wææ cædinque önönancapæ ængö cædinque adimongä næænte mëidäni tæwaimpaa æicantapa. 36 Ayæ tömänäni edæ tee empote pönäni iñömö Yæ yæ äninque, “Cöwë wido cæcæimpa,” ante ancaä änänitapa.

Pabodo nämä wææ apænecampa

37 Wææ cætiñömö tæcæ mangui guicæte ante cæyönäni Pabodo iñömö tontadoidi awënë cömantante ingante apænedinque,

—Bitö Ao ämi ëñente ate botö adod-eque bitö imite apænecæboimpa.

Äñongante,

—Iñæmpa bitö guidiego tededö tedebi imitawo. 38 Bitö iñæmpa equitobi inömi inte edæ doyedë,

Wido cæcæimpa, ante cædinque nē, Wænongæimpa, ante näni änincabo iñönänite coatodo miido ganca inäni inänite önömæca ænte mäobi godänitapa. Botö ayömo bitö adobi imitapa töö.

³⁹ Äñongante Pabodo wæætē,

—Iñæmpa botö waobo eñagaïmo inte oodeobo inömo imopa. Botö wii önöñomonque eñagaïmo imopa. Tiditiabæ Tadoto näni nanguï quëwëñömö eñagaïmo imopa cæbii. Ao ämi ate botö iinäni inänite apænebo eñëmainänipa.

⁴⁰ Äñongante Ao angä ate tēwaimpaa adiyæ gongæninque godongämæ ongönäni inänite Pabodo, Apocænē iedäni, ante bai cædinque compo compo cæcä. Adinque tededämaï ongönäni ate tömengä ebedeoidi näni tededö tededinque iïmaï ante apænecä eñënanitapa.

22

¹ “Botö tönïñamini imini eñëedäni. Botö wæmpomini imini botö nämä wææ apænebo eñëedäni.”

² Ante Pabodo ebedeo tededö apænecä eñëninque tömënäni, Æ mönö tededö apænecampa, ante wædinque godömenque eamonca nöwæ ongöñönäni tömengä iïmaï ante apænecantapa.

³ “Botö iñömö oodeobo ingaïmo imopa. Tiditiabæ Tadoto iñömö eñagaïmö inte botö Eedotadëe ponte pægaboï aedäni. Iñömö pædinque Gämadedo nē odömongä weca adïmo inte botö mönö mæmæidi näni wææ angainö ante ædæmö eñëninque adodö ante eñente cæte pægaboïmpa. Minitö, Wængonguï beyæ ante mönö cöwë cæcæimpa, ante ñöwoönæ cæminipa. Minitö cæmini bai botö adobai Wængonguï beyæ ante cæcæte ante cöwë nanguï cædinque quëwengaboïmpa. ⁴ Iñinque, Itota öönædë godö Taadö bai ingampa, ante nē pönënäni inänite botö, Pämö wæncædänimpa, ante togænte pangaboïmpa. Onguïñænäni incæ onquiyænäni incæ tömänäni inänite

bæi ongöningue botö wadäni nempo pædæ godömo æninque tömënäni wæætē nē pönënäni inänite mäo tee mönedäni wægadänimpa.”

⁵ “Mänömaï cædinque botö, Godömenque Daämaco iñömö godinque botö, Taadö, ante nē pönënäni inänite bæi ongönte goti winte adodö Eedotadëe iñömö ænte mämö pædæ godömo æninque awënëidi wæætē tömënäni inänite pänäni wæcædänimpa, ante cætabopa. Mänömaï cæcæte ante cæbo adinque, Wængonguï quï, ante nē godongä ñænængä pönï inongä tönö nē aadäni näni Picæncabo tönö Ao æninque, Mönitö tönïñadäni Daämaco iñömö quëwënäni acædänimpa, ante cadota ante yewæmönäni ænte gotabopa. Iñinque, Botö æbänö cæboo, ante nē againäni inte awënëidi incæ edæ, Pabodo näwangä angampa, ante ñöwo nē apænequënänäni inänipa,” ante Pabodo angantapa.

Botö wëenë pönëwengainö ante ñimpo cædinque wadö ante pönëmopa, ante Pabodo apænecampa

(Näni Cægainö 9.1-19, 26.12-18)

⁶ Äninque Pabodo, Iïmaï cægaboïmpa, ante godömenque apænecantapa, “Botö taadö godinque tæcæbæcä iñonte Daämaco obo ponte ayömote öönædë iñontobæ ñäö botö weca pö godongämæ guinæ gongæ ate wædinque, ⁷ botö guidömëmæ tæ go wææntabopa. Ayæ eñëñömote, ‘Taodo, Taodo. Botö imote quinante togænte pämi.’ ⁸ Äñongante, ‘Awënë, æbidö inömi imii.’ Ante wæyömate tömengä, ‘Itota Näatadeta quëwënimo inte mänimodö bitö nē togænte pänömo imopa,’ ante apænecantapa.

⁹ Mänömaï apæneyongä botö tönö godongämæ godäni guiquënë ñäö gongænque adinque botö imote nē apænecä nänö tededö ante eñënamäi inänitapa. ¹⁰ Botö iñömö, ‘Awënë, quinä cæquënëmo imoo, ante ämi eñëmoe.’ Äñömote mönitö Awënë wæætē, ‘Bitö ængæ gantidique Daämaco iñömö goe. Botö, Taodo

iïmaï cæcæcäimpa, ante wacä ingante Daämaco iñömö nē quēwengä ingante do apænebo eñengampa cæbii. Bitö Daämaco iñömö gote ongöñömi tömengä wæætē bitö imite apæneca eñente cæcæbiimpa, angantapa. ¹¹ Ayæ ñäo gongæ adinque botö bee wodömonte bai bayömote botö tönö godongämæ godinani wæætē töo æmænte Daämaco iñömö mäodäni gotabopa,” ante Pabodo apænecantapa.

¹² Mänömainö ante apænedinque Pabodo godömenque apænecantapa. “Mäniñömö gote ongöñömo wacä tömengä emöwo Änäniya botö weca pongantapa. Tömengä iñömö Wængongui ingante guiñente wædongä inte dodäni näni wææ angainö ante cöwē eñente cæcä inongäimpa. Ininque oodeoidi mäniñömö quēwēnāni tömänāni tömengä ingante waa adönānimpa. ¹³ Tömengä iñömö botö weca pö næ gongæninque, ‘Taodo, bitö botö biwi imi, ñöwo waa bamonte ae.’ Tæcæ añongante botö æmō adinque tömengä ingante waa atabopa. ¹⁴ Tömengä ayæ apænedinque, ‘Mönö mæmæidi Wængongui incæ, Botö æbänö cæquimo imoo, ante botö pönente angainö ante bitö eñencæbiimpa, ante cædinque bitö imite apænte ængampa. Ayæ, Mönö nö cædongä ingante tömēmi acæbiimpa. Adocä apæneca eñencæbiimpa, ante cædinque Wængongui bitö imite do apænte ængampa. ¹⁵ Ininque nē adimi inte nē eñēmi inte bitö iñömö edæ bitö adinö ante bitö eñēninö ante, Näwangä impa, ante tömāmæ quēwēnāni inānite mäo apænebi eñencædānimpa. ¹⁶ Nöwo iñömö quinante a ongömii. Ængæ gantidinque Itota emöwo apænedinque, Wænæ wænæ botö cædö pönö ñä mēnongabi quēwēmoē, äninque æpænē guie.’ Ante Änäniya angä eñēninque botö æpænē guitabopa,” ante Pabodo apænecantapa.

Oodeoidi weca gotabopa, ante Pabodo apænecantapa

¹⁷ “Ayæ ate adodö Eedotadēe pontabopa. Ayæ Wængongui oncö ñænæncö yabæcönē go guiidique Wængongui ingante apænedinque botö ate bai cæwēnente ayömö, ¹⁸ mönö Awēnē botö imote iïmaï ante apænecantapa. ‘Bitö botö imote ante nö apænebi incæte iināni eñēnāmaï ināni inte Baa anguināni inānipa cæbii. Nöwo Eedotadēe quingæ wodii tao gobæwe.’ ¹⁹ Äñongante botö, ‘Awēnē eñēmi, antabopa. Oodeoidi odömöincönē wacönē wacönē go guidinque botö bitö imite nē pönēnāni inānite mäo tee mönedinque tæi tæi pänimo imopa. Mänömaï impa, ante iināni do eñēnānipa. ²⁰ Ayæ, Itota incæ näwä Awēnē inongä ingampa, ante nē apæneca iñongante Etebä wodi ingante wænönāni wæñongä botö edæ Ao äninque nē wænönāni weocoo aate a ongontabopa, ante tömēnāni do agāināni inte botö imote waa aquināni inānipa.’ ²¹ Ante wææ apænebo incæte Wængongui Awēnē wæætē, ‘Nöwo goe, ämopa, angantapa. Gobæ oodeoidi ināmaï ināni weca bitö imite da godömo gocæbiimpa,’ ante da godongä gotabopa,” ante Pabodo apænecantapa.

Pabodo tontadoidi awēnē cömantante weca ongongampa

²² Pabodo, Oodeoidi ināmaï ināni weca angä gotabopa, ante nänö apænedi ganca godongämæ ongönāni eñēe gönānitapa. Wæætē mänine apæneca eñente wædinque tömänāni yedæ äninque, “Oodeoidi ināmaï ināni weca godingä iñömö edæ quēwēnāmaï inguēnengä awædö. Tömengä ingante mönö wo ewengæimpa.” ²³ Äninque tömēnāni godömenque ængui badinque Yæ yæ äninque nämä weocoo yabæcooque gāni tadongadinque wancæ wancæ cædinque onguipo guidimö ö æninque wo ææntodö wo ææntodö ancaa cædānitapa. ²⁴ Mänömaï ængui bate wænæ wænæ cædāni adinque tontadoidi awēnē cömantante angä

ēñēninque Pabodo ingante wææ cæte iñömö manguidäni guicantapa. Ayæ, Quinö wænæ wænæ cæcäi ante piinte änānii, ante ēñencæte ante tontadoidi inānite apænedinque, Minitö cōwē cædinö bai cædinque tæi tæi pāmīni caate wædinque Pabodo tōmāā tōmengä cædinö edonque pōni apænecä ēñencæboimpa, angantapa. ²⁵ Eñēninque tōmengä ingante pancæte ante æmontaimenca tæcæ goti wīninqe ñö cæyōnāni Pabodo iñömö tontado awēnē capitāō māniñömö ongongä ingante apænedinque,

—Iñæmpa apænte änāmaī iñōnāni botö odömāno onguīñæmo iñōmote quīmæ pāwēmīnii. Mānōmaīnō cædinque mīnitö awēnēidi nāni wææ angainö ante dicæ ēñente cæmīniyaa.

²⁶ Añongä capitāō wæætē awēnē cōmantante weca godinque,

—Iñgä iñömö odömāno onguīñængä iñongä ingä атаque. Ñōwo æbānō cæquīmīi. ²⁷ Angä ēñente wædinque cōmantante iñömö Pabodo weca pōninque tōmengä ingante,

—Bitö nāwangä odömāno onguīñæmi imitawo.

Añongante Pabodo,

—Ao, bitö ä bai botö mānimodö imopa, angantapa.

²⁸ Pabodo apænecä ēñēninque cōmantante wæætē,

—Botö guiquēnē odömāno ināmaī ēñagāimo inte māninö bacæte ante cædinque nangui godōmo æninque odömānoidi wæætē botö imote, Odömānobi imipa, ante yewæmōnāni bagaboimpa.

Apænecä ēñēninque Pabodo wæætē,

—Botö guiquēnē odömānobo ēñagāimo inte edæ odömānobo inōmo imopa, ante apænecantapa.

²⁹ Mānōmaī apæneyongä nē pancæ cædināni guiquēnē do tōmengä ingante emö cæte wadæ godānitapa. Ayæ cōmantante iñömö, Pabodo odömāno onguīñængä iñongante botö āmo yaēmengonca goti wīnānīpa tōö, ante guīñente wædinque, Botö

awēnēidi piināni wæcæ wæ, ante wægacäimpa.

Oodeoidi näni Apænte Äincabo weca Pabodo ongongä

³⁰ Iimö ate cōmantante iñömö, Quinö Pabodo wænæ wænæ cæcäi ante oodeoidi piinte änānii, ante ēñencæte ante Pabodo ingante añecä ta pongantapa. Ayæ, Wængongui qui, ante nē godōnāni ñænænāni tōnō oodeoidi tōmēnāni nāni nē Apænte Äincabo inānite añete godongāmæ ponte ongōñōnāni Pabodo ingante ænte māwæ tōmēnāni weca gö cæcä gongængantapa.

23

¹ Pabodo iñömö oodeoidi nāni nē Apænte Äincabo inānite gomö adinque,

—Botö mēmōidi ēñeedāni. Botö mīmō entawente nāmā apænte cædinque Wængongui beyæ botö cæquēnēnō ante wēēnēñedē iinque cædinque cōwē ñōwo ganca adobai cædinque quēwēmopa.

² Ante mānōmaī apænecä ēñente wædinque, Wængongui qui, ante nē godongä ñænængä pōni inongä Änāniya guiquēnē Pabodo gāānē ongōnāni inānite apænedinque, Öñoneca tæi tæi tadeedāni, angantapa. ³ Añongä Pabodo wæætē,

—Bitö iñæmpa botö imote apænte ancæte ante Mōitee wodi nānō wææ angainö ante cæbitawo. Incæte adode nānō wææ angainö ante ēñēnāmaī inte bitö edæ, Tæi tadeedāni, ante pōnō āmi awædō. Bitö weocoo waëmoncoo ēñabi incæte mīmō wentamō entawēninque cæyōmite Wængongui bitö imite nāēmæ tæi tadecæcäimpa tōö.

⁴ Ante apænecä ēñēninque Pabodo gāānē ongōnāni wæætē,

—Bitö iñæmpa, Wængongui qui, ante nē godongä ñænængä pōni iñongante quīmæ tedewēmīi.

⁵ Añōnānite Pabodo wæætē,

—Botö tōniñadāni ēñeedāni. Botö, “Waodāni awēnē iñongante

tömengä ingante wænæ wænæ ted-
edämaï incæbiimpa,” ante do wææ
yewæmongatimpa, ante do eñēmopa.
İnıneque botö, İñömö ongongä,
Wængonguï qui, ante nē godongä
ñænængä pönı inongä ingampa, ante
eñēnämäi inte botö mänömainö ante
apænetabopa.

⁶ Ante apænedınque Pabodo, İinäni
pancadäniya Tadoteoidi İñönänite
pancadäniya Paditeoidi İinäni, ante
adınque tömēnāni nāni nē Apænte
Äincabo İnäniite aa pedınque,

—Botö mēmōidi eñēedāni. Botö
Paditeo wēmo nē eñagaımo inte
botö mämpo Paditeo nānō ingaı baı
botö adobaı Paditeobo İnömo İmopa.
Mänımodö İnömo inte botö, Mönö ñāni
ömæmonte watapæ quēwengæimpa,
ante pönēmopa. İnıneque mänıne botö
pönēnō beyænque botö İmote apænte
änınque mınıtö pancæ cæmıni awædö,
angantapa.

⁷ Pabodo mänömainö ante apæneçä
eñente wædıneque Paditeoidi tönö
Tadoteoidi dodāni nāni pönengainö
ante wæætedö wææte änewēnıneque
Paditeoidi nänēnē Tadoteoidi nänēnē
nāni cabo nāni cabo badānitapa.

⁸ İımaı İmpa. Tadoteoidi guıquēnē,
Mēwoga waomö ēwocamö inte mönö
ñāni ömæmongæimpa, ante, Babæ
ancædö, ante Baa änıneque, Önöwocaidi
tönö anquedoidi Wængonguï weca
owodänıpa, ante adobaı edæ Baa
änāni İñönänımpa. Paditeoidi
guıquēnē mēnea ante pönēnıneque

Ao änäni İñönänımpa. ⁹ İnıneque
wadö wadö tedete ogæ tedeyönänite
Paditeoidi tömēnāni nē odömönāni
pancadäniya ængæ gantıdıneque,

—İngä İñömö mönitö ayömöni
wænæ wænæ cædämaı ingampa töö.
Wææte edæ anquedo incæ wacä
önöwoca incæ Wængonguï weca
owocä İnongä inte tömengä ingante
apæneçä İmaıngampa änewēmıni.

¹⁰ Ante nanguı ogæ tedeyönāni
tömānāni godömenque Yæ yæ änäni
ate wædıneque tontadoidi awēnē
cömantante İñömö, Pabodo ingante
æmæmæ İnö töö godö æmæmæ İnö

töö godö cædıneque æi guıñænāni
wæmaıngampa. Ante pönente
guıñente wædıneque tontadoidi İnäniite
angä wæænāni ate, Pabodo ingante
bæi ongonte ö ænıneque wææ cæte
İñömö ænte mäi tee möneedāni, angä
eñente tee mönedänıtapa.

¹¹ İımö ate woyowotæ mönö
Awēnē İñömö Pabodo weca ponte
apæneçantapa. “Pabodo, Guıñente
wædämaı incæbiimpa. Bitö doyedē
Eedotadēe İñömö botö İmotedö
ante apænedınque, Nāwä Awēnē
İnongä ingampa, ante apænebitawo.
Ñöwo İñömö do bitö apænedö baı
Odömä İñömö godınque adobaı
apæneçæbiimpa,” angantapa.

*Pabodo ingante wænongæımpa,
ante cædänıpa*

¹² Ñäö bayonte Oodeoidi pan-
cadäniya guıquēnē godongämæ
pönēnıneque İımaınö ante Ao änäniıtapa.
Cænāmaı bedämaı İnımo inte mönö
Pabodo ingante wænongæımpa,
ante cædıneque, Pabodo mıı quēwēñongante
mönö cabo incæ æcänö cæna æcänö
beda mäningä nänö wænguıneque
cæcampa. ¹³ Onguıñænāni nē

änāni İñömö coadenta ganca İnäni
ayæ godömenque nanguı İnäni
godongämæ pönēnıneque mänömaı
änewēnıneque cædāni İnäniıtapa.

¹⁴ İināni İñömö, Wængonguï qui,
ante nē godönāni ñænænāni tönö
nē aadāni nāni Picæncabo weca
godınque İımaı ante apænedänıtapa.

—Mönıtö godongämæ Ao änıneque,
Pabodo ingante wænongæımpa.
Edæ mıı quēwēñongante æcänö
cæna æcänö beda nänö wænguıneque,
ante ämönıpa cæmıni. ¹⁵ Mınıtö

tönö wadāni mıni Apænte Äincabo
İnömıni inte mınıtö İñömö, Pabodo
æbänö cæcäı, ante ædæmö eñencæte
ante wæte baı apænedınque ton-
tado awēnē cömantante ingante
babæ ante ämıni eñēnıneque tömengä
wææte Pabodo ingante mınıtö
weca ænte ponçæ cæcæcäımpa,
ämönıpa. Mänömaı babæ ämıni
eñente cædıneque cömantante wææte
Pabodo ingante mäwængä tæcæ

wææñongante mōnitō guiquēnē taadō wææ wānōninque bæi ongonte edæ wænōmōni wæncæcāimpa āmōnipa.

16 Āñōnāni Pabodo nānōwāa iñōmō edæ do eñengantapa. Eñēninque tōmengā tontadoidi nāni wææ cæte iñōmō do go guidinque Pabodo ingante apæneca. 17 Eñēninque Pabodo wæætē tontadoidi awēnē capitāo ingante apænedinque,

–Īngā edēningā ingante mīnitō awēnē cōmantante weca ænte man-guibi guicæ. Tōmengā cōmantante ingante adodeque apænecaēcāimpa.

18 Angā Ao āninque capitāo wæætē māningā edēningā ingante ænte guidinque cōmantante ingante apænecaēntapa.

–Pabodo mōnō nē tee mōnedongā iñōmō botō ĩmote aa pedinque iīmaī angantapa. Īngā edēningā ingante awēnē cōmantante weca ænte māobi guidinque tōmengā awēnē ingante adodeque apænecaēcāimpa, angantapa.

19 Ante apæneca eñēninque cōmantante iñōmō edēningā ingante tōō æmænte nānēnē māocā goyongante,

–Botō ĩmote æbānō apænecaēte ante pōmii.

20 Āñongante,

–Awēnē eñēmi. Oodeoidi godongāmæ pōnēninque iīmaī babæ cæcæte ante cædānipa. Tōmēnāni, Pabodo æbānō cæcāi, ante ædæmō eñencæte ante bai apænedinque bitō ĩmite babæ ante apænecaē cædānipa. Bitō iīmō ate Pabodo ingante tōmēnāni nāni nē Apænte Āincabo weca ænte poncæbiimpa, ante cædinque babæ cæcæte ante cædānipa. 21 Tōmēnāni iñōmō, Pabodo mīingā quēwēñongante æcānō cæna æcānō beda nānō wænguinque, ante nē ānōnāni inte edæ, Wæñongæimpa, āninque cædānipa. Adodāni nāni cabo incæ coadenta ganca onguīñænāni wænoncæte ante taadō do wææ wānōninque edæ, Wænōmō wæncæcāimpa, aatabopa. 28 Ayæ oodeoidi, Pabodo ante edæ a ongōnānipa cæbii.

Tōmēnāni, Bitō æbānō Ao anguīmi, ante eñencæte ante ponte ānewēñōnāni bitō iñōmō wæætē tōmēnāni nāni ānō bai cædāmaī incæbiimpa āmopa.

22 Ante edēningā apæneca eñēninque cōmantante iñōmō, Bitō, Awēnē ingante ante mānōmaī apænetabopa, ante wacā ingante apænedāmaī pæ wēenecæbiimpa. Nōwo edæ goe, angantapa.

Pedique weca Pabodo ingante ænte māodāni gocampa

23 Edēningā ingante mānōmaī angā gocā ate cōmantante wæætē awēnēna capitāona mēnaa ĩnate aa pecā pōñōnate tōmēna ĩnate iīmaī angantapa. Mīnatō nōwo tontadoidi ōnōwa nē godāni dotiento ganca ĩnāni tōnō cabayo mongænte nē godāni tetenta ganca ĩnāni ayæ tapa nē næænāni dotiento ganca ĩnāni tōnō mānimpodāni ĩnānite iīmaī ancæmīnaimpa. Mīnitō nōwoōnæ eyepæ cædinque wantæ wantæ guīñongā wadæ godinque Tetadea ganca goedāni, ante da godōmīna tao gocædānimpa. 24 Ayæ Pabodo beyæ cabayoidi āmi ænte gocædānimpa. Tōmengā ingante wææ aadinque pancabaa awēnē gobedōnadodo Pedique weca āmīna ænte māodāni cabayo mongænte adimongā gocæcāimpa. 25 Āninque awēnē cōmantante iñōmō cadota ante iīmaī ante yewæmongantapa.

26 Pedique eñēmi.

Bitō acæbiimpa, ante botō Co-daodio Ditia ĩnōmo inte nōwo yewæmōmopa. Bitō nē gobedōnadodo awēnē ĩnōmi inte waēmō pōni ĩmipa, āmopa. Waa quēwencæbiimpa, āmopa.

27 Īngā ingante oodeoidi bæi ongonte wænoncæ cæyōnānite botō wæætē, Īñæmpa ĩngā iñōmō odōmāno onguīñægā ingampa, ante do eñente wædimo inte tontadoidi tōnō godinque tōmengā ingante gā pe æmpote ō ænte wææ wēnæ wēnæ cæcāi, ante quīnante

pīinte ānānii. Ante ēñencæte ante cædinque botö tōmengä ingante tōmēnāni nāni nē Apænte Äincabo weca ænte gotabopa. ²⁹ Ænte gote ēñēñōmo tōmēnāni dodānique nāni angainonque ante, Pabodo ēñēnāmaī cæcampa, ante pīinte ānāni wætabopa. Īninqe botö ayōmote tōmēnāni, Pabodo nānō wænguinque nānō tee mōnequinque wēnæ wēnæ cæcampa, ante pīininqe ōnonquedö ante cædānipa, ante awædö. ³⁰ Nōwo ĩñōmō, ĩngä onguĩñægä ingante wænoncæte ante oodeoidi awēmō cædānipa, ante tededāni ēñēñimo inte botö tōmengä ingante bitö weca do da godōmo gocampa. Tōmengä ingante nē pīinte ānināni ĩnānite bitö weca adobaī da godōmo godānipa. Māninqe ante yewæmōmopa.

Ante cadota ante yewæmōninqe, Awēnē gobedōnadodo Pedique acæcāimpa, ante tontado awēnē cōmantante da godongä ænte godānitapa.

³¹ Īninqe cōmantante nānō āninō ēñente cædinque tontadoidi woyowotæ tao godinque Pabodo ingante Antipati ganca adīmongä māodāni gocantapa. ³² Īimō ate, Cabayo mongænte nē godāni tōnō Pabodo adīmongä gocæcāimpa, āninqe tōmēnāni nempo emō cæte godinque ōnōwa nē godānique tōmēnāni nāni cæte quēwencōnē ocæ emænte godānitapa. ³³ Cabayo mongænte nē godāni wæætē Pabodo ingante godōmenque ænte godinque Tetadea ĩñōmō pōninqe awēnē gobedōnadodo ingante cadota pædæ godōninqe Pabodo ingante awēnē nempo pædæ godōnāni ængantapa. ³⁴ Awēnē gobedōnadodo ĩñōmō cadota ænte adinque, Bitö æbædö ēñagabiimpa. Āñongä Pabodo, Tidi tiabæ ēñagaboimpa. ³⁵ Ante apænecä ēñēninqe gobedōnadodo wæætē,

—Bitö ĩmite nē pīinte ānināni pōnāni ate māñīñedē ate botö, Bitö æbānō apænequimi, ante ēñencæboimpa.

Āninqe wææ wānōnāni ĩnānite apænedinque, Minitö Awēnē Edode wodi nānō apænte angaincōnē Pabodo ingante ænte gote wææ wānōedāni, ante gobedōnadodo angä ænte godānitapa.

24

Pedique weca ongōninqe Pabodo nāmā wææ apænecä

¹ Ōnempo æmæmpoque ĩionæ go ate, Wængonguī quī, ante nē godongä ñænægä pōni ĩongä Ānāniya ĩñōmō Eedotadēē quēwēninqe wææ Tetadea gocantapa. Ayæ wacä tōmengä emōwo Tedetodo tōmēnāni nāni wææ angainō ante ædæmō adingä inte wadāni beyæ ante nē wææ apænecä ĩongä inte nē abogado nāni ānongä ĩongäimpa. Tōmengä tōnō oodeoidi nē aadāni nāni Picæncabo pancadāniya adobaī Ānāniya tōnō godongāmæ godānitapa. Godinque pancabaa awēnē gobedōnadodo weca ponte apænedinque, Pabodo nē wēnæ wēnæ cædongä ingampa tōō, ānānitapa. ² Pabodo ingante añete māmōnāni pongä ate nē abogado Tedetodo ĩñōmō gobedōnadodo Pedique weca ongōninqe apænecantapa.

—Awēnē gobedōnadodo ēñēmi. Bitö nempo quēwēninqe mōnitö wantæpiyæ wæætēdö wæætē cædāmaī inte godongāmæ piyænē cæte waa quēwēmōnipa. Ayæ bitö nē aabi ĩnōmi inte, Æbānō cæcæimpa, ante do ēñēninqe mōnitö omæ ĩñōmō waa cæbi ate mōnitö godōmenque waa pōni quēwēmōnipa.

³ Awēnē Pedique, bitö waemō pōni ĩnōmi inte ĩmæca tōmāo waa cæbi æninqe mōnitö bitö ĩmite cōwē waa ate pōnēninqe waa apænemōnipa.

⁴ Incæte, Botö wantæpiyæ apænebo baī bitö wæcædōmiimpa, ante pōnente wædinque botö, Ao āmi ate wantæ ĩñō apænebo pōnō ēñēe, ante abogado Tedetodo angantapa.

⁵ Ayæ, “Mōnitö ayōmōni ĩñōmō ongongä ĩñōmō nē wēnæ wēnæ cædongä inte tōmāo godinque wapiticæ

apæneca eñëninque oodeoidi ænguï badinque Yæ yæ änäni wæmönipa. Edæ Näatadënöidi wapiticæ näni cæcabo iñönänite iingä iñömö adocä inongä inte nê angä ingampa töö. ⁶ Ayæ Wængonguï oncö ñænæncö incæ önonconque bai baquinque tömengä wënæ wënæ cæcä adinque mönitö tömengä ingante bæi ongontamönipa. Ayæ mönitö mæmæidi näni wææ angainö ante Pabodo æbänö eñente cæcäi, ante mönitö apænte ancæte ante cætamönipa. ⁷ Mänömaï ante tæcæ cæyömöni tömengä mönitö nempo ongöñongante cömantante Ditia iñömö mämö gä pe æmpote ö ængantapa. ⁸ Ayæ mönitö adocä Pabodo ingantedö ante nê pïinte ämöni iñömönite adocä cömantante Ditia angä eñëninque bitö weca ponte ongömöni ae. Bitö Pabodo ingante ämi eñëninque tömengä, Æbänö cæboï, ante nämä wææ apæneccæimpa. Tömengä mänömaï wææ apæneca eñëninque bitö, Mönitö æbänö näwangä ämöni, ante do eñencæbiimpa.”

⁹ Ante Tedetodo mänömainö ante apæneyongante oodeoidi godongämæ apænedinque, Tedetodo näwangä angampa. Pabodo wënæ wënæ cæcä ingampa töö, ante adoyömö ante apænedänitapa. ¹⁰ Gobedönadodo Pedique guiquënë Pabodo gämænö opo cæpoyongante Pabodo wæætë iïmaï apæneccantapa.

—Awënë Pedique eñëmi. Tæiyæ wadepo iñonte bitö iïmæca nê apænte angäimi inte möni oodeo-cabo æbänö cæmöni imönii, ante do eñëmipa, ante adinque botö, Bitö weca ponte nämä beyæ wææ apæneccæboimpa, ante tobopa. ¹¹ Bitö iñömö eñencæte ante cæbi iñinque iïmainö ante do eñënguïmi iïmämipa. Botö önonpo tipæmpoga go mæönaa mänimpoönæque iñonte Wængonguï weca ædæ wææninque tömengä ingante waa apæneccæte ante Eedotadëe æitabopa. ¹² Mäniñömö æi pöninque botö tömënäni ayönäni quinö wënæ wënæ cæboï ae.

Botö Wængonguï oncönë ñænæncö yabæcönë go guibo incæ, oodeoidi odömöincönë go guibo incæ taadö gobo incæ wädäni tönö guëadö guëa pïinte ämo dicæ adäniyaa. Botö ædömë godinque Yæ yæ ämo dicæ eñënäniyaa. ¹³ Iñinque tömënäni näni, Pabodo wënæ wënæ cæcampa, ante näni pïinte änewönö ante edæ, Näwangä impa, ante quinö impa odömöingünäni. Edæ dæ ampa, ante Pabodo nämä wææ apæneccantapa.

¹⁴ “Incæte mönitö, Quëwenguïnö Taadö impa, ante möni pönönö ante oodeoidi wæætë, Wapiticæ goquinö impa, ante pïinäni. Iñinque, Pabodo mänönö ante pönengampa, ante iñäni nö ante apænedänipa. Näwangä impa, ante bitö imite ämopa. Botö mänönö ante pönëninque mönitö mæmæidi Wængonguï ingante waa ate cædinque quëwëmopa. Ayæ Möitee wodi nänö wææ angainö ante botö Ao äninque Wængonguï beyæ nê apænedäni näni yewæmongainö ante adobaï Ao äninque quëwëmopa. ¹⁵ Wængonguï angä ate mönö wao-cabo edæ nö cæmö incæ wiwa cæmö incæ tömämö wænte ate ñäni ömæmöninque mönö quëwengæimpa, ante iñäni pönänäni. Botö tömënäni näni pönönö bai adobaï ante pönente tobopa. ¹⁶ Mänömaï beyæ botö, Wængonguï ayongä incæ waodäni ayönäni incæ botö nämä apænte botö pönönö tæiyæ waëmö entawencæboimpa, ante cöwë nanguï cæbopa.”

¹⁷ Äninque Pabodo godömenque apæneccantapa. “Botö wayömö gote tæiyæ wadepo quëwente ate tömëmö ömæ adodö pöninque, Ömæpodäni wæwënäni quï, ante ænte pöninque botö guidänäni oodeoidi inänite wæætë pædæ godömo ænänitapa. Ayæ, Wængonguï quï, ante baö pædæ godontabopa. ¹⁸ Mänömaï cæyömo ayönäni botö iñömö tæiyæ waëmö bacæte ante Möitee wodi nänö angainö bai do eyepæ cædimö inte Wængonguï oncö ñænæncö yabæcönë

pö guidine, botö, Wængongui qui, ante godömo adänitapa. Wii nangui inäni tönö cædinqe botö Yæ yæ änämaï inte cæbo adänitapa. ¹⁹ Incæte botö imotedö ante näni pïinte äninö näwangä i bai wadäni guiquenë oodeoidi incæ Atiabæ quëwente pönäni iñömö, tömënäni wæætë bitö weca do ponte angüenänäni inänipa. ²⁰ Botö oodeoidi näni në Apænte Äincabo weca ongöñömote, Pabodo æbänö nö cædämaï ingää, ante apænte äñönänite bitö weca ñöwo ongönäni guiquenë mäninö ante në eñënäni inänipa. Ininqe wadäni dæ änäni adinqe iinäni wæætë edæ tömënäni näni eñëninö ante në angüenänäni inänipa. ²¹ Botö awënëidi weca ongöninqe yedæ äninque, 'Mönö wænte ate ñäni ömæmongæimpa, ante botö apænedö beyænque mïnitö ñöwoönæ botö imote apænte äninque pïimïnipa,' ante apænetabopa. Ininqe iñömö ongönäni wabänö adobaï adode botö äninö beyænque pïinte änänipa," ante Pabodo nämä wææ ante iinqe apænecantapa.

²² Pabodo mäninganca apænecä eñëninque Pedique, Taadö ante në quëwënäni æbänö ante pönënanii, ante do eñëningä inte, Idæwaa, äninque tömënäni inänite,

—Cömantante Ditia pongä ate wæætedö wæætë mïni äninö ante apænte ancæboimpa.

²³ Äninque tontadoidi capitäo ingante apænedinqe, Pabodo ingante tee mönedämaï inte wææ wänöedäni. Ayæ tömengä quiëmë ante ænguënengä ingä adinqe tömengä æmigoidi ponte pædæ pönönäni ængä iinqe mïnitö ee amïni æncæcäimpa, angantapa.

²⁴ Tæönæ go ate Awënë Pedique tömengä nänöogængä Dodotida tönö nana gæncaya pönatapa. Tömengä nänöogængä oodea onquiyængä inongäimpa. Pedique iñömö Pabodo ingante äñete mämönäni pöninqe Pabodo wæætë, Codito Itota ingante mönö wede pönente quëwengæimpa, ante apænecä eñëe cönatapa. ²⁵ Ayæ

Pabodo godömenque apænedinqe, Mönö nö cæte quëwengæimpa, äninque, Mönö nämä wææ aate waa cæte quëwengæimpa, angantapa. Ayæ, Wængongui Awënë nänö apænte angüönæ oo baquinö angüenë, ante apænecä eñëninque Pedique wæætë guñente wædinqe, Idæwaa, äninque, —Ñöwo gobæwe, angantapa. Waönæ ate botö eyepæ imo inte ämo bitö imite äñete mämönäni ponte apænebi eñëmaïmopa, angantapa.

²⁶ Mänömaï äninque tömengä, Pabodo wabänö, Ñimpo cæbi gocæboimpa, ante cædinqe godonte æinta pönömaingampa, ante pönengantapa. Ininqe tömengä wantæ wantæ iñö Pabodo ingante angä pöñongä guëa tededatapa. ²⁷ Mänömaï ancaa cæyongä wadepo mënepoga ba ate Pedique gobedönadodo awënë iinqe bayongante wacä Pontio Peto näni änogä pöninqe wæætë awënë gobedönadodo bacantapa. Ininqe Pedique iinqe awënë bayedë, Botö iïmaï cæbo ate oodeoidi botö imote waa acædänimpa, ante pönente cædinqe Pabodo ingante tee möneincönë oncodo tadönämaï ee adinqe wadæ gogacäimpa.

25

Gobedönadodo Peto weca Pabodo ongonte apænecampa

¹ Peto iñömö pancabaa awënë gobedönadodo tæcæ badingä inte mänimæ pöninqe Tetadea näni quëwëñömö mëönaa go adoönæque quëwëninque Eedotadëe go æicantapa. ² Eedotadëe iñömö ponte ongöñongante, Wængongui qui, ante në godönäni ñænænäni tönö oodeoidi awënëidi tömengä weca pöninqe, Pabodo iïmaï wënæ wënæ cæcantapa töö, ante apænedäni eñengantapa. ³ Tömënäni doyedë adoyömö pönëninque, Gobedönadodo Peto ingante ämö ate tömengä wæætë Pabodo ingante Eedotadëe iñömö da pönongä pöñongante mönö taadö wææ wänonte ö ænte wænongæimpa. Ante në pönëwënäni inte tömënäni ñöwo

Peto weca pöningue iimaï änänitapa. Gobedönadodo Peto eñëmi, Bitö Ao ante möni ämaï pönö cæquimi. Bitö Pabodo ingante ämi Eedotadëe iñömö ænte mämönäni pongäe, ante ancaa änäni. ⁴ Eñëningue Peto wæætë tömënäni inänite edæ, Pabodo iñæmpa Tetadea iñömö tee mönete ongongantawo. Botö tömëmo edæ oo adoyömö wæi gocæboimpa. ⁵ Äninqe,

—Mänömaï beyæ minitö mini cabo iñöminite nê änäni pancadaniya inänite da godömini botö tönö godongämæ Tetadea wæi gocädänimpa. Pabodo wënæ wënæ cæcä ingä ininqe tömënäni mänïñömö pöningue ancädänimpa.

⁶ Äninqe tömënäni tönö wodo önompo tipæmpoga iionæ godömenque quëwëningue Peto wadæ godinqe Tetadea wæi gocantapa. Pöningue tömengä iimö ate awënëidi apæncæte ante näni containpaa tæ contadinqe angä ate Pabodo ingante ænte mämönäni pongä. ⁷ Ate oodeoidi Eedotadëe quëwente ñowo wææ pöninäni inte pö godongämæ gongæningue, Pabodo mänömainö wiwa cæcampa, wadö wiwa cæcampa, iimainö wiwa cæcampa, ante ancaa änewënanitapa. Incæte Petoidi inänite, Näwangä ante apænemönipa, ante odömoncæte ante tömënäni quinö impa ante odömönäni aquinänii. ⁸ Pabodo iñömö nämä wææ apænedinque,

—Oodeoidi näni wææ angainö ante Baa änämaï inömo inte botö eñente cæte quëwëniimo imopa. Wængonguï oncö ñænæncö waa adinqe botö mänincönë yabæcönë guiite wënæ wënæ cædämaï intabopa. Odömänoidi tæiyæ awënë Tetædo nänö änö ante eñente cædinque wadö ante cöwë cædämaï intabopa.

⁹ Äñongante Peto, Oodeoidi tömënäni näni äninö bai cæbo ate botö imote waa acädänimpa, ante babæ cædinque Pabodo ingante,

—Botö Eedotadëe go æibo ate adinqe bitö botö weca pönömi iinäni piinte näni äninö ante

apænte ancæboimpa. Bitö Ao ante, Gocæboimpa, ämitawo.

¹⁰ Äñongante Pabodo wæætë,

—Botö iñæmpa odömäno tæiyæ awënë Tetædo nänö Apænte ante Containpaa gäänë ñowo incæ ongömo ae. Minitö iñömö Tetædo beyæ ante nê apænte ämini inömini inte edæ botö imote nê apænte anguënëmini iminitapa töö. Bitö tömëmi iñömö edæ, Pabodo oodeoidi inänite wënæ wënæ cædämaï iningä ingampa, ante edæ do eñëmipa. ¹¹ Ininqe wënæ wënæ cædinque botö tente wænguënëmo imo bai botö edæ Baa änämaï inte edæ dobæ wæncædömoimpa. Wæætë edæ, Wënæ wënæ cæbipa, ante iinäni oodeoidi näni änewënö guiquënë önonquedö ante i ininqe waocä æcämenque incæ ædö cæte tömënäni nempo pædæ godonguëngä ingää. Ininqe botö, Odömäno tæiyæ awënë Tetædo ingante ämo botö imote pönö apænte ancæcäimpa, angantapa.

¹² Pabodo mänömaï angä eñente wædinque Peto tömengä tönö godongämæ nê apænte änäni tönö, Æbänö cæquimöö, ante adoyömö pönënäni ate tömengä Pabodo ingante,

—Ao ämönipa. Tæiyæ awënë Tetædo incæ apænte ancæcäimpa, ante do änimi inte bitö Tetædo weca edæ gocæbiimpa, angacäimpa.

Awënë odeye Agodipa ingante Peto apænecampa

¹³ Tæönæ go ate wacä awënë odeye Agodipa tönö onquiyängä Bedënite iñömö gobedönadodo awënë Peto ingante, Bitö iimæca waa pömi amönapa, ante apænecæte ante Tetadea iñömö pöningue Peto weca eñacæ pönatapa.

¹⁴ Pöningue tæönæ quëwëna ate awënë Peto guiquënë awënë odeye Agodipa ingante, Pabodo ingante iimaï cætamönipa, ante apænedinque,

—Gobedönadodo awënë Pedique wodi nänö nê tee mönete ëmö cæte godingä iñömö onguinängä adocanque ayæ a ongongampa.

¹⁵ Ininqe botö Eedotadëe æite quëwëñömote, Wængonguï qui, ante

nē godönāni ñænænāni tönö oodeoidi inānite nē aadāni näni Picæncabo guiquenē botö imote āninqe, Māningā iñömö wīwa cæcā ingā adinqe bitö tömengā ingante apænte āninqe āmi wænönāni wæncæcāimpa, änānitapa. ¹⁶ Eñēninqe tömēnāni inānite botö wæætē iīmaī antabopa. Waocā nāmā beyæ apænedāmaī iñongante mōnitö mōni odömānocabo iñömö nē pānāni inānite pædæ godönāmaī imōnipa. Wæætē wadāni, ĩngā iīmaī cæte wēnæ wēnæ cæcampa, ante pīinte änāni eñente wædinque mōnitö māningā tönö nē pīināni inānite āmōni godongāmæ pōnānipa. Ponte awincadö awinca adinqe wæætedö wæætē añönānite mōnitö iñömö, Tömēnāni nāni pīinte ānīnō ante tömengā æbānō nāmā wææ apæneccā, ante ædæmō eñente ate nōingā ante apænte āmōnipa. Mānōmainö ante botö tömēnāni inānite apænetabopa, ante awēnē Peto apænecantapa.

¹⁷ Ayæ, “Mānōmaī ante apænebo eñēninqe nē pīinte änāni botö tönö wææ Tetadea iñömö godongāmæ pōnānitapa. ĩninqe botö a ongönāmaī do mōni apænte āimpaa iīmō ate go tæ contadinque, Māningā ingante ænte pōedāni, āmo ænte pōnānitapa. ¹⁸ Botö iñömö, Pabodo wadāni inānite wīwa cæcampa, ante pīinguīnāni ĩmainānipa, ante pōnentabopa. Incæte nē pīinte änāni ængæ gantite apænedinque edæ botö ante pōnēnīnō baī wīi pīinānitapa. ¹⁹ Wæætē edæ wadö ante pīināni eñente wætabopa. Wængonguī ingante æbānō cæte waa aquīi, ante tömēnāni Pabodo tönö wæætedö wæætē pīinānitapa. Ayæ tömēnāni mæmæidi nāni wææ angainö ante tömēnāni, Pabodo eñēnāmaī ingampa tōö, ante pīinānitapa. Ayæ adocanque Itota wodi do wængaingā incæte Pabodo, Mīingā quēwengampa, ante tede-campa tōö, ante pīinānitapa. ²⁰ ĩninqe botö, Quiēmē baī ānewēnānīi, Æbānō cæte nō eñente apænte anguīmoo, ante wædinque botö Pabodo ingante iīmaī antabopa. Tömēnāni nāni pīinte ānīnō

ante bitö Ao āninqe Eedotadēe gote ongōñomite botö apænte ancæboimpa, antabopa.”

²¹ “Añömö tömengā wæætē, Botö imote ee wææ wānōñōmīni, Botö æbānō cætawoo, ante tæiyæ awēnē Empedadodo mōnō ānongā apænte ancæcāimpa, āmopa. Angā eñēninqe botö, Æyedēmē eyepæ ĩ ate Pabodo ingante tæiyæ awēnē Tetædo weca da godōmo gocæcāimpa, ante pōnēninqe, Tömengā ingante mānimpoga wææ wānōedāni, antabopa,” ante Peto apænecantapa.

²² Mānōmaī apæneccā eñēninqe awēnē Agodipa wæætē,

—ĩngā onguīñængā æbānō apæneccā, ante tömēmo eñēinente wætabopa.

Añongante Peto,

—ĩmō ate tömengā apæneccā eñencæbiimpa, angantapa.

²³ ĩmō ate awēnē odeye Agodipa tönö Bedānite iñömö waēmō pōnī weocoo wēñate mongæninque tömēnāni nāni eñēincōnē ñænæncōnē pōninqe, Mōnatö awēnēmōna iñömōnate waa aedāni, ante baī cædinque wæñee da da pō guīdatapa. Ayæ tontadoidi tæiyæ awēnēidi tönö māñiñömö quēwēnāni awēnēidi ñænænāni tönö tömēna mīñæ dao dao pōnānitapa. Ayæ Peto angā eñēninqe nē wææ wānönāni wæætē Pabodo ingante ænte māmōnāni pō guīte ongōñongante, ²⁴ Peto iñömö,

—Awēnē odeye Agodipa eñēmi, angantapa. ĩñömö ongōmīni tömāmīni edæ eñēedāni. ĩngā ingante amīnīi. Tömengā ingante āninqe Eedotadēe quēwēnāni incæ iñömö quēwēnāni incæ oodeoidi tömānāni botö imote yedæ āninqe, ĩngā nē wēnæ wēnæ cæcā inte godōmenque wīi quēwenguēnengā ingampa cæbi, āninqe, Bitö apænte ancæbiimpa, ante wædānipa. ²⁵ ĩninqe, Adocā Pabodo nānō wænguinque wēnæ wēnæ cæcantawoo, ante botö cōwā ayōmo edæ dæ antapa. Ante wæyōmo tömengā guiquenē, Tæiyæ awēnē empedadodo incæ botö imote apænte ancæcāimpa, angā eñente pōnēninqe

botö, Ao, tæiyæ awënë Tetædo weca da godömo gocæbiimpa, antabopa. ²⁶ Incæte, Ìngä nänö cædinö ante tæiyæ awënë aquinö ante botö ædö cæte yewæmonguimoo, ante wæbopa. Mänömaï beyæ botö, Minitö tömämïni apænte ämïni ëñencæboimpa, antabopa. Ayæ, odeye Agodipa bitö tömëmi apænte ämi nö ëñente ate yewæmoncæboimpa, ante cædinque botö ñowo Pabodo ingante ænte mämömo ponte a ongongä aedäni. ²⁷ Ìñæmpa botö, Mönö nē tee mönete ongongä wënæ wënæ nänö cædinö ante yewæmönämaï inte mönö ædö cæte da godonguï, ante awædö, ante Peto apænegacäimpa.

26

Agodipa weca ongonte Pabodo nāmā wææ apænegacampa

¹ Awënë odeye Agodipa wæætë Pabodo ingante,

—Bitö ñowo nāmā beyænque wææ apænegacæbiimpa, ämopa.

Angä ëñëninge Pabodo compo compo cædinque nāmā beyænque ante wææ apænegacæ cæcantapa. ² “Awënë odeye Agodipa, ëñëmi. Oodeoidi nāni pïinte äninö tömänö ante nāmā beyænque wææ apænedingue botö bitö awënë ïmi weca ongonte apænebopa, ante adingue botö waa edæ tobopa. ³ Möni oodeocabo dodäni nāni cægai bai möni cæinö ante bitö ñömo edæ do ëñëmipa, ante tobopa. Ayæ adobaï, Oodeoidi ñowodäni æbänö ante wæætedö wæætë ante tededänii, ante do ëñëmi ñömi inte bitö botö wææ apænedö ante edonque ëñenguïmi ïmipa, ante pönëninge botö godömenque tobopa. Ìninge bitö Ao ante ee ongönninge ëñencæbiimpa, ämopa.”

Ïmaï quëwengaboimpa, ante Pabodo apænegacampa

⁴ Ante apænedingue, “Botö ñowo ganca æbänö quëwëmoï, ante oodeoidi tömänäni do ëñënanipa. Edæ do wëñæmoyedë botö ëñagaimæ quëwente pædinque botö edënimoyedë

ñowo ganca æbänö Eedotadëë ñömo quëwengaboï, ante do ëñënanipa.

⁵ Möni oodeocabo incæ pancadäniya Wængonguï ingante wædænque ëñente quëwëñönäni möni Päditeocaboque wæætë, Dodäni nāni wææ angainö ante mönö ëñente cæcæimpa, ante ëñente quëwëmönipa. Botö ñömo Päditeobo ñömo inte mäninö ante cöwë Ao ante godömenque nanguï cæte quëwentabopa. Ìninge oodeoidi do againäni ñönäni inte Ao ante bai, Nawangä Pabodo ëñente quëwengampa, ante apænegacædönänimpa. ⁶ Mönitö mæmæidi ñänite apænedingue Wængonguï, Minitö beyæ cöwë pönö waa cæcæboimpa, ante nänö angainö bai cæcä beyænque mönö watapæ bacæimpa, ante botö pönëmopa.”

“Ñowo ñömo mänine botö pönëno beyænque ñänäni, Pabodo ingante apænte ancæminimpa, ante ænte mämönäni pönninge botö minitö weca a ongömo aedäni. ⁷ Wængonguï, Minitö beyæ pönö waa cæcæboimpa, ante nänö angainö ante ñique bacæimpa, ante möni pönëno beyænque möni oodeo pægaincabo önompo tipæmpoga go mencaboga mänimpomöni ïmöni ñömo woyowotæ itædë, Wængonguï ingampa, ante tömengä beyæ cæte quëwëmönipa. Incæte awënë odeyebi, ëñëmi. Wængonguï, Cöwë cæcæboimpa, ante nänö angainö ante möni pönëno beyænque oodeoidi incæ botö ïmote, Wiwa cæbipa töö, ante pïinänipa. ⁸ Minitö ïminite ämo apænemïni ëñëmoedäni. Do wænänäni ñönänite Wængonguï, Botö pönö cæbo ate ñäni ömæmoncædänimpa, angacäimpa. Minitö ñæmpa, Wængonguï ædö cæte mænömaï cæquingää, ante pönente wædinque quïnante Baa änewëmïni,” ante Pabodo angacäimpa.

Pabodo, Coditoidi ñänite togænte pantabopa, angampa

⁹ Äninge Pabodo godömenque apænegacampa. “Botö wëenënedë

edæ oodeoidi näni pönewenö bai pönengaboimpa. Mäniñedē botö Itota wodi Näatadeta quewengaingä emöwo ante näni pönenö ante piinte cædinque nanguï wido cæquenemo imopa, ante pönewentabopa. ¹⁰ Ininque botö Eedotadēe iñömö quewenique mäniñonque ante cægaboimpa. Mäniñedē edæ, Wængongui qui, ante nē godönäni ñænænäni inänite antabopa. Ämo Ao ante tömēnāni nē änāni inte yewæmonte pædæ pönönāni æninque botö Wængongui Awenē quinäni nanguï inäni inänite bæi ongonte æninque nē tee mönebo ingaboimpa. Ayæ tömēnāni inänite wænoncæ cæyönāni botö cöwē godö Ao angaboimpa. ¹¹ Botö wayömö wayömö godinque oodeoidi odömöincönē wantæ wantæ iñö go guidinque, Wængongui Awenē quinäni tömengä ingante godö wænæ wænæ ante piincædänimpa, ante cædinque päedäni, ante nanguï ämo pangadänimpa. Ayæ tömēnāni inänite nanguï piininque godömenque ænguï badinque botö tömēnāni inänite pancæte ante wabæca näni quewēñömö wabæca näni quewēñömö incæ togænte gogaboimpa,” ante Pabodo wææ apænecantapa.

Wadö ante pönente babopa, ante Pabodo adodö angampa

(Näni Cægainö 9.1-19, 22.6-16)

¹² Ante apænedinque Pabodo godömenque, “Mänömaï wabæca go wabæca go cædömo inte Daämaco iñömö gocæte ante cætabopa. Cæyömö, Pabodo iïmaï cæcæcäimpa, ante Ao ämönipa, ante, Wængongui qui, ante nē godönäni ñænænäni nē änāni inönāni inte botö beyæ cadota ante yewæmöninque pædæ pönönāni ænte gotabopa. ¹³ Awenē odeyebi, eñēmi. Mänömaï gote idömæ goyömo tæcæ bæcä pönï bayonte nænque nänö näwä bai godömenque näwä öönæde inö botonga möni godongämæ gocaboga pö tömäo guinä gongæ. ¹⁴ Ate

wædinque tömämöni guidömēmæ go go wææñömöni adocanque möni ebe-deo tededö tedete öönæde apænecä botö adoboque eñentabopa. ‘Taodo. Taodo ämo. Botö imote quinänte togænte pämi. Iñæmpa wagada päintoca bai bitö nämä iñæ æwate cowate bai bitö caate wæquinque cæbipa,’ angacäimpa.”

¹⁵ “Angä eñente wædinque botö, ‘Awenē, æbidö inömi imii.’ Ante eñente wæyömote, ‘Botö Itota inömo inte bitö nē togænte pänimo mäniñmodö imopa cæbii. ¹⁶ Nöwo edæ ængæ gantidinque adiyæ næ gongæmi ämopa. Botö beyæ nē pönö cæbi ämo edæ bacæbiimpa. Ayæ, Botö imote æbänö abii, ante bitö adinö ante nē apænebi ämo bayömite botö iincayæ ate godömenque odömömo ate bitö aquinö ante bitö nē apænebi ämo bacæbiimpa. Mänömainö ante ämo bacæbiimpa, ante apænecæte ante botö bitö weca ponte a ongömopa. ¹⁷ Ayæ bitö guidēnāni oodeoidi incæ wadäni wabæca quewēnāni incæ bitö imite wænæ wænæ cæcæ cæyönāni ate botö bitö imite gä pe æmpote wææ gompobo beyænque bitö wæætē quewencæbiimpa. Tömēnāni weca botö bitö imite da godömo gocæbiimpa. ¹⁸ Tömēnāni botö imote wede pönēnāni ate botö wænæ wænæ näni cædinö ante godö ñimpo cæbo ate tömēnāni do botö tæiyæ wæmö badongaināni tönö adocabodäni bai badömo badinque quewencædänimpa, ante cæbopa. Mänömainö cæcæte ante botö, Bitö Taodobi iñömö tömēnāni awinca wi æmonte bai cædinque apænebi eñēninque tömēnāni wæætē edonque adinque ñäö inö gämænö poncædänimpa, ante cæbopa. Tatäna nempo quewēñönänite bitö wæætē gä pe æmpote bai cædinque odömönte apænebi eñēninque tömēnāni wæætē edæ ocæ emænte pöninque Wængongui nempo quewencædänimpa, ante bitö imite da godömo gocæbiimpa.’ Ante Awenē Itota botö imote angä eñente gotabopa,” ante Pabodo apænecantapa.

Pabodo, Öönædē apæneecä eñente cætabopa, angampa

19 Mänömaï apænedinque Pabodo godömenque, “Awënë odeyebi Agodipa, eñēmi. Botö wüimonte bai ayömo öönædē inö nē angä nänö angainö ante botö ædö cæte eñēnāmaï cæquimoo. Edæ do cætabopa. 20 Tāno Daāmaco iñömö quëwēnāni inānite apænedinque botö ayæ Eedotadē iñömö godinque māniñömö quëwēnāni inānite apænedinque Oodeabæ quëwēnāni inānite go apæneboque go wayömö oodeo ināmaï ināni inānite māo apænedinque iimainö ante apænebo eñēnānitapa. Minitö wēnæ wēnæ mini cædö ante, Ancaa wæwente awædö, ante ñimpo cædinque Wængongui gāmænö edæ pödäni. Ayæ pöninque minitö, Māninö wēnæ wēnæ botö cædinö edæ æmæwo ñimpo cæbopa, ante edonque acæimpa, ante cædinque waa cæte quëwēdäni, ante ämo eñēnānitapa.”

21 “Iinque botö mänömaï cæbo beyænque Wængongui oncö ñænæncö boyæ ongöñömote oodeoidi botö imote bæi ongöninque edæ wænoncæ cædānitapa. 22 Mänömaï wēnæ wēnæ cædāni incæte Wængongui ñowoönæ ganca botö tönö cöwē godongāmæ cæcampa. Iinque botö, Wængongui Awënë æbänö cæcää, ante guiñēnāmaï inte næ gongæninque awënëidi inānite önönānique inānite apænedinque apæneboï aedäni. Möitee wodi tönö wadāni Wængongui beyæ nē apænegaināni tönö, Æbänö baquii, ante apænegadānimpa, ante apænebopa. Mānīne tōmēnāni nāni apænegaineque adodö ante apænedinque botö godömenque apænedāmaï imo inte edæ iimainö ante apænebopa. 23 Möiteeidi iñömö, Mönö Codito cöwē caate wæquingä ingampa, ante apænegadānimpa. Ayæ, Wænte ate tōmengä tānocä nē ñāni ömæmōningä inongä inte, Acædānimpa, ante cædinque ñäö tica ënente bai tōmengä guidēnāni inānite wadāni inānite edæ odömoncæcäimpa,

ante yewæmongadānimpa. Botö iñömö, Möiteeidi nāni angainö do edæ iinque batimpa, ante apænedinque wadö ante apænedāmaï imopa,” ante Pabodo apænegacäimpa.

Agodipa, bitö Codito ingante pönenguēnēmi imipa, angä

24 Pabodo mänömaï nāmā beyænque tæcæ wææ apæneyongante awënë Peto do ogæ tededinque,

—Iñæmpa Pabodo ocai ömæcabi inte tedebe awædö. Nanguï wantæpiyæ dibodo adimi inte idiquibæ pönente babiimpa töö.

25 Ante wææ tedecä eñēninque Pabodo,

—Awënë Peto bitö waa pönī awënë gobedönadodo imi incæte botö wii bitö änö bai imopa. Botö wii idiquibæ pönēmo inte tōingä pönēninque nāwangä ante apænebopa. 26 Awënë odeye Agodipa guiquēnē tōmengä māninö botö apænedö ante tōmää eñengä iñongante tōmengä ingante edonque apænebo eñengampa. Edæ māninö botö äninö wii awēmö cætimpa, ante pönēninque botö, Awënë odeye incæ do adingä inte ædö cæte eñēnāmaï inguingää, ante awædö. 27 Awënë odeyebi Agodipa, ñowo bitö imite apænebo eñēe. Wængongui beyæ nāni apænegainö ante bitö pönemitawo. Do pönēmi imitapa, ante eñēmopa.

28 Äñongante Agodipa wæætē,

—Iñæmpa bitö botö imote wantæ iñö tededinque, Agodipa bitö Codito ingante do pönencæbiimpa, ante cæcæte ante cæbitawo.

29 Äñongä Pabodo wæætē,

—Wantæ iñö apænebo incæ wantæpiyæ apænebo incæ bitö botö bai pönēmi waa tobaïmopa. Edæ bitö tönö godongāmæ eñēe cönāni tönö minitö tōmāmini botö bai entawencæminimpa, ante botö Wængongui ingante apænebopa. Incæte, Botö bai baedäni, äninque botö, Yaëmengoncoo empocæminimpa, ante apænedāmaï intabopa.

³⁰ Ante Pabodo mänömaï apæneca ëñëninque awënë odeye Agodipa ængæ ganticantapa. Ayæ pancabaa awënë Peto, Bedänite, godongämæ ongönäni adobaï tömengä tönö ængæ gantidinqe, ³¹ mänincönë tao godinque iïmaï ante tededänitapa.

—İngä Pabodo wënæ wënæ cædämaï iïngante quïnante wææ wänonguïi. Quïnante apænte wænonguïi. Edæ wënæ wënæ nänö cædinö dæ ampa.

³² Ante tedeyönäni Peto ingante Agodipa apænecantapa.

—Tetædo incæ botö imote apænte ancæcäimpa, ante Pabodo wïi angä baï botö edæ tömengä ingante do ñimpo cæcædömoimpa, angacäimpa.

27

Pabodo ingante Odömä iñömö da godönäni gocampa

¹ Mänömainö ante wædinque mänimæ awënëidi, Pabodoidi inänite ñöwo Itadiabæ ämö wogaa gocædänimpa, ante godongämæ Ao änänitapa. Mäniñömö tontadoidi iñömö tæiyæ awënë empedadodo beyænque nani wææ wänoncabo inönäni inte Empedadodoidi nani änoncabo inönänimpa. Tömënäni capitäo Codio nempo Pabodo tönö wadäni nê tee mönete ongöninäni inänite pædæ godönäni ö æninque ænte gocantapa. Ayæ botö Odocabo nê yewæmömo tönö wadäni adobaï Pabodo tönö godongämæ gotamönipa. ² Gäwapæntibæ wedeca gote ayömöni wipo ñænæmpo Adadämitio wäi wocænte nani ænte pönimpo inte ñöwo Atiabæ godinque wayömö go ti wææ wayömö go ti wææ nani goquimpo adinque mönitö mänimpodë go guïite gäwapæntibæ wogaa gotamönipa. Ayæ wacä Aditadoco Mäatedöniabæ Tetadönica iñömö quëwëningä inte mönitö tönö pö äampodenque gocantapa. ³ İimö ate Tidöo nani quëwëñömö pö wäi wocæñömöni Pabodo ingante capitäo Codio waa cædinque pönö apænecantapa. Bitö æmigoidi weca

quïemë bitö ænguënënö ante gote ænte pöe, äninque ee acä tömæwæ gote ëñadinque ænte pongantapa. ⁴ Ayæ mänüi Tidöo iñömö ëñate wogaa goyömönite möni nê gocæ cædö woboyæ betamonca pæmæ ate wædinque mönitö wää tæiwænë Tipidebæ nani äniwænë wææ cæteïnö wogaa gotamönipa. ⁵ Wää tæiwænë go wodo tebæ gomönique go tæcæpæ pönö wogaa godinque Tiditiabæ wodo tebæ pömönique go Pampidiabæ wodo tebæ pömönique go Ditiabæ godinque Miida nani quëwëñömö pö wäi wocæntamönipa.

⁶ Mäniñömö wacä wipo ñænæmpo Adecantodia nani ænte pönimpo adinque capitäo Codio, Itadiabæ goquimpo impa, äninque mönitö imönite angä godongämæ guïite wogaa gotamönipa. ⁷ Tæönæ iñonte wæñee godinque mönitö, Æiquedö goquimönii, ante ancaa cæmönique go Gönido nani quëwëñömö go wodo tebæ gotamönipa. Ayæ woboyæ cöwë mönitö gocæ cædö inö nanguï pönö pö ate wæmönique go wää tæiwænë Tadamöne wodo tebæ godinque wawænë Cædeta nani änowænë yaatænque gotamönipa. ⁸ Mäniwænë wææ cæteïnö yæwedecaque ancaa cædinque wæñee godinque mönitö Datea wëmonca wodöiñömö nani Waa Wodöiñömö nani äniñömö pontamönipa. Mäniñömö pömöni ate wipodë nê cædäni iñömö, Wipo ñænæmpo wäi wocæñompo nämä godämaï ingæimpa, ante cædinque teëmenca gæguincamë inte nani ñä cæcadodince guitodönäni nänë ñongæ ate wipo godämaï wäi wocæntapa.

⁹ Mäniñömö wäi wocænte owod-inque mönitö, Quingæ pongamö incæ wæñee pömömpa, ante wædinque mönitö, Woboyæ nanguï pæmæ tedæ baquinque mönitö Wængonguï beyæ ante mönö cænämaï ëönæ do iinque batimpa, ante pönentamönipa. İinque mönitö, Nöwo mönö wænguinque wipodë godömenque gomömpa, ante wæyömöni wipo ñænæmpo nê ænte godäni inänite Pabodo nö pönëninque

wææ angantapa.

10 —İñänäni, botö ayömo mönō ēwente wæquinque godömenque gomompa. Mäincoo mīni ænte gocoo wido cæquinque wipo nä tobæ go ate mönō becadote wænguinque impa cæmīni.

11 Äñongä wipo ñænæmpo nē ēacä tönō wipo capitäo wadō ante apænedä ēñēninque tontado capitäo Codio iñömō Pabodo nänō äninō ante ēñēnämaï cæcantapa.

12 Wæætē edæ, İñömō ponte mönō wodöiñömō woboyæ pæmæ tedæ iñonte wīi owöinente wæmompä. Ante wædinque wodo tömänäni, Pēnite näni wēmonca wodöiñömō nænque tamönō imætæ inō ongöninque woboyæ ante wææ cæte impa cæmöö. Nöwo wadæ godinque Pēnique näni wēmonca wodöiñömō go ti wæænte quēwēninque woboyæ pæmæ tedæ iñque pæmænte go ate mönō gomonga gocæimpa, ante adoyömō äñänitapa.

Wini cai pompa

13 Mänömainö, Gocæimpa, äñönäni ñænæ wipo goquinque woboyæ dipæmæ inō betamonca wædænque pæmæ ate wædinque, Mönō äninō bai ñöwo mönō waa goquinque impa, ante todänitapa. Ayæ wipo ñænæmpo wäi wocæñö teēmenca näni guitodöninca ñöwo gæguincamenca quingæ iñæ æænö ñænæ wipodē cö cædäni ate mönitö wogaa go Cædeta näni äñöwænē yæwedecaque gotamönipa.

14 Mäninö tæcæ gocæ cæyömöni do woboyæ wīni cai Yodocodöno näni äñö wää tēiwænē ayaenēmää inō mämö pæmæ pöninque, 15 wipo ñænæmpo mämö ö ænimpa. Mönitö, Mönō wodöiñömō adodö gocæimpa, ante cædinque woboyæ pönö gämænö ædö cæte wiya wēnente goquīi. Ante wædinque mönitö ee amöni woboyæ betamonca inō quingæ mämö dadi wēnente da godö mäo gotamönipa. 16 Wää tēiwænē guiyawænē Caoda näni äñöwænē

dipæmæ inö yæwedeca woboyæ wææ cæteinö godinque mönitö guiyampo möni wëä wëä ænte pönimpo ante, Tobænämaï impacæimpa, ante pæ pagænte ancaa cædinque wëä pönonte pæ mantamönipa. 17 Ayæ nē cædäni guiyæmpo gæguincamenca wëä æænonte ñænæmpodē da wēñänitapa. Guiyæmpo da wēnente ate tömēñäni, Ñænæmpo awæmpacoo wīi bedē wænecæimpa, ante cædinque ñænæ wipo incæ gæguincamenca wīni wīni cæte goto wīñänitapa. Ayæ, Öñætämö Tidite näni äñontämö impa, ante adinque tömēñäni, Æ quingæ gomö bai mönō wænguinque Tidite emönaiboga go näñe ñongæncædönimpa. Ante pönente guiñente wædinque wæñee gocæte ante cædinque weocoo ñænæmpodē pæmænte mäo näni gocoo incæ wëä wænonte ñö cædinque ee adäni woboyænque wæñee mäo gotamönipa.

18 Wīni cai iñömō godömenque woboyæ pæmæninque æpæ mængonta mængonta ante cæ wædinque wipo ñænæmpo incæ æmætæ dadiimæ æmætæ dadiimæ go wætamönipa. İñinque iimö ate tömēñäni, Wipo ömædē bate wodæi bacæimpa, ante cædinque mäincoo ñænæmpodē ongönincoo incæ æpænē edæ wido wido cædäni gotapa. 19 Waönæ bayonte tömēñäni, Ñænæ wipo quincöo, ante näni cæincoo incæ nämä öñompoca pancacooğa æpænē wido cædäni gotapa. 20 Ayæ tæönæ iñonte nænque edæ tamönämaï nēmö tamönämaï i ate mönō, Ædömē gomompa, ante ēñēnämaï inte edæ wætamönipa. Ayæ woboyæ godömenque mämö pæmæñö æpæ nanguī mængonta mængonta cæ wædinque mönitö, Nöwo quēwenguñämaï imompa, ante edæ pönēninque wætamönipa.

21 Mäninäni wantæpiyæ cænämaï inäni adinque Pabodo tæcæguedē ængæ gantidinque tömämöni ayömöni tömēñäni inänite iimäi apæñecantapa. —İñänäni, botö ämo ēñēninque

Cædeta näni änöwænē emō cæte pönāmaī inte ee owoquēnēmīni imīnitapa. Edæ mänōmaī ee ongōmīni baī wipo tobænāmaī iñonte mīnitō mǎincoo ewēnāmaī inte wædāmaī incædōmīnīmpa. ²² Nōwo guiquēnē guīñēnāmaī piyænē cæte quēwēedāni. Nænæ wipo mōnō goimpo incæ tobænte bacæimpa. Nāwangā impa. Incæte waomō iñōmō wænāmaī tōmāmō mīimō quēwenguīmō imōmpa. ²³ Botō iñōmō edæ Wængonguī quīmo inōmo inte botō, Wængonguī ingampa, ante tōmengā beyæ cæbopa. Nōwoönæ woyowotæ tōmengā anquedo botō weca pōnīnque, ²⁴ botō imote apænecā ēñentabopa. “Pabodo, guīñēnāmaī ie. Tæiyæ awēnē Tetædo weca bitō cōwē gote gongæncæbiimpa. Ayæ bitō beyæ waadete pōnō cædinque Wængonguī bitō tōnō adopodē godongāmæ godāni inānite do angā quēwencædānīmpa.” ²⁵ Ante mänōmaī pōnō apænecā ēñēnīmo inte botō wæætē mīnitō imīnite, Guīñēnāmaī imīni inte pōnencæmīnīmpa, āmopa. Tōmengā nānō apænedō baquīnō anguēnē, ante botō Wængonguī ingante nē wede pōnēmo inte āmopa. ²⁶ Incæte wipo nænæmpoque wāā tēiwænē wawænē godinque tobænte ba wæcæimpa, ante Pabodo angantapa.

²⁷ Īnīnque mēa Wængonguī itædē iñonte woboyæ ayæ pæmæ māo godinque mōnitō Adodiaticopæ näni änōmāa wadō wadō wogaa gotamōnīpa. Mānimpoönæ īnque go ate woyowotæ ayaönænēña iñonte wipo nænæmpodē nē cædāni iñōmō, Onguīpoiya obo pōmōmpa, ante pōnēnānitapa. ²⁸ Tōmēnāni, Ægancadō īi, ante acæte ante cædinque pædæ guidonte adinque todēinta i tei mēetodo impa, ante adinque ayæ godōmenque godinque pædæ guidonte adinque tōmēnāni, Nōwo edæ pōnōmenque bæintitiæte mēetodo impa, ante wædānitapa. ²⁹ Dicaboga pōni edæ gomō tamēñedāni, ante guīñente wædinque, Nænæ wipo wāi wocængæimpa, ante teēmenca

nāni guitodōnīnca menca go menca yæmīñæmpo inō edæ guitodōnānitapa. Ayæ, Nāo ba waa tobaimpa, ante Wængonguī ingante apænedīnque edæ wāi wocænte a owotamōnīpa. ³⁰ Wipo nænæmpo nē cædāni guiquēnē, Mōnō wodīi wīnongæimpa, ante awēmō cædinque waca näni guitodōnīnca yæcadopo inō guitodoncæte ante cæte baī babæ cædinque, Mōnō awēmō goquimpo, ante guiyā wipo incæ pædæ wæænōncæ cædānitapa. ³¹ Guiyæmpo tæcæ pædæ wæænōñōnāni Pabodo iñōmō tontado capitāo tōnō tontadoidi inānite angantapa.

—Īnāni wipo nænæmpo nē cædāni inte nænæ wipodē ongōnāmaī ināni baī mīnitō ædō cæte nāmā cæte quēwenguīmīnīi.

³² Angā ēñente wædinque tontadoidi guiquēnē nænæ wipo nē cædāni näni awēmō gocæ cædimpo gæguīncamē aa wiyænāni īnīnque guiyæmpo tæi guīte æmæwo gotimpa.

³³ Tæcæ oque pōnente iñonte Pabodo iñōmō, Tōmāmīni cænguī cæedāni, ante nanguī ānīnque,

—Nōwo mēa Wængonguī itædē iñonte mīnitō ancaī guīñente wædinque ee ate cænāmaī quēwēmīni abopa. ³⁴ Nōwo iñōmō mīnitō imīnite, Cæedāni, āmopa. Cænte quēwenguēnē cæmīnīi, āmopa. Mīnitō æcāmenque incæ tōmāmīni wænāmaī incæmīnīmpa.

³⁵ Ānīnque tōmānāni waa ayōnāni Pabodo pāo ænīnque Wængonguī ingante, Waa pōnōmi cæmōnīpa. Ante apænedīnque ao mænte cængā. ³⁶ Adīnque tōmēnāni, Mōnō quēwengæimpa, ante gancæ pōnente wædinque tōmānāni cænānitapa.

³⁷ Wipodē mōni adopodē gocabo iñōmō dotiento tetenta i tei mānīmpomōni intamōnīpa. ³⁸ Mänōmaī cædinque tōmēnāni eyepæ cænāni ate edæ, Wipo teēmē emīñænte önætāmō iñōmō gobaimpa, ante guīñente wædinque,

Wodæi bacæimpa, ante cædinque mōnitō cænguī tōmēmō incæ æpænē gāwapænē wido cægadānimpa.

Wipo ñæncæmpo incæ goyæ guiipa

³⁹ Mānii ñāō bayō ōmæ adinque ñænæ wipo nē cædāni iñōmō, ĩimæ quimæmē impa, ante eñēnāmaī ināni inānitapa. Wæætē cōwā ayōnāni, Æpæ wedeca togaa paodāmæ iñōmō emōnai impa, ante adinque, Eyepæ imō ininque mōnō emōnaiboga wipo nāñe ñongæimpa. ⁴⁰ Ante cædinque teēmenca nāni guitodōnincacoo emō cæte gocæte ante gæguincamē aa wiyæninque ñimpo cædāni tadōmengadæ ee ongontapa. Ayæ wiyaimpa mempaa tōmēnāni wāi wocæñedē yæmiñæmpoya inō nāni goti winimpa incæ ñōwo wæætē edæ, Wipo tōō gocæimpa, ante ñi cædinque æpænē wæætē pædæ guidōnānitapa. Ayæ, Woboyæ pæmænte māo gocæimpa, ante ñænæ wipo weocoo adocooque yæcadopo pædæ æænonte wo cædāni ate emōnaiboga togaa paodāmæ iñōmō tōingā māo gotamōnipa. ⁴¹ Incæte tæcæ goyōmōni ōnætāmō iñōmō nāñe ñongæntapa. Wipo yæcado nāñe ñongæ adinque mōnitō, Mōnō ædō cæte goquī, ante wæyōmōni æpæ nanguī mængonta mængonta cæ beyænque yæmiñæmpo nā tobæninque panguimæ panguimæ æmæwo gopotapa.

⁴² Tæcæ tobæñō tontadoidi guiquēnē, Nē tee mōnete ongōnāni wīi tæi tæi pante wodii winonguināni, ante wææ cædinque tōmēnāni inānite wænōncæ cædānitapa. ⁴³ Adinque tontado capitāō iñōmō, Pabodo cōwē quēwencæcāimpa, ante cædinque tōmēnāni nāni cæcæ cædinō ante wææ angā eñente ñimpo cædānitapa. Ayæ mōnitō imōnite, Nē ipo cæmini iñōmō tāno æpænē tæi guidinque ōnompoca compo compo go tōmæwæ ōmaa goedāni, angā eñente gotamōnipa. ⁴⁴ Wadāni ipo cædāmaī ināni inānite tōmengā, Mīnitō guiquēnē awæmpaa incæ wipopa tobænimppaa

incæ nāñe ñongæninque wiyacæ wiyacæ goedāni, angā eñente godānitapa. Mānōmaī eñente cædinque mōnitō edæ tōmāmōni æpæmpo becadote wænāmaī inte ōmaa edæ tōmæwæ pongamōnimpa.

28

Wāā tēiwænē Mānatabæ Pabodo ponte quēwengampa

¹ Æpæmpo becadote wænāmaī inte tōmāmōni ōmaa taote eñēñōmōnite, Wāā tēiwænē iiwænē Mānatabæ impa, ante apænedāni eñentamōnipa. ² Māniōmæ quēwēnāni iñōmō wīi wadāni baī cædinque mōnitō imōnite waadete cædānitapa. Cōōnæ ayæ nanguī cæ ate yoguite wæyōmōnite tōmēnāni gonga tånōninque, Pō ootoedāni, ānāni gonga tōmāmōni bæcōyōmō oototamōnipa. ³ Pabodo iñōmō ōnompoca gæte tēnewæ bacoo ænte māmō ñō cæyongā gonga ocoi ā wædinque tæntæ gongapamō manta Pabodo ōnompō æo pocænte ñinga cædāmaī ee engate owo wæcā. ⁴ Adinque iñōmō quēwēnāni wæætē nāni cabo nāmāneque tedinque, “ĩingā iñōmō waocā ingante nē wæningā ingā awædō. Tōmengā æpæmpo becadote wænāmaī iñongante edæ mōnō nō cæte pānongā incæ tōmengā ingante ata cæpodāmaī inte angā ate ñōwo quēwenguināmaī incæcāimpa.”

⁵ Ante wapiticæ ante pōnente tedeyōnānite Pabodo iñōmō pongadāmaī ingā inte pipo cæcā tæntæ ñingacæ gongapamō togodo guiite gonga gonte wængantapa. ⁶ Adinque tōmēnāni, Tincadō pæncæ pæncæ mempoquingāā, ante ayæ, Tincadō iñontobæ tæi go wæænte wænguingāā, ante acæte ante wantæpiyæ cōwā ayōnāni, Ayæ dæ pongadāmaī i inque ingampa, ante adinque tōmēnāni wæætē edæ, Æ ĩingā wacā wængonguī ĩnongā inte ponte a ongongampa, ante wapiticæ ante pōnēnānitapa.

⁷ Ayæ māniwænē awēnē Pobidio iñōmō tōmengā quincodē mōni ōmaa pōñōmō eyequei intapa. Tōmengā,

Oncönë pö guite quëwëedäni, angä pö guite mönitö meönaa go adoönæque quëwëñömöni tömengä waadete pönö cæcä ate waa quëwentamönipa. ⁸ Pobidio mänömaï waa cæcä quëwëñömöni, Tömengä mæmpo wepæ tönö gömæ cæte daicawo gawænte möimoga a öñongampa. Ante apænedäni wædinque Pabodo tömengä weca guiddinque Wængonguï ingante apænedinque gampocä ate waa bacantapa. ⁹ Pabodo mänömaï cæcä adinque mäniwænë tömäo gode änäni ëñente wædinque në wënæ wënæ inäni inänite Pabodo weca ænte mämö ænte mämö cæyönäni tömänäni Wængonguï cæcä waa badänitapa. ¹⁰ Mäniñömö quëwënäni mönitö imönite wæætë pönö waa apænedinque cöwë waa cædänitapa. Ayæ wogaa tæcæ gocæ cæmöni adinque quiëmë möni ænguënënö ante adinque tömënäni, Minitö ænte goquï, ante eyepæ pönï ænte mämö da wënäni ænte gotamönipa.

Odömä iñömö Pabodo pongampa

¹¹ Ayæ mönitö Mänatabæ iñömö mengäa go adocanque mämonque quëwëninque gocæte ante cædinque, Äancadënaquepo, Adecantodia iñömö quëwënäni nänäni pemonte änimpodë go guitamönipa. Tömënäni wængonguïna Catodo tönö Podoco awinca bai ante badöninque tömënäni ñænæ wipocado gö cædinque wipo ñænæmpo ëmöwo, Äancadënaquepo impopa, ante pemönönänimpa. Mänimpo Mänatabæ wëmonca wodöiñömö do pöninque pæmæ tedæ wäi wocæ adinque mönitö iñömö mänimpodë go guiddinque wogaa gotamönipa. ¹² Godinque Tidacota iñömö nänäni wëmonca wodöiñömö pö wäi wocæninque mönitö meönaa go adoönæque quëwentamönipa. ¹³ Ayæ wadæ godinque Odeguio nänäni quëwëñömö pontamönipa. Ìimö ate dipæmæ gämænö woboyæ betamonca wædænque pæmæ wædinque mönitö wadæ godinque waönæ ate Poteodi quëwënäni nänäni

wëmonca wodöiñömö æmæwo pö ti wææninque tömæwæ gotamönipa.

¹⁴ Tömæwæ godinque Poteodi nänäni quëwëñömö ponte ayömöni në pönënäni nänäni cabo ongönäni atamönipa. Tömënäni, Adoque Wængonguï itæde mönitö tönö ee owoedäni, änäni Ao ante mönitö tömënäni nänäni änimpoga mäniñömö quëwentamönipa. Ayæ ate Odömä taadonque gotamönipa. ¹⁵ Odömä iñömö quëwente në pönënäni iñömö, Pabodoidi oo pönänipa, ante do ëñënäni inte doönæ tadinque mönitö imönite bee tencæte ante pönänitapa. Pancadäniya iñömö Apio nänäni godonte æiñömö ganca pöninque mönitö imönite mämö bee tënäni ate godongämæ gotamönipa. Godinque, Cæincö, ante Menconga go Adoconque, nänäni äñömö mäniñömö pöñömöni wadäni mämö bee tënänitapa. Mäninäni inänite adinque Pabodo iñömö, Nöwo iñömö wampo pönëmopa, äninque Wængonguï ingante waa ate pönëninque apænecantapa. ¹⁶ Ayæ odömänoidi nänäni nanguï quëwëñömö Odömä nänäni äñömö pöñömöni tontado capitäo iñömö në tee mönedinäni wadäni inänite tömengä awënë nempo pædæ godöninque Pabodo ingante tee mönedämaï ingantapa. Wæætë wacönë nänënë ænte mäodäni quëwëñongante tontado adocanque tömengä ingante wææ wänönongäimpa.

Odömä iñömö Pabodo quëwengampa

¹⁷ Mäniñömö ponte ate Pabodo meönaa go adoönæque ate oodeoidi në änäni inänite äñecä godongämæ pönäni ate tömënäni inänite,

—Botö tönïñamini, ëñëedäni. Mönö guiddänäni inänite wënæ wënæ cædämaï inte botö dodäni nänäni angainö ante wido cædämaï iñömote oodeoidi incæ Eedotadëe iñömö botö imote bæi ongöninque æninque odömänoidi nempo pædæ godönäni gotabopa. ¹⁸ Odömänoidi guiquënë botö imote apænte äninque, Æbänö

cæcantawo, ante ancaa ante ad-
inque, Pabodo dicæ tömengä nänö
wænguinque wænæ wænæ cæcäa, ante
adinque botö imote ñimpo cæcæte
ante cædänitapa. ¹⁹ Odömänoidi botö
imote ñimpo cæcæte ante cæyönäni
oodeoidi wæætë ancaa Baa änäni
ēñente wædinque botö iñömö edæ,
Odömänoidi tæiyæ awënë Tetædo
incæ botö imote apænte anguēnengä
ingampa, antabopa. Mänömaï äñimo
incæte botö awënë Tetædo weca
ongöinque, Botö guidēnāni wænæ
wænæ cædänitapa, ante wæætë piinte
änämaï incæboimpa. ²⁰ Mänömaï beyæ
mīnitö imīnite apæncæte ante botö,
Pöedāni, antabopa. Nöwo apænebo
ēñēdāni. Mönö idægocabo iñömö,
Mönö nē ponguingä Codito pönö
cæcä beyænque watapæ bacæimpa,
ante mönö pönēmompā. Mäninö mönö
pönengainö beyænque botö daagömē
ñānoncapoīmo a ongömo aedāni.

²¹ Ante apæneyongante tömēnāni
wæætë Pabodo ingante apænedinque,

—Oodeabæ quēwēnāni bitö imite
ante yewæmöninque cadota pædæ
pönönāni dicæ æmönīyaa. Mönitö
tönīñadāni Oodeabæ quēwente
pöninque bitö imitedö ante dicæ
wiwa änāniyaa. Bitö wiwa cædinö
ante yewæmöninque odömönāmaï
inönānimpa. ²² Mänömaï i incæte
wayömo wayömo tömāmæ quēwēnāni,
Mänināni Coditoidi iñömö wænæ
wænæ cædāni inānipa, ante piinte
tededāni do ēñēmōni iñinque mönitö,
Bitö ayömi Coditoidi æbänö cædāni
ināni. Æbänö pönēmīi, ante ēñencæte
ante wæmönīpa.

²³ Änīnque tömēnāni, Iiönæ
godongāmæ bee tēninque ēñengæimpa,
äninque wadæ godänitapa. Ayæ
wæætë mänīönæ nāni äñiönæ
iñinque ba ate ocæ emænte pönönāni
tæiyænāni bee tēninque Pabodo
weca godongāmæ pönānitapa.
Pönāni adinque Pabodo iñömö
baänæ contadingä gāwadecæ pönī
apænedinque, Wængonguī Awënë
Odeye nempo mönö quēwengæimpa,
ante apæncantapa. Ayæ, Möitee

wodi tönö Wængonguī beyæ nē
apænegaināni, Mönö Codito ponte
cæcæcäimpa, ante nāni angainö bai
Itota iñömö ñöwo ponte tömänö ante
do iñinque cægacäimpa. Nāwangä impa,
ante botö apænebo ēñēmaimīnīpa,
ante Pabodo oodeoidi inānite
apæncantapa. ²⁴ Angä ēñēninque
pancadāniya, Pabodo nāwangä
angampa, änānitapa. Pancadāniya
guiquēnē, Wīi pönēinente awædö,
änānitapa. ²⁵ Nāni cabo incæ mänömaï
wæætedö wæætë apænete wadæ
gocæ cæyönānite Pabodo wæætë
æmæwo apæncantapa.

—Wængonguī Tæiyæ Waëmö
Önöwoca apæncä ēñēninque Itaiya
wodi doyedē mīnitö mæmæidi inānite
nāwangä ante apænegacäimpa.

²⁶ “Itaiya ēñēmi, bitö oodeoidi weca
godinque iīmaï ante apænebi
ēñencædänimpa.

Mīnitö önömoncaque ēñēninque
ēñēnāmaï incæmīnimpa.

Awīncaque adinque cōwē adāmaï
incæmīnimpa, ante apænebi
ēñencædänimpa.

²⁷ Iñāni edæ mīmö ömædēnāni inte
wīi ēñēinente wæwædö,
äninque ædö cæte ēñenguñāni.

Awīnca wīi aīnente awædö, änāni inte
ædö cæte aquīnāni.

Edæ mīmö enēnāni inte bai tömēnāni
awīnca wi æmōnte adinque

önömonca wi æmoncate ēñencædönānimpa.

Edæ mīmö nö pönēninque dadi
emænte botö gāmænö pönāni
bai

botö do godö cæbo waa bacædönānimpa.”

Ante Itaiya wodi mīnitö mæmæidi
beyæ ämotamīni ante bai yewæmongacäimpa.

²⁸ Iñinque mīnitö oodeoidi inömiñi inte
ēñēnāmaï imīni adinque Wængonguī
ñöwo wæætë, Botö pönö æmo
beyænque quēwencæmīnimpa, ante
oodeo ināmaï ināni inānite do
apæncæ cæcampa. Tömēnāni
guiquēnē ædæmö waa ēñenguñāni
inānipa, ante apænebo ēñēmaimīnīpa,
ante Pabodo apæncantapa.

²⁹ Mänömaï apæncä ēñente
wædinque oodeoidi nāni cabo nan-
guī pönī wæætedö wæætë äninque

wadæ godänitapa. ³⁰ Pabodo
 iñömö oncö ænte quëwencæte
 ante tömënäni näni godonte æinta
 pædæ godöningue wacä oncö incæ
 tömengä oncö bai bayö mänincönë
 wadepo mënepoga quëwengantapa.
 Ayæ, Æcänö ëñacæ pöinäna cöwë
 botö weca waa ponguimäni, ante
 quëwëningue tömengä në pönäni
 inänite apænecä ëñënönänimpa.
³¹ Ayæ në wææ wänönäni cöwë Baa
 änämai iñönäni tömengä guiñënämai
 apænedingue, Wængongui Awënë
 Odeye nempo mönö quëwengæimpa,
 ante apænedingue, Mönö Awënë
 Itota Codito æbänö cægacäi, ante
 edonque odömonte apænecä ëñengadänimpa.

Odömānoidi inānite Pabodo nānō cadota ante yewæmongainta

Waa quëwencæminimpa, ante

¹ Itota Codito ingante nē cædōmo inte botō Pabodobo inōmo inte īī cadota ante nē yewæmōmo imopa. Wængonguī botō imote apænte æninqe īīmainō ante aa pegacāimpa. Bitō Pabodobi gote botō pōnō cædō ante watapæ apænebi ēñencædānimpa, ante angacāimpa.

² Mānīnō, Wængonguī æbānō pōnō cæquingā, ante watapæ apænedinqe tōmengā beyæ nē apænegaināni wēēñēdē pōnī nāni tæiyæ waēmō yewæmongainō ante botō mānīnō ante nē apænebo imopa. ³ Mānīnō waa pōnī nānō cæquīnō ante īinqe cæcæte ante cædinque Wængonguī tōmengā Wengā ingante da pōnongā pongacāimpa. Tōmengā īñōmō waocā onguīñængā nānō baquinque Awēnē Dabii wodi Pæingā inte ēñagacāimpa. ⁴ Adocā Itota īñōmō botō Wengā inongā ingampa, ante tōmānāni edonque acædānimpa, ante odōmoncæte ante cædinque Wængonguī tæī piñængā inte īīmaī cægacāimpa. Īingā Itota Codito mōnō Awēnē īñōmō Tæiyæ Waēmō ewocacā inte do wæningā īñongante Mæmpo Wængonguī wæætē nanguī angā ate ñāni omæmongacāimpa.

⁵ Ayæ adocā tōnō godongāmæ cædinque tōmengā emōwo beyæ mōnitō imōnite Wængonguī pōnō waadete cægacāimpa. Ayæ, Minitō wabæca wabæca gote apænemini ēñēninqe tōmāmæ quëwēnāni Itota Codito emōwo ante wede pōnēninqe nē ēñente cæte quëwēnāni bacædānimpa, ante cædinque Wængonguī wampō pōnēninqe godōmenque tæī piñænte entawengæimpa, ante pōnēninqe botō mīnitō imīnite aīnente wæbopa.

⁶ Īninqe tōmāmæ quëwēnāni inānite

Itota Codito, Botō gāmēnō pōedāni, ante aa pedinqe mīnitō imīnite adobaī aa pecampa. ⁷ Minitō botō quīmīni badinqe botō ayōmō tæiyæ waēmō ewocate quëwēmīni bacæminimpa, ante Wængonguī cægacāimpa. Īninqe mīnitō Odōmā īñōmō quëwēninqe Wængonguī quīmīni īñōmīnite botō, Acæminimpa, ante īīmaī ante yewæmōmopa. Mōnō Mæmpo Wængonguī tōnō Awēnē Itota Codito waadete pōnō cæyōnate mīnitō wæætē gānē pōnente bacæminimpa, āninqe yewæmōmopa.

Odōmā īñōmō ēñacæ pōinēmopa, ante

⁸ Minitō æbānō wede pōnēmīni, ante tōmāmæ quëwēnāni tededāni ēñēnānipa. Īninqe botō īñōmō Itota Codito emōwo apænedinqe Wængonguī ingante waa ate apænebopa. Wængonguī bitō adobique pōnō cæbi ate odömānoidi wede pōnēnānipa, ante apænebopa. ⁹ Wængonguī Wengā ingantedō ante watapæ apænedinqe botō Wængonguī ingante nē cædōmo inte tōmengā nānō ānō ante ædāmō ewocadinque apænebo ēñēnānipa. Botō mānōmaī cæbopa, ante nē adingā inte Wængonguī īñōmō edæ, Odömānoidi beyæ ante Pabodo botō imote woyowotæ incæ itædē incæ apænecampa, ante nē ēñengā ingampa. ¹⁰ Edæ, Wængonguī, bitō Ao āmi ate botō ñōwo odömānoidi weca ēñacæ gobāimopa, ante Wængonguī ingante mīnitō beyæ ante botō cōwē apænebopa. ¹¹ Wængonguī Ōnōwoca beyæ apænebo ēñēninqe mīnitō tæī piñænte ewocacæminimpa, ante cæcæte ante botō mīnitō weca ēñacæboimpa, ante wæbopa. ¹² Edæ mīnitō botō wede pōnēnō beyæ wampō pōnente bayōmīni botō wæætē, Minitō wede pōnēmīnipa, ante adinqe adobaī wampō pōnēmo Īninqe mōnō pōnencabo godongāmæ wampō pōnēninqe godōmenque tæī piñænte entawengæimpa, ante pōnēninqe botō mīnitō imīnite aīnente wæbopa.

13 Botō wabæca quēwēnāni weca gote apænebo ēñēnīnque pancadāniya wede pōnēnāni badānitapa. Īnīnque, Botō mīnitō weca gote apæneyōmo wadāni pancadāniya adobaī wede pōnencādānīmpa, ante cædinque botō æpogamē incæ poncæ cæyōmo edæ wææ cæte intapa. Īnīnque botō, Tæmpo poncæ cætabopa, ante yewæmōmo ate ēñencæmīnīmpa, ante yewæmōmopa. 14 Edæ guīdiegoidi incæ wadāni incæ, ocai encadāni incæ ocai ōmæcadāni incæ ædānimē ĩñōnānite botō debe inte baī edæ tōmānāni ĩnānite odōmonte apænequēnēmo ĩnōmo ĩmopa. 15 Mānōmaī beyæ mīnitō Odōmā ĩñōmō quēwēmīni ĩñōmīnite botō mīnitō ĩmīnite adobaī mōnō Codito ingantedō ante watapæ apænecæte ante nanguī cæinente wæbopa.

Mōnō tæī piñænte ewocadō Codito beyænque ĩmpa, ante

16 Mōnitō oodeomōni ĩñōmōnīte tāno apænedīnque Wængonguī ĩñōmō mīnitō oodeoidi ĩnāmaī ĩñōmīnite ayæ adobaī apænedīnque, Mīnitō wede pōnēmīni adīnque Codito waa pōnī pōnō ængā beyænque quēwencæmīnīmpa, ante tæī piñænte cægacāīmpa. Īnīnque mānīnō Codito ingantedō ante botō ĩñōmō watapæ apænedīnque, Wængonguī tæī piñænte nānō cægānō ĩmpa, ante pōnente wædinque edæ guīñēnedāmaī inte do apænebopa. 17 Mōnō wede pōnēmō ĩñōmonte Wængonguī mānīne ante odōmonte watapæ apænecā beyænque mōnō nō cæte quēwēmō bagamōīmpa. Mānīne beyænque godōmenque wede pōnente badīnque mōnō wede pōnēnō beyænque quēwēmōmpa. Īnīnque docā ĩñōmō Wængonguī beyæ yewæmōnīnque, “Nē nō cæte quēwēnongā incæ tōmengā nānō wede pōnēnō beyænque quēwencæcāīmpa,” ante nānō yewæmongānō baī edæ do batīmpa.

Mōnō waocabo wentamō mongænte wæmōmpa, ante

18 Nē wīwa cædāni guīquēnē wīwa nāni cædō beyænque wadāni edæ Wængonguī nō pōnī nānō apænegānō ante ædō cæte ēñenguīnānī. Īnīnque Wængonguī ingante nē wīwa cædāni nāni ēñēnāmaī ĩnīnō ante godō pūīnīnque tōmengā ōñædē ongōnīnque wīwa nāni cædinō beyænque do pangā wædāni edonque amōmpa. 19 Wængonguī, Botō æbodō ĩmoo, ante tōmāmīni edonque pōnī ēñencæmīnīmpa, ante cædinque tōmāmō ĩmonte odōmōnīnque tōmēnāni ĩnānite adobaī edonque pōnī odōmongā wægadānīmpa. 20 Wēēnēñedē pōnī nē quēwengānāni tōnō ñōwo ganca quēwēmō adobaī, Wængonguī mōnō nē adāmaī ĩnongā inte æbānō quēwengāā, ante ēñencæte ante wægāīmō ĩnōmō inte mōnō tōmengā nānō badongaincooque adīnque edæ edonque pōnī acæīmpa. Edæ, Tōmengā ñīmpo cædāmaī inte cōwē nē tæī piñænongā ingāmpa, ante ayæ, Nē Wængonguī ĩnongā ingāmpa, ante wædinque mōnō waocabo edonque aquēnēmō ĩmōmpa. Īñæmpa ēñēnāmaī intabopa, ante ædō cæte anguī.

21 Wængonguī ingante do ate baī ingānāni incæte waodāni tōmengā ingante edæ, Bitō Wængonguī ñāō ēmōnōmi ĩmīpa, ante edæ ānāmaī ĩñōnānīmpa. Wængonguī ingante waa ate pōnente apænedāmaī ĩñōnānīmpa. Mānōmaī ocai ōmæcadāni baī mīmō ōmædēnāni baī badīnque tōmēnāni wentamō entawēnāni bagadānīmpa. 22 Ocai encāmōni ĩmōnīpa, ante ānāni incæte tōmēnāni wæætē mānōmaī cædinque ocai ōmæcadāni bagadānīmpa. 23 Edæ Wængonguī wænāmaī nē Quēwengāngā ĩñongante tōmēnāni wæætē godō Baa angadānīmpa. Tōmengā nānō ñāō ēmōnō ante piīnte cædinque tōmēnāni wæætē waomō nē wæwocāmō mōnō ēmōnō baī badōnīnque, ōmā ēñadāni nāni ēmōnō baī badōnīnque, ocaguī ēñadāni nāni ēmōnō baī

badönnique, ocaguï ömaadäni näni emönö bai badönnique tömänni, Mönitö wængonguï ingampa, ante cædönnanimpa.

²⁴ Mänömaï cædäni ate wædinqwe Wængonguï, Minitö mini cæinente wædö ante ee abo cæcæminimpa, ante da godongä wadæ godinqwe tömänni baonga näni ñömæï mongænte quëwenguinque cædönnanimpa. Ìninqwe näna gæncaya näna gæncaya näni monguënönö ante Baa ante guïññadämaï inte cædinqwe wacä ingä wacä ingä godö wiwa cædönnanimpa. ²⁵ Wængonguï näwangä pönï nänö apænegainö ante tömänni Baa äninqwe mä pönënninqwe näni babæ apænegainonque ante Ao änönänimpa. Mänömaï cædönnäni inte tömänni wæætë Wængonguï nänö nê badongaincoo weca ædæ wææninqwe, Mönitö wængonguï impa, ante cædinqwe nê Badongaingä ingante edæ emö cæte wadæ gogadänimpa. Incæte tömengä nê Badongaingä ïñongante mönö waocabo inguipoga mönö quëwëñedë ayæ ate mïnguipo bayonte wantæpiyæ mönö quëwëñedë Wængonguï ingante, Bitö tömëmi toquinque pönö waa cæbi æmönipa, ante mönö apænecæimpa. Mänömaï impa, ante Amëë, amopa.

²⁶ Mänömaï cæyönänite Wængonguï, Minitö guïññadämaï mini toinente wædonque gobæwedäni, ante da godongä gogadänimpa. Ìninqwe onquiyænäni incæ, Nê onquiyæmo inömo inte botö onguïñængä tönö monguënëmo imopa, ante änämaï inäni inte godö wacä onquiyængä tönö towente möwënönänimpa.

²⁷ Ayæ onguïñænäni incæ adobaï cædinqwe, Botö onguïñæmo inömo inte onquiyængä tönö monguënëmo imopa, änämaï inäni inte godö wacä onguïñængä tönö möinente gonga bæco bai toinente wædäni bagadänimpa. Ìninqwe cöwë näni waa quëwenguënönö ante Baa äninqwe näni onguïñæncabo inönäni inte wiwa cædönnanimpa. Mänömaï cæyönänite Wængonguï eyepæ pönï godö pangä

wædinqwe tömänni wiwa näni cædö beyænque nämä baonga caate wæwengadänimpa.

²⁸ Wængonguï ingante mönö pönente ëñengæimpa, ante tömänni, Önonquedö ante impa, ante tedeyönänite Wængonguï wæætë, Ocaidë wentamö encadömini inte edæ waomini mini wiw cæquënönö incæ ee abo cæbæwedäni, ante da godongä gogadänimpa.

²⁹ Tömänni ïñömö nö cæquinämaï inäni inte do wiwa cædänique badinqwe iïmaï cædänipa. Wacä ingä godö towënninqwe tömänni wadäni inänite nê wënæ wënæ cædänique inänipa. Mäincoo ante æinente wæwënnäni inte tömänni, Wacä gomonga ængä ingante godö piinte adänipa. Ayæ edæ, Mönö godö wænnongæimpa, ante cædinqwe do cædänipa. Guëadö guëa piinte cædänipa. Wacä oda cæcæcäimpa, ante ancaa cædinqwe tömänni godö babæ cædänipa. Ayæ nê wiwa pönëwënnäni inte tömänni, Wadäni wæcædänimpa, ante godö piinte cædänipa. Godö wæntaa godö wæntaa tedewënnäni inänipa.

³⁰ Ayæ wadäni inänite piïnninqwe iïnäni ïñömö godö babæ ante tedewënnäni inänipa. Wængonguï ingante piinte cædäni inänipa. Ayæ, Tömëmoque wæmö imopa, ante nämä ængö cæte bai cædinqwe wadäni inänite wææntodonte bai äninqwe, Önonquedö cæcantedö abii, ante godö piinte todäni inänipa. Edæ, Æbänö godömenque wënæ wënæ cæte toquimoo, ante edæ pönëë cönninqwe edæ nanguï cædänipa. Mæmpocä tönö badä, Cædäni, äñönate tömänni ëñënnämaï cædänipa.

³¹ Mïmö ömædënnäni inte tömänni ocai ömæcadäni bagadänimpa. Cæcæboimpa, äninqwe edæ ïnque cædämaï inönänimpa. Wacä caate wæcä adinqwe godö waadedämaï inönäni inte tömänni edæ godömenque piïnnäni inte cædönnanimpa.

³² Mänömaï cædäni ïñömö näni wænguinque cædänipa, ante Wængonguï nö pönï nänö angainö ante tömänni

önömoncaque nē ēñēnāni inte
tömēnāni nāni wēnæ wēnæ cæinēnonque
ante cædānīpa. Ayæ tömēnāni wīwa
nāni cædō bai wadāni adobai cædāni
adinque tömēnāni, Waa cæmīnīpa,
ānīnque nē cædāni inānite waa
adānīpa.

2

Nōingā ante Wængonguī apænte angampa, ante

¹ Tömēnāni mǎnōmaī cædānīpa.
Incæte bitō adobai wīwa cædōmi inte
tömēmi pante wæquinque tömēnāni
inānite apænte āmīpa. Īnīnque bitō
wacā ingante, Bitō pante wæquinque
wīwa cæbīpa, ante apænte āmi inte
bitō iñæmpa adobai wīwa cædōmi
inte edæ æbānō cæte nāmā ante
wææ anguīmīi. ² Wīwa cædāni inānite
apænte ānīnque Wængonguī cōwē
nōingā ante apænte angampa, ante
edæ do ēñēmōmpa. ³ Īnīnque waobi
önōmīque inōmi inte bitō iñæmpa
tömēnāni inānite apænte āmi incæte
tömēnāni nāni cædō bai adobai
cædōmi inte edæ, Wængonguī botō
imote pānāmaī inte ata cæpocæcāimpa,
ante pōnēmitawo. ⁴ Bitō wīwa cæbi
inte Ca ca wæquēnēmi iñōmīte
Wængonguī wæætē ee pānāmaī inte
nanguī waadete pōnō cæyongante bitō
wæætē edæ pīnīnque Baa āmitawo.
Īñæmpa tömēngā, Bitō, Æmæwo
wēnæ wēnæ cætābōpa, ante wædinque
botō gāmēnō poncæbiimpa, ante
Wængonguī pōnō waadete cæcampa,
ante pōnēmiyaa.

⁵ Incæte bitō mīmō ōmædēmi
inte ancaa Baa ānīnque edæ wēnæ
wēnæ bitō cædō ante ñimpo cædāmaī
iñōmīte Wængonguī nānō ænguī
baquīōnæ iīnque bayonte tömēngā
ænguī pōnī badīnque godōmenque
pangā wæcæbiimpa. Tömēngā æbānō
nō apænte angāā, ante māniñedē
ate edæ edonque acæimpa. ⁶ Edæ,
Tömāmō mōnō cægāi ganca ante
Wængonguī eyepæ pōnī pædæ
pōnongā æncæmōimpa, ante dodāni
nāni yewæmongainō bai edæ iīnque
bacæimpa.

⁷ Īnīnque, Mōnō ñāō bai entawengæimpa,
ante cædinque ayæ, Wængonguī mōnō
imonte waa adīnque pōnō cæcā ate
mōnō wæwocadāmaī ewocacæimpa,
ante cædinque mōnō wæntædāmaī
inte ee waa cæte quēwēmō Īnīnque
Wængonguī pōnō cæcā ate mōnō
cōwē wænāmaī quēwēmaimōmpa.
⁸ Wæætē, Wængonguī nāwangā nānō
apænedō ante Baa ānīnque, Tömēmo
beyænque quēwencæboimpa, ante nē
ānāni inānite ayæ wadāni wīwa nāni
cæquinque ante nē tee empote
godāni inānite Wængonguī ænguī bad-
īnque godō pīinte cæcæcāimpa. ⁹ Edæ
mōnō waocabo wēnæ wēnæ cæmō
adinque Wængonguī oodeomōni
iñōmōnite tāno pānīnque oodeomīni
ināmaī imīni imīnite adobai pāñongā
nē wēnæ wēnæ cæmō tömāmō
iñōmō edæ caate wæwencæmōimpa.
¹⁰ Wæætē waa cæmō adīnque
Wængonguī oodeomōni imōnite tāno
pōnō waadete cædinque oodeomīni
ināmaī imīni imīnite adobai pōnō
waadete cæyongā nē waa cæmō
wæætē gānē entawēnīnque ñāō apāite
bai entawēñōmōnte edæ Wængonguī
tömāmō imonte waa acæcāimpa.

¹¹ Edæ mōnitō oodeomōni imōni
incæ mīnitō oodeomīni ināmaī
imīni incæ Wængonguī tömāmō
imonte adoyōmō pōnī adīnque
wadō wadō ate pōnente cædāmaī
ingampa. ¹² Mōitee wodi, Īmaī
cæedāni, ante nānō wææ angainō
ante ōmæmoncadāni inte wīwa
cædāni Īnīnque tömēngā nānō wææ
angainō dæ ante bai mānīnāni
wæncædānīmpa. Wæætē Mōitee wodi
nānō wææ angainō ante do ēñente
ēmoncadānīni incæte wīwa cædāni
adinque Wængonguī mānīne ante
ēñēnāmaī cædāni beyænque apænte
ānīnque pangā wæcædānīmpa. ¹³ Edæ
Mōitee wodi nānō wææ angainō ante
önōmoncaque ēñēnāni inte tömēnāni
nāni önōmoncaque ēñēnō beyænque
Wængonguī ayongā dicæ nō cædāni
badānīyaa.

Wæætē edæ mānīne ante ēñente
cædāni inānite guiquēnē Wængonguī
pōnō angā ate tömēnāni iñōmō

nō cædāni bacædānimpa. ¹⁴ Edæ Mōitee wodi nānō wææ angainō ante ðmæmoncadāni inte oodeoidi ināmaī ināni incæ pancadāniya tōmēnāni dodāni nāni wææ angainonque ante Ao ante cædinque Wængonguī nānō wææ angainō bai edæ do cædānīpa. Mānōmaī ēñente bai cædinque tōmēnāni mīmō entawēnāni inte mānīne ante ðmæmoncadāni ināni incæte nāmā nāni wææ ānonque ēñente cædānīpa. ¹⁵ Edæ, Tōmēnāni dodāni nāni wææ angainō ēñēninque waa cædāni inte tōmēnāni Wængonguī nānō wææ angainō bai do entawēnānīpa, ante edonque acæimpa. Mīmō entawēnāni inte tōmēnāni nāni caboque godongāmæ pōnēninque wēnæ wēnæ nāni cædōnō ante nāēmæ apænte wææ ānānīpa. Ayæ wæætē waa cædāni ate tōmēnāni nāēmæ apænte ñimpo cædānīpa.

¹⁶ Codito ingantedō ante wat-apæ ēñengāimo inte botō iīmaī ante apænebopa. Wængonguī angā ēñente cædinque Itota Codito wæætē waomō mōnō awēmō entawēnō ante edonque pōni adinque apænte ancæcāimpa. Tōmengā nānō apænte anguīōnæ iinque bayedē edæ mānīnō ante botō yewæmonte apænedō bai edæ iinque bacæimpa.

Mōitee nānō wææ angainta adinque oodeoidi wī ēñēnāni

¹⁷ Bitō iñōmō edæ, Oodeobo inōmo imopa, ante āmīpa. Ayæ, Mōitee wodi nānō wææ angainta nē ēñēmo inte botō Wængonguī ayongante waa quēwēmo imopa, ante edæ nāmā ængō cædinque āmīpa. ¹⁸ Wængonguī æbānō angāā, ante do ēñēmīpa. Ayæ tōmengā nānō wææ angainō ante do ēñēmi inte bitō, Quīnō waa i, ante do ēñēninque Ao ante æmīpa. ¹⁹ Bitō, Wadāni babetamō bai ēwocayōnānite botō tōō æmænte māobo godānīpa. Wēmō iñōmō quēwente bai adāmaī iñōnānite botō iñōmō, Acæminimpa, ante tica ēnente bai odōmonte apænebopa, ante edæ, Nāwangā āmopa, ante bitō apænebitawo. ²⁰ Ayæ adobai,

Mōnō Mōitee wodi nānō wææ angainō ante ēñente beyænque mōnō ēñenguēnēnō ante entawēninque mōnō nō cæquēnēnō ante adobai tōmānō ante entawengæimpa, ante bitō pōnēmitawo. Ayæ mānōmainō ante bitō pōnēnō beyæ bitō, Nē oda cædāni inānite botō nē tōingā odōmōmo imopa, ante pōnēmitawo. Wēñænāni bai wædænque ēñēnāni iñōnānite botō nē odōmonte apænebo imopa, ante pōnēmitawo.

²¹ Iñæmpa mānōmaī inōmi inte bitō edæ dicæ nāmā odōmonte apænete ēñēmitawogaa. Wadāni inānite odōmonte apænedinque, Awēmō ænāmaī iedāni, ante odōmonte apænedōmi inte tōmēmi awēmō æmitawo. ²² Bitō wadāni inānite odōmonte apænedinque, Nānōogængā ināmaī iñongante godō guēa mōnāmaī iē, ante nē wææ āmi inte bitō adobai wacā tōnō guēa mōmitawoo. Ayæ, Wængonguī ingampa, ante nāni badōinca ante nē pīimi inte bitō edæ tōmēnāni nāni apæneincōnē go guiidinque edæ ō æmitawoo. ²³ Iñæmpa bitō, Mōitee wodi nānō wææ angainō ante botō ēñente cæbo imopa, ante tededinque nāmā ængō cædōmi inte edæ mānīne ante ēñēnāmaī cæbi adinque wadāni wæætē Wængonguī ingante waa adāmaī inānīpa tōō. ²⁴ Edæ, “Mīnitō cædinō beyæ oodeoidi ināmaī ināni incæ Wængonguī emōwo ante godō babæ ante wēnæ wēnæ ānewēnānīpa,” ante tōmengā beyæ dodāni nāni yewæmongainō bai do batimpa.

²⁵ Edæ Wængonguī nānō wææ angainō ante ēñente cæbi iinque bitō, Nāwā oodeobo imopa, ante nē ēō togæimi badinque waa imaimpa. Wæætē edæ ēñēnāmaī cæbi iinque oodeo ināmaī ingā bagācā ingā bai bitō iñōmō edæ do babaīmīpa. ²⁶ Oodeoidi ināmaī ināni guiquēnē bagāadāni ināni incæte tōmēnāni Wængonguī nānō wææ angainō ante ēñente cædāni iinque Wængonguī ayongā tōmēnāni do ēō togæināni bai inōnāni inte oodeoidi bai inānīpa.

27 Bitō iñōmō Mōitee wodi nānō wææ yewæmongainta mǎnīmi inte nē ēō togæīmi imitawo. Bitō mǎnōmaī imi incæte ēñēnāmaī cæbi iñōmi wacā wæætē bagāacā inongā inte ēñēnte cæcā ininque tōmengā ēñēnte nānō cædō beyænque Wængonguī wæætē bitō imite apænte āninque pancæcāimpa.

28 Iñæmpa oodeo ēñagaingā inte baō beyænque oodeocā ingā incæte tōmengā wīi mǎnōmaī ingā beyænque nāwā oodeocā ingampa. Adobaī nē ēō togæingā iñōmō baonque nānō ēō togæinō beyænque tōmengā Wængonguī ayongā ædæmō ēō togæingā bai wīi ingampa.

29 Wængonguī Ōnōwoca ingante nē ēwocacā guiquēnē tōmengā iñōmō edæ nāwā oodeo bai badinque Wængonguī wēñængā ingampa. Edæ Mōitee wodi nānō wææ yewæmongainō ante ēñēnte ēō togæninque waocā tōmengā wentamō nānō entawēnō dicæ wido cæquingāā. Wængonguī Ōnōwoca guiquēnē pōnō wido cæcā beyænque waocā wæætē waēmō entawengampa. Mǎnōmaī entawengā ingante wadāni waa adāmaī ināni incæte Wængonguī wæætē, Bitō waa entawēmi abopa, āninque tōmengā ingante waa apæñecampa.

3

1 Ininque oodeocā iñōmō edæ, Oodeobo imopa, ante toquēnengā ingantawo. Ayæ adobaī, Botō ēō togæīmo imopa, ante toquēnengā ingantawo. 2 Ao āmopa. Nē oodeoidi inōnāni inte tōmēnāni cōwē nanguī toquēnēnāni inānipa. Edæ Wængonguī apæñecā ēñengaināni inte edæ oodeoidi tōmengā nānō apænedō ante nē mangaināni inte nē toquēnēnāni inānipa. 3 Mǎnōmaī i incæte pancadāniya iñōmō edæ wede pōnēnāmaī inānipa. Ininque mōnō æbānō anguīi. Tōmēnāni nāni pōnēnāmaī inō beyænque Wængonguī tōmēnāni inānite dicæ ñimpo cædinque ædæmō aadāmaī ingantawogaa.

4 Ædō cæte mǎnōmaī inguīi. Mōnō waocabo tōmāmō nē babæ apæñemō iñōmonte Wængonguī iñōmō nō pōni cæcā ingainō anguēnē. Edæ tōmengā beyæ iīmaī ante yewæmongatimpa.

“Wængonguī bitō æbānō apæñebii, ante apænte ancæ cædāni incæte tōmēnāni, Wængonguī nō pōni ante apæñecampa, ante edonque acædānimpa.

Bitō nē tæi emōmi inte edæ bitō imite nē apænte ancæ cædāni inānite nāēmæ edæ wææntodonte bai cædinque edæ gānā cæcæbiimpa.”

Ante nāni yewæmongainō bai edæ bacæimpa.

5 Waodāni mā pōnēninque iīmaī ante tedewēnānipa. Mōnitō wīwa cæyōmōnite Wængonguī nō cæcā adinque wadāni, Wængonguinque nē nō cædongā ingampa, ante godōmenque edonque acædānimpa. Ininque wīwa cæyōmōnite Wængonguī quīnante piinte pangāā, ante tedewēnānipa. Mǎnōmaī tedewēnāni adinque mōnō wæætē æbānō anguēnēmō imōō. Iñæmpa waodānique nāni ānewēnō bai dicæ anguēnēmō imongaa. 6 Ædō cæte mǎnōmaī ānewenguīi. Mǎninō nāni tedewēnō nāwangā i bai inguipoga quēwēmō imonte Wængonguī apænte ānāmaī inguēnengā.

7 Wadāni guiquēnē iīmaī ante tedewēnānipa. Wængonguī cōwē nāwangā ante apæñeyongante botō babæ apæñebo adinque wadāni, Wængonguinque nāwangā ante apæñecampa, ante tōmengā ingante godōmenque waa acædānimpa. Ininque babæ botō apænedō beyænque Wængonguī godōmenque ñāō apāite bai emongā ingampa. Ininque, Bitō nē wēnæ wēnæ cæbi imipa, ante Wængonguī quīnante botō imote apænte angāā, ante tedewēnānipa.

8 Tōmēnāni, Wængonguī ingante godōmenque waa acædānimpa, ante mōnō godōmenque wēnæ wēnæ cæcæimpa, ante tedewēnānipa. Tōmēnāni nāni tedewēnō nāwangā i

baī mōnitō adobaī ante ancædōmōnimpā¹⁷ Edæ, Tōmēnāni nāni tedewēnō baī edæ Pabodoidi adobaī ante apænedānīpā, ante pancadāniyā pōnō wēnæ wēnæ ante babæ apænedānīpā. Mānōmaī ante nē apænewēnāni inānite pānīnque Wængonguī nō cæte pangampa.

Tōmāmō mōnō pante wæquinque wentamō mongæmompā

⁹ Īnīnque æbānō ante anguī. Mīnitō oodeoidi ināmaī ōnōmīnīque iñōmīnite mōnitō mōni oodeocabo dicæ godōmenque waa pōnī imōniyā. Īñæmpā mōnitō oodeomōni incæ mīnitō oodeomīni ināmaī imīni incæ tōmāmō nē wēnæ wēnæ cædōmō imompā, ante do odōmonte yewæmōmōni abaimīnīpā.

¹⁰ Edæ iīmaī ante Wængonguī beyæ ante āmotamīni ante baī yewæmongatimpā.

“Nē nō cædongā iñōmō edæ dæ angampa.

Adocanque incæ edæ dæ angampa.

¹¹ Nē ēñente pōnengā iñōmō edæ dæ angampa.

Wængonguī ingante ante nē diqui diqui mīnongā iñōmō edæ dæ angampa.

¹² Tōmānāni edæ oda cæte wapiticæ godinque,

nāni waa cædāmaī incaboque badānitapā.

Nē waa cædongā iñōmō edæ dæ angampa.

Adocanque incæ edæ dæ angampa.

¹³ Waodāni inānite wænoncæte ante ææ ænete baī ēmencadinque, tōmānāni babæ ante enguēnēwate tedewēnānīpā.

Edæ tæntæ tōmēmæ ēnete baī, Wænongæimpā, ante ēnedānīpā.

¹⁴ Tōmēnāni pīinte nāni tedewēnō beyænque moncapæ tī nā baī enguēnēwadānīpā.

¹⁵ Tōmēnāni wænonguīwaque pogodo goquīwaque ēwadānīpā.

¹⁶ Tōmēnāni nē godō wænōnāni inte māincoo wido cæte wodii godāni ate edæ mīi quēwēnāni ponte adinque caate baī wæwēnānīpā.

Nē pīinte cædōnāni inte tōmēnāni Wængonguī taadō tōmengā gānē entawente nānō godōnō ante adāmaī inte cædānīpā.

¹⁸ Tōmēnāni, Wængonguī ingante mōnō guīñente ēñengæimpā, ante pōnēnāmaī inānīpā.”

Ante dodāni nāni yewæmongainō baī impā.

¹⁹ Æcānō Mōitee wodi nānō wææ angainō ante nē ēñente quēwenguēnēna ināa tōmengā beyænque ante wææ yewæmongatimpā. Mānōmaī i beyæ, Botō eyepæ cæbo imopā, ante mōnō ædō cæte anguī. Edæ guīñēnete mōnō pæ wēēnecæimpā. Ayæ ingui-poga tōmāo quēwēmō tōmāmō Wængonguī nē apænte angā weca ongōnīnque edæ, Æbānō cætaboo, ante Wængonguī ingante mōnō edonque apænequēnēmō imopā. Mānōmainō ante edæ do ēñēmompā. ²⁰ Mānōmaī beyæ Wængonguī, Mōitee wodi nānō wææ angainō ædæmō ēñente cæbi beyæ bitō botō ayōmo nē nō cæbi babīpā, ante adocanque ingante edæ ānāmaī incæcāimpā. Wæætē mānīne nānō wææ angainō ēñente beyæ mōnō, Nē wēnæ wēnæ cæmō imopā, ante edonque amompā.

Mōnō wede pōnēnō beyænque nō cæte quēwēmompā, ante

²¹ Wīi Mōitee wodi nānō wææ angainō ante ēñēmīni beyæ wæætē edæ Wængonguī incæ pōnō badongā beyænque mōnō tōmengā ayongā nō cæmō bamompā, ante ñōwo pōnī odōmongatimpā. Dodāni Mōitee wodi tōnō Wængonguī beyæ

nē apænegaināni iñōmō, Īncayæ ate mānōmaī bacæimpā, ante do yewæmongadānīpā. ²² Wængonguī pōnō badongā ate mōnō nē wede pōnēmō iñōmō Itota Codito ingante mōnō wede pōnēnō beyænque edæ tōmāmō tōmengā ayongā nō cæmō bamompā. Edæ mōnō adoyōmō ingaimō inte ōnōmonque imopā.

²³ Īnīnque mōnō tōmāmō wēnæ wēnæ cæmō inte Wængonguī nānō

ñāō bai quēwēñōmō guicæte ante cædinque wīi eyepæ cæmō inte wīi guimompa. ²⁴ Incæte Itota Codito ængā beyænque abæ tawænte gote bai quēwēmō iñōmonte Wængonguī ōnonque änāmaī inte waadete pōnō badongā ate mōnō tōmengā ayongā nō cæmō bamompa. ²⁵ Wængonguī iñōmō Itota Codito ingante da pōnōnque, Tōmengā mīnitō wēnæ wēnæ cædō ante teēmente wængā beyænque botō wæætē piyænē cædinque mīnitō imīnite pānāmaī incæboimpa, ante cægacäimpa. İnque tōmengā, Mänōmaī pōnō cæbo ate mīnitō, Itota wepæ mōnō beyæ pe tæ pe tæ wæænimpa, ante wede pōnēnque wede mīni pōnēnō beyænque quēwencæmīnimpa, ante pōnō cægacäimpa.

Mänōmaī cædinque Wængonguī wēēñēñedē mōnō waocabo mōnō wēnæ wēnæ cægainō ante ee adinque nē pānāmaī ingaingā incæte edæ, Botō cōwē nōingā ante apænte änōmo imopa, ante eñencæmīnimpa, ante odōmongacäimpa. ²⁶ İnque, Wængonguī nē nō cæcā inongā ingampa, ante mōnō acæimpa. Ayæ adobai, Itota ingante nē pōnēmō iñōmonte Wængonguī nē panguēnengā ingā incæ mōnō imonte ata cæpodinque pōnō badongā ate mōnō wæætē tōmengā ayongā edæ nē nō cæmō bamompa, ante mōnō acæimpa. İnque tōmengā mänōmaī cædinque tōmengā nō nānō cædō ante odōmoncæte ante ñōwo cægacäimpa.

²⁷ İnque mōnō waocabo iñōmō nāmā ængō cæte bai cædinque mōnō, Nāmā cædinque nō cæmō bamompa, ante ædō cæte anguimō. İñæmpa mänōmaī äninque cædāmaī ingæimpa. Quinante nāmā wīi ængō cæquīi, ante wæmīnitawo. Möitee wodi nānō wææ angainō ædæmō eñente cæmō inte bai mōnō, Tōmēmō cætamompa, ancædōmōimpa. Incæte ædæmō eñente dicæ cæmongaa. Wæætē tōmengā ingante wede mōnō pōnēnō beyænque tōmengā ayongā

nō cædōmō bamompa, ante adinque mōnō, Tōmēmō cætamompa, ante ædō cæte anguīi. ²⁸ İñæmpa waocā Wængonguī nānō wææ angainō ante eñente cæcā incæ wīi tōmengā nānō eñente cædō beyæ nē nō cæcā bacampa. Wæætē wede nānō pōnēnō beyænque Wængonguī ayongā edæ nē nō cæcā bacampa, ante do edæ apænebo eñēmaimīnīpa.

²⁹ Oodeomōni iñōmōnīte Wængonguī mōnitō Wængonguī inongā ingampa. Oodeomīni ināmaī imīni guiquēñē, Wīi mōnitō Wængonguī ingampa, ante pōnēmīnitawo. İñæmpa oodeomīni ināmaī iñōmīnīte adocā Wængonguī mīnitō Wængonguī ingampa. ³⁰ Edæ adocanque Wængonguī inongā ingampa. İnque nē eō togæimōni imōni mōni wede pōnēnō beyænque tōmengā pōnō badongā ate tōmengā ayongā edæ nō cæmōni bamōnīpa. Adobai bagāamīni mīni wede pōnēnō beyænque Wængonguī adocanque inongā inte pōnō badongā ate mīnitō adobai tōmengā ayongā nō cæmīni bamīnīpa. ³¹ Mōnō pōnēnō beyænque impa, ante apænedinque mōnitō Wængonguī nānō wææ angainō ante dicæ wēä godonte bai cæmōniyaa. Wīi mänōmaī cæmōnīpa. Wæætē mänōmainō ante apænedinque tōmengā nānō wææ angainō ante Ao äninque mōnitō, Eñēedāni, ante odōmonte apænemōnīpa.

4

Abadäo wodi æbānō cægacäi, ante pōnengæimpa

¹ Mäninō ante mōnitō mæmæ Abadäo wodi iñōmō æbānō ante eñengacäi, ante mōnō ñōwo pōnente apænecæimpa. ² Abadäo wodi nē eñente cæcā ingaingā incæte tōmengā nānō eñente cædō beyænque dicæ nō pōni entawengā bacantawogaa. Mänōmaī cædinque nō cæcā bagacäimpa, ante nāwangā i bai tōmengā woadāni eñēñōnānīte, Waa cæbo imopa, ante do ancægacäimpa. Incæte tōmengā Wængonguī eñēñongante

männinö ante cöwē ännämaï inguēnengä ingacäimpa. ³ Wængonguï æbänö ante apæneccä eñente yewæmongadäni, ante aminii. Edæ iïmaï ante apæneccä eñente yewæmongadänimpa. “Wængonguï nöingä ante apæneccä, ante Abadäö wede pönengacäimpa. Ìninqe tömengä wede nänö pönönö beyænque Wængonguï wæætē edæ, Botö ayömo Abadäö nē nö entawengä ingä abopa, angacäimpa,” ante yewæmongadänimpa.

⁴ Edæ wadäni beyæ waocä nanguï cæcä ate tömēnāni debe badināni inte edæ, Önonque pönömöni æe, ante ædö cæte anguinānii. Ìñæmpa wii önonque godonte impa. Wæætē tömengä nänö nanguï cædinö beyænque paga ante nē godonguēnēnāni inte awēnēidi, Bitö nanguï cæbitapa, ante godönāni ængampa. ⁵ Wængonguï guiquēnē önonque pönö cæcä æmöimpa. Waocä wiwa cæcä incæ wede pönengä adinque Wængonguï pönö badongä ate tömengä Wængonguï ayongante wæætē nö cæcä bacampa. Ìninqe waocä waa cædämaï incæ edæ wede pönengä adinque Wængonguï wæætē tömengä ingante pönö badöinque, Nö pönö bitö entawenguinque bitö wede pönēmi abopa, angampa. ⁶ Waocä waa cædämaï iñongante Wængonguï pönö badongä ate tömengä Wængonguï ayongä nö pönö entawengä ininqe tömengä watapæ quēwencæcäimpa, ante apænedinque Dabii wodi adobai ämotamini ante bai yewæmongacäimpa.

⁷ Adocä yewæmöninque,

“Waodäni eñēnāmaï cædäni inänite Wængonguï pönö ñimpo cæcä ate tömēnāni wæætē watapæ quēwencædänimpa.

Edæ tömēnāni eñēnāmaï nāni cædö ante ö ænte mao tee moncate bai cæcä adinque nanguï tocädänimpa.

⁸ Æcänö ingante Wængonguï, Bitö pante wæquinque wēnæ wēnæ cæbipa, ante cöwē piinte ännämaï ingä ininqe mäningä waocä wæætē nanguï tocæcäimpa.”

⁹ Ante Awēnē Dabii wodi, Eö togæninnānique tocädänimpa, ante dicæ yewæmongantawogaa. Bagäadäni adobai tocädänimpa, ante ancæte ante yewæmongacäimpa. Abadäö wodi Wængonguï ingante wede nänö pönönö beyænque Wængonguï, Botö ayömo Abadäö nē nö entawengä ingä abopa, angacäimpa. Mänömainö ante edæ botö do yewæmömo abaiminipa. ¹⁰ Abadäö wodi æbänö engæñongante Wængonguï männömaï angacäi. Dicæ eö togæningä iñongante angantawogaa. Wæætē bagäacä iñongante angacäimpa. ¹¹ Ìninqe, Abadäö bagäacä inte wede pönengä beyænque botö pönö badömo ate nö cæcä bacampa, ante eñencædänimpa, ante cædinque Wængonguï angä eö togænte bagacäimpa.

Männömaï cæcä beyæ minitö bagäamini inte wede pönemini iñömöni Abadäö wodi minitö wæmængä bai bagacäimpa. Abadäö wodi pæimöni bai wede pönemini adinque Wængonguï adobai, Nö entawemini bamini acæboimpa, ante pönö badongacäimpa. ¹² Mönitö wæmæ Abadäö wodi doyedē bagäacä ingäñedē incæ wede pönengä ingacäimpa. Möni idægocabo iñömö nē eö togæimöni inte edæ tömengä wede pönente nänö cægongalnö adodö tee empote gomönipa. Ìninqe männönö möni wede pönente godönö gomöni beyænque möni eö togæncabo wæmængä adocä Abadäö wodi ingacäimpa.

Mönö wede pönönö beyænque Wængonguï nänö angainö ante cæcä, ante

¹³ Wængonguï, Inguipoga incæ bitö nē ænguimi incæbiimpa, äninque Abadäö wodi tönö tömengä nänömoidi inänite pönö angä ængadänimpa. Mänömainö äninque Wængonguï dicæ, Botö wææ angainö ante eñente cædänique æncædänimpa, ante angantawogaa. Wæætē edæ wede pönente tömengä ayongä

nō entawēnāni badāni beyænque Wængonguī, Inguipoga incæ pönōmo æncæminimpa, ante apænegacäimpa.

14 Wængonguī dicæ, Botō wææ angainō eñente nē cædānique nē ænguīnāni inānīpa, ante angantawogaa. Edæ mänōmainō angā bai mōnō wede pönēnō ante ononque pönencædōmōimpa.

Tömengā nānō angainō incæ wo ewente bai bacædōnimpa.

15 Edæ mäninō tömengā nānō wææ angainō ante eñēnāmai cædāni beyænque Wængonguī ænguī badinque pangampa. Wæætē wææ änāmai inte bai Wængonguī, Botō wææ angainō ante eñēnāmai cæbīpa, ante ædō cæte anguingāā. Edæ dæ ancædōnimpa.

16 Mänōmai beyæ Wængonguī, Botō waadete pönō cædō beyænque æminīpa, ante edonque acæimpa, ante cædinque Abadäo wodi wede nānō pönēnō beyænque ante, Pönōmo æncæminimpa, angacäimpa. Mōnitō Mōitee wodi nānō wææ angainō ante nē eñēmōni iñōmōnite wī adomōnique imōnite angacäimpa. Wæætē Abadäo wodi nānō wede pönengai bai adobai wede pönēmō iñōmonte mōnō tömāmō imonte Wængonguī, Cōwē pönōmo æncæminimpa,

Edæ mōnō wede pönencabo iñōmonte Abadäo wodi tömāmō wæmængā bai ingacäimpa.

17 Wængonguī edæ do wængaināni inānite pönō cæcā ate tömēnāni iñōmō nāni omæmonte edæ miināni quēwēnānīpa. Dæ angaincoo incæ tömengā do badongā ate edæ a ongoncoopa. Wængonguī mänōmai nē badongā iñongante Abadäo wodi tömengā ingante nē wede pönengā ingacäimpa. Ininque Wængonguī, “Abadäo eñēmi. Botō pönō badōmo ate bitō pæināni yebæninque wacabodāni nāni cabo wacabodāni nāni cabo nanguī ināni iñōnānite edæ bitō adobique tömēnāni wæmæmi incæbiimpa.” Ante Wængonguī beyæ ante yewæmongatimpa. Ininque Wængonguī ayongante mōnō wede

pönēmō iñōmonte Abadäo wodi mōnō wæmængā bagacäimpa.

18 Tömengā ingante, “Bitō pæināni edæ mänimpodāni bacædānīpa,” ante Wængonguī do angacäimpa. Mänōmainō angā eñēninque, Ædō cæte baquīi, ante wædongā incæ Abadäo wodi, Wængonguī cōwē cæcā beyæ watapæ bacæimpa, ante wede pönengā ingacäimpa. Ininque tömengā wede nānō pönēnō beyænque “wacabodāni nāni cabo wacabodāni nāni cabo nanguī ināni bayōnānite tömēnāni wæmængā” Abadäo bagacäimpa.

19 Tömengā, Botō picængadebo wodo tiēē wadepo quēwengaimo inte edæ botō baō wænte bai eñabo inte edæ ædō cæte wēñæ tapæiquimoo, ante eñengacäimpa. Ayæ, Tada adobai wēñæ cōwē mänāmai ingaingā inte picængadecā badinque ædō cæte wēñæ manguingāā, ante pönengacäimpa. Incæte mäninō nānō wædō beyænque guiñēñadāmai inte Abadäo wodi Wængonguī nānō äninō ante godōmenque pönengacäimpa.

20 Tömengā, Wængonguī wabānō cæbaingāā, ante wædāmai inte wæætē Wængonguī nānō, Cōwē pönō cæcæboimpa, äninō ante wede pönengacäimpa. Ayæ, Wængonguī bitō nāo entawēmi inte tæi emonte waa cæcæbiimpa, ante godōmenque tæi piñænte entawēninque Abadäo wodi wede pönengacäimpa.

21 Edæ, Wængonguī nē tæi piñængā inte, Cōwē cæcæboimpa, ante nē angaingā inte edæ cōwē cæcæcäimpa, ante Abadäo do eñēninque edæ wede pönengacäimpa. 22 Tömengā mänōmai wede pönengā beyænque Wængonguī, Abadäo bitō nō entawēmi imi abopa, angacäimpa.

23 Mänine, Bitō nō cæbi imi abopa, ante nānō angaine iñōmō wīi tömengā beyænque yewæmongatimpa.

24 Wæætē mōnō beyæ adobai yewæmongatimpa. Edæ, Mōnō Awēnē Itota ingante Wængonguī angā nāni omæmongacäimpa, ante nē angaingā ingante wede pönēmō

iñömönte Wængongui, Botö ayömo mīnitö nö cæmīni imīni abopa, ante badongampa. ²⁵ Wænæ wænæ mönö cædö beyænque mönö Awēnē Itota ingante Wængongui pædæ godongä wængacäimpa. Ayæ mönö beyæ ante cædinque tömengä mönö Awēnē Itota ingante, Bitö nē nö cædömi inte ñāni ömæmōmi beyænque tömēnāni botö ayömo nö entawēnāni bacædānīmpa, ante cædinque angä ñāni ömæmongacäimpa.

5

Wængongui badongä ate mönö nö cæmō bamōmpa

¹ Mönö wede pönēnō beyænque Wængongui pönö badongä ate mönö tömengä ayongante edæ nö cæmō bamōmpa. İninque mönö Awēnē Itota Codito nānō cægāinō beyænque Wængongui piyænē cæcä ate mönö tömengä tönö godongämæ gänē entawente quēwēmōmpa. ² Mönö wede pönēnō beyæ adocä Codito mönö imonte pönö ænte māmōngä ate Wængongui waadete pönö cædinque mönö imonte ængampa. Ayæ Wængongui nē ñāö emōngä weca ongōñömö tömengä pönö badongä ate mönö godongämæ ñāö emonte mönö watapæ bacæimpa, ante wede pönēninque tomōmpa.

³ Ayæ wīi māninque beyæ tomōmpa. İñæmpa, Waocä nānō wæntædāmaī inte ee cæquinque caate wæcampa, ante eñēmö İninque mönö caate wæmō incæte caate mönö wædö beyæ adobaī tomōmpa. ⁴ Ayæ nē wæntædāmaī inte ee cæmō adinque mönö Wængongui ayongä nē waa cæmō edæ bamōmpa. Mänōmaī bamö İninque mönö, Watapæ bacæimpa, ante pönente tomōmpa. ⁵ Mänōmainö ante nē pönente tomö iñömö edæ mönö ænguēnēnō ante do æninque mönö guingo imonte wædāmaī imōmpa. Edæ Wængongui tömengä Tæiyæ Waēmö Önōwoca ingante da pönōninque tömengä nānō

waadete pönēnō adobaī do pönongä æninque mīmōnē entawēmōmpa.

⁶ Edæ İmaī impa. Mönö aquīimö pönī inōmo inte, Ædö cæte cæmōö, ante wæyömönte mönö Codito iñömö eyepæ pönī pöninque, Mīnitö Wængongui ayongante wīwa cæmīni imīnīpa, ante adinque wīwa mönö cædö ante teēmente wæætē wængacäimpa. ⁷ Waocä guiquēnē wacä nē nö cædongä ingä adinque tömengä beyæ wæætē dicæ wænguingäa. Incæte, Nē waa cædongä wæætē quēwencæcäimpa, ante cædinque adocanque adocanque wabānō Ao ante tömengä beyæ wæætē wæmainānīpa. ⁸ Incæte, Wængongui mīnitö imīnite nanguī waadete pönēngampa, ante odōmoncæte ante cædinque mönö Codito iñömö nē wænæ wænæ cæmō iñömönte mönö beyænque wæætē wængacäimpa. ⁹ Codito wepæ mönö beyæ pe tæ pe tæ wææ beyænque mönö Wængongui ayongante nö entawēmö do batamōmpa. Codito mönö beyæ mänōmaī wængaingä inte cōwē godōmenque cæcæcäimpa.

Ämo eñēedāni. Wængongui nē pīinte panguēnēngä iñongante adocä Codito gä pe æmpote ængä beyænque Wængongui wæætē mönö imonte edæ ata cæpocä quēwencæmōimpā. ¹⁰ Mönö edæ Wængongui tönö mönö godongämæ pīincabo iñömönte tömengä Wengä mönö beyæ wæætē wængä beyænque mönö Wængongui tönö godongämæ piyænē cæmō bagamōimpā. Mönö Wængongui tönö godongämæ piyænē cæmō İninque tömengä Wengä iñömö cōwē godōmenque cæcæcäimpa. Ämo eñēedāni. Tömengä adocä do wængaingä inte ñāni ömæmōnte mīingä quēwēninque mönö imonte ængä beyænque mönö wænāmaī inte cōwē quēwencæmōimpā. ¹¹ Ayæ mönö godōmenque İmainö ante eñēngæimpa. Mönö Awēnē Itota Codito ængä beyænque Wængongui piyænē cæcä İninque mönö ñōwo Wængongui nempo quēwēninque edæ

Itota Codito beyæ ante watapæ tomompa.

Tānocä Adäo wodi bai Codito adobai Tānocä ingampa

¹² Docä mæmæ adocanque tānocä incæ eññämaï cæcä ininque mōnō wēnæ wēnæ cæpāmo inguipoga do pongatimpa. Ayæ tōmengä nānō eññämaï cægainō beyænque nē wæwocacä bagacäimpa. Tōmengä wēnæ wēnæ cæcä ingaingä bai mōnō tōmāmō adobai nē wēnæ wēnæ cæmō imō ininque edæ mōnō waocabo tōmāmō nē wæwocamō edæ do bagamōimpa. ¹³ Edæ wēēñēdē Möitee wodi nānō wææ änämaï iñedē incæ waodāni do wēnæ wēnæ cædāni ingadānimpa. Wēnæ wēnæ cædāni incæte Wængonguï, Botō wææ änō ante eññämaï cæminipa, ante ædō cæte apænte anguingä. Iñæmpa māniñedē ayæ wææ änämaï ingacäimpa. ¹⁴ Nē Ponguingä, ante dodāni nāni nē angaingä iñōmō Tānocä nānō ingai bai docä Adäo wodi adobai tānocä ingacäimpa. Incæte Adäo wodi Wængonguï nānō wææ änō ante eññämaï cædinque wēnæ wēnæ cægacäimpa. Wæætē Wængonguï edæ Möitee wodi nānō quēwenganca wææ änämaï iñongante Adäo wodi pæināni guiquēnē wēnæ wēnæ cædāni incæte tōmengä nānō eññämaï cægai bai wii adobai eññämaï cægadānimpa. Incæte tōmēnāni nē wæwocadāni inte wægadānimpa.

¹⁵ Incæte Wængonguï nānō wææ angainō ante adocanque nānō eññämaï cægai bai Wængonguï nānō pōnongai iñōmō wii adobai impa. Edæ adocanque nānō eññämaï cægai beyænque nanguï ināni inte wængadānimpa. Incæte Wængonguï guiquēnē nanguï pōni waadete pōnō cædinque Itota Codito ingante da pōnongä pōninque tōmengä adocanque inongä waadete eyepæ pōni pōnō cæcä ate mōnō nanguï pōni imō inte quēwēmpa. ¹⁶ Onguñængä adocanque wēnæ wēnæ nānō cægai beyæ nē wæwocadāni bagadānimpa.

Wængonguï nānō pōnongai iñōmō edæ wii adobai impa. Adocanque nānō adopoque eññämaï cægainō ante adinque Wængonguï tōmengä ingante apænte äninque edæ, Bitō tente wæquinque impa, angacäimpa. Wæætē Wængonguï nānō wææ angainō ante eññämaï wæætē wæætē cæmō incæte tōmengä, Botō ayōmo mīni nō entawenguinque impa, ante önonque pōnongä ænte entawēmpa.

¹⁷ Waocä adocanque incæ Wængonguï nānō wææ angainō ante eññämaï cæcä ininque tōmengä adocanque nānō eññämaï cægai beyænque mōnō wæwocamō do bagamōimpa. Wængonguï guiquēnē godōmenque eyepæ pōni waadete pōnō badongä ate tōmengä ayongä mōnō nō entawēmō bagamōimpa. Ininque Itota Codito adobai Adocanque iñongante mōnō tōmengä nempo wæwocadāmaï inte quēwēninque awēñēidi bai badinque quēwēmpa.

¹⁸ Mänōmaï beyæ adocanque adopoque eññämaï cæcä beyænque Wængonguï mōnō tōmāmō imonte apænte äninque, Mīni wænguinque wēnæ wēnæ cæminipa, angampa. Ayæ adobai Adocanque adopoque nānō nō cægainō beyænque mōnō Wængonguï ayongä nō cæmō bamō ininque Wængonguï apænte äninque mōnō tōmāmō imonte, Mīni quēwenguinque mīnitō botō ayōmo nō entawēmīni bamīnipa, angampa. ¹⁹ Edæ adocanque nānō adopoque eññämaï cægai beyænque mōnō nanguï imō incæ edæ nē wēnæ wēnæ cæmō bagamōimpa. Adobai Adocanque nānō adopoque eññämaï cægai beyænque mōnō nanguï imō incæ edæ Wængonguï ayongä nō cæmō bagamōimpa.

²⁰ Mōnō waocabo wēnæ wēnæ cæyōmonte Wængonguï, Botō wææ änō eññämaï inte cæminipa, ante edonque acæminipa, ante wææ angacäimpa. Wææ angä ate edonque adinque mōnō waocabo wæætē, Nanguï eññämaï inte cæte awædō, ante wæyōmonte Adocä

incæ godömenque nanguï waadete pönö cæcä æmompä. ²¹ Ìninqwe mönö eññämaï cægai beyæ mönö nē wæwocamö bagamöimpa. Wæætē mönö Awēnē Itota Codito waadete pönö nō cæte badongä ate mönö cōwē wænāmaï quēwēnguinque Wængonguï ayongä nō entawēmö bagamöimpa.

6

Codito nempo quēwēninqwe mönö nē wīwa cædongä nempo wīi quēwēmompä

¹ Ìninqwe mönö æbänö anguï. Pancadāniya iïmaï ānewēnānīpa. Wængonguï godömenque waadete pönö cæcæcäimpa, ante cædinque mönö godömenque wēnæ wēnæ cæcæimpa, ante tedewēnānīpa. Mönö iñömö dicæ mänömainö ante tedewenguēnēmö imongaa. ² Ìñæmpä ædö cæte mänömainö ante tedewenguï. Wēnæ wēnæ mönö cæte quēwēmāmo pædæ godömo æninqwe Codito teēmē mongæninqwe wæñongante mönö tömengä tönö godongämæ wænte bai inömo inte ædö cæte godömenque wēnæ wēnæ cæte quēwenguï. ³ Mönö Itota Codito nempo quēwengæimpa, ante æpænē guiddinque mönö tömengä tönö godongämæ wængaimö bai batamompä, ante mīnitö iñömö eññämaï imīnitawo. ⁴ Tömengä wænte öññongante Mæmpo Wængonguï nē ñäö entawēnongä inte tæi emönongä inte, Ñāni ömæmöe, angä ñāni ömæmongacäimpa. Ìninqwe mönö iñömö edæ, Codito tönö ñāni ömæmonte bai mönö mīimö quēwengæimpa, ante cædinque æpænē guiddinque tömengä wodido godongämæ guite bai wænte bai öñontamompä.

⁵ Edæ tömengä wængä ate godongämæ wænte bai bagaimö ininqwe mönö tömengä ñāni ömæmongä ate tömengä tönö äawocaque bai ewocate ñāni ömæmonte bai quēwēmāmo

⁶ Waocä nänö nē ö ænināni inte tömengä beyænque cæte nē quēwēnāni bai mönö adobai wēnæ wēnæ mönö cædö beyænque

wægämöimpa. Mänömaï inte wæyömonte mönö Codito iñömö, Aamö cæte gocæminimpa, ante cædinque wēnæ wēnæ cæte mönö wentamö mongæñö ö ænte teēmē mongængantapa. Ee mongæñongante tömengä ingante awāa timpodāni wængä adinque baonque ante mönö wēnæ wēnæ cæpāmo iñömö ewente bai ba ininqwe mönö do aamö cæte bai mäninö ante emö cæte gomompä. ⁷ Waocä æmæwo wængaingä inte edæ ædö cæte wēnæ wēnæ cæquingä. Edæ tömengä nänö wēnæ wēnæ cægainö ante emö cæte aamö cæte bai gogaingä ingampa.

⁸ Mönö Codito tönö äawocaque bai ewocadinque adopoque wængaimö inte mönö tömengä tönö godongämæ quēwengæimpa, ante wede pönēmompä.

⁹ Edæ do wænte ñāni ömæmonte mīingä quēwēnongä inte Codito wæætē mēmpoga wænguingä ināmaï ingampa. Tömengä ñöwo wæwocadāmaï iñongante tömengä ingante, Wæmäwe, ante ædö cæte anguï. Ìñæmpä, wænāmaï incæcäimpa, ante do eññēmompä.

¹⁰ Tömengä adopoque wæninqwe mönö wēnæ wēnæ cægainö ante æmæwo wido cæcæte ante teēmē mongænte wængacäimpa. Wæætē ñāni ömæmonte mīingä quēwēninqwe tömengä, Wængonguï beyænque cæte quēwencæboimpa, ante quēwengampa.

¹¹ Mīnitö adobai Codito nempo quēwēnömīni inte wīwa mīni cægainö ante æmæwo wido cæcæte ante cædinque, Itota Codito tönö adopoque wængaimö imompä, ante wæætē, Mönö Wængonguï beyænque cæte quēwengæimpa, ante pönēninqwe quēwēedāni.

¹² Mänömaï beyæ mīnitö, Baonga mönö ñömænguïñö quēwēninqwe mönö wēnæ wēnæ cæinēnö ante mönö eññente cædāmaï ingæimpa, wænāmaï wææ aadinque edæ wēnæ wēnæ mīni cæinēwēnö ante edæ eññämaï inte quēwēedāni. ¹³ Ayæ mīnitö, Bado, ante edæ, Botö baonca wīwa cæcæimpa, ante edæ mīnitö baö

quiōmē ī incæ wēnæ wēnæ cæquinque ante edæ godō cædāmaī iedāni. Wæætē do wæwocagaimīni inte ñāni ōmæmonte mūimīni quēwēninque mīnitō wæætē Wængonguī ingante nāmā godōmīni æncæcāimpa. Edæ, Botō baō īni edæ tōmāo Wængonguī quī impa, ante pædæ godōninque mūimīni quēwēñōmīnite tōmengā wæætē mīnitō tōnō godongāmæ cædinque nō pōni cæcæcāimpa. ¹⁴ Edæ Mōitee wodi nānō wææ angainō ante ēñēmīni incæte wīi mānīnō beyænque quēwēmīnīpa. Wæætē Wængonguī waadete pōnō cæcā beyænque quēwēmīni inte mīnitō wēnæ wēnæ mīni cæinēwēnō ante ēñente cædāmaī inte quēwencæmīnīpa.

Wiwa mōnō cæinēwēnō ante mōnō ēñēnāmaī ingæimpa

¹⁵ Mōitee wodi nānō wææ angainō ante ēñente beyænque wīi quēwēmō inte mōnō Wængonguī waadete pōnō cæcā beyænque quēwēmōmpa. Nāwangā impa. Īnīnque mōnō æbānō cæquīī. Wadāni īñōmō idiquibæ ante pōnēninque, Wængonguī pōnō cæcā beyænque nē quēwēnōmō inte mōnō wæætē wēnæ wēnæ cæcæimpa, ante tedewēnānīpa. Mōnō īñōmō ædō cæte mānōmainō ante cæquīmōō.

¹⁶ Wacā ingante nē cæte quēwēmīni bacæte ante cædinque mīnitō, Bado, bitō botō awēnē badīnque edæ āmi ēñente nē cæbo baboe, āmīni ĩnīnque edæ māningā mīnitō ĩmīnite ō ængā ate tōmengā beyænque cæte quēwēmaīmīnīpa. Mānīnō ante pōnēmīniyaa. Ayæ adobaī mīnitō wēnæ wēnæ cæinente mīni wædō ante Ao ante cæmīni ĩnīnque mīni wænguinque edæ mānīnō beyænque cæte nē quēwēmīni inte wæbaīmīnīpa. Wæætē Wængonguī ingante, Bado, bitō botō Awēnē ĩnōmi inte edæ āmi ēñente nē cæbo baboe, ānīnque mīnitō nō cæte mīni quēwenguinque tōmengā beyænque nē cæmīni babaīmīnīpa. ¹⁷ Mīnitō doyedē mīni wēnæ wēnæ cæinēwēnonque ante cædinque mīnitō awēnē beyænque cæte nē quēwēmīni baī ingamīnīpa. Nōwo

guiquēnē Wængonguī nō nānō ānō ante odōmōmōni ēñēninque mīnitō ĩnonque ante edæ nē ēñente cæmīni bamīnitapa. Mānōmaī bamīnīpa, ante adīnque botō Wængonguī ingante waa ate pōnēninque apænebopa. ¹⁸ Ayæ wēnæ wēnæ mīni cædō beyænque cæte nē quēwēmīni inte wæyōmīnite Wængonguī ñīmpo cæcā ate mīnitō abæ tawænte ee gote baī quēwēmīnīpa. Nōwo wæætē tōmengā nānō nō cædonque ante ēñente cæmīni ĩnīnque mīnitō edæ nē nō cædongā nempo quēwēninque tōmengā beyænque cæte nē quēwēmīni bamīnīpa.

¹⁹ Mīnitō ōnōmīnīque inte æiquedō ædæmō ēñenguīmīni, ante wædinque botō, Waocā nānō cæi baī impa, ante tededīnque odōmōmo aedāni. Wēēnēñedē wēnæ wēnæ cædinque godōmenque quingāmē baī quēwencæte ante mīnitō, Bado, ante quiōmē incæ mīni baonga wīwa cæquinque pædæ godō cæmīnitapa. Mānōmaī beyænque ēñēnāmaī mīni cæinēwēnō ante ēñente cædinque edæ mīnitō mānīnonque ante nē cæte quēwēmīni ingamīnīpa. Nōwo guiquēnē tæiyæ waēmō mīni ēwocate quēwenguinque ante mīnitō baō īni edæ, Wængonguī quī impa, ante tōmāo pædæ godōedāni. Ayæ mīni nō cæquinque ante edæ tōmengā beyænque nē cæmīni inte quēwēedāni. ²⁰ Wēēnēñedē ĩñōmō mīnitō wēnæ wēnæ mīni cæinēnō beyænque cæte nē quēwēmīni baī inte wægāmīnīpa. Māniñedē mīnitō nē nō cædongā nempo quēwēnāmaī ingaimīni inte tōmengā nānō angainō ante edæ ēñēnāmaī ingamīnīpa. ²¹ Māniñedē quingāmē baī mīni cægāinō ante pōnente wædinque mīnitō ñōwo ĩñōmō guingo imonte bamīnīpa. Edæ mānīnō mīni wīwa cægāinō beyæ ante dicæ watapæ tote bamīniyaa. ĩñæmpa edæ mīni wænguinque mānōmaī cægāmīnīpa.

²² Nōwo guiquēnē, Wēnæ wēnæ mīni cæinēwēnō ante idæwaa ēñencæmīnīpa, ante cædinque Wængonguī gā pe æmpote ængā ate

mīnitō abæ tawænte bai Wængongui nempo wæætē ee pongamīnīmpa. Īnīnque nē gā pe æmpocā nempo quēwēnīnque mīnitō tōmēngā ingante cæte nē quēwēmīni inte mīni cōwē wænāmaī quēwēngūnque tæiyæ waēmō ēwocamīni bamīnīpa. ²³ Mōnō waocabo mōnō wēnæ wēnæ cædō beyæ ante paga cæte bai cædinque Wængongui mōnō īmonte pōnō pangā wænguēnēmō īmōmpa. Wæætē, Wantæpiyæ quēwēncæmīnīmpa, ante adocā incæ mōnō Awēnē Itota Codito tōnō godongāmæ cædinque mōnō īmonte ōnonque pōnō ængā beyænque mōnō cōwē wænāmaī quēwēmōmpa.

7

Ēñente cæquēnēmō inte ñā cæyænte bai ingamōīmpa

¹ Īñānāni ēñēedāni. Mōitee wodi nānō wææ ante yewæmongainō ante do adīmīni īmīni incæte mīnitō īmaī ante ēñēmīniyaa. Edæ, Ēñente cæedāni, ante tōmēngā mīināni quēwēnānīque īnānite wææ ante yewæmongacāīmpa. Īnīnque waocā do wæningā īñongante, Cæe, āñōmō tōmēngā mīingā ingampa diyæ cæquingā. Edæ dobæ wængāīmpa.

² Īimainō ante pōnēedāni. Onquiyængā ingante ñānōnāni mongā ate tōmēngā nānōogængā mīingā nānō quēwēnganca onquiyængā īñōmō tōmēngā nānōogængā ingante ēñente quēwēncæcāīmpa, ante wææ ante yewæmongatīmpa. Wæætē edæ tōmēngā nānōogængā wængā ate onquiyængā owæmpoingā inte adocanque quēwēñongante mānōmainō ante edæ ædō cæte wææ angūī.

³ Īnīnque nānōogængā ayæ mīingā quēwēñongante onquiyængā wacā ingante godō guēa mongā adīnque, Bitō nānōogængā mīingā īñongante bitō wacā ingante guēa godō mōmīpa tōō, ante pīinānīpa. Incæte tōmēngā nānōogængā wængā ate abæ tawænte gote bai tōmēngā adocanque quēwēñongante, Wacā ingante mōnāmaī incæbiīmpa, ante ædō cæte

wææ angūinānī. Do owæmpoingā inte wacā ingante mongā adīnque tānocā quēwēngampa diyæ wææ angūinānī. Edæ owæmpoingā inte tōmēngā do mongampa.

⁴ Mānōmaī beyæ botō tōñīñamīni, Mōnō adobai īmōmpa, ante āmo ēñēedāni. Ñānōnāni nē mōningā īñōmō ēñente cæquēnēngā ingā bai mīnitō wēēñēñedē adobai Mōitee wodi nānō wææ angainō ante ēñente cæquēnēmīni inte ñā cæyænte bai ingamīnīmpa. Mānōmaī inte wæyōmīnite Codito īñōmō, Mīnitō botō nempo quēwēnīnque waincate bai cæmīni badīnque Wængongui beyænque ante ēñente cæcæmīnīmpa, ante pōnō cægacāīmpa. Tōmēngā baonga ponte ēñadīnque mōnō beyæ wænīnque ñāni ōmæmongacāīmpa. Īnīnque mōnō tōmēngā tōnō adobai wænte bai ingaimō inte mōnō wēēñēñedē mōnō ēñēngūēnēngainō ante edæ ædō cæte wæætē ēñēngūēnēmō ingūimōō. Wæætē edæ nē ñāni ōmæmongaingā nempo quēwēnōmo inte mōnō tōmēngā quīmō īñōmō īmōmpa.

⁵ Doyedē īñōmō mōnō nē wæwocamō īñōmō inte baonque ante pōnente mōnō quēwēñedē Mōitee wodi nānō wææ angainō ante ēñente wædinque godōmenque wīwa cæinēwente wæmō batamōmpa. Īnīnque mōnō baaca incate bai cædinque mōnō wænguīnque wēnæ wēnæ cætamōmpa. ⁶ Wēēñēñedē wææ ānāni ate mōnō, Ædō cæte ēñente cæquīī, ante ñā cæyænte bai wægaimō inte mōnō edæ Codito tōnō adopoque wænte bai ñī cæyænte bai bagamōīmpa. Ñōwo guiquēñē adopoque wængaimō inte mōnō Mōitee wodi pedæne ante nānō wææ ante yewæmongainō ante wīī ēñente cæquēnēmō inte abæ tawænte bai gomōmpa. Wæætē edæ Wængongui Tæiyæ Waēmō Ōnōwoca beyæ quēwēmō īñōmō inte mōnō tōmēngā mīine nānō ānonque ante ēñente cæmō īmōmpa.

Wënæ wënæ botö cædö beyæ ante wæbopa, ante

⁷ Ìninqe æbänö ante anguïmoo. Möitee wodi, Wënæ wënæ cæqui, ante yewæmongacäimpa, ante botö dicæ antawogaa. Ædö cæte edæ mänömaï anguïi. Ìñæmpa tömengä wææ änämaï ingä bai botö, Quïnö wënæ wënæ cæte i, ante ëñënämaï incædömoïmpa. Botö edæ, Wacä qui æinente wæbo incæte botö ænämaï inte ee abo inte waa cæbopa, ante pönengaboïmpa. Möitee wæætë, “Wacä qui ante æinente wædämaï ie,” ante wææ angä beyænque botö, Æ æinente botö wædö incæ wënæ wënæ ïmpa, ante tæcæ ëñentabopa. Mäninö ante änämaï ingä bai botö, Wënæ wënæ ïmpa, ante ëñënämaï incædömoïmpa. ⁸ Ìninqe në wënæ wënæ cædömo inte botö Möitee nänö wææ angainö ante önömoncaque ëñente ate botö quingämë bai tömancoo ante godömenque æinente wætabopa. Edæ tömengä wææ änämaï ingä bai mönö wënæ wënæ cædö iñömö edonque inämaï inte edæ dæ ante bai incædönïmpa.

⁹ Möitee wodi wææ ante nänö yewæmongainö ante botö adämaï imoyedë botö önönque wædämaï quëwengaboïmpa. Wæætë, Ìimaï wææ ante yewæmonte ongompa, ante adinqe botö, Æ, wënæ wënæ cæbo imopa, ante tæcæ ëñëninque, ¹⁰ edæ näñe wænte bai botö, Wæwocabo imopa, ante wætabopa. Edæ, Ìimaï cædinque quëwencæminïmpa, ante wææ ante nänö yewæmongainta adinqe botö edæ, Botö wænguinque wii ëñente cæbopa, ante tæcæ ëñëninque wætabopa. ¹¹ Edæ Möitee wodi wææ ante nänö yewæmongainta do adïmo inte mäninö ante ëñënämaï cædinque botö pante wænguinque wënæ wënæ cætabopa. Edæ, Önönque wënæ wënæ cæte tocæi, ante wapiticæ pönente cæyömote tömengä nänö wææ angainö ante odömönäni ëñëmo beyænque botö, Æ, botö wænguinque wënæ wënæ cæbopa, ante wægaboïmpa.

¹² Wængonguï nänö wææ angainö iñömö tæiyæ waëmö ïnepa. Ayæ Möitee wodi adobaï mänine tæiyæ waëmö ïnedö ante apænedinqe, Ìimaï cæedäni, ante wææ äninque, Mïni waa cæte quëwenguinque ëñente cæcæminïmpa, ante nöingä pönï angacäimpa.

¹³ Ìninqe tömengä, Mïni waa quëwenguinque ïmpa, ante nänö wææ angainö incæ botö imote ædö cæte wænonguïi. Wængonguï wæætë, Quïnö wënæ wënæ cæte i, ante edonque acæminïmpa, ante pönö waa cædinque, Minitö ëñënämaï imini beyænque mïni wænguinque ïmpa, ante wææ angacäimpa. Ìninqe Wængonguï nänö wææ angainö beyænque botö iñömö, Wënæ wënæ cægaboïmpa, ante edonque atabopa.

¹⁴ Minitö tæiyæ waëmö ëwocacæminïmpa, ante Wængonguï mönö önöwoca beyænque ante wææ angacäimpa, ante do ëñëmompa. Incæte botö wiwa cædönö beyænque cæte në quëwëmo inte botö edæ ömæwocate bai inte wæbopa. ¹⁵ Edæ botö waa cæinente wædö ante cædämaï inte botö wæætë edæ, Wii cæinente awædö, ante botö piïnte adö incæ edæ do cæte wæbopa. Ìninqe botö, Æbänö cæboo, ante ëñënämaï imopa. ¹⁶ Wængonguï nänö wææ angainö ante ëñënämaï cæbo incæte botö ëñënämaï botö cædö ante wii cæinëmopa. Mänömaï botö wii cæinënö beyænque botö, Wængonguï waa cædinque wææ angacäimpa, ante bai cædinque tömengä nänö wææ angainö ante edæ Ao ante bai cæbopa. ¹⁷ Incæte botö wodi wii tömëmo änö ante cæbopa. Wæætë edæ botö wiwa entawënö beyæ wii cæinente botö wædö ante do ëñente cædinque wæbopa. ¹⁸ Edæ ancaa waa cæinente wæbo incæte botö dicæ waa cæbogaa. Mänömaï beyæ botö, Botö baonga quëwëninque botö waa cæquinö iñömö edæ dæ ampa, ante do ëñëmopa. ¹⁹ Waa pönï botö cæinënö incæ cædämaï inte wæbopa. Wæætë edæ wënæ wënæ cæte botö wii cæinente wædö ante ancaa cæte

wæbopa. ²⁰ Īninqe botō wīi cæinēmo inte do cæbo Īninqe wīi tōmēmo cæbopa. Wæætē wīwa cæquinque botō entawēnō beyænque edæ wēnæ wēnæ cæte wæbopa.

²¹ Waa cæinente wæbo incæte botō wēnæ wēnæ cæquinō edæ do entawente wæbopa. Īninqe botō ñā cæyænte bai ĩmopa, ante do abopa.

²² Edæ botō Wængonguī nānō wææ angainō ante mīmōnē pōnēninqe watapæ tobopa.

²³ Incæte, Wængonguī nānō wææ angainō ante botō pōnēnō incæ ēñēnāmaī ingæimpa, ante botō edæ wade wææ ante entawente bai inte wæbopa. Īninqe nāmā wææ ante bai mīmōnē botō pōnēnō tōnō wade, Ēñēnāmaī ingæimpa, ante wææ ante botō entawēnō tōnō nāēmæ guēadō guēa cæ bai inte wæbopa. Edæ mānīne beyæ wīwa botō cæquinō entawēninqe botō yæguincamenca ñā cæyænte bai inte wæwēmopa.

²⁴ Edæ cætawente wænguī wæ. Botō wīwa cæquinō entawente beyæ botō wænguīñō ēñate wæyōmote æcānō edæ æna beyænque quēwēmaīmo, ante wæbopa. ²⁵ Edæ, Itota Codito beyænque quēwenguīmo ĩmopa, ante botō Wængonguī ingante waa ate pōnente apænebopa. Īninqe Wængonguī nānō wææ angainō ante ēñēninqe botō tōmēmo mīmōno tōmengā beyænque cæte nē quēwēmo ĩnōmo ĩmopa. Incæte botō ēñayō beyæ botō wīwa cæinēnō beyænque cæte nē quēwēmo inte wæbopa.

8

Wængonguī Ōnōwoca ingante ēwocate quēwengæimpa

¹ Īninqe mōnō Itota Codito nempo quēwēninqe mōnō wīwa cæinente wæwēnō ante cædāmaī ĩnōmō inte wæætē tōmengā Ōnōwoca pōnō angā ēñēninqe cæte quēwēmō adinqe Wængonguī ĩñōmō, Mīni wænguinque, ante apænte ānāmaī ingampa. ² Edæ wīwa cæinente mōnō wæwēnō ante mōnō wænguinque ēñente

cæyōmote Itota Codito ĩñōmō pōnō gā peyæmpote bai ō ængā beyænque mōnō abæ tawænte ee gote bai quēwēmompa. Ayæ tōmengā Ōnōwoca nē quēwēnongā nānō wææ ānō ante wæætē mōnō ēñente cæinente quēwēmompa.

³ Edæ Mōitee wodi, Īmaī cæedāni, ante wææ āñongā mōnō ĩñōmō wīwa cæinente mōnō wæwēnō beyænque aquīi pīñænāmaī ēñadōmō inte, Mōnō ædō cæte ēñente cæquīi, ante wægāmōimpa. Mōnō wao-cabo mānōmaī wēnæ wēnæ cædōmō inte wæyōmō Wængonguī wæætē, Waocā bacæcāimpa, ante tōmengā Wengā ingante da pōnongā pōninqe mōnō wīwa cæinentai bai adotai bai ēñate pægacāimpa. Ēñate pædinque tōmengā nāmā baō nānō ēñayō ante edæ, Wængonguī quī impa, ante pædæ godonte bai cædinque wēnæ wēnæ mōnō cædō beyænque ante wængacāimpa. Mānōmaī cædinque Wængonguī mōnitō ĩmōnite apænedinqe, Mīni wænguinque mīnitō baonga ēñadinque wēnæ wēnæ cæmīni awædō, ante apænte angacāimpa. ⁴ Mānōmaī pōnō cædinque tōmengā, Wīwa cæinente mīni wæwēnō ante ēñente cædāmaī inte mīnitō ñōwo wæætē botō Ōnōwoca ingante ēwocadinque tōmengā beyænque quēwēmīnīpa. Īninqe nō pōnī botō wææ angainō ante tōmānō ante ēñēninqe nō cæte quēwencæmīnīpa, ante cægacāimpa.

⁵ Adopoque ēñadinque baonque nē ēñadāni guiquēnē wīwa cæinente nāni wæwēnō ante pōnente cædānīpa. Mempoga ēñadinque Wængonguī Ōnōwoca ingante nē ēwocādāni guiquēnē tōmengā nānō ānonque ante pōnente cædānīpa. ⁶ Wīwa cæinente nāni wæwēnō ante cæcæte ante nē pōnēwēnāni guiquēnē tōmēnāni nāni wænguinque mānīnō ante pōnēwēnānīpa. Wæætē Wængonguī Ōnōwoca angā ēñente nē pōnēnāni guiquēnē tōmēnāni nāni gānē entawente quēwenguinque edæ mānōmaī pōnēnānīpa. ⁷ Waodāni wīwa

näni cæinente wæwënö ante cæcæte ante nē pönëwënäni iñömö edæ Wængonguï ingante püinte cædänipa. Wængonguï nänö wææ änö ante tömënäni önömoncaque eññänäni inte edæ wüi eñente cædänipa. Iñæmpa tömengä Önöwoca ingante ewocadänipa diyæ eñente cæquinänii. ⁸ Wiwa cæinente näni wæwënö ante cæcæte ante nē cædäni iñömö, Wængonguï waa acæcäimpa, ante ancaa cædäni incæte Wængonguï wæætë edæ waa todämaï incæcäimpa.

⁹ Minitö guiquënë Wængonguï Önöwoca ingante ewocamini ininque edæ wiwa cæinente mini wæwëninö ante cædämaï inte quëwëmini imaiminipa. Wæætë edæ tömengä Önöwoca angä eñente cæte quëwëmaïminipa.

Incæte waocä æcämenque incæ Codito Önöwoca ingante ewocadämaï ingä ininque tömengä wæætë Codito nempo quëwënamäi imaingampa.

¹⁰ Minitö guiquënë Codito ingante entawëmini ininque wënæ wënæ mini cægäinö beyænque minitö baö incæ tömengä tönö adopoque wænte bai eñaminipa. Incæte Codito nänö nö cædönö entawëmini inte minitö önöwoca mempoga eñate bai müiwoca ewocaminipa.

¹¹ Itota ingante Wæmpocä, Nñani ömæmöe, angä eñëninque nñani ömæmongacäimpa. Ayæ mini baö nñomæintai eñayöminite tömengä Önöwoca pö guiddinque quëwengä ininque Wæmpocä wæætë minitö iminite, Nñani ömæmöe, ante adobai angä nñani ömæmoncæminipa. Edæ tömengä Önöwoca mini nē ewocadongä tönö tömengä pönö cæcä ate minitö baö incæ nñomænämäi intai bacæimpa.

¹² Ininque botö töninñamini eñëedäni. Wængonguï Önöwoca angä ate mönö eñente cæquënemö imompa. Wæætë wiwa cæinente mönö wæwënö ante wüi eñente cæte quëwenguënemö inömö imompa.

¹³ Iñæmpa wiwa cæinente mini wæwënö ante eñente cæmini ininque mini æmæwo wænguinque

cæbaiminipa. Wæætë Wængonguï Önöwoca ingante ewocadinque minitö wiwa mini cædinö ante wido cæmini ininque mini quëwenguinque imaimpa.

¹⁴ Ædänidö inänite Wængonguï Önöwoca töö æmænte angä ate eñente goda iñömö tömënäni iñömö edæ Wængonguï wënäni inänipa. ¹⁵ Minitö guñente mini wægäinö beyænque nñä cæyænte bai nē quëwengaimini inte nñowo wæætë Wængonguï Önöwoca ingante æninque wüi adobai guñente wæmini iminipa. Wæætë Wængonguï Önöwoca pönö cæcä beyænque minitö näwä wëmini baminipa. Ayæ tömengä Önöwoca pönö cæcä ænte ewocadinque mönö guñenedämaï inte edæ, Mæmpo, botö Wæmpo, ante apænemompa. ¹⁶ Edæ mönö mimönë ponte apænedinque Wængonguï Önöwoca incæ, Bitö Wængonguï näwä wëmi inömi imipa, ante apænecampa. ¹⁷ Ininque mönö Wængonguï wëmö inömö inte tömengä nänö pönonguincoo nē ænguimö imompa. Edæ Codito tönö aanque bai caate wëmö ininque mönö tömengä nñao bai nänö emö bai nñao adobai emöninque tömengä tönö edæ godongämæ ænguimö imaimompa.

Nñao bai mönö entawenguimämo

¹⁸ Botö iïmaï ante pönëmopa. Nñowo caate mönö wæpämö iñömö pönömenque iñonte iincayæ ate nñao bai mönö emonguimämo guiquënë wüi adobai wædænque inte godömenque nanguï pönö ingæimpa. ¹⁹ Æyedënö Wængonguï wënäni tæi emonte badinque edonque a ongonguinänii, ante acæte ante edæ Wængonguï nänö badongaincoo incæ nanguï äinente wædinque wänö conte bai ongoncoopa. ²⁰ Edæ wënæ wënæ cædämaï incoo iñonte mönö waocabo mönö eññänämaï cægäinö beyæ Wængonguï nänö badongaincoo önoncooque bai bagatimpa. Wüi nämä änö beyæ mänömaï bagatimpa. Wæætë Wængonguï nē, iincayæ ate watapæ bacæimpa,

ante angaingä inte adocä angä beyænque önoncooque bai bagatimpa. ²¹ Edæ Wængongui nänö badongaincoo ñömænguincocooque inte yæguincamenca ñä cæyænte bai wæyoncoote Wængongui gä pe æmpote bai godö cæcä beyænque ñömænämäi inguincocooque bacæcoimpa. Mönö Wængongui wëñæmö iñömonte tömengä pönö ñimpo cæcä ate mönö abæ tawænte bai tæi emonte bamö bai tömengä nänö badongaincoo adobai abæ tawænte bai miincooque bacæcoimpa. ²² Wëñæ nantate, Æiquedö eñaquingää, ante nani wæ bai Wængongui nänö badongaincoo incæ ñöwo ganca godongämæ nantate bai, Æiquedö waa baquii, ante ö ö wæconcoopa.

²³ Ayæ Wængongui mönö imonte mä pönöninge tömengä Önowoca ingante pönongä ænte do ewocamö inömö inte mönö adobai, Mönö baö miinö eñaque æiquedö Wængongui wëñæmö ædæmö baquii, ante nangui æinente wänö conte ö ö wæmompä. ²⁴ Edæ Codito, Botö iincayæ ate badömo ate watapæ bacæimpa, ante pönëdäni, äninge mönö imonte edæ ængä beyænque quëwëmompä. Inique mäninö edæ, Watapæ bacæimpa, ante nänö angainö iñömö iinque ba acæte ante mönö ayæ wänö cömompä. Mäninö watapæ do ba amö bai mönö, Ayæ ate watapæ ba acæimpa, ante änämäi incædömöimpa. Waocä do æningä inte, Æinente wæbopa, ante quinate anguingää. Iñæmpä edæ dobæ ægantapa. ²⁵ Inique mönö æinente wædö ante mönö cöwë ængæimpa, ante wede pönëmö iinque mönö wæntædämäi inte ee wänö cömompä.

²⁶ Ayæ adobai mönö aquimö pönö iñömonte Wængongui Önowoca mönö beyæ cæcampa. Æbänö cæte Wængongui ingante apænequii, ante eñenämäi inte wæyömonte tömengä wii waomö tededö ante apænedinque tömengä önowënenque mönö beyæ apænecampa. Mäninö tömengä nänö tededönö ante mönö

guiquënenö inte önonëca ædö cæte tedequii. ²⁷ Mönö Wængongui quimö tæiyæ waëmö ewocamö iñömonte Wængongui Önowoca iñömö mönö beyæ apænedinque, Mæmpo Wængongui nänö angainö bai bacæimpa, ante pönëninge apænecampa. Inique mönö mimöno do adongä inte Mæmpo Wængongui iñömö edæ, Botö Önowoca æbänö pönëninge apænecää, ante do eñengampa.

Në tæi emöninge mönö gänä cæmö imompä, ante

²⁸ Wængongui, Botö änö bai iinque bacæimpa ante cæcæminimpä, ante mönö imonte aa pegacäimpa. Inique tömengä nänö änö bai në cæmö inte mönö tömengä ingante waadete pönëmö iñömonte Wængongui wæætë mönö beyænque cöwë waa pönö cæcä ate mönö edæ, Inguipoga æbämë ba incæte mönö waa pönö quëwëninge impä, ante edæ do eñëmompä. ²⁹ Doyedë badöninge Wængongui iñömö, Botö Wengä Bamoncadengä iñongante iinani tömengä biwiidi badinque nangui inani yebænte bacædänimpä, angacäimpa. Inique tömengä mänömaï cæcæte ante cædinque, Do botö në againäni iñömö tömënanique botö Wengä nänö entawënö bai adobai entawencædänimpä, ante badongacäimpa. ³⁰ Ayæ, Botö Wengä nänö entawënö bai entawencæminimpä, ante nänö në angainäni iñönänite do aa pegacäimpa. Ayæ tömengä nänö aa pegainäni adodäni inänite, Botö ayömo minitö nö cæmini bacæminimpä, ante badongacäimpa. Tömengä ayongä nö cædäni në bagainäni inänite tömengä, Minitö tæi emonte badinque ñäö bai emonte bacæminimpä, ante do badongacäimpa.

³¹ Inique æbänö ante angüimoo. Edæ Wængongui mönö tönö godongämæ cæcä iñongante æcänö mönö imonte bæ taquingää. Edæ dæ angampa. ³² Tömengä Wengä adocanque

iñongante Wængonguī pæ gom-
podāmaī inte da pōnongā pōninqe
tōmengā wæætē mōnō tōmāmō
beyæ teēmente wæætē wængacāimpa.
Māningā ingante da pōnōninqe
Wængonguī tōmengā nānō ēagaincoo
ante ædō cæte pōnōnāmaī ingu-
ingāā. Edæ, Botō Wengā tōnō
godongāmæ entawencæminimpa,
ante Wængonguī tōmancoo do pōnongā
æmompā. ³³ Wængonguī mōnō
imonte apænte ængā ongōñomonte
æcānō, Wīwa cæbipa tōō, ante apænte
anguingāā. Iñæmpā Wængonguī incæ,
Botō ayōmo mīnitō edæ nō cæmini
imīnīpā, ante badongā bamōimpa.
³⁴ Itota Codito nē wængaingā inte
godōmenque ñāni omæmongaingā
inte Wængonguī tōmēmæ inō do
tæ contate a ongongampa. Ayæ
mōnō beyæ Wængonguī ingante cōwē
apænecampa. Tōmengā mānōmaī
cæcā adinqe mōnō imonte æcānō,
Bitō wænguinque, ante apænte angu-
ingāā. Iñæmpā wī eyepæ inānīpā.

³⁵ Codito mōnō imonte waadete
pōnente aayongā æcānō gā pe
æmpote ö ænguingāā. Edæ, Ædō
cæte cæquīmōō, ante wæmō incæ
caate wæwēmō incæ mōnō imonte
togænte pānāni wæmō incæ mānōmaī
wæyōmōnte mōnō Codito dicæ
māniñedē edæ waadedāmaī ingu-
ingāā. Mōnō wænguinque gue ænente
wæmō incæ weocoo ömaamō inte
wæmō incæ tōmengā mōnō imonte
dicæ waadedāmaī inguingāā. Quiēmē
beyæ, Mīni wænguinque, ante wææ
ānāni wæyōmōnte yaēmenca tacadāni
wæyōmōnte Codito māniñedē dicæ
waadedāmaī inguingāā. ³⁶ Edæ
Wængonguī ingante āmotamīni ante
baī yewæmongatimpa.

“Bitō beyænque wænōnāni wænguī
wæ, ante
mōnitō tōmāā itædē wæmōnīpā.

Obegaidi inānite, Wænongæimpa,
ante ānāni baī,
mōnitō imōnite adobaī, Wænongæimpa,
ante pīināni wæmōnīpā,”
ante yewæmōnte ongō aedāni.

³⁷ Edæ mānimāmo mōnō wæpāmo
tōmāmāmo pō ate wædōmō incæte
mōnō imonte nē waadete pōnengā
nempo ongōninqe mōnō tæi ēmōnte
godōmenque gānā cæte ongōmompā.
³⁸ Botō do ēñente pōnēmopā.
Mōnō nē waadete pōnengā nempo
ongōñomonte mōnō wænguīmāmo
incæ mōnō quēwenguīmāmo incæ
anquedoidi incæ wænæidi incæ
ñōwopāmo incæ iincayæ ponguīmāmo
incæ tæi nāni pīñæmāmo incæ
mānimāmo tōmāmāmo ædō cæte
mōnō imonte gā pe æmpote ö
ænguī. ³⁹ Ayæ edæ æibæ mōnō
æite wæquīmāmo incæ guībæ mōnō
wæænte wæquīmāmo incæ quiēmē
Wængonguī nānō badongāimāmo
incæ mānimāmo tōmāmāmo iñōmō
mōnō Codito nempo ongōñomonte
ædō cæte gā pe æmpote ö ænguī. Edæ
Wængonguī nānō waadete pōnēnō
entawēninqe mōnō Awēnē Itota
Codito iñōmō mōnō imonte waadete
pōnēninqe pæ gompoyongante
mānimāmo tōmāmāmo incæ gā pe
æmpote ö ænāmaī ingæimpa. Āmo
ēñēmaīmīnīpā.

9

*Idægoidi inānite Wængonguī apænte
angacāimpa, ante*

¹ Botō iñōmō edæ mīmō entawēmo
inte nāmā apænte pōnēñōmote
Wængonguī Tæiyæ Waēmō Ōnōwoca
adoyōmō ante apænecā ininqe botō
ædō cæte babæ wapiticæ anguīmoo.
Edæ Codito nempo quēwēnōmo inte
botō nō pōnī apænedinqe iīmaī
āmopā. ² Mīmōno cōwē cæwēnente
wæwēmo inte botō iīmaī ante
pōnēninqe nanguī wæbopā. ³ Botō
guīdēnāni botō tōnō adodāni inōnāni
iñōnānite Wængonguī ængā beyænque
quēwencædānīmpā, ante botō nanguī
āninqe wæbopā. Ininqe Wængonguī
tōmēnāni inānite, Quēwencæminīmpā,
ante æninqe wæætē botō Codito
nempo quēwēñōmote botō imote
pīininqe tatodonte wido cæcā baī
botō Ao ante piyænē cæcædōmoimpa.

⁴ Tömēnāni iñōmō idægoidi inānīpa. Wængonguī pæpogacā pædāni ininque tōmēnānique tōmengā wēnāni ingadānīpa. Tömēnāni inānite Wængonguī ñāō entawente nānō tæi ēmōnō ante odōmongā adinque tōmēnānique nē agāināni inānīpa. Tömēnāni inānite apænedinque Wængonguī, Botō pōnō cæbo ate mīnitō Ao āmīni ininque mōnō godongāmæ waa cæcæīmpa, ante cægacāīmpa. Iīmaī cæedāni, ante tōmengā tōmēnāni inānite tāno wææ angā ēñente mānīnō nānō wææ angāinō ante tōmēnānique nē mangāināni inānīpa. Wængonguī oncōnē ñænæncōnē wadāni guīdāmaī iñōnānite idægoidique guīte tōmengā ingante waa ate ædæ wæænte apænedānīpa. Tömēnānique inānite Wængonguī, Cōwē waa cæcæboīmpa, ante mā apænegacāīmpa. ⁵ Mōnitō, Mæmæīdi, ante mōni nē angāināni incæ idægoidi mæmæīdi adodāni inānīpa. Ininque tōmēnāni Pæīngā badinque mōnō Codito inguīpoga ēñagacāīmpa. Tōmengā iñōmō tōmāmō Wængonguī inongā ingampa, ante adinque mōnō tōmengā ingante apænedinque, Tōmēmi toquinque pōnō waa cæbi æmōnīpa, ante mōnō cōwē ñīmpo cædāmaī apænecæīmpa. Mānōmaī impa, ante botō, Amēē, āmopa.

⁶ Idægoidi quēwencædānīmpa, ante nānō angāinō baī Wængonguī cædāmaī ingacāīmpa, ante botō dicæ āmogaa. Wæætē edæ iīmaī impa. Nāwā idægoidi nāni wede pōnēnō baī pancadāniya pōnēnāmaī ināni iñōnānite botō tōmēnāni inānite, Nāwā idægoidi inānīpa, ante apænedāmaī īmopa. ⁷ Edæ Abadāō wodi pæīnāni incæ pancadāniya iñōmō, Abadāō wodi wēnāni, mōnō ānōnāni wīi inānīpa. Wæætē, “Botō ayōmo Itæca wēnānique bitō pæīnāni inguīnāni inānīpa,” ante mæmæ Abadāō ingante Wængonguī angampa, ante yewæmongatīmpa. ⁸ Mānōmaī ī ininque Abadāō tapæicā nē ēñate pædāni inānite Wængonguī, Abadāō

wēnāni, ante angantawogaa. Wæætē Abadāō wodi ingante apænedinque, Bitō wēnāni bacædānīmpa, ante Wængonguī nānō nē angāināni guīquēnē tōmēnānique tōmengā wēnāni inānīpa. ⁹ Edæ, “Iīñedē impa, ante botō ānōñedē botō adodō pōmo ate māiñedē ate edæ Tada incæ wēñængā onguīñængā ingante mancæcāīmpa,” āninque Wængonguī, Mānīnō botō ānō baī cōwē cæcæboīmpa, angacāīmpa.

¹⁰ Wīi mānīnique impa, ante ēñengæīmpa. Godōmenque iīmaī ante mōnō pōnengæīmpa. Wæmpocā adocanque tapæicā ate Adebeca wodi wēna āancadēnaque ēñagadāīmpa. Mānīna wæmpocā iñōmō mōnō wæmæ Itæca wodi ingacāīmpa. ¹¹ Tömēnā wēna ayæ ēñadāmaī iñedē ædō cæte wēnæ wēnæ cæquīnaa, ædō cæte waa cæquīnaa. Incæte edæ Wængonguī, Iīngā ingante apænte æncæboīmpa, ante nānō angāinō ante cōwē bacæīmpa, ante cædinque, ¹² tōmēna ayæ cædāmaī iñōnate Wængonguī nē aa pedongā inte, “Bamoncadengā incæ ayæmengā ingante nē cæcā incæcāīmpa,” ante Adebeca wodi ingante apænegacāīmpa. ¹³ Adobainō ante Wængonguī beyæ yewæmongadānīmpa. “Aacobo ingante waadete pōnengaboīmpa. Etawoo ingante guīquēnē piīnte agaboīmpa,” ante yewæmongatīmpa.

¹⁴ Ininque mōnō æbānō anguīi. Wængonguī dicæ nō cædāmaī ingantawogaa. ¹⁵ Wæætē Mōitee wodi ingante apænedinque Wængonguī iīmaī angacāīmpa. “Waocā adocanque ingante botō, Wīi pāinēwædō, āninque tōmengā ingante do godō ñīmpo cædinque pānāmaī incæboīmpa. Adocanque ingante nē waadete cæinēmo inte botō tōmengā ingante do godō waadete waa cæcæboīmpa,” angacāīmpa, ante yewæmongatīmpa. ¹⁶ Ininque waocā nanguī cæinengā incæte waocā nanguī cæcā incæte Wængonguī wīi waocā nānō cædō beyænque apænte ængampa. Wæætē

nämä nänö waadete waa cæinēnō beyænque Wængonguī waocā ingante godō apænte ængampa. ¹⁷ Edæ awēnē Padaönō wodi ingante apænedinque Wængonguī, “Botō iīmaī ante cæcæte ante bitō imite ængō cætabopa. Edæ bitō imite ængō cædinque tæi piñænte pönō cæbo adinque waodāni, Wængonguī tæi piñængä inte mänōmaī cæcampa, ante botō emōwo ante inguipoga tōmāo apænedāni do eñencædānimpa, ante cætabopa.” Wængonguī mänōmainō ante Padaönō ingante apæncantapa, ante yewæmongatimpa. ¹⁸ Īninqe Wængonguī, Adocanque ingante godō waadete ñimpo cæcæboimpa, āninqe tōmengä ingante do godō waadete ñimpo cæcampa. Wæætē wacā ingante guiquēnē, Godō cæbo ate mīmō omædengä bacæcäimpa, āninqe Wængonguī tōmengä ingante do cæcā ate edæ mīmō omædengä bate wæcampa.

¹⁹ Mänōmainō ante yewæmōmo adinque bitō wabänō iīmaī anguīmi, ante awædō. “Īñæmpa mōnitō Wængonguī nänō änō ante Baa änāmaī iñōmōnite tōmengä, Mīnitō beyænque impa, ante quīnante piinte angää.” Mänōmainō ante āmitawoo. ²⁰ Bitō iñæmpa önōmique inōmi inte Wængonguī ingante wæætedō wæætē āmii. Nē badongä ingante tōmengä nänō nē badōninca incæ dicæ, “Botō imote quīnante mänōmaī badōwēmii,” ante dicæ anguīi. ²¹ Nē bædongä iñōmō daibo pancaiya æninqe waa pōni wamoncade bædinque ado daibo pancaiya æninqe önōnque ewenguincade bæyongante æcänō nē bædingä ingante Baa anguingää. Nē bædongä iñōmō nē ānongä inte bæcampa. Edæ Baa anguīmii.

²² Wængonguī nänō nē piināni iñōmō tōmēnāni nāni omæe ewente wæquinque wiwa cæyōnānite tōmengä piyænē cædinque wantæpiyæ pānāmaī inte ee ongongantawo. Īñæmpa tōmengä nänō piimāmo ante adinque do wæcædānimpa, ante cædinque ayæ tōmengä nänō

tæi piñæmāmo ante edonque acædānimpa, ante cædinque Wængonguī mänōmaī ee ongongä apa ānewēē.

²³ Ayæ wæætē, Botō waadete godō waa cæbo ænāni inte edæ tōmēnāni iñōmō botō ñāo bai botō emōnō ante acædānimpa, ante cædinque Wængonguī mänōmaī pānāmaī inte edæ ee cæcampa. Wæætē, Tōmēnāni ñāo iñōmō quēwencædānimpa, ante tōmengä godō badongä ate tōmēnāni ñāo bai emōnānīpa. ²⁴ Edæ mōni oodecabo iñōmōnite mīnitō oodeomīni ināmaī iñōmīnite Wængonguī mōnō tōmāmō imonte mänōmaī cæcæte ante aa pegacäimpa. ²⁵ Wængonguī iīmaī angampa, ante Ootea wodi yewæmongacäimpa.

“Botō guidēnāni ināmaī iñōnānite botō wæætē,

Botō guidēmīni, ante apæncæboimpa.

Onquiyængä botō nē waadedāmaī ingainga iñongante botō wæætē,

Botō nē waadebi imīpa, ancæboimpa.

²⁶ Ayæ, ‘Botō guidēmīni ināmaī imīnīpa,’ ante botō ongonte āñōmō adoyōmō ongōninqe

botō wæætē edæ, ‘Botō Wængonguīmo nē Quēwēmo wēmīni imīnīpa,’ ancæboimpa.”

Ante adocā Wængonguī nänō änō ante yewæmongacäimpa. ²⁷ Idægoidi inānitedō ante yedæ āninqe Itaiya wodi iīmaī apænegacäimpa. “Gāwapæ wedeca emōnaicoo nanguī pōni oñō

bai idægoidi adopodāni nanguī pōni ināni incæte pancadāniya guiyä wææntodōni bai mānimpodānique quēwencædānimpa. ²⁸ Edæ Wængonguī,

Inguipoga quēwēnāni inānite apænte āninqe botō angainō bai do edæ cæcæboimpa, ante nē apænegaingä

inte tōmengä adocā, Idæwaa, ante quingæ pōni edæ iinqe cæcæcäimpa,”

ante Itaiya wodi yewæmongacäimpa. ²⁹ Adocā Itaiya wēenē iīmainō ante

nänō apænegainō bai impa.

“Mōnō Awēnē nē Tæiyæ Awēnē tæi piñængä inte dodāni inānite,

Mīnitō pæināni yebænte nanguī ināni bacædānimpa, ante cædinque pancadāniya inānite

ante cædinque pancadāniya inānite

ata cæpocä quëwengadänimpa. Mänömaï ante cædämaï ingä bai,
mönö wæætë Todömä quëwengainäni bai dæ badinque Gömoda nāni quëwëñömö dæ ba bai mönö adobaï edæ dæ bacædömöimpa,” ante nānō angainō bai impa.

Idægoidi adobaï pönëninque quëwenguëñëni inänipa

³⁰ Ìninqe æbänö ante anguii. Oodeo inämaï inäni guiquënë, Nö entawëmöni bacæmönimpa, ante änämaï ingadänimpa. Incæte Wængongui godö cæcä beyænque tömënanï wede pönëninque wede nāni pönëno beyænque Wængongui ayongä nö entawënäni do badänipa. ³¹ Idægoidi guiquënë, Nö cædäni, ante möni wææ angainō beyænque nö entawëmöni bacæminimpa, ante nē angainäni inte eyepæ cædämaï inänipa. ³² Quinante eyepæ cædämaï inänii. Tömënanï wede pönënamäi inäni inte wæætë edæ, Mönö nanguï cædinque nö cæmöni bacæmönimpa, äninque oda cæte nāni pönëno beyænque dicaboga tee tēwate bai cædinque eyepæ cædämaï ingadänimpa. ³³ Edæ do Wængongui beyæ yewæmongatimpa.

“Aquënë quëwënanii. Botö Codito ingante Tiöno nāni quëwëñömö dica bai gö cæbo gongængä adinque edæ waodäni dicaboga tee tēwate bai pönënamäi inäni inte tæ go wææncædänimpa.

Tömengä adocä ingante nē pönengä guiquënë cöwë edæ guingo imönämaï inte quëwencæcäimpa,” ante yewæmongatimpa.

10

¹ Botö töninämaïni ëñëdäni. Idægoidi quëwencædänimpa, ante botö mimönë nanguï ainente wædinque Wængongui ingante apænedinque botö, Bitö æmi beyænque quëwencædänimpa, ante cöwë apænebopa. ² Wængongui beyæ nö cæcæimpa, ante cæinente

wædänipa, ante nāwangä impa. Incæte tömënanï, Wængongui beyæ nö cæcæte ante æbänö cæquii, ante ëñënamäi inäni inte önonque cæte wædänipa. Botö, Mänömaï impa, ante nē apænebo inömo imopa. ³ Edæ Wængongui pönö badongä ate mönö tömengä ayongä nö entawëmö bamompa, ante ëñënamäi inäni inte idægoidi inömo, Nämä mönö cædö beyænque nö cæmö bacæimpa, ante cædinque edæ oda cægadänimpa. Mänömaï cædinque tömënanï Wængongui nänö nö cægainō ante edæ Baa angadänimpa. ⁴ Nö cæmö bacæte ante Wængongui nänö wææ angainō ante ëñente cæquënemö inte mönö tömämö wii eyepæ inte wægämöimpa. Mänömaï inte wæyömonte Codito inömo, Mini pönencabo Wængongui ayongä nö entawëmini bacæminimpa, ante cædinque mäninö Wængongui nänö wææ angainō ante tömänö ante inque cægacäimpa. Ìninqe tömengä mänömaï inque cæcä adinque Wængongui mönö imonte wæætë wææ änämaï ingampa.

⁵ Ìimaï cædäni, ante botö wææ angainō ëñente cædinque nö cædäni badänipa, ante Möite wodi iimaï ante yewæmongacäimpa. “Nē ëñente cæcä inömo tömengä nänö ëñente cædö beyænque quëwencæcäimpa,” ante yewæmongacäimpa. ⁶ Wæætë, Mönö wede pönencabo æbänö cæte Wængongui ayongä nö entawëmö imöö, ante iimaï ante adocä yewæmongacäimpa. “Bitö, ‘Æcänö öönædë æi añete wæænguingää,’ ante nāmäneque änämaï ie.” Mänömaï ante tömengä, Codito ingante æi añete wææncæte ante mönö pönënamäi ingæimpa, ante ancæte ante yewæmongacäimpa. Ìnæmpa Codito pönämaï ingampa diyæ æite mäwæmi wæænguingää. Dobæ edæ inguipoga pongacäimpa. ⁷ “Ayæ, ‘Æcänö tadömengadæ wæi añete ænguingää,’ ante änämaï ie.” Ìnæmpa Codito ayæ öñongampa diyæ wæite mämi æænguingää. Edæ Codito

dobæ ñāni ömæmonte quëwengampa.

⁸ Ìninqe, Mönö wede pönencabo æbānō nō cæmō bamōō, ante æbānō ante yewæmongacāi. Edæ, Wede pönengæimpa, ante mōnitō apænemōni mīni eñēnīne ante adode ante iīmaī ante yewæmongacāimpa. “Wængonguī nānō nō ānōne iñōmō edæ bitō weca eyequeī pōni ēnēpa. Edæ bitō önōne tedeyōmi bitō mīmōno pōnēñōmi tōmengā nānō nō ānōne edæ adoyōmō pōni ēnēpa.” ⁹ Æbānō cæte quëwenguī, ante iīmaī ante ēnēpa. Itota Codito Tæiyæ Awēnē inongā ingampa, ante bitō önōneca apænedinque, Itota Codito wænte öñōñongante Wængonguī angā ñāni ömæmongacāimpa, ante bitō mīmōno pōnēmi adinque tōmengā ængā beyænque quëwencæbiimpa, ante adode incæ ēnēpa. ¹⁰ Mīmōno edæ wede pōnēninqe mōnō Wængonguī ayongā nō entawēmō bamompa. Mānōmainō ante wede pōnēmopa, ante önōneca apæneyōmonte tōmengā ængā beyænque mōnō quëwēmompa.

¹¹ Codito ingantedö ante apænedinque. “Tōmengā ingante nē wede pönengā iñōmō tōmengā edæ guingo imōnāmaī incæcāimpa,” ante Wængonguī angā eñēnte yewæmongadānimpā. ¹² Edæ mōnitō oodeomōni iñōmōnite mīnitō wæætē oodeomīni ināmaī iñōmīnite mōnō tōmāmō imonte adinque mōnō Awēnē iñōmō edæ, Adoyōmō pōni imīnīpa, ante acampa. Ìninqe tōmengā adocā tōmāmō Awēnē inongā ingampa. Ayæ tōmengā ingante aa pemō eñēninqe tōmengā iñōmō edæ tōmāmō imonte nangui pōni pōnō cæcā æmompā.

¹³ Iīmaī ante Wængonguī beyæ ante yewæmongatimpā. “Mönö Awēnē emōwo ante apænedinque aa pedāni eñēninqe mōnō Awēnē iñōmō edæ tōmēnāni tōmānāni inānite ængā beyænque quëwencædānimpā.”

¹⁴ Ìninqe tōmengā ingante nē pōnēnāmaī ināni iñōmō ædō cæte tōmengā ingante aa pequīnāni. Ayæ tōmengā emōwo ante eñēnāmaī ināni iñōmō tōmengā ingante

ædō cæte pönenguīnāni. Ayæ tōmengā emōwo ante wadāni gote apænedāmaī iñōnāni tōmēnāni ædō cæte eñenguīnāni. ¹⁵ Ayæ edæ wadāni da godōnāmaī iñōnāni nē apænequēnēnāni wæætē ædō cæte gote apænequīnāni. Iīmainō ante edæ Wængonguī beyæ ante yewæmongatimpā. “Tōmengā waa pōni nānō cægāinō ante nē watapæ apænedāni iñōmō tōmēnāni nāni apænecæ gote cægōniwa iñōmō edæ waa pōni ewadānīpa,” ante nāni yewæmonte angāinō baī impā. Edæ nē apænecæ godāni inānite Wængonguī waa acampa.

¹⁶ Mönö Awēnē ingantedö ante watapæ apænedāni eñēninqe idægoidi pancadāniya Ao angadānimpā. Pancadāniya guiquēnē Baa angadānimpā. Tōmēnāni mānōmainō nāni cædinō ante Itaiya wodi iīmaī ante yewæmongacāimpa. “Awēnē Wængonguī eñēmi. Mōnitō apænemōni tōmēnāni nāni eñēnō ante edæ æcānō eñēnte pönengā. Iñæmpā nē pönengā iñōmō edæ dæ angā awædō,” ante yewæmongacāimpa.

¹⁷ Ìninqe gode ānāni ate nē eñēnānique wede pōnēnāni badānīpa. Ayæ Codito nānō ānōnō ante gode ante apænedāni beyænque nē eñēnāni badānīpa. ¹⁸ Ìninqe botō, Mānīnō ante idægoidi gobæ ongōnānīpa diyæ eñēnāmaī inguīnāni, āmopa. Do eñēnānitapa, ante edæ iīmaī ante Wængonguī beyæ yewæmongatimpā.

“Nē apænedāni inguipoga tōmāo gote tededāni eñēnānīpa.

Waadāni inguipoga nāni quëwenganca quëwēñōnānite mānīnō tōmēnāni nāni apænedō ante do eñēnānīpa,” ante yewæmongatimpā.

¹⁹ Ayæ wæætē, Idægoidi önōmonca eñēninqe ömæcadāni inānīpa diyæ eñēnāmaī inguīnāni. Do eñēnānitapa. Edæ Mōitee wodi incæ iīmaī ante yewæmongacāimpa.

“Wadāni önōnānique iñōnānite botō godō waa cæbo adinque

mīni idægocabo wæætē, Mōnitō
imōnite wīi pōnō cæbii, ante
pīinte wæcæmīnimpa.

Ayæ wadāni ocai ōmæcadāni
iñōnānite

botō godō waa cæbo adinque
mīnitō wæætē nē pīinte amīni
bacæmīnimpa,”

Ante cæcæte ante Wængonguī pōnō
cægacāimpa. ²⁰ Itaiya wodi guiquēnē
Wængonguī beyæ ante guīñēnāmaī
inte apænegacāimpa.

“Wadāni iñōmō botō imote ante diqui
diqui mīnāmaī ināni incæte do
adānitapa.

Ayæ, Wængonguī ingante ainēmōnipa,
ante anāmaī iñōnānite, Botō
imote aedāni, ante botō
odōmōmo adānitapa.”

²¹ Äninqe Itaiya wodi idægoidi
inānitedō ante apænedinque,
“Eñēnāmaī inte Baa anōnāni iñōnānite
botō, Pōedāni, ante tōmāā itædē
ōnompō compo compo cæbo incæte
pōnāmaī inānitapa.”

11

*Idægoidi pancadāniya inānite
Wængonguī apænte ængā*

¹ Ininqe botō iīmaī ante apænebopa.
Tōmengā quīnāni iñōnānite Wængonguī
dicæ idægoidi inānite Baa anganta-
wogaa. Iñæmpa botō adobo nāwā
idægobo imopa. Abadāō wodi pæīmo
inōmo inte botō edæ Beencamīnō
wodi pæīmo inōmo inte tōmengā
pæīnāni tōnō adocabobo tōmēmo
inōmo imopa. ² Idægoidi botō quīnāni
incædānimpa, äninqe Wængonguī
wēēnēñedē pōni mōnitō imōnite ad-
inque do apænte ængacāimpa. Ininqe
mōnitō tōmengā nānō nē agaimōni
iñōmōnite tōmengā cōwē Baa anāmaī
ingacāimpa. Idægoidi inānite pīinte
äninqe Ediya wodi Wængonguī in-
gante apænegacāimpa, ante æbānō
yewæmonte ongompā, ante mīnitō
adāmaī imīnitawo.

³ “Awēnē eñēmi. Bitō beyæ
nē apænedāni inānite wænōninque
idægoidi godōmenque cædinque,
Wængonguī quī, ante nāni iya tainca

bæ tadinque edæ wido cædānitapa.
Ayæ botō adoboque inte edæ ayæ
quēwēñōmote botō imote wænōncæte
ante cædāni wæbo abi.” ⁴ Äñongante
Wængonguī, “Iñæmpa botō tiæte mīdo
ganca mānimpodāni inānite, Botō
quīnāni inānipa, ante wææ gompobo
quēwēnāni apa quēwēe. Wadāni
nāni, Mōnitō wængonguī Baado
ingampa, nāni anōngā weca botō
quīnāni iñōmō edæ da guicapodāmaī
inānipa cæbii,” angacāimpa, ante nāni
yewæmongainta adāmaī imīnitawo.

⁵ Nōwo iñōmō edæ adobāi impa.
Idægomōni mōni cabo incæ mēa
pōni imōni inte Wængonguī ingante
Baa anāmaī iñōmōnite tōmengā
mōnitō imōnite waadete pōnō
cædinque, Botō quīmīni imīnipa,
ante apænte ængampa. ⁶ Ininqe,
Wængonguī waadete pōnō cædinque
apænte ængampa, ante adinque
tōmēmonque waa cæmō beyæ ædō
cæte Wængonguī apænte ænguingāā.
Iñæmpa tōmēmonque waa cæmō beyæ
Wængonguī mōnō imonte apænte
ængā bai, Wængonguī waadete pōnō
cæcampa, ante ædō cæte anguēnē
ī. Wæætē edæ tōmēmonque waa
cæmō beyæ Wængonguī apænte ængā
bai tōmengā adocā ædō cæte nānō
waadete pōnō cædō beyænque mōnō
imonte apænte ænguēnengāā. Iñæmpa
Wængonguī waadete pōnō cædinque
apænte ængā ininqe, Tōmēmonque
waa cæmompā, ante ædō cæte anguīī.

⁷ Mānōmaī ī ininqe æbānō ante
anguīī. Edæ idægoidi tōmēnāni nāni
nanguī æīnēnō ante diqui diqui
minte ænāmaī iñōnāni mōnō iñōmō
Wængonguī nānō nē apænte ængaimō
imō iñōmō edæ do æntamompā. Nē
ænāmaī ināni inānite Wængonguī
ee ayongante mīmō ōmædēnāni
bagadānimpa. ⁸ Iīmaī ante Wængonguī
beyæ nāni yewæmongainō bai
ingatimpa. “Tōmēnāni inānite
Wængonguī godō cæcā ate mōwo
mōinente bai wædāni inte tōmēnāni
awinca emōnāni incæ nōwo ganca
adāmaī inte wædānipa. Ōnōmonca

ēmoncadāni incæ edæ ēñēnāmaī inte wædānīpa,” ante yewæmongatimpa.

⁹ Ayæ awēnē odeye Dabii wodi Wængonguī ingante apænedinque iīmaīnō ante apænegacāimpa.

“Wængonguī ēñēmi. Waodāni nāni wænguinque gote ææmæ bedāni baī cædinque iīnāni iñōmō edæ wapiticæ nāni towēnōnō ante gote towēnānīpa. Incæte bitō godō cæbi ate tōmēnāni nāni towēnō beyæ edæ wæncædānīpa, āmopa.

Tōmēnāni tee tēwate baī oda cæte wæyōnāni bitō godō pāmi wæcædānīpa, āmopa.

¹⁰ Bitō godō cæbi ate tōmēnāni awīnca edæ mæ māmonte baī bamōninque adāmaī incædānīpa.

Ayæ teēmē mongæninque bocæ ñongænte cōwē wæcædānīpa, āmopa,”

ante awēnē Dabii wodi Wængonguī ingante apænegacāimpa.

Idægoidi ināmaī ināni quēwēnānīpa, ante

¹¹ Ñōwo wæætē iīmaī āmopa. Do oda cædāni incæ idægoidi iñōmō dicæ æmæwo tæ go wæænguīnāni inānitawogaa. Iñæmpa ayæ ate ængæ gantidinque tōmēnāni nē quēwenguīnāni inānīpa. Incæte Wængonguī, Tōmēnāni ēñēnāmaī cædāni beyæ wadāni quēwēnāni adinque idægoidi wæætē, Mōnō quēwengade impa, ante pīinte wæcædānīpa, ante godō cæcā ate idægoidi edæ oda cægadānīpa.

¹² Iñinque idægoidi ēñēnāmaī cædinque ænāmaī ināni beyæ mōnō ingui-poga tōmāmæ mōnō quēwencabo wæætē edæ nanguī pōnī æmompā. Tōmēnāni ænāmaī inte omæpodāni wædāni beyænque mīnitō idægomīni ināmaī imīni wæætē nanguī pōnī æmīnīpa. Iñinque idægoidi nāni quēwenguīmāmo iīncayæ ate eyepæ pōnī ænāni ate edæ æbānō baquīi. Edæ idægoidi iīncayæ ate eyepæ pōnī ænte entawēnāni beyænque

mōnō waocabo tōmāmō godōmenque nanguī pōnī ænte entawengæimpa.

¹³ Idægomīni ināmaī imīni imīnite apænebo ēñēdāni. Botō imote Codito, Idægoidi ināmaī ināni inānite apænecæbiimpa, ante da godongā gotabopa. Iñinque botō, Mīnitō imīnite nē apænebo inte tobopa, ante nanguī tedebo. ¹⁴ Edæ, Idægoidi ināmaī ināni incæ do quēwēnānīpa, ante botō tedebo ēñente wædinque botō guīdēnāni idægoidi wæætē, Mōnitō adobaī quēwencæmōnīpa, ante pīinte wæcædānīpa, ante tedebo. Ayæ adodāni pancadāniya godōmenque pōnēninque quēwencædānīpa, ante cædinque botō edæ nanguī tedebo.

¹⁵ Idægoidi inānite Baa ante wido cædinque Wængonguī wæætē ingui-poga tōmāmæ quēwēmō iñōmonte piyænē cædinque edæ waadete pōnō cægacāimpa. Iñinque tōmengā iīncayæ ate idægoidi inānite Ao ante ængā ate edæ æbānō baquīi. Māniñedē ate edæ mōnō wænte oñonte baī inōmō inte edæ mōnō ñāni omæmonte quēwengæimpa.

¹⁶ Iīmaī ante pōnengæimpa. Pāo pancaboga pancæte baī wædænque ināni inte tāno nāni pōnente quēwencabo iñōmō tæiyæ waēmō ināni iñinque iīncayæ nāni pōnente quēwencabo guīquēnē pāo babo baī adobaī ināni inte tōmēnāni adobaī tæiyæ waēmō inānīpa, ante pōnengæimpa. Tāno pōnengāināni guīquēnē tæcæguinto baī inōnāni inte tæiyæ waēmō ināni iñinque edæ iīncayæ pōnēnāni guīquēnē yæpænto baī inōnāni inte adobaī tæiyæ waēmō inānīpa.

¹⁷ Odibowæ ononque pæwæ incæ wainca incacæimpa, ante cædinque waocā tōmengā nānō mingaiwæ waa pōnī incawæ adinque yæpængō nāmænte godō ononque pæwæ yæpæntoga mīne timongā amīnīpa. Idægoidi iñōmō waocā nānō minte pæwæ baī iñōnānite Wængonguī pancadāniya inānite yæpængō wæi ñæmænte baī wido cæcā wædānīpa. Tōmēnāni mānōmaī

wæyönāni bitō guiquēnē ōnonque pæwæ yæpængō bai īmitapa. Incæte Wængongui, Odibowæ yæpængoncoo bai tæcæguinto beyænque odæ yate bai pæte incacæimpa, ante odibowāa yæpæntoga godō mīni tinte bai cædinque bitō īmite waadete pōnō cæcā ate bitō idægoidi beyænque mīimi inte ongōmipa. ¹⁸ Mänōmai ī īninqe bitō wæætē edæ, Wængongui botō īmote pōnō cæcæte ante tōmēnāni īnānite wido cæcampa, ante bitō nāmā ængō cæcæte ante cædinque idægoidi īnānite ante wīi pīinte ancæbiimpa. Īñæmpa tæcæguinto ēwa bai īnāni inte idægoidi īñōmō edæ bitō beyæ dicæ quēwēnāniyaa. Wæætē edæ tæcæguinto ēwa bai īnāni beyænque bitō quēwēmipa, ante apænebo ēñēninqe bitō pīimi īninqe, Mänōmai impa, ante tāno pōnēe.

¹⁹ Īninqe bitō, “Odæ yacæimpa, ante cædinque godō mīne tīmōnāni bai Wængongui botō īmote pōnō cæcæte ante cædinque idægoidi īnānite wæætē wido cæcampa,” ante pōnēmitawoo. ²⁰ Bitō pōnēnō edæ nāwangā impa. Incæte edæ tōmēnāni nāni pōnēnāmai īnō beyænque Wængongui tōmēnāni īnānite wido cægacæimpa. Bitō guiquēnē wede bitō pōnēnō beyænque mīimi inte ongōmipa. Īninqe bitō guīñente wædinque edæ nāmā ængō cædāmai inte edæ, Botō waēmō īmo beyæ cæcantapa, ante pōnēnāmai īmāwe. ²¹ Īñæmpa nāwā yæpængō bai īnāni īnānite Wængongui tapodāmai īnongā inte bitō ōnōmique īñōmite dicæ ata cæpoqingāā.

²² Īninqe, Wængongui nē waadete cædongā incæ cōwē nē apænte pangā ingampa, ante pōnēe. Tōmengā īñōmō nē oda cædāni īnānite pangampa. Wæætē bitō nē waadete cædongā nempo quēwēmi īninqe tōmengā bitō īmite waadete cæbaingampa. Incæte tōmengā nempo wīi quēwēmi īninqe tōmengā wæætē bitō īmite edæ wæi ñæmænte bai wido cæbaingampa. ²³ Idægoidi guiquēnē, Idæwaa

pōnēnāmai inte awædō, ante ocæ ēmænte pōnāni adinqe Wængongui nē tæi pīñænongā inte tōmēnāni īnānite wæætē ado awæ yæpæntoga godō mīni tīmōnte bai pōnō cæcā ate mīināni edæ ongōmāinānipa. ²⁴ Waodāni waa incawæ yæpængō nāmænte ōnonque pæwæ yæpæntoga godō nāni mīne tīmōnō bai Wængongui wīi adobai cæcampa. Wæætē edæ bitō ōnonque pædiwæ yæpængō bai īñōmite tōmengā waadete pōnō nāmænte bai cædinque, Nāwā idægobi babipa, ante waa pæwæ yæpæntoga godō mīni tīmōnte bai cæcampa. Bitō īmite mänōmai waa cæcā īnongā inte tōmengā idægoidi īnānite æbānō godōmenque waa cæbaingāā. Tōmēnāni īñōmō waa pōni pæwæ yæpængoncoo tōmengā nānō wæi ñæmæncōo bai inte wæyönānite adowænē yæpæntoga godō mīne tīmōnte bai cædinque tōmengā tōmēnāni īnānite, Nāwā idægōmīni inte mīnitō wæætē mīimīni ongoncæmīnimpā, ante do cæcæcæimpa.

Idægoidi īninqe bayonte quēwencædānimpā, ante

²⁵ Īñānāni ēñēedāni. Mīnitō nāmā ængō cædāmai incæmīnimpā, ante cædinque botō wēēnēñedē mīni ēñēnāmai ingainō ante edæ wææ āmopa. Mīnitō idægōmīni īnāmai īmīni mīni pōnencabo eyepæ pōni mīni yebænganca idægoidi īñōmō ñōwo mīmō ōmædēnāni inte wædōnāni inte edæ māninganca cōwē mīmō ōmædēnāni inte wæcædānimpā. ²⁶ Īncayæ ate guiquēnē idægoidi tōmānāni quēwenguīnāni īnānipa. Edæ īimai ante yewæmōnte ongōmpa.

“Mōnō ñā cæyænte bai tee mōnete bai wæwēñōmōnte nē Ñimpo Cæcā īñōmō Tiōno īñōmō quēwente poncæcæimpa.

Aacobo wodi pæināni Wængongui ingante ēñēnāmai cæte quēwēnāni adinqe nē Ñimpo Cæcā īñōmō tōmēnāni nāni ēñēnāmai entawēnō wadæ cæcā ate tōmēnāni wæætē ēñente cæte quēwencædānimpā.

27 Īninqe wēnæ wēnæ nāni cægāinō ante wadæ cæte wido cædinque Wængonguī tōmēnāni ĩnānite ĩmaī angampa.

Botō pōnō cæbo ate mīnitō Ao āmīni ĩninqe edæ mōnō godongāmæ waa cæte quēwengæimpa, ante Wængonguī angampa,” ante yewæmongadānimpā.

28 Codito ingantedō ante watapæ ēñente pōnēninqe mīnitō idægōmīni ĩnāmaī ĩmīni do quēwēmīni beyæ idægōidi wæætē Wængonguī ingante pīinte adānīpā. Incæte tōmēnāni mæmæidi ĩnānite nē apænte ængaingā inte Wængonguī wæætē mæmæidi beyænque ante pōnēninqe ñōwodāni ĩnānite waadete pōnengampa. 29 Edæ waomō ĩmonte quincōomē pōnongā æñōmonte Wængonguī adodō ō ænāmaī ingampa. Ayæ adobaī waomō ĩmonte aa pedinqe tōmengā wadō ante ānāmaī inte edæ adodō ante edæ cōwē aa pecampa.

30 Mīnitō wēēñēdē ēñēnāmaī cæmīni incæte Wængonguī ĩñōmō idægōidi ēñēnāmaī cædāni beyæ mīnitō ĩmīnite wæætē waadete cædinque pōnō ata cæpocā quēwēmīnīpā.

31 Ayæ adobaī mīnitō ĩmīnite pōnō waadete ata cæpocā quēwēmīni beyæ idægōidi ēñēnāmaī cædāni ĩñōnānite Wængonguī ñōwo tōmēnāni ĩnānite adobaī waadete cædinque godō ata cæpocā quēwēnānimpā.

32 Īninqe tōmengā, Mīni waocabo tōmāmīni ĩmīnite botō waadete cædinque pōnō ata cæpocæboimpā, ante cædinque, Mīni ēñēnāmaī cæcabo ĩnōmīni inte mīnitō nāmā eō toyænte aamō cædāmaī incæmīnimpā, ante tōmāmō ĩmonte ñā cæyænte baī cæcā wæcongāmōimpā.

33 Īninqe Wængonguī nanguī pōni waadete entawēnongā ĩñongante tōmengā nānō pōnō cædōnō ante mōnō ædō cæte tee mante aquīī. Tōmengā tōmancoo do adongā inte nanguī pōni ēñēnongā inte cæcā ingānō anguēnē. Tōmengā edæ, Æbānō ĩ, ante do againgā inte edæ, Æbānō cæquīī, ante do apænte

añongante mōnō waocabo wæætē tōmengā nānō cædō ante ædō cæte ēñenguīī. Tōmengā ædōnō ponte ædōnō gocāā, ante pōnente wædinque mōnō tōmengā ōnōwa amōmpā diyæ taadō aquīī. 34 Edæ ĩmaī ante nāni yewæmongāinō baī impā. “Mōnō Awēnē æbānō pōnengāā, ante pōnente wædinque æcānō ēñengāā. Ayæ, ĩmaī cæquī impā, ante mōnō tōmengā ingante edæ ædō cæte odōmonte apænequīī. 35 Wængonguī ingante æcānō do godongā inte wæætē, Bitō debe ĩmīpā, ante anguingāā. ĩñæmpā tōmengā ingante godōmōmpā diyæ debe inguingāā,” ante Itaiya wodi nānō yewæmongāinō baī impā. 36 Edæ tōmengā nānō pōnongaincooque inte edæ tōmancoo ongōmpā. Mōnō waocabo ĩñōmō tōmengā badongā beyænque tōmengā quīmō baquinque ongōmōmpā. Ayæ adobaī edæ tōmengā badongā beyænque tōmancoo tōmengā quincōoque edæ baquinque ongoncoopa. Edæ tōmengā adocanque pōni ñāō entawente edæ cōwē tæi ēmoncæcāimpā. Mānōmaī impā, ante mōnō, Amēē, ante apænecæimpā.

12

Wængonguī quīmō ĩmōmpā, ante cæte quēwengæimpa

1 Botō tōniñamīni ēñēdāni. Wængonguī waadete pōnō waa cæcā ængāimīni inte mīnitō ĩmaī cædāni, ante botō nanguī āmōpā. Wængonguī quī, ante baō pædæ godōnāni waa ængā baī mīnitō adobaī edæ, Wængonguī quīmōni ĩmōnīpā, ante mīimīni inte edæ tōmengā ingante nāmā pædæ godōmīni ængædāni. Mānōmaī cædinque mīnitō tōmengā ōnōwa ĩnō mīni ædæ wæænte nanguī cæquēnēnō ante edæ do cæmīni incæmīnimpā. Mānōmaī godōmīni æninqe tōmengā wæætē edæ, Botō ayōmo tæiyæ waēmō pōnōmīni æmōpā, ante tocæcāimpā. 2 Inguipogaque ante pōnente mīni cægāinō ante ñōwo ñīmpo cædinque

mīnitō mīimīni mīni quēwenguinque ante edæ ocai mīinque encate bai nōingā ante pōnēedāni. Mānōmaī cædinque mīnitō, Wængonguī waa pōnī nānō ānōnō ante, Æbānō ī, ante ædæmō ēñēninque, Tōmengā nānō ānō īñōmō eyepæ pōnī impa, ante ēñencæmīnimpa. Mānīnō ante ēñente cæte quēwēmō inte mōnō tōmengā tōnō godongāmæ waa tocæimpa.

³ Wængonguī waadete pōnō cæcā ate botō nē apænebo badīmo inte īmaī ante apænebopa. Mīnitō nāmā pōnēninque, Ñænæmo īmopa, ante pōnēnāmāī īedāni. Wængonguī pōnō badongā ate mīnitō wede pōnēmīni badīmīni inte mīni wede pōnenganca māningancaque pōnēninque īmaīnō ante pōnēedāni. Botō ōnōmoque bai īnōmo īmopa, ante ocai encamīni inte tōō pōnī pōnēedāni. ⁴ Mōnō baō adoyonque pōnī ēñāmō incæte wīī adodonque mōnō cæquēnēnō ante ēñamompa. Īninque mōnō aquīnō ante awinca ēmōninque mōnō dao dao goquīnō ante ōnōwa ēwamompa. Ayæ wadō mōnō cæquīnō ante wayō ēñadinque mōnō wæætē wadō mōnō cæquīnō ante wayō ēñadinque wayō wayō mōnō ēñacoo ēñamompa. ⁵ Īninque wayō wayō ēñāmō incæ mōnō baō pæ pagænguīncoo adoyonque ī bai mōnō adobai Codito nempo mōnō quēwencabo nangūī pōnī imō incæte adocabomō īnōmō īmopa.

⁶ Īninque mōnō adocabomō īñōmonte Wængonguī waadete pōnō cædinque mōnō īmonte wadō wadō mōnō cæquīnō ante tōmānō pōnongā æmompa. Īninque mōnō tōmengā da pōnongā mōnō ænganca edæ adoganca wadō wadō cæmompa. Mānōmaī ænte cædōmō īñōmonte pancamīniya īmīnite Wængonguī pōnō apænecā ēñēninque mīnitō tōmengā beyæ nē apænemīni do badinque wede mīni pōnenganca apæneedāni. ⁷ Wæætē wamīni īmīnite Wængonguī pōnō cæcā æninque mīnitō wadāni īnānite nē

cæmīni do badinque wadāni beyæ cæcæmīnimpa. Wæætē wamīni īmīnite tōmengā pōnō cædinque odōmonte apænecā ēñēninque mīnitō nē odōmonte apænemīni do badinque odōmonte apænecæmīnimpa. ⁸ Ayæ wæætē wamīni īmīnite Wængonguī pōnō waadete apænecā ēñēninque nē waadete apænemīni badinque mīnitō īñōmō wæntæye inte wædāni īnānite ædæmō apænemīni ēñēninque tōmēnāni wæætē edæ wampo pōnēninque tæī pīñænte cæcædānimpa. Wamīni īmīnite Wængonguī pōnongā æninque nē nēnempomīni badinque mīnitō, Tōmēmōni quī, ante wædāmaī inte wæætē wadāni nāni ænguēnēnō ante eyepæ godōmīni æncædānimpa. Wamīni īmīnite Wængonguī pōnō angā ēñēninque mīnitō wæætē awēnēidi bai nē āmīni badinque wadāni īnānite nōingā cæte awēnēidi bai ancæmīnimpa. Wamīni īmīnite Wængonguī ædæmō waadete pōnō waa cæcā æninque mīnitō wæætē ædæmō waadete cæmīni do badinque wadāni īnānite ædæmō waadete godō waa cædinque edæ wædāmaī inte tocæmīnimpa.

Codito nempo quēwēninque īmaī cæcæimpa, ante

⁹ Botō waadete pōnēmopa, ante tedemīni īninque mīnitō nōīnō cæte waadete pōnencæmīnimpa. Wīwa mīni cædōnō ante pīīninque wido cæedāni. Wæætē, Quīnō waa cæquīī, ante adinque mānīnō ante ænte mīnitō mīmōnē ædæmō entawēninque cōwē waa cæte quēwēedāni. ¹⁰ Mōnō waadete pōnencabo īmopa, ante pōnēninque wacā ingā wacā ingā waadete pōnente cæedāni. Wadāni ñænænāni īnānipa, ante mīnitō tōmēnāni īnānite ængō cæte bai cædinque wæætē, Botō wædāmo īmopa, ante nāmā ængō cædāmaī īedāni.

¹¹ Tæī pīñænte ēwocadinque mōnō Awēnē beyæ ante wæntædāmaī inte cæedāni.

12 Watapæ bacæimpa, ante pönëninque tocæminimpa. Caate wæwëmini incæte wæntæye badämaï inte ee cæedäni. Ñimpo cædämaï inte Wængongui ingante cöwë apæneedäni.

13 Wængongui quïnäni ænguënänäni inte wædäni adinque mīnitō māincoo wæætē nēnempomīni æncædānimpa. Ayæ, Botō oncōnē pō guiite cænte mōedäni, ante wadäni inänite waadete cæedäni.

14 Mīnitō imīnite nē piinte cædäni iñönänite mīnitō tōmēnāni inänite waadete godō apæneedäni. Edæ tōmēnāni inänite waadete apænedinque Wængongui mīnitō imīnite waa cæcæcäimpa, ante apænedinque wæætē piinte änämaï iedäni.

15 Nē watapæ todäni tönō godongāmæ watapæ toedäni. Nē Ca wædäni tönō mīnitō godongāmæ Ca ca wæedäni.

16 Mönō pönencabo imompa, ante adoyömō pönente quëwëedäni. Önönänique nāni nē änönāni tönō godongāmæ cædinque, Botō ñænæmo imopa, ante pönēnāmaï iedäni. Mīnitō, Wadäni pönömenque ocai encayönāni botō godömenque nangui pönī encabo imopa, ante nāmā ante pönēnāmaï iedäni.

17 Wadäni mīnitō imīnite pönō wënæ wënæ cædäni adinque mīnitō wæætē godō wënæ wënæ cædämaï iedäni. Ayæ, Quinō waa cæquī, ante tōmānāni nāni waa adönō ante adinque mīnitō māninonque ante cæedäni. 18 Eyepæ imīni inte mīnitō cæganca cædinque tōmānāni tönō godongāmæ piyænē cæte quëwëedäni. 19 Botō nē waademini ëñeedäni. Mönō Awënē beyæ iïmaï ante yewæmongatimpa. “Wënæ wënæ cædäni adinque botō wënæ wënæ nāni cædinō beyæ ante nē apænte panguënemo inte tōmēmo eyepæ wæætē godō cæbo wæcædānimpa, ante Awënē angampa,” ante yewæmonte ongompa cæminii. Mīnitō imīnite pönō wënæ wënæ cædäni wæminii inique edæ wæætē godō cædämaï

ee aedäni. Edæ nē äingä bate pänongä inte Wængongui incæ pancæcäimpa. 20 Wæætē, “Bitō imite nē piinte cædongä incæ gæwænte wæcä adinque godömi cængæe. Gue ænente wæcä adinque godömi becæe. Edæ mänömaï waa cædinque edæ tōmengä guingo imonte nänō wæwenguinque bitō tōmengä ingante waa cæcæbiimpa,” ante Wængongui beyæ yewæmonte ongō apa cæbii. 21 Tōmēnāni wënæ wënæ nāni cædō beyæ oda cædämaï inte wæætē mäninō ante wido cæte bai cædinque bitō waa cædinque edæ tæi emonte wægänä cæe.

13

1 Gobiedōno awënē nempo waodäni ëñente cæte quëwencædānimpa, ante Wængongui incæ godō gö cæcä beyænque gobiedōno awënëidi badānipa. Edæ Wængongui mänömaï ante gö cædämaï ingä bai quingänō awënē inguënengäa. Edæ dæ ancædōnimpa. Inique gobiedōno awënëidi inänite mönō tōmämō Ao äninque ëñente cæcæimpa.

2 Inique awënē ingante æcänō Baa änaa tōmengä nänō apænte pante wæquinque Wængongui nänō goncægainō ante ëñenāmaï inte edæ Baa angampa. 3 Nē waa cædäni guiquënē awënëidi inänite waa ate todinque guïñenāmaï inänipa. Wæætē wënæ wënæ cædäni guiquënē awënëidi inänite guïñente wædānipa. Gobiedōno awënē ingante guïñenāmaï inte quëwencæboimpa, ante bitō ämitawoo. Inique bitō guïñenāmaï inte quëwencæte ante waa cæcæbiimpa. Waa cæbi adinque tōmengä, Bitō waa cæbi abopa, ante pönō waa cæcä inique bitō guïñenāmaï imaimipa.

4 Botō imote nē cædongä inte mīnitō beyæ waa cæcæcäimpa, ante Wængongui gobiedōno awënē ingante godō gö cæcä ongongampa. Edæ Wængongui ingante nē cæcä inongä inte tōmengä nē wënæ wënæ cæcä ingante nō cæte nē panguënengä

ingampa. Īninqe awēnē yaēmē nē nǣængā inte wīi ōnonque nǣængampa cæbii. Wēnæ wēnæ cæbi ĩninqe edæ guīñente wæcæbiimpa. ⁵ Īninqe mōnō, Pangā wæcæ wæ, āninqe awēnē ingante ēñente cæcæimpa. Ayæ pangā wæmō incæ wīi pangā wæmō incæ mōnō mīmō nē entawente nāmā apænte ānōmō inte mōnō awēnē ingante Ao ante ēñente edæ nōingā cæcæimpa. ⁶ Wængonguī beyæ nē cædōnāni inte awēnēidi ĩñōmō tōmēnāni nempo quēwēnāni ĩnānite cōwē aadinque māninqe cæte quēwēnānipa. Mānōmaī ĩ ĩninqe mīnitō, Awēnēidi eyepæ æninqe mōnitō beyæ cæcædānimpā, ante tōmēnāni nāni āinta pædæ godōmīni ænānipa.

⁷ Æcāmenque ingante cæquēnēmīni ĩmīni inte mīnitō tōmānāni ĩnānite mīni cæquēnenganca do godō cæmīni æncædānimpā. Awēnē nempo quēwēñōmonte tōmengā eyepæ æninqe mōnō beyæ cæcæcāimpā, ante mīnitō awēnē nānō āinta godonguēnēmīni inte do godōmīni ængædāni. Waocā ingante mīnitō guīñente ēñenguēnēmīni ĩmīni ĩninqe tōmengā ingante guīñente ēñēedāni. Waocā ingante mīnitō waa aquēnēmīni ĩmīni ĩninqe edæ tōmengā ingante waa aedāni.

⁸ Wacā ingante mīni cæquēnēnō ante edæ ee ongōnāmaī inte godō cæmīni ængā ate abæ tawænte gocæbiimpa. Wæætē wacā ingā wacā ingā waadete mīni pōnenguēnēnō ante edæ godongāmæ cōwē waadete pōnenguēnēmīni ĩmīnipa. Wadāni ĩnānite nē waadete pōnengā ĩñōmō tōmengā ĩñōmō Wængonguī nānō, ĩmaī cædāni, ante nānō wææ angāinō ante do ēñente cæcā ingampa. ⁹ Tōmēmi nāmā bitō waadete pōnēnō ganca wacā ingante adoganca waadete pōnencæbiimpa, ante Mōitee wodi yewæmongacāimpā. Mānīne adodeque ante ēñente cædinque waocā Wængonguī nānō wææ angāinō ante tōmānō do ĩninqe cæcampa. Edæ, “Bitō nānōogængā ĩnāmaī

ĩñongante godō guēa mōnāmaī ĩe. Wacā ingante godō wænōnāmaī ĩe. Wacā nānō ēadincoo adinque godō ænāmaī ĩe. Wacā wēnæ wēnæ cæcā atabopa, ante godō babæ wapiticæ apænedāmaī ĩe. Wacā quī ante æñente wædāmaī ĩe.” Mānīnecoo Wængonguī nānō wææ angāinecoo ante bitō waadete pōnēmi beyænque tōmāne do ĩninqe cætimpa. Ayæ quīnemē godōmenque wææ ante ĩ mānīne adobāi bitō waadete pōnēmi beyænque tōmāne do ĩninqe cætimpa. ¹⁰ Nē waadete pōnengā ĩñōmō edæ wacā ingante cōwē wīwa cædāmaī ingampa. Mānōmaī beyæ nē ædæmō waadete pōnēnānique Wængonguī nānō wææ angāinō ante ĩninqe cædānipa.

¹¹ Īninqe, Nōwoyedē æbānō oo baquīi, ante do ēñēninqe mīnitō waadete pōnente quēwēedāni. Edæ wēēnēñedē mā mōnō wede pōnēñedē mīnguipo mōnō quēwenguīmāmo ĩñōmō edæ māñēñedē edæ oo bacæ cædāmaī ingatimpā. Nōwo guiquēnē, Oo pōnī bacæimpā, ante pōnente wædinque mīnitō mōwocodē ōñōmīni inte edæ ñāni ōmæmōninqe mīlmīni quēwēedāni. ¹² Wēmō ĩñōmō mōnō wæwēmāmo idæwaa edæ bapa. Mīnguipoga ñāo baī baquinque edæ oque pōnente impā cæmōō. Wēmō ĩñonte mōnō wēnæ wēnæ cædō æmæwo wido cædinque, mōnō wæætē ñāo ĩñōmō quēwēninqe edæ wææ cæquincoo wēñate baī cædinque nāmā wææ gompotawengæimpā. ¹³ Mānōmaī cædinque mōnō itædē quēwēnōmō inte nō pōnī cæcæimpā. Baonque ante mōnō cæñewēnō ante towēnāmaī inte mōnō tī nāmæ nanguī bete quidi quidi dowænāmaī ingæimpā. Mōnō wacā tōnō godō guēa mōnāmaī, cænguī eyepæ cæninqe godōmenque nanguī cænāmaī ingæimpā. Wæætēdō wæætē pīinte cædāmaī inte mōnō, Wacā baī bacæboimpā, ante pīinte adāmaī ingæimpā. ¹⁴ Wæætē wææ cæquincoo entawente baī cædinque mīnitō nāmā wææ gompotawencæte

ante cædinqwe mōnō Awēnē Itota Codito ingante entawente quēwēedāni. Ayæ baonque ante mini cæinēwēnō ante wido cædinqwe, Æbānō cæte wēnæ wēnæ cæquimoo, ante cæcæte ante wædāmaī iedāni.

14

Minitō tōniñadāni inānite piinte ānāmaī iedāni, ante

¹ Wacā wīi ædæmō pōnengā incæte mīnitō, Mōnō pōnencabo imōmpa, ante pōnēninqwe tōmengā adocabocā nānō baquinque āmīni pongædāni. Tōmengā nānō pōnēnō ante wæætedō wææte ānāmaī iedāni. ² Pancadāniya wede pōnēnāni inte cængui adinqwe, Nāwā cængui impa, ante guiñēnāmaī inte quiēmē cængui incæ edæ dobæ ade cænānipa. Wadāni guiquēnē æmæ pōnente beyæ, Tōmāā baō baacā impa, ante awente baī cædinqwe quingāmenque baō incæ cænāmaī inte onguipoiya pæcooque edæ cænānipa. ³ Incæte tōmāā cængui nē cænongā iñōmō onguipoiya pæcooque nē cænongā ingante piinte adāmaī incæcāimpa. Wacā ingante, Bitō ōnōmique baī inōmi inte edæ awente cænāmaī imipa, ante ānāmaī incæcāimpa. Ayæ wææte onguipoiya pæcooque nē cænongā guiquēnē baō nē cænongā ingante, Baacā apa cæwēe, ante apænte ante piināmaī incæcāimpa. Edæ nē cænongā ingante Wængongui Ao āninqwe, Botō quīmi imipa, ante do ængampa. ⁴ Iñæmpa tōmengā wacā awēnē ingante nē cæcā iñongante bitō ædō cæte apænte āmii. Edæ tōmengā awēnē incæ, Waa cæbipa, angā wædinqwe edæ tōmengā adiyæ tæi ongōmaingampa. Wææte adocā tōmengā awēnē, Wēnæ wēnæ cæbipa, angā wædinqwe edæ tæ go wææmaingampa. Incæte edæ tōmengā mōnō Awēnē ingante nē cæcā iñongante mōnō Awēnē adocā incæ tæi piñænongā inte eyepæ cædinqwe edæ æænō gō cæcā tæi ongoncæcāimpa.

⁵ Ayæ wacā guiquēnē, Pancaōnaa godōmenque waa ēōnæpa, ante cæcæimpa, ante pōnēñongante wacā guiquēnē, Tōmāā itædē ōnōnæque impa, ante pōnengampa. Iñinqwe mōnō pōnencabo wacā wadō wacā wadō pōnēmō incæte mōnō tōmāmō iñōmō edæ, Nāmā botō pōnēnonque ante botō nō pōnente cæcæboimpa, ante edæ mānīnonque ante cæcæcāimpa. ⁶ Edæ, Pancaōnaa godōmenque waa ēōnæpa, ante nē pōnengā guiquēnē tōmengā mōnō Awēnē ingante waa adinqwe mānōmainō ante cæcampa. Pancaōnaa wīi godōmenque waa ēōnæpa, ante nē pōnengā guiquēnē tōmengā adobāi mōnō Awēnē ingante waa adinqwe mānōmainō ante cæcampa. Baō nē cænongā guiquēnē Wængongui ingante, Waa pōnōmi cæmopa, ante adobāi mōnō Awēnē ingante waa adinqwe cængampa. Baō ate nē awente cænāmaī inongā guiquēnē tōmengā adobāi Wængongui ingante, Waa pōnōmi cæmopa, ante onguipoiya pæcooque cæninqwe mōnō Awēnē ingante waa adinqwe baō cænāmaī ingampa.

⁷ Mōnō pōnencabo iñōmonte æcāmenque incæ nāmā beyænque dicæ quēwengāā. Dicæ nāmā beyænque wængāā. ⁸ Wææte edæ quēwēmō ininqwe mōnō Awēnē beyænque quēwēmōmpa. Wææte edæ wæmō ininqwe mōnō Awēnē beyænque wæmōmpa. Iñinqwe quēwēmō incæ wæmō incæ mōnō Awēnē quīmō inōmō inte quēwēninqwe tōmengā quīmō inte edæ wæmōmpa. ⁹ Edæ do wængaināni beyæ ante mīimō quēwēmō beyæ ante Codito tōmāmō Awēnē nānō baquinque edæ wænte ñāni ōmæmongacāimpa.

¹⁰ Bitō guiquēnē bitō tōniñacā ingante ædō cæte apænte āmii. Ayæ bitō tōniñacā ingante, Ōnōmique baī imipa, ante quīnante āmii. Edæ Wængongui nānō apænte anguimpaa gāānē ongōñōmonte tōmengā tōmāmō imonte apænte ancæcāimpa cæbii. ¹¹ Edæ Wængongui beyæ ante iīmaī

ante yewæmonte ongompa.

“Mönö Awënë incæ, ‘Në Quëwëmo
iñömö inte edæ ämo ëñëedāni,
angampa.

Ayæ, ‘Minitö tömāmīni botö önöwa inö
da guicapodique,

Bitö Wængonguī inömi imipa, ante
adoyömö apænecæmīnimpa,
angampa.”

¹² Ante nāni yewæmongainö bai
iñique cædique mönö tömāmö
Wængonguī weca ponte ongöningue
mönö pönengainö ante mönö
apænegainö ante mönö cægainö
ante tömengä ingante edonque pönī
apænecæimpa.

*Wacä oda cæcæcäimpa, ante
cædämaī incæbiimpa, ante*

¹³ Mänömaī beyæ mönö wacä
ingante apænte änāmaī ingæimpa.
Wæætë mīnitö, Waa cæcæboimpa,
ante nāmā wææ cædique, Botö
tönīñacä taadö nänö goquinö ante
ee acæboimpa, ante pönëedāni.
Tömengä tee tēwate bai oda cædämaī
incæcäimpa, ante nöingä cæquinque
ante pönencæmīnimpa. ¹⁴ Botö
iñömö Itota Codito nempo quëwëmo
inte edæ nöingä pönëningue, Tömää
cænguī nāmā incæ nāwāaquiringä impa,
ante do ëñëmopa. Incæte wacä,
Pancaa cænguī baacä impa, ante në
pönengä inte tömengä beyæ baacä
iñonte tömengä nänö, Baacä impa, änö
cænāmaī inguëngä ingampa.

¹⁵ Bitö quingämë cæmi adinque
bitö tonīñacä, Baacä apa cæwëe, ante
wæwente bacä inique bitö waad-
edämaī inte godömenque cæmaīmipa.
Edæ bitö tonīñacä beyæ Codito
wængacäi apa quëwëe. Bitö tonīñacä
nänö pönënamāi bate wænguinque baö
cæmipa, ante wædique bitö tömengä
ingante nāwangä waadete pönëmi
inte tömengä beyænque ante cöwë
baö cænāmaī incæbiimpa. ¹⁶ Botö
mänömaī cædique waa pönī cæbopa,
ante pönëmi incæte wadāni bitö
waa cædö ante, Wiwa cæbipa, ante
pönö babæ ante tedewënāni ate
wædique bitö wæætë waadete

pönëningue wææ ämi tedewënāmaī
incædānimpa. ¹⁷ Wīi cænguinque

ante wīi bequinque ante Wængonguī
nempo quëwëmompā. Wæætë

Wængonguī Tæiyæ Waëmö Önöwoca
nempo quëwëñömönte tömengä pönö
cæcä æningue mönö nö entawen-
guinque impa. Ayæ mönö gänë
pönëningue ante mönö watapæ tote
quëwëningue ante tömengä nempo
quëwëmompā. ¹⁸ Edæ Codito nempo
quëwëningue waocä mänömaī cæcä
adinque Wængonguī tömengä ingante
waa ate tocampa. Waodāni adobāi,
Waa cæbipa, ante waa adānipa.

¹⁹ Mänömaī impa, ante adinque,
Mönö pönencabo godongämæ piyænë
cæte quëwëngæimpa, ante, Ayæ mönö
godongämæ wede pönëningue tæi
mænonte bai ongongæimpa, ante
mönö nanguī cæcæimpa. ²⁰ Iñique
cænguī cæinente beyænque bitö
Wængonguī nänö në badongaināni
inānite bæ tadāmaī incæbiimpa.
Tömää cænguī edæ nāwāaquiringä
impa. Incæte bitö cænīnö beyænque
wacä ëñënamāi inte tee tēwate bai
oda cæbaingampa, ante do ëñëmi inte
bitö godömenque cæmi inique wīwa
cæbāimipa töö. ²¹ Waa cæcæte ante
bitö iīmaī cæcæbiimpa. Bitö baö cæmi
beyæ, biinömæ nāni wædænque ti
nāmæ bebi beyæ, quiëmë cæbi beyæ
bitö tonīñacä oda cæte wæcantawo.
Iñique bitö iñömö, Botö tonīñacä
oda cædämaī incæcäimpa, ante wææ
cædique ee cædämaī imi inique waa
imaimpa.

²² Mäninö, Æbänö cæte waa in-
guīi, ante bitö pönëno beyænque
wadāni inānite apænte änāmaī inte
bitö adobique inte Wængonguī ay-
ongante cæcæbiimpa. Waa cæqui
impa, ante mīmönö bitö pönënonque
ante mäninonque cædique bitö tente
wæquinque cædämaī inte waa to-
baīmipa. ²³ Wæætë në æmæ pönengä
guiquënë, Cæmo beyæ Wængonguī
pangä wæcæ wæ, ante wædingä inte
tömengä nāmā nänö apænte pante
wæquinque ade cængampa. Edæ
æcänö wede pönënamāi inte cæda

tömengä nänö cædönö tömänö edæ wīwa cætimpā. Īninqe bitö cædö tömänö wede pönente cæcæbiimpā.

15

Wadāni incæ watapæ quēwencædānimpa, ante cæe, ante

¹ Mönö nē wede pönemö ĩñömö tæi piñante entawēmö ĩñömö inte nāmanque ante mönö cæinēnō ante edæ wædāmaī ingæimpā. Wæætē edæ nē æmæ pönēnāni guiquēnē tömēnāni aquīi pōni ĩnāni inte, Ædö cæte cæquimoo, ante wædāni adinqe mönō tömēnāni wædö ante ænte mongænte bai cædinque tömēnāni tönö ĩñacabo cæcæimpā.

² Godongāmæ godö cæmō æninqe waa todirque tömēnāni wæætē wede pönēninqe oncö tæi mænonte bai tæi ongoncædānimpa, ante mönō ædæmō cæcæimpā.

³ Edæ mönō Codito incæ nāmanque ante nänö cæinēnō ante cæcæte ante edæ wædāmaī inte piyænē cægacāimpā. Wængonguī ingante do nāni apænegaīnō bai tömengä wadāni beyænque ante cægacāimpā.

“Wængonguī ēñēmi. Wadāni bitö ĩmite piinte badete tocæte ante cædinque botö imote wæætē piinte badete todānipa,” ante apænete bai Codito ee cægacāimpā.

⁴ Edæ mönō ĩmonte odömonte apænecæte ante Wængonguī angä ēñēninqe dodāni tömantaa yewæmongadānimpa. Īninqe mäninta ædæmō adinqe wampo pönēninqe wæntædāmaī inte ee cæmō ĩninqe edæ mönō, Watapæ bacæimpā, ante pönente tocæimpā.

⁵ Īninqe Codito Itota miñæ tee empote goyömonte Wængonguī ĩñömö edæ, Minitö wampo pönēninqe wæntædāmaī inte ee cæcæminimpā, ante nē ædæmō cæcä ingampa. Tömengä mänömaī pönö cæcä ate minitö ĩñömö adoyömö ante mini pönencabo bacæminimpā, ämopa.

⁶ Mänömaī bamīni ĩninqe minitö äanque bai adodö ante pönēninqe ĩmaī ante Wængonguī ingante apænecæminimpā. Mönitö Awēnē Itota Codito Mæmpobi ĩnömi inte

bitö tömengä Wængonguī adobi ĩmi ĩñömö bitö tæi emömi inte ñäö apäite bai ĩmi amönipa, ante adoyömö ante apænecæminimpā, ante botö mänömainö ante yewæmömopa.

Oodeoidi ĩnāmaī ĩnāni ēñencædānimpa, ante

⁷ Codito mīnitö ĩminite Ao ante ængacāimpā. Īninqe tömengä mīnitö ĩminite nänö ængai bai mīnitö adobai wacä ingä wacä ingä godongāmæ Ao ante æedāni. Mänömaī cæmīni adinqe wadāni Wængonguī ingante apænedinqe, Bitö waa pōni cæbi amönipa, ante watapæ pōni apænecædānimpa.

⁸ Edæ apænebo ēñēedāni. Mönitö mæmæidi ĩnānite Wængonguī, Minitö beyæ pönö waa cæcæboimpā, angacāimpā. Īninqe, Wængonguī tömengä nänö angainö ante cöwē cæcæcāimpā, ante oodeoidi ēñencædānimpa, ante cædinque mönö Codito tömēnāni beyæ nē cæcä bagacāimpā.

⁹ Tömengä ĩñömö, Idægoidi ĩnāmaī ĩnāni incæ Wængonguī ingante, Bitö ñäö bai emömi inte pönö waadete waa cæbi æmönipa, ante apænecædānimpa, ante mänömaī cægacāimpā. ĩmaī ante Wængonguī beyæ nāni yewæmongainö bai impā.

“Botö mänömaī beyæ, Bitö æbänö nē waa cæbi ĩmii, ante idægo ĩnāmaī ĩnāni weca gote apænecæboimpā.

Bitö emöwo ante ämotamīni watapæ pōni ancæboimpā,” ante nāni yewæmongainö bai Codito cægacāimpā.

¹⁰ Ayæ wataa ĩñömö ĩmaī ante yewæmongatimpā.

“Idægoidi ĩnāmaī ĩmīni incæ mīnitö Wængonguī quīnāni tönö godongāmæ watapæ toedāni.”

¹¹ Ayæ wæætē,

“Idægoidi ĩnāmaī ĩmīni mönö Awēnē ingante apænedinqe, Bitö waa pōni cæbi amönipa, ante watapæ pōni apæneedāni.

Wamīni mīni cabo mīni cabo tömāmīni ämotamīni ante bai apænedinqe, Waa pōni cæbi

amōnīpa, ante watapæ pōnī
apæneedāni.”

12 Itaiya wodi adobainō ante
yewæmongacāimpa.

“Inguipoga quēwēnāni tōmānāni
Awēnē baquinque

Awænguinto tā bocate bai cædinque
Yæte Pæingā iñōmō ængæ gan-
ticæcāimpa.

Tōmengā cæcā beyænque watapæ
bacæimpa, ante idægoidi
ināmaī ināni incæ pōnencædānimpa
ante Itaiya wodi yewæmongacāimpa.

13 Wængonguī iñōmō, Watapæ
bacæimpa, ante nē badongaingā
inongā inte iīmaī cæcæcāimpa, āmopa.
Tōmengā Tæiyæ Waēmō Ōnōwoca tæi
piñænte cæcā ate mīnitō, Watapæ
bacæimpa, ante godōmenque wede
pōnencæminimpa. Mänōmaī cæcæte
ante cædinque Wængonguī pōnō
apænecā ēñēninque mīnitō tōmengā
ingante wede pōnēninque edæ gānē
entawēninque watapæ tocæminimpa,
āmopa.

14 Botō tōniñamīni ēñēedāni. Botō
tōmēmo ayōmote mīnitō nē waa
cæmīni iīmīni abopa. Ayæ, Æbānō
waa cæquī, ante do ēñēmīni iīmīnīpa.
Ayæ adobai mīnitō eyepæ iīmīni inte
wacā ingā wacā ingā do odōmonte
apænemīni iīmīnīpa, ante pōnēmopa.

15 Īninque botō, Mīnitō ēñēnīnō
ante mīnitō ocai encadōmīni inte
edæ adodō ante pōnencæminimpa,
ante bai cædinque pancadea ante
yewæmontabopa. Botō iñōmō
Wængonguī waadete pōnō cæcā ænte
nē entawēmo inte mänōmainō ante
yewæmōninque edæ guiñēnāmaī
inte nangui ante yewæmōmopa.

16 Edæ tōmengā waadete pōnō cæcā
ænte entawēninque botō Itota Codito
beyænque ante idægoidi ināmaī ināni
inānite nē cæbo badinque Wængonguī
ingantedō ante watapæ apænebo
ēñēnānīpa. Mänōmainō ante apænebo
ēñēñōmīnite Wængonguī Tæiyæ
Waēmō Ōnōwoca pōnō badongā
ate idægoidi ināmaī ināni incæ
tæiyæ waēmō ewocate quēwēnāni
badānīpa. Mänōmaī bayōnānite botō

iñōmō, Wængonguī quī, ante pædæ
godōnāni bai cædinque tōmēnāni
inānite ante edæ, Wængonguī quīmīni
bacæminimpa, ante pædæ godōmo
æninque Wængonguī wæætē waa
tocampa.

17 Mänōmaī beyæ botō Itota Codito
nempo quēwēninque Wængonguī
beyæ cædinque edæ nangui to-
bopa. 18 Codito botō tōnō guēa

cæcā beyænque botō nangui
cæcā beyænque botō nangui cæbo ate

tōmengā iñōmō tōō æmængā pōninque
edæ idægoidi ināmaī ināni incæ
edæ Wængonguī ingante ēñente
cædāni badānitapa. Botō Codito

mänōmaī botō tōnō nānō cædinō
ante apænedinque edæ māninque
ante apænedinque guiñēnete
wædinque godōmenque apænedāmaī
incæboimpa. 19 Wængonguī Tæiyæ

Waēmō Ōnōwoca tæi piñængā inte
botō tōnō godongāmæ cæcā ate botō,
Ēñencædānimpa, ante bamōnengæ
cæbo ate nē pōnēnāni badānitapa.
Mänōmaī Eedotadēē iñōmō mā cæte
godinque Ididiabæ ganca tōmāo
godāmæ godinque botō Codito in-
gantedō ante watapæ apænedinque
adodō adodō ante tōmānō ante
apænebo ēñēnānitapa.

20 Botō, Codito ēmōwo ante wadāni
nāni apænedāmaī iñōmō gote tōmengā
ingantedō ante watapæ apænebo
ēñencædānimpa, ante cōwē goinente
wætabopa. Wacā onguitanca nānō
tænōnincōnē æmōnga mænōnāmaī
incæboimpa, ante bai cædinque botō,
Wacā do nānō apænediñōmō botō
wæætē apænedāmaī incæboimpa,
ante cætabopa. 21 Wæætē iīmaī ante
Itaiya wodi nānō yewæmongainō bai
cætabopa.

“Tōmengā ingante ante ēñēnāmaī
īnināni incæ edæ do ate bai
ēwocæcædānimpa.

Ōnōmonca ēñēnāmaī īnināni incæ
edæ, ‘Æbānō ī,’ ante do
ēñencædānimpa.”

Ante nānō yewæmongainō bai botō,
Ēñencædānimpa, ante cætabopa.

Odömā iñömö pöinēmopa, Pabodo angampa

²² Mänömaï beyæ botö mīnitö weca poncæ cæyömote edæ, Wææ cæte i, ate wædinque pönāmaï intabopa.

²³ Iñömö ömæ idæwaa cæbo inte botö æpomē wadepo iñonte mīnitö imīnite aīnente wædömopa. ²⁴ İinque botö, İincayæ ate Epāñabæ gocæ cædinque wodo tebæ godinque mīnitö weca eñate aboque gocæboimpa, ämopa. Edæ botö wantæpiyæ eñate tote quēwente ate godömenque Epāñabæ gote cæyömo mīnitö botö beyæ cædinque da godöminī gocæboimpa.

²⁵ Nöwo guiquēnē botö täno Eedotadēē iñömö Wængonguï quīnāni beyæ godö cæcæte ante gobopa. ²⁶ Wængonguï quīnāni incæ Eedotadēē quēwēnāni pancadāniya ömæpodāni inte wædānīpa, ante pönente wædinque wabæca Mäatedöniabæ quēwēnāni tönö Acayabæ quēwēnāni tönö, Mönö da godö da godö cæcæimpa, ante pönēninque watapæ todirque tömēnāni, Wængonguï quīnāni quī, ante do godönānitapa. ²⁷ Mänömainö ante watapæ pönente cædāni incæte tömēnāni Eedotadēē iñömö quēwēnāni İnānite nē godonguēnēnāni inte da godönānimpa. Edæ

Wængonguï Önöwoca nänö pönongaincoo ante idægoidi pönö apænedāni eñente ænte ewocadināni inte wabæca quēwēnāni iñömö tömēnāni nāni eadincoo incæ idægoidi beyæ ante wæætē godonguēnēnāni badīnāni İnānīpa. ²⁸ İinque botö iñömö mānincoo tömēnāni nāni da godönincoo idægoidi weca ænte gocæboimpa. Godinque botö cöwā adinque, Nē ömæpodāni inte nē wædānique æncædānimpa, ante wææ cæcæboimpa. Adæmō cæbo ænāni ate botö māniñedē ate Epāñabæ gocæte ante cædinque mīnitö ömæ wodo tebæ godinque mīnitö weca eñacæ poncæboimpa. ²⁹ Codito pönö waa cædinque da pönongā pöninque botö cöwē tömengā tönö waa pönī botö cæquinque mīnitö weca poncæboimpa,

ante do eñēmopa.

³⁰ Botö tönīñamīni eñēedāni. Botö pæ pagænte bai nanguï cæyömote mīnitö iñacabo cædinque botö beyæ Wængonguï ingante nanguï apæneedāni, ante botö mönö Awēnē Itota Codito beyænque ānīnque ayæ Wængonguï Önöwoca nē waadete pönengā beyænque ānīnque mīnitö imīnite nanguï ämopa. ³¹ Oodeabæ pönēnāmaï İnāni iñömö Pabodo ingante wēnæ wēnæ cædāmaï incædānimpa, ante botö beyæ ante apæneedāni. Ayæ, Eedotadēē iñömö botö gote cæbo adinque Wængonguï quīnāni incæ botö cædö ate Ao ancædānimpa, ante apæneedāni. ³² Mänömaï i adinque botö, Awēnē Wængonguï angā ate botö watapæ todirque mīnitö weca pömo ate mönö godongāmæ guēmānīnque wampo pönengæimpa, ämopa. ³³ Wængonguï nē gānē pönengā inte mīnitö tönö godongāmæ ongöninque pönö cæcā ate gānē pönencæmīnimpa, ämopa. Mänömaï impa diyæ, ante botö, Amēē, ämopa.

16

Waa quēwencæmīnimpa, ante

¹ Botö iīmaï ämopa. Mönö tönīñacā tömengā emöwo Pebe mīnitö weca nöwo poncæ cæcampa. Tencodea iñömö Codito ingante nāni godongāmæ pönencabo iñönānite tömēnāni beyæ nē waa cæcā inte İingā onquiyængā iñömö waingā pönī ingampa. ² Tömengā nanguï İnāni beyæ wææ gompodinque waa cædongā inte botö beyæ adobaï nanguï cæcantapa. İinque edæ botö mīnitö imīnite iīmaï ämopa. Wængonguï quīmō İnömö inte mönö Awēnē nempo quēwēñömonte Pebe adocā inte adobaï ingampa, ante adinque mīnitö tömengā ingante waa adinque Ao ante æedāni. Ayæ tömengā quīēmē æīnente wæcā İñongante mīnitö wæætē edæ godö cæedāni ämopa.

³ Ayæ wada Pidotida tönö Aquidæ nāna gæncaya iñömö Itota Codito nempo quëwëningue edæ botö tönö godongämæ cæda inapa. İnıne mınıtö tömëna inate, Waa quëwencæmınımpa, ante botö beyæ ante apænemıni ëñëcædaımpa.

⁴ Wadāni botö imote wænoncæ cædāni wæyömote tömëna nāna wodo wængıneque edæ botö imote wææ cædatapa. Mānōmaı cædapa, ante botö tömëna inate waa ate pönente apænëbopa. Ayæ idægoidi ināmaı ināni Codito ingante nāni wayömö pönencabo wayömö nāni pönencabo adobaı tömānāni Aquidæda nāna cædınö ante ëñëningue tömëna inate waa ate pönëningue apænëdānıpa.

⁵ Ayæ Itota Codito ingante nē pönënanı Aquidæda oncönë godongämæ pö guıdāni inānite, Waa quëwëdāni, ante apænemıni ëñëncædānımpa. Botö æmıgo Epëneto botö nē waadecä iñongante mınıtö botö beyæ apænëdınque, Waa quëwencæbımpa, ante apænëdāni. Atıabæ iñömö Codito ingante wadāni pönënamāı iñönāni tömengä iñömö tāno pönëngantapa. ⁶ Ayæ Māadiya mınıtö beyæ nangui cædingä iñongante mınıtö wæætë tömengä ingante Waa quëwencæbımpa, ante apænëdāni. ⁷ Botö guıdëna Antodönico tönö Nönıato iñömö botö tönö godongämæ tee mönete wædına inapa. Tömëna iñömö botö pönënamāı iñömote wëenëñedë Itota Codito nempo quëwëna iñönate Codito incæ tömëna inate da godongacāımpa. İnıne, Itota Codito nānö nē da godongāina tänoda ina adınque mınıtö botö beyæ ante tömëna inate waa apænëdāni.

⁸ Ayæ wacä mönö Awënë nempo quëwëningue Ampıdiato ingante waadete pönëmo inte edæ botö, Waa quëwencæbımpa, ämopa. ⁹ Ayæ adobaı Odömāno mönıtö tönö godongämæ Codito nempo quëwente nē cæcä iñongante, Waa quëwencæbımpa, ante botö beyæ ante apænëdāni. Botö nē

waadecä Etaquito ingante adobaı ante apænëdāni. ¹⁰ Ayæ Apede iñömö Codito nempo quëwëñongante

tömengä æbānö cæcää, ante adınque Codito tömengä ingante wæætë, Waa cæbi abopa, angampa. Tömengä ingante botö beyæ ante waa apænëdāni. Ayæ Adıtobodo nāni quëwencabo inānite adobaı waa apænëdāni. ¹¹ Botö guıdengä Edodiyaönö ingante waa apænëdāni. Ayæ Nāadotıto guıdënanı incæ æcānö mönö Awënë nempo quëwëna tömënanı inānite adobaı, Waa quëwencæmınımpa, äedāni.

¹² Ayæ wada mönö Awënë nempo quëwëna onquıyæna Tidıpına tönö Tidıpota iñömö nē nangui cæda inapa. Tömëna inate botö beyæ ante waa apænëdāni. Ayæ wacä onquıyængä mönö nē waadecä Pedetıda iñömö tömengä mönö Awënë nempo quëwëningue nangui cæcantapa. Tömengä ingante adobaı, Waa quëwencæbımpa, äedāni. ¹³ Ayæ mönö Awënë nānö nē apænte ængaingä Odopo ingante waa apænëdāni. Tömengä badä incæ adobaı botö badä baı iñönante tömënä inante botö beyæ ante waa apænëdāni.

¹⁴ Ayæ adobaı Atıncodito, Pedegonte, Edëme, Patodobato, Edëma tömënanı nāni pönencabo tömānāni inānite, Waa quëwencæmınımpa, ante apænëdāni. ¹⁵ Ayæ wadāni Pidodogo tönö Oodıa, Nëdeeo tömengä mængä tönö, Odımpa tönö Wængongui quınāni tömānāni inānite, Waa quëwencæmınımpa, ante apænëdāni.

¹⁶ Edæ, Waa quëwencæmınımpa, ante mınıcabo incæ tömāmıni godongämæ waa waadete apænëncæmınımpa. Codito ingante wayömö nāni pönencabo wayömö nāni pönencabo tömānāni mınıtö imınite wæætë, Waa quëwencæmınımpa, ante änānıpa.

¹⁷ Botö tönıñamıni ëñëdāni. Mınıtö adocabomıni iñömınite wadāni æmæmoncadö æmæmonca pä cædāni inānite cöwä adınque edæ Baa äedāni. Doyedë mınıtö ëñënö ante ëñënamāı ināni inte tömënanı, Mınıtö

tee tēwate bai oda cæcæminimpa, ante cædinque wadö ante edæ odömönānipa cæminii. Tömēnāni inānite gomö aquēnē cæminii. ¹⁸ Mänōmaī cædāni iñömö mönō Awēnē Codito ingante cædāmaī inte nāmā nāni cæinēnonque ante cædānipa. Tömēnāni ante, Mīnitö imīnite waa amōnipa, ante waa tedete bai tededāni ēñēnque pancadāniya guiquēnē, Babæ wapiticæ impa, ante cōwā adāmaī ināni inte, Nō impa, ante do pōnēnānipa. ¹⁹ Mīnitö cōwē ēñente cæminii imīnipa, ante tōmānāni do ēñēnānipa. Mänōmaī beyæ botö iñömö nanguī tobopa. Incæte, Quinō waa cæquī, ante mīnitö ædæmō ēñencæminimpa, ante ainēmopa. Quinō wēnæ wēnæ cæquī, ante edæ ædæmō ēñēnāmaī inte edæ gomö acæminimpa, ante ainēmopa. ²⁰ Wængonguī, Gānē pōnente quēwencæminimpa, ante nē pōnō cæcā iñömö edæ Tatāna ingante mīnitö önōwa gānē wææntodongā ate mīnitö wæætē do pinā gāwate bai cæcæminimpa. Nōwo iñömö mönō Awēnē Codito nānō waadete pōnō cædō incæ entawencæminimpa, amopa.

²¹ Botö tönö guēa cædongā Timoteo iñömö mīnitö imīnite, Waa quēwencæminimpa, angampa. Ayæ botö guidēnāni Dotio tönö Yatōnō adobai Totipatedo adobai mīnitö imīnite, Waa quēwencæminimpa, anānipa.

²² Nōwo botö Tedetiyobo iñömö Pabodo önōneque tedecā ēñēnque iī cadota ante nē yewæmōnimo inte botö adobai, Waa quēwencæminimpa, amopa.

²³ Gayo adobai mīnitö imīnite, Waa quēwencæminimpa, angampa. Tömengā oncōnē Codito ingante nāni pōnencabo cōwē godongāmæ ponte apænedānipa. Ayæ tōmengā botö imote adobai, Pōe, angā ēñēnque edæ botö nōwo tōmengā oncōnē owobopa. Ayæ iñömö quēwēnāni awēnē nānō äinta æninqe adocanque Edaato nāni anongā iñömö

tōmengā, Tōmānāni beyæ æbānō cæquī, ante nē angā iñömö tōmengā tönö mönō tōniñacā Coadoto adobai, Waa quēwēdāni, anapa.

²⁴ Mönō Awēnē Itota Codito mīnitö imīnite pōnō waadete cæcæcäimpa. Mänōmaī impa, ante botö, Amēē, ante amopa.

Wængonguī ingante waa ate apænecæimpa, ante

²⁵ Nōwo iñömö Wængonguī ingantedö ante watapæ botö apænedö ante ayæ Itota Codito ingantedö ante mönō apænedö ante nē pōnēmīni inte mīnitö tæi piñante ongoncæminimpa. Wængonguī eyepæ inte mänōmaī pōnō cæcæcäimpa. Tömengā mäninō ante nōwo tæcæ nānō odömönō ante wēēnēñedē pedæmāmo iñonte cōwē wantæpiyæ wē wodonte bai cægacäimpa. ²⁶ Nōwo guiquēnē, Codito æbānō cægacāi, ante inguipoga tōmāmæ quēwēnāni ēñente wede pōnēnque botö imote ēñente cæcædānimpā, ante cædinque Wængonguī cōwē nē Quēwēnongā inte do odōmongā acæimpa. Tömengā angā ēñēnque tōmengā beyæ nē apænegaināni wæætē edonque pōni yewæmōnāni acæimpa.

²⁷ Iñinque Wængonguī nō pōni ēñēnongā inte adocanque Wængonguī ingampa, ante adinque mönō, Bitö adobique nāo bai emōmi inte edæ waa cæbi amōnipa, ante mönō Itota Codito emōwo apænedinque Wængonguī ingante edæ cōwē apænecæimpa. Mänōmaī impa diyæ, ante botö, Amēē, amopa.

1 Coodintoidi inänite Pabodo cadota ante tänota nänö yewæmongainta

*Coodinto iñömö Codito ingante
näni pönencabo*

¹ Wængonguï angä eñëninque Itota Codito botö imote aa pedinque da godongä godömo inte botö Pabodobo yewæmömopa. Mönö tönñacä Totënë tönö guëa apænete ate yewæmömo aedäni. ² Coodinto iñömö minitö Codito ingante mini godongämæ pönencabo inömini inte eñëedäni. Wængonguï, Botö quimäni badinque minitö Itota Codito nempo quëwëninque täiyæ waemö ewocate quëwencæminimpa, ante cædinque añecä pönimäni inte minitö acæminimpa, ante yewæmömopa. Ayæ adobai, Mönö Awënë Itota Codito emöwo ante nê aa pedäni tömämæ quëwënäni incæ acædänimpa, ante yewæmömopa. Itota Codito iñömö mönö Awënë ingä incæ tömënäni Awënë adocä ingampa. ³ Mönö Mæmpo Wængonguï tönö mönö Awënë Itota Codito godongämæ waadete pönö cæda ate minitö gänë pönente quëwencæminimpa, ante botö Totënë tönö ämönapa.

*Codito nänö entawënö bai nanguï
entawëmompä, ante*

⁴ Wængonguï waadete pönö cæcä ate minitö Codito Itota nempo quëwëninque tömengä nänö entawënö bai nanguï entawëminipa, ante adinque botö minitö beyæ ante Wængonguï ingante waa ate pönëninque cöwë apænebopa. ⁵ Edæ Codito nempo quëwëñöminite tömengä nänö ate eñengainö ante pönö apæneccä eñëninque minitö do entawëminipa. Inique mäninö nänö ate eñengainö ante eyepæ entawëmini inique minitö nö apænemäni bamäni. ⁶ Edæ mönitö, Itota iñömö adocä mönö Codito inongä ingampa, ante apænemöni

eñëninque minitö Ao äninque, Näwangä impa, ante wede pönëninque waa cæte quëwëmini acæimpa.

⁷ Mäninö beyæ, Mönö Awënë Itota Codito æyedënö pöninque edonque pönä a ongongungä, ante wänö cöninque minitö wëntæye badämaï incæminimpa, ante cædinque Wængonguï Önöwoca pönö apæneccä eñëninque minitö eyepæ inte waa cæquimäni imäni. ⁸ Minitö cöwë inique baganca täi ongonte oda cædämaï incæminimpa, ante Wængonguï pönö cæcä ate mönö Awënë Itota Codito pönedë mäniñedë ate minitö wentamö ædö cæte entawënguimäni. Edæ dæ ampa. ⁹ Wængonguï, Botö Wengä Itota Codito iñömö minitö Awënë inongä ingampa. Inique minitö tömengä nempo quëwëninque tömengä tönö godongämæ cæte quëwencæminimpa, ante minitö imäni añete aa pecantapa. Mänömaï ante nê aa pecä iñömö tömengä nänö angainö bai edæ cöwë nê ædæmö cæcä ingampa cæminäni.

*Wæætë godö wæætë godö cædämaï
iedäni, ante*

¹⁰ Botö tönñamäni, botö mönö Awënë Itota Codito emöwo apænedinque imäni ante ämo eñëmaimäni. Mönö pönencabo imömpa, ante adodö pönëninque minitö tömämäni godongämæ Ao ante adodonque cædinque näwæ godämaï iedäni. ¹¹ Botö tönñamäni apænebo eñëedäni. Codoeidi minitö imäniñedö ante apænedinque, Coodintoidi näni pönencabo incæ wæætë godö wæætë godö tedewënanipa. ¹² Ante apænedäni eñëninque botö, İmaï impa, ante apænebo eñëedäni. Pancamäniya, “Mönitö Pabodo nänö nê emiñæmöni imönipa,” ante cæminäni. Pancamäniya guiquënë, “Apodo nänö nê emiñæmöni imönipa,” ante cæminäni. Pancamäniya guiquënë, “Pegodo nänö nê emiñæmöni imönipa,” ante cæminäni. Ayæ wæætë pancamäniya guiquënë, “Codito nänö nê emiñæmöni imönipa,” ante

cæminipa. Mänömainö ante minitö wadö wadö ante tedewëmini awädö.

¹³ Ìñæmpa Codito nämä incæ ante dicæ wadö wadö ante apænecantawogaa. Incæte Codito nempo quëwëmini inte minitö, Pabodo ëmiñæmöni ìmönipa, ämini. Pëgodo ëmiñæmöni ìmönipa, ämini. Ayæ botö Pabodobo ìñömote wadäni awæ ñænquedimæ gönöninge minitö beyæ wænönäni dicæ wæntawogaa. Ayæ botö Pabodobo ëmöwo apænedinque minitö dicæ æpænë guiminitawogaa.

¹⁴ Botö minicabo weca quëwëninge Codipo tönö Gayo ìnate mäninaque ìnate æpænë guidömo guidatapa, ante pönëninge waa tobopa.

¹⁵ Mänömaï ì adinque minitö, Pabodo ëmöwo apænedinque æpænë guitamönipa, ante ædö cæte anguimīni, ante tobopa.

¹⁶ Æ, tæcæ pönëmopa. Etepänäidi ìnänite adobaï guidömo guidänitapa. Wadäni ìnänite wabänö guidömoï, ante wīi pönëmopa. ¹⁷ Edæ Codito, Bitö æpænë guidömi guicædänimpa, ante botö ìmote änämaï ingacäimpa. Wæætë, Tæi piñænogä inte Codito mönö wädö ante teëmë mongænte ñænquedimæ wængä beyænque mönö quëwengæimpa, ante apænebi ëñencædänimpa. Ayæ, Mänine ante wadäni, Önonque impa, ante änämaï incædänimpa, ante wææ cædinque bitö waodänique nani nanguï ëñente apænedö ante apænedämaï incæbiimpa. Wæætë, Codito ingantedö ante watapæ apænebi ëñencædänimpa, äninge Codito botö ìmote da godongä gobo ìmopa.

Codito Wængonguï nänö ëñëno entawëninge tæi nänö piñænö entawengampa

¹⁸ Itota ingante nani timpogaiwæ ante apænemöni adinque në wænguinäni guiquënë, Mäniwæ ante apænete wädänitedö abi, ante badete todänipa. Codito ængä beyænque në quëwëmöni guiquënë, Codito mäniwäa wængä

beyænque Wængonguï tæi piñænente pönö cæcampa, ante wede pönente apænemönipa. ¹⁹ Edæ Wængonguï, Ìmaï cæcæboimpa, angampa, ante yewæmonte ongompa.

“Në adäni önonquedö ante ëñënanipa, ante botö nanguï nani ëñëno ante wido cæcæboimpa.

Në nämä mä pönente ëñënanipi guiquënë önonque ëñënanipi, ante botö nämä nani ëñëno ante Baa ancæboimpa,”

ante Wængonguï cæcampa, ante yewæmongatimpa.

²⁰ Mänömaï cædinque Wængonguï, Inguipogaque quëwënanipi nani nanguï ëñëno incæ önonque impa, ante ëñenguënë quëwëmini, ante do odömongampa. Ìninque adocanque ingante, Nanguï ëñëmipa, ante Wængonguï dicæ anguingäa. Dodäni nani wææ angainö ante në nö odömömi ìmipa, ante Wængonguï dicæ anguingäa. Nämä mä pönëninge në nö apænebi ìmipa, ante Wængonguï dicæ anguingäa. Edæ dæ ampa.

²¹ Edæ, Inguipogaque quëwënanipi ocaidë nanguï ëñënanipi incæ önonque nani ëñëno beyænque botö ìmote ædö cæte ate bai pönenguinänipi, ante Wængonguï në nö ëñënogä inte cæcampa. Codito nänö cægainö ante apænemöni adinque ìinäni ìñömö, Önonque tedewënanitedö abi, ante badete todänipa. Ìñæmpa Codito nänö cægainö ante badete nani todö beyænque minitö wæætë në wede pönëmini inte quëwencæminimpa, ante Wængonguï nöingä pönëninge pönö cæcampa.

²² Oodeoidi, Öönädë nani mä cæi bai bamönengæ cæmini ate ëñëmaimönipa, ante änewënanipi. Guidiegoidi guiquënë, Nämä mä pönëninge ëñëmaimönipa, ante cædänipa. ²³ Mönitö guiquënë,

Codito ingante awænëmæ timpote wænönäni wængacäimpa, ante mäninonque ante apænemöni ëñëminipa. Mänömainö ante apænemöni ëñëninge oodeoidi guiquënë Baa ante tee tëwate bai

oda cædānīpa. Guidiegoidi guiquēnē mǎnīne ante ēñēnīque badete todānīpa. ²⁴ Mōnitō oodeomōni iñōmōnite mīnitō guidiegomīni iñōmīnite ædānimē inānite Wængonguī apænte ængā ingaīmō inte mōnō iñōmō edæ iīmaī ante pōnēmōmpa. Wængonguī nānō nō ēñēnō incæ Codito encacampa, Wængonguī nānō tæi piñænō incæ Codito entawengampa, ante do edæ ēñente pōnēmōmpa.

²⁵ Wængonguī ōnonque ante cæcampa, ante pōnēwēmīnitawoo. Mōnō waocabo nanguī ēñēmō iīmōmpa, ante pōnēmīnitawoo. Iñæmpa, Nanguī ēñēmō, ante tedewēmō incæ ōnonque wædāmō inte cæmōmpa. Wæætē Wængonguī guiquēnē ōnonque cæte bai cæcā incæ godōmenque gomonga nanguī ēñengā inte cæcampa. Ayæ, Wængonguī aquīngā inte cæcampa, ante pōnēmīnitawoo. Iñæmpa mōnō waocabo tæi piñæmō iīmōmpa, ante tedewēmō incæ mōnō ōnonque aquīimō inte cæmōmpa. Wæætē Wængonguī guiquēnē nē ōnonque cæte bai cæcā incæ godōmenque gomonga tæi piñæmongā inte cæcampa.

²⁶ Iñānāni, æbānō iñōmīnite Wængonguī aa pecantapa, ante pōnēedāni. Tōmāmīni dicæ nanguī ēñēmīni ingamīniyaa. Inguipogaque quēwēnāni nanguī nāni encadō bai mīnitō tōmāmīni dicæ adobai nanguī encamīni ingamīniyaa. Tōmāmīni dicæ nanguī tæi piñæmīni ingamīniyaa. Awēnēidi pæingā nānō awēnē baquinque ēñacā bai mīnitō tōmāmīni dicæ adobai awēnē baquinque ēñamīniyaa. Mānōmaī iñōmīnite Wængonguī dicæ aa pecantawogaa. Incæte adocanque adocanque mānōmaī iñōmīnite Wængonguī aa pegacāimpa.

²⁷ Wæætē, Nē nanguī ēñēnāni incæ guīñente wæcædānīmpa, ante cædinque Wængonguī iīmaī cægacāimpa. Inguipoga quēwēnāni inānite cōwā adinque nē ōnonque cæi bai cædāni inānite apænte

ængacāimpa. Ayæ, Nē tæi piñænāni incæ guīñente wæcædānīmpa, ante cædinque Wængonguī inguipoga nē wæntæte cædāni inānite apænte ængacāimpa. Iñinque tōmengā mānōmaī cæcā ate waa cædānīpa, ante adinque nē tæi piñænāni wæætē guīñente wædānīpa. ²⁸ Wængonguī inguipoga quēwēnāni nāni waa pōni māincoo ēwente bai bacæimpa, ante cædinque, Inguipoga panca-cooga wīwa incoo impa, ante adinque mānincooque ænīnque waa cægacāimpa. Ayæ, Ōnoncooque impa, ante mōnō ānoncoo adinque tōmengā ingante do ænīnque nō cægacāimpa. Ayæ, Dæ ampa, mōnō ānoncoo incæ do adinque Wængonguī mānincoo ænīnque nanguī cægacāimpa. ²⁹ Iñinque Wængonguī weca ongōnīnque waocā adocanque incæ, Waēmō iīmōpa, ante ædō cæte anguingā.

³⁰ Wængonguī pōnō ængā beyænque mīnitō Codito Itota nempo quēwēmīnīpa. Wængonguī Codito Itota ingante da pōnongā ænīnque mōnō Codito nānō ēñēnō bai ænte entawēmōmpa. Tōmengā nempo quēwēnīnque mōnō tōmengā nānō nō cæte quēwēnō bai adobai ænte entawēmōmpa. Ayæ tōmengā tæiyæ waēmō nānō ēwocadō adobai pōnongā ænīnque tæiyæ waēmō ēwocate quēwēmōmpa. Ayæ Codito ængā beyænque mōnō abæ tawænte gote bai quēwēmōmpa. ³¹ Iñinque Wængonguī beyæ nāni yewæmongainō bai iīmaī ante bacæimpa. “Waocā, botō nanguī waēmō pōni iīmōpa, ante nāmā waa ate apæneinente wædongā iñōmō tōmengā wæætē, Mōnō Awēnē adocanque waēmō pōni ingampa, ante apænecā iñinque waa cæbaingampa.”

2

Itota Codito ingante awāa tim-podāni wængacāimpa, ante

¹ Iñānāni botō mīnitō weca apænecæte ante mā pōnīnque nē nanguī ēñēnāni nāni waa ēñēnō bai

ēñēnāmaī imo inte baī pontabopa. Waodāni nāni waa tede baī tededāmaī imo incæ pontabopa. Wæætē, Wængonguī nāwangā waa pōni cægacāimpa, ante mǎnīnonque ante apæñecæte ante pontabopa. ² Itota Codito ingante do adīmo inte botō, Tōmenganque nānō cægāinonque ante ēñente baī cædinque botō coodintoidi weca gote apænebote, ante godāmaī iñedē do ānōmoimpa. Īnīnque, Wadō nāni nanguī ēñēnō ante ēñēnāmaī inte baī cædinque botō, Itota Codito ingante awāa timpodāni wængacāimpa, ante mǎnīnonque ante ēñente baī gote apænebote, ante pōnēnīnque mīnitō weca pontabopa. ³ Ayæ botō aquīmo pōni inōmo inte mīnitō weca pōnīnque, Ædō cæte apænequīmo, ante guīñēnete wædinque nanguī do do wāate pōmo amīnitapa. ⁴ Pōnīnque botō, Mǎnōmaī impa, ante dicæ tōmēmo nanguī ēñēnō ante tedetabogaa. Wængonguī beyæ apænebo ēñēedāni, ante ānīmo incæ botō dicæ waa pōni tedete baī apænetabogaa. Wæætē Wængonguī Ōnōwoca tōnō āāwocaque baī ēwocadinque botō tōmengā nānō tæi pīñænō beyænque apænebo amīnitapa. ⁵ Mǎnōmaī cædinque botō, Waomō mōnō nanguī ēñēnō beyænque ante wīi pōnencæmīnīmpa. Wæætē Wængonguī nānō tæi pīñænō beyænque wede pōnēmīni bacæmīnīmpa, ante cæcæte ante mǎnōmaī ponte apænetabopa.

Wængonguī æbānō ēmongāā, ante tōmengā Ōnōwoca odōmongā ēñēmompā, ante

⁶ Wæætē ædæmō pōnēnāni æmæwo pæte baī iñōnānite mōnitō tōmēnāni weca ongōnīnque mōni nanguī ēñēnīnō ante apæñemōnīpa. Incæte ñōwodāni nāmā nāni ēñēnō ante apæñedāmaī imōnīpa. Ayæ imæca awēnēidi nāni dæ goquincabo tōmēnāni nāni ēñēnō ante apæñedāmaī imōnīpa.

⁷ Wæætē Wængonguī awēmō iñonte nānō ēñengāinō ante apæñemōnīpa. Tōmengā iñōmō, Botō nanguī ēñēnōmo inte pōnō cæbo beyænque

botō nē apænte ænānique ñāō apāite baī entawencædānīmpa, ante inguīpoga dæ āñedē wēēñēñedē pōni incæ mōnō imonte ante pōnō cægacāimpa. Incæte, Mǎnōmaī cæcæboimpa, ante tōmengā nānō ēñēnō ante wadāni ēñēnāmaī incædānīmpa, ante wææ cædinque wē wodonte baī cædinque tōmengā nānō ēñengāinō ante ñōwo ganca awēmō iñōmō entawēnongāimpa. Ñōwo iñōmō tōmengā awēmō nānō ēñengāinō ante tæcæ apæñecā ēñēñimōni inte mōnitō wæætē mǎnīnō ante ñōwo apæñemōnīpa. ⁸ Inguīpoga awēnēidi guīquēñē Wængonguī nānō wē wodonte ēñengāinō ante dicæ ēñēnāniyaa. Edæ mǎnīnō ante ēñente baī tōmēnāni mōnō Awēñē ñāō baī entawēnongā iñongante awāa timpote wænōnāmaī incædōnānīmpa. ⁹ Wæætē iīmaī ante yewæmongatīmpa.

“Botō imote nē waadete pōnēnāni iñōmō watapæ quēwencædānīmpa, ante Wængonguī do pōnō badongacāimpa.

Mǎnīnō nānō pōnō cægāinō ante waocā dicæ acāa. Mǎnīnō ante dicæ ēñengāa.

Edæ waocā nāmanque mā pōnēnīnque dicæ ēñengāa,”

ante nāni yewæmongāi baī iīnque bacæimpa, ante mōnitō apæñemōnīpa.

¹⁰ Wængonguī Ōnōwoca guīquēñē tōmāā cōwā adīnque Wængonguī awēmō nānō pōnō badongāinō ante edonque adīnque do ēñengampa. Īnīnque mōnonga pō guīidīnque tōmengā mōnō imonte edonque odōmongā ēñēmompā.

¹¹ Edæ mōnō waocabo incæ, Adocanque ōnōwēnenque pōnēē cōñongante wacā, Æbānō ante pōnēē congāā, ante ædō cæte ēñengūngāā. Edæ nē pōnēē congā guīquēñē, Botō æbānō ante pōnēē cōmoo, ante tōmengā adocanque ōnōwēnenque pōnente ēñengampa. Wængonguī adobaī ingampa. Wængonguī æbānō ante awēmō pōnēē congāā, ante waocā ædō cæte ēñengūngāā.

Wængonguī æbānō ante pōnēē con-
gāā, ante tōmengā Ōnōwoca ado-
canque ēñēñongā wadāni ēñēnāmaī
īnānīpa. ¹² Wængonguī īñōmō, Botō
æbānō pōnōmo æmīnīi, ante edonque
acæmīnīmpa, ante cædinque tōmengā
Ōnōwoca ingante da pōnongā ænte
ēwocate amompa. Īnīnque ingui-
pogaque quēwēnāni nāni pōnēnō
baī entawēnāmaī īnōmō inte mōnō
Wængonguī tōmengā Ōnōwoca tōnō
āāwocaque baī ēwocamō inte do
ēñēmompa.

¹³ Mōnitō īñōmō, Wængonguī
mānōmaī pōnō cæcampa, ante
odōmoncæte ante mā pōnente
mōni ēñēnō ante apænedāmaī
īmōnīpa. Wæætē Wængonguī Ōnōwoca
pōnō odōmonte apænecā ēñente
ēwocadinque tōmengā nānō odōmōnō
mōni ēñēnō ante apænemōnīpa. Edæ
Wængonguī Ōnōwoca nānō pōnēnō
ante ēñencæte ante Wængonguī
Ōnōwocaque nānō apænede ante
apænete ēñente ēwocacæīmpa, ante
pōnēnīnque mōnitō mānīneque ante
apænemōnīpa.

¹⁴ Edæ, Wængonguī Ōnōwoca nānō
pōnēnō æbānō ī, ante tōmengā
Ōnōwoca tōnō āāwocaque baī nē
ēwocadānīque pōnente ēñēnānīpa.
Īnīnque nē ōmæwocacā baī ingā
guiquēnē tōmengā ædō cæte edonque
ēñēnguingāā. Edæ oda cæcampa.
Mānīnō ante apænemōni ēñēnīnque
tōmengā, Ōnonquedō ante apænete
wæcantedō abi, ante badete todīnque
edæ, Baa angampa. ¹⁵ Wængonguī
Ōnōwoca tōnō āāwocaque baī nē
ēwocacā guiquēnē, Tōmāā æbānō ī,
ante cōwā adīnque edonque pōnī
ēñēngampa. Wæætē edæ, Tōmengā
æbānō ēwocacāā, ante wadāni cōwā
adāni incæte ædō cæte apænte an-
guīnānīi. ¹⁶ Ayæ, “Wængonguī Awēnē
æbānō nanguī ēñente pōnēngāā, ante
æcānō ēñēnguingāā. Edæ Wængonguī
ingante godōmenque odōmōnānīpa
diyæ ēñente baquīngāā,” ante
yewæmongatīmpa. Mōnō guiquēnē

Codito ēñente nānō pōnēnō ante
entawēmompa.

3

*Wængonguī ingante nē cæmō mōnō
godongāmæ cæcabo*

¹ Īñānāni ēñēedāni. Codito Ōnōwoca
tōnō nē ædæmō ēwocadāni īnānīte
botō Wængonguī Ōnōwoca nānō
apænedō ante do apænebopa. Mīnitō
guiquēnē mempoga ēñamīni inte
Codito nempo quēwēmīni incæ tæcæ
ēñadāni baī pædāmaī īnōmīni inte
mīnitō inguīpogaque ante pōnēmīni
awædō. Mānōmaī beyæ botō
adobainō ante ædō cæte mīnitō
īmīnīte apænequīmoo. ² Edæ tæcæ
ēñadāni īñōmō tæēmō mōnō cænguī
capo capo cænāmaī īnānīpa. Mīnitō
īñōmō tōmēnāni baī adobaī īmīni inte
Wængonguī Ōnōwoca nānō apænedō
ante ædō cæte ēñēnguīmīnīi. Īnīnque
tæcæ ēñadingā ingante goōmæ di
godōnete baī cædinque botō mīnitō
īmīnīte apænedīnque adodeque
adodeque apænebo ēñēmīnītapa.
Īñæmpa ñōwo ganca tæcæ ēñadāni
baī īnōmīni inte mīnitō æīquedō
ēñēnguīmīnīi. ³ Edæ cōwē ingui-
pogaque ante pōnēmīni inte pan-
camīniya, Wacā gomonga cæcampa,
ante pīinte wæmīnīpa. Pancamīniya
guiquēnē wæætē godō wæætē godō
pīinte ānewēmīnīpa. Mānōmaī cæte
quēwēnīnque mīnitō ōmæwocadāni baī
īmīni inte inguīpogaque ante pōnente
quēwēmīni abopa. ⁴ Edæ īīmaī ante
tedewēmīnīpa. Adocanque, “Botō
Pabodo nānō nē ēmīñæmo īmopa,”
ante cæcampa. Wacā, “Botō guiquēnē
Apodo nānō nē ēmīñæmo īmopa,” ante
cæcampa. Mānōmaīnō ante mīnitō
ōmæwocamīni inte baī cæmīni awædō.
⁵ Īñæmpa, Apodo æcānō ingāā,
ante pōnēmīni. Pabodo æcānō ingāā,
ante pōnēmīni. Edæ botō mōnō
Awēnē nānō pōnō anganca tōmengā
ingante nē cæbo bagaboīmpa. Apodo
adobaī mōnō Awēnē nānō pōnō
anganca Awēnē ingante nē cæcā
bagacāīmpa. Īnīnque tōmengā beyæ
nē cæmōnaque īmōna inte mōnatō

mīnitō īmīnite apænemōna ēñente pōnemīnitapa. ⁶ Tōmēmō minte bai cædinque botō mā apænebo ate mīnitō tæcæ ēñēmīnitapa. Apodo guiquēnē, Cōñe bate pæcæimpa, ante æpæ gao caadāni bai cædinque mīnitō īmīnite godōmenque nanguī odōmonte apæneca ēñēmīnitapa. Incæte mōnatō apænemōna beyænque ædō cæte tā bocate bai pæwocaquīmīni. Wængonguī adocanque nē apæneca beyænque mīnitō tā bocate bai pæwocate ēwocamīnipa. ⁷ Īnīnque minte bai nē apænebo inte botō tōnō Apodo æpæ gao cæte bai nē odōmonte apæneca tōnō mōnatō īñōmō ōnōmōnaque īmōnapa. Wængonguī tōmenganque, Pæe, ante nē ānongā ingampa. Tōmengā adocanque angā beyænque pæmīnitapa.

⁸ Botō nē apænebo tōnō Apodo nē odōmonte apæneca tōnō mōnatō, Pæcæimpa, ante āanque bai Wængonguī beyænque cæmōnapa. Īnīnque botō nē apænebo īñōmote tōmengā nē odōmonte apæneca īñongante Wængonguī īñōmō, Mīnatō apænegainō beyæ æeda, ante eyepæ pōni pōnongā æncæmōnaimpa. ⁹ Mōnatō īñōmō Wængonguī tōnō godongāmæ cæmōni inte mōni nē cæcabo īmōnipa. Mīnitō guiquēnē Wængonguī quīmīni īnōmīni inte tōmengā gōnea bai pæwocamīni īmīnipa.

Ayæ adobaī tōmengā nānō mænōincō bai īmīnipa. ¹⁰ Nē ēñente mænongā īñōmō, Wænōmēnæca īnō mænongæimpa, ante cædinque dicaco cō cō cæcampa. Botō īñōmō Wængonguī waadete pōnō cæcā ate nē ēñente mænongā bai adobaī bagaimo inte botō mīnitō weca mā ponte apænebo ēñēmīnitapa. Nōwo guiquēnē botō mænōmaī cō cæte bai mā apænebo ēñēmīni ate wadāni ponte botō cō cædinca wænōmēnæca mænonte bai cædinque godōmenque odōmonte apænedāni ēñēmīnipa. Īnīnque edæ æcānō mānīnca mænonte bai odōmōna tōmengā tōingā mænonte bai nō

ēñente odōmonte apænequēnengā ingampa. ¹¹ Waodāni, Dica adocaa wænōmēnæca īnō mænongæimpa, ante tāno nāni cō cædinca bai Itota Codito adocanque Tānocā ingampa. Īnīnque, Wacā tānocā ingampa, ante bai cædinque mīnitō ædō cæte wacā mīñæ gomīni. Īñæmpa, Dica wacaa wænōmēnæca īnō mænonte bai babaimpa.

¹² Ayæ tānoca nāni gō cædinca bai Itota Codito Tānocā īñongante mōnitō, Mānīnca adocaa wænōmēnæca mænongæimpa, ante bai cædinque odōmonte apænemōnipa. Nē mænōnāni īñōmō oodo ænīnque padata ænīnque dica nāni waa pōni adinca ænīnque, Quīncamē ēwēnāmaī īngūnca, ante ænīnque tōmēnāni nāni mænōnō bai cædinque pancamōniya nō pōni odōmonte apænemōni ate mōnitō apænedō wido cædāmaī īngæimpa. Wadāni guiquēnē awæ ænīnque gaguīmæ amīmō ī ænīnque ayawāa amīwæ ænīnque quīncoomē ēwēngūncoo ænīnque godō mænōnāni bai cædinque tōmēnāni ōnonque odōmonte bai apænedānipa. ¹³ Edæ Wængonguī nānō apænte anguīōnæ īnque ba ate gonga nāni angā nanguī bæcocæimpa. Māñīñedē ate edæ, Mōnitō æbānō nōwo odōmonte apænemōnī, ante nāō gongæ edonque acæimpa. Wængonguī māñīñedē mōnitō apænedō apænte ancæte ante cædinque nē tante bai cæcā ate pancadea æmæwo montæ gōne ate pancadea ongō æncæcāimpa.

¹⁴ Īnīnque, Æcānō mænongaincō montæ gōnāmaī ī, ante adīnque Wængonguī eyepæ pōnongā ænīnque nē mænongaingā wæætē watapæ quēwencæcāimpa. ¹⁵ Wacā guiquēnē tōmengā nānō mænongaincō do montæ gō adīnque Wængonguī mānīncō nē mænongaingā īngante pōnōnāmaī īncæcāimpa. Incæte mānīngā waocā gonga bæcoyōmō wodii tao wīnongā bai ōmæpocā wæyongante Wængonguī ængā beyænque tōmenganque quēwencæcāimpa.

16 Minitö iñömö, Wængongui Önowoca ingante do æninque tömengä ingante ewocamompa, ante eññämaï iminitawo. Wængongui tæiyæ waëmö oncö bai mönö baö eñnamompa, ante eññämaï inte bai cæmini awædö.

17 Wængongui oncö tæiyæ waëmö oncö i iñonte waocä bæ tate wido cæcä adinque Wængongui näëmæ tömengä ingante edæ ömæe ewencæcäimpa. Ayæ adobai Wængongui tæiyæ waëmö oncö bai baö eññayöminite waocä wapiticæ odömonte apæneca beyæ mini godongämæ apænedincabo incæ oda cæte näwæ gomini adinque nê wapiticæ apæneca ingante Wængongui adobai wido cæcæcäimpa.

18 Minitö, Nöwodäni nani eññö ante do nanguï eññemönipa, ante pöneminitawoo. Iñæmpa mänömainö ante minitö nämä babæ pönewëninque apænemini awædö. Nê nö eññemini bacæte ante minitö ñöwodäni nani nanguï eññewënö ante wido cædinque ömæcamini badinque nê eññemini bacæminimpa.

19 Inguipogaque quëwënäni nanguï eññänäni incæte Wængongui, Önonquedö ante eññemini awædö, angampa. Edæ Wængongui beyæ apænedinque iïmaï ante yewæmongadänimpa. “Ömë nämä nänö ñönömë incæ waocä näëmæ wini wini dawacä bai nê nanguï eññänäni adobai nämä nani eññö beyænque näëmæ oda cædänipa, ante cæbopa,” Wængongui angampa.

20 Ayæ adobai, “Nê eññänäni iñömö tömënanäni nani nanguï eññente pönönö incæ idiquibæ impa, ante edæ mönö Awënë do eñngampa,” ante yewæmonte ongompa.

21 Iñinque, Botö waocä adocanque nänö nê emiññæmo inte tobopa, ante änämaï incæminimpa. Iñæmpa mönitö waomini inte tömämöni minitö beyæ ante cæte quëwëmönipa.

22 Botö Pabodobo inömo incæ Apodo ingä incæ Pegodo ingä incæ minitö beyæ ante cæte tömämöni quëwëmönipa. Inguipo incæ ingui-poga ongoncoo incæ minitö beyæ

ongompa. Mönö quëwëmämo incæ mönö wænguimämo incæ minitö beyæ ongompa. Nöwopämo incæ miiimämo iincayæ ponguimämo incæ quincoomë incæ edæ minitö beyæ tömancoo ongompa. 23 Ayæ minitö wæætë Codito beyænque quëwëmöni iminipa. Codito wæætë Wængongui beyænque quëwengä ingampa, ante ämo eññemaiminipa.

4

Itota nänö nê da godongaimöni inte iïmaï cæmönipa

1 Iñinque mönatö Pabodobo tönö Apodo iñömönate minitö iïmaï ante eññenguënemini iminipa. Codito tönö godongämæ cædinque tömengä beyæ ante Pabodo tönö Apodo nê cæda inapa. Ayæ godömenque, Wængongui tömengä nänö awëmö eññengainö ante pönö apæneca eñña inte tömëna mäninö ante nê apæneda inapa, ante eññenguënemini iminipa.

2 Iñinque Awënë Wængongui iïmaï angampa. Botö waocä ingante quiemë pönö cæbo æninque tömengä botö pönönonque entawëninque nö pönente ædämö aaquënegä ingampa, ante Wængongui cöwä adinque, Æbänö botö beyæ wææ aabii, ante apænte angampa.

3 Iñinque minitö, Pabodo æbänö cæcää, ante apænte ancæte ante cöwä amini incæte botö wädämaï iïmaïmopa. Nê apænte nani änoncabo incæ botö imote adobai cöwä adinque apænte änäni eññeninque botö wädämaï iïmaïmopa. Tömëmo incæ, Æbänö botö cöwë wede pönente cæbo imoo, ante ædö cæte nämä anguimoo.

4 Botö, Tömëmo wënæ wënæ cædämaï inömo imopa, ante pönëmopa. Incæte, Wentamö mongænämaï imopa, ante ædö cæte botö nämä anguimoo. Mönö Awënë adocanque botö imote nê apænte angä ingampa.

5 Mäninö beyæ minitö, Iñinque bayedë tömäa apænte angæimpa, ante mönö Awënë ponganca ee adinque apænte änämaï iedäni. Tömengä

iñömö waomö mönö awëmö cægainö ante, Edonque pöni acæimpa, ante ñäö iñömö mäo odömoncæcäimpa. Ayæ, Æbänö cæcæboimpa, ante mönö önöwënenque pönengainö incæ edonque odömongä gongæ näwæ acæimpa. Ayæ, Adocanque æbänö waa cægacäi, ante, Wacä æbänö waa cægacäi, ante watapæ apænedinque tömämö mönö cægainö ante Wængonguï pönö apænecä ëñente mönö tocæimpa.

6 Iñänäni ëñeedäni. Waocä adocanque ingante, Waingä ingampa, äninque wacä ingante wii piincæminimpa, ante yewæmongatimpa. İninque botö minitö beyæ ante, Mönatö æbänö cæmöna, ante yewæmontabopa. Minitö, Apodo tönö Pabodo æbänö cæda inaa, ante pönëninque Wængonguï beyæ näni yewæmongainonque ante mäninonque ëñente cædinque godömenque cædämaï incæminimpa, ante cætabopa. 7 Iñæmpa tömämö önömonque iñömonte Wængonguï, Bitö gomonga waëmömi pöni imipa, ante dicæ apænte angantawogaa. Bitö entawënö iñömö tömëmi ocaidë mä bitö pönëno beyænque dicæ entawëmitawogaa. Mönö Codito adocanque edæ pönö apænecä ëñente nê ænte entawëmi inömi inte bitö, Tömëmoque nämä beyænque entawëmopa, ante ædö cæte änewëmi.

8 Minitö, Eyepæ pöni do entawëmönipa, ante bai cæmini awædö. Minitö waa quëwënguinque ante do eyepæ ænte bai cæmini awædö. Edæ Pabodoidi mönitö beyæ cædämaï iñönänite tömëmöni nämä beyænque awënë odehyemöni bamönipa, ante cæte bai cæmini awædö. Iñæmpa minitö näwangä awënë odehyemini bamini bai mönitö adobai awënë odehyemöni badinque nanguï tocædömönimpa. 9 Wæætë Itota nänö nê da godongaincabo iñömonite Wængonguï incæ, Yæmiñæ pöni gote näni wænguinque godänitedö amini, ante badete tote bai odömongä awædö. Mänömaï cæcä adinque waodäni incæ anquedoidi incæ Wængonguï nänö nê badon-

gäinäni tömänäni mönitö imönite adinque badete todänipa, ante awædö.

10 Edæ minitö adobai cædinque iimaï piimini wæmönipa. Mönitö Codito beyæ cæyömonite minitö, Ocai ömæcamini inte cæminipa, ante pönëmïnitawoo. Wæætë nämanque ante pönëninque, Codito nempo quëwëninque mönitö ocai encamöni inte nanguï ëñëmönipa, ante tedewëmini awædö. Ayæ, Pabodoidi aquii pöni iñönänite mönitö wæætë tæëmö piñæmöni imönipa, ante pönëmïni awædö. Wadäni adobai minitö iminite ante apænedinque, Waimini pöni iminipa, äninque mönitö imönite ante wæætë, Önöminique iminipa, ante piinänipa.

11 Ayæ mönitö ñöwo ganca cænguï cænämaï inte gue ænente awædö. Tepæ bedämaï inte gæwænte awædö. Weocoo wää tëincoo mongænte awædö. Ayæ tæi tæi pänäni caate wæmönipa. Ayæ oncö ömaamöni inte mönitö önompoca nanguï cædinque ænte quëwëmönipa. Wënæ wënæ iminipa, ante piinäni wædinque mönitö wæætë, Minitö iminite Wængonguï pönö waadete cæcæcäimpa, ante cæmönipa. Ayæ togænte pänäni ate wædinque mönitö wæætë piinämaï piyænë cæmönipa. 13 Mönitö imönite ante apænedinque, Wiwa cædänipa töö, ante babæ änäni ëñente wædinque mönitö wæætë waadete apænëmönipa.

Edæ, Æwëmöimæ gadonguimæ bai iminipa. Ömæpocoo wido cæquincoo bai iminipa töö, ante piinique inguipogaque quëwënäni iñömö mönitö imönite ñöwo ganca cöwë wido cædäni wædömöni imönipa.

14 Mönitö beyæ cædinque Pabodoidi wæwente quëwënänipa, ante adinque minitö wæætë guingo imonte wæcæminimpa, ante botö dicæ mänömainö ante yewæmömogaa. Wæætë botö wëmini bai iñöminite botö, Mänömaï cædinque mini wæquinque impa, ante wææ yewæmömopa. 15 Minitö iminite nê aadäni iñömö diete miido ganca mänimpodäni iñönänite mönitö minitö

mæmpoidi bai imöni guiquenë memöniya pöni imönipa. Edæ, Itota Codito nempo quëwëningue botö, Itota Codito pönö cæcä beyænque mönö watapæ quëwengæimpa, ante apænebo ëñëmïnitapa. Mänömainö ante apænebo ëñëningue mïnitö mempoga ëñamïni ate botö mïnitö mæmpo bai bagaboimpa. ¹⁶ Mänömaï beyæ botö mïnitö imïnite waadete apænedingue, Botö mæmpobo cædö bai mïnitö adobaï cæcæmïnimpa, ante nanguï ämopa.

¹⁷ Botö tömämæ godingue wayömö Codito ingante nani godongämæ pönencabo weca wayömö nani pönencabo weca go guïdïngue iïmaï ante apænebopa. Mönö Itota nempo quëwëningue nö ëñëningue waa cæte quëwengæimpa, ante odömonte apænebopa. Mänömainö ante botö odömonte apænedö bai botö tömëmo adodö ëñente quëwëmo abaimpa. Ìningue mïnitö, Pabodo mänömaï quëwengampa, ante ëñencæmïnimpa, ante botö në waadecä Timoteo ingante da godömo mïnitö weca ponte apænecæcäimpa. Tömengä iñömö botö wengä bai inongä inte Codito nempo quëwëningue cöwë nö pönente cæcä ingampa. Tömengä mïnitö weca ponte apænedingue, Pabodo nänö odömonte apænedö bai tömengä nämä adodongue ante cöwë ëñente quëwengampa, ante apænecä ëñëningue adodö ante pönencæmïnimpa.

¹⁸ Pancamïniya, Pabodo wii pongä awædö, ante, Tömëmönique wæætë në ämöni incæmönimpa, ante botö imote piïnte tedewëminipa. ¹⁹ Incæte mönö Awënë Ao angä ate botö oo poncæboimpa. Ponte adingue botö, Tömëmönique në ämöni incæmönimpa, ante në tedewëminï æbänö tedewëminï, ante änämaï incæboimpa. Wæætë adomïni mïni tæï piñænö ante cöwä adingue apænte ancæboimpa. ²⁰ Wængonguï Awënë Odeye nempo në quëwëmö iñömö wii önonque mönö tedequinö beyænque quëwëmompä. Wæætë edæ

tæï piñænte mönö quëwënguïnö ante mönö tömengä nempo quëwëmompä. ²¹ Mïnitö æbänö cæmïni ate mïnitö weca ponguïmo. Edæ mïni cædinö adingue botö panguënëmo inguïmo, ämïnitawo. Wæætë waadete pönëningue ædæmö cæquënëmo inguïmo, ämïnitawo.

5

Në wiwa towengä ingante apænte angæimpa, ante

¹ Edæ, Në wiwa towengä incæ coodintoidi nani pönencabo tönö godongämæ ongongampa, ante tededäni ëñentamönipa. Mïnitö weca ongongä adocanque tömengä wæmpo nänöogængä incæ manguiwengampa töö. Ìnæmpa Wængonguï ingante në ëñënamäi inäni incæ mänömaï wënæ wënæ cædämaï iñönäni mïnitö weca ongonganque do cæcä apa cæmïni. ² Në wiwa towengä tönö godongämæ ongömïni incæte mïnitö, Tömëmönique waa cæmöni imönipa, ante tedewëminï awædö. Incæte Ca ca wæmïni bai waa incædönimpa. Në wiwa cæcä ingante, Mönitö weca ongönämaï gobäwe, ante da godömïni gocä bai waa incædönimpa. ³ Botö guiquenë nänënë quëwëmö incæte mïnitö weca owote bai önöwënenque pönëmo imopa. Ìningue mïnitö weca owote bai botö në wiwa cæcä ingante do apænte ämopa. ⁴ Mïnitö Awënë Itota ëmöwo apænedingue godongämæ pöñömïni botö nänënë quëwëmö incæte adoyömö owote bai pönencæboimpa. Ayæ Awënë Itota tæï piñænongä inte mïnitö tönö adoyömö ongoncæcäimpa. Ìningue mïnitö iïmaï cædäni. ⁵ Awënë nänö ponguïönæ iñedë në wiwa cædongä tömengä önöwoca quëwencæcäimpa, ante iïmaï cædäni. Tömengä nänö wiwa ëñayö ewente bacæimpa, ante cædïngue mïnitö tömengä ingante Tatäna nempo pædæ godömïni æncæcäimpa. ⁶ Mïnitö, Waa imöni imönipa, ante tededïngue wiwa tedewëminipa töö. Edæ dodäni nani yewæmongainö ante adämaï inte bai tedewëminipa.

“Päo tömäo yedæ æmpoquinque wædænque da wënäni” bai mīnitō adobai adocanque wiwa cæcä ingante mīni oda cæquinque ee amīni ongongampa. ⁷ Mīni pōnencabo waëmō pōni mīni entawenguinque päo yedæ æmpoqui wido cæte bai cædinque nē wiwa cædongä ingante da tadömīni gocæcäimpa. Edæ mönō Codito iñömō wiwa mönō cædinō ante ñä mēnongacæte ante nāmā wepæ godongacäimpa. Edæ dodäni, Nē wænonguēnengä wænönāmaī inte wodo pænta gocæcäimpa, ante, Patowa, ante codotedo nāni nē wænongaingä bai mönō Codito iñömō adobai inongä inte wængacäimpa. ⁸ İnīnque mönō päo yedæ æmpoqui ömæmō i cænte bai cædinque wiwa mönō cædō ante wido cædinque mönō piinte cædāmaī inte waa cæte quēwengæimpa. Ayæ ææmæ watapæ bete bai cædinque, Quinō nāwangä pōni i, ante Ao ante ænīnque mönō nō pōnente quēwengæimpa.

⁹Nē wiwa towēnāni tönō godongāmæ cædāmaī iedāni, ante botō cadota ante do yewæmōmo amīnitawo. ¹⁰ Mänōmainō ante yewæmōnīnque botō, Inguipogaque quēwēnāni tönō godongāmæ cædāmaī iedāni, ante dicæ antabogaa. İñæmpa wiwa towēnānique, wacä qui nē æinente wædānique, wacä qui nē ö ænānique inguipoga quēwēnānipa. Ayæ, Wængongui impa, ante badōnīnque nē ædæ wæænte quēwēnānique mānimpodānique inguipoga quēwēnānipa. İnīnque ædō cæte tōmēnāni weca cædāmaī inguīi. Edæ inguipo emō cæte gote bai tōmēnāni weca ongönāmaī inguīi.

¹¹Wæætē mānīnō ante yewæmōnīnque botō, Mīni pōnencabo incæ adocanque wiwa cæcä adīnque mīnitō tōmengä tönō godongāmæ cædāmaī iedāni, ante wææ ämopa. Edæ, Nē pōnengä incæ wiwa towengantawo. Nē pōnengä incæ wacä qui æinente wæcantawo. Wængongui impa, ante badonte nē pōnengä

ædæ wæængantawo. Wacä ingante, Wēnæ wēnæ imīpa, ante angantawo. Ti nāmæ bete nē pōnengä incæ quidi quidi dowængantawo. Wacä qui æncæte ante babæ cædinque ö ængantawo. İnīnque tōmengä, Nē pōnēmo imōpa, änongä incæ mänōmaī wiwa cæcä adīnque mīnitō tōmengä tönō godongāmæ cædāmaī inte godōmenque tōmengä tönō godongāmæ contate cænāmaī iedāni, ante botō wææ ancæte ante ämopa.

¹² Mīnitō Codito nempo mīni quēwencabo incæ nāemæ apænte änāmaī imīni inte oda cæmīnipa. Wadāni inānite Codito nempo quēwēnāmaī iñönānite botō, Tōmēnāni æbänō wēnæ wēnæ cædānīi, ante ædō cæte apænte anguimoo. ¹³ Wængonguinque tōmēnāni inānite apænte ancæcäimpa. Incæte mīni cabo incæ adocanque wiwa cæcä adīnque mīnitō tōmēmīni, Mōnitō weca ongönāmaī gobāwe, ante da tadömīni tao gocæcäimpa.

6

Nē pōnēnāmaī ingä apænte ancæcäimpa, ante änāmaī iē

¹ Mīni pōnencabo iñömīnite adocanque bitō imite wēnæ wēnæ cæcantawo. İnīnque bitō, Tōmengä ingante apænte ancædānīmpa, ante cædinque eñēnāmaī ināni weca ædō cæte ænte gobii. Wæætē Wængongui quīnāni inānite angä eñēnīnque tōmēnāni wæætē, Tōmengä æbänō wēnæ wēnæ cæcää, ante apænte adīnque nō ancædānīmpa. ² Edæ mönō Wængongui quīmō iñömō edæ, Inguipoga tōmāmæ quēwēnāni æbänō wēnæ wēnæ cædānīi, ante nē apænte anguimō imōmpa. Incæte mīnitō, Mänōmaī cæcæmōnīmpa, ante eñēnāmaī inte bai cæmīni awædō. Tōmāmæ quēwēnāni inānite nē apænte anguimīni inte mīnitō ñowo wædænque mīni apænte anguēnēnō incæ quīnante änāmaī imīnīi. ³ Mōnō iñömō Wængongui anquedoidi inānite nē apænte anguimō inōmōimpā, ante eñēnāmaī imīnitawo. Mānīnāni

inänite nē apænte anguimō inōmō inte mōnō pōnencabo ñowo mōnō wædō ante mōnō godōmenque apænte angæimpa, ante pōnēmīniyaa.

⁴ Codito ingante mīni godongāmæ pōnencabo incæ mīni wædō ante apænte ancædānimpa, ante mīnitō ædānidō inänite ämīni apænte änānii. Inæmpa, Önōnānique inänipa, ante mīni änōnāni incæ mäninō ante nē apænte änāni badānitawo. ⁵ Mīnitō guingo imonte mīni wæquinque cæmīnīpa, ämo eñēmaimīnīpa. Nāna pōnencaya incæ näēmæ wæætedō wææte äna wædinque mīnitō, Mōnō pōnencabo incæ æcānō nē nō eñēnongā inte apænte anguingāā, ante adinque tōmengā ingante anguēnemīni imīnīpa. Inæmpa mīnitō weca nē nō eñengā adocanque dæ angantawogaa. ⁶ Wææte nāna pōnencaya incæ näēmæ pīinīnīque adocanque, Botō beyæ apænte äninque lingā ingante pancædānimpa, angampa. Ayæ godōmenque wænæ wænæ cædinque tōmengā nānō tōniñacā ingante nē pōnēnāmaī ināni weca ænte godinque, Apænte äninque pancæmīnīpa, angā pānānīpa.

⁷ Inæmpa mīni pōnencabo incæ näēmæ pīinīnīque, Apænte ante pangæimpa, ante dobæ oda cæmīnīpa tōō. Edæ wacā wīwa cæcā ate wædinque bitō wææte piyænē cæbi waa imaimpa. Tōmengā babæ wapiticæ äninque ö ængā wædinque bitō piyænē cæbi waa imaimpa. ⁸ Incæte piyænē cæquēnemīni incæ mīnitō wææte babæ cædinque ö æmīni awædō. Wacā ingante wīwa cæmīni awædō. Mänōmaī cædinque mīnitō mīni pōnencabo incæ wææte godō wææte godō wīwa cæmīnīpa tōō.

⁹ Wīi eñente cædāni inōmō Wængonguī Awēnē Odeye nempo cōwē guidāmaī inguināni inänipa, ante mīnitō inōmō eñēnāmaī inte baī cæmīnīpa tōō. Mänōmainō ante pōnēninque mīni oda cæquinque i apa cæmīni. Ñowo godōmenque ämo eñēdāni. Pancadāniya towente cædānīpa. Pancadāniya guiquēnē,

Wængonguī impa, ante nāni badōniñōmō gäänē ædæ wæænānīpa. Pancadāniya guiquēnē nānōogæ ināmaī inōngante godō guēa mōwēnānīpa. Pancadāniya guiquēnē nāna onguīñæncaya incæ nāna gæncaya inte baī cædinque guēa monte quēwēnāpa. ¹⁰ Pancadāniya guiquēnē awēmō ænānīpa. Pancadāniya guiquēnē wacā māincoo ante æinente wædānīpa. Pancadāniya guiquēnē tī nāmæ bete quidi quidi dowænānīpa. Pancadāniya guiquēnē wacā ingante, Bitō wænæ wænæ imīpa tōō, ante pīinīnīque babæ änānīpa. Pancadāniya guiquēnē babæ apænedinque ö ænānīpa. Mänōmaī wīwa cædōnāni inte tōmēnāni Wængonguī Awēnē Odeye nempo cōwē guidāmaī inguināni inänipa, ämo eñēmaimīnīpa. ¹¹ Mīni pōnencabo incæ pancamīniya mänōmaī ingaimīni inte ñowo inōmō æbānō imīnīi. Edæ mōnō Awēnē Itota Codito emōwo beyænque Wængonguī Önōwoca pōnō ñā mēnongacā ate mīnitō tæiyæ waēmō ewocate quēwēmīni adinque Wængonguī, Botō ayōmo mīnitō waa cæmīni imīnīpa, angampa.

Baonga quēwēninque mōnō tæiyæ waēmō entawente quēwengæimpa

¹² “Botō cæinēnonque ante cæbo incæ Wængonguī wææ änāmaī ingampa,” ante apænedānīpa. Incæte botō cæinēnonque ante quēwēmo baī wīi botō waa quēwengūnīque incædōmoimpa. Botō cæinēnonque ante cæbo incæ Wængonguī wææ änāmaī ingampa, ante nāni änō inōmō edæ nāwangā impa. Incæte botō cæinēnonque ante cæbo baī botō ñā cæyænte baī wæwenguēnēmo inte awædō. ¹³ Ayæ cænguī inōmō. “Mōnō cæncadē guiquinque cænguī æmōmpa. Ayæ adobaī mōnō cæncadē cæi cænguī beyænque enēmōmpa,” ämīnitawo. Inæmpa cænguī incæ cæinca incæ, Idæwaa impa, ante Wængonguī wo ewencæcāimpa. Ayæ adobaī mōnō baō inōmō wīi towengūnīque beyæ eñamōmpa. Wææte mōnō Awēnē beyænque mōnō baō eñate quēwēmōmpa. Ayæ mōnō

baö beyæ ante mönō Awēnē pō guicā ate tömengä tönō äawocaque bai ewocamompa. ¹⁴ İninque edæ mönō Awēnē ingante Wængongui tæemō piñæninque angä ñāni ömæmongä bai mönō imonte adobai tæemō piñæninque angä ñāni ömæmonguimō imompa.

¹⁵ Edæ, Codito qui, ante mönō baö incæ godömō ængä ate mönō tömengä baö bai eñamompa, ante eñenāmai iminitawo. İninque Codito baö bai eñabo inte botō iñömō edæ onquiyængä maincoo beyæ ante nē towente quëwengä tönō edæ ædō cæte godō monguimoo. ¹⁶ Edæ, Æcänö mänömai godō möna tömengä nē tote quëwengä tönō adocanque bai bacampa, ante eñenāmai iminitawo. Edæ, “Mēnaa inīna incæ tömēna wæætē nāna gæncaya möninque adocanque bai bacædaimpa,” ante apænetē yewæmonte ongompa. ¹⁷ Ayæ mönō Awēnē nempo quëwengä tömengä iñömō mönō Awēnē tönō äawocaque bai ewocacampa cæminii.

¹⁸ Æcänö godō towēna tömengä nāmā baö cædingä inte nāmā baö nānō wæwenguinque wēnæ wēnæ cæcampa. Wæætē yabæque mönō wēnæ wēnæ cædō beyæ mönō baö ædō cæte wæwenguī. Mänömai i inique mīnitō iñömō wodii winonte towēnāmai quëwēdāni. ¹⁹ Edæ Wængongui tömengä Tæiyæ Waëmō Önōwoca ingante mīnitonga da pönongä pō guite owocampa. İninque mīnitō, Botō baö tömēmo qui eñabopa, ante ædō cæte äminii. İñæmpa Wængongui Önōwoca tæiyæ waëmō oncō bai eñate apa anewēminii. ²⁰ Wængongui nangui pōni godonte ængä beyænque mīnitō baö tömengä qui eñapa. Mänömai beyæ mīnitō, Tömānāni Wængongui ingante waa ate eñencædānimpa, ante cædinque mīnitō baonga quëwēninque edæ waa cæedāni.

7

Nāna gæncaya inōna inte iūmai

cæbainapa

¹ Nōwo iñömō mini wædō ante yewæmōmini ænte adinque botō iūmai amopa. Onguiñængä iñömō onquiyængä ingante mönāmai ingä waa tobaimpa. ² Incæte, Wīi towēinente wæcæcäimpa, ante cædinque onguiñænāni tömānāni, Botō nānōogængä incæcäimpa, ante mönāni waa imaimpa. Ayæ onquiyænāni adobai tömānāni, Botō nānōogængä incæcäimpa, ante mönāni waa imaimpa. ³ Onguiñængä iñömō tömengä nānōogængä añongante, Botō nānōogæmi imipa, ante Ao äninque ääodenque moncæcäimpa. Ayæ onquiyængä adobai, Botō nānōogæmi imipa, ante äninque tömengä nānōogængä añongante ääodenque moncæcäimpa. ⁴ Monte ate nānōogængä tönō adocanque bai ba adinque onquiyængä wæætē, Onguiñængä qui, ante eñadinque, Tömēmo baonque eñabopa, ante ædō cæte anguingää. Ayæ adobai onguiñængä wæætē, Onquiyængä qui, ante eñadinque, Tömēmo baonque eñabopa, ante ædō cæte anguingää. ⁵ Nānōogængä angä eñente edæ Baa änāmai. Pancaguēnēa Wængongui ingante nangui apænecæte ante guēa Ao äninque nānēneto nānēnē wantæ iñō möninque idæwaa. Edæ, Tatāna angä wacä ingante towēinente wæcæ wæ, ante wææ cædinque adodē iñömō wæætē moncædaimpa.

⁶ Incæte mänömai äninque botō, Mīnitō botō änō bai cōwē cæcæminimpa, ante wææ änāmai imopa. Wæætē, Mīnitō mänömai cæminii waa imaimpa, ante mäninonque ante apænebopa. ⁷ Onguiñænāni tömānāni botō bai wēmō cædāni quëwēnāni bai waa incædōnimpa, ante pönēmopa. Incæte Wængongui pancadāniya inānite pönō apænedinque, Bitō mönāmai inte adobique wēmō cæte botō beyæ cæcæbiimpa, äninque wadāni inānite, Bitō mömi ate mīna gæncaya botō beyæ cæcæminaimpa, angampa.

⁸ Botō, edëningä ingante apænedinque ayæ owæmpoingä ingante apænedinque,

Botō bai wēmō cæbi waa ïmaimpa, ämopa. ⁹ Incæte adocanque, Onquiyængä ingante cōwē moncæboimpa, ante wæcä adinque botō, Bitō cōwē moncæbiimpa, ämopa. Edæ tōmengä towëinente wædämaï incæcäimpa, ante wææ äninque botō, Tōmengä godōmenque waa quëwencæcäimpa, ante ee abo moncæcäimpa.

¹⁰ Do möningä ingante edæ botō ïmaï ämopa. Æ, wadō ämopa. Wïi botō ämopa. Mönō Awënë incæ ïmaï angampa. Onquiyængä incæ tōmengä nänöogængä ingante ëmō cæte godämaï incæcäimpa, angampa. ¹¹ Incæte ëmō cæte gocä ïninque wæætë adodō pōninque adocä ingante mongä waa ïmaimpa. Wæætë adodō pōnämaï ingä ïninque tōmengä ee quëwëninque wacä ingante cōwē mönämaï incæcäimpa. Ayæ onguiñængä incæ nänöogængä ingante pämänte godämaï incæcäimpa, ante mönō Awënë angampa.

¹² Wamini ïminite guiquënë mönō Awënë änämaï ïñongä botō wæætë ïmaï ämopa. Onguiñænganque nē pōnengä inte, Botō nänöogængä pōnënämaï ingä incæ botō tōnō ee quëwengampa, ante adinque tōmengä nänöogængä ingante pämänämaï incæcäimpa. ¹³ Onquiyænganque nē pōnengä inte, Botō nänöogængä pōnënämaï incæ botō tōnō ee quëwengampa, ante adinque tōmengä nänöogængä ingante pämänämaï incæcäimpa. ¹⁴ Onquiyænganque nē pōnengä ïñongante tōmengä adocanque nänö pōnëno beyænque Wængongui, Mïna gæncaya botō quïmina ïminapa, ante onguiñængä ingante edæ do ængampa. Ayæ adobai onguiñænganque nē pōnengä ïñongante tōmengä nänö pōnëno beyænque Wængongui, Mïna gæncaya botō quïmina ïminapa, ante onquiyængä ingante adobai do ængampa. Wængongui mänömaï cæcä beyænque minatō wënäni nani waa quëwenguinque Wængongui quinäni badänipa. Wængongui wïi mänömaï cæcä bai minatō

wënäni ïñömō Wængongui quinäni ïnämaï inte nōwadäni bai nänënë pæcædonänimpa.

¹⁵ Bitō adobique nē pōnëmi ïñömite bitō nänöogængä pämänte gocä wædinque ee abi gocæ. Mänömaï ëmō cæte gocä adinque bitō tōmengä ingante ñänönämaï inte bai badinque ee quëwencæbiimpa. Edæ, Piyænë cæte quëwëedäni, ante Wængongui tōmämo ïmonte aa pegacäimpa. ¹⁶ Bitō onquiyæmi tōmëmi waa cæbi adinque bitō nänöogængä wabänö waa pōnente quëwëmaingä, ante ædō cæte ëñëmi. Edæ onguiñæmi adobai tōmëmi waa cæbi adinque bitō nänöogængä wabänö waa pōnente quëwëmaingä, ante ædō cæte ëñëmi.

¹⁷ Incæte mönō Awënë, ïmaï cæe, angä ate ëñente wædinque bitō tōmengä nänö änönonque ante cæte quëwencæbiimpa. Ayæ, Æbänö botō nänöogængä ëayömo mönō Awënë aa pecantapa, ante pōnëninque bitō mäniñedë bitō nänöogængä ëagai bai adobi inte quëwencæbiimpa. Botō ïñömō Codito ingante nani pōnencabo wayömö nani godongämæ poncabo wayömö nani godongämæ poncabo weca gote apænedinque, Mänömaï cæedäni, ante tōmänäni ïnänite ante apænebopa.

¹⁸ Onguiñæmi ïmi do ëö togænïmi ïñömite Wængongui aa pecantawo. ïninque bitō, Bagäacä bai babote, ante cædämaï incæbiimpa. Eö togæmi inte ee quëwëe. Wæætë ëö togænämaï ïñömite Wængongui aa pecantawo. ïninque bagäabi inte ee quëwëe. ¹⁹ Edæ ëö togæmö incæ bagäamö incæ waomö önömonque ïmopa. Wïi mäninö beyænque waa quëwëmö ïmopa. Wæætë Wængongui nänö wææ angainö ëñente beyænque waa quëwëmompa. ²⁰ ïninque, Æbänö engæñömo Wængongui aa pecantawo, ante pōnëninque bitō adobi inte cōwë quëwëe. ²¹ Bitō wacä beyænque cæte nē quëwëmi ïñömite Wængongui bitō ïmite aa pecantawo. ïninque bitō nē cæbi inte piyænë cæte wædämaï

incæbiimpa. Incæte bitō ïmite ñimpo cædinque, Abæ tawænte goe, angä eñëninque ee goe.

²² Waocä beyænque cæte nē quēwēmi iñōmite mōnō Awēnē aa pecantawo. Ìnque mōnō Awēnē incæ pōnō ñimpo cædinque, Abæ tawænte goe, angä eñëninque ee gote bai ēwocabipa. Wæætē bitō waocä beyænque nē cæbi ināmaï iñōmite mōnō Awēnē aa pecantawo. Ìnque Codito nē aa pete ængä beyænque bitō cæte nē quēwēmi babipa. ²³ Edæ Wængonguï tōmengä nänō Tæiyæ Waēmō Wengä ingante godongä beyænque mōnō wæætē tōmengä quimō bagamōimpa, ante pōnëninque mīnitō wæætē waocä beyænque nē cæte quēwēmini badāmaï iedāni. ²⁴ Iñänāni iïmaï ante cæedāni. Botō Wængonguï Awēnē nempo quēwëninque tōmengä nänō änonque eñente cæcæboimpa, ante cædinque mīnitō Wængonguï nänō aa peyedē mīni ēgaï bai adomīni inte quēwëedāni.

²⁵ Ayæ, Mōnāmaï ināni æbänō quēwenguënänāni ināni, ante mōnō Awēnē angampa diyæ eñenguimoo. Incæte Wængonguï waadete pōnō apænecä eñëninque botō nē eñënōmo bagaïmo inte mā pōnëninque ämo eñëmaïmīnīpa. ²⁶ Mōnō wæwenguimāmo oo pōni impa, ante pōnëninque bitō, Ñowo botō nänōogængä ingante æbänō äate quēwēmoo, ante pōnëninque ñowo bitō äadō bai adobi inte cōwē quēwenguënēmi imīpa, ante pōnēmopa. ²⁷ Onguïñæmi eñëmi, Bitō nänōogængä ingante do mōmitawo. Ìnque, Pämæncæboimpa, ante änāmaï iē. Wæætē wacä ingante ämopa. Bitō wēmō cæbitawo. Ìnque, Botō nänōogængä, ante diqui diqui mīnāmaï imi waa imaimpa. ²⁸ Incæte ñowo mōmi incæ wënæ wënæ cædāmaï inte mōmīpa. Ayæ baquēcä adobaï do mongä incæ wënæ wënæ cædāmaï inte mongampa. Incæte æcänō möna tōmengä inguipoga

quēwente nänō caate wæquinque mongampa. Mänōmainō ante yewæmōninque botō, Mīnitō caate wædāmaï incæmīnimpa, ante wææ ämopa.

²⁹ Iñänāni, Ñowopāmo wīi wantæpiyæ ingæimpa, ante wædinque ämopa. Edëningä nänō pōnënō bai nē manguiwengä incæ adobaï pōnengä bai waa imaimpa. ³⁰ Æcänō Ca ca wæda tōmengä iñōmō wīi wæcä bai bacä ïnque waa imaimpa. Æcänō Ca ca toda tōmengä wīi tocä bai bacä ïnque waa imaimpa. Æcänō godonte æna tōmengä ömæpocä bai bacä ïnque waa imaimpa. ³¹ Inguipoga mōnō cædō ante æcänō cæda tōmengä mäninō ante änāmaï inte bai cæcä ïnque waa imaimpa. Edæ inguipoga quēwëninque mōnō cædō oo pōni ewente baquïnō anguënē.

³² Edæ mīnitō, Æbänō cæquimoo, ante wædāmaï incæmīnimpa, ante botō iïmaï ante wææ ämopa. Nē wēmō cæcä guiquënē, Æbänō cæbo ate mōnō Awēnē waa toquingä, ante pōnëninque tōmengä mōnō Awēnē beyænque ante quēwengampa. ³³ Do möingä guiquënē inguipoga nänō quēwenguïnō ante pōnëninque, Æbänō cæbo ate botō nänōogængä waa toquingä, ante wæcampa. ³⁴ Ìnque tæcæ tæcæ pōnente cæcampa. Onquiyængä guiquënē owæmpoingä ingä incæ baquēcä ingä incæ mōnō Awēnē beyæ ante pōnëninque, Æbänō botō baö tæiyæ waēmō eñaquimoo, ayæ, Æbänō botō önōwoca tæiyæ waēmō ewocaquimoo, ante cæcampa. Do möingä guiquënē, Æbänō cæbo ate botō nänōogængä waa toquingä, ante inguipogaque nänō quēwenguïnō ante wæcampa.

³⁵ Mäninō ante botō wīi mīnitō ïmīnite wææ cæcæte ante ämopa. Wæætē mīnitō mīni watapæ quēwenguinque ante botō, Mōnō Awēnē ingante æmæ pōnënāmaï inte nōingä cæte quēwencæmīnimpa, ante ämopa.

³⁶ Onguïñængä adocanque guiquënē, Botō wengä baquēcä do picængä

bacampa, ante adinque botö tömengä ingante godonguënemo imopa, angä inique tömengä nänö änö bai cædinque ee godongä moncæcäimpa. Edæ mänömai godöningue tömengä wii wënæ wënæ cæcä ingampa. ³⁷ Wacä guiquënë mimöno ædæmö nö pönëningue, Botö wengä baquécä picængä bacä incæte botö piyænë cæte godönämai incæboimpa, angampa. Inique wadäni tömengä ingante wææ änämai iñönäni tömengä, Tömëmoque botö äninö bai cæcæboimpa, ante në ëñente pönëningue godönämai ingampa. Tömengä adobai waa cæcampa. ³⁸ Inique tömengä wengä baquécä iñongante edæ, Moncæcäimpa, ante në godongä guiquënë waa cæcampa. Wæætë wacä, Mönämai incæcäimpa, ante wii godongä guiquënë tömengä godömenque waa cæcampa.

³⁹ Nänöogængä ayæ müngä quëwëñongante onquiyængä iñömö tömengä tönö cöwë quëwenguënengä ingampa. Wæætë nänöogængä wængä owæmpote ate tömengä abæ tawænte bai adocanque quëwengampa. Do owæmpoingä inte, Wacä ingante möinëmopa, angä ëñëningue minitö, Tömëna mönö Awënë nempo nana quëwencaya inapa, ante adinque möinente nänö wædö ante ee godömini moncædäimpa. ⁴⁰ Incæte botö, Owæmpoingä ee wëmö cædinque godömenque watapæ quëwëmaingampa, ante pönëmopa. Edæ Pabodo imo Wængonguï Önöwoca tönö äawocaque bai ewocabo inte mänömainö ante pönëmopa.

8

Mönitö wængonguï cænguï, ante wadäni nani cönöni ante

¹ Wadäni, Mönitö wængonguï cænguï impa, ante nani cönöningoo ante adinque minitö, Önonque cænguï impa, ante abäimpa, äminitawo. Näwangä tömämö mini änö bai do ëñëmompä. Incæte, Tömëmoque do ëñëmopa, ante në angä iñömö tömengä

nämä ængö cæte bai cædinque wadäni inänite piinte bai cæcampa. Wæætë në waadecä guiquënë wadäni inänite ængö cæte bai cædinque tömënäni inänite waadete cæcampa. ² Waocä, Tömëmo do ëñëmopa, ante në änewengä guiquënë tömengä nö nänö ëñenguënënö ante ayæ ëñënämai inte cæcampa. ³ Wæætë Wængonguï ingante në waadedäni inänite do againgä inte tömengä tömënäni inänite pönengampa.

⁴ Inique, Mönitö wængonguï cænguï impa, ante wadäni nani cönöningoo ante ñöwo apænebo ëñëedäni. Tömënäni nani, Mönitö wængonguï impa, ante nani cönöningoo ononcaque impa, ante mönö do ëñëmompä. Ayæ adobai, Näwä Wængonguï adocanque pönö ingampa, ante do ëñëmompä. ⁵ Wængonguïdi nani änönäni incæ awënëidi nani änönäni incæ nangui pönö inänipa. Näwangä impa. Incæte tömënäni, Wængonguïdi inänipa, ante nani änönäni inguipoga incæ öönædë incæ ongönäni incæte, ⁶ Wængonguï mönö Wæmpocä iñömö adocanque pönö ingampa. Öönæ incæ inguipo incæ öönædë ongoncoo incæ inguipoga ongoncoo incæ tömancoo incæ tömengä adocanque badonte aacä beyænque edæ ongoncoopä. Ayæ adobai mönö tömengä nempoque quëwëmompä. Ayæ Itota Codito mönö Awënë adocanque pönö ingampa. Tömengä tönö godongämæ cædinque Wængonguï tömancoo badongacäimpa. Adocä Codito tönö godongämæ cædinque Wængonguï pönö cæcä ate mönö quëwëmompä.

⁷ Mäninö ante pancamonga guiquënë ëñëmompä. Pancadäniya guiquënë në pönënäni incæ mäninö ante ëñënämai inänipa. Inäni Codito ingante tæcæ pönënäni iñömö tömënäni wëenëñedë, Mönitö wængonguï impa, ante badonte cönonte ædæ wæænte cægäinäni inänipa. Nöwo iñömö tömënäni Codito ingante tæcæ pönente ate, Wadäni wængonguï cænguï incæ cæningue

wentamö mongænte wæcæ wæ, ante guiñente wædäni incæte do edæ cænänipa. Mänömaï Codito ingante æmæ pönänäni inte tömönäni wadäni nāni wængonguï cænguï cæninque nāmanque nāni æmæ pönönö beyænque nāmā apænte do wentamö entawënäni inänipa. ⁸ Incæte cænguï önonque iñonte mönö cænāmaï imö beyænque ædö cæte wīwa entawenguï. Wæætē mönö cæmō beyænque ædö cæte waa entawenguï. Edæ mönö imonte cænguï beyænque Wængonguï dicæ waa aquingāa.

⁹ Wængonguï wææ änāmaï ingā adinque mīnitō do cæmīnitawoo. Iñæmpa mänömaï cæmīni adinque wadäni nē æmæ pönänäni adobaï cænāni ininque tömönäni tee tēwate bai oda cæbainänipa. Mänömaï impa, ante pönäninque mīnitō, Oda cædāmaï incædänimpa, ante cædinque ee cænāmaï imæwedäni ämopa. ¹⁰ Edæ, Mönitō wængonguïdi oncö impa, ante tömönäni nāni änincönē bitō nē eñēmi inte go guidinque cængömitawo. Iñæmpa bitō mänömaï go guï cængömi adinque wacā nē æmæ pönengā guiquënë bitō cæbaï adobaï do cædinque nāmā apænte änāmaï inte tömengā nänö oda cæquinque do go guite cæmaingampa. ¹¹ Codito tömāmō beyæ wæninque nē æmæ pönengā beyæ adobaï wængacäimpa cæbii. Bitō tömönäni nāni wængonguï oncö ante, Önonconque impa, ante nē eñēmi inte do guite cæmi beyænque bitō tönñacā nē æmæ pönengā iñongante wapiticæ mäobi oda cæte wæwente bacampa töö. ¹² Mänömaï cædinque mīnitō tönñadäni inänite mīnitō waadedāmaï inte wënæ wënæ cæmīnipa. Tömönäni nāni nāmā apænte æmæ pönönö ante wido cæte bai cædinque mīnitō mönö Codito ingante do wīwa cæmīni imīnipa. ¹³ Ininque botō cæmo beyænque botō tönñacā oda cæcā adinque botō, Tömengā oda cædāmaï incæcäimpa, ante cædinque baö incæ

cöwē cænāmaï incæboimpa.

9

Codito nänö da godongainäni iïmaï cæquënëni inänipa

¹ Botō Pabodobo æbänö imoo, ante mīnitō æbänö ante pönēmīni. Edæ, Botō Itota nänö nē da godongaïmo imopa. Tömengā botō imote pönö ñimpo cæcā beyænque quëwëmopa. Mönö Awënë Itota ingante do agaïmo imopa. Mīnitō guiquënë, Pabodo mänömaï ingampa, ante pönēmīniyaa. Ayæ mönö Awënë nempo quëwëninque botō Pabodobo tömengā beyæ apænebo eñēmīni inte mīnitō wæætē, Pabodo apænecā beyænque mönitō nē pönēmōni imönipa, ante pönēmīniyaa. ² Wadäni guiquënë, Pabodo ingante Awënë Itota da godönāmaï ingacäimpa, änänitawo. Tömönäni mänömainö ante tedewënäni incæte mīnitō guiquënë, Pabodo ingante mönö Awënë Itota nāwangā da godongacäimpa, ante apænequënëmi imīnipa. Edæ botō pönö apænebo beyænque mīnitō wede pönäninque mönö Awënë nempo quëwëmīnipa, ante edonque abaimpa.

³ Pancamīniya botō imote apænte ancæte ante cæyömīni botō nāmā wææ cæcæte ante iïmaï ämopa. ⁴ Mönatō apænemōna eñēmīni incæte mīnitō iñömö, Mīnatō eyepæ cæmīnapa diyæ cænguï tönö bequï ænguimīnaa, ante wææ ante bai tedemīni awædö. ⁵ Wadäni mönö Awënë Itota nänö nē da godongainäni iñömö nāna gæncaya nāna gæncaya godänipa. Mönö Awënë tönñadäni adobaï Pegodo adobaï tömönäni nāna gæncaya nāna gæncaya godänipa. Mönatō imönate guiquënë mīnitō, Mīnatō godinque nänöogængä ænāmaï inte goeda, ante wææ ante bai tedemīni awædö. ⁶ Wadäni önompoca cædāmaï inte quëwëñönäni botō tönö Bedënabee adomōnaque önompoca möna cædö beyænque ænte quëwenguënëmöna imönatawo.

7 Tontadoidi guiquënë dicæ tōmēnāni nāmā nāni godonte æinta beyæ quēwēnāniyaa. Ayæ æcānō yowementacoo mingā pæ inca ate nē mīningā iñōmō ædō cæte yowepæ ænte bedāmaī inguingāā. Edæ dobæ ade becampa. Cænīnāni nē aacā guiquënë dicæ goōmæ yopænte ænāmaī inguingāā. Edæ do yopænte ænte becā apa ānewēmīni.

8 Mānōmaīnō ante apænedinque botō waodānique nāni ānōnō ante wīi āmopa. Wæætē Wængonguī nānō wææ angainō ante mānīnonque ante āmopa. 9 “Wagada onguīñengā nē cæcā inte tōmentapo æ yacæimpa, ante āmi pīnā pīnā gāwate cægōñongā bitō tōmengā ōnōne wææ wodōnedāmaī inte ee abi cæncæcāimpa,” ante Mōitee wodi wææ yewæmongacāimpa.

Īnīnque Wængonguī dicæ wagada beyænque ante pōnēninque mānōmaīnō ante angantawogaa.

10 Wæætē mōnō beyænque ante Wængonguī angampa, ante pōnengæimpa. Nāwangā mōnō beyænque yewæmongatimpa. Waocā dicæ, Wadānique cæncædānimpa, ante ante onguipoi mangæ mangæ tæñongāā. Wæætē, Mōnitō godongāmæ cæncæmōnimpa, ante mangæ mangæ tæñongampa. Ayæ tōmēmō nē æ yeyacā guiquënë dicæ, Wadānique cæncædānimpa, ante æ yeyacāā. Wæætē edæ, Mōnitō godongāmæ cæncæmōnimpa, ante pōnengā inte æ yeyacampa. 11 Īnīnque, Mīnitō mīmōno cænte baī ēwocæmīnimpa, ante cædinque mōnatō tōmēmō mīnte pæ baī pōnō apænemōna do ēñente ēwocamīnitapa. Incæte mōnatō ĩmōnate wæætē māincooque pōnōmīni wēnæ wēnæ ænguēnēmōna āmīnitawo.

12 Īñæmpa wadāni ĩnānite māincoo ee godōmīni ænānipa. Mōnatō iñōmō godōmenque apænedinque godōmenque ænguēnēmōna iñōmōnate mīnitō Baa āmīnitawoo.

Mōnatō nē ænguēnēmōna incæte cōwē ænāmaī ĩmōnapa. Edæ, Mōnō Codito ingantedō ante watapæ apænedinque mōnatō māincoo æmōna baī wadāni, Pabodoidi

māincoo æncæte ante apænedapa, ante pīinīnque wææ ancædōnānimpa. Īnīnque, Wææ ānāmaī incædānimpa, ante cædinque mōnatō, Cōwē ænāmaī incæmōnaimpa, ante piyænē cæte ee apænemōnapa. 13 Nāwā Wængonguī cænguī, ante ænte māmō cōnōnāni ongō adīnque Wængonguī oncōnē ñænæncōnē nē cædāni incæ pancaa ænte ade cænte quēwēnānipa. Ayæ,

Wængonguī quī, ante baō nāni iya tāimpaa nē cædāni adobaī iya tāimpaa nāni cōnōningā incæ pancacāā ænte cænte quēwēnānipa, ante pōnēmīniyaa. 14 Mōnō Awēnē adobaī, Botō ĩmotedō ante watapæ apænedāni ate nē ēñēnāni wæætē nē apænedāni ĩnānite cænguī pædæ godōnāni ænte cænte quēwēncædānimpa, angampa.

15 Botō guiquënë nē ænguēnēmo incæte cænguī ante ānāmaī inte cōwē apænebo ĩnōmoimpa. Nōwo mīnitō ĩmīnite yewæmōninque botō dicæ, Pōnōmīni æncæboimpa, Cænguī Nāwangā mōnō beyænque yewæmōmogaa.

16 Itota Codito ingantedō ante apænebi ēñencædānimpa, angā ēñente botō nē apænebo bagaimo inte edæ ædō cæte wadō cæquīmoo. Īnīnque botō mānōmaīnō ante nē apænedōmo inte edæ, Tōmēmō waa cædinque apænebopa, ante ædō cæte tedequīmoo. Edæ botō Itota ingantedō ante mōni watapæ apænedō ante wīi apænebo baī edæ botō wæquinque incædōnimpa. 17 Edæ Itota Codito, Apænebi ēñencædānimpa, angā ēñēninque botō Ao ante watapæ todinque apænebo adīnque tōmengā, Waa cæbi ĩmipa, ante eyepæ pōnongā æmaīmopa. Wæætē, Wīi apæneinente wæbo incæte botō cōwē apænebo ĩnīnque edæ tōmengā nānō angainonque cæte apænebopa. Edæ botō nē

apænequënëmo inte ædö cæte apænedāmaī inguimoo. ¹⁸ Īninqe botō ēñente cæbo beyænque quīnō ænguimoo. Botō Itota Codito ingant-edō ante watapæ apænebo beyænque Wængonguī ĩmaī pōnō cæcā æninqe tocæboimpa. Botō apænebo beyæ mīnitō nē pōnonguënēmini incæte pōnōnāmaī ĩmini ĩninqe botō wæætē ænāmaī inte tocæboimpa.

¹⁹ Ayæ waodāni wīi botō awënēidi ĩnānīpa. Ayæ botō wacā ingante nē cæbo ĩnāmaī inte abæ tawænte baī quëwëmopa. Incæte botō, Waodāni godōmenque nangūi ĩnāni Codito gāmænō poncædānīpa, ante cædinque tōmānāni ĩnānite nē cæte quëwëmo baī botō baquinque nāmā pædæ godonte baī quëwëmopa. ²⁰ Godongāmæ cæbo ate oodeoidi incæ Itota gāmænō poncædānīpa, ante cædinque botō oodeoidi nāni pōnēnō baī pōnēninqe tōmēnāni nāni quëwënō baī quëwëmopa. Pancadāniya, Mōitee wodi nānō wææ angainō ēñēmō beyænque mōnō quëwengæimpa, ante pōnēninqe mānīnonque ante ēñente cædānīpa. Botō guiquēnē, Wīi Mōitee wodi nānō wææ angainō ēñēmō beyænque mōnō quëwengæimpa, ante pōnēmopa. Incæte, Godongāmæ cæbo ate mānīnonque ante nē ēñente cædāni adobaī Itota Codito gāmænō poncædānīpa, ante cædinque botō tōmēnāni ēñēnō baī adobaī ēñente baī cæbopa.

²¹ Wadāni guiquēnē Mōitee wodi wææ ante nānō yewæmongainta adāmaī ĩnānīpa. Botō guiquēnē, Wængonguī, ĩmaī cæedāni, ante nānō wææ angainō ante cōwē ēñenguënëmo inte botō mōnō Awënē Codito nempo quëwēninqe tōmengā nānō angainō ante cōwē ēñente quëwëmopa. Incæte godongāmæ cæbo ate nē adāmaī ĩnāni adobaī Itota Codito gāmænō poncædānīpa, ante cædinque botō wadō pōnēmo incæ tōmēnāni adāmaī inte nāni quëwënō baī adobaī inte baī quëwëmopa. ²² Ayæ, Godongāmæ

cæbo ate æmæ pōnēnāni adobaī Codito gāmænō poncædānīpa, ante cædinque botō tōmēnāni æmæ pōnente quëwēnāni baī æmæ pōnēmo inte baī quëwëmopa. Īninqe, Godongāmæ cæbo ate pancadāniya Codito gāmænō ponte quëwencædānīpa, ante cæcæte ante botō æbānō cæquimoo, ante wædinque ĩmaī cæbopa. Wadāni nāni quëwënō baī wadāni nāni quëwënō baī wadāni nāni quëwënō baī adobaī cædinque botō tōmānāni nāni quëwënō baī adodō ante pōnēmo inte baī quëwëmopa. ²³ Edæ, Itota Codito watapæ pōnō cæcā beyænque tōmāmō tōmengā nempo quëwēninqe godongāmæ watapæ tocæimpa, ante cædinque mānīnō wadāni nāni quëwënō baī wadāni nāni quëwënō adodō ante pōnēmo inte baī quëwëmopa.

²⁴ Edæ nē quingæ pogodo godāni ĩñōmō tōmēnāni nāni pogodo goīmancadē tōmānāni pogodo godānīpa. Incæte adocanque quingæ pogodo gocā inte tāno gote næ gongængā adinque edæ, Bitō adobique quingæ pogodo gote gānā cæbīpa, ante pædæ pōnōnāni ængampa, amīnitawoo. Mīnitō guiquēnē quingæ pogodo gote baī gānā cæte æncæte ante tæi piñænte cæedāni. ²⁵ Gānā cæcæimpa, ante cædinque tōmēnāni wadō nāni cæinēnō ante cædāmaī inte wæntæye ĩnāmaī inte mānīnonque ante cædānīpa. Tōmēnāni guiquēnē gānā cædinque poganta aquīi guīñē wænguīñabo nāni que cædīntaque ænte wencacæte ante mānōmaī cædānīpa. Mōnō guiquēnē poganta guīñē wænāmaī inta mōnō cōwē encaquinta æncæte ante mānōmaī cæmōmpa. ²⁶ Mānōmaī ĩmpa, ante pōnēninqe edæ wīñatæ wīñatæ guīdāmaī inte pogodo godāni baī botō tōingā gobopa. Ayæ, Æcānō gānā cæcāā, ante tiyæmāa tamonte guëa cæda baī cædinque botō, Gānā cæcæboimpa, ante tæimō piñænte nō cæbopa. ²⁷ Īninqe godōmenque godōmenque apænebo ēñēnāni ate tōmēmo oda cædāmaī incæboimpa,

ante cædinque botö, Tæi piñænte quingæ gobæwe, ante bai cædinque botö nämä incæ da godö da godö godoncæte ante nämä tæi tæi pante bai cæbopa.

10

Wængonguï impa, ante nãni cönöninca

¹ Botö tönifñamini iïmaï ante apænebo eñeedäni. Mönö wæmæidi wodi tömänäni boguimä gänëñömö quëwente cægongadänimpa. Ayæ tömänäni gäwapæntibædë tæcæguedëmæ ti wææ tao gogadänimpa. ² Ìninqe æpænë guite bai cædinque tömënäni Möitee wodi nempo tömänäni nãni quëwenguinque edæ boguimämodë godinque gäwapæntibæ tæcæguidëmæ gogadänimpa. ³ Ayæ cænguï Wængonguï öönædë da pönongä wææ nãni cæ bai tömengä Önöwoca nänö apænedö adobai eñente ëwocate quëwengadänimpa. ⁴ Wængonguï Önöwoca apænecä eñëninque tömänäni godongämæ bete bai ëwocate quëwengadänimpa. Edæ dicabo tæëmonca iñonte Möitee wodi ongonto tæi tæi äayongä æpæ ompade ba begadänimpa. Ìncayæ Ponguingä mönö Codito adobai tæi piñænongå inte tömënäni tönö godongämæ godinque tömengä Önöwoca ingante pönongä æninque tömënäni ompade bete bai äawocaque bai ëwocagadänimpa. ⁵ Incæte wodo tömänäni eñënämaï cædäni adinque Wængonguï wii togacäimpa. Edæ püininqe wænöninque önomæca yabæque wido cæcä ñömængadänimpa.

⁶ Ìninqe, Tömënäni wënæ wënæ cæcæte ante nãni toinente wædö bai munitö wii adobai toinente wæcæminimpa, ante mönö imonte wææ odömoncæte ante Wængonguï tömënäni nãni toinënö beyæ ante pangä wængadänimpa, ante abaimpa. ⁷ Pancadäniya nãni badonte cönöninca weca ædæ wæænte, Wængonguï impa, ante babæ apænete townegadänimpa. Edæ, “Cæncæte ante

becæte ante tæ contadinque tömënäni Yæ yæ owempocæte ante ængæ gantidänitapa,” ante yewæmongatimpa cæminii. Minitö iñömö edæ, Wængonguï impa, ante nãni babæ towengai bai wii adobai cædäni. ⁸ Pancadäniya guiquënë nänöogængä inämaï iñongante wiwa towengadänimpa. Edæ bæintitodee müido ganca inäni mänimpodäni edæ mänömaï towënäni inte adoönæque iñonte nãne wængadänimpa, ante adinque pönente wædinque mönö wæætë towënämaï ingæimpa.

⁹ Pancadäniya guiquënë, Quiëmë cæmö iñömönte Awënë dicæ pangäa, ante ancaa wënæ wënæ cædäni adinque Wængonguï tæntæ angä pocæ wængadänimpa. Ìninqe tömënäni nãni wënæ wënæ cægainö ante mönö Baa ante wënæ wënæ cædämaï ingæimpa. ¹⁰ Pancadäniya guiquënë Wængonguï nänö pönönincoo adinque, Wængonguï wii waëmö pönongä awædö, ante piinte tededäni ate Wængonguï anquedo në wido cædongä inongä inte tömënäni inänite wænonte edæ wido cægacäimpa. Mänömaï cæcä ante adinque munitö, Pangä wæncæ wæ, ante wædinque tömënäni nãni piinte tedewengai bai adobai piinte tededämaï imæwedäni.

¹¹ Ìninqe, Wamini mïni adobai panguinque cæminipa, ante wææ odömoncæte ante pancadäniya inänite Wængonguï mänömaï pangacäimpa. Ayæ iïmamo wodo inque bayonte quëwëmö iñömönte dodäni mönö imonte wææ ancæte ante yewæmöninqe, Wënæ wënæ cædäni ate Wængonguï æbänö pangacäi, ante aedäni, ante wææ yewæmongadänimpa. ¹² Mänömaï impa, ante adimini incæte munitö, Mönitö nämä ongönte cöwë oda cædämaï incæmönimpa, ante pönëmïnitawo. Edæ mïni ædocæ tæ go wæænguinque mänömaï anewëmïnipa töö. ¹³ Minitö wënæ wënæ cæinente wæmïnitawo. Edæ wii munitö adomïnique mänömaï wënæ wënæ cæinente wæmïnipa. Mönö waocabo mönö wënæ wënæ

cæinente wæcabo tōmāmō imompa. Incæte mīnitō mīni oda cæquinque wēnæ wēnæ cæinente wæmīni adinque Wængonguī mōnō imonte cōwē nē pōnengā inongā inte, Oda cædāmaī incæmīnimpa, ante wææ ānīnque edæ, Idæwaa, angampa. Ayæ wēnæ wēnæ cæinente wæmīni incæte tōmengā tōō æmænte ængā beyænque mīnitō eyepæ inte ate adiyæ næ gongæninque oda cædāmaī inguīmīni imīnīpa.

14 Mānīnō beyænque botō nē waademīni, āmo ēñēedāni. Wængonguī impa, ante nāni babæ ante gōnōninca gomō adinque ocæmæ wodii wīnōedāni āmopa. 15 Mīnitō ocai encadōmīni imīnīpa, ante adinque botō mānōmainō ante yewæmōmopa. Īnīnque botō ānō ante, Nō intawo, babæ intawo, ante mīnitō nē encadōmīni inte apænte ante baī ēñencæmīnimpa. 16 Mōnō pōnencabo owæta ænīnque Wængonguī ingante waa ate pōnente apænedīnque, Mōnō Codito wepæ tōmāmō beyæ godonte impa, ante pōnēninque mōnō pōnencabo ĩñōmō godongāmæ bemompa. Ayæ pāo mōnō pā ænō ænīnque, Mōnō Codito tōnō godongāmæ caate wængaīmō baī imompa, ante pōnēninque mōnō godongāmæ cæmompa. 17 Mōnō pāo adocaque ænīnque pā ænte godongāmæ cæninque mōnō, Pāo adocaque ĩ baī mōnō tæiyæmō pōnī imō incæte adocabomō imompa, ante pōnengæimpa.

18 Idægoidi ēñagāināni ĩñōmō, Wængonguī quī, ante baō ænte māmō ñōnōninque iya tånānīpa. Mānīi baō tōmēnāni nāni iya tāimpaa ñōnōningā pancacāa ænīnque tōmēnāni, Baō Wængonguī quī ĩ baī mōnō adobaī Wængonguī quīmō imompa, ante baī cædinque godongāmæ cænānīpa, ante do ēñēmīnīpa. 19 Mānōmaī ānīnque botō æbānō āmoo, ante pōnēmīni. Nē ēñēnāmaī ĩnāni nāni babæ cōnōninca ĩñōmō edæ nāwā Wængonguī ingampa diyæ tōmēnāni tōmengā quīnāni ĩnāniyaa. Ayæ, Wængonguī

cænguī impa, ante babæ nāni ānongā ĩñōmō nāwā Wængonguī cænguī impa diyæ tōmēnāni Wængonguī tōnō godongāmæ cænāniyaa. Botō ĩñōmō edæ mānōmainō ante dicæ āmogaa.

20 Mānōmaī ānāmaī imo inte botō ĩīmaī āmopa. Tōmēnāni, Wængonguī quī, ante babæ cōnōninque dicæ nāwā Wængonguī ingante godōnāniyaa. ĩñæmpa wēnæidi ĩnānite godōnānīpa cæmīnīi. Wēnæ tōnō cædāni awædō, ante mīnitō gomō adinque godongāmæ cænāmaī imæwedāni, āmopa. 21 Edæ mōnō Awēnē bepæ godongāmæ bemīni inte mīnitō wēnæidi bepæ ædō cæte godongāmæ bequīmīnīi. Mōnō Awēnē cæimpaa tæ contate godongāmæ cæmīni inte mīnitō wēnæidi cæimpaa ædō cæte godongāmæ tæ contate cænguīmīnīi.

22 Æmæ pōnente baī wēnæidi nāni bepæ bemō adinque mōnō Awēnē piīnte badīnque pāmaingampa, ante ēñēnīmō inte mōnō ædō cæte wēnæidi bepæ bequīmōō. Tæi piñænte wææ cæmompa mōnō Awēnē pānāmaī inguīngāa.

Ñi cæycænte gote baī quēwente waadete pōnengæimpa

23 Mīnitō ĩīmaī apænedīnque, “Mōnō quīēmē baī cæinēmo incæ Wængonguī wææ ānāmaī ingampa,” āmīnitawo. ĩñæmpa mōnō cæinēnonque cæte quēwēmō baī wīi mōnō waa quēwenguīnque incædōnīpa. Ayæ adobaī, “Mōnō cæinonque cæmō incæ Wængonguī wææ ānāmaī ingampa,” āmīnitawo. ĩñæmpa mōnō cæinēnonque cæte quēwēmō baī wacā, Botō adobaī cæbote, ante oda cæcædongāimpa cæmōō. Oda cædāmaī incæcāimpa, ante wææ cædinque mōnō Wængonguī nānō ānōnonque ante ēñente cæcæimpa. 24 Edæ, Mōnō æbānō cæte eyepæ ænīnque quēwenguīmōō, ante nāmā beyænque wædāmaī inte wæætē wadāni beyæ ante pōnēninque, Tōmēnāni nōingā ante ēñente waa quēwencædānīpa, ante mōnō nanguī cæcæimpa.

²⁵ Īninqe baö godonte æncæte ante nē mänāni nāni æi pancadē gote æninqe mīnitō mīmō entawēmīni incæte, Baacā bai intawo, nāwāaquinḡā intawo, ante apænte ānāmaī inte guiñenedāmaī ade cæedāni. ²⁶ Edæ, Inguipo Wængongui qui impa. Īninqe inguipoga ongoncoo tōmancoo adobai Wængongui qui inte nāwāaquincoo impa, ante yewæmongatīi apa guiñewēmīni.

²⁷ Ayæ nē pōnēnāmaī ingā mīnitō imīnite, Pō cæedāni, angā eñēninqe mīnitō goinēmīni inte godinque tæ contayōmīni cænguī pædæ pōnongā adinque ee ö ænte cæedāni. Baacā intawo, Nāwāaquinḡā intawo, ante nāmanque apænte ānāmaī inte ade cæedāni. ²⁸ Wæætē wacā tōmengā nānō mīmō pōnēnō beyænque ante wææ āninqe, “Wadāni tōmēnāni, Mōnitō wængongui cænguī impa, ante do nāni godōni impa iñæmpa cæmīni,” angantawo. Mānōmainō wææ angā eñēnte wædinque mīnitō nē wææ āningā beyæ ante ayæ tōmengā nānō nāmā apænte æmæ pōnēnō beyæ ante edæ cænāmaī iedāni. Iñæmpa inguipo incæ inguipoga ongoncoo tōmancoo incæ mōnō Awēnē qui impa cæmīni. ²⁹ Wīi tōmēmīni mīmō entawēnō beyæ ante nāmā apænte āninqe wæætē nē wææ āningā beyæ ante tōmengā nānō nāmā apænte æmæ pōnēnō beyænque ante mīnitō cænāmaī incæmīnimpā.

Incæte bitō wabi iīmaī ante wæbitawo. “Mōjtee wodi nānō wææ angainō beyæ ñā cæyænte wægaimo bai inte botō ñōwo ñī cæyænte gote bai imo adinque wacā tōmengā nānō nāmā apænte æmæ pōnēnō beyænque ædō cæte botō imote apænte anguingāā,” ante wæbitawoo. ³⁰ Ayæ, “Wængongui ōnonque pōnongā æninqe botō tōmengā ingante waa ate pōnente apænedinque ade cæmo adinque wadāni iñōmō edæ, Baacā incæ iñæmpa cæmīi, ante quīnante pōnō babæ ante tedewēnāni,” ante bitō wæbitawoo. ³¹ Incæte mīnitō cæmīni incæ bemīni incæ quiēmē

bai cæmīni incæ mīnitō cædinō adinque wadāni, Wængongui ñāö apāite bai emōnongā ingampa, ante acædānimpā, ante cædinque waa cæedāni. ³² Edæ mīnitō iñōmō, Waa cæmōni adinque wadāni ood-eoidi incæ guidiegoidi incæ Codito ingante nē godongāmæ pōnēināni incæ tōmānāni tee tēwadāmaī inte oda cædāmaī incædānimpā, ante pōnēninqe edæ waa cæedāni. ³³ Botō adobai, Botō tōmēmo ænguīnō ante wædāmaī imopa. Wæætē, Botō waa cæbo adinque wadāni Itota gāmænō pōninqe tōmengā ængā beyænque quēwencædānimpā, ante pōnēninqe botō quiēmē cæbo incæ cōwē waa cæbopa.

11

¹ Mōnō Codito tōmengā nānō cæi bai botō adobai cæbo adinque mīnitō botō cæi bai adobai cæbaīmīnīpa.

Īmaī cæte Wængongui ingante apænecæimpā

² Mīnitō botō imote cōwē pōnēmīni adinque botō mīnitō imīnite waa adinque apænebopa. Ayæ do pōnengaināni nāni apænegainō ante botō adodō ante apænebo eñēninqe mīnitō, Nāwangā impa, ante eñēnte cæmīnīpa, ante adinque botō mīnitō imīnite waa ate pōnēninqe apænebopa.

³ Ñōwo iñōmō iīmaī āmo eñēedāni. Mōnō Codito ñænængā inongā inte onguiñængā ingante nē angā ingampa. Waoda nāna gæncaya adinque onguiñængā ñænængā bai inongā inte onquiyængā ingante nē angā ingampa. Mæmpo Wængongui guiquēnē ñænængā pōni inongā inte mōnō Codito ingante nē angā ingampa. ⁴ Īninqe onguiñængā iñōmō Wængongui ingante apænedinque ayæ, Wængongui æbānō angāā, ante apænedinque wencadāmaī apænecæcāimpā. Edæ bee ocadinque tōmengā nāmā ocabo ante guiñencate bai apænebaingampa.

⁵ Onquiyængā guiquēnē bee ocadinque Wængongui beyæ apænecæcāimpā.

Bee ocadinque tömengä, Wængongui æbänö angää, ante apæ necæcäimpa. Edæ bee ocadämaï inte nämä ocamö ante guiñencate bai onquiyængä apænebaingampa. Mänömaï cædinque tömengä nē ēñēnāmaï cædingä ingante nāni eö tocadingä bai inongä inte encabaingampa. ⁶ Edæ onquiyængä bee ocadämaï ingä inte godömenque eö tocacä bai waa incædönimpa. Wæætē, Eö tocate wæcæ wæ, ante wæcä inique tömengä iñömö edæ bee ocabaingampa. ⁷ Edæ onguiñængä ingante badöningue Wængongui tömengä nänö emönö bai adobai badongä emongacäimpa. Inique Wængongui nänö ñäö apäidö bai adobai emönongä inte onguiñængä bee ocadämaï incæcäimpa. Onquiyængä guiquenē onguiñængä nänö emönö mäninque emönongä ingampa. ⁸ Onguiñængä ingante täno badöningue Wængongui ayæ onquiyængä ingante badoncæte ante onguiñængä iyapa ænte badongacäimpa. ⁹ Edæ wii onquiyængä beyæ ante onguiñængä ingante Wængongui badongacäimpa. Wæætē, Bitö onguiñængä beyæ quëwencæbiimpa, ante onquiyængä ingante badongacäimpa. ¹⁰ Inique onquiyængä iñömö, Botö nänöogængä beyæ Wængongui botö imote badongacäimpa, ante pönente wædinque bee ocacæcäimpa. Ayæ, Bee ocabo adinque Wængongui anquedoidi incæ, Botö nänöogængä nē angä ingampa, ante ēñencædänimpa, ante cædinque onquiyængä waa cædinque bee ocacæcäimpa.

¹¹ Incæte mönö Awënë nempo quëwëninque onguiñængä dæ angä bai onquiyængä önonganque baquënegainö angüenē. Wæætē onquiyængä dæ angä bai onguiñængä wæætē önonganque baquënegainö angüenē. ¹² Edæ onquiyængä ayæ dæ añongante tömengä ingante badoncæte ante Wængongui onguiñængä iyapa æninque badon-

gacäimpa. Wæætē wëñængä onguiñængä ingante onquiyængä mangä beyænque ēñacampa. Incæte Wængongui beyænque tömämö quëwëmompä.

¹³ Onquiyængä bee ocadämaï inte Wængongui ingante apæ necä inique waa intawoo, ante mīnitö tömëmini godongämæ pönē cöningue äedäni. ¹⁴ Edæ dodäni nāni cægäi bai cæquënemö inte mönö iïmaï ante pönengæiimpa. Onguiñængä doyængui encadinque guiñencate wæquënegä ingampa, ante edonque ate pönëmaimpa. ¹⁵ Onquiyængä guiquenē tömengä doyængui pæ inique edæ waa impä. Edæ, Doyængui bee ocacæbiimpa, ante onquiyængä ingante Wængongui badongä encacampa. ¹⁶ Botö mänömainö ante apænebo ēñëninque mīnitö pancamīniya wæætēdö wæætē äinëmīnitawo. Iñæmpä botö äninö bai mönitö cöwë cæmönipa. Ayæ Codito ingante godongämæ nāni pönencabo adobai Wængongui quinäni inönäni inte edæ cöwë mänömaï cædänipa cæminii.

Awënë ææmæ ante bedinque pancamīniya wiwa cæmini

¹⁷ Mīnitö mīni waa quëwënguinque ante godongämæ ponguënëmini incæte mīni godömenque wiwa quëwënguinque godongämæ pömīni awædö. Inique botö, Waa cæminipa, ante ædö cæte angüimoo. ¹⁸ Iïmainö ante ñöwo täno apænebo ēñëedäni. Codito ingante mīni pönencabo godongämæ pöninque mīnitö iñömö mīni caipæ incæ wæætē godö wæætē godö tedewëninque wacabo nänënë wacabo nänënë bamīnipä. Ante apænedäni ēñëninque botö, Wabänö nöingä ante apænedänipa, ante pönëmopa. ¹⁹ Näwangä impä, ante pönëmopa. Edæ, Ædänidö inänite Wængongui waa acää, ante edonque acæiimpa, ante tömengä angä ate mīnitö mīni cabo wadö ante mīni cabo wadö ante tedemīnipä, ante awædö.

20 Īninqe, Awēnē ææmæ impa, ante godongāmæ pōninqe mīnitō wīi mōnō Awēnē ææmæ bete bai cæmīni awædō. 21 Edæ mīni godongāmæ cæñedē incæ mīnitō, Wadāni adobai cæncædānimpa, ante ee ongōnāmaī ĩmīni inte tōmāmīni cænguī ade cæmīnīpa. Pancadāniya ayæ gæwænte ongōñōnāni edæ pancamīniya do tōmo bete dowænte wæmīni awædō. 22 Īñæmpa oncō ōmaamīni bai inte mīnitō tōmēmīni oncōnē cænte wīi bemīni. Edæ Codito ingante mōnō godongāmæ pōnencabo Wængonguī quīmō ĩmō incæte mīnitō nāēmæ piinte cæmīni awædō. Ōmæpodāni incæ tōmēnāni nāni guingo imonte wæquinque ante mīnitō pæ gompote ade cæmīnīpa tōō. Mānōmaī cæmīni adinqe botō dicæ, Waa cæmīnīpa, āmogaa.

Mōnō Awēnē ææmæ

(Māateo 26.26-29; Māadoco 14.22-25; Odoca 22.14-20)

23 Edæ mōnō Awēnē botō ĩmote pōnō apæ necā ēñēninqe botō wæætē ĩmaī ante mīnitō ĩmīnite pōnō apænetabopa. Mōnō Awēnē Itota ingante Codaa nānō odōmonte godongaiōnæ woyowotæ ĩñonte Itota pāō æninqe, 24 Wængonguī ingante waa ate pōnente apænedinqe pāō pā æninqe angacāimpa. “Īi pāō botō baō bai impa. Botō, Mīnitō quēwencæmīnimpa, ante botō baō godonte bai cædinque wæncæboimpa. Botō pā ænte pædæ pōnōmo bai mīnitō adobai ĩncayæ ate botō ĩmote ante pōnēninqe godongāmæ cæedāni,” angantapa.

25 Mānōmaī angā ĩninqe cænāni ate owæta adobai æninqe tōmengā, “Botō wepæ ĩmæ bai impa. Wængonguī do apænedinqe, Botō pōnō cæbo ate mīnitō Ao āmīni ĩninqe mōnō godongāmæ waa cæte quēwengæimpa, angacāimpa. Nōwo adobai mīine āninqe apænebopa. Botō wepæ ante Ao ante æmīni inte mōnō godongāmæ waa cæte quēwengæimpa. Īninqe mīnitō wantæ wantæ ĩñō bedinqe botō

ĩmote ante pōnente becæmīnimpa.” Ante Itota angā begadānimpa.

26 Īninqe Itota nānō ponguīōnæ ganca mīnitō mānōmaī pāō wæætē wæætē cæninqe mānīmæ bai wæætē wæætē bedinqe, Mōnō Awēnē tōmāmō beyæ wængacāimpa, ante odōmonte bai cæmīni adinqe wadāni ēñencædānimpa.

Nōingā ante pōnēninqe mōnō Awēnē ææmæ becæimpa

27 Mānōmaī ĩ ĩninqe waocā pōnēnāmaī inte mōnō Awēnē pāō ōnonque cæninqe Awēnē nānō bequīmæ ōnonque bedinqe tōmengā nānō wentamō mongænguinque mōnō Awēnē baō ante, Ōnonque impa, ante piinte bai cædinque tōmengā wepæ ōnonque wido cæte bai cæcampa. 28 Īninqe, Æbānō entawēmōō, ante mīnitō nāmā nāēmænte cōwā adinqe nōingā ante pōnēninqe pāō cæninqe mānīmæ bequēmēmīni ĩmīnīpa. 29 Edæ, Mōnō Awēnē baō bai impa, ante æcānō pōnēnāmaī inte cænte beda ĩñōmō tōmengā nāmā nānō apænte pante wæquinque mānōmaī cænte becampa. 30 Edæ mānōmaī cæmīni beyænque pancamīniya aquīimīni badinqe wæntæye bamīnīpa. Pancamīniya wīi pōnente wæmīnīpa. Ayæ wadāni æpodānimē mānīnō beyænque do æmæwo wænānimpa.

31 Incæte mōnō cōwā adinqe nāmanque apænte āninqe nōingā cæmō ĩninqe mōnō Awēnē wæætē mōnō ĩmote apænte ante piināmaī ĩmaingampa. 32 Mōnō Awēnē mīnitō ĩmīnite apænte ante piingantawo. Edæ mōnō Awēnē, Inguipogaque quēwēnāni ĩnānite apænte āninqe botō pāñedē mīnitō wīi adobai pante wæquīmīni, ante wææ cædinque ñōwo ĩñōmō edæ, Ēñenguēnē quēwēedāni, ante wædænque pangā wæmōmpa.

33 Botō tōniñamīni ēñēedāni. Mānōmaī ĩ, ante pōnēninqe mīnitō cæncæte ante pōninqe ee ongōñōmīni tōmānāni adoyōmō pōnāni ate godongāmæ cæedāni. 34 Godongāmæ

pöninge mönö wii apænte panguenemö bacæimpa, ante wææ cædinque mīnitō nē gæwænte wæcā ingante ämini oncōnē tāno cæncæcäimpa. Ñowo mäninque ante yewæmōninge botō mīnitō weca iincayæ ate pöninge wadō mīni äninō ante godōmenque apænebo eñencæminimpa.

12

Wængonguī Önöwoca pönö cæcä æninque cæcæimpa

¹ Iñänäni eñëedäni. Wængonguī Önöwoca mönö imonte pönö cæcä ate tömengä nänö pönönoncoo eyepæ ænte ewocadinque mönö æbänö cæquii, ante eñëninque mīnitō oda cædämaī incæminimpa, ante ñowo yewæmōmo aedäni.

² Doyedē iñömö mīnitō eñënämaī iñömīnite wadäni, Mōnitō miñæ pōedäni, ante æbämē cæte ænte mäodäni gogamīnimpā. Tömēnāni miñæ mänömaī go go cædinque mīnitō do oda cædinque babetade nāni badōninca weca ædæ wææninque, Mōnitō wængonguī impa, ante cædinque quëwengamīnimpā. ³ Iñinque mīnitō imīnite botō ñowo, Eñenguënë quëwēmīni, ante iīmaī ante apænebopa. Æcänö Wængonguī Önöwoca tönö äawocaque bai ewocacä guiquënë tömengä, Itota nänö panguinque nē wentamö mongængä ingampa, ante ædö cæte tedewenguingää. Ayæ wæætē Wængonguī Tæiyæ Waëmö Önöwoca tönö ewocadämaī ingä guiquënë tömengä, Itota Tæiyæ Awënë ingampa, ante ædö cæte apænequingää.

⁴ Adocanque ingante wadö pönö cædinque Wængonguī Önöwoca wacä ingante wadö pönö cædinque tömengä nänö pönönincoo nēnempote bai cæcä æninque mönö wadö wadö nē cæmō imompa. Wængonguī Önöwoca adocanque pönö inongä incæ mänömaī wadö wadö pönö cæcampa. ⁵ Ayæ mönö Awënë adocanque pönö inongä inte waocä adocanque ingante,

iīmaī cæe, äninque wacä ingante, Wadö bai cæe, angä eñëninque mönö tömämö wadö wadö nē cæmō imompa. ⁶ Ayæ Wængonguī adobai adocanque pönö incæ tæi piñængä inongä inte waocä adocanque ingante pönö cæcä æninque tömengä tæi piñængä badinque inte wadö cæcampa. Wacä ingante wadö pönö cæcä æninque tömengä tæi piñængä badinque wadö wadö cæcampa. Iñinque Wængonguī mänömaī wadö wadö pönö cæcä æninque mönö tömämö eyepæ badinque cæmompā.

⁷ Wængonguī Önöwoca, Tömänäni waa quëwencædänimpā, ante cæedäni, ante tömämö imonte wadö wadö pönö odömonte apænecä eñëninque tömämö mönö waa quëwenguinque ante godongämæ cæmompā.

⁸ Iñinque Wængonguī Önöwoca pancadäniya inänite, Wængonguī nö nänö eñënö ante apænecä eñëninque tömēnāni nē nö ante apænedäni badänipa. Ayæ adocä Önöwoca iñömö Wængonguī nänö cædö ante edonque odömongä adinque pancadäniya nē adinäni badinque, Wængonguī mänömaī cæcampa, ante nö apænedänipa. ⁹ Adocä Wængonguī Önöwoca apænecä eñëninque pancadäniya, Wængonguī eyepæ pönö cæcampa, ante wede pönēnāni inte tömēnāni wede nāni pönēnö beyænque nanguī cædänipa. Ayæ Wængonguī Önöwoca adocanque inongä inte pönö cæcä æninque pancadäniya wënæ wënæ inäni inänite gampote apænedäni ate waa badänipa. ¹⁰ Pancadäniya inänite guiquënë Wængonguī Önöwoca godö cæcä æninque tömēnāni tæi piñænāni badinque nanguī pönö cædänipa. Wængonguī Önöwoca apænecä eñëninque wadäni Wængonguī beyæ nē apænedäni inänipa. Ayæ wacä yewænte bai tedecä adinque, Wængonguī Önöwoca tedecantawo, wënæ tedecantawo, ante wæyönāni Wængonguī Önöwoca pancadäniya

inänite edonque odömongä adinque tömënäni, Æcänö önöwoca nē tedecä, ante do eñenänipa. Pancadäniya guiquenē Wængonguī Önöwoca tönö apænedinque wadäni nāni tede bai nē tededäni inänipa. Ayæ iināni wadäni nāni tede bai tededäni eñenique pancadäniya Wængonguī Önöwoca apænecä eñenique, Nē tededäni æbänö ante tededänii, ante do eñenāni inte wadäni inänite edonque pönī apænedäni eñenänipa.

¹¹ İninque adocä Önöwoca adocanque inongä inte tömengä nänö nō angai bai cædinque mönō imonte apænte æninque, Pancamīniya iimaī cæcæminimpa, wamīni iimaī cæcæminimpa, ante pönö cæcä æninque adocanque nänö cæquënönö ante wacä nänö cæquënönö ante edæ tömämö mönö cæquënönö ante cæmompä.

Adocabomö bai imompä

¹² Mönö baö adoyonque pönī eñamö incæ mönö wii adodonque cæquïnö ante eñamö inte mönö pæ pagænguincōo watai watai eñamompä. Edæ wadö mönö cæquïnö ante watai eñadinque mönö wæætē wadö cæquïnö ante watai watai eñamompä. İninque watai watai nanguī mönö eñacōo iñömö adoyonque pönī impä. Ayæ Codito nempo quëwëninque mönö adobai adocabomö imompä. ¹³ Mönö adocabomö mönö tömämö baquinque Wængonguī Önöwoca mönonga pö guite owocampa. İninque oodeocä incæ guidiegocä incæ wacä ingante nē cæcä incæ abæ tawænte ee gote bai nāmä beyænque nē cæcä incæ mönö tömämö adotaca bete bai Wængonguī Önöwoca tönö äawocaque bai tömämö ewocamompä.

¹⁴ Mönö baö adoyonque pönī eñamö incæ mönö wii adodonque cæquïnö ante eñamö inte mönö eñacōo watai watai nanguī eñamompä. ¹⁵ İninque mönö önöwa incæ, “Önompö ömæpobo inte botö waocä baö ömaabo imopa,” ante ædö cæte anguingä. İñæmpä mänömaī wæte tedecä incæ önöwa

cöwë waocä baö eñate ewacampa. ¹⁶ Ayæ mönö önömonca incæ, “Aw-
inca ömæmömo inte botö waocä baö ömaabo imopa,” ante ædö cæte anguingä. İñæmpä mänömaī ante tedecä incæ önömonca cöwë waocä baö eñate emoncacampa. ¹⁷ İñæmpä mönö baö tömäñö awincaque emömö bai edæ quimoncadö eñenguënëi. Eñenāmaī incædömöimpa. Ayæ mönö baö tömäñö önömoncaque emoncāmö bai quincadodö ongoncadoquënëi.

¹⁸ Incæte Wængonguī iñömö edæ, Waomīni mini cæquënönö ante eyepæ cæcæminimpa, ante badoncæboimpa, ante Wængonguī angacäimpa. İninque tömengä nāmä nänö angainö bai badöninque mönö pæ pagænguincōo adoyonque baquinque ante wadö cæquïnö ante wadö cæquïnö ante tömäñö badongacäimpa. ¹⁹ Edæ adodonque pönī mönö cæquënönö ante Wængonguī badongä bai mönö wadö mönö cæquënönö ante quiodö pæ pagænte cæquënëi. ²⁰ Wængonguī nänö nē badongaīmö inömö inte wadö mönö cæquïnö ante watai wadö mönö cæquïnö ante watai nanguī mönö eñacōo eñamö incæ mönö baö adoyonque pönī eñamompä.

²¹ Mänömaī eñamö iñömönte edæ mönö awinca incæ önompö inte apænedinque, “Bitö dæ ämi bai botö tömëmo eyepæ cæcædömoimpa,” ante ædö cæte anguii. Ayæ wæætē mönö ocamö incæ önöwa inte apænedinque, “Bitö dæ ämi bai botö tömëmo eyepæ cæcædömoimpa,” ante ædö cæte anguii. ²² Wæætē mönö baö pancayonga pæ pagænāmaī i incæte mäniñö ante mönö godömenque waa adinque, Mönö quëwënguñö impä, ante angæimpa. ²³ Wayö guiquenē, Wii waëmongä awædö, ante mönö äñö ante, Waa acædänimpa, ante cædinque waëmoncōo pönö dadi ompogate mäniñö beyæ godömenque waa ate bai cæmompä. Wayö guiquenē mönö guñëñate wædö ante, Wii edonque acæimpa, ante pönö bee ogate cædinque mönö guñëñayö beyæ godömenque waa

cæmompā. ²⁴ Waēmō mōnō ayō guiquēnē, Edonque acæimpa, ante bee ogadāmaī cæmompā.

Incæte, Adoyonque bacæimpa, ante mōnō baō wayō wayō badōninque Wængonguī, Wīī waēmōngā, ante mōnō wæyō ante pōnēninque, Māniñō botō godōmenque waa abopa, ante badongacāimpa. ²⁵ Īninque,

Mīnitō baoncoo nāēmæ pīināmaī incæmīninpa, ante cædinque Wængonguī mōnō baō adoyonque badongacāimpa. Wæætē mīnitō nāmā baoncoo incæ nāēmæ waadete waa cæcæmīninpa, āninque Wængonguī tōmāñō waa acampa. ²⁶ Īninque

mōnō baō adoyōmonque nantate wæyōmō tōmāo wootæ wootæ nantate wæmompā. Ayæ wæætē adoyōmonque adinque, Waēmō impa, ānāni ēñente wædinque tōmāo watapæ tomompā.

²⁷ Mīnitō ĩñōmō, Wayō wayō ēñamō incæ adoyonque ēñamompā, ante do pōnēninque, Mōnō adobaī nānēnē nānēnē ingāimō inte ñōwo wæætē Codito nempo quēwēninque adocabomō ĩmompā, ante pōnencæmīninpa.

²⁸ Īninque Codito ingante godongāmæ mōnō pōnencabo ĩmō adinque Wængonguī angā ēñēninque ĩmaī cæmompā. Yæcadomōni ĩmōni ĩñōmō Codito nānō da godongaīmōni ĩmōnipa. Gao wæi ĩnāni ĩñōmō Wængonguī beyæ nē apænedāni ĩnānipa. Ayæ tæcæguedēnāni ĩnāni ĩñōmō nē odōmonte apænedāni ĩnānipa. Wæænōmenque ĩnāni ĩñōmō tæi pīñænte entawente nē nangui cædāni ĩnānipa. Yæmīñæ gao æidinque ĩnāni ĩñōmō Wængonguī Ōnōwoca tōnō āawocaque baī ēwocadinque ĩmaī cædānipa. Pancadāniya, Wēnæ wēnæ ĩnāni waa bacædānimpa, ante nē waa cædāni ĩnānipa. Pancadāniya wadāni beyæ nē waa cædāni ĩnānipa. Pancadāniya nē ānāni ĩnōnāni inte awēnēidi ĩnānipa. Ayæ yæmīñæ pōni ĩnāni ĩñōmō wadāni nāni tede baī nē tededāni ĩnānipa.

²⁹ Mānōmaī ĩmō incæte edæ Codito nānō nē da godongāimō dicæ tōmāmō

ĩmongaa. Ayæ Wængonguī beyæ nē apæneimō dicæ tōmāmō ĩmongaa. Nē odōmōnōmō dicæ tōmāmō ĩmongaa. Nē tæi pīñænte entawente nangui cædōmō dicæ tōmāmō ĩmongaa.

³⁰ Ayæ Wængonguī Awēnē pōnō cæcā incæte wēnæ wēnæ ĩnāni nāni waa baquinque ante dicæ tōmāmō nē waa cæmongaa. Edæ wadāni nāni tede baī dicæ tōmāmō tedemongaa. Wacā mānōmaī wadāni nāni tede baī tedecā ēñēninque tōmāmō dicæ mōnō tededō adodō edonque apænemongaa. ³¹ Incæte mīnitō

Wængonguī ingante, Bitō Ōnōwoca pōnō cæcā ate mōnitō eyepæ inte ate yæcado ongōnāni nāni cæi baī adobaī cæcæte ante nangui wæmōnipa, ante apænedinque nangui cæedāni.

Mōnō waadete pōnente cæcæimpa, ante

Ñōwo ĩñōmō botō, Æbānō godōmenque waa pōni cæquī, ante yewæmonte odōmōmo aedāni.

13

¹ Botō waodāni nāni tede baī tedebopa, āmīnitawo. Wængonguī anquedoidi nāni tede baī tedebopa, ante tomīnitawo. ĩñæmpa mōnō wadāni ĩnānite waadedāmaī inte tedemō ĩninque ampoincade ōnonque ampoi baī ĩmāimpa. Waadedāmaī inte tedemō ĩninque adoyōmō pōnō wo pōnō wo pōnō wæcainta baī mōnō adobaī ōnonque tedewēmō ĩmaimompā.

² Wængonguī Ōnōwoca pōnongā æninque botō tōmengā beyæ nē apænebo ĩmopa, ante tomīnitawo. Waodāni nāni wē wodonte ēñengainō tōmānō ante edonque pōni ate ēñēmopa, ante tomīnitawo. Waodāni nāni nangui ēñēnō ante adinque tōmānō ante ēñēmopa, ante tomīnitawo. Edæ nē wede pōnēmīni inte mīnitō ānanquidi incæ āmīni ēñente cabænte gotawo. ĩñæmpa mānīnō tōmānō waa pōni cæmō incæ mōnō wadāni ĩnānite waadedāmaī inte cæmō ĩninque wæætē ōnōmonque edæ mōnō babāimpa.

³ Ömæpodäni inänite botö mäincoo tömää nēnempote godömopa, ante tomīnitawo. Wængonguī beyæ ante cæyömote wadäni botö baö botö eñayö incæ iya tancæ cædäni ate wædinque botö piyænē cæbaīmopa, ante mīnitö, Waa cæbopa, ante tomīnitawo. Iñæmpa mänīi tömää waa cædinque mönö waadedämaī inte cæmō inique mönö waa cædö beyæ ænāmaī imāimompa.

⁴ Nē waadete pönengä iñömö tömengä piināmaī inte edæ piyænē cædinque godö waadete cæcampa. Wadäni gomonga cædinque godömenque nanguī ænäni adinque nē waadecä wæætē waadete pönēninque piinte wædāmaī inte piyænē cæcampa. Nämä nänö cædinö ante pönēninque nē waadete pönengä iñömö, Botö gomonga cæbopa, ante tededāmaī ingampa. Tömēmoque waemö imopa, ante nämä waa adāmaī ingampa. ⁵ Wacä tæcæ cæyongante nē waadete pönengä iñömö, Tāno cæbote, ante wææ cædāmaī ingampa. Nämä nänö æinēnō ante cædāmaī inte tömengä wadäni beyænque cæcampa. Wæætē wīiñontobæ ænguī bacampa. Wadäni wænæ wænæ cædäni ate wædinque tömengä nē waadecä inongä inte wæætē piyænē cæcampa.

⁶ Iñique, Wacä wænæ wænæ cæcampa, ante tededäni eñente wædinque nē waadete pönengä iñömö mäninö ante todāmaī ingampa. Wæætē, Wacä nöingä cæcampa, ante tededäni eñēninque tömengä watapæ pönī tocampa. ⁷ Æbämē cædäni incæ nē waadete pönengä iñömö piyænē cædinque tömänäni inänite wææ gom-pocampa. Wæætē, Waa cædānīpa, änäni eñēninque tömengä, Nāwangä impa, ante do eñengampa. Æbämē ba incæte tömengä, Ayæ ate watapæ bacæimpa, ante cōwē pönēninque wæntædāmaī inte ee cæcampa.

⁸ Mönö waadete pönēmāmo iñömö cōwē dæ badāmaī ingæimpa. Wæætē Wængonguī iincayæ ate, Idæwaa, angä inique inguipoga tömengä beyæ

mönö apænedö guiquēnē edæ dæ angæimpa. Wadäni nāni tede bai mönö tededö incæ pæ wēenecæimpa. Inguipoga nanguī adinque mönö eñēnō ante Wængonguī, Idæwaa, ancæcæimpa. ⁹ Nöwo mönö eñēnō iñömö pancaa eñēninque pancaa wæætē oda cæmompā. Wængonguī beyæ mönö apænedö iñömö pancaa apænedinque mäninque apænemompa. ¹⁰ Iñique bayedē guiquēnē Wængonguī nänö apænedö ædæmō eñēninque mönö nöingä pönī odömōnte apæneccæmōimpa. Oda cæte mönö eñēnō ante, Idæwaa, äninque Wængonguī mänīñedē edæ mönö wīi eyepæ apænete wædö ante, Idæwaa, ancæcæimpa.

¹¹ Botö iñömö wēñæmoyedē wēñængä nänö tede bai tededinque wēñængä nänö ocāi eñēnō bai eñengaīmo inte wēñængä, Imaī impa, ante nänö pönēnō bai botö mänīñedē adobāi pönengaboimpa. Nöwo guiquēnē picæmo badinque wēñæmoyedē botö cægāinö ante ñimpo cæbopa. ¹² Awocawænta wēmō ate bai cædinque mönö ñöwo Wængonguī Önöwoca nänö odömönö ante edæ wīi edonque amompa. Ayæ ate guiquēnē mönö awincadö awinca edonque pönī acæimpa. Botö ñöwo pancaa adinque oda cæte eñēmo imopa. Ayæ ate guiquēnē Wængonguī pönö odömōngä adinque tömengä botö imote edonque pönī acā bai botö adobāi tömää eyepæ pönī acæboimpa.

¹³ Iñique mönö entawēnoncoo ante adinque mēnonque go adodonque mänimpodonque ayæ ongompa. Mönö wede pönēnō ante ædæmō entawengæimpa. Watapæ bacæimpa, ante mönö pönēnō ante ædæmō entawengæimpa. Mönö waadete pönēnō ante ædæmō entawengæimpa. Iñique mänimpodonque ayæ ongö incæte mönö waadete pönēnō iñömö edæ ñænænō pönī i inique mönö mäninö ante tāno ædæmō entawengæimpa.

14

*Wadāni nāni tede bai æbānō tede-
quī, ante*

¹ Īninqe mīnitō, Nē waadete pōnēmō bacæimpa, ante mānīnonque ante pogodo gote bai nanguī cæedāni. Ayæ adobai, Wængonguī Ōnōwoca mōnō ĩmonte nānō pōnōnō bai mōnō eyepæ ewocadinque cæcæimpa, ante nanguī æinente wæedāni. Mānīnō Wængonguī

Ōnōwoca nānō pōnōnoncoo ate adinque mīnitō, Wængonguī beyæ nē apænemō mōnō tāno adodonque ante bacæimpa, ante godōmenque æinente wædinque cæedāni. ² Edæ wadāni nāni tede bai æcānō tededā tōmengā wīi waodāni ĩnānite apænecampa. Wængonguinque

ingante apænecampa. Edæ tōmengā ōnōwocaque tedecā ĩninqe tōmengā ingante Wængonguī æbānō awēmō apænecāā, ante ædō cæte eñenguīnāni. ³ Wængonguī beyæ

nē apænecā guiquēnē waodāni ĩnānite waadete pōnēninque ĩmaī cæcæte ante apænecā eñēnānīpa. Mīnitō tæī piñæmīni mīni entawenguinque wede pōnencæmīnīpa, ante apænecampa. Ayæ, Wæwente quēwēmīni incæ mīnitō wampo bawēnente tæī piñænte cōwē cæcæmīnīpa, ante tōmengā Wængonguī

beyæ ante pōnō apænecampa. ⁴ Wadāni nāni tede bai nē tedecā guiquēnē, Tōmēmo tæī piñæmo botō entawenguinque ante nanguī eñencæboimpa, ante nāmā beyænque ante tedecampa. Wængonguī beyæ nē apænecā guiquēnē Codito ingante nāni godongāmæ pōnencabo beyæ ante apænedinque, Mīnitō tæī piñænte mīni entawenguinque eñencæmīnīpa, ante apænecampa.

⁵ Īninqe mīnitō tōmāmīni wadāni nāni tede bai apænemīni adinque botō wædænque tobaīmopa. Wæætē tōmāmīni Wængonguī beyæ apænemīni adinque botō godōmenque watapæ tobaīmopa. Wængonguī beyæ nē apænecā

ĩñōmō ñænængā ĩñongā wacā tededō nē tedecā guiquēnē wædangā ingampa. Incæte, Codito ingante mīni godongāmæ pōnencabo tæī piñænte entawencæmīnīpa, ante cædinque tōmengā wacā tededō tedete ate, ĩmaī ante tedetabopa, ante mīnitō tededō adodō ante edonque apænecā ĩninqe tōmengā adobai ñænængā ĩnongā ĩmaingampa. ⁶ ĩñānāni eñēedāni. Wængonguī nānō wē wodōnō incæ tōmengā nānō nō eñēnō incæ tōmengā nānō nō odōmōnō incæ ante botō mīnitō weca pōninque odōmonte apænebo eñēninque mīnitō godōmenque pōnēmaimīnīpa. Wængonguī ĩmaī cæcæcāimpa, ante apænebo eñēninque mīnitō guīñente wædinque waa cæbaimīnīpa. Wæætē mīnitō weca pōninque botō wadāni nāni tedebai tedete apænebo bai mīnitō ædō cæte godōmenque nē pōnēmīni baquēnēmīni.

⁷ Edæ gobæ ongonte aa pedinque ōnonque ante pedāni eñēninque mōnō wæætē, Ædemē ante pedānīpa, ante ædō cæte eñenguī. Nē ampoinca ampodāni adobai āmotamīni ĩnāmaī ōnonquedō ante ampodāni eñēninque mōnō, Ædemē ante ampodānīpa, ante ædō cæte eñenguī. ⁸ Ayæ tontado adobai, Wæætēdō wæætē cæcæimpa, ante todompeta nāni

ancadeca we ōninque idiquibæ we ōngā ĩninqe wadāni, Æbāmē cæcæte ante we ōngāā, ante wædinque oda cæte ee ongonte wæætēdō wæætē cædāmaī ĩmaīnānīpa. ⁹ Ayæ mīni cabo adobai wīi edonque apænemīni eñēninque wadāni, Æbāmē ante tedecāā, ante wædinque oda cæte wæbainānīpa. Woboyæ māmōque ĩñæmpa tedewēmaimīnīpa.

¹⁰ Waodāni inguipoga tōmāo quēwēninque nanguī nāni tededoncoo tededānīpa. Nāwangā ĩmpa. Incæte wadāni nāni tededō wadāni nāni tededō tōmāā tedequīnō ĩ ĩninqe adodeque incæ ōnonque tedete ĩnāmaī ĩmpa. ¹¹ Īninqe wacā

apænecā eñēninque botō, Æbānō ante tedecāā, ante eñēnāmaī ĩmo

adinque tōmengā wæætē, Wabi inte wīi ēñēmipa, ancædongāimpa. Tōmengā ingante botō adobaī, Wabi inte botō tededō wīi tede bipa, ante ancædōmoimpa. ¹² Īninqe mīnitō, Wængonguī Ōnōwoca pōnō cæcā æninqe mōnō eyepæ ēwocadinque cæcæimpa, āmīnitawo. Mānōmainō āninqe mīnitō, Wængonguī Ōnōwoca pōnō cæcā ænte ēwocadinque cædōmō inte mōnō Codito ingante mōnō godongāmæ pōnencabo godōmenque tæī piñænte entawengæimpa, ante pōnēninqe mīnitō, Mānīnonque ante botō ēwocate cæquīnō ante pōnongā æncæboimpa, ante tāno æīnente cæedāni.

¹³ Mānōmaī beyæ wadāni nāni tede baī nē tedemīni īñōmō mīnitō tōniñadāni adobaī ēñencædānimpa, ante cædinque Wængonguī ingante īmaī ante æedāni. Wængonguī ēñēmi. Wadāni nāni tede baī do tededinqe botō æbānō ante tedetawoo, ante bitō odōmonte apænebi ēñēmoe. Mānōmainō ante apænebi ēñēninqe botō wæætē mōnitō tededō adodō ante edonque apænebo ēñēninqe mīnitō Wængonguī ingante apænete cæedāni. ¹⁴ Wadāni nāni tede baī tededinqe Wængonguī ingante apænebo inte botō ōnōwocaque pōnente apænedinqe ocai ōmædæcabo baī inte apænebaīmopa.

¹⁵ Mānōmaī impa, ante adinque æbānō cæquīmoo. Edæ ōnōwoca pōnente apænedinqe botō ocai adobaī ēñente pōnēninqe Wængonguī ingante apænecæboimpa. Ayæ Wængonguī ingante waa pōnī apænecæte ante ōnōwoca pōnente āmotamīni āninqe adobaī ocai ēñente pōnēninqe āmotamīni ancæboimpa. ¹⁶ Bitō, Wængonguī ingante waa pōnī cæcampa, ante ōnōwocaque pōnēninqe apænebitawoo. Īñæmpa Wængonguī ingante waa ate pōnēninqe ōnōwocaque pōnente apænebi ēñēninqe wacā nē ōnonganque ingā guiquēnē, Bitō æbānō apænebī, ante ēñēnāmaī inte, Ædō cæte Ao anguīmoo, ante

wæbaingampa. ¹⁷ Bitō waa ate pōnēninqe ōnōwocaque waa apænebi ēñēninqe tōmengā wæætē, Bitō æbānō ancæte ante tede bī, ante ēñēnāmaī inte ædō cæte godōmenque tæī piñænte entawengūngā. ¹⁸ Botō īñōmō, Mīnitō wadāni nāni tede baī wædænque tede yōmīni botō godōmenque nangūi tede bopa, ante Wængonguī ingante waa ate pōnēninqe apænebopa. ¹⁹ Incæte Codito ingante mōnō pōnencabo tōnō godongāmæ pōninqe botō wadāni nāni tede baī tæne tīnco mīido ganca tede quī incæ wīi tededinqe wæætē, Wadāni ēñencædānimpa, ante mēnea pōnī edonque apænedinqe waa tobaīmopa.

²⁰ Īñānāni ēñēedāni. Tæcæ ēñadāni īñōmō wænæ wænæ mōnō cæpāmo ante ēñēnāmaī inānīpa. Mīnitō adobaī mānīnō wænæ wænæ mōnō cæpāmo ante ēñēnāmaī inte baī pōnēedāni. Wæætē ocai mōnō pōnēnō guiquēnē mīnitō mānīnō ante wēñænānīque wædænque nāni encadō baī wīi pōnēninqe wæætē picænāni nāni nangūi encadō baī adobaī nangūi encate pōnēedāni. ²¹ Dodāni mōnō Awēnē beyæ ante wææ āninqe īmaī ante yewæmongadānimpa. “Wadāni nāni tede baī nē tededāni inānite botō āmo ēñēninqe tōmēnāni wæætē botō quīnāni inānite apænecædānimpa. Incæte īnāni guiquēnē botō īmote cōwē ēñēnāmaī inguīnāni awædō, ante mōnō Awēnē angampa,” ante yewæmongatimpa.

²² Īninqe, Wadāni nāni tede baī tedemīni ēñēninqe nē pōnēnāni wædāmaī īñōnāni nē pōnēnāmaī ināni guiquēnē mānōmaī tedemīni ēñēninqe guīñente wæcædānimpa, ante cædinque Wængonguī Ōnōwoca pōnō cægacāimpa. Wæætē Wængonguī beyæ ante edonque apænemīni ēñēninqe nē pōnēnāmaī ināni wædāmaī īñōnāni nē pōnēnāni guiquēnē do ēñencædānimpa, ante cædinque Wængonguī Ōnōwoca pōnō cægacāimpa. ²³ Codito ingante mīni pōnencabo godongāmæ

pöninge tömämīni wadāni nāni tede bai wadāni nāni tede bai tedemīni adinque ayæ pönāni guiquēnē nē ēñēnāmaī ināni incæ nē pönēnāmaī ināni incæ æbānō anguinānii. Mänōmaīnonque tedemīni ēñēninque tömēnāni wæætē, Mīnitō ōmædæcamīni inte ōnonque tedewēmīnipa ante wæbainānipa.

²⁴ Tömämīni wæætē Wængonguī beyæ edonque apæneyōmīni nē pönēnāmaī ingā incæ nē ēñēnāmaī ingā incæ ponte ēñēninque tömämīni mīni apænedō beyæ tömengä, Botō wēnæ wēnæ cætabopa, ante wæbaingampa. Ayæ Wængonguī beyæ ämīni ēñente wædinque tömengä, Botō nāwangä wēnæ wēnæ cædōmo inte wentamō mongænte awædō, ante nāmā apænte ämaingampa. ²⁵ Ayæ tömengä mīmōno nānō wentamō wē wodōnincoo da tadonte ate bai edonque ate wædinque tömengä ædæ wæænte guidōmēmæ ñongæninque Wængonguī ingante, Bitō adobique nē waa cæbi imipa, ante waa apænebaingampa. Ayæ mīnitō imīnite, Nāwangä Wængonguī Ōnōwoca tōnō äawocaque bai ewocamīnipa, ante apænebaingampa.

Quiēmē cæmīni incæ nōingä pönente ædæmō cædāni

²⁶ Mänōmaī i ininque iñānāni, mōnō æbānō cæquīi. Wængonguī Ōnōwoca pōnō cæcä æninque eyepæ inte mīnitō tömämīni godongāmæ pöninge iīmaī cæmīni incæmīnimpa. Adocanque ämotamīni adodeque angä ingampa. Wacä odōmoncæte ante adodeque apænecä ingampa. Wacä ingante Wængonguī edonque odōmonte apænecä ēñēningä inte tömengä adodō ante adodeque ante odōmonte apænecä ingampa. Wacä guiquēnē wadāni nāni tede bai adodeque tedecä ingampa. Tömengä æbānō ante tedecä, ante wacä do ēñēninque mīnitō tededō wæætē edonque apænecä ingampa. Mänōmaī wade wade ante nē apænemīni inte mīnitō tömämīni, Godongāmæ tæi piñænte

entawengæimpa, ante iīmaī cæte tedecæmīnimpa. ²⁷ Wadāni nāni tede bai tedeyongä wacä adot-edæ wææ tededāmaī incæcäimpa. Mäningä iinque tedecä ate wacä tedecæcäimpa. Ayæ wæætē wacä, Tedecæboimpa, angä Ao ämīni tedecä ate idæwaa. Mänimpodānique tedete ñine cædāni adinque wacä ēñēninque, Æbānō ante tededānii, ante mīnitō tededō edonque apænecä ēñencæmīnimpa. ²⁸ Codito ingante mīni pönencabo weca nē ēñente adodō apænequēnengä dæ angä ininque edæ wadāni nāni tede bai nē tedeinente wæcä iñōmō wæætē ee adinque tededāmaī inte pæ wēnecæcäimpa. Tömengä nāmā incæ ōnōwēnenque tedete Wængonguī ingante tedecæcäimpa.

²⁹ Wængonguī beyæ nē apænedāni adobai mengäa pōni apænedāni ate idæwaa. Mänimpodānique apænedāni ēñēninque mīnitō, Nō ante apænedānii, idiquibæ ante apænedānii, ante apænte ante ēñencæmīnimpa. ³⁰ Ayæ adocanque tæcæ apænee gōñongä wacä nē ēñēe congä ingante Wængonguī Ōnōwoca iñontobæ apænecä ēñēninque tömengä, Botō apænecæboimpa, angä ēñēninque nē apænedingä wæætē apocænē edæ äamonca ēñēe concæcäimpa. ³¹ Edæ Wængonguī beyæ apænedinque adocanque tāno apænete ñine cæcä ate wæætē wacä wæætē wacä apænete ñine cæcæcäimpa. Mänōmaī cædinque mīnitō godongāmæ ēñente badinque wampo bawēnente ongoncæmīnimpa. ³² Wængonguī beyæ nē apænedāni iñōmō tömēnāni nāmā ōnōwoca wææ äninque ōnōwēnenque wædāmaī inte ocai pönente apænedānipa. ³³ Edæ Wængonguī incæ nē gänē pönēnongä inte Yæ yæ wapiticæ godō tededāmaī ingampa cæmīnii.

Wængonguī quīnāni Codito ingante nāni pönencabo tömānāni wayōmō nāni cabo wayōmō nāni cabo godongāmæ pöninge nāni cæi bai cædinque, ³⁴ mīnitō adobai

Codito ingante mini pönencabo godongämæ pöñömini onquiyænäni inänite ämini tededämaï incädänimpa. Edæ, Apocænë eñëmæwedäni, ante Möitee wodi nänö wææ angai bai cædinque onquiyænäni wæætedö wæætë änämaï inte onguïñænäni nani änonque eñëninque edæ eñëe concädänimpa. ³⁵ Æbänö ante apænedäni, ante eñencæte ante wædinque onquiyængä oncönë gote ate angä eñëninque tömengä nänöogængä wæætë adodö apænecä eñencæcäimpa. Edæ Codito ingante mini pönencabo godongämæ pöñömini onquiyængä iñömö, Guïñënete awædö, äninque ee tededämaï incæcäimpa.

³⁶ Iñæmpa, Wængonguï nänö angainö ante minitö adomînique dicæ mä pönëninque odömöminitawogaa. Wadäni eñënämaï iñönänite minitö dicæ adomînique Wængonguï nänö apænedö ante eñëmînitawogaa. ³⁷ Bitö, Wængonguï beyæ në apænebo imopa, ämitawo. Wængonguï Önöwoca pönö cæcä æninque botö eyepæ ewocadinque në nanguï cæbo imopa, ämitawo. Mänömaï ewocabi inte do eñëmi ininque bitö, Mönö Awënë nänö wææ angainö ante Pabodo mäninonque ante yewæmongampa, ante, Näwangä impa, ante apænebaïmipa. ³⁸ Wæætë mäninö ante æcänö eñënämaï ina tömengä ingante wæætë mönö eñënämaï ingæimpa.

³⁹ Iñänäni, Mänömaï impa, ante pönëninque minitö, Wængonguï beyæ apænecæimpa, ante cæcæte ante cöwë nanguï cæedäni. Ayæ, Pancadäniya wadäni nani tede bai apænedänipa, ante adinque minitö Baa änämaï iedäni. ⁴⁰ Incæte quiëmë cæmini incæ mini pönencabo mini godongämæ watapæ quëwenguinque ante nöingä pönente ædæmö cæedäni.

15

Codito ñäni ömæmongacäimpa, ante

¹ Nöwo botö tönïñamini eñëedäni. Codito ingantedö ante botö do watapæ apænebo eñëninque minitö mänineque ante Ao ante wede pönëninque edæ tæi ongömînitapa. Nöwo guiquënë minitö, Mänine ante æbänö intawoo, ante oda cädämaï incæminimpa, ante botö adodö ante ædæmö odömönte yewæmömoï aedäni. ² Mänine ante watapæ apænebo eñëninque edæ minitö adode ante wede pönëninque tæi ongömîni inte edæ mänine beyænque quëwëmaïmînipa. Wæætë mänine botö watapæ apænedö ante æmæ pönëmîni ininque mini pönënimämo incæ önömämoque pöni babaimpa.

³ Edæ mönö Codito tömengä nänö pönö cægäinö ante botö eñënö ante botö doyedë, Mänine ante mönö täno pönengæimpa, ante pönö apænebo eñëmînitapa. Nöwo wæætë, Eñencæminimpa, ante botö adode ante yewæmömo acæminimpa. Wængonguï angä eñente nani yewæmongainö bai iinque cædinque mönö Codito iñömö wënæ wënæ mönö cægäinö ante teëmë mongænte wæætë wængacäimpa, ante impa.

⁴ Ayæ, Wængä ate tömengä baö ini ö ænte mäo daga wengadänimpa. Ayæ Wængonguï angä eñente nani yewæmongainö bai cædinque Codito mëönaa go adoönæque iñonte do ñäni ömæmonte miingä quëwængacäimpa, ante mänine ante impa. ⁵ Ayæ ñäni ömæmonte quëwëngä inte tömengä dobæ Pegodo weca ponte a ongongä acantapa. Ayæ ate tömengä nänö në emiñængainäni, Dote, nani änonäni weca dobæ ponte a ongongä adänitapa. ⁶ Ayæ ate mönö tönïñadäni quïniento ganca ayæ godömenque nanguï inäni godongämæ ongöñönäni tömengä tömënäni weca do ponte edæ a ongongä adotedæ agadänimpa. Iñäni iñömö pancadäniya ñöwo do wængadänimpa. Pancadäniya nanguï inäni në agäinäni incæ ayæ müinäni quëwënanipa. ⁷ Mäninäni adäni ate Itota wæætë Tantiago weca a ongongä agacäimpa. Ayæ ate tömengä

nänö nē da godongaināni weca adocā Itota ponte a ongongā agadānimpa. Itota mänōmaī cægacāimpa, ante botō, Mänine tāno pönengāimpa, ante yewæmōmopa.

⁸ Botō guiquēnē nē wæmpodingā bai inte wæyōmote tōmengā ñōwo pōni botō weca a ongongā atabopa.

⁹ Edæ Codito tōmengā nänö nē da godongaīmo imo incæ botō wadāni tōmengā nänö nē da godongaināni bai wīi adobai imopa. Edæ Itota ingante godongāmæ nāni pōnencabo inānite nē togænte pangāimo inte botō wædāmo pōni imopa.

¹⁰ Edæ æbāmē imo incæte Wængonguī waadete pōnō cæcā beyænque botō mänōmaī imopa. Edæ tōmengā nänö pōnō cædō ante botō wīi ōnonque cæcæte ante æmoimpa. Wæætē wadāni wædænque cæyōnāni tōmengā waadete pōnō cæcā æninqe botō godōmenque nanguī cætabopa. Incæte botō dicæ tōmēmoque adoboque cæbogaa. Wæætē Wængonguī nänö waadete pōnō cædō ænimo inte botō tōmengā tōnō cædinque nanguī cæbo imopa. ¹¹ Ininqe botō apænebo incæ tōmēnāni apænedāni incæ mōnō Codito tōmengā nänö pōnō cægānonque ante tōmāmōni apænemōnipa. Mänineque ante apænemōni eñēninqe mīnitō mänineque ante pōnēmīnitapa.

Do wængaināni incæ ñāni òmæmoncædānimpa, ante

¹² Ininqe, Codito do ñāni òmæmongacāimpa, ante apænemōni eñēmīni incæte pancamīniya, Nē wængaināni dicæ ñāni òmæmōnāniyaa, ante ædō cæte ænewēmīni. ¹³ Inæmpa, Cōwē ñāni òmæmōnāmaī ināni bai mōnō Codito incæ adobai ñāni òmæmōnāmaī incædongāimpa. ¹⁴ Ayæ Codito ñāni òmæmōnāmaī ingā bai tōmengā waa pōni nänö pōnō cægāinō ante quīnante apænequēnēmōnii. Edæ ōnonque pōni bacædōnimpa. Ayæ ōnonquedō ante apænemōni bai mīnitō mänine ante pōnēmīni incæ ædō cæte quēwenguēnēmīni. ¹⁵ Mōnitō godōmenque Wængonguī

ingante ante apænedinque, Codito ingante Wængonguī incæ angā ñāni òmæmongacāimpa, ante apænetamōnipa. Ininqe, Nē wængaināni cōwē ñāni òmæmōnāmaī inānipa, ante mīni ænewēnō inōmō nāwangā i bai mōnitō Wængonguī nänö cægāinō ante babæ wapiticæ ante edæ apænecædōmōnimpa. Edæ, Cōwē ñāni òmæmōnāmaī inānipa, ante mīni ænewēnō nāwangā i bai Wængonguī, Ñāni òmæmōe, ante ædō cæte anguēnengāā.

¹⁶ Inæmpa, Ñāni òmæmōnāmaī inānipa, ante mīni ænewēnō nāwangā i bai Codito incæ adobai ñāni òmæmōnāmaī incægacāimpa. ¹⁷ Ayæ Codito ñāni òmæmōnāmaī ingā bai mīnitō mīni wede pōnēnō incæ ōnonque pōni pōnente incædōnimpa. Ininqe wentamō mīni mongæñō ædō cæte ñā mēnongaquēnēmīni. Mīni wēnæ wēnæ cædinō beyæ wentamō mongænte wæcædōmīnimpa.

¹⁸ Mäninō ante mīni ænewēnō nāwangā i bai Codito nempo quēwēninqe do wængaināni incæ do mēmpoga wæninque ædō cæte quēwenguēnēnāni. Quēwēnāmaī incædōnānimpa. ¹⁹ Codito pōnō ængā beyænque mōnō adopoque wæninque wæætē wænāmaī quēwengæimpa, ante mōnō inguipogaque pōnēninqe wæmo bai wadāni wædænque wæwēñōnāni mōnō godōmenque nanguī wæwenguēnē incædōnimpa.

²⁰ Incæte Codito dobæ ñāni òmæmongacāi apa ænewēmīni. Edæ waodāni tānomō amīñayonte tā pedāni bai cædinque Wængonguī adobai, Do wængaināni inānite ämo ñāni òmæmoncædānimpa, ante cæcæte ante cædinque Codito Tānocā ingante do angā eñēninqe ñāni òmæmongacāimpa. Nāwangā impa, ante ämo eñēmāimīnipa.

²¹ Edæ waocā incæ adocanque eñēnāmaī cæcā beyænque mōnō wænguimāmo pongatimpa. Ayæ nē wænguēnēmō inte wæyōmonte Ñōwocā Waocā eñagāingā inte wæninque ñāni òmæmongā beyænque mōnō ñāni

ömæmonte quëwenguimämo adobai pongatimpa. ²² Edæ mæmæ Adäo wodi tömengä tönö tömämö godongämæ nê wænguënëmö bagaimö inte mönö tömämö adobai Codito tönö godongämæ nê ñäni ömæmonguimö bagamöimpa. ²³ Incæte to amiñayedë tänömö näni tä pedömö bai inongä inte mönö Codito adobai Tānocā inongä inte edæ tāno ñäni ömæmongacäimpa. Codito nempo nê quëwënömö guiquënë mönö ayæmö inömö inte edæ tömengä nänö ponguionæ iinque ba ate mönö mäniñedë ate nê ñäni ömæmonguimö imompa.

²⁴ Mäniñedë ate inguipoga awënë odeyedi nempo ongoncoo incæ Codito tömancoo ö ænte ömæe ewencæcäimpa. Nænænäni näni änömämo adobai tömämämo ömæe ewencæcäimpa. Tæi piñænäni näni nangui cædoncoo incæ Codito adocä incæ tömancoo wido cæcæcäimpa. Ayæ adocä nê Awënë Odeye inongä inte tömengä nempo ongoncoo wæætë edæ Mæmpo Wængongui nempo edæ pædæ godongä æninque Mæmpo Wængonguinque tömenganque adocanque Awënë Odeye inongä incæcäimpa. Mäniñedë ate edæ ñöwo mönö quëwëmämo iñömö edæ iinque baquinö anguënë. ²⁵ Incæte Wængongui Codito ingante, Bitö imite nê piinte cægäinäni tömänäni inänite mö gongæncæbiimpa, ante cædinque tömengä önöwa gäänë nänö wææntodonganca edæ adocä Codito incæ mäninö nänö iinque cæganca nê Awënë inongä ingampa.

²⁶ Ayæ tömengä ingante nê piinte cædäni inänite æmæwo bæ tacä adinque adoque pöni mönö wænguimämo incæ ayæ ongö adinque Wængongui, Mänimämo dæ bacæimpa, ante mäo ömæe ewencæcäimpa. ²⁷ Tömengä nempo Wængongui tömancoo pædæ godongä æninque tömengä nê Awënë bacæcäimpa, ante do yewæmongatimpado

godönongä inte ædö cæte, Nämä pædæ godömopa, anguingää, ante edonque acæimpa. ²⁸ Ayæ ate Wængongui Wengä incæ, Mæmpo Wængongui botö nempo tömancoo nê pædæ pönongä inte tömengä adocanque pöni Tæiyæ Awënë badinque tömenganque tömancoo enempocæcäimpa, ante cæcæcäimpa. Mänömaï cæte ate tömengä adobai Mæmpo Wængongui nempo quëwëninque Mæmpo nänö änonque ante eñente cæcæcäimpa.

²⁹ Pancadäniya edæ, Do wængäinäni beyænque cæmönipa, ante cædinque tömënäni beyæ æpænë guidänipa. Iinque, Ñäni ömæmönämaï ingæimpa, ante mïni änewënö näwangä i bai tömënäni æbänö cæquënänäni inänii. Edæ, Ñäni ömæmönämaï ingæimpa, ante näwangä i bai edæ tömënäni nê wængäinäni beyæ quinante æpænë guiquënänäni. ³⁰ Ayæ mïni änewënö näwangä i bai mönitö iñömö quinante möni wantæ iñö wantæ iñö wodo wænguinö ante wæquënëmönii. ³¹ Botö iimö iñö iimö iñö do wæwocabo inömo imopa, ante näwangä ämopa. Botö mönö Awënë Itota Codito nempo quëwëninque mïnitö iminite ante pönëninque watapæ tobopa, ante näwangä antawoo. Edæ botö töninamini iñöminite botö mäninö ante näwangä änimö inte, Wæwocabo imopa, ante adobai, Näwangä impa, ante ämo eñëmaimäni. ³² Waomö mönö æinënö æncæte ante botö epetoidi babæidi bai inäni tönö guëa wæætedö wæætë cæbo bai önonque cæte incædönimpa. Edæ, Do wængäinäni ñäni ömæmönämaï incædänimpa, ante näwangä i bai botö, “Iimö ate mönö æmæwo wænguinque ante cænte bete tocæimpa,” ante näni änewënö bai ante ee quëwencædömoimpa.

³³ Iñæmpa mänömainö ante tedewënäni eñëninque mïnitö wæætë oda cædämaï imæwedäni. Edæ yewæmöninque, “Wiwa cædäni tönö guëa cædinque bitö adobai wapiticæ quëwëninque godongämæ

cæbipa.” ³⁴ Ante wææ änäni eñeedäni. Edæ, mīnitō wēnæ wēnæ cæmīni adinque Wængonguī ingante ante eñēnāmaī ināni iñōmō oda cæbainānipa. Mānōmaī beyæ mīnitō guingo imonte wæquēnēmīni inōmīni inte nō cæte quēwēnīnque edæ wēnæ wēnæ cædāmaī iedāni.

Do wængaināni iūmaī ñāni ōmæmoncæ ante

³⁵ Bitō, Do wængaināni æbānō cæte ñāni ōmæmonguīnāni, ante āmitawo. Ayæ, Ñāni ōmæmōnīnque mōnō baō quīnō baī eñate ponguīmōō, ante eñencæte ante wæbitawo. ³⁶ Iñæmpa ōnonquedō ante wæbi awædō. Edæ waocā tōmēmō quiyacā ate yabæque ñōmāate ate tā bocate pædīmō baī mōnō baō adobaī inte ñōmængæimpa. ³⁷ Iñæmpa todigo incæ wawæ incæ bitō, Tā bocate pæcæimpa, ante cædinque do pædiwæ tōmēwæ ænāmaī inte tōmēmonque ænte godō quiyabi ate tā bocate pæpa. ³⁸ Incæte, Tōmēwæ æbānō iwæ pæquīwæ, ante nāmā nānō angainō baī cædinque Wængonguīnque pōnō badongā ate tā bocate pæpa. Wamō tā bocate pædinque æbānō incaquīi, wamō æbānō incaquīi, ante do eñengaingā inte Wængonguī pōnō badongā ate wainca wainca incapa.

³⁹ Tōmāñō baō wīi adoyō baī eñompa. Mōnō waomō baō wayō eñamompa. Ööingāidi baō wayō eñadānipa. Ayamōidi baō wayō eñadānipa. Gæyæidi baō wayō eñadānipa. ⁴⁰ Ayæ ōönædē quēwēnāni wayō mongæñōnāni inguipoga quēwēmō iñōmō wayō eñamompa. Iñinque ōönædē quēwēnāni waa nāni eñadō wayō iñonte inguipoga quēwēmō waa pōni mōnō eñayō guiquēnē wīi adobaī eñamō imompa.

⁴¹ Woyowotæ apāicā iñōmō itædē nænque nānō apāi baī wīi apāicampa. Pōnōmenque pōni apāicampa. Nēmōidi guiquēnē wadō baī apāidānipa. Edæ nēmōidi incæ pancadāniya ñāmōināni inte wædænque apāiyōnāni pancadāniya waa pōni emōnāni inte guinæ nanguī apāidānipa.

⁴² Mānīi quiyadīmō yabæque ñōmāate ate tā bocate pædīmō baī mōnō adopoque wæmō ate mōnō baō adobaī aquīñō inte ñōmæmpa. Wæætē iñcayæ ate mōnō baō ñōmāadāmaī inguīnque wæætē ñāni ōmæmonguīmō imōimpa.

⁴³ Ayæ mōnō guīñēñate wægaiñō wido, cæte ate mōnō waa pōni eñaquīnque ñāni ōmæmongæimpa. Edæ mōnō aquīñō wido cædinque mōnō tæi piñæñō baaquinque ñāni ōmæmongæimpa. ⁴⁴ Edæ inguipogaque quēwēnīnque mōnō eñayō wido cæte ate mōnō ōönædē pōniwoca eñate ewocadinque mōnō waiñō pōni eñate ñāni ōmæmongæimpa.

⁴⁵ “Adāo wodi tānocā inongā inte nē ewocacā badinque quēwengacāimpa,” ante yewæmongatimpa. Ayæ adobaī Adāo wodi baī Nōwocā mōnō Codito incæ nē ewocacā inte quēwēnīnque mōnō imote pōnongā ænīnque ewocate quēwēmompa. ⁴⁶ Inguipogaque nē quēwengā guiquēnē tāno pongacāimpa. Mempoga nē Quēwēnongā guiquēnē ñōwoque ayæ pōningā inte nē Quēwengā ingampa. ⁴⁷ Tānocā ingante badoncæte ante Wængonguī onguipoi guīdīmōi ænīnque badongacāimpa. Nōwocā guiquēnē ōönædē quēwengaingā inte pongacāimpa. ⁴⁸ Inguipogaque ante quēwēnāni guiquēnē inguipoga tāno quēwengaingā baī adobaī inānipa. Ōönædē mōnō goquincabo guiquēnē ōönædē quēwente Pongaingā baī adobaī imompa.

⁴⁹ Inguipogaque quēwengā nānō eñayō baī mōnō adobaī ñōwo eñamompa. Iñcayæ ate guiquēnē ōönædē quēwente nē Pongaingā nānō eñayō baī mōnō adobaī eñaquīmō imompa.

⁵⁰ Botō tōniñamīni apænebo eñeedāni. Adopoque eñagaingā inte Wængonguī Awēnē Odeye nempo ædō cæte guīte quēwenguingā. Nē aquīñō ñōmænguīñō eñadongā incæ tōmengā mempoga eñadāmaī inte ædō cæte baō ñōmāadāmaī iñō eñaquingā.

51 Mönö waocabo wēēnēñedē mönō ēñēnāmaī ingainō ante botō tæcæ ēñēnimo inte ñowo edonque apænebo ēñēedāni.

Wīi tōmāmō wænguimō imompa. Incæte tōmāmō iñontobæ wayonque ēñaquimō imompa. 52 Edæ todompeta mönō ancadeca æmæwo pōni nanguī oōnāni ate mönō awinca adopoque bomō cæyōmonte iñontobæ bacæimpa. Edæ todompeta tæcæ we oōñōnāni do wængaināni incæ ñōmænāmaī nāni inguinque ñāni omæmoncædānimpa. Māniñedē edæ wayonque pōni mönō tōmāmō ēñacæmōimpa. 53 Edæ mönō baō mönō aquīi ñōmænguiñonque wido cæte ate mönō ñōmænāmaī inguiñonque ēñaquinque impa. Ayæ mönō aquīi wænguiñō ēwente ate waiñonque mönō wænāmaī inguiñō ēñacæimpa. 54 Mönō ñōmænguiñō ēñamō adinque Codito waiñō pōnongā ænte ēñadinque mönō baō ñōmænāmaī ingæimpa. Ayæ mönō wænguiñō ēñamō adinque tōmengā mönō wænāmaī inguiñō ante waiñō pōni pōnongā ēñacæimpa. Mänōmaī cæcā ate dodāni nāni yewæmonte angainō tōmāā iinque cæte ingæimpa. Edæ iūmaī ante yewæmongadānimpa. “Mönō Codito nē tæi piñænongā inte mönō wænguimāmo godō omæe ewēninque gānā cæcæcāimpa. 55 Iinque oononque bagai inte mönō wænguimāmo iñōmō dicæ tæi piñænte cæpa æmæwo wænguimōō. Mönō wænguimāmo incæ dicæ daapa emiñæmpa gui wænguimōō.”

56 Mönō wēnæ wēnæ cægainō beyænque mönō daapa guiite bai pante wæquinque nē wænguēnēmō ingamōimpa. Ayæ ēñēnāmaī cæyōmonte Wængongui wææ angā beyænque mönō nē pante wæquinque nē wænguēnēmō bagamōimpa. 57 Wæætē mönō Awēnē Itota Codito gānā cædinque mönō wænguēnēmāmo ante godō omæe ewengā beyænque Wængongui mönō imonte pōnō cæcā ate gānā cæmōimpa. Iinque, Mänōmaī

waa pōni cæcampa, ante pōnēninque mönō Wængongui ingante waa ate pōnēninque apænecæimpa.

58 Mänōmaī beyæ botō nē waadete tōniñamini ēñēedāni. Minitō, Mönō imonte bæ tadāmaī incædānimpa, ante adiyæ tæi ongonde wææ cædāni. Edæ, Mönō Awēnē nempo quēwēninque nanguī cæmō iinque mönō cædinō iñōmō edæ cōwē ewēnāmaī ingæimpa, ante pōnēninque mīnitō mönō Awēnē beyæ ante cōwē godōmenque gomonga cæcæmīnimpa, amopa.

16

Wængongui quīnāni beyæ iūmaī cæte godongcæimpa, ante

1 Ñowo iñōmō mīnitō godonte æinta ante, Wængongui quīnāni beyæ impa, ante mīni godonguēnēnō ante apænebo ēñēedāni. Gadatiabæ iñōmō Itota ingante godongāmæ nāni pōnencabo inānite do ānimo inte botō mīnitō imīnite adobaī ante iūmaī āmo cædāni. 2 Minitō tōmāmīni, Botō ænincoo æpodō i, ante adinque, Pancaa Wængongui quīnāni qui baquimpa, ante cædinque Wængongui itædē iñō pancacooga nānēnē cō cædinque wacā Wængongui itædē iñō pancacooga nānēnē cō cædinque ee mædāni. Iinque wæætē wæætē cō cæte eyepæ māmīni adinque botō mīnitō weca ponte adinque, Godōmenque cō cædāni, ante ānāmaī inguēnēmo imopa. 3 Edæ botō mīnitō weca ponte añōmo mīnitō, Iināni nō cædōnāni inte mōnitō godōnincoo ænte māo godoncædānimpa, ante odōmōmīni adinque botō wæætē tōmēnāni beyæ cadota ante yewæmoncæboimpa. Ayæ cadota tōnō mīnitō pōnōnoncoo tōnō botō iināni inānite pædæ godōninque da godōmo ænte māo Eedotadēē gote nēnempocædānimpa. 4 Ayæ Wængongui Ao angā ate botō tōmēnāni bai adobaī gobo adinque tōmēnāni botō tōnō godongāmæ edæ gobainānipa.

Īmaī gocæboimpa, ante

⁵ Cōwē Māatedōniabæ wodo pænta gocæboimpa. Īninqe mǎnimæ tāno wodo pænta gote ate botō ayæ wæætē mīnitō weca poncæboimpa. ⁶ Ayæ mīnitō weca pōninque wabānō wantæ iñō quēwente goquīmo. Æbāmē cæcæboimpa. Edæ, Quēwente ate ædōmē gomonga gocæ cæyōmo mīnitō botō tōnō godongāmæ waa cæmīni ate waa gocæboimpa, ante pōnēninque botō wabānō godōmenque quēwēninque tōmāā mōnō yoguiintedæ incæ mīnitō weca quēwencæboimpa. ⁷ Edæ, Botō wodo pænta gocæ cædinque mīnitō weca ñōwo pōmo bai wantæ iñō ēñaquinque incædōnimpa, ante pōnente wædinque botō wīi ñōwo pōinēmo imopa. Wæætē, Wængonguī Ao angā ate botō iincayæ ate mīnitō weca ponte wantæpiyæ quēwēninque tocæboimpa, ante pōnēmopa. ⁸ Wæætē mōni oodeocabo ææmæ Pentecotee mōni ānōmæ iinque beganca botō Epeto adoyōmō quēwencæboimpa. ⁹ Edæ Epeto iñōmō quēwēnāni wede pōnente bacædānimpa, ante botō guiite apænequinque odemō bai wi ænete bai ongō abopa. Ayæ adobai, Nē piinte cædāni nanguī ināni mæ ongōnānīpa, ante adinque botō adoyōmō quēwēninque nanguī wææ apænecæboimpa.

¹⁰ Tīmoteo mīnitō weca wabānō ponguingā. Pongā ininque mīnitō wæætē, Mōnitō weca guiñēnāmaī inte quēwencæbiimpa, āninque tōmengā ingante waa cædāni. Edæ botō nē cæbo imo bai tōmengā adobai Wængonguī beyænque nē cæcā ingampa. ¹¹ Īninqe, Tīmoteo ōnonque cæcampa, ante tedewēnāmaī inte mīnitō tōmengā ingante Baa ānāmaī incæmīnīpa. Wæætē waadete cædinque da pōnōmīni ate tōmengā piyænē cæte botō weca adodō poncæcāimpa, āmopa. Edæ, Mōnō tōniñadāni tōnō Tīmoteo godongāmæ poncæcāimpa, ante pōnēninque botō wānō cōmopa.

¹² Botō mōnō tōniñacā Apodo

ingante guiquēnē, Mōnō tōniñadāni tōnō bitō coodintoidi weca ēñate pōe, ante ancaa āmo incæte tōmengā wæætē, Ñōwo wīi goquīmo, ante Baa angantapa. Incæte Wængonguī Ao angā ate tōmengā iincayæ ate mīnitō weca cōwē poncæcāimpa.

Waa quēwencæmīnīpa, ante

¹³ Mīnitō guiquēnē cōwā ate nāmā wææ aadāni. Wede pōnēmīni inte tæi gongænte ongōedāni. Æmæwo pægaīmīni inte tæi piñænte entawēninque guiñēnāmaī inte ee cædāni. ¹⁴ Ayæ tōmāā quiēmē cæmīni inte waadete pōnēninque cædāni āmopa.

¹⁵ Botō tōniñamīni mīnitō iīmaī ante do ēñēmīnīpa. Acayabæ iñōmō tāno pōnengāināni inte Etepānā nāni quēwencabo iñōmō, Wængonguī quīnāni inānite nē cæmōni bacæmōnīpa, ante ñōwo cædānīpa cæmīnī. ¹⁶ Īninqe mīnitō Wængonguī quīnāni beyæ nē cædināni inānite Ao āninque piyænē cædinque tōmēnāni nāni ānō bai do ēñente cædāni. Ayæ, Wadāni adobai, Mōnō tōnō godongāmæ nanguī cædānīpa, ante adinque mīnitō tōmēnāni nāni ānō bai do ēñente cædāni.

¹⁷ Etepānā tōnō Podotōnato ayæ Acaico botō weca pōninque mīnitō botō beyæ mīni cæinēnō ante do cædāni ate nanguī totabopa. ¹⁸ Edæ tōmēnāni pōnō apænedāni ēñēninque mīnitō wampo pōnente tæi piñænte ēwocamīnitawo. Ayæ adobai pōnō apænedāni ēñēninque mōnitō wampo pōnente tæi piñænte ēwocamōnīpa. Mānōmaī nē pōnō cædināni inānite mīnitō wæætē waa ate pōnēninque cæquēnēmīni imīnīpa.

¹⁹ Atiabæ iñōmō Codito ingante godongāmæ nāni pōnencabo nāni cabo nāni cabo tōmānāni mīnitō imīnite ante pōnēninque, Waa quēwencæmīnīpa, ante apænedānīpa. Aquidæ tōnō Pidica nāna gæncaya adobai ayæ tōmēna oncōnē Codito ingante pōnente godongāmæ pōninque nāni pōnencabo adobai mīnitō imīnite waadete

pönëninque, Mönö Awënë nempo
 waa quëwencæminimpa, änänipa.
²⁰ Mönö tönïñadäni tömänäni,
 Waa quëwencæminimpa, ante
 apænedänipa. Minitö guiquënë mini
 cabo godongämæ pö bee tëninque
 waadete pönente waa apæneedäni,
 ämopa.

²¹ Botö Pabodobo iñömö tæcæ
 tömëmo önompoca yewæmöninque,
 Waa quëwencæminimpa, ante tömëmo
 yewæmömopa.

²² Æcänö mönö Awënë ingante
 waadete pönënamäi ina iñömö
 tömengä nänö wænguinque mänömaï
 cæcampa töö. Botö iñömö wæætë,
 Mönitö Awënë imi pöe, ante wæbopa.

²³ Mönö Awënë Itota waadete pönö
 cæcä æninque minitö tömengä nänö
 waadete pönö cædö entawëninque
 waa quëwencæminimpa. ²⁴ Codito
 Itota nempo mönö quëwencabo
 imompa, ante pönëninque botö minitö
 iminite waadete pönëmopa. Mäninque
 ante yewæmömopa.

2 Coodintoidi inānite Pabodo cadota ante ayænta nānō yewæmongainta

Waa quēwencæminimpa, ante

¹ Wængonguī pōnō angā beyæ Itota Codito botō Pabodobo imote da godongā godongaīmo inte botō mōnō tōniñacā Timoteo tōnō guēa apænemōna ate botō iīmaī ante yewæmōmopa. Coodinto iñōmō quēwēmīni inte mīnitō iñōmō Codito ingante mīni godongāmæ pōnencabo incæ acæminimpa, ante yewæmōmopa. Ayæ Acayabæ tōmāo iñōmō quēwente Wængonguī quināni inte tōmēnāni adobaī adota acædānimpā, ante yewæmōmopa. ² Mōnō Awēnē Itota Codito tōnō Mæmpo Wængonguī tōnō guēa waadete pōnō cæda adinque mīnitō gānē pōnente waa quēwencæminimpa, āmōnapa, ante yewæmōmopa.

Codito iīmaī waadete pōnō cæcampa, ante

³ Mōnō Awēnē Itota Codito Wæmpocā iñongante Itota iñōmō adocā ingante, Botō Wængonguī inongā ingampa. Ayæ Itota Wængonguī adocā inongā inte tōmengā mōnō wæwēnō ante adinque godongāmæ wæte baī pōnō waadete apænecā ēñēninque mōnō wampo pōnēmō imopa. Mānōmaī beyæ, Itota Mæmpo Wængonguī cōwē waa cæcampa, ante mōnō watapæ apænecæimpā. ⁴ Adocā Wængonguī mōnō imonte āninque, Wēnæ wēnæ wæwēmīni adinque botō waadete pōnō apænebo ēñēninque mīnitō wampo pōnēmīnitapa. Īninque wadāni wēnæ wēnæ wæwēnāni adinque mīnitō botō apænedō ante waadete godō apænemīni ēñēninque tōmēnāni wæætē wampo pōnencædānimpā, ante botō mīnitō imīnite pōnō cætabopa, Wængonguī angampa.

⁵ Edæ iīmaī beyæ mānōmaī angampa. Codito nē nantate wægaingā beyæ nantate wæwēninque mōnō tōmengā tōnō āanque baī nantate wæwēmōmopa. Ayæ adobaī nantate wæwēmō adinque adocā Codito waadete pōnō apænecā ēñēninque mōnō tōmengā tōnō āanque baī ēwocadinque wampo pōnēmōmopa. ⁶ Mōnitō nantate wæwēmōni amīnitawo. Edæ mōnitō nantate wæwente apænemōni beyæ Wængonguī mīnitō imīnite wæætē pōnō waadete apænecampa. Apænecā ēñēninque mīnitō wæætē wampo pōnēninque wænāmaī quēwencæminimpa, ante Wængonguī cæcampa. Ayæ mōnitō wæwēñōmōnite tōmengā pōnō waadete apænecā ēñente wampo pōnēmōni amīnitawo. Edæ mīnitō nantate wæwēmīni inte wampo pōnencæminimpa, ante Wængonguī mānōmaī cæcampa. Ayæ wampo pōnēmīni badinque mīnitō iīncayæ ate mōnitō nantate wæwēnō baī adobaī nantate wæwēmīni incæte piyænē cæte ee cæte quēwencæminimpa, ante Wængonguī pōnō cæcampa. ⁷ Ayæ mōnitō tōnō āanque baī mīnitō nantate wæwēmīnitawo. Edæ tōmengā waadete pōnō apænecā ēñēmīni ate mīnitō adobaī mōnitō tōnō āanque baī wampo pōnenguīmīni imīnīpa. Ante do ēñēninque mōnitō, Nāwangā mīnitō watapæ quēwencæminimpa, ante do pōnēmōnīpa.

⁸ Īñānāni, mōnitō Atiabæ quēwēninque æbānō wēnæ wēnæ bate wætāmōnīi, ante ñōwo yewæmōmo aedāni. Tæi piñæmōni ināmaī inte mōnitō godōmenque teēmē mongænte baī nangū wēnæ wēnæ bate wædinque, Nangæ bate wænguī wæ, ante wætāmōnīpa. ⁹ Wængonguī do angā wænguēnēmōni imōnīpa, ante nāmāneque pōnente wætāmōnīpa. Incæte mōnitō, Tōmēmōni nāmā tæi piñænō beyænque quēwencæmōnīpa, ante pōnēnāmaī incæmōnīpa, ante odōmoncæte ante Wængonguī pōnō cæcā wætāmōnīpa. Wæætē tōmengā,

Do wængainäni quëwencæðänimpa, ante botö nê ämo iñömote minitö wæætê botö imote wede pönente quëwencæminimpa, ante cæcæte ante Wængongui mänömaï pönö cæcä wætämönipa. ¹⁰ Mönitö mäninö möni oo wænguinque ante wæyömönite tömengä do bæi ongonte ængä beyænque quëwentämönipa. Ayæ ate wæyömönite tömengä ængä beyænque quëwencæmönimpa. Ayæ, Adocä wæætê wæætê ængä beyænque quëwencæmönimpa, ante pönëninque mönitö tömengä ingante wede pönente tomönipa. ¹¹ Ìninqe minitö iñacabo gongænte bai mönitö beyæ Wængongui ingante apænemini ëñëninque tömengä cöwê bæi ongonte ængä beyænque quëwencæmönimpa. Mänömaï cæcä adinqe nanguï inäni wæætê Wængongui ingante waa ate pönente iïmaï ante apænecæðänimpa. Wængongui ëñëmi. Nanguï inäni apænedäni ëñëninque bitö Pabodoidi beyæ pönö waa cæbi amönipa, ante apænequinäni inäni.

Coodinto iñömö quïnante pönämaï imoi, Pabodo angampa

¹² Mönitö iïmaï ante nämä waa ate pönëninque apænemönipa. Wængongui quimöni inömöni inte mönitö tömengä, Tæiyæ waëmö ewocæminimpa, ante ante entawëmönipa. Mänömaï beyæ Wængongui nö cæcä bai mönitö adobai inguipoga quëwëninque nö cæte quëwëmönipa. Ayæ minitö weca pöninque mönitö godömenque waa cætämönipa. Mänömaï cædinque mönitö inguipoga quëwënanique nani ëñënö beyænque dicæ cætämöniyaa. Wæætê mimö entawëmöni inte nämä apænte äninque mönitö Wængongui waadete pönö apænecä ëñëninque eyepæ cætämönipa, ante tomönipa. ¹³ Minitö acæminimpa, ante yewæmöninque mönitö dicæ idiquibæ ante yewæmömönipa. Wæætê, Edonque adinqe do ëñencæminimpa, ante edonque yewæmömöni abaiminipa. Ayæ botö, Minitö näwangä godömenque ëñencæminimpa, ante iïmaï ante

pönëmopa. ¹⁴ Mönitö æbänö imönii, ante minitö pancaa ante do ëñëminipa. Ayæ, Mönö Awënë Itota tömengä nänö ponguïönæ iinque bayonte mönitö minitö iminite adinqe, Minitö nê wede pönengaïmini iminipa, ante adinqe tocæmönimpa, ante do ëñëminitawo. Ayæ mäniönæ bayonte mönitö imönite adinqe minitö adobai, Waa nê cægäimini iminipa, ante tocæminimpa, ante ämo ëñëmaïminipa.

¹⁵ Mänömaï impa, ante pönëninque botö, Iïmaï cæcæboimpa, ante pönentabopa. Wayömö ayæ godämaï inte botö täno minitö weca ponte waadete apænecæboimpa. Apænebo ëñëninque minitö wæætê mempoga tocæminimpa, ante iïmaï cædimö intabopa. ¹⁶ Minitö weca täno ponte ëñadinque godömenque godinque botö Mäatedöniabæ gote pöninque wæætê minitö weca adodö ocæ ëmænte poncæ cædimö intabopa. Ayæ pömo ate minitö botö imote godongämæ cædinque da godömini godömenque Oodeabæ gocæ cædimö intabopa. ¹⁷ Incæte botö, Mänömaï cæquïmo imopa, ante pönëninque dicæ önonque ante pönentawogaa. Mänömaï pöinëmo inte botö ñimpo cæte pönämaï imo adinqe minitö, Pabodö æmæ pönente, Wii pönente wabänö wii pongä, ante pönëminitawo. Iñæmpa inguipogaque quëwënanäni mänömainö ante nani æmæ pönënö bai botö iñömö edæ dicæ adobai pönentawogaa.

¹⁸ Wængongui näwangä mönö imonte cöwê pönëninque nê aacä ingampa, ante nö pönï impa. Mänömainö ante nö pönï i bai minitö iminite mönitö apænedö iñömö adobai nö pönï impa. Ìninqe mönitö ædö cæte wadö ante apænequimöni. ¹⁹ Tidibänö tönö Timoteo botö tönö mönitö weca pöninque, Wængongui Wengä Itota Codito ingampa, ante nö impa, ante apænemöni ëñëminitawo. Ìninqe mönitö Itota Codito nempo quëwëninque nê Ao ämöni inte ædö cæte æmæ pönente bai wadö ante

apænequimönii. ²⁰ Iïmaï impa. Wængongui, Cöwë cæcæboimpa, ante æpogamë wæætë wæætë angacäimpa. Wæætë wæætë angä incæte Codito iñömö edæ cöwë Ao äninque, Wængongui nänö angainö tömänö iinque cæcæimpa, ante cæcampa. Iinque mönitö tömengä tönö cædinque, Wængongui ñäö apäite bai emöñongante tömänäni tömengä ingante waa acædänimpa, ante cædinque, Ao, mänömaï impa, ante, Amëë, ante watapæ apænemönipa. ²¹ Wængongui incæ mönitö imönite apænte æninque ayæ mïnitö iminite apænte æninque, Mïnitö Codito nempo quëwëninque në tæi piñæmïni bacæmïnimpa, ante mönö tömämö imonte pönö öni pæte bai cædinque iïmaï cæcampa. ²² Tömengä emöwo yewæmonte bai cædinque, Botö quimïni iminipa, ante pönö cæcampa. Ayæ, Iincayæ ate mïni godömenque nanguï ænguinque mïnitö ñöwo botö Önöwoca ingante ænte ewocædäni, ante tömengä Önöwoca ingante ñöwo da pönongä ænte ewocamïnipa.

²³ Iinque Coodinto iñömö botö quïnante wæætë pönämaï ingaboï. Edæ wënæ wënæ cæmïni adinque mïnitö iminite në panguënemo incæ botö, Wïi päinente awædö, ante wïi pontabopa. Wængongui ayongante botö, Mänömaï impa, ante nö apænebo eñëmaïmïnipa. ²⁴ Iïmaï ante wede pönencæmïnimpa, ante mönitö dicæ në wææ ämöni imöniyaa. Wæætë edæ, Mïnitö mïni wede pönönö beyænque tæi ongöninque edæ nanguï cæmïnipa, ante adinque mönitö wæætë, Mïnitö watapæ tocæmïnimpa, ante cædinque mïnitö tönö godongämæ cæmönipa.

2

¹ Botö wëenëñedë mïnitö weca eñacæ pöninque nanguï ämo wæmïnitapawæbipa, ante ædæmö waadete Iinque, Wïi wæætë ämo wæcæmïnimpa, ante ñöwo eñacæ pönämaï incæboimpa, ante nämäneque pönëninque antabopa.

² Edæ piïmo wæwëmïni bai æcänö

wæætë, Tocæbiimpa, ante botö imote waadete pönente apænequënengä. Iñæmpa botö piïmo beyæ në wæwënimïnique ongömïni bai botö imote në waadete pönente apænequënengä iñömö edæ dæ ancædongäimpa. ³ Botö quïemë beyæ tobo adinque mïnitö godongämæ watapæ toquënëmïni iminipa, ante pönentabopa. Mïnitö botö beyæ äninque, Pabodo mönö weca pongä adinque mönö cæmö tocæcäimpa, ante në cæquënëmïni iminipa, ante awædö. Iinque, Mïnitö weca pöninque botö mïnitö wæwënö ante wædämaï incæboimpa, ante cædinque botö, Botö cadota ante yewæmömo adinque mïnitö eñente cæcæmïnimpa, ante wæbopa. ⁴ Botö nanguï caate wædömo inte mïmönoque pönente wæwëninque yabæque adobai Ca ca nanguï pönente wædinque mänömainö ante wæbopa. Incæte botö, Mïnitö wæwencæmïnimpa, ante dicæ ämogaa. Wæætë, Botö æbänö mïnitö iminite nanguï waadete pönëmopa, ante eñencæmïnimpa, ante odömoncæte ante yewæmömopa.

Në wiwa cæcä ingante æbänö godö waadete ñimpo cæquï

⁵ Adocanque wiwa cæcä adinque botö tömengä nänö wiwa cædö beyæ wæwëmo incæte mïnitö tömämïni wædænque incæ nanguï incæ wæwëmïni adobai iminipa. Botö, Tömengä ingante piïnämaï incæboimpa, ante pönëninque, Wædænque wæwëmïnipa, ante apænebopa. ⁶ Në eñënämaï cædingä ingante mïnitö pancamïniya wodo tömämïni do pämïnitapa. Iinque botö, Idæwaa pämïnipa, ämopa. ⁷ Tömengä, Ancaa pämïni awædö, ante godömenque wæwente bacantawo. Iinque mïnitö pönö ñimpo cædinque tömengä ingante, Idæwaa pämöni wæbipa, ante ædæmö waadete apænemïni eñëninque tömengä iinque wædinque wampo pönencæcäimpa. ⁸ Mïnitö wæætë, Bitö imite näwangä waadete pönëmönipa, ante adodö

apænemini eñencæcäimpa, ante botö mīnitö imīnite nanguī ämopa. ⁹ Botö änö ante æbänö tōmänö ante eñente cæmīni, ante eñencæte ante botö wēenēñedē yewæmontabopa. Eyepæ cæmīni ate wædinque botö, Eyepæ cæmīnīpa, ämopa. ¹⁰ Nē eñēnāmaī cæcä ingante mīnitö ñimpo cæmīni ee gocantawo. Mänömaī cæmīni inique botö ñöwo adobai ñimpo cæbopa. Waocä æcāmenque eñēnāmaī cæcä adinque godö pönö ñimpo cæbo inique botö Codito ayongante mīnitö beyænque ante mänömaī godö ñimpo cæbo intabopa. ¹¹ Inæmpa Tatāna incæ angä eñente beyænque mönö oda cæte wæquinque edæ godömenque pīimaimompa, ante aquēnē quēwēedāni. Tatāna æbänö, Oda cæte wæcædānimpa, ante cæcampa, ante edæ do eñēmompa.

Tito beyæ ante Pabodo wæcampa

¹² Botö Todoa nāni quēwēñömö tāno pöninque, Mönö Codito ingantedö ante watapæ apænecæte ante cæyömo mönö Awēnē, Botö beyæ guiite apænee, ante odemö wi ænete bai do cæcä atabopa. ¹³ Incæte botö tōniñacä Tito dæ angä wædinque botö, Ædö cæte iñömö a ongonte apænequimoo, ante tōmēnāni inānite, Gobopa, ante Mäatedöniabæ gocæte ante wadæ gotabopa.

Codito nempo quēwēninque tæi emömönīpa, ante

¹⁴ Nē tæi emongä inte mönö Codito iñömö nē pīinte cædāni inānite gänä cæcampa. Inique mönitö Codito nempo quēwēñömönite Wængonguī, Nē tæi emongä ingante waa acædānimpa, ante cædinque mönitö imönite nē tæi emongä miñæ ænte mäocä dao dao godinque mönitö tōmengä nänö emönö bai adobai tæi emömönīpa. Ayæ oguī wa woboyæ wodo wodo cædinque tōmäo mäo oguī wa bai Wængonguī adobai cædinque mönitö imönite angä eñēninque mönitö wæætē, Mönö Codito æbänö ingää, ante wayömö wayömö mäo apænemöni eñēnānīpa.

Wængonguī mänömaī cæcä beyæ mönö Wængonguī ingante waa ate pönēninque apænecæimpa.

¹⁵ Iīmaī edæ impa. Codito ængä beyænque nē quēwēnguīnāni weca quēwēmöni incæ nē wænguīnāni weca quēwēmöni incæ mönitö Codito nempo quēwēninque tōmengä nänö oguī wamönedö bai mönitö adobai, Wængonguī wē ongonte bai tocæcäimpa, ante oguī wamönete bai apænemönīpa. ¹⁶ Mönitö öo wa wamönete bai cædinque nē wænguīnāni inānite tōmēnāni nāni wænguīmāmo ante apænemöni eñēninque tōmēnāni nāni wænguinque wē ongonte ocado cæte bai eñēnānīpa. Wæætē oguī wamönete bai mönitö nē quēwēnguīnāni inānite guiquēnē tōmēnāni nāni quēwēnguīmāmo ante apænemöni eñēninque tōmēnāni wæætē nāni quēwēnguinque wē ongonte ocado cæte bai eñēnānīpa.

Inique mäninö mönitö cæquēnēnö ante æcänö eyepæ cæquingää. ¹⁷ Edæ nanguī ināni nāmā beyænque ante æncæte ante cædinque Wængonguī nänö apænedö ante apænewēnāni bai mönitö wīi adobai wēnæ wēnæ cæcæte ante apænemöni imönīpa. Wæætē Wængonguī mönitö imönite da godongä godinque mäo nē apænemöni inte mönitö Wængonguī ayongä mönö Codito nempo quēwēninque nö pönente apænemönīpa.

3

Wængonguī müne pönö angä beyænque quēwēmompa

¹ Mönitö imönitedö ante pönēninque mīnitö, Pabodoidi, Waa cæmöni aedāni, ante tedewēnānīpa, ante wēenēñedē ämīnitawo. Ayæ, Nöwo wæætē adodö ante tedewēnānīpa, ante pīimīnitawo. Mönitö iñæmpa nāmanque ante, Waa cæmöni aedāni, ante dicæ ämöniyaa. Wadāni mönitö imönite waa acædānimpa, ante cædinque pancadāniya guiquēnē

mīnitō imīnite ānīnque, Cadota ante pōnō yewæmōedāni, ānāni ēñēnīnque yewæmōmīni ate tōmēnāni ænte māo odōmōnāni adānīpa. Ayæ wadāni inānīte adobāi, Cadota, ānāni ēñēnte yewæmōnāni ænīnque mīnitō imīnite odōmōnānīpa. Mōnitō guiquēnē, Cadota ante pōnō yewæmōedāni, ante dicæ āmōniyaa. ² Wæætē mīnitō guiquēnē waa quēwēmīni adīnque wadāni, Pabodoidi tōmēnāni inānīte apænedāni beyænque coodintoidi wede pōnēnāni inte waa quēwēnāni amōnīpa, ante pōnēnīnque cadota ate bāi do ēñēnānīpa. Mānōmāi pōnō cæmīni ænīnque mōnitō cadota næænte odōmonte bāi cædīnque, Coodintoidi æbānō waa cædānīi, ante tōmānāni inānīte odōmōmōni adīnque ēñēnānīpa. ³ Īnīnque, Pabodoidi apænedāni beyænque waa cædānīpa, ante edonque acædānīmpa, ante cædīnque Codito īñōmō Wængonguī nē Quēwengā Ōnōwoca īngante da pōnongā ænte ēwocamīnīpa. Mānōmāi cædīnque Codito cadota ante yewæmonte bāi pōnō cædīnque wīi tōmēngonca yewæmongampa. Wīi dicaboga yewæmōnīnque tōmēngā Ōnōwoca īngante mīnitō baonga da pōnongā ænte ēwocamīnīpa.

⁴ Codito godongāmæ cæcā beyænque mōnitō Wængonguī ayongā nōingā ante apænemōnīpa, ante pōnēnīnque mōnitō guīñēnedāmaī inte do edæ apænemōnīpa. ⁵ Mōnitō nāmanque ante, Æbānō waa cæmōnīi, ante eyepæ imōnīpa diyæ apænte anguīmōnīi. Wæætē Wængonguīnque pōnō godongāmæ cæcā ate mōnitō eyepæ badīnque cæmōnīpa. ⁶ Wængonguī Botō pōnō cæbo ate mīnitō Ao āmīni īnīnque mōnō godongāmæ waa cæte quēwengæīmpa, ante cōwē angampa. Tōmēngā doyedē īñōmō, Botō wææ angainō ante ēñēnte cædīnque quēwencæmīnīmpa, ante nānō wææ angāine ante ñōwo wæætē ānāmaī īngampa. Mānīne ante ñōwo ganca wææ angā bāi mōnō wænguīnque incædōnīmpa. Ñōwo guiquēnē Wængonguī wæætē, Botō

Ōnōwoca īngante ænte ēwocadīnque quēwencæmīnīmpa, ante mīīne ante apænecā ēñēnīnque mōnō quēwenguīnque Wængonguī Ōnōwoca īngante ænte ēwocamōmpa edæ. Mōnitō īñōmō tōmēngā Ōnōwoca īngante nē ēwocamōni inte eyepæ badīnque mīīne Wængonguī ñōwo nānō pōnō apænede ante nē apænemōni imōnīpa.

⁷ Wængonguī, Īmaī cæedāni, ante dicaboga wææ yewæmongā ate mōnō ēñēnāmaī imō beyænque mānīne tōmēngā nānō wææ yewæmongāine beyænque mōnō wænguīmāmo bagatīmpa. Incæte mānīne beyæ edæ ñāo nanguī apāigatīmpa. Īnīnque mānīne ænte godōmenque wææ ānīnque Mōitee wodi awīnca ñāo apāite bāi ēmongacāīmpa. Mānīi ñāo wodēmæmō ēmongā incæte idægoidi tōmēngā awīnca adīnque, Ædō cæte Mōitee awīnca cōwā aquīmōnīi, ante wægadānīmpa.

⁸ Mōnitō guiquēnē, Wængonguī Ōnōwoca īngante ænte mōnō quēwengæīmpa, ante mōni apænedō beyænque quīēmē bāi godōmenque nanguī apāite bāi apāicæīmpa. ⁹ Mōnō apænte tente wænguīnque edæ mānīne pedæne ante ēñēnāmaī cægāmōīmpa. Incæte mānīne ante nānō wææ angainō beyænque Mōitee wodi awīnca ñāo apāite bāi ēmongacāīmpa. Īnīnque ñōwo īñōmō, Mōnō nō cæte quēwenguīnque ante Wængonguī Ōnōwoca īngante ængæīmpa, ante mōni apænedō guiquēnē ñāo quīēmē bāi godōmenque nanguī nāwante bāi ēnepa. ¹⁰ Wængonguī Tæiyæ Waēmō Ōnōwoca īngante ante mōni apænedō īñōmō godōmenque ñāo nānō apāidō beyænque Mōitee wodi nānō wææ angainō guiquēnē pōnōmenque apāidīnque edæ wodēmāa badīnque edæ dæ bapa. ¹¹ Edæ mānīne mōnō wodēmāa baquēnēmāmo incæ ñāo apāite bāi īñōnte Mōitee wodi ænte apænegacāīmpa. Wængonguī ñōwo nānō pōnō āne guiquēnē

cōwē wodēmāa badāmaī ēne inte godōmenque nanguī guīnæ nāwante baī ēnepa.

¹² Īninqe, Wængonguī Tæiyæ Waēmō Ōnōwoca pōnō cæcā beyænque mōnō nō cæte watapæ quēwengæimpa, ante pōnente quēwēmōni inte mōnitō guīñenedāmaī inte do apænemōnipa.

¹³ Mōitee wodi guiquēnē, Ñāo apāi baī botō ēmōnō incæ wodēmāa bamōñōmote idægoidi adāmaī incædānimpa, ante cædinque weocoo ñāne cæmongacāimpa. Mōnitō guiquēnē Mōitee wodi nānō ñāne cæmongaī baī cædāmaī imōni inte edonque apænemōnipa. ¹⁴ Māninta, Botō wææ angainō ante ēñente cædinque quēwencæmīnimpa, ante Wængonguī nānō pedænta ante adinque idægoidi do nāni ñāne cæmongaincoo ñōwo ganca edæ ñāne cæmōntē baī ēmōnānimpā. Īninqe tōmēnāni ocai ōmæcadāni baī bagadānimpā. Edæ Codito nempo quēwēnānique mānincoo wi cæmōntē baī ēmōnāni inte tōmēnānique edonque adāni inānimpā. Īninqe idægoidi wæætē Codito nempo quēwēnāmaī ināni inte ayæ edæ wi cæmōnāmaī inte wædānimpā. ¹⁵ Īninqe idægoidi ñōwo ganca mīmō bee otawente baī inōnāni inte Mōitee wodi nānō yewæmongainta adinque ēñēnāmaī inānimpā.

¹⁶ Incæte Awēnē gāmæñō æcānō pōna tōmengā Mōitee wodi nānō wi cæmōnō baī badinque do wi cætawente baī bacampa. ¹⁷ Mōnō Awēnē incæ Wængonguī Ōnōwoca ingampa. Ayæ waocā mōnō Awēnē Ōnōwoca ingante ēwocacā Īninqe tōmengā wi cætawente baī entawente quēwēnongā inte wīi tee mōnete wæcā baī ingampa. ¹⁸ Mōnō tōmāmō iñōmō awinca wi cæmōntē baī ēmōnōmō inte mōnō awocawænta baī bamompā. Īninqe wadāni mōnō imonte adinque, Mōnō Awēnē æbānō ñāo apāite baī ēmongāā, ante awocawænta ate baī edonque acædānimpā. Ayæ godōmenque ayæ godōmenque mōnō

ñāo apāidō mōnō ēwocaquinque mōnō Awēnē nānō ēwocadō baī mōnō ayæ godōmenque ayæ godōmenque ēwocamō imompā. Mōnō Awēnē incæ Wængonguī Ōnōwoca inongā inte mōnōmaī pōnō cæcā entawēmompā.

4

¹ Wængonguī, Botō pōnō cægāinō ante mīnitō nē apænemīnī incæmīnimpā, ante waadete pōnō angā beyænque mōnitō mānīnō ante nē apænemōni bagāimōni inte ñōwo wæ guemōnāmaī inte cōwē apænemōnipa. ² Wadāni guiquēnē tōmēnāni nāni guingo imonte wæquinque awēmō cædānimpā. Mōnitō iñōmō tōmēnāni nāni cæwēnō baī cædāmaī incæmōnimpā, ante do ānimōni inte babæ cædāmaī imōnipa. Wængonguī nānō apænedō ante idiquibæ apænedāmaī imōnipa. Wæætē Wængonguī ayongā mōnitō tōmengā nō nānō apænegāinō ante edonque pōni odōmōntē apænemōni ēñēninqe tōmānāni mīmō entawēnāni Īninqe edæ, Pabodoidi nō ante cædānimpā, ante apænebainānimpā. ³ Incæte mōnō Codito ingantedō ante watapæ mōni apænedō iñōmō ñāne cædete baī intawo. Īñæmpā ñāne cædete baī i Īninqe nē wē womōntē wænguīnāni beyænque ñāne cædete baī impā. ⁴ Wængonguī nānō ēmōnō nē ēmōnongā inte mōnō Codito iñōmō mōnō beyæ ñāo apāite baī cæcampa, ante watapæ mōnō ēñente pōnēnō ante apænemōnipa. Ñōwoguipogaque quēwēnāni beyæ guiquēnē tōmēnāni awēnē wængonguī baī Tatāna nē cæcā ingampa. Tōmengā iñōmō mānīne watapæ mōni apænedō ante pīininqe, Nē pōnēnāmaī ināni adāmaī incædānimpā, ante tōmēnāni awinca ñāne cæmōntē baī wææ cæcampa. ⁵ Mōnitō iñōmō, Nāmā incæ wāa cæmōnimpā, ante tededāmaī imōnipa. Wæætē, Itota Codito incæ mōnō Awēnē ingampa, ante mōnitō, Tōmengā beyænque mōnitō mīnitō imīnite nē cæmōni imōnipa, ante mānīnque ante apænemōnipa.

6 Wēmō iñōmō ñāo apāicæimpa, ante Wængonguī incæ badongacāimpa. Adocā ñāo ante nē angaingā inte ñōwo wæætē mōnitō mīmōno tica ēnente bai cædinque iīmaī ante odōmongā amōnipa. Tōmengā iñōmō, Botō æbānō guīnæ nāwante bai ēmōmoo, ante mīnitō Codito awinca adinque edonque pōnī acæmīnimpa, ante pōnō tica ēnente bai odōmongā amōnipa.

Itota ingante mōnō wede pōnēnō beyænque quēwēmō

7 Nanguī ñāo apāite bai ēwocamōni incæ ōnoncadedē mante bai edæ ēwocamōnipa. Edæ daigænē cængæmoncadenque bai mōnitō baō mongæñōmōnite Wængonguī, Wīi mīnitō nāmā tæi piñænō beyænque ēwocamīnipa, wæætē botō tæi piñænō beyænque ēwocamīnipa, ante acædānimpa, ante badongampa. Īnīnque tōmengā tæi piñænte pōnō badongā ænīnque mōnitō ñāo apāidō mōni mānō iñōmō ōnoncadedē mante bai ēwocamōnipa. 8 Mōnitō imōnite tōmānō māmō mō ongonte bai cædāni wæmōni incæ gueogæ godāmaī imōnipa. Æbānō cæte quēwēmō imōo, ante wæmōni incæ mōnitō guīñente wædāmaī imōnipa. 9 Anca togænte pānāni wæyōmōni Wængonguī mōnitō imōnite cōwē ēmō cæte godāmaī ingampa. Ayæ wænoncæte ante bæ tadāni incæte æmæwo wænāmaī imōnipa.

10 Itota tōmengā nānō quēwēnō pōnongā æmōni beyænque mōnitō, Baō ayæ mongænte quēwēmōni acædānimpa, ante cæmōnipa. Tōmengā nānō wængainō bai mōnitō adobai wæætē wæætē wænte bai baō mongæmōnipa. 11 Mōnitō nē quēwēmōni iñōmōnite wadāni wæætē mōnitō imōnite bæi ongonte ænīnque, Itota beyænque wæncæmīnimpa, ante nanguī cædānipa. Īnīnque mōnitō baō ñōmænguīñō ēñayōmōnite wadāni, Itota tōmengā nānō quēwēnō ēñate beyænque ayæ quēwēnānipa, ante edonque acædānimpa, ante mōnitō wæncæ cæte bai ēñate

wæmōnipa. 12 Īnīnque mōnitō mōni wænguīmāmo beyæ ante wæyōmōni mīnitō wæætē mīni quēwænguīmāmo ēñate quēwēmīnipa.

13 Docā do apænedinque, Botō nē wede pōnēmo inte apænetabopa, ante yewæmongacāimpa. Tōmengā wede nānō pōnengainō bai adobai ēwocadinque mōnitō nē wede pōnēmōni inte adobai apænemōnipa.

14 Īimainō ante ēñēnīnque wede pōnēmōni inte mōnitō apænemōnipa. Itota ingante, Ñāni ōmæmōe, ante nē cægaingā adocā mōnitō imōnite angā ate mōnitō Itota tōnō godongāmæ ñāni ōmæmoncæmōnimpa, ante do ēñēmōnipa. Ayæ mīnitō tōnō mōnitō tōmāmō iñōmonte Wængonguī ænte māmō gōnongā ate mōnō tōmengā weca godongāmæ gongænguīmō imōmpa. Mānōmainō ante do ēñēmōni inte mōnitō nē wede pōnēmōni inte apænemōni imōnipa. 15 Wængonguī godōmenque nanguī ināni inānite waadete pōnō cæcā ate tōmēnāni wæætē Wængonguī ingante waa ate pōnēnīnque apæncædānimpa. Ayæ mānōmaī pōnō cæcā adinque, Wængonguī ñāo apāite bai ēmōnongā inte mānōmaī cæcampa, ante mōnō tōmāmō watapæ apæncæimpa. Īnīnque, Mānōmaī bacæimpa, ante mīnitō beyæ ante mōnitō tōmāā edæ cæmōnipa.

16 Mānōmaī beyæ mōnitō, Æbānō cæquīmōnīi, ante wædāmaī imōnipa. Edæ iīmō iñō iīmō iñō mōnō baō godōmenque wænguīñō bai mongæñōmō mōnō ōnōwoca wæætē iīmō iñō godōmenque iīmō iñō godōmenque mīiwoca badonte bai ēwocamōmpa. 17 Īñæmpa wēnæ wēnæ mōnō wæwēnō incæ wantæ iñō wodēmāa pōnī badinque wodæi bai bapa. Incæte mānīi mōnō wæwēnō beyæ mōnō godōmenque ñāo apāite bai ēwocacæimpa. Īnīnque mōnō wæwēnō wodæi pōnī inte dæ bayō mōnō ñāo apāidō mōnō ēwocadō wæætē cōwē wodēmāa badāmaī ingæimpa. Wæætē mōnō watapæ quēwænguīnque godōmenque

nanguī apāite bai bacæimpa.
 18 Inguipogaque mōnō quēwēnō
 guiquēnē wantæ iñō dæ gocoopa.
 Öönädē ñōwo mōnō adāmaī incoo
 guiquēnē cōwē dæ badāmaī inte
 ongongæimpa. Īninqe inguipogaque
 mōnō quēwēnō ante mōnō adāmaī
 inte bai pōnengæimpa. Wæætē
 öönädē mōnō adāmaī incoo ante
 mōnō cōwē ate bai pōnengæimpa.

5

1 Oncontai wido cæquintai bai mōnō
 æmontai mongænte quēwēmōmpa.
 Īninqe mānintai wido cæmō incæte
 Wængonguī wæætē, Öönädē mīintai
 mīni cōwē owoquintai, ante do
 mænongacæimpa. Mānintai iñōmō
 waocā onompoca mænōnāmaī intai
 iñonte mōnō öönädē æite owoquimō
 imōmpa, ante do ēñēmōmpa. 2 Ñōwo
 iñōmō mōnō wido cæquintai mongæntai
 ö ö ante nantate wæwēmōmpa.
 Mānōmaī beyæ mōnō öönädē
 æidinqe mōnō owoquintai ēñacæte
 ante wæmōmpa. 3 Edæ, Baö ömaamō
 inte wæcæ wæ, ante guññewocate
 wædinque mōnō, Mīintai ēñacæimpa,
 ante wæmōmpa. 4 Mōnō ĩintaique
 ēñadinque, Baö ömaamō inte wædāmaī
 incæmōnimpā, ante guññewocate
 wæmōmpa. Mōnō wænguintai
 mongænte nantate wæmō inte ö
 ö ante wæmōmpa. Wængonguī,
 Mīnitō ēñate quēwenguintaique, ante
 yabæque wīni caate bai pōnongā
 ēñayōmō mōnō wænguēnēñō edæ
 dæ bacæimpa, ante æncæte ante
 wæmōmpa.

5 Ñōwo ämo ēñēedāni. Wængonguī
 incæ edæ, Mīni mīintai wēñate
 mongænguinque, ante mōnō imonte
 badongacæimpa. Ayæ, Mīnitō mīintai
 cōwē pōnōmo æncæmīnimpā, ante,
 Nāwangā impā, ante odōmoncæte
 ante Wængonguī tōmengā Öönōwoca
 ingante ñōwo da pōnongā æmōmpa.
 Īninqe tōmengā Öönōwoca ingante
 ænte ewocadinque mōnō, Mīintai ēñate
 mongænguinque ewocamōmpa, ante do
 ēñēmōmpa.

6 Mānōmaī beyæ mōnitō cōwē,
 Wængonguī cæcæcæimpa, ante wede
 pōnente tomōnīpa. Oncōnē owote
 bai ĩintaidē mōnō quēwenganca
 mōnō Awēnē oncōnē owodāmaī
 imōmpa, ante do ēñente wædinque,
 7 mōnitō mānīnō ante ayæ adāmaī
 emōmōni inte wīi mōni adīnō beyæ
 quēwēmōnīpa. Wæætē mōni wede
 pōnēnō beyænque quēwēmōnīpa.
 8 Īninqe edæ, Wængonguī cōwē
 cæcæcæimpa, ante wede pōnēmōni
 inte mōnitō, ĩintaidē owodāmaī
 inte wæætē mōnō Awēnē oncōnē
 gote owote waa tobaimpā, ante
 pōnēmōnīpa. 9 Īninqe oncōnē owote
 bai tomōni incæ oncōnē owodāmaī
 inte bai wæmōni incæ mōnitō,
 Mōnō Awēnē waa tocæcæimpa, ante
 cædinque cōwē nō cæte quēwēmōnīpa.
 10 Codito tōmengā nānō apænte
 anguimpāa gāanē mōnō tōmāmō
 pante edæ a ongonguēnēmō imōmpa.
 Mōnō edæ inguipoga ĩintai ēñate
 quēwēninqe mōnō cædo ante do
 againgā inte tōmengā iñōmō apænte
 ancæcæimpa. Edæ waa cægāimō
 imō adinqe tōmengā mōnō imonte
 edæ eyepæ pōnī pædæ pōnongā
 ænguimō imaīmōmpa. Wæætē edæ
 wēnæ wēnæ cægāimō imō adinqe
 tōmengā wæætē eyepæ pōnī pangā
 wæbāimōmpa.

*Wængonguī piyænē cædinque,
 Pōedāni, angampa*

11 Īninqe mōnō Awēnē ingante
 guññente wæmōni inte mōnitō
 waodāni inānite godō waadete
 apænēmōnīpa. Codito gāmænō
 pōninqe watapæ quēwengæimpa,
 ante pōnencædānimpā, ante mōnitō
 godō waadete apænēmōnīpa. Edæ,
 Mōnitō æbānō ewocamōnīi, ante
 Wængonguī do edonque acampa.
 Ayæ adobāi mīnitō mīmō entawēmīni
 inte mōnitō ewocadō ante edonque
 amīni ĩninqe botō waa tobāimōpa.
 12 Mānōmainō ante apænedinqe
 mōnitō, Wæmō pōnī imōnīpa,
 ante nāmā ante dicæ amōnīyaa.
 Wæætē ĩimaī ante apænēmōnīpa.

Pancadāniya iñōmō mōnitō awincaque adinque, Pabodoidi æbānō ēwocadānii, ante adāmaī ināni inte tōmēnāni nāni adōnonque ante pōnēninque nāmā ængō cæte bai todānipa. Mīnitō guiquēnē, Mōnitō æbānō ēwocamōnii, ante do amīnitapa. Īninque tōmēnāni mōnitō imōnite ante pīinte ānāni ēñēninque mīnitō wæætē edæ, Pabodoidi nō ēwocadāni inte waa cædāni amōnipa, ante wææ apænecæmīnimpa, ante cæbopa. ¹³ Edæ òmæcamōni bai cæmōni incæte Wængonguī beyænque ante mănōmaī cæmōnipa. Wæætē nō pōnente cæmōni incæ mīnitō beyæ ante cæmōnipa.

¹⁴ Īmaīnō ante pōnente wædinque edæ mănōmaī cæmōnipa. Tōmāmō beyæ adocanque wængacāimpa, ante adinque mōnitō, Mōnō tōmāmō do wængamōimpa, ante edonque ēñēmōnipa. Īninque, Mōnō Codito nanguī waadete pōnengā inte pōnō cæcampa, ante pōnēninque mōnitō ædō cæte wapiticæ cæquimōnii. ¹⁵ Mōnō Codito iñōmō tōmāmō beyæ wæninqe, Mīnitō idæwaa nāmā beyænque quēwēmīnīpa, ante wængacāimpa. Ayæ, Botō nē wænte ñāni òmæmongaīmo iñōmote mīnitō botō beyæ ante quēwencæmīnimpa, ante cædinque tōmengā tōmāmō beyæ wængacāimpa. ¹⁶ Mănōmaī impa, ante pōnēninque mōnitō ñōwo iīncayæ ate waodāni inānite adinque, Inguipogaque ēñate quēwēnānīpa, ante pōnēnāmaī imōnīpa. Edæ mōnō Codito incæ inguipoga ēñate quēwēñongante mōnitō mănōmaīnō ante pōnengāimōni incæte mōnitō ñōwo wæætē mănōmaīnō ante wīi pōnēmōnīpa. ¹⁷ Īninque Codito nempo æcānō quēwēnaa tōmengā ingante Wængonguī mīngā badongā ate mīngā bate quēwengampa. Tōmengā nānō inguipogaque nānō quēwēnīmāmo edæ dæ gotimpa. Ñōwo wæætē edæ mīimāmoque ēwocacampa.

¹⁸ Mānīnō botō ānō ante tōmānō nē pōnō badongā iñōmō edæ Wængonguī adocanque ingampa. Tōmengā

iñōmō, Mīnitō ēñēnāmaī cæmīni incæte Codito pōnō cæcā beyænque botō piyænē cæcæboimpa, angampa. Īninque botō piyænē cæbo adinque mīnitō botō gāmænō pōedāni, angampa. Ayæ mōnitō imōnite pōnō angā ēñēninque mōnitō wæætē edæ wadāni inānite, Wængonguī piyænē cædinque, Pōedāni, angampa, ante nē cæmōni batamōnīpa. ¹⁹ Īninque iīmaī ante apænēmōnīpa. Codito tōnō godongāmæ cædinque Wængonguī iñōmō piyænē cædinque, Inguipoga quēwēmīni tōmāmīni botō gāmænō pōedāni, angampa. Pōmīni adinque botō, Æpogadō wēnæ wēnæ cæmīnitawo, ante tee mante adāmaī inte pīināmaī incæboimpa, angampa.

Tōmengā mănōmaī angā ēñēninque mōnitō wæætē mānīne ante nē waadete apænēmōni badinque edæ, Wængonguī piyænē cæcā adinque pōedāni, ante apænēmōnīpa. ²⁰ Īninque Wængonguī mōnitō imōnite āninque, Mīnitō wæætē botō beyæ wadāni inānite waadete apænēmīni ēñēninque poncædānīpa, angā ēñēninque mōnitō wæætē Codito beyænque nē waadete apænēmōni bamōnīpa. Īninque mīnitō imīnite waadete pōnō apænedinque mōnitō, Wængonguī gāmænō pōedāni, ante Codito beyænque ante apænēmōnīpa. ²¹ Wængonguī, Mīnitō Codito nō nānō ēwocadō ænte ēwocacæmīnimpa, ante pōnō cædinque Codito ingante angā ēñēninque tōmengā iñōmō edæ wēnæ wēnæ ēwocadāmaī inte wæætē edæ mōnō beyæ ante nē wēnæ wēnæ cæcā bai badinque mōnō wentamō ēwocadō incæ mongængacāimpa. Īninque mōnitō tōmengā nempo quēwēninque nō pōnī tōmengā nānō ēwocadō wæætē ænte ēwocamōmpa.

6

¹ Tōmengā tōnō godongāmæ nē cæmōni inte mōnitō mīnitō imīnite iīmaī ante waadete apænēmōnīpa. Wængonguī waadete pōnō cæcā æmīni inte mīnitō wīi ònonque oda cæcæte ante æncæmīnimpa, ante

nangui ämöni eñëmaïminipa. ² Edæ Wængongui do angacäimpa,

“Minitö iminite botö waadete pönö cæyedë mäniñedë minitö apænemini eñentabopa.

Ayæ, Mini quëwenguionæ impa, ante Codito nänö bæi ongonte æñedë botö mäniñedë minitö beyæ pönö cægaboimpa.”

Ante yewæmongatimpa. Ìninqe botö iïmaï ämo eñëedäni. Wængongui tömengä nänö waadete pönö cæyedë do ba apa quëwëminii. Codito edæ ængä beyænque mini quëwenguionæ iñömö edæ do batimpa cæminii.

³ Mönö quëwenguinö ante adocanque incæ Wængongui beyæ möni apænedö ante pïinämaï incæcäimpa, ante wææ cædinque mönitö iñömö idiquibæ cädämaï imönipa. ⁴ Wæætë minitö, Pabodoidi Wængongui beyæ në cädäni inänipa, ante acæminimpa, ante odömoncæte ante mönitö cöwë iïmaï cæmönipa. Cöwë nantate wæmöni incæ wënæ wënæ cädäni wæmöni incæ mö ongonte wææ cädäni wæmöni incæ æbämenque wæmöni incæte mönitö cöwë wëntæye badämaï inte ee cæmönipa. Ædö cæte quëwenguï, ante wæmöni incæ Wængongui beyæ në cæmöni inte mönitö godömenque cæmöni aedäni. ⁵ Ayæ tæi tæi pänäni wæmöni incæ tee mönedäni wæmöni incæ Yæ yæ ante mönitö imönite wido cädäni incæte mönitö wæætë Wængongui ingante në cæmöni inte edæ nanguï cæmönipa. Ayæ woyowotæ nanguï cædinque mönitö möwo mönämaï inte cæmöni incæ cænguï cænämaï inte gæwænte wædinque cæmöni incæ mönitö godömenque cæmöni aedäni.

⁶ Mänömaï cædinque mönitö wentamö mongænämaï inte cæmönipa. Ayæ wadäni æbämenque cädäni incæ mönitö nö eñëmöni inte edæ piyænë cæte piinte änämaï imönipa. Wæætë waadete cæmönipa. Edæ Wængongui Tæiyæ Waëmö Önöwoca nempo quëwëninque näwangä waadete pönëmönipa. ⁷ Wængongui nänö tæi piñænö ewocadinque mönitö

Wængongui nö nänö angainö ante apænëmönipa. Ayæ tontadoidi guëadö guëa wænnoncæte ante tipæmäa næænäni bai cædinque mönitö nö pönö cæcæte ante Wængongui nänö tæi piñænö ante eyepæ næænte bai cæmönipa.

⁸ Mönitö imönite waa adäni incæ wiwa adäni incæte mönitö Wængongui beyænque ante cæmönipa. Pabodoidi waa pönö cädänipa, ante nö apænedäni incæ wæætë, Pabodoidi wënæ wënæ cädänipa, ante tedewänäni incæ mönitö cöwë godömenque cæmönipa. Pabodoidi babæ cädänipa, ante pïinäni incæte mönitö nöingä pönente Wængongui beyænque ante cæmöni aedäni. ⁹ Edæ tömänäni mönitö imönite do edonque pönö adäni incæ adämaï inte bai cædinque, Önöminique iminipa, ante tededänipa. Wæncæ cæmöni incæte ee quëwëmönipa. Pänäni wæmöni incæte mönitö imönite wænönämaï inänipa. ¹⁰ Wæwëmöni incæte mönitö cöwë mïmöno watapæ towocamönipa. Mönitö mäincoo ömæpomöni incæ wadäni inänite godö cæmöni æninque tömënäni mäincoo nanguï pönö ænte bai eyepæ pönö entawänänipa. Edæ në ömæpomöni inte wæmöni incæte mönitö tömancoo pönö entawëmöni inte Wængongui ingante në cæmöni imöni aedäni.

¹¹ Coodintoidi eñëedäni. Minitö iminite mönitö edonque pönö apænetamönipa. Minitö iminite nanguï pönö waadete pönëmönipa. ¹² Mönitö dicæ pæ gompote minitö iminite waadedämaï imöniyaa. Wæætë edæ tömëmöni pæ gompodinque edæ mönitö imönite waadedämaï imöni inte wæwëmönipa. ¹³ Ìninqe botö wëñæmïni bai iñöminite iïmaï ämopa. Minitö iminite waadete pönëmöni adinque minitö næëmæ waadete pönëedäni.

Wængongui në Quëwengä nänö owocö bai imompa, ante

¹⁴ Guëa mangæ mangæ woquïna, ante wagada tönö bodo guëa goti wëmencädämaï iedäni, ante

do yewæmongatimpa cæminii. Pönenämaï inäni tönö godongämæ cädämaï iedäni. Ìñæmpa nè nõ cæcä tönö guëa äantawente bai nè eñenämaï cæcä guiquënë dicæ adobai entawengäa. Ayæ ñäo entawengä tönö guëa gocæte ante cædinque nè wëmö entawengä ìñömö mimö ñäo entawengampa diyæ guëa go-
 quingäa. ¹⁵ Codito nänö pönënö ante edæ wënæ awënë Bediado ìñömö edæ adodö ante pönengampa diyæ guëa cæquiringäa. Nè wede pönengä nänö pönënö ante nè pönenämaï ingä ìñömö edæ adobai pönengampa diyæ adobai quëwengingäa. ¹⁶ Ayæ, Wængonguï impa, ante waodäni nani badöninca æninqwe edæ näwä Wængonguï tæiyæ waëmö oncönë ædö cæte mangui cö cæquii. Mönö guiquënë Wængonguï nè Quëwengä nänö tæiyæ waëmö owoquincö bai ìñömönte tömengä Önöwoca mönonga pö guite owocampa. Ìninqwe tömënëni tönö mönö ædö cæte godongämæ cæquii. Wængonguï incæ, Mänömaï impa, ante ancæte ante iïmaï angacäimpa.

“Waodäni weca owodinqwe botö tömënëni tönö godongämæ cægoncæboimpa.

Botö tömënëni Wængonguï ìñömöte tömënëni wæætë botö quinäni incädänimpa,” angacäimpa.

¹⁷ Mänömainö ante apænedinqwe mönö Awënë adobai ante,

“Wadäni inänite taayænte pöninqwe nänënë ponte quëwëedäni, angampa.

Wentamö i adinqwe gampodämaï iedäni.

Mänömaï cæmini adinqwe botö minitö iminite, Pöedäni, ante ee æncæboimpa.

¹⁸ Æninqwe, Minitö Wæmpobo inömo inte botö,

onguïñæmini incæ onquiyæmini incæ, Botö wëmini iminipa, ante æncæboimpa,

ante nè Tæi Piñængongä inte Awënë Wængonguï angampa.”

Ante Wængonguï beyæ yewæmongatimp

7

¹ Ìninqwe botö nè waademini eñeedäni. Mönö ìñömö, Wængonguï, Cöwë cæcæboimpa, ante nänö angainö ante do eñengamöimpa. Ìninqwe baonga wentamö mönö eñadö tönö mimö mönö wentamö entawënö adobai ñä mënongate bai cædinque edæ mönö tæiyæ waëmö ewocate quëwengæimpa. Ayæ, Wængonguï ingampa, ante guïñente wædinque mönö, Cöwë nõ cæte waa quëwengæimpa, ante nanguï cæcæimpa.

Coodintoidi Codito gämçenö pönänipa

² Mönitö dicæ wacä ingante wënæ wënæ cæmöniiyaa. Wacä wentamö nänö mongænguinque mönitö dicæ wënæ wënæ cæmöniiyaa. Dicæ wapiticæ apænedinqwe wacä quï ö æmöniiyaa. Ìninqwe, Pabodoidi mänömaï cädämaï inänipa, ante adinqwe minitö wæætë mönitö imönite waadete pönëninque eñeedäni, ämopa. ³ Mänömainö ante ämo incæte botö, Mini pante wæquinque, ante dicæ apænte ämogaa. Edæ botö do antabopa. Minitö tönö möni quëwenguinque incæ minitö tönö möni wænguinque incæ mönitö minitö tönö äanque bai entawente minitö iminite cöwë waadete pönëmönipa, antabopa.

⁴ Edæ, Minitö nõ pönente cæmini iminipa, ante pönëmopa. Mönitö apænemöni eñëninque minitö nè waa cæmini baminitapa, ante adinqwe botö mönitö apænedö ante nanguï tobopa. Minitö mänömaï cæmini iminipa, ante eñente wædinque botö gancæ pönëmopa. Ìninqwe mönitö wënæ wënæ inte wæwëmöni incæte botö wæætë godömenque watapæ tobopa.

⁵ Iïmaï edæ Mäatedöniabæ pöninqwe cætamönipa. Æmætæ æmætæ gote apænecæte ante cæyömönite wadäni bæ ta bæ ta cädäni wædinque mönitö ædö cæte guëmanguimönii. Edæ nanguï piïnte cädäni wædinque mönitö

paonga nantate wædinque önöwoca

adobaï guiñente wæwocatamönipa. ⁶ Incæte mönitö wæwëñömönite, Nē wæwēnāni gancæ bacædānimpa, ante nē pönö cæcā inongä Wængonguï iñömö Tito ingante da pönongä pongä adinque mönitö wæætē gancæ pönentamönipa. ⁷ Tömengä ponte a ongongä beyæ gancæ pönëñömönite tömengä, Coodintoidi botö imote waa cædāni adinque botö wæætē gancæ pönentabopa, ante apænecä ëñente mönitö godömenque totamönipa. Ayæ botö imote ante apænedinque tömengä, Bitö imite ante nanguï aïnente wædinque coodintoidi Ca ca wædānipa. Tömēnāni iñömö, Mönö ñöwo Pabodo beyæ ante nanguï cæcæimpa, ante wædānipa, ante Tito tedecä ëñëninque botö godömenque nanguï totabopa.

⁸ Botö doyedē cadota ante yewæmöninque da godömo æninque mönitö wæwente baminitawo. Nāwangä botö cadota beyæ wæwente baminitapa, ante wædinque botö, Quinante mänömaï yewæmömöi, ante wætabopa. Incæte ayæ ate, Coodintoidi wantæ iñö wæwëninque ñöwo iñömö edæ wæwēnāmaï inānipa, ante adinque botö ñöwo edæ, Nö cædinque yewæmömöimpa, ante piyænē cæbopa. ⁹ Edæ mönitö wæwëmini beyæ todāmaï inimo inte botö wæætē, Mini wēnæ wēnæ cædinö ñimpo cædinque mönitö Codito gämænö mini ponguinque wæwente baminitapa, ante adinque mänömaï beyænque totabopa. Edæ Wængonguï nänö änönö mini ëñënguinque wæwente bamini ininque mönitö cædö beyæ dicæ wæminiyaa.

¹⁰ Edæ Wængonguï nänö änönö ante wæwëmö bai mönö ocæ ëmænte ponte quëwënguinque impa. Ininque, Quinante mänömaï wæwëmoï, ante wædāmaï imoppa. Wæætē ingui-poga mönö quëwëngüimämo ante wæwëmö bai mönö wænguinque impa. ¹¹ Edæ Wængonguï nänö änönö ante do wæwënimini inte mönitö ñöwo, Mäninö möni wæwënö beyæ æbänö entawëmönii, ante nāmā

aedāni. Edæ mänömaï wæwëmini inte mönitö, Mönö ee ongönāmaï inte cæcæimpa, ante do cæminitapa. Cædinque, Mönö pönencabo wentamö mongænāmaï ingæimpa, ante nanguï cædinque mönitö nē wēnæ wēnæ cædingä ingante edæ do püiminitapa. Ayæ, Pabodo æbänö anguingää, ante guiñente wæmini incæte botö imote ante aïnente wæminitapa. Ayæ, Nē wēnæ wēnæ cædingä ingante mönö nö ante pangæimpa, ante do cæminitapa. Mänömaï eyepæ cædimini inte mönitö wentamö mongænāmaï iminipa, ante edonque abaimpa.

¹² Ininque mönitö iminite yewæmöninque botö nē wēnæ wēnæ cædingä beyæ ante wii yewæmontabopa. Tömengä wēnæ wēnæ cæcä wædingä beyæ ante adobaï yewæmönāmaï intabopa. Wæætē mönitö Wængonguï ayongä nāmā adinque, Mönitö Pabodoidi inānite waadete amönipa, ante, Nāwangä impa, ante edonque acæminimpa, ante botö mönitö beyænque ante yewæmontabopa. ¹³ Mönitö mänömaï cæmini adinque mönitö wëenëñedē nē wæwëmöni inte ñöwo iñömö gancæ pönëmönipa.

Mönitö waa cæmini beyæ wëenëñedē wæwëningä inte Tito adobaï gancæ pönente ñöwo watapæ pönengampa, ante adinque mönitö do gancæ pönëmöni inte ñöwo godömenque nanguï tomöni imönipa. ¹⁴ Botö do inöñedē Tito ingante apænedinque, Coodintoidi waa cædāni abopa, antabopa. Ñöwo mönitö waa cæmini adinque botö, Tito ingante botö apænedinö nö impa, ante adinque botö guingo imönāmaï imopa. Edæ botö mönitö iminite nöinö ante apænetawo. Edæ mönitö iminite nöinö ante apænebo bai botö Tito ingante, Coodintoidi waa cædānipa, ante apænedinque adobaï nöinö ante apænetabopa. ¹⁵ Ayæ Tito iñömö, Coodintoidi tömānāni botö imote waa adinque guiñente wædānitapa. Ayæ, Pöe, äninque tömēnāni botö apænebo ëñëninque Ao ante ëñente cædānitapa, ante pönëninque tömengä

mīnitō īmīnite godōmenque waadete pōnengampa. ¹⁶ Ayæ, Mīnitō cōwē waa cæmīni īmīnīpa, ante pōnēnīnque edæ botō adobai watapæ tobopa.

8

Mōnō godōmenque nanguī godongæimpa, ante

¹ Nōwo botō tōniñadāni apænebo ēñēedāni. Māatedōniabæ īñōmō Codito ingante godongāmæ nāni pōnencabo wayōmō nāni cabo wayōmō nāni cabo ongōñōnānīte Wængonguī Ōnōwoca pōnō apænecā ēñēnīnque tōmēnāni wæætē waadete cædinque iīmaī cædānīpa. ² Nanguī wēnæ wēnæ nantate wæwēnāni incæ tōmēnāni cōwē piyænē cæte watapæ todānīpa. Īnīnque ōmæpodāni incæte tōmēnāni nanguī mǎnāni bai cædinque, Wængonguī quīnāni quī, ante godōmenque tođinque nanguī gomonga godōnānīta. ³ Tōmēnāni edæ nāni godonguēnēnō ganca do godōnīnque ayæ godōmenque nanguī godōnāni adīmo inte botō, Nāwangā impa, ante apænebopa. Ayæ edæ tōmēnāni nāni nāmā pōnēnō bai cædinque, ⁴ Wængonguī quīnāni beyæ impa, ante mōnitō wadāni tōnō godongāmæ godoncæmōnīmpa, ante tōmēnāni mōnitō īmōnīte nanguī ānīnque ancaa ānānīta. ⁵ Mōnitō guīquēnē, Māatedōniabæ quēwēnāni tōmēnāni nāni godonte æīntaque godonguīnāni īnānīpa, ante edæ pōnentamōnīpa. Incæte tōmēnāni, Wængonguī quīmōni īmōnīpa, ante edæ Wængonguī ingante nāmā godōnīnque ayæ, Mīnitō īmīnite nē cæmōni bacæmōnīmpa, ānīnque mōnitō īmōnīte edæ adobai nāmā pōnōnānīta. Ayæ mōnitō pōnēnō ganca adobai godōnīnque tōmēnāni nāni godonte æīnta ayæ godōmenque godōnānīta.

⁶ Māatedōniabæ quēwēnāni mǎnōmai cædāni adīnque mōnitō Tito ingante iīmaī antamōnīpa. Bitō doyedē āmi ēñēnīnque coodintoidi waadete pōnēnīnque tæcæ godoncæ cædānīta cæbīi. Nōwo

wæætē āmi ēñēnīnque tōmēnāni nē waadete godōnāni badīnque eyepæ godoncædānīmpa, ante mōnitō Tito ingante nanguī antamōnīpa. ⁷ Mīnitō īñōmō wede pōnēmīni inte edæ nē waa pōni apænēmīni īmīnīpa. Ayæ godōmenque gomonga ēñēmīni inte mīnitō, Mōnō cōwē cæcæimpa, ante nanguī cædōmīni īmīnīpa. Ayæ mōnitō īmōnīte nē waadete pōnēmīni īmīnīpa. Mǎnōmai tōmānō ante do cædōmīni inte mīnitō nōwo adobai, Wængonguī quī, ante mōnō nē waadete godōmō bacæimpa, ante edæ nanguī cæedāni, āmopa.

⁸ Mǎnōmaīnō ānīnque botō, Cæedāni, ante wææ ānāmai īmopa. Wæætē, Mīnitō æbānō cæmīnī, ante ēñencæte ante cædinque botō wadāni nāni nanguī cædīnō ante apænetabopa. Mǎnōmaīnō ante apænedīnque botō, Mīnitō adobai tōmēnāni nāni cæbai nanguī waadete pōnēnīte cæmīnīta, ante acæte ante cædinque, Nē godōmīni baedāni, antabopa. ⁹ Mīnitō do ēñēmīnīpa. Mōnō Awēnē Itota Codito ōnædē quēwēnīnque nanguī gomonga ēnem pogaingā inte mōnō īmonte waadete pōnēnīnque iīmaī ante pōnō cægacāimpa. Botō ōmæpobo babo beyænque mīnitō nanguī wæætē entawencæmīnīmpa, ante cædinque tōmengā edæ mīnitō beyænque ante inguīpoga pōnīnque edæ ōmæpocā bagacāimpa.

¹⁰ Ayæ, Mǎnīnō mīni godonguīnō ante æbānō cæquēnēmīni īmīnī, ante botō nāmā pōnēnīnque iīmaī āmopa. Wadepo īnōñedē wadāni godōnāmai īñōnāni mīnitō īñōmō edæ do tāno godōmīnīta. Mōnō godongæimpa, ante edæ mīnitō cōwē tāno cæinēmīni īmīnīta. ¹¹ Īnīnque, Mōnō godongæimpa, ante quīngæ ānīmīni inte nōwo edæ īnque cæedāni. Mīni ēadīncoo adīnque mīnitō, Eyepæ inte botō pancacooga godoncæboimpa, ante mīni ānīncoo edæ godōmīni adīnque, Eyepæ godōmīnīpa, ante acæimpa. ¹² Edæ æcānō godōinengā tōmengā nānō godonte æīnta tōmānta ad-

inque, Æpotadö botö godonguënemo imoo, ante adinque mänimpotaque godöningue idæwaa. Godömenque nanguï mangampa diyæ nanguï godonguingää.

¹³ Mänömaï äningue botö, Wadäni pönömenque godöningue guëmännönäni minitö wæætë mini eyepote wæquinque godömenque nanguï godoncæminimpa, ante dicæ ämogaa. ¹⁴ Wæætë, Cöwë eyepæ bacæimpa, ante ämopa. Edæ mäincoo ñowo eyepæ mäninque minitö nê ænguënente wædäni inänite godömini ænänipa. Ìnque iincayæ ate minitö wæætë nê ænguënemini bamini ate tömönäni wæætë eyepæ mante ate minitö iminite pönönäni æñömini adopo adopo edæ eyepæ babaimpa. Mänömaïncö ancæte ante ämopa. ¹⁵ Edæ do yewæmongatimpa. “Cænguï gomonga wææmpo æningä incæ tömengä nänö ænguënganca ænte bai mäninque godömenque mänämaï ingantapa. Wæætë edæ wædænque wææmpo æningä guiquënë tömengä nänö ænguënganca eyepæ ænte bai eyepæ mangantapa.” Ante nani yewæmongainö bai ìnque bacæimpa, ante minitö iminite ämopa.

Minitö weca Titoidi poncædänimpa, ante

¹⁶ Botö cöwë, Coodintoidi beyæ cæcæimpa, ante minitö iminite waadete pönömopa. Ayæ, Wængonguï pönö apænecä eñëningue Tito iñömö botö pönemo bai adobai pönente cæcampa, ante adinque botö wæætë Wængonguï ingante waa ate pönëningue apænebopa. ¹⁷ Edæ mönitö, Coodintoidi weca goe, ämöni eñëningue edæ Tito do Ao ante pongä aedäni. Incæte wii mönitö äninö beyænque pongampa. Wæætë nämanque pöinente wædinque tömengä nanguï todinque minitö weca pongampa.

¹⁸ Ayæ Tito tönö wacä mönö tönñacä ingante da pönömöni pongampa. Ìngä Tito tönö nê pongä iñömö tömengä Codito ingantedö ante watapæ möni apænedö ante nê

apænecä ingampa. Ìnque Codito ingante godongämæ nani pönencabo wayömö nani cabo wayömö nani cabo tömänäni tömengä ingante waa ate waa apænedänipa. ¹⁹ Codito ingante nani pönencabo incæ adocä ingante apænte æningue, Pabodoidi tönö gocæbiimpa, ante da godönäni ate tömengä mönitö tönö godongämæ goquingä ingampa. Edæ mönitö, Mönö Awënë ñäö apäite bai emongä ingampa, ante acædänimpa, ante cædinque ayæ, Mönitö wadäni beyæ cæinëmönipa, ante acædänimpa, ante cædinque minitö da godonguincoo ænte goquimöni imönipa. Mänömaï cæcæte ante goyömöni, Tömengä godongämæ gote cæcæcäimpa, ante da godönäni gocæcäimpa. ²⁰ Edæ wadäni, Pabodoidi babæ cædänipa, ante änämaï incædänimpa, ante wææ cædinque mönitö nö pönö cædinque nanguï pönö minitö godonguincoo ænte godinque pædæ godoncæmönimpa. ²¹ Edæ, Mönitö Wængonguï ayongä nö cæmöni inte waodäni ayönäni adobai edonque pönö cædinque nö pönö cæcæimpa, ante cæmönipa.

²² Ayæ wacä mönö tönñacä iñongante mönitö æpogamë cöwä ayömöni tömengä cöwë tömää nö cæcä inongampa. Ayæ ñowo tömengä, Coodintoidi nö cædänipa, ante pönengä inte godömenque waa cædongä ingampa. Mänömaï ingampa, ante adinque mönitö ñowo tömengä ingante da godömöni godinque tömengä iñäna tönö minitö weca poncæcäimpa.

²³ Tito iñömö botö tönö godongämæ cöwë cæcampa. Ìnque minitö beyæ guëa nê cæmöna imönapa. Codito ingante nani godongämæ pönencabo incæ mönitö tönñada Tito tönö wada inate da godönäni godinque tömönäni, Mönö Codito ingante waa acædänimpa, ante nanguï cæda inapa. ²⁴ Ìnänäni inänite apænedinque mönitö, Coodintoidi nê waa cædäni inänipa, ante do apænetamönipa. Ìnque minitö eyepæ godömini adinque tömönäni, Näwangä impa, ante

edonque acædänimpa. Ayæ adobaï, Minitö waadete pönö cæmini adinque Pabodoidi wæætë minitö iminite waa adänipa, ante acædänimpa, ante cæedäni. Mänömaï cæmini adinque Codito ingante godongämæ nani pönencabo wayömö nani cabo wayömö nani cabo tömänäni adobainö ante edonque acædänimpa.

9

Mönö wædämaï eyepæ pönï godongæimpa, ante

¹ Ñöwo mäninö, Wængonguï quïnäni beyæ minitö godoncæminimpa, ante botö idæwaa yewæmömopa.

² Edæ, Minitö wædämaï inte do cæminipa, ante ëñëninque botö Mäatedöniabæ quëwënäni inänite apænedinque, Acayabæ quëwënäni iñömö wadepo inöñedë do godoncæte ante cædönänimpa, ante do apænetabopa. Apænebo ëñëninque tömënäni wodo tömänäni, Æ Acayabæ quëwënäni nani quingæ cæbaï mönö adobaï cæcæimpa, ante cædänipa.

³ Incæte botö ñöwo mönö tönïñadäni inänite da godömo pöninque tömënäni minitö iminite apænedäni ëñëninque minitö wæætë eyepæ godoncæminimpa. Mänömaï cæmini ate botö babæ apænedämaï imoi, ante edonque ëñengæimpa. ⁴ Iñæmpa Mäatedöniabæ quëwënäni botö tönö godongämæ ponte ayönäni minitö wii eyepæ cæmini adinque tömënäni wæætë, Minitö dicæ cæminiyaa, ante badete tobainänipa. Ayæ mönitö guiquënë, Coodintoidi iinque cæcædänimpa, ante në animöni inte odadete guingo imonte wæbaimönipa. Minitö adobaï, Möni cæquënëñö cædämaï imönipa, ante guingo imonte wæbaimönipa. ⁵ Iinque minitö, Godoncæmönimpa, ante mini äninö baï eyepæ godoncæminimpa. Ante cædinque botö mönö tönïñadäni inänite äninque, Minitö gote apænemini ëñëninque coodintoidi ædæmö pönente cæcædänimpa, ante da pönömo pönäni aedäni. Iinque

minitö tönö godongämæ cædäni ate minitö ædæmö pönëninque, Botö wææ gompodämaï inte waa todinque godömopa, ante godoncæminimpa.

⁶ Iïmaï ante pönëedäni. Wædænque quiyadingä iñömö amiñaimö wædænque pete æncæcäimpa. Nanguï quiyadingä guiquënë amiñaimö nanguï pete æncæcäimpa. ⁷ Wadäni qui, ante æcänö watapæ todinque godönaa, ante adinque Wængonguï tömengä ingante waadete pönengampa. Iinque wadäni wææ änämaï iñönäni minitö, Botö æpotadö godonguimoo, ante pönëninque tömämäni wædämaï inte mini änimota adopota godöninque do godonguënemini iminipa. ⁸ Ayæ, Eyepæ pönï ëamini inte minitö quïëmë cæmini incæ tömänäni beyæ ante cöwë godö waa cæcæminimpa, ante Wængonguï cæcampa. Iinque, Minitö eyepæ ænte ëadinque mänömaï cæcæminimpa, ante tömengä nanguï cædongä inte cöwë eyede tate baï waadete pönö cæcä ingampa. ⁹ Edæ docä ingante ante iïmaï ante yewæmongatimpa.

“Yepanca quiyacä baï inongä inte tömengä, Ömæpodäni qui, ante wayömö wayömö godongan-tapa. Iinque tömengä nö nänö cædinö iñömö edæ cöwë ewënamäi ongongæimpa.”

¹⁰ Ante yewæmongatimpa. Në quiyacä ingante Wængonguï, Tömëmö quiyaquimö, ante eyepæ pönöninque adobaï, Cænguï, ante tömämö imonte eyepæ pönongä ænte cæmompä. Minitö iñömö eyepæ ëamini inte wacä ingä wacä ingä quiyate baï nënempocæminimpa, ante cædinque Wængonguï mini godonganca da pönöninque godömenque gomonga da pönongä æncæminimpa. Mänömaï eyepæ da pönongä æninque minitö wæætë nö cædinque wadäni nanguï inäni inänite nënempomini æninque tömënäni wæætë amiñaimö tä pete baï watapæ quëwencædänimpa. ¹¹ Minitö pæ gompodämaï inte wadäni

inānite cōwē pædæ godoncæminimpa, ante cædinque mīnitō imīnite Wængonguī nanguī pōnī pōnongā æncæminimpa. Æninqe mīnitō pæ gompodāmaī inte pædæ godō pædæ godō cæmīni adinque mōnitō wæætē, Coodintoidi mǎnōmaī cædānīpa, ante tedemōni ēñēninqe wadāni wæætē Wængonguī ingante waa ate pōnēninqe apænecædānīpa.

¹² Wadāni quī, ante do godōmīni æninqe Wængonguī quīnāni tōmēnāni nāni ænguēnēnō ante eyepæ pōnī æncædānīpa. Ayæ mīni godōnō æninqe tōmēnāni mīmōno eyede tate baī Wængonguī ingante waa ate pōnēninqe nanguī apænecædānīpa. ¹³ Mōnō Codito ingantedō ante watapæ ēñēninqe mīnitō Ao ante do pōnēmīnitapa. Ininqe Wængonguī nānō ānōnō ante do ēñente cædinque mīnitō, Ōmæpodāni quī, ante pædæ godōmīni æninqe nē ænāni wæætē Wængonguī ingante, Bitō ñāō baī nō pōnī cæbi ate coodintoidi bitō ānōnō ante ēñente cædānīpa, ante watapæ apænecædānīpa. Ayæ nē ænīnāni inte adodāni godōmenque apænedinque, Nē ōmæpodāni tōmānāni inānite da godōninqe coodintoidi iñōmō mōnitō imōnite adobaī eyepæ pōnōnāni æmōnīpa, ante Wængonguī ingante godōmenque waa ate apænecædānīpa. ¹⁴ Ayæ, Coodintoidi inānite Wængonguī godōmenque nanguī waadete pōnō cæcā beyænque tōmēnāni waa cædāni inānīpa, ante pōnēninqe nē ænīnāni iñōmō edæ mīnitō imīnite waadete pōnēninqe mīnitō beyæ ante Wængonguī ingante apænecædānīpa.

¹⁵ Wængonguī iñōmō godōmenque waa cædinque mōnō Codito ingante da pōnongā ængamōīpa. Ininqe mōnō, Wængonguī, bitō waa pōnī pōnō cægabiīpa, ante mōnitō ædō cæte eyepæ inte waa ate pōnente apænequīmōnīi, ante mōnō Wængonguī ingante apænecæīpa.

10

Pabodo, Itota nānō nē da godōnīmo imopa, angampa

¹ Mīnitō, Wayōmonque quēwēninqe Pabodo nanguī pīinte angampa, ante pōnēmīnitawo. Wæætē mōnitō weca pōninqe awincadō awinca adinque tōmengā guīñēnete wædinque pæ wēenecampa, ante pōnēmīnitawo. Iñæmpa mīni ānōmo mānīmōtō inte iīmaī āmopa. Codito iñōmō edæ gānē pōnengā inongā inte pōnō piyænē cæcantawo. Botō adobaī ñōwo piyænē cædinque mīnitō imīnite pōnō waadete apænebopa. ² Pabodoidi iñōmō inguipogaque ante pōnente cædānīpa, ante pancadāniya odadete ānewēnānīpa. Tōmēnāni inānite botō guīñēnedāmaī inte nanguī ancæboīpa. Mīnitō guīquēnē adobaī odadete āmīni ininqe botō mīnitō weca pōninqe pīinte anguēnēmo iīmāimopa. Ininqe, Wīī pīinte anguīmo bacæboīpa, ante wææ cæcæte ante botō ñōwo mīnitō imīnite, Ee aquēnē quēwēmīnīi, ante waadete pōnente yewæmōmopa.

³ Edæ inguipoga quēwēmōni incæte mōnitō Wængonguī beyæ ante wæætedō wæætē cæcæte ante cædinque inguipogaque quēwēnāni nāni wæætedō wæætē cæī baī cædāmaī imōnīpa. ⁴ Wæætē edæ mōnitō Wængonguī beyæ ante wæætedō wæætē cæcæte ante cædinque inguipogaque quēwēnāni nāni wænoncaquincoo næænāmaī inte cæmōnīpa. Wæætē Wængonguī tōmengā nānō tæī piñæmāmo ænte mīmōno entawēninqe eyepæ næænte baī badinque mōnitō tōmēnāni nāni tæī mænōincō bæ tate baī cædinque wæætedō wæætē nāni godō ānewēnō ante wido cæte baī cæmōnīpa. ⁵ Wængonguī ingante pōnēnāmaī ingæīpa, ante nē pōnēwēnāni inte ængæ gantidinque tōmēnāni iñōmō, Wadāni tōmānāni adobaī Wængonguī ingante pōnēnāmaī incædānīpa, ante cædinque babæ wapiticæ cædānīpa. Mānīī babæ wapiticæ nāni cædōnō ante mōnitō wæætē bæ

tate wido cæmönipa. Edæ, Codito ingante mönō ēñengæimpa, ante nō apænemōni ēñēninque wadāni idiquibæ pönēwēnāni iñōnāni mönitō wæætē mäninō nāni pönēwēnō tōmānō ō ænte bai wido cæmönipa. ⁶ Ayæ mīnitō ædæmō nē ēñente cæmīni bamīni ate adocanque incæ ēñēnāmaī cæcā adinque mönitō wæætē tōmengā ingante do pan-guimōni imönipa.

⁷ Æbānō i, ante edonque ongō abaiminipa. Pancamīniya, Botō nāwangā Codito nempo quēwēmo imopa, ante pönēmīnitawo. Mīnitō mänōmaī pönēmīni inte godōmenque iīmaī ante pönenguēnēmīni iminipa. Botō Codito nempo quēwēmo imo bai Pabodoidi adobai Codito nempo quēwēnāni inānipa, ante nāwangā impa, ante pönenguēnēmīni iminipa. ⁸ Iñæmpa Wængonguī mönitō imönite āninque, Mīnitō nē āmīni badinque coodintoidi inānite bæ tate wido cædāmaī incæmīnimpa. Wæætē ædæmō āmīni ēñēninque coodintoidi wæætē oncō tæi mænonte bai gongæncædānimpa, ante cæedāni, ante Wængonguī pönō angā ēñēninque mönitō nē āmōni batamönipa. Ininque botō, Nē āmo inte nāmā tocæboimpa, ante tedebo incæte guiñēnedāmaī tedecæboimpa.

⁹ Botō, Cadota ante botō yewæmōinta adinque mīnitō guiñente wæcæmīnimpa, ante dicæ āmogaa. ¹⁰ Pancamīniya, Pabodo tæi piñænongā bai inte cadota ante yewæmōninque nanguī angā awædō, ante wæmīnipa. Wæætē edæ adocā incæ mönitō weca ponte ongōninque edæ aquī ingā amönipa. Tōmengā nānō tedepāmo onōmāmoque bai impa, ante pönēmīni awædō. ¹¹ Iñæmpa, Tæi piñæmōni inte cadota ante nē yewæmōmōni incæ mönitō adomōni inte mīnitō weca ponte ongōninque adobai tæi piñænte cæcæmönimpa, āmo ēñēmaimīnipa.

¹² Pancadāniya nāmā incæ, Waēmō pōni imopa, ante tededāni incæte tōmēnāni nāmā nāni tede bai mönitō

ædō cæte adobainō ante tede-quimōnii. Tōmēnāni iñōmō, Ægancadō waa cæbo eyepæ inguīi, ante nāmā nāni cægancaque ante adinque edæ, Eyepæ cætabopa, ante pönēwēnānipa. Tōmēnāni nāni cædō ante, Waa cætawo, ante tee mancæte ante, Do botō cædinō bai adobai cæbopa, ante adinque, Eyepæ impa, ante pönēwēnānipa. Mänōmaī nāmā nāni pönēwēnonque ante cædinque tōmēnāni ēñēnāmaī inte oda cæte cædānipa.

¹³ Mönitō guiquēnē, Iingancaque goedāni, ante Wængonguī nānō angancaque cōwē gomönipa. Ininque tōmengā, Coodintoidi ganca godinque apæneedāni, angā ēñēninque mönitō do gote apænedinque, Māningancaque waa cæmönipa, ante nāmā waa ate tedemönipa. Godōmenque ante tededāmaī imönipa. ¹⁴ Mīnitō ganca pönāmaī inte bai mönitō, Coodintoidi weca gote do cætamönipa, ante tedemōni bai babæ wapiticæ incædōnimpa. Incæte mīnitō ganca do pōninque Codito ingantedō ante mönitō watapæ mōni ēñēnō ante apænetamönipa. Ininque edæ, Māninganca cætamönipa, ante māninque ante tedemönipa. ¹⁵ Ayæ wadāni nāni cædinō ante adinque mönitō, Tōmēmōni cædinō impa, ante ānāmaī imönipa. Wæætē mīnitō godōmenque godōmenque wede pönēñōmīni mönitō wæætē adodō mīnitō weca ponte quēwēninque godōmenque gomonga cæyōmōni mönō watapæ bacæimpa, ante pönēmönipa. ¹⁶ Ayæ mīnitō weca iinque cædinque mönitō godōmenque gomonga godinque mönō Codito ingantedō ante watapæ mōni ēñēnō ante apænecæmönimpa, ante pönēmönipa. Mänōmaī cædinque mönitō wacā nānō cædiñōmō ante, Mönitō māniñōmō cætamönipa, ante tededāmaī incæmönimpa.

¹⁷ Æcānō, Botō waēmō pōni inōmo inte waa cæbopa, ante toinēna tōmengā wæætē, Mōnō Awēnē waēmō pōni inongā inte pönō waa cæcampa,

ante toquēnengā ingampa. ¹⁸ Edæ, Waēmō inōmo imopa, ante nāmā ānongā ingante Wængonguī waa adāmaī ingampa. Wæætē, ĩngā waēmō inongā ingampa, ante mōnō Awēnē nānō ānongā ingante ante Wængonguī wæætē waa acampa.

11

Wængonguī beycē, ante pancadāniya babæ apænedānipa

¹ Nōwo botō adodeque ōnonque tedete bai yewæmōmo adinque mīnitō ee amīni ĩninqe botō waa tobaīmopa. Wadō āmo, Mīnitō ee ayōmīni edæ botō ōnonque tedete bai do yewæmōmopa. ĩninqe ĩmaī ante odōmoncæte ante yewæmōmoī aedāni. ² Wængonguī wææ gompocā bai botō adobaī mīnitō beyæ ante wææ gompote āmopa. Mīnitō baquēcā mōnāmaingā bai ĩnōmīnite Codito ængā beyænque mīni pōnencabo tōmengā nempo nō cæte quēwencæmīnimpa, ante pædæ godoncæte ante cædinque botō tōmengā adocanque ingante, Bitō quīnāni ĩnānite æe, antabopa. ³ Mīnitō nōingā cædinque wacā mīñæ godāmaī inte Codito ingante waadete pōnēmīni incæte botō, Mīnitō oda cæmīni wæcæ wæ, ante guīñente wæbopa. Eba wodi ingante Tæntæbo nanguī ēñengā inte babæ cædinque apænecā ēñēninqe tōmengā nānō oda cægāi bai mīnitō wīi adobaī oda cæcæmīnimpa, ante botō wææ ante apænebopa.

⁴ Mōnitō, Itota ingante pōnengæimpa, ante do apænemōni ēñēmīnitapa. Incæte wacā mīnitō weca pōninqe nāwā Itota ingante apænedāmaī inte, Wacā Itota ingante pōnēedāni, ante babæ apæneyongante mīnitō edæ ēñēē cōmīni awædō. Adobaī Wængonguī Ōnōwoca do ængāimīni ĩnōmīnite wacā ōnōwoca pō guīyongante mīnitō ee æmīni guīicā awædō. Ayæ wadāni mōnō Codito ingante ante apænedāmaī ĩnāni inte, Wacā ængā beyæ quēwengæimpa,

ante babæ apæneyōnāni mīnitō edæ ēñēē cōmīni awædō. ⁵ Mānōmainō ante nē tededāni ĩnōmō nāmā ante pōnēninqe, Nē gode āmōni inte mōnitō ñænæmōni pōnī imōnipa, ante edæ babæ ānewēnānipa. Tōmēnāni nāwangā ñænænāni ĩnāni bai botō dicæ wædāmo inguēnēmogaa, ante pōnēmopa. ⁶ Botō æbānō tedeboo, ante ēñēninqe mīnitō ĩnōmō, Ōnōnepāmoque tedecampa, ante pūimīnitawo. Incæte botō ædæmō adīmo inte nē ēñēnīmo inte apænebopa. Pabodo mānōmaī inongā inte apænecampa, ante acæmīnimpa, ante mōnitō cōwē mīnitō imīnite edonque odōmōmōni amīnitapa.

⁷ Mīnitō imīnite ængō cæte bai cæcæte ante botō Wængonguī ingantedō ante watapæ apænebo beyæ ænāmaī intabopa. Mānōmaī ænāmaī inte botō nāmā edæ piinte bai cædinque dicæ wīwa cætabogaa. ⁸ Codito ingante godongāmæ nāni pōnencabo wayōmō nāni cabo wayōmō nāni cabo da pōnōnāni ō æninqe botō mānintaque godonte ænte quēwēninqe mīnitō beyæ cætabopa. ⁹ Ayæ mīnitō weca ongōninqe botō quīēmē æīnente wæbo incæ edæ waa atabopa. Wadāni edæ mōnō tōnīñadāni incæ Māatedōniabæ quēwente pōninqe tōmēnāni botō ænguēnēnō ante eyepæ pōnōnāni æntabopa. ĩninqe coodintoidi botō ānō beyæ wædāmaī incædānimpa, ante wææ cædinque botō ĩnōmō edæ, Pōnōmīni æmoedāni, ante cōwē ānāmaī intabopa. Ayæ ĩncayæ ate cōwē ānāmaī incæboimpa. ¹⁰ Mōnō Codito nō nānō apænedō ante ēñente entawēmo inte āmopa. Botō, Mānōmaī cædinque waa cæbopa, ante cōwē edæ tedeyōmote mīnitō Acayabæ quēwēmīni inte edæ wææ cædāmaī incæmīnimpa. ¹¹ Quīnante mānōmaī ante tedeboī. Mīnitō imīnite waadedāmaī inte mānōmaī ante tedeboī. ĩñæmpa botō æbānō mīnitō imīnite waadete pōnēmoo, ante do againgā inte Wængonguī tōmengā ancæcāimpa.

¹² Wadāni guiquēnē, Mōnitō Codito nānō nē godongaīmōni īmōnipa, ante nē ānāni guiquēnē, Æbānō cæte odōmōmōni adinque wadāni Pabodoidi inānite waa adō bai mōnitō īmōnite adobai waa acædānimpa, ante wædānipa. Īninqe botō īñōmō, Īnāni mǎnōmǎnō ante odōmōnāmaī incædānimpa, ante mǎnōmaī tedete wææ cæbo inte edæ cōwē godōmenque wææ cæcæboimpa. ¹³ Tōmēnāni īñōmō edæ, Wadāni oda cæcædānimpa, ante awēmō cædāni inānipa. Mōnō Codito tōmēnāni inānite da godōnāmaī ingā incæte tōmēnāni īñōmō edæ, Codito nānō da godongaīmōni īmōnipa, ante babæ apænedānipa. Ayæ edæ mōnitō Codito nānō da godongaīmōni mōni ēmōnō bai ōnōmoque ēmōninqe babæ cædānipa. ¹⁴ Mīnitō, Tōmēnāni quīnante wacā bai ēmōnānii, ante wæmīnitawo. Īñæmpa tōmēnāni awēnē Tatāna incæ babæ cædinque Wængonguī anquedoidi ñāō nāni ēmōnō bai ñāō ēmonte bai ēmongampa. ¹⁵ Īninqe Tatāna beyæ nē cædāni īñōmō tōmēnāni awēnē Tatāna nānō babæ cædō bai adobai babæ cædinque, Nē nō Cædongā ingante nē cæmōni īmōnipa, ante ōnōmoque ēmōnānipa. Īninqe tōmēnāni nē ōnōmoque ēmōnāni inte ōnonque ēwente baquīnānidō anguēnē.

Æbānō caate wæboo, ante Pabodo yewæmongampa

¹⁶ Botō ñōwo adodō ante yewæmōmopa Mīnitō, Pabodo ocai ōmædæcacā īnongā inte ōnonque tedecampa, āmīnitawo. Mǎnōmǎnō ante ānāmaī īmāwedāni. Incæte wacā ocai ōmædæcacā tedeyongante mīnitō ee amīni tedecā bai botō adobai ocai ōmædæcabo inte bai, Nāmā waa cæbo īmopa, ante adodeque tedebo īninqe ee amīni tedeboedāni. ¹⁷ Botō ñōwo mǎnōmaī nāmā waa ate bai tedete yewæmōninqe mōnō Awēnē nānō āmaī wīī yewæmōmopa. Wæætē ocai ōmædæcacā mā nānō pōnente tede bai adobai ōnonque tedete bai yewæmōmopa. ¹⁸ Pancadāniya nanguī ināni incæ, Mōnitō nāmā

waa cæmōnipa, ante edæ ingui-pogaque quēwēnāni tededāni bai adobai tededānipa. Tōmēnāni mǎnōmaī tededāni īninqe botō adobai, Nāmā waa cæbopa, ante tedecæboimpa. ¹⁹ Nē ēñēmōni īmōnipa, ante nē amīni inte mīnitō īñōmō ocai ōmædæcadāni ōnonque tedeyōnānite ee ēñēē cōmīnipa tōō. ²⁰ Wacā edæ mīnitō īmīnite bæi ongongā wædinque mīnitō tōmengā ingante ee nē cæmīni bawēmīni awædō. Wacā babæ wapiticæ cædinque mīnitō quī inguēnē incæ ō ængā incæte mīnitō edæ ee amīnipa. Wacā mīnitō awēnē bai nāmā ængō cæte angā incæ ee ēñēmīnipa. Wacā mīnitō īmīnite pōnō tamongā incæte mīnitō ee ate wæmīni awædō. ²¹ Botō wæætē aquīimo inte, Tōmēnāni nāni nanguī cædō bai ædō cæte cæquīmoo, ante botō guingo imonguinque ōnonque tedeboipa tōō.

Tōmēnāni nāmanque waa adinque edæ guīñēnāmaī inte tededānitawo. Botō adobai nāmanque waa adinque edæ guīñēnāmaī inte tedecæboimpa. Incæte mǎnōmaī tededinque botō ōnonque badete tote bai tedeboipa. ²² Tōmēnāni guiquēnē ebedeoidi inānitawo, ante pōnēmīni. Botō īñōmō edæ tōmēnāni nāni īmaī adobo īmopa. Tōmēnāni idægoidi inānitawo. Edæ botō tōmēnāni nāni īmaī adobo īmopa. Tōmēnāni Abadāō wodi pæīnāni inānitawo. Edæ botō tōmēnāni nāni īnō bai adobo Abadāō wodi pæīmo īmopa. ²³ Mōnō Codito beyæ nē cædōnāni inānipa, ante pōnēmīni. Botō edæ tōmēnāni nāni īmaī inte edæ gomonga īmopa. Incæte mǎnōmǎnō ante tededinque botō ocai ōmædæcacā bai inte ōnonque tedeboipa. Tōmēnāni inānite adopoque adopoque wædænque cæyōnāni botō godōmenque nanguī cægaboimpa. Tōmēnāni inānite wædænque tee mōnedāni wæyōnāni botō imote godōmenque wæætē wæætē tee mōnedāni wægaboimpa. Tōmēnāni inānite wædænque tæi pānāni wæyōnāni botō imote godōmenque nanguī tæi pānāni wægaboimpa. Ayæ botō wæætē

wæætē wodo wængaboimpa.

²⁴ Oodeoidi æmontaimenca wodo coadenta ganca adoyedē nāni cōwē tæi pāimpoga botō imote adoyedē mānimpoga tæi tæi pāninqe ōnompō æmæmpogoncaque wæætē adopoga adopoga tæi tæi pānāni wægaboimpa. ²⁵ Ayæ cantaca mem-poga go adopoque botō imote tæi tæi pānāni wægaboimpa. Ayæ adopoque botō imote dicaca tacadāni wangæ wængaboimpa. Ayæ wipodē wogaa godinque mem-poga go adopoque wipo tente tobæmpo wægaboimpa. Edæ wii eyepæ gote botō tōmāā itædē tōmāā woyowotæ tæcæpæno pōni wæwogaboimpa. ²⁶ Wayōmō wayōmō botō ancaa godinque wætabopa. Ōnō æpæmpo wodo bete wæntabopa. Nē ō ænāni incæ botō guidēnāni incæ wadāni incæ wodo wænōnāni wæmo adinque botō wænguinque ante wægaboimpa. Ayæ tōmēnāni nāni quēwēñōmō quēwēninqe, Ōnōmæca quēwēninqe, gāwapæno owodinque botō wænguinque ante wægaboimpa. Ayæ wadāni incæ, Mōnō pōnencabo imopa, ante babæ ānāni adinque botō iñōmō edæ, Babæ cædāni wæncæ wæ, ante wægaboī aedāni. ²⁷ Botō pancaōnaa tōmāā woyowotæ miimo inte nanguī cædinque wægaboimpa. Tepæ pancaōnaa gæwænte wægaboimpa. Pancaōnaa cænguī dæ ā ate gue ænente wægaboimpa. Edæ æpogamē pōni cænāmaī inte wægaboimpa. Pancayedēña botō weocoo ōmaabo inte yoguite wægaboimpa.

²⁸ Mānōmaī wædōmo inte botō, Codito ingante godongāmæ nāni pōnencabo tōmancabodāniya nāni wædō ante æbānō cæquimoo, ante wædinque iimō iñō iimō iñō nanguī cæbopa. ²⁹ Edæ wacā aquīngā inte wæcā iinque botō adobāi aquīmo inte baī wæbopa. Ayæ, Wēnæ wēnæ cæe, ānāni ēñēninqe adocanque oda cæcā ēñente wædinque botō ædō cæte wæwēnāmaī inguimoo.

³⁰ Iinque, Nāmā tæēmō inte cæbopa, ante tededāmaī incæboimpa. Wæætē,

Æbānō aquīmo inte cæbopa, ante acædānimpā, ante botō mānionque ante tedecæboimpa. ³¹ Wængonguī iñōmō mōnō Awēnē Itota Wæmpocā inongā inte edæ tōmengā adocā iñōmō Itota Wængonguī ingampa. Tōmengā waēmō pōni inongā inte cōwē waa pōni cæcampa, ante mōnō tōmengā ingante cōwē apænecæimpā. Tōmengā iñōmō edæ, Pabodo nō angampa, ante do ēñengampa. ³² Ayæ iimaī cædāni wægaboimpa. Adeto Tidi-abæ awēnē nānō inōñedē māniñedē botō imote bæi ongoncæte ante cædinque tōmengā nānō emiñængā wædænque awēnē iñōmō iimaī cæcantapa. Tōmengā wadāni inānite angā ēñēninqe tōmēnāni wæætē Daāmaco iñōmō tōmēnāni nāni wīni wææ cæincō boyæ yabædemō gāānē wānō cōñōnāni, ³³ botō tōnō cædāni guiquēnē Daāmaco nāni wīni wææ cæincō boyæ cæimpiticæ inō otodē ñā cædete botō imote pædæ wæænōnāni ti wææ aamō cæte wodii winongaboimpa.

12

Pabodo, Iimaī wūmonte baī atabopa, angampa

¹ Ōnonque tedebo incæte botō, Waa cætabopa, ante cōwē tedequēnēmo imopa. Iinque botō ñōwo edæ, Wūmonte baī ayōmo mōnō awēnē mā pōni odōmongā atabopa, ante yewæmoncæboimpa. Ayæ tōmengā, Æbānō i, ante edonque pōni nānō odōmōnō ante godōmenque yewæmoncæ cæbopa. ² Codito nempo nē quēwēmo iñōmote Wængonguī do catodote wadepo iñonte botō imote ōnædē wænōmēnæcaōnæ mæicā æigaboimpa. Incæte wacā æicā ate baī nāmā incæ agaboimpa. Wabānō ōnōwocaque inte æigaboī. Iintai ēñate wabānō inque inte æigaboī, ante botō adāmaī imopa. Wængonguinque nē æente mæigaingā inte tōmenganque ēñengampa. ³ Edæ baō ēñate æibo incæ baō ōmaabo inte æibo incæ Wængonguinque ēñēñongā botō,

Īmaī ingatimpa, ante māninqe ēñēmopa. ⁴ Waēmōnædē tōmengā ōmæ ĩñōmō Wængonguī ænte mæicā æigaboimpa. Māniñōmō waa pōni apænedāni ēñēmo incæte tōmengā, ĩñōmō mōni apænedō ante mīni waocabo apænedāmaī incæminimpa, ante wææ angā ēñēninqe botō waobo inte ædō cæte apænequīmo.

⁵ Īninqe wacā mānōmaī ōōnædē æite ēñengā ĩninqe botō, Tōmengā waa pōni cæcampa, ante do apænebaīmopa. Wæætē nāmā botō waa cædōnō ante apænedāmaī incæboimpa. Incæte, Tōmēmo aquīmo inte ōnonque cætabopa, ante māniñonque ante botō nāmā waa ate baī apæneceboimpa. ⁶ Waa cægaboimpa, ante tedebo ĩninqe botō wīi ocai ōmæcabo inte edæ tedebaīmopa. ĩñæmpa nāwangā waa cægāimo ĩnōmo inte botō nō ante edæ tedebaīmopa. Incæte botō wædænque apænete pōnōmenque cæyōmote æcāmenque incæ, Pabodo godōmenque waa pōni cæcampa, ante ānāmaī incæcāimpa, ante wææ cædinque botō waa cægāinō ante tededāmaī inte edæ pæ wēēnebopa.

⁷ Wængonguī mā nānō odōmongāinō æbānō waa pōni ingateī, ante wadāni adāmaī ĩñōnāni botō adoboque atabopa. ĩninqe, Pabodo, Botō adoboque nē agāimo ĩmopa, ante nāmā waa adāmaī incæcāimpa, ante wææ cædinque Wængonguī angā ate Tatāna botō ĩmote pōnō da boo codongate ocæ ocæ coingā baī cæcā wætabopa. ⁸ Mānōmaī cæcā wædinque botō mempoga go adoboque Wængonguī Awēnē ingante apænedinque, Botō daa cogate baī wæyōmote o tongaate baī cæbi quēwēmoē, ante nanguī ante wætabopa. ⁹ Ca wæyōmote mōnō Awēnē wæætē, “Nē aquī pōni ĩnāni ĩñōnānite botō tæi piñæmāmo eyepæ pōni pōnōmo æninqe tōmēnānique wæætē tæi piñænte entawencædānimpā. ĩninqe bitō nē aquīmi ĩmi beyænque botō waadete

pōnō cædō ĩñōmō edæ eyepæ pōni impa.”

Īninqe mōnō Codito nānō tæi piñænte cæpāmo ænte entawencæte ante cædinque botō ĩñōmō edæ, Nāmā aquīmo inte botō wædinō beyæ ante botō nāmā waa ate tobopa, ante tededinque godōmenque tocæboimpa. ¹⁰ Æyedēnō aquīmo ĩmoī māniñedē edæ tæi ēwocaboimpa. Mānōmaī beyæ aquīmo inte botō Codito beyænque nanguī tobopa. Badete tote piinte cædāni wæbo incæte botō piyænē cædinque tobopa. Ancaa nanguī caate wædinque nangæ babo incæ, togænte pānāni wæbo incæ, Ædō cæte quēwenguīmo, ante wæbo incæ māniñō tōmāā beyæ wædōmo inte botō Codito beyænque ante piyænē cæte nanguī tobopa.

Coodintoidi æbāmē cædāni, ante wæbopa, Pabodo angā

¹¹ Ocai ōmædæcacā ingā baī Pabodo ōnonque tedete yewæmongampa, ante pōnēmīnitawo. ĩñæmpa tōmēmīni botō beyæ wææ apænedāmaī ĩmīni beyænque botō tōmēmo nāmā wææ cæcæte ante cædinque mānōmaī tedete yewæmōmopa. Wadāni nē gode ānāni guiquēnē nāmā nāni waa acabo ĩnānīpa. Incæte tōmēnāni nāwangā ñænænāni ĩnāni ĩninqe botō ĩñōmō dicæ wædāmo ĩmogaa. ĩninqe mīnitō tōmēmīni, Pabodo waa cæcā ingampa, ante tedequēnēmīni ĩmīnīpa tō.

¹² Wacā mīnitō weca pōninqe æbānō cæcā ate mīnitō, ĩngā ĩñōmō mōnō Codito nānō nē da godongāingā ingampa, ante ēñēmīni. Īmaī impa. Tōmengā, Ēñencæminimpa, ante mā pōni cæcā ate do ēñēmīnīpa. Tōmengā bamōnengæ nanguī odōmongā ate ēñēmīnīpa. Wadāni cædāmaī ĩñōnāni tōmengā tæi piñænte cæcā ate wædinque mīnitō wæætē edæ, Codito nānō nē da godongāingā ingampa, ante do ēñēmīnīpa. ĩninqe botō mīnitō weca quēwēninqe edæ Codito nānō nē da godongāingā mā cæte nāni odōmōni baī adobaī

odömöninque edæ wæntædāmaï inte ee cæbo abaiminipa. ¹³ Ìninqe wadāni Codito ingante nāni godongāmæ pönencabo ìnānite waa cædinque botō mīnitō ìmīnite dicæ pönōmenque cætabogaa. Wabānō mīnitō ìmīnite, Pönōmīni æmoedāni, ante ānāmaï inte botō mīnitō ìmīnite wīwa cæbopææ.

¹⁴ Botō do mīnitō weca mempoga pōnimo inte ñōwo wæætē poncæ cæbopa. Pōninque botō mīnitō māincoo ante ānāmaï incæboimpa. Wæætē, Mīnitō botō wēmīni bacæminimpa, ante cæbopa. Wēñænāni tōmēnāni mæmpoidi beyæ ante dicæ godonguēnēnāni ināniyaa. Wæætē edæ mæmpoidi ìñōmō wēñænāni beyæ ante nē godonguēnēnāni inānipa. ¹⁵ Ìninqe, Mīnitō quēwencæminimpa, ante botō māincoo tōmancoo godōninque waa tocæboimpa. Ayæ, Mīnitō quēwencæminimpa, ante cæte wæmo ìninqe waa tobaimopa. Botō mǎnōmaï mīnitō ìmīnite gomonga waadete pōnēmo ìninqe mīnitō wæætē botō ìmote pönōmenque waadete pōnēmīni ìmīnitawo.

¹⁶ Incæte edæ idæwaa āmopa. Mīnitō māincoo ante botō ānāmaï intabopa. Incæte mīnitō, Pabodo nē wēnæ wēnæ pōnengā inte awēmō æncæte ante babæ cæcampa, ante pōnēwēmīni awædō. ¹⁷ Wadāni ìnānite mīnitō weca da godōninque botō awēmō æntawo, ante pōnēmīnitawo. ¹⁸ Tito ingante, Coodintoidi weca ate pōe, nanguï āninqe botō wacā mōnō tōññacā tōnō tōmengā tōnō da godōmo guēa godatapa. Ìninqe Tito mīnitō weca pōninque dicæ wīwa cædinque māincoo ò ængantawogaa. Ìñæmpa tōmengā tōnō botō guēa āawocaque baï ēwocamōna inte mōnatō guēa cægōmōna adinque mīnitō adāmaï inte baï tedewēmīni awædō.

¹⁹ Mīnitō, Pabodoidi nāmā wææ cæcæte ante apænedānipa, ante pōnēmīni awædō. Ìñæmpa mōnō Codito nempo quēwēnōmo inte mōnitō Wængonguï ayongante apænetamōnipa. Edæ, Botō nē waademīni ìmīni inte mīnitō

tæi pīñænte bacæminimpa, ante cædinque mōnitō mǎnōmaïno ante apænetamōnipa. ²⁰ Botō ìñōmō edæ mīnitō waa cæmīni acæte ante ponte ayōmo mīnitō wadō cæmīni baï botō nanguï wæcædōmoimpa, ante guñente wæbopa. Ayæ mīnitō wæætē, Pabodo waa cæcæte ante pongampa, ante pōnēñōmīni botō wadō cæbo baï mīnitō nanguï wæcædōminimpa, ante pōnente wædinque botō, Mōnō mǎnōmaï wædāmaï ingæimpa, ante wææ cæcæte ante cæbopa. Edæ mīnitō wæætēdō wæætē piinte amīnitawo. Wacā ingante waa cædāni wædinque mīnitō godō piinte amīnitawo. Ìñontobæ ænguï bamīnitawo. Nāmanque pōnente cæmīnitawo. Wacā ingante piininqe godō babæ ante tedewēmīnitawo. Godō wæntaa wæntaa amīnitawo. Nāmā waa adinque cæmīnitawo. Wīi ēñente cædinque mīnitō Yæ yæ tedemīnitawo. Mǎnō tōmānō wabānō cæmīni, ante guñente wædinque botō mǎnōmaïno ante edæ yewæmontabopa.

²¹ Ìninqe botō ponte ayōmo pancamīniya wēēñēdē mīni cægāi baï ñōwo adobaï cæmīni adinque botō guingo imonte wæconguēnēmo ante awædō. Edæ pancamīniya wēēñēdē wentamō mīni mongæñō ee mongæmīni adinque botō Ca ca wæbaimopa. Wēēñēdē mīni godō towengainō ayæ towēmīni intawo. Wēēñēdē ēñēnāmaï inte mīni wīwa cædinō ayæ cæmīni intawo. Edæ wentamō mongæmīni inte guingo imōnāmaï ìmīni inte pancamīniya Wængonguï gāmæñō ocæ ēmænte pōnāmaï ìmīnipa, ante guñente wæbopa.

13

Idæwaa māninqe yewæmōmopa, ante

¹ Botō mīnitō weca mempoga do pongaimo inte ñōwo wæætē poncæ cæbopa. Ìimaï ante do yewæmongatimpa. Nō nō æbānō cætimpā, ante ēñencæte ante

waoda mēnaa incæ mengāa go adocanque incæ nē adināni inte adodō ante apænedāni ēñēningue do apænte angæimpa, ante nāni yewæmongainō ante ēñēningue cæcæboimpa. ² Wēēñēdē wēnæ wēnæ cædināni tōnō wadāni tōmānāni inānite botō mīnitō weca doyedē pōningue, Åmo ēñēdāni, ante wææ āningue ñōwo wæætē wayōmō ongōningue adodō ante wææ ante yewæmōmopa. Ayæ ate wæætē mīnitō weca ponte ongōningue tōmanga apænte āningue adodāni inānite ata cæpodāmaī incæboimpa.

³ Pabodo wabānō mōnō Codito tōnō godongāmæ cæte apænecāā, ante wæmīnitawo. Mānīnō ante mīni wædō ante edæ, Nāwangā impa, ante odōmoncæte ante botō mānōmaī apænte ancæboimpa. Mōnō Codito incæ botō tōnō godongāmæ nē cædongā iñōmō tōmengā iñōmō aquīngā ināmaī inte mīnitō imīnite apænte angā abaīmīnīpa. Tōmengā iñōmō nanguī tæī piñængā inte mīnitō weca cæcā apa ānewēmīnī. ⁴ Nāwangā impa. Mōnō Codito adocā incæ aquīngā baī inte cæyongante waodāni wæætē ñænquedīmæ cæte māo timpodāni wængacāimpa. Incæte Wængonguī nānō tæī piñænō beyænque adocā ñāni ōmæmonte quēwengampa. Mōnitō adobaī tōmengā nempo quēwēningue aquīmōni inte edæ Wængonguī nānō tæī piñænō beyænque mōnō Codito tōnō godongāmæ quēwēningue mīnitō beyæ ante cæquīmōni imōnīpa.

⁵ Mīnitō tōmēmīni iñōmō, Æbānō wede pōnēmo imoo, ante nāmā waa aedāni. Mīni cædinō adinque, Æbānō nōingā cæbo imoo, ante aedāni. Iñæmpa, Itota Codito ingante entawēmōmpa, ante ēñēnāmaī imīnitawo. Wabānō mīnitō pan-camīniya nāmā adinque, Botō nōingā cædāmaīmo inte edæ wede pōnēnāmaīmo inte awædō, ante ēñencæte ante aquēnēmīni imīnīpa. ⁶ Ayæ nāmā mīni a baī mōnitō imōnite adobaī apænte adinque mīnitō, Pa-

bodoidi guiquēnē nōingā cædōnāni inte nē wede pōnēnāni inānīpa, ante edonque amīni waa tobaīmopa. ⁷ Mīnitō beyæ ante mōnitō Wængonguī ingante apænedinque, Coodintoidi cōwē wēnæ wēnæ cædāmaī incædānīpa, ante apænemōnīpa. Incæte mōnitō, Mīnitō wēnæ wēnæ cædāmaī imīni ate wadāni, Pabodoidi ædæmō cædāni beyænque impa, ante mōnitō imōnite waa acædānīpa, ante wīī cæmōnīpa. Wæætē wadāni, Pabodoidi wīī eyepæ cædānīpa, ante piīnte ānāni incæte mīnitō wæætē nōingā cæcæmīnīpa, ante mōnitō mānīnonque ante cōwē cæmōnīpa.

⁸ Edæ Wængonguī nōingā nānō ānō ante nē cæmōni inte mōnitō adode ante ædō cæte wido cæquīmōnīi.

⁹ Iñique mōnitō æyedēmē aquīmōni iñōmōni mīnitō wæætē tæī piñænte cæmīni adinque mōnitō nanguī tomōnīpa. Mīnitō beyæ edæ Wængonguī ingante apænedinque mōnitō, Coodintoidi eyepæ entawēningue picænāni baī nō cæcædānīpa, ante apænemōnīpa. ¹⁰ Botō imote apænedinque Wængonguī, Bitō wadāni inānite bæ tadāmaī inte tæī mænonte baī pōnō cæcæbiimpā, ante pōnō cæcā ate botō tæī piñæmo badinque nē āmo batābopa. Nē āmo imo incæte botō mīnitō weca ponte ayōmo wīwa cæmīni adinque piīnte panguēnēmo ināmaī incæboimpa, ante wææ cædinque botō ñōwo wayōmō quēwēningue, Nāmā apænte aedāni, ante wææ yewæmōmopa.

¹¹ Iñānāni, māningue ante ñōwo yewæmōmopa. Mīnitō eyepæ entawēningue, Mōnō picænāni baī badinque nō cæcæimpā, ante nanguī cædāni, āmopa. Wæntædāmaī inte tæī piñænte cædāni. Mīni cabo incæ adoyōmō pōnēningue gānē pōnente quēwēdāni. Wængonguī incæ nē Waadecā inte nē gānē entawengā inte mīnitō tōnō cōwē quēwencæcāimpa, āmopa. ¹² Mīni cabo incæ godongāmæ pō bee tēningue waadete pōnente waa apæneedāni. ¹³ Wængonguī quīnāni eyequeī

quëwënäni iñömö, Minitö waa
quëwencæminimpa, ante apænedäni
ëñente yewæmömopa.

¹⁴ Minitö tömämïni mönö Awënë
Itota Codito waadete nänö pönö
cægainö ante entawencæminimpa,
ämopa. Mæmpo Wængonguï tömengä
nänö waadete pönënö ante entawencæminimpa,
ämopa. Wængonguï Tæiyæ Waëmö
Önöwoca tönö ääwocaque bai ëwocadinque
tömämïni godongämæ waa quëwencæminimpa,
ante botö Pabodobo mäninque ante
yewæmömopa.

Gadataidi inānite Pabodo nānō cadota ante yewæmongainta

*Gadataidi inānite Pabodo, Waa
quëwëedāni, angampa*

¹ Botō Pabodobo inōmo inte, Mīnitō acæmīnīmpa, ante yewæmōmopa. Mæmpo Wængonguī incæ Itota Codito ingante, Nāni òmæmōe, angā ñāni òmæmongacāimpa. Mæmpocā iñōmō Itota Codito tōnō guēa cædīnque botō imote da godonga gotabopa. Inīnque botō dicæ waodānique ānāni eñēnte gotabogaa. Botō imote edæ dicæ waocanque da godongā gotabogaa. ² Mīnitō Gadatiabæ wayōmō wacabo wayōmō wacabo quëwëmīni inte Codito ingante mīni godongāmæ pōnencabo inōmīni inte edæ eñencæmīnīmpa, ante mōnitō mōni pōnencabo tōmāmōni iūmaī ante apænemōnīpa.

³ Wængonguī mōnō Mæmpo tōnō mōnō Awënē Itota Codito godongāmæ pōnō waadete cæda ate mīnitō gānē pōnente waa quëwencæmīnīmpa, āmōnīpa. ⁴ Adocā mōnō Mæmpo Wængonguī iñōmō, Mīnitō pedænguipogaque wīwa cæte mīni wæwëñōmō edæ abæ tawænte ponte baī botō gāmænō ponte quëwëedāni, angampa. Inīnque, Wængonguī nānō angainō baī cæcæmīnīmpa, ante cædīnque mōnō Awënē Itota Codito mōnō imonte ò æncæte ante cægacāimpa. Mīni wënæ wënæ cæpāmo mongæncæboīmpa, ante tōmengā nāmā wepæ pædæ godonte baī cædīnque pōnō ængā beyænque mōnō wæætē quëwëmōmpa. ⁵ Edæ pedænguipoga iñonte mīnguipoga bayonte edæ, Mānōmaī bacæīmpa, ante nē angaingā inongā inte mōnō Mæmpo Wængonguī iñōmō edæ cōwë ñāō apāite baī waëmō pōnī emōnongā ingānō anguënē. Mānōmaī impa, ante botō, Amëe, āmopa.

*Codito ingantedō ante watapæ
eñengcæīmpa*

⁶ Mīnitō iñōmō æbāmē pōnī cæmīni awædō. Mōnō Codito waadete pōnō cæcā beyænque mīnitō Wængonguī āñecā pōmīnitawo. Nōwo guiquënē nē āñecā iñongante quīmæ panguīmæ gomīnīi. Wadāni, Quëwenguī taadō wadō inōmpa, ante tededāni eñēnīnque mīnitō do Ao ānewëmīni awædō. ⁷ Iñæmpa wadō incæ wīi quëwenguīnō inōmpa. Wæætē edæ, Mīnitō oda cæcæmīnīmpa, ante cædīnque wadāni pancadāniya, Codito ingantedō ante watapæ mōni apænedō ante edæ, Idiquibæ bacæīmpa, ante cædāni apa eñëwëmīnīi.

⁸ Mōnitō Codito ingantedō ante watapæ apænemōni eñëmīnitapa. Incæte mōnitō adomōni incæ wadō ante apænemōni baī Wængonguī wæætē pōnō pīnte apænte angā wæquīmōnidō anguënē. Ayæ adobaī Wængonguī anquedo incæ oōnædē owodīnque wææ pōnīnque wadō ante apænecā baī Wængonguī tōmengā ingante wæætē godō pīnte apænte angā wæquingānō anguënē. ⁹ Edæ doyedē mōni ānīnō baī botō ñōwo wæætē adodō ante āmopa. Codito ingantedō ante watapæ apænemōni eñēnīnque mīnitō Ao āmīnitawo. Inīnque mānīnō ante æcāmenque pōnēnāmaī inte wadō ante apænecā eñēnīnque Wængonguī tōmengā ingante wæætē godō pīnte apænte angā wæquingānō anguënē.

¹⁰ Botō dicæ, Mīnitō waomīnīque botō imote Ao ancæmīnīmpa, ante apænebogaa. Wængonguīnque, Ao ancæcāimpa, ante apænebo aedāni. Ayæ, Waomīnīque tocæmīnīmpa, ante dicæ cæbogaa. Waomīnīque tocæmīnīmpa, ante cæbo inte baī edæ Codito ingante nē cædōmo ināmaī incædōmoīmpa.

*Pabodo Wængonguīnque da godongā
gotabopa, angampa*

¹¹ Botō tōniñamīni eñëedāni. Codito ingantedō ante watapæ botō

apænedö iñömö edæ wii waodänique nani mä pönengainö impa, ante ämo eñeedäni. ¹² Mäninö ante waocanque dicæ pönö apæ necä eñente æntabogaa. Waocanque dicæ odömonte apæ necä eñenique apænetabogaa. Wæætë Itota Codito edonque odömonte apæ necä eñenique botö nê æmo inte adodö ante apænebopa.

¹³ Oodeobo inömö inte botö iñömö edæ möni oodeocabo pönengainö ante wëenëñedë mäninonque ante eñenique quëwengaboï aedäni. Botö mäninö edæ Codito ingante nani godongämæ pönencabo inänite wido cæcæte ante cædinque ancaa togænte edæ nanguï pönï pämo wægadänimpa, ante do eñëminipa. ¹⁴ Ayæ botö tönö guëa pægainäni incæ nanguï inäni guiquënë möni oodeocabo möni eñengainö ante wædænque eñente cæyönäni botö iñömö godömenque nanguï pönï eñente cægaboimpa. Edæ mönitö mæmæidi nani odömonte angainö ante botö, Mönö Ao ante adodö eñente cæte quëwengæimpa, ante nanguï cæbo ingaboimpa.

¹⁵ Incæte botö badä cæncadë ongöñömote Wængongui, Botö beyæ cæcæbiimpa, äninque edæ mäninö edæ botö imote apænte ængaingä inte ñöwo botö imote pönö waadedinque añecantapa. Ayæ ñöwo pönï tömengä nämä nänö pönönö ante cæte todinque edæ, ¹⁶ botö imote pönö angantapa. Bitö oodeoidi inämaï inäni inänite apænebi eñenique tömënäni botö Wengä ingante edonque ate bai ewocacædänimpa, ante täno botö imote edonque odömongä adinque botö tömengä Wengä ingante do ewocabo inte apænebo eñenänitapa. Ininque botö waocä ingante, Æbänö cæquimoo, ante edæ änämaï intabopa. ¹⁷ Botö imote da godongä ate botö Codito täno nänö nê da godongainäni inänite apæ necæte ante Eedotadëe iñömö æidämaï intabopa. Wæætë edæ wadæ godinque botö wayömö Adabiabæ do godinque ayæ ate Daämaco iñömö ocæ emænte gotabopa.

¹⁸ Ayæ wadepo mënepoga go adodepoque iinque go ate botö Pegodo weca mä eñacæte ante Eedotadëe æidinque mä Wængongui itædë tömengä weca quëwentabopa. ¹⁹ Ayæ wadäni Itota nänö nê da godongainäni iñönänite botö adocanque ingante mönö Awënë Itota biwi Tantiago ingante adinque wadäni inänite adämaï intabopa. ²⁰ Mänömainö ante botö Wængongui ayongä babæ änämaï inte näwangä ante yewæmömo aedäni.

²¹ Mänii gote eñate ate botö Tidiabæ godinque godömenque Tidi tiabæ gotabopa. ²² Ininque Oodeabæ quëwente Codito ingante nani godongämæ pönencabo mönö Codito nempo nê quëwänäni iñömö botö awinca cöwë adämaï inäni inte önöwënenque pönengadänimpa. ²³ Tömënäni iñömö iimainö ante önömoncaque eñengadänimpa. “Wëenëñedë mönö imonte nê togænte pangaingä iñömö mönö pönente quëwenguine ante, Mänine ante wido cæcæimpa, angantawo. Ñöwo guiquënë tömengä, Wido cæquine, ante nänö angaine incæ adode ante edæ watapæ apæ necä eñenänipa,” ante tededäni eñengadänimpa. ²⁴ Ininque, Pabodo ñöwo waa cæcampa, ante adinque tömënäni Wængongui ingante apænedinque, Bitö waëmö pönï emönömi inte nê waa cæbi imipa, ante watapæ apænegadänimpa.

2

Itota nänö nê da godongainäni Pabodo ingante Ao änäni

¹ Ayæ mänii pö godinque iincayæ ate catodote wadepo go ate botö Bedënabee tönö Eedotadëe iñömö adodö æidinque Tito ingante mäomöna gocantapa. ² Wængongui do botö imote apænete bai edonque odömongä adinque botö Eedotadëe iñömö æidinque iimaï ante apænetabopa. Botö iñömö oodeoidi inämaï inäni weca godinque, Codito ingantedö ante cöwë watapæ apænebopa, ante botö ñænænänique

inānite awēmō apænebo eññānitapa. Mānōmaī cædinque botō, Æbānō cæboī, ante adodō adodō ante apænebo eññinque tōmēnāni pīnāmaī incædānimpa, ante cætabopa.

³ Ayæ, Botō tōnō guēa pōningā Tito ingante adinque pancadāniya, Īngā iñōmō Guidiego inongā iñongante āmīni eō togæncædānimpa, ante pīinte ānāni incæte nē ānāni guiquēnē, Eō togæedāni, ante ānāmaī inānitapa.

⁴ Eō togængæimpa, ante nē pīinte ānāni nāni wææ angainō ante mōnitō iñōmō Codito Itota gā pe æmpote æængā beyænque abæ tawænte ee gote baī quēwēmōnipa. Mānōmaī iñōmonte pancadāniya, Æbānō quēwēnāni, ante edæ awēmō acæte ante cædinque edæ, Mōnō caipæ imōmpa, ante baī babæ cædinque mōnitō weca pōnāni wætāmōnipa. Ayæ edæ mōnitō tōmēnāni nāni wææ ānō beyænque nē cæte quēwēmōni bacæmōnimpa, ante cædinque tōmēnāni godōmenque, Cæedāni cæedāni, ante wææ ānewēnāni wætāmōnipa. ⁵ Incæte edæ, Mōnō Codito ingantedō ante watapæ mōni apænedō nāwangā ante impa, ante mīnitō oda cædāmaī incæmīnimpa, ante wææ cædinque mōnitō wantæ iñō incæ nē wææ ānewēnāni inānite eññente cædāmaī intāmōnipa.

⁶ Næænānāni inānipa, ante wadāni nāni nē waa adōnāni iñōmō æbāmē emōnāni, ante botō iñōmō edæ wædāmaī imōpa. Edæ Wængonguī incæ waocā ingante apænte acæte ante cædinque adāmaī ingampa. Mīmōnoque acampa. Īninqe botō idæwaa apænebo ate iñāni incæ ædō cæte godōmenque apænequīnāni.

⁷ Īñæmpa iñāni incæ edæ do eññānitapa. Pegodo ingante mōnō Awēnē incæ pōnō angā ate tōmengā oodeoidi inānite mōnō Awēnē ingantedō ante nē watapæ apænecā ingampa. Botō imote adobaī mōnō Awēnē incæ pōnō angā ate botō wæætē oodeoidi ināmaī ināni inānite nē apænebo imōpa. Īninqe botō mānōmainō ante apænebo ate nē

ānāni iñōmō, Pegodo cæcā baī Pabodo adobaī cæcampa, ante do eññānitapa. ⁸ Pegodo oodeoidi weca gote cæyongante Wængonguī tōmengā tōnō godongāmæ cæcā baī botō guiquēnē oodeoidi ināmaī ināni weca edæ gote cæyōmote adocā incæ botō tōnō adobaī edæ godongāmæ cæcampa, ante do eññānitapa.

⁹ Tantiago, Pegodo, Wāō iñōmō nē tæī emōnāni inānipa, ante adinque wadāni, Gōnōniwæ onguitanca baī inānipa, ante apænedānipa. Īninqe botō apænebo eññinque mānināni, Onguitancaidi, nāni ānāni iñōmō edæ, Pabodo ingante Wængonguī mānōmaī pōnō waadete cæcampa, ante adinque botō imote ayæ Bedēnabee ingante, Mōnitō tōniñamīna imīnapa, ante tōmēmæ inō pædæ pompote bæi ongompodānitapa. Ayæ, Mōnitō oodeoidi weca gote apæneyōmōni mīnitō wæætē oodeoidi ināmaī ināni weca gote apænecæmīnimpa, ante godongāmæ Ao ānānitapa. ¹⁰ Ayæ, Mīnitō nē omaadāni inte wædāni inānite ante cōwē pōnēninqe waa cæcæmīnimpa, āninqe māninqe ante wææ ānānitapa. Māninō nāni āninō incæ botō cōwē pōnēninqe edæ nanguī cæinente wæbo intabopa.

Pegodo ingante Pabodo angā wæcampa

¹¹ Ayæ Pegodo Antioquiya iñōmō pōninqe wīī nō cæcā adinque botō tōmengā awinca waa adinque, Bitō pante wæquinque wēnæ wēnæ cæbi imōpa, āmo wæcantapa. ¹² Īīmaī edæ Pegodo cæcā inongāimpa. Tæcæ Antioquiya pōninqe tōmengā oodeoidi ināmaī ināni weca wæætē wæætē pō guī pō guī ongōninqe godongāmæ cænongāimpa. Incæte Tantiago nānō da pōnōnīnāni pōnāni ate Pegodo iñōmō edæ, Mōnō eō togængæimpa, ante nē ānōnāni pīnāni wæcæ wæ, ante guīñēnongā inte edæ oodeoidi ināmaī ināni weca ñōwo cænāmaī inte edæ gomonga gote cænongāimpa. ¹³ Mānōmaī wadonque cædingā inte ñōwo wadonque cæyongante tōmengā tōnō oodeoidi tōmānāni wadonque

cædināni inte edæ ñowo wæætē wadonque cædānīpa, ante adinque Bedēnabee incæ oda cæte wapiticæ cæcantapa.

¹⁴ Īinque edæ Codito ingantedō ante watapæ mōnō ēñēnō nō pōnī ī incæte tōmēnāni nō cædāmaī inte wapiticæ cædānīpa, ante adinque botō tōmānāni ayōnāni edæ Pegodo ingante ĩmaī ante āmo wæcantapa. “Bitō ĩñōmō oodeobi ĩnōmi inte edæ oodeo ĩnāmaī ĩnāni baī ĩnīpo cæte quēwēnīnque edæ wīī oodeoidi nāni wææ angainō ante ēñente quēwēmīpa. Incæte bitō, Oodeo ĩnāmaī ĩnāni incæ oodeoidi nāni wææ angainō ante ēñente quēwēncædānīpa, ante quīmæ wææ ānewēmīi,” āmo wæcantapa.

Mōnō pōnēnō beyænque mōnō tōmāmō quēwēmōmpa

¹⁵ Oodeoidi ĩnāmaī ĩnāni nāni ēñēnāmaī quēwēncabo baī ĩnāmaī ĩmōni inte mōnitō ĩñōmō edæ oodeomōni nē ēñagāimōni ĩmōnīpa.

¹⁶ Incæte edæ ĩmaī ante do ēñēmōnīpa. ĩmaī cædāni, ante Mōitee wodi nānō wææ angainō ante ēñente cæcā beyænque waocā dicæ Wængonguī ayongā edæ nō cæcā baquingāā. Wæætē Itota Codito ingante wede nānō pōnēnō beyænque waocā nō cæcā bacampa, ante mōnitō do ēñēmōnīpa. Īinque, Waocā æcāmenque incæ mānīnō Mōitee wodi nānō wææ angainō ante tōmengā nānō ēñente cædō beyænque edæ nō cæcā badāmaī incæcāīpa, ante do ēñēmōni inte mōnitō adobaī, Ædō cæte mānīnō beyænque nō cæmōni baquimōnīi, ante ēñēmōnīpa. Wæætē, Codito ingante mōni wede pōnēnō beyænque nō cæmōni bacæte ante mōnitō adobaī tōmengā ingante wede pōnēmōnīpa.

¹⁷ Īinque mōnitō oodeoidi ĩmōni ĩñōmō, Mōnō Codito nempo quēwēnīnque Wængonguī ayongā mōnō nō cæmō bacæīpa, ante cæmōnīpa. Mānōmainō ante cædinque mōnitō nē wēnæ wēnæ cæmōni inte wæmōni incæte dicæ Codito angā beyæ wēnæ wēnæ cætāmōnīyaa. ¹⁸ Mānīnō

Mōitee wodi nānō wææ angainō ante ēñente cæte quēwengæīpa, ante botō pōnengainō ante do wido cægaboīpa. Mānōmainō ante botō pōnengainō ante nē wido cægāimo inte botō ædō cæte wæætē adodō ænte baī cædinque, Mānīnō ante ēñente mōnō quēwengæīpa, ante anguīmoo. Mānōmainō ante āmo inte baī botō Wængonguī nānō wææ angainō ante edæ nē ēñēnāmaī ĩmo bacædōmoīpa. ¹⁹ Edæ, Wængonguī nānō wææ angainō ante ædō cæte tōmānō ante ēñente cæquīmoo, ante botō wædō beyænque nē wæwocāimo bagaboīpa. Īinque botō nē wæwocagāimo ĩnōmo inte mānīne ante ēñente cæcæte ante quīnante wæquīmoo. Wæætē edæ Wængonguī beyænque ante botō quēwengūinque ĩmopa.

²⁰ Mōnō Codito ingante awāa timpodāni wæñongante botō tōmengā tōnō godongāmæ wæente baī bagaboīpa.

Īinque botō baonga ēñate quēwēmo incæte botō wīī tōmēmo quēwengūimāmo ēwocate quēwēmopa. Wæætē

Codito nānō quēwengūimāmo ēwocate quēwēmopa. Īinque adocā Codito Wængonguī Wengā botō ĩmote waadete pōnēnīnque nāmā tōmengā wepæ ante, Wængonguī quī, ante botō beyæ pædæ godongā adinque botō baō ēñate quēwēnīnque tōmengā ingante wede pōnēnīnque quēwēmopa.

²¹ Īinque, ĩmaī cædāni, ante Mōitee wodi nānō wææ angainō ante ēñente cædinque mānōmainō cæmō beyænque ñā mēnongate nō entawēmō bamō baī mōnō Codito ōnonque pōnī wæncægacāīpa. Mānōmaī beyæ Wængonguī nānō pōnō waadete cægāinō ante botō Ao ante ō ænīnque cōwē wido cædāmaī ĩmopa.

3

Mōnō pōnēnō beyænque mōnō quēwengæīpa, ante

¹ Gadataidi ōnonque pōnī mīni cæcabo ĩnōmīni inte ēñēedāni. Æcānō wadō ante apæncæ ēñēnīnque mīnitō

dowænte bai önonque tedewëminipa. Iñæmpa botö doyedë, Itota ingante æbänö awäa timpodäni wængacäi, ante botö edonque pöni odömonte apænebo ëñëninque mïnitö önöwënenque ante bai do pönëmïnitapa. ² Adodeque ämo ate apænemïni ëñëmoedäni. Mïnitö Wængonguï Önöwoca ingante æbänö cæte æmïni. Möitee wodi wææ nänö angainö ante ëñente mïni cädö beyæ mïnitö tömengä ingante æmïnitawogaa. Wæætë edæ mönitö apænemöni ëñëninque wede pönëmïni inte æmïnitawo.

³ Iñæmpa mïmö ömædë imïni inte ëñënamai incädö. Mïnitö wëenëñedë mä pöni pönëninque Wængonguï Önöwoca tönö në cægaimïni inte ñöwo wæætë edæ ömæwocamïni inte bai edæ baonga ëñadinque namanque cædinque iinque cæmïni. ⁴ Wængonguï nanguï pöni pönö cæcä caate wædinque mïnitö önonque beyæ caate wæmïnitawo. Tömengä dicæ önonquedö ante cæcæte ante pönö cæcä wæmïniyaa. ⁵ Wængonguï tömengä Önöwoca ingante da pönöninque mïnitö weca bamönengæ pöni cæcampa. Quïnante mänömai cæcää. Edæ, Möitee wodi nänö wææ angainö ante ëñente mïni cädö beyæ ante dicæ cæcäa. Wæætë mönitö apænemöni mïni ëñente pönënö beyæ Wængonguï tömengä Önöwoca ingante da pönöninque mïnitö weca bamönengæ pöni pönö cæcä æmïnipa.

⁶ Wængonguï apænecä ëñëninque Abadäo wodi, Nöingä ante apænecampa ante wede pönengacäimpa. Iinque tömengä wede nänö pönënö beyænque Wængonguï, Botö ayömo Abadäo iñömö në nö cæte quëwënogä ingampa, angacäimpa, ante yewæmongacäimpa. ⁷ Mänömainö ante adinque mïnitö iïmai ante ëñëedäni. Mönö në wede pönëmö iñömö Abadäo wodi pæimö bai adomö imoppa, ante ëñente pönëedäni. ⁸ Wængonguï, Oodeoidi inämai inäni incæ wede nänö pönënö beyænque botö ayömo edæ në nö cæte quëwënanï bacædänimpa,

ante badoncæcäimpa, ante dodäni edonque adinque Wængonguï beyæ yewæmongadänimpa. Ayæ Abadäo wodi ingante apænedinque tömengä, “Botö bitö imite pönö waa pöni cæbo æmi iinque bitö beyænque wadäni nänï cabo wadäni nänï cabo tömancabodäniya edæ watapæ quëwënguïnanidö angüenë,” ante apænegacäimpa. Mänömai impa, ante yewæmöninque dodäni wëenëñedë pöni Wængonguï waa pöni nänö cæquïnö ante yewæmongadänimpa. ⁹ Abadäo wodi cöwë ædæmö cæte pönengaingä iñongante Wængonguï pönö waa pöni cægacäimpa. Mönö në wede pönëmö iñömö tömengä adobai pönö waa pöni cæcä æninque mönö iñömö edæ Abadäo wodi tönö godongämæ watapæ quëwëmö imönö angüenë.

¹⁰ Wæætë edæ, “Wææ ante botö yewæmongainta adinque æcänö tömänö ante dicæ cæcää tömengä iñömö Wængonguï piinte angä wæwocaingä ingänö angüenë,” ante Möitee wodi incæ do yewæmongacäimpa. Iinque Wængonguï edæ nänö wææ angainö ante waodäni, Botö ëñente cädö beyænque quëwencæboimpa, ante në anewënanï incæ wii eyepæ ëñente cädäni inönäni inte tömënanï tömänäni inänite Wængonguï piinte angä wæwocainäni inänidö angüenë. ¹¹ Ayæ wacä Wængonguï beyæ yewæmöninque, “Në nö cæte quëwënogä incæ tömengä nänö wede pönënö beyænque quëwencæcäimpa,” angacäimpa. Iinque iïmai ante mönö edonque ëñengæimpa. Möitee wodi nänö wææ angainö ante ëñente cæte beyænque waocä dicæ Wængonguï ayongä në nö cæcä badoncæcäimpa. ¹² Wængonguï nänö wææ angainö ante ëñente quëwengæimpa, ante në cädönäni iñömö tömënanï dicæ nänï wede pönënö beyæ quëwënanïyaa. Wæætë, “Mäninö ante në ëñente cæcä iñömö tömengä nänö ëñente cädö beyænque quëwencæcäimpa,” ante Möitee wodi nänö yewæmonte angainö bai impa.

13 Ayæ adobaï, “Æcänö ingante awäa wodoncædäni a ongöna tömengä ingante Wængonguï pilingä wæwocaingä ingänö anguënë,” ante Möitee wodi yewæmongacäimpa. Ìninqe Wængonguï nänö wææ angainö ante wii eyepæ ëñente cæmö beyæ mönö wæwocaimö inte wæyömonte mönö Codito ïñömö, Abæ tawænte gote bai quëwencæminimpa, ante cædinque mönö beyæ wæætë wæwocaingä badinque edæ awäa wæninqe a ongongacäimpa. 14 Abadäo wodi ingante Wængonguï waa pönö cægacäimpa. Ayæ, minitö oodeoidi inämaï ïñöminite Itota Codito pönö cæcä beyænque Abadäo tönö godongämæ watapæ quëwencæminimpa, ante Wængonguï adobaï pönö waa cæcampa. Mänömaï bacæimpa, ante cædinque Codito tömämö imonte, Minitö wede pönëninque botö Önöwoca ingante ænte ëwocacæminimpa, ante cædinque mönö imonte æncæte ante nämä wepæ godonte ængä beyænque quëwëmompä.

Wængonguï täno, Cæquïmo, aninqe ayæ ate wææ angacäimpa

15 Botö tönïñamini ëñëedäni. Botö, Waomö mönö cæi bai Wængonguï mönö beyæ wodo adobaï cæcampa, ante odömoncæte ante ïmaï ante yewæmömo aedäni. Waoda, Möna guëa cæcaya imönapa, ante Ao äna ate adocanque inte ædö cæte wadö ante cæquëngä. Ayæ, Mönö godömenque cæcæimpa, ante waocä adocanque inte ædö cæte edæ ante cæquëngä. Ñöwo edæ ämo ëñëedäni. Wængonguï, Mönö godongämæ cæcabo bacæimpa, ante botö pönö cæcæboimpa, angä ëñëninque mönö Ao ante cæquënenö ïñömö edæ wodo adobaï impä. 16 Mæmæ Abadäo wodi ingante apænedinque Wængonguï, Bitö Pæingä ingante botö cöwë pönö waa cæcæboimpa, angacäimpa. Mänömaï äninque tömengä Abadäo wodi ingante, “Bitö pæinäni,” ante änämaï ingacäimpa. Wæætë, “Bitö Pæingä

ingante pönö cæcæboimpa,” äninque Abadäo wodi Pæingä adocanque Codito ingante ante pönëninque angacäimpa.

17 Mänömainö ante apænedinque botö ïmainö ante odömoncæte ante apænetabopa. Abadäo wodi ingante Wængonguï, Botö pönö cæbo ate minitö Ao ämini ininqe mönö godongämæ waa cæcæimpa, ante wëenëñedë cægacäimpa. Ayæ wantæpiyæ coatodo tiento todëinta wadepo go ate Möitee wodi ingante apænedinque adocä, ïmaï cæedäni, ante pönö wææ ängongäimpa. Ìninqe Wængonguï wantæpiyæ ate wææ äninque do nänö angaine ante wëä godönämaï ingacäimpa. Edæ, Cöwë pönö cæcæboimpa, ante doyedë në angaingä inte tömengä ñöwo wææ äninque mänine ante dicæ wëä godongantawogaa. 18 Möitee wodi nänö wææ angainö ëñente cæmö beyænque mönö ænguëncöo do æmö bai Wængonguï, Cöwë pönö cæcæboimpa, ante önonque ancægacäimpa. Incæte Wængonguï pönö waadete cædinque mæmæ Abadäo wodi ingante apænedinque, Cöwë pönömo æncæminimpa, ante nänö angainö bai cædinque do cægacäimpa.

19 Ìninqe, Cöwë pönömo æedäni, ante në angaingä inte Wængonguï quïnante ñöwo wæætë, ïmaï cæedäni, ante wææ angacäi. Ìñæmpa tömengä, Minitö botö änö ante ëñënämaï cædinque wënæ wënæ mini cædinö edonque bacæimpa, ante odömoncæte ante wææ angacäimpa. Mänömaï cædinque tömengä, Abadäo wodi Pæingä botö në angaingä incæ tömengä nänö ponganca minitö ëñente cædinque quëwencæminimpa, ante wææ angacäimpa. Mänine nänö wææ angaine ëñente cæcædänimpa, ante Wængonguï tömengä anquedoidi inänite da pönongä pöninque tömënanäni Möitee wodi ingante mämö odömönäni agacäimpa. Tömengä ïñömö tæcæguedë ongonte bai në

anguingä badinque Wængongui nänö angaine ante idægoidi inänite wæætē angä eñengadänimpa. ²⁰ Nöwo apænebo eñëedäni. Adocanque eyepæ cæcä adinque tömengä beyæ ancæte ante wacä tæcæguedē ongönämaï i maingampa. Wængongui iñömö, Cöwë pönö cæcæboimpa, nē angaingä inte adocanque incæ eyepæ cædongä ingampa.

Īmaï cæedäni, ante quīnante angacäi, ante

²¹ Īninqe Wængongui, Cöwë pönö cæcæboimpa, ante nē angaingä inte wantæpiyæ ate, Īmaï cæedäni, ante wææ äninqe tömengä doyedē nänö angaine dicæ wëä godongantawogaa. Edæ tömengä mönö imonte apænedinque, Botö wææ angainö beyæ quëwencæminimpa, ante mänine pönongä ænte quëwëmö bai mänine beyænque edæ nē nō quëwëmö bacædömöimpa. Wæætē edæ wii mänömaï impa. Wængongui, Cöwë pönö cæcæboimpa, angä eñëninque mönö quëwenguinque edæ nē nō cæmö bamompa. ²² Īninqe Wængongui, Cöwë pönömo æncædänimpa, ante nē angaingä inte iimaï ante cæcampa. Botö angaincoo ante Itota Codito ingante nē pönënäni inänite da pönömo ate tömënäni wede näni pönëno beyænque ænte ëwocacædänimpa, ante iimaï cæcampa. Tömengä mönö inguipoga tömäo quëwëmö mönö wënæ wënæ cædimämo adinque mönö imonte pönö tee mönete bai cæcä ongömompa. Mänömaï pönö cæcä ongongaïmö iñömönte Wængongui mönö wede pönencabo adomonque iñömönte tömengä nänö angaincoo ante pönongä ænte ëwocamompa. Wængongui, Mänömaï cæbopa, ante apæncä eñëninque yewæmongadänimpa.

²³ Doyedē iñömö mönö, Möitee wodi nänö wææ angainö tömäno ante mönö ædö cæte eyepæ cæquii, ante tee mönete bai wægämöimpa. Edæ Itota Codito mönö nē wede pönënogä edonque pöni nänö ponte

a ongonganca mönö tee mönete bai wægämöimpa. ²⁴ Īninqe, Minitö Codito ingante wede pönëninque nē nō cæmini bacæminimpa, ante cædinque Wængongui Codito gämænö töo æmænte bai cædinque wææ angacäimpa. Mänömaï i Īninqe tömengä nänö wææ angainö beyænque mönö wapiticæ godämaï inte Codito gämænö pongamöimpa. ²⁵ Ayæ nōwo iñömö, Mönö nē wede pönënogä do pongäimpa, ante adinque Wængongui nōwo wæætē wææ änämaï ingampa.

²⁶ Minitö Itota Codito ingante wede pönëmini inte tömämini Wængongui wëñæmini iminipa. ²⁷ Edæ tömämini mönö Codito tönö godongämæ guite bai æpænë guidinque tömengä nänö ëwocadö adodö ëwocadinque tömengä nempo quëwëminipa. ²⁸ Tömengä nempo adocabomö inömö inte mönö adocanque ingantedö ante apænedinque, Oodeocä ingampa, ante änämaï ingæimpa. Ayæ wacä ingantedö ante adobai, Guidiego ingampa, ante änämaï ingæimpa. Ayæ, Waocä nänö nē ö æningä inte awënë beyænque cæte nē quëwengä ingampa, ante mönö änämaï ingæimpa. Wacä ingantedö ante, Abæ tawænte gocä ingampa, ante mönö änämaï ingæimpa. Ayæ adocanque ingantedö ante, Onguiñængä ingampa, ante mönö änämaï inte wacä ingantedö ante adobai edæ, Onquiyængä ingampa, ante änämaï ingæimpa. Īnämpa Codito Itota nempo quëwëninque adocabomö imompa. ²⁹ Ayæ minitö iñömö Codito nempo quëwëmini inte mæmæ Abadäo wodi pæimini bai iminipa. Īninqe Wængongui nänö, Cöwë pönömo æncæminimpa, ante nänö angaincoo ante minitö nē ænguimini iminipa.

4

¹ Mäninö ante yewæmöninque botö, Waodäni æbänö cædäni, ante odömöninque iimaï ante apænecæte ante yewæmömopa. Wæmpocä wængä ate tömengä wengä iñömö

wæmpocā nānō ēadincoo nē ænguingā ingampa. Īninqe wæmpocā ayæ mīngā quēwengāñedē mānincōo tōmancoo do ænte bai tōmengā wengā nē ēacā ingampa. Incæte tōmengā wengā tōmancoo nē ēacā incæ edæ tōmengā wēñængāñedē guiquēnē wæmpocā beyænque cæte nē quēwengā bai inongā ingampa. ² Īninqe wæmpocā do āninqe, Īiōnæ iinque bayonte botō wengā do picængā badinque nāmā nē angā bacæcāimpa, ante nānō angaiōnæ iinque baganca nē aadāni Īnānite wæmpocā angā ēñēninqe tōmēnāni wæætē wēñængā ingante wææ aadānīpa. Ayæ, Wēñængā nānō manguincoo ante æbānō cæquīi, ante nē aadānique ānāni ēñente wēñængā incæ cæcampa.

³ Mōnō Īñōmō doyedē māningā wēñængā bai adobai picæmō Īnāmai mōnō ingaiñedē inguipogaque nāni wææ angaiñonque ante ēñente cægāmōimpa. Waocā beyænque cæte nē quēwengā bai mōnō adobai inguipogaque nāni wææ angaiñonque ante ēñencæte ante cædinque māniñō beyænque cæte nē quēwēmō bai inte wægāmōimpa.

⁴ Incæte Mæmpo Wængonguī Īñōmō, Īiōnæ da pōnōmo poncæcāimpa, ante doyedē nānō angaiōnæ iinque bayonte tōmengā Wengā ingante da pōnongā pongacāimpa. Īngā Wēñængā ingante onquiyængā mangā ēñadinque tōmengā Wængonguī nānō wææ angaiñō ante nē ēñente cæquēnengā nānō baquinque pægacāimpa. ⁵ Īninqe mōnō Mōitee wodi nānō wææ angaiñō beyæ tee mōnete bai wæyōmonte adocā Wængonguī Wengā incæ, Minitō abæ tawænte bai picæmīni badinque nāwā wēmīni bate quēwencæmīnīpa, ante mōnō imonte ængā beyænque mōnō abæ tawænte bai quēwēmōmpa. ⁶ Mæmpo Wængonguī Īñōmō, Minitō nāwā wēmīni ĩmīni beyæ, ante tōmengā Wengā Ōnōwoca ingante mōnonga da pōnongantapa. Īninqe

tōmengā Ōnōwoca Īñōmō, “Mæmpo, botō Wæmpo,” ante nē apæñecā ĩnongā inte mōnō mīmōnē owod- inque adodō ante mōnō beyæ apæñecampa. ⁷ Īninqe bitō Īñōmō bitō ĩmite nē wææ angaingā beyænque idæwaa cæte quēwengāimi inte ñōwo abæ tawænte bai æmæwo pædimi inte nāwā wēmī ĩñōmī ĩmīpa. Ayæ nāwā wēmī Īñōmite Wængonguī pōnō cæcā ate bitō tōmengā nānō ēagaincoo ante nē ænguīmi babīpa.

Nē pōnēmīni æbāmē cæte quēwēmīni, ante wæcampa

⁸ Wængonguīdi ĩnāmai Īñōnānite wadāni Īñōmō, Wængonguīdi ĩnānīpa, ante babæ apæñedānīpa. Minitō wēēñēñedē Wængonguī ingante mīni adāmai ĩñedē, Wængonguīdi, ante tōmēnāni babæ ante nāni nē ānōnāni beyænque cæte nē quēwēmīni inte ñæ cæyænte bai wægāmīnīpa. ⁹ Ñōwo Īñōmō mīnitō Wængonguī ingante ate bai nē pōnēmīni ĩmīni inte ædō cæte wapiticæ ante ēñēmīni. Æ wadō ante godōmenque āmo. Wængonguī incæ mīnitō ĩmīnite do ate pōnengaingā ingā incæte mīnitō ædō cæte inguipogaque quēwēnāni nāni ōnonquedō ante wææ angaiñō ante ēñente quēwēmīni. Īñæmpa, Mānīne nāni wææ angaiñō ante wæætē ēñengæimpa, āninqe mīni ñā cæpote wæquinque āmīni awædō. ¹⁰ Edæ Wængonguī ānāmai Īñongante mīnitō mā pōnēninqe, Wængonguī beyæ, ante mōnō ĩiōnæ cædāmai inte ongōninqe ææmæ cæte becæimpa, ānewēmīnīpa. Ayæ, Īi apāicā ĩñonte adobai, ĩintedæ ĩñonte adobai, ĩinēpo ĩñonte adobai, Wængonguī beyæ, ante mōnō cædāmai inte ææmæ cæte becæimpa, ante ōnonque pōni ante cæmīnīpa tōō. ¹¹ Īninqe, Minitō ēñēnāmai inte mīni wæquinque cæmīnīpa, ante adinque botō mīnitō beyæ ante guīñente wæbopa. Botō pōnō nanguī cæbo incæte edæ ōnonque wabānō cægaboimpa, ante wæbopa.

¹² Botō tōniñamīni ēñēedāni. Botō wēēñēdē mīnitō bai Mōitee wodi nānō wææ angainō nē cæbo bai inte wæbo amīnitawo. Wæætē botō nē wææ angaingā ingante idæwaa ēñente cædinque abæ tawænte gobo bai mīnitō adobai cæmīni waa tobaimopa. Mīnitō dicæ botō imote wēnæ wēnæ cæmīnitawogaa.

¹³ Wēēñēdē wēnæ wēnæ mānimo inte botō mānōmai beyæ mīnitō weca pōninque mōnō Codito ingantedō ante watapæ apænedinque mā apænebo ēñēmīnitapa.

¹⁴ Īnīnque mānōmai wēnæ wēnæ bate pōmo ate wædimīni incæte mīnitō guiñēñate wædāmai inte towæ tānongadāmai imīnitapa. Wæætē edæ botō imote adinque mīnitō, Wængonguī anquedo ingampa, ante pōnente bai cædinque watapæ todinque, Pōe, amīnitapa. Ayæ edæ, Itota Codito ingampa, ante pōnente bai cædinque, Pōe, amīnitapa.

¹⁵ Mīnitō māniñedē watapæ mīni todinō bai ñōwo guiquēnē quimæ todāmai imīnii. Mīnitō māniñedē edæ eyepæ inte bai nāmā awinca o togæmōninque botō imo pōnō mīne tīmoncædōmīnīmpa, ante pōnēninque apænebopa.

¹⁶ Īñæmpa mīnitō imīnite nāwangā apænebo beyænque mīnitō ñōwo wæætē botō imote pīinte bamīnitawo.

¹⁷ Wadāni iñōmō, Mōnitō gāmænō ponte ēñēedāni, ante nanguī cædāni iñōmō mīnitō imīnite wēnæ wēnæ cæcæte ante ānewēnānīpa. Tōmēnāni iñōmō, Pabodoidi inānite ēñēnāmai inte mīnitō wæætē mōnitō tōnō godongāmæ cædinque mōnitō cæinēnonque ante amōni ēñēninque cæcæmīnīmpa, ante babæ cædānīpa.

¹⁸ Wacā nānō cæinēnō ante godongāmæ cæmīni cōwē waa imaimpa. Nāwangā impa. Incæte tōmengā nānō waa cæquēnēnonque ante cæcā adinque mīnitō, Mānīnonque edæ cæcæimpa, ante nanguī cæquēnēmīni imīnīpa. Ayæ edæ botō mīnitō weca quēwēmoyedē cæmīni bai mīnitō botō dæ āmo iñedē cōwē adobai cæmīni waa imaimpa. ¹⁹ Botō wēmīni ēñēedāni. Yædēmadā inte

nantate wædā bai botō iñōmō wæætē nantate wædinque edæ, Mīnitō mīmōnē Codito ingante ædæmō entawencæmīnīmpa, ante nanguī pōni cædinque wæbopa. ²⁰ Edæ, Mīnitō æbāmē cæmīnii, ante ēñēnāmai imo inte botō mīnitō weca pōninque wīi gobæ tedete botō ānō bai tededinque wæætē wadō bai tedecæte ante pōinente nanguī wæbopa.

Tada wodi tōnō tōmēnā inante nē cægaingā Agada

²¹ Mīnitō, Mōitee wodi nānō wææ angainō ante mōnō ēñengæimpā, ante nē amīni inte apænēmīni ēñēmoedāni. Mīnitō wææ ante tōmengā nānō yewæmongainta incæ adāmai inte ēñēnāmai imīnitawo. ²² Īmai ante yewæmongatimpā. Abadāo wodi iñōmō wēñæna onguiñæna mēnaa inate tapæigacāimpā. Adocanque guiquēnē nānōogængā beyænque nē cæte quēwengā wēñængā iñongā wacā guiquēnē nāwā nānōogængā wēñængā ingacāimpā. ²³ Nē cæte quēwengā wēñængā guiquēnē cōwē mōnō ēñadō bai adobai ōnonque ēñagacāimpā. Nāwā nānōogængā wēñængā guiquēnē Wængonguī, Cōwē pōnōmo æncæbiimpā, ante nānō ānīnō beyænque ēñagacāimpā.

²⁴ Wængonguī iñōmō, Botō pōnō cæbo ate mīnitō Ao amīni ĩnīnque mōnō godongāmæ waa cæcæimpā, ante mempoga apænēgacāimpā. Īnīnque, Wængonguī mēnea nānō apænēgainō æbānō inēi, ante ēñencæte ante mōnō mānīna onquiyæna inate adinque pōnengæimpā. Wængonguī iñōmō adopoque apænecæte ante Tīnaiquidi wæænte ongōninque wææ angacāimpā. Mānīneque tōmengā nānō wææ angāineque ante nē ēñente cædāni iñōmō Agada wodi wēnāni mānīne beyænque nē cæte quēwēnāni bai nāni baquinque ēñadānīpa. ²⁵ Māningā Agada tōmengā nāni wencabo iñōmō wacā ingante nē cædōnāni inte cæningā ñā cæyænte bai inte wægadānīpa. Īnīnque Adabiabæ ongonquidi Tīnaiquidi ongōninque Wængonguī wææ angā

ate mönō iñōmō Agada bai wacā ingante nē cæmō bagamōimpa. Edæ Agada wodi nāni wencabo wacā beyænque nē cæte quēwēnāni inte nāni wægainō bai ñōwo Eedotadēē quēwēnāni adobai wacā beyænque nē cæte quēwēnāni bai inōnāni inte wæwente quēwēnānipa. ²⁶ Eedotadēē inguipoga ongōñōmō bai mönō öönädē æite Eedotadēē bai iñōmō ongongæimpa. Māniñōmō Eedotadēē nāni añōmō mönō badā Tada wodi bai impa. Tada iñōmō wii wacā ingante nē cæcā bai iñōnante mönō tömēnā wēmō bai imompa. ²⁷ Edæ iimaī ante Wængongui beyæ yewæmongatimpa, “Bitō owæntabi eñēmi. Wēñæ mǎnāmaī inimi inte bitō, İncayæ ate mancæboimpa, ante watapæ tocæbiimpa.

Bitō wēñæ nantadāmaī inimi inte, Botō iincayæ ate toquinque impa, ante yedæ ancæbiimpa.

Edæ nānōogængä emō cæte gocā ate adocanque inte wēñæ mǎnāmaī iñongante,

Wængongui, Botō pönōmo æncæbiimpa, angä eñengä inte owæmpocā iñōmō godōmenque nanguī wēñænāni inānite māñongä nānōogængä äacā guiquēnē wēñænāni wædænque mancæcäimpa, ante yewæmongatimpa.

²⁸ Botō tōniñamini, eñēedāni. Wængongui, Bitō wēñængä cōwē pönōmo æncæbiimpa, ante nānō angainō beyænque Itæca wodi eñagacäimpa. Wængongui, Cōwē cæcæboimpa, ante mīnitō imīnite adobai angä beyænque mīnitō mem-poga eñadinque tömengä wēmīni bagamīnipa. ²⁹ Māniñedē iñōmō Wængongui Öñowoca beyænque eñacā iñongante Itæca ingante önonque nē eñagängä Itimædo guiquēnē pīinte cægacäimpa. Mānōmaī nānō pīinte cægai bai inguipogaque quēwēnāni Wængongui wēnāni inānite ñōwo adobai cædānipa. ³⁰ İniquē Wængongui æbānō angä eñente yewæmongadāni. İimaī impa. “Nāwā nānōogængä wēñængä mæmpocā

ëadincoo æñongä nānōogængä beyænque cæte nē quēwengä wēñængä wæætē ænāmaī incæcäimpa. İniquē nē cæte quēwengä nāna wencaya inate mönō wido cæcæimpa.” Ante yewæmongatimpa. ³¹ İniquē botō tōniñamini eñēedāni. Mönō iñōmō nāwā nānōogængä wēñæmō bai inōmō inte mönō nānōogængä beyænque nē cæte quēwengä wēñæmō bai wii inōmō imompa, ante ämo eñēedāni.

5

Abæ tawænte bai mönō quēwēnō ante

¹ Mönō iine Möitee wodi nānō wææ angainō ante eñente nē cæmō inte ñā cæyænte bai wæyōmonte Codito, Abæ tawænte bai inte quēwencæmīnipa, ante pönō ö ænte ñimpo cæcā beyænque mönō abæ tawænte gote bai ee quēwēmō imompa. İniquē mīnitō iñōmō nē abæ tawænte gogaīmīni inte tæi ongōniquē edæ wæætē mǎnine beyænque ñā cæyænte bai badāmaī iedāni.

² İñānāni, botō Pabodobo apænebo eñenguēnē quēwēmīni. Mīnitō, Mönō eö togæimō inte quēwengæimpa, ante, cæmīni iniquē ædō cæte Codito angä beyænque quēwenguēnēmīni. İñæmpa mǎnōmaī cæmīni iniquē Codito mīnitō beyæ ædō cæte pönō cæquiringä. ³ Bitō, Botō eö togæimo inte quēwencæboimpa, ante cæbitawo. Edæ botō bitō imite iimaī ante apænebo eñēe. Bitō quēwencæte ante cædinque eö togæimi babi iniquē Möitee wodi nānō wææ angainō tömānō ante bitō eñente cæte quēwenguēnēmi babaīmipa tōö.

⁴ Pancamīniya, Nō cæmō mönō baquinque Möitee wodi nānō wææ angainō ante eñente cæcæimpa, ante ämīnitawo. İñæmpa mǎnōmaī ante nē ämīni inte mīnitō mönō Codito ingante do pango cæte bai cæmīnipa tōö. Edæ pango cæte nānēnē goyōmīnite tömengä ædō cæte pönō waadete cæquiringä. ⁵ Mōnitō guiquēnē, Wængongui ayongä mönō

nē nō entawēmō bacæmōimpa, ante nanguī pōnī æinente wānō cōñmōnite Wængonguī Ōnōwoca pōnō apænegā ēñēninque mōnitō, Mōnō nē nō entawēmō badinque watapæ bacæimpa, ante wede pōnēmōnipa. ⁶ Edæ Codito Itota nempo quēwēninque ēō togæimō imō incæ bagæmō imō incæ tōmāmō adobaī ōnōmonque inōmō imōmpa. Wæætē edæ Codito ingante wede pōnēninque nē waadete pōnēmō iñōmō māninō mōnō pōnēnō beyænque waa pōnī entawēmōmpa.

⁷ Mīnitō guiquēnē wēēnēdē godongāmæ pogodo gote baī nanguī cædinque waa cæmīnitapa. Edæ ñōwo guiquēnē mīnitō waa pōnī pogodo gote baī cæyōmīni æcāmē wææ āna ēñēnimīni inte wæætē Wængonguī nō ante nānō apænegāinō ante ēñēnāmaī cæmīnitawo. ⁸ Wængonguī mīnitō imīnite nē aa pegaingā inte tōmengā iñōmō edæ, Ēñēnāmaī cædāni, ante dicæ wææ angantawogaa. ⁹ Edæ, “Yedæ æmpocæimpa, ante cædinque guiyā pōnī da wente ate pāo cæquimo tōmāo guipæñō pāo yedæ æmpopa,” ante pōnēninque iīmaī ante ēñēngæimpa. Adocanque wapiticæ wææ angā ēñēninque nanguī ināni wæætē oda cæte wæcædānimpa. ¹⁰ Mōnō Awēnē nempo mōnō quēwencabo imōmpa, ante pōnēninque botō, Mīnitō botō pōnēnō baī pōnēmīni inte wīī wapiticæ ante pōnenguīmīni imīnipa, ante pōnēmōmpa. Wæætē edæ æcāmenque mīnitō imīnite wapiticæ ante wææ angāā, ante adinque Wængonguī nē apænte angā ingante cōwē godō pangā wæcæcāimpa.

¹¹ Botō tōniñamīni ēñēdāni. Botō Itota awāa wængacāimpa, ante apænebo ēñēninque, Ēō togæimīni baedāni, ante nē ānāni iñōmō botō imote cōwē piīninque pānāni wæbo aedāni. Incæte botō tōmēnāni nāni ānō baī, Ēō togæimīni baedāni, ante āmo baī tōmēnāni botō imote wīī bæi ongōninque pancædōnānimpa. Edæ mānōmainō āmo baī tōmēnāni wæætē

piīnāmaī ināni inte, Pabodo Itota nānō wængaiwæ ante apænegā awædō, ante tee tēwate baī oda cædāmaī incædōnānimpa. ¹² Mīnitō imīnite nē wapiticæ ante wææ ānāni iñōmō nāmā wido togænte baī cædinque nāmā ta ñænte Codito ingante nē pōnēmīni weca pōnāmaī ināni inte waa imaimpa, ante awædō.

¹³ Mīnitō botō tōniñamīni abæ tawænte gote quēwencæmīnimpa, ante mōnō Awēnē mīnitō imīnite apænte aa pegacāimpa. Incæte mīnitō, Abæ tawænte godimōni inte inguipogaque mōni cæinēnō ante godōmenque cæcæmīnimpa, ante cædāmaī iedāni. Wæætē edæ wadāni inānite godō waadete pōnēninque tōmēnāni beyæ ante cædāni. ¹⁴ Edæ Itota, “Nāmā bitō waadete pōnēnō baī pōnēninque bitō wacā ingante adobaī edæ waadete pōnencæbiimpa,” angacāimpa. Īine adodeque ēñente cæmō iīninque Wængonguī nānō wææ angāinō incæ tōmānō ante do nē cæmō edæ babaimōmpa. ¹⁵ Edæ babæidi baī nāēmæ pocænte baī cædinque nāēmæ gāwæī cænte baī cæmīni baī mīnitō nāēmæ wido cædinque wantæ biquēnēmīnidō anguēnē, ante apa quēwēmīni.

Mōnō Wængonguī Ōnōwoca nempo quēwengæimpa, ante

¹⁶ Ñōwo āmo ēñēdāni. Wængonguī Ōnōwoca ēwocadinque quēwēdāni. Mānōmaī quēwēninque mīnitō inguipogaque mīni cæinēwēnō ante wīī ēñēninque nāmā beyænque ante cædāmaī inguīmīni imīnipa. ¹⁷ Edæ inguipogaque mōnō cæinēwēnō ante adinque Wængonguī Ōnōwoca iñōmō edæ Baa angampa. Ayæ wæætē æcānō inguipogaque mōnō cæinēwēnō ante cæte quēwēna tōmengā Wængonguī Ōnōwoca ingante nāēmæ Baa angampa. Īininque mōnō inguipogaque cæinēwēnō ante wæyōmō Wængonguī Ōnōwoca guiquēnē, Wadō cædāni, angampa. Mānōmaī beyæ mīnitō mīmōnē wæætedō wæætē ante baī entawēmīni

inte mīnitō nāmā mīni ānō ante ædō cæte cæquīmīnii. ¹⁸ Incæte mīnitō imīnite Wængonguī Ōnōwoca nōinō tōō æmænte māocā gomīni inte mīnitō Mōitee wodi nānō wææ angainō ante do abæ tawænte gomīni imīnīpa.

¹⁹ Inguipogaque mōnō cæinēwēnō ante ēñēnīnque nē cædāni iñōmō æbānō cædānii, ante edonque abaimpa. Edæ iīmaī impa. Tōmēnāni nānōogængā ināmaī iñongante do godō guēa towēnānīpa. Wentamō pōnēwēnīnque cædānīpa. Ōnonque guiñēñadāmaī inte nāmā baonque pōnēwēnīnque towēnānīpa. ²⁰ Wængonguīdi inānīpa, ante badōnīnque ædæ wæænte waa adānīpa. Idō baī yewænīnque ōnonque tedewēnānīpa. Pīinte quēwēnānīpa. Tiyænō tiyæ tedewēnānīpa.

Wacā godōmenque ængā ate wædinque pīinte awēnānīpa. Ænguī bawēnānīpa. Nāmā waa tobote, ante ānewēnānīpa. Wæætedō wæætē ānīnque nāwæ godānīpa. Wadō ante nāni cabo wadō ante nāni cabo badīnque wæætedō wæætē cædānīpa. ²¹ Wacā gomonga ængā ingante godō pīinte adānīpa. Tī nāmæ nangūi bedīnque dowænte badānīpa. Ayæ nangūi pōnī godōmenque bedīnque nangūi pōnī cænīnque guiñēñadāmaī inte towēnānīpa. Ayæ godōmenque quiēmē baī nē cæināni inānīpa. Mānōmaī cæte quēwēnāni iñōmō Wængonguī Awēnē Odeye nempo ædō cæte edæ guīquīnānīi, ante do botō ānīnō baī ñōwo wæætē āmo ēñēedāni.

²² Wængonguī Ōnōwoca ingante ēñente nē cæmō guīquēnē mōnō waincawæ incate baī iīmaī cæmōmpa. Waadete pōnēmōmpa. Watapæ tomōmpa. Gānē entawente pōnēmōmpa. Ee cæte pīināmaī imōmpa. Waadete cæmōmpa. Wadāni beyæ ante waa pōnī cæmōmpa. Wæntædāmaī inte cōwē cæmōmpa. ²³ Gānē pōnēnīnque ædæmō cæmōmpa. Nāmā wææ ānīnque nō cæmō imōmpa. Wængonguī Ōnōwoca ingante ēñēnīnque mānōmaī cæmō adīnque Wængonguī mōnō cædōnō

ante wææ ānāmaī ingampa. ²⁴ Mōnō Codito quīmō inōmō inte mōnō baō tōmengā tōnō awænēmæ timpote baī wængālmō inīnque inguipogaque mōnō cæinēwengainō adobaī awæ timpote baī iñonte mōnō abæ tawænte baī godīmo inte baonque ante mōnō cæinēwēnō ante ēñēnāmaī inte cæmōmpa. ²⁵ Edæ Wængonguī Ōnōwoca ængā beyænque quēwēmō inte mōnō tōmengā Ōnōwoca tōnō guēa godongāmæ cægonte baī quēwengæimpa. ²⁶ Mānōmaī quēwēnīnque mōnō nāmā waa adāmaī ingæimpa. Edæ wacā tōnō guēa wæætedō wæætē ānāmaī ingæimpa. Wacā gomonga ængā ingante mōnō godō pīinte adāmaī ingæimpa.

6

Mōnō wacā ingā wacā ingā iñacabo cæcæimpa, ante

¹ Botō tōnīñamīni ēñēedāni. Wacā ēñēnāmaī cædinque oda cæte wæcantawo. Inīnque mīnitō Wængonguī Ōnōwoca ingante mīni ēwocacabo iñōmō, Māningā nē oda cædingā inte Wængonguī taadonque adodō pō gocæcāimpa, ante cædinque tōmengā ingante ædæmō cæedāni. Mānōmaī cædinque nē apænecā guīquēnē, Botō adobaī ēñēnāmaī cæinente wīi bacæboimpa, ante pōnente wædinque nāmā wææ cæedāni. ² Wacā teēmente mongænte baī entawengā ate wædinque mīnitō mōnō Codito nānō, Iīmaī cæedāni, angainō ēñente cædinque tōmengā nānō mongæncōo iñacabo mongænte baī cædinque waa cæedāni.

³ Æcānō ōnonganque ina inte, Botō ñænæmo inōmo imōpa, ante pōnēna, tōmengā iñōmō nāmā babæ apænete baī oda cæte pōnengampa.

⁴ Inīnque adocanque nāmā nānō cæinō cōwā adīnque adocanque nāmā nānō cæinō cōwā adīnque tōmāmīni, Tōmēmo æbānō cæboo, ante nāmā apænte anguēnēmīni imīnīpa. Mānōmaī cædinque wacā nānō cæinō adāmaī inte waocā nāmā nānō

cæinonque cōwā adinque apænte äinique, Tömëmo nō cæbo imopa, ante adinque tobaingampa. ⁵ Edæ adocanque nāmā nānō cæquënēnō ante teëmente mongænte bai cædinque adocanque nāmā nānō cæquënēnō ante teëmente mongænte bai cædinque tōmāmīni eyepæ cæbaiminipa.

⁶ Ayæ Wængonguī nānō apænedō ante wacā apæneçä eñëninque nē eñengä iñōmō tōmengä määncoo pancacooga waincooga æninque nē apæneçä ingante eyepæ pædæ godongä æncæcäimpa.

⁷ Tömëmō tā bocate pæte incayō waocā wäänā adomō bai tā pete ængampa. Mänōmaī ingæimpa, ante nē angaingä inte Wængonguī iñæmpa oda cæcampa diyæ waocā wamō ænguingä. İninque, Waocā æbänō cæcää, ante adinque Wængonguī pönō cæcä ate waocā nānō cægāi bai adobai ænte wæcæcäimpa. Ämo eñëninque mīnitō wīi wacā wapiticæ nānō apænedō beyæ oda cæquënēmīnidō anguënë. ⁸ Edæ minte pædimō bai tā pete ængä bai cædinque imæcaque ante nāmā pönente nē cæcä guiquënë adobai imæcaque nānō ñömænguinque æncæcäimpa. Wæætē Wængonguī Önowocaque ante pönëninque nē cæcä guiquënë Wængonguī Önowoca pönō cæcä beyænque tōmengä nānō cōwē wænāmaī quëwenguinque æncæcäimpa. ⁹ İninque mönō wæntæye badāmaī inte wadāni beyæ godömenque waa cæcæimpa. Ñimpo cædāmaī imō ininque edæ Wængonguī, İñedē æncæmīnimpa, ante nānō angaiñedē iinque bayonte māniñedē mönō edæ tā pete bai eyepæ pōni æmaimompa. ¹⁰ Mänōmaī beyæ mönō eyepæ imō iñedē tōmānāni inānite mönō waa cæcæimpa. Ayæ wadāni nē wede pönënanī iñönānite mönō, Adomō imopa, ante pönëninque tōmënāni inānite godömenque nangui cædinque waa cæcæimpa.

Waa quëwencæmīnimpa, ante

¹¹ Botō önompoca yewæmöninque tömëmō ñænæmōmo yewæmōmoī aedāni. ¹² Codito mönō beyæ awāa wængacäimpa, ante nē pönënanī incæ pancadāniya, Mänine ante eñëninque oodeoidi pīināni wæcæ wæ, ante nāmā wææ cæcæte ante cædānipa. İninque tōmënāni, Eö togænte cæmōni ininque oodeoidi wæætē mōnitō imōnite waa acædānimpa, ante cædinque mīnitō imīnite, Eö togæimīni bacæmīnimpa, änānipa. ¹³ Nē eö togæināni incæ edæ Wængonguī nānō wææ angainō ante dicæ eñente cædāniyaa. Incæte tōmënāni, Mōnitō änō bai mīnitō do eö togæimīni bamīni ate wadāni mōnitō imōnite waa acædānimpa, ante cædinque mīnitō imīnite, Eö togæimīni baedāni, ante cædānipa.

¹⁴ Botō guiquënë quïëmenque ante, Waa aedāni, ante dicæ ämogaa. İñæmpa imæcaque ante botō cæinëmāmo ante botō, Codito nānō wængaiwāa tente bai wæinëmāmo impa, ante bai cædinque edæ mānimāmo ante æmæwo wido cætabopa. Ayæ tömëmō adobai Codito tönō āanque bai awāa wænte bai ingaimo inte edæ imæcaque botō cæinënō ante cædāmaī inōmo imopa. İninque, Mönō Awënë Itota Codito awāa wæninque mönō beyæ waa pōni pönō cægacäimpa, ante pönente wædinque botō māniwænque tōmengä nānō wængaiwænque ante waa ate apænedinque edæ wade ante cōwē waa ate tededāmaī incæboimpa, ämopa. ¹⁵ İninque eö togæimō incæ bagāamō incæ önonque pōni edæ impa. Edæ Itota Codito badongä beyænque mönō mīimō quëwëmompā. ¹⁶ Mänōmainō ante pönente cæmīni iñömīnite Wængonguī pönō waadete piyænē cæcä adinque mīnitō gänē pönente waa cæcæmīnimpa. Idægoidi imīnipa, ante Wængonguī nē nānō angaimīni incæ mīnitō mānōmaī cæte quëwencæmīnimpa.

¹⁷ Botō Itota beyæ ante cæyömō wadāni pānāni wædimō inte botō do

baonga ämogate ee eñabo iñömote
ñöwo ñincayæ ate mīnitō tōmāmīni
edæ ee amīni quēwēmoedāni. ¹⁸ Botō
tōñiñamīni waa quēwencæmīnimpa,
ämopa. Mōnō Awēnē Itota Codito
pōnō waadete apæncā eñēnīque
mīnitō mīmōnē adobāi waadete
entawencæmīnimpa. Mānīque ante
yewæmōmopa, ante Amēē ämopa.

Epetoidi inānite **Pabodo nānō** **cadota ante** **yewæmongainta**

Waa quēwencæminimpa, ante

¹ Wængonguī angā eñēninque Itota Codito botō imote da godongā gogaīmo inte botō Pabodobo inōmō inte yewæmōmopa. Epeto inōmō quēwēmini incæ mīnitō Wængonguī quīmini inte Itota Codito nempo quēwēninque nē ædæmō cæte pōnēmini inōmīnite botō, Mīnitō acæminimpa, ante yewæmōmopa. ² Mōnō Mæmpo Wængonguī tōnō mōnō Awēnē Itota Codito piyænē cæte waadete pōnō cæda ate mīnitō gānē pōnēninque waa quēwencæminimpa, ante yewæmōmopa.

Codito nempo quēwēninque mōnō eyepæ ēwocamōmpa

³ Mōnō Awēnē Itota Codito Wæmpocā inōngante Itota inōmō adocā ingantedō ante, Botō Wængonguī inōngā ingampa, ante apænegacāimpa. Inique mōnō inōmō Codito tōnō do oōnædē æite bai tōmengā nempo quēwēnōmonte adocā Itota Wængonguī incæ tæiyæ waēmoncoo nē ēwocagaingā inte pōnō cæcā æninque mōnō tōmengā nānō ēwocadoncoo tōmancoo bai adobaī eyepæ pōnī ænte ēwocamōmpa. Mānōmaī cæcā adinque mōnō tōmengā ingante apænedinque, Bitō waa pōnī cæbi æmōnīpa, ante watapæ apænecæimpa. ⁴ Tōmengā inōmō edæ, Codito nempo quēwēninque mīnitō botō ayōmo edæ tæiyæ waēmō ēwocamīni inte edæ wentamō mongænāmaī incæminimpa, ante tōmengā inguipoga nānō badōnāmaī inēdē incæ mōnō imonte pōnō apænte ængacāimpa. Ayæ mōnō imonte waadete pōnēninque tōmengā, ⁵ Botō pæpogate bai æmo beyænque mīnitō inōmō Itota Codito nempo quēwēninque botō

wēmini baquīmīni incæminimpa, ante cædinque tocæboimpa, angacāimpa. Inique tōmengā doyedē nānō angainō bai cædinque pōnō angā ate mōnō Wængonguī wēmō cōwē baquēnēmō ingamōimpa.

⁶ Edæ nanguī waadete pōnō cædinque tōmengā nānō nē Waadecā ingante da pōnongā æmōmpa. Mānōmaī beyæ mōnō inōmō tōmengā ingante, Bitō nāō apāite bai emōnōmi inte mānōmaī waadete pōnō cæbi æmōnīpa, ante watapæ apænecæimpa. ⁷ Edæ tōmengā nānō nē Waadecā inōmō mōnō imonte æncæte ante nāmā wepæ godonte ængā beyænque mōnō abæ tawænte quēwēmōmpa. Ayæ adobaī tōmengā wepæ inte nā mēnongacā beyænque eñēnāmaī mōnō cædō ante Wængonguī nanguī waadete pōnō cædinque nīmpo cæcā quēwēmōimpa. ⁸ Tōmengā inōmō edæ, Æbānō i, ante tōmānō ante nē eñēnongā inte, Æbānō cæquī, ante edæ nōingā eñēninque mōnō beyæ ante godōmenque nanguī pōnō cæcā æmōimpa. ⁹ Ayæ edæ, Codito tōnō guēa cædinque nāmā botō ānō bai cæte tocæboimpa, ante Wængonguī angacāimpa. Tōmengā mānōmainō ante nānō wēmō inōmō angainō ante mōnitō imōnite nōwo edonque pōnī odōmonte apænecā eñēmōnīpa. ¹⁰ Tōmengā, Iīnēdē cæcæboimpa, āninque tōmengā nānō angaiñedē inique ba ate tōmengā nānō angainō bai edæ inique cæcæcāimpa. Edæ oōnædē ongoncoo tōnō inguipoga ongoncoo tōmancoo tē gæte māmō adocanque nempo Codito Awēnē nempo godōmo æncæcāimpa, ante cæcampa.

¹¹ Nāmā pōnente nānō angainō bai tōmānō ante adobaī pōnī nē cædongā inte Wængonguī, Iīmaī cæcæboimpa, ante pōnente ate cōwē cæcampa. Inique tōmengā, Codito nempo quēwēnāni inānite æncæboimpa, ante nānō pōnente angainō bai cædinque, Mīnitō Codito nempo quēwēnguīmīni incæminimpa, ante pōnēninque mōnitō imōnite apænte

ængacäimpa. ¹² Mönitö, Codito beyæ watapæ bacäimpa, ante täno pönömöni iñömönite tömengä, Botö ñäö emönö ante watapæ apænemini bacæminimpa, ante mönitö imönite pönö apænte ængacäimpa.

¹³ Ayæ, Codito pönö ængä beyænque minitö quëwencæminimpa, ante Wængonguï watapæ nänö apænegainö ante eñente pönëninque minitö epeteomini adobaï Codito nempo quëwëmini iminipa. Wede pönëmini adinque Wængonguï, Botö wëmini iminipa, ante edonque acäimpa, ante odömoncæte ante tömengä emöwo ante minitonga yewæmonte bai cædinque tömengä Tæiyæ Waëmö Önöwoca ingante da pönongä ænte ewocaminipa. ¹⁴ Edæ Wængonguï, Botö quimini inömini inte minitö abæ tawænte mini goyedë minitö ænguincöo mänifedë ate eyepæ pönö æncæminimpa, angampa. Äninque tömengä, Nö pönö impa, ante eñencæminimpa, ante cædinque tömengä Önöwoca ingante ñöwo da pönongä ænte ewocamömpa. Ininque pancacooga do ænte bai ewocamö inte mönö, Incayæ ate mönö tömancoo ænguincöo impa, ante edonque eñengæimpa. Tömengä mänömai cæcä adinque mönö, Wængonguï bitö godömenque ñäö apäite bai bitö emonguinque mänömai cæbipa, ante watapæ apænecæimpa.

Nö eñenäni baccädänimpa, ante Pabodo apænecampa

¹⁵ Botö iñömö, Epetoidi mönö Awënë Itota ingante wede pönënanäni inänipa, ante tededäni eñentabopa. Ayæ adobaï, Wængonguï quinäni tömänäni inänite epeteoidi iñömö waadete pönënanäni inänipa, ante eñenimo inte, ¹⁶ botö ñimpo cädämai inte Wængonguï ingante cöwë waa ate pönëninque apænebopa. Ayæ minitö beyæ ante cöwë apænebopa. ¹⁷ Itota Codito mönö Awënë iñongante Wængonguï iñömö adocä Codito Wængonguï inongä ingampa. Ayæ në Mæmpocä inongä inte tömengä ñäö

emönongä ingampa. Tömengä ingante apænedinque botö, Bitö Önöwoca ingante da pönömi æninque epeteoidi iñömö në eñenäni baccädänimpa, ante apænebopa. Ayæ, Bitö Önöwoca pönö odömongä adinque epeteoidi wæætë Itota Codito ingante do ate bai ædæmö pönencädänimpa, ante botö minitö beyæ ante Wængonguï ingante cöwë apænebopa.

¹⁸ Wængonguï pönö cæcä beyænque watapæ bacäimpa, ante minitö pönente tocæminimpa, ante cædinque Wængonguï minitö iminite aa pegacäimpa. Ayæ adobaï, Mönö tömengä quimö inte tæiyæ waëmö bayömonte tömengä nänö godömenque ñäö emonguinque mönö imonte ængacäimpa. Mänine mënea edæ näwangä inepa, ante minitö eñencæminimpa, ante botö, Wængonguï bitö tömënanäni mimönë tica ënente bai odömonte apænebi ate do eñencädänimpa, ante Wængonguï ingante apænebopa. ¹⁹ Mönö në pönömö iñömonte Wængonguï nänö pönö cæquinö ante tömengä nänö tæi piñæmämö æpodö i, ante mönö ædö cæte tee mante aquii. Incæte minitö, Mänimämö ante æpodö i, ante epeteoidi eñencädänimpa, ante botö Wængonguï ingante apænebopa. Edæ, Tömengä nänö tæi piñæmämö iñömö æbänö i, ante eñencæte ante mönö, Tömengä gomonga tæi piñæmongä inte iimai cægacäimpa, ante eñengæimpa.

²⁰ Në tæi piñæmongä inte Wængonguï angä ate mönö Codito iñömö do wæningä inte edæ do ñäni ömæmongacäimpa. Ayæ godömenque tæi piñæninque Codito ingante öönæde ænte mæidinque Wængonguï tömëmæ inö angä Codito tæ contagacäimpa. ²¹ Edæ æcämenque pedænguipoga iñonte miinguipoga iñonte ñænængä inte në angä inaa, æcämenque në awënë inaa, æcämenque tæi piñænte ongongä inaa, æcämenque ingante, Awënë ingampa, ante godö pemönänii mäninänäni tömänäni önönänique incädänimpa. Mönö Codito ado-

canque ingante ogæ æænonte bai cædinque Wængongui angä ate tömengä wæætë Tæiyæ Awënë bacä acæimpa. ²² Ayæ Wængongui tömäo iñömö ongoncoo Codito önöwaca inö pönö wææntodöningue edæ, Bitö edæ Tæiyæ Awënë inömi inte edæ æmonga pönö ongoncæbiimpa, angacäimpa. Ayæ, Bitö imite godongämæ nê pönënanî tömënanî Ocamö bai iñömite, ²³ tömënanî wæætë bitö baö bai adoyonque bai incædänimpa. Codito ingante mänömainö ante apænedinque Wængongui, Bitö nê Awënë inömi inte tömäo iñömö ongoncoo tömancoo bitö nempo ongoncooque bacæimpa. Ayæ bitö imite nê pönënanî iñömö bacoo inäni yebænänî inique bitö enempodö eyede pönö bacæimpa, ante Wængongui Codito ingante pönö cægacäimpa.

2

Wængongui nänö waadete pönëno beyænque quëwëmö

¹ Minitö guiquënë wëenëñedë ëñënamäi cæte quëwëmîni inte wënæ wënæ mîni cædö beyæ dobæ edæ wæwocaimîni ingamînimpa. ² Nê inguipogaque ante pönënanî taadö adodö cægonte bai mînitö mänîñedë edæ wënæ wënæ cæte quëwengamînimpa. Ayæ wënæidi tæi piñænte nâni owocabo awëmö iñömö nâni cægönö adodö gote bai mînitö tömënanî awënë miñæ tee empote godinque wënæ wënæ cægamînimpa. Nöwo incæ Wængongui nänö änö ante nê ëñënamäi cæte quëwënâni guiquënë adocä wënæ awënë nänö pönëwënö ante ëñente ëwocadinque cædänipa. ³ Wëenëñedë tömënanî tönö godongämæ quëwëningue mönö tömämö adobai imæcaque ante pönëningue mönö towëmämoque ante quëwengamöimpa. Quiëmenque ante towencæte ante mönö cæinëwënö ante cædinque mönö ocaidë ædëmenque pönëningue mönö cæinëwënonque cæte quëwengamöimpa. Inique wadâni nâni tente wæquënënö bai

mönö adobai imæcaque ante pönente nê cæmö inömö inte edæ Wængongui nänö piinte panguënëmämo ante edæ do tente wæquënëmö ingamöimpa.

⁴ Mänömai ingaimö iñömönte Wængongui mönö imonte nangui waadete pönëningue iïmai nangui waadedongä inte pönö waa cægacäimpa. ⁵ Mönö ëñënamäi cægäinö beyæ ante wæwocate wæyömönte tömengä pönö cæcä beyænque mönö Codito tönö godongämæ quëwëmompä. Minitö edæ Wængongui nänö waadete pönö cægäinö beyænque quëwëmîni imînipä. ⁶ Wængongui angä Codito nâni ömæmöñongä mönö tömengä tönö godongämæ nâni ömæmönte bai miimö badinque quëwengamöimpa. Ayæ mönö tömengä nempo quëwëmö iñömönte Wængongui iñömö Itota Codito ingante ææntodöningue mönö imönte öönædë ææntodönte Itota tönö pönö gönongä tæ contate bai ongömompä. ⁷ Mänömai Itota Codito nempo quëwëñömönte Wængongui iñömö, Botö pönö waadete cædinque godömenque gomonga cæbo acædänimpa, ante cægacäimpa. Ayæ, Miinguipo badömo ate botö mänîñedë ate odömömo adinque tömänâni, Wængongui nänö waadete pönö cæganca wadâni dicæ adoganca cædâniyaa, ante wæcædänimpa, ante cæcæte ante mänömai cægacäimpa.

⁸ Edæ Wængongui nänö waadete pönö cægäinö beyænque mînitö mîni quëwëningue wede pönëmîni bamînitapä. Incæte mînitö dicæ nâmä mîni cæinö beyænque nê wede pönëmîni bamînitawogaa. Wæætë edæ Wængongui pönongä æningue mînitö nê wede pönëmîni bamînitapä. ⁹ Inique, Nâmanque cæte quëwëmo aedâni, ante mönö edæ änämai ingæimpa. Iñæmpä wiï mönö cædö beyæ quëwëmompä. ¹⁰ Edæ Wængongui nänö nê badongaimö inömö imompä. Ayæ, Codito nempo nê quëwënâni iïmai cædinque waa cæcædänimpa, ante tömengä

wēenēñedē mōnō cæquēnēnō ante eyepæ badongacäimpa. Ìninqe mōnō imonte badōninqe tōmengä, Codito Itota nempo quēwēninqe mīnitō mīni waa cæquēnēnō ante edæ cæte quēwencæmīnīmpa, ante pōnō badongä bagamōimpa.

Codito beyænque gancaē pōnēmompā, ante

¹¹ Mänōmaī beyæ mīnitō, Doyedē ïmaī ingatīmpa, ante pōnēedāni. Ood-eoidi ïñōmō ònompoca æmontaique eō togæināni inte nāmanque ante edæ, “Nē eō togæimōni ïmōnipa,” ante pemonte baī apænedānipa. Wæætē mīnitō oodeomīni ïnāmaī nē eñagaimīni ïñōmīnite, “Bagāamīni ïmīnipææ,” ante mānīnāni pūwēnāni wægāmīnīmpa. Ìninqe mīnitō māniñedē æbānō ingaimīni ïnōmīni, ante yewæmōmo ate pōnēedāni.

¹² Māniñedē edæ mōnō Codito nempo quēwēnāmaī ingaimīni inte mīnitō mōni idægocabo nempo adobaī edæ quēwēnāmaī inte nānēnē quēwengāmīnīmpa. Ìninqe Wængonguī, ïmaī cōwē pōnō cæcæboīmpa, ante nānō angainō ante mōnitō godongāmæ Ao ante eñente quēwēñōmōnite mīnitō wæætē gobæ nānēnē quēwēninqe Wængonguī nānō angainō ante edæ ænāmaī ingāmīnīmpa. Watapæ bacæīmpa, ante mōnitō pōnēnō ante mīnitō ïñōmō nānēnē quēwente ædō cæte watapæ pōnente to-quīmīni. Gobæ quēwēninqe mīnitō Wængonguī nempo edæ quēwēnāmaī ingāmīnīmpa. ¹³ Incæte mīnitō gobæ nē quēwēnōmīni ïñōmīnite Itota Codito nāmā wepæ godonte æninqe mīnitō ïmīnite ænte māmōngä eyequeī pōni pōninqe mīnitō ñōwo tōmengä nempo quēwēmīnīmpa.

¹⁴ Wēenēñedē mōnitō tōnō mīnitō guēadō guēa cædōmō ingaimō inte mōnō, Nānēnē incæmīnīmpa, ante wææ cæ impa tæcæguedē wææ gōnonte baī cægāmōīmpa. Codito ïñōmō nē piyænē cædongä inte, Wææ cæ impa, mōnō ānompā bæ tate wido cæte baī cædinque mōnō imonte

ääñōmonque badongä bamōīmpa. Ìninqe tōmengä mīmōnē nē piyænē cæte entawēnongä ingä beyænque mōnō adobaī gānē pōnēmompā.

¹⁵ Edæ Wængonguī, ïmaī cæedāni, ante wade wade ante nānō wææ angainō ante eñēninqe dodāni godōmenque wææ angadānīmpa. Mōnō Codito ïñōmō inguipoga pōninqe mānīne ante tōmānō ante eñente cæte quēwengacäīmpa. Ayæ, Idæwaa wææ ante impa, ante baī cædinque tōmengä mānīne ante nāmā baonga mongænte wæninqe tee moncate baī cægacäīmpa.

Mänōmaī cædinque tōmengä, Mīnitō mencaboga inte nānēnē quēwēmīni incæte ñōwo piyænē cæte botō nempo godongāmæ quēwencæmīnīmpa, ante cædinque mōnō imonte ænte wempo cægacäīmpa. Ìninqe mōnō edæ piyænē cæte quēwenguinque edæ ääñōmonque bagamōīmpa. ¹⁶ Itota Codito ingante awāa timpodāni wængä ïninqe tōmengä mōnō guēadō guēa pūinte cægaimāmo ante ænte mongænte wido cæte baī wængä beyænque mōnō piyænē cæmō bagamōīmpa. Ayæ ado tōmengä awāa nānō wængainō beyænque mōnō tōmāmō adocabomō bamō adinqe Wængonguī wæætē piyænē cædinque mōnō imonte Ao āninqe ængacäīmpa. ¹⁷ Mīnitō guiquēnē gobæ nānēnē quēwēñōmīnite mōnitō guiquēnē Wængonguī weca eyequeī quēwēñōmōnite Codito ïñōmō inguipoga pōninqe mōnō tōmāmō imonte apænedinqe, Piyænē cæte gānē pōnente quēwēedāni, ante pōnō apænecā eñentamompā. ¹⁸ Tōmengä nānō pōnō cægainō beyænque mōni oodeocabo adobaī mīnitō wamīni adobaī mōnō tōmāmō Wængonguī

Önōwoca adowocaque ingante ewocamō inte mōnō Wæmpocā weca tōmāmō do pōmompā.

¹⁹ Ìninqe mōnitō Wængonguī quīmōni do bagaimōni inte Wængonguī nempo quēwēmōni ingaimōni baī Codito nānō pōnō cægainō

beyænque mīnitō adobaī mōnitō tōnō adocabomīni do badinque edæ Wængonguī nempo quēwēmīni imīnīpa. Ininque mīnitō ñōwo idæwaa wamīni ingamīnīmpa. Wīi wabæca quēwente baī edæ tōmēmīni oncōnē ponte owote baī mīnitō ñōwo Wængonguī nempo quēwēmīnīpa. ²⁰ Waodāni dica tāno gōnōnīnque tānocaa wænōmēnæca mænōnāni baī Wængonguī adobaī cædinque Itota Codito ingante tāno gōnongā ongōñongante tōmengāa godō mænonte baī cædinque mōnō imonte iīmaī cædinque pōnō gōnongā gongæmōmpa. Codito nānō nē da godongaimōni tōnō tōmengā beyæ nē apænemōni tōnō iñōmōnite Wængonguī mōnitō imōnite ænīnque wænōmēnæca gōnongā gongæñōmōnite wadāni inānite gā æænō tæi mænonte baī gōnongā gongænānīpa. ²¹ Codito nempo quēwēñōmōnite Wængonguī mōnitō imōnite adocooga gō cæte baī pōnō tæi mænongā ate mōnitō æicō baī bacō baī bamōnīpa. Edæ Wængonguī Tæiyæ Waēmō Önōwoca ingante āanque baī ewocadinque mōnitō godongāmæ Awēnē tæiyæ waēmō oncō baī bamōnīpa. ²² Bayōmōnite mīnitō adobaī tōmengā nempo ongōñōmīnīte Wængonguī mīnitō imīnīte ænīnque mōnitō tōnō godongāmæ māmō adocooga gō cæte tæi mænonte baī cædinque, Mīnitō botō Önōwoca tōnō āāwocaque baī ewocadinque botō owoquincō baī bamīnīpa, ante pōnō badongacāīmpa.

3

Oodeoidi ināmaī ināni inānite apæneccægotabopa, ante

¹ Mānīnō beyæ iīmaī ante apænebopa. Botō Pabodobo iñōmō Codito beyæ ante oodeomīni ināmaī imīni imīnīte apæneccæte ante cæyōmote botō imote edæ tee mōnedāni wædōmo inte yewæmōmopa.

² Mīnitō oodeomīni ināmaī imīni iñōmō iīmaī ante wabānō eñēmīnitawo. Wængonguī pōnō angā eñēnīnque botō

mīnitō beyæ tōmengā nānō waadete cædōnō ante nē apænequēnēmo batabopa. ³ Mānīnō ante botō, Wængonguī awēmō nānō cægainō ante botō imote edonque odōmongā atabopa, ante do wædænque yewæmōmo amīnitawo. Edæ adodō ante ñōwo yewæmōmopa.

⁴ Ininque mānōmainō ante botō do yewæmōnīnta adīnque mīnitō, Mōnō Codito awēmō nānō cægainō ante Pabodo do ate baī eñengampa, ante eñēmaimīnīpa. ⁵ Mōnitō wæmæidi nāni quēwēñedē nē quēwengaināni iñōmō, Mōnō Codito iīcayæ ate pōnīnque æbānō awēmō cæquingāa, ante eñēnāmaī inte wægadānīmpa. Ñōwo guiquēnē Codito beyæ nē apænedāni tōnō mōnitō tōmengā nānō nē da godōnīmōni tæiyæ waēmō bamōni iñōmōnite Wængonguī Önōwoca mānīnō ante edonque odōmōnte apæneccā eñēmōnīpa.

⁶ Iīmaī ante impa. Mōnitō Wængonguī nānō pōnonguincoo nē ænguimōni iñōmōnite mīnitō oodeoidi ināmaī imīni inte mōnitō tōnō adocabomīni badinque edæ mōnitō tōnō godongāmæ nē ænguimīni adobaī bamīnīpa. Ayæ, Itota Codito tōnō pōnō cædinque Wængonguī nānō, Cōwē cæcæboīmpa, ante angainō do cægacāīmpa, ante watapæ pōnēnīnque mīnitō mōnitō tōnō edæ godongāmæ quēwencæmīnīmpa.

⁷ Wængonguī nē tæi piñænongā inte waadete pōnō nanguī cæcā adīnque edæ tōmengā beyæ nē cæbo badīnque botō Codito ingantedō ante nē watapæ apænebo batabopa.

⁸ Mōnō tōmāmō Wængonguī quīmō iñōmōnte botō iñōmō wamīni baī wīi imopa. Botō adoboque wædāmo pōnī imo incæte Wængonguī waadete cædinque pōnō angā eñēmo inte botō mīnitō imīnīte nē apænebo batabopa. Codito nānō pōnō cægainō ante æpodō i, ante mōnō ædō cæte tee mante eñenguīi. Incæte Wængonguī waadete pōnō cæcā beyænque botō iñōmō Codito waa pōnī nānō pōnō

cægainō ante edæ oodeo ināmai imini iminite nē apænequēnēmo batabopa. ⁹Ayæ Wængongui tōmancoo nē badongaingā inte wēenēñedē nāmanque entawēninque awēmō nānō wē wodongainō ante botō imote odōmonte apænecantapa. Ayæ, Pabodo māninō ante edonque odōmonte apænequēnengā ingampa, ante tōmānāni ēñencādānimpa, ante pōnō apænecā æntabopa.

¹⁰Codito ingante mōnō godongāmæ pōnencabo iñōmonte tōmengā wadō wadō ante tōmānō ante nē ēñengaingā inte mōnō tōnō godongāmæ cæcampa. Mōnō tōnō mānōmai cædinque tōmengā, Botō wadō wadō ante tōmānō ante botō ēñengainō ante adinque oōnædē quēwēnāni awēnēidi tōnō māniñōmō nē ānāni tōnō wæcādānimpa, ante cægacāimpa.

¹¹Wēenēñedē pedæmāmo iñonte Wængongui, Cæbo ate awēnēidi incæ wæcādānimpa, ante cōwē pōnengacāimpa. Nōwo iñōmō tōmengā māninō ante nānō pōnengainō ante tōmengā mōnō Awēnē Itota Codito tōnō godongāmæ cædinque do cægacāimpa. ¹²Codito nempo nē quēwēmō inte mōnō tōmengā ingante wede mōnō pōnēnō beyænque guiñēnāmai inte Wængongui weca do pōninque apænemompa. ¹³Mānōmai impa, ante edæ mīnitō do ēñēmīnipa. Inique botō mīnitō beyæ ante cædinque botō caate wædō ante pōnēninque mīnitō wæætē wædāmai iedāni. Wæætē, Mōnitō godōmenque ñāō bai ēmoncæmōnimpa, ante Pabodo caate wæcampa, ante pōnēninque mīnitō wædāmai incæmīnimpa āmopa.

Codito nānō pōnēnō ante

¹⁴Māninō beyæ mōnō Awēnē Itota Codito Wæmpocā iñongante botō tōmengā onōwaca inō da guicapodique apænebopa. ¹⁵Tōmengā iñōmō edæ adocanque nāwā Wæmpocā ingampa. Inique inguipoga quēwēmō incæ oōnædē quēwēnāni incæ tōmengā ingante, Mæmpo, ante

nē tedemō iñōmō mōnō tōmengā tōnō mōnō wæmpocabo bai imompa.

¹⁶Inique mōnō Wæmpocā ingante apænedinque botō mīnitō beyæ ante iīmai ante apænebopa. Wængongui bitō nē ñāō bai entawēmi inōmi inte bitō Tæiyæ Waēmō Onōwoca ingante epeteoidi inānite da pōnōmi æninque tōmēnāni wæætē edæ mīmō tæi piñænte entawencādānimpa, ante apænebopa. ¹⁷Ayæ, Mōnō Codito adobai mīnitō weca pōñongante mīnitō mīmōnē wede pōnēninque tōmengā ingante ædæmō entawencæmīnimpa, ante mōnō Wæmpocā ingante apænebopa. Ayæ, Awæ ædæmō guiwa inte tōmēmæ āwāate pæwæ bai cædinque mīnitō iñōmō adobai tōmengā nānō waadete pōnēmāmo entawēninque edæ mīmōnē tæi ongōmīni bacæmīnimpa. ¹⁸Ayæ mōnitō Wængongui quimōni tōnō mīnitō adocabomīni inte tæi piñæmīni badinque, Itota Codito nānō waadete pōnēnō ante ægancadō owoo, ante ēñencādānimpa, āmopa. Ayæ, Tōmengā nānō waadete pōnēnō iñōmō edæ yepanca pōni owopa, oopānō pōni owopa, æibæ pōni owopa, wincamō pōni owopa, ante ēñencādānimpa, ante apænebopa. ¹⁹Ayæ edæ, Mōnō Codito waadete nānō pōnēnō æbānō gomonga pōni owoo, ante mōnō ædō cæte ēñenguīi, ante mōnō wædō incæte mīnitō māninō ante ēñencæmīnimpa. Ayæ edæ, Māninō ante ēñēmīni inte mīnitō Wængongui nānō nanguī entawēnō edæ eyepæ pōni entawencæmīnimpa, ante botō mōnō Wæmpocā ingante apænebopa.

²⁰Mōnō ānō ante ayæ mōnō pōnēnō ante eyepæ cædongā inte Wængongui iñōmō mōnō imonte tæi piñænte nānō cæpāmo ganca cædinque nanguī gomonga cæcā ingampa. Inique ñōwo iñōmō mōnō Wængongui ingante waa ate pōnente apænecāimpa. ²¹Edæ do wænte æigaināni tōnō ayæ ate ēñate quēwenguīnāni tōnō mōnō tōmāmō Codito ingante godongāmæ

mönö pönencabo inömö inte Itota Codito ingante ewocadinque mönö godongämæ apæ necæimpa. Mæmpo Wængongui ëñëmi. Bitö adobique ñäö ëmongaïmi inömi imipa, ante mönö ñimpo cädämaï inte cöwë waa ate apæ necæimpa. Mänömaï impa, ante botö, Amëë, ämopa.

4

Codito nempo quëwëninque adocabomö imompa

¹ Waa cæte quëwencæminimpa, ante Wængongui aa pecantapa, ante ëñëmini inte mïnitö tömengä nänö änonque ante ëñente cædinque quëwencæminimpa. Botö mönö Awënë beyæ tee mönete wæcömo incæ ämo ëñëdäni. ² Mïnitö nämä ængö cädämaï inte, Önömoque bai imopa, ante pönëninque wadäni inänite edæ ædæmö cædäni. Æiquedö waa cæquinänii, ante wädämaï inte edæ piyænë cæte quëwëdäni. Ayæ wadäni mïnitö iminite wënæ wënæ cædäni wædinque tömënäni inänite wæætë piinämaï inte ædæmö waadete cædäni. ³ Mïnitö, Mönö pönencabo piyænë cædinque cöwë adodö ante pönente edæ Wængongui Önöwoca tönö äanque bai ee ewocacæimpa, ante nanguï cædinque wacä ingä wacä ingä edæ waa cædäni.

⁴ Mönö Awënë pönö cæcä ate watapæ bacæimpa, ante mïnitö adodeque ante pönente tocæminimpa, ante Wængongui mïnitö iminite edæ adodeque ante aa pegacæimpa. Æinque mänine, Watapæ bacæimpa, ante mïni pönëne adodeque i bai Wængongui Önöwoca edæ adobai adowocaque inte quëwengampa. Tömengä adowocaque nempo quëwënömö inte mönö adobai edæ adocabomonque inömö imompa. ⁵ Mönö Awënë edæ adocanque pönï inongä inongante tömengä ingante mönö wede pönëno adobai adodeque pönï inepa. Ayæ adodö ante pönëninque æpænë guidinque mönö

adopænenque guiite bai guiita-mompa. ⁶ Wængongui adocanque pönï inongä inte tömengä tömämö Wæmpocä adocanque ingampa. Tömengä inömö edæ Tæiyæ Awënë pönï inongä inte tömämö imonte në aacä ingampa. Tömengä adocanque pönï nempo quëwëñömonte tömengä wæætë mönö tömämö mïmönë quëwengampa.

⁷ Incæte mönö Codito, Mïmönë bitö entawenganca ænte cæe, ante tee mante bai cædinque adocanque ingante waadete pönö cædinque wacä ingante waadete pönö cædinque edæ tömämö imonte tömengä nänö pönö cæcoo eyepæ pönongä æninque entawëmompa. ⁸ Codito mänömaï cæcæcäimpa, ante pönëninque awënë Dabii wodi iïmaï ante yewæmongacäimpa.

“Tömengä æibæ æicæ cædinque wadäni inänite bæi ongonte ñä cæyænte tömengä miñæ ænte mæicä æigadänimpa.

Ayæ æidinque tömengä mönö waocabo inömonte, Mïnitö entawenguinö, ante eyepæ pædæ pönongä ænte entawengamöimpa,” ante Dabii nänö yewæmonte angainö bai impa.

⁹ Mänine, “Æigacäimpa,” ante nänï angaine inömö quinante yewæmongatïi. Edæ, Tömengä inguipoga tadömengadæ do wææningä inte æigacäimpa, ante odömoncæte ante yewæmongatimpa. ¹⁰ Në wæængaingä inongä inömö adocä do öönædë gömonga æidinque inguipoga tömäo öönædë tömäo tömäo inömö edæ godömenque æibæ pönï quëwengä inongä ingampa.

¹¹ Tömengä tömancoo në enemocä inongä inte adocä mönö waomö imonte pönö angä ænte entawëninque mönö iïmaï cæmö bamöimpa. Pancamöniya imönite tömengä angä ëñëninque tömengä nänö në da godongaïmöni batamönipa. Pancamöniya guiquënë Wængongui waa pönï nänö pönö cægainö ante në

apænemöni batamönipa. Pancamöniya guiquënë Wængongui beyæ nē apænemöni batamönipa. Pancadäniya guiquënë nē aadäni badänitapa. Ayæ pancadäniya guiquënë nē odömonte apænedäni badänitapa. ¹² Mänömaï pönö cædinqe mönö Codito mönö ocamö bai inongä inte, Botö baö bai adoyonque bai inäni iñömö ñancæ äate bai tæi piñænäni ewocacædänimpa, ante pönö cægacäimpa. Mönö imonte tömengä, Minitö Wængongui quimäni inömini inte tömänäni inänite nē cæmini inte godö cæcæminimpa, ante pönö cægacäimpa.

¹³ Mini wede pönönö ante minitö tömämäni adoyömö ante pönencæminimpa, ante mönö Codito pönö cægacäimpa. Ayæ, Botö Wængongui Wëmo iñömote minitö botö imote ate bai pönencæminimpa, ante tömengä pönö cæcampa. Ayæ æmæwo pæmäni bai mini baquinque minitö botö entawönö ædæmö entawencæminimpa, ante Codito edæ da pönongä eyepæ æmompä.

¹⁴ Inique æmæwo pædimö inte wëñæmö inämaï imö inique mönö edæ oda cædämaï ingæimpa. Wadäni guiquënë mä pönëninque, Æbänö cæmö ate oda cæquinänii, ante edæ nämäneque tedewänäni. Tömänäni iñömö edæ babæ cæcæte ante cædinqe waa cæte bai cædäni ataqeedäni. Woboyæ ædæ go ædæ go pæmænte bai cædinqe tömänäni wadö ante odömonte tedewänäni. Mänömaï wido piñænte bai cædäni incæte mönö iñömö Codito nänö entawënoncoo ænte entawëninque ää mænämaï ingæimpa.

¹⁵ Wæætë Wængongui, Näwangä pönä impä, ante nänö apænegainö ante mönö tömänäni inänite waadete pönëninque apænecæimpa. Mänömaï cædinqe mönö Codito baö bai iñömote tömengä nē Ocamö bai inte pönö angä beyænque mönö ñancæ äadinqe godömenque picæmö bamompä. ¹⁶ Mönö baonga wepæ eyepæ ëñadinqe ñancæ äadinqe tæi

piñænte pæte quëwëmompä. Adobaï mönö Codito baö tönö adoyonque bai inömö inte mönö tömengä nänö apænedö ante ëñënömo inte ñancæ äate pæte bai quëwëmompä. Ayæ wæætë ocai encamö inte mönö pæ pagænguinque wangö ténämaï oguincai bamë impä. Ayæ adobaï mönö Codito nänö waadete pönönö ante mimönë entawëmö inte mönö wacä ingä wacä ingä godö aamö inte mönö pönencabo incæ edæ tæi piñænte entawëmompä.

Codito nempo mönö iimaï quëwëmompä, ante

¹⁷ Inique mönö Awënë nempo quëwënömo inte botö nö ämo ëñëedäni. Wadäni nē ëñënämaï inäni önonquedö ante pönëninque quëwänäni. Minitö guiquënë adobaï quëwengäimäni inte ñöwo wæætë ñimpo cædinqe mänömaï cædämaï ingüënë quëwëminii.

¹⁸ Tömänäni guiquënë mimö ënänäni diyæ Wængongui weca ponguinänii. Mimö ömædänäni inte tömänäni ocai ëñënämaï badäni beyænque Wængongui weca pönämaï inäni. Edæ wentamö mongæninque tömänäni ocai wëmö encadäni inte idiquibæ ante pönänäni.

¹⁹ Inäni iñömö tömänäni nänäni cæquënënte ante ñimpo cædinqe ñöwo wæætë guiñänämaï inte baö nänäni towëinönö ante cæcæte ante nämä pædæ godonte bai edæ cædänipa. Edæ, Quiëmë wiwa cæquüi, ante mäninonque cæcæte ante godömenque cæinente wædänipa.

²⁰ Wæætë minitö guiquënë, Mönö Codito æbänö ingää, ante pönëninque edæ wii tömänäni nänäni cæinëwönö bai mini cæquinque edæ pönëmänitapa. ²¹ Tömengä apænecä edæ wii ëñëmänitawo. Inämpä,

Wængongui nö pönä nänö apænegainö ëñëninque Itota iñömö mimönë entawengampa, ante minitö tömengä nempo quëwëñöminite tömengä mänömainö ante adodö ante edæ do odömonte apænecä ëñëmänitapa.

²² Minitö wëenëñedë mini cæte quëwengainö ante tömengä iimaï ante

odömönte apænegacäimpa. Babæ pönente mīni cæinente wæwënö beyæ mīnitö mīmönë wentamö mongænte wæwëmini inte do mīni entawengainö ante edæ wido cæedäni, ante odömönte apænegacäimpa. ²³ Edæ mempoga ëñagaimīni inte mīnitö ëñënö do mīi pönī encamīni inte mīinonque ante pönencæmīnimpa, ante odömönte apænecä ëñëmīnitapa. ²⁴ Ayæ, Botö pönö badömo ate mīnitö botö bai tæiyæ waëmö ewocadinque nö pönī cæte quëwencæmīnimpa, ante Wængonguī pönö badongä ate mīnitö mīimīni bagamīnimpa. Ìnīnque tömengä, Mäninö Wængonguī nö pönī nänö entawënö ænīnque mīnitö ædæmö entawencæmīnimpa, ante odömönte apænecä do ëñëmīnitapa.

²⁵ Mänömaī beyæ mīnitö tömämīni, Mönö adocabomö imōmpa, ante adīnque babæ mīni tedewëninö ante ñimpo cædinque wacä ingante wacä ingante näwangä ante apæneedäni.

²⁶ Ænguī bamīni incæte mīnitö piyænë cædinque wacä ingante wënæ wënæ cædämaī ee aedäni. Edæ gawadecæ ganca nanguī pīinīnque edæ mīni wæquinque imaimpa. ²⁷ Mänömaī cædinque mīnitö, Wënæ incæ pönö cæcä ate botö ænguī batabopa, ante pönente wædinque ñöwo wæætë, Wënæ botö weca pönämaī incæcäimpa, ante nämä wææ cæedäni.

²⁸ Në awëmö æningä iñömö ñöwo edæ ee cædinque awëmö ænämaī incæcäimpa. Wæætë, Botö önompoca nanguī cædinque ænte quëwëninque në ænguënänäni inänite adobai godömo æncædänimpa, ante cæcæcäimpa.

²⁹ Mīnitö nämä önöne wææ aadinque wiwa ante tededämaī iedäni. Wæætë edæ, Wadäni æbänö ante ëñenguënänäni inänii, ante pönëninque mīnitö, Tömënanäni tæi piñænte entawencædänimpa, ante cædinque në ëñënäni beyænque ante waadete godö cædinque apæneedäni. ³⁰ Wængonguī Tæiyæ Waëmö Önöwoca iñömö mīnitonga pö guiidīnque, Botö

æmo beyænque mīnitö iincayæ ate æmæwo abæ tawænte gote bai quëwencæmīnimpa, ante odömoncæte ante yewæmōnte bai cægacäimpa. Ìnīnque mīnitö, Wënæ wënæ möni cædö beyæ ante Wængonguī Önöwoca wæwente badämaī incæcäimpa, ante wææ cædinque edæ ëñente cæedäni.

³¹ Ayæ, Wīi waëmö awædö, ante mīni pīiwëninö ante edæ ñimpo cæedäni. Äimö ante mīni pönëwëmämö adobai ñimpo cædinque ænguī pönī mīni badimämö edæ ñimpo cæedäni. Yæ ante mīni piinte ogæ tedewëmämö, wacä ingante ante mīni piinte tedewëmämö edæ ñimpo cæedäni. Ayæ piinte cæquinque ante mīni entawëninö ante tömänö edæ wido cæedäni. ³² Wæætë godongämæ waadete cædinque wacä caate wæcä adīnque mīnitö godongämæ Ca ca wæcæmīnimpa. Ayæ Codito ængä beyænque Wængonguī mīnitö imīnite pönö ñimpo cæcampa cæmīni. Tömengä ñimpo cæcä quëwëmini bai mīnitö adobai cædinque wadäni wënæ wënæ cæyönänite wacä ingä wacä ingä ñimpo cæmīni quëwënanii.

5

Wængonguī wëmīni, iūmaī cæte quëwëedäni, ante

¹ Ìnīnque Wængonguī wëmīni iñömö mīnitö tömengä nänö në waademīni inömīni inte Wæmpocä nänö cæi bai ante cöwä adīnque adobai cæedäni. ² Baö, Wængonguī qui, ante godöninque, Oguī wacæimpa, ante iya tänäni bai cædinque Codito mönö imōnte waadete pönëninque edæ adobai cægacäimpa. Tömengä iñömö, Botö Wængonguī quimo imōpa, ante nämä wæpæ pædæ godöninque mönö imōnte wæætë ængacäimpa. Ìnīnque tömengä nänö waadete pönënö bai mīnitö adobai waadete pönëninque quëwëedäni.

³ Wæætë edæ mīni pönencabo iñömīnite waocä adocanque incæ nänöogængä inämaī iñongante godö guëa mönämaī iedäni. Wentamö

mongæ wæcæ wæ, ante edæ wīwa cædāmaī iedāni. Nanguī māincoo ante æinente wædāmaī iedāni. Māninō tōmānō cædāmaī imini inte māninō ante edæ adopoque incæ tededāmaī imæwedāni. Edæ Wængonguī quimīni tæiyæ waemō entawemīni inte mīnitō māninō tōmānō cædāmaī incæminimpa. ⁴ Wentamō ante nāni pōnēwēnō bai mīnitō wæætē adobainō ante pōnēnāmaī iedāni. Ononque ante nāni tedewēnō bai mīnitō wæætē adobai tededāmaī iedāni. Wēnæ wēnæ ante pōnente nāni badete towēnō bai mīnitō wæætē adobai badete todāmaī iedāni. Iñæmpa Wængonguī quimīni inōmīni inte mīnitō māninō ante wīi pōnenguēnēmīni imīnīpa. Wæætē Wængonguī ingante waa ate pōnēninque apænequēnēmīni imīnīpa.

⁵ Awēnē Odeye Wængonguī nempo ayæ Awēnē Odeye Codito nempo edæ ædānidō nē guiite ænguīnāni ināni. Nānōogængā ināmaī iñongante nē towēnāni tōnō wentamō pōnente nē cædāni iñōmō tōmēnāni edæ dicæ guiite ænguīnāniyaa. Ayæ māincoo ante wacā qui nē æinente wæwēnāni iñōmō edæ, Māincoo incæ mōnitō wængonguī impa, ante bai cædāni inōnāni inte tōmēnāni adobai edæ guiite ænāmaī incædānimpā. Ante āmo ēñēedāni. ⁶ Wadāni, Mīnitō oda cæcæminimpa, ante ononquedō ante tedete cæyōnānite mīnitō wæætē tōmēnāni nāni tededō ante edæ ēñēnāmaī iedāni. Edæ tōmēnāni ēñēnāmaī inte nāni wēnæ wēnæ cædō beyæ Wængonguī ænguī badinque tōmēnāni inānite pancæcāimpā. ⁷ Iñinque mīnitō gooque gomō adinque tōmēnāni tōnō godongāmæ cædāmaī iedāni.

⁸ Mīnitō iñōmō wēēnēñedē wentamō mongæmīni ingalmīni inte ñōwo wæætē edæ mōnō Awēnē nempo quēwēninque edæ ñāō bai entawēmīnīpa. Iñinque Mæmpo nānō ñāō emōnō bai entawēmīni inte mīnitō ñāō iñōmō cægonte bai edæ waa quēwēedāni. ⁹ Edæ waiwæ waincate bai cædinque mōnō wadāni inānite godō waa cæquinque mōnō

edæ ñāō iñōmō quēwēmompā. Ayæ nō pōni mōnō cæquinque nāwangā pōni ante mōnō apænequinque edæ ñāō iñōmō quēwēmompā. ¹⁰ Ayæ, Æbānō cæmō ate mōnō Awēnē, Waa cæmīni abopa, ante apænequingā, ante ēñencæte ante cædinque do ēñēnīmi inte tōmengā nānō waa adonque cæedāni. ¹¹ Wadāni wēmo iñōmō ononque nāni cædō ante adinque mīnitō iñōmō edæ gooque gomō aedāni. Ayæ tica ēnente bai cædinque, Tōmēnāni nāni cædō wēnæ wēnæ impa, ante edonque odōmōmīni acædānimpā. ¹² Awēmō nāni cædō beyæ guingo imonte wæquēnēnāni iñōnāni mōnō iñōmō edæ guiñēnete wædinque māninō ante edæ tededāmaī ingæimpā. ¹³ Wæætē edæ, Awēmō iñōmō æbānō cædāni, ante tōmānō ante edæ tica ēnente edonque acæimpā. ¹⁴ Ñāō beyænque edæ edonque amompā. Mānōmaī i beyæ iīmaī ante āmotamīni ante bai apænedānīpa.

“Bitō wangæ möimi inte ñāni omæmonte ængæ gantie.

Edæ ængæ gantiyōmite

Codito incæ pōnō tica ēnente bai cæcā ate ñāō entawencæbiimpā,” ante apænedānīpa.

¹⁵ Mānōmaī beyæ mīnitō ocai omæcamīni ināmaī inōmīni inte wæætē ocai nē encamīni inte cædinque, Æbānō waa cæte quēwenguīmo, ante nāmā waa ate waa cæedāni. ¹⁶ Wadāni ñōwo incæ godōmenque wīwa cædānīpa cæmīnīi. Eyepæ iñonte mīni cæquēnēnonque ante edæ do cæedāni. ¹⁷ Edæ wēñænāni owempote cædāni bai mīnitō adobai cædāmaī iedāni. Wæætē, Wængonguī æbānō angantawo, ante ēñēninque māninonque ante ēñente cæedāni. ¹⁸ Wadāni biinōmæ nāni amæ bedinque dowænte badinque godōmenque pōnēnāmaī cædinque tōmēnāni nāni ewente wæwenguinque bewēnānīpa. Iñinque mīnitō iñōmō bete dowænte badāmaī iedāni. Wæætē Wængonguī Onōwoca ingante ædæmō ewocate quēwēedāni. ¹⁹ Amotamīni ante bai godongāmæ

watapæ ante tedeedäni. Awënë Dabii wodi nänö ämotamini angaintaa adinque edæ adodö äedäni. Ayæ mīnitō nāmā mā pōnēninque, Īmaī Wængonguī beyæ mōnō ämotamini angæimpa, ante adodö äedäni. Wængonguī Önōwoca angä eñente ewocadinque tōmengä ämotamini nänö änönö ante adodö äedäni. Mīmōno ämotamini ante bai pōnēninque mīnitō mōnō Awënë ingante watapæ pōnente äedäni. ²⁰ Æbāmē bay-onte mīnitō tōmānō beyæ ante edæ Mæmpo Wængonguī ingante cōwē waa ate pōnēninque mōnō Awënë Codito emōwo ante apæneedäni.

Mæmpoidi nāni wencabo ĩmaī quēwencædänimpa

²¹ Mōnō Codito ingante guñente wædinque mīnitō wīi nāmā mīni pōnēnonque bai cædinque wæætē edæ, Nē änāni æbānō änāni, ante Ao ate nōinō ante cæedäni.

²² Onquiyæmīni eñeedäni. Mīnitō, Mōnō Awënë nänö angainō bai mōnō eñente cæcæimpa, ante tōmēmīni nänöogænāni inānite Ao ante eñente cæedäni. ²³ Edæ Codito ingante mōnō godongāmæ pōnencabo iñōmonte mōnō Codito adocā iñōmō, Quēwencæmīnimpā, ante nē Ængaingä inongä ingampa. Tōmengä tōnō mōnō adoyonque bai iñōmonte tōmengä iñōmō mōnō Ocamō bai inongä ingampa. Ayæ onquiyængä tōnō onguñængä adobai adoyonque bai iñōnate onguñængä iñōmō nē ocamō bai inongä ingampa. ²⁴ Īninqwe Codito ingante mōnō godongāmæ pōnencabo incæ tōmengä ingante Ao ante eñente cæmō bai onquiyænāni adobai tōmēnāni nänöogænāni inānite cōwē edæ Ao ante eñente cæquēnēnāni inānipa.

²⁵ Wæætē onguñæmīni eñeedäni. Mīnitō Codito nänö waadete pōnēnō bai tōmēmīni nänöogænāni inānite adobai waadete pōneedäni. Tōmengä ingante mōnō godongāmæ pōnencabo iñōmonte tōmengä iñōmō mōnō imonte waadete pōnēninque mōnō imonte æncæte ante pōnō

cædinque nāmā wepæ godongacæimpa. ²⁶ Ayæ, Wængonguī

nänö apænedö waēmōmæ imæ bai iñonte mīnitō iñōmō mānīnō ante eñēninque tæiyæ waēmō ewocate quēwencæmīnimpā, ante mōnō Codito adocā mōnō imonte edæ nā mēnongate bai cægacæimpa. ²⁷ Mānōmaī tæiyæ waēmō badinque mōnō wentamō mongænāmaī inte Codito ingante mōnō pōnencabo adocabomō iñōmonte tōmengä iñōmō edæ nänöogængä ænte bai cædinque mōnō pōnencabo imonte, Bitō, ante apænegacæimpa. Ayæ mōnō cabo iñōmonte tōmengä, Bitō idiquibæ entawēnāmaī iñōmite ædö cæte bitō imite piinte anguiī, ante pōnō cægacæimpa. Ayæ wæætē edæ, Nā mēnongate bai tæiyæ waēmō emōmi ĩninqwe mōnō edæ guēa nāö apāite bai emongæimpa, ante Codito nänöogængä ænte bai mōnō imonte pōnō ængacæimpa.

²⁸ Onguñænāni iñōmō adobai tōmēnāni, Botō baö, ante nāni pōnē bai tōmēnāni nänöogænāni inānite adobai waadete edæ pōnenguēnēnāni inānipa. Æcānō tōmengä nänöogængä ingante waadete pōnēna iñōmō tōmengä nāmā baö ante waadete pōnente bai edæ cæcampa. ²⁹ Īñæmpa waocā nāmā baö cōwē pīnāmaī ingampa. Wæætē, Botō baö, ante edæ pæ gompodinqwe pōnō aacampa. Ayæ adobai Codito ingante mōnō godongāmæ pōnencabo iñōmonte edæ tōmengä adobai, Botō baö, ante bai cædinque mōnō imonte wææ gompodinqwe pōnō aacampa. ³⁰ Edæ mōnō Codito nē Ocamō bai inongä inte nē angä iñongante mōnō wæætē tōmengä tōnō adoyonque bai inte eñente quēwēmompā. ³¹ “Mānōmaī beyæ onguñængä mæmpo tōnō badā inate emō cæte godinqwe onquiyængä ingante, Botō nänöogængä, ante æmæwo monte quēwencæcæimpa. Mēnaa ĩnina incæ tōmēna wæætē nāna gæncaya badinque adocanque bai bacædaimpa,” ante yewæmongatimpā.

³² Mänömainö ante nani yewæmongaiēñente cæedāni. Minitö Codito ante edæ wē wodonte bai i iñonte wii tömänö ante eñēmompā. Incæte, Codito ingante mönö godongāmæ pönencabo iñömonte mönö tömengä tönö adocanque bai imöimpa, ante minitö eñencæminimpa, ante botö apænetabopa. ³³ Incæte onguiñæmi nämä bitö waadete pönënganca tömëmi nänöogængä ingante edæ adoganca waadete pönencæbiimpa. Onquiyæmi adobai, Botö nänöogængä ingampa, ante adinque edæ eñente cæcæbiimpa.

6

¹ Wēñæmini guiquënë eñeedāni. Minitö mönö Awënë nempo quëwënöminite tömëmini mæmpoidi inänite edæ ædæmö eñente cæedāni. Æcänö edæ mänömai cædaa tömengä edæ nö pöni cæcampa. ² “Wæmpocä ingante wäänä inante waa adinque tömëna inate godö waadete cæe,” ante Wængongui incæ wææ angacäimpa. Tömengä wade nänö wææ angainö äninque, Mini waa quëwënguinque cæcæminimpa, ante apænedāmai ingaingä inte ñöwo iine ante wææ äninque, Mini waa quëwënguinque cæcæminimpa, ante mä apænegacäimpa. ³ Edæ iine ante wææ äninque tömengä, “Mänömai cæmini ininque minitö watapæ quëwëninque iimæca wantæpiyæ quëwëncæminimpa,” ante mä apænegacäimpa.

⁴ Wæmpomini guiquënë eñeedāni. Minitö wënäni wii äināni bacædänimpa, ante wææ cædinque minitö tömënanäni inänite piinte cædāmai iedāni. Wæætë, Mönö Awënë wææ aadinque mönö imonte päninque odömonte apænecampa, ante adinque minitö tömengä nänö cæi bai adobai cædinque wēñænāni inänite ædæmö wææ aadinque mönö Awënë nänö apænedö ante odömonte apænemini ate tömënanäni waa pæcædänimpa.

⁵ Waodāni minitö iminite ö ænāni inte tömënanäni beyænque cæte nē quëwëmini iñöminite apænebo eñeedāni. Iimæca minitö awënëidi inänite minitö waa adinque guñente wædinque tömënanäni nani änö ante

angä eñente mïmönë nö pönente cæminitawo. Ininque edæ iimæca awënë angä eñente edæ adobai mïmönë nö pönente cæedāni. ⁶ Minitö edæ, Awënë botö imote waa acæcäimpa, ante tömengä ayongante eñente cæminitawo. Iñæmpa awënë dæ goyongante adobai cöwë eñente cæedāni. Codito botö imote nē godonte Ængaingä ingante nē cæte quëwëmö imompā, ante pönëninque minitö edæ Wængongui nänö änönö ante mïmönöque pönente cæedāni.

⁷ Minitö mïmönö piyænë cædinque iimāi ante pönente cæedāni. Iimæca awënë ingante cædinque botö wii waocä beyænque ante cæbopa. Wæætë Wængongui Awënë beyænque ante botö iimæca awënë ingante cæbopa, ante pönëninque pæ piñænte bai cæedāni. ⁸ Minitö iimāi ante edæ do eñëminipa. Minitö wacä nänö ö ænimini inte tömengä beyænque nē cæte quëwëmini incæ abæ tawænte ee gote bai nämä beyænque cæte quëwëmini incæ minitö iminite mönö Awënë iñömö, Bitö ægancadö waa cæbii, ante adinque wæætë eyepæ pöni pædæ pönongä ænguimini iminipa.

⁹ Waocä ingante nē ö æmini guiquënë eñeedāni. Mini nē ö ængaināni inänite adobai waa cæedāni. Tömëmini Awënë incæ tömënanäni Awënë adocä inongä inte öönædë owocampa cæminii. Tömengä iñömö wacä ingante wadö wacä ingante wadö ate pönente cædāmai ingampa. Mänömainö ante do eñëmini inte minitö beyænque cæte nē quëwënanäni inänite edæ piinte äninque edæ pæmënenāmai iedāni.

Tæinta wēñate bai mönö tæi piñænte ewocacæimpa

¹⁰ Nöwo iimāi yewæmöninque botö idæwaa yewæmömopa. Minitö mönö Awënë nempo nē quëwënomini iñöminite tömengä nänö tæi piñænö pædæ pönongä æninque tæi piñænte entawente quëwëedāni.

¹¹ Minitö wææ caaquincoo, ante

Wængonguī eyepæ pōni nānō da pōnōnincoo tōmancoo æninqwe wēñate bai cædinque tæi ongōedāni. Edæ mānincōo tōmancoo wēñate ongōñōmini wēnæ awēnē, Oda cæcæminimpa, ante nanguī ēñente cæcā incæte mīnitō wæætē oda cædāmaī inte edæ tæi ongōncæminimpa.

¹² Edæ wīi waodāni inānite mōnō guēadō guēa cæcæimpa. Wæætē wēnæidi awēnēidi tōnō wēnæidi inānite nē ānāni iñōnānite mōnō tōmēnāni inānite wæætē guēadō guēa cæcæimpa. Inguipoga wēmō iñōmō tæi piñænte ēnempodāni tōnō oōnædē iñōmō wēnæcoo nē wīwa ewocate cædāni tōnō mānimpodāni māmō ti gotodoncæ cæyōnānite mōnō wæætē guēadō guēa cæcæimpa. ¹³ Ininqwe tōmēnāni piinte māmō nāni wīwa cæōnæ iinqwe bayonte mōnō wodii wīnōnāmaī inte tōmēnāni inānite wæætē da godongæimpa. Ante ayæ, Tōmāā edæ eyepæ cæte ate mōnō edæ tæ go wæænāmaī inte adiyæ ongongæimpa, ante cædinque mīnitō Wængonguī nānō, Wææ caaquincoo, ante tæinta bai nānō da pōnōnincoo edæ do eyepæ æninqwe tōmancoo edæ da wēñædāni.

¹⁴ Wēñadinque edæ wodii wīnōnāmaī inte edæ næ gongænte tæi ongōedāni. Edæ, Tæi wææ caaquincoo, ante pōnō tæi pacadeyænte bai cædinque mīnitō Wængonguī nānō nō pōnēnō entawēninqwe adobai nō entawente quēwēdāni. Tæcætawē inō tæi neta mīni wææ wodontawēinta ante wēñate bai cædinque Wængonguī tæiyæ waēmō nānō cædō ante edæ entawente tæi cæte ongōedāni.

¹⁵ Mōnō Codito pōnō cæcā beyænque mōnō godongāmæ piyænē cæcæimpa, ante watapæ mōnō ēñēnō beyæ pogodo gote apæneçæte ante cædinque mīnitō awæncata tæi wææ cæwainta wēwate bai cædinque gānē pōnente cæedāni.

¹⁶ Yabæque pōni wææ cæquinta tæinta bai næænte bai cædinque mīni wede pōnēnō ædæmō entawēninqwe quēwēdāni. Ininqwe nē wīwa cædongā ponte gonga encado bai to

piyænçate bai cædinque, Mīnitō oda cæcæminimpa, ante cæcā ate mīnitō mīni wede pōnēnō beyænque tōmengā wīwa nānō ānō ante edæ ēñēnāmaī incæminimpa. ¹⁷ Ayæ, Ocamō incainta tæinta bai impa, ante wææ wencate bai cædinque mīnitō Codito pōnō ængā beyænque mīni quēwenguīnō ante ænte entawencæminimpa. Mīnitō yaēmē wææ næænte bai cædinque Wængonguī Ōnōwoca apæneçā ēñēninqwe nāni yewæmongainta ate ædæmō ēñēninqwe edæ cōwē entawēdāni.

¹⁸ Ayæ Wængonguī Ōnōwoca ingante ewocadinque mīnitō tōmengā ingante, Wængonguī bitō cōwē cæcæbiimpa, ante godōmenque nanguī apænedinque ñine cædāmaī iedāni. Mānōmaī cæcæte ante mīnitō mīmīni ongōninqwe wæntæte badāmaī inte Wængonguī quīnāni tōmānāni beyæ ante cōwē apæneedāni.

¹⁹ Ayæ botō beyæ ante adobai apænemīni ēñēninqwe Wængonguī pōnō cæcā ate botō edonque tedecæboimpa, āmopa. Edæ Codito ingantedō ante wēēnēñedē mōnō ēñēnāmaī ingaīne ante botō ñōwo watapæ ēñēninqwe guīñēnedāmaī inte apænebo ēñencædānimpā, āmopa. Mānōmainō ante mīnitō Wængonguī ingante apæneedāni, āmopa.

²⁰ Māñine ante botō wadāni weca nē gote apænebo beyænque ñōwo gæguincamē encaipobo inte wæbopa. Ininqwe, Māñine ante nē apænequēnengā inte Pabodo cōwē guīñēnedāmaī inte apæneçæcæimpa, ante mīnitō botō beyæ ante apæneedāni.

Waa quēwencæminimpa, ante

²¹ Botō Pabodo iñōmō æbānō quēwēmoo, ante, Quīnō bai cæboo, ante ēñencæte ante wæmīnitawo. Edæ Tiquico mōnō tōñiñacā mōnō nē waadecā inongā inte tōmengā ñōwo pōninqwe mīnitō imīnite māñinō tōmānō ante apæneçā ēñencæminimpa. Tōmengā iñōmō mōnō Awēnē nempo quēwēninqwe tōmengā beyæ nē cædongā inte

cōwē nē pōnengā inte ædæmō
 cæcā acæimpa. ²² Īninqe, Pa-
 bodoidi æbānō quēwēnānii, ante
 tōmengā pōnō apænecā ēñēninqe
 mīnitō wampo pōnēninqe tæi
 piñænte entawencæminimpa. Ante
 cædinque botō, Ædæmō apænebi
 ēñencædānimpa, ante tōmengā in-
 gante mīnitō weca da godōmo pongā
 aedāni.

²³ Mæmpo Wængonguī tōnō mōnō
 Awēnē Itota Codito mīnitō ĩmīnite
 waadete pōnō cæda ate mīnitō mīni
 caipæ incæ gānē entawēninqe
 wede pōnēninqe godongāmæ edæ
 waadete pōnencæminimpa, āmopa.

²⁴ Æcānō mōnō Awēnē Itota Codito
 ingante cōwē waadete pōnente
 ñimpo cædāmaī ĩna ĩñōmō tōmengā
 ingante Wængonguī pōnō waadete
 cæcæcāimpa, ante botō Wængonguī
 ingante apænebopa. Māninqe ante
 yewæmōmopa.

Pidipenteidi **inänite Pabodo nänö** **cadota ante** **yewæmongainta**

Waa quëwëedäni, ante

¹ Itota Codito ingante nê cæmōna inte botō tōnō Tīmoteo guëa apænemōna İnıneque botō Pabodobo adoboque yewæmōmopa. Mınitō Pidipoto İñōmō quëwëınıneque Wængonguı quımıni İnōmıni inte Itota Codito nempo nê quëwëmıni İñōmınite botō, Acæmınimpa, ante yewæmōmopa. Mıni pōnencabo beyænque ante pancamıniya nê aamıni İñōmınite pancamıniya guıquënë nê cæmıni İñōmınite pancamıniya guıquënë önōmıni İñōmınite botō edæ, Tömämıni edæ acæmınimpa, ante yewæmōmopa. ² Mönō Mæmpo Wængonguı mönō Awënë Itota Codito tōnō waadete pōnō cæda ate gänê pōnëınıneque waa quëwëedäni, ämopa.

Nê pōnëmıni beyæ Wængonguı ingante apænebopa, ante

³ Æyedëmê mınitō İmınite ante pōnëmo inte botō Wængonguı ingante waa ate pōnëınıneque apænebopa. ⁴ İnıneque mınitō beyæ ante Wængonguı ingante wantæ İñō wantæ İñō apænëınıneque botō, Waa quëwëmıniya, ante watapæ todıneque apænebopa. ⁵ Edæ, Botō täno goyedê mınitō godongämæ cæmınitapa. Ayæ, Mönō Codito ingantedō ante mınitō ñōwo ganca godōmenque watapæ apænëmıniya, ante pōnëınıneque botō, Wængonguı bitō pōnō cæbi ate pidipenteidi waa cædänıya, ante apænebopa. ⁶ Mınitō botō ayōmo tæiyæ waëmō entawencæmıniya, ante nê mä badongaıngä İnongä inte Wængonguı ñōwo Itota Codito nänō ponguıganca godōmenque pōnō badōınıneque cōwê İnıneque badongä ate mınitō ædæmō pæımıni bacæmıniya.

Mänōmai İmpa, ante botō, Nawangä İmpa, ante do ëñëmopa.

⁷ Mönō Codito ingantedō ante watapæ mōni ëñëınıno ante botō wææ äınıneque, Nawangä İmpa, ante apænebopa. Mänıne botō apænede beyænque pancayedëna botō İmote tee mönedäni wæbopa. Incæte tee mönedäni wæbo incæ, Nawangä İmpa, ante wææ ämo incæ Wængonguı nänō waadete pōnō cægäınō ante ænte entawëñōmo mınitō adobaı mänıno ante æınıneque botō tōnō godongämæ entawëmıniya. İnıneque, Mönō mänıno ante äanque baı entawëmō İmopa, ante mınitō İmınite waadete pōnëınıneque botō, Mınitō ædæmō pæımıni bacæmıniya, ante nōıngä cæte pōnëmopa. ⁸ Itota Codito mönō İmote nanguı waadete pōnengantawo. Edæ tōmengä waadete nänō pōnëno ante entawëınıneque botō mınitō İmınite waadete pōnëmopa, ante adıneque Wængonguı incæ, Pabodo nawangä mınitō İmınite nanguı waadete pōnengampa, ante apænëbaıngampa.

⁹ İnıneque mınitō beyæ ante botō Wængonguı ingante İımaı ante apænebopa. Mıni waadete pōnencabo İñōmınite Wængonguı pōnō cæcä ate godōmenque waadete pōnencæmıniya. Ayæ waadete pōnëmıni inte mınitō, Quıno wënæ wënæ İ, Quıno waa İ, ante edonque adıneque nō apænte ämıni bacæmıniya. ¹⁰ Mönō æbänō cæte waa quëwënguıı, ante edonque adıneque mınitō Ao ante waa quëwëınıneque Itota Codito nänō ponguıganca wentamō mongænämai inte tee tewardämai İmıni incæmıniya. ¹¹ Ayæ Itota Codito pōnō cæcä ate mınitō nō cædıneque waa quëwëmıni adıneque wadäni Wængonguı ingante waa ate pōnëınıneque apænecædänıya, ante botō Wængonguı ingante apænebopa. Ayæ mınitō mänōmai inte waa cæmıni adıneque tōmänäni wæætê Wængonguı ingante apænëınıneque, Wængonguı ëñëmi. Bitō ñäo baı ëmönōmi inte waa pōni cæbıya, ante apænecædänıya,

ante cædinque botö mīnitö beyæ ante Wængonguī ingante apænebopa.

Pabodo, Codito beyænque quëwëmopa, angampa

¹² Īñänāni apænebo eñēedāni. Mänömaī cædāni botö wædö incæ wīi önonque cætimpā. Wæætē, Codito beyænque Pabodo caate wæcampa, ante adinque wadāni godömenque nanguī ĩnāni Codito ingantedö ante watapæ möni apænedö eñēninque wede pönēnāni badānīpa. ¹³ Edæ, Codito emöwo apæneca beyænque Pabodo ingante tee mönedānīpa, ante tededāni eñēninque odömāno tæiyæ awēnē oncö wææ wänönāni incæ wadāni wayömö quëwēnāni incæ tömānāni do eñēnānīpa. ¹⁴ Mönö Awēnē nempo quëwēnāni incæ, Pabodo tee mönete wæcampa, ante wædinque wodo tömānāni godömenque wede pönente badānīpa. Īninque wede pönēninque tæi piñante entawēninque tömēnāni guiñēnāmaī inte Wængonguī nānö apænedö ante godömenque apænedānīpa.

¹⁵ Pancadāniya, Pabodo miñæ godömenque nanguī ĩnāni godānīpa, ante pönö piinte adinque Codito emöwo ante apænedāni incæte botö imote guëadö guëa piincæte ante apænedānīpa. Mänömaī i incæte wadāni guiquēnē, Pabodo tönö mönö godongāmæ cæcæimpa, ante gānē pönēninque Codito emöwo ante apænedānīpa. ¹⁶ Nē gānē pönente apænedāni guiquēnē, Codito ingantedö ante watapæ mīni eñēninö ante Pabodo wææ ancæcāimpa, ante botö imote godö gö cæcampa, ante do eñēnānīpa. Īninque tömēnāni botö imote waadete pönēninque apænedānīpa. ¹⁷ Nē wæætedö wæætē tededāni guiquēnē, Pabodo tee mönete wæyongante mönö apænete tomö wæcā tocæi, ante cædānīpa. Tömēnāni nāmā beyænque ante cædāni incæte waa cæte bai cædinque Codito emöwo ante apænedānīpa. ¹⁸ Incæte pancadāniya nāmā beyænque ante apænedāni

incæ pancadāniya nō pönente apænedāni incæ mānināni tömānāni Codito nānö cægāinö ante nāwangā ante do edæ apænedānīpa. Mänömaī impa, ante pönēninque botö watapæ tobopa.

Ayæ iūmaī ante pönēninque cöwē godömenque nanguī tocæboimpa. ¹⁹ Mīnitö Wængonguī ingante botö beyæ nanguī apænemīni eñēninque Itota Codito Önowoca pönö cæcæcāimpa, ante eñente tobopa. Īninque ñöwo botö caate wædö ante edæ ĩncayæ ate ñimpo cædāni ate edæ botö abæ tawænte gote quëwenguinque edæ impa, ante do eñēninque tobopa. ²⁰ Botö wëēnēñedē botö cæbo bai ñöwo adobai cæinēmo imopa. Īntai eñate mīimö quëwëmo incæ baonque wænönāni wæmo incæ, Mönö Codito ingante waa acædānīpa, ante cædinque botö cöwē guiñēnāmaī inte tæi ongöninque nanguī cædinque watapæ edæ bacæboimpa, ante pönēmopa. ²¹ Edæ inguipoga quëwëmo incæ botö Codito ingante entawēninque tömengā beyænque ante quëwëmopa. Wæætē wæmo incæ tömengā beyæ botö godömenque nanguī entawenguimo imopa.

²² Incæte, Waiwæ nanguī incæte bai botö cæquinque inguipoga ayæ quëwenguēnēmo imopa, ante pönēninque botö, Æbānö anguimoo, ante eñencæte ante wæbopa. Edæ, Wæncæboimpa, ante anguēnēmo imoo. Wæætē, Ayæ quëwencæboimpa, ante anguēnēmo imoo. Edæ, Æbānö anguēnēmo imoo, ante botö edæ eñēnāmaī imopa. ²³ Edæ wada bæi ongönte æmataæ töö æmataæ töö godöna wæcā bai wædömo inte botö, Ædönö gāmænö goquimoo, ante wæbopa. Codito weca godömenque wæmö pönī quëwencæboimpa, ante botö wadæ goinēmo imopa. ²⁴ Incæte inguipoga quëwēninque mīnitö beyænque ante cæquēnēmo inte botö ædö cæte wayömö goquimoo. ²⁵ Ante pönente wædinque botö, Mīnitö mönö pönēnö ante godömenque wede pönēninque

watapæ tote quëwencæminimpa, ante cæquïmo ïmopa, ante ëñëmopa. Ayæ, Ñowo wænāmaï inte botō mīnitō weca quëwenguïmo ïmopa, ante do ëñëmopa. ²⁶ Ìinque botō mīmo inte mīnitō weca pōmo adinque mīnitō Itota Codito ingante waa adinque botō beyænque nanguï tocæminimpa.

²⁷ Codito ingantedō ante watapæ mōnō ëñënīnō beyæ ante mōnō waa cæquënēmō ïmopa, ante ëñëmini inte mīnitō edæ waa cæte quëwëedāni. Mānōmaï cæmini ïinque botō önōmoncaque ëñëmo incæ mīnitō weca ponte abo incæ, Pidipenteidi adoyōmō pōnëninque tæi ongōnānīpa, ante tededāni ëñëninque tobaïmopa. Ayæ, Codito ingantedō ante watapæ mōnō ëñënīnō ante wadāni ëñencædānimpa, ante pidipenteidi ïñacabo cædinque nanguï cædānīpa, ante botō edæ ëñente tobaïmopa. ²⁸ Ayæ pīinte cædāni incæte mīnitō wæætē guīñënāmaï inte tæi ongōmīnīpa, ante adinque botō tobaïmopa. Mīnitō mānōmaï guīñënāmaï inte tæi ongōmīni ate wædinque nē pīinte ānāni wæætē, Mōnitō wænguinque ïmpa, ante wæcædānimpa. Nē pōnëmini mīni quëwenguinque ïmpa, ante adinque tōmënāni godōmenque wæcædānimpa. Edæ Wængonguï ængā beyænque quëwencæminimpa.

²⁹ Wængonguï waadete pōnō cæcā ate mīnitō Codito ingante wede pōnëmīnitawo. Edæ adocā pōnō cæcā ate mīnitō Codito beyænque cædinque cōwë caate wæquimīni ïmīnīpa. ³⁰ Pabodobo doyedē Codito beyæ ante wææ ancæte ante caate wætabopa, ante amīnitawo. Ñowo godōmenque wææ cædinque caate wæbopa, ante önōmoncaque ëñëmīnitawo. Ìinque botō wææ āninque caate wæbo baï mīnitō adobaï botō tōnō godongāmæ wææ āninque caate wæmīni ïmīnīpa.

2

Codito önonganque bayongante

Wængonguï da æænongä

¹ Mōnō Codito nempo quëwëninque mīnitō wampo pōnëmīnitawo. Tōmengä waadete pōnengä beyænque gancæ pōnëmīnitawo. Mōnō Codito Önōwoca tōnō äawocaque baï ëwocadinque godongāmæ watapæ quëwëmīnitawo. Nē wæcā ingante godō waadete pōnëmīnitawo. Adocanque wæwengä adinque mīnitō āanque baï wæwëninque tōmengä beyæ cæmīnitawo. ² Mānōmaï ï ïinque adodonque pōnëninque mīnitō waa waademīni adinque botō watapæ pōni tobaïmopa. Tōmāmīni āanque baï ëwocadinque, Mōnō adoyōmō cæcæimpa, ante godongāmæ cæmini adinque botō godōmenque nanguï watapæ tobaïmopa. ³ Ìinque mīnitō nāmanque ante pōnëninque, Botō ïmote waa acædānimpa, ante cædāmaï ïedāni. Yæcado ongoncæboimpa, ante cædāmaï ïedāni. Wæætē, Botō önōmoque baï ïñōmote wadāni wæætē waa pōni ïnānīpa, ante pōnëninque wadānique ïnānite ængō cæedāni.

⁴ Nāmā mīni cæinënō ante cædinque mīnitō wīi mānīnonque ante cædinque wæætē edæ wadāni nāni cæinënō adobaï ante cæedāni.

⁵ Mānōmaï cædinque mīnitō Itota Codito nānō pōnengāinō baï adodō ante pōnëedāni.

⁶ Tōmengä ïñōmō cōwë nāwä Wængonguï ïnongä ingampa. Incæte, Botō nāwä Wængonguïmo ingaïmo inte

Mæmpo Wængonguï ganca botō ïngainō ante ñimpo cædāmaï incæboimpa, ante tōmengä ānāmaï ïngacäimpa.

⁷ Wæætē edæ, Mānīnō botō ïngainō incæ botō edæ ñimpo cæcæboimpa, āninque wææ, önonganque baï bagacäimpa. Ayæ, Wængonguï ingante nē cædōmo edæ bacæboimpa, ante badinque wææ,

tōmengä waomō mōnō ëmōnō baï nānō ëmonguinque waocā ëñagacäimpa.

8 Mänömaï eñate pæte wææ tömengä
önonganque inte bai cæyongä
Wæmpocä,

Bitö wænguïnö taadö gocæbiimpa,
angä eñëninque edæ Ao ante
goyongante wææ,

tömengä nänö guiñëñaquinque awæ
ñænquedimæ cæte mæo tim-
podäni wææ tiwadäni ate
tömengä caate wægöninque
wææ bacaa edæ wængacäimpa.

9 Mänömaï cæcä adinque Wængongui
wæætë tömengä ingante
æmonga pöni da æængacäimpa

Ayæ wadäni emöwo önöwoque
emönäni bai tömengä Tæiyæ
Awënë inongä inte wii adobai
önöwoque bai emoncæcäimpa,
ante cædinque Wængongui edæ,
Itota Codito ingampa, ante
pönö pemongacäimpa.

10 Edæ öönädë quëwënäni incæ in-
guipoga quëwënäni incæ gui-
monga quëwënäni incæ

tömänäni edæ Itota emöwo eñente waa
adinque
da guicapocädänimpa, ante Wængongui
tömengä ingante pönö pemon-
gacäimpa.

11 Ayæ, Itota Codito ingante adinque
tömänäni,

Mönö Tæiyæ Awënë inongä ingampa,
ante edæ Ao ancädänimpa,
ante Wæmpocä cægacäimpa.

Mänömaï cæcä adinque, Mæmpo
Wængongui waa pöni cæcampa,
ante mönö edæ watapæ
apænecäimpa.

*Nëmoncoo äo äo cædote bai nöinö cæte
quëwëedäni*

12 Mänömaï beyæ botö në
waademini iñöminite botö apænebo
eñëedäni. Minitö weca botö
quëwëñedë minitö do eñente
cædimini inte ñöwo botö wayömö
quëwëmo incæ godömenque eñente
cæmini abopa. Ìninque cöwë
mini eñente cædinö bai adobai
cædinque ñöwo mönö watapæ
quëwenguïnö taadonque gocæte
ante cædinque, Oda cæte wæcæ
wæ, ante cöwä aquënë quëwëminii.

13 Wii cæinente awædö, ante
wæminitawo. Edæ Wængonguinque
apænecä eñente entawëninque minitö
tömengä waa pöni nänö änö ante
në eñente cæinëmini bamnipa. Oda
cæte awædö, ante wæminitawo.
Adocä Wængonguinque mongæncadæ
mongæncadæ cæcä ate tæi piñæmini
bate ate eyepæ cæminipa.

14 Ìninque, Wii cæinente awædö,
ante änämaï inte minitö piyænë cæte
mini cæquëñenö ante do cæedäni.

15 Edæ mänömaï cæmini adinque
wadäni, Wentamö mongænämaï
imnipa, ante abainäni. Ayæ in-
guipogaque quëwënäni eñëñämaï
inte idiquibæ pönente cæyönäni
minitö wæætë Wængongui wëñæmini
inömini inte tömënäni weca quëwëninque
nëmoncoo äo äo cædote bai nöingä
cæte quëwencæminimpa. 16 Edæ,
Codito pönö cæcä beyænque mönö
quëwengæimpa, ante edonque
apænemini eñencädänimpa. Ìninque,
Doyedë botö apænedö ante minitö
në eñente cæminipa, ante adinque
botö nangui todinque iïmaï ante
pönëmopa. Minitö beyæ pæ pagænte
cædömo incæte botö wii önönque
cæboimpa. Wæætë mönö Codito nänö
ponguïönæ iñonte botö, Minitö nö
apæneminitapa, ante adinque botö
tocæboimpa. 17 Ayæ, Wængongui qui,
ante baö godöninque waodäni baonga
tepæ gao caadänipa. Minitö iñömo
wede pönëmini inte, Wængongui
qui, ante nämä godö cæyömini
botö quëwenguimämo incæ mini
godöincooga gao caate bai ba
edæ waa tobaimopa. Minitö tönö
godongämæ edæ tobaimopa. 18 Minitö
adobai, Pabodo mönö beyæ cæcampa,
ante tocæminimpa. Edæ mönö edæ
godongämæ tocæimpa.

Timoteo tönö Epapododito

19 Minitö æbänö quëwëminii, ante
eñëninque Timoteo wæætë apænecä
eñente tocæboimpa, ante cædinque
botö, Itota Codito Ao angä ate
Timoteo ingante oo da pönömo minitö
weca poncæcäimpa, ante pönëmopa.

20 Minitō æbānō quēwēmīnī, ante wæyōmo tōmengā adocanque mīnitō beyæ ante botō tōnō guēa wæcampa. Wadāni guiquēnē mīnitō beyæ ante wædāmaī īnānīpa. 21 Tōmānāni edæ nāmā beyænque ante cæinente wædinque Itota Codito nānō ānōnō ante wīī cæinēnāni īnānīpa. 22 Cōwā ayōmīni, Timoteo īñōmō cōwē waa cæcampa, ante do ēñēmīnitapa. Ayæ mōnō Codito ingantedō ante watapæ apænedinque Timoteo tōnō mōna wencaya baī guēa cæmōnāpa, ante do ēñēmīnitapa. 23 Īnīnque, Botō imote awēnēīdi æbānō apænte anguīnānī, ante ēñente ate botō Timoteo ingante māñīnēdē ate mīnitō weca do da pōnōmo poncæcāīmpa, ante pōnēmōpa. 24 Ayæ mōnō Tæiyæ Awēnē Ao angā ate tōmēmo do pōmaīmōpa.

25 Ayæ Epapododito mōnō tōñīnacā incæ botō tōnō guēa cæmōna īmōnāpa. Wadāni pīinte cædāni adīnque mōnatō guēa wææ cæmōnāpa. Tōmengā ingante mīnitō, Pabodo beyæ ante godō cæcæbiīmpa, ante do da pōnōmīni ponte cæcā æntabōpa. Tōmengā ingante ñōwo wæætē adodō mīnitō weca edæ da pōnōmo ponguēnengā ingampa, ante pōnēmōpa. 26 Adocā Epapododito īñōmō mīnitō pidipenteīdi īmīnite acæte ante edæ nanguī wæcampa. Ayæ, Epapododito daicawo gawængampa, ante apænedāni ēñēnīnque pidipenteīdi do wædānīpa, ante ēñente wædinque tōmengā wæætē mīnitō beyæ ante nanguī wæwente bacampa. 27 Nāwangā impa edæ. Tōmengā daicawo gawænte wodo wængantapa. Incæte Wængonguī tōmengā ingante waadete pōnō gam-pocā waa bacantapa. Mānōmaī cædinque Wængonguī botō beyæ adobāī ante pōnēnīnque, Pabodo wīī godōmenque wæcæcāīmpa, ante pōnengā inte edæ Epapododito ingante gam-pocā waa bacantapa.

28 Mānōmaī beyæ, Epapododito wæætē pongā adīnque tocæmīnīmpa, ante cædinque ayæ, Mīnitō tomīni ad-

īnque botō wæwēnāmaī bacæboīmpa, ante cædinque botō tōmengā ingante ñōwo da godoncæboīmpa, āmōpa. 29 Pongā ate mīnitō, Mōnō Awēnē nempo quēwēnōmī inte pōe, ānīnque Epapododito ingante waa adīnque godongāmæ watapæ tote cædāni. Ayæ wadāni tōmengā baī adobāī waa cædānīpa, ante adīnque tōmēnāni īnānite waa adīnque waa cædāni. 30 Mīnitō, Pabodo beyæ ædō cæte cæquīmōnī, ante, Gobæ awædō, ante wæyōmīnite Epapododito īñōmō edæ, Wæmo incæ cōwē cæcæboīmpa, ante mīnitō cæquēnēnō ante cæcantapa. Codito beyæ ante cæcæte ante edæ tōmengā wodo wængantapa cæmīnī. Tōmengā ingante edæ waa cædāni, āmōpa.

3

Tæi pīñænte cæccēīmpa, ante

1 Ñōwo īñōmō botō tōñīñamīni ēñēdāni. Mōnō Awēnē nempo quēwēnīnque mīni watapæ toquinque īmīnīpa. Mīnitō oda cædāmaī incæmīnīmpa, ante botō adodō adodō ante ancaa yewæmōmo incæte wædāmaī īmōpa.

2 Īīmaī āmōpa. Wadāni īñōmō, Mōnō eō togænte quēwengæīmpa, ante nē ānewēnāni inte guīntaidī baī wēnæ wēnæ cædinque nāmā baō eō eō towēnānīpa. Ante adīnque mīnitō tōmēnāni īnānite gomō adīnque wææ cædāni. 3 Edæ tōmēnāni īnānite ee adīnque Wængonguī mōnō imonte wæætē pōnō eō togænte baī cædinque mōnō wentamō mongænō do wido cægacāīmpa. Wængonguī Ōñōwoca ingante ænte ēwocamō īñōmō inte mōnonque edæ, Wængonguī ingampa, ante tōmengā beyæ cæmōmpa. Itota Codito nempo quēwēmō inte mōnonque wīī inguīpoga beyænque quēwēmō īmōmpa, ante mōnō tōmengā ingante waa ate apænemōmpa. 4 Tōmēnāni guīquēnē inguīpogaque ante pōnēnīnque, Mōnitō cædō beyænque quēwēncæmōnīmpa, ante pōnēwēnānīpa. Tōmēnāni nāni

pönewönö bai adobai pönente bai botö, Tömänäni wædænque cæyönäni botö godömenque nanguï cædömo ïmopa, ante pönewencædömoimpa. Edæ, Nanguï botö cædö beyænque quëwencæboimpa, ante pönewencædömo

⁵ Edæ tömänäni në eö togæinäni inänitawo. Botö inömo adobai ïmopa. Tæcæ eñayömote onompo æmæmpoque go meönaa go adoönæque mänimpoönæ inönte botö imote do eö togænäni wægaboimpa. Tömänäni idægoidi inänitawo. Botö inömo idægo wodi pæimo inömo inte tömengä nänömcä Beencaminö wodi pæimo inömo ïmopa. Tömänäni ebedeoidi inänitawo. Botö inömo ebedeobo eñagaimo inte näwä ebedeobo inömo ïmopa. Tömänäni Paditeoidi inänitawogaa. Edæ botö Paditeobo inömo inte Möitee wodi nänö wææ angainö ante möni Paditeocabo wædö ante tömää eñente cædömo imoi aedäni. ⁶ Ayæ tömänäni, Wængongui beyæ nanguï cæcæimpa, ante apænedänitawo. Edæ, Wængongui beyæ cæbote, ante edæ botö inömo doyedë Codito ingante nani pönengaincabo inänite ancaa togænte pancæte ante cægaboï aedäni. Ayæ oodeoidi guiquënë, Mönitö wææ angainö ante në eñente cædänique në nö cædäni inänipa, ante änänitawo. Botö inömo edæ mäninonque ante cöwë cædömo inte wentamö mongænämaï inömo ïmopa.

⁷ Doyedë inömo botö mänömaï godömenque waa cædimo inte, Botö toquinque waa pöni cægaboimpa, ante pönewentabopa. Nöwo guiquënë botö waa cægainö ante, Önonquedö ante cægaboï, ante do eñëmopa. ⁸ Ayæ wææ, Itota Codito botö Awënë ingante adimo inte botö tömengä ingante pönëninque tömengä tönö godömenque waa pöni quëwencæboimpa, ante botö, Wëenënedë botö entawengaincoo botö waa againcoo incæ edæ ewenguincooque impa, ante pönëmopa. Edæ Codito beyæ ante cæyömo botö wëenë mänincoo tömancoo edæ dæ ba wætabopa. Ininque, Codito ingante

godömenque ewocacæboimpa, ante nanguï cædinque botö, Wëenë botö entawengainö ompotacoo bai impa, ante wido cæbopa.

⁹ Edæ, Iïmaï cæedäni, ante inäni. wææ angainö ante eñente cæbo incæte Wængongui ayongante botö ædö cæte mäninö beyænque nö entawëmo baquimoo. Wæætë Codito mönö në nö cædongä ingante wede pönëmo inte tömengä nempo quëwëñömote Wængongui pönö badongä ate nö cæbo bacæboimpa, ante nanguï cæbopa. ¹⁰ Mönö Codito ingante ate bai pönencæboimpa, ante cæbopa. Ayæ tömengä adocä nanguï tæi piñæninque nänö ömæmongacäimpa, ante wede pönëninque botö mäninö tömengä në nänö ömæmongaingä nänö tæi piñænö bai adobai entawencæboimpa, ante cæbopa. Ayæ adobai, Tömengä caate nänö wængai bai botö tömengä beyæ wæncæboimpa, ante pönëninque botö tömengä tönö godongämæ caate wænte bai tömengä nänö ewocadö bai ewocacæboimpa, ante cæbopa. ¹¹ Mänömaï cædinque botö, Tömengä wænte ate nänö ömæmonte nänö quëwengai bai botö adobai wænte ate nänö ömæmoncæboimpa, ante nanguï cæbopa.

Mänömaï bacæboimpa, ante nanguï cæbopa, ante

¹² Mänömainö ante apænedinque botö, Codito nänö entawönö bai do entawëmopa, ante dicæ apænebogaa. Picænäni bai do badinque nö cædinque oda cædämaï ïmopa, ante dicæ apænebogaa. Incæte Itota Codito incæ edæ, Botö ewocadö bai adobai ewocacæbiimpa, ante botö imote do bæi ongongacäimpa. Ininque botö wæætë, Tömengä waa pöni nänö ewocadö bai adobai ewocacæboimpa, ante bæi ongoncæte ante nanguï cæbopa. ¹³ Inänäni eñëedäni. Botö Codito nänö ewocadö ante dicæ eyepæ æmogaa, ante wæbopa. Incæte, Eyepæ ænämaï ïmopa, ante adinque wæwënämaï ïmopa. Wæætë,

Īncayæ ate Codito nānō ēwocadō bai ædæmō ēwocacæboimpa, ante cædinqe botō māninqe ante pōnēninqe pogodo gote bai cōwē cæbopa. ¹⁴ Wængonguī do, Bitō Itota Codito nempo quēwēnōmi inte eyepæ cædinqe æmonga ponte æe, ante botō ĩmote aa pegacæimpa. Īninqe tōmengā, Pædæ pōnōmo æncæbiimpa, ante nānō angaincoo ante ænte ēwocacæte ante botō gānā cæcæte ante pogodo gote bai edæ nanguī cæbopa.

¹⁵ Mōnō æmæwo picæmō badōmō ĩñōmō tōmāmō adobainō ante pōnenguēnēmō ĩmompā. Pancamīniya guiquēnē mānōmainō ante wīi pōnēmīni adinqe Wængonguī, Mīnitō æbānō nō pōnenguēnēmīni ĩmīni, ante pōnō odōmongā ate ēñencæmīnimpā. ¹⁶ Mōnō do ēñente quēwenganca māninganca mōnō cōwē nō cæte quēwengæimpa.

¹⁷ Īñānāni ēñēedāni. Botō Pabodobo æbānō cæboo, ante adinqe mīnitō botō cædō bai adobai godongāmæ cæedāni. Ayæ, Mōnitō cæmōni bai mīnitō adobai cæedāni, ante odōmōmōni bai pancadāniya adobai cædāni adinqe mīnitō ĩñōmō, Adobai cæcæimpa, ante tōmēnāni ĩnānite cōwā aedāni. ¹⁸ Mīnitō ĩmīnite wantæ wantæ ĩñō wantæ wantæ ĩñō apænedīmo inte botō ñōwo Ca ca wædinqe adodō ante ĩīmai ante godōmenque apænebopa. Mōnō Codito awāa wængā incæte nanguī ĩnāni tōmengā ingante Baa āninqe tōmengā nānō wængaiwæ ante piinte bai cædānīpa, ante awædō. ¹⁹ Tōmēnāni nāni ōmæe ēwente wæquinque mānōmai cædānīpa. Cænguī beyænque ante pōnente quēwēnānīpa. Wēnæ wēnæ nāni cædō beyæ guingo imonte wæquēnēnāni incæ tōmēnāni wæætē guīñēñadāmai inte edæ, Waa pōnī cæmōnīpa, ante nāmā incæ waa adānīpa. Edæ inguipoga beyænque ante cæinente wædānīpa.

²⁰ Mōnō ĩñōmō mempoga ēñagaimō inte mōnō ōnædē ōmæ do ēamō

edæ ĩmompā. Īninqe mōnō Awēnē Itota Codito, Quēwencæmīnimpā, ante nē Ængaingā ingante nanguī ānente wædinqe mōnō, Tōmengā æyedēnō ōnædē edæ wææ ponguingāā, ante wānō cōmompā. ²¹ Tōmengā ĩñōmō tæi piñænongā inte tōmancoo edæ bæ tadinque ō æninqe Tæiyæ Awēnē incæcæimpa. Īninqe, Mōnō quēwenguīnāmai aquīñō ēñamompā, ante adinqe tōmengā tæi piñænongā inte, Botō baō bai tæiñō mongæncæmīnimpā, ante badongā ēñaquīmō ĩmompā.

4

Mōnō Awēnē nempo quēwēninqe watapæ toccæimpa

¹ Wængonguī botō ĩmote poganta pōnō wencate bai cædinqe, Bitō waa apænebi ēñente beyænque pidipenteidi ēñente waa cædāni abopa, angā ēñēninqe botō mīnitō beyæ ante watapæ tobopa. Mīnitō ĩmīnite ædæmō waadedinqe botō, Æyedēnō bee tengūimoo, ante wæbopa. Īninqe botō nē waademīni āmo ēñēedāni. Mānīnō botō ānīnō ēñente cædinqe mīnitō mōnō Awēnē nempo quēwēninqe tæi ongōedāni.

² Ñōwo Eodia, Tintique, mīna onquiyæncaya ĩmīnate āmo ēñēeda. Mōnō Awēnē nempo quēwēninqe mīnatō piyænē cæte adodonce ante cæbæweda, āmopa. ³ Botō mōnō Awēnē ingantedō ante watapæ apænecæte ante nanguī cæyōmote Codēmente tōnō wadāni botō tōnō ĩñacabo cædānitapa. Wængonguī, Nāni quēwenguīnta, ante tōmengā nānō yewæmongaintaa tōmēnāni ēmōwo dobæ yewæmonte mæ ōñompā. Tōmēnāni botō tōnō cæyōnāni ĩīna onquiyæna Eodia tōnō Tintique ĩñōmō botō tōnō adobai ĩñacabo nanguī cædāinatapa. Īninqe bitō cōwē botō tōnō guēa cædōmi ĩñōmite bitō ĩmite āmopa. ĩīna ĩnate bitō waadete apænebi ēñēninqe piyænē cæte quēwencædaimpā.

4 Ayæ tōmāmīni īmīnite, Mōnō Awēnē nempo quēwēnīnque watapæ tote quēwēedāni, āmopa. Edæ, Watapæ pōnī tote quēwēedāni, ante adodō ante āmo ēñēedāni. 5 Mōnō Awēnē edæ oo pōnī poncæcāimpa cæmīnī. Ee ædæmō cæte quēwēñōmīni tōmānāni waadete mīni cædōnō ante edonque acædānimpa.

6 Ayæ, Quiēmē bacæ wæ, ante mīni wædō ante guīñente wædāmaī iedāni. Wængonguinque ingante apæneedāni. Apænedinque, Wængonguī, bitō pōnō cæbi ate eyepæ inte quēwencæmōnimpa, ante quiēmē mīni æncæ wædō incæ ante apænecæmīnimpa. Ayæ tōmengā pōnō cæcā adinque mīnitō, Bitō pōnō cæbi waa æmōnīpa, ante Wængonguī ingante wæætē waa ate pōnente apæneedāni. 7 Ayæ, Wængonguī piyænē cædinque pōnō aacā beyæ mīnitō Itota Codito nempo quēwēnīnque piyænē cædinque mīmōnē wædāmaī inte nō pōnēnīnque quēwencæmīnimpa. Edæ mōnō, Æbāmē cæte Wængonguī pōnō piyænē cæte aacā, ante mōnō waocabo ēñēnāmaī imō incæte tōmengā cōwē godōmenque aacā ate wædāmaī inte quēwēmōmpa.

Quiñō waa ī, ante mānīnonque ante pōnēē cōedāni, ante

8 Iñānāni ēñēedāni. Mīnitō æbānō ante pōnēē congūenēmīni īmīnīpa, ante yewæmōnīnque botō ñōwo æmæwo pōnī yewæmōmōī aedāni. Nāwangā nāni apænedō ante pōnēē cōedāni. Æbānō waa cæquīī, æbānō nō cæquīī, ante pōnēē cōedāni. Quiēnō nō ī, ante mānīnō ante pōnēē cōedāni. Mōnō æbānō waadete pōnenguīī, ante pōnēnīnque mōnō waa adoncoo ante adobaī pōnēē cōedāni. Wadāni waa nāni cædinō ante pōnēē cōedāni. Mānōmaī cædāni ate wadāni waa adānitawo. Īnīnque tōmēnāni nāni waa adīnō ante mīnitō mānīnō ante pōnēē cōedāni. Īnīnque, Quiēmē waa pōnī ī, ante adīnque mānīnonque ante pōnēē cōedāni.

9 Botō odōmonte apænebo ēñēmīnitawo.

Īnīnque botō pōnō apænebo ēñēnīnque mīni ēñēnīnō baī tōmānō ante edæ cæedāni. Botō pædæ pōnōmo æmīnitawo. Īnīnque botō pædæ pōnōmo mīni ænīnō incæ ee mæedāni. Botō entawēnō ante, Æbānō entawēmoo, ante edonque amīnitawo. Īnīnque botō entawēnō mīni adīnō baī mīnitō adobaī entawēnīnque edæ waa cæedāni. Mānōmaī cæmīni adīnque Wængonguī nē gānē pōnēnongā inte mīnitō tōnō godongāmæ quēwēnīnque pōnō cæcā ate mīnitō wæætē gānē pōnēmīni bacæmīnimpa.

Pidipenteidi mīni pōnōnī waa ōntabopa, Pabodo angampa

10 Botō wædō ante mīnitō doyedē pōnō cædīmīni inte ñōwo wæætē tæcæ pōnente wædinque wæætē pōnō cæmīni ænīnque botō, Mōnō Awēnē beyænque pōnō cæmīnīpa, ante adīnque nanguī waa tobopa. Edæ botō wædō ante cōwē waadete pōnēmīni incæte mīnitō da pōnoncæ cæyōmīnite wææ cæte ī æiquedō da pōnonguīmīnī. 11 Incæte mānōmaī apænedinque botō wīī ænguēnēmo inte apænetabopa. Edæ wædænque ēabo incæ nanguī ēabo incæ quiēmē ēabo incæ botō, Æbānō quēwenguīī, ante do ēñēmo inte edæ piyænē cæte wædāmaī cōwē quēwēmōmpa.

12 Ōmæpobo wædīmo inte botō, Ōmaadāni æbānō quēwēnānīī, ante do ēñēmōpa. Adobaī nanguī ēate quēwēnīmo inte botō, Nanguī ēadāni æbānō quēwēnānīī, ante do ēñēmōpa. Edæ tōmo cæmo incæ, gæwænte wæbo incæ, nanguī ēabo incæ, ōmæpobo incæ mānīnō tōmānō ante wægāimo inte botō mānōmaī ingāimo beyænque ēñente batabopa. Īnīnque æyōmōmē quēwēmo incæ quiēmē baī quēwēmo incæ piyænē cæte wædāmaī quēwēmōmpa. 13 Edæ quiēmē beyæ wæbo incæ mōnō Codito pōnō cæcā ate botō wæætē edæ eyepæ entawēnīnque tōmāā edæ cæbopa.

14 Incæte botō ōmæpobo inte wæyōmote mīnitō pōnō cæmīni waa

æntabopa. ¹⁵ Ayæ adobaï mōnō botō beyæ ancæminimpa. Ayæ Codito ingantedō ante watapæ mōni botō tōnō godongāmæ ongōnāni apænedō ante tæcæ ēñēmīni ate botō incæ, Minitō æbānō quēwēmīni, Māatedōniabæ iinque apænedinque ante wædānīpa. ²² Edæ Tæiyæ wadæ goyōmote wadāni Codito ingante nāni godongāmæ pōnencabo Awēnē Tetædo oncōnē quēwēnāni pōnōnāmaï iñōnānite mīnitō adomīnique quēwēnāni tōnō Wængonguï quīnāni da pōnōmīni æntabopa, ante mīnitō incæ tōmānāni adobaï mīnitō imīnite, pidipenteidi do ēñēmīnīpa. ¹⁶ Edæ, Waa quēwencæminimpa, ānānīpa. Tetadōnica nāni quēwēñōmō quēwēnīnque ²³ Mōnō Awēnē Itota Codito mīnitō Pabodo ōmæpocā bacampa, ante imīnite waadete pōnō cæcæcāimpa, tededāni ēñēnte wædinque mīnitō āmopa. Mānīnque ante yewæmōmopa. wīi adopoque wæætē wæætē da pōnōmīni æntabopa.

¹⁷ Botō dicæ botō æncæ wædō ante apænetabopa. Wæætē, Pidipenteidi wadāni inānite nē godōnāni inānīpa, ante adinque Wængonguï wæætē mīnitō imīnite godōmenque pōnongā æncæminimpa, ante apænetabopa. ¹⁸ Iinque botō iñōmō idæwaa æntabopa. Botō ænguēnēnō ænīnque godōmenque nanguï ænte ēabopa. Edæ, Pabodo quī, ante mīni da pōnōnincoo Epapododito wæætē botō imote pædæ pōnongā ænīnque botō eyepæ pōnī ēate quēwēmopa. Mīnitō, Wængonguï quī, ante oguï waquï baï pōnō iya tante baï cædinque, Pabodo quī, ante da pōnōmīni adinque, Waa pōnī pōnōmīnīpa, ante Wængonguï incæ waa acampa. ¹⁹ Botō Wængonguï ñāō baï entawēnīnque tæi ēmongā inongā inte tōmengā nānō ēadoncoo iñōmō edæ bacoo pōnī ongompa. Iinque, Mīnitō ænguēnēmīni imīnīpa, ante adinque tōmengā Itota Codito beyænque cædinque eyepæ pōnī edæ da pōnongā æncæminimpa.

²⁰ Mōnō Wængonguï mōnō Mæmpo iñongante, Bitō waēmō pōnī inōmi imīpa, ante mōnō cōwē watapæ apænecæimpa. Edæ ñōwopāmo incæ mīimāmo incæ mōnō cōwē mānōmaï apænecæimpa. Mānōmaï imīpa, ānīnque botō, Amēē, āmopa.

Mānīnque ante yewæmōmopa, ante

²¹ Wængonguï quīnāni Itota Codito nempo quēwēnōnāni iñōnānite mīnitō, Waa quēwencæminimpa, ante

Codotenteidi inänite Pabodo nänö cadota ante yewæmongainta

Waa quëwencæminimpa, ante

¹ Wængonguī angä eñëninque Itota Codito botö imote da godongä gogaïmo inte botö Pabodobo inömo inte yewæmömopa. Mönö tönñacä Timoteo tönö guëa tedete ate botö, Acæminimpa, ante yewæmömopa. ² Mönitö tönñamini eñëedäni. Codota iñömö quëwëninque Wængonguī quimini inte minitö mönö Codito nempo quëwëninque ædæmö cæte pönëmini iñöminite botö iïmaï ante yewæmömopa. Mönö Mæmpo Wængonguī tönö mönö Awënë Itota Codito waadete pönö cæda ænte entawëninque minitö gänë pönëninque watapæ quëwencæminimpa, ämopa.

Në pönënanï beyæ Pabodo Wængonguī ingante apæneccä

³ Mönö Awënë Itota Codito Wæmpocä iñongante mönitö minitö beyæ ante apænedinque Wængonguī ingante waa ate pönente apænemönipa. ⁴ Edæ, Minitö Itota Codito ingante wede pönëmini iminipa, ante do eñëmönipa. Ayæ, Wængonguī quinäni inänite tömänäni inänite minitö waadete pönëminipa, ante mönitö do eñëmönipa. ⁵ Edæ, Öönædë æidinke minitö watapæ quëwënguinque impa, ante edæ Codito do badongampa. Mänömainö ante, Näwangä impa, ante watapæ mini eñënö ante minitö godömenque wede pönëmini badinque godongämæ waadete pönëmini iminipa. Ininque, Minitö mänömaï iminipa, ante adinke mönitö wæætë Wængonguī ingante waa ate pönëninque apænemönipa. ⁶ Doyedë minitö weca ponte apænedinque mönitö, Mönö Codito ingantedö ante watapæ apænemöni eñëninque minitö, Wængonguī näwangä waadete pönö cæcampa,

ante do eñëmönitapa. Mänömainö ante mini eñëniönæ incæ minitö waincawæ nanguī incawæ bai tæcæ badinque ñöwo ganca nanguī apænemini eñëninque wadäni minitö weca në pönënanï tæiyænäni badänipa. Ayæ tæiyænäni badäni bai mönö pönencabo adobaï tömämæca tæiyæmö pöni bamompa. ⁷ Epapada möni në waadedongä incæ, Codito waa pöni nänö pönö cægäinö ante do odömonte apænecä eñëmönitapa. Tömengä iñömö Itota Codito beyæ në cæcä inongä inte mönö imönite pönëninque ædæmö cæcä ingampa. ⁸ Ayæ mönitö imönite apænedinque tömengä, Codotenteidi iñömö Wængonguī Önöwoca nempo quëwëninque në waadete pönënanï inänipa, ante do apænecä eñëntamönipa.

⁹ Mänömaï beyæ mönitö, Minitö æbänö iminï, ante tæcæ eñëninque minitö beyæ ante Wængonguī ingante apænedinque ñimpo cædämaï inte cöwë apænemönipa. Edæ, Wængonguī æbänö angää, ante minitö eñente ëwocacæminimpa, ante mönitö, Wængonguī eñëmi. Bitö eñënö ante apænebi eñente ëwocadinque Codotenteidi wæætë, Æbänö waa cæte quëwënguï, ante eñencædänimpa, ante apænemönipa. ¹⁰ Wængonguī apænecä eñëninque minitö, Mönö Awënë tocæcäimpa, ante cædinque tömengä nänö waa cædö bai minitö adobaï waa pöni cæcæminimpa, ante apænemönipa. Ayæ Wængonguī ingante minitö doyedë æmæ ate bai æmæ pönënimini inte ñöwo wæætë ædæmö ate bai ædæmö pönencæminimpa. Ayæ waa incawæ bai minitö adobaï bate cædinque nö mini waa cæquënenonque cæcæminimpa, ante apænemönipa. ¹¹ Wængonguī ñäö ëmöninke tæ piñænongä inte pönö cæcä ate minitö edæ tömengä nänö tæi piñænö bai adobaï tæi piñæmini ëwocacæminimpa, ante apænemönipa. Ayæ, Tömengä mänömaï pönö cæcä ænte ëwocamini inte minitö wæntæye badämaï inte ee cædinque

piyænē cæte ee cæcæminimpa, ante ämönipa. Ayæ watapæ todinque, ¹² mīnitō mōnō Mæmpo ingante waa ate pōnēninque apæncæminimpa, ante mōnitō Wængonguī ingante apænemönipa.

Edæ Wængonguī quīmōni imōni bai tōmengä mīnitō imīnite pōnō badongä ate mīnitō tōmengä quīmīni do bamīnīpa. İninque mīnitō tōmengä ñäö emōmāmodē mōnitō tōnō godongāmæ pōñōmīnite tōmengä nanguī pōnī pōnongä æninque mīnitō mōnitō tōnō godongāmæ nē ēamīni incæminimpa. ¹³ Edæ nē wēmō enempodongä nempo wæwēñōmonte Wængonguī wæætē mōnō imonte gä pe æmpote ö æninque, Botō Wengä botō nē Waadedongä iñōmō nē Awēnē Odeye iñongante mīnitō tōmengä nempo quēwencæminimpa, ante māmongä pongamōimpa. ¹⁴ Tōmengä Wengä nāmā wepæ petæ petæ wææ beyænque mōnō wænæ wænæ cægainō ante Wængonguī pōnō ñimpo cæcä æninque mōnō abæ tawænte bai quēwēmompā.

Codito wængä beyænque Wængonguī piyænē cæcampa

¹⁵ Mōnō adāmaī ingaingä Wængonguī æbänō emongää, ante adāmaī iñōmonte Wængonguī Wengä iñōmō Mæmpocä bai nē emongä inte mōnō weca pōninque, Mæmpocä æbänō emongää, ante do odōmongacäimpa. Wēēnēñedē Wængonguī nänō badönāmaī ingäñedē adocä incæ Bamoncadengä bai inongä inte do quēwengacäimpa. ¹⁶ İninque Mæmpocä pōnō angä eñēninque tōmengä Wengä incæ tōmancoo edæ badongacäimpa. Mōnō nē adincoo incæ mōnō adāmaī incōo awēmō ongoncoo incæ adocä tōmancoo badongacäimpa. Awēnēidi incæ nē änāni incæ, awēnēidi nāni enempodō incæ nē tæi pīñænāni incæ, öönædē owodönāni incæ inguipoga quēwēñōnāni incæ mänināni edæ tōmänāni inānite Mæmpocä pōnō angä eñēninque Wængonguī Wengä iñōmō badongacäimpa. Badōñongante

Wæmpocä, Bitō quī bacæimpa, angä Ao ante badongacäimpa. ¹⁷ Adocä Wængonguī Wengä incæ Tānocä quēwengaingä ingampa. Tōmengä pōnō angä beyænque tōmengä nänō badongaincoo iñōmō adoyōmō pōnente bai cædinque tōmengä nempo godongāmæ gongænte cægompā.

¹⁸ Ayæ tōmengä nē Önoncamō bai nē angä iñongante mōnō tōmengä ingante mōnō godongāmæ pōnencabo wæætē tōmengä tōnō adoyonque bai inōmō imompā. Adocä tōmengä nänō Tæiyæ Awēnē baquinque nē badongaingä inongä inte tānocä pōnī ingacäimpa. Ayæ æmonga pōnī nänō ongonguinque tōmengä wænte ate tānocä nē ñāni omæmongaingä inongä ingampa. ¹⁹ Edæ, Botō entawēnō incæ botō Wengä tōmänō entawencæcäimpa, ante pōnō cædinque Mæmpocä iñōmō nanguī togacäimpa. ²⁰ Ayæ tōmengä Wengä wepæ awāa gowete wædinque wængä beyænque Wængonguī mōnō tōmāmō beyæ pōnō cædinque piyænē cægacäimpa. Tōmengä Wengä tōnō mänōmaī pōnō cæcä beyænque mōnō inguipoga tōmāo quēwēmō tōnō öönædē tōmāo quēwēñāni tōnō tōmengä ingante Ao äninque tōmengä tōnō godongāmæ piyænē cæte quēwēmō adinque Wængonguī iñōmō nanguī togacäimpa.

²¹ Ayæ mīnitō guiquēnē Wængonguī ingante nāwæ pāmænte gogaīmīni inte wīwa cædimīni inte ocaidē nē piinte bagaīmīni iñōmīnite, ²² Wængonguī wæætē, Adocä Codito tōmengä baö ewēnente wængä beyænque mīnitō botō quīmīni badinque botō ayōmo tæiyæ waēmō entawencæminimpa, ante cæcampa. İninque tōmengä ñā mēnongacä ate mīnitō tōmengä ayongä wentamō mongænāmaī imīni adinque, Wænæ wænæ cæbitapa, ante ædō cæte piinte anguīi. ²³ Edæ mīnitō tæi mænonte bai ongōninque do mīni wede pōnēnonque ante cōwē godōmenque pōnēmīni İninque tōmengä weca ponte ongōmaīmīnīpa. Mōnitō mōnō Codito

ingantedö ante mönö pönönö beyæ mönö watapæ bacæimpa, ante apænemöni eñëminitawo. Mänine ante ñimpo cædämaï imini inte minitö tömengä weca cöwë ongömaïminipa. Mänine mini eñënine ante mönitö ñöwo inguipoga tömäo quëwënanäni inänite apænemöni eñënanipa. Mänine beyænque ante botö Pa-bodobo në cæbo batabopa.

Mönö pönencabo beyæ botö në cæbo batabopa, ante

²⁴ Minitö beyæ nanguï cædinque nantate wæðimo incæte botö nanguï tobopa. Ayæ Codito beyæ ante godömenque wæquënemö inte botö tömengä tönö guëa baonque nantate wæbopa. Codito mönö Önoncamö bai në angä iñongante mönö tömengä ingante mönö godongämæ pönencabo iñömö tömengä tönö adoyonque bai imompa. Botö iñömö edæ mönö cabo beyænque caate wæbopa. ²⁵ Ayæ, Codito ingante në pönënanäni beyæ bitö në cæbi badinque botö angäine ante adodö adodö ante tömänö ante edonque pönï apænebi eñencæðänimpa, ante Wængonguï angä eñëninque botö minitö beyæ në cæquënemö do bagaboimpa.

²⁶ Mänine Wængonguï nänö angäine ante wantæpiyæ wë wodonte bai iñonte mönö mæmæidi cöwë eñënamäi ingadänimpa. Nöwo guiquënë Wængonguï tömengä quimö iñömonte mänine ante edonque pönï odömonte apænecä eñëmompa.

²⁷ İninqe mönitö imönite äninque, Waa pönï botö angäine ante mini waocabo wëenëñedë mini eñënamäi ingäine ante minitö ñöwo tæcæ eñëmini inte oodeoidi inämaï inäni inänite odömonte apænemini eñencæðänimpa, ante Wængonguï cæcampa. Mänömaï beyæ mänine ante apænemöni eñëninque mini waa pönï ñäö bai entawenguinque eñencæminimpa. Edæ, Minitö mönö Codito ingante ewocadinque mini ñäö emämodë æiyömini watapæ bacæimpa, ante mönö pönönö ante mänineque impa.

²⁸ Mönö Codito tömengä nänö eñënö ante entawëninque mönitö adocä ingante mönö Codito ingante ante apænemönipa. Tömengä nempo quëwëninque minitö picænäni bai në eñëmini bayöminite Wængonguï minitö iminite waa acæcäimpa, ante mönitö tömänäni inänite waadete odömonte apænemönipa. Ayæ, Eñenguënë quëwëedäni, ante tömänäni inänite wææ ante apænemönipa.

²⁹ Mönö Codito nänö tæi piñænö pönongä ænte entawëninque botö, Në eñëmini bacæminimpa, ante cædinque tæi pæ pagænte cöwë nanguï cæbo imopa.

2

¹ Botö minitö beyæ nanguï cædinque Daoditea iñömö quëwënanäni beyæ adobai nanguï cæbo aedäni. Ayæ wadäni botö awinca adämaï inäni beyæ adobai tæi pæ pagænte cædinque nanguï cæbopa, ante apænebo eñëedäni. ² Botö, Tömänäni wæwënamäi inte wampo pönëninque godongämæ waadete pönëninque adocabodäni bai bacæðänimpa, ante ædæmö cæbopa. Edæ, Mänömaï badinque tömënanäni Codito nänö eñënö ædæmö pönï nani entawenguinque impa, ante pönëninque cæbopa. Ayæ, Mänömaï badinque tömënanäni Wængonguï nänö në wë wodongaingä ingante Codito ingante edonque acæðänimpa, ante botö mänömaï beyæ ante ædæmö pönï odömonte apænebopa. ³ Edæ, Æbänö i, ante, Æbänö waa cæquïi, ante Wængonguinque nänö nö pönönö incæ mönö Codito mäninö tömänö ante eñëninque waëmö pönï incoo bai wë wodonte mante bai entawengampa. ⁴ Mänömainö ante apænedinque botö, Minitö oda cædämaï incæminimpa, ante yewæmonte apænebopa. Edæ wadäni waa pönï tededäni incæ babæ wapiticæ odömoncæte ante tededäni inäni adinque eñënamäi iedäni, ante wææ ämopa. ⁵ Edæ wayömö quëwëmo incæ minitö weca owote bai botö önöwoca pönëmopa.

Īninqe botō ayōmo mīnitō mōnō Codito ingante wede pōnente tæi piñænte ongōninqe iñacabo cædinque tōingā pōni cæminipa, ante pōnēmopa. Mānōmaī īminipa, ante ate bai adinque botō nanguī tobopa.

Codito nempo quēwēninqe mūimō quēwēmōmpa, ante

⁶ Mānōmaī beyæ botō iūmaī āmopa. Mīnitō Itota Codito ingante mōnō Awēnē ingante Ao ante do æmīnitawo. Īninqe tōmengā ingante do Ao ante ænimīni inte mīnitō ñōwo adobaī tōmengā ingante cōwē Ao ante tōmengā nempo quēwēedāni. ⁷ Mīnitō waomīni incæ awæ tæimōwæ ædæmō guiwate pæwæ bai Codito nempo quēwēninqe cōwē godōmenque picæmīni bacæminipa. Ayæ mōnitō odōmonte apænemōni mīni ēñēnō bai cædinque godōmenque wede pōnēninqe tæi piñænte ongōedāni. Ayæ Wængonguī ingante waa ate pōnēninqe watapæ apæneedāni.

⁸ Wadāni mā pōnente ōnonquedō ante apænedāni ēñente wædinque mīnitō, Mōnō imonte ō æncæte ante babæ apænedānipa, āninqe wææ cæedāni. Edæ tōmēnāni dicæ Codito nānō odōmonte apænegainō ante apænedāniyaa. Wæætē waodāninqe nāni odōmonte apænegainonque ante Ao āninqe tōmēnāni inguipogaque ante nē pōnēnāni nāni pōnēnō bainonque ante cædānipa tōō.

⁹ Edæ Wængonguī tōmengā nānō entawēnoncoo incæ mōnō Codito Waocā nē ēñagaingā inongā inte mānincoo tōmancoo entawēninqe nāmā baonga ēñacampa. ¹⁰ Ōönædē awēnēidi incæ inguipoga awēnēidi incæ nanguī ināni iñōnāni mōnō Codito adocanque Ñænængā pōni inongā inte Tæiyæ Awēnē inongā ingampa. Incæte tōmengā nempo quēwēmīni inte mīnitō tōmengā nānō entawēnō incæ ædæmō entawēmīnipa. ¹¹ Īninqe tōmengā nempo quēwēninqe mīnitō wao ōnompoca ēō togænāmaī īmīni incæte mōnō Codito iñōmō ēō togænte bai cædinque mīnitō baonque ante mīni

wīwa cægainō ante wido cæcā ate mīnitō tæiyæ waēmō entawente quēwēmīnipa. ¹² Wængonguī nē tæi piñænongā inte Itota ingante angā ñāni ōmæmongacāimpa, ante wede pōnēmīni inte mīnitō, Itota tōnō godongāmæ nāñe wænte bai imōmpa, ante æpænē guimīnitapa. Ayæ adobaī adocā nē tæi piñænongā ingante wede pōnēninqe mīnitō æpænē guidinque Itota tōnō ñāni ōmæmonte godongāmæ tao gongænte quēwēmīnipa.

¹³ Doyedē ēñēnāmaī cædinque do wænguēnēmīni ingaimīni inte mīnitō inguipogaque ante mīni cæinēwēnō ante ee mongæñōmīnite Wængonguī angā ate mīnitō Itota tōnō ñāni ōmæmonte quēwengamīnipa. Edæ wēnæ wēnæ mīni cægainō ante adinque Wængonguī pōnō ñimpo cæcā quēwēmīnipa. ¹⁴ Mīnitō pante wæquinque ēñēnāmaī cæminipa, ante Wængonguī wade wade ante wææ angā ēñēninqe dodāni adodō adodō ante yewæmōnāni ate wægāmōmpa. Mānōmaī mōnō imonte ancaa wææ ānāni wæmō adinque Codito iñōmō mānīnecoo mōnō wægāinecoo ante wēā godonte bai cæcā ate dæ batimpa. Edæ awæ timpodāni wæninque Itota Codito māninō ante do teēmente mongæ māo wido cægacāimpa. ¹⁵ Ayæ māniwāa wæninque adocā tæi emongā inte wēnæidi awēnēidi tōnō nē ānāni nāni wænonguēnencacoo gā pe æmpote ō æninqe tōmengā, Wænoncaincoo nææmīnipa wænonguimīni, ante bai wadāni ayōnānite badete tote bai cægacāimpa.

Ōönædē mōnō entawēnō ante æncæte ante cæedāni, ante

¹⁶ Mōnō ee aquēnēnō incæ bitō quimæ cæmīi, Quimæ be-bii, ante pōnō apænte piinte ānānitawo. Wængonguī beyæ ante ææmæ cæcāimpa, ante apænte ancæ piinānitawo. Wacā māmō ī ate becāimpa, ante wææ ānānitawo. Guēmanguīōnæ incæ quimæ cæbii, ante mīnitō

īminite apænte pancæ cædānitawo. Edæ æcāmenque mǎnōmǎnō ante apænte ancæ cæyōnānite mīnitō wæætē, Tōmēnāni nāni wææ ānīnō ante Codito wēā godonte bai cægacāimpa, ante pōnēninque guīñente wædāmaī incæmīnīmpa. ¹⁷ Cænguī cænte bai bequī bete bai mōnō ōnōwoca beyæ Codito incæ mōnō guēmanguīmāmo bai īnongā ingampa. Īnīnque Codito ingante ænte entawēninque mōnō æbānō cænte bai guēmante bai quēwenguī, ante odōmoncæte ante cædinque dodāni īñōmō ōwocodenganque odōmonte bai cædinque wææ angadānīmpa. Mǎnōmaī beyænque tōmēnāni, Īmaī cæedāni, Īmaī beedāni, Īmaī guēmæedāni, ante wææ angadānīmpa.

¹⁸ Pancadāniya mā pōnēninque, Ōnōmonque bai īnōmō inte mōnō anquedoidi īnānite waa adīnque waa cæcæīmpa, ante babæ ante wææ ānewēnānīpa. Ayæ mōnitō ānō bai cædāmaī īnīnque edæ mīnitō ænte entawēnō ænāmaī inte wæbāimīnīpa, ante ānewēñōnāni mīnitō wæætē guīñente wædāmaī īedāni. Edæ, Mōnitō ate bai do adīmōni inte āmōni ēñēedāni, ante tōmēnāni Codito Ōnōwoca ingante ēwocadāmaī īnāni inte mā pōnēninque ānewēnānīpa. Edæ, Nāmāneque ante pōnēninque tōmēnāni, Mōnitō adomōnique waa cæmōni īmōnīpa, ante nāmā waa adānīpa. ¹⁹ Mōnō ocai encamō inte cænguī cænīnque mōnō baonga wepæmē tōmāo gogadīnque pæmōmpa. Ayæ adobāi mōnō ocai encadīnque oguēmē tōnō baō beyæ cōñe pō cōñe pō cæmōmpa. Mōnō pōnencabo adobāi Codito tōnō adoyonque bai īñōmonte tōmengā Ōnoncamō bai īnongā inte nē angā ingampa. Mōnō mǎnōmaī īmō incæte tōmēnāni wæætē nē Ōnoncamō bai īnongā ingante Baa ānīnque nāmā wido tote wææīñō bai edæ wadæ godānīpa. Īnīnque wææīñō bai īnāni incæ mīnitō īmīnite wææ ānāni apa quēwēmīnī.

²⁰ Wēēnēñedē inguīpogaque

ante nāni wææ angāinō ante nē ēñengāimīni incæte ñōwo wæætē Codito tōnō godongāmæ wænīmīni inte mīnitō wænte bai īmīni inte mǎnīne ante ædō cæte ēñenguīmīnī. Inguīpogaque quēwēmīni īmīnīpa diyæ mǎnīne ante ēñente cæquēnēmīni inguīmīnī. ²¹ “Gampodāmaī, Yædæ bedāmaī, Bæi ongōnāmaī,” ante tōmēnāni nāni wææ ānewēnō ante quīnante ēñente cæmīnī. ²² Īñæmpa waodānique edæ, Gampodāmaī, ante nāni ānoncoo īñōmō tæcæ ænte cæyōmīni edæ dobæ wote ba apa ēñēwēmīnī. Inguīpogaque quēwēnāni nāni ānewengāinō ante ēñēnīnque tōmēnāni wææ ānānīpa. Dodāni nāni odōmonte apænegāinō ante ēñēnīnque wææ ānānīpa. ²³ Tōmēnāni, Ōnōmonque bai īnōmō inte mōnō anquedoidi īnānite waa adīnque waa cæcæīmpa, ante wææ ānewēnānīpa. Ayæ mā pōnēninque, Cædāmaī, Cædāmaī, ante nāmā baō incæ pānānīpa. Īnāni ocai encadōnāni inte wææ ānānīpa, ante pōnēninque wadāni edæ wæætē oda cædānīpa. Īñæmpa, Cædāmaī, Cædāmaī, ante nāni wææ ānewēnō wīi eyepæ ī īnīnque nē ēñēnāni inguīpogaque nāni cæīnēwēnō ante godōmenque wīwa cædānīpa, ante āmo ēñēmaīmīnīpa.

3

¹ Īnīnque mōnō Codito nē ñāni ōmæmongaingā tōnō nē ñāni ōmæmongāimīni inte mīnitō æmōnga ongoncoo edæ æīnente pōnēedāni. Codito ñōwo Mæmpo Wængonguī tōmēmængā īnō æi tæ contate ongongampa, ante pōnēninque edæ mīnitō, Æmōnga pōnī nē quēwengā tōmengā nānō entawēnō bai adobāi entawengæīmpa, ante æīnente wædinque quēwēedāni. ² Inguīpogaque mōnō quēwēmāmo ante edæ wædāmaī inte wæætē æmōnga mōnō quēwenguīnō ante cōwē pōnente quēwēedāni. ³ Edæ do wænte bai ingāimīni inte mīnitō ñōwo Codito tōnō Wængonguī nempo awēmō quēwēñōmīnite mīnitō

quēwenguinō ante wīi edonque acæimpa. ⁴ Mönō Codito mīnitō quēwenguinō ante nē pōnongaingā inte ponte a ongōñongā māniñedē tōmengā ñāō entawēninque nānō tæi emōmāmodē mīnitō adobaī tōmengā tōnō a ongōmīni acæimpa.

Inguipogaque ante wægaimō inte mōnō mīimō quēwēmō

⁵ Mānōmaī impa, ante wædinque mīnitō inguipogaque ante mīni cæinēwēnō ante wænonte baī æmæwo wido cæedāni. Nānōogængā ināmaī iñongante godō mōnāmaī ee aedāni. Wīwa mīni pōnēwēnō ante æmæwo wido cæedāni. Wacā ingante mīni toinente wædō ante æmæwo wido cæedāni. Wīwa mīni cæinēwēnō ante æmæwo wido cædinque ee ate quēwēedāni. Mīni māincooque ante æinēwēnō ante æmæwo wido cæte ñimpo cæedāni. Edæ māincoo ante æinente nē wæcā iñōmō tōmengā, Māincoo incæ botō wængonguī impa, ante baī wæcā apa cæmīni. ⁶ Nē ēñēnāmaī cædāni inguipogaque nāni cæinēwēnonque ante cæyōnānite Wængonguī nānō pīnguimāmo oo ponguinō anguēnē. ⁷ Mīnitō incæ doyedē inguipogaque ante quēwēninque adobaī mīni cæinēwēnonque ante cægaimīni imīnipa. ⁸ Ñōwo guiquēnē ænguī badāmaī iedāni. Aīmīni badāmaī iedāni. Pīinte cædāmaī iedāni. Babæ godō wēnæ wēnæ ānewēnāmaī iedāni. Wīwa apænedāmaī iedāni. Wæætē, Idæwaa wēnæ wēnæ cæte awædō, ante māninō tōmānō ñimpo cæte ee aedāni. ⁹ Wēēnēñedē mīni entawengaimāmo ante wido cædinque māniñedē mīni cægainō ante adobaī nē wido cædimīni inte ñōwo iñōmō edæ wacā ingā wacā ingā babæ wapiticæ apænedāmaī iedāni.

¹⁰ Wæætē mīimīni edæ quēwencæmīnimpa, ante Wængonguī do pōnō badongā entawēmīnipa. Ayæ māninō ante nē Badongaingā iñōmō cōwē pōnō odōmonte apæneccā ēñēninque mīnitō mīimīni quēwēmīni inte tōmengā nānō entawēnō baī godōmenque godōmenque adobaī entawēmīni

bamīnipa. ¹¹ Mönō Codito nempo adoyōmō pōni iñōmō inte mōnō guidiegoidi incæ oodeoidi incæ adomō iñōmō imompa. Nē eō togæināni incæ bagāadāni incæ adomō iñōmō imompa. Waodāni incæ cowodēidi incæ adomō iñōmō imompa. Wacā beyænque nē cæte quēwēnāni incæ abæ tawænte ee gote baī nāmā beyænque nē cæmōni incæ mōnō tōmāmō adomō pōni iñōmō imompa. Edæ mōnō tōmāmō Codito adocanque nempo quēwēninque tōmengā adocanque ingante nē ewocamō imompa.

¹² Wængonguī, Mīnitō botō quīmīni badinque tæiyæ waēmō bacæmīnimpa, ante mīnitō imīnite waadete pōnēninque do apænte ængacāimpa. Inique tōmengā nānō nē apænte ængaimīni inte mīnitō wadāni inānite waadete pōnente godō waa cæedāni. Nāmā onōmoque baī imopa, ante pōnēedāni. Wadāni inānite ædæmō cæedāni. Æiquedō waa cæquīnāni, ante wædāmaī inte piyænē cæte quēwēedāni. ¹³ Ayæ wacā nānō cæinēnō ante cæcā adinque mīnitō pīināmaī ee amīni cæcæedāni. Wacā adobaī mīnitō imīnite wīwa cæcā ate wædinque mīnitō godō ñimpo cæmīni quēwencæcāimpa. Edæ mōnō imonte mōnō Awēnē nānō ñimpo cægāi baī mīnitō adobaī pīināmaī inte godō ñimpo cæedāni. ¹⁴ Ayæ, Adocabomō mōnō baquinque mōnō waadete pōnengæimpa, ante pōnēninque mīnitō tāno wadāni inānite waadete pōnēninque ayæ tōmēnāni inānite mīni godōmenque cæquēnēnō ante cæedāni. ¹⁵ Mīnitō adocabomīni badinque piyænē cæte quēwencæmīnimpa, ante Wængonguī mīnitō imīnite aa pegacāimpa cæmīni. Mōnō Awēnē Codito nānō piyænē cædō pōnongā æninque mīnitō piyænē cæte quēwēedāni. Ayæ Wængonguī ingante cōwē waa ate pōnente quēwēedāni.

¹⁶ Mönō Codito nānō apænegainō ante ēñēninque mīnitō ædæmō entawēninque nanguī ēñente baedāni. Inique nanguī ēñēmīni badinque

mīni cabo incæ wacā ingā wacā ingā godongāmæ odōmonte apæneedāni. Ayæ nanguī ēñēmīni inte mīnitō wacā ingā wacā ingā waadete pōnēninque, Īmaī cæcæimpa, ante apæneedāni. Ayæ dodāni Wængonguī ingante waa adinque ämotamīni ante nāni yewæmongainta adinque mīnitō wæætē adodō tee empote äedāni. Ayæ Itota Codito nānō cægainō ante pōnēninque ämotamīni äedāni. Ayæ adobaī Wængonguī Ōnōwoca pōnō apænecā ēñente ewocadinque mīnitō ämotamīni ante adodō tee empote äedāni. Mänōmaī ämotamīni äninque Wængonguī ingante cōwē waa ate pōnēninque äedāni. ¹⁷ Ayæ æbāmenque ante apænemīni incæ æbāmenque cæmīni incæ mīnitō, Mönō Awënë Itota emōwo beyæ impa, ante tōmää cæedāni. Ayæ tōmengā pōnō cæcā beyænque mīnitō eyepæ inte Mæmpo Wængonguī weca pōninque tōmengā ingante waa ate pōnēninque apæneedāni.

Mönō godongāmæ quēwencabo ĩmaī cæte quēwengæimpa

¹⁸ Onquiyæmīni ēñeedāni. Mönō Awënë nempo quēwēninque mönō ēñente cæcæimpa, ante wædinque mīnitō nānōogænāni inānite Ao ante ēñente cæedāni. ¹⁹ Onguīñæmīni ēñeedāni. Mīnitō nānōogænāni inānite ædæmō waadete pōnēninque tōmēnāni inānite pīnte cædāmaī iedāni.

²⁰ Wēñæmīni ēñeedāni. Mīnitō mæmpoidi inānite ædæmō ēñente cæedāni. Edæ mänōmaī cæmīni adinque mönō Awënë, Waa pōni cæbi abopa, ancæcäimpa. ²¹ Wæmpomīni ēñeedāni. Mīnitō, Ancaa ämo bai botō wēñængā ænguī badinque guingo imonte wæquēnengā, ante pōnente wædinque wæætē wēñænāni inānite nanguī änāmaī inte waadete pōnō cæedāni.

²² Wacā nānō nē ō ænimīni inte tōmengā beyænque nē cæte quēwēmīni ĩñōmō ēñeedāni. Mīnitō imīnite nē ō ængaingā ingante nē cæmīni inte mīnitō tōmengā nānō

ä bai tōmää ēñente cæedāni. Edæ, Awënë Wængonguī incæ botō imote cōwē acampa diyæ, ante guñente wædinque mīnitō imīnite nē ō ængaingā nānō ayedē incæ tōmengā nānō adāmaī ĩñedē incæ cōwē ēñente cæedāni. Waodānique botō imote waa acædānimpa, ante pōnēnāmaī inte mīnitō nō pōnēninque cōwē ēñente cæedāni. ²³ Æbāmenque cædinque mīnitō, Wīi waocā beyænque ante cædinque botō Wængonguī Awënë beyænque ante cæcæboimpa, ante pōnēninque tæi ewocadinque ee cæedāni. ²⁴ Mönō Awënë ĩñōmō tōmengā do nānō angainō bai cædinque mīnitō cægainō beyæ ante eyepæ pōni pōnongā æncæmīnimpa. Mänōmainō ante pōnente cæedāni. Edæ, Mönō Awënë Codito ingante adocanque ingante nē cæmīni imīnipa, ante ämo ēñēmaimīnipa. ²⁵ Nē wēnæ wēnæ cæcā guiquēnē tōmengā nānō wēnæ wēnæ cægaignanca eyepæ æncæcäimpa. Edæ Wængonguī ĩñōmō wacā ingante wadō wacā ingante wadō ate pōnēnāmaī inte tōmāmō imonte apænte äninque pōnō nō pōni paga cæcæcäimpa.

4

¹ Awënëidi ēñeedāni. Mīnitō waocā ingante nē ō ænimīni inte ēñeedāni ämopa. Edæ mīnitō Awënëidi imīni bai mīnitō imīnite nē Ængaingā incæ adobaī mīnitō Awënë inongā inte öönædē quēwengampa cæmīni. Mīnitō beyænque cæte nē quēwēnāni inānite mīnitō nōingā cædinque tōmēnāni nāni ænguēnēnō ante adinque eyepæ pædæ godōmīni æncædānimpa.

² Wængonguī ingante cōwē apænedinque, Tōmengā æbānō cæcää, ante cōwā adinque tōmengā ingante waa ate pōnēninque apæneedāni. ³ Codito æbānō cæcää, ante dodāni nāni ēñēnāmaī ingaine incæ botō mänine ante do ēñēnimo inte apænebo beyænque botō imote tee mönedāni wæbopa. Incæte mönitō mänine ante apæneyōmōni mīnitō wæætē mönitō beyæ ante Wængonguī ingante apænedinque

īmaī ante apæneedāni āmopa. Wængonguī ēñēmi. Bitō wi ænete bai cæbi ate Pabodoidi nāni apænede wadāni mīmōnē guicæimpa, ante apæneedāni. ⁴ Codito æbānō cæcāā, ante botō edonque apænequēnēmo īmopa. Īnīnque mīnitō botō beyæ ante apænedīnque, Pabodo edonque apænecæcāimpa, ante Wængonguī ingante apæneedāni āmopa. ⁵ Wadāni inānite bee tēnīnque mīnitō ocai encamīni inte ēñente cædāni. Pōnēnāmaī ināni do ēñencædānīmpa, ante waa apænete cædāni. ⁶ Ayæ Wængonguī waadete pōnō apænecā ēñēnīnque mīnitō adobaī wadāni inānite waadete pōnō apænedīnque waa pōnī apæneedāni. Wadāni, Æbānō īi, ante ēñencæte ante wæyōnānite mīnitō wæætē nō pōnī ēñēmīni inte nōingā apænemīni ēñencædānīmpa.

Waa quēwencæmīnīmpa, ānānīpa

⁷ Botō Pabodobo æbānō quēwēmo, ante nē ēñēningā inte Tiquico ñōwo mīnitō weca pōnīnque mānīnō ante apænecā ēñencæmīnīmpa. Tōmengā mōnō tōnīñacā bai īñongante mōnitō tōmengā ingante waa waadete pōnēmōnīpa. Tōmengā mōnō Awēnē nempo quēwēnīnque mōnitō tōnō godongāmæ cæcā īnongā inte mōnō pōnencabo tōmāmō īmonte pōnēnīnque mōnō beyæ cōwē ædæmō cæcā ingampa. ⁸ Mīnitō, Pabodoidi æbānō quēwēnānīi, ante ēñencæte ante wæmīnitawo. Edæ, Tiquico mānīnō ante apænedīnque mīnitō īmīnite ædæmō apænecā ēñēnīnque mīnitō wampo pōnencæmīnīmpa, ante cædīnque botō ñōwo tōmengā ingante mīnitō weca da godōmo pongā aedāni. ⁹ Tiquico goyongā tōmengā tōnō Ōnetīmo mīni cabo nē īnongā incæ guēa gocæcāimpa. Ōnetīmo cōwē ædæmō cæte nē pōnengā ingampa, ante adīnque mōnitō tōmengā ingante waadete pōnēmōnīpa. Īnīnque tōmēna īñōmō, Pabodoidi weca æbānō cædānīi, ante tōmānō ante apæneda ēñencæmīnīmpa.

¹⁰ Botō tōnō guēa tee mōnete ongongā Aditadoco īñōmō tōmengā mīnitō īmīnite, Waa quēwēdāni, angampa. Ayæ Bedēnabee nānō wænquicā Māadoco adobaī, Waa quēwencæmīnīmpa, angampa. Tōmengā ingante æbānō waa cæquīi, ante do āmo ēñēmīnitapa. Īnīnque tōmengā pongā adīnque waa cædāni. ¹¹ Ayæ wacā Itota Yoto nāni ānongā adobaī, Waa quēwencæmīnīmpa, angampa. Botō Wængonguī Awēnē Odeye nempo quēwēnāni beyæ cæyōmo ood-eoidi incæ wadāni cædāmaī īñōnānite mānīnānīque botō tōnō godongāmæ cædīnque pōnō ædæmō cædāni ænīnque botō wampo pōnentabopa.

¹² Ayæ mīni cabo īnongā inte Epapada īñōmō tōmengā Itota Codito ingante nē cædongā inte adobaī, Waa quēwēdāni, angampa. Tōmengā Wængonguī ingante nangūi apænedīnque, Codotenteidi inānite bitō godō cæbi ate tōmēnāni picænāni bai bacædānīmpa. Ayæ bitō angainō tōmānō ante ēñente cædāni inte tōmēnāni tæi pīñænte ēwocacædānīmpa, ante tōmengā mīnitō beyæ ante cōwē apænecampa. ¹³ Mīnitō beyæ tōmengā nangūi cæcampa. Daoditea īñōmō nāni pōnencabo beyæ adobaī Yedapodi īñōmō nāni pōnencabo beyæ adobaī tōmengā nangūi cæcampa, ante botō nāwangā apænebo ēñēdāni. ¹⁴ Ayæ, Waa bacædānīmpa, ante mōnō nē cædongā tōmengā emōwo Odoca tōmengā īñōmō mōnō nē waadecā ingampa. Tōmengā tōnō Deēma, Waa quēwencæmīnīmpa, ante adobaī ānāpa. ¹⁵ Ayæ botō Pabodobo beyæ ante wæætē Daoditea īñōmō mōnō tōnīñadāni inānite mīnitō, Waa quēwēdāni, ædāni. Diīmpa īnante, Waa quēwēdā, ædāni. Ayæ Codito ingante nāni pōnencabo tōmēnā oncōnē godongāmæ ponte apæneyōnānite mīnitō wæætē botō beyæ apænedīnque, Pabodo, Waa quēwēdāni, angampa, ædāni.

¹⁶ Ayæ īinta botō cadota ante yewæmōinta īinque adīnque mīnitō,

Daoditea iñömö Codito ingante nāni godongāmæ pōnencabo adobai acædānimpa, ante cædinque da godōmini ænte acædānimpa. Ayæ daoditeaidi inānite botō cadota ante yewæmōninta adobai āmini da pōnōnāni æninque aedāni.

¹⁷ Ayæ Adoquipo ingante apænedinque, Bitō mōnō Awēnē pōnō angā ēñēnīmi inte bitō cæquēnēnō ante tōmāā ædæmō cæe, aedāni.

¹⁸ Botō Pabodobo tōmēmo ōnompoca yewæmōninque, Waa quēwēedāni, ante tōmēmo ēmōwo ante yewæmōmopa. Botō æbānō yæguincamē encapote wæboi, ante pōnēninque mīnitō Wængonguī ingante apæneedāni āmopa. Wængonguī waadete nānō pōnō cædō ænte entawencæminimpa, ante māninque ante yewæmōmopa.

1 Tetadönitenteidi inänite Pabodo cadota ante tänota nänö yewæmongainta

Pabodo, Waa quëwëedäni, ante apænecäimpa

1 Botö Pabodobo inömo imopa. Mönö töninäda Tidibänö tönö Timoteo tönö godongämæ apænete ate yewæmömo aedäni. Mönö Mæmpo Wængongui nempo ayæ mönö Awënë Itota Codito nempo quëwëninque minitö Tetadönica inömo quëwëninque Codito ingante godongämæ mini pönencabo ëñëedäni. Mönö Wængongui waadete pönö cæcä ate minitö gänë entawencæminimpa, ante yewæmömönipa.

Tetadönitenteidi näni wede pönëno

2 Mönitö möni apæneyedë minitö tömämäni beyæ ante Wængongui ingante cöwë waa ate pönëninque apænemönipa. 3 Minitö Itota ingante æbänö wede pönente cæmäni iminipa, ante ayæ tömengä ingante waadete pönëninque æbänö cæmäni iminipa, ante cöwë apænemönipa. Ayæ minitö wæwëmäni incæ, Mönö Awënë Itota Codito pongä ate watapæ bacæimpa, ante pönëninque æbänö wæntæye inämaï ee cæmäni iminipa, ante adinque mönitö Wængongui mönö Mæmpo weca æyedëmë ponte apænedinque cöwë mäninö ante pönëninque apænemönipa. 4 Mönitö töninämani, minitö Wængongui nänö në waademäni inömini inte ëñëedäni. Tömengä minitö iminite apænte ængacäimpa, ante do ëñëmönipa. 5 Edæ Itota ingantedö ante mönitö watapæ möni apænedö ante wii önonquedö ante apænetamönipa. Wæætë Wængongui nämä tæi piñænte në angä beyænque mönitö minitö iminite apænedinque Awënë inte bai apænetamönipa. Wængongui Önöwoca mönitö tönö godongämæ cæcä

beyænque mönitö mäninö möni watapæ apænedö ante, Nö impa, ante ædæmö pönëninque apænetamönipa. Mänömaï apænemöni ëñëmini adinque mönitö, Wængongui minitö iminite apænte ængacäimpa, ante do ëñëmönipa. Ayæ minitö weca quëwëninque mönitö æbänö minitö beyæ ante quëwentamönii, ante do ëñëmönipa.

6 Wængongui Önöwoca watapæ nänö topämo ante pönongä ænimäni inte minitö nanguï caate wæmäni incæte Wængongui nänö angainö ante ëñëninque Ao ante æminitapa. Mönitö æbänö cæmönii, ante adinque Awënë Itota Codito æbänö cæcää, ante adinque minitö adobaï möni cæbaï cæmäni baminitapa.

7 Ininque Mäatedöniabæ quëwënäni tönö Acayabæ quëwënäni inömo Itota Codito ingante në pönënäni inönäni inte tömënäni tömänäni mini cædi adinque mini cæbaï adobaï cædanitapa.

8 Minitö wede pönëninque apænemäni beyænque Wængongui nänö angainö ante Mäatedöniabæ quëwënäni tönö Acayabæ quëwënäni ëñënäni incæte wii mänii mëñömongaque inömo quëwënäni ëñënäni. Wæætë ædömë quëwënäni inönänite wadäni minitö Wængongui ingante mini wede pönëmämo ante tededäni do ëñënäni.

Ininque mönitö mänii beyæ quinante godömenque apænequii.

9 Edæ, Mönitö minitö weca ëñacæ pöninque apænemöni ëñëninque minitö æbänö watapæ ëñëminitapa, ante mäninäni në pönënäni incæ apænedäni ëñëmönipa. Ayæ adodäni minitö iminitedö ante iïmaï ante apænedänipa. Minitö, Mönitö wængonguïdi impa, ante mini cönönincacoo incæ ëmö cæte wadæ pöninque mönö Wængongui gämænö pöminitapa, ante apænedäni ëñëmönipa. Ayæ, Näwä Wængongui në Quëwëngä ingante ëñente cæcæmönimpa, ante pöminitapa, ante apænedäni ëñëmönipa. 10 Ayæ tömengä Wengä öönädë në quëwëngä

inte ocæ emænte poncæcäimpa, ante mīnitō wānō cōmīni imīnīpa, ante apænedāni eñēmōnīpa. Tōmengā do wængaingā iñongante Wængonguī, Ñāni omæmōe, angā nē ñāni omæmongaingā ingampa. Inique Wængonguī mōnō imonte nānō pīinte panguīmāmo ante wæyōmonte tōmengā Wengā iñōmō ængā beyænque quēwenguīmō imōmpa.

2

Pabodo Tetadōnica iñōmō nānō cædō

¹ Mōnitō tōniñamīni eñēedāni. Mōnitō mīnitō weca mōni eñacæ pōnedē mōni cædinō wīi ononque impa, ante mīnitō do eñēmīnīpa.

² Mōnitō do mīni eñēnīnō bai mōnitō wēēñēdē Pidipoto iñōmō quēwēñōmōnīte māniñōmō quēwēnāni mōnitō imōnīte wēnæ wēnæ cædāni beyænque wæwente intamōnīpa. Adodāni mōnitō imōnīte, Mīnitō wēnæ wēnæ cæmīni imīnīpa, ante tedewēnāni eñēnīnīque wætāmōnīpa, ante mīnitō adobai eñēmīnīpa. Ayæ mīnitō weca ponte quēwēñōmōnīte waodāni tæiyænāni mōnitō imōnīte Baa ante, Mīnitō apænedāmai incæmīnīpa, ante wææ ānāni incæte Wængonguī mōnitō tōnō godongāmæ cæcā beyænque tōmengā ingantedō ante watapæ mōni apænedō ante mīnitō imīnīte guiñēnāmai apænetāmōnīpa.

³ Edæ mōnitō, Wængonguī ingante pōnēmīni inique waa imāimpa, ante mīnitō imīnīte nanguī apænemōni inte wīi babæ wapiticæ pōnēnīnīque apænemōnīpa. Wīi wentamō entawēnīnīque pōnente apænemōnīpa cæmīnī. Ayæ adobai, Mīnitō oda cæcæmīnīpa, ante cædāmai inte mōnitō wīi wapiticæ apænemōnīpa.

⁴ Wæætē Wængonguī mōnitō imōnīte apænedīnīque, Waa cæmīni abopa, ānīnīque, Mīnitō Itota ingantedō ante botō watapæ apænedō ante nē apænemīni eñencædānīpa, ante angā eñēnīnīque mōnitō nē apænemōni imōnīpa. Mōnitō, Waodāni mōnitō imōnīte waa

acædānīpa, ante cædāmai inte wæætē, Wængonguīnīque mōnitō imōnīte waa acæcāimpa, ante cædinīque apænemōnīpa. Edæ tōmengā, Æbānō entawēmīnī, ante mōnō entawēñōmō ante nē acā ingampa. ⁵ Wadāni nāmā beyænque ante, Waa tedemōni eñēnīnīque mōnitō imōnīte wæætē pōnō cæcædānīpa, ante babæ cædāni bai mōnitō iñōmō dicæ mānōmānō ante mīnitō imīnīte babæ cætāmōnīyaa. Mānōmānō ante do eñēmīnīpa. Ayæ, Mōnitō wīi mīnitō godonte æinta ante beyæ apænetāmōnīpa, ante do eñēmīnīpa. Æbānō cætāmōnīpa, ante Wængonguī nē acā ingampa. ⁶ Waodāni mōnitō imōnīte waa acædānīpa, ante mōnitō dicæ amōnitawogaa.

Ayæ, Mīnitō incæ wadāni incæ mōnitō imōnīte waa acædānīpa, ante dicæ amōnitawogaa. ⁷ Edæ, Itota Codito nānō da godongāimōni inōmōni inte mōnitō mīnitō imīnīte, Pōnōmīni ænīnīque quēwencæmōnīpa, amōni bai waa incædōnīpa. Wæætē mīnitō weca quēwēnīnīque mōnitō wānā nānō wēñænāni guiyānāni inānīte ædæmō cædā bai adobai mīnitō imīnīte cætāmōnīpa. ⁸ Mīnitō imīnīte nanguī pōni waadete pōnēmōni inte mōnitō, Itota ingantedō ante Wængonguī nānō watapæ apænedō ante mīnitō imīnīte apænedīnīque watapæ totāmōnīpa. Ayæ mīnitō nō mōni nē waademīni iñōmīnīte mōnitō mīnitō beyæ quēwentāmōnīpa. Ayæ mīnitō beyæ wæmōni incæ adobai watapæ tobāimōnīpa. ⁹ Mōnitō tōniñamīni eñēedāni. Nanguī pōni mōni cædinō ante mīnitō do eñēmīnīpa. Itota ingantedō ante Wængonguī nānō watapæ apænedō ante mōnitō mīnitō weca quēwente apænedīnīque, Mōni quēwengæimpa, ante wīi eyepæ godō wædō ante dicæ antāmōnīyaa. Wæætē edæ, Mīnitō wædāmai incæmīnīpa, ante mōnitō itædē incæ woyowotæ incæ tōmēmōni nanguī cædinīque ænte quēwentāmōnīpa.

¹⁰ Mīnitō nē wede pōnēmīni weca quēwēnīnīque mōnitō tæiyæ

waemö ewocamöni inte nö cæte quëwëñömönite mīnitō, Wënæ wënæ cæmīnīpa, ante ædō cæte anguīmīni. Wæætē mōnitō cædinō adinque mīnitō, Mōnitō æbānō quëwëmōni imōnii, ante do amīni inte nē apænemīni imīnīpa. Wængonguī adobaī ante do acā ingampa. **11** Edæ waocā mæmpocā tōmengā wëñænāni iñōnānite tōmengā, Mīnitō ëñenguīmīni, ante odōmongā baī mōnitō adobaī mīnitō tōmāmīni iñōmīnite adocanque adocanque ingante, Bitō ëñenguīmi, ante odōmonte apænētāmōnīpa. Mänōmaī cætāmōnīpa, ante mīnitō do ëñēmīnīpa. **12** Mīni quëwënō adinque Wængonguī tocæcāmpa, ante cædinque mīnitō tæiyæ waemö quëwencæmīnīpa, ante mōnitō nanguī apænētāmōnīpa. Ayæ, mīnitō mänōmaī cæte quëwencæmīnīpa, ante waadete apænētāmōnīpa. Ayæ adobaī mōnitō wæætē wæætē apænēdinque mīnitō imīnite adodō ante ancaā apænētāmōnīpa. Wængonguī

iñōmō, Botō Awënē Odeye nempo quëwëninque mīnitō botō ñāō ëmōñōmō botō tōnō godongāmæ quëwencæmīnīpa, ante tōmengā mīnitō imīnite aa pedinque apænte ængampa. **13** Ayæ adobaī mōnitō Wængonguī nānō angainō ante mīnitō imīnite apænēmōni ëñëninque mīnitō ò ænte do pōnēmīnitapa. Nāwangā Wængonguī nānō angainō impa, ante adinque mīnitō, Wīi waodānique nāni angainō impa, ante pōnëninque wæætē, Nāwangā Wængonguī nānō angainō impa, ante pōnëninque ò æmīnitapa. İninque mīnitō nē wede pōnēmīni inte Wængonguī nānō angainō entawëmīni beyænque nanguī cæmīni imīnīpa, ante ëñëninque mōnitō Wængonguī ingante cōwë waa ate pōnente apænēmōnīpa. **14** Oodeabæ iñōmō Wængonguī ingante godongāmæ nāni pōnencabo iñōmō tōmengā nempo quëwëñōnānite oodeoidi tōmënāni inānite togænte pānāni wädāni baī mīnitō mōnitō tōniñamīni iñōmīni mīnitō òmæ iñōmō nē quëwënāni incæ mīnitō

imīnite adobaī cædāni wæmīnitapa. Mänōmaī cædāni wædinque mīnitō Oodeabæ iñōmō Wængonguī ingante godongāmæ nāni pōnencabo wädāni baī adobaī wæmīni bamīnitapa.

15 Oodeoidi iñōmō Wængonguī beyæ nē apænegaīnāni inānite wænōnāni wængadānīpa. Ayæ ate tōmënāni pæināni iñōmō Itota Codito ingante wænōnāni wængacāmpa. Ayæ ñōwodāni adocabodāni incæ mōnitō imōnite adobaī togænte wido cædānitapa. Mänīnāni nāni cædinō adinque Wængonguī tōmënāni inānite ædō cæte waa aquingāā. Adodāni incæ waodāni tōmānāni inānite piinte quëwënōnānīpa tōō. **16** Edæ oodeoidi ināmaī ināni inānite, Codito ængā beyænque mīnitō quëwencæmīnīpa, ante apænēdāmaī incæmīnīpa, ante cæcæte ante mänīnāni oodeoidi incæ mōnitō imōnite Baa āninque wææ cædānīpa tōō. Mänōmaī cōwë wënæ wënæ cædinque tōmënāni wæætē wæætē nāni wënæ wënæ cædincoo idæwaa cædānīpa. Idæwaa i ĩninque Wængonguī nānō ænguī bate piīmāmo tōmënāniya do pongatīpa.

Tetadönitenteidi weca Pabodo ëñaccë pōinente wæcampa

17 Incæte mōnitō tōniñamīni ëñëedāni. Tōmënāni ānāni beyæ mōnitō mīnitō imīnite ëmō cæte godinque wīi wantæpiyæ ante gotāmōnīpa. Godinque mīnitō imīnite adāmaī imōni incæte mōnitō mīnitō beyæ ante cōwë pōnentāmōnīpa. Mīnitō imīnite nanguī aīnente wæmōni inte mōnitō, Æbānō cæte goquīmōnii, ante pōnëninque nanguī cætāmōnīpa. **18** Edæ mīnitō weca pōinente wætāmōnīpa. Botō Pabodobo inōmo inte wæætē wæætē nō pōinēmo intabopa. Mōnitō pōinēmōni incæte Tatāna wæætē mōnitō imōnite wææ cæcā wætāmōnīpa. **19** Mōnō Itota Codito nānō ponguīōnæ tōmengā weca ongōninque mōnitō æbānō ante beyæ watapæ bacæīmpa, ante pōnēmōni imōnii. Wīi mīnitō beyænque toquīmōnii. Edæ nē pōnēmīni inōmīni inte mīnitō do mōni nē watapæ todōmīni imīnitapa. Ayæ

waodäni tæi emonte gänä cædinque poganta ænte todäni bai minitö beyænque ante mönitö nê toquimöni imönipa. ²⁰ Näwangä impa. Waa pöni cæmini ininque minitö möni nê waa amini inömini inte möni nê watapæ todömini iminipa.

3

¹ Mänömaï beyæ mönitö, Minitö iminite adämaï inte awædö, äninque, Ædö cæte godömenque wänö cömöni inguimönii, ante pönëninque mönatö adomönaque Atëna inömö ongonguënëmöna imönapa, ante pönente wætämönapa. ² Ayæ Timoteo nê mönö töninacä ingante minitö weca ante da pönömöna pongantapa. Tömengä inömö Wængongui tönö godongämæ cædongä inongante Itota mönö Codito ingantedö ante mönö watapæ apænedö ante ëñencædänimpa, ante odömonte apænedongä ingampa. Tömengä minitö iminite, Mini wede pönënö ante tæi ongonte quëwëedäni, ante ayæ, Wampo pönëninque tæi piñænte cæedäni, ante ædæmö apæ necæcäimpa, ante mönatö tömengä ingante da pönömöna pongantapa. ³ Wadäni minitö iminite quiëmë cædäni caate wæmini incæte tömämöni wadö pönënamäi inte ñimpo cædämaï incæminimpa, ante cædinque Timoteo ingante da pönömöna pongantapa. Mönö imonte cöwë mänömaï cædäni caate wæquënëmö imompa, ante minitö do edonque pöni ëñëminipa. ⁴ Ayæ minitö weca möni quëwëñedë mönitö minitö iminite apænedinque,

Mönö imonte quiëmë bai togænte panguinänidö angüenë, ante wæætë wæætë apænetämönipa. Edæ minitö ëñënö bai mäninö do batimpa. ⁵ Mänömaï beyæ botö, Ædö cæte godömenque wänö cömo inguimoo, ante, Mini wede pönënö æbänö impa, ante botö ëñencæboimpa, ante Timoteo ingante da pönömo pongantapa. Wënæ awënë, Oda cæe, ante nê änewëngä inömö minitö iminite, Oda cæedäni, angä ëñëninque minitö

wabänö ëñëminimpa, ante botö ancai guiñente wætäbopa. Mänömaï ëñente cæmini ininque mönitö cædinö wo ewente babaimpa, ante pönentäbopa.

⁶ Incæte Timoteo minitö weca quëwëninque ñöwoque mönitö weca ocæ emænte pongantapa. Mini wede pönënö ante apænedinque tömengä, Wede pönënanipa, angantapa. Ayæ, Nê waadete pönënanäni inänipa, ante apæ necä ëñentämönapa. Minitö mönatö beyæ cöwë waa pönëmöni iminipa, ante tömengä apæ necä ëñentämönapa. Ayæ mönatö minitö iminite ainëmöna inte wæmöna bai minitö adobai mönatö imönate ainëmöni inte wæmini iminipa, angantapa. ⁷ Mänömaï beyæ mönitö töninamäni ëñëedäni. Quiëmë beyæ wæmöna incæ ayæ mönatö imönate togænte pänäni wæwëmöna incæte mönatö mini wede pönënö beyænque wæætë wampo pönente batämönapa. ⁸ Minitö mönö Awënë ingante ñimpo cædämaï pönëmöni beyænque mönatö ñöwo wampo pönente bai quëwëmöna imönapa. ⁹ Mönatö mönö Mæmpo Wængongui weca ongöninque minitö beyæ nanguï watapæ tomöna inte wæætë apænëmönapa. Incæte minitö beyæ ante Wængongui ingante ædö cæte waa ate pönente eyepæ apænequimönaa. ¹⁰ Minitö mini wede pönënö ante æbänö ayæ wii eyepæ pönëmöni, ante wæmönipa. Ininque, Minitö iminite wæætë adinque mönitö odömonte apænëmöni ëñëninque minitö eyepæ pönencæminimpa, ante cædinque mönitö woyowotæ itædë Wængongui ingante nö nanguï pöni apænëmöni imönipa.

¹¹ Wængongui mönö Mæmpo incæ mönö Awënë Itota Codito tönö möni goquinö ante töinö pinonte bai cæda ate minitö weca gocæmönimpa. ¹² Mönitö minitö iminite godömenque waadete pönëmöni bai mönö Awënë Itota pönö cæcä ate minitö adobai minitö weca wacä ingä wacä ingä godömenque godömenque waadete pönencæminimpa, ämönipa. Ayæ waodäni tömänäni inänite

godömenque waadete pönencæminimpa, ämönipa. ¹³ Tömengä pönö cæcä beyænque mīnitō tæimō entawente incæminimpa, ämönipa. Edæ mönō Awēnē Itota quīnāni nē tæiyæ waēmō ēwocadāni tōmānāni tōmengä tönō godongāmæ poncædānimpa. Tömēnāni nāni pōñedē mīnitō iñōmō Wængonguī mönō Mæmpo weca pōmīni adinque tōmengä ædō cæte, Wēnæ wēnæ cæmīni imīnīpa, ante anguingāā. Mīnitō tæiyæ waēmō ēwocamīni incæminimpa, ämönipa.

4

Wængonguī waa acæcäimpa, ante mönō quēwēnō ante

¹ Mōnitō tōniñamīni ēñēedāni. Ado- deque ayæ apænequīmōni imönīpa. Mīni quēwēnō ante Wængonguī waa acæcäimpa, ante mönitō, Iīmaī quēwēedāni, ante do wææ odōmonte apænemōni ēñēmīnitawo. Iñinque mīnitō Ao ante quēwēnōmīni imīnīpa. Nōwo iñōmō mönitō Awēnē Itota emōwo ante apænedinque mīnitō imīnite, Mānīnonque ante gomonga cæte quēwencæminimpa, ante ancaa apænemönīpa.

² Awēnē Itota nānō änō ante ēñente cædinque mönitō mīnitō imīnite wææ äninque, Iīmaī cæedāni, antamönīpa. Mānīnō möni wææ ante odōmonte apænedō ante mīnitō do ēñēnimīnīpa.

³ Wængonguī nānō änō iñōmō iīmaī impa. Mīnitō iñōmō tæiyæ waēmō ēwocate quēwenguēnēmīni imīnīpa. Wacā nānōogæ ingante godō towente cædāmaī inte edæ önonque mīni nānōogænque quēwenguēnēmīni imīnīpa. ⁴ Onguīñæmīni tōmāmīni iñōmō, Botō moncæboimpa, ante cædinque mīnitō, Æbānō cæte nānōogæ æmo ate Wængonguī tönō woadāni waa aquīnānīi, ante ēñenguēnēmīni imīnīpa. Mīnitō, Tæiyæ waēmō ēwocadinque ængæimpa, ante ēñenguēnēmīni imīnīpa. ⁵ Wīi wadāni baī, Wængonguī ingante æbānō ingaingā ingāā, ante ēñēnāmaī ināni baī onquiyænque ante nāni towēnonque ante pönēnāmaī quēwencæminimpa.

⁶ Mānīnō ante nē pönengä iñōmō, Botō tōniñacā nānōogængä ingampa, ante pönēninque tōmengä nānōogæ ingante towente cædāmaī ininque tōmengä ingante wēnæ wēnæ cædāmaī incæcäimpa.

Iīmaī wēnæ wēnæ cædāni inānite. Awēnē Itota pancæcäimpa. Wēēnēñedē mānīnō ante mīnitō imīnite apænedinque do wææ angamönīpa. ⁷ Edæ Wængonguī mönō imonte wīi, Towencæminimpa, ante apænte ængacäimpa. Wæætē, Mīnitō tæiyæ waēmō ēwocate quēwencæminimpa, ante tōmengä mönō imonte apænte ængacäimpa. ⁸ Mānōmaī beyæ æcānō mānīnō ante Pabodo nānō, Iīmaī cæedāni, ante nānō wææ odōmonte apænedō ēñēninque Baa äna iñōmō tōmengä wīi woadānique inānite ēñēnāmaī inte Baa angā ingampa. Wæætē Wængonguī mīnitō imīnite nānō Tæiyæ Waēmō Önōwoca nē pönongä ingante ēñēnāmaī inte Baa angā apa quēwēmīnīi.

⁹ Mīni pönencabo mīni tōniñadāni iñōnānite mīni waadete pönēnō ante mönitō quīnante yewæmonguīmōnīi. Edæ mīnitō tōmēmīni imīnite, Wacā ingā wacā ingā waadete pönencæminimpa, ante Wængonguī odōmonte apænecā ēñēmīnitapa tōö. ¹⁰ Nō impa. Mäatedöniabæ tōmāmæ iñōmō mönō pönencabo mönō tōniñadāni tōmānāni inānite do waadete pönēmīni imīnīpa. Incæte möni tōniñamīni, Mīnitō mānīnō ante gomonga cæte quēwencæminimpa, ante ancaa apænemönīpa. ¹¹ Mīnitō piyænē cæte quēwencæminimpa. Wadāni, Æbānō cæquēnēnāni inānīi, ante cōwē änāmaī incæminimpa. Ayæ, Wæntæye ināmaī inte mīni önompoca cæte quēwencæminimpa. Mānīnō do möni apænedō baī mīnitō, Cæinēmönīpa, ante cæcæminimpa, ämönīpa. ¹² Mānōmaī cæmīni baī iīmō iñō iīmō iñō mīni quēwēnō adinque wadāni nē pönēnāmaī ināni wæætē mīnitō imīnite waa acædānimpa. Ayæ adobaī mīnitō woadāni inānite, Pönōmīni æncæmönīpa, ante

änewenämaï quëwencæminimpa.

Mönö Awënë Itota nänö occä emænte ponguionæ

¹³ Mönitö tönifnamini ëñeedäni. Në æmæwo wængainäni iñömö æbänö baquinänii, ante minitö ëñencæminimpa, ante yewæmömönipa. Wadäni, Mönö ñäni ömæmongæimpa, ante pönenämaï inäni inte wæwänäni bai minitö wii adobai wæwëmini incæminimpa, ante yewæmömönipa. ¹⁴ Itota æmæwo wæningä incæ ñäni ömæmonte inongäimpa, ante pönëmö imompa. Itota ingante pönente në wængainäni iñönänite Wængongui iñömö mäninäni inänite Itota tönö tömengä weca ænte mämongä poncædänimpa, ante adobai pönëmompa.

¹⁵ Wængongui nänö apænedö bai mönitö iimaï ante minitö iminite apænëmönipa. Awënë Itota nänö ponguionæ mönö në miimö quëwëmö inte ayæ ongömö iñömö mönö wii täno tömengä weca gocæmöimpa. Wæætë tömengä ingante pönëninge në æmæwo wængainäni inte mäninäni iñömö täno goquinänidö angüënë. ¹⁶ Edæ mönö Awënë Wængongui nänö wææ änonque ante yedæ añongä Wængongui anquedoidi tæiyæ awënë aa pecæcäimpa. Wængongui todompeta nani ancadeca adocanque we we öoncæ cæyongä mönö Awënë Codito incæ öönædë quëwente pö wææncæcäimpa. Pö wææñongä tömengä ingante në pönente wængainäni tömënäni täno ñäni ömæmoncædänimpa. ¹⁷ Ayæ ate Wængongui cæcä beyænque mönö në miimö quëwëmö inte ayæ ongömö iñömö mönö tömënäni tönö godongämæ boguimancodë æicæmöimpa. Boguimancodë æidique mönö Awënë öönædë inö wææ pöñongante mönö tömengä ingante bee tencæmöimpa. Inique cöwë Awënë weca quëwencæmöimpa. ¹⁸ Mänömaï beyæ, Mönö Awënë Codito incæ öönædë quëwente pö wææncæcäimpa, ante pönëninge wampo pönencædänimpa, ante

cædique minitö wacä ingä wacä ingä ædæmö apæneedäni.

5

¹ Nöwo mönitö tönifnamini ëñeedäni. Æönædö mänii baquii, ante minitö iminite ædö cæte yewæmonguimönii. ² Edæ mönö Awënë Itota nänö ponguionæ iñömö në awëmö ængä woyowotæ iñontobæ pö guicä bai iñontobæ baquinö angüënë, ante minitö tömëmini waa ëñëmönipa edæ. ³ Wadäni, Mönö piyænë cæte guifnenämaï quëwëmompa, ante nani tedeyedë ënengä iñontobæ wëñæ nantate wacä bai tömënäni adobai iñontobæ nani ömæ ewenguinö baquinö angüënë. Inique ædö cæte wodii winonguinänii.

⁴ Incæte minitö mönitö tönifnamini ëñeedäni. Mänionæ nani wæwente eönæ në awëmö ænongä pö guicä bai iñontobæ inque bayonte minitö wii wëmö iñömö quëwëmini inte guifnenämaï incæminimpa. ⁵ Minitö Wængongui wëñæmini imini inique ñäo iñömö tömämini quëwëmini iminipa. Mönö cöwë wentamö iñömö cædönäni bai wii imöimpa. ⁶ Mänömaï beyæ mönö wii wadäni mö ñönäni bai mongæimpa. Wæætë mönö ñäni ömæmöninque nämä wææ ante quëwëmö ingæimpa. ⁷ Edæ tömënäni në mönäni iñömö woyowotæ mönäni inänipa. Ayæ wadäni ti nämæ bedinque në quidi quidi dowænte inäni iñömö woyowotæ bete badänipa. ⁸ Incæte mönö ñäo iñömö cægömö inte nämä wææ ante quëwëmö ingæimpa. Tæineta wææ wëñate bai cædique Itota ingante mönö wede pönënö ante mönö waadete pönënö ante mönö entawente quëwengæimpa. Tæineta ocabogata wææ encate bai cædique mönö edæ, Wængongui ængä beyænque quëwencæmöimpa, ante pönënö ante mönö ewocate quëwengæimpa. ⁹ Edæ Wængongui nänö ængui bate piinguimämo ante tömengä, Wii wæwencæminimpa, ante mönö imonte apænte ængacäimpa. Wæætë mönö Awënë Itota beyæ

tömengä mönō imonte ængä beyænque quëwencæmōimpa. ¹⁰ Tömengä, Botō tönō quëwencæminimpa, ante mönō beyæ wængacäimpa. Inique miī imō incæ wænte imō incæ mönō cōwē tömengä weca quëwencæmōimpa. ¹¹ Mänōmaī beyæ mīnitō iñōmō do cæmīni bai gomonga cæedāni. Wampo pönencædānimpa, ante cædinque mīnitō wacā ingä wacā ingä ædæmō apænedinque, Æmæwo pægaimīni inte tæi piñænte cæedāni, ante odōmonte apæneedāni.

Mönō tönīñadāni inānite Pabodo nānō änō

¹² Nōwo mōnitō tönīñamīni ëñeedāni. Mīnitō imīnite iīmaī apænemōnipa. Mīnitō weca nē nangui odōmonte apænedāni iñōnānite mīnitō tömēnāni inānite waa acæminimpa, ämōnipa. Edæ Awënë Itota apænte nānō ænināni inte tömēnāni, Mīnitō iīmaī waa quëwēedāni, ante mīnitō imīnite nē aadāni inānipa. ¹³ Tömēnāni nāni cædō beyænque mīnitō tömēnāni inānite godōmenque nangui waa amīni inte waadete pōneedāni. Mīnitō wacā ingä wacā ingä piyænē cæte quëwēedāni.

¹⁴ Mōnitō tönīñamīni ëñeedāni. Mīnitō imīnite iīmaī ante ancaa ämōnipa. Wæntæye ināni inānite wææ ante apæneedāni. Guiñente ināni wampo pönencædānimpa, ante tömēnāni inānite ædæmō apæneedāni. Æmæ pōnēnāni tönō godongāmæ cæedāni. Wadāni tömānāni inānite mīnitō waadete ee cæedāni ämōnipa.

¹⁵ Æcāmenque ingante wadāni wēnæ wēnæ cædāni adinque mīnitō Baa ämīni beyænque mānināni wæætedō wæætē nāemæ wēnæ wēnæ cædāmaī incædānimpa. Wæætē wacā ingä wacā ingä cōwē waa cæcæmōnimpa, ante pōnēninque cæedāni. Ayæ wadāni tömānāni inānite adobai cæedāni.

¹⁶ Mīnitō cōwē watapæ tote quëwēedāni. ¹⁷ Wængongui ingante woyowotæ itædē apænete quëwēedāni. ¹⁸ Mini quëwenganca quiēmē bai ba incæte mīnitō cōwē Wængongui ingante waa ate

pōnēninque apæneedāni. Edæ Itota Codito nempo nē quëwēmīni inte māninō ante mīnitō beyæ ante Wængongui nānō änō impa.

¹⁹ Wængongui Önōwoca nānō cæinō adinque mīnitō tömengä ingante ædō cæte, Cædāmaī iē, ante wææ anguimīni. ²⁰ Wængongui beyæ nē apænedāni nāni apænedō ëñēninque mīnitō badete todāmaī quëwēedāni. ²¹ Wæætē wadāni nāni apænedō tömānō ante ëñēninque, Æbānō i, ante edonque ëñengæimpa, ante cædinque mīnitō, Nō nāni änō i, Babæ nāni änō i, ante pōnēninque do ëñencæminimpa. Waa änō impa, ante ëñēninque mīnitō māninō ante ö ænte bai quëwēedāni. ²² Quiēmē wēnæ wēnæ cæquīi, ante adinque mīnitō Baa ante gomō aedāni.

²³ Wængongui incæ nē piyænē cædongä inte pōnō cæcā beyænque ædæmō tæiyæ waemō entawēmīni incæminimpa. Awënë Itota mönō Codito tömengä nānō ponguinganca mīnitō iñōmō Wængongui pōnō cæcā ate mīnitō mīmō incæ önōwoca incæ baonga incæ wēnæ wēnæ cædāmaī incæminimpa. ²⁴ Wængongui nānō nē apænte ænimīni iñōmīnite tömengä mīnitō imīnite cōwē pōnēninque tömengä nānō änō bai ædæmō cæcæcäimpa.

Pabodo, Waa quëwencæminimpa, angampa

²⁵ Mōnitō tönīñamīni iñōmō ëñeedāni. Mīnitō mōnitō beyæ ante Wængongui ingante apæneedāni. ²⁶ Mīnitō pönencabo iñōmīnite mōnitō tömāmīni waa quëwencæminimpa, ante waadete pōnēninque ämōnipa. ²⁷ Edæ Awënë Itota ëñēñongä botō mīnitō imīnite wææ ante, Ii yewæmōinta adinque mīnitō mīni pönencabo iñōmīnite adocanque ingante ämīni tömānāni ëñēñōnāni tömengä adotaa adinque apænecä ëñencædānimpa, ämopa. ²⁸ Awënë Itota mönō Codito mīnitō imīnite waadete pōnō cæcæcäimpa, ante botō māninque ante yewæmōmopa.

2 Tetadönitenteidi inänite Pabodo cadota ante ayænta nänö yewæmongainta

*Pabodo, Waa quëwëedäni, ante
apcëncampa*

¹ Botö Pabodobo inömo imopa. Mönö töninada Tidibänö tönö Timoteo tönö godongämæ apænete ate yewæmömo aedäni. Tetadönica inömo quëwëmini inte Codito ingante godongämæ mini pönencabo inömini inte ëñëedäni. Minitö mönö Mæmpo Wængongui nempo ayæ mönö Awënë Itota Codito nempo quëwëmini iminipa. ² Mönö Mæmpo Wængongui tönö mönö Awënë Itota Codito waadete pönö cæda ate minitö gänë entawencæminimpa, ante yewæmömönipa.

*Itota Codito pongä ate Wængongui
apcente pancæcäimpa*

³ Mönitö töninamini ëñëedäni. Mini wede pönönö godömenque pæte bai impa, ante ayæ tömämöni wacä ingä wacä ingä mini waadete pönönö waa pönö pæte bai iminipa. Mänömaï beyæ mönitö minitö beyæ ante Wængongui ingante cöwë waa ate pönëningue apænequënëmöni imönipa. ⁴ Wadäni minitö iminite quiëmë togæwëningue wënæ wënæ cædäni caate wæmini incæ quiëmë beyæ wæwëmini incæ minitö wæntæye inämaï inte ee cæminipa. Mänömaï beyæ Wængongui ingante godongämæ nani pönencabo wayömö wayömö quëwëñönänite mönitö incæ mini cæinö ante waa adingue cöwë apænemönipa. Ayæ mini wede pönönö ante cöwë apænemönipa. ⁵ Mäninö ante beyæ Wængongui apænte nänö panguinö ante, Tömengä cöwë nö panguingänö angüënë, ante do ëñëmompä. Mänömaï beyæ minitö Wængongui Awënë Odeye nempo guicæte ante eyepæ waa pönö bacæminimpa. Minitö do mäninö Wængongui nempo

mini öönæde quëwenguinö beyæ wæwente quëwëminipa.

⁶ Wængongui në nö cædongä ingampa. Edæ wadäni minitö iminite wënæ wënæ cædäni ate wæwëmini inömini tömengä wæætë tömënanäni inänite wënæ wënæ cæcä ate wæwencædänimpa. ⁷ Ayæ minitö në wæwëmini inöminite pönö cædinque tömengä mönitö imönite adobai pönö cæcä ate tömämö mönö wæwënamäi baquimö imompä.

Mönö Awënë Itota tönö tömengä anquedoidi në tæi piñænte cædäni tönö öönæde ongonte pö gonga bæcote bai godongämæ wææñönänäni tömämö ayömö mänömaï bacæimpa. ⁸ Mönö Awënë Itota ingantedö ante mönö watapæ apænedö ante në ëñënamäi cædäni inömo, Wængongui æbänö ingaingä ingää, ante ëñënamäi inäni inönänite tömengä mäninäni inänite pante cæcæcäimpa. ⁹ Wængongui adodäni inänite päningue æmæwo wo ewencæcäimpa. Tömënanäni inömo Awënë Itota weca tömengä nänö tæi piñæmämo wæmö pönö nänö emönömö mäniñömö pö guidämaï incædänimpa, ante Wængongui wææ cæcæcäimpa. ¹⁰ Awënë Itota nänö ponguionæ Wængongui mänömaï cæcæcäimpa. Mänionæ Itota quinäni inömo në tæiyæ wæmö ewocate quëwënanäni inte tömengä ingante waa acædänimpa, ante poncæcäimpa. Ayæ tömengä në pönënanäni weca pönongante tömënanäni tömänäni, Tömengä waa pönö cæcä amönipa, ante watapæ ancædänimpa, ante cæcæte ante poncæcäimpa. Ayæ minitö adobai mönitö apænedö ante ëñëningue pönëmini inte tömengä quimini inömo mönitö tönö adobai cæcæminimpa, ante cæcæte ante poncæcäimpa.

¹¹ Mänömaï beyæ mönitö minitö beyæ ante woyowotæ itæde Wængongui ingante apænemönipa. Wængongui, Mini quëwenguinö ante quëwencæminimpa, ante minitö iminite apænte ængä iningue mönitö, Minitö eyepæ waa pönö bacæminimpa,

ante mönö Mæmpo Wængongui ingante apænemönipa. Minitö, Mönitö waa cæcæmönimpa, ante mini änö bai tömänö ante Wængongui nänö tæi piñæmämö inte iinque cæcæcäimpa, ante apænemönipa. Ayæ mini wede pönönö beyæ minitö cæquinö tömänö ante tömengä adobai iinque cæcæcäimpa. ¹² Mönö Awënë Itota pönö cæcä beyænque minitö waa pönö cæmini adinque wadäni tömengä emöwo ante waa ate apænecædänimpa. Ayæ tömengä mänömai cæcä beyænque wadäni, Minitö waa quëwëmini iminipa, ante minitö iminite waa acædänimpa. Mönö Mæmpo Wængongui tönö mönö Awënë Itota waadete pönö cæda bai mänömai bacæimpa, ante mönitö mäninö ante Wængongui ingante apænemönipa.

2

Mönö Awënë Itota nänö ponguionæ cëbänö baquii, ante

¹ Mönitö töninamini ëñeedäni. Mönö Awënë Itota Codito nänö ponguinö ante amönipa. Ayæ tömengä æbänö, Botö weca pöedäni, ante gæcä goquimö imompa, ante apænedinque minitö iminite iimäi amönipa. ² Minitö weca quëwënäni pancadäniya iñömö, Mönö Awënë nänö ponguionæ do batimpa, ante änäni ëñëninque minitö idiquibæ pönënamäi bacæminimpa, amönipa. Edæ mönitö Wængongui beyæ nê apænemöni inte möni apæneyedë incæ möni odömönte apæneyedë incæ möni yewæmointaa yewæmönedë incæ æyedëmë incæ apænemönipa, ante mäninäni iñömö mönitö imönitedö ante apænedinque, Pabodoidi mäninö ante apænedäni inäni, ante tededäni ëñëninque minitö guinente wädämai iedäni amönipa. ³ Æcämenque angä æbämë nänö änö ëñëninque minitö oda cæte godämai iedäni.

Edæ waodäni tæiyænäni Wængongui ingante Baa ante wadæ godäni ate wacä nê wiwa cæcä inte pongä acæimpa. Ayæ tömengä pongä ate mönö Awënë nänö ponguionæ

bacæimpa. Mäningä nê wiwa cædongä iñömö Wængongui æmæwo nänö nê wo ewengingä ingampa. ⁴ Æcämenque ingante, Wængongui ingampa, ante waodäni waa adinque ædæ wææninque apænedäni incæ ayæ quiëmë adinque, Wængongui impa, ante waa adinque apænedäni incæ mäningä nê wiwa cædongä iñömö wængonguïdi nani nê änönäni tömänäni inänite Baa äninque nämä ængö cæte bai cæcä inongampa. Wængongui oncö tæiyæ waëmö oncönë adocä pö guite tæ contadinque, Botö tömëmö wængonguïmo inömo imopa, angä ingampa.

⁵ Botö minitö weca quëwënedë mäninö ante minitö iminite apænetabopa. Wii ëñëminitawo. ⁶ Adocä nê wiwa cædongä iñömö Wængongui nänö äönæ mänionæque edonque pongä acædänimpa. Iinque quinö beyæ

ante mäningä ayæ pönämai ingää, ante minitö ñöwo do ëñëminipa. ⁷ Adocä awëmö nänö wiwa cæpämö incæ do ëñente cædäni inte waodäni tæiyænäni quiëmë wiwa i, ante do cædänipa. Incæte tömënäni inänite, Wiwa cædämai iedäni, ante nê wææ cædongä iñömö adodö ante godömenque wææ cæcä ingampa. Nê wææ cæcä ingante guiquënë wacä wæætë, Mäninganca idæwaa, äninque ö ængä wadæ gocæcäimpa. ⁸ Mäniñedë nê wiwa cædongä iñömö edonque pongä acædänimpa. Incæte

Awënë Itota pöninque tömengä nänö öo guëmämämö inte mäningä ingante wænongå wænguingä ingampa. Tömengä ñäo apäite emönongä inte pongä adinque nê wiwa cædongä guiquënë æmæwo wo ewente bacæcäimpa. ⁹ Wiwa cædongä ingante Tatäna nänö tæi piñæmämö inte da pönongä ponguingä ingampa. Tömengä nänö mä cæ bai quiëmë bamönengæ cæcä adinque waodäni, Æbänö cæcää, ante oda cæte gocædänimpa. ¹⁰ Ayæ quiëmë wënæ wënæ nänö cæpämö beyæ nê æmæwo wo ewente baquinäni iñömö

oda cæte godänipa. Edæ Wængongui

nawangä nänö angainö ante waadete pönenämaï iñönänite Wængonguï tömənäni inänite, Quëwencæminimpa, ante ædö cæte ænguingää. Mänömaï beyæ tömənäni æmæwo wo ewente bacædänimpa.

¹¹ Mänömaï beyæ, Tömənäni në wiwa cædongä wapiticæ nänö angainö ante pönencædänimpa, ante cædinque Wængonguï tæï piñænte cæcä beyænque tömənäni babæ ante pönente oda cædänipa. ¹² Edæ Wængonguï nawangä nänö angainö ante në pönenämaï ininäni inte wæætë, Mönö wentamö mongæmämo incæ waa impa, ante watapæ todinäni iñönänite Wængonguï mäninäni tömänäni inänite apænte ante pancæte ante mänömaï cæcampa.

Wængonguï, Quëwencæminimpa, ante në apænte cæninäni

¹³ Mönitö töninämini minitö mönö Awënë Itota nänö në waademini inte eñeedäni. Inguipoga badönämaï iñedë Wængonguï minitö iminite do, Quëwencæminimpa, ante apænte ængacäimpa, ante mönitö minitö beyæ ante tömengä ingante waa ate pönëninque cöwë apænequënëmöni imönipa. Tömengä iñömö, Botö Önöwoca pönö cæcä ate tæiyæ waëmö ewocamini inte minitö nawangä botö angainö ante pönëmini beyæ quëwencæminimpa, ante minitö iminite ængacäimpa. ¹⁴ Itota ingantedö ante mönitö watapæ apænedö beyæ Wængonguï, Quëwencæminimpa, ante minitö iminite apænte ængacäimpa. Tömengä, Awënë Itota Codito ñäö nänö emönö bai minitö adobai ñäö bai entawencæminimpa, ante cædinque minitö iminite apænte ængacäimpa.

¹⁵ Mönitö töninämini eñeedäni. Mänömaï beyæ tæï ongonte quëwëedäni. Edæ mönitö önöne inte tedemöni eñënimini incæ yewæmointa yewæmömöni cæminimpa, ante Wængonguï adinque eñënimini incæ minitö mönitö odömönte apænedinö ante ñimpo cædämaï quëwëedäni. ¹⁶ Mönö Mæmpo Wængonguï mönö imonte në waadecä inte pönö ædæmö

cæcä ate mönö, Tömengä weca cöwë quëwenguïmö imompa, ante pönëninque wampo pönëmö inte quëwëmompa. Ayæ, Waa bacæimpa, ante mönö pönëmompa. Inique tömengä tönö mönö Awënë Itota Codito, Iïmaï cæcædäimpa, ante ämönipa. ¹⁷ Tömëna ædæmö apænedä beyænque minitö wampo pönëninque tæï ongonte quëwencæminimpa. Ayæ tömëna cæda beyænque minitö æmæwo pægaimini inte tömäa mini waa cædö ante mini waa änö ante tæï piñænte cæcæminimpa.

3

Minitö mönitö beyæ ante Wængonguï ingante apæneedäni

¹ Adodeque ante iinque yewæmömönipa. Mönitö töninämini eñeedäni. Minitö mönitö beyæ ante Wængonguï ingante iïmaï apæneedäni. Mönitö wayömö wayömö gote möni apæneyömö mönö Awënë nänö angainö ante nanguï inäni quingæ eñencædänimpa, ante apæneedäni. Ayæ, Minitö bai wadäni adobai iï änö ante Wængonguï ingante waa ate pönëninque æncædänimpa, ante mäninö ante Wængonguï ingante apæneedäni. ² Wadäni në wënæ wënæ cædäni inte wiwa cædäni iñömö tömənäni mönitö imönite wënæ wënæ cædämaï, ante mänii beyæ ante minitö adobai Wængonguï ingante apæneedäni. Edæ wiï waodäni tömänäni pönënëni inänipa.

³ Incæte mönö Awënë cöwë ædæmö aacä inongä ingampa. Tömengä pönö cæcä ate minitö æmæwo pægaimini inte tæï piñænte cæcæminimpa. Ayæ, Tatäna minitö iminite wënæ wënæ cædämaï incæcäimpa, ante Wængonguï adobai aacä incæcäimpa. ⁴ Minitö iminite möni wææ änö ante eñëninque do cæmini incæ godömenque adodö cæminimpa, ante Wængonguï pönö cæcæcäimpa, ante mönitö do pönëmönipa. ⁵ Wængonguï nänö waadete pönënëni ante eñencæminimpa, ante mönö Awënë taadö eñente odömönte bai pönö odömöngä ate

mīnitō mīmōnē ēñencæminimpa. Itota Codito pōnō cæcā beyænque mīnitō wæntæye ināmaī inte ee cæcæminimpa.

Cæcæte ante mōnō cæquēnēnō

⁶ Mōnitō tōniñamīni ēñēedāni. Mōnitō mōnō Awēnē Itota Codito ēmōwo ante mīnitō imīnite wææ ämōnipa. Mōnō tōniñadāni pancadāniya wæntæye ināni adinque ayæ mōni odōmonte apænedō mīni ēñente æninō baī quēwēnāmaī ināni adinque mīnitō iñōmō mānināni tōmānāni inānite gomō aedāni.

⁷ Mōnitō cægaī baī mīnitō æbānō adobaī cæquēnēmīni imīnipa, ante edæ tōmēmīni do ēñēmīnipa. Mōnitō mīnitō weca quēwēñedē wæntæye ināmaī quēwentamōnipa. ⁸ Ayæ adobaī æcāmenque cænguī ante nāni pōnōni æninque mōnitō ōnonque ænāmaī inte wæætē paga cæte cæntamōnipa. Ayæ, Mīnitō cænguinque ante pōnēninque wædāmaī incæminimpa, ante mōnitō, Tōmēmōni cænguī cæncæmōnipa, ante woyowotæ itædē nanguī cædinque quēwentamōnipa. ⁹ Mōnitō mīnitō imīnite, Mōni quēwengæimpa, ante, Cænguī tōnō mōnitō owoquincō pōnōmīni æncæmōnipa, ante ānāmaī intamōnipa. Mōnitō mānōmaī ante baī waa incædōnipa. Wæætē æbānō mōnitō cætāmōnii, ante adinque mīnitō adobaī cæcæminimpa, ante cætāmōnipa. ¹⁰ Edæ mōni mīnitō weca quēwēñedē incæ mōnitō mīnitō imīnite, Īmaī cæedāni, ante wææ antamōnipa. Adocanque nē mōnō cæquēnēnō ante, Wīi cæinēmo, angā iñongante mīnitō tōmengā ingante cænguī godōnāmaī inguēnēmīni imīnipa.

¹¹ Mīnitō weca pancadāniya ōnonque cædāmaī a ongonte quēwēnāni inānipa, ante ānāni ēñēmōnipa. Adodāni nē Baa āninque cædāmaī ināni inte wæætē, Wadāni æbānō quēwēnāni, ante godō wæntæ godō wæntæ tededāni inānipa. ¹² Mōnitō mānināni inānite mōnō Awēnē Itota Codito ēmōwo āninque, Mīnitō iimō iñō iimō iñō nanguī cæte

quēwēedāni, ante wææ ämōnipa. Tōmēmīni cæte beyænque mīnitō cænguī ænte cæncæminimpa, ante ancaa apænemōni imōnipa.

¹³ Mōnitō tōniñamīni mīnitō guiquēnē, Quiēmē waa impa, ante wæntædāmaī inte cōwē cæedāni. ¹⁴ Mōnitō mīnitō imīnite iī yewæmōintaa mōni yewæmongainō ate adocanque ēñēnāmaī cæcā ininque, Tōmengā æcānō ingāā, ante aedāni. Ayæ tōmengā guingo imonte wæcæcāimpa, ante tōmengā ingante gomō aedāni. ¹⁵ Mīnitō adocā ingante, Wīi wacā ingampa, ante pōnēninque wæætē tōmēmīni biwīdi inānite ante baī tōmengā ingante wææ ämīni ēñencæcāimpa.

Waa quēwencæminimpa, ante Pabodo angampa

¹⁶ Mōnō Awēnē Itota nē piyænē cædongā incæ tōmengā pōnō cæcā ate mīnitō æbāmenque bamīni incæ cōwē piyænē cæte quēwencæminimpa. Mōnō Awēnē mīnitō tōmāmīni weca a ongoncæcāimpa, ämopa. ¹⁷ Botō Pabodobo ñōwo tōmēmo ōnompoca yewæmōninque, Mīnitō imīnite waa pōnēmopa, ante yewæmōmo aedāni. Pabodo nānō yewæmōinta impa, ante ēñencæminimpa, ante cædinque botō tōmanta yewæmōninque mānōmaī baī yewæmōmopa. ¹⁸ Mōnō Awēnē Itota Codito mīnitō imīnite waadete pōnō cæcæcāimpa, ante botō māninque ante yewæmōmopa.

1 Tímoteo ingante Pabodo cadota ante tãnota nãno yewæmongainta

Tímoteo ingante Pabodo yewæmongainta

¹ Botö Pabodobo inömo imopa. Itota Codito nãno në da godongaimo imopa. Itota Codito waa pöni nãno inö bai mönö adobai bacæmöimpa, ante pönëmompaa. Inique Itota Codito mönö në pönëngã tönö Wængongui mönö imonte në Ængaingã tönö botö imote ana eññömote da godöna godimo imopa. ² Tímoteo eñemi, Bitö acæbiimpa, ante bitö imite yewæmömopaa. Edæ mönö wede pönëno ante apænebo në eñëniimi inte bitö Itota Codito quimi badinque nãwã botö wëmi bai inömi imipa. Inique botö, Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämopaa.

Wadani wapiticæ nãni odömönte apænedö

³ Botö Mäatedöniabæ inömo pöninque bitö imite, Epeto inömo ee ongöe, nangui antabopaa. Mäniñömö wadani babæ wapiticæ nãni odömönte apænedö ante në odömönte apænedönãni inãnite bitö, Minitö godömenque mäninö ante odömönte apænedãmai iedãni, ante ämi eñencædänimpa. Mänömainö ante do botö äninö bai ñowo adodö ante bitö imite ämopaa. ⁴ Ayæ, Dodãni önonque ante nãni tedegainö ante pönënamai quëwëedãni, ante bitö ancæbiimpa. Ayæ adobai tömënanï wæmæidi tæiyænãni ante pönëninque, Æmönãnidö ingainãni, ante ancaa anewëñönãni bitö tömënanï inãnite, Minitö mäninö ante pönënamai iedãni, ancæbiimpa. Edæ mäninö nãni tedewëno beyæ tömënanï, Æbãno i, ante nangui wæætedö wææte anewënanïpa töö. Wææte edæ, Wængongui nãno

cædö ante wede pönëninque mönö cæquënëno guiquënë tömënanï nãni tedewëno beyæ pönömenque cætimpa.

⁵ Mänömainö ante äninque botö, Tömënanï mimö iimai entawëninque waadete pönencædänimpa, ante ämopaa. Edæ mimö wæmö pöni entawëninque tömënanï Wængongui waadete pönencædänimpa. Ayæ adobai nãma apænte adinque wentamö mongænãmai entawënanï inte tömënanï waadete pönencædänimpa.

⁶ Inæmpa pancadãniya mäninö ante eñëninque Baa ante ñimpo cæte wadæ godinque önonque ante quëwënanïpa. ⁷ Möitee wodi nãno wææ yewæmongainö ante odömönte apæneinëmönïpa, ante në änanï incæ tömënanï nãni odömönte apæneyedë quinö apænedãni, ante eñënamai inãnipa töö. Adobai quiëmë ante apænedinque tömënanï, iimai impa, iimai impa, ante apænedãni incæte eñënamai inãni inte apænedänïpa.

⁸ Möitee wodi nãno wææ yewæmongainö ante adinque nöngã cæmö inique mäninö tömengã nãno wææ angainö inömo waa ante imaimpa, ante do eñëmompaa. ⁹ Möitee wodi nãno wææ yewæmongainö ante Wængongui wii në nö cædãni beyæ pönö wææ angacäimpa. Wææte në eñënamai cædãni tönö wadani mäninö ante eñënanï incæ në godömenque wënæ wënæ cædãni tönö tömënanï beyæ pönö wææ angacäimpa, ante do eñëmompaa. Ayæ adobai Wængongui ingante Baa ante në quëwënanï tönö wënæ wënæ cædãni beyæ wææ angatimpa. Në tæiyæ wæmö entawënamai inönãni beyæ ayæ adobai Wængongui ingante në badete todönãni beyæ wææ angatimpa. Mæmpocã ingante wäänã inante në wænönãni beyæ ayæ adobai waocã ingante në piinte wænönãni beyæ wææ angatimpa. ¹⁰ Nãnoögængã inãmai inöngante në towënanï beyæ ayæ adobai onguiñænãni nãna onguiñæncaya guëa towënanï beyæ wææ angatimpa. Në cæte quëwëngã

bacæcäimpa, ante waocä ingante nē godonte ænāni beyæ ayæ adobaī nē babæ änāni beyæ wææ angatimpa. Wadāni inānite, Nō ämönipa eññedāni, ante nē babæ anewēnāni beyæ ayæ adobaī nō odōmonte apænedō incæ nē wadō ante cædāni beyæ wææ angatimpa. Mānināni tōmānāni eññencædānimpā, ante Wængonguī māninō ante pönō wææ angacäimpa, ante eññemompā.

¹¹ Edæ Wængonguī nāō apāite emongampa, ante odōmonte apænecebiimpā, ante tōmengä nē waa inongä inte edæ tōmengä watapæ nānō apænedō ante pönongä æntabopā. Ayæ nō nānō odōmonte apænedō ante Wængonguī nānō pönō angainō ante adodō änō impā.

Wængonguī waadete nānō pönō cædō ante

¹² Itota Codito mönō Awēnē pönō cæcä beyænque botō tæī ewocabo batapopā. Tōmengä iññömō botō imote waa adinque, Bitō nē pönēmi inte cōwē ædæmō cæbi imipā. Ininque bitō botō beyæ wadāni inānite nē cæbi bacæbiimpā, ante pönō cægacäimpa. Mänōmai beyæ botō tōmengä ingante waa ate pönente apænebopā. ¹³ Botō wēenēñedē Itota Codito ingante nē godō babæ ante anewengäimo imopā. Tōmengä ingante nē pönēnāni inānite wēnæ wēnæ cæquīmo, ante nē togænōmo inte botō nē piinte quēwengäimo imopā. Incæte botō nē pönēnāmai inōmo inte, Quinō cæquī, ante eññenāmai inte cæbo adinque Wængonguī, Quēwencæbiimpā, ante pönō waadete waa cægacäimpa. ¹⁴ Mönō Awēnē botō imo nangui waadete pönō cæcä adinque botō Itota Codito nempo quēwēninque nē wede pönēmo badinque nē waadete pönēmo bagaboimpā.

¹⁵ Iīmai ante nō pönī nāni änō nāwangä ante impā, ante ämo eññemāiminipā. Itota Codito iññömō, Wēnæ wēnæ cæmīni imīnite æmo beyænque quēwenguimīni, ante ingui-poga wææ pongacäimpa. Tōmengä

mänōmai cæcä incæte wadāni wēnæ wēnæ cædāni iññōnāni botō tōmēmoque godōmenque wēnæ wēnæ nē cægäimo imopā. ¹⁶ Mänōmai beyænque tōmēmoque godōmenque wēnæ wēnæ cægäimo iññōmote Itota Codito pönō waadete angä beyænque quēwengaboimpā. Wēenēñedē botō bai nē wēnæ wēnæ cægäināni inānite adinque Itota Codito, Botō weca cōwē wantæpiyæ nāni quēwenguinque pancadāniya botō imote pönenguināni inānipā, ante do eññengacäimpa. Ininque tōmengä, Botō nē waadete cædinque ee abo imopā, ante tōmēnāni inānite odōmoncæte ante cædinque tōmengä botō Pabodobo imote mänōmai pönō waadete waa cægacäimpa.

¹⁷ Mönō Wængonguī iññömō cōwē wænāmai nē quēwengäingä inongä inte tōmengä iincayæ ate adobaī cōwē wænāmai inte Awēnē Odeye inongä ingampa. Tōmengä awēmō iññömō quēwēnongä iññongante mönō wao-cabo tōmengä ingante ædō cæte aquī. Tōmengä wæætē tōmää nē eññengäingä inongä ingampa. Ininque tōmengä adocanque Wængonguī inongä iññongante mönō tōmengä ingante cōwē waa aquimō anguēnē. Tōmengä ingante, Bitō nāō bai emōmi inōmi imipā, ante apænedinque mönō ñine cædāmai inte cōwē watapæ angæimpā. Cōwē iīmai babaimpā, ante Amēē, ämopā.

¹⁸ Tímoteo, botō wēmi eññēmi. Nē pönēnāni wēenēñedē Wængonguī beyæ apænedinque bitō imitedō ante nāni angainō bai adobainō ante apænedinque botō iīmai ämopā. Edæ tōmēnāni nāni angainō ante eññente cædinque bitō tontadoidi nāni cæbai adobaī bitō cæquēnēnō ante guññenāmai inte wæætē tæī ewocate nangui cæcæbiimpā. ¹⁹ Wængonguī ingante cōwē wede pönente incæbiimpā. Adobaī mīmō entawēmi inte nāmā apænte pönēninque wentamō mongænāmai inte bitō cōwē quēwencæbiimpā. Edæ mīni pönencabo iññōmīnite pancadāniya nāmā apænte änāmai ināni inte Codito ingante nāni pönēninō ante

dobæ ñimpo cæte wadæ godänimpa.
 20 Ìimëneo tönö Adecantodo adobai
 Wængongui ingante ñimpo cædinque
 wadæ godatapa. Ìinque, Tömëna,
 Wængongui ingante mönö wënæ
 wënæ ante babæ änämaï ingæimpa,
 ante eñencædaimpa, ante cædinque
 tömëna inate Tatäna nempo pædæ
 godontabopa.

2

Wængongui ingante mönö ïmaï apæneccæimpa

1 Mïni pönencabo ïñömïnite botö
 täno ïmaï ämopa. Wængongui in-
 gante mïni apæneyedë quiëmë
 mïni æïnenö ante apæneccæmïnimpa.
 Tömengä ingante waa ate pönente
 apænedinque waodäni tömänäni
 beyæ ante apæneccæmïnimpa ämopa.

2 Awënë odeyeyidi incæ pönömenque
 awënëidi tömänäni incæ mönö ïmonte
 waa aayönäni mönö piyænë cæte
 quëwengæimpa, ante cædinque mïnitö
 tömënanï beyæ ante Wængongui
 ingante apæneccæmïnimpa. Edæ

Wængongui ingante mönö cæquënënö
 ante ayæ waodäni inänite mönö
 cæquënënö ante mönö waa cæte
 quëwencæmöimpa, ante Wængongui
 ingante awënëidi beyæ ante
 apæneccæmïnimpa. 3 Mänömainö

ante mönö apænedö ïñömö waa
 impa. Wængongui mönö ïmonte
 në Ængäingä ïnongä inte mäninö
 mönö apænedö ante waa acampa.

4 Waodäni tömänäni näwangä botö
 angainö ante eñencædänimpa, ante
 Wængongui pönö ængä beyænque
 quëwencædänimpa, ante në waa
 cæïnenongä ingampa.

5 Edæ adocanque Wængongui
 ïnongä ingacäimpa. Tömengä waodäni
 inänite adinque, Wadäni bai inänipa,
 ante nänënë quëwengacäimpa. Ìinque
 Itota Codito në Waocä eñagaingä
 inte tæcæguedë adocanque në
 pongä inte, Waodäni Wængongui
 guidënanï badinque adoyömö bee
 tente godongämæ quëwencædänimpa,
 ante pönö cægacäimpa. 6 Tömengä

ïñömö mönö ïmonte ante godonte
 æncæte ante cædinque nämä wepæ
 incæ godoncæte ante në pongä
 ingacäimpa. Wængongui, Ìionæ, ante
 nänö angaiönæ incæ ïinque bayonte
 mäninö Codito nänö cægainö ante,
 Nö impa, ante tömänäni inänite në
 odömongä ingacäimpa. 7 Mäninö
 ante bitö në apænebi bacæbiimpa,
 ante Wængongui botö ïmote angä
 eñëninque botö tömengä nänö në
 da godömo batatabopa, ante näwangä
 ämopa. Edæ babæ änämaï ïmopa.
 Ayæ näwangä mönö pönënö ante
 Wængongui, Wadäni oodeoidi inämaï
 inäni adobai pönencædänimpa, ante
 cædinque botö ïmote angä eñëninque
 botö tömengä nänö në odömonte
 apænedömo ïmopa.

8 Wayömö wayömö godongämæ
 mïni pönencabo ongonte mïnitö
 onguiñæmïni ïñömö në pïinämaï ïmïni
 inte Wængongui ingante apænemïni
 adinque botö waa tobaïmopa. Wadäni
 inänite në pïinte wæætedö wææte
 änämaï inte wææte tæiyæ waëmö
 entawëmïni inte Wængongui ingante
 pædæ æmpote apæneccæmïnimpa,
 ante ainëmopa.

9 Ayæ onquiyæmïni ïñömö
 waëmö weocoo mongæmïni incæte
 mïnitö, Botö waëmö weocoo
 mongæmo adinque wadäni botö
 ïmote waa acædänimpa, ante änämaï
 inte nämä baö ante guïñëñate
 pönëninque weocoo ædæmö wëñate
 mongæncæmïnimpa. Mïnitö ocagui
 que que cæmïni incæte oodo
 badöi tönö pededamö nänï ämö
 wente cædämaï incæmïnimpa.

Waëmoncoo nänï nanguï godonte
 ænincoo nänï waa acoo ante
 mïnitö mongænämaï incæmïnimpa.

10 Wææte edæ Wængongui ingante,
 Bitö Wængongui Awënë imidö an-
 guënë, ante në watapæ apænemïni
 ïmïni ïinque mïnitö mïni apæneï
 bai cædinque mïni waa cæquënënö
 ante pönencæmïnimpa. Mänömainö
 ante pönente quëwencæmïnimpa,
 ante adobai ainëmopa. 11 Wadäni
 apæneyönäni mïnitö onquiyæmïni

tededāmaī inte ēamonca ongonte ēñencæminimpa. Ayæ nē ämöni möni änö ante ēñeninqe wadö pönenämaī inte do ēñente cæcæminimpa, ämopa.

¹² Godongämæ mīni pönencabo weca ongonte mīnitö onquiyæmīni iñömö odömonte apænedāmaī incæminimpa, ante botö wææ ämopa. Ayæ adobaī onguīñæmīni imīnite onquiyæmīni iñömö, İmaī cæedāni, ante änāmaī incæminimpa, ante wææ ämopa. Wæætē tededāmaī ēñencæminimpa. ¹³ Wængonguī edæ onguīñængä Adäö ingante täno badöninge ayæ onquiyængä Eba ingante badongacäimpa. ¹⁴ Ayæ Tatāna wīi Adäö ingante wapiticæ mäocä oda cægacäi. Wæætē Eba ingante æpiticæmē mäocä oda cædinque do wænæ wænæ cæcä bagacäimpa. ¹⁵ Incæte onquiyænāni Wængonguī ingante godömenque pönëninge cöwë waadete pönënanī inönāni inte nē nö pönente tæiyæ waëmö entawënāni ininque tömënāni wëñænāni inänite mäñönānite Wængonguī wææ aacä beyænque quëwencædänimpa, ämopa.

3

Godongämæ mönö pönencabo iñömonte nē aadāni

¹ İmaī ante nāni änö nö pönī ante impa. Godongämæ mönö pönencabo iñömonte, Aacæboimpa, ante nē angä iñömö tömengä waa cæquīnö ante pönö cæinengä ingampa. ² Incæte wadāni, Wænæ wænæ cæcä ingampa, ante änāmaī incædänimpa, ante cædinque nē aacä wæætē waa quëwenguënegä ingampa. Edæ tömengä nänöogænä adodanque nē manguiwengä incæcäimpa. Tömengä töö pönente nö quëwengä incæcäimpa. Nöinö cæcæimpa, ante pönëninge nāmā wææ ante nē cæcä incæcäimpa. Waodāni botö imote waa acædänimpa, ante cædinque waa quëwencæcäimpa. Waodāni inänite, Botö oncönē pö cæedāni, ante cöwë nē watapæ angä incæcäimpa. Ayæ tömengä nē waa odömonte apæncä incæcäimpa.

³ Nē aacä ti nāmæ bete beyæ quidi quidi dowænāmaī quëwenguënegä ingampa. Wacä ingä do piinte cædāmaī inongä inte wæætē ædæmö cæcä inte quëwencæcäimpa. Tömengä piyænē cæcä incæcäimpa. Tömengä godonte nāni æinta ante waadete pönente wædāmaī incæcäimpa ämopa.

⁴ Nē aacä tönö godongämæ quëwënāni inänite tömengä waa aaquënegä ingampa. Tömengä wëñænāni inänite ædæmö aacä beyæ tömënāni wæætē tömengä ingante waa adinque tömengä nänö änö ante ēñente cæte quëwencædänimpa. ⁵ Edæ nē aacä tönö godongämæ quëwënāni inänite tömengä wīi waa aacä ininque Codito ingante godongämæ mönö pönencabo iñömonte ædö cæte waa aacä inguingä.

⁶ Itota Codito ingante ñöwo tæcæ pönëningä wīi nē aacä baquënegä ingampa. Edæ mänömaī inongä iñongante mīnitö, Nē aabi imipa, ämīni ininque tömengä nāmā incæ, Adoboque waa cæbo imopa, ante pönengä imaingampa. Wænæ awënē mänömaī pönengä beyænque Wængonguī tömengä ingante apænte nänö panguinö bai nē aacä ingante adobaī apænte pämaingampa. ⁷ Ayæ adobaī Itota Codito ingante nē pönënëmaī ināni nē aacä ingante adinque, Tömengä nē waa cæcä ingampa, ante acædänimpa, ante cædinque tömengä waa quëwenguënegä ingampa. Tömengä waa cædāmaī ingä adinque tömënāni wæætē, Tömengä wænæ wænæ cæcä ingampa, ante pīimainānīpa. Tömengä waa cædāmaī ingä pīināni ininque wænæ awënē iñömö, Tömengä oda cæcæcäimpa, ante godö cæcä ate tömengä do wænæ wænæ cæcä babaingampa.

Mönö pönencabo tönö godongämæ nē cædāni

⁸ Mönö pönencabo tönö godongämæ nē cædāni iñömö adobaī, Mönö eyepæ cæte quëwëmö ininque wadāni mönö imonte waa acædänimpa, ante cædinque waa quëwenguënenāni

inānīpa. Nē cædāni nāmā nāni ānō bai ante nō cæcædānīmpa. Tömēnāni yowepæ wædænque tī nāmæ biinōmæ nāni āmæ wīi nangūi becædānīmpa. Babæ cæmōni incæte godonte nāni æinta cōwē godōmenque æncæmōnīmpa, ante wadāni nāni pōnēwēnonque ante iināni wæætē mǎnīnō ante pōnēnāmaī incædānīmpa. ⁹ Edæ nāmā apænte pōnēnīnque wentamō mongænāmaī entawēnāni inte tōmēnāni Wængongūi nānō wē wodonte angainō ante tæcæ ēñēnīnque tōmēnāni, Nō pōni mōnō pōnēnō impa, ante cōwē wede pōnenguēnēnāni inānīpa. ¹⁰ Ayæ mǎnīnāni inānite mīnitō, Quīnō cæmīni imīni, ante ēñencæte ante cōwā acæmīnīmpa. Ayōmīni tōmēnāni cōwē waa cæte quēwēnāni adīnque mīnitō wæætē tōmēnāni inānite, Mīnitō mōnō pōnencabo tōnō godongāmæ nē cæmīni bacæmīnīmpa, ante āmīni bacædānīmpa.

¹¹ Tömēnāni nānōogæidi inānite wadāni waa acædānīmpa, ante cædīnque adobai eyepæ cæte waa quēwenguēnēnāni inānīpa. Mǎnīnāni iñōmō wadāni inānitedō ante babæ ānāmaī incædānīmpa. Wæætē adodāni cōwē tōō pōnente nō quēwēnāni incædānīmpa. Tömēnāni cōwē pōnēnīnque, iīmaī cæcæmōnīmpa, ante nāni ānīnō bai ædæmō cæcædānīmpa. ¹² Mōnō pōnencabo tōnō godongāmæ nē cæcā iñōmō tōmengā nānōogænā adodanque nē mangūiwengā incæcāīmpa. Tōmengā wēñænāni inānite ayæ tōmengā tōnō godongāmæ quēwēnāni inānite tōmengā nē waa aaquēnengā ingampa. ¹³ Mōnō pōnencabo tōnō godongāmæ nē cædāni iñōmō, Nē waa cædīnāni inānīpa, ante adīnque mōnō tōmēnāni inānite waa āmōmpa. Ayæ mǎnōmaī waa cædīnāni inte mǎnīnāni, Itota Codito ingante pōnēedāni, ante guīñēnāmaī apænecædānīmpa.

Wē wodonte nāni angainō edonque pōni batīmpa, ante

¹⁴ Quingæ bitō weca acæponcæboīmpæ ante pōnēmo incæte botō, iīmaī cæe,

ante bitō imite yewæmōmōpa. ¹⁵ Botō wæætē wīi quingæ pōmo inīnque bitō, Mōnō Wængongūi tōnō godongāmæ quēwencabo iñōmō inte mōnō æbānō cæquīi, ante bitō ēñencæbiīmpa, ante yewæmōmōpa. Edæ Wængongūi nē Quēwengāingā quīmō iñōmō inte mōnō Codito ingante godongāmæ mōnō pōnencabo iñōmō mōnō cobacadewæ tæi ongō bai tōmengā nō nānō angainō ante iīmpo cædāmaī inte wæætē wææ cæmō imōmpa. ¹⁶ iīmaī ante nō pōni impa. Wængongūi ayongā mōnō æbānō waa cæte quēwenguīi, ante Wængongūi wē wodonte nō nānō angainō incæ iñōmō edonque pōni mōnō ēñēnō iñōmō waa pōni impa. iīmaī impa.

Wængongūi inguipoga iñōmō ponte ēñadīnque Waocā bacā agadānīmpa.

Tōmengā ingantedō ante Wængongūi Onōwoca, Māningā waēmō quēwēnongā ingampa, angacāīmpa.

Tōmengā ingante Wængongūi anquedoidi do agadānīmpa.

Wabæca wabæca nāni quēwencabo inānite Itota nānō cægāinō ante apænecatīmpa.

Tōmāmæ quēwēnāni pancadāniya tōmengā ingante pōnente bagadānīmpa.

Ayæ tōmengā iñāō bai emōnīnque oñnædē iñōmō ocæ emænte gogacāīmpa.

Mānōmāinō ante nāni āmotamīni ānō bai impa.

4

Nē pōnēnāni pancadāniya wadæ goquīnāni inānīpa, ante

¹ Wængongūi Onōwoca iīmaī ante edonque pōni apænecampa. iīnque iñōnæidi bayonte Codito ingante nē pōnēnāni incæ pancadāniya iīmpo cæte tōmengā ingante pōnēnāmaī bacædānīmpa. iīnque onōwocaidi incæ nē, Wapiticæ oda cæcædānīmpa, ante nē wēnæ wēnæ cædōnāni mīñæ wēnæidi nāni odōmonte apænewēnō

ēñente cæquināni inānīpa. ² Nē babæ ānāni nē wadō tedete wadō cædāni iñōmō tōmēnāni mānīnō wēnæidi nāni odōmonte apænewēnō ante nē odōmonte apænedāni inānīpa. Iñāni guiquēnē tōmēnāni nāmā nāni apænte pōnēnō ante ōmætawēnāni inte wēnæ wēnæ nāni cædinō ante wædāmaī quēwēnānīpa. ³ Mānīnāni iñōmō waodāni inānite wææ ānīnque, Mīnitō, Botō nānōogængā, ante onquiyængā ingante mōnāmaī iedāni, ānānīpa. Ayæ adobāi mōnō waa cænguī adīnque pancaā ante, Cænāmaī iedāni, ante wææ ānānīpa. Iñæmpa Wængonguī edæ tōmāā cænguī badongacāīmpa. Tōmengā, Botō imote waa ate pōnente apænedīnque nē pōnēnāni iñōmō botō nō angainō ante ēñēnōnāni inte cænguī ænte cæncædānīmpa, angampa.

⁴ Edæ Wængonguī nānō badongaincoo tōmancoo waa pōnī i iñonte mōnō Wængonguī ingante waa ate pōnente apænedīnque tōmāā cænguī æmō īnīnque pancaā ante ædō cæte Baa ante ænāmaī inguīī. ⁵ Iñæmpa Wængonguī nānō angainō beyænque ayæ tōmengā ingante waa ate pōnente apænemō beyænque tōmāā cænguī iñōmō tæiyæ waēmō cænguī bapa.

Itota Codito ingante nē waa cæcā

⁶ Bitō godongāmæ mīni pōnencabo iñōmīnite bitō mānīnō botō ānō ēñēnīnque bitō tōnīñadāni inānite wæætē odōmōmi īnīnque Itota Codito beyæ nē waa cæquīmi incæbiīmpa. Ayæ Wængonguī nānō angainō ante mōnō pōnēnō ante ēñente quēwēnīnque bitō waa mōnō odōmonte apænedō ante nē ēñente cædīmi inte edæ tōmo cænte baī nē nō cæbi incæbiīmpa.

⁷ Babæidi baī nē tedewēnāni inānite ēñēnāmaī inte bitō onquiyænāni picænāni incæ ōnonquedō ante nāni tedewēnīnō ante ēñēnāmaī incæbiīmpa. Wæætē, Wængonguī ayongā mōnō waa cæte quēwēncæte ante cædinque bitō iñōmō tæī ēwocabo badīnque cæcæboīmpa, ante godōmenque godōmenque

cæcæbiīmpa. ⁸ Mōnō baō tææmō bacæīmpa, ante cædinque mōnō ñīmpo cædāmaī inte adodō adodō cæmōmpa. Mānīnonque ante mōnō cædō guiquēnē wædænque waa īmpa. Wæætē Wængonguī ayongā mōnō waa cæte quēwēnīnque mōnō ñōwoyedē waa quēwēnīnque adobāi īncayæ ate waa quēwēnguīmō incæmōīmpa. Iñīnque mānīnō ante mōnō cæquinō iñōmō tōmāā beyæ nō waa pōnī i īnīnque, Mōnō tæī ēwocāquīmō, ante cædinque mōnō ñīmpo cædāmaī inte adodō adodō cæcæīmpa.

⁹ Mānōmaīnō ante nō pōnī nāni ānō nāwangā ante īmpa, ante āmo ēñēmaīmīnīpa. ¹⁰ Mānōmaī beyæ tæī piñænīnque nangūī cæmō īmōmpa. Edæ, Wængonguī nē Quēwēngāngā beyænque mōnō watapæ quēwēngæīmpa, ante pōnēngāīmō īmōmpa. Tōmengā iñōmō mōnō waocabo tōmāmō īmonte, Quēwēnguīmīni, ante nē Œngāngā incæ tōmengā ingante nē pōnēmō iñōmonte nō ængā beyænque mōnō quēwēngæīmpa.

¹¹ Mānīnō botō ānō ante bitō tōmēnāni inānite, Iīmaī cædāni, ante odōmonte apæncæcæbiīmpa, āmōpa. ¹² Bitō wīī picæmi incæte æcāmenque iñongante bitō, Botō imote piīnte adāmaī incæcāīmpa, ante pōnente quēwēncæcæbiīmpa. Wæætē edæ bitō Wængonguī ingante nē pōnēnāni beyæ ante, Botō cæbaī tōmēnāni adobāi cæcædānīmpa, ante iīmaī cæcæbiīmpa. Apænebi incæ waa cæte quēwēmi incæ waadete pōnēmi incæ wede pōnēmi īmi incæ nō pōnente waa cæbi incæ bitō, Botō baī bacædānīmpa, ante cædinque bitō cædō ante odōmōmi adīnque tōmēnāni adobāi cæcædānīmpa. ¹³ Botō pōnāmaī īngūngāncā bitō ongōñōmō iñōmō Wængonguī angā ēñente nāni yewæmongainō adīnque adodō ante ædæmō apænebi ēñencædānīmpa. Ayæ Wængonguī ingantedō ante apænebi inte odōmonte apænebi ēñencædānīmpa.

Mäninonque cæte ongoncæbiimpa. ¹⁴ Mini pönencabo iñöminite në aadani nani Picæncabo iñömö bitonga gampo cædinque Wængongui beyæ apænedinque bitö imite, Bitö në aabi badinque në odömonte apænebi bacæbiimpa, ante pönö apænedänitapa. İninque bitö do në aabi badinque në odömonte apænebi bagaimi inte godömenque godömenque cæcæbiimpa.

¹⁵ Edæ waodani tömänäni bitö æbänö godömenque waa cæbi imi adinque eñencædänimpa, ante cædinque bitö mäninonque ante pönëninque godömenque godömenque cæcæbiimpa. ¹⁶ Bitö quëwënö ante, Æbänö quëwëmoo, ante nämä wææ aacæbiimpa. Ayæ bitö odömonte apænedö ante, Botö nö pönëninque odömonte apænecæboimpa, ante wææ cæcæbiimpa. Edæ mänömaï cæte wæntædämaï inte cöwë cæcæbiimpa. Bitö mänömaï cæbi ininque tömëmi nämä incæ wantæpiyæ quëwencæbiimpa. Bitö odömonte apæneyömi në eñënëni iñömö adobaï bitö cædö beyænque wantæpiyæ quëwencædänimpa.

5

Në pönënëni inänite æbänö cæcæbiimpa, ante

¹ Onguiñængä picængä wënæ wënæ cæcä incæte tömengä ingante piinte änämaï incæbiimpa. Wæætë tömëmi mæmpocä ingante ante bai tömengä ingante waadete ämi eñencæcäimpa. Edëninäni iñömö tömëmi biwïidi inänite ante bai tömënëni inänite waadete ämi eñencædänimpa. ² Onquiyænäni picænäni iñömö tömëmi wäänä inante ante bai bitö tömënëni inänite adobaï waadete ämi eñencædänimpa. Ayæ baquedäni iñömö tömëmi biwinqueidi inänite ante bai tömënëni inänite waëmö mïmönë waadete ancæbiimpa.

³ Owæmpoinäni në näwangä ömæpodäni inte quëwënanipa, ante tömënëni inänite waa adinque pönö cæcæbiimpa. ⁴ Incæte owæmpoingä

wëñænäni næængä ininque nänömoidi næængä ininque mäninäni wæætë tömengä beyæ cæquënënanipa. Edæ mäninäni täno tömënëni tönö godongämæ quëwënëni inänite waa adinque næëmæ nani cæquënëno ante, Æbänö cæquïi, ante eñente cæcædänimpa. Mänömaï cædinque tömënëni mæmpoidi tönö mæmæidi tömënëni inänite waadete nani cædi bai iñäni adobaï mæmpoidi tönö mæmæidi inänite næëmæ waadete cæcædänimpa. Edæ mänömaï cædäni adinque Wængongui waa acæcäimpa. ⁵ Në nö ömæpocä inongä inte adodanque quëwengä ininque tömengä në owæmpoingä inongä inte Wængongui beyænque watapæ quëwengæimpa, ante pönengä ingampa. Itæde incæ woyowotæ incæ tömengä ñimpo cædämaï inte, Botö beyæ cæquïmi, ante Wængongui ingante apænete quëwengampa. ⁶ Wæætë owæmpoingä tote quëwengæimpa, ante nämäncæ pönente në quëwëngä guiquënë tömengä mïi quëwengä incæte do wænte bai ingampa töö.

⁷ Tömënëni inänitedö ante wënæ wënæ änämaï incædänimpa, ante wææ cædinque bitö mäninö botö änö ante adodö ante ämi eñencædänimpa. ⁸ Æcänö guidënëni inänite pönö cædämaï inaa ayæ tömengä nani wencabo inänite pönö cædämaï inaa tömengä iñömö Wængongui nänö angainö mönö pönëno ante do Baa äninque wïi eñente cæcampa. Ayæ në pönënëmaï ingä wënæ wënæ cæcä iñongante mäningä iñömö godömenque wënæ wënæ cæcä ingampa töö.

⁹ Owæmpoinä do tetenta wædepo ganca godömenque në picænä inönä inte tömënë nänöogængä wodi ingante në möninanque quëwënë ingadäimpa, ante adinque bitö, Wængongui qui, ante mönö godonte æninta mäninä owæmpoinä në ænguinä incædäimpa, ante tömënë emowo ante yewæmoncæbiimpa. ¹⁰ Edæ tömënë wëñænäni inänite waa cædä pædäni inänitawo. Wädäni inänite tömënë, Botö oncönë pö

beedāni, ante waa apænedā inantawo. Wængonguī quīnāni iñōnānite tōmēnā nāmā pōnēnāmaī inte waa cædantawo. Nē wæwēnāni inānite adinque tōmēnā tōmēnāni tōnō godongāmæ cædantawo. Ayæ, Quiēmē waa cæcæimpa, ante mānīnonque ante pōnēninque cæte quēwēnantawo. Mānōmaī quēwēnā adinque waodāni, Mānīnā nōinā waa cædā inōnampa, ante do ēñēnāni inānitawo, ante adinque bitō wæætē tōmēnā ēmōwo ante yewæmoncæbiimpa. Ayæ wadāni mānīnā bai iñōnānite bitō, Wængonguī quī, ante mōnō godonte æninta mānimpodānique nē ænguīnāni incædānimpa, ante tōmēnāni ēmōwo ante yewæmoncæbiimpa.

11 Wæætē edæ owæmpoīnāni wīi picænāni iñōnānite bitō tōmēnāni ēmōwo ante yewæmōnāmaī inte Baa ancæbiimpa. Ayæ toīnente wæwēninque Codito ingante ñimpo cæte wadæ godinque wæætē, Wacā nānōogængā ingante mōinēmopa, ante quēwēnānīpa. 12 Edæ tōmēnāni Codito ingante, Botō bitō beyænque cæcæboimpa, ante tāno nāni angainō ante ñimpo cædāni beyæ Wængonguī apænte pangā wæcædānimpa. 13 Ayæ godōmenque iīmaī cædānīpa. Tōmēnāni cædāmaī inte wæntæye badinque adobaī wacōnē wacōnē acæte ante ōnonque godāni inānīpa tōō. Ayæ wīi ōnonque wæntæyedānique badinque tōmēnāni, Wadāni æbānō cædānīi, ante gote adinque wadāni nāni cædōnō ante godō wæntæ godō wæntæ tededāni inānīpa. Edæ wīi nāni anguēnēnō ante do ānewēnānīpa. 14 Mānōmaī beyæ botō owæmpoīnāni wīi picænāni inānite iīmaī āmopa. Mīnitō wæætē mōninque wēñænāni māedāni. Ayæ oncōnē mīni cæquēnēnō ante cædāni. Wadāni edæ mōnō imontedō ante wēnæ wēnæ nāni tedewēnō ante tededāmaī incædānimpa, ante mīnitō mānōmaī cæte waa quēwēdāni, āmopa. 15 Iñæmpa owæmpoīnāni pancadāniya do Itota Codito ingante ēmō cæte godinque Tatāna mīñæ tee

empocæ godānitapa tōō.

16 Onquiyængā nē pōnengā iñōmō tōmengā guīdēnāni owæmpoīnāni næængā ininque tōmengā tōmēnāni beyæ cæcæcāimpa. Codito ingante godongāmæ mīni pōnencabo iñōmīnite tōmengā, Botō guīdēnāni inānite godōmīni æncædānimpa, ante ānāmaī incæcāimpa. Mānōmaī cædinque Codito ingante mīni godongāmæ pōnencabo wæætē, Owæmpoīnāni nāwangā ōmæpodāni inānīpa, ante adinque tōmēnāni inānite godōmīni æncædānimpa, āmopa.

17 Wængonguī ingante godongāmæ mīni pōnencabo iñōmīnite nē aadāni nāni Picæncabo iñōmō nō waa aadāni iñōnānite mīnitō tōmēnāni inānite waa aquēnēmīni imīnīpa. Mānīnāni Wængonguī nānō angainō ante nē apænedāni inte ayæ nē odōmonte apænedāni iñōnānite mīnitō godōmenque nanguī waa acæmīnīpa. 18 Edæ Wængonguī iīmainō ante apænecā ēñēninque yewæmongadānimpa. “Wagada onguīñængā nē cæcā inte tōmentapo æ yacæimpa, ante āmi pīnā pīnā gāwate cægōñongā bitō tōmengā ōnōne wææ wodōnedāmaī inte ee abi cæncæcāimpa,” ante yewæmongatimpa. Ayæ godōmenque iīmaī ante impa. “Nē cæcā iñōmō tōmengā nānō cædīnō beyæ ante nē ænguēnengā ingampa.” Mānōmaī yewæmongadānimpa.

19 Godongāmæ mīni pōnencabo iñōmīni waocā adocanque iñōmō bitō imite apænedinque, Māningā nē aacā Picængā iñōmō wēnæ wēnæ cæcantapa tōō, ante āñongante bitō ēñēnāmaī incæbiimpa. Wæætē waoda mēnaa nē babæ wapiticæ ānāmaī ina inte bitō imite apænedinque, Tōmengā nē wēnæ wēnæ cæcantapa, ante adodō apæneda ēñēninque bitō nē āna inate ēñencæbiimpa. Ayæ waodāni mengāa go adocanque adobaī adodō apænedāni ēñēninque bitō nē ānāni inānite ēñencæbiimpa.

20 Nē wēnæ wēnæ cædōnāni incæ ñimpo cædāmaī inānīpa, ante adinque

bitō wæætē godongāmæ ongōnāni ēñēñōnāni mǎnīnāni inānite nanguī ancæbiimpa. Godongāmæ ongōnāni ēñēñōnāni bitō mǎnōmaī āmi inique tōmēnāni wæætē guīñēninque, Wēnæ wēnæ mōnō cæquīnō ante cædāmaī incæmōimpa, ante pōnencædānimpa.

²¹ Mōnō Wængonguī ayongā Itota Codito ayongā Wængonguī nānō apænte ænīnāni anquedoidi ayōnāni botō īmaī āmopa. Mǎnīnō botō ānīnō ante ēñente cædinque bitō, Adoyōmō pōnī inānīpa, ante tōmānāni inānite adoyōmō godō cæbi incæbiimpa. Wīi adocanque ingante, Botō nē waa adīmi īmīpa, ante tōmengā ingante wadō cædāmaī incæbiimpa. ²² Æcāmenque ingante, Mōnō pōnencabo beyæ bitō nē cæbi baquīmi, ante pōnēmi inte bitō tōmengāa quingæ gampo cædāmaī īe. Edæ quingæ gampo cæbi nē cæcā badinque edæ tōmengā wēnæ wēnæ cæcā inique bitō adobaī tōmengā tōnō wēnæ wēnæ cæbi baquēnēmi īmīpa. Bitō tōmēmīque godōmenque wēnæ wēnæ nāni cæpāmo ante tōmānō ante Baa ante waa cæte quēwēe.

²³ Bitō cæinca cædente wæbitawo. Ayæ wantæ wantæ īñō wantæ wantæ īñō wēnæ wēnæ inte wæbitawo. Inique wīi æpænque bee āmopa. Wæætē biīnōmæ wædænque bete quēwencæbiimpa.

²⁴ Wængonguī nānō apænte an-guīōnæ badāmaī īñedē incæ waodāni pancadāniya wēnæ wēnæ nāni cægāinō do edonque pōnī impa. Wadāni guīquēnē wēnæ wēnæ nāni cægāinō wē wodonte ī incæ māniñedē edonque pōnī baquīnō anguēnē. ²⁵ Ayæ adobaī waodāni waa nāni cægāinō do edonque pōnī impa. Ayæ ñōwoyedē panca waa nāni cægāinō wīi edonque pōnī ī incæte wīi cōwē wē wodonte ingæimpa. Wæætē edonque pōnī aquīnō anguēnē.

6

¹ Waodāni awēnēidi nāni nē ō ænīnāni inte awēnēidi beyænque cæte ñā cæyænte baī nē quēwēnāni

īñōmō tōmēnāni tōmānāni awēnēidi inānite waa ēñente cæcædānimpa. Īñæmpa tōmēnāni nē pōnēnāni inte wīi waa ēñente cædāni baī wadāni wæætē Wængonguī ēmōwo ante wēnæ wēnæ ante babæ anguēnēnānimpa. Adobaī mōnō odōmonte apænedīnō ante, Wēnæ wēnæ impa, ante anguēnēnānimpa. ² Tōmēnāni awēnēidi īñōmō nē pōnēnāni ināni beyænque nē cædāni īñōmō, Botō tōniñacanque īnongā inte botō awēnē īñōmō ōnonganque ingā awædō, ante pīināmaī incædānimpa. Wæætē edæ nē cædāni īñōmō, Botō cæbo nē ængā īñōmō nē pōnengā īnongā inte Wængonguī nānō nē waadecā ingampa, ante adinque tōmēnāni awēnēidi inānite godōmenque waa ēñente cæcædānimpa.

Nāwā māincoo ante

Inique Tīmoteo ēñēmī. Mǎnīnō ante tōmēnāni inānite odōmonte apænedīnque bitō adodō adodō ante ancaa ancæbiimpa, āmopa. ³ Pancadāniya wadō ante odōmonte apænedīnque mōnō Awēnē Itota Codito nō pōnī nānō angāinō ante Baa ānānīpa. Ayæ mōnō odōmonte apænedō ante tōmēnāni Wængonguī ayongā mōnō waa cæte quēwenguēnēnō ante Baa ānānīpa. Inique æcānō mǎnōmaī Baa āna īñōmō ⁴ tōmengā nāmā incæ, Botō gomonga waa ēñēmopa, ante nē pōnēnongā ingā incæte tōmāā ēñēnāmaingā ingampa. Tōmengā nāmanque nānō pōnēwēnō ante wæætedō wæætē tededīnque, Ædedō ī, ante wacā tōnō guēadō guēa āinēwente wæcampa. Tōmengā mǎnōmaī tedecā beyænque wadāni nē gomonga ēñengā ingante godō pīinte adānīpa. Godongāmæ wadodō wadō pīinte tedewēnānīpa. Wacā ingā wacā ingā, Bitō wēnæ wēnæ cæbi īmīpa, ante ānewēnānīpa. Nāmā nāni wēnæ wēnæ pōnēnonque ante, Wadāni wēnæ wēnæ cædānīpa, ante pōnēwēnānīpa. ⁵ Ayæ ocaidē pōnente wentamō encadāni inte tōmēnāni Wængonguī nāwangā nānō angāinō

incæ eññēnāmaī badānīpa. Īnīnque nāni cabo incæ wacā ingā wacā ingā guēadō guēa apānete nāni pīincabo īnānīpa. Ayæ mānīnāni adobai, Wængonguī ayongā waa cæte quēwēmō beyænque nanguī ēate baquīmō, ante pōnēwēnānīpa.

⁶ Īñæmpa māincoo quīncoomē ēacā incæte, Mānīnque ēabopa, ante piyænē cæte quēwēnongā īñōmō tōmengā Wængonguī ayongā waa cæte quēwēngā beyænque watapæ quēwēnongā inte nō nanguī ēacā ingampa. ⁷ Edæ mōnō īi ingui-poga īñōmō ōmaamō pontamompa. Adobai ōmaamō inte tao goquīmō īmōmpa. ⁸ Incæte mōnō cænguī tōnō weocoo ēamō inte mānīnque beyæ mōnō watapæ quēwēngūnque īmōmpa. ⁹ Wadāni guīquēnē, Māincoo nanguī ēainēmōnīpa, ante quēwēnāni inte tōmēnāni wēnæ wēnæ nāni cæinēmāmo badīnque oda cæte goquīnānidō anguēnē. Mānōmaī cædinque tōmēnāni, Quīnō ōnonque impa, ante æinente badānīpa. Ayæ wēnæ wēnæ nāni baquinque edæ æinēwēnāni inte quiēmē incæ tōmēnāni æmæwo ōmæ nāni ēwēngūnonque gocædānīpa. ¹⁰ Waodāni nāni godonte æinta waadete pōnente nāni wædō beyæ wadō wadō nāni wēnæ wēnæ cæpāmo pompa. Edæ pancadāniya, Mōnō godonte ængūnta ængæīmpa, ante pōnēnīnque tōmēnāni nāni wede pōnēngūnēnō ñīmpo cæte wadæ godīnque nāmā nāni cædō beyænque nanguī wæwente badānītapa.

Mōnō wede pōnēnō ante mōnō tæi ēwocate cæcæīmpa

¹¹ Bitō guīquēnē Wængongūnque ingante nē cædōmi inte mānīnō tōmānō ante ñīmpo cæte wodīi gote bai quēwēncæbiīmpa, āmōpa. Wæætē mōnō nō cæquēnēnō ante cæte quēwēncæbiīmpa. Wængonguī ayongā mōnō waa cæte quēwēngæīmpa, ante cæcæbiīmpa. Mōnō wede pōnēmāmo, ante godōmenque pōnente quēwēncæbiīmpa. Waodāni īnānite

godōmenque waadete pōnēncæte ante cæcæbiīmpa. Ayæ tæi pīñænte entawēnīnque wæntæye badāmaī inte ee cæcæbiīmpa. Cōwē ædæmō cæte quēwēncæbiīmpa. ¹² Wængonguī ingante mōnō wede pōnēnō ante mōnō cæquēnēnō ante bitō tæi ēwocate cæcæbiīmpa. Mōnō wænāmaī quēwēngūnō goquīmō, ante pōnente ñīmpo cædāmaī incæbiīmpa. Edæ waodāni tæiyænāni eññēñōnāni, bitō, Wængonguī ingante wede pōnente babopa, ante āñōmi Wængonguī edæ, Mānīnō quēwēngūnō gocæbiīmpa, ante bitō īmite apænte aa pecantapa. ¹³ Wængonguī pōnō cæcā beyænque quīngāmenque incæ tōmānāni quēwēnāni īnānīpa. Itota Codito īñōmō Pontio Pidato ingante apænedīnque, Quīnō nō impa, ante edonque pōnī apænēgaingā ingampa. Edæ Wængonguī tōnō Itota Codito mānōmānō ingaina īñōna botō tōmēna ayōna bitō īmite, Īīmaī cæe, āmōpa. ¹⁴ Mōnō Awēnē Itota Codito nānō ocæ ēmænte pongūnganca bitō mānīnō botō wææ ānō tōmānō ante waa eññente cæcæbiīmpa, āmōpa. Bitō eññente cædō adīnque wadāni ædō cæte, Wēnæ wēnæ impa, ante angūnānīi, ante pōnente cōwē waa pōnī cæcæbiīmpa. Mānōmaī ante āmōpa.

¹⁵ Wængonguī nānō aīnēngūiōnæ bayonte Itota ocæ ēmænte poncæcāīmpa. Mōnō Awēnē Wængonguī īñōmō tōmengā adocanque Wængongūnque ingaingā inte nē waa pōnī īnongā ingampa. Tōmēnāni awēnē odeyeīdi īñōnānite tōmengā Tæiyæ Awēnē Odeye īnongā ingampa. Ayæ tōmengā īñōmō awēnēīdi tōmānāni Awēnē īnongā ingampa. ¹⁶ Tōmengā adocanque nē wantæpiyæ wænāmaī īnongā inte nē Quēwēngā ingaingā ingampa. Tōmengā tōmāā ñāō īñōmō quēwēnongā īñongante waodāni ædō cæte tōmengā weca goquīnānīi. Tōmengā mōnō waocabo mōnō nē adāmaī ingaingā ingampa. Edæ tōmengā ingante mōnō ædō cæte aquīi. Tōmengānque ingante waodāni

tömänäni waa aquinänidö anguënë. Tömenganque cōwē nē tæi piñænongä inte quingämenque quēwēnāni iñönānite tömengä tömänäni Awēnē inguingänö anguënë. Mänömaï babaimpa, ante, Amëë, ämopa.

17 Inguipogaque mäincoo nē nanguï éadäni inānite bitö iïmaï ancæbiimpa. Nanguï éamöni inte mönitö godömenque waa pönï imönipa, ante pönēnāmaï iedäni. Iñæmpa mäincoo mönö éadincoo iñömö quingæ dæ ä apa quēwēnāni. Inique mīni mäincooque ante wīi mänincooque ante pönēedäni. Wæætē, Wængonguinque beyænque watapæ quēwengæimpa, ante pönēedäni, ancæbiimpa, ämopa. Edæ, Mönö qui quinä dæ ä, ante wæmö adinque tömengä mönö imonte, Mīni watapæ quēwenguinque, ante tömää nē pönongä ænguimö imopma. 18 Mäninäni nē nanguï éadäni inānite bitö, Mīnitö quinä waa cæquī, ante mäninonque cæcæmīnimpa, ancæbiimpa. Waa mīni cæquinä ante mīnitö nanguï cæte quēwencæmīnimpa. Ayæ do Ao ante mīnitö mäincoo mīni éadincoo pancacooga pædæ godömīni æncædānie, ancæbiimpa, ämopa. 19 Mäninö bai nē cædönānique, Mönö nämä beyæ éaquincoo, ante öönædē iñömö do cö cæte bai cædänipa. Mänömaï cædinque tömēnāni, Nö pönï mönö quēwenguinque impa, ante iincayæ ate æncædänimpa.

Timoteo ingante, Pabodo iinque wææ angampa

20 Timoteo ëñëmi. Wængonguï, Wææ aacæbiimpa, ante bitö imite quinä pönongä bitö ö æninö ante wææ ae. Tæiyæ waëmö ewocadāmaï inte wadäni önonquedö ante nāni änönö ante ëñēnāmaï ie. Adobai wadäni, Mönitö ëñente ate nanguï encaimöni imönipa, ante nē babæ änāni iñönānite bitö wadodö wadö nāni anewēnö ante ëñēnāmaï ie. 21 Tömēnāni nāni anewēnö ante pönēninque waodäni pancadāniya Wængonguï ingante nāni

pönēninö ante do ñimpo cædinque wadæ godinäni inänipa.

Wængonguï bitö imite waadete pönö cæcæcäimpa, ante botö mäninque ante yewæmömopa.

2 Tímoteo ingante Pabodo cadota ante ayænta nänö yewæmongainta

Tímoteo ingante Pabodo yewæmongainta

¹ Botö Pabodobo inömo imopa. Wængongui nänö änö bai Itota Codito nänö nē da godongaïmo imopa. Itota Codito nempo quēwēnōnāni inōnānite Wængongui, Minitö wantæpiyæ mini quēwenguinö ante pönömo ænguimini iminipa, angacäimpa. Mänömaï beyæ tömengä botö imo, Mäninö ante apænebi eñencädänimpa, angä eñēninque botö tömengä nänö nē da godongaïmo imopa. ² Tímoteo eñēmi. Bitö botö wēmi bai inömi inte botö nē waadebi inömi imipa. Bitö acæbiimpa, ante bitö imite yewæmömopa. Mönö Mæmpo Wængongui tönö Awēnē Itota mönö Codito tönö bitö imite waadete pönö waa cæda ate bitö gänē entawencæbiimpa, ämopa.

Itota Codito waa pönö nänö ingainö ante

³ Wēenēñedē botö wæmæidi nāni cægai bai botö adobai nāmā apænte pönente adinque wentamö mongænāmaï entawēmo inte Wængongui beyæ nē cæbo imopa. Botö itædē incæ woyowotæ incæ bitö beyæ ante mäningä Wængongui ingante botö apæneyedē adocä ingante cōwē waa ate pönente apænebopa. ⁴ Botö bitö æbänö wēñapæ tamömitapa, ante pönēninque, Botö watapæ tocæboimpa, ante bitö imite aïnente imopa. ⁵ Bitö Wængongui ingante nō wede pönēmi imipa, ante adimo inte botö adodö ante wæætē pönēmopa. Edæ bitö ñæñæ Doida bitö wäänä Eönita tönö tömēna tano Wængongui ingante nō wede pönente nāna ingai bai bitö inōmō ñowo adobai imipa, ante do eñēmopa.

⁶ Mänömaï beyæ bitö imite iïmaï ämopa. Wængongui nänö cædonö ante

bitö cæcæbiimpa, ante botö bitonga gampo cæyömo Wængongui pönö cæcä æninque ewocabi imipa. Ininque mäninö bitö ewocadö beyænque bitö godömenque godömenque cæcæbiimpa. ⁷ Wængongui tömengä Tæiyæ Waëmö Önöwoca ingante mönö imonte pönongä æmō ininque mönö wii tömengä beyæ guinente ewocamopa. Wæætē mäniwoca beyæ tæi ewocamö imopa. Ayæ adowoca ingante ewocadinque waodäni inänite waadete pönēmö imopa. Adowoca beyæ mönö, Nöinö cæcæimpa, ante pönēninque nāmā wææ ante cæmō imopa.

⁸ Mönö Awēnē Itota Codito nänö angainö bitö eñēninö ante bitö guingo imönāmaï inte apænecæbiimpa. Botö adobai, Tömengä nänö angainö botö eñēninö ante botö apænebo beyæ botö imote tee mönedäni wæyömote bitö mäninö adinque guingo imönāmaï inte apænecæbiimpa. Wæætē botö tönö Itota ingantedö ante möna watapæ apænedö ante apænedinque bitö Wængongui nänö tæi piñæmāmo ante ewocadinque botö tönö adobai guëa caate wæcæbiimpa. ⁹ Wængongui, Quēwencæminimpa, ante mönö imonte æninque, Minitö tæiyæ waëmö entawente quēwencæminimpa, ante mönö imonte aa pegacäimpa. Mänömaï cædinque tömengä wii mönö waa cædinö beyænque wæætē tömengä nänö aïnēnö ante cægacäimpa. Ayæ wēenēñedē inguipoga badönāmaï inēdē tömengä, Itota Codito beyænque, ante pönēninque mönö imonte waadete pönö cægacäimpa. Mäninö nänö waadete pönö cægainö beyænque tömengä mönö imonte æninque aa pegacäimpa. ¹⁰ Incæte ñöwoyedē mönö imonte, Quēwenguimini, ante nē Ængaingä Itota Codito pongä ininque tömengä waadete nänö pönö cægainö ante edonque odömongantapa. Ayæ Itota ingantedö ante mönö watapæ apænedö beyæ tömengä, Minitö mempoga wænāmaï incæminimpa, ante

cædinqwe wantæpiyæ wænāmaī mōnō quēwenguīmāmo ante edonque odōmongacāimpa.

¹¹ Wængonguī botō imote apænedinqwe Itota ingantedō ante watapæ botō apænedō ante bitō apænebi ēñencædānimpa, angantapa. Angā ēñēninqwe botō adobaī tōmengā nānō nē da godōmo imo inte ayæ nē odōmonte apænebo imopa. ¹² Mānīi beyæ botō mānōmaī wæwente quēwēmopa. Incæte, Æcānō ingante nē wede pōnēmo imopa, ante do ēñēmo inte botō guingo imōnāmaī imopa. Edæ botō quīnō tōmengā ingante godōnīmo incæ tōmengā mānīnō æninqwe nanguī tæī ēwocacā inongā inte tōmengā nānō apænte anguīōnæ ganca wææ cæcæcāimpa. Mānīnō ante botō ædæmō ēñēmopa.

¹³ Botō bitō imite odōmonte apænebo bitō ēñēnīnō ante bitō ñimpo cædāmaī ee nææncæbiimpa. Wæætē, Mānīnō nō ante mōnō adodō adodō ante odōmonte apænedō impa, ante bitō adobaī adodō ante odōmonte apæncæbiimpa. Mōnō Itota Codito nempo quēwēmi inte wede pōnēninqwe waadete pōnente odōmonte apæncæbiimpa. ¹⁴ Wængonguī, Wææ aacæbiimpa, ante bitō imite pōnongā ænīmi inte bitō tōmengā waa pōnī nānō pōnongāinō ante wææ aacæbiimpa. Edæ mōnō Wængonguī Ōnōwoca tōnō ēwocate quēwēmompā. Īninqwe bitō tōmengā tōnō cædinqwe wææ aacæbiimpa.

¹⁵ Atiabæ quēwēnāni iñōmō tōmānāni botō imote emō cæte godānitapa, ante bitō do ēñēmipa. Edæ Pīguedo tōnō Edōmogæna incæ tōmēnāni tōnō botō imote emō cæte godatapa. ¹⁶ Ōnetipodo guiquēnē botō wæwēmo adinqwe tōmengā wæætē wæætē pōnō cæcā beyænque botō wampo pōnentabopa. Ayæ adobaī botō imote yæguincamē inte ñā cæyænte tee mōnedāni wæyōmote tōmengā guingo imōnāmaī ingacāimpa. Īninqwe tōmengā tōnō godongāmæ quēwēnāni inānite mōnō Awēnē Itota Codito waadete pōnō

waa cæcæcāimpa, amopa. ¹⁷ Edæ Odōmā nāni quēwēñōmō iñōmō pōninqwe Ōnetipodo botō imo ante nanguī diqui diqui mininqwe ate ate ĩnque mingacāimpa. ¹⁸ Botō Epeto nāni quēwēñōmō māññōmō quēwēñōmote tōmengā æbānō botō beyæ pōnō nanguī cæcantapa, ante bitō do ædæmō ēñēmipa. Mānōmaī beyæ botō ĩnque baquīōnæ iñonte Wængonguī tōmengā ingante pōnō waadete waa cæcæcāimpa, amopa.

2

Itota Codito beyæ waa tontado bai cæcæimpa

¹ Ayæ bitō botō wēmi bai inōmi inte ēñēmi. Itota Codito nempo quēwēñōmite tōmengā waadete pōnō cæcā beyænque bitō tæī ēwocabi incæbiimpa, amopa. ² Waodāni tæiyænāni ēñēñōnāni botō æbānō ante apænebo bitō ēñēnīnō ante bitō wæætē wadāni nē pōnēnāni inte cōwē ædæmō cædāni iñōnānite adodō ante odōmonte apænebi ēñencædānimpa. Ēñēninqwe tōmēnāni nē nō cædōnāni inte adobaī wadāni inānite odōmonte apænequināni inānipa, ante tōmēnāni inānite āmi gocædānimpa.

³ Bitō Itota Codito beyæ waa tontado bai inōmi inte bitō wæwēmi incæ ee ongonte godōmenque cæcæbiimpa, amopa. ⁴ Waocā tontado badinqwe nānō cæyedē tōmengā, Botō awēnē botō imote waa acæcāimpa, ante tōmengā nānō ānonque ante ēñente cæcæboimpa, āninqwe wadāni tontado ināmaī ināni nāni cæbaī cædāmaī inongā ingampa. ⁵ Gānā cæcæte ante nē owempocā iñōmō, Cōwē nāni cægaī bai owempoedāni, ante nāni wææ angāinō ante ēñente cæcā ĩninqwe tōmenganque godōmenque waa owempodinqwe gānā cædinqwe poganta æmaingampa. ⁶ Amīña bayedē pancamonga pancamonga æññōnāni gōnea ante nē nanguī cæcā iñōmō tōmengā tāno ænguēnengā ingampa. ⁷ Mānīnō imæca quēwēnāni nāni cæ bai ante mēnea go adodeque botō ānīnō ante pōnēñōmi mōnō Awēnē

edæ bitö ïmite odömongä eñëninque bitö edonque pönï eñencæbiimpa.

⁸ Itota Codito awënë Dabii wodi nänö päingä ïnongä inte do wæninque në ñäni ömæmongaingä ingante ante pönencæbiimpa. Mäninö ante watapæ botö apænedö impa.

⁹ Mänine beyænque botö caate wæwëmo ïmopa. Edæ në wënæ wënæ cæcä ingante tee mönecönë ñä cæyænäni bai botö ïmote adobai mänine botö apænedö beyænque ñä cædäni wæbopa. Incæte Wængongui nänö angainö ædö cæte ñä cæyænte inguü. ¹⁰ Mänömai beyæ Wængongui nänö apænte æninäni beyænque ante cæyömote wadäni ancaa wënæ wënæ cædäni wæbo incæte botö ñimpo cædämai inte godömenque cæbopa. Edæ Wængongui nänö ñäö apäiyömö nani cöwë quëwenguinque mäninäni Itota Codito ængä beyænque tömengä nempo quëwencædänimpa, ante cædinque botö wæwëmo incæte godömenque cæbopa.

¹¹ ïmai ante nani änö näwangä ante impa.

Mönö Itota Codito tönö godongämæ wængaimö inte adobai tömengä tönö cöwë wænämai quëwencæmöpä.

¹² Mönö tömengä tönö ñimpo cædämai inte ee cæte wæwëmö inte adobai tömengä tönö në awënëidi badinque godongämæ aacæmöimpa.

Mönö, Tömengä ingä dicæ abogaa, ämö ïninque tömengä adobai näemæ mönö ïmonte, Dicæ abogaa, ämaingampa.

¹³ Mönö wede pönënö ante ædæmö cædämai ïmö incæte tömengä guiquënë mönö ïmonte cöwë pönëninque cöwë ædæmö cædongä ingampa.

Ïñæmpa tömengä ïñömö nämä nänö ingainö ante ñimpo cædämai ïnongä inte tömengä wadö ante pönënamai ingampa.

Wængongui bitö ïmi, Waa cæbi abopa, anguingä, ante

¹⁴ Waodäni ïnänite apænedinque bitö, Mäninö ante pönëedäni, ante wæætë wæætë ancæbiimpa. Mönö Wængongui ayongä ïmai ante wææ ante nangui apænebi eñencædänimpa. Minitö, Ædedö ï, ante wadodö wadö ante piinte tededämai incæminimpa. Ïñæmpa mänömai bai äninque mönö änö ïñömö önonque ante impa. Ayæ mänömai ante tedemö eñëninque në eñënëni ïñömö æmæ pönente babainäni, ante bitö wææ ancæbiimpa, ämopa.

¹⁵ Bitö Wængongui ayongä, Botö në waa cæbo incæboimpa, ante nangui cæcæbiimpa. Në cæbo inte guingo imönämai incæboimpa, ante cædinque Wængongui nö nänö angainö ante tömëmi në ædæmö eñente entawëninque mäninonque ante töinö ante wadäni ïnänite waa odömonte apænecæbiimpa. ¹⁶ Tæiyæ wæmö

ëwocadämai inte wadäni önonquedö ante tedeyönäni bitö tömënëni ïnänite eñënëmai inte nänënë wadæ goe. Edæ mäninäni Wængongui ingante emö cædinque cöwë godömenque wiwa nani cæquinque wadæ godänipa.

¹⁷ Baö ñömæïñömö aca podinque nangui godömenque baayö bai mäninäni nani odömonte apænewënö adobai wodo wodo go ïninque wadäni tæiyænäni eñëninque oda cæcædänimpa.

Mäninäni nani tedewencabo ïñönäni ïmëneo tönö Pideto adodæque ïnapa. ¹⁸ Tömëna Wængongui näwangä nänö angainö ante ñimpo cæte wadæ godina ïnapa. Ayæ, Mönö ñäni ömæmönö ïñömö ïnque bagatimpa, ante tedewëna eñëninque wadäni pancadäniya nani wede pönënö incæ wido cæte bai quëwënanipa. ¹⁹ Incæte Wængongui näwangä nänö angainö mönö pönënö ïñömö tæi gönonte bai cöwë ongompä. Mäninö ante mënea ante ïmai yewæmonte bai ongompä. Edæ Wængongui Awënë tömengä quinäni ædänidö ïnänii, ante do eñengampa. Ayæ tömengä emöwo ante, Botö Awënë ïnongä ingampa, ante në änäni

iñömö tömënäni tömänäni, Mönö wīwa cædimāmo ante wæte wædinque wadæ goquënänäni inänipa.

²⁰ Nē ēacā oncönē ñænæncönē tömengä nänö waa waa cō cæincade iñömö oodo inte padata inte nāni badöincade mæ ongompa. Adobaī wacade awæmpaincade daicade incade mæ ongompa. Pancacadea iñömö waëmoncooque da wëincade incadepa. Wacade guiquënë ömæpocooque da wëincade incadepa. ²¹ Waocā wënæ wënæ nänö entawënö ante ñimpo cædinque nāmā ñā mënongate bai quëwengä ininque tömengä iñömö waëmoncooque da wëincade bai inongä inte Wængonguī beyæ waa cæcā imaingampa. Tömengä tæiyæ waëmö ewocate quëwengä babaingampa. Ininque tömengä Awënë nänö änö ante do cæcā imaingampa. Ayæ, Quinö waa cæquinö i, ante tömengä do cæcā imaingampa.

²² Edëninäni wīwa nāni cæinënö ante bitö ñimpo cæte wodii gote bai quëwencæbiimpa. Wæætë waodäni mīmō ñā mënongate entawënäni inte Wængonguī ingante nē apænedäni tönö bitö nö cæquënënö ante cæte quëwencæbiimpa. Mönö wede pönënö ante godömenque pönente quëwencæbiimpa. Waodäni inänite godömenque waadete pönencæte ante cæcæbiimpa. Ayæ mönö piyænë cæte quëwenguimāmo ante pönëninque cæcæbiimpa. ²³ Önonquedö ante apænedinque nē, Ædedö i, ante wacā tönö guëadö guëa tedewengä mänömaī tedecā beyænque wadodö wadö piinte tedewënänipa, ante do ëñëmipa. Ininque tömënäni nē pönënämaī inäni inte önonquedö ante apæneyönäni bitö tömënäni tönö godongāmæ apænedämaī incæbiimpa.

²⁴ Mönö Awënë ingante nē cæcā iñömö tömengä wadäni tönö wadodö wadö piinte tededämaī incæcäimpa. Wæætë tömänäni inänite ædæmō cæcæcäimpa. Ayæ wadäni tömengä ingante wënæ wënæ cædäni adinque tömengä wæætë piinämaī inte piyænë cæcæcäimpa. Ayæ tömengä nē

waa odömonte apænecä incæcäimpa.

²⁵ Tömengä apænecä ëñëninque nē ëñënäni iñömö Baa ante wadö änäni inänite tömengä ædæmō cæte, Iimaī impa, ante odömonte apænecä ëñencædänimpa. Edæ Wængonguī pönö cæcā ate tömënäni nāmā incæ, Wënæ wënæ cæmō awædö, ante wædinque tömengä nāwangä nänö angainö ante ëñencædänimpa, ante pönente cæcæcäimpa. ²⁶ Ayæ tömënäni ëñënämaī encadäni incæ nē ëñenguinäni wæætë bacædänimpa, ante pönente cæcæcäimpa. Wënæ iñömö tömënäni inänite bæi ongöninque tömengä, Botö änö ëñente quëwencæminimpa, ante godö cæcā ate tömengä nänö nē bæi ongönäni wæætë aamö cæte wodii gocædänimpa, ante adobaī pönente cæcæcäimpa.

3

Ïinque bayedë waodäni cëbänö quëwenguinäni, ante

¹ Timoteo ëñëmi. Ïinque eönæ bacæ cæyedë wënæ wënæ ba wæquinö angüënë. ² Mänïñedë edæ waodäni nāmanque waadete pönenguinäni inänipa. Tömënäni nāni godonte æninta waadete pönente nāni wædö ante quëwenguinäni inänipa. Tömënäni nāmanque, Botö gomonga waa cæbo imopa, ante pönenguinäni inänipa. Wængonguī ingante godö wënæ wënæ ante babæ angüinäni inänipa. Wadäni inänite badete toquinäni inänipa. Wëñænäni incæ wæmpoda inate ëñënämaī cæquinäni inänipa. Wadäni pönö waa cædäni incæte tömënäni nē waa cædäni inänite wæætë waa cædämaī inguinäni inänipa. Ayæ tæiyæ waëmö entawënämaī inguinänimpa. ³ Adobaī waadete pönënämaī quëwenguinäni inänipa. Mäninäni inänite wënæ wënæ cædäni adinque tömënäni wæætë piinque ñimpo cædämaī inte wënæ wënæ cæquinäni inänipa. Wadäni inänitedö ante babæ ante anewenguinäni inänipa. Tömënäni nāni cæinëwënö ante nāmā wææ änämaī inte do cæquinäni inänipa. Ayæ wadäni

inänite ædæmō cædāmaī inte pīinte cæquīnāni inānīpa. Wadāni, Quīnō waa impa, ante pīinguīnāni inānīpa. ⁴ Tömēnāni nāni guīdēnāni incæ, Wēnæ wēnæ bate wæcædānīmpa, ante godō odōmonguīnāni inānīpa. Tömēnāni pōnēnāmaī inte do wēnæ wēnæ cæquīnāni inānīpa. Tömēnāni nāmā incæ, Botō gomonga waa ēñēmopa, ante pōnēwenguīnāni inānīpa. Wængonguī ingante waadete pōnēnāmaī inguīnāni inte wæætē tote quēwengæīmpa, ante nāmanque waadete pōnenguīnāni inānīpa. ⁵ Tömēnāni Wængonguī ayongā waa cæte quēwēnāni baī adobaī cædāni incæte Wængonguī nānō tæī pīñæmāmo pīiwēninque nāmanque cæte quēwēnānīpa tōō.

İnīnque bitō mānīnāni inänite gomō ae. ⁶ Mānōmaī baī cædāni inñōmō waa apænedīnque waodāni oncōnē wāānē guīdānīpa. Onquīyænāni wīī tæīmō entawēnāni inte tōmēnāni nāni wēnæ wēnæ cædī teēmēmō mongænte baī ināni inñōnānite oncōnē nē guīdāni inñōmō, Onquīyænāni mōnitō apænedō ante ēñente cæcædānīmpa, ante cædāni ate onquīyænāni wæætē oda cæte godānīpa. Mānīnāni onquīyænāni inñōmō, Quīēmē nāni wēnæ wēnæ cæinēmāmo, ante wadō gote wadō gote oda cædānīpa. ⁷ Tömēnāni cōwē ēñencæte ante cædāni incæte wapiti wapiti cædāni inīnque Wængonguī nāwangā nānō angāinō ante cōwē ēñente badāmaī inānīpa. ⁸ Wēēnēñedē Mōitee wodi Equitobæ tæiyæ awēnē ingante apæneyongā Aānee tōnō Aāmōdee nē idōna inte Mōitee ingante pīīnīnque, Ōnonque angampa, āna ingadāīmpa. İnīnque bayedē nē wēnæ wēnæ cædāni guīquēnē iīna inōna nāna cægāī baī adobaī cædīnque Wængonguī nāwangā nānō angāinō ante Baa ante wadō ānāni inānīpa. Tömēnāni ocaidē pōnente wentamō encadāni inte oda cæte godānīpa. İnīnque Wængonguī ingante mōnō pōnēmāmo incæ dicæ pōnēnāniyaa.

Wængonguī tōmēnāni inänite Baa ancæcāīmpa. ⁹ İñæmpa ædō cæte godōmenque cæquīnānīi. Mānīna nē idōna nāna ōnonque cægāinō ante edonque agadāni baī tōmēnāni nāni ōnonque cædīnō ante waodāni tōmānāni adobaī edonque pōnī acædānīmpa.

Tımoteo ingante Pabodo inque wææ angampa

¹⁰ Bitō inñōmō, Æbānō botō odōmonte apæneboo, ante, Æbānō waa quēwēmoo, ante, Æbānō pōnente ante, İmaī cæcæboīmpa, ante cæboo, ante bitō tōmānō ante do ēñēmīpa. Ayæ Wængonguī ingante botō pōnēmāmo ante waodāni inänite botō ee cæpāmo ante botō waadete pōnēmāmo ante botō wæntædāmaī inte cæpāmo ante bitō adobaī do ēñēmīpa. ¹¹ Ayæ botō imote togænte pānāni botō wæpāmo ante ayæ botō wæwēmāmo ante bitō do ēñēmīpa. Wadāni quīēmē wēnæ wēnæ cæcæte ante botō imote togænte pānāni wæbo incæ botō wæntæye ināmaī intabopa. Antioquiya inñōmō İcōnio inñōmō adobaī Ditada nāni quēwēñōmō māniñōmō wēnæ wēnæ cædāni wæbo incæte mōnō Awēnē ō ængā beyænque ayæ quēwēmō imopa. ¹² Nō ante impa. Æcānō, Botō Itota Codito nempo quēwēmō inte Wængonguī ayongā waa cæte quēwencæboīmpa, ante āna tōmengā ingante togæwēnīnque wēnæ wēnæ cædāni wæquīngā ingampa. ¹³ Waodāni wēnæ wēnæ cædāni tōnō, Oda cæcædānīmpa, ante nē cædāni inñōmō tōmēnāni nē wēnæ wēnæ cædīnāni inte godōmenque wēnæ wēnæ cæquīnāni inānīpa. Edæ mānīnāni inänite wapiticæ māodāni oda cæte cædīnāni inte tōmēnāni wæætē wadāni inänite adodō, Æpiticæmē oda cæquīnānidō, ante cæcædānīmpa.

¹⁴ Bitō guīquēnē æbānō ēñēnīmi inte, Nō impa, ante pōnēnīnque cōwē ñīmpo cædāmaī incæbiīmpa. Edæ bitō imi ædānidō odōmonte apænedānīi, ante do ēñēmīpa. ¹⁵ Wængonguī angā ēñente tæiyæ

waemö nani yewæmongainö ante bitö wëñæmiyedë mä ëñëninque ñowo ganca do ëñëmitawo. Mäninö ante nani yewæmongainta ate ëñëninque bitö Itota Codito ingante pönëñömi tömengä ængä beyænque quëwencæbiimpa.

16 Wængongui pönö apæneca ëñëninque waodäni tömënäni nani ëñënonque ante Wængongui beyæ yewæmongadänimpa. Tömënäni Wængongui nänö odömonte apænegainö ante nani yewæmongainta adinque mönö, Æbänö waa impa, ante ëñëninque mönö odömonte apænecaëimpa. Wængongui angä ëñente nani yewæmongainta adinque, Quinö mönö wënæ wënæ cædinö ii, ante mönö do ëñëninque në wënæ wënæ cæcä ingante mönö wææ angæimpa. Ayæ Wængongui angä ëñente nani yewæmongainta adinque në oda cæte wæcä ingante, Mönö nöinö cæquënëno iimaï impa, ante mönö odömonte apænecaëimpa. Nö cæte quëwencæminimpa, ante odömonte apænete ongö ate mönö ëñëno ante mönö waodäni inänite odömonte apænecaëimpa. 17 Edæ Wængongui beyæ në odömonte apæneca iñömö eyepæ ëñengä inte tömengä nänö waa cæquimämo tömämämo ante cæcæcäimpa, ante odömonte apænecaete ante yewæmongadänimpa.

4

1 Waodäni müinäni quëwënäni incæ do wængainäni incæ tömänäni inänite mönö Itota Codito në apænte anguingä inte tömengä Awënë Odeye badinque ponte a ongongä acæimpa. Tömengä ayongä ayæ mönö Mæmpo Wængongui ayongä botö bitö imite, Iimaï cæe, ämopa. 2 Wængongui nänö angainö ante apænebi ëñencædänimpa. Waodäni Ao ante, Eñëinëmöni ante änäni incæ Baa ante ëñënamäi inäni incæ bitö cöwë apænebi ëñënanie. Wængongui nänö angainö ante oda cæte wædäni adinque bitö, Mönö nöinö cæquënëno

ante cæcæminimpa, ancæbiimpa. Wënæ wënæ cædäni inänite, Ædö cæte mänömaï cæminii, ante nangui ancæbiimpa. Ayæ adobaï, Wampo pönencædänimpa, ante ædæmö apænebi ëñencædänimpa. Mäninö tömänö cædinque nangui waadete ee cædinque adodö adodö ante odömonte apænebi ëñencædänimpa.

3 Iincayæ ate nö odömonte mönö apænedö ante waodäni Baa anguinäni inänipa. Mäninö ante ëñënamäi incæmönimpa, ante änäni inte tömënäni wæætë, Mönö ëñëinënonque ante odömonte apæneedäni, ante në odömonte apænedönäni nangui inäni inänite diqui diqui minte acædänimpa. Mäninuedö ante ëñencæmönimpa, ante anguinäni inänipa. 4 Mäninäni näwangä angainö ante ëñënamäi inte wadæ godinque wæætë önonquedö ante dodäni nani angainö ante ëñente cæquinäni inänipa. 5 Bitö guiquënë tömëmi quëwenganca æbämë baquii incæ godömenque cæcæbiimpa. Caate wæbi incæte bitö ñimpo cædämaï inte godömenque cæcæbiimpa. Wængongui waa pöni nänö apænedö ante apænebi ëñencædänimpa. Bitö cæquënëno tömäa iinque cæcæbiimpa.

6 Wængongui qui, ante nani godönö bai botö adobaï iñömote wantæ iñonte wænönäni wæncæboimpa. Edæ botö wænguiönæ oo pöni impa. 7 Botö tæi ewocabo inte Awënë Itota beyæ botö cæquënëno waa pöni iinque cætabopa. Gänä cæcæte ante në pogodo godäni næ gongænämaï nani iinque goganca godäni bai botö adobaï tömëmo quëwenganca wæntæye inämaï inte iinque cætabopa. Mönö wede pönëno ante botö ñimpo cædämaï inte cöwë pönentabopa. 8 Mönö Awënë në nö apænte anguingä iñömö tömengä nänö apænte anguiönæ iñonte tömengä, Bitö nö pönente waa cædimi inte bitö waa cædinta ante poganta æncæbiimpa, ante botö imote pönongä æncæboimpa. Wüi botö adoboque iñömote pönongä æncæboimpa. Wadäni adobaï tömengä

nänö pongä aquíönæ ante nan-
guí aínente nē wänö cönäni inäni
adinque tömengä, Minitö nö cæte
quēwēnimini inte minitö waa cædinta
ante poganta æncæminimpa, ante
tömēnāni tömānāni inānite pönongä
æncædānimpa.

Tímoteo quīnō cæcæcāimpa, ante

⁹ Bitö eyepæ inte botö weca
quingæ pöe, ämopa. ¹⁰ Deëma iñömö
inguipogaque ante botö imote emö
cæte Tetadónica nāni quēwēñömö
gocantapa. Ayæ Quedetente iñömö
Gadatiabæ iñömö gocantapa. Adobai
Tito Dadāmatiabæ iñömö gocan-
tapa. ¹¹ Odoca adocanque botö
weca ongongampa. Mäadoco in-
gante adinque tömengä ingante
botö weca ænte māmōmi pongäi.
Edæ botö cæquēnēnō ante cæyōmote
tömengä botö tönö guëa nanguí cæcä
ingampa. ¹² Ayæ Tiquico ingante
botö Epeto iñömö da godōmo gocan-
tapa. ¹³ Botö yacoo ocoi ä weocoo
Todoa iñömö Cadopo oncōnē botö
emö cæte pönincoo bitö ponte ate
ænte pöe. Adobai botö dibodocoo
ænte māmōmi æmoe. Botö tæinetacoo
yewæmōintacoo, ante godōmenque
wæbopa. Mäninta cōwē māmōmi
æncæboimpa, ämopa.

¹⁴ Adecantodo tæineta nē badongä
inongä iñömö botö imote nanguí wēnæ
wēnæ cæcä wætabopa. Mänōmai cæcä
adinque Wængonguī edæ tömengä
nänö wēnæ wēnæ cædinganca
mäninganca tömengä ingante wæætē
pancæcāimpa, ämopa. ¹⁵ Mäningä bitö
imite adobai wēnæ wēnæ cædāmai
incæcāimpa, ante bitö adobai wææ
cæcæbiimpa. Edæ mönō odōmonte
apænedö ante tömengä cōwē Baa ante
wadö ante quēwēnongä ingampa.

¹⁶ Botö imote nē apænte änongä
weca ænte mäodāni gote ongōninqe
botö nāmā incæ wææ ancæte ante
mä apæneyōmo æcānō botö tönö
godongāmæ äna edæ dæ änāni
wætabopa. Tömānāni edæ botö imote
emö cæte wadæ godānitapa. Mänōmai
nāni cædinö beyæ Wængonguī
tömēnāni inānite pīināmai incæcāimpa,

ämopa. ¹⁷ Incæte, Wadāni wīi
oodeoidi ināni tömāmæ quēwēnāni
Wængonguī waa pōni nänö apænedö
ante eñencædānimpa, ante cædinque
mönö Awēnē iñömö botö gāänē
ongōninqe botö tönö godongāmæ
cæcä beyænque tæi ewocabo inte
apænetabopa. Iimæca awēnē nempo
wæwente quēwēñōmote mönö Awēnē
wæætē gä pe æmpote ö ængä
beyænque quēwēmopa. ¹⁸ Mänōmai
bai cædinque botö imote quīēmē wēnæ
wēnæ cædāni wæbo incæ mönö
Awēnē Odeye botö imote ænguingä
beyænque quēwencæboimpa. Adobai
tömengä öönæde nänö aayōmō botö
imote adimongä ænte mæicä æite
goquimo imopa. Wængonguī ñāö
apæite bai emōnongä ingante mönö
cōwē waa acæimpa, ämopa. Mänōmai
babaimpa, ante Amēē, ante ämopa.

*Tímoteo ingante Pabodo, Waa
quēwencæbiimpa, angampa*

¹⁹ Pidica tönö Aquidæ nāna gæncaya
waa quēwencædaimpa, ämopa. Bitö
tömēna inate adodö apænebi eñēnae.
Adobai Önetipodo tönö godongāmæ
quēwēnāni waa quēwencædānimpa,
ämopa. Bitö tömēnāni inānite adodö
apænebi eñēnānie. ²⁰ Edaato Cood-
into iñömö ayæ a ongongantapa.
Ayæ Todopimo nē wēnæ wēnæ
iñongä botö tömengä ingante Mīideto
iñömö emö cæte gotabopa. ²¹ Bitö
eyepæ inte cōönædepo badāmai
iñedē botö weca quingæ pöe, ämopa.
Eobodo iñömö tömengä, Bitö waa
quēwencæbiimpa, angä eñēninqe botö
bitö imite adodö ämo eñēe. Podænta
tönö Diino ayæ Codaodia tönö möni
pönencabo tömāmōni bitö imite, Waa
quēwencæbiimpa, ämōnipa.

²² Mönö Awēnē Itota Codito bitö
tönö ongonte incæcāimpa, ämopa.
Ayæ Wængonguī bitö imite waadete
pönö cæcæcāimpa, ante mäninque
ante yewæmōmopa.

Tito ingante Pabodo cadota ante nänö yewæmongainta

Tito ingante Pabodo yewæmongampa

¹ Botö Pabodobo inömo imopa. Wængongui ingante nē cæbo iñömote Itota Codito, Bitö Wængongui nänö nē apænte æninäni inänite apænebi eñencædänimpa, ante da godongä ate botö tömengä nänö nē da godongäimo imopa. Tömengä, Tömänäni botö imote nani wede pönönö ante godömenque wede pönencædänimpa, ante cæcæbiimpa, ante da godongä gotabopa. Ayæ, Wængongui näwangä nänö angainö ante eñente entawëninque tömänäni tömengä ayongä waa cæte quëwencædänimpa, ante cædinque Itota Codito botö imote da godongä godimo imopa.

² Edæ, Iincayæ ate mönö wænämaï quëwenguinö gocæmöimpa, ante eñëninque pönencædänimpa, ante Wængongui nē babæ änämaï inongä inte wëenëñedë inguipoga badönämaï iñedë iïmaï angacäimpa. Mini wænämaï quëwenguimämo ante pönömo æninque minitö wæætë wantæpiyæ cöwë quëwencæminimpa, ante cægacäimpa. ³ Mänömaï cædinque tömengä, Iiñedë cæcæboimpa, ante nänö angaiñedë iinque bayedë tömengä nänö angainö ante edonque pönö odömonte apænegacäimpa. Edæ, Quëwencæminimpa, ante mönö imonte nē Ængaingä inte Wængongui mäninö nänö angainö ante, Bitö odömonte apænebi eñencædänimpa, ante botö imote angä eñëñömote da godongä godimo imopa.

⁴ Tito eñëmi. Bitö acæbiimpa, ante yewæmömopa. Edæ godongämæ mönö wede pönönö ante apænebo nē eñëmi inte bitö Itota Codito quimi badinque botö näwä wëmi bai inömi imipa. Iinque botö, Mæmpo Wængongui tönö Itota Codito

mönö imonte nē Ængaingä tönö waadete pönö cæda ate bitö gänë entawencæbiimpa, ämopa.

Cædeta nani änöwænë iñömö Tito nänö cædö ante

⁵ Cædeta nani änöwænë iñömö botö cæquënenö ante wii eyepæ cæbo adinque botö, Bitö godömenque quëwëninque tömänö iinque cæcæbiimpa, ante botö bitö imite emö cæte gotabopa. Adobai wayömö wayömö nani quëwëñömö godinque bitö botö äninö bai cædinque, Mini pönencabo iñöminite iinäni nē aadäni Picænäni bacædänimpa, ante cæcæbiimpa, ante cædinque botö bitö imite mäniñömö emö cæte gotabopa.

⁶ Wadäni, Nē aacä Picængä wënæ wënæ cæcä ingampa, ante änämaï incædänimpa, ante wææ cædinque nē aacä Picængä wæætë waa quëwenguëngä ingampa. Edæ tömengä nänöogænä adodanque nē manguiwengä incæcäimpa. Tömengä wëñænäni Itota Codito ingante nē pönänäni incædänimpa. Ayæ tömänäni inänite adinque, Babæidi bai quëwänäni inänipa, ante ayæ, Eñënämaï cæte quëwänänipa, ante wadäni änämaï incædänimpa, ante nē aacä Picængä iñömö wææ aacæcäimpa.

⁷ Mönö pönencabo iñömömonte nē aacä ingante Wængongui, Botö cædö ante cæcæbiimpa, ante pönö angä eñëninque tömengä Wængongui beyæ ante nē cæcä ingampa. Iinque waodäni, Nē aacä wënæ wënæ cæcä ingampa, ante änämaï incædänimpa, ante wææ cædinque nē aacä wæætë cöwë waa quëwenguëngä ingampa. Wadäni tömengä ingante apænedäni incæ tömengä wæætë, Botö ædö cæte eñenguimoo, ante änämaï incæcäimpa. Tömengä wii quingæ piinte bacæcäimpa. Tömengä ti nämæ nē nangui bewengä inämaï incæcäimpa. Tömengä piyænë cæcä incæcäimpa. Babæ cæbo incæte godonte nani æinta cöwë godömenque æncæboimpa, ante wadäni nani pönëwënonque ante nē aacä iñömö

mānīnō ante pōnēnāmaī incæcāimpa. ⁸ Wadāni inānite, Botō oncōnē pō cæedāni, ante cōwē nē watapæ angā incæcāimpa. Ayæ, Quīnō waa impa, ante mānīnonque cæinengā incæcāimpa. Nōinō cæcæimpa, ante pōnēninque nāmā wææ ante cæcā incæcāimpa. Wængonguī nānō cædō ante cōwē cædongā inte nē aacā wæætē nāmā wææ āninque nāmā nānō cæinewēnō ante cædāmaī incæcāimpa.

⁹ Ayæ adobaī Wængonguī nō pōnī nānō angainō ante mōni odōmonte apænegainō baī adobaī entawēninque tōmengā ñimpo cædāmaī quēwenguēnengā ingampa. Edæ mōnō pōnencabo iñōmonte tōmengā ædæmō apænedinque nō pōnī mōnō odōmonte apænedō ante odōmonte apænecæcāimpa. Tōmengā odōmonte apænecā eñēninque pancadāniya, Baa ante wadō ānāni incæ tōmengā wæætē tōmēnāni inānite, Mānīnō ante mīni odōmonte apænedinō wapiticæ i apa quēwēmīni, ante nē aacā inongā inte wææ ancæcāimpa, āmopa.

¹⁰ Edæ nē odōmonte apænedāni inānite, Mōnitō eñēnāmaī cæinēmōnīpa, ante nē ānāni tæiyænāni inānīpa. Tōmēnāni iñōmō ōnonquedō ante tedewēnōnāni inte, Wadāni oda cæcædānīpa, ante nē cædōnāni inānīpa tōō. Pancadāniya, Mōnō eō togænte quēwengæimpa, ante nē pōnēnāni nāni cæcabo iñōmō godōmenque nanguī pōnī mānōmaī babæ cæte quēwēnānīpa. ¹¹ Tōmēnāni, Babæ cæmōni incæte mōnitō odōmonte apænedō beyænque godonte nāni æinta cōwē æncæmōnīmpa, ante pōnente cædānīpa. Mōnō odōmonte apænedāmaī inguēnēnō ante odōmonte apænedāni eñēninque nē eñēnāni pancadāniya tōmēnāni nāni godongāmæ quēwencabo tōnō oda cæte wædānīpa cæbīi. Edæ mānīnō tōmēnāni babæ cæte nāni odōmonte apænewēnō ante odōmonte apænedāmaī incædānīpa, ante bitō, Apocænē inguēnē quēwēedāni, ante wææ ante cæquēnēmi īmīpa.

¹² Edæ Cædetabæ iñōmō nāni quēwencabo incæ adocanque tōmēnāni wængonguīdi beyæ nē apænecā iñōmō īmaī ante apænegacāimpa. “Cædetabæ quēwēnāni iñōmō cōwē babæ ante quēwēnāni inte babæidi baī wīwa cædānīpa. Tōmēnāni wæntæye ināni incæ cæowæodāni inte cænānīpa tōō.” ¹³ Mānīnō ante tōmengā nānō angainō nāwangā ante impa. Īninque Itota ingante nē pōnēnāni incæ oda cæte wædāni adinque bitō, Nō pōnēnāni incædānīpa, ante tōmēnāni inānite nanguī ancæbiimpa. ¹⁴ Ayæ, Oodeoidi dōdāni nāni ōnonquedō ante angainō ante pōnēnāmaī incædānīpa, ante bitō tōmēnāni inānite nanguī ancæbiimpa. Ayæ wadāni Wængonguī nāwangā nānō angainō ante Baa ante eñēnāmaī inōnāni incæ wadō ante wææ ānewēñōnāni bitō wæætē nē pōnēnāni inānite, Mānīnō tōmēnāni nāni wææ ānewēnō ante mīnitō eñēnte cædāmaī iedāni, ante nanguī ancæbiimpa, āmopa.

¹⁵ Edæ nē waēmō entawente quēwēnāni Īninque edæ tōmēnāni ayōnāni quincoomē i incæ tōmancoo edæ waēmoncoo īmāimpa. Wadāni guiquēnē nē wentamō entawente quēwēnāni inte Itota ingante pōnēnāmaī ināni Īninque edæ tōmēnāni ayōnāni quincoomē i incæ tōmāancoo edæ wīi waēmoncoo īmāimpa. Īñæmpa adodāni nāmā nāni apænte pōnēnō incæ wentamō entawente quēwēnāni inte tōmēnāni nāni ocaidē pōnēnō adobaī wentamō encadāni inānīpa tōō. ¹⁶ Īināni iñōmō Wængonguī ingante, ate baī pōnēmōni īmōnīpa, ante ānāni incæte tōmēnāni cædō beyænque, Īināni Wængonguī ingante nē Baa ānāni inānīpa, ante edonque pōnī bapa. Mānīnāni Wængonguī ingante eñēnāmaī cædōnāni inte edæ mōnō waa cæquēnēnō ante ædō cæte cæquīnānīi. Īninque tōmēnāni mōnō nē baacā baī inōnāni inānīpa.

2

Nō pōnī mōnō odōmonte apænedō

1 Bitō wæætē nō pōnī mōnō odōmonte apænedō ante odōmonte apænecæbiimpa.

2 Onguiñænāni picænāni inānite iīmaī ante odōmonte apænebi eñencædānimpa. Tōmēnāni tī nāmæ nanguī bete quidi quidi dowænte badāmaī incædānimpa. Waodāni mōnitō imōnite waa acædānimpa, ante onguiñænāni picænāni iñōmō nē eyepæ cæte quēwenguēnēnānimpa. Nōinō cæcæimpa, ante pōnēnīnque nāmā wææ ante cæte quēwencædānimpa. Itota ingante mōnō pōnēnō ante waodāni inānite mōnō waadete pōnēnō ante tōmēnāni nōingā cædinque quēwencædānimpa. Wæntædāmā, ante bitō quiēmē cæbi incæ cōwē waa cæe. Ayæ bitō odōmonte apænedō incæ nōingā ante odōmonte apænedinque bitō önōneque änāmaī incæbiimpa.

3 Ayæ onquiyænāni picænāni inānite adobaī iīmaī ante odōmonte apænebi eñencædānimpa. Tōmēnāni, Wængonguī nānō angainō bai mōnō tæiyæ waēmō entawengæimpa, ante quēwencædānimpa. Wadāni inānitedō ante babæ änāmaī incædānimpa. Wadāni nanguī yowepæ wædænque tī nāmæ biinōmæ nāni amæ ante, Beboe beboe, ante nē bedāni bai iināni iñōmō adobaī cæte quēwēnāmaī incædānimpa. Adodāni, Quinō waa impa, ante mānīnō ante odōmonte apænecædānimpa, ante bitō onquiyænāni picænāni inānite odōmonte apænebi eñencædānimpa, amopa.

4 Mānōmaī cæte quēwēnāni inte tōmēnāni wæætē onquiyænāni wīi picænāni inānite, iīmaī cædāni, ante ānīnque, Mīnitō nānōogæidi inānite waadete pōnēnīnque mīnitō wēñænāni inānite adobaī waadete pōnente quēwēdāni, ante odōmonte apænedāni eñencædānimpa.

5 Ayæ adobaī onquiyænāni wīi picænāni inānite odōmonte apænedinque, Nōinō cæcæimpa, ante pōnēnīnque mīnitō nāmā wææ ante cæte quēwencæmīnīnque. Mīnitō oncōnē mīni cæquēnēnō cōwē cædinque wadāni inānite ædæmō cæte quēwencæmīnīnque wadāni Wængonguī mōnō imonte nē Ængaingā ingante nāni

ante eñente cædāni, āmi eñente odōmonte apænecædānimpa. Edæ onquiyænāni picænāni mānōmainō ante odōmonte apænedāni eñēnīnque onquiyænāni wīi picænāni wæætē waa cæte quēwēnāni adinque wadāni Wængonguī nānō angainō ante ædō cæte, Wēnæ wēnæ impa, ante babæ anguiñānīi.

6 Onguiñænāni wīi picænāni ināni iñōmō adobaī tōmēnāni, Nōinō cæcæimpa, ante pōnēnīnque nāmā wææ ante cæte quēwencædānimpa, ante ædæmō apænebi eñencædānimpa.

7 Bitō tōmēnāni beyæ ante, Botō cæbaī tōmēnāni adobaī cæcædānimpa, ante bitō quiēmē cæbi incæ cōwē waa cæe. Ayæ bitō odōmonte apænedō incæ nōingā ante odōmonte apænedinque bitō önōneque änāmaī incæbiimpa.

8 Ayæ bitō imite nē Baa ante wadō änāni wæætē mōnō imonte ante apænedinque, Mōnitō ædō cæte wēnæ wēnæ anguimōnīi, ante wædinque edæ guingo imonte wæcædānimpa, ante cædinque bitō tōmēnāni inānite nōingā ante odōmonte apænecæbiimpa. Edæ mānōmaī nōinō odōmonte apænebi eñēnīnque nē eñēnāni wæætē, Wēnæ wēnæ odōmonte apænedinō impa, ante änāmaī incædānimpa.

9 Waodāni inānite ō ænāni ate awēnēidi beyænque cæte nē quēwēnāni bate wæyōnānite bitō tōmēnāni inānite iīmaī ante odōmonte apænebi eñencædānimpa. Edæ tōmēnāni awēnēidi nāni änō ante tōmānō eñente cæcædānimpa. Adobaī tōmēnāni, Mōnitō imōnite adinque awēnēidi tocædānimpa, ante cæcædānimpa. Ayæ tōmēnāni awēnēidi änāni eñēnīnque wæætedō wæætē änāmaī incædānimpa.

10 Adodāni iñōmō awēmō ænāmaī quēwēnāni inte wæætē, Mōnitō cōwē nō eñente cæmōni imōnīpa, ante adinque mōnitō awēnēidi wæætē, Waa cæmīni imīnīpa, ante pōnencædānīpa, ante nē cædāni iñōmō waa cæcædānimpa. Tōmēnāni quiēmē cædāni incæ cōwē waa cædāni

odömönte apænegaïnö waa impa, ante pönencædänimpa, ante bitö nê cædäni inänite mänömainö ante odömönte apænecæbiimpa, ämopa.

¹¹ Edæ waodäni quïnänidö inäni incæte mönö Mæmpo Wængonguï tömänäni inänite waadete pönö cædinque, Botö æmo beyænque quëwenguïmini, ante odömongä ininque edonque pönö ba agadänimpa. ¹² Tömengä nänö waadete pönö cædönö ante edonque pönö adinque mönö iïmaï ante ëñëmö imompa. Wængonguï ingante wapiticæ pönëninque mönö cædö ante mönö Baa ante ñimpo cæte quëwengæimpa. Inguipoga ante nänö wënæ wënæ cæinëwënö ante mönö Baa ante ñimpo cæte quëwengæimpa. Ñöwoyedë mönö, Nöinö cæcæimpa, ante pönëninque nämä wææ ante cæte quëwengæimpa. Wængonguï ayongä waa cæte quëwëninque ¹³ mönö Itota Codito nänö pöönæ watapæ mönö to-quïönæ ante wänö cömö imompa. Edæ Itota Codito adocä mönö Wængonguï mönö nê tæi piñænongä inongä inte mönö imonte nê Ængaingä ingacäimpa. Tömengä iñömö nê ñäö apäite bai ëmönongä inte poncæcäimpa, ante wänö cömompa. ¹⁴ Mönö wiwa cægäinö tömänö adinque tömengä iñömö, Botö æmo beyænque quëwenguïmini, ante nämä wepæ godöninque wængacäimpa. Ayæ tömengä, Botö tömëmo beyæ ante mïnitö imïnite ñä mënongate bai cæyömote mïnitö botö quïmini badinque, Quïnö waa impa, ante cæinente bacæminimpa, ante cægacäimpa.

¹⁵ Ayæ mäninonque ante odömönte apænedinque bitö waodäni inänite, ædæmö apænebi ëñencædänimpa. Wadäni wënæ wënæ cædäni iñönänite tömënäni inänite, Ædö cæte mänömaï cæminii, ante nanguï äninque awënë bai inte apænebi ëñencædänimpa. Bitö imite, Ædö cæte awënë bai cæbii, ante piinte anguinänii, ante pönente quëwencæbiimpa.

3

Nê pönëmö, Quïnö waa impa, ante mönö cæquënëö

¹ Bitö weca nê pönënanii iñönänite do mönitö angäinö nänö ëñëninö incæ bitö tömënäni inänite adodö ante apænebi ëñencædänimpa. Nê aadäni tönö gobiedöno beyæ nê änanii inänite ëñëninque mïnitö tömënäni nänö äno ante ëñente cæcæminimpa, ante apænebi ëñencædänimpa. Ayæ, Quïnö waa i, ante mäninö do cæcæminimpa, ante apænebi ëñencædänimpa. ² Ayæ æcämenque ingante wënæ wënæ ante babæ änamäi incæminimpa. Piyænë cæte quëwëninque mïnitö wadäni tönö wadodö wadö tedete piinämäi incæminimpa. Waodäni tömänäni inänite mïnitö ædæmö cæte quëwencæminimpa, ante bitö mänömainö ante apænebi ëñencædänimpa.

³ Edæ wëenënedë mönö adobäi ocai ömædæca ingaimö inte ëñënamäi cæte quëwengamöimpa. Mönö wapiticæ pönëninque oda cæte quëwengamöimpa. Quiëmë mönö wënæ wënæ cæinënö ante cæte quëwengamöimpa. Quiëmë nämämanque pönente, Waa tote quëwengæimpa, ante cædinque mönö cöwë ñimpo cædämaï inte quëwengamöimpa. Waodäni inänite cöwë wiwa pönente quëwengamöimpa. Wadäni godömenque ëadäni adinque godö piinte agamöimpa. Wadäni mönö imonte piinönäni mönö wacä ingä wacä ingä piinte quëwengamöimpa. ⁴ Incæte mönö Wængonguï mönö imonte, Quëwenguïmini, ante nê Ængaingä pöninque tömengä nänö waadete pönëmämo ante ayæ tömengä nänö ædæmö cædömämo ante do odömongacäimpa. ⁵ Tömengä wiï mönö nö cægäinö beyænque, Quëwenguïmini, ante mönö imonte ængacäimpa. Wæætë tömengä nänö waadete pönö waa cæinënö beyænque mönö imonte, Quëwenguïmini, ante ængacäimpa. Mïnitö mempoga ëñacæminimpa, ante Wængonguï mönö mïmö mënongacä entawëmompa. Ayæ Wængonguï mönö imonte æñongä tömengä Tæiyæ Waëmö Önöwoca

pönö cæcä beyænque mönö mimö entawente quëwëmompä. ⁶ Itota Codito mönö imonte, Quëwenguimîni, ante nê Ængaingä beyænque Wængonguî iñömö mönö imonte eyepæ pönî pönö cædinque tömengä Önöwoca ingante angä pö guicä ate entawente quëwëmompä. ⁷ İninque Wængonguî waadete pönö cæcä ate mönö tömengä ayongä nö cæte quëwengaimö imompä. Ayæ tömengä nänö waadete pönö cægainö beyænque nê ænguimö inte mönö, Wænämaî quëwengæimpä, ante ee pönente quëwëmompä.

⁸ Mänömainö ante nö ante impä. Edæ Wængonguî ingante do pönënanî iñömö, Quinö waa î, ante nânî pönënonque cöwë cæcædänimpä, ante bitö mäninö ante wæætë wæætë adodö ante apænebi ëñencædänimpä, ämopa. Mäninö ante waa pönî î İninque tömänänî beyæ adodö ante waa ingæimpä. ⁹ Wæætë, Æbänö î, ante nangui wæætedö wæætë önonquedö ante tedewënänî bai bitö iñömö tömënänî bai tededämaî incæbiimpä. Dodänî, Æmönänidö ingainänî, ante ancaa nânî änewënö ante pönënamäi incæbiimpä. Ayæ wæætë godö wæætë godö tedewënänî ëñëninque bitö wæætë tededämaî incæbiimpä. Ayæ idægoidi nânî wææ angainö ante godongämæ wadodö wadö piinte tedewëñönänî bitö iñömö iñänî tönö tededämaî incæbiimpä. Edæ mänömaî nânî tededö iñömö önonque tedete î İninque edæ æcämenque beyæ waa impä, ante dæ ampa cæbii.

¹⁰ Mîni pönencabo incæ adocanque mänömaî tedewengä beyænque wadäni nänëneto nänëne godinque wacabo wacabo badäni adinque bitö wæætë nê tedewëngä ingante adopoque wææ ämi ëñencæcäimpä. Adopoque wææ ämi ate tömengä ëñënamäi inte gomonga adobai cæte tedewengä adinque bitö tömengä ingante wæætë wææ ämi wæcæcäimpä. Mänömaî mempoga wææ ämi ëñëninque tömengä ñimpo cædämaî inte gomonga tedewengä ate wædinque bitö tömengä ingante

Baa äninque gomö ae. ¹¹ Edæ mänömaî cædongä iñömö tömengä idiquibæ pönëngä inte nê wënæ wënæ cæcä ingampa. Tömengä nämä nänö apænte panguinque mänömaî cæcampa, ante do ëñëmipa.

Tito quinö cæcæcäimpä, ante

¹² Botö cöönædepo iñonte Nin-copodi nânî quëwëñömö quëwencæboimpä, ante pönentabopa. İninque Adotëma incæ Tiquico incæ æcänö bitö weca goquinäa, ante pönëninque botö adocanque ingante ämo go pöñongä bitö eyepæ inte botö weca quingæ pöe, ämopa. ¹³ Abogado inte nê cæcä Teëna tönö Apodo gocæ cæyönate tömëna nänä goquinö ante nänä ænguënëno wii eyepæ ëada adinque bitö pædæ godömi ænte godæ. ¹⁴ Mönö tönö godongämæ nê pönënanî iñömö wii önonque cæte quëwencædänimpä. Wæætë edæ wadäni wii eyepæ ëadäni adinque tömënänî pædæ godönänî æncædänimpä, ante cædinque bitö apænebi ëñëninque tömënänî wæætë, Quinö waa î, ante adinque mäninonque ante cæte quëwencædänimpä.

Waa quëwencæmînimpa, ante Pabodo yewæmongampa

¹⁵ Botö tönö nê ongönänî tömänänî bitö imite, Waa quëwencæbiimpä, ante apænedänipa, ante botö, Bitö acæbiimpä, ante yewæmömopa. Mönitö imönite nê waadete pönënanî inänite bitö, Waa quëwencæmînimpa, ante mönitö beyæ ante apænebi ëñencædänimpä. Wængonguî mînitö tömämîni imînite waadete pönö cæcæcäimpä, ante mäninque ante botö yewæmömopa.

Pidemöö ingante Pabodo cadota ante nänö yewæmongainta

Pidemöö ingante Pabodo yewæmongainta

¹ Botö Pabodobo inömo inte Itota Codito ingantedö ante apænebo beyænque botö imote tee mönedäni tee mönegaïmo imopa. Mönö töninäcä Tımoteo tönö yewæmömönäpa. Pidemöö möna nē waadebi inömi inte mönatö tönö godongämæ cædömi inömite mönatö, Bitö acæbiimpa, ante yewæmömönäpa. ² Bitö oncönē inömo Itota Codito ingante mīni pönencabo godongämæ pönömīnite mönatö mīnitö imīnite adobaï yewæmömöna acæmīnimpa. Ayæ mönö mängä Apia tönö Adoquipo mönitö tönö godongämæ nē tontado baï cædongä tönö tömēna acædaimpa, ante yewæmömönäpa. ³ Mönö Mæmpo Wængonguï tönö Awēnē Itota Codito tönö godongämæ waadete pönö cæda ate mīnitö gänē entawencæmīnimpa, ämönäpa.

Pidemöö nē waadete pönengä inte wede pönengä ingä

⁴⁻⁵ Bitö Awēnē Itota ingante wede pönēmi imipa, ante tömengä quinäni inönäni inänite waadete pönēmi imipa, ante bitö imitedö ante änäni eñēnimo inte botö bitö beyæ ante Wængonguï ingante botö apæneyedē adocä ingante cöwē waa ate pönente apænebopa. ⁶ Mäninö Itota Codito ingante bitö wede pönēnō ante wadäni inänite cöwē apænebi eñēninqe tömēnāni, Mönö tömengä waa pönī nänö entawēnoncoo incæ quincodö entawēmö imöö, ante ædæmō eñente bacædänimpa, ante nanguï cæcæbiimpa, ante botö bitö beyæ ante Wængonguï ingante apænebopa. ⁷ Botö töninäbi eñēmi. Itota Codito quinäni inönäni inänite bitö waadete pönente cæbi ate tömēnāni gancæ entawente

todänitapa, ante apænedäni eñēninqe botö nanguï watapæ todinqe wampo pönentabopa.

Pabodo Önetimo beyæ ante Pidemöö ingante angampa

⁸ Mänömaï beyæ mönö Awēnē Codito botö imote angä eñēninqe botö awēnē baï äninqe bitö cæquēnēnō ante, İmaï cæe, ante guñēnāmaï inte bitö imite wææ ämo baï waa incædönimpa. ⁹ Incæte botö wææ änāmaï inte wæætē mönö waadete pönēmāmo beyænque ædæmō apænebopa. Botö Pabodobo inömo inte nē picæmo imopa. Ayæ nōwo botö Itota Codito ingantedö ante apænebo beyænque botö imote tee mönedäni tee mönegaïmo inte ämopa. ¹⁰ İninqe botö wengä onguñængä Önetimo beyæ ante bitö imite ædæmō apænebopa. Edæ tee mönecönē botö quēwēnedē Önetimo ingante apænebo eñēninqe tömengä nē pönengä badinqe botö wengä baï bacä æntabopa cæbii.

¹¹ Wēēnēnedē tömengä bitö beyæ waa cædāmaï inte önonque quēwengacäimpa. Incæte tömengä nōwo inömo bitö beyæ incæ botö beyæ incæ nē waa cæcä bacäimpa. ¹² Tömengä botö nē waadecä ingä incæte tömengä ingante botö bitö weca ocæ emænte da godömo poncæcäimpa. ¹³ Itota ingantedö ante mönö watapæ apænedö beyænque botö imote tee mönedäni ongöninqe botö, Pidemöö dæ añonte Önetimo inömo tömengä beyæ botö weca ongöninqe botö tönö guëa cæcæcäimpa, ante pönēninqe äinentabopa. ¹⁴ Incæte æbāmenque pönö waa cæbi incæ wii botö wææ änö beyænque cæcæbiimpa. Wæætē tömēmique pönente cæcæbiimpa, ante cætabopa. Bitö eñēnāmaï inte Ao änāmaï inömite botö ædö cæte Önetimo ingante, Bitö botö weca ongoncæbiimpa, ante anguïmo. ¹⁵ Önetimo bitö imite wantæyö wodii godingä inte nōwo adodö

põõngante bitö tömengä ingante wæætē æñömi tömengä cöwē bitö tönö quēwencæcäimpa. Wabänö mänüi ante beyænque wantæyö wodii gocantawo. ¹⁶ Tömengä ingante bitö godonte ænte mämi ate tömengä bitö beyænque cæte nē quēwēningä ingä incæte tömengä ñöwo wüi nē cæte quēwēnānique bai inongä ingampa. Wæætē edæ Itota Codito ingante pönengä badinque tömengä ñöwo godömenque bitö tönñacä inongä inte bitö nē waadecä ingampa. Edæ tömengä botö nē nangui waadecä ingampa. Ayæ wüi bitö nē cædonganque inongä inte tömengä wæætē mönö Awēnē quingä ingampa. Mänömai beyæ tömengä godömenque bitö nē waadecä inongä ingampa.

¹⁷ Ìninqe bitö, Pabodo tönö guëa cæmöna imönapa, ante pönēmi ìninqe bitö botö imote æmi bai Önetimo ingante adobai æmaimipa. ¹⁸ Bitö imite wēnæ wēnæ cæcantawo. Bitö imi quiēmē ante æninqe wæætē pönönāmai ingantawo. Ìninqe tömengä nänö pönönāmai ìninö ante bitö botö imote wæætē, Pönömi æmoe, ämi eñēninqe botö pædæ pönömo æmaimipa. ¹⁹ Botö Pabodobo inömo inte tömēmo önopoca inte imainö ante yewæmömopa. Tömengä quinö nänö pönönāmai ìninö ante botö wæætē tömänö pönömo æncæbiimpa. Botö edæ bitö imite wüi Itota Codito ingantedö ante odömonte apænebo bai bitö ayæ pönönāmai inte quēwencædömiimpa. Ìninqe botö apænedö beyæ bitö botö imote wæætē pönönāmai ingä bai inömi imipa. Incæte botö mänömai beyæ bitö imite wüi ancæboimpa. ²⁰ Botö tönñabi eñēmi. Mönö Awēnē beyænque bitö botö beyæ pönö cædinque Önetimo ingante waadete pönencæbiimpa, ante wæbopa. Edæ mönö Codito nempo quēwēmöna ìninqe bitö waadete pönente cæbi ate botö gancæ entawente tocæboimpa, ämopa.

²¹ Bitö cöwē eñente cæquimi imipa,

ante do eñēnimo inte botö, Bitö acæbiimpa, ante yewæmömopa. Edæ botö änö eñente cædinque bitö godömenque cæquimi imipa, ante eñēmopa. ²² Ìninqe adodeque ayæ äinēmopa. Minitö botö beyæ ante Wængongui ingante mini apænedö beyæ botö imote ñimpo cædäni ate bitö weca acæ poncæboimpa, ante pönēmopa. Ìninqe bitö oncönē adocönē botö owoquincö ante tömää ædæmö cö cæquimi, ämopa.

Pidemöö ingante Pabodo, Waa quēwencæbiimpa, angä

²³ Epapada botö bai adobai Itota Codito beyænque nāni nē tee mönegaingä inömo tömengä botö imote, Pidemöö waa quēwencæcäimpa, ante angä eñēninqe botö bitö imite yewæmömopa. ²⁴ Mäadoco tönö Aditadoco ayæ Deëma tönö Odoca botö tönö godongämæ cædäni inömo adobai botö imote, Pidemöö waa quēwencæcäimpa, ante änāni eñēninqe botö bitö imite yewæmömopa.

²⁵ Mönö Awēnē Itota Codito bitö imite waadete pönö cæcæcäimpa. Mäninqe ante botö yewæmömopa.

Ebedeoidi inānite cadota ante nāni yewæmongainta

*Wængonguī beyæ tōmengā Wengā
pōnō apænegacāimpa*

¹ Wængonguī wēēnēñedē wantæ wantæ iñō apænedinque wantæ iñō wadō bai cædinque wantæ iñō wadō bai cædinque tōmengā beyæ nē apænedāni inānite tæmpo pōnō apænegā eñengadānimpa. Eñēninque tōmēnāni wæætē adodō ante mōnō mæmæidi inānite tæmpo apænegadānimpa.

² Nōwo guiquēnē mānīnō ante Wængonguī dodāni inānite nānō apænegaiōnæ idæwaa bayonte tōmengā apænegā eñēninque tōmengā Wengā wæætē mōnō imonte pōnō apænegacāimpa. Wēēnē pōni inguipoga dæ iī emōnæ dæ añonte Wæmpocā tōmengā Wengā ingante, Badōe, angā eñēnte cæyongā tōmengā nānō cædō beyæ Wæmpocā tōmancoo badongacāimpa. Mānōmaī beyæ nē badongā iñongante Mæmpo Wængonguī wæætē, Tōmancoo nē ænguingā iñōmō botō Wengā adocanque nē ænguingā ingampa āmopa, angacāimpa. ³ Mæmpocā nē tæi emōnongā inte ñāō emongā iñongā tōmengā Wengā iñōmō adobai nē tæi emōnongā inte ñāō emongā ingampa. Iñinque, Wængonguī Wengā nō pōni entawēninque nānō quēwengainō bai Mæmpocā iñōmō edæ adobai pōni entawēnongā inte edæ nōingā cæte quēwengā ingampa, ante mōnō edonque eñengæimpa. Iñinguipo incæ iī emōnæ incæ a ongoncoo incæ awēmō iñōmō ongoncoo incæ tōmengā Wengā adocā tæi piñænte nānō angāinō beyænque tōmancoo edæ nōwo ganca cōwē ongoncoo incoopa. Ayæ nāmā wepæ godonte wæninque adocā iñōmō wēnæ wēnæ mōnō cæpāmo ante ñā mēnongagacāimpa. Mānōmaī nē ñā

mēnongaingā inongā inte tōmengā do æidinque Wængonguī nē tæi emongā tōmēmængā inō tæ contadinque ongongampa.

Tōmengā ñæncængā iñongā anquedoidi pōnōmenque ināni

⁴ Mānōmaī æi contadinque tōmengā nē ñænængā iñongante Wængonguī iñōmō, Bitō emōwo bitō cōwē ænguēnengaiwo, ante pemongacāimpa. Wængonguī anquedoidi guiquēnē wii adobai ñænænāni iñōnānite Wængonguī tōmēnāni inānite adobai ante pemōnāmaī ingacāimpa. ⁵ Edæ anquedoidi iñōnānite æcāmenque ingante Wængonguī dicæ,

“Botō Wēmi inōmi imipa.

Ñōwoōnæ bitō Mæmpobo babopa,”

Ante angantawogaa. Ayæ adobai,

“Botō tōmengā Mæmpobo incæboimpa.

Iñinque tōmengā botō Wengā incæcāimpa,” ante anquedo ingante anāmaī ingacāimpa.

⁶ Wæætē tōmengā Wengā Tānocā iñongante inguipoga da pōnōninque Wængonguī,

“Botō anquedoidi tōmānāni iingā onōwa inō ædæ wææninque, Bitō Wængonguī Wēmi imidō anguēnē, ante watapæ apænegacādanimpa,” ante apænegacāimpa.

⁷ Ayæ wæætē anquedoidi inānitedō ante apænedinque,

“Tōmengā godō cæcā ate tōmengā anquedoidi iñōmō woboyæ nanguī pæmæ bai quingæ pōni cæcædānimpa.

Ayæ tōmengā godō cæcā ate tōmengā beyæ nē waa cædāni iñōmō gonga bæcoguēnewate bai nanguī cæcædānimpa.”

⁸ Ante apænedinque tōmengā Wengā ingante guiquēnē Wængonguī incæ iīmaī angacāimpa.

“Bitō nē Wængonguī inōmi inte eñēmi. Awēnē Odeye badinque Awēnē contaimpaa tæ contagāimi inte bitō ñimpo cædāmaī inte cōwē

Awënë Odeyebi inömi inte on-goncæbiimpa.

İninqe Awënë Odeyebi inömi inte bitö nempo quëwënäni inänite nō pōni cæte aadinque yaëmē töëmē pōni næænte bai nē ämi incæbiimpa.

9 Nē Wængonguïmo inömo inte botö inömo bitö Awënë Wængonguïmo imopa. İninqe botö, Nō cæte mönō quëwenguïnō ante nē waadebi inömi inte bitö eñenāmaï nāni cæinō ante edæ wii ainēmi imipa.

Mänömaï imi ante adinque botö iïmaï pōnō cæbopa. Bitö tönō godongämæ ongönāni Awënë badinque bitö watapæ tocæbiimpa, ante cædinque botö, oguinguipæ pōnō gao caate bai nanguï cægaboimpa.”

10 Ante Mæmpo Wængonguï angacäimpa. Ayæ adobaï tömengä Wengä ingante apænedinque, “Bitö Tæiyæ Awënë inömi inte wëenëñedē pōni inguipo mä cō cæte bai cædinque tömēmi badongabiimpa, angacäimpa. Ayæ öönædē ongoncoo adobaï tömēmi bitö onompoca badongaincoo inte ongoncoopa.

11 Mänincoo guiquënë iincayæ ate wido cæte bai bayonte Bitö guiquënë cōwē ongonguïmi imipa. Mänincoo guiquënë mönō weocoo pedæncoo woincoo bai bayonte,

12 waocä yacooque æninqe topo cæcä bai cædinque bitö wæætē bitö badongaincoo ænte topo cæte bai cæcæbiimpa. Wæætē miincoo wëñacä bai cædinque bitö wæætē tömancoo miincoo badömi ongongæimpa. Bitö inömo do bitö ingaï bai adobaï cōwē inguïmi imipa. Bitö quëwenguïmämo cōwē inguïnō anguënë.”

13 Äninqe Wængonguï tömengä Wengä ingante iïmaï angacäimpa.

“Botö tömëmæ inö tæ contate ongönömite, botö bitö imite nē piinte cædäni inänite bæ tabo tæ wæænāni ate bitö tæi emömi inte pinä gawate bai godö cæbi wæcædänimpa,” angacäimpa.

Tömengä Wengä ingante mänömainö ante nē angaingä inte Wængonguï dicæ anquedoidi inänite adobaï angantawogaa. 14 İnæmpa Wængonguï anquedoidi inömo baö ömaadäni inte Wængonguï beyæ nē waa cædäni inänipa. Mänömaï inönänite tömengä, Botö æmo beyænque nē quëwënäni beyæ minitö godö cæcæminimpa, ante da pōnongä pōninqe tömënäni mönō beyæ pōnō waa cædänipa.

2

Wængonguï ængä beyænque quëwëmompä, ante

1 Mänömaï beyæ mönō Awënë apæncä eñëninque mönō eñengainö ante mönō ñimpo cædämaï inguinque ante mönō wede pōnente ædæmō eñente cæcæimpa. 2 Edæ anquedoidi incæ Wængonguï beyæ apæneyönäni tömënäni nāni änö ante dodäni wæætē nē eñente cæquënänäni ingadänimpa. İninqe æcänö wii eñëninque wapiti cæda tömengä nē tente wæquënegä inongante dodäni nō cædinque pangadänimpa.

3 İnänäni eñëedäni. Wængonguï nänö, Quëwencæminimpa, ante angainö ante æcänö mönō imonte täno apæncantawo, ante pönëedäni. Wængonguï Awënë inongä incæ tänocä apænegaingä inte, Botö tömëmo æmo beyænque quëwencæminimpa, ante apænegacäimpa. Ayæ Wængonguï nänö apænegainö eñente Ao äninqe wadäni godömenque mönō imonte, Näwangä impa, ante apænedäni eñënimö inte mönō ædæmō eñengæimpa. Edæ eñenāmaï inte bai ñimpo cæmō ininqe Wængonguï dicæ pänāmaï inte ata cæpocampa quëwenguïmöö.

4 İninqe, Quëwencæminimpa, ante näwangä botö änö ante eñencædänimpa, ante cædinque

Wængonguī godōmenque cægacāimpa. Tōmengā, Æcānō tōnō cæquīmoo, ante, Æyōmōnō cæquīmoo, ante, Æyedēnō cæquīmoo, ante nāmā nānō angainō bai cædinque iīmaī pōnō cægacāimpa. Tōmengā, Botō mā cæbo ate waodāni ēñencædānimpa, ante nanguī cægacāimpa. Ayæ, Æbānō cæcāā, ante wæcædānimpa, ante tæi pīñæninque wadō wadō cædinque hamōnengæ edæ nanguī cægacāimpa. Tōmengā Ōnōwoca ingante da pōnongā pōninque tōmengā wæætē Wængonguī nānō angaināni inānite pōnō cæcā æninque tōmēnāni tōmānāni Wængonguī Ōnōwoca nānō pōnongā ænganca cægadānimpa. Ininque Wængonguī mānōmaī pōnō cæcā adimō incæ mōnō ēñēnāmaī cæmō bai tōmengā wæætē mōnō imonte ædō cæte ata cæpoquēnengāā.

Itota Codito tōmengā tōniñadāni bai adobaī bagacāimpa

⁵ Ayæ mīnguipoga Awēnē nempo mōnō quēwenguīmāmo ante apænemōnīpa. Ininque mīnguipoga mōni ānonguipoga Wængonguī, Æcāmenque ingante āmo awēnē baquingā, ante cædinque, Anquedoidi incæ awēnēidi bacædānimpa, ante dicæ angantawogaa. ⁶ Wacā wataa yewæmōninque iīmaī ante Wængonguī ingante āmotamīni ante bai yewæmongacāimpa.

“Wængonguī ēñēmi. Waomōni ōnōmōnique iñōmōnite bitō ædō cæte waadete cæbii.

Wao wēmōni ēñagāimōni iñōmōnite bitō ædō cæte pōnō waadete cæbii.

⁷ Anquedoidi inānite æmōnga ææntodōninque bitō waocā ingante gao wænō gö cæbi ate tōmengā wantæ iñō pōnōmenque ongongantapa.

Ayæ, Waocā nē tæi emōnongā inte ñāō emōñongante wadāni tōmengā ingante waa acædānimpa, ante pōnō badongabiimpa.

⁸ Edæ bitō badongaincoo tōmancoo waocā nempo pōnōmi æninque

waocā tæi emōngā inte nē angā bagacāimpa.”

Ante nānō yewæmongaine bai cædinque Wængonguī tōmengā nānō badongaincoo tōmancoo Waocā nempo pōnongā æninque Waocā nē angā bayongā wacoo wayōmō ongoncoo edæ dæ ampa. Incæte, Tōmengā nempo tōmancoo do ongōmpa, ante mōnō ñōwo ganca ayæ adāmaī imōmpa. ⁹ Doyedē mōnō waocabo iñōmonte Wængonguī waadete pōnō cædinque Itota ingante angā ēñēninque tōmengā wæætē mōnō tōmāmō wænguīmāmo beyæ ante cōwē wæwocate wæquingā bagacāimpa. Mānōmaī cædinque Wængonguī anquedoidi inānite æmōnga ææntodōninque, Itota wæætē caate wæncæcāimpa, ante cædinque tōmengā ingante gao wænō iñōmō gönongā ongongacāimpa. Incæte Itota caate wængā beyæ Wængonguī poganta tæiyæ waēmō da wencate bai cædinque, Itota nē tæi emōnongā inte ñāō emōngā adinque wadāni tōmengā ingante waa acædānimpa, ante pōnō cægacāimpa. Ininque Itota Tæiyæ Awēnē wencate ongongā ingante do amōmpa.

¹⁰ Tōmancoo nē badongaingā inongā inte Wængonguī tōmancoo nē enempodongā inte iīmaī angacāimpa. Botō Wēmi ēñēmi. Wadāni incæ botō wēnāni nanguī ināni quēwencædānimpa, ante nē badōmi bitō baquinque caate wæcæbiimpa. Mānōmaī caate bitō wædō beyænque ædæmō picæmi bate nē ēñēnīmi inte bitō botō wēnāni inānite ñāō iñōmō ænte māmōmi poncædānimpa. Pōninque tōmēnāni botō ñāō emōmo bai adobaī ñāō emoncædānimpa, ante Wængonguī nō pōni cægacāimpa. ¹¹ Itota mōnō imonte, Tæiyæ waēmō ewocate quēwencæmīnimpa, ante nē badongā inongā mōnō tōmengā tōnō adomō mōnō cabo imōmpa. Mānōmaī imō beyæ tōmengā mōnō imonte ante apænedinque, Botō tōniñamīni imīnipa, ante guiñēnedāmaī tede-campa. ¹² Iīmaī ante apænecampa.

“Wængonguī ēñēmi. Bitō ēmōwo ante botō tōniñadāni inānite apænebo ēñencædānimpa.

Tömēnāni godongāmæ ongonte ēñēñōnāni botō, Wængonguī iñōmō Tæiyæ Waēmō inongā inte waa pōni cæcā abopa, ante āmotamīni ante bai ancæboimpa.”

¹³ Ayæ adobai apænedinque,

“Wængonguī ingante botō wede pōnente quēwencæboimpa,” angacāimpa.

Ayæ wæætē adobai apænedinque,

“Wængonguī botō imote apænedinque, Bitō wēnāni, ante pōnongā ænōmo inte botō, Mōni wencabo mæ ongōmōni aedāni, āmopa.”

Itota incæ Wængonguī beyæ nāni yewæmongainō bai adobai apæncampa.

¹⁴ Mōnō wænguimāmo ante wēnæ awēnē incæ nē angā iñongante Itota, Botō nāñe wæninque tōmengā ingante edæ omæe ewencæboimpa, ante iīmaī cægacāimpa. Mōnō Itota wēñæmō inōmō inte mōnō baō tōnō wepæ ñōmænguīñō ēñamō bai tōmengā nānō wænguinque adobai ñōmænguīñō ēñagacāimpa. Ininque tōmengā nāmā nānō wænō beyænque wēnæ awēnē ingante bæ tacā ate tōmengā wæætē piñænāmaī aquiī bate nē angā ināmaī ingampa. ¹⁵ Ayæ wēnæ awēnē nempo ñā cæyænte bai quēwēninque mōnō wænguimāmo ante guīñente wæyōmonte Itota mōnō beyæ ante wæætē wæninque mōnō imonte gā pe æmpote o ængā beyænque quēwēmompā.

¹⁶ Edæ wīi anquedoidi inānite ænte pæ mancæte ante cædinque tōmengā wæætē Abadāo wodi pæimō iñōmonte mōnō imonte pōnō æninque pæ mangampa.

¹⁷ Māninō beyæ Wængonguī, Bitō tōniñadāni bai adobai badinque bitō, Wængonguī quī, ante nē nō Pōnōmi Ñænæmi pōni incæbiimpa. Ayæ bitō tōniñadāni inānite cōwē pōnēninque waadete pōnō waa cædinque ædæmō aacæbiimpa, ante tōmengā ingante da

pōnongā pongacāimpa. Ayæ adobai, Bitō tōmēnāni wēnæ wēnæ nāni cædō beyæ nāmā wepæ godoncæbiimpa, ante cædinque Wængonguī Itota ingante da pōnongā pōninque tōmengā mōnō ēñamō bai adobai ēñadinque waomō mōnō inōmō bai adobai badinque Waocā inongā ingacāimpa. ¹⁸ Mōnō inguipoga quēwēninque wēnæ wēnæ mōnō cæinēnō beyæ wæwēmompā. Wēnæ awēnē, Itota oda cædinque Wængonguī ingante ēñēnāmaī cæcæcāimpa, ante cæyongā Itota iñōmō mōnō wæwēnō bai adobai wæwengā incæte oda cædāmaī ingacāimpa. Ininque wēnæ wēnæ cæinente wæwēñōmonte tōmengā adobai do wægaingā inte, Mīnitō tæi piñænte ongōninque oda cædāmaī incæminimpa, ante pōnō tōo æmænte cæcampa.

3

Itota Ñæncængā iñongā Mōitee wodi wædangā ingacāimpa

¹ Mōnitō imōnite aa pedinque Wængonguī mīnitō imīnite adobai aa pedinque, Tæiyæ waēmō entawencæminimpa, ante badongacāimpa. Ininque botō tōniñamīni ēñēdāni. Itota iñōmō Wængonguī nānō nē da pōnongaingā ingacāimpa, ante mōnō pōnēnō ante mōnō, Nāwangā impa, ante apænemompā. Ayæ, Wængonguī quī, ante nē Godongā Ñænængā pōni iñōmō Itota adocā ingampa, ante mōnō pōnēnō ante, Nāwangā impa, ante apænemompā. Ininque mīnitō guiquēnē, Itota æbānō ingacāimpa, ante onōwēnenque pōnente quēwenguēnēmīni imīnipa.

² Wængonguī angā ēñēninque Mōitee wodi guiquēnē tōmengā ingante cōwē pōnente cædinque Wængonguī tōnō nāni godongāmæ quēwencabo inānite ædæmō cæte aagacāimpa. Tōmengā nō cæte nānō aagai bai adobai cædinque Itota iñōmō Wængonguī angā ēñēninque tōmengā ingante cōwē pōnente cædinque tōmengā tōnō

mönö godongämæ quëwencabo ïmonte ædæmō cæte aacantapa.

³ Edæ, Oncö waa ongompa, ante waa amö incæ mönö oncö nē badöningä ingante godömenque waa ate apænegacæimpa. Adobai, Möitee wodi nē waa aacä ingacæimpa, ante tömengä ingante waa amö incæ mönö edæ Itota nē badongaingä ingante godömenque nanguï waa ate apænegacæimpa. ⁴ Waocä oncö guiquënë wii tömenque ongompa. Edæ waocä mænongä ate oncö edæ ongö amïnipa. Inguipo incæ adobai öönädē ongoncoo adobai wii tömenque ongoncoopa. Mänincoo tömancoo Wængonguï nänö badongaincooque ongoncoo acæimpa. ⁵ Möitee wodi guiquënë Awënë Wængonguï ingante nē cæcä ïnongä inte tömengä tönö nāni godongämæ quëwencabo ïnānite cōwē pönëninque ædæmō cæte aagacæimpa. Mänömaï cædinque tömengä, Wængonguï æbänö ïncayæ ate apænequingä, ante odömöninque, Näwangä impa, ante apænegacæimpa. ⁶ Mönö Codito guiquënë Wæmpocä Wengä Onguïñengä ïnongä inte Wæmpocä tönö nāni godongämæ quëwencabo ïnānite cōwē pönente nöingä pönï cæte pönö aacampa. Edæ mönö guiquënë, Codito waa pönï pönö cæcä beyænque watapæ bacæimpa, ante mönö pönönö ante wadāni eññönāni waa tote apænemompa. ïnque mönö guïñenāmaï inte mäninö mönö pönönö ante ædæmō entawëninque ïnque baganca ñimpo cædāmaï ïmō ïnque tömengä tönö mönö godongämæ quëwencabo ïmaïmompā.

*Wængonguï quïnāni nāni guëmanguïmäms
ante*

⁷ Mänömaï beyæ Wængonguï Tæiyæ Waëmö Önöwoca nänö angainö ante mönö eñente cæcæimpa. Tömengä nänö apænegainö ante ïmainö ante yewæmongatimpa.

“Nöwoönæ incæ tömengä apænegä eñëninque,

⁸ minitö, Mimö ömädē bawënāmaï incæmönimpa, ante cædinque Baa änāmaï ïedāni.

Dodāni ïñömö, Wido cæcæimpa, ante nāni önomæca quëwente cæyedē, Wængonguï ingampa diyæ panguingä, ante pönëninque wiwa cægadānimpa. Mänömaï cædinque tömënāni Baa ante mimö ömädënāni nāni bawengai bai minitö adobai bawënāmaï ïedāni.

⁹ Minitö mæmæidi mäññömö quëwëninque botö ïmote wiwa cædāni wægaboimpa.

Incæte botö mäññedē coadenta wadepo ïñonte waa cæbo agadānimpa.

¹⁰ Mäññedē quëwënāni mänömaï cædāni beyæ botö tömënāni ïnānite pünnique ïimaï angaboimpa.

‘Botö taadö goquënenāni incæ taadö cōwē adāmaï ïnāni inte tömënāni ancaa oda cædinque mimö ömädënāni inte bai wadö godānipa.’

¹¹ Änque botö ænguï badinque, Botö nē Quëwëmo ingaimo inte nöingä ämopa, äninque,

Guëmädäni, ante botö angaiñömö tömënāni cōwē guite guëmänāmaï incædānimpa, angaboimpa.”

Ante Wængonguï nänö angainö ante yewæmongadānimpa.

¹² ïñänāni eñnedāni. Mini pönencabo ïñöminite minitö wacä ingä wacä ingä waa adinque adocanque incæ mimö ömädengä badāmaï incæcæimpa, ante wææ aedāni. Ayæ adocanque incæ wënæ wënæ entawengä badinque wiya æmænte Wængonguï nē Quëwengä ingante emö cæte godāmaï incæcæimpa, ante wææ aedāni.

¹³ Nöwoönæ, ante nē angä nänö angaiönæ ïñömö ayæ ñowo ganca eönæpa. ïnque minitö ñowoönæ incæ wacä ingä wacä ingä ædæmō apænedinque, Æcāmenque incæ wiwa nāni cædö beyænque oda cæte wædinque mimö ömädengä badāmaï incæcæimpa, ante cædinque ïimö ïñö ïimö ïñö godongämæ ïñacabo

cædinqe tæi ongödäni. ¹⁴ Edæ mönō wēnēñedē wede pōnengamōimpa. Nōwo adobai pōnēninqe iinqe baganca wede pōnēmō iinqe mönō Codito nempo godongāmæ quēwēmaimompa.

¹⁵ Iinqe adode ante pōnente cæcæimpa.

“Nōwoönæ incæ tōmengä apænecä eñēninqe mīnitō, Mōnitō mīmō omædēmōni bawēnāmai incāmōnimpa, ante wææ cædinqe Baa änāmai iedäni.

Edæ dodäni, Wido cæcæimpa, ante cædinqe edæ Baa ante mīmō omædēnāni nāni bawengai bai mīnitō adobai bawēnāmai iedäni.”

¹⁶ Wængonguī angä önōmoncaque eñēninqe, Wido cæcæimpa, ante ædānidō cægadānii. Edæ Mōitee wodi Equitobæ nānō nē ænte gogaināni adodäni incæ, Wido cæcæimpa, ante cægadānimpa. ¹⁷ Ayæ adobai Wængonguī coadenta wadepo iñonte ædānidō inānite piīninqe ænguī bagacāi. Edæ nē eñēnāmai inte wēnæ wēnæ cædāni inānite Wængonguī piīnte ænguī bacā ate tōmēnāni baō ingai önōmæca yabæque wæænte õñongatimpa. ¹⁸ Ayæ, Pō guīte guēmædäni, ante botō angaiñōmō cōwē guīte guēmānāmai incædānimpa, ante Wængonguī, Botō nē Quēwēmo inōmo inte nōingä angaboimpa, angacāimpa. Edæ ædānidō inānite mænōmai angacāi. Edæ nē eñēnāmai cædāni inānite mænōmai angacāimpa. ¹⁹ Iinqe nē pōnēnāmai ināni inte tōmēnāni nāni pōnēnāmai inō beyænque guīdāmai ingadānimpa.

4

¹ Botō nempo guīdinqe guēmancæmōnimpa ante wēnēñedē nānō angainō ante Wængonguī nōwo incæ adodō ante cōwē angampa. Mænōmai beyæ mīni pōnencabo tōmāmīni tōmengä nempo guīdinqe guēmanguēnēmīni iñōmīnite adocanque incæ oda cædāmai incæcāimpa, ante cædinqe

mōnō godongāmæ waa adinqe wææ aacæimpa. ² Edæ dodäni inānite Wængonguī ingantedō ante watapæ nāni apænegainō bai mönō imonte adobai ante watapæ apænedäni eñēmompa. Incæte dodäni guīquēnē önōmoncaque eñēninqe wede pōnēnāni beyænque guēmānāmai inte wægadānimpa. ³ Mönō nē wede pōnēmō imō guīquēnē Wængonguī nempo guīdinqe mīmōnē do guēmāmompa. Edæ Wængonguī nempo mönō guēmanguēnēnō ante botō äninta adotaa iīmānō ante yewæmonte ongō bai batimpa.

“Botō ænguī badinqe, Botō nē Quēwēmo ingaimo inte amopa, äninqe,

Pō guīte guēmædäni, ante botō angaiñōmō tōmēnāni cōwē guīdāmai incædānimpa, angaboimpa.”

Ante Wængonguī beyæ ante yewæmongadānimpa.

Incæte doyedē inguipoga iī emōnæ badōninqe Wængonguī tōmengä nānō cæquēnēnō ante iinqe badōninqe, Idæwaa, angacāimpa. ⁴ Wængonguī önōmpo æmæmpoque go adoönæque iñonte iinqe cædinqe iīmō wæiyō nānō guēmangaionæ ingatimpa, ante iīmai ante wataa yewæmonte ongompa.

“Önōmpo æmæmpoque go adoönæque iñonte iinqe cædinqe iīmō wæiyō ñimpo cædinqe Wængonguī guēmangacāimpa.”

⁵ Ayæ botō äninta adotaa iīmai ante yewæmonte ongompa.

“Pō guīte guēmædäni, ante botō aññōmō tōmēnāni cōwē guīdāmai incædānimpa,” angampa, ante yewæmongatimpa.

⁶ Iinqe Wængonguī nānō pōnō cædō ante watapæ ante apænecä eñēnāni inte tōmēnāni nāni eñēnāmai cægainō beyæ guīdāmai ingadānimpa. Iinqe, Wængonguī tōmengä nānō angainō iinqe cæcæimpa, ante cædinqe iīncayæ quēwēnāni pancadāniya cōwē guīquēnēnāni inōnānimpa.

⁷ Mænōmai beyæ, Æönædō eñēnguēnēmīni

īmīni, ante odōmoncæte ante cædinqwe Wængonguī, “Ñowoönæ,” ante awënë Dabii ingante wantæpiyæ ate apænecä eñengacäimpa. Ìninqwe mäninö botö do ante yewæmōmo mīni adinö bai ante Dabii wodi ïmainö ante yewæmongacäimpa.

“Ñowoönæ incæ tömengä apænecä eñëninque mīnitö, Mīmō ömædēmōni bawënämaī incæmōnimpa, ante cædinqwe Baa änämaī ïedäni,” ante yewæmongacäimpa.

⁸ Edæ docä Ootowee wodi tömënäni ïnänite doyedë manguicä guiidinqwe Cänaämæ quëwengadänimpa. Incæte tömënäni mänïömæ do guidīnāni inte näwangä guëmānāni bai Wængonguī ïincayæ ate, Ñowoönæ guëmancæmīnimpā, ante wæætë änämaī incædongäimpa. ⁹ Ìninqwe mönō Wængonguī quīmō ïñömō edæ guëmanguïönæ guëmante bai mönō tömengä nempo quëwëninque mīmōnë guëmāninque cætawente wädämaī ingäimpa. ¹⁰ Wængonguī ïinque badōninque tömengä nänō cæquënënō tömää cædinqwe ñimpo cædinqwe guëmangacäimpa. Tömengä nänō ñimpo cæte guëmangaī bai waocä ïñömō Wængonguī nempo guiidinqwe në guëmangä ïñömō adobai tömengä nänō cæquënënō ante, Tömänō do cætimpā, ante adinqwe ñimpo cædinqwe guëmangampā. ¹¹ Dodäni nāni eñënämaī cægaī bai ñowodāni adobai cædāni ïninqwe tömënāni nāni tæ go wæænguinque cæbainānimpā. Mänōmaī ï ïninqwe, Adocanque incæ mänōmaī cæte tæ go wæænāmaī incæcäimpa, ante wææ cædinqwe mönō tömāmō, Wængonguī nempo guiite mīmōnë guëmangæimpa, ante nanguī cæcæimpa.

¹² Wængonguī nänō änō ïñömō mīine quëwëne inte tæi piyænë ënepā. Edæ yaëmë yægāmë tipængaa engamë bamencaa guibæ watii co bai Wængonguī nänō änō ïñömō adobai cædinqwe mönō önōwoca incæ do cote bai guipā. Ayæ bamë tadōmengadämë tæi guñænte

bamīi edonque a bai Wængonguī nänō änō ïñömō adobai mönō mīmō incæ tadōmengadæ tæi guñænte bai cædinqwe mönō pönënō ante mönō cæinënō ante do edonque ba adinqwe adode incæ apænte bai ampa. ¹³ Wængonguī në apænte änongä ïñongante mönō nāmā incæ, Æbänō cægāmōnii, ante tömengä ingante töingä apænequënëmō ïmompā. Edæ, Wængonguī ayongä tömengä nänō badongaincoo tömancoo edæ gä ængate ömægacoo bai inte wodönāmaī ongompā.

Wængonguī ingante në Godongä Ñæncængä Itota ingampā

¹⁴ Mönō beyæ, Wængonguī quī, ante në Godongä Ñænængä pōni ïñömō Wængonguī Wengä Itota ingampā. Tömengä ïñömō nāmā wepæ godonte do wængaingä inte ñāni ömæmōninque öönædë æite ongongampā. Ìninqwe mönō, Tömengä ingante wede pönëmōnimpā, ante në apænemō inte mönō wede pönënō ante ædæmō pæ mangæimpa. ¹⁵ Wængonguī quī, ante mönō beyæ në Godongä Ñænængä pōni ïnongä ïñömō wënæ wënæ cædāmaī ingacäimpa. Incæte aquīi imō inte wæmō adinqwe tömengä wæætë, Botö Waobo eñadinqwe aquīi bate wægäimo inte, Aquīi mīni wädö æbänō ï, ante do edæ eñëmopā, angampā. Edæ wënæ awënë tömengä ingante, Wënæ wënæ cæe, angä do wægaingä inte tömengä mönō wënæ wënæ cæinënō, Æbänō ï, ante do eñengampā. ¹⁶ Ìninqwe mönō Awënë ïñömō nanguī waadete pönengä inte Awënë containpaa ongongampā cæmōö. Mönō wënæ wënæ cædinö ante tömengä pönō ñimpo cæcæcäimpa, ante cædinqwe mönō tömengä weca ponte apænecæimpa. Mönō caate wæyedë tömengä pönō töö æmænte cæcæcäimpa, ante mönō tömengä weca ponte apænecæimpa. Mänōmaī Awënë ongompaa gäänë pōninque mönō guñënāmaī inte apænemō

ēñēninque tōmengä waadete pōnō waa cæcä ængæimpa.

5

¹ Wængonguī qui, ante bitō botō imote nē pōnōmi ñænæmi pōni bacæbiimpa, ante æcänō ingante Wængonguī angä bacää.

Edæ waocä adocanque ingante apænte æninque Wængonguī angä ate tōmengä iñōmō nē waocä inongä inte waodäni beyæ Wængonguī weca cæcampa. Ìninque waodäni iingä weca pōninque, Wængonguī qui, ante pædæ pōnōnāni æninque tōmengä wæætē Wængonguī ingante godongampa. Ayæ, Wænæ wænæ cæmōni incæte Wængonguī waadete pōnō ñimpo cæcæcäimpa, ante cædinque waodäni, Wængonguī qui, ante cæningä ænte pōninque pædæ pōnōnāni ængampa. Æninque nē godongä ñænængä iñōmō nē waocä inongä incæte cæningä ingante ænte wænōninque nē ænte pōnāni nāni wænæ wænæ cædinō beyæ ante baö iya tangampa.

² Ìninque wadäni, Æbämē impa, ante ēñēnāmaï nāni wædō ante nē godongä ñænængä iñōmō nē waocä inongä inte adobaï pancaa ēñēnāmaï inte wæcampa. Ayæ oda cæte nāni wædō ante tōmengä adobaï oda cæte wæcampa. Ìninque wadäni baï aquingä inongä inte tōmengä gänē pōñēninque wadäni inānite ædæmō cæte odōmongä adānipa.

³ Mänōmaï inongä inte tōmengä wadäni wænæ wænæ nāni cædinō beyæ ante, Wængonguī qui, ante iya täninque adobaï, Botō nāmā wænæ wænæ cædinō beyæ godōmopa, ante iya tante Wængonguī ingante godongampa.

⁴ Waocä nāmā incæ, Botō, Wængonguī qui, ante nē godōmo ñænæmo bayōmote wadäni botō imote waa acædänimpa, ante ædō cæte anguingä. Ìñæmpa Wængonguī angä beyænque Aadōō wodi nē godongä ñænængä bacä baï wadäni adobaï Wængonguī angä beyænque nē godōnāni ñænænāni badānipa.

⁵ Codito incæ, Nē godōmo ñænæmo badinque nē tæï emōmo inte ñäö emōmo acædänimpa, ante nāmā ante wii angacäimpa. Wængonguī incæ tōmengä ingante,

“Bitō botō Wēmi inōmi imipa.

Ñöwoönæ bitō Wæmpobo babopa.”

⁶ Angacäimpa. Ayæ godōmenque Wængonguī nānō angainō ante wataa yewæmongatimpa.

“Wængonguī qui, ante nē pōnongä Mēequitedeco nānō cōwē ingaï baï,

bitō adobaï ñimpo cædāmaï inte nē Pōnōmi cōwē incæbiimpa,” ante Codito ingante angacäimpa.

⁷ Codito iñōmō Waocä ēñate quēwēninque Ca ca wædinque Yæ yæ äninque Wængonguī ingante nangui apænegacäimpa. Wængonguī bitō adobique eyepæ imi inte wææ ämi ñininque botō wænāmaï imaimopa, angacäimpa. Incæte, Bitō, Wæe, ämi ate botō wæncæboimpa, ante nānō Ao äninō beyænque Wængonguī tōmengä ingante do ēñengacäimpa. ⁸ Wæmpocä Wēñængä inongä incæte Itota nānō caate wæwēmāmo beyænque Wængonguī nānō änō ante ædæmō ēñente cædinque picængä bagacäimpa.

⁹ Tōmengä nānō änō ante nē ēñente cædōmō iñōmonte tōmengä ædæmō ēñēninque picængä bagaingä inte edæ mōnō imonte ængä beyænque mōnō cōwē wænāmaï inte quēwēmompā.

¹⁰ Tōmengä ingante Wængonguī apænte æninque, Mēequitedeco nē pōnongä ñænængä pōni nānō ingaï baï bitō adobaï botō imote nē Pōnōmi Ñænæmi pōni inōmi imipa, angacäimpa.

Mönō wede pōnēnō ante Baa änāmaï ingæimpa, ante

¹¹ Mäninō ante botō mīnitō imīnite godōmenque nangui apænequēnēmo imopa. Incæte, Æiquedō ēñenguimīni, ante pōnente wædinque botō, Æbānō cæte apænebo ēñenguimīni, ante wæbopa. ¹² Ìñæmpa mīnitō doyedē mīni ēñengainō ante ñöwo nē odōmōmīni baquēnēmīni imīnipa.

Incæte wacä wæætē mīnitō īmīnite Wængonguī nānō angainō ante adodeque adodeque ante odōmonte apæneca ēñenguēnēmīni adodō bamīni awædō. Edæ wēñænāni nē goömæ gānāni bai wæætē bamīni īñōmīnite botō ædō cæte tæēmō cænguī godonte bai apænebo ēñenguīmīnii. ¹³ Goömæ nē gangā bai ingā īñōmō tōmengā wēñængā bai īñongante mōnitō, Æbānō nō cæquī, ante odōmonte apænemōni incæte tōmengā īñōmō cōwē ēñēnāmaī ingampa. ¹⁴ Wæætē æcānō cōwē waa cæda īna īñōmō tōmengā, Quīnō waa īi, ante, Quīnō wēnæ wēnæ īi, ante wæætē wæætē ante cædinque do ēñente badinque picængā bai bacampa. Īnīnque ædæmō picænāni nē badāni beyænque mōni nō odōmonte apænedō īñōmō cænguī tæēmō bai ongompa.

6

¹ Mōnō Codito inguipoga quēwēnīnque wēnæ wēnæ cæte awædō, ante ocæ ēmænte ponguīnānii. Īñæmpa dodāni Wængonguī Wengā ingante awæ timpote wænōnāni bai cædinque īināni wæætē tōmengā ingante adodō wænonte bai cædānīpa. Ayæ tōmēnāni nāni æmæwo ēwente wæquinque tōmānāni ayōnāni Wængonguī Wengā ingante badete tote bai cædānīpa. ⁷ Edæ cōōnæ wantæ wantæ cæ ate waodāni cōñe inguipoga tōmēmō quiyadāni wææ pæte incapa. Incate amīmō ba ate nē quiyadīnāni nangui tā pete eyepæ ænāni Īnīnque Wængonguī wæætē onguipo tōmenguipo waa pæ ate adinque, Waa pæguipo abopa, angampa. Adobai tōmengā nānō ānō ante wantæ wantæ īñō apænedāni ēñēnīnque waodāni gānē pōnēnāni badinque wadāni īnānite waadete cædāni ate Wængonguī mānīnāni īnānite, Mīnitō waa ēñente cæmīni abopa, ante pōnō waa cæcampa. ⁸ Ōmentacooque pæguipo daacamenque pæguipo quiquēnē nānō æmæwo tante ēwengūnque ōnongūpoque impa.

ēñēnāmaī īnīnō ante wæætē nangui apænebo ēñencæmīnīmpa.

⁴ Wængonguī mōnō mīmōnē pōnō tica ēnente bai cædinque edonque odōmonte apæneca ēñēnīnque mōnō ñāō bai entawēmompa. Tōmengā oōnædē waa pōnī nānō da pōnongaincoo do ænte quēwēmompa. Ayæ tōmengā Tæiyæ Waēmō Ōnōwoca ingante da pōnongā ænīnque mōnō tōmengā tōnō āanque bai ēwocamompa. Mānōmaī ēwocamō incæte pancadāniya wadæ godāni inte edæ ædō cæte, Wēnæ wēnæ cæte awædō, ante ocæ ēmænte ponguīnānii. ⁵ Tōmēnāni īñōmō, Wængonguī nānō ānō waa pōnī impa, ante do ēñēnīnāni inte ayæ, Wængonguī mīinguipo nānō badōñedē māniñedē mīimāmoque ba ate tæi piñænte cæcæimpa, ante do ēñēnānīpa. ⁶ Incæte mānīnō nāni wede pōnēnīnō ante Baa ante wadæ godāni bai tōmēnāni edæ ædō cæte īincayæ ate, Idæwaa

ēñēnāmaī īnīnō ante wæætē nangui apænebo ēñencæmīnīmpa.

Māninguipo iya tanguī bai waocā adobai Wængonguī nānō ānō ante nē Baa angā iñōmō tōmengā nānō æmæwo ewenguinque Baa angampa.

Watapæ bacæimpa, ante pōnēninque tæi ongōmōmpa

⁹ Iñānāni eñēedāni. Wadāni mǎnōmaī iñānīpa, ante yewæmōmōni incæte mōnitō ayōmōni mīnitō wīi tōmēnāni bai iṁīni amōnīpa. Wæætē Codito ængā beyænque nē quēwenguīmīni inōmīni inte mīnitō cōwē waa cæmīni iṁīni amōnīpa. ¹⁰ Edæ mīnitō cōwē waa cædinque Wængonguī ingante waadete pōnēninque tōmengā quīnāni beyæ godō waa cægaimīni inte ñōwo godōmenque cæmīnīpa, ante adingā inte Wængonguī dicæ mīni cædō ante pōnēnāmaī inguingāā. Wæætē nē nō cædongā inte tōmengā mīni cædō ante cōwē pōnengampa. ¹¹ Codito beyænque watapæ bacæimpa, ante mīnitō wede pōnēmīnīpa. Iñinque mīnitō mǎnīnō mīni wede pōnēnō ante iñinque baganca wede pōnencæte ante cædinque mīni waadete pōnō cægāinō bai adobai iñinque baganca cōwē cæedāni, amōnīpa. ¹² Edæ nē wede pōnēnāni wæntæye iñāmaī iñāni iñōmō edæ Wængonguī, Pōnōmo æedāni, ante nānō angaincoo cōwē æncædānīpa. Mīnitō iñōmō, Tōmēnāni æbānō cædānīi, ante adinque tōmēnāni nāni cædō bai adobai cædinque wæntæye iñāmaī inte Wængonguī nānō angaincoo adobai æncæmīnīpa, amōnīpa.

¹³ Wængonguī, Botō ānō bai cōwē cæcæboīpa, ante Abadāo wodi ingante angacāīpa. Mǎnōmaīnō ante nāwangā īpa, ante Abadāo eñencæcāīpa, ante cædinque tōmengā, Wacā emōwo godōmenque tæi piñængā emōwo ante apænebo eñēninque do eñencæcāīpa, ante cæyongante wacā nē tæi piñængā guiquēnē edæ dæ angacāīpa. Iñinque Wængonguī iñōmō nāmā emōwo ante apænedinque, Wængonguī

eñēe, ānīnque iñāmaī angacāīpa. ¹⁴ “Botō bitō īmite pōnō waa cæbo ate bitō pæīnāni nangūi yebæninque bacoo bacædānīpa. Botō Wængonguīmo nē Quēwēmo inte amōpa.” ¹⁵ Ante do angā eñengaingā inte Abadāo wodi wantæpiyæ ænāmaī inte wānō cōñongante Wængonguī tōmengā nānō angāinō bai pōnō cæcā ængacāīpa.

¹⁶ Wadāni guiquēnē, Nāwangā amōpa, ante eñencædānīpa, ante cædinque wacā emōwo godōmenque tæi piñængā emōwo apænedinque ānānīpa. Mǎnōmaī cædinque waocā, Botō godōmenque nē tæi piñængā tōnō guēa cæte bai ānīmo inte ædō cæte babæ ante wadō cæquīmoo, ante bai apæneyongante wacā Ao angā ate tōmēna nāna guēa cæcaya badapa.

¹⁷ Wængonguī iñōmō, Botō wadō bai ānāmaī inōmo inte mǎnīi botō angāinō bai cōwē cæcæboīpa, angacāīpa. Ayæ, Mǎnōmaī īpa, ante botō angaincoo nē ænguīnāni ædæmō eñencædānīpa, ante cædinque Wængonguī nāmā emōwo apænedinque, Botō Wængonguīmo nē Quēwēnōmo inte nāwangā amōpa, angacāīpa. ¹⁸ Tōmengā, Botō pōnō cæbo beyænque watapæ bacæīpa, ante nānō angāinō ante æncæte ante mōnō Wængonguī gāmēnō do wodii wīnonte pōmōīpa. Iñinque tōmengā weca do pōnīmō iñōmonte tōmengā wæætē, Mēnea beyæ mōnō watapæ bacæīpa, angampa. Ayæ, Mīnitō wampo pōnēninque edæ botō tōnō edæ godōmenque cæcæmīnīpa, ante tōmengā ædæmō apænecampa. Mēnea ante apænebo eñēedāni. Botō Wængonguīmo inōmo inte nāmā Wængonguī emōwo apænebo beyæ nē eñēmīni inte mīnitō mǎnīne beyæ pōnencæmīnīpa. Ayæ godōmenque wade ante, Wængonguī incæ ædō cæte babæ wapiticæ anguingāā, ante pōnencæmīnīpa. Mǎnōmaī Wængonguī mēnea ante cægacāīpa.

¹⁹ Iñinque wipo gæguīncamē inte tæi iñānōcadodāni ate wāi wocæ bai mōnō iñōmō edæ, Mānīne mēnea

beyæ watapæ bacæimpa, ante mönō wede pönēnō beyæ tæi ongömō inte mönō ædō cæte wadæ goquii. Mönō wede pönēnō beyænque edæ Wængongui oncönē weocoo wææ owoyōmo tadōmengadæncönē guii öönæde ñä cæte bai i ïninqe mönō öñowoca iñömō edæ tæi ongonte bai ewocamompa. ²⁰ Itota iñömō tāno beyænte öönæde æidinque mönō beyæ ante mänincönē do wäänē guigacäimpa. ïninqe Mëequitedeco nē godongä ñænængä nänō ingai bai badinque Itota, Wængongui qui, ante nämä wepæ nē Godongä Ñænængä pōni ïnongä inte edæ cōwē ongongampa.

7

Mëequitedeco bai Itota nē Godongä Ñænængä ingampa

¹ Mëequitedeco guiquēnē Tadēē nāni añömō quēwēnāni awēnē odeye ïnongä inte tömengä, Wængongui Æibæ pōni nē Quēwengä qui, ante nē godongä ingacäimpa. ïñongante Abadäo wodi wadāni awēnē odeyēidi ïnānite wænonte pōñongante Mëequitedeco eyepæ pō bee tēninqe, Abadäo ēñēmi, angantapa. Bitō ïmite Wængongui pōnō waa cæcæcäimpa. ² Ante pōnō waa apæneyongante Abadäo iñömō awēnēidi wodi nāni mangaincoo tömengä nänō ö ænincoo baco pōni incoo adinque önompo tipæmpoga mänimpocato cabo ti gæte cō cædinque, Wængongui qui, äninque Mëequitedeco ingante adocatoque pædæ godongä ængacäimpa.

Mëequitedeco nē awēnē odeye iñongante tömengä emōwo pemonte bai cædinque wadāni, “Awēnē ïnongä inte tömengä nē nō cæcä ingampa,” ante angadänimpa. Ayæ, Tadēē “Gänē pönēñömō” nāni angaiñömō quēwēnāni awēnē odeye ingampa, ante pönēninqe tömēnāni, “Awēnē odeye ïnongä inte tömengä nē gänē pönengä ingampa,” ante wawo pemongadänimpa. ³ Tömengä badä ömaacä ingä bai, tömengä wæmpocä

ömaacä ingä bai, tömengä nänō ēñagaiönæ ömaacä ingä bai, tömengä nänō wængaiönæ ömaacä ingä bai ante dodāni tömengä ingantedō ante yewæmongadänimpa. Mänōmai i ïninqe mönō, Wængongui Wengä nänō cōwē ingai bai Mëequitedeco adobai, Wængongui qui, ante nē cōwē godongä ingampa, ante pönengæimpa.

⁴ Tömengä ñænængä pōni ingacäimpa, ante botō iimai ante apænebo pönēdāni. Wængongui qui, ante nē godongä ñænængä pōni Mëequitedeco ingampa, ante pönēninqe mönō wæmæ Abadäo wodi incæ tömengä nänō ö ænincoo önompo tipæmpoga mänimpocato ongō adinque adocatoque æninque Mëequitedeco ñænængä ingante pædæ godongä ængacäimpa. ⁵ Mönō Abadäo wodi pæimō iñömō tömancabomō ïñömō incæte adocabodāniya mönō tōniñadāni Debiidi pancadāniya guiquēnē, Wængongui qui, ante nē godōnāni bagadänimpa. Bayönānite Möitee wodi tömēnāni ïnānite iimai angacäimpa. Minitō tōniñadāni ïnānite ämini ēñēninqe tömēnāni wæætē tömēnāni nāni ænincoo önompo tipæmpoga mänimpocato ongō adinque adocatoque pædæ pönōnāni æncæminimpa, ante wææ angä ēñēninqe tömēnānique, Wængongui qui bacæimpa, ante nē ænāni ïnānipa. ⁶ Mëequitedeco guiquēnē Debii wodi pæingä ïnāmai ingaingä incæte adocatoque angä ēñēninqe Abadäo wodi pædæ godongä ængacäimpa. Do iñömō Wængongui incæ Abadäo ingante apænedinque, Bitō qui, ante botō cōwē pönōmo æncæbiimpa, angacäimpa. Incæte wantæpiyæ ate Wængongui nänō nē angaingä iñongante Abadäo ingante apænedinque Mëequitedeco iñömō, Wængongui bitō ïmite pōnō waa cæcæcäimpa, ante pōnō waa apænegacäimpa.

⁷ Mönō ayömō guiquēnē, Ñænænāni ïñōnāni iñömō tömēnānique öñōnānique ïnānite nē godō waa apænedāni

inānīpa, ante do ēñēnīmo inte mōnō wadō ante ædō cæte pōnenguī. Īnīnque, Abadāō wodi ōnonganque īñongante Mēequitedeco nē ñænængā īnongā inte edæ mǎnōmaī waa apænegacāīmpa, ante mōnō edonque ēñēmōmpa. ⁸ Mǎnīnāni Debiidi guiquēnē nē ñōmæīntai ēñadāni inānīpa. Incæte tōmēnāni inānite wadāni, Wængonguī quī bacæīmpa, ante adocatoque cōwē pōnōnāni ænānīpa. Īngā Mēequitedeco guiquēnē ñōmæīntai ēñadāmaī baī ingaingā inte nē quēwengā ingampa, ante yewæmongatīmpa. Tōmengā mǎnōmaī nē quēwengā baī īñongante Abadāō wodi tōmengā ingante, Wængonguī quī, ante adocatoque godongā ængacāīmpa.

⁹ Mǎnōmaī impa, ante pōnēnīnque botō, Ēñencæmīnīmpa, ante ñōwo godōmenque yewæmōmo aedāni. Tōmēnāni nāni ænīnō ōnōmpo tipæmpoga ganca mǎnīmpocato ongō adīnque, Wængonguī quī, ante adocatoque pædæ godōñōnāni Debiī nāni pæīncabo incæ nē ænāni inōnānīmpa. Incæte Debiī wodi wæmpocoo ingaingā īnongā inte Abadāō wodi adocatoque do godongā īnīnque tōmengā pæīngā inguingā Debiī īñōmō wæmpocoo tōnō āanque baī adocatoque do godonte baī ayæ ate ēñate quēwengacāīmpa. ¹⁰ Edæ Abadāō wodi nānō pæīnāni Debiidi inānīpa. Īnīnque Debiī ayæ ēñadāmaī īñongante tōmengā wæmpocoo Abadāō wodi ingante Mēequitedeco pō bee tente adocatoque ænīnque Debiī nānō ænguēnencoo incæ pancacooga adobaī ængacāīmpa.

¹¹ Wængonguī doyedē angā ēñēnīnque Debiidi pancadāniya, Wængonguī quī, ante nē godōnāni bagadānīmpa. Ayæ Wængonguī, Īmaī cæedāni, ante angā ēñente yewæmōnīnque Debiidi wæætē wadāni inānite odōmonte apænedāni ēñengadānīmpa. Incæte Debiidi, Wængonguī quī, ante nāni godōnō beyænque mōnō Wængonguī ayongā

mōnō ædæmō pædāni baī edæ dicæ entawente bamongaa. Īñæmpa mǎnīnāni nāni godōnō beyænque nē picænāni baī bamō baī ñōwo wacā nē Godongā ingante Wængonguī da pōnōnāmaī incædongāīmpa. Ayæ, Wængonguī quī, ante nē Pōnongā incæcāīmpa, ante Codito ingante da pōnōnīnque Wængonguī, Debiī wodi pæīngā Aadōō nānō pōnongaī baī Codito adobaī pōnoncæcāīmpa, ante ānāmaī inte wæætē, Mēequitedeco nānō pōnongaī baī cædīnque Codito pōnongā beyænque wadāni botō ayōmō nē nō cædāni bacædānīmpa, angacāīmpa. ¹² Ayæ, Wængonguī quī, ante nāni godoncabo īñōnānite Wængonguī, Idæwaa cæmīnīpa, ānīnque wacā ingante, Bitō wæætē botō imote nē Pōnōmi bacæbiīmpa, angacāīmpa. Ayæ wacā mǎnōmaī nē Godongā bacā beyæ Wængonguī, Īmaī cæedāni, ante nānō wææ angainō ante wēā godonte baī cædīnque wade ānīnque wææ angā ingacāīmpa.

¹³ Īnīnque Wængonguī ñōwo, Nē Pōnōmi bacæbiīmpa, ante nānō nē angaingā īñōmō Debiidi nāni cabo ināmaī inte wæætē wacabocā īnongā ingampa. Incæte ñōwocā Codito guīdēnāni īñōmō, Wængonguī quī, ante nāni iya tāīmpaa cōwē godōnāmaī inōnānīmpa. ¹⁴ Edæ, Wængonguī quī, ante oodaīdi nāni cabo nē godōnāni incædānīmpa, ante Mōītee wodi dicæ angacāīñaa. Incæte, Mōnō Awēnē īñōmō Oodaa wodi pæīngā ingacāīmpa, ante edonque acæīmpa. ¹⁵ Īnīnque Mēequitedeco nānō ingāī baī wacā wæætē, Wængonguī quī, ante nē Godongā bacā adīmō inte mōnō godōmenque edonque ēñengæīmpa. ¹⁶ Edæ Ñōwocā tōmengā mæmæīdi wīī nē godōnāni ingadānīmpa. Īnīnque, Bitō mæmæīdi nāni godongaī baī bitō adobaī godonte ēñēe, ante ædō cæte anguīī. Wīī tōmengā mæmæīdi nāni cægāī baī cædīnque tōmengā nē Godongā bagacāīmpa. Wæætē cōwē nē wænāmaī Quēwenguingā inte tōmengā

nämä nänö tæi piñænö beyænque nē Godongā bagacāimpa. ¹⁷Edæ tōmengā ingante apænedinque Wængongui,

“Mēequitedeco, Wængongui qui, ante nē pōnongā cōwē nänö ingai bai,

bitō adobai ñimpo cædāmai inte nē Pōnōmi cōwē incæbiimpa,” ante apænegacāimpa.

¹⁸ Ìninqe, Ìimai cæedāni, ante Mōitee wodi wēenēñedē nänö wææ angaine incæ aquiline inte önoneque bai iñonte wēā godonte bai bagatimpa.

¹⁹ Edæ Mōitee wodi, Ìimai cæedāni, ante nänö wææ angainō ēñente beyænque mōnō Wængongui ayongā ædæmō pædāni bai dicæ entawente baquimōō. Wængongui wæætē, Codito pōnō cæcā beyænque wat-apæ quēwencæminiipa, ante ñōwo pōnō apænegacāimpa. Ìninqe, Mänōmai impa, ante pōnēninque mōnō Wængongui weca pōmompā.

²⁰ Wængongui wii önonque angacāimpa. Wæætē tōmengā nämā emōwo apænedinque, Botō Wængongui nē Quēwēnōmo inte nāwangā amopa, aninqe Codito ingante angā ate tōmengā wæætē, Wængongui qui, ante nē Godongā bagacāimpa. Wæætē wadāni inānite guiquēnē tōmengā wii nämā emōwo apænedinque, Nāwangā amopa, ante anāmai ingā incæte tōmēnāni önonque, Wængongui qui, ante nē godōnāni bagadānimpa. ²¹ Codito ingante guiquēnē Wængongui iimai ante apænegacāimpa.

“Bitō ñimpo cædāmai inte, Wængongui qui, ante nē Pōnōmi cōwē incæbiimpa.

Ante botō nē Tæiyæ Awēnē inōmo inte nōingā aninqe

iincayæ ate wadō ante cōwē anāmai incæboimpa.”

²² Wængongui, Itota botō imote nē Pōnongā inongā inte mīnitō beyæ cæcā ate mīnitō Ao amini ininqe mōnō godongāmæ waa cæcæimpa, aninqe Wængongui mōnō imonte ñōwo godōmenque waa pōni

apænegacāimpa. Ìninqe Wængongui mänōmai nämā emōwo apænedinque, Nāwangā amopa, aninqe Itota nänö nē angāingā iñongante mōnō Itota ingante pōnēninque, Wængongui nänö angainō bai cōwē cæcæcāimpa, ante do ēñēmompā. ²³ Mänināni guiquēnē nē ñōmæintai ēñagāināni inte ædō cæte ñimpo cædāmai inte Wængongui

ingante nē godōnāni cōwē inguināni. Ìninqe wii adocanque nē godongā ingacāimpa. Wacā wacā nē godōnāni bagadānimpa. ²⁴ Itota iñōmō nē wænāmai quēwēnongā inte tōmengā, Wængongui qui, ante nē Godongā inongā inte cōwē quēwengampa.

²⁵ Edæ tōmengā nē wænāmai Quēwēnongā inte Wængongui ingante mōnō beyæ ante cōwē apænedinque, Botō bitō gāmænō nē māmōmo pōnāni inānite bitō pōnō waa cæcæbiimpa, ante ñimpo cædāmai inte cōwē apænecampa. Wængongui ingante cōwē apænecā inongā inte tōmengā cōwē quēwēninque ædæmō pōnō angā beyænque mōnō wæætē cōwē wænāmai quēwenguimō imompā.

²⁶ Wadāni nāni ēñēnāmai cæcabo bai wii inongā inte Itota iñōmō tæiyæ waemō inongā ingampa. Wentamō mongænāmai inongā iñongante tōmengā ingante ædō cæte piinte apænte anguināni. Mänōmai ingā adinqe Wængongui tōmengā ingante önædē æmonga pōni ængō cæcā ongongampa. Ìninqe tōmengā adocanque pōni, Wængongui qui, ante nē nō Godongā Ñænængā pōni inongā inte mōnō wædō ante eyepæ pōni pōnō cæcampa. ²⁷ Wadāni

nē godōnāni ñænænāni pōni ināni guiquēnē tōmēnāni tāno godōninque nämā nāni wænæ wænæ cædō beyæ ante, Wængongui botō imote waa acæcāimpa, ante cæningā wepæ iimō iñō iimō iñō godōnānipa. Ayæ ate wadāni nāni wænæ wænæ cædō beyæ adobai godōnānipa. Itota guiquēnē wænæ wænæ nāni cædō bai cædāmai inongā inte nämā beyænque godōnāmai ingacāimpa. Ayæ wamō mōnō wænæ wænæ cædō

beyæ wæætē wæætē godōnāmaī inte tōmengā eyepæ īnongā inte adopoque pōnī godongacāimpa. Īnīnque tōmengā nāmā wepæ godōnīnque eyepæ pōnī godongā adīnque Wængonguī wæætē mōnō īmonte waa acampa.

²⁸ Mōitee wodi nānō wææ angainō ante ēñente cædinque waodāni aquīī īnāni nāni cabo īñōnānite pancadāniya īnānite ānāni Wængonguī ingante nē godōnāni ñænænāni do badānīpa. Wængonguī guiquēnē īincayæ ate nāmā ēmōwo apænedīnque, Botō Wengā ædæmō Picængā nē ēñengā bagaingā ingante āmo ate tōmengā nē Pōnongā Ñænængā bacæcāimpa. Botō Wængonguīmo nē Quēwēnōmo inte nāwangā āmopa, angacāimpa.

8

Wængonguī ñōwo nānō angainō ante Itota īnīnque cæcā

¹ Mānōmaīnō ante quīnante yewæmōmōnī. Edæ, Mōnō wædō beyæ ante, Wængonguī quī, ante nē Godongā Ñænængā pōnī inte ongongampa, ante, Nāwangā impa, ante edonque ēñencæminīmpa, ante yewæmōmōnīpa. Tōmengā īñōmō oōnædē æīdīnque Awēnē Wængonguī tōmēmængā īnō tæ contadīnque Tæiyæ Awēnē inte ongongampa, ante yewæmōmōnī adīnque ēñencæminīmpa. ² Mānōmaī īnongā inte tōmengā wīī waocā nānō mænongaincōnē cæcampa. Wæætē Wængonguī, Owocæboīmpa, ante tæiyæ waēmō nānō mænongaincōnē Itota īñōmō mōnō beyæ ante, Wængonguī quī, ante nē Godongā Ñænængā pōnī inte cæcampa.

³ Inguipoga quēwēnāni guiquēnē adocanque ingante, Wængonguī quī, ante bitō nē godōmī ñænæmī pōnī bacæbiīmpa, ānāni badīnque tōmengā nē tā nē tā cædinque māīncoo cōwē godonguēnengā ingampa. Īnīnque māningā Itota guiquēnē adobaī nē Godongā Ñænængā pōnī īnongā inte adobaī godonguēnengā ingampa.

⁴ Edæ, īīncooque godoncæminīmpa,

ante Mōitee wodi wææ angā ēñente cædinque inguipoga nē godōnāni guiquēnē do eyepæ pōnī godōnāni īnānīpa. Īnīnque tōmēnāni nāni godō baī Itota īñōmō ædō cæte godonguēnengā inguingāā. Inguipogaque quēwengā inte baī tōmengā īñōmō edæ Wængonguī ingante nē godongā īnāmaī incædongāimpa.

⁵ Tōmēnāni guiquēnē, Wængonguī oōnædē nānō owocō cōwē ongō baī inguipoga adobaī mænonte māīncō ōwocodenganque baī īñōnte acæīmpa, ante adobaī pōnī mænongadānīmpa. Mānōmaī mænōnīnque tōmēnāni māīncōnenque, Wængonguī quī, ante nē godōnāni inte cædānīpa. Īnīnque Wængonguī, Adobaī pōnī mænōīncō ongongæīmpa, ante cædinque Mōitee wodi nē mænonguingā ingante doyedē angacāimpa. “Mōitee ēñēmi. Bitō, Æbānō mænonguīī, ante, Æbānō badonguīī, ante botō onquiyabo īñōmō bee tente odōmōmo adīnque badoncæbiīmpa. Bitō cōwā adīnque botō odōmōnō baī īīncō adobaī mænōnīnque īīncōnē ongoncoo tōmancoo adobaī pōnī badoncæbiīmpa,” angacāimpa.

⁶ Wængonguī, Botō Mōitee tōnō wææ ānīnque, Īīmaī cæedāni, āmo ate Ao āmīni īnīnque mōnō godongāmæ waa cæte quēwengæīmpa, ante wēēnēñedē nānō angainō wædænque waa ingatīmpa. Ñōwo guiquēnē tōmengā, Itota ængā beyænque quēwēminī inte Ao āmīni īnīnque mīnītō botō tōnō godongāmæ waa cæte quēwencæminīmpa, ante nānō ānō īñōmō godōmenque waa pōnī impa. Edæ Wængonguī nānō ānō īīnque bacæīmpa, ante Itota incæ nō cægacāimpa. Ayæ adobaī māīnō nē godōnāni nāni cædō guiquēnē wædænque waa īñōnte Itota nānō nō cædō guiquēnē godōmenque waa pōnī impa.

⁷ Mānīne edæ, Mōnō godongāmæ waa cæte quēwengæīmpa, ante Wængonguī wēēnēñedē nānō angāīne īñōmō mōnō quēwenguīnō ante eyepæ

- ī bai Wængonguī ñowo wade ante
 änāmaī incædongäimpa. ⁸ Incæte
 waodāni wentamö mongænāni ad-
 inque Wængonguī doyedē apænedinque
 “Botö pönö cæbo ate mīnitö Ao ämīni
 īnīnque mönö godongämæ waa
 cæte quëwengæimpa,
 Ante botö nē Awënē inömo inte
 idægoidi inānite oodaaidi
 inānite iincayæ ate mīine ante
 mā pönī apæne cæboimpa.
- ⁹ Mæmæidi doyedē Equitobæ
 quëwëñönānite botö töö
 æmænte ænte poncæte ante
 cædinque,
 tömēnāni inānite, Mönö godongämæ
 waa cæcæimpa, äñömote
 tömēnāni wæætē pango cæte
 gogadānimpa.
 Pango cæte godāni ate botö wæætē
 dadi ëmæmonte tömēnāni
 inānite adāmaī ingaboimpa.
 Mänömaī beyæ botö wëenēñedē botö
 angainö bai
 ñowo wæætē adobainö ante änāmaī
 incæboimpa, ante botö nē
 Awënemo inömo inte ämopa.
- ¹⁰ Māniñedē ate edæ idægoidi inānite
 botö,
 İimaī pönö cæbo ate mīnitö Ao ämīni
 īnīnque
 mönö godongämæ waa cæte
 quëwengæimpa, äninque edæ
 İimaī cæcæboimpa.
 İimaī cæedāni, ante botö wææ änö
 ante godö apænebo ëñēninque
 mänīne ante mīmönē yewæmonte bai
 entawēninque
 tömēnāni nē wede pönēnāni incædānimpa
 Tömēmo tömēnāni Wængonguimo
 iñömote tömēnāni wæætē botö
 quīnāni incædānimpa.
- ¹¹ Māniñedē botö angaiñedē ba ate
 edæ waocä tömengä guiidengä
 ingante
 ayæ wacä ingante odömonte
 apænedinque,
 Bitö Wængonguī ingante ate bai
 pönencæbiimpa, ante quīnante
 anguingää.
- İñæmpa māniñedē ate guiiyanga pönī
 inongä incæ ñænængä pönī
 inongä incæ
 tömēnāni tömānāni botö imote do ad-
 inque pönencædānimpa.
- ¹² Edæ tömēnāni ëñēnāmaī nāni
 cædö ante botö pānāmaī
 inte waadete godö ñimpo
 cæcæboimpa.
 Ayæ tömēnāni wënæ wënæ nāni
 cægainö ante adāmaī inte bai
 botö pönēnāmaī incæboimpa,”
 ante Wængonguī apænegacäimpa.
- ¹³ Äninque ñowo, Æmo beyænque
 quëwēmīni inte mīnitö Ao ämīni
 īnīnque mönö godongämæ waa cæte
 quëwengæimpa, ante mā pönī äninque
 Wængonguī wëenēñedē, İimaī cæedāni,
 ante nänö wææ angaine ante, Woīne
 inte eyepæ ināmaī ingaine ënepa, ante
 bai cæcampa. Woīne iñömö oo dæ
 baquīne ënepa.

9

Wængonguī Tæiyæ Waëmö oncö bai æmontaicö impa

- ¹ Wængonguī wëenēñedē dodāni
 inānite, Botö pönö cæbo ate mīnitö
 Ao ämīni īnīnque mönö godongämæ
 waa cæte quëwengæimpa, an-
 gacäimpa. İninque tömengä nänö
 wææ angainö bai cædinque tömēnāni,
 Wængonguī ingampa, ante tömengä
 beyæ cæquēnēnāni ingadānimpa.
 Ayæ inguipoga tömengä owoquincö
 tæiyæ waëmö oncö mænöninque
 tömengä weca pöninque cæquēnēnāni
 ingadānimpa. ² Angä ëñēninque
 dodāni, Wængonguī nänö owoquincö,
 ante æmontaicö badöninque weocoo
 odemontai wodönedinque mencönea
 badongadānimpa. Yabæcönē, Tæiyæ
 Waëmö Oncö impa, ante nāni ancönē
 iñömö māniñömö gongapæncade
 doyæncade tæiyæ ti wodönoquī en-
 cadocade ongongatimpa. Ayæ
 awæmpaa badöninque tömēnāni,
 Wængonguī beyæ tæiyæ waëmö
 päö öñongæimpa, ante cædinque
 mänimpaa päö ñö cædāni öñongatimpa.

3 Weocoo wacoo nāni guimon-gademō wodōiñōmō guimongacō iñōmō Tæiyæ Waëmoncō Pōni nāni angaincō ingatimpa. 4 Mānincōnē ogui wacæimpa, ante cædinque, Ogui waqui iya tangæimpa, ante awæmpa oodo nāni pōnō tee bæimpa badonte cō cædāni ongongatimpa. Ayæ, Mōnō godongāmæ waa cæcæimpa, ante wææ āninqe Wængongui nānō yewæmongainca Tæiyæ Waëmoncōnē Pōni ongongæimpa, ante cædinque awæmpa badōninqe oodo yabæpa tee baadinqe cæncadempa adobaī tee baate nāni cōnōimpa ongongatimpa. Ayæ oodo æninqe aca podonte wamoncade baī bædinque tōmēnāni ōnōmæca nāni cængaīmō Mānāā nāni angaīmō æninqe oodo nāni bædincadedē da wēninqe mānincade wæætē oodo ēmompaa cæncadē inō da wente cō cæte mangadānimpa. Ayæ adobaī Aadōō wodi nānō ongonto tā bocagainto æninqe ado oodo ēmompaa cæncadē inō da wente ñō cædāni ōñongatimpa. Ayæ Wængongui dicaboga nānō, Īimaī cædāni, ante yewæmongaine adoyōmō ongongæimpa, ante cædinque mānincæ æninqe ado oodo ēmompaa cæncadē inō da wēninqe cō cædāni ongongatimpa.

5 Mānimpaa yædopaa waomīni mīni wēnæ wēnæ cædō beyæ wepæ godonte impa, ante Wængongui, Botō pōnō waadeimpa impapa, angacæimpa. Ayæ Wængongui nē ñāō ēmongā weca nē owoda iñōmō adobaī ñāō baī ēmōna iñōnate tōmēna nāna ēmōnō baī dodāni adobaī badonte oodo ēmompaa æmataæ æmataæ tæi goncædāni ongongatimpa. Ayæ tōmēna ōōmā tiyæmāa pōmæna gānē iñōmō Wængongui, Botō pōnō waadeimpa, ante nānō angaimpa ōñongatimpa. Mānimpacoo æbānō impaa, ante māninqe ñōwo yewæmōmōnīpa.

6 Tōmancoo mānōmaī cōō cædāni ongōñonte, Wængongui qui, ante nē godōnānīque iimō iñō iimō iñō

yabæcōnē pō guidinqe, Wængongui ingampa, ante cægadānimpa. 7 Guimongacōnē guiquēnē nē godongā ñænængā iñōmō wadepo iñō adopoque wadepo iñō adopoque pō guidinqe tōmengā adocanque guidongāimpa. Incæte tōmengā nē godongā ñænængā pōni inongā incæ wepæ næænāmaī inte ædō cæte guiquingā. Edæ wepæ cōwē ænte guidinqe tōmengā nāmā beyæ godō pipo pipo cædinque, Wadāni ēñēnāmaī inte nāni wēnæ wēnæ cægaīnō incæ ñā mēnongacæimpa, ante tōmēnāni beyæ adobaī godō pipo pipo cædongāimpa. 8 Mānincō æmontaicō ayæ ongōñedē Tæiyæ Waëmoncōnē Pōni wīi ōnonque guigadānimpa. Wængongui nānō owodō æidō māniñedē adobaī wīi edonque ingatimpa, ante odōmoncæte ante Wængongui Tæiyæ Waēmō Ōnōwoca angā guidāmaī ingadānimpa.

9 Mānōmainō ante odōmōninqe tōmengā mōnō ñōwomō imonte wæætē, Īimaī ante ēñencæmīnīmpa, ante cægacæimpa. Waocā, Wentamō mongænte awædō, ante nē wædongā inte waēmō iñōmō pōninqe, Wængongui qui, ante baō iya tanguī tōnō bequi cænguī godongampa. Mānōmaī ancaa godongā incæte tōmengā mīmō nāmā nānō apænte entawēnō ñā mēnongadāmaī inte wentamō ayæ mongænte entawēnongāimpa. 10 Mānōmaī cænguinque bequinque ante wææ āninqe, Æbānō cæte godonguī, ante ayæ, Æpænenque æbānō cæte mēnongaquī, ante dodāni mānīncooque ante nāni wææ angainō ante ēñente cægadānimpa. Īninqe, Waguipo ĩninqe bayonte ōnōwoca ædæmō mēnongate quēwengæimpa, ante mīnguipo ĩninqe bagancaque tōmēnāni mānīncooque ante cædōnānimpa.

11 Wapāmo mīni waa quēwenguinque pōmāmo, ante badoncæte ante mōnō Codito iñōmō, Wængongui qui, ante nē Godongā Ñænængā

pöni ïnongä inte do pongacäimpa. Pöninge tömengä waodäni önompoca nani mänongaincönë guidämaï inte Wængongui nänö badongainguipoga cädämaï ingacäimpa. Wæætë adodö go æidinqe tömengä öönädë Wængongui nänö owocönë ñænæncönë guidinqe näwä owocönë cægacäimpa. ¹² Caboda wepæ næænte guidämaï inte wagada wë wepæ næænte guidämaï inte mönö Codito ïñömö edæ nämä wepæ godöninge öönädë Tæiyæ Waëmoncönë Pöni æmæwo guigacäimpa. Ìninqe tömengä ængä beyænque mönö æmæwo pöni abæ tawænte bai cöwë quëwëmompä.

¹³ Ñömæï incæ gampodinqe, do wæningä baö incæ gampodinqe waocä näate bai wædongä inte edæ Wængongui weca ædö cæte ponguingä. Wæætë, Tömengä waiñacä bate poncæcäimpa, ante cædinqe, Wængongui qui, ante në godönäni ïñömö caboda wepæ tönö wagada onguïñængä wepæ æninqe në näadingä baonga pipo pipo cædänipa. Ayæ wagada baquécä ingante wænonte në täninqe gönaique adobai æninqe tömengä baonga pipo pipo cædinqe, Bitö në näadimi inte waiñabi babipa, ante cægadänimpa.

¹⁴ Mönö Codito guiquënë Tæiyæ Waëmö ïnongä inte në cöwë Quëwengä Önowoca tönö guëa cædinqe Wængongui ingante, Bitö quïmo ïmopa, ante nämä wepæ godongacäimpa. Tömengä wepæ ïñömö wïi cæningä wepæ bai inte godömenque eyepæ pöni wepæ ïmæmpä. Ìninqe mönö wænguinque wënæ wënæ cæyömonte tömengä, Minitö mïmö entawëmïni inte ñä mënongate entawente nämä apænte pönente quëwencæminimpa, ante nämä wepæ do godongacäimpa. Ayæ mönö wënæ wënæ cægainö ante wadæ cædinqe godömenque pönö cæcä ate mönö Wængongui në Quëwengä ingante në cæmö badinqe cæmompä.

¹⁵ Wængongui mïine ante apænedinqe, Mïitee ïñömö, Mäninta adinqe

Mönö godongämæ waa cæte quëwengæimpa, añongante mönö waocabo wæætë ëñënamäi inte wënæ wënæ cæmö adinqe Codito ïñömö mönö wënæ wënæ cægainö beyæ ante wæætë wængä beyænque mönö abæ tawænte bai quëwëmompä. Ñowo ïñömö Wængongui mïine ante apænedinqe, Botö pönö cæbo ate mïnitö Ao ämïni ïninqe mïni ænguincoo æmæwo æninqe mïnitö cöwë mante quëwencæminimpa, ante aa pecä pongamönimpa. Ìninqe mönö Codito wæætë, Wængongui nänö angaincoo æncæminimpa, ante cædinqe ïninqe cæcä ate mönö në pönimö inte do ænte quëwëmompä.

¹⁶ Waocä, Näñe wæmo adinqe botö mäincoo ïni ïnänique æncædänimpa, ante ëmöwo ëmöwo yewæmongä adinqe wadäni wæætë, Näwangä æmæwo wængäimpa, ante ëñente ate, Në wængaingä nänö ante yewæmongainö bai bacæimpa, ante ïninqe cædänipa. ¹⁷ Ìñæmpä, Ìnäni qui bacæimpa, ante yewæmongä incæte në yewæmönigä mïingä quëwëñongante tömengä mäincoo ædö cæte tömënäni qui baquïi. Wæætë tömengä æmæwo wængä ate mäniñedë ate tömengä nänö yewæmongai bai ïninqe cædänipa.

¹⁸ Mänömaï beyæ wëenëñedë Wængongui, Mönö godongämæ waa cæcæimpa, ante yewæmongä ate dodäni cæningä wænonte ate wepæ gowete ate godongämæ Ao äninqe ïninqe cægadänimpa. ¹⁹ Wængongui, Ìmaï cædäni, nänö wææ angainö tömanta adinqe Mïitee wodi ïñömö tömänäni ïnänite apænecä ëñënäni ate wepæ gowete ate cægacäimpa. Wagada wënäni wepæ tönö caboda wepæ æninqe æpæ tönö ænte wempo cædëninge iitopowæ nani äwæyæpængö æninqe obega ocagui opatawæmæ nani guipæningui ænte pæ dacadinqe wepæ nani wempo cædënimæñë bee podonte Mïitee ïñömö, Mäninta adinqe

ēñgæimpa, ante cædinque mænintaa wepæ pipo pipo cægacäimpa. Ayæ nē ēñēnināni tōmānāni baonga wepæ pipo pipo cædinque tōmengä iīmaī angacäimpa. ²⁰ “Wængonguī, Botō pōnō ämo ēñēninque mīnitō Ao ante ēñente cæmīni iīnque mōnō godongāmæ waa cæcæimpa, ante nānō wææ angainō beyænque iī wepæ impa. Iīnque iī wepæ emontaa adinque mōnō Ao ante mænīne ante ēñente cæcæimpa,” ante Mōitee wodi apænegacäimpa. ²¹ Ayæ æmontaiconga wepæ pipo pipo cædinque tōmengä mænincōnē Wængonguī beyæ nāni cæincooga wepæ pipo pipo cægacäimpa. ²² Ayæ wodo tōmancooga ante Wængonguī, Wepæ tōnō ñā mēnongacæimpa, ānīnque wææ angä cægadānīmpa.

Iñæmpa wepæ gowedāmaī iñonte mōnō wēnæ wēnæ cæmō adinque Wængonguī nē panguēnengä inte ædō cæte pōnō ata cæpoquingä.

Codito wepæ beyænque mōnō mīmō mēnongacæimpa

²³ Öönædē ongoncoo baī inguipoga nāni adobaī badongaincoo incæ cæningä wænonte ate wepæ tōnō ñā mēnongaquēñēnāni ingadānīmpa. Wæætē nāwā öönædē Wængonguī weca gote mōnō ongonguinque mōnō adocanque nē waēmō pōnī inongä wepæ beyænque ñā mēnongaquēñēmō imompa. ²⁴ Edæ öönædē Wængonguī nānō owocōnē baī ante waodāni önompoca nāni tæiyæ waēmō pōnī badongaincōnē mōnō Codito guīdāmaī ingacäimpa. Wæætē öönædē incæ æidinque tōmengä mōnō beyæ ante Wængonguī weca guīdinque a ongongampa.

²⁵ Wængonguī quī, ante inguipoga nē godongä ñænængä pōnī inongä guīquēñē wīi nāmā wepæ ænte pōnīnque cæningä wepæ incæ ænte pōnīnque wadepo iñō adopoque wadepo iñō adopoque Tæiyæ Waëmoncōnē Pōnī guīcampa. Mōnō Codito guīquēñē inguipoga nē quēwengä baī wīi adobaī inongä inte

wīi wæætē wæætē godoncæte ante öönædē æi guīgacäimpa. Wæætē öönædē adopoque æi guīdinque tōmengä nāmā wepæ adopoque godongacäimpa. ²⁶ Edæ inguipoga nē quēwēnāni nāni cæi baī cæcä baī tōmengä Wængonguī inguipoga nānō badōñedē mā caate wædinque wantæ wantæ iñō cædinque ñōwo ganca tæmpo caate wæcædongäimpa. Wæætē mōnō waocabo tōmāmō pedænguipoga mōnō quēwēnō wodo iīnque bayonte tōmengä ñōwo pōnī adopoque pōnī pōnīnque wēnæ wēnæ mōnō cædō ante æmæwo wido cæcæte ante nāmā wepæ godongacäimpa.

²⁷ Mōnō waocabo guīquēñē nē wænguīmō inōmo inte adopoque wænte ate Wængonguī weca pō gongæñōmonte tōmengä apænte ancæcäimpa. ²⁸ Mōnō waocabo nangui imō iñōmonte mōnō Codito iñōmō wēnæ wēnæ mōnō cædō ante mongænīnque adopoque nāmā godōnīnque wængacäimpa. Ayæ wæætē pōnīnque tōmengä wīi mōnō wēnæ wēnæ cædō mongæncæte ante poncæcäimpa. Wæætē tōmengä nānō ponguīnō ante nē wānō cōmō iñōmonte tōmengä, Quēwencæmīnīmpa, ante mōnō imonte æncæte ante poncæcäimpa.

10

¹ Iīncayæ ate nē Ponguingä iñōmō, Wængonguī quī, ante nāmā wepæ eyepæ godoncæcäimpa, ante odōmoncæte ante cædinque Wængonguī, Iīmaī cæte cæningä wepæ pōnōedāni, ante do wææ angacäimpa. Incæte mænīi wepæ Wængonguī nānō wææ angaimæ iñōmō wīi eyepæ godonguī ænguī impa. Iīnīnque mænīmæ tōmengä nānō wææ angaimæ beyænque waocä ædō cæte ædæmō ēñente picængä baī baquingä. Iñæmpa idægoidi iñōmō wadepo iñō wadepo iñō wepæ ancaa godōnīnque Wængonguī weca pō ædæ wæænīnque, Bitō Tæiyæ Waēmō imidō anguēñē, ante apænecæte ante

pönäni incæte tömënäni tömengä nänö wææ angainö beyænque picænäni bai dicæ badäniyaa. ² Tömengä nänö wææ angainö eyepæ i bai tömënäni adopoque godöningue idæwaa godoncædönänimpa. Edæ, Wængongui ingampa, ante nē cædäni iñömö mäninque godöningue ædæmō ñä mënongate bacædönänimpa. Ayæ iincayæ ate tömënäni, Wentamö entawente wængui wæ, ante nämä apænte wædämaï incædönänimpa.

³ Edæ wii mänömaï impa. Wæætē, Botö wænæ wænæ cæte awædö, ante wæætē wæætē nāni pönente wæquinque tömënäni wadepo iñö wadepo iñö godönönänimpa. ⁴ Edæ, Möni wænæ wænæ cægäinö ante mënongacæimpa, ante godöñönäni wagada onguiñæ wepæ tönö caboda wepæ eyepæ imæmpa diyæ mënongaquii.

⁵ Cæningä wepæ wii eyepæ impa, ante wædinque Codito inguipoga pöninque iimaï ante apænecacæimpa.

“Wængongui eñemi. Cæningä baö nāni wænonte pönönö tönö cængui bequi nāni, Wængongui qui, ante pönönö adinque bitö edæ wii æinemi ingabiimpa.

Wæætē botö Waobo baquinque bitö botö baö ante badongabiimpa.

⁶ Waodäni, Wængongui qui, ante iya tämöni ate Wængongui waa acæcæimpa, ante täñönäni bitö wii tobi ingabiimpa. Tömënäni, Wænæ wænæ möni cædö ante Wængongui pönö wido cæcæcæimpa, ante pönöñönänite bitö Baa angabiimpa.

⁷ Ante adinque botö, ‘Wængongui eñemi. Dodäni botö imotedö ante yewæmöninque, Tömengä inguipoga pöninque iimaï cæcæcæimpa,

ante nāni yewæmongainö bai cædinque botö bitö änö eñente cæcæte ante pöninque a ongömoï ae,’ antabopa,”

⁸ Möitee wodi guiquënë, Cæninäni inänite wænöninque minitö, Wængongui

qui, ante pædæ godöningue cængui tönö bequi godoncæminimpa, ante wææ angacæimpa. Incæte mönö Codito Mæmpocä ingante täno apænedinque, Waodäni cæningä nāni wænonte pönönö tönö cængui bequi nāni, Wængongui qui, ante pönönö adinque bitö wii æinemi ingabiimpa.

Wængongui qui, ante iya tämöni ate Wængongui waa acæcæimpa, ante ayæ, Wænæ wænæ möni cædö ante Wængongui pönö wido cæcæcæimpa, ante pönö täñönäni bitö Baa ante wii tobi ingabiimpa, ante Codito apænecacæimpa. ⁹ Ayæ, “Bitö änö cæcæte ante pöninque a ongömoï ae,” angacæimpa. Äninque tömengä, iine botö angainö iñömö ædæmō eñenguine bate ongongæimpa, ante cædinque Möitee wodi wëenëñedë nänö angaine ante da godonte bai cægacæimpa.

¹⁰ Ayæ Wængongui nänö änö ante nē eñente cæcä inte Itota Codito, Wængongui qui, ante baonga eñadinque adopoque wæninque nämä wepæ eyepæ godongä beyænque mönö wæætē Wængongui ayongä tæiyæ waëmö ewocamö bate quëwëmompä.

¹¹ Wængongui qui, ante nē godönäni guiquënë tömänäni iimö iñö iimö iñö adiyæ gongænte Wængongui beyæ ante cædänipa. Mänömaï wæætē wæætē godöningue ado ado godönäni beyænque tömënäni wænæ wænæ nāni cædö ante ædö cæte wido cæte baquii.

¹² Mäningä mönö beyæ nē nö Godongaingä guiquënë adopoque godöningue iinque baganca eyepæ pönö godöningue Wængongui tömëmængä inö æi tæ contate ongongampa.

¹³ Mänömaï ongöninque, Botö imote piinte cædäni inänite Wængongui æyedönö botö nempo pönongä æninque botö tæi emömö inte nē ämo baquimoo, ante Codito ñowo ganca wänö congampa.

¹⁴ Edæ tömengä pönö badongä ate mönö tæiyæ waëmö ewocate quëwëmö bayömonte tömengä adoque pönö nänö godongainö beyænque, Ædæmō

picæmini bacæminimpa, ante do badongacäimpa. ¹⁵ Mäninö ante

Wængonguï Tæiyæ Waëmö Önöwoca mönö imonte adobaï apænecampa. Tömengä täno apænegacäimpa.

¹⁶ “Mönö Awënë iïmaï angacäimpa.

Mäniñedë ate iïncayæ ate,

botö pönö cæbo ate Ao änäni ininque mönö godongämæ waa cæte quëwengæimpa,

ante iïnque cæcæte ante iïmaï cæcæboimpa, angacäimpa.

Botö pönö apænebo ëñëninque tömënäni, iïmaï cæedäni, ante botö wææ angainö incæ mimönë entawencædänimpa.

Botö pönö apænebo ëñëninque mänine ante ocai encate ëñencædänimpa.

¹⁷ Ayæ, Wënæ wënæ nani cædö ante ñimpo cædinque botö pönënamäi incæboimpa. Ëñënamäi nani cædö ante botö wæætë wæætë änämaï incæboimpa,” angampa.

¹⁸ Ininque tömengä pönö ñimpo cæcä ate mönö edæ, Wënæ wënæ mönö cædö beyæ pänämaï incæcäimpa, ante quïnante godömenque godonguï. Iñæmpa tömengä dobæ ñimpo cægacäimpa.

Mönö Wængonguï weca pongcæimpa, ante

¹⁹ Iñänäni ëñëedäni. Tæiyæ Waëmö Pöni Oncönë pö guiite bai mönö Itota wepæ beyænque guiñënamäi inte Wængonguï weca do guiiquënëmö imompa. ²⁰ Weocoo mänincönë nani wææ cægaincoo wægo tē bai

Itota baö adobaï wangö cote ingatimpa. Mänömaï beyæ odemö miïnemö wi ænete bai i adinque mönö quëwenguïnemö guïdinque Wængonguï weca edæ do guiimompa.

²¹ Wængonguï nänö godongämæ owocabo iñömonte, Wængonguï quï, ante nē Godongä Nænængä pöni inongä iñömö adocä Itota iñömö mönö imonte nē aacä inongä ingampa.

²² Mänömaï beyæ mönö Wængonguï weca pö guiicæimpa. Wëenëñedë

wentamö mönö entawënö ante Itota nämä wepæ inte ñä mënongacä ate mönö nämä apænte nō cæinëmö inte guiicæimpa. Ayæ mönö baö waëmömæ äate bai ëmömö ininque mönö, Wængonguï tömengä nänö änö bai cöwë ædæmö cæcæcäimpa, ante wede pönëninque mönö guiñënamäi inte tömengä weca do guiicæimpa.

²³ Botö cöwë pönö cæcæboimpa, ante nē angaingä iñömö nē ædæmö cæcä ingampa, ante adinque mönö, Tömengä nänö änö bai cæcä beyænque watapæ bacæimpa, ante mönö pönëno ante cöwë wido cædämaï inte mönö pönengæimpa.

²⁴ Ayæ, Mönö pönencabo tömämö waadete pönëninque waa cæte quëwengæimpa, ante cæcæte ante pönente adinque mönö wacä ingä wacä ingä iïmaï godö cæcæimpa.

²⁵ Pancadäniya Wængonguï ingante godongämæ apænecæte ante pönämaï inte wadæ godäni incæte tömënäni nani cæi bai mönö adobaï cædämaï ingæimpa. Wæætë, Codito nänö ponguïönæ oo pöni impa, ate pönente wædinque mönö pönencabo iñömonte mönö wacä ingä wacä ingä edæ waadete apænedinque, Wængonguï gämænö pöninque watapæ quëwëmini incæminimpa, ante apænecæimpa.

²⁶ Wængonguï nō nänö änö ante do ëñënimö inte mönö, Wii ëñëinewædö, äninque godömenque wënæ wënæ cæmö ininque edæ wënæ wënæ mönö cædö ante mënongaquïmæ ante edæ wepæ dæ ä bai babaimpa.

²⁷ Wæætë mänömaï ancaa ëñënamäi cæmö ininque mönö Wængonguï nänö apænte ante panguïmämoque ante guiñente wæcömaïmompa. Edæ mönö Baa ante godömenque wënæ wënæ cæmö ininque Wængonguï ingante nē piïnäni nani gonte wænguïmämoque ante, Mönö adobaï gonte wæncaæ wæ, ante guiñente wæcömaïmompa.

²⁸ Möitee wodi nänö wææ angainö ante, Wii ëñëinewædö, ante adocanque nē angä iñongante Waoda mënaa ina incæ woadäni mengäa go

adocanque ināni incæ, Mānōmainō ante apæneçā eñentamōnipa, ante apænedāni eñēninqe nē āningā ingante waadedāmaī inte godō wænongadānimpa.

²⁹ Īninqe adocanque Wængonguī Wengā ingante pīnā gāwate baī cædinque Baa angā adinque tōmengā ingante Wængonguī ædō cæte pānāmaī inguingāā. Wængonguī, Botō pōnō æmo ate mīnitō Ao āmīni ĩninqe mōnō godongāmæ waa cæte quēwengæimpa, ante nānō angainō ĩninqe bacæimpa, ante cædinque Itota nāmā wepæ inte mōnō ĩmonte ñā mēnongacā beyæ tōmengā ayongā tæiyæ waēmō ewocamō bagamōimpa. Incæte adocanque Itota nānō nē ñā mēnongadingā ĩnongā inte, Itota wepæ wīī waēmō ĩ awædō, ante pīngā adinque Wængonguī ædō cæte apænte ante pānāmaī inguingāā. Ayæ Wængonguī Ōnōwoca nē waadete pōnō cædongā ĩñongante adocanque badete tocā adinque Wængonguī tōmengā ingante ædō cæte pānāmaī inguingāā. Edæ Mōitee wodi nānō wææ angainō ante Baa ānāni ĩnānite wædænque pāninqe Wængonguī ĩnāni ĩnānite godōmenque nangūi pōnī pancæcāimpa, ante pōnēmīniyaa.

³⁰ Wængonguī, “Botō tōmēmo nē panguīmo ĩmopa. Wīwa nāni cædinō beyæ eyepæ pōnī godō pāmo wæcædānimpa,” angacāimpa. Ayæ, “Botō nē Awēnē ĩnōmo inte botō quīnāni ĩnānite apænte ancæboimpa,” angacāimpa. Mōnō ĩñōmō, Mānōmainō ante nē apænte pancæ angaingā ingante æbānō ingāā, ante do eñēmompā. ³¹ Edæ Wængonguī nē Quēwengā ĩnongā inte edæ ænguī badinque bæi ongonte pangā wæcæ wæ, ante mōnō nangūi guīñēñate wæcæimpa.

³² Wēēnēñedē Wængonguī apæneçā eñēmīni inte mīnitō tæcæ ñāō baī entawēmīni ate wadāni pō pīinte guēadō guēa cæyōnāni mīnitō mīni caate wæquinque tæī ongōninqe godōmenque cæmīnitapa. Mānōmaī mīni cædinō ante ñōwo pōnēedāni.

³³ Pancayedēña ĩñōmō nē pīinte cædāni tōmānāni ayōnāni mīnitō ĩmīnite badete todinque pānānitapa. Pancayedēña guīquēnē mīnitō tōñīñadāni adobaī caate wæyōnānite mīnitō, Adocabomōni ĩmōnipa, ante baī cædinque nē caate wædāni tōnō godongāmæ ongōmīnitapa. ³⁴ Wadāni ĩnānite tee mōnedāni adinque mīnitō tōmēnāni tee mōnete nāni wædō ante pōnēninqe tōmēnāni tōnō godongāmæ wæmīnitapa. Ayæ, Mōnō māincoo oōnædē godōmenque waa pōnī ongoncoo inte cōwē ongongæimpa, ante eñēmīni ĩñōmīnite wadāni inguipoga mīnitō ēadincoo ō ænāni adinque mīnitō wædāmaī inte watapæ tomīnitapa. ³⁵ Īninqe, Mōnō wede pōnēnō beyænque eyepæ pōnī ænguīmō ĩmompā, ante eñēninqe mānīnō mīni wede pōnēnō ante wido cædāmaī ĩedāni. ³⁶ Ayæ, Wængonguī nānō ānō ante eñente cæmōni ate tōmengā, Pōnōmo æncæmīnimpa, ante nānō angaincoo ante cōwē pōnongā æncæmōnimpa, ante cædinque mīnitō wæntædāmaī inte ee cæquēnēmīni ĩmīnīpa. ³⁷ Edæ Wængonguī beyæ ante do yewæmongatimpa.

“Wantæ wantæ ate nē Ponguingā mōnō ānongā ĩñōmō do poncæcāimpa.

Edæ tōmengā nānō angāiōnæ ĩnque bayonte

tōmengā eyepæ pōnī poncæcāimpa.

³⁸ Nē nō cæte quēwēnongā incæ tōmengā nānō wede pōnēnō beyænque quēwēncæcāimpa.

Adocā wæætē guīñente wædinque wodiī wīnongā adinque,

botō tōmengā ingante adinque wīī tobaīmopa,” ante Wængonguī beyæ yewæmongatimpa.

³⁹ Mōnō guīquēnē tōmēnāni nāni cæī baī cædāmaī ĩnōmō inte wīī guīñente wædōmō inte wodiī wīnōnāmaī ĩmompā. Edæ wodiī wīnonte baī mōnō æmæwo ewente baquēnēmō ĩmompā. Wæætē edæ tōmengā ængā beyænque mōnō quēwēngūinque tōmengā ingante wede pōnēmō ĩmompā.

11

Mönö wede pönönö ante

¹ Wængongui pönö cæcä ate watapæ bacæimpa, ante mönö pönönö ante mönö, Wængongui ayæ cædämaï ingä incæte cöwë cæquingä ingampa, ante wede pönëmompä. Awinca adämaï emömö incæ mönö mïmöno wede pönëninque awinca do ate emonte bai ewocamö inte mönö, Näwangä bacæimpa, ante do eñëmö imompä.

² Dodäni wede pönënanï iñönänite Wængongui, Mïni wede pönönö beyænque botö mïnitö imïnite waa abopa, ante apænecäimpa.

³ Wængongui inguipo tönö iimönæ tömäo badoncæte ante cæyongä quiëmë impä ænte badonguingä. Iñæmpä dæ angatimpä. Iñinque mönö nê acoo dæ añonte mänincoo ænämaï inte tömengä wæætë mä pönëninque angä beyænque mönö nê acoo do bagatimpä. Mänömaï ingatimpä, ante wede pönëninque mönö Ao ämompä.

Dodäni nani wede pönengainö

Abedo wodi

⁴ Abedo wodi iñömö Wængongui nänö angainö ante wede pönëninque, Wængongui qui, ante nö cæte godöninque Cäinö wodi wæætë önömonque nänö godönö bai wïi godongacäimpa. Tömengä mänömaï wede pönente cæcä adinque Wængongui, Abedo bitö nö cæte pönömi æmopa, ante apænecäimpa. Iñinque do wænte gogaingä inongä incæte Abedo wodi, Botö wede pönente cægäi bai adobai wede pönente cædäni, ante ñowo ganca ayæ apænete bai apænecampa.

Ënoco wodi

⁵ Ënoco wodi guiquënë nê wede pönengä iñongante Wængongui, Ënoco eñëmi. Bitö botö nê waa adömi inte bitö wænguënëmämo ante wädämaï inte pöe, äninque inque iñongante ö ænte wo ææntodongä æigacäimpa. Æite gocä ate wadäni ancaa diqui diqui mïninque Wængongui nänö

nê wo æntodongä ingante adämaï ingadänimpä. Edæ tömengä ingante Wængongui ayæ ææntodönämaï iñongante wadäni, Ënoco wede pönengä ingante Wængongui waa acampa, ante do eñënönänimpä.

⁶ Edæ Wængongui weca poncæte ante cædinque waocä, Wængongui nê Quëwengä ingampa, ante wede pönenguënengä ingampa. Ayæ adobai, Wængongui ingante nê diqui diqui mïmö iñömonte tömengä, Pöe, äninque pönö waa cæcampa, ante wede pönëninque nê poncæ cæcä pongampa. Mänömainö ante nê wede pönënanique Wængongui weca pönänipa. Mäninö ante nê wede pönënanämaï ingä guiquënë tömengä ingante Wængongui ædö cæte waa aquiringä. Edæ waa adämaï ingampa.

Docä Nöwee wodi

⁷ Nöwee wodi Docä nani änongä guiquënë, Æbänö baquïi, ante adämaï iñongante Wængongui, Nöwee eñëmi. Bitö adämaï imämo oo pongæimpa cæbii. Angä eñente guïñente wædinque nê wede pönengä inte tömengä nani wencabo nani guïte quëwenguinque wipo ñænængade impo incæ ñænæ oncö bai badongä ate guïte quëwengadänimpä. Nê wede pönënanique nani nö entawönö bai adobai nö nänö entawenguinque Nöwee wodi wede pönente cægacäimpa. Iñinque tömengä adocanque wede pönëninque mänömaï cædingä iñongante wadäni guiquënë nani apænte wænguinque Baa angadänimpä.

Abadäo wodi

⁸ Abadäo wodi guiquënë tömengä wede pönengä iñongante Wængongui, Abadäo eñëmi. Botö pönömo bitö ænguïmæ ante botö odömömo goe. Angä eñëninque, Æbæmë impä, ante adämaï inongä inte Abadäo wede pönëninque eñente cædinque do gogacäimpa. ⁹ Mänömaï wede pönëninque wadäni nëmæ gote wacä inongä inte wantæ iñö quëwengä bai inte æmontaicönë owogacäimpa.

Ayæ Wængonguī nānō angaimæ nē ænguina inōna inte tōmengā wengā Itæca wodi adobaī tōmengā wengā Aacobo wodi adobaī wantæ inō quēwente baī æmontaicōnenque owote quēwengadaimpa. ¹⁰ Wængonguī doyedē pōni, Waodāni nāni oōnædē quēwenguīnōmō ante botō iīmaī badoncæboimpa, ante nāmā nānō pōnēnō baī tæī gōnonte mænongacāimpa. Abadāo iīnōmō, Botō māniī iīnōmō owocæboimpa, ante nē wædongā inte wede pōnēnīnque piyænē cædinque æmontaicōnenque owote inguipoga quēwengacāimpa.

¹¹ Mōnō imonte pōnēnīnque nē ædæmō aacā inongā inte Wængonguī iīnōmō tōmengā nānō ānīnō baī cōwē cæcæcāimpa, ante nē wede pōnēnā iīnōmō Tada wodi ingadāimpa. Mānōmaī beyæ tōmēnā owæntadā iīnōnante Wængonguī pōnō cæcā ænīnque tōmēnā picængadedā inōnā inte tæī piīnæninque yædēmadā bate wēñængā mangadāimpa. ¹² Abadāo wodi wede pōnēnīnque tæī piīnænte tapæicā ate wēñængā ēñagacāimpa. Inīnque adocanque picængadecā inte nē wænte baī inongā inte wede pōnengā beyænque mōnō tōmengā nānō pæīmō yebæninque nēmoncoo oōnædē owocoo nanguī pōni ī baī mōnō iīnōmō adobaī nanguī pōni imompa. Ēmōnaicoo gāwapæ yæwedeca oñoncoo nanguī pōni ī baī mōnō tōmengā pæīmō imō adobaī nanguī pōni iīnōmōnte mōnō, Mānimpomō imompa, ante ædō cæte anguīi.

¹³ Mānīnāni tōmānāni wede pōnente quēwēnōnāni inte wængadānīmpa. Wængonguī nānō, Pōnō cæcæboimpa, angaincoo ayæ ænāmāi ināni inte tōmēnāni gobæ ongoncoo gomō ate baī, Cōwē æncæmōnīmpa, ante wede pōnente piyænē cæte quēwengadānīmpa. Wadāni nēmæ wabæca quēwente baī quēwēnīnque tōmēnāni, Wīi mōnitō ōmæ iīnōnte mōnitō wamōni inte quēwēmōnīpa, ante inguipoga owogadānīmpa. ¹⁴ Mānōmāinō ante nē ānāni iīnōmō, Tōmēmōni ōmæ ante diqui diqui

mēmōni imōnīpa, ante quēwēnānīpa. ¹⁵ Dodāni iīnōmō do nāni ēmō cæte pongaimæ ante pōnente wædāni inte baī tōmēnāni do adodō gocædōnānīmpa. ¹⁶ Wæætē adodō māniōmæ nāni quēwengaimæ wīi gōinēnīnque tōmēnāni, Mōnō oōnædē godōmenque wæmōmæ pōni gote quēwengæimpa, ante gōinente wængadānīmpa. Inīnque wadāni Wængonguī ingante, Bitō nē wæmōmæ gōinente wædāni tōmēnāni Wængonguīmi imīpa cæbīi, ante ānāni incæ tōmengā wæætē, Iīnæmpa nē wædōnāni tōmēnāni quēwenguīnōmō nāni wædō ante botō do eyepæ mænongaboimpa, ānīnque guīñēnāmāi inte nanguī tocampa.

Abadāo tōnō Itæca

¹⁷ Wængonguī, Abadāo æbānō botō imote ēñente cæquingāā, ante acæte ante angā ēñēnīnque Abadāo wodi nē wede pōnēnongā inte tōmengā wengā Itæca ingante, Wængonguī quī, ante godongacāimpa. Edæ Abadāo ingante doyedē apænedīnque Wængonguī, Bitō pæināni nanguī ināni inte iīmæ æncædānīmpa, ante do angā ēñengacāimpa. Incæte Wængonguī mānōmāinō angā ante nē ēñēningā incæ tōmengā wengā adocanque pōni inongā inte Abadāo, Wængonguī quingā ingampa, ante godoncæ cægacāimpa. ¹⁸ Adocā tōmengā wengā ingantedō ante Wængonguī doyedē Abadāo ingante apænedīnque, Bitō wengā Itæca pæinānīnque inānitedō ante botō, Abadāo pæināni inānīpa, angacāimpa. ¹⁹ Incæte Itæca wodi adocanque pōni iīnongante Abadāo wodi, Botō wengā do wængā incæte Wængonguī, Nāni ōmæmōe, angā inīnque do nāni ōmæmōmaingampa, ante wede pōnēnīnque godoncæ cægacāimpa. Wængonguī guiquēnē, Ee ae, ante wææ angā beyænque tōmengā wengā ingante wænōnāmāi ingacāimpa. Inīnque Itæca wodi do wæningā inte baī nāni ōmæmōnte baī ayæ quēwengacāimpa.

Itæca, Aacobo, Ootee

20 Itæca wodi adobaï, Wængongui æbänö cæquiringää, ante wede nänö pönönö beyænque eñëningä inte edæ picængadecä badinque Aacobo wodi tönö Etawoo wodi inate apænedinque, Wængongui minatö iminate iimaï pönö waa cæcæcäimpa, ante waa apænegacäimpa.

21 Aacobo wodi iñömö, Wængongui æbänö cæquiringää, ante wede nänö pönönö beyænque do eñëningä inte wæncæ cæte öñöninge tömengä nänömoda Ootee wodi wëna inate, Minatö iminate Wængongui pönö waa cæcæcäimpa, ante waa apænegacäimpa. Ayæ ongontoca da cæte ongonte ædæ wææninque, Wængongui bitö waëmö pönö inömi inte cæquimidö angüenë, ante watapæ apænegacäimpa.

22 Ootee wodi guiquenë, Wantæ iñö wæncæboimpa, äninque, Mönö idægocabo mönö pæinäni incæ Equitobæ wantæpiyæ quëwënanäni ate Wængongui ænte mäocä wadæ gocädänimpa, ante tömengä nänö wede pönönö beyænque eñëninge iimaï angacäimpa. Godinque botö bayetoca ingai ee ænte næænte godinque da wencæminimpa, angacäimpa.

Möitee wodi

23 Möitee wodi mæmpoda guiquenë wëñængä eñacä ate, Wii önonganque ingampa. Waëmö wëñængä awädö, ante adinque iimaï cægadäimpa. Mäniñedë Equitobæ awënë odeye iñömö, Onguiñængä eñacä adinque do wænongæimpa, angä incæte tömëna guiñënamäi inte tömëna wede nana pönönö beyænque wëñængä Möitee ingante apäicä mengäa go adocanque mämonque wë wodonte mangadäimpa.

24 Möitee wodi guiquenë picængä bayongante wadäni, Awënë Padaönö wengä wææ Möitee badä ingampa, ante Möitee ingante waa ayönäni tömengä wæætë Wængongui ingante në wede pönëngä inte edæ Baa angacäimpa. 25 Wæætë edæ, Botö caate wæquinque botö Wængongui quinäni tönö godongämæ cæcæboimpa, ante

cædinque Möitee wodi, Equitoidi nänäni wiwa cæte tönö adinque botö wantæ iñö incæ wii toinente awädö, ante wido cægacäimpa. 26 Wængongui iincayæ ate eyepæ pönö pönongä æncæboimpa, ante wede pönëninge tömengä mäninö ante mimöno gomö ate bai pönengacäimpa. Ayæ Equitobæ quëwënanäni waëmoncoo pönö nänäni mäincoo ante adinque, Önoncooque ewenguincooque i awädö, ante Möitee edæ Baa angacäimpa. Wæætë edæ püinte badete todäni wæcä incæte tömengä, Codito beyænque impa, ante pönëninge godömenque waa pönö togacäimpa.

27 Tömengä iñömö, Awënë odeye Padaönö ængui badinque püingä wæcæ wæ, ante guiñente wädämaï inte wæætë wede pönëninge Equitobæ emö cæte gogacäimpa. Ayæ Wængongui në Quëwengä mönö awinca adämaï inongä ingante Möitee wodi iñömö në awinca gomö acä bai emongä inte wæntæye badämaï inte godömenque cægacäimpa. 28 Ayæ, Bamoncadë eñadäni inänite në ewëngä incæ godö wænoncæcäimpa, ante Wængongui angä eñëninge Möitee wodi wæætë, Në ewëngä nänö wodo pänta goqui ingæimpa, ante wede pönëninge cægacäimpa. Tömengä wadäni idægoidi tönö Patowa ææmæ mönö cæmæ bai mä cængacäimpa. Ayæ, Në ewëngä incæ mönö idægocabo bamoncadë eñadäni inänite wænönämaï incæcäimpa, ante wææ cæcæte ante cædinque Möitee në wede pönëngä inte wadäni tönö godongämæ odemompaa wepæ öni paagacäimpa.

29 Idægoidi guiquenë wede pönëninge gäwapæ Opatawæmæ nänäni ämæ goyæ go næ gongæmæ ate tæcæguedëmæ pönö tao gogadänimpa. Equitoidi guiquenë, Taadö bapa, mönö taocæimpa, ante cæyönänite æpæmpo becadote wængadänimpa.

Adacaba wodi

30 Idægoidi nänäni wede pönönö beyænque Eedicoo nänäni quëwëñömö yabæque nänäni wææ cægainca

incæ nāwæ cabænte wæængatimpa. Edæ idægoidi önompo æmæmpoque go mēönaa mänimpoönæ iñonte yabæque godongämæ cægonte godäni ate cabænte wæængatimpa. ³¹ Onquiyængä Adacaba iñömö maincoo beyæ ante nē towente nē quëwengä inongä incæte tömengä wede nänö pönënö beyænque iimaï cæte miingä quëwengacäimpa. Idægoda mänaa, Eedicoo iñömö æbänö quëwënänii, ante acæte ante awëmö pö guiida adinque Adacaba wodi, Ee pöeda, angä beyænque idægoidi wæætë ëñënamäi inäni inänite wænöninque tömengä ingante ata cæpodäni quëwengacäimpa.

Wadäni nāni wede pönengäinö

³² Quinante godömenque ante apænequimoo. Inäni nē wede pönënäni nāni cægäinö ante botö æiquedö apænequimoo. Guedeönö wodi tönö Badaco wodi ingadäimpa. Ayæ wææ Tantöo wodi tönö Yepetee wodi ingadäimpa. Ayæ wææ Awënë Dabii wodi tönö Tämoedo wodi ingadäimpa. Mäninäni tönö Wængongui beyæ nē apænegainäni wodi tömänäni wede nāni pönënö beyænque iimaï cædinque nanguï cægadänimpa.

³³ Nē wede pönënäni iñömö tæi ëmonte badinque wabæca awënë odeyeyidi nempo quëwënäni inänite bæ tadinque wido cægadänimpa. Pancadäniya wede pönëninque wadäni beyæ wææ äninque nö cægadänimpa. Wacä, Cæcæboimpa, äninque do cæquëngä incæ wii cæcä ininque nē pönënäni pancadäniya, Bitö änö cæcæbiimpa, änäni ëñëninque do cægacäimpa. Pancadäniya nāni wede pönënö beyænque mëñeyidi incæ ecadämäi inäni bagadänimpa. ³⁴ Gongä nanguï wo bæco adinque pancadäniya wede nāni pönënö beyænque mönä ëmongatimpa. Wadäni yaëmenca tamencacæ cädäni wædinque nē pönënäni pancadäniya aamö cædinque müinäni quëwengadänimpa. Aquüi pöni

inänäni inte nē wede pönënäni pancadäniya tæi piñænte bagadänimpa. Wabæca tontadoidi wænönca pönäni adinque nē pönënäni pancadäniya wæætë tæi piñæninque wido cädäni gogadänimpa. ³⁵ Tömënäni guidënanäni nāne wænäni ate onquiyænäni wede nāni pönënö beyænque do wæninäni quëwënäni ate ængadänimpa.

Näni caate wægäinö

Ayæ adobaï nē pönënäni inänite wiwa cädäni caate wæyönänite wacä, Ata cæpobo goquimi, angä incæte nē caate wädönäni pancadäniya wæætë, Ee abi caate wæwëmoe, änänitapa. Tömënäni, Botö iincayæ ate ñäni ömæmöninque caate botö wädö beyænque godömenque waa quëwencæboimpa, ante wææ äninque Ao änämäi ingadänimpa. ³⁶ Tömënäni nāni wede pönënö beyæ pancadäniya inänite wadäni badete togadänimpa. Wadäni inänite wæætë tæi tæi pangadänimpa. Wadäni inänite wæætë yaëmengö ñä cæyæninque tee mönedäni wægadänimpa. ³⁷ Pancadäniya inänite dicaca tacadäni wægadänimpa. Pancadäniya inänite ta wiyænäni wægadänimpa. Pancadäniya inänite yaëmenca yedäni wægadänimpa. Pancadäniya obega æmontai tönö caboda æmontai badöninque mäninque wëñate mongæninque ömæpodäni inte wæyönänite wadäni togænte päninque wiwa cægadänimpa. ³⁸ Tömënäni nē wede pönënäni inte waa pöni inäni iñönänite inguipogaque quëwënäni wæætë wii tömënäni bai inäni inte wënæ wënæ cægadänimpa. Nē pönënäni iñömö pancadäniya, Äyömömë gote quëwenguimoo, ante pönente wædinque wodii winonte önomæca wayömö godinque änanquidi wayömö godinque oncontatodë guidäni pancadäniya wë womöñönäni pancadäniya onguipodë ææ wote wë womongadänimpa.

³⁹ Ininque Wængongui tömënäni inänite, Wede müni pönënö adinque botö waa tobopa, ante

apænegacäimpa. Incæte tömengä nänö, Pönö waa cæcæboimpa, angainö ante tömënäni mänïñedë ayæ ænämaï ingadänimpa. ⁴⁰ Edæ tömënäni adodänique wïi æncædänimpa, angacäimpa. Wæætë Codito godömenque pönongä æninque mönö watapæ quëwëñömönte tömënäni mönö tönö godongämæ æninque ædæmö picænäni bai bacædänimpa, ante Wængonguï mönö imonte waa cædinque tömënäni beyæ adobai waa cægacäimpa.

12

Itota ingante mönö cöwë adinque quëwengcäimpa, ante

¹ Ìninque boguimä bacoo owo bai mäninäni ìñömö, Wængonguï cöwë pönö cæcæcäimpa, ante në wede pönengainäni ìñömö adobai bacoo ongönänipa. Edæ, Mönitö wede pönente möni cægai bai minitö adobai wede pönëninque ìmaï cædäni, ante a ongönte bai apænedänipa cæmöö. Tömënäni quingæ pogodo gocæte ante cædäni teëmencoo gä äadäni bai cædinque mönö adobai oda caate mönö wædoncoo ante ñimpo cæcæimpa. Wënæ wënæ mönö cægaincoo ante, Ancaa cæte awædö, äninque mönö wido cæcæimpa. Ayæ taadö ante Itota nänö odömongainonque ante mönö edæ wæntædämaï inte tæi piñæninque pogodo gocæimpa.

² Mönö wede pönente æite godö taadö ante tömengä ìñömö në täno beyænte gogaingä ingampa. Tömengä adocä incæ mönö wede pönönö ante, Cöwë mänömaï bacæimpa, ante ædæmö badongaingä ingampa. Tömengä ìñömö wadäni tömengä ingante awæ timpodäni wæyongante badete todäni adinque tömengä, Mänömaï cædäni botö caate wædö beyænque botö ìncayæ ate watapæ tocæboimpa, ante në ëñëningä inte piyænë cædinque caate wædinque wængacäimpa. Tömengä ñowo ìñömö ñäni ömæmönöte æite godinque Awënë Wængonguï nänö containpaa

tömëmængä ìnö tæ contate Awënë bate ongöñongä mönö adocä Itota ingante æmö ate bai pönëninque edæ tömengä miñæ tee empote pogodo gocæimpa.

³ Tömengä ìñömö në wïwa cædäni nanguï piinte cædäni wæcä incæte piyænë cægacäimpa. Ìninque minitö ìñömö, Wæntædämaï inte mïmö nangæ batawënämaï ingæimpa, ante cædinque, Tömengä æbänö cægacäi, ante pönëdäni. ⁴ Ñowo ganca minitö wënæ wënæ mïni cæinente wædö ante wido cæcæte ante minitö wænguï beyæ wepæ dicæ gowete cæminiyaa. ⁵ Ayæ Wængonguï mönö wampo pönencæmöimpa, ante mönö imonte, Botö wëmïni godömenque cæcæminimpa, ante æbänö pönö angacäi, ante minitö dicæ pönëminiyaa. Ìmaï angacäimpa, ante yewæmongatimpa.

“Botö wëmi ëñëmi. Mönö Awënë bitö ìmite, Eñente cæcæbiimpa, ante pangä wædinque,

bitö wæætë badete todämaï incæbiimpa.

Bitö ìmite, Eñenguënë quëwëe, angä ëñente wædinque wæwënämaï incæbiimpa.

⁶ Ìñæmpa tömengä nänö në waadete pönënanique ìnänite päninque mönö Awënë ìñömö, Eñencæminimpa, ante cæcampa.

Botö wëmïni, ante nänö në ængainänique ìnänite tömengä pangampa.”

⁷ Ante yewæmongatimpa cæminii. Minitö caate wæmïni ìmïnitawo. Ìñæmpa wëñænäni ìnänite wæmpoidi dicæ pänämaï inguïnäniyaa. Mæmpo Wængonguï ìñömö adobai, Botö wëmïni ìminipa, ante edonque acæimpa, ante nanguï äninque pangä caate wæminipa. Ìninque tömengä pangä wædinque minitö wæætë, Mönö ëñente quëwenguinque ante Mæmpo Wængonguï pangampa, ante piyænë cæte ee amïni pancæcäimpa.

⁸ Tömengä wëñæmö ìñömönte tömengä tömämö imonte edæ nanguï pante angampa. Incæte minitö pancamïniya ìmïnite tömengä

pante änāmaī ingantawo. Īninqe mīnitō, Wīī Wængonguī wēmōni imōnipa. Wacā wēmōni imōnipa, ante wæquēnēmīni imīnipa.

⁹ Mōnō mæmpoidi waodānique inōnāni inte nanguī āninqe pānāni adinqe mōnō, Mæmpocā inongā inte tōmengā nānō cæquēnēnonque cædinque mōnō imonte waa cæte pangantapa, ante tōmēnāni inānite waa atamompa. Mōnō Mæmpo Wængonguī adobaī mōnō imonte nanguī āninqe pangā adinqe mōnō quēwenguinque mōnō tōmengā ingante godōmenque Ao ante ēñente cæcæimpa. ¹⁰ Mōnō mæmpoidi guiquēnē, Æbānō pōnō waa cæquimoo, ante pōnente ate mōnō imonte edæ, Ēñencæmīnimpa, ante wantæ iñō nanguī ānāni ēñente cætamompa. Wængonguī iñōmō edæ, Tæiyæ waēmō botō ewocabo baī mīnitō adobaī tæiyæ waēmō ewocadinque watapæ quēwencæmīnimpa, ante cædinque mōnō waa quēwenguinque ante pōnō pangampa. ¹¹ Æcāmenque mōnō imonte nanguī āninqe pāna incæ tōmengā pangā ate mōnō caate wædinque dicæ quingæ watapæ tomongaa. Īñæmpa, Caate awædō, ante cōwē āmompā. Wæætē iincayæ ate edæ doyedē nāni pānō beyænque mōnō nē ēñente badōmo ate mōnō nō cæmō badinqe gānē pōnente entawēmompā.

Mōnō wæquinque Wængonguī apænecā ēñēnāmaī imompā

¹² Īninqe mīnitō guepænte wædimīni inte edæ tæī piñæninque wæntædāmaī inte nanguī cædāni. Ōnoncapo nanguī guecapote wædimīni inte edæ guecapodāmaī inte ængæ gantite pogodo gote baī nanguī cædāni. ¹³ Mōnō cægonguinō, ante mīnitō taadō ante enga womīni mæmō ba ate nē podā cædināni incæ podā cædāmaī inte tōmēnāni nāni waa baquinque mænīnōnō tōinō gote waa cægoncædānimpa, ante godō waadete cædāni.

¹⁴ Mōnō godongāmæ piyænē cæte quēwengæimpa, ante mīnitō nanguī tæī piñæninque waodāni tōmānāni inānite gānē pōnente cædāni. Ayæ, Æcānō tæiyæ waēmō ewocadāmaī ingāā tōmengā iñōmō mōnō Awēnē ingante cōwē adāmaī incæcæimpa, ante pōnente wædinque mīnitō, Mōnō tōmāmō Wængonguī ayongā tæiyæ waēmō ewocate quēwengæimpa, ante nanguī cædāni. ¹⁵ Wængonguī pōnō waadete nānō cædō ante mōnō tōmāmō ænte entawengæimpa, ante cædinque mīnitō cōwā adinqe, Adocanque incæ omætawengā ināmaī incæcæimpa, ante wææ cædāni. Adocanque wæwente nānō quēwēnō beyæ piinte bate tedecā ēñēninque mīnitō, Wadāni nāni wentamō mongænguinque adobaī piinte badāmaī incædānimpa, ante wææ cædinque nē piingā ingante godō wææ ædāni. ¹⁶ Ayæ mīni cabo incæ, Nānōogængā ināmaī iñongante adocanque incæ godō mōnāmaī incæcæimpa, ante cōwā adinqe wææ cædāni.

Etawoo wodi iñōmō tōmengā bamoncadengā inongā inte nānō nanguī ænguēnencoo ante piinte baī cædinque cænguinque æncæte ante tōmancoo godonte beyæ adopoque ænte cængacæimpa. Mīnitō guiquēnē, Inguipogaque ante ænte to wædō, ante Etawoo wodi nānō pōnēwente cægāinō baī adocanque incæ cædāmaī incæcæimpa, ante edæ wææ cædāni. ¹⁷ Bamoncadengā inte nānō ænguēnencoo ante do piinte baī godōningā inte Etawoo wodi iincayæ ate, Pōnōmi æmoe, āñongante mæmpocā wæætē Baa angacæimpa, ante do ēñēmīnipa. Edæ Ca ca wædinque tōmengā, Æbānō cæte ænguimoo, ante ancaa angā incæte mæmpocā do Baa āningā inte ñōwo wæætē wadō ante ædō cæte anguingā.

¹⁸ Onquiyabo Wængonguī nānō gonga tānongā bæcobo ñænoque dodāni ponte godongāmæ ongonte cægōnāni baī mīnitō wīī onquiyabo

ñænoque pöminipa. Tömënäni wëmö mæ mämönte bai iñömö wini cai pæmæmämö iñömö nani ponte wægaiñömö bai minitö wii pöminipa. ¹⁹ Todompeta nani ancadeca nangui we öömämö dodäni nani eñente wægaimämö bai minitö wii adopämö eñemäni. Wængongui wææ ante nänö tedepämö tömënäni nani eñente wægaimämö bai minitö wii adopämö eñemäni. Mänimämö eñente guiñente wædinque tömënäni, Idæwaa ämipa. Ædö cæte godömenque eñenguimöni, ante wægadänimpa. ²⁰ Edæ “Cæningä incæ onquiyaboga ponte cængö adinque minitö tæi tacamini wæncæcäimpa,” ante wææ añongante tömënäni ancai guiñente wædinque, Wængongui nänö wææ angainö ante mönitö ædö cæte ædämö eñente cæquimöni, ante wægadänimpa. ²¹ Onquiyaboga nani ate guiñemämö adinque Möitee wodi incæ, “Ancai guiñente botö do do wäate bai wæbopa,” angacäimpa.

²² Minitö guiquënë Tiönoquidi nani änonquidi do ponte bai ewocaminipa. Edæ Wængongui nê Quëwengä öönädë Eedotadë bai nänö waëmö pöni owoyömö minitö mäniñömö do ponte bai ewocaminipa. Wængongui anquedoidi æpodö miido ganca inönäni inte nangui pöni inäni godongämæ pö bee tente tömënäni nani watapæ ongöñömö minitö mäniñömö do ponte bai ewocaminipa. ²³ Mönö Codito ingante godongämæ mönö pönencabo iñömö bamoncadänäni nê ænguimö bayömönte mönö emöwo ante öönädë yewæmöntaa do yewæmönte ongompa. Ìninqe minitö adocabomini badinque Wængongui weca mönö waocabo tömämö imönte nê apænte anguingä weca do pömini iminipa. Nê nö cæte quëwengainäni wænte goyönänite Wængongui inque badongä ate do ædämö picænäni bai badänipa. Tömënäni önöwoca weca minitö do ponte bai ewocaminipa. ²⁴ Wængongui, Botö pönö cæbo ate minitö Ao

ämäni ininqe mönö godongämæ waa cæte quëwengæimpa, ante nänö angainö ante Itota, Ìninqe bacæimpa, ante ædämö badongacäimpa. Minitö iñömö nê badongaingä weca do pömini iminipa. Abedo wodi wepæ onguipoiya gowecä adinque Wængongui wæætë nê wænöningä ingante, Botö weca ongönämaï gobäwe, angacäimpa. Itota wepæ wii Abedo wodi wepæ bai imæ adinque Wængongui wæætë, Itota wepæ petæ petæ gowedimæ beyænque botö weca pödäni, ante cægacäimpa. Mänimæ Itota wepæ nänö petæ petæ gowegaiñömö minitö do ponte bai ewocaminipa.

²⁵ Mänömaï waëmö pöni iñömö do pömini inte minitö nê apæncä ingante Baa änämaï iedäni. Onquiyabo godongämæ ongönäni guiquënë inguipoga wææ angaingä ingante Baa äninäni iñönänite tömengä ata cæpodämaï inte pangacäimpa cæminii. Öönädë ongönte nê wææ angaingä ingante eñenämaï inte dadi emænte wadæ gomö bai mönö godömenque pante wæquënemö iñömönte tömengä cöwë ata cæpodämaï incæcäimpa.

²⁶ Mäniñedë tömengä nänö tedepämö beyænque inguipo wancæ wancæ cægatimpa. Nöwo iñömö tömengä, “Botö ìncayæ ate inguipo adopoque pöni wancæ wancæ cædinque öönädë adobaï wancæ wancæ edæ cæcæboimpa,” angacäimpa. ²⁷ Tömengä, “Ìncayæ ate adopoque pöni cæcæboimpa,” angacäimpa, ante pönëninque mönö iïmaï ante eñengæimpa. Tömengä adopoque wancæ wancæ cæcä ate tömengä nänö badongaincoo oo pöni ongoncoo iñömö tömancoo adoyedë ewente bacæimpa. Quincodö oo ongönämaï tæi ongoncoo i manincooque ayæ a ongongæimpa, ²⁸ Ìninqe mönö Awënë Odeye nempo quëwëmö iñömö wancæ wancæ cædämaï inte tæi ongonguimö imompa, ante pönëninque mönö Wængongui ingante waa ate

pönente apænecæimpa. Mänōmaï cædinque Wængongui ñäö bai nänö tæi emömämo ate guiñente wædinque tömengä beyæ cæcæimpa. ²⁹ Edæ mönō Wængongui iñömō edæ gonga wo bæcoqui bai ingänō anguenē, ante ämo eñēmaïminipa.

13

Īmaï cæmō adinque Wængongui waa tocæcæimpa, ante

¹ Minitō iñömō, Mönō caipæ imompa, ante mini waadete pönēnō bai cædinque cōwē godongāmæ waadete pönente cæedāni. ² Tömänāni inānite edæ, Pōedāni, ante waadete cæedāni. Mänōmaï cædinque pancadāniya, Botō weca ædānidō eñacæ pönāni, ante eñēnāmaï ināni incæte do waa cædāni ate edæ, Æ, Wængongui nänō da pönönāni anquedoidi incæ botō weca pönānitapa, ante tæcæ abopa, ante todānipa.

³ Tee mönete ongönāni tönō botō godongāmæ tee mönete wæcōmo bai imopa, ante pönēninque mīnitō tömēnāni inānite ante cōwē pönēedāni. Pancadāniya inānite wadāni wiwa godō cædāni ate caate wæwēñōnāni mīnitō adobai pönēninque, Mönō baō adobai eñamō inte tömēnāni tönō godongāmæ caate wæmō bai imompa, ante tömēnāni inānite cōwē pönēedāni.

⁴ Nänōogængä ināmaï iñongante waocä nē godō guëa mongä tönō nē godō wiwa towēnāni iñönānite Wængongui mänināni tömänāni inānite do apænte ante pancæcæimpa cæminii. Mīna gæncaya adominaque guëa moncæminaimpa. Ayæ ñänönāni möninque nāna gæncaya quëwēna ate, Waa impa, ante mönō waa acæimpa.

⁵ Wængongui incæ, “Mīnitō imīnite cōwē emō cæte godāmaï inte botō cōwē aacæboimpa,” angacæimpa. Mänōmaï beyæ mīnitō godonte æinta ante æinente wædāmaï inte mini eadincooque eadinque piyænē cæte quëwēedāni. ⁶ Īninque Wængongui beyæ iïmaï ante nāni yewæmongainō bai ante mönō wede pönente apænemompa.

“Mönō Awēnē botō tönō godongāmæ cæcä adinque botō,

Waocä ædō cæte botō imote wēnæ wēnæ cæquiringä, ante eñēmo inte guiñēnāmaï incæboimpa.”

⁷ Nē aadāni iñömō mīnitō imīnite Wængongui nänō änō ante nē apænedāni inānite ante pönēninque mīnitō, Tömēnāni iñömō waa cædinque edæ watapæ quëwēnānipa, ante pönēedāni. Ayæ tömēnāni nāni wede pönēnō bai adobai wede pönēedāni.

⁸ Itota Codito iñömō wēenēñedē nänō ingai bai ingä ñowoönæ adobai ingä inte tömengä adocä iincayæ ate cōwē adobai incæcæimpa.

⁹ Wadāni, Wacä taadō odömōnte apænebo eñēe, aññōnānite tömēnāni mīñæ godāmaï iedāni. Īñæmpa tömēnāni cænguinque ante, Æbänō waa pōni cō cæquīi, ante wææ änāni incæte mänīi cænguincoo beyæ tömēnāni wīi godōmenque watapæ quëwēnānipa. Īninque mänincoo cænte beyæ mönō mīmō ædō cæte tæi piñænte entawenguīi. Wæætē edæ Wængongui nänō waadete pönō cædō beyænque mönō tæi piñænte entawengæimpa. ¹⁰ Æmontaicōnē cædinque, Wængongui quī, ante nē godönāni iñömō tömēnāni nāni iya täimpaa godōninque pancaa cænguī ænte nē cænguēnēnāni inönāni incæte tömēnāni mönō Codito mönō beyæ nāmā nänō wepæ godongainō guiquēnē ædō cæte ænguīnāni.

¹¹ Cænināni inānite wænönāni ate nē godongä ñænængä pōni inongä iñömō wepænque æninque, Wēnæ wēnæ möni cædinō ante Wængongui pönō ñä mēnongacæcæimpa, ante cædinque Tæiyæ Waemō Pōni Oncōnē wäänē guīdinque godongampa. Godongä ate baonque, Wentamō mongænte awædō, ante æninque tömēnāni nāni quëwēñömō yabæque mao iya tangadānipa. ¹² Itota adobai, Botō wepæ pönō mēnongabo ate botō quimīni iñömō tæiyæ waemō ewocate quëwencæminimpa, ante cædinque wentamō mönō

entawënö ænte teëmë mongænte godinque tömënäni quëwëñömö wææ cædinemö tao godinque yabæque pönï guiñëñate wædinque caate wængacäimpa cæmöö. ¹³ Tömengä yabæque pönï guiñëñate wædinque nänö tao gogai bai mönö adoyömö tömengä weca tao gote ado guiñëñate wæcæimpa. ¹⁴ Inæmpa inguipoga mönö quëwëñömö tæi ongompa diyæ wantæpiyæ quëwenguü. Wæætë öönæde iincayæ ate edæ mönö cöwë quëwenguüñömö ante æinente wædinque wänö cömompa.

¹⁵ Ininque, Wængonguü qui, ante cænguü godönäni bai cædinque mönö iñömö edæ, Itota emöwo beyænque quëwëmönipa, ante në apænemö inte tömengä emöwo ante Wængonguü ingante apænedinque, Bitö tæi emömi inte waa pönï cæbipa, ante watapæ apænecæimpa. ¹⁶ Ayæ ñimpo cædämaï inte minitö wadäni inänite cöwë waa cæedäni. Ayæ wadäni inänite mini mänincoo godö nënempomini æncædänimpa. Minitö mänömaï, Wængonguü qui, ante godonte bai cædinque nënempomini adinque Wængonguü mini godönö ante waa acampa. ¹⁷ Minitö, Mönö imonte në änäni inänite mönö Ao ante eñengæimpa, ante pönëninque në aadäni inänite cöwë eñente cæedäni. Tömënäni, Æbänö cæboo, ante adinque Wængonguü apænte ancæcäimpa, ante eñëninque guiñente wædäni inte nö cædinque aadänipa cæminii. Tömënäni mänömaï aadinque watapæ tote quëwencædänimpa, ante minitö wæætë tömënäni nani änönö ante eñente cæedäni. Minitö wæætë eñënämaï imini adinque tömënäni wæætë edæ, Ædö cæte aaquimönii, ante wæwente badäni ininque minitö adobai todämaï imaiminipa.

¹⁸ Mönitö beyæ ante Wængonguü ingante apæneedäni. Mönitö mimö entawëmöni inte wentamö entawënämaï imönipa, ante nämä apænte pönëmönipa. Edæ, Quiëmë cæmö incæ mönö cöwë

nö cæte quëwengæimpa, ante cæmönipa. ¹⁹ Botö minitö weca ocæ emænte pönëmopa. Ininque minitö Wængonguü ingante apænedinque, Wængonguü, bitö pönö cæbi ate Pabodo mönitö weca poncæcäimpa, ante apæneedäni, ante nanguü ämopa.

Minitö iminite Wængonguü waa cæcæcäimpa, ante

²⁰ Wængonguü inguipoga nänö badönämaï iñedë wëenëñedë pönï äninque edæ, Mönö godongämæ waa cæte quëwengæimpa, ante tömengä nänö angainö bai cöwë në badongäingä inte iïmaï pönö cægacäimpa. Edæ mönö obegaidi bai iñömönte Awënë Itota iñömö mönö imonte në Aacä ñænængä inongä inte tömengä wepæ gowe-gaimæ eyepæ pönï godongä ate Wængonguü tömengä ingante, Eyepæ i, äninque, Näni ömæmöe, angä ñäni ömæmongacäimpa. Mänömaï gänë pönente në cægaingä inte Wængonguü iñömö, ²¹ waa pönï pönongä ænte eyepæ entawëninque minitö iñömö tömengä nänö änö bai cæcæminimpa. Tömengä Itota Codito tönö godongämæ cædinque pönö cæcä æninque mönö tömengä nänö waa adoncooque entawengæimpa, ämopa. Itota Codito iñömö ñöwopämo incæ iincayæmämo incæ cöwë në tæi emönongä inte ñäö emongä amönipa, ante mönö tömengä ingante cöwë watapæ apænecæimpa. Mänömaï ingæimpa, ante botö, Amëe, ämopa.

²² Inänäni eñeedäni. Botö mäninö tömänö ante apænecæte ante wædænque pönï yewæmömopa. Ininque mäninö botö ædæmö apænedinö ante minitö piyænë cædinque eñeedäni, ämopa. ²³ Mönö töninacä Timoteo tee mönete wæyongante ñöwo ñimpo cædäni gocantapa, ante apænebo eñeedäni. Tömengä botö weca quingæ pongä ininque botö tömengä tönö guëa minitö weca eñacæ pömaimönapa. ²⁴ Mönitö beyæ apænedinque minitö iminite në aadäni inänite, Waa quëwencæminimpa,

ante apæneedäni. Ayæ adobaï
Wængonguï quinäni tömänäni inänite,
Waa quëwencæminimpa, ante
mönitö beyæ äedäni. Ayæ, Minitö
iminite ante apænedinque Itadi-
abæ quëwänäni adobaï, Minitö waa
quëwencæminimpa, ante apænedänipa,
ante ämo ëñëedäni. ²⁵ Minitö
tömämïni iminite Wængonguï pönö
waadete cæcæcäimpa. Mäninque ante
yewæmömopa.

Tantiago cadota ante nānō yewæmongainta

Tantiago iīmaī yewæmongacāimpa

¹ Botō Santiagobo iīnōmō Mæmpo Wængonguī tōnō mōnō Awēnē Itota Codito inate nē cædōmo imopa. Idægoidi mīni cabo tipæmpoga go mencabomīniya inte wabæca nāni quēwencabo wabæca nāni quēwencabo weca pangocæte godimīni iīnōmīnite botō waa pōnēmo inte iī yewæmōintaa yewæmōmopa.

Wængonguī nānō eñēmāmo ante mōnō cængæimpa, ante

² Botō tōniñamīni eñēedāni. Quiēmē beyæ wæwente bamīni incæ mīnitō æyedēmē mānōmaī bamīni inique edæ māniñedē incæ cōwē, Mōnō wat-apæ toquinque impa, ante pōnēedāni. ³ Mīni wede pōnēnō æbānō i, ante edonque acæimpa, ante cædāni ate caate wæmīni incæte mīnitō, Mōnō caate wædō beyænque mōnō godōmenque pædinque wæntæye ināmaī inte ee cæquīmō imopa, ante do eñēmīnīpa. ⁴ Inique, Mōnō æmæwo pæcæimpa, ante cædinque mīnitō wæntæye ināmaī inte ee cæedāni. Mānōmaī cæte pæmīni inique, Mīni cædimāmo æbānō cæmīni imīni, ante adinque edæ, Tōmānō waēmō cæmīni imīnīpa, ante abaimpa.

⁵ Mīnitō weca æcānō nānō eñēmāmo wīi eyepæ ina adinque tōmengā, Pōnōmi eñēmoe, ante Wængonguī ingante apænequēnengampa. Apæneyongā Wængonguī wæætē pōnō cæcā æncæcāimpa. Edæ Wængonguī iīnōmō nē, Pōnōmi æmoe, ante ānongā ingante wæætē piinte ānāmaī inte godōnongā ingampa. Ayæ tōmānāni inānite pōnō cædinque tōmāā godōnongā ingampa. ⁶ Iñæmpa nē angā iīnōmō wede pōnenguēnengā inte wīi æmæ pōnēninque apænecæcāimpa. Edæ nē æmæ pōnengā iīnōmō gāwapæ æpæ woboyæ pæmæninque mæ

conta mæ conta gopæ ocæmæ pō cæpæ nānō cægaīmæ bai tōmengā adobaī gocā ingampa. ⁷ Māningā iīnōmō Wængonguī pōnongā æncæboimpa, ante ædō cæte iīmaī ante pōnenguīgāā. Wængonguī edæ tōmengā ingante tōmāā godōnāmaī incæcāimpa. ⁸ Tōmengā mēnongā pōnente quēwengā ingampa. Æbānō cæcāā, ante eñēnāmaī inongā inte ædō cæte waa cæquīgāā.

⁹ Adocanque mōnō tōniñacā incæ imæca quēwēnāni nāni ēadincoo nē wīi eyepæ ēacā incæte tōmengā Wængonguī pōnō cæcā beyænque, Æbānō ēaboo, ante pōnēninque wat-apæ toquēnengā ingampa. ¹⁰ Wacā mōnō tōniñacā guiquēnē imæca quēwēnāni nāni ēadincoo nē ēacā incæte tōmengā wæætē, Botō ōnōmoque imopa, ante pōnēninque wat-apæ toquēnengā ingampa. Edæ ongai ōnonque pododique guīñē wæmpa bai tōmengā adobaī wæncæcāimpa. ¹¹ Edæ nænque tamō tī nāwāñonte awæ guingo icate to aminte æmæwo wæmpa. Ongai yædoī gueo odote wæninque nānō waēmō ēnodī wo ēwente bapa bai nē ēacā iīnōmō adobaī ingampa. Tōmengā godonte æ godonte æ tæcæ cædinque quingæ wæninque edæ dæ anguīgā.

Mōnō caate wæpāmo

¹² Wængonguī ingante nē waad-edāni inānite tōmengā wæætē, Mīni cōwē quēwenguīnta, ante poganta bai mīnitō imīnite pōnōmo æncæmīnīmpa, ante angacāimpa. Mānīnta Wængonguī weca cōwē mōnō quēwenguīnō ingampa. Inique waocā caate wæcā incæte tōmengā wæntæye badāmaī ingā iīnōmō tōmengā nānō toquinque. Wæntæye ināmaī inte ee cæcā adinque Wængonguī, Mīni cōwē quēwenguīnta, ante tōmengā nānō angāinō bai māningā ingante pōnongā æncæcāimpa. ¹³ Waocā nānō cæinēwente wædō beyæ, Wēnæ wēnæ cæboe, ante cædinque tōmengā, Wængonguī botō imote, Wēnæ wēnæ cæcæbiimpa, ante ingampa, ante

wīi anguēnengā ingampa. Edæ Wængonguī ingante, Wēnæ wēnæ cæcæbiimpa, ante waocæ ædō cæte anguingā. Wængonguī wæætē wadāni inānite, Wēnæ wēnæ cæcæminimpa, ante ānāmaī inongā ingampa cæminii. ¹⁴Æcāmenque incæ, Wēnæ wēnæ botō cæinente wædō incæ ante waēmō impa, ante pōnēnque tōmengā do wēnæ wēnæ mōnō cæinente wædō beyænque wēnæ wēnæ cæinengā ingampa. ¹⁵Yædēmadā wēñængā pæcā adinque ēñāqingā bai mōnō cæinēwente wæpāmo adobai entawente pætawēmō ininque mōnō do wēnæ wēnæ cæmompā. Ayæ wēnæ wēnæ mōnō cæpāmo beyæ mōnō æmæwo wænguinque impa.

¹⁶Botō nē waadete tōniñamini ēñēedāni. Minitō nāmā incæ oda cædāmaī incæminimpa. ¹⁷Ōnonque mōnō ænō ante mōnō waēmō ñāō emōnoncoo tōmancoo incæ mōnō Mæmpo Wængonguī oōnædē owote nē pōnōngā ingampa. Mæmpo Wængonguī oōnædē owodique apaidāni ināni badongacāimpa. Adocā nænque wēmō cæbai wayōmō wayōmō go bai entawēnāmaingā ingampa. Tōmengā wæætē adodonque ingaingā ingampa. ¹⁸Botō cæinēmopa, ante nē angaingā inte Wængonguī, Nāwangā botō angainō beyænque mīnitō botō wēñæmini bacæminimpa, ante wāānā mangā bai cædinque mōnō imonte pōnō badongacāimpa. Tōmengā nānō badongaincoo tōmancoo iñonte mōnō tānomō inōmō imompā.

Wængonguī ingante mōnō nō ēñente cædō

¹⁹Botō nē waadete tōniñamini ēñēedāni. Wacā āñongā mīnitō tōmāmini quingæ ēñenguēnēmini iminipa. Minitō wæætē quingæ apænedāmaī inte adobai quingæ piinte ināmaī inguēnēmini iminipa. ²⁰Wængonguī, Nō cæte quēwēedāni, ante waa nānō cæinēmāmo ante waocā nānō piimāmo beyæ wīi edæ cæcampa. ²¹Mānōmaī beyæ mīnitō wentamō entawēnque mīni wīwa cædō tōmāā ñimpo cæedāni. Adobai

quēmē mīni wēnæ wēnæ cæpāmo tōmāmāmo ñimpo cæte iedāni. Ayæ Wængonguī nānō angainō ante mīnitō mīmōnē nānō mingainō ante Ao ante gānē pōnente æncæminimpa. Edæ iī angainō beyænque mīnitō quēwencæminimpa.

²²Mīnitō, Nāmā incæ oda cædāmaī ingæimpa, ante cædinque Wængonguī nānō angainō ante wīi ōnonque ēñēmīnique inte wæætē, Æbānō ante i, ante ēñente cæedāni. ²³⁻²⁴Waocā nāmā awinca awocawæntaa adinque nāmā ate ate wadæ godinque, Quīnō bai intawo, ante nānō adinca do oda cæte wæcampa. Mānōmaī oda cæte wæcā bai Wængonguī nānō angainō ante nē ēñenganque wīi ēñente cæcā iñōmō tōmengā adobai oda cæte wæcā ingampa. ²⁵Wængonguī nōingā nānō wææ angainō ante nāni yewæmongainō ante nē ædæmō cōwē acā guiquēnē tōmengā iñōmō nānō ēñēninō ante wīi pōnente badāmaī inte wæætē cōwē ēñente cæcā ininque tōmengā mānōmaī cædinque nānō toquinque cæcampa. Wængonguī nōingā nānō wææ angainō beyænque waocā ñimpo cæte quēwengā ingampa.

²⁶Wængonguī ingante botō nē ēñente cæbo imopa, ante pōnengā incæte tōmengā ōnonguēnēwa ñā cæguēnēwate bai cædāmaī inte wæætē wīwa tedecā ininque tōmengā nāmā incæ oda cæte gobaingampa. Ayæ Wængonguī ingante botō ēñente cæbo imopa, ante tōmengā nānō ānō ante ōnonque angā imaingampa. ²⁷Nōwadāni tōnō owæmpoināni nāni wæwēñedē mōnō tōmēnāni tōnō godongāmæ cæcæimpa. Ayæ adobai imæcaque ante quēwēnāni nāni wēnæ wēnæ cædimāmo bai mōnō, Wentamō badāmaī ingæimpa, ante wææ cæcæimpa. Mānōmaī cæmō ininque mōnō Mæmpo Wængonguī ayongante mōnō wapiticæ cædāmaī inte wæætē nō ēñente cæmō imompā.

2

Wacā ingante wadō wadō ate pōnente cædāmaī ingæimpa

¹ Botō tōniñamīni eñēedāni. Mōnō Awēnē Itota Codito ñāō emonte nē apāigaingā ingante nē pōnēmīni inte waodāni inānite wadō wadō ate pōnente cādāmaī iedāni. ² Īmaī nāni cēbaī ante onōwēnenque pōnēedāni. Edæ onguīñængā nē ēacā iñōmō tōmengā nānō onongompo timpoi oodo badōi wempocā ĩnīnque waēmoncoo mongængā inte mīni a ongōñōmō guī pongampa. Ayæ onguīñængā nē wīi eyepæ ēacā iñōmō pedæncoo mongængā inte mīni a ongōñōmō adobaī pongampa. ³ Adīnque mīnitō waēmoncoo mongængā ingante, “Bitō iñōmō waa tæ containpaa tæ contae,” ante apænemīni ĩmīnitawo. Wæætē wīi eyepæ ēacā ingante, “Bitō māniñōmō adiyæ ongōe. Botō onōwa iñōmō tepataa tæ contae,” ante apænemīni ĩmīnitawo. ⁴ Mānōmaī apænedīnque mīnitō weca wīi godongāmæ wadō wadō ate pōnente cēbaīmīnitawo. Ayæ wēnæ wēnæ pōnēnīnque apænte āmīni babaīmīnitawo. ⁵ Botō nē waadete tōniñamīni eñēedāni. Wængonguī Awēnē Odeye ingante nē waadedāni inānite tōmengā, Botō pōnō cæbo ate mīnitō botō nempo cōwē quēwencæmīnīmpa, angacāimpa. Īmæca quēwēnāni weca māincoo wīi eyepæ ēadāni iñōnānite tōmengā, Mīni wede pōnēnō nanguī ēwocadīnque mīnitō botō angainō baī botō nempo quēwencæmīnīmpa, ante tōmēnāni inānite wīi apænte ængantawo. ⁶ Mīnitō wæætē wīi eyepæ ēacā ingante pīnte tedemīni ate tōmengā guingo imonte badingā ingampa. Īñæmpa nē ēadāni guiquēnē mīnitō ĩmīnite nāni wēnæ wēnæ cædīnō beyænque wīi wæmīnitawo. Ayæ adodāni mīnitō ĩmīnite apænte anguīnāni weca godoncæte ante wīi ænte godānitawo. ⁷ Ayæ mīnitō, Coditoidi ĩmōnīpa, ante Codito waa pōni emōwo ante emōmīni iñōmīnite tōmēnāni adodāni incæ māniwo ante babæ ānīnque nē wēnæ wēnæ ānāni wīi inānitawo.

⁸ Wængonguī angā eñēnīnque nāni yewæmongainō ante adīnque mīnitō

waa pōni Awēnē nānō wææ angainō ante nō eñēnte cæmīni ĩnīnque waa cēbaīmīni ĩmīnīpa. Īmaī ante yewæmonte impa. “Bitō nāmā ante pōnente, Nāmā waadebo ĩmōpa, ante nāmā bitō waadete pōnenganca wadāni inānite adoganca waadete pōnēe.” ⁹ Mānōmaī cædīnque mīnitō māincoo ēacā ingante waa cæmīni incæte wīi eyepæ ēacā ingante wadō wadō ate pōnēmīni inte wīwa āmīni ĩnīnque wēnæ wēnæ cæmīni ĩmaīmīnīpa. Ayæ Wængonguī nānō wææ angainō ononque wido cæte baī cædīmīni inte mīnitō wentamō mongæmīni ĩmaīmīnīpa. ¹⁰ Wængonguī beyæ Mōitee wodi nānō wææ yewæmongainō ante tōmānō ante æcāmenque nē eñēnte cæcā incæte mānīnō adodonque pōni incæ eñēnāmaī cæcā inte tōmengā mānīnō tōmānō ante ononque wido cæte baī cædingā inte wentamō mongængā ingampa. ¹¹ Edæ Wængonguī, “Nānōogæ ĩnāmaī iñongante godō guēa mōnāmaī iedāni,” ante nē angaingā inte tōmengā adocā godōmenque ĩmaī angacāimpa, “Wacā ingā wænōnāmaī iedāni.” Mīnitō wacā nānōogæ iñongante godō guēa mōnāmaī ĩmīni incæte wacā ingante wænōmīni ĩnīnque mīnitō Wængonguī nānō wææ angainō ononque wido cæte baī cædīmīni inte wentamō mongæmīni ĩmaīmīnīpa.

¹² Wængonguī nānō apænte anguīōnæ mōnō imonte tōmengā nānō wææ angainō baī cæcæcāimpa. Mānīnō nānō wææ angainō beyænque waocā ñimpo cæte quēwengā ingampa. ĩnīnque mīnitō tedemīni incæ cæmīni incæ, Cōwē mānōmaī impa, ante pōnēnīnque tedecæmīnīmpa. Adobaī ante cæcæmīnīmpa. ¹³ Wadāni wæwēnāni iñōnānite æcāmenque wīi waadete godō waa cædingā ingāā, ante Wængonguī wæætē tōmengā ingante godō waadete waa cādāmaī inte apænte ānīnque pancæcāimpa. Wadāni wæwēnāni inānite æcāmenque guiquēnē nē godō waadete waa cædingā iñongante

Wængonguī wæætē tōmengā ingante nānō apænte anguiōnæ godō waadete waa cæcæcāimpa.

Wængonguī ingante pōnēninque mōnō cæquēnēnō

¹⁴ Botō tōniñamīni ēñēedāni. Waocā, Botō Wængonguī ingante wede pōnēmo īmopa, angā incæte tōmengā nānō waa cædinō wæætē dæ ā īninque tōmengā mānīnō, Wede pōnēmopa, ante nānō ānō beyænque ædō cæte wænāmaī quēwengūngā.

¹⁵ Īmaī nāni cæbaī ante ōnōwēnenque pōnēedāni. Wængonguī ingante wede pōnengā īñōmō onguiñængā incæ onquiyængā incæ æcāmenque incæ tōmengā weocoo tōnō cænguī ōmaacā ingampa, ¹⁶ adinque mīnitō weca adocanque tōmengā ingante, “Waa goe, āmopa. Bitō, Yoguidāmaī, ante weocoo wēñæ, cænguī eyepæ æninque cæe,” ante angā incæte nē ōmaacā nānō ænguēnēnō ante edæ tōmengā ingante godōnāmaī īninque tōmengā waa cæcantawogaa. ¹⁷ Adobaī Īmaī impa. Mōnō waa cædinō dæ ā īninque Wængonguī ingante mōnō wede pōnēnō incæ ōnonque bapa.

¹⁸ Incæte wacā Īmaī anguingā. “Bitō Wængonguī ingante tōmēmi wede pōnēnō ēabi īmipa. Botō guiquēnē tōmēmo waa cædinō ēabo īmopa,” ante añongā botō wæætē, Bitō nē cædāmaī īnōmi inte Wængonguī ingante bitō wede pōnēnō ante botō īmote odōmōmi aboe, āmopa. Odōmōmi adinque botō guiquēnē botō cædinō ante odōmōmo adinque bitō wæætē botō wede pōnēnō edonque pōni abaīmipa.

¹⁹ Wængonguī nāwangā adocanque ingaingā ingampa. Bitō mānōmaīnō ante pōnēmi inte waa pōni pōnēmi īmipa. Wēnæidi diyæ adodō ante pōnēnānipa tōō. Incæte ancaī guīñente do do wāate wædānipa.

²⁰ Bitō mānōmaīnō ante nē ōnonque tedebe īmi ēñēe. Botō, Mōnō waa cædāmaī īmō īninque Wængonguī ingante mōnō wede pōnēnō incæ ōnonque īmampa, ante odōmōmo ate bitō edæ Ao ante ēñenguīmiyaa. ²¹ Edæ

mōnō docā Abadāō wodi Wængonguī nānō āmaī cædinque tōmengā wengā onguiñængā Itæca ingante æninque iya tāimoga cōnōninque wænoncæ cæyongante Wængonguī adinque, Bitō nō cæte entawēmi āmopa, ante apænegacāimpa. Abadāō wodi nānō cædinō beyænque Wængonguī mānōmaī angacāimpa. ²² Bitō

ēñēnāmaī īmitawo. Abadāō wodi edæ Wængonguī ingante wede pōnēninque ēñente cægacāimpa. Wīi ēñente cægāingā inte baī tōmengā Wængonguī ingante nānō wede pōnengāinō ōnonque pōnēmaingā incægacāimpa. Ayæ waa nānō cægāinō beyæ Abadāō wodi nānō wede pōnengāinō eyepæ pōni bagatimpa. ²³ Wængonguī angā

ēñente nāni yewæmongāinō baī īinque batimpa. Īmaī ante impa. “Abadāō īñōmō Wængonguī, Botō Īmaī pōnō cæcæboimpa, ante nānō angāinō ante pōnengacāimpa. Īninque Wængonguī, Mānōmaī pōnēmi beyæ bitō botō ayōmo nō cæte entawēmi īmipa,” ante tōmengā ingante wæætē pōnō angacāimpa. Ayæ Abadāō, Wængonguī æmigo ingampa, ante angadānimpa.

²⁴ Bitō ēñēnāmaī īmitawo. Waocā Wængonguī ingante wīi nānō wede pōnēnō beyænque wæætē, Tōmengā æbānō waa cæcā, ante adinque Wængonguī tōmengā ingante, Bitō nō cæte entawēmi abopa, ante cæcā ingampa. ²⁵ Idægoidi, Ōmæ awēmō ate pōeda, ante mēnaa īnate da godōnāni gote pōñōnate Adacaba wodi nē towente quēwengā incæ, Botō oncōnē guīeda, ante tōmēna īnate wē wodongacāimpa. Ayæ, Wadāni tōmēna īnate bæi ongōnāmaī incædānimpa, ante, Wadō taadō goeda, ante da godongā gogadaimpa. Mānōmaī cæcā adinque Wængonguī, Bitō cædinō beyænque bitō botō ayōmo nō cæte entawēmi īmipa, ante Adacaba ingante adobāinō ante pōnō angacāimpa. ²⁶ Mōnō baō ōmæwocā inte do wænte ī baī Wængonguī ingante mōnō waa cædāmaī wede pōnēnō adobaī do wæningā baī inte edæ ōnonque impa.

3

Mönö önonguënëwa

¹ Botö tönĩñamĩni eñeedāni. Mĩnitö weca wĩi tæiyæñāni, Nē odōmonte apæñemōni bacæmōnimpa, ante baine wæquënēnāni incædānimpa. Edæ wadāni inānite pōnōmenque apænte āninqe Wængonguĩ wæætē mōnō nē odōmonte apæñemō iñōmonte, Æbānō odōmonte apæñemĩni, ante mōnō imonte godōmenque apænte āninqe pancæcāimpa. Mĩnitö do eñēmĩnipa. ² Mönö tōmāmō nanguĩ ægodawate tæi go wæninque bai oda cæmō imompa. Nē tedecā iñōmō tōmengā, Æbānō ante tedebōo, ante tōmengā önonguënëwa cōwē wææ aadinque tōmengā wënæ wënæ ānāmaĩ ininqe nōingā cæbaingā ingampa. Ayæ wënæ wënæ cædāmaĩ incæboimpa, ante nāmā baonga tōmāo wææ aate quëwëngōngā ingampa.

³ Cabayo mōnō imonte eñente cæcæcāimpa, ante tæinta badōinta önōne da wënemō ate, Cabayo baō tōmāñō incæ iñāimæ iñāimæ gocæcāimpa, ante cæmō ininqe cabayo do eñente gocampa. ⁴ Iimainō ante ñænængade wipo ante adobaĩ ante pōñeedāni. Ñænængade pōni wipo incæ woboyæ nanguĩ pæmænte gopa incæte wipo nē dadongā nānō cæinēnō bai, Ædōnō dadiimæ ædōnō dadiimæ wiyate goquĩ, ante guiyā awæmpa inte wiyate cæcā gopa. ⁵ Ayæ adobaĩ mōnō baō tōmāo eñayōmō mōnō önonguënëwa guiyā enguënëwamō imompa. Incæte mōnō önonguënëwa inte tededinque, Mönö nanguĩ cæmompā, ante tedewëmompā. Ñænængade pōni omædē incæ amimō bayedē guiyā gonga beyæ omædē tōmāo gonga bæcodote bapa. ⁶ Ayæ mōnō önonguënëwa adobaĩ gonga bæcodote bai tedepa. Mönö baō tōmāo eñayōmō mōnō önonguënëwa tōmāo mōnō wĩwa tedewënguinque wënæ wënæ enguënëwamō imompa. Waomō incæ māninguënëwa beyænque mōnō baō tōmāo inte eñenāmaĩ cæmompā. Ayæ gonga wacæ tænōmonte

bæcododāni bai ado önonguënëwa beyæ mōnō quëwenganca tōmanganca wo ewente imompa. Edæ iĩ gonga tadōmengadænguipodē oñonte ö ænte wacæ tænōmonte bæcodote bai cædinque wënæ incæ mōnō imonte cæcā beyænque mōnō wĩwa tedewëmō imompa.

⁷ Babæidi incæ öömā eadāni incæ tæntæidi incæ æpænē quëwënāni incæ quingānōidi incæ tōmānāni inānite waocā, Botö pæpogate cænināni bacæminimpa, ante cæcā ingampa. Waocā doyedē nānō cægai beyænque cænināni bate quëwengadānimpa. ⁸ Iñæmpa æcānō, Mönö önonguënëwa pæpogate bai bacæimpa, ante cædaa edæ dæ angampa. Edæ, Babæidi cōwē incæmōnimpa, ante cænināni badāmaĩ ināni bai mōnō önonguënëwa adobaĩ wënæ wënæ i ininqe ædō cæte waa tedemōö. Wæætē mōnō önonguënëwa nanguĩ wænguimæ enguënëwamō bai imompa.

⁹ Māninguënëwa inte mōnō Mæmpo Wængonguĩ ingante, Bitö tæiyæ waemō imidō anguënē, ante waa apæñemompa. Wæætē waodāni Wængonguĩ tōmengā nānō ingai bai nānō nē badongaināni iñōnānite tōmēnāni inānite ante mōnō adoguënëwa inte wënæ wënæ apæñemompa. ¹⁰ Ado önōne incæ wade wade ante mēnea ante apæñemompa. Adodeque ante wænæ wænæ impa. Botö tönĩñamĩni eñeedāni. Māninō bai mōnō edæ wĩi cæquënemō ingæimpa. ¹¹ Æpæ tayōmō ado tayōmō ædō cæte waëmōmæ wentamōmæ äāñōmonque ta goquimææ.

¹² Botö tönĩñamĩni eñeedāni. Iigowæ nāni äwæ incayō odibomō nāni änōmō ædō cæte incaquĩ. Yowewæ incayō iigo mæñeca ædō cæte incaquĩ. Adobaĩ ado tayōmō ædō cæte waëmōmæ wentamōmæ äāñōmonque ta goquimææ.

Mönö nö eñëmāmo

¹³ Mĩnitö weca æcānō nö eñengā ingantawo. Tōmengā iñōmō, Nō eñëmo

imopa, ante wadāni eñencædānimpa, ante cædinqe tōmengā nānō waa quēwēnō inte odōmoncæcāimpa. Ayæ tōmengā nō eñengā incæ, Botō önōmoque imopa, ante pōnēninqe tōmengā nānō cædīnō beyæ odōmongā acædānimpa. ¹⁴ Mīnitō guiquēnē wacā quincōo adinqe pīinte entawēmīni ayæ nāmanque ante, Mōnō ñænæmō badinqe waa quēwengæimpa, ante pōnente entawēmīni īninqe mīnitō nō eñēmīni incæ, Mōnō waa cæmōmpa, ante ædō cæte anguīmīni. Ayæ mǎnōmaī baī godōmenque entawēmīni īninqe nāwangā mīni anguēnēnō ante edæ Baa ānāmaī iedāni. ¹⁵ Mǎnīnō eñēmāmo wīī Wængonguī nānō nō eñēmāmo i. Wæætē īī inguipogaque ante quēwengā inte waocā mā pōnēninqe wēnæ nānō eñēmāmo ante entawengā ingampa. ¹⁶ Edæ waocā æyedēmē wacā quincōo adinqe pīinte entawengā ayæ nāmanque ante, Botō ñænæmo badinqe waa quēwencæboimpa, ante pōnente entawengā īñōmō tōmengā ædō cæte tōingā pōnente cæcāā. Īñæmpa quīēmē nāni wēnæ wēnæ cæpāmo ante cæcampa.

¹⁷ Waocā Wængonguī nānō nō eñēmāmo ante nē entawengā guiquēnē waēmō entawengā ingampa. Ayæ wacā ingante cōwē piyænē cæte quēwēnongā ingampa. Tōmengā nē waadete pōnengā inte wacā ingante waa eñēnongā ingampa. Wacā ingante eñente cædongā ingampa. Tōmengā, Wæwēnāmaī incæbiimpa, ante wacā ingante godō waadete waa cædongā ingampa. Ayæ, Quīnō waa inguīī, ante mǎnīnō ante cædongā ingampa. Nē waodāni īnānite wadō wadō ate pōnente cædāmaī inte tōmengā nō pōnente quēwēnongā ingampa. ¹⁸ Wadāni īnānite, Botō piyænē cæcæboimpa, ante nē cæcā īñōmō tōmengā nānō piyænē cædīnō beyæ tōmēmō nē mīnongā baī ingampa. Tōmengā nānō piyænē cædīnō beyæ waodāni wæætē, Quīnō nō cæte impa, ante cædāni īninqe tōmengā edæ amīñayedē tōmēmō tā

pete ængā baī incæcāimpa.

4

Inguipoga nāni quincōo ante pōnēnāmaī incæmōimpa

¹ Mīni cabo quīnō beyæ ante guēa wæætēdō wæætē pīininqe wæætē godō wæætē godō ānewēmīnitawo. Mīnitō nāmā wadō wadō mīni cæīnēnō ante entawente guēa cæte quēwēmīni beyænque cōwē godongāmæ mīni pīinte quēwengūninqe īmīnīpa tōō. ² Mīnitō æīnente wæmīni incæte ænāmaī īmīnīpa. Īninqe nē èacā ingante wænōmīni incæ tōmengā nānō quincōo ante æīnēmīni incæte mīni æīnēnō, ante ænāmaī īmīnīpa. Mǎnōmaī beyæ mīnitō wæætē godō wæætē godō ānewēninqe guēa wæætēdō wæætē pīininqe guēadō guēa cæte quēwēmīni īmīnīpa. Mīni ānō ante mīnitō, Pōnōmī æmōnie, ante mīnitō Wængonguī ingante apænedāmaī īmīni inte mīni ænāmaī quēwengūninqe impa. ³ Mīnitō Wængonguī ingante mīni ānō ante apænēmīni incæte wēnæ wēnæ ante pōnēninqe apænēmīni beyæ ænāmaī īmīnīpa. Edæ Wængonguī nānō pōnōnī æninqe mōnō edæ nāmanque pōnente tote quēwengæimpa, ante æīnente wæmīni inte ænāmaī īmīnīpa tōō.

⁴ Waocā nānōogæ ingante wido cæcā baī mīnitō adobaī Wængonguī ingante wido cæmīni īmīnīpa. Mīnitō eñēnāmaī īmīnitawo. Inguipoga nāni quincōo ante mōnō pōnēnō beyæ mōnō Wængonguī ingante pīinte īmōmpa. Incæte, Inguipoga nāni quincōo ante nē pōnencæboimpa, ante æcānō angā Wængonguī ingante pīinte bacæcāimpa. ⁵ Wængonguī angā eñēninqe nāni yewæmongainō īīmaī ante ōnonquedō ante intawogaa. “Wængonguī cæcā beyænque mōnō tōmengā Ōnōwoca ingante ēwocate quēwēmō īmōmpa. Īninqe mǎnīwoca mōnō īmonte waadete pōnēninqe, Botō īmote waadete pōnenguēnēmīni īmīnīpa, ante wæætē edæ godō pīinte acā ingampa.” ⁶ Incæte

tömengä mönō imonte godōmenque waadete pönō cædinque mönō tönō godongämæ cædongä ingampa. Mänōmaï beyæ Wængongui angä eñente nāni yewæmongainō iïmaï ante impa. “Nāmanque ante, Mönitō gomonga waa cæmōni imōnipa, ante nē pönēnāni inānite Wængongui Baa angampa. Wæætē edæ, Mönitō önömōnique bai imōnipa, ante nē änāni inānite tömengä pönō waadete cæcampa.”

⁷ Mänōmaï beyæ mīnitō Wængongui ingante eñente cædāni. Wænæ ingante Baa ante quēwēedāni. Baa ämīni inique tömengä nānēnē wodii wīnōmaingampa. ⁸ Wængongui gāmænō pōedāni. Pōmīni ate tömengä wæætē mīnitō weca poncæcāimpa. Mīnitō wænæ wænæ cæmīni inōmīni inte onompo mempote bai waemō pōni quēwēedāni. Ayæ, Wængongui ingante waadete pönēmopa, ante ämīni incæ adobai inguipoga nāni quincōo pönēmīni inte mīnitō mēnonga ante pōnente quēwēnōmīni imīnipa. Inique edæ mīmō ñā mēnongate bai cædinque tōingä pōnente entawēmīni baedāni. ⁹ Mīni nāmā wænæ wænæ cædinō ante pōnēninque mīnitō, Ancaa wæwente awædō, ante wæedāni. Mīnitō Ca ca tote quēwēnō ñimpo cædinque Ca ca wædinque edæ wæwente quēwēedāni. ¹⁰ Mīnitō incæ, Wænæ wænæ cæmōnipa, ante önömōnique imōnipa, ante Wængongui ingante äñōmīni tömengä wæætē, Wadāni mīnitō imīnite waa acædānimpa, ante mīnitō imīnite ængō cæte bai cæquingānō anguēnē.

Mönō tōniñacā ingante apænte änāmaï incæmōimpa

¹¹ Botō tōniñamīni eñēedāni. Mīnitō wacā ingä wacā ingä wænæ wænæ ante apænedāmaï iedāni. Æcānō tömengä tōniñacā ingantedō ante wænæ wænæ äna ayæ tömengä ingante, Wænæ wænæ cæbipa, ante æcānō apænte äna ina mäningä Wængongui nānō wææ angainō incæ wænæ wænæ ante apænecampa. Ayæ Wængongui nānō wææ angainō

ante wænæ wænæ impa, ante apænte angampa. Wīi tömengä nānō eñente cæquinque Wængongui nānō wææ angainō ante apænte angampa. Wæætē edæ, Mäninō ante nē apænte ämo imopa, ante bai cæcampa. ¹² Wængongui tömenganque nānō wææ angainō ante nē angaingä ingampa. Mänōmaï beyæ tömengä adocanque nē apænte anguingä inongäimpa. Adocā pönō cæcā beyænque, Botō æmo beyænque quēwenguināni, ante cædongä ingampa. Adobai tömengä apænte angä beyænque, Wadāni wo ewente bacædānimpa, ante cædongä ingampa. Bitō guiquēnē nē angaimi imipa diyæ wacā ingante apænte anguēnēmi imii.

Baänæ ate æbānō baquī, ante Wængonguinque eñengä

¹³ Mīnitō ñōwo botō imote eñēedāni. Mīnitō nē iïmaï ante tademīni imīnipa. “Ñōwoönæ incæ baänæ ate incæ mönitō iï wadāni quēwēñōmō goquimōni imōnipa, ante māniñōmō godinque adoque wadepo iñonte mönitō godonte ænguinta æncæte ante cæquimōni imōnipa,” ante ämīni imīnipa. ¹⁴ Iñæmpa, Baänæ ate æbānō bacæimpa, ante tömäā eñēnāmaï imīnipa. Cōwē quēwenguimompa diyæ eñenguimōō. Awænæcaque owo boguimā nænque tamōninque quingæ dæ ba bai mönō quēwēnō adobai do dæ bacæimpa. ¹⁵ Mīnitō guiquēnē iïmaï ante anguēnēmīni imīnipa. “Wængongui Ao angä inique mönitō quēwenguimōni imōnipa. Ayæ Ao angä inique mönitō iï waa cæqui cæcæmōnimpa.” ¹⁶ Iñæmpa mīnitō, Tömēmōnique äninque cæcæmōnimpa, ante pōnēninque tedete quēwēnōmīni imīnipa. Mäninō ante tömānō wænæ wænæ impa. ¹⁷ Waocā, Æbānō waa impa, ante eñengä incæte cædāmaï ingä inte mäningä wænæ wænæ cæcā ingampa.

5

Mäincoo nē eadāni nāni pōnenguēnēnō

¹ Minitō mǎincoo nē ēamīni iñōmō ñōwo ēñēedāni. Minitō nanguī Ca ca wæedāni. Edæ, Mönō caate wæquinque nanguī ingæimpa, ante tedecōninque Ca ca wæcæminimpa. ² Minitō mǎincoo ēadincoo do wote batimpa. Ayæ mīnitō waēmoncoo tōmancoo cayæ ade cænimpa. ³ Minitō oodo tönō padata tæinta to tamōninque bai batimpa. Mānīi to tamōnī beyæ mīni wēnæ wēnæ cædinō edonque pōnī odōmonte ingæimpa. Ayæ quincoomē gonga bæcodōñōmō concædinque æmæwo gonte ba bai mīnitō iī to tamōnī beyæ mīni baō incæ adobai æmæwo gonte ba bai bacæimpa. Iñæmpa iīmæca wodo iinque bayedē incæ tōmēmīni mǎincoo ēadincoo do wote baquincoo gæte da wente cæminipææ.

⁴ Aedāni. Wadāni edæ tōmēmīni quēwencodencōo cædināni iñōnānite mīnitō, Paga, ante mīni godonguēnenta pæ gompodinque godōnāmai imīnitapa. Iinque ænāmai ināni mīnitō imīnitedō ante piinte wædinque, Nē ēadāni iñōmō, Mōnitō cædinō beyæ ante dicæ pōnōnāni æntamōniyaa, ante wædōnānimpa. Mönō Awēnē nē adocanque Tōmāā Cægaingā iñōmō nē cædināni nāni wædinō do ēñēningā ingampa. ⁵ Iīmæca quēwēñedē mīnitō quincoo waēmoncoo tōmancoo mante quēwēmīni inte mīnitō cōwē, Nāmā mōni watapæ tote quēwengæimpa, ante quēwēnimīni imīnipa. Waocā nānō wænongā wænguiōnæ iñonte cæningā nānō wænguinque oguīmo pōnī ba bai mīnitō cæningā bai adobai oguīmo pōnī bamīni imīnitapa tōō. Māniōnæ edæ do batimpa. ⁶ Wadāni nō cæte quēwēnāni mīnitō imīnite Baa ānāmai iñōnānite mīnitō iñōmō, Mīni pante wæquinque wēnæ wēnæ cædānipa, ante wapiticæ apænte āmīni inte tōmēnāni inānite wænōmīni wænānitapa.

Mönō ee cæpāmo ayæ Wængongui ingante mōnō apænedō

⁷ Mānōmai beyæ botō tōniñamīni ēñēedāni. Mīnitō mōnō Awēnē nānō ponguinganca ante wæntædāmai inte

ee cæte wānō cōnōedāni. Aedāni, Nē quiyacā tōmēmō wæænte ate onguipo cōñe ba ate, Tā bocate pæqui, ante cōönæ tedænque ee ongongampa. Cōönæ tedæ iinque baganca amiña bayedē waēmō pōnī nānō tōmēmōncoo tā pete gæcæte ante wīi ee ongongantawo. ⁸ Mönō Awēnē nānō ponguiōnæ oo pōnī impa, ante mīnitō adobai ee cæte wānō cōnōedāni.

⁹ Botō tōniñamīni ēñēedāni. Mīnitō wacā ingā wacā ingā wæætedō wæætē, Wiwa cæcampa, ante godō ānāmai iedāni. Mīnitō mānōmai cæmīni iinque Wængongui wæætē mīnitō imīnite apænte ante pāmaingampa. Edæ mōnō Apænte Anguingā oo poncæcāimpa cæmīni. ¹⁰ Botō tōniñamīni ēñēedāni. Wēēnēñedē Wængongui beyæ nē apænegaināni iñōmō tōmengā emōwo apænedinque wæwēnāni incæte wæntædāmai inte ee cæte quēwengadānimpa, ante pōnēninque mīnitō tōmēnāni nāni cægai bai adobai cæedāni. ¹¹ Wadāni wæwēnāni incæte wæntæye ināmai inte ee cædāni iinque nāni toquinque impa, ante mōnō pōnēnō ante do ēñēmīnipa. Docā Coba wodi iñōmō tōmengā nanguī pōnī wæwengā incæte wæntædāmai inte piināmai ingacāimpa. Māninō ante do ēñēnimīni inte ayæ tōmengā nānō wæwēñedē iinque ba ate Wængongui æbānō tōmengā ingante nanguī godongā ængaingā ingacāimpa, ante adobai ēñēmīnitawo. Edæ waodāni wæwēnāni iñōnānite mōnō Awēnē Wængongui ædæmō waadete waa cædongā ingampa.

¹² Botō tōniñamīni ēñēedāni. Wadō mīni pōnēnō ante pōnōmenque pōnēninque mīnitō iīmai ante godōmenque pōñēedāni. Mīnitō ānō nāwangā impa, ante wadāni pōnencædānimpa, ante cædinque, Botō ānō nōingā baquinō anguēnē, ante ānāmai iedāni. Edæ, Öönæ beyænque iīmæca beyænque quīēmē beyænque mōnō apænemōnō nāwangā baquinō anguēnē, ante tōmānō ante edæ apænedāmai iedāni. Mīnitō wæætē

Ao äinēmīni inte “Ao” ante mäninque äedāni. Ayæ mīnitō Baa äinēmīni inte “Baa” ante mäninque äedani. Edæ wīi mänōmaī cæmīni īninque Wængonguī wæætē mīnitō īmīnite apænte ante pāmaingampa.

¹³ Mīnitō wæwēmīni īninque Wængonguī ingante apænequēnēmīni īmīnīpa. Mīnitō watapæ tomīni īninque Wængonguī ingante, Bitō tæiyæ waēmō īmidō anguēnē, ante ämotamīni ancæmīnīpa. ¹⁴ Æcānō mīnitō weca wēnæ wēnæ īna īñōmō tōmengā Codito ingante mīni godongāmæ pōnencabo īñōmīnite nē aadāni nāni Picæncabo mīni ānāni īnānite, Pōedāni, ante aa pequēnengā ingampa. Aa pecā pōnāni ate tōmēnāni Awēnē Itota ēmōwo ante apænedinque wædænque oguī wapæ æninque nē wēnæ wēnæ īnongā ingante oo paacædānīpa. Ayæ adoyedē wēnæ wēnæ īnongā ingante nāni oo paayedē tōmengā beyæ ante Wængonguī ingante apænecædānīpa. ¹⁵ Ayæ, Wængonguī ingante apæneyōmonte tōmengā ēñengampa, ante wede pōnēninque apænemō beyænque waocā nē wēnæ wēnæ īningā incæ edæ gancæ bacæcāimpa. Wængonguī tōmengā ingante pōnō cæcā ate waa ba ñāni ōmæmoncæcāimpa. Ayæ adocā nānō wēnæ wēnæ cædīnō beyæ wēnæ wēnæ ingā īninque Wængonguī tōmengā nānō wēnæ wēnæ cædīnō adinque ñimpo cæcā quēwēmaingampa. ¹⁶ Mänōmaī beyæ mīnitō wacā ingante wacā ingante apænedinque, Botō wīwa cædīmo inte wæbopa, ante äedāni. Mänōmaī cædinque mīnitō, Gancæ bacæmōnīpa, ante wacā beyæ ante wacā beyæ ante Wængonguī ingante apæneedāni. Waocā nē nō cæte quēwēnongā īñōmō Wængonguī ingante apænedinque edæ tæi pīñænte apænecā ingampa. Māningā nānō apænedō beyænque Wængonguī cæcæcāimpa. ¹⁷ Ediya wodi mōnō waomō īmō bai tōmengā adobai ingacāimpa. Incæte tōmengā Wængonguī ingante, Cōönæ āmi

cædāmaī ingæimpa, ante ædæmō apænecā ate mēa go adoque tæcæ wadepo ganca edæ cōönæ cædāmaī ingatimpa. ¹⁸ Ayæ ate tōmengā, Cōönæ āmi cæcæimpa, ante Wængonguī ingante wæætē apænegacāimpa. Apænecā ate ōönædē īnō wææ cōönæ cægatimpa. Cōönæ wææ cæ ate onguipoga tōmēmō do tā bocate pægatimpa.

¹⁹ Botō tōñīñamīni ēñēedāni. Mīnitō weca æcāmenque nō taadō oda cæte gocā adinque wacā tōmengā ingante ocæ ēmænte māmongā ponguēnengā ingampa. ²⁰ Īīmaī pōnēedāni. Nē wēnæ wēnæ cæcā wapiticæ taadō gocā adinque æcāmenque tōmengā ingante nō taadō īnō ocæ ēmænte nē māmongā ingāā tōmengā māmongā beyænque nē wapiticæ gocā īñōmō æmæwo nānō wænguēnēnō ñimpo cæte edæ quēwencæcāimpa. Ayæ nangūi pōñi nānō wēnæ wēnæ cædīnō incæ wadæ cæte ingæimpa, āmopa. Mäninque ante yewæmōmopa.

1 Pegodo

cadota ante nänö tänota yewæmongainta

Waa quëwencæminimpa, ante

¹ Botö Pegodobo Itota Codito nänö nē da godongaïmo inömo inte nē yewæmōmo imopa. Minitö iñömö tömëmini ömæ quëwënämaï imini inte nāwæ godinque wadāni nēmæ ponte quëwëmini inte pancaminiya Pontobæ quëwëñömini wamini guiquënë Gadatiabæ quëwëminipa. Wamini Capadotiabæ quëwëñömini wamini guiquënë Atiabæ quëwëminipa. Wamini guiquënë Bitiniabæ quëwëminipa. Mänömaï wayömö wayömö quëwëmini iñöminite botö, Acæminimpa, ante yewæmōmopa. ² Mæmpo Wængonguï iñömö minitö iminite wëenëñedē pōni do adinque, Minitö Itota Codito ingante nē ëñente cæmini bacæminimpa, ante apænte ængacäimpa. Ayæ, Botö ayōmo minitö tæiyæ waëmö ewocamini bacæminimpa, ante cædinque Wængonguï Önōwoca incæ Itota wepæ inte pōnō ñā mënongacäimpa. Mänömaï cæcä bagaimini iñöminite botö ñōwo iñömö edæ, Wængonguï nanguï waadete pōnō cæcä ate minitö nē gänē pōnëmini bacæminimpa, ante yewæmōmopa.

Watapæ bacæimpa, ante pōnëninque quëwëmompā, ante

³ Itota Codito Wæmpocä iñongante Itota incæ, Botö Wængonguïmi inömi imipa, ante Wængonguï ingante waa apænecampa. Adocä iñömö mönō Awënë Itota Codito wænte öñöñongante, Nāni ömæmōe, angä ñāni ömæmongacäimpa. Tömengä ñāni ömæmongä beyænque Wængonguï mönō imonte adobaï pōnō cæcä ate mönō mempoga ëñate baï inömo inte edæ, Mönō miimö quëwëninque watapæ quëwengæimpa, ante pōnente quëwëmompā. Ìninqe mönō iñömö Wængonguï ingante

apænedinque, Bitö tæi emönömi inte waa pōni cæbi æmönipa, ante edæ watapæ apænecæimpa.

⁴ Ayæ Wængonguï, Ìncayæ ate mini ænguincōo, ante öönädē do edæ cō cæte mangampa. Mänincoo iñömö ñömädämaï incoo ìninqe cōwë wentamö badämaï incoo inte edæ wodämaï inguincōo ingæimpa.

⁵ Ìnguipo pedænguipo ìninqe bayedē edæ Wængonguï pōnō ængä beyænque mönō cōwë quëwenguinö ante edonque pōni acæimpa. Ìninqe minitö wede pōnëmini beyænque minitö quëwenguimāmo ìninqe baquin-ganca Wængonguï nē tæi piñænongä inte edæ minitö iminite wææ gom-pocampa.

⁶ Minitö ñōwo wantæ iñö incæ quiëmë beyænque wënæ wënæ bate wæmini incæte Wængonguï pōnō wææ gom-pocä beyænque edæ watapæ tomini iminipa. ⁷ Oodo waëmö bamongæimpa, ante waodāni gongapamö godö aca podönāni ate oodoque badinque waëmonca pōni ongoncāpa. Incæte oodo iñömö ìncayæ ate ömæe ewente ate edæ dæ bacæimpa. Oodo mini æinënonca waëmonca ì ìñonte mini wede pōnëñö iñömö edæ godömenque waëmö pōni impa. Ìninqe mini wede pōnëñö iñömö wii wido cæqui impa. Cōwë edæ ongongæimpa. Wæætë, Mini wentamö entawëninö edæ dæ go ate mini wede pōnënonque edæ waëmö pōni entawencæminimpa, ante cædinque Wængonguï pōnō angä ate minitö gonga gonte caate baï wæminipa. Mänömaï mini caate wädö beyænque edæ godömenque wede pōnëmini bamini. Ìninqe Itota Codito mönō weca ponte a ongöñongante minitö cōwë wede pōnëmini inte tömengä önöwa gäänë ædæ wæænte apænedinque, Nē tæi emönömi inte bitö waa pōni cæbi æmönipa, ante watapæ apænecæminimpa, ante Wængonguï cæcampa.

⁸ Itota Codito ingante minitö awinca adämaï inimi incæte tömengä ingante cōwë waadete pōnëminipa.

Edæ ñowo ganca adāmaī inīmīni inte mīnitō tōmengā ingante wede pōnēnīnque mīni ñāō baī entawengūnque watapæ todiŋque æbāmē ante tomīni īmīnīpa. ⁹ Ōnōwoca mīni ēwocate quēwenguīnō ante æncæte ante wede pōnēmīni inte mīnitō ñowo īñōmō edæ do æmīni īmīnīpa.

¹⁰ Wængonguī beyæ nē apænegaināni īñōmō, Īncayæ ate quēwenguīnāni īnānite Wængonguī pōnō cæcā beyænque quēwencædānīmpa, ante ñōwomīni īmīnītedō ante apænegadānīmpa. Mānōmaīnō ante apænedāni incæte tōmēnāni, Ædānidō īnānite ante Wængonguī apænecāā, ante ēñēnāmaī inte ēñencæte ante nanguī cægadānīmpa.

¹¹ Codito Ōnōwoca tōmēnāni ōnōwoca quēwēnīnque pōnō apænedīnque, Īncayæ ate Codito nanguī caate wæcæcāīmpa, angacāīmpa. Ayæ, Caate wædingā inte tōmengā wæætē ñāō baī entawengā inte tæī ēmongā edæ bacæcāīmpa, ante pōnō apænecā ēñēnīnque tōmēnāni wæætē adodō ante apænegadānīmpa. Incæte tōmēnāni, Æyedēnō Codito mānōmaī cæquīngāā, ante ēñencæte ante wægadānīmpa. Æbānō ba ate mānōmaī cæquīngāā, ante ēñencæte ante edæ nanguī cægadānīmpa.

¹² Ñowo īñōmō Wængonguī oōnædē quēwēnīnque tōmengā Tæiyæ Waēmō Ōnōwoca ingante mōnitonga da pōnongā pōnīnque apænecā ēñēnīnque mōnitō wæætē Codito ingantedō ante mīnitō īmīnīte watapæ apænēmōni ēñēmīnītapā. Mānīne adode ante Wængonguī beyæ nē apænegaināni īñōmō, Codito waa cæcæcāīmpa, ante apænegadānīmpa. Incæte Wængonguī tōmēnāni īnānite apænedīnque, Wīī tōmēmīni beyæ ante apænēmīnīpa, angacāīmpa. Īncayæ ate quēwēnāni beyæ ante apænēmīnīpa, ante tōmēnāni īnānite angacāīmpa. Mānīnō ante Wængonguī beyæ ante æbānō apænedānīi, ante ēñēnāmaī īnāni inte Wængonguī anquedoidi incæ, Waodāni beyæ Wængonguī æbāmē waa pōnī cæcāā, ante ēñēnīnque

wædānīpa.

Wængonguī, Tæiyæ waēmō ēwocædāni, angampa

¹³ Mānōmaī beyæ mīnitō, Mōnō nanguī cæcæīmpa, ante edæ tāno pōnente ate cædāni. Nāmā wææ gompotawente baī ēñente cædāni. Itota Codito ponte a ongōnīnque mōnō īmonte waadete pōnō cæcā ate watapæ bacæīmpa, ante edæ mānīnōnque ante cōwē pōnente cædāni.

¹⁴ Wēñēnāni wæmpoidi īnānite nāni ēñente cæbaī edæ mīnitō adobaī ēñente cædāni. Mīnitō ēñēnāmaī īñedē mīni cæīnēwēnō ante do cægāmīnīmpa. Ñowo īñōmō nē ēñēmīni badīnque mīni ēñēnāmaī īñedē mīni cæīnēwēnō ante edæ cædāmaī īedāni. ¹⁵ Mīnitō īmīnīte nē apænte aa pegaīngā īñōmō edæ tæiyæ waēmō ēwocadongā ingampa cæmīnīi. Quīēmē cædīnque edæ tōmengā baī adobaī tæiyæ waēmō ēwocadīnque edæ tōmāā cædāni. ¹⁶ Wængonguī incæ, “Botō tæiyæ waēmō ēwocabo īmopa cæmīnīi. Botō ēwocabo baī mīnitō adobaī edæ tæiyæ waēmō ēwocacæmīnīmpa,” angampa, ante yewæmongatīmpa.

¹⁷ Tōmāmō īmonte adoyōmō pōnī cædīnque mōnō Mæmpo īñōmō mōnō cædīnō ante cōwā adīnque nōīngā pōnī ante apænte angampa. Īnīnque, Botō Wæmpo, ante nē apænēmīni īnōmīni inte mīnitō īñōmō edæ nē nōīngā ante apænte angā ingante edæ guīñente wædīnque quēwēdāni. Inguīpoga quēwēnīnque mīnitō, Wabæca baī ongonte awædō, ānīnque, Wængonguī weca edæ mōnō ōmæ ingæīmpa, ante pōnente quēwēdāni.

¹⁸ Edæ, Dodāni nāni quēwengāī baī adobaī quēwengæīmpa, ante ānāni ēñēnīnque mīnitō Ao ante ōnonque pōnī cæte quēwengāmīnīmpa. Mānōmaī quēwēñōmīnīte Codito wæætē, Mīnitō abæ tawænte baī quēwencæmīnīmpa, ante cædīnque edæ, Quīnō godongantawo, ante mīnitō do ēñēmīnīpa. Īñæmpa oodo

incæ padata incæ mönō, Woquin-coo, ancoo iñonte tömengä dicæ mänincooque godongantawogaa.

¹⁹ Wæætē quipi wē, Codotedo, nāni ānongä iñömō quenta mongænāmaī wentamō ēñadāmaī imāi Codito adobaī iñongä inte edæ tömengä nāmā wepæ tæiyæ waēmō wepæ godonte ængä beyænque quēwēmīnīpa.

²⁰ Inguipoga badoncæte ante cædinque Wængonguī ayæ gö cædāmaī ingāñedē wēēñedē pōnī incæ Codito ingante edæ, Mänōmaī cæcæbiimpa, ante do apænte ængacäimpa. Codito mīnitō beyæ ante edæ ñōwo pōnī incæ inguipoga pōnīnque ongongantapa.

²¹ Inguipoga pōnīnque tömengä do wænte öñöñongante Wængonguī, Nāni ömæmōe, angä ñāni ömæmongacäimpa. Ayæ tömengä ingante godömenque godö ææntodongä ate tömengä ñāö entawēnongä inte tömengä nānō tæī emonguinque edæ æite gogacäimpa. Wængonguī mänōmaī nē cægaingä iñongante Codito mīnitō imīnite pōnō cæcä beyænque mīnitō wæætē Wængonguī ingante pōnēmīnitapa. Mänōmaī beyæ mīnitō, Wængonguī pōnō cæcä beyænque watapæ bacæimpa, ante pōnēnīnque tömengä ingante wede pōnēmīni bamīnitapa.

²² Wængonguī nō nānō änō ante ēñente cædinque mīnitō mīmō ñā mēnongate baī badīnque mīnitō tōññadāni inānite nē waadete pōnēmīni bagamīnīpa. Nōwo iñömō mīmōno nō pōnēnīnque mīnitō godongämæ ædæmō waadete pōnēnīnque wacä ingä wacä ingä godō waa cædāni. ²³ Edæ waomō mönō yate pōñiwoca wæwocaquī iñonte wīi mänīnō beyænque mempoga ēñagamīnīpa. Wæætē Wængonguī nānō änōnō mīi quēwenguīnō iñömō edæ wodāmaī inte cōwē ongongæimpa. Mänīnō Wængonguī nānō änōnō beyænque mīnitō mempoga ēñagamīnīpa. ²⁴ Edæ,

“Waomō gaguīmænque baī iñōmonte gaguīmæ do to aminca baī

mönō adobaī aquīi pōñi iñömō inte wæwocamompa.

Waēmō pōñi mönō emönō iñömō edæ ongai waēmō ængado baī iñonte ongai edæ do guīñē wæno baī mönō emönō adobaī bacæimpa.

²⁵ Incæte Wængonguī nānō änō iñömō edæ cōwē wodāmaī ongongæimpa.”

Ante edæ ämotamīni ante baī Wængonguī beyæ nāni yewæmongainō baī impa. Mänīnō Wængonguī nānō änōnō ante mīnitō imīnite do watapæ apænemōni ēñēmīnitapa.

2

¹ Mänīnō beyæ mīnitō piinte mīni pōñewēnō edæ ñimpo cædāni. Wacä adāmaī iñongante babæ mīni cædō ante edæ cædāmaī ñimpo cædāni. Mīnitō wadō apænete wadō mīni cædō ante ñimpo cædāni. Mänōmaī cæte mīni quēwēnīnō ante edæ æmæwo ñimpo cædāni. Wacä gomonga ængä ingante godō piinte adāmaī iedāni. Wacä ingantedō ante babæ ante mīni piinte anewēnō ante edæ ñimpo cædāni. ² Wēñænāni tæcæ ēñadināni inte goömæ gäinente wædāni baī mīnitō adobaī Wængonguī nānō apænedonque ante ēñencæte ante wæedāni. Edæ tömengä ængä beyænque mīnitō nē quēwēmīni inte mīnitō önōwoca ædæmō picæmīni mīni pæquinque edæ tömengä nānō apænedō ante edæ goömæ waēmōmæ beinente baī ēñencæte ante wæedāni. ³ Waēmepæ impa, ante adīnque wēñængä goömæ wæætē wæætē becä baī mīnitō adobaī, Mönō Awēnē waingä pōñi ingampa, ante do adīmīni inte tömengä weca wæætē wæætē ponte bete baī edæ ēñēedāni.

Nē quēwengä iñongä inte Codito wainca baī ingampa, ante

⁴ Oncō dicaca mænoncæte ante cædinque waodāni, Wīwa inca awædō, ante pancacaa wido cædāni baī waodāni pancadāniya mönō Awēnē ingante adobaī wido cædānīpa. Wængonguī guīquēnē mönō Awēnē nē quēwengä ingante waa adīnque,

Botö owocö mänonguinca wainca pöni bai tömengä ingampa, ante tömengä ingante apænte æninque ee mangampa. Ìnque mīnitö iñömö tömengä weca pöñömīnite tömengä,⁵ Mīnitö mīmīni quēwēñömīni Wængonguī mīnitö imīnite ænte cabo tingæte adoconque mænonte bai cædinque edæ, Botö Öñowoca owoquincö, ante badongä quēwēmīnīpa. Quēwēñömīnite godömenque tæiyæ waëmö badongä badimīni inte edæ mīnitö iñömö edæ Wængonguī Öñowoca tönö äawocaque bai ewocadinque, Wængonguī quī, ante nē godömīni bamīnīpa. Ìnque mīnitö Itota Codito emöwo ante apænedinque, Wængonguī quī, ante godömīni ate tömengä edæ waa ængampa.⁶ Edæ Wængonguī apæncä eñēninque iīmaī ante do yewæmongadānīpa.

“Tiönouquidi dæguīmonga mænoncæte ante cædinque dica tänoca gö cæte bai cædinque,

Botö nē waa adongä ingante ænte pönö Tänocä pöni gönömo gongæncæcäimpa.

Tömengä ingante nē wede pönengä ingante wadāni ædö cæte bæ taquīnāni guingo imonte wæquingä,” angacäimpa.

⁷ Mīni pönencabo iñömö, Tänocä nē ongongä iñömö waingä pöni ingampa, ante adinque tömengä ingante æninque ee māmīnīpa. Wīi pönēnāni guiquēnē tömengä ingante Baa änānīpa.

“Nē mænönāni nāni wido cædinca incæ ñænænca pöni gönöninca bate tänoca inte tæi gongæncapa,”

ante Wængonguī beyæ nāni yewæmonganō bai cædānīpa.⁸ Ayæ adobai,

“Dicaa nē tao tencawa tæ go wæængä bai ināni inte tömēnāni nē Tänocä ingante piinte adinque tæ go wæænte bai oda cædānīpa.”

Ante yewæmongatimpa. Tömengä nānō angainö ante eñēnāmaī nāni cædö beyæ oda cædinque tæ edæ go wæænānīpa. Tömēnāni edæ

mānīnonque cædinque nē tæ go wæænguēnēnāni cōwē ingadānīpa.

⁹ Wængonguī nānō nē apænte ængalmīni guiquēnē wēmö iñömö quēwēñömīnite tömengä aa pedinque, Botö weca botö waëmö pöni ñäö emöñömö pödāni, ante cægacäimpa. Mänömainö cægāngä iñongante mīnitö, Bitö Wængonguī Waëmö pöni emönömi inte waa pöni cæbi edæ æmönīpa, ante anguēnēmīni imīnīpa. Mänömainö ante watapæ ancæmīnīpa, ante cædinque tömengä mīnitö imīnite do apænte ængacäimpa. Ìnque mīnitö Awēnē wēmīni inömīni inte, Wængonguī quī, ante mīnicabo nē godömīni bai bamīnīpa. Wængonguī, Botö quīmīni imīnīpa, æninque tæiyæ waëmö badongä bagaimīni inte mīnitö Wængonguī nempo nē quēwēmīni imīnīpa.¹⁰ Mīnitö wēenēñedē adocabomīni ināmaī ingamīnīpa.

Ñowo guiquēnē Wængonguī tönö godongāmæ quēwēmīni inte edæ adocabomīni imīnīpa. Wēenēñedē guiquēnē tömengä mīnitö imīnite pönö waadete cædāmaī ingacäimpa. Ñowo guiquēnē tömengä pönö waadete waa cæcä ate quēwēmīnīpa.

Wængonguī ingante nē cæmō imōmpa, ante quēwēedāni

¹¹ Botö nē waademīni edæ eñēedāni. Mīnitö inguipoga quēwēmīni incæte inguipo wīi tömēmīni omæ bai impa. Wæætē wabæca quēwente bai quēwēmīni inte mīnitö öñowoca wentamö mongænāmaī ingæimpa, ante edæ wææ cædinque mīnitö baonque ante mīni cæinewēnō ante ñimpo cædinque edæ cædāmaī iedāni ämopa.¹² Nē eñēnāmaī ināni weca quēwēninque mīnitö wæætē waa cæte quēwēedāni. Tömēnāni guiquēnē mīnitö imīnite piīninque, Wēnæ wēnæ cæmīnīpa, ante babæ änānitawo.

Incæte mīnitö waa cæmīni ininque tömēnāni, Waa cæcampa, ante do abainānīpa. Ìnque Wængonguī Awēnē nānō apænte añedē tömēnāni

do againāni inte Wængonguī ingante, Bitō ñāō bai ēmōmi inte cæbi ate bitō wēnāni waa cædāni amōnīpa, āmaīnānīpa. Īnīnque tōmēnāni waa adīnque waa apæñecædānīmpa, ante cædīnque mīnitō ñōwo incæ waa cæte quēwēedāni.

¹³ Waodāni inānite wadāni edæ, Awēñēidi inānīpa, ante godō gōnōnāni ongōnānīpa. Æcāmē ingante ānāni bayōnānite mīnitō wæætē Wængonguī Awēñē beyænque ante cædīnque tōmēnāni inānite edæ ēñente Ao ante cæedāni. Adocanque ingante, Awēñē Odeye, ānīnque godō gōnōnāni ate mīnitō ĩñōmō, Tōmēngā tæiyæ awēñē inte nē angā ĩnongā ingampa, ante adīnque tōmēngā ingante ēñente cæedāni. ¹⁴ Ayæ pancabaa awēñēidi gobedōnadodoidi mīni ānōnāni inānite godō gōnōnīnque awēñē odeye wæætē ĩmaī angampa. Mīnitō wēnæ wēnæ cædāni inānite edæ godō pæedāni. Ayæ waa cædāni adīnque mīnitō, Waa cæmīni ĩmīnīpa, ānīnque edæ godō waa cæedāni, ante gobedōnadodoidi inānite godō gōnongā ongōnānīpa cæmīnīi. Mīnitō tōmēnāni inānite adobai ēñente cæedāni. ¹⁵ Ēñēñāmaī ināni wīwa tedeyōnānite mīnitō waa cæmīni ate wædīnque tōmēnāni ædō cæte godōmenque wīwa tedequīnānīi. Īnīnque, Tōmēnāni pæ wēēnedīnque tededāmaī incædānīmpa, ante cædīnque mīnitō ĩñōmō edæ waa cæte quēwēedāni, ante edæ Wængonguī angampa cæmīnīi.

¹⁶ Tōmēngā ñīmpo cæcā quēwēmīni inte mīnitō, Wacā wææ ānāmaī ĩñongante botō æbānō cæte waa quēwēnguīmoo, ante adīnque nāmā wææ ante cæedāni. Incæte mīnitō wacā wææ ānāmaī ingā beyænque awēmō wēnæ wēnæ cæmīnitawo. Edæ cædāmaī ĩedāni. Wæætē Wængonguī ñīmpo cæcā quēwēmīni inte mīnitō tōmēngā ingante nē cæmīni inte edæ ēñente cæte quēwēedāni. ¹⁷ Tōmānāni inānite mīnitō, Waodāni inānīpa, ante edæ waa aedāni. Mīni pōnencabo ĩñōmīnite edæ godongāmæ waadete pōñeedāni. Wængonguī ingante, Wængonguī ingampa, ante guñente

wæedāni. Awēñē odeye ingante, Tæiyæ awēñē ingampa, ante edæ waa aedāni.

Codito æbānō caate wægacāi, ante pōñeedāni, ante

¹⁸ Pancamīniya ĩmīnite wadāni ō ænāni wædīmīni inte mīnitō tōmēnāni beyænque cæmīni bamīnīpa. Īnīnque nē ō ænāni ĩñōmō pōnō waa cædāni incæ pōnō pīnte cædāni incæ mīnitō wæætē, Botō awēñē ingampa, ante piyænē cædīnque tōmēnāni nāni anganque edæ ēñente cæedāni. ¹⁹ Edæ waocā wēnæ wēnæ cædāmaī ĩnongā inte quīēmē beyænque wæwente caate wæcā incæte tōmēngā, Wængonguī acampa, ante pōñēnīnque nangæ batawēñāmaī ingā ĩnīnque edæ waa ĩmaīmpa.

²⁰ Wæætē mīnitō wēnæ wēnæ cæmīni beyæ pānāni ate mīnitō piyænē cæmīni ĩnīnque Wængonguī mānīnō beyænque dicæ waa aquīngāa. Waa adāmaī ĩmaīngampa. Wæætē waa cæmīni beyænque pānāni caate wædīnque mīnitō piyænē cæte ee cæmīni adīnque Wængonguī edæ, Waa cæbīpa, āmaīngampa. ²¹ Botō caate wædōnō adodō taadō tee empote pōedāni, ānīnque mīnitō beyæ Codito caate wægacāīmpa cæmīnīi. Botō caate cægongāñō adodonque cægonte wæcæmīnīmpa, ante mīnitō ĩmīnite do aa pecā pongamīnīmpa. ²² Tōmēngā ĩñōmō edæ cōwē wēnæ wēnæ cædāmaī ingacāīmpa. Ayæ cōwā ayōnāni tōmēngā dicæ babæ ante cæcā agadāñiyaa. ²³ Tōmēngā ingante pīnte badete toyōnāni tōmēngā wæætēdō wæætē pīñāmaī ingacāīmpa. Caate wædīnque tōmēngā wæætē pīnte ānāmaī ingacāīmpa. Wæætē, Nē nō apænte ānongā Wængonguī incæ botō beyæ cæcæcāīmpa, ante pōñēnīnque piyænē edæ cægacāīmpa. ²⁴ Mīnitō wēnæ wēnæ mīni cægāñīcōo ante Baa ānīnque mongæñāmaī inte nō pōñī cæte quēwēncæmīnīmpa, ante cædīnque tōmēngā nāmā baonga teēmē mongæñongante tōmēngā ingante awāa tīmpodāni edæ

wængacäimpa. İninque tōmengä mongænte nänō wængainō beyæ mōnō wæætē mäninō wēnæ wēnæ mōnō cægainō ante wænte bai inōmō inte nō pōni cæcæte ante quēwēmō inguēnēmō imōmpa. Tōmengä ingante tæi pānāni nänō ämogate wægainō beyænque mīnitō wæætē gancæ bamīnipa. ²⁵ Edæ obegaidi pāmænte godāni bai ingaimīni inte mīnitō ñōwo nē aacā weca adodō ocæ emænte pōmīni adinque tōmengä inōmō edæ mīnitō önōwoca beyæ ante wææ aacā ewocamīnipa.

3

Mīna gæncaya iimāi quēwencæmīnaimpa, ante

¹ Onquiyæmīni eñēedāni. Mīnitō nänōogænāni nāni ānonque ante Ao ante eñente cæedāni. Mīni nänōogænāni pancadāniya Wængonguī nänō ānō ante pōnēnāmāi inānitawo. Mānōmāi i ininque mīnitō inōmō, Wīi mōnitō tededō beyæ pōnāni inte tōmēnāni wæætē eñente mōni cædinō ante adinque Wængonguī gāmænō poncædānimpa, ante cædinque piyænē cæte edæ tōmēnāni inānite eñente cæedāni. ² Mīnitō Wængonguī ingante guiñente wædinque waēmō entawēmīni inte eñente cæte waa quēwēmīni adinque tōmēnāni wæætē Wængonguī ingante Ao ante pōmāinānipa. ³ Mīnitō, Waēmō pōni bacæboimpa, ante cædinque ocaguī waa pōni wao wincate oodo mongænte wamoncoo mongænte weocoo waēmōncoo wēñate mongæmīnitawo. İñæmpa mānōmāi cæmīni beyænque mīnitō dicæ waimīni bamīniyaa. ⁴ Wæætē tōmēmīni waa entawēnō beyænque waimīni pōni baquēnēmīni imīnipa. Mīnitō önōwoca gānē pōnēninque ædæmō cæmīni beyæ mīni waa entawēnō edæ wodāmāi inte godōmenque waēmō pōni ongongæimpa. Māninō mīni waēmō entawēnō bai ante æncæte ante edæ quiēmē impa diyæ godonte ænguī. Incæte Wængonguī mäninō

ante adinque, Waēmō pōni entawēmīni abopa, ante nanguī tocampa.

⁵ Dodāni pōni mōnō wængānāidi inōmō, Wængonguī pōnō cæcā beyænque waa bacæimpa, ante wede pōnēninque tæiyæ waēmō entawengadānimpa. Tōmēnāni waēmō pōni bacæte ante tōmēnāni önōwoca gānē pōnēninque ædæmō waadete cægadānimpa. Tōmēnāni nänōogæidi nāni ānonque ante eñēninque Ao ante cægadānimpa. ⁶ Dodā ñæñænā Tada wodi inōmō Abadāō wodi ingante eñente cædinque tōmengä ingante, Nē ämi imīpa, angacäimpa. Mīnitō inōmō tōmēnā nānā cægai bai waa cædinque mīni guiñente wæpāmo æbāmē ba incæte guiñente wædāmāi imīni ininque nāwangā nō tōmēnā nänōmomīni babaīmīnipa.

⁷ Onguīñæmīni guiquēnē eñēedāni. Mīnitō gænāni tōnō quēwēninque tōmēnāni beyæ ante cōwē pōnēninque waa cæedāni. Botō gængä onquiyængä inongä inte aquīngä ingä incæte mōna guēa cæcaya imōnapa, ante eñente wædinque mīnitō gænāni inānite edæ cōwē waa aedāni. Ayæ, Mōna gæncaya Wængonguī ingante apæneyōmōna tōmengä do eñencæcäimpa, ante cædinque iimāi pōnente cæedāni. Wængonguī inōmō, Mīna quēwenguimāmo, ante waadete pōnō cæcā beyænque mōna guēa ængucaya imōnapa, ante edæ eñente cæedāni.

Mīni waa cædō beyænque caate wæquīmīni, ante

⁸ Tōmāmīni guiquēnē eñēedāni. Mīnitō adoyōmō pōnēninque Ao ante cæedāni. Nē Ca ca wæcā tōnō edæ adoyōmō Ca ca pōnente wæedāni. Mōnō pōnencabo imōmpa, ante cædinque godongāmæ waadete pōnēedāni. Wacā caate wæcā adinque mīnitō tōmengä tōnō guēa wæte bai pōnēedāni. Nāmā ængō cædāmāi imīni inte mīnitō wæætē edæ, Önōmonque bai inōmō imōmpa, ante piyænē cæte quēwēedāni. ⁹ Wēnæ wēnæ cædāni wæmīni incæte, Botō wæætē wēnæ wēnæ

cæbo wæcā tocæi, ante cædāmaī iedāni. Wiwa ānāni wæmīni inte, Botō wæætē wiwa āmo wæcā tocæi, ante cædāmaī iedāni. Wæætē edæ, Tōmēnāni waa quēwencædānimpa, ante cædinque mīnitō tōmēnāni inānite waa apænedinque godō waa cæedāni. Mānōmaī cæcæmīnimpa, ante Wængonguī mīnitō imīnite waa cædinque pōnō aa pegacāimpa cæmīni. ¹⁰ Edæ iīmaī ante Wængonguī beyæ ante yewæmongatimpa,

“Waacā tōmengā nānō quēwenguīmāmo ante nanguī æinente wædinque, Tæōnæ waa quēwente tocæi, ante nē angā iñōmō

tōmengā iñōmō wēnæ wēnæ ted-edāmaī inte babæ wapiticæ ānāmaī inte tæōnæ quēwente tocæcāimpa.

¹¹ Tæōnæ quēwencæte ante cædinque tōmengā wēnæ wēnæ nānō cæinō ante emō cædinque dadi emæninque waa edæ cæquēnengā ingampa.

Ayæ tōmengā piyænē cædinque, Mōnō tōmāmō godongāmæ gānē pōnente quēwengæimpa, ante nanguī cæquēnengā ingampa.

¹² Mōnō Awēnē awinca emongā inte nē nō cædāni gāmænō adinque tōmēnāni inānite cōwē aacampa.

Ayæ, Botō imote æbānō ante apænedāni, ante tōmengā eamonca ongonte cōwē eñengampacædāmaī

Wēnæ wēnæ cædāni inānite guiquēnē tōmengā pūinque awincaque acampa,”

ante yewæmongatimpa cæmīni.

¹³ Mīnitō waa cæcæte ante edæ nanguī cæinēmīni bamīni adinque æcānō wæætē mīnitō imīnite wēnæ wēnæ cæquingā. ¹⁴ Incæte mīnitō nō pōni mīni cædō beyænque caate wæmīni ininque edæ mīni waa quēwente toquinque imaimpa. Ininque iīmaī ante nāni yewæmongainō bai cæedāni. Tōmēnāni nāni guīñente wæpāmo beyæ ante mīnitō iñōmō edæ guīñente wædāmaī iedāni. Edæ guīñēñate wædāmaī iedāni.

¹⁵ Wæætē, Tæiyæ Waēmō Awēnē inongā ingampa, ante wede pōnēninque edæ Codito ingante mīmōno entawēedāni. Ayæ, Watapæ bacæimpa, ante mīnitō quīnante pōnēmīni, ante eñencæte ante wadāni

āñōnānite mīnitō wæætē a ongōnāmaī inte iīnonque ante edæ do apænemīni incæmīnimpa. Codito mōnitō Awēnē pōnō cæcā beyænque mōnitō, Watapæ bacæimpa, ante wede pōnēmōnīpa, ante mānīnonque ante do apænemīni edæ eñencædānimpa. ¹⁶ Iīnāni iñōmō eñencæte ante ānānīpa, ante pōnēninque mīnitō, Botō wentamō entawēnāmaī incæboimpa, ante nāmā apænte cædinque guīñente wædinque tōmēnāni inānite ædæmō apænemīni eñencædānimpa. Mānōmaī cæyōmīni wadāni guiquēnē mīnitō Codito nempo quēwēninque mīni waa cædōnō ante pūinque babæ ante todānitawo. Ininque mīnitō wentamō entawēnāmaī inte ædæmō apænemīni adinque tōmēnāni wæætē, Mōnitō babæ ante tede-tamōnīpa, ante eñēninque guīñēnete wæcædānimpa.

¹⁷ Mīnitō wēnæ wēnæ cæmīni beyæ caate wæmīni ininque ōnonque imaimpa. Wæætē, Wængonguī, Caate wæcæmīnimpa, angā ininque mīnitō waa pōni mīni cædō beyænque caate wæmīni ininque edæ godōmenque waa imaimpa. ¹⁸ Mīnitō nō cædāmaī iñōmīnite Codito iñōmō mōnō nē nō cædongā inte mīnitō imīnite Wængonguī weca ænte poncæte ante cædinque wēnæ wēnæ mīni cædō beyænque adopoque caate wængacāimpa. Tōmengā baō eñayongante tōmengā ingante wænōnāni wængā ate Wængonguī Ōnōwoca angā ate nāni ōmæmonte edæ mīingā quēwengampa. ¹⁹ Ayæ adobai Wængonguī Ōnōwoca tōmengā ingante ænte māocā godinque tōmengā nē wænte gogaināni ōnōwocacoo tee mōnete ongoncōo weca gote apænecā eñengadānimpa. ²⁰ Mānīnāni nē tee mōnete ongōnāni inānite Nōwee wodi Docā nāni ānongā

doyedē ancaa apænecā incæte tōmēnāni ēñēnāmaī inte cægadānimpa. Mānīnāni nē ēñēnāmaī cægāināni iñōnānite Codito ñōwo tōmēnāni weca gote apænecāimpa. Wængonguī iñōmō, Wipo ñænængade pōni impo incæ oncō baī mænoncæbiimpa, ante Nōwee ingante do angaingā inte, Īnque mænoncæcāimpa, ante ee wānō congacāimpa. Incæte mānīnāni ēñēnāmaī cæyōnāni ocho ganca ināni mānimpodānique æpæno yædopāa wogaa gote quēwengadānimpa.

²¹ Mānimæno edæ wogaa godinque tōmēnāni nāni quēwengāi baī mīnitō adobaī æpænē guīdinque quēwēmīnīpa. Incæte wīi baonque mēnongate beyæ quēwēmīnīpa. Wæætē mīnitō, Wængonguī ayongā botō mīmō ñā mēnongate entawēmo inte quēwēmōpa, ante nāmā apænte pōnēnīnque æpænē guīmīnīpa. Edæ guīdinque mīni ængæ gantidō baī Itota Codito ñāni ōmæmōnte quēwengā beyænque mīnitō adobaī ñāni ōmæmōnte quēwēmīnīpa. ²² Tōmengā iñōmō do oōnædē æite Awēnē badinque Wængonguī tōmēmængā inō edæ tæ contayongante anquedoidi incæ nē ānāni incæ nē tæi piñænte cædāni incæ tōmēnāni tōmānāni edæ tōmengā nānō ānō ante ēñente cædānīpa cæmīnīi.

4

Wængonguī nānō pōnō cæganca mōnō cæcæimpa

¹ Nē caate wædingā iñōmō, Botō idæwaa wēnæ wēnæ cæte awædō, ante tōmengā wīwa nānō cædinō ante do wido cæcampa. Īnque mīnitō, Codito incæ baonga quēwēnīnque caate wægacāimpa, ante pōnēnīnque, Botō baonga caate wædinque ēñente badinque botō wēnæ wēnæ cædinō ante wido cæcæboimpa, ante piyænē cæte tæi ongōedāni. ² Edæ nē caate wædingā iñōmō, Mōnō waocabo baonque ante mōnō cæinēwēnō ante botō iñōmō cædāmaī incæboimpa, ante pōnēnīnque

edæ ñimpo cædinque inguipoga tōmengā nānō quēwenguīganca Wængonguī nānō ānōnonque ante ēñente quēwengampa. ³ Ēñēnāmaī ināni cæinente wæwente nāni ānōnō ante ēñente mīnitō wēenēñedē adobaī quingāmē baī cæte quēwengamīnīpa. Edæ baonque ante mīni tōinente wæwēnonque ante do cædinque mīnitō tōmēnāni nāni cæi baī cædinque edæ tī nāmæ bete quidi quidi dowæninque beowæo inte cæowæo inte Yæ yæ angamīnīpa. Ayæ mīnitō tōmēmīni badōnīnca incæ adinque, Mōnitō wængonguī ingampa, ante ædæ wænte tedewengamīnīpa. Ñōwo iñōmō mīnitō mānōmaī cæte idæwaa cæmīni awædō.

⁴ Tōmēnāni iñōmō baonque ante nāni godō tōinēwēnō ante cæcæte ante pogodo gote baī cædinque mīnitō imīnite, Ponguēnē quēwēnānīi, ante ancaa ānānīpa. Mīnitō gomō adinque tōmēnāni tōnō godongāmæ godāmaī imīni adinque tōmēnāni wæætē, Quīmæ awīncaque gomō awēmīnīi, ante edæ piīnte ānewēnānīpa. ⁵ Incæte mōnō waocabo mīmō quēwēmō incæ do wænte gogāināni incæ tōmāmō imōnte nē oo apænte anguingā iñōmō edæ Wængonguī inongā ingampa. Īnque tōmengā, Æbānō cægāmīnīi, ante angā ēñente wædinque mānōmaī cægāināni wæætē aamō cædāmaī inte tōmēnāni nāni cægāinō ante edæ do apænequīnāni inānīpa. ⁶ Mānōmaī beyæ do wængāināni inānite mōnō Codito ingantedō ante watapæ apænecatimpa. Tōmēnāni baō ēñate quēwēñōnānite waodāni apænte ānīnque pānāni incæte Wængonguī wæætē, Tōmēnāni ōnōwoca ēwocadinque quēwencædānimpa, ante tōmengā waa pōni nānō cægāinō beyænque nāni quēwenguīnō ante godō apænecā ēñengadānimpa.

⁷ Ñōwo iñōmō tōmancoo edæ oo ĩnque baquīnō anguēnē. Mānōmaī impa, ante ēñente wæmīni inte mīnitō, Mōnō tōingā pōnente Wængonguī ingante apænecāimpa, ante cædinque nāmā wææ aadinque ocai encate

pönēedāni. ⁸ Wēnæ wēnæ cæmō incæte waadete pönēmō ininque mōnō waadete cædō beyænque wadāni piyænē cæte piināmaī inānīpa. Mānōmaī impa, ante pönēninque mīnitō nē wede pönēmīni inōmīni inte cōwē waadete pōnente cæedāni. ⁹ Edæ wadāni inānite, Pōedāni, āninque wacā ingā wacā ingā pædæ godōninque edæ, Tōmēmo quī impa, ante wædāmaī iedāni.

¹⁰ Wængonguī, Botō pōnō waadete cæbo ate mīnitō ado botō waadete cædōnō ante ænte ēwocadinque godō waadete cæedāni, ante adocanque ingante wadō wacā ingante wadō pōnō waadete cæcā ænte ēwocamīnīpa. Ininque mīnitō tōmāmīni mīni ænte ēwocaganca cædinque mīni pōnencabo beyæ godongāmæ waa cæquēnēmīni imīnīpa. ¹¹ Wængonguī pōnō cæcā æninque æcānō nānō apænequinganca ēwocacā tōmengā Wængonguī nānō apænedonque ante apænequēnengā ingampa. Æcānō wadāni beyæ ante nānō nē cæquinganca ēwocacā tōmengā Wængonguī nānō tæī piñænnonque entawēninque waa cæquēnengā ingampa. Mānōmaī cædinque mīnitō waa cæmīni adinque mōnō tōmāmō Itota Codito emōwo apænedinque Wængonguī ingante, Bitō waēmō pōnī inōmi inte waa cæbīpa, ante apænecæimpa. Tōmengā iñōmō nē tæī emōnongā inte ñāō emōninque nē nanguī cædongā ingampa, ante mōnō pedænguipoga quēwēmō incæ iincayæ ponte mīnguipoga quēwēmō incæ cōwē watapæ pōnī apænecæimpa. Mānōmaī baquīnō anguēnē, ante botō, Amēē, āmopa.

Codito nempo quēwēninque caate wæcæmīnīpa, ante

¹² Botō nē waademīni ēñēedāni. Mīnitō ñōwo incæ gonga gonte caate baī wæmīni incæte, Quiēmē beyæ mānōmaī caate wæboī, ante guīñente wædāmaī iedāni. Edæ wīi ononque caate wæmīnīpa. ¹³ Wæætē, Codito nānō caate wægāinonque godongāmæ ñōwo caate wæmōnīpa,

ante pönēninque watapæ toedāni. Mānōmaī caate wædinque tomīni ininque Codito ñāō apāite baī nānō pōñedē godōmenque gomonga watapæ toquīmīni imāimīnīpa. ¹⁴ Mīnitō imīnite wadāni piinte āninque, Codito emōwo ononquedō waa adinque wæcantedō abi, ante badete todāni ininque Wængonguī wæætē, Watapæ quēwencæmīnīpa, ante pōnongā æninque mīnitō tōmengā Onōwoca nē ñāō emōnongā ingante ēwocamīni beyæ toquēnēmīni imīnīpa. ¹⁵ Wacā ingante nē godō wænongā ingante do pānāni wæcampa. Wacā quī nē awēmō ængā ingante nē wēnæ wēnæ cæcā ingante adobaī pānāni wæcampa. Adocanque nē cæquēnengā inte ānāmaī iñongante wacā iñontobæ godō ononque cæcā ate nē ononque cæcā ingante pānāni wæcampa. Mīnitō wæætē nāmā wææ adinque tōmēnāni nāni cædō baī cædāmaī imīni ininque caate wæmīni incæte ædō cæte mīni wīwa cædō beyæ pānāni caate wæquēnēmīnīi. Edæ dæ anguēnē.

¹⁶ Wæætē wadāni mīnitō imīnite, Wææ, Codito emīñæmi imipææ, ante piinte cædāni caate wæmīni incæte mīnitō guingo imonte wædāmaī iedāni. Wæætē edæ Wængonguī ingante apænedinque edæ, Bitō ñāō emōmi inte pōnō pemonte baī cæbi æninque mōnitō Codito emōwo emonte baī adobaī emōmōnīpa, ante waa apæneedāni.

¹⁷ Edæ iīmaī impa. Wængonguī tōnō mōnō godongāmæ owocabo iñōmonte tōmengā oo apænte ancæcāimpa. Ininque mōnō imonte tāno apænte angā ininque tōmengā wadāni inānite guiquēnē æbānō cæquingāā. Tōmengā ingantedō ante watapæ apænedāni ate nē ēñente cædāmaī ināni inānite apænte āninque Wængonguī quingāmē baī nanguī pangā wæquīnānīi. ¹⁸ Ayæ Wængonguī beyæ nāni yewæmongāinō baī impa. Nē nō cæcā wodo wænguēnengā iñongante Wængonguī tingæ ængā beyænque quēwēñongā Wængonguī ingante ēñēnāmaī ingā guiquēnē tōmengā

ædō cæte quēwengungäa. Nē wēnæ wēnæ cæcā adobaī edæ ædō cæte quēwengungäa. ¹⁹ Mīnitō iñōmō Wængonguī nānō ānīnō beyænque caate wæmīnitawo. Īnīnque mǎnōmaī beyænque mīnitō, Mōnō ĩmonte nē badongaingā cōwē pōnēnīnque ædæmō aaqingā ingampa, ante pōnēnīnque nāmā mīnitō ōnōwoca tōmengā nempo godōnīnque piyænē cæte godōmenque waa cæquēnēmīni ĩmīnīpa.

5

Mīni pōnencabo æbānō cæte quēwengæīmpa, ante

¹ Mīni pōnencabo iñōmīnite pancamīniya nē aamīni Picæmīni mōnō āmīni ĩmīnīpa. Botō iñōmō adobaī nē aabo Picæmo ĩnōmo ĩnte, Mōnō nē Picæncabo, ante mīnitō ĩmīnite ædæmō apænedīnque āmopa. Codito caate wæcā nē agāimo ĩnte botō edæ waadete āmopa. Ayæ Codito ñāō baī nānō ēmōnō edonque pōnī nānō odōmonguīnō ante botō tōmengā tōnō ñāō baī entawēmo ĩnōmo ĩnte edæ, Ēñencæmīnīmpa, ante nangūī āmopa. ² Codito ĩngante nē pōnēnāni iñōmō mīnitō nempo cænīnāni baī ongōñōnānite mīnitō tōmēnāni ĩnānite nē aamīni ĩmīnīpa. Wængonguī, Nē pōnēnāni ĩnānite aacæmīnīmpa, angā ēñēnīnque mīnitō wæætē Baa āmōni ĩnīnque Wængonguī pangā wæcæ wæ, ante guīñente wæmīnitawo. Īñæmpa wīī guīñente beyænque aacæmīnīmpa. Wæætē Wængonguī, Mīnitō do Ao ante aacæmīnīmpa, ante tōmengā nānō ānōnonque ante edæ ēñente cæte edæ tōmēnāni ĩnānite ædæmō aadedāni. Ayæ edæ godonte æīnta ante æīnente wæmīnitawo. Īñæmpa wīī æncæte ante wædīnque mīnitō edæ, Nē pōnēnāni beyænque nangūī cæīnente wædīnque cæcæboīmpa, ante piyænē cæte aadedāni. ³ Waodāni nē cænīnāni baī mīnitō nempo ongōñōnānite mīnitō wæætē ĩmæca awēnēidi nāni pīinte āmaī wīī adobaī pīinte aadedāni. Wæætē edæ, Mōnō waa cæte quēwēmō adīnque tōmēnāni mōnō baī adobaī

waa cæte quēwencædānīmpa, ante cædīnque edæ waa cæedāni.

⁴ Mǎnōmaī cæmīni ĩnīnque mōnō nē Aadongā Ñænængā pōnī ĩnongā iñōmō ĩncayæ ponte a ongōnīnque poganta ñāō ēmonta cōwē wodāmaī ĩnta pædæ pōnonte baī cædīnque mīnitō ĩmīnite, Mīnitō nē aamīni ĩnte botō ñāō ēmonte ongōñōmō ponte quēwencæmīnīmpa, ancæcāīmpa.

⁵ Tæcæ æmæwo pæīmīni guīquēnē ēñēedāni. Godōmenque picænāni nāni ānīnō ēñēnīnque edæ Ao ante cæedāni. Ayæ gānē entawente pōnēnīnque, Ōnōmōnīque baī mōnitō ĩmōnīpa, ante pōnēnīnque wacā nānō ānīnō ante ēñēnīnque Ao ante cæedāni. Edæ ĩmaī ante yewæmonte ongōmpa.

“Nāmanque ante, Mōnitō gomonga waa cæmōni ĩmōnīpa, ante nē pōnēnāni ĩnānite edæ Wængonguī Baa angampa. Wæætē edæ, Mōnitō ōnōmōnīque baī ĩmōnīpa, ante nē ānāni ĩnānite tōmengā pōnō waadete cæcampa.”

⁶ Ante yewæmongatīmpa cæmīni. Īncayæ ate eyepæ pōnī bayonte Wængonguī incæ mōnitō ĩmōnite ængō cæcā ongoncæmōnīmpa, ante cædīnque mīnitō ñōwo iñōmō nē tæī pīñængā ōnōnempo ongōnīnque nāmā ængō cædāmaī ĩedāni. ⁷ Codito mōnō ĩmonte waadete pōnente cæcampa, ante ēñente wædīnque mīnitō guīñente mīni wædō ante tōmengāa wo cæmīni mongængā ate mīnitō guīñēnāmaī ĩnīnque wæætē guēmancæmīnīmpa.

⁸ Nāmā incæ edæ wææ aadedāni. Wēnæīdi awēnē iñōmō edæ mēñēbo nē pīinte angā baī ĩnongā ĩnte, Æcānō ĩngante ecate cænguīmoo, ante nē pīinte cædongā ĩnte awēmō dīqui dīqui mīngampa cæmīni. Ee aadedāni. ⁹ Mīnitō caate wæmīni ĩncæte, Mōnō tōnīñadāni ĩnguīpoga tōmāmæ quēwēnīnque adobaī edæ caate wædānīpa, ante do ēñēmīni ĩnte Codito ĩngante wede pōnēnīnque adīyæ næ gongænīnque wēnæ awēnē ĩngante cōwē Baa aadedāni.

¹⁰ Mǎnōmaī cædīnque wantæ iñō

caate wæmīni ate Wængonguī nē waadete pōnō cædongā inte mīnitō imīnite pōnō cæcā ate edæ gançæ bacæmīnimpa. Ayæ godōmenque pōnō cædinque tōmengā mīnitō imīnite pōnō tæi gōnongā ate mīnitō tæi piñænte entawēninque wæntædāmaī inte edæ cōwē tæi ongoncæmīnimpa. Tōmengā adocā iñōmō ñāō bai cōwē emōnongā inte mīnitō imīnite aa pedinque, Mīnitō Codito nempo nē quēwēnōmīni inte botō ñāō emonte ongōñōmō pō guite quēwēedāni, angacāimpa. ¹¹ Tōmengā iñōmō cōwē tæi emōninque nē nanguī cædongā ingampa, ante mōnō pedænguipoga quēwēmō incæ iincayæ ponte mīnguipoga quēwēmō incæ cōwē watapæ pōni apænecæimpa. Mānōmaī baquīnō anguēnē, ante botō, Amēē, amopa.

Codito nempo quēwēmīni inte tōmāmīni gānē pōnente quēwencæmīnimpa, ante botō Pegodobo imo yewæmōmopa.

Waa quēwencæmīnimpa, ante

¹² Botō tōniñacā bai inongā inte Tidibānō iñōmō cōwē pōnēninque ædæmō cæcā ingampa, ante adinque botō tōmengā tōnō godongāmæ cædinque, Mīnitō acæmīnimpa, ante cadota ante ocanta yewæmōmopa. Ìi cadota adinque mīnitō gançæ pōnēninque nanguī cæcæmīnimpa, ante cædinque botō Pegodobo iñōmō, Wængonguī nāwangā mānōmaī pōnō waadete cæcampa, ante yewæmōmopa cæmīni. Tōmengā nānō waadete cædonque ante entawēninque edæ mīnitō adiyæ tæi gongænte ongōedāni, amopa.

¹³ Mīnitō imīnite apænte æninque Codito iñōmō Babidōnia iñōmō tōmengā ingante nāni godongāmæ pōnencabo inānite adobaī apænte ængacāimpa. Tōmēnāni iñōmō mīnitō imīnite, Waa quēwencæmīnimpa, ante apænedānipa. Botō wengā bai inongā inte Māadoco adobaī, Waa quēwencæmīnimpa, angampa. ¹⁴ Mīni pōnencabo adobaī godongāmæ waadete pōnēninque, Wængonguī bitō imite waa cæcæcāimpa, ante wacā ingā wacā ingā apæneedāni.

2 Pegodo cadota ante nänö ayænta yewæmongainta

*Wængonguï mînitö imînite waa
cæccæcäimpa, ante*

¹ Botö Timönö Pegodo inömo inte Itota Codito ingante nê cædömö iñömote tömengä botö imote da godongä godingue botö tömengä beyæ nê apænebo bagaboimpa. Mönö Wængonguï inongä inte Itota Codito iñömö mönö imonte, Quëwencæminimpa, ante nê Ængaingä ingampa. Tömengä iñömö mönitö imönite pönö cædinque, Mîni wede pönönö ante waa pönî entawencæminimpa ante pönongä ænimöni inte entawemönimpa. Ayæ adobai tömengä nê nö pönî cædongä inte mînitö imînite pönongä æninque mînitö mönitö entawënö bai ado mîni wede pönönö ante edæ waa pönî entawemînipa. Inique mînitö imînite botö, Acæminimpa, ante yewæmömopa. ² Mînitö Wængonguï ingante pönëninque Itota Codito mönö Awënë ingante adobai pönëninque tömëna inate edæ ate bai pönencæminimpa, ämopa. Ayæ tömëna godömenque pönö cæda ate mînitö tömëna nänä gänë pönönö ante edæ eyepæ pönî entawencæminimpa, ante botö yewæmömopa.

*Codito nänö nê emiñæmö inte mönö
iïmai entawëmompapa*

³ Itota Codito iñömö, Nê waa cæbo inte botö ñäö emömo iñömote pöedäni, ante mönö imonte do aa pecä pömompapa. Mänömai Itota Codito weca pönömote tömengä Wængonguï nänö tæi piñæmämö entawëmongä inte, Quëwëedäni, äninque eyepæ pönö cæcä ænte quëwëninque mönö tömengä awinca ate bai pönëninque tömengä nänö waa cædö bai edæ adobai mönö waa cæmö bamompapa. ⁴ Tömengä nê waa cædongä inte edæ ñäö bai emöninque, Botö godömenque nanguï cædinque

waa pönî edæ pönö cæcæboimpa, ante edæ wæætë wæætë angacäimpa. Inique mînitö iñömö tömengä nänö angäinö ante wede pönëñöminite Wængonguï tömengä nänö entawënö pönongä æninque mînitö Wængonguï nänö entawënö bai adobai entawencæminimpa. Ayæ mänine ante wede pönëninque mînitö inguipoga quëwëninque wënæ wënæ mönö cæinente wægäinö ante, Nömænte bacæ wæ, ante wædinque Baa ante edæ aamö cæcæminimpa.

⁵ Codito mänömai pönö cæcä beyæ mînitö wede pönëmîni inte nê waa cæmîni bacæte ante cöwë edæ pæ pagænte cæedäni. Ayæ wææ nê waa cæmîni badinque Æbänö cæte nö cæquïi, ante eñëmîni bacæte ante nanguï cæedäni. ⁶ Ayæ wææ mänömainö ante mînitö nê eñëmîni badinque godömenque nanguï cædinque nämä wææ aamîni bacæte ante cæedäni. Ayæ wææ nämä wææ aamîni badinque wæætë nê wæntædämai inte ee cæmîni bacæte ante cæedäni. Ayæ wææ nê wæntædämai inte ee cæmîni badinque mînitö wæætë Wængonguï nänö ante entawënö bai entawëninque tömengä nänö cædö cæte quëwencæte ante cæedäni. ⁷ Ayæ wææ Wængonguï nänö cædö bai cæte quëwëmîni badinque mînitö ayæ, Mönö caipæ, ante godongämæ mîni waa cæcabo bacæte ante cæedäni. Ayæ wææ mîni godongämæ waa cæcabo bamîni inte mînitö ayæ waodäni tömänäni inänite waadete pönëninque godö waa cæmîni bacæte ante cæedäni.

⁸ Mänömai wede pönëninque tæi ongöninque waadete pönëninque Wængonguï nänö cædö ante godömenque godömenque entawente cæmîni inique mînitö mönö Awënë Itota Codito ingante ate bai nê pönëmîni inte edæ tömengä beyæ mîni cæquënönö ante oda cæte wædämai imaimînipa. Wæætë edæ awæ nanguï inca bai mînitö adobai mîni cæquënönö ante do cæcæminimpa.

⁹ Wæætë mäninö tömänö ante

entawënämaï ingä guiquënë tömengä möwoyata bai ëmönongä inte ingui-pogaque waa adinque öönädë iñömö gobæ i ædö cæte aquingää. Tömengä nänö wënæ wënæ cægainö ñä do mënongate impa, ante pönënämaï inte önonque quëwengampa. ¹⁰ Iñänäni ëñëedäni. Wængonguï mïnitö imïnite do apænte æninque aa pegacäimpa cæmïni. Mïnitö, Wængonguï nänö änönonque ante ëñente entawëninque mönö cöwë tæi gongænte on-gongæimpa, ante nanguï cæedäni. Edæ mänömaïnonque ante cæmïni inte mïnitö oda cædämaï inte tæi ongoncæmïnimpa. ¹¹ Ayæ iincayæ ate nänë wæmïni ate mönö Awënë Odeye Itota Codito iñömö mïnitö imïnite ææntodongä goyöminite tömengä, Pö guiidäni, ante watapæ æmæwo man-guicä guite cöwë quëwencæmïnimpa.

¹² Mïnitö mäninö ante do ëñëninque mïni nö pönï ëñënö ante ædæmö entawente tæi ongöminï incæte botö, Godömenque cöwë pönencæmïnimpa, ante cædinque adodö adodö ante apænebo ëñencæmïnimpa. ¹³ Edæ botö, Mïnitö oda cædämaï inte cöwë pönencæmïnimpa, ante cædinque botö baonga botö quëwenganca wæætë wæætë apænedinque nö cæte apænebopa, ante pönëmopa. ¹⁴ Edæ mönö Awënë Itota Codito botö imote edonque apænedinque, Bitö oo pönï wæninque botö weca ææ poncæbiimpa, angacäimpa. ¹⁵ Angä ëñengaïmo inte botö, Nöwo botö yewæmöninö ante adinque entawëmïni inte mïnitö iñömö botö gobo ate cöwë pönencæmïnimpa, ante cædinque ñöwo incæ tæi piñæninque nanguï cæcæboimpa.

Itota Codito Tæiyæ Awënë nänö ëmönö atamönipa

¹⁶ Mönö Awënë Itota Codito iñömö tæi piñængä ingä inte oo poncæcäimpa, ante mïnitö imïnite apænedinque mönitö dicæ wadäni nänï mä apænewënö ante apænetamönïyaa. Wæætë edæ, Tömengä në Awënë inongä inte mönö Tæiyæ Awënë nänö ëmönö

incæ ëmongampa, ante në agaimöni inte mönitö, Nawangä agamönimpa, ante apænemöni ëñëmïnitapa. ¹⁷ Edæ Awënë nänö ñäo apæite bai ongöñömö ongonte apænedinque Mæmpo Wængonguï incæ, “Iingä botö Wengä inongä inte botö në waadecä ingampa. Tömengä ingante adinque botö waa tobopa,” ante apænegacäimpa. Ayæ Itota ingante waa adinque tömengä në ñäo ëmongä ingante odömongä agamönipa. ¹⁸ Änanquidi tömengä tæiyæ waëmö ëmonte nänö ongöñömö godongämæ ongöninque mönitö mäninö ante Wængonguï öönädë tedecä ëñentamönipa.

¹⁹ Wængonguï beyæ në apænegainäni nänï yewæmongainö bai mönitö adobai edonque agaimöni inte, Nawangä iñonte yewæmongadänimpa, ante apænemöni ëñënguënëmïni imïnipa. Mäninö nänï angainö wëmö iñömö ñäo apæite tica ënente bai i apa quëwëmïni. Oque pönente iñonte, Wadaamö æængæimpa, ante wänö cönäni bai mïnitö adobai mïni ñäo entawënginque ante Itota Codito nänö ponguïönæ ante edæ wänö cöninque wede pönëmïni ininque waa imaimpa. ²⁰ Iñänäni ëñëedäni. Dodäni Wængonguï beyæ në apænegainäni incæ, Wængonguï æbänö ante apænecä ëñente yewæmonguïmoo, ante pönëninque dicæ mä pönëninque adodeque incæ yewæmongadänïyaa. ²¹ Wïi nämanque pönëninque yewæmongadänimpa. Wæætë Wængonguï Tæiyæ Waëmö Önöwoca nempo quëwëñönänite tömengä pönö apænecä ëñëninque Wængonguï nänö apænedonque ante apænegadänimpa, ante ämo ëñëmaïmïnipa.

2

Në babæ odömonte apænedäni iimäi cædänipa, ante

¹ Doyedë pancadänïyaa, Wængonguï beyæ apænebopa, äninque babæ apænegadänimpa. Nöwo iñömö

wadāni adobaī awēmō cædinque, Mini cabo oda cæte ewente wæcæminimpa, ante cædinque babæ ante odōmonte apænequināni mīnitō weca do ongōnānīpa. Mōnō Tæiyæ Awēnē incæ tōmēnāni inānite æncæte ante nāmā wepæ nē godongaingā iñongante tōmēnāni wæætē nāni quingæ omæe ewenguinque edæ Baa ānānīpa cæmīnīi. ² Pancamīniya nanguī imīni incæ mīni guīñente wæquinque tōmēnāni nāni wentamō mongænte goquīnō incæ tee empote goquīmīni imīnīpa, ante awædō. Mānīnō godinque mōnō nōingā ēñēnōnō ante piīnte cæyōmīni wadāni adobaī mānīi taadō nōinō iñonte godō babæ ānīnque wēnæ wēnæ ānāni baquīnānīpa, ante awædō. ³ Nē babæ odōmonte apænedāni iñōmō mīnitō māincoo ante ō æinēwente wæwēnāni inte nāmāneque nāni pōnēwēnō ante tededāni ēñēnīnque mīnitō do oda cæyōmīnite tōmēnāni wæætē ō æmāinānīpa, ante awædō. Mōnō nē pangā ōnoncadopo do ongongaināni inānīpa. Mōnō nē pangā iñōmō, Oo nāni ewenguinque mānōmaī cædānīpa, ante apænte ancæte ante piīnīnque edæ mōwo mōnāmaī mīingā inte a ongongampa.

⁴ Anquedoidi incæ ēñēnāmaī cædāni ate Wængonguī ata cæpodāmaī ingacāimpa. Wæætē, Tōmēnāni nāni apænte tente wæquinganca ontatodē wēmō mæ māmonte baī iñōmō guī tee mōnete ongongcædānīpa, ante cædinque tōmengā angā ēñente tōmēnāni nāni owogaiñōmō tadōmengadæ pōnī dobæ go guīgadānīpa. ⁵ Ayæ doyedē tōmengā nānō nē badongaināni inguīpoga quēwēñōnānite Wængonguī tōmēnāni inānite ata cæpodāmaī inte angā ate nē ēñēnāmaī ināni iñōmō edæ æpæmpo bete wængadānīpa. Wæætē Nōwee wodi Docā nāni ānongā guīquēnē, Mōnō nō cæte quēwengæimpa, ante nē apænegaingā iñongante Wængonguī tōmengā tōnō tiæte ganca ināni mānimpodānīque inānite wææ aacā

quēwengadānīpa. ⁶ Ayæ, Todōmā tōnō Gōmoda iñōmō quēwēnāni inānite, Mini apænte wido cæquinque, ante tōmēnāni quēwēñōmō iya tānīnque wido cæcā gōnaiboque bate contagatīpa. Mānōmaī cædinque Wængonguī, Botō imote ēñēnāmaī imīni mīni adobaī tente wæquinque cæmīnīpa, ante wadāni inānite odōmoncæte ante cægacāimpa. ⁷ Ayæ ēñēnāmaī inte cædāni baonque towente quēwēnāni adīnque Dooto wodi iñōmō nē nō cægāingā inte, Wentamō pōnī mongænte quēwēnāni awædō, ante wædongā inte adoyōmō quēwēñongante Wængonguī tōmengā ingante tōō æmænte ō ængā beyænque quēwengacāimpa.

⁸ Tōmengā waa cæquinque nō entawēnongā inte tōmēnāni weca quēwente ayongā iimō iñō iimō iñō ēñēnāmaī cædāni adīnque tōmengā, Ancaa ate awædō, Ancaa ēñente awædō, ante wæwēñongante Wængonguī tōmengā ingante do ō ængā beyænque quēwengacāimpa. ⁹ Mānōmaī cædinque Wængonguī, Botō mīñæ nē pōnāni caate wædāni adīnque botō do ēñente cædinque æmo ate quēwēnānīpa. Wæætē wiwa cædāni inānite botō apænte anguīōnæ ganca mō ongonte baī mānīnque ñōwo incæ wæætē wæætē pāmo wædānīpa, ante Wængonguī cæcampa. Inīnque, Nō ēñente Wængonguī cæcampa, ante mōnō edonque ēñengæimpa. ¹⁰ Mānīi babæ ante nē odōmonte apænewēnāni iñōmō tōmēnāni baonque ante towēinente nāni entawēmāmo ante nē cædāni inōnāni inte edæ awēnēidi inānite, Wīi ēñēinē wædō, ante piīnānīpa. Mānōmaīnō ante nē piīnte ānāni inānite godōmenque pancæte ante Wængonguī mō ongonte baī mangampa. Tōmēnāni iñōmō nāmā ængō cædinque guīñēnedāmaī inte edæ nē ñāō entawente tæi emōnāni inānite godō wēnæ wēnæ apænedīnque edæ babæ ante tedewēnānīpa. ¹¹ Iñæmpa anquedoidi tæi piñænāni inte godōmenque

ñænænāni inōnāni incæ Wængonguī ayongante guñēnete wædinque nē ñāo entawente tæi emōnāni inānite pīnte apænte ānāmaī inānīpa.

¹² Nē babæ ante odōmōnāni guiquēnē tōmēnāni nāni nē adāmaī inō ante mā pōnēnīnque wēnæ wēnæ apænedīnque babæ ante tedewēnānīpa. Babæidi omæwocādāni inte nāni togænte ecate ewengūnque ononque pōnī cægōnāni baī nē babæ odōmōnāni iñōmō edæ adobaī ēñēnāmaī ināni inte tōmēnāni nāni wængūnque babæ cædinque quingāmē baī quēwēnānīpa. ¹³ Tōmēnāni wādāni inānite godō wīwa cædāni īnīnque īnāni wæætē nāēmæ godō cædāni wæcædānīpa. Tōmēnāni iñōmō, Itædē incæ mōnō baonque pōnente towengæīmpa, ante cædānīpa. Mīnitō waadete pōnēnīnque godongāmæ cæñōmīni tōmēnāni adoyōmō pōnīnque cæowæo incædō beowæo incædō inte cæyōnāni wentamō nāni mongæñō beyænque mīni cabo wæætē baate baī ēñamīni badīnque wentamō tæ encaa tæ encaa emonte bamīni awædō.

¹⁴ Wacā onquiyængā awīnca adīnque cōwē godō towēīnente wædāni inte tōmēnāni iñōmō ñīmpo cædāmaī cōwē wīwa cæīnente wædānīpa. Wacā aquī pīñænāmaī ingā adīnque tōmēnāni, Mōnitō tōnō godongāmæ ponte wēnæ wēnæ cæcæcāīmpa, ante cædinque godō waa cæte baī babæ cædānīpa. Botō quī botō quī, ante nē æīnente wædāni iñōnānite Wængonguī iñōmō, Tōmēnāni nāni wæwocāincabo inānīpa, ante pīnte angampa. ¹⁵ Taadō tōīnō oda cædinque edæ docā Beodo wodi wengā Badāo wodi mīñæ tōmēnāni tee empote godānīpa. Tōmengā Badāo iñōmō, Nō cædāmaī imo incæte botō māīncooque ænte tobote, ante baī cægacāīmpa. ¹⁶ Tōmengā Wængonguī beyæ nē apænecā incæ ocai omæcacā baī inte wapiticæ ēñēnāmaī cæyongante babetadecā īningā incæ bodo incæ iñontobæ wao baī tededīnque Badāo ingante wæe angacāīmpa.

¹⁷ Mānīi ñōwodāni nē babæ odōmōnāni iñōmō æpæ taquēnēñōmō æpæ dæ ā baī edæ onōnānīque inte odōmōnānīpa. Boguīmancoo wīni cai mongænte ononque ænte poncoo baī tōmēnāni adobaī ināni inte ononque cædānīpa. Mānōmaī cædāni beyæ Wængonguī, Tōmēnāni nāni ongote wæquīñōmō, ante mæ māmonte baī iñōmō badongacāīmpa.

¹⁸ Edæ tōmēnāni ogæ tededīnque, Botō godōmenque waa pōnī cæbo aedāni, ante ononquedō ante tedewēnānīpa. Wādāni wapiticæ cæte quēwēnāni nempo adocanque wodo aamō cæyongante mānīnāni nē babæ odōmōnāni iñōmō, Bitō mōnitō mīñæ wæætē pōnīnque baonque bitō cæīnēwēnō ante guīñēñadāmaī inte cæte tocæbiīmpa, ante waa cæte baī godō babæ cædānīpa. ¹⁹ Mīni ædæmō aamō cæte mōnedāmaī quēwengūnque mōnitō mīñæ pōedāni, ante babæ ānewēnānīpa. Incæte nē babæ odōmōnāni incæ tōmēnāni nāni wīwa cædonque beyænque cæte quēwēnāni beyænque nāēmæ ñā cæyænte baī inte wædānīpa. Edæ quīēmenque ante waocā ēñente cæcāā tōmengā mānīnō nānō ēñente cædō beyænque nē cæte quēwēnongā inte nāēmæ ñāo cæyænte baī inte wæcampa.

²⁰ Inguīpoga ñōmænguēnēmāmo beyæ tee mōnete baī quēwēnīnāni inte tōmēnāni mōnō Awēnē Itota Codito mōnō imonte nē Ængaingā ingante do ate baī pōnēnīnque edæ abæ tawænāni inānitapa. Mānōmaī abæ tawænte godīnāni inte tōmēnāni īnguīpoga ante nāni cæīnente wæpāmo beyænque wæætē adodō go goyo cæte ægodawate tæ wææntodonte baī wædāni īnīnque tōmēnāni godōmenque nāni wēnæ wēnæ wæwengūnque īmaīmpa. ²¹ Nōīnō taadō do adīnāni inte tōmēnāni nāni godōmenque wæwengūnque emō cæte godānīpa. Wængonguī tæiyæ waemō nānō wææ angāīnō ante odōmōnāni nāni do ēñēnīnō ante Baa ante wædæ godāni iñōmō godōmenque wēnæ wēnæ nāni wæquinque īmpa. īnīnque

mānīnō taadō ante tōmēnāni cōwē adāmaī ināni inte baī tōmēnāni beyæ godōmenque waa incædōnīmpa. ²² Tōmēnāni nōinō taadō emō cæte godīnāni nāni cædō baī ante īmaīnō ante nāwangā ante badete todānīpa. “Guinta awæ wēningā adodō cængampa. Odæ wængānā īñōmō æpæ pantate ate onguipoipæ wēango wēango nangampa.”

3

Mönō Awēnē wæætē adodō poncæcāīmpa, ante

¹ Botō nē waadedōmīni ēñēedāni. Mīnitō mōwo mōnāmaī inte nōingā ante pōnencæmīnīmpa, ante botō, Mānōmaī īmpa, ante mentaa yewæmōnīnque adodō adodō ante yewæmōmo aedāni. ² Tæiyæ waēmō entawēnāni Wængonguī beyæ ante apænedīnque nāni yewæmongainō ante nē adīmīni inte mīnitō wæætē pōnencæmīnīmpa, ante cæbopa. Mönō Awēnē mōnō īmonte nē Ængaingā inte adobaī ante wææ angacāīmpa. Tōmengā nānō da godongaimōni īñōmō tōmengā nānō wææ angainō ante apænemōni ēñēmīni inte mīnitō wæætē adodō ante pōnencæmīnīmpa, ante cædinque yewæmōmopa.

³ Īmaī ante tāno apænebo ēñencæmīnīmpa. Mönō waocabo inguipoga mōnō quēwēmāmo wodo īinque bayonte nē badete todāni cōwē poncædānīmpa. Pōnīnque tōmēnāni badete todīnque nāmā nāni wēnæ wēnæ cæinēnō ante edæ do cæquīnāni inānīpa. ⁴ Tōmēnāni īmaī ante badete tocædānīmpa. “Codito nānō ponguīnque īmpa, ante wædānītedō abi. Īñæmpa Wængonguī nānō badongāñedē inguipo nānō cægāi baī mæmæidi wodi wænte godāni ate ñōwo ganca adobaī inte cæ apa guīñewēmīnīi,” ante badete toquīnāni inte poncædānīmpa. Apænebo ēñēedāni. ⁵ Wængonguī īñæmpa adodeque angā beyænque oōnædē owocoo edæ do bagatīmpa. Adodeque angā beyænque onguipo æpæ tæcæpæno odæ yate ongōñonte tōmengā æpæ

tōnō badongā ongōmpa. Mānōmaī īmpa, ante edonque ī incæte tōmēnāni, Mönō Baa angæīmpa, ante beyænque adāmaī inte baī pōnēnāmaī inānīpa. ⁶ Ado æpæ inguipoga mæ ā beyænque Nōwee wodi quēwengāñedē māninguipo nānō ingāi dæ badīnque waguipo baī bagatīmpa, ante edæ ñōwodāni īñōmō adobaī pōnēnāmaī inānīpa. ⁷ Ayæ adobaī Wængonguī adodeque angā beyænque oōnædē owocoo tōnō īinguipo ñōwo mīni cægonguipo edæ iya tanguīnque ongōmpa. Tōmengā, Botō īmote nē Baa ānāni inānite botō apænte pante wido cæquīōnæ ganca mānīi oōnæ tōnō īinguipo ongōmpa, angampa.

⁸ Botō nē waademīni edæ ēñēedāni. Mönō Awēnē ayongante adoōnæque incæ edæ, Mīido ganca wadepo baī īmpa, ante acampa. Mīido ganca wadepo īñonte mōnō Awēnē ayongante, Adoōnæque baī īmpa, ante acampa. Mānōmaīnō ante adodeque incæ mīnitō cōwē ēñente pōnēedāni, āmopa. ⁹ Mönō Awēnē, Cōwē pōnō cæbo æncæmīnīmpa, ante nānō angainō ante pancadāniya, Æiquedō mōnō Awēnē cæquīngāā, ante wædānīpa. Mönō Awēnē īñæmpa wīi wæntæye ingampa. Wæætē, Adocanque wænāmaī incæcāīmpa. Wæætē tōmānāni, Idæwaa wēnæ wēnæ cæte awædō, ante botō gāmænō poncædānīmpa, ante cædinque tōmengā mānīnō beyænque ee cædāmaī ingampa. Īnīnque tōmengā, Mīnitō wæætē botō gāmænō æiquedō ponguīmīnīi, ante wānō cōnīnque edæ ee pōnāmaī ingampa.

¹⁰ Incæte nē awēmō o ængā īñontobæ nānō pōmaī mōnō Awēnē nānō poncæ cæōnæ īñōmō adobaī īñontobæ ponguīnō anguēnē. Nanguī tæi tæi tēnīnque oōnædē owocoo incæ īñontobæ dæ goquīnō anguēnē. Gongā nāni angā nanguī pōnī bæco īnīnque edæ Wængonguī nānō badongaincoo tōmancoo edæ aca podīnque edæ ewente bacæīmpa. Inguipoga tōmāo ongōncoo dæ ba īnīnque in-

guipo önömæca pönī baquinō anguēnē. ¹¹ Tōmancoo edæ mänōmaī ēwenguincooque impa, ante adinque edæ mīnitō iñōmō, Æbānō quēwenguīi, ante pōnēmīni. Wængonguī nānō cædō bai cōwē cædinque tæiyæ waēmō quēwenguēnēmō imompa. ¹² Wængonguī nānō ponguīōnæ iñōmō edæ æyedēnō ponguīi, ante wānō cōninque, Quingæ pōnī pongæimpa, ante mōnō nanguī cæcæimpa. Mānīōnæ iñonte edæ oōnæ incæ gonga bæcote ēwente bayonte Wængonguī nānō badongaincoo incæ nanguī ocoi āninque tōmancoo aca podinque ēwente baquinō anguēnē. ¹³ Picæōnæ tōnō pedænguipo omæe ēwēninque Wængonguī wæætē, Botō mīiōnæque tōnō mīinguipoque pōnō badoncæboimpa, ante nānō angainō bai do badoncæcæimpa. Īninque mōnō iñōmō, Mīiōnæ tōnō mīinguipo iñōmō mōnō nō pōnī cæte quēwengæimpa, ante nanguī aīnente wæmompā.

¹⁴ Botō nē waadedōmīni ēñēedāni. Mänōmaī bacæimpa, ante nē aīnente wæmīni inte mīnitō iñōmō edæ, Mōnō māniñedē wentamō entawēnāmaī imō adinque Wængonguī pīnāmaī incæcæimpa, ante nanguī cædinque edæ nāmā wææ aadedāni. Ayæ tōmengā, Botō ayōmo waēmō ēwocamīni ĩninque edæ mōnō godongāmæ piyænē cæte quēwengæimpa, ante pōnō cæcæcæimpa, ante edæ nanguī cæedāni. ¹⁵ Mōnō quēwenguinque ante mōnō Awēnē edæ ee ongonte pōnāmaī ingampa, ante pōnēedāni. Wængonguī pōnō cæcā ate ocai nē encacā bate pōnēninque mōnō tōniñacā Pabodo mōnō nē waadecā inte adobainō ante mīnitō imīnite edæ, Acæminimpa, ante yewæmongantapa. ¹⁶ Wængonguī mōnō quēwenguinque ante ee pōnāmaī ingampa, ante cadota ante yewæmōninque Pabodo adobainō ante edæ cōwē yewæmongampa. Tōmengā nānō yewæmōninta pancataa wīi edonque ĩ adinque nē ēñēnāmaī ĩnāni tōnō aquīi pīñænāmaī ĩnāni iñōmō edæ oda cædinque wapiticæ odōmōnānīpa. Tōmēnāni

edæ Wængonguī angā ēñente nāni yewæmongainta tōmantaa adobai adinque tōmēnāni nāni æmæwo ēwenguinque edæ wapiticæ odōmōnānīpa.

¹⁷ Botō nē waademīni ēñēedāni. Mänōmaī impa, ante do ēñēmīni iñōmīnite Wængonguī nānō wææ angainō ante ēñēnāmaī cædāni ĩnāni guiquēnē mīnitō imīnite tōō æmænte wapiticæ ænte gocæ cædāni ate wædinque mīnitō wæætē tōmēnāni mīñæ godāmaī iedāni. Wæætē edæ Tæiyæ Awēnē nempo quēwēmīni inte, Tæi gowæænāmaī incæboimpa, ante nāmā wææ aadedāni. ¹⁸ Mōnō Tæiyæ Awēnē Itota Codito ængā beyænque mōnō quēwēmompā. Īninque tōmengā waadete pōnō cæcā ate mīnitō tōmengā ingante ate bai pōnēninque wadāni ĩnānite godōmenque waadete godō cæmīni baedāni. Tōmengā iñōmō edæ ñōwopāmo iñonte wapāmo mīimāmo iñonte edæ cōwē tæi ēmongā ĩnongā inte ñāō apāite bai ēmongampa, ante adinque mōnō ñimpo cædāmaī inte tōmengā ingante cōwē waa acæimpa. Mänōmaī baquinō anguēnē, ante botō, Amēē, āmopa.

1 Wäo cadota ante nänö tänota yewæmongainta

Mini quëwenguinö ante në pönongä

¹ Æcänö wëenëñedë Wængonguï nänö badongaiñedë do ingacäimpa, ante mäninö ante apænemönipa. Wængonguï nänö Angainö ante në ëmongaingä iñömö Itota adocä, Mini quëwenguinö ante në pönongä ingacäimpa. Mönitö iñömö mäningä apænecä ëñëninge tömengä ingante awinca inte në adimöni imönipa. Adocä ingante cöwä adinque mönitö tömengä ingante në gampodimöni imönipa. Ìnque möni në ëñëningä ingante ante, awinca inte möni në adingä ingante ante, möni në cöwä adingä ingante ante, möni në gampodingä ingantedö ante apænemönipa. ² Edä Itota në quëwengaingä iñömö edonque pönö a ongongacäimpa. Mönitö tömengä ingante në adimöni imönipa. Mäningä ingante ante, Näwangä quëwengaingä ingampa, ante apænemöni imönipa. Ayæ mönö Mæmpo Wængonguï tönö guëa cöwë quëwengaingä iñömö tömengä mönö weca ponte a ongongä atamönipa. Ìnque minitö iminite mäningä ingante ante apænemöni ëñencæminimpa. ³ Ayæ mönö Mæmpo Wængonguï tönö tömengä Wengä onguïñængä Itota Codito tönö mönitö godongämæ cæmöni imönipa. Ìnque, Minitö adobai mönitö tönö godongämæ cæcæminimpa, ante cædinque mönitö möni në adingä ingante ante, möni në ëñëningä ingante ante minitö iminite apænemöni ëñencæminimpa. ⁴ Mönö eyepæ watapæ toquinque ante mäninö ante minitö iminite yewæmömönipa.

Wængonguï ñäo apäite bai inongä ingampa

⁵ Tömengä nänö angainö möni ëñëninö æbänö i, ante mönitö iïmai ante minitö iminite apænemöni

ëñencæminimpa. Wængonguï ñäo apäite bai inongä ingampa. Ìnque tömengä wentamö nänö entawënö edä dæ ampa. ⁶ Wentamö iñömö në cægömö Ìnque mönö, Tömengä tönö godongämæ cæmöni, ante ämö Ìnque mönö edä në babæ ämö iïaimompa töö. Ayæ mänömai cæmö Ìnque mönö, Quinö nöingä impa, ante cädämai iïaimompa. ⁷ Wængonguï ñäo apäiyömö mäniñömö ongongä bai mönö adobai ñäo iñömö cægömö Ìnque mönö wacä ingä wacä ingä godongämæ cæbaimompa. Ayæ ñäo iñömö cægömö Ìnque mönö wënæ wënæ cægainö tömäa adinque tömengä Wengä Itota nämä wepæ inte mönö imonte mënongacä ate mënongate iïaimompa.

⁸ Mönö, Botö wënæ wënæ cæpämö dæ ampa, ante ämö Ìnque mönö nämä incæ oda cæte wapiticæ go bai cæbaimompa. Ayæ mänömai äninque mönö, Quinö nöingä i, ante ewocadämai quëwëaimompa töö. ⁹ Wæætë edä Wængonguï mönö imonte cöwë pönëninge në ædæmö cæcä inongä ingampa. Ayæ në nö cæcä iñongante mönö tömengä ingante, Botö nämä wënæ wënæ cædimö inte awædö, ante ämö ëñëninge tömengä wæætë pïinämai inte mönö imonte pönö ñimpo cæcä quëwencæmöimpa. Ayæ wiwa mönö cæte quëwënö tömäa adinque tömengä wæætë mönö imonte mënongacæcäimpa. ¹⁰ Mönö, Botö cöwë wënæ wënæ cädämai ingaïmo imopa, ante ämö Ìnque Wængonguï ingantedö ante, Babæ änongä ingänö, ante äaimompa. Ayæ mänömai ämö Ìnque tömengä nänö angainö ewocadämai quëwëaimompa töö.

2

Mönö Codito wæcæ angä beyænque mönö quëwenguinque

¹ Botö wëñæmini bai imini ëñëedäni. Minitö wënæ wënæ cädämai incæminimpa, ante iïmai ante cædinque yewæmömopa. Incæte

adocanque wënæ wënæ cæcantawo. Tömengä beyæ wacä, Mæmpo Wængongui pänämaï incæcäimpa, ante mönō nē wææ änongä incæ mæ ongongampa. Mäningä iñömō nē Nō Cæcä ïnongä inte Itota Codito ïnongä ingampa. ² Ayæ idægoidi, Mönō wënæ wënæ cægäinō ante mönō imō Wængongui piinämaï incæcäimpa, ante cædinque cæningä wænönäni nänō wængai bai mäninganque adobai mönō wënæ wënæ cægai beyæ wængacäimpa. Ayæ wii önonque mönō wënæ wënæ cægäinonque beyænque wæætē tömämaë quëwënäni nani wënæ wënæ cægai beyæ adobai wængacäimpa.

³ Mönō Wængongui ingaingä ingante ate bai pönemōö, ante æbänō cæte ëñenguüi. Edæ, Iïmaï cæedäni, ante Wængongui nänō wææ angainō ante ëñente cæmō ïninqe mönō edæ, Wængongui ingante ate bai nē pönemō imopma, ante do ædæmō ëñëmaïmopma. ⁴ Waocä iñömō, Wængongui ingaingä ingante ate bai pönemo imopa, ante nē angä incæte tömengä Wængongui nänō, Iïmaï cæedäni, ante wææ nänō angainō ante ëñënämaï cæcä ïninqe mäningä nē babæ änongä ingampa. Ayæ Wængongui nöingä nänō angainō ante ewocadämaï quëwengampa töö. ⁵ Wæætē, Wængongui nänō angainō ante æcänō ëñente cæda iñömō mäningä ingante Wængongui pönō cæcä beyænque tömengä Wængongui waadete nänō pönönō ante eyepæ entawente quëwengampa. ïninqe Wængongui nänō angainō ante ëñente cæmō inte mönō, Tömengä nempo quëwemō imopma, ante ædæmō ëñëmopma. ⁶ ïninqe æcämenque, Botō tömengä nempo nē quëwemo imopa, ante nē angä iñömō tömengä Itota nänō quëwente cægöni bai adobai quëwente cægonguënē ingampa.

Itota, Iïmaï cæedäni, ante ñowo nänō wææ äno

⁷ Botō nē waademini ëñëedäni. Minitō iminite, Iïmaï cæedäni, ante

wii botō tömëmo wææ äno ante ñowo yewæmömopa. Wæætē Itota do nänō wææ angainō ante wëenëñedē mini ëñente ængainō ante adodō ante yewæmomo aedäni. Iï tömengä do nänō wææ angainō iñömō minitō iminite möni apænedō mini ëñëñinō impa. ⁸ Incæte minitō iminite Itota, Iïmaï cæedäni, ante ñowo nänō wææ äno yewæmömopa. Tömengä tönō minitō quëwente cædinō beyænque, Mäninō nō pönï impa, ante edonque pönï acæimpa. Edæ mönō wëmō iñömō wodëmäa tæcæ bacæ cæyō nō ñäo iñömō tatodonte do apäite impa.

⁹ Botō ñäo iñömō quëwemo imopa, ante nē angä incæte tömengä nänō tönïñacä ingante nē piingä ingä ïninqe tömengä wëmō iñömō ayæ quëwengampa. ¹⁰ Æcänō guiquënë nänō tönïñacä ingante nē waadete pönengäa tömengä ñäo iñömō nē quëwengä ingampa. Tömengä ñäo iñömō quëwëninque quïëmë beyænque edæ tëwate goquingäa. Edæ dæ ampa. ¹¹ Wæætē æcänō nänō tönïñacä ingante nē piingäa wëmō iñömō quëwengampa. Tömengä wëmō iñömō cægongä inte compocæ compocæ gocä ingampa. Wëmō iñömō quëwëninque babetamongä bagaingä inte tömengä ædönō gocäa, ante ëñënämaï ingampa.

¹² Wëñæmïni ëñëedäni. Edæ Itota Codito ëmowo beyænque mini wënæ wënæ cægäinō ante ñimpo cæte quëwëmini iminipa, ante adinqe botō minitō iminite yewæmömopa. ¹³ Mæmpomïni ëñëedäni. Minitō edæ, Wëenëñedē nē ingaingä ingante do ate bai pönengaimini imini beyænque botō minitō iminite yewæmömopa. Onguiñæmïni tæcæ pæmïni ëñëedäni. Minitō edæ godömenque tæi ëmömïni imini inte wënæ awënë ingante Baa ante gänä cæmïni beyænque botō minitō iminite yewæmömopa. Wëñæmïni ëñëedäni. Minitō edæ mönō Mæmpo Wængongui ingante do ate bai pönengaimini imini beyænque botō minitō iminite yewæmömopa.

¹⁴ Mæmpomïni ëñëedäni. Minitō

edæ wēēnēñedē nē ingaingä ingante do ate bai pönengäimīni imīni beyænque botō mīnitō imīnite yewæmōmopa. Onguiñæmīni tæcæ pæmīni eñēedāni. Mīnitō edæ tæi emōmīni inte ayæ Wængongui nānō angainō cōwē ewocate quēwēmīni imīnīpa. Adobai mīnitō edæ wēnæ ingante godōmenque tæi emōmīni inte Baa ante gānā cæmīnīpa. Mānōmaī beyæ botō mīnitō imīnite yewæmōmopa.

¹⁵ Inguipogaque ante nāni quēwēmāmo ante waadete pōnēnāmaī iedāni. Inguipoga quēwēnāni quiēmē wēnæ wēnæ nāni cæpāmo ante tōmāmāmo ante adobai waadete pōnēnāmaī iedāni. Ayæ æcānō ii inguipogaque ante nāni quēwēmāmo ante waadete pōnente ina māningä mōnō Mæmpo Wængongui nānō waadete pōnēnō ewocadāmaī quēwengä ingampa. ¹⁶ Ii inguipoga iñōmō æbānō i, ante acæimpa. Edæ wēnæ wēnæ cædāni quiēmē beyæ nāni æinente wædō i, awinca inte adinque nāni æinente wædō i, ante wīi mōnō Mæmpo Wængongui pōnō cæcā ate æinēnānīpa. Tōmēnāni, Māincoo nanguī eamōni imōni aedāni, ante cædānīpa. Ayæ, Nanguī cæmōni aedāni, ante cædānīpa. Incæte tōmāā māniī nāni æinēnō wīi mōnō Mæmpo Wængongui pōnō cæcā ate æinente badānīpa. Wæætē inguipoga iñōmō nē mā cædāni inte quiēmē wēnæ wēnæ nāni cæpāmo ante adinque wadāni dobæ wēnæ wēnæ cæinēnāni badānīpa. ¹⁷ Inguipoga mōnō quēwēñōmō incæ māninguipogaque ante quēwēnāni nāni cæinēnō incæ oo pōni dæ baquinō anguēnē. Wæætē waocā, Wængongui nānō angainō ante nē eñente cæcā inte wantæpiyæ wænāmaī quēwencæcāimpa.

Quinō nōingä ante impa, quinō babæ ante impa

¹⁸ Wēñæmīni eñēedāni. Iinque baquiōnæ mōnō äōnæ oo batimpa. Māniōnæ iñonte Codito ingante wacā nē piinte cæcā iñōmō, Botō Codito imopa, ante nē anewēnongä

ponguingä, ante eñēmīnitapa. Edæ mānīnō mīni eñēnīnō bai ñōwoönæ incæ nanguī ināni Codito ingante nē piinte cædāni iñōmō, Botō Codito imopa, ante nē anewēnōnāni inte edæ do pōnānitapa. Mānōmaī i iinque edæ, Iinque baquiōnæ do bapa, ante mōnō eñengæimpa. ¹⁹ Mānīnāni iñōmō mōnō imonte emō cæte godānitapa. Incæte tōmēnāni wīi nō mōnō pōnencabo adocabo ināmaī inānitapa. Edæ mōnō pōnencabo adocabodāni inīnāni inte bai tōmēnāni edæ wadæ godāmaī inte mōnō tōnō ayæ a ongoncædōnānīpa. Wæætē do godāni adinque mōnō, Mānīnāni tōmānāni mōnō cabo ināmaī inānitapa, ante edonque pōni acæimpa.

²⁰ Edæ ogui wapæ gadoncadāni encadāni bai mōnō Tæiyæ Waēmō inongä iñōmō edæ tōmengä Önōwoca ingante mīnitonga angä pō guicā ate mīnitō tōmāmīni tōmengä ingante entawēnīnque, Quinō nō i, ante eñēmīnīpa. ²¹ Mīnitō imīnite yewæmōnīnque botō dicæ, Mīnitō, Quinō nō i, ante eñēnāmaī imīnīpa, ante yewæmōmogaa. Wæætē edæ, Mīnitō, Quinō nō i, ante eñēmīnīpa, ante adinque botō mānōmaī beyæ ante yewæmōmopa. Ayæ babæ nāni ānīnō tōnō Wængongui nōingä nānō angainō tōnō ædō cæte guēa inguīnaa, ante eñēmīni adinque botō mānōmaī beyæ ante yewæmōmopa. ²² Babæ ante nē anewēnongä æcānō ingantawo. Edæ Itota incæ wīi mōnō Codito ingaingä ingampa, ante nē angä iñōmō tōmengä nē babæ anewēnongä ingampa. Māningä wæætē, Botō Codito inōmo imopa, ante Codito ingante nē piinte cæcā ingampa. Tōmengä edæ mōnō Mæmpo Wængongui tōnō tōmengä Wengä Itota Codito nāna Mæmpocaya inate Baa angampa. ²³ Ii Wengä onguiñængä ingante Baa ānīnque, Itota incæ wīi mōnō Codito ingaingä ingampa, ante nē ānāni iñōmō ædō cæte Mæmpo Wængongui nempo quēwēnōnāni inguīnāni. Wæætē tōmengä Wengä ingante æcānō Ao

äninque, Itota mönō Codito ingaingā ingampa, ante nē angā guiquēnē tōmengā Mæmpo Wængonguī nempo nē quēwēnongā ingampa.

²⁴ Mīnitō guiquēnē, Quīnō angainō, ante wēēnēñedē mīni ēñengainō ante ñōwo godōmenque mīnitō mīmōnē entawente quēwēedāni. Māninō ante godōmenque entawēmīni inte mīnitō Itota Codito tōmengā Mæmpo Wængonguī nāna Mæmpocaya tōmēna nempo cōwē quēwenguīmīni imīnīpa.

²⁵ Mōnō imonte Wængonguī, Cōwē cæcæboimpa, ante cædinque iīmaī angacāimpa. Mīnitō wantæpiyæ cōwē wænāmaī quēwencæmīnīpa.

²⁶ Wadāni, Mīnitō incæ oda cæcæmīnīpa, ante nē cædāni iñōnānite botō mīnitō imīnite māninō ante yewæmōmopa.

²⁷ Codito tōmengā Ōnōwoca ingante do pōnongā ēwocamīnīpa. Tōmengā ingante cōwē ēwocamīni iñōmīnite wacā ædō cæte mīnitō imīnite odōmonte apænequingāā. Tōmengā Ōnōwoca incæ tōmānō ante odōmonte apænecā ēñencæmīnīpa. Ayæ tōmengā nānō odōmonte apænedō iñōmō nō pōni i ininque edæ wīi babæ āninō impa. Ininque mīnitō tōmengā mānōmaī nānō odōmonte apænedīnō baī cædinque godōmenque mönō Itota Codito nempo quēwēedāni.

²⁸ Mānōmaī beyæ botō wēñæmīni baī imīni ēñeedāni. Tōmengā nempo godōmenque quēwēedāni. Edæ, Tōmengā pongā mönō aquīōnæ mönō guīñēnāmaī ingæimpa, ante cædinque ayæ, Tōmengā ponguīōnæ mönō tōmengā weca ongōninque guingo imōnāmaī ingæimpa, ante cædinque godōmenque tōmengā nempo quēwēedāni.

²⁹ Edæ mīnitō, Itota Codito nō nānō cæte ingainō ante ēñēmīni ininque edæ mīnitō iīmaī ante adobaī do ēñēmaīmīnīpa. Quīnō waa impa, ante nē cædōnāni tōmānāni mempoga ēñagāināni inte Wængonguī wēnāni inānīpa.

3

Wængonguī wēnāni

¹ Mōnō Mæmpo Wængonguī incæ æbānō mönō imonte nangui pōni nē waadete pōnēnongā inte cægacāimpa, ante apænebo ēñeedāni. Edæ mönō imonte, Botō wēmīni imīni āmopa, ante angacāimpa. Ininque nāwangā mānimōnō imōmpa. Inguipogaque quēwēnāni iñōmō, Mōnō Mæmpo Wængonguī ingante wīi adinque pōnēnāmaī inānitapa. Mānōmaī beyæ mönō imonte adobaī adāmaī ināni inte baī pōnēnāmaī inānīpa.

² Botō nē waademīni ēñeedāni. Ñōwoyedē Wængonguī wēmō inōmō inte mönō ayæ ate æbānō baquīmōō, ante ayæ wīi edonque amōmpa. Wæætē, tōmengā nānō pōnæ mönō aquīōnæ tōmengā nānō ingaī baī mönō adobaī bacæimpa, ante ædæmō ēñēmōmpa. Edæ tōmengā æbānō ingaingā ingāā, ante mönō edonque acæimpa.

³ Edæ, Tōmengā beyænque mānōmaī bacæimpa, ante nē pōnente todāni tōmānāni, Itota Codito tæiyæ waēmō nānō ingaī baī mönō adobaī tæiyæ waēmō bacæimpa, ante nāmā incæ cædānīpa.

⁴ Nē wēnæ wēnæ cædāni tōmānāni Wængonguī nānō, Iīmaī cæedāni, ante nāni yewæmongainō ante Baa ante nē ēñēnāmaī cædāni inānīpa. Edæ wēnæ wēnæ nāni cægāinō incæ Wængonguinque ingante Baa ante nāni angainō impa. Māninō ante nō ante impa.

⁵ Mīnitō do ēñēmīnīpa. Tōmengā edæ mönō wēnæ wēnæ cægāinō ante mönō imonte, Ñimpo cæbo quēwenguīmīni, ante cæcæte ante cædinque ēñagacāimpa. Ayæ tōmengā wēnæ wēnæ cædō entawēnāmaingā ingampa.

⁶ Ayæ edæ tōmengā nempo nē quēwēnōnāni tōmānāni wīi godōmenque wēnæ wēnæ cædāni inānīpa. Godōmenque nē wēnæ wēnæ cædōnāni guiquēnē tōmengā ingante adāmaī inōnāni inte pōnēnāmaī inīnāni inānīpa tōō.

⁷ Wēñæmīni ēñeedāni. Wacā mīnitō imīnite, Wapiticæ gote oda cæquīmīni, ante nē māocæ cæcā ingante gomō aedāni. Wæætē, Quīnō waa impa, ante nē cæcā guiquēnē tōmengā Itota

Codito nö nänö cæte ingai bai adobai nö cædongä inongampa. ⁸ Nē wēnæ wēnæ cæcä guiquēnē wēnæ pæingä bai inte adocä nempo quēwengampa. Edæ wēnēñedē wēnæ awēnē nänö wēnæ wēnæ cægai bai cōwē wēnæ wēnæ cæcampa. Mänömai beyæ Wængongui Wengä iñömö wēnæ awēnē nänö wēnæ wēnæ cægainö ante wo ēwencæte ante inguipoga ponte eñagacäimpa.

⁹ Wængongui wēnāni tōmānāni wii godōmenque wēnæ wēnæ cæquināni inānīpa. Edæ tōmēmö guidimö bai minte bai cædinque Wængongui nänö quēwēnō ante da pōnongä ænīnque tōmēnāni cōwē entawente quēwēnānīpa. Tōmēnāni edæ Wængongui wēnāni inte ædö cæte godōmenque wēnæ wēnæ cæquinānīi. ¹⁰ Æcänö, Quinö waa impa, ante nö cædāmai inaa tōmengä wii Wængongui wengä ingampa. Ayæ æcänö tōmengä nänö tōniñacä ingante nē waadete pōnēnāmai inaa tōmengä adobai wii Wængongui wengä ingampa. Wængongui wēnāni ædānidö inānīi, ante ayæ, Wēnæ wēnāni ædānidö inānīi, ante mōnō mänömai beyænque edonque pōni eñēmōmpa.

Wacä ingä wacä ingä mōnō waadete pōnengæimpa, ante

¹¹ Minitö mä mini pōnēñedē mini eñengainö iūmai ante impa. Wacä ingä wacä ingä mōnō waadete pōnengæimpa. ¹² Minitö Cäinö wodi bai wii iedāni. Māningä edæ wēnæ nänö pæingä bai ingaingä inte tōmengä nänö tōniñacä ingante nāemæ wænongä wængacäimpa. Ayæ quīnante tōmengä ingante wænongacäi. Edæ tōmengä nāmā nänö cæinö wēnæ wēnæ cæinonque iñonte, Tōmengä tōniñacä nänö cæinö wæætē nö cæinonque i, ante adinque mänömai beyænque Cäinö wodi tōmengä nänö tōniñacä ingante wænongacäimpa.

¹³ Botö tōniñamini eñēedāni. Inguipogaque quēwēnāni mīnitö imīnite ancaa piināni adinque mīnitö wæætē, Quīnante piināni, ante wædāmai

iedāni. ¹⁴ Mōnō tōniñadāni inānite nē waadete pōnēmö beyænque, Mōnō nē wænguēnēmö inte mōnō wæætē mii quēwēmö imōmpa, ante edonque eñēmōmpa. Nē waadete pōnēnāmai ingä guiquēnē tōmengä iñömö mōnō wænguēnēmāmo cōwē emö cædāmai ingampa tōö. ¹⁵ Æcänö tōmengä tōniñacä ingante piina tōmengä iñömö nē wænongä bai ingampa tōö. Ayæ, Nē wænongä inongä inte tōmengä nänö wantæpiyæ wænāmai quēwenguimāmo ante ædö cæte entawente quēwenguingää, ante do eñēmīnīpa. ¹⁶ Nāwangä waadete pōnēnīnque æbānō cæquii, ante mōnō iūmai ante eñengæimpa. Edæ, Itota Codito nāmā incæ mōnō beyænque wængacäimpa, ante adinque mōnō, Mänömai waadete pōnente cæqui impa, ante eñēmōmpa. Iinīnque mōnō adobai mōnō tōniñadāni beyænque ante mōnō nāmā incæ Ao ānīnque wænguēnēmö imōmpa. ¹⁷ Māincoo nē ēacä iñömö tōmengä tōniñacä nänö quēwenguinö ante wii eyepæ ēacä acä incæte tōmengä ingante waadete cædāmai ingantawo. Edæ nē ēacä incæ ædö cæte Wængongui nänö waadete pōnēnō entawengä ingantawogaa. ¹⁸ Wēñæmīni eñēedāni. Mōnō, Wadāni inānite botö waadete pōnēmö imōpa, ante tedemö incæte wii mānīnō onōne mōnō tededö beyæ mōnō nōingä cæte waadete pōnēmö imōmpa. Wæætē edæ wadāni beyæ godö cædinque mōnō nōingä waadete pōnengæimpa.

Wængongui weca ongonte mōnō guñēnāmai ingæimpa

¹⁹ Mänömai cæmōmpa, ante adinque mōnō, Wængongui nōingä nänö angainö bai quēwēmö imōmpa, ante do eñēmōmpa. Ayæ adobai, Tōmengä weca mōnō a ongōñedē nāmā guñēnāmai incæmōimpa, ante eñēmōmpa. ²⁰ Botö pante wæquinque wēnæ wēnæ cæbopa, ante mīmōnē nāmā apænte amö incæte iūmai ante adobai eñēmōmpa. Wængongui edæ wii mōnō mīmōnē eñēnō bai

inongä inte tömengä godömenque nē ēñenongä ingampa. Ayæ tömengä tömää ēñengaingä ingampa.

²¹ Botö nē waademini ēñeedäni. Botö pante wæquinque wënæ wënæ cæbopa, ante mīmönē nāmā apænte änāmaï imö ininque mönö Wængonguï weca ongöninque guiñenāmaï imaimompa. ²² Ayæ tömengä, İmaï cæedäni, ante nänö wææ angainö ante ēñente cæmö ininque ayæ, Cæmö adinque tömengä tocæcäimpa, ante cæmö ininque tömengä ingante quiëmē beyæ ante ämö tömengä wæætē pönö cæcä æmaïmompa. ²³ Tömengä nänö wææ angainö iïmaï impa. Botö Wengä Itota Codito emöwo ante pönëedäni. Ayæ tömengä mönö imonte, Botö wææ angainö bai wacä ingä wacä ingä waadete pönëedäni. ²⁴ Mänömainö ante Wængonguï nänö wææ angainö ante nē ēñente cædäni iñömö tömënäni tömengä nempo quëwënönäni inänipa. Ayæ adobai tömënäni tömengä ingante entawënänipa. Wængonguï tömengä Önöwoca ingante pönongä ænimö inte mönö mäningä tömengä nänö pönongaiwoca beyæ, Wængonguï ingante entawëmö imompa, ante do ēñëmompa.

4

Æcänö önöwoca ingante ewocadäni, ante

¹ Botö nē waademini ēñeedäni. Wadäni, Wængonguï Önöwoca incæ mönitonga pö guicä ininque ewocamöni imönipa, ante nē änäni incæte mīnitö wīi tömënäni nāni änö pönëedäni. Wæætē, Tömënäni önöwoca Wængonguï weca owodinique pöwocacantawo, ante ēñencæte ante apænte aedäni. Edæ Wængonguï beyænque nē apænemönipa, ante nē babæ anewënönäni nanguï inäni imæca quëwënäni weca godänipa. ² Mīnitö edæ, Mäniwoca näwangä Wængonguï Önöwoca ingantawoo, ante ēñencæte ante iïmaï ante edonque pönī ēñencæminimpa. Edæ,

Itota Codito Waocä ēñate pongaingä ingacäimpa, ante änäni adinque mīnitö, Tömënäni tömänäni Wængonguï weca nē pöwocacä ingante nē ewocadäni inänipa, ante ēñencæminimpa. ³ Wæætē Itota ingantedö ante adodö ante nē änāmaï inäni guiquënë tömënäni tömänäni edæ Wængonguï weca pöwocacä ingante ewocadāmaï inänipa. Tömënäni nāni nē ewocadongä iñömö tömengä, Itota Codito Waocä ēñate pongaingä ingacäimpa, ante änāmaï ingampa. Mäningä iñömö Codito ingante nē piinte cædongä iñömö tömengä poncæcäimpa, ante mīni nē ēñëningä ingampa. Nöwoönæ incæ tömengä do inguipoga mönö quëwëñömö iñömö pongä ataqueedäni.

⁴ Wëñæmīni ēñeedäni. Wadäni, Codito ingante nē piinte cædönäni iñönänite mīnitö Wængonguï quimīni imīni inte godömenque tæi emömīni iminipa. Edæ Wængonguï Önöwoca mīni nē ewocadongä iñömö tömengä godömenque nanguï tæi emongä iñongante wënæ inguipogaque quëwënäni nāni nē ewocadongä guiquënë wædænque tæi emongä ingampa. İninque mīnitö mäninäni nē babæ anewënönäni inänite Baa ante cædinque godömenque tæi emömīni inte gänä cædimīni iminipa.

⁵ Mäninäni inguipoga beyænque quëwënäni inte mänömaï beyæ inguipoga quëwënäni nāni pönente änö bai tededäni iñönänite inguipogaque ante quëwënäni adodäni inte tömënäni inänite ēñënanipa töö. ⁶ Mönitö Wængonguï quimöni imöni iñömönite, Wængonguï ingante nē ate pönengä iñömö tömengä mönitö imönite ēñengampa. Wæætē Wængonguï wengä ināmaï inongä guiquënë tömengä mönö imonte ēñënämaï ingampa. Mänömaï iñinque edæ waocä adocanque önöwoca nöingä angä ingante ewocadongä incæ wacä önöwoca babæ angä ingante ewocadongä incæ mönö mäninö beyænque, Æwocadö iï, ante edonque pönī ēñëmompa.

Wængonguī waadete pönengaingä inte

⁷ Botö nē waademini ēñēdāni. Mönö wacā ingä wacā ingä waadete pönengæimpa. Edæ mönö waadete pönönö incæ Wængonguī nänö da pönongainö impa. Tömänāni, Nē waadete pönänāni iñömö Wængonguī wēñænāni nāni mem-poga ēñagaincabo inönāni inte Wængonguī ingaingä ingante ate bai pönänānipa. ⁸ Wæætē nē waadete pönänāmaī ināni guiquēnē tömēnāni Wængonguī ingante wīi ate bai pönänāni inānipa. Edæ Wængonguī nē waadete pönengaingä ingampa. ⁹ Mönö imonte Wængonguī nänö waadete pönēmāmo iīmaī cæte odömongacäimpa. Tömengä edæ, Botö Wengä beyænque quēwencæminimpa, ante cædinque tömengä Wengä adocanque ingante inguipoga mönö quēwēñömö da pönongä pongacäimpa. ¹⁰ Æbänö waadete pönenguīi, ante iīmaī impa. Mönö wīi Wængonguī ingante waadete pönēnimö imompa. Wæætē tömengä mönö imonte waadete pönengä ingaingä ingampa. Ayæ, Mönö wēnæ wēnæ cægainö ante mönö imonte Wængonguī pīināmaī incæcäimpa, ante idægoidi cæningä ingante wænönāni nänö wængai bai Wængonguī adobai mönö wēnæ wēnæ cægainö beyænque tömengä Wengä ingante da pönongä pöninque mönö beyæ wæætē wængacäimpa.

¹¹ Botö nē waademini ēñēdāni. Wængonguī edæ mönö imonte mänömaī nē waadete pönengaingä ingampa, ante adinque mönö adobai wacā ingä wacā ingä waadete pönenguēnēmö imompa. ¹² Mönö waocabo tömämö Wængonguī ingante cöwē adāmaī imompa. Incæte mönö wacā ingä wacā ingä waadete pönēmö ininque Wængonguī ingante entawente quēwēmaimompa. Ayæ adobai wacā ingä wacā ingä waadete pönēmö ininque tömengä pönö cæcä beyænque mönö tömengä nänö waadete

pönönö ante eyepæ entawente quēwēmompa. ¹³ Mönö tömengä nempo quēwēmö inte tömengä ingante adobai mönö entawente quēwēmompa. Wængonguī tömengä Önöwoca ingante mönö imonte pönongä ængamöimpa. Mänömaī beyæ mönö mäninö ante do ēñēmompa. ¹⁴ Mæmpo Wængonguī tömengä Wengä ingante äninque, Inguipoga quēwēnāni tömänāni inänite bitö æmi beyænque quēwenguināni, ante cæcæbiimpa, ante da pönongä pongantapa. Pongä adinque mönitö nē adimöni inte wadāni inänite mäninö ante apænemöni ēñencædänimpa. ¹⁵ Æcänö, Itota Codito Wængonguī Wengä ingaingä ingampa, ante äna iñömö tömengä Wængonguī ingante entawente quēwengampa. Tömengä adobai Wængonguī nempo quēwengä ingampa.

¹⁶ Ayæ mänii beyæ Wængonguī mönö imonte waadete pönengampa, ante mönö nē ēñēnömö inte edæ ædæmö pönēmö imompa. Wængonguī iñömö nē waadete pönengaingä ingampa. Tömänāni nē waadete pönente quēwēnāni iñömö tömēnāni Wængonguī nempo quēwēnānipa. Wængonguī ingante adobai tömēnāni entawente quēwēnānipa. ¹⁷ Wængonguī nänö waadete pönönö ante ædæmö entawēmö ininque mönö godongämæ waadete pönēmö beyæ tömengä apænte anguiönæ iñonte guiñēnāmaī inguimö imompa. Edæ Mæmpo Wængonguī nempo Itota nänö quēwengai bai mönö imæca quēwēninqe adobai quēwēmö inte mänifēdē guiñēnāmaī inguimö imompa. ¹⁸ Nē waadete pönengä iñömö tömengä guiñēnāmaī ingampa. Wæætē edæ tömengä nänö waadete pönönö æmæwo pæte bai eyepæ ba ininque tömengä nē waadete pönengä inongä inte ædö cæte guiñenguingää. Nē guiñengä guiquēnē tömengä nänö pante wæwenguinö incæ do pante bai wæwengä ingampa. Tömengä nänö waadete pönönö ante wīi eyepæ ba

īninqe tōmengä æmæwo pædāmaī bai ingampa.

¹⁹ Wængonguī edæ mōnō īmonte tāno waadete pōnengacāimpa. Mānōmaī beyæ mōnō wæætē waadete pōnēmō īmōmpa. ²⁰ Botō Wængonguī ingante nē waadete pōnēmō īmōpa, ante nē angä īñōmō tōmengä wæætē tōmengä tōniñacā ingante nē pūinte ingä īninqe tōmengä babæ ānewēnongä ingampa. Edæ māningä nānō tōniñacā ingante nē adingä incæ tōmengä ingante waadete pōnēnāmaī ingä incæte adocā Wængonguī ingante nē adāmaī īningä incæ ædō cæte tōmengä ingante waadete pōnenguingää. ²¹ Ayæ, īimaī cæedāni, ante Itota Codito mōnō īmonte īimaī angacāimpa. Tōmāmīni Wængonguī ingante nē waadete pōnēmīni inte mīnitō tōniñadāni īnānite adobaī waadete pōnengūēnēmīni īmīnīpa.

5

Inguipogaque nāni quēwēnō ante mōnō Baa angæīmpa

¹ Tōmānāni Itota ingantedō ante, Mōnō Codito ingaingä ingampa, ante nē pōnēnāni inte Wængonguī wēnāni nāni mempoga ēñagāincabo īnānīpa. Ayæ tōmānāni Mæmpocā ingante nē waadete pōnēnāni īñōmō tōmēnāni adobaī tōmengä Wengä ingante waadete pōnēnānīpa. ² Mōnō Wængonguī wēnāni īnānite waadete pōnēmō īmōō, ante ēñencæte ante īimaī ante do ēñēmōmpa. Wængonguī ingante waadete pōnēmō īninqe ayæ tōmengä, īimaī cæedāni, ante nānō wææ angāinō ante ēñente cæmō īninqe mōnō, Nē waadete pōnēmō īmōmpa, ante ēñēmāimōmpa. ³ Wængonguī ingante mōnō waadete pōnēnō īñōmō īimaī ante impa. Wængonguī, īimaī cæedāni, ante nānō wææ angāinō ante mōnō ēñente cæcæīmpa. Edæ mānīnō ante, īimaī cæedāni, ante nānō wææ angāinō ante ēñente cædinque mōnō wīī teēmē mongænte bai baquinque cæmōmpa. ⁴ Edæ

Wængonguī wēmō mempoga mōnō ēñagāincabo īñōmō mōnō tōmāmō inguipogaque ante nāni quēwēnō ante Baa āninqe godōmenque tæī ēmonte gānā cæmōmpa. Inguipogaque ante nāni quēwēnō ante mōnō godōmenque tæī ēmōmāmo īñōmō īimaī ante impa. Wængonguī ingante mōnō wede pōnēnō beyænque mōnō godōmenque tæī ēmōmō inte gānā cæmōmpa. ⁵ Inguipogaque ante nāni quēwēnō ante Baa ancæte ante æcānō godōmenque tæī ēmongä inte gānā cæcantawoo. Edæ Itota Wængonguī Wengä ingaingä ingampa, ante nē pōnenganque tōmengä godōmenque tæī ēmōnongä ingampa.

Wængonguī Wengä ingantedō ante nō ante impa

⁶ Nē æpænē guīte pongaingä īñōmō nāmā wepæ petæ petæ wæænte nē gogaingä īñōmō māningä īñōmō Itota Codito īnongä ingacāimpa. Tōmengä wīī æpænenque inte pongacāī wæætē æpænē inte ayæ nāmā wepæ inte pongacāīmpa. Ayæ Wængonguī Ōnōwoca incæ tōmenganque mānīnō ante, Nō ante impa, ante nē apænegā ingacāīmpa. Edæ Wængonguī Ōnōwoca nē nōingä īnongä ingampa. ⁷ Edæ mēa go adoque īnāni mānimpodāni, Nō impa, ante apænete bai nē ānāni īnānīpa. ⁸ Edæ Wængonguī Ōnōwoca incæ æpæ incæ wepæ incæ mēa go adoque mānimpodāni incæ, Nō impa, ante nē apænedāni mæ ōñōmpa. Mānimpodāni īñōmō quīēmē āninqe adodō ante nē apænedāni īnānīpa. ⁹ Quīēmē ante waocā incæ, Nō impa, ante nānō apænedīnō ante do ēñēmōmpa. Quīēmē ante, Nō impa, ante Wængonguī nānō apænegāinō guīquēnē godōmenque waa pōnī impa. Edæ Wængonguī tōmenganque nānō apænegāinō impa. Edæ tōmengä Wengä ingantedō ante Wængonguī, Nō pōnī impa, ante nānō apænegāinō impa tōō. ¹⁰ Æcānō Wængonguī Wengä onguīñængä ingante nē wede pōnēna īñōmō tōmengä, Nō impa,

ante Wængonguï nänö apænegainö ante entawente quëwengampa. Wæætë edæ æcänö Wængonguï nänö apænegainö ante wii pönëna guiquënë tömengä Wængonguï ingantedö ante, Babæ ängongä ingänö, ante në angä ingampa. Edæ Wængonguï tömengä Wengä ingantedö ante, Nö impa, ante nänö apænegainö ante mäningä iñömö pönënamai ingampa töö. ¹¹ Ayæ mäninö ante tömengä, Nö impa, ante nänö apænegainö ante iimai ante impa. Mönö imonte Wængonguï, Mini wantæpiyæ cöwë quëwenguinö, ante pönongä æntamompa. Mäninö mönö quëwenguinö ante tömengä Wengä në quëwëngongä inte mönö imonte pönongä ænimö inte entawente quëwëmompa. ¹² Tömengä Wengä nempo në quëwengä iñömö tömengä wantæpiyæ nänö quëwenguinö do entawente quëwengampa. Wængonguï Wengä nempo në quëwënamai ingä guiquënë tömengä wæætë wantæpiyæ nänö quëwenguinö ænämai ingampa.

Wäö iñque nänö angainö

¹³ Minitö Wængonguï Wengä ëmowo ante në pönëmini iñöminite botö mäninö ante yewæmomo aedäni. Minitö edæ wantæpiyæ cöwë mini quëwenguinö do entawente quëwëmini iñöminite botö, Eñencæminimompa ante yewæmömopa.

¹⁴ Iimai beyænque Wængonguï weca guïñënamai pömö imompa. Mönö quiëmë æncæte ante tömengä ingante apænedinque tömengä nänö äno bai ante apænemö iñinque tömengä mönö imonte eñëmaingampa. ¹⁵ Ayæ, Mönö imonte në eñëngongä ingampa, ante eñëmö iñinque mönö, Quiëmë ante apænemö eñëninque tömengä mäninö mönö äninö ante do pönongä æmö imompa, ante eñëmaimompa.

¹⁶ Minitö mini tönñacä wënæ wënæ cæcä incæ wii tömengä nänö æmæwo wænguinque wënæ wënæ cæcä aminitawo. Mänömai cæyongante në adingä iñömö

mäningä beyæ ante Wængonguï ingante apænegainö. Apænegä eñëninque Wængonguï tömengä ingante wantæpiyæ nänö quëwenguinö pönongä æncæcäimpa. Edæ pancadäniya wënæ wënæ nani cædincoo mongænäni incæ wii tömënanäni nani æmæwo wænguinque wënæ wënæ cædänipa, ante botö mäninänique iñantedö ante apænebopa. Wæætë edæ waocä Wængonguï Tæiyæ Waëmö Önöwoca ingante ancaa Baa Baa äninque tömengä nänö æmæwo wænguinque në wënæ wënæ cæcä ingampa. Iñinque botö, Mänömai Baa äninque në wënæ wënæ cædingä beyæ ante Wængonguï ingante apænegainö, ante änamai imopa. ¹⁷ Quiëmë wiwa cæmö mäninö tömänö wënæ wënæ mönö cædö impa. Wæætë wënæ wënæ cæmö incæte wii tömänö mönö wënæ wënæ cædö beyæ mönö në wængüenëmö bamompa. Pancaa beyænque në wængüenëmö bamompa.

¹⁸ Wængonguï wënäni nani mem-poga eñagancabo iñömö godömenque wënæ wënæ cædämai iñänipa, ante eñëmompa. Edæ Wængonguï Wengä eñagangä inte tömënanäni iñänite wæcædongä ingampa. Ayæ wënæ incæ tömënanäni iñänite gampodämai iñongä ingampa. ¹⁹ Wængonguï wëmö imö imompa, ante eñëmompa. Wæætë wadäni edæ inguipogaque ante në quëwënanäni guiquënë tömënanäni wënæ awënë nempo quëwënanäni, ante eñëmompa. ²⁰ Wængonguï Wengä do pongä ingacäimpa. Ayæ Wængonguï në nöingä ingaingä ingante ate bai pönencæminimompa, ante cædinque tömengä mönö imö pönö odömongä ate eñëmompa. Tömengä mänömai cæcampa, ante adobai eñëmompa. Ayæ tömengä në nöingä ingaingä iñongante mönö tömengä Wengä Itota Codito nempo quëwëmompa. Itota Codito nö Wængonguï ingaingä ingampa. Ayæ tömengä wantæpiyæ cöwë në quëwengä ingaingä inte pönö cæcä beyænque mönö adobai

wantæpiyæ quëwëmö imompa. ²¹ Botö
wëñæmini bai imini ëñëedäni.
Wadäni, Mönitö wængonguüidi impa,
ante näni cönönincoo weca godämaï
iedäni, ämopa. Mäninque ante
yewæmömopa.

2 Wäo cadota ante nänö ayænta yewæmongainta

*Nöinö mönö änö ante ayæ mönö
waadete pönönö ante*

¹ Minitö Wængongui ingante mini pönencabo iñöminite botö nê aabo Picæmo mini änömo inte yewæmömopa. Minitö badä nani wencabo bai iñöminite tömengä minitö iminite apænte ængacäimpa. Botö minitö iminite nö waadete pönëmopa. Wii botonque waadete pönëmini inte wæætê mönö Codito nöingä nänö waa pöni angainö ante nê eñëninäni adobaï tömënäni tömänäni nani nê waadete pönëmini iñöminite yewæmömo aedäni. ² Edæ mönö nê Nöingä nänö waa pöni angainö ante entawente quëwëmö inte mönö cöwê ñimpo cædämaï entawencæmöimpa. ³ Nê Mæmpocä Wengä Itota Codito tönö Mæmpo Wængongui tömëna godongämæ waadete pönö cædinque, Quëwencæminimpa, ante mönö imonte waadete waa cæda beyænque mönö gänê entawencæmöimpa. Inique mönö nê nö pönëmö inte mäninö ante cöwê entawente quëwënömö inte mönö wacä ingä wacä ingä waadete pönëmö incæmöimpa.

⁴ Mæmpo Wængongui mönö imonte nänö, Iïmaï cæedäni, ante nänö wææ angainö bai eñente cædinque mini pönencabo iñömini botö, Pancadäniya nöinö cægonte bai quëwënänipa, ante eñëniimo inte nanguï tobopa. ⁵ Nöwo iñömö minitö iminite ämo eñëedäni. Minitö Wængongui ingante mini pönencabo iñömö wacä ingä wacä ingä waadete pönëedäni ämopa. Botö ñowo mänömaï äninque wii tömëmo wææ änö ante yewæmömopa. Wæætê Awënë do wææ nänö angainö ante wëenëñedê mönö eñente ængainö ante adodö ante yewæmömo aedäni. ⁶ Nê pönënäni inänite mönö waadete pönönö iïmaï impa. Mönö

Codito, Iïmaï cæedäni, ante nänö wææ angainö ante eñente cædinque mönö quëwengæimpa. Minitö wëenëñedê do mini eñëninö bai wææ äninque tömengä, Minitö cöwê waadete pönente quëwëedäni, angacäimpa.

*Waadäni oda cæcædänimpa, ante nê
cædäni*

⁷ Waadäni edæ oda cæcædänimpa, ante nê cædäni nanguï inäni iïmæca quëwënäni weca gote mæ ongönänimpa. Mäninäni iñömö Itota Codito Waocä eñate pongaingä ingampa, ante änämaï nê inäni inänipa. Æcänö tömënäni bai nê ingä, Waadäni edæ nani oda cæquinque, ante nê cæcä ingampa. Ayæ, Botö Codito imopa, ante Codito ingante piinte cædongä ingampa. ⁸ Minitö iñömö nämä wææ aedäni. Quiëmê cæcæte ante mini cædinö ante minitö, Wê womönämaï ingæimpa, ante cædinque wææ cæedäni. Wæætê mini cædinö beyæ Wængongui nänö pönonguincoo tömancoo eyepæ pönongä æncæte ante cæedäni.

⁹ Nê pönengä Itota Codito nänö odömönte apænægainö ante nê eñëningä incæ wii godömenque eñente cædinque wadö ante wadæ gocä iñömö tömengä ædö cæte Wængongui tönö godongämæ quëwenguingä. Wæætê Itota Codito nänö odömönte apænægainö ante godömenque nê eñente cædongä iñömö tömengä iñömö Mæmpocä tönö ayæ tömengä Wengä tönö godongämæ quëwengampa. ¹⁰ Wacä minitö weca pöninque mäninö Codito odömönte apænedinö ante odömönte apænedämaï ingampa, ante adinque minitö tömengä ingante, Botö oncönê pö guiie, ante änämaï iedäni. Ayæ, Waa quëwente pömi, ante änämaï iedäni. ¹¹ Edæ adocä ingante æcänö, Waa quëwente pömi, ante äna tömengä mäningä wënæ wënæ cæyongante tömengä tönö guëa cæte bai cæcampa.

Wäo iinque nänö angainö

¹² Botö mīnitō īmīnite godōmenque nanguī äinente wæbo incæte mincay-onta inte wentamömæ yewæmöimæ inte wīi yewæmōinēmopa. Wæætē mīnitō weca ēñacæ pōinēmo īmopa. Ayæ mīnitō tōnō awincadō awinca adinque botō apæneinēmo īmopa. Mänōmaī cædinque botō, Mönō godongämæ eyepæ pōnī watapæ tocæmöimpa, ante cæbopa. ¹³ Mōnitō tōniñamīni ēñēedāni. Wængonguī ingante mōni pōnencabo tōmengā nānō nē ængaimōni inte mōnitō iñōmō mīni pōnencabo iñōmīnite, Waa quēwēedāni, ämōnipa, ante yewæmömopa.

3 Wäo cadota ante nänö tömanta yewæmongainta

Gayo ingante Wäo nänö waa apænedö

¹ Gayo botö nê waadebi eñëmi. Bitö botö nê nö waadete pönëmi iñömite botö nê aabo Picæmo mini änömo inte, Acæbiimpa, ante yewæmömopa.

² Botö nê waadebi eñëmi. Tömëmi önöwoca incæ waa ewocate quëwëmi bai bitö baonga adobai waa eñabi quëwencæbiimpa, äninque ayæ, Bitö quëwenguinö ante bitö cöwë waa pönï quëwencæbiimpa, ämopa.

³ Mönö tönïñadäni pancadäniya iñömö pöninque, Gayo iñömö Itota Codito nö pönï nänö angainö ante cöwë nö pönëninque cæcampa, ante apænedänitapa. Ayæ, Gayo ñöwo godömenque nöinö cægonte bai quëwengä ingampa, ante apænedäni eñëninque nanguï pönï totabopa.

⁴ Botö wëmini bai imini iminitedö ante, Itota Codito nö pönï nänö angainö bai tömënäni nöinö cægonte bai quëwënäni inänipa, ante apænedäni eñëninque botö godömenque watapæ toquinque impa.

⁵ Botö nê waadebi eñëmi. Mönö tönïñadäni incæ bitö nê tæcæ adinäni inäni incæte bitö quïnö tömënäni beyæ ante cædinque cöwë pönëninque ædæmö cæbi imipa.

⁶ Codito ingante godongämæ möni pönencabo iñömönite mäninäni wæætë, Gayo nê waadete pönengä ingampa, ante mönitö imönite apænedäni eñëntamönipa. Tömënäni Wængonguï ingante nê cædäni inänipa cæbii. Bitö tömënäni inänite godö cæbi æninque gomonga godäni ininque waa imaimpa.

⁷ Edæ tömënäni iñömö Itota emöwo beyænque tao godänitapa. Mänömai goyönänite nê eñënämai cædäni dicæ pönönäni ænänitawogaa.

⁸ Mänömai beyæ mönö Wængonguï nöingä nänö angainö ante tömënäni tönö godongämæ cæcæimpa, ante

cædinque mäninäni bai inäni mönö oncö pönäni adinque mönö, Pö guiite cænte möedäni, angüenëmö imompa.

Diotedepeto tönö Deëmetedio

⁹ Codito ingante mini pönencabo iñömönite botö munitö iminite do yewæmontabopa. Incæte Diotedepeto iñömö, Botö nê awënë imopa, ante nê cæinënongä inte mönitö imönite Baa äninque nänënë cæcä ingampa.

¹⁰ Munitö weca botö pöninque tömengä quïnö nänö cædö ante edonque pönï apænebo eñencæminimpa. Edæ tömengä mönitö imönitedö ante önönquedö ante wënæ wënæ apænecampa. Ayæ mäninö ante wii eyepæ impa, ante pönente ingä ininque tömengä edæ mönö tönïñadäni pönäni adinque, Pö guiite cænte möedäni, änämai ingampa töö. Wadäni guiquënë, Pö guiite cænte möedäni, ancæte ante nê cæinënäni inänite tömengä adobai, Cædämai iedäni, ante wææ angä ingampa. Ayæ mänömai cædäni adinque tömengä, Mönitö Codito ingante möni godongämæ pönencabo iñömönite munitö gobæwedäni, angampa cæbii.

¹¹ Botö nê waadebi eñëmi. Quïnö wënæ wënæ i adinque bitö adodö cædämai ie. Wæætë quïnö waa i adinque adodö cæe. Quïnö waa impa, ante nê cædäni iñömö Wængonguï wënäni inänipa. Quïnö wënæ wënæ impa, ante nê cædäni guiquënë Wængonguï ingante adämai inänipa.

¹² Deëmetedio ingantedö ante tömänäni waa apænedänipa. Wængonguï nöingä nänö quëwënö bai Deëmetedio adobai nöinö cæte quëwënongå ingampa, ante acæimpa. Mönitö adobai tömengä ingante ante waa apænemöni imönipa. Ayæ tömengä ingantedö mönö äninö nö impa, ante do eñëmipa.

Wäo iinque nänö yewæmongainö

¹³ Munitö iminite godömenque nanguï äinente wæbo incæ yewæmöingö inte wentamömæ yewæmöimæ inte wii yewæmöinëmopa.

¹⁴ Wæætë bitö weca wantæ iñö pöninque botö

aïnemo ïmopa. Pömo ate botö bitö
tönö awincadö awinca adinque
apæñecæmönaimpa.

¹⁵Bitö piyænë cæte quëwencæbiimpa,
ämopa. Mönö æmigoidi iñömö
quëwënäni bitö ïmite, Waa quëwencæbiimpa,
ante apæñedänimpa. Mönö æmigoidi
bitö weca quëwënäni tömänäni ïnänite
wæætë bitö adocanque ingante
adocanque ingante apæñedinque,
Waa quëwencæbiimpa, ante botö beyæ
apæñebi ëñencädänimpa, ämopa.
Mäninque ante yewæmömopa.

Codaa cadota ante nānō yewæmongainta

*Waa quēwencæminimpa, ante Codaa
yewæmongampa*

¹ Botō Itota Codito ingante nē cædōmo inte Tantiago tōniñabo Codaabo inōmo imopa. Mæmpo Wængonguī mīnitō imīnite waadete pōnēnīnque aa pecā pōmīni inīnque mīnitō Itota Codito nempo nē ongōmīni iñōmīnite botō, Acæmīnimpa, ante yewæmōmopa. ² Wængonguī waadete pōnō piyænē cæcā inīnque mīnitō tōmēngā nānō gānē entawēnō ædæmō entawēnīnque nangūi waadete pōnente waa cæte quēwencæmīnimpā ante yewæmōmopa.

*Babæ ante nē odōmonte apænedāni
(2 Pegodo 2.1-7)*

³ Botō nē waadedōmīni ēñēedāni. Botō, Codito ængā beyænque mōnō quēwēmāmo æbānō ī, ante quingā yewæmoncæte ante cæyōmote wadāni wēnæ wēnæ cædāni ate wædinque botō, Mīnitō wææ cæedāni, ante yewæmonguēnēmo batabopa. Wængonguī quīmō iñōmonte tōmēngā iñōmō, Wede mīni pōnēnō ante pōnōmo ænīnque mīnitō cōwē wææ aedāni, ante æmæwo pōnī pædæ pōnongā ænte entawēmompā. Inīnque botō wæætē, Wede mīni pōnēnō ante wææ cæcæmīnimpa, ante yewæmonguēnēmo intabopa. ⁴ Wængonguī, Botō imote nē Baa ānāni nāni pante wæquinque wentamō mongæñānipa, ante tōmēnāni inānite apænte ānīnque pīngampa, ante do yewæmongatimpa. Tōmēnāni iñōmō mīnitō weca do awēmō pōnānipa cæmīni. Wængonguī pōnō waadete nānō cægāinō ante tōmēnāni wapiticæ cædinque, Mīnitō baonque towenque mīni cæinēnō ante ōnonque cæcæmīnimpa, ante cædinque Wængonguī waadete pōnō cæcampa, ante babæ ante odōmonte

apænedānipa. Ayæ Itota Codito adocanque mōnō Tæiyæ Awēnē iñongante tōmēnāni iñōmō tōmēngā ingante Baa ānānipa.

⁵ Mīnitō wæætē tōmānō ante ēñēnīmīni iñōmīnite botō, Do mīni ēñēnīnō ante wæætē wæætē adodō ante pōnencæmīnimpa, ante cædinque adodō ante yewæmoncæ cæbo aedāni. Dodāni Equitobæ quēwēñōnānite mōnō Awēnē ænte māocā godāni ate tōmēngā nē wede pōnēnāmaī ināni inānite edæ, Ōmæe, ante capo wænongā wængadānimpa.

⁶ Ayæ anquedoidi nē awēnēidi inōnāni incæ pancadāniya tōmēnāni nāni aagāinō incæ ñimpo cædinque tōmēnāni nāni quēwēngaiñōmō emō cædinque wadæ gogadānimpa. Adīnque Wængonguī, Botō apænte inīnque bayonte tōmēnāni inānite botō pancæboimpa, ante ñōwo iñōmō gæguincamenca wodāmaī inguimenca tæi goti wīnīnque tōmēnāni inānite wēmō iñōmō mangui tee mōnete wææ cæcampa. ⁷ Ayæ Todōmā iñōmō quēwēngāināni tōnō Gōmoda iñōmō quēwēngāināni eyequei godongāmæ nāni quēwēngāincabo nāni quēwēngāincabo tōnō adobaī wēnæ wēnæ cædinque nānōogængā ināmaī iñongante godō mōnīnque ayæ godōmenque quingāmē baī wīwa tote quēwēngadānimpa. Mānōmaī cæte quēwēnāni ate Wængonguī angā gonga wææ tī wocæno gonte æmæwo wængadānimpa. Mānōmaī godō pangā nāni wængāi baī ante odōmōnīnque Wængonguī, Nē wēnæ wēnæ cædāni adobaī gonga cōwē yædæ yædæ bæcōyōmō caate wæquīnānidō anguēnē, ante mōnō imonte odōmoncæte ante cægacāimpa.

⁸ Ayæ wīimonte baī mā pōnente nē odōmonte apænedāni iñōmō ñōwo mīnitō weca pōnīnque dodāni nāni cægāi baī adobaī pōnī cædānipa. Wīwa cædinque tōmēnāni wentamō mongænte baī edæ baō ñōmænguī ēñādānipa. Awēnēidi inānite edæ Baa ānānipa. Ayæ anquedoidi ōnædē ñāō iñōmō quēwēnāni inānite edæ

babæ äninque wënæ wënæ ante tedewënänipa. ⁹ Incæte anquedo awënë Miiiguedo incæ tömënäni püinte nani tedewënö bai adobaï tededämaï ingacäimpa. Möitee wodi baö ini adinque anquedo Miiiguedo tönö wënæ awënë iñömö edæ, Æbänö cæquüi, ante guëadö guëa angadairopa. Äñöñate Miiiguedo iñömö, Botö nê apænte anguënëmo imopa diyæ anguimoo, ante pönëninque guifente wædinque wënæ awënë ingante, Wënæ wënæ cæbipa töö, ante püinte änämaï ingacäimpa. Wæætë, “Wængongui incæ bitö imite Baa angä ëñencæbiropa,” angacäimpa. ¹⁰ Nöwodäni iñömö tömënäni adämaï inte nani ëñenämaï inönö ante edæ püinque do wiwa tedewënänipa. Wæætë babæidi nani ëñenonque ante ëñëninque tömënäni mäninonque ante nani cædö beyæ wænte nani ñömænguinque godömenque quingämë bai cædänipa.

¹¹ Tömënäni edæ nani Ca ca wæquinque baquinö anguënë. Cainö wodi nänö gogainö incæ edæ do godänipa. Ayæ Badäo wodi, Nanguï æncæboimpa, ante cædinque tömengä nänö oda cægainö incæ tömënäni iñömö adodö ante pogodo godinque, Godömenque nanguï æncæboimpa, ante oda cædänipa. Ayæ Codee wodi, Awënëidi inänite wido cæcæimpa, ante nänö cægainö bai cædinque ñöwodäni nani wænguinque adobaï cædänipa.

¹² Minitö waadete pönëninque godongämæ ponte cæñömini iinäni iñömö guifënëmaï inte adoyömö ponte cænänipa. Minitö tönö godongämæ ongönäni beyænque mini cabo wentamö baate bai emömini awædö. Tömënäni, Nê aawëmöni imönipa, ante babæ apænedinque nê cæninäni bai inäni inänite pædæ godönämaï inäni inte tömënanique ade cænte bai cædinque wii nöinö ante odömönte apænedänipa töö. Ayæ waodäni, Cöönæ cæ tobairopa, ante wæyönänite boguimancoo cöönæye emöñonte woboyæ pö wido cæ bai

cædinque tömënäni nani, Pönömöni æncæminimpa, äninö ante pönönämaï inte edæ babæ cædänipa. Ayæ awæ incayedë ömæcawæ i adinque do bæ wite mempoga wænüwæ bai inäni inte tömënäni mempoga wænte bai inäni inte, Pönömöni cæncæminimpa, ante nê babæ änewënäni inänipa. ¹³ Ayæ gäwapæno tadömengadæ ompota öñöñö mængonta mængonta cædinque ompota yabæ tayönöi edonque öñö ai bai tömënäni wiwa cæyönäni wentamö nani entawënö adobaï edonque pönü ongö acæimpa. Ayæ nëmö adodonque goquënë incæ oo tobæ wæænte wëmö ba bai tömënäni adobaï oda cæte wapiticæ godäni inte edæ tömënäni nani cöwë tadämaï wæwenguinque mæ mämönte bai iñömö edæ godäni inänipa.

¹⁴ Ayæ Adäo wodi nänö mömoidi wææ nänö mömoidi wææ nänö mömocä ingaingä inte Ænoco iñömö tömengä Wængongui beyæ apænedinque dodäni babæ ante nê odömönte apænedäni inänitedö ante iimainö ante apænegacäimpa. “Mönö Awënë pongä apa quëwënänii. Ayæ tömengä quinäni tæiyæ wæmö inäni adobaï müido ganca mänimpodäni pöñönänite adopo adopo edæ pö pö cædinque önompo tipæmpoga mänimpoga pönäni inte bacoo inäni mönö Awënë tönö godongämæ poncædänipa. ¹⁵ Tömengä mänömaï pöninque edæ tömämö imönte apænte ancæcäimpa. Wængongui ingante nê Baa änäni inänite tömengä, Minitö mini wæwente baquinque botö imöte Baa äninque edæ ëñënëmaï cæminipa töö, ancæcäimpa. Ayæ, Mini nê Baa änoncabo inömini inte minitö mini wæwente baquinque edæ botö imöte püinte äninque wiwa äminipa. Ämo ëñëmaïminipa, ante edonque apænecæte ante mönö Awënë poncæcäimpa.” Mänömainö ante Ænoco wodi wëenëñedë pönü angacäimpa. ¹⁶ Nöwodäni æbämë cædäni incæ nê babæ ante odömönte apænedäni iñömö, Quimæ quëwëë, ante püinque piyænë cædämaï

inānīpa. Taadō ante tōmēnāni nāmā nāni cæinēwēnonque ante tee empote godānīpa. Botō godōmenque waa pōnī cæbo aedāni, ante nāmā ængō cædinque tedewēnānīpa. Ayæ, Wadāni mōnitō wædō ante pōnō cæcædānīpa, ante babæ cædinque tōmēnāni wadāni inānīte waa ate bai tededinque waa pōnī cæte bai godō apænedānīpa cæmīnī.

Nē pōnēmīni iñōmō iīmaī cæcæmīnīpa, ante

¹⁷ Mīnitō guiquēnē botō nē waademīni ēñēdāni. Mōnō Awēnē Itota Codito nānō nē da godongaināni incæ, Æbānō baquīi, ante nāni apænegainō ante iīmainō ante pōnēdāni. ¹⁸ Tōmēnāni iñōmō mīnitō iīmīnīte apænedinque, “Wodo iīmæca iīnque bayonte edæ wadāni nāmā nāni toinēwente godōnō ante goquīnāni incæ Wængonguī ingante Baa ante badete toquīnāni inōnāni inte edæ do poncædānīpa,” ante apænedāni ēñēmīnītapa. ¹⁹ Iīnāni nē badete todāni iñōmō Wængonguī Ōnōwoca ingante ēwocadāmaī ināni inte edæ nāmā nāni cæinēnō ante ēñente cædānīpa. Mīnitō adocabomīni iñōmīnīte tōmēnāni, Nānēneto nānēnē gocæmīnīpa, ante cædinque pā cæte bai cædāni inānīpa.

²⁰ Botō nē waadedōmīni edæ iīmaī cædāni. Mīnitō mōnō Tæiyæ Waēmō pōnī inongā ingante wede pōnēmīni inte mānīnō mīni wede pōnēnō incæ dica tæi gō cæte ongonca bai impa. Ante adinque mīnitō oncō dicaboga mænonte bai edæ tæi piñæninque godōmenque cædāni. Ayæ Wængonguī Tæiyæ Waēmō Ōnōwoca ingante ēwocadinque mīnitō, Tōmengā æbānō angāā, ante ēñēninque mānīnonque ante Wængonguī ingante apæneedāni. ²¹ Mīnitō, Mōnō Awēnē Itota Codito pōnō waadete waa cæcā beyænque mōnō wænāmaī inte cōwē wantæpiyæ quēwengæimpa, ante æncæte ante wānō cōmīnitawo. Iīnīnque Wængonguī nē waadete pōnengā nempo cōwē waadete pōnēninque ongōedāni.

²² Pancadānīya guiquēnē, Wabānō quēwenguīmoo, ante guīñente wæyōnānīte mīnitō tōmēnāni inānīte piīnte adāmaī inte godō waadete waa cædāni. ²³ Pancadānīya guiquēnē gonga bæcoyōmō oo goquīnāni iīmaī impa, ante adinque mīnitō wæætē, Quēwencædānīpa, ante odōmonte apænedinque tōmēnāni inānīte ō æmīni beyænque quēwencædānīpa. Wadāni guiquēnē wīwa cædāni inte nāmā baō wentamō mongænte bai ēñayōnānīte mīnitō, Nāate wæcæ wæ, ante guīñente wædinque tōmēnāni weocoo nāni nāadincoo incæ gampodāmaī inte tōmēnāni beyæ wæætē waadete godō waa cædāni.

Wængonguī waēmō pōnī emōnongā ingampa, ante

²⁴ Mīnitō tæ go wæænte bai oda cædāmaī incæmīnīpa, ante Wængonguinque eyepæ pōnī inongā inte tōō æmængā ate mīnitō adiyæ ongonte bai wede pōnencæmīnīpa. Ayæ tōmengā adocanque eyepæ pōnī cædongā inte pōnō badongā ate mīnitō waīmīni bamīni iīnīnque mīnitō nanguī pōnī mīni watapæ toquinque tōmengā nānō ñāō emōñōmō ænte mæicā æicæmīnīpa. ²⁵ Wængonguī adocanque pōnī inongā inte mōnō imonte, Quēwencæmīnīpa, ante nē Ængaingā ingampa. Iīnīnque Itota Codito mōnō Awēnē nānō cægāinō beyænque eyepæ bate quēwēmō iñōmō mōnō iīmainō ante apænecæimpa. Wængonguī ēñēmi. Bitō badongaincoo dæ añonte wēēnē imāmoque iñonte ñōwopāmo iñonte wapāmo mīimāmo iīnīnque bayonte bitō adobique cōwē ñāō entawente tæi emōninque Awēnē nē tæi piñæmī inōmi inte tōmāo iñōmō quēwēnāni inānīte nē Ānōmi imidō anguēnē, ante mōnō apænecæimpa. Mānōmaī baquīnō anguēnē, ante botō, Amēē, amopa.

Wäo ingante Itota Codito Nänö Odömongainö

Wäo wüimonte bai nänö adi, ante yewæmongainö

¹ Wëenëñedë quinä wë wodonte bai ingatimpa, ante Itota Codito nänö odömongainö ante yewæmonte impa. Wængongui iñömö, Wantæ iñonte quinä bai baquii, ante, Itota tömengä ingante në cädäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäo botö në cæcä weca godinque odömömi acæcäimpa, ante da pönongä ponte odömongä atabopa.

² Botö Wäömo guiquënë, Quinä botö adinö tömänö incæ nö impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobai wüimonte bai tömänö botö adinö ante, Nö impa, ante yewæmömopa.

³ Wængongui beyæ botö apænedö ante ii yewæmointaa yewæmömopa. Mänintaa adinque në apænedäni nani toquinque. Ayæ mäninta botö yewæmöninö ante ëñente cädäni nani toquinque. Edæ iimaï baquionæ wantæ iñö oo baquinä anguënë.

Godongämæ nani pönencabo tiæte ganca inäni beyæ Wäo yewæmongampa

⁴ Botö Wäömo inömo imopa. Atiabæ iñömö wayömö wayömö incæ Codito ingante godongämæ mini pönencabo önompö æmæmpoque go mencabominiya acæminimpa, ante botö yewæmömopa.

Mönö Mæmpo Wængongui wëenëñedë në quëwengainä inte ñöwo quëwengä incæ ayæ wantæpiyæ quëwencæcäimpa. Tömengä Önöwoca incæ önompö æmæmpoque go mëwoga önöwocaidi bai ëwocadongä inte Wængongui nänö aacæ tæ contayömö tæcætawë inö në ongongampa. Ininque Mæmpocä tönö

tömengä Önöwoca waadete pönö cæda ate minitö gänë entawencæminimpa.

⁵ Ayæ adobai Itota Codito edæ Wængongui ingantedö ante cöwë ædæmö pönü apænedongä inte wængä ate täno ñäni ömæmongaingä ingampa. Tömengä tömämæ awënë odeyëidi nani Tæiyæ Awënë Odeye inongä ingampa. Tömengä adobai mönö imonte në waadete pönënonngä inte mönö wënæ wënæ cægainö adinque tömengä wepæ inte mënongacäimpa. Tömengä adobai waadete pönö cæcä ate minitö gänë entawencæminimpa, ämopa.

⁶ Ayæ Itota, Botö Awënë Odeyebo nempo quëwëninque minitö botö tönö godongämæ aamini bacæminimpa, ante pönö badongacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui qui, ante në godömö bagaimö imopa. Tömengä ñäo bai ëmöñongante mönö waocabo tömenganque ingante waa acæimpa. Tömenganque cöwë në tæi piñænongä inte quingämenque quëwënanäni iñönänite tömengä tömänäni Awënë inongä ingampa, ante mönö cöwë angæimpa, ante Amëë, ante ämopa.

⁷ Eñëedäni, tömengä edæ boguimancodë wææñongante, tömänäni tömengä ingante acædänimpa. Tömengä ingä në timpogainäni incæ adobai tömengä ingante acædänimpa.

Ayæ tömämæ quëwënanäni tömänäni tömengä ingante adinque Ca ca wæcædänimpa.

Mänömai baquinä anguënë, ante botö, Amëë, ämopa.

⁸ Wængongui Awënë adocanque Tömää në Cægaingä inte iimaï angampa. “Botö Tånobo ingaimo inte Tömämö inguimo imopa.” Mänömainö ante në angä iñömö tömengä wëenëñedë do quëwengainä inte ñöwo quëwengä incæ ayæ wantæpiyæ quëwencæcäimpa.

Itota Codito në ñäo bai ëmongaingä ingante Wäo nänö adö

9 Botö Wäömo inömo imopa. Minitö töninābo inte botö minitö tönö Awēnē Odeye Itota nempo quēwēninqe mōnō tōmengä tönō godongāmæ aamō inōmō imopa. Botö minitö tönō godongāmæ wæwēmō imō incæte mōnō wæntæye ināmaī inte ee cæmompā. Wængonguī nänö angainö ante apænedinque ayæ, Itota mōnō Codito inongä ingampa, ante, Nö impa, ante botö apænedö beyænque botö wää tēiwænē Patōmoto iñōmō tee mōnete bai quēwentabopa.

10 Wængonguī Awēnē itæde iñonte Wængonguī Tæiyæ Waēmō Önōwoca incæ botö imote bæi ongonte bai cæyongä botö önōñabæ inö adocanque tedepāmo todompeta nāni ancadeca we öonte bai yedæ tē eñentabopa. 11 Iīmaī angantapa. “Bitö quīnō wīimonte bai abii, ante yewæmōintaa yewæmōe. Yewæmōninqe wayōmō wayōmō incæ Codito ingante godongāmæ nāni pōnencabo önompo æmæmpoque go mencabodāniya iñönānite tōmēnāni inānite da godōe,” ante angantapa. “Epeto quēwēñōmō quēwēnāni Ætāmidōna quēwēñōmō quēwēnāni Pedegāmo quēwēñōmō quēwēnāni Tiatida quēwēñōmō quēwēnāni Tadedepia quēwēñōmō quēwēnāni Pidadedepia quēwēñōmō quēwēnāni ayæ Daoditea quēwēñōmō quēwēnāni Codito ingante godongāmæ nāni pōnencabo nāni cabo nāni cabo iñönānite bitö tōmēnāni inānite iī bitö yewæmōninta da godōmi æncædānimpa.”

12 Äñongante botö, Æcänö äna eñēmoo, ante dadi emænte atabopa. Dadi emæñōmote yædo concædi tī wodōnoincade oodo inte badōincade önompo æmæmpoque go mēa ganca ongoncade atabopa. 13 Ayæ yædo concædi tī wodōnoincade ongōñōmō adoyōmō tæcæguedē adocanque nē Waocä eñagaingä bai inte ongongä atabopa. Tōmengä doyæncoo önōwa ganca incoo mongæninqe ayæ tæcæenēmæ inö pacadeyænta oodo inte badōi eēnemængä ingantapa.

14 Tōmengä ocabo tönō ocaguī iñōmō dayō nāamænta pōni emō bai adobai encadinque yoguimō ñäo pōni emō bai adobai ñäo bai encacä ingantapa. Ayæ tōmengä awinca incæ gonga wo bæcote bai emongä ingantapa. 15 Tōmengä önōwa incæ yaēmenta bodonte nāni änō gongapamō guī ocoi äñonte ñäo emō bai tōmengä adobai ewacä ingantapa. Tōmengä tedeyongä æpæ mæ conta goyonte æpæ tē bai adobai tē eñentabopa. 16 Tōmengä önönempo tōmempo incæ nēmōidi æmæmpoque go mēa ganca næængantapa. Ayæ tōmengä önōne inö yaēmē tipængaa waingamē engamē enedinque yædæ tadete ongongantapa. Ayæ tōmengä awinca incæ nænque nanguī tamonte bai ñäo bai emongantapa.

17 Tōmengä ingä adinque botö tōmengä önōwa inö wænte bai tæ gowææntabopa. Tæ gowææñōmo tōmengä önompo tōmempo inte botö imote gampodinque “Bitö guīñēnāmaī incæbiimpa,” ante äninqe edæ, “Tōmää badōnāmaī iñedē botö Do Quēwengaimo imopa. Ayæ tōmää iinqe bayedē incæ botö Ayæ Pōni nē Quēwēmo incæboimpa,” ante angantapa. 18 Edæ “Botö nē Quēwengaimo inōmo inte nē wænimo incæ ñāni ömæmonte cōwē wantæpiyæ quēwēmo inōmo imopa. Waodāni nē wænte godināni nāni wænte ongōñōmō ongōñönānite botö, Cōwē wænāmaī quēwencæminimpa, ante botö tæi piñæmāmo inte nē æmo imopa.

19 “Mänōmaī beyæ bitö wīimonte bai bitö adinö ante quīnō ñōwo i, ante quīnō iincayæ ate baquīi, ante yewæmōe amopa. 20 Mänīi nēmōidi önompo æmæmpoque go mēa ganca botö önönempo tōmempo incæ mæ öñoncoo bitö adincoo ante, Æbänö i, ante bitö eñēnāmaī inönö ante botö edonque pōni apænebo eñencæbiimpa. Botö imote godongāmæ nāni pōnencabo önompo æmæmpoque go mencabodāniya iñönānite tōmēnāni inānite nē aadāni

baï nēmōidi inānīpa. Ayæ yædo concædi tī wodōnoincade oodo inte badōincade ōnōmpo æmæmpoque go mēa ganca ongoncadedoo bitō adincoo ante, Quinō baï inānīi, ante botō adobaï bitō imite edonque pōnī apænebo ate nē ēñēmi bacæbiimpa. Wayōmō wayōmō incæ botō imote godongāmæ nāni pōnencabo ōnōmpo æmæmpoque go mencabodāniya iñōmō tōmēnāni yædo concædi tī wodōnoincade baï adobaï inānīpa,” ante Waocā nē ēñagaingā iñōmō botō imote apænegacāimpa.

2

Godongāmæ nāni pōnencabo tiæte ganca ināni inānite Itota nānō ānō

Epeto iñōmō quēwēnāni inānite Itota nānō ānō

¹Ayæ adocā godōmenque apænecantapa

“Epeto iñōmō Wængonguī ingante godongāmæ nāni pōnencabo inānite nē aacā acæcāimpa, ante botō ānō ante iīmaï yewæmōe āmopa. ‘Botō edæ nēmōidi ōnōmpo æmæmpoque go mēa ganca botō ōnōnempo tōmempo nē nææmo imo inte botō adobaï yædo concædi tī wodōnoincade oodo inte badōincade ōnōmpo æmæmpoque go mencadea incade ongōñōmō adoyōmō tæcæguedē nē cægōmo imopa.

² “ ‘Minitō æbānō cæmīnīi, ante do ēñēmopa. Edæ nangui pōnī cædinque mīnitō wæntæye ināmaï inte ee cæmīnīpa. Mīnitō wīwa cædāni inānite Baa ante quēwēminīpa, ante do ēñēmopa. Ayæ Wængonguī nānō nē da godongāimōni imōnīpa, ante nē ānāni incæte ināmaï iñōnānite mīnitō, Nāwangā inānīi, ante ēñencæte ante apænte adinque, Tōmēnāni babæ ānānīpa, ante ēñente wæmīnitapa.

³ Mīnitō wæntæye ināmaï inte ee cæmīnī imīnīpa. Ayæ botō emōwo apænete beyænque wæwēminī incæte godōmenque godōmenque cædinque mīnitō mīmōnē nangæ badāmaï imīnīpa, ante do ēñēmopa.

⁴ “ ‘Incæte adoque pōnī mīni cædinō wīi waa abopa. Mīnitō edæ wīi wēenēñedē baï ædæmō waadete pōnēmīnī imīnīpa, ante awædō. ⁵ Edæ mīnitō waa cædimīnī imīnī incæte ñōwo wæætē wēnæ wēnæ cæmīnī bamīnī awædō. Mānīnō ante pōnēedāni. Mānīi mīni wēnæ wēnæ cædinō ante, Ancaa wæwente awædō, ante pōnente ñimpo cædinque mīnitō wēenēñedē mīni waa cægāi baï adobaï cæte quēwēedāni āmopa. Amo ēñēninque mīnitō mīni wēnæ wēnæ cædinō ante wædāmaï imīnī adinque botō mīnitō weca pōmaïmopa. Pōninque mīni yædo concædi tī wodōnoincade nānō ongōñōmō ongōñonte botō ō ænguimodō anguēnē. ⁶ Incæte adoque mīni cædinō guiquēnē waa abopa. Mīnitō edæ Nīncodaitaidi nāni ānāni nāni cædō ante adinque piinte imīnīpa. Botō adobaï tōmēnāni nāni cædō ante adinque piinte imopa.

⁷ “ ‘Wayōmō wayōmō incæ botō imote godongāmæ nāni pōnencabo inānite Wængonguī Ōnōwoca quinō angāā, ante tōmengā nānō ānō ante nē ēamonca imīnī inte ēñēedāni. Wængonguī waa gōnea iñōmō māniñōmō adowænque quēwenguiwæ pædiwæ iwæmpa. Tæi emonte nē gānā cædāni inānite botō iñōmō, Māniwæ inca cæncæmīnīpa, ante pædæ godoncæboimpa,’ ante māninque āmopa,” ante Waocā nē ēñagaingā iñōmō botō imote apænegacāimpa.

Ætāmidōna iñōmō quēwēnāni inānite Itota nānō ānō

⁸Ayæ adocā godōmenque apænecantapa.

“Ætāmidōna iñōmō Wængonguī ingante godongāmæ nāni pōnencabo inānite nē aacā acæcāimpa, ante botō ānō ante iīmaï yewæmōe āmopa. ‘Tōmāā badōnāmaï iñedē botō Do Quēwengāimo imopa. Ayæ tōmāā iinque bayedē incæ botō Ayæ Pōnī nē Quēwēmo incæboimpa. Botō nē wænīmo incæ ñōwo wæætē ñāni ōmæmongāimo imopa.

9 “Minitö wæwëmini inte adobai ömæpomini iminipa, ante botö do ëñëmopa. Incæte minitö nö ëamini iminipa. Oodeoidi pancadaniya, Mönitö Wængongui ingante möni pönencabo imönipa, ante në änäni incæte wii mänömai inänipa. Tömënanäni minitö iminite ancaa piinte babæ anewënanäni inänipa, ante botö do ëñëmopa. Mäninänäni iñömö Tatäna ingante näni ëñencabo inte mänömai cædanipa töö. 10 Minitö quinä beyæ wæwencæ cæmini imini incæte guiñënamai iedäni. Tatäna incæ, Æbänö cæminii, ante acæte ante cæcä beyænque waodäni pancaminiya iminite tee mönecædanimpa. Önonpo tipæmpoga ëönæ iñonte wæwenguimini iminipa. Inique minitö mini wænguinque wæmini incæ cöwë pönëninque ædæmö cæedäni. Mänömai në cæmini inique botö, Mini cöwë quëwenguinta, ante poganta bai minitö iminite pönömo æmalmiminipa.

11 “Wayömö wayömö incæ botö imote godongämæ näni pönencabo inänite Wængongui Önöwoca quinä angää, ante tömengä nänö änö ante në ëamonca imini inte ëñëedäni. Wadäni adopoque wëninque näni mempoga wænguimämo bai tæi ëmonte në gänä cædäni iñömö wæætë mempoga wënamai incædanimpa,” ante mäninque ämopa,” ante Waocä në ëñagaingä iñömö botö imote apænecacäimpa.

Pedegämo iñömö quëwënanäni inänite Itota nänö änö

12 Ayæ adocä godömenque apænecantapa. 17 “Wayömö wayömö incæ botö imote godongämæ näni pönencabo inänite Wængongui Önöwoca quinä angää, ante tömengä nänö änö ante në ëamonca imini inte ëñëedäni. Tæi ëmonte në gänä cædäni inänite cængui mänää näni angainö botö wë wodöni cængui iñonte godömo ænte cæncædanimpa. Adodäni inänite adobai dica näamëntaca godömo æncædanimpa. Wa ëmowo ante pemöninque mänincaa

13 “Ædönö quëwëminii, ante botö do ëñëmopa. Tatäna contaimpa ongonte nänö aayömö adoyömö minitö quëwëmini imini incæte botö imo edæ ñimpo

cædämai quëwëmini iminipa. Mini quëwëñömö Tatäna adoyömö quëwengä inique, Antipato edæ botö änö ante cöwë pönëninque ædæmö apænedongä iñongante mäniñömö quëwënanäni tömengä ingante wëñedë incæ minitö botö imote edæ, Dicæ pönëmogaa, änämai iminipa.

14 “Incæte pancaa mini cædinö wii waa abopa. Edæ pancaminiya docä Badäo nänö odömonte apænecacä ante ëñëwëmini awädö. Tömengä iñömö, Badaco godö cæcä beyænque idægoidi tee tëwate bai oda cæcædanimpa, ante cædinque adocä Badaco ingante odömonte apænecä ëñente cægacäimpa. Wadäni, Mönitö wængongui cængui impa, ante näni cönöni ante, Minitö cæedäni, ante Badaco iñömö idægoidi inänite odömonte apænecacäimpa. Ayæ onquiyänäni tönö godö towente cæedäni, ante odömonte apænecacäimpa. 15 Ayæ pancaminiya adobai Nincodaitaidi näni odömonte apænedö ante ëñëwëmini awädö. 16 Mänömai beyæ mini wëwënanäni cædinö ante, Ancaa wæwente awädö, ante pönente ñimpo cæedäni. Minitö mini wëwënanäni cædinö ante wædämai imini adinque botö wantæ iñonte minitö weca pömaimopa. Pöninque tömënanäni näni odömonte apænedö ante në ëñëwënanäni iñönänite botö önöne incæ yaëmë ënedinque yædæ tadedinque guëadö guëa cæcæboimpa.

17 “Wayömö wayömö incæ botö imote godongämæ näni pönencabo inänite Wængongui Önöwoca quinä angää, ante tömengä nänö änö ante në ëamonca imini inte ëñëedäni. Tæi ëmonte në gänä cædäni inänite cængui mänää näni angainö botö wë wodöni cængui iñonte godömo ænte cæncædanimpa. Adodäni inänite adobai dica näamëntaca godömo æncædanimpa. Wa ëmowo ante pemöninque mänincaa

yewæmonte ingæimpa. Nē ænānique māniwo ēñēnāni inānīpa, ante mānīnque āmopa,” ante Waocā nē ēñāgaingā iñōmō botō imote apænegacāimpa.

Tiatida iñōmō quēwēnāni inānite Itota nānō ānō

¹⁸ Ayæ adocā godōmenque apænecantapōnō nāni guēa godō mōwēninō ante, Mōnitō wēnæ wēnæ cæmōni inte ancaa wæwente awædō, ante pōnente ñimpo cædāmaī ināni iñinque tōmēnāni inānite adobaī botō cæbo beyænque nanguī wēnæ wēnæ bate wæwēmainānīpa. ²³ Tōmengā wēnāni inānite wænōmo wæncædānimpa. Iñinque wayōmō wayōmō incæ botō imote godongāmæ nāni pōnecabo tōmancabodāniya iñōmō, Botō incæ tōmēnāni nāni mīmōno tōnō ocaidē, Æbānō pōnēnāni, ante nē ēñēmo inōmo imopa, ante ēñencædānimpa. Ayæ mīnitō cædī bai ante adinque botō wæætē adobaī mīnitō tōmāmīni imīnite cæcæboimpa.

¹⁹ “ Mīnitō æbānō cæmīni, ante mīni waadete pōnēnō ante mīni wede pōnēnō ante wadāni inānite mīni waa cædō ante botō do ēñēmopa. Mīnitō wæntæye ināmaī inte ee cædinque godongāmæ cæmīni imīnīpa, ante ayæ, Wēēnēñedē do waa cædimīni inte ñōwo godōmenque waa cæmīni imīnīpa, ante adobaī do ēñēmopa.

²⁰ Incæte adoque pōnī mīni cædinō wīi waa abopa. Onquiyængā Etabete nē emongā iñōmō edæ, Wængonguī beyæ nē apænebo, ante nāmā incæ nē angā ingante wido cædāmaī imīni inte wæætē tōmengā ingante ayæ godōmenque Ao āmīnīpa tōō. Iñæmpa tōmengā iñōmō botō imote nē cædāni inānite nānō odōmonte apænedō beyænque oda cæte gocædānimpa, ante cæcā beyæ tōmēnāni onquiyænāni tōnō godō towente cædānīpa. Wadāni, Mōnitō wængonguī cænguī impa, ante nāni cōnōnī cænānīpa tōō. Mānōmaī cæcædānimpa, ante māningā onquiyængā odōmonte apænecāimpa.

²¹ “ Tōmengā nānō towente cædimāmo ante, Botō wēnæ wēnæ cæbo inte ancaa wæwente awædō, ante pōnente wabānō ñimpo cæquingāā, ante botō tōmengā ingante ee pānāmaī intabopa.

Incæte tōmengā nānō wēnæ wēnæ cædō ante wædāmaī quēwengā ingampa. ²² Iñinque botō, Tōmengā ingante cæbo beyænque wēnæ wēnæ bate wæwencæcāimpa, ante cæcæboimpa. Ayæ tōmengā nānō odōmonte apænedinō bai nē ēñente cædāni iñōmō tōmengā pōnō nāni guēa godō mōwēninō ante, Mōnitō wēnæ wēnæ cæmōni inte ancaa wæwente awædō, ante pōnente ñimpo cædāmaī ināni iñinque tōmēnāni inānite adobaī botō cæbo beyænque nanguī wēnæ wēnæ bate wæwēmainānīpa. ²³ Tōmengā wēnāni inānite wænōmo wæncædānimpa. Iñinque wayōmō wayōmō incæ botō imote godongāmæ nāni pōnecabo tōmancabodāniya iñōmō, Botō incæ tōmēnāni nāni mīmōno tōnō ocaidē, Æbānō pōnēnāni, ante nē ēñēmo inōmo imopa, ante ēñencædānimpa. Ayæ mīnitō cædī bai ante adinque botō wæætē adobaī mīnitō tōmāmīni imīnite cæcæboimpa.

²⁴ “ ‘Wamīni pancamīniya guiquēnē Tiatida iñōmō quēwēmīni inte māningā onquiyængā nānō odōmonte apænedō ante mīnitō nē pōnēnāmaī imīnīpa. Ayæ Tatāna wē wodonte nānō angainō ante ēñēnāmaī imīnitapa. Iñinque botō mīnitō imīnite iñāmaī āmopa. Mīnitō teēmē mongæncōo mongænte gote bai wædāmaī incæmīnīpa, ante wadō ante ānāmaī incæboimpa. ²⁵ Wæætē botō ocæ emænte wææganca mīnitō edæ do mīni pōnēnō ante ñimpo cædāmaī iedāni. Mānīnque āmopa.

²⁶ “ ‘Inguipoga iñinque baganca ædānidō botō ānō nē cædōnāni inte tæi emonte nē gānā cædāni inānite botō pōnō cæbo ate tōmēnāni nāmā tæi piñænāni badinque tōmāmæ quēwēnāni inānite nē ānāni bacædānimpa. ²⁷ Botō Mæmpo botō imote pōnō cæcā beyænque Awēnē badinque nāmā tæi piñænte inte nē āmo bai botō adobaī tōmēnāni inānite pōnō cæbo beyænque

awënëidi badinque aacädänimpa. Tæiyæ awënë tömengä nempo quëwënäni inänite aacä bai tömengä inömö tömämæ quëwënäni inänite, İmaï cæedäni, ante aacæcäimpa. Dai inte bæte cængæmö tæi ænacä nancate bai cædinque tömengä adobai wabæca wabæca quëwënäni inänite nanguï pante cæcæcäimpa. ²⁸ Mäninäni inänite botö adobai wadaamö ñäo bayonte apäimö incæ godömo æncædänimpa.

²⁹ “Wayömö wayömö incæ botö imote godongämæ nani pönencabo inänite Wængonguï Önöwoca quinä angää, ante tömengä nänö änö ante nê éamonca imini inte ëñëedäni, ante mäninque ämopa,” ante Waocä nê ëñagaingä inömö botö imote apænegacäimpa.

3

Tadoditiidi inänite Itota nänö änö

¹ Ayæ adocä godömenque apænegacantapa.

“Tadoditi inömö Wængonguï ingante godongämæ nani pönencabo inänite nê aacä acæcäimpa, ante botö änö ante iimaï yewæmöe ämopa. ‘Wængonguï Önöwoca incæ önompo æmæmpoque go mëwoga önöwocaidi ewocadongä ingampa. Botö inömö tömengä ingante nê ewocate quëwengaimo inte nëmöidi önompo æmæmpoque go mëa ganca inäni nê næænte ingaimo imopa.

“ İninqe, Minitö æbänö cæminii, ante do ëñëmopa. Minitö müimini quëwëminipa, ante wadäni apænedäni incæte minitö wii waa cæte quëwëmini inte do wængainäni bai iminipa töö. ² Edæ, Botö Wængonguï ayongä mini cædinö wii eyepæ cæminipa, ante adinque botö, Ñäni ömæmöedäni, ante ämopa. Ñäni ömæmöninque minitö, Ayæ müinäni quëwënäni incæ nê wæncæ cædäni bai badäni incæte tömënäni wænämäi inte wæætë tæimö bacædänimpa, ante cæedäni. ³ Mänömaï beyæ, Quiëmë do ænimini bai iminii, quiëmë ante do ëñëminii, ante mäninö ante wæætë

adodö ante pönëedäni. Pönëninque minitö mäninö ante ëñente cæedäni. Ayæ mini wænæ wænæ cædinö ante, Ancaa wæwente awædö, ante pönente ñimpo cæedäni. Wæætë minitö wii ñäni ömæmonte bai imini ate wædinque botö incæ minitö weca awëmö nê ængä bai pömaïmopa. Ayæ, Awëmö nê ængä æyedëno ponguingää, ante ëñënëmaï inäni bai botö adobai minitö ëñënëmaï inömini minitö weca awëmö ponguïmo apa quëwëminii.

⁴ “ Incæte Tadoditi inömö mini quëwencabo inöminite pancadäniya tömënäni weocoo wentamö nämönämäi bai ininäni inte nê waa cæte quëwënäni. Mäninäni waa cæte quëwënäni beyæ eyepæ inönäni inte weocoo näämæntacoo mongænte botö miñæ gocædänimpa. ⁵ Nê tæi emonte gänä cædäni inömö adobai weocoo näämæntacoo mongæncædänimpa. Ayæ, Quëwenguinta, ante Wængonguï nänö yewæmongaintaa mäninäni emöwo do yewæmöi ininqe botö cöwë wadæ cædämaï incæboimpa. Wæætë botö Mæmpo Wængonguï weca ayæ tömengä anquedoidi weca botö, İinäni botö miñæ gogainäni inänipa, ancæboimpa.

⁶ “Wayömö wayömö incæ botö imote godongämæ nani pönencabo inänite Wængonguï Önöwoca quinä angää, ante tömengä nänö änö ante nê éamonca imini inte ëñëedäni, ante mäninque ämopa,” ante Waocä nê ëñagaingä inömö botö imote apænegacäimpa.

Pidadedepiadi inänite Itota nänö änö

⁷ Ayæ adocä godömenque apænegacantapa.

“Pidadedepia inömö Wængonguï ingante godongämæ nani pönencabo inänite nê aacä acæcäimpa, ante botö änö ante iimaï yewæmöe ämopa. ‘Botö edæ nê Tæiyæ Wæmö ingaimo imopa. Nö ante cægaimo inte botö docä Awënë Dabii nänö wi ænequi nê næængaimo imopa.

İnıne quınö odemö botö wi ænebo incæ mäninemö wacä ædö cæte tee mönequingää. Ayæ quınö odemö botö tee mönebo incæ mäninemö wacä ædö cæte wi ænequingää.

⁸ “Minitö æbänö cæminii, ante do eñemopa. Minitö cæcæminimpa, ante botö odemö wi ænete bai cæbo aedani. Æcänö mäninemö wæætë tee mönequingää. Edæ dæ angampa. Minitö wii tæi piñæmini imini incæte botö angainö ante eñente cæmini inte botö emöwo ante, Dicæ eñemöniyaa, ante änämaï inimini iminipa. Botö do eñemopa. ⁹ Möni oodeocabo imöni incæ pancadaniya, Mönitö Wængongui ingante möni eñencabo imonipa, änäni incæte inämaï inänipa. Wæætë tömënanı iñömö babæ anewënanı inänipa. Tatana ingante nani eñencabo inänipa töö. Botö godö cæbo ate adodani minitö weca ponte minitö önöwa gäänë ædæ wææncædanimpa. Ayæ, Botö minitö iminite nê waadete pönengaimo imopa, ante botö godö odömömo eñencædanimpa. ¹⁰ Minitö iminite, Ee cædinque wæntæye inämaï iedani, ante botö angainö ante eñente nê cædimini imini adinque botö wæætë minitö iminite wææ aacæboimpa. Inguipoga quëwënanı tömänani nani wæwenguimämo ancaa baquınö angüenë. Edæ Tatana, Æbänö quëwënanii, ante acæte ante cæcä ate nani wæwëñedë botö iñömö, Minitö wæwënanı incæminimpa, ante minitö iminite wææ aacæboimpa.

¹¹ “Botö oo ocæ emænte ponguimo imopa. Wængongui poganta nänö godonguinta, ante minitö iminite godongä æncæminimpa. Mäninta mini ænguinta iñömö wacä ænämäi incæcäimpa, ante minitö mini entawëno ante godömenque godömenque ñimpo cædämaï iedani. ¹² Botö cæbo ate waodani tæi emonte nê ganä cædani iñömö tömëmo Wængongui tæiyæ

waemö oncönë wantæpiyæ quëwenguinänidö angüenë. Tömënanı Wængongui weca cöwë quëwente taodämaï incædanimpa. Tömënanıya botö Wængongui emöwo yewæmoncæboimpa.

Mii Eedotadëe nani añömö iñömö botö Wængongui nänö quëwëñömö iñonte manii tömengä nänö quëwëñömö incæ öönædë inö da pönongä wæængæimpa. Manii Wængongui nänö quëwëñömö emöwo botö adobai tömënanıya yewæmoncæboimpa. Ayæ botö wawo botö ñöwo pemongaiwo adobai tömënanıya yewæmoncæboimpa.

¹³ “Wayömö wayömö incæ botö imote godongämæ nani pönencabo inänite Wængongui Önöwoca quınö angää, ante tömengä nänö änö ante nê eamonca imini inte eñëedani, ante mäninque ämopa,” ante Waocä nê eñagängä iñömö botö imote apænegacäimpa.

Daoditeaidi inänite Itota nänö änö

¹⁴ Ayæ adocä godömenque apænecantapa.

“Daoditea iñömö Wængongui ingante godongämæ nani pönencabo inänite nê aacä acæcäimpa, ante botö änö ante iimaï yewæmoe ämopa. ‘Botö emöwo Amëe, ante pemongaimo inte botö cöwë, Näwangä impa, ante nê cöwë ædæmö apænegaimo imopa. Wëenëñedë Wængongui nänö badongäñedë manïñedë botö tömengä tönö godongämæ badongaimo beyænque tömengä nänö badongaincoo tömancoo Awënë badinque botö nê ämo imopa.

¹⁵ “Minitö æbänö cæminii, ante do eñemopa. Yoguiyæ bai inämaï imini incæte ocoi ämæ bai adobai inämaï iminipa töö. İnæmpa yoguiyæ bai iminipa diyæ waa aquimoo. Edæ ocoi ämæ bai iminipa diyæ waa aquimoo. ¹⁶ Minitö yoguiyæ bai inämaï imini incæte ocoi ämæ bai inämaï imini inte wæætë wii eyepæ cæmini inte gänë ämæ bai iminipa töö. Mänömaï beyæ botö edæ tömëmo önönë towæ tänonte bai minitö iminite adobai wido cæcæ

cæbo apa quëwëminii. ¹⁷ Minitö, Mönitö nangui ëamöni imönipa, ante äminipa. Edæ, Tömëmöni mäincoo gæte da wëninque eyepæ ëamönipa, ante äminipa. Iñæmpa mäninö ante wapiticæ pönente äminipa. Minitö mini wæwënö incæ ëñënamai iminipa töö. Minitö æbänö bate cæminii, ante adinque wadäni, Minitö wodi, ancædänimpa. Ömæpodäni bai imini inte minitö babetamönäni bai imini inte ömaadäni bai imini incæte, Mänömai imönipa, ante ëñëminiyaa.

¹⁸ “ ‘Mänömai beyæ botö, Iïmai cæedäni, ante waadete ämopa. Botö pönö cæbo beyænque minitö wæætë waa bate bai nangui cæcæminimpa, ämopa. Mäninö botö pönö cædö iñömö oodo gongapamö aca podonte ate waëmö oodo bate bai impa. Iñinque minitö, Mönitö nangui ëamöni bacæmönimpa, ante cædinque botö weca ponte tömëmö oodo ante godonte æedäni. Ayæ, Ömaamöni inämai incæmönimpa, ante guingo imönämai incæmönimpa, ante minitö botö weocoo näämæntacoo godonte ænte mongæedäni. Ayæ minitö, Awinca waa acæimpa, ante cædinque tömëmö awinca cönömöimæ godonte æninque cönömöedäni.

¹⁹ “ ‘Botö nê waadete pönënanäni inänite botö piinte ämo inte adobai pante cæbo imopa cæminii. Minitö nangui cædinque mini wënæ wënæ cædinö ante, Ancaa wæwente awædö, ante pönente ñimpo cæedäni. ²⁰ Eämonca ëñëedäni. Botö incæ odemö yabæ inö ongonte bai waomini mimöno a ongöninque, Wi ænequi, ante aa peyömo waocä æcämenque incæ ëñëninque odemö wi ænete botö imo, Pö guie, angä ininque botö iñömö edæ tömengä mimönë pö guicæboimpa. Tömengä mimö botö oncö bai iñonte botö tömengä tönö cænte bai cöwë quëwencæboimpa. Ayæ tömengä wæætë botö tönö cænte bai cöwë

quëwencæcäimpa. ²¹ Botö tæi ëmonte nê gänä cægäimo inte botö Mæmpo nänö aacæ tæ containpaa tömengä tönö guëa tæ contagaïmo bai nê tæi ëmonte nê gänä cædäni iñömö adobai botö tömëmö aacæ tæ contayömo botö tönö godongämæ tæ contacædänimpa, ante ämo adopaa tæ contaquinäni.

²² “ ‘Wayömö wayömö incæ botö imote godongämæ nani pönencabo inänite Wængongui Önöwoca quinö angää, ante tömengä nänö änö ante tömënanäni nê ëamonca imini inte ëñëedäni,’ ante mäninque ämopa,” ante Waocä nê ëñagaingä iñömö botö imote apænegacäimpa.

4

Öönædë iñömö Wængongui ingante watapæ apænedäni

¹ Botö Wäömo inömo inte ayæ ate æmö ayömote öönædë inö odemö wi ænete atabopa. Todompeta nani ancadeca we öonte yedæ tæ bai tedepämo täno botö ëñëninö iñömö ñöwo wæætë adopämo botö imote iïmai äninque, “Iñömö pö æe. Æñömite botö, Ayæ ate quinö baquënë inguii, ante bitö imite edonque odömömo acæbiimpa,” angantapa.

² Mäninö ante äñongä Wængongui Önöwoca incæ botö imote bæi ongonte bai cæyongä botö wiimonte bai adinque iïmai atabopa. Öönædë inö Awënë tæ containpa ayömo adocanque mäniñömö tæ contacä atabopa. ³ Mäningä adoyömö nê tæ contadongä iñömö dica ñäö bai ëmonca bai adobai ëmongä ingantapa. Aatape nani äninca bai codönadina nani äninca bai mäninca mencaa ñäö bai inca bai tömengä adobai ëmongä ingantapa. Awënë tæ containpa iñömö daimë dica bai etëmedada nani äninca ëmonca bai inte æidämæ waimë pöni gongæmënimpa. ⁴ Mänimpa Awënë nänö aacæ tæ containpa waimpacoo bæinticoatodo ganca mänimpopacoo mäniñömö godämæ a ongompapa. Adopacoo iñömö nê aadäni nê Picænäni bæinticoatodo

ganca mänimpodäni tæ contadique näämæntacoo mongæninque poganta oodo inte badöinta da wencate a ongönänitapa. ⁵ Awënë tæ contaimpa inö näinte yædæ yædæ ta gote detæbo tæi tæi tē tēñonte yedæ pönī änimpa. Ayæ Awënë tæ contayömö tæcætawë inö ti wodönoincade önompo æmæmpoque go mencadea wocædöincadecoo a ongönimpa. Wængonguī Öñowoca incæ önompo æmæmpoque go mēwoga öñowocaidi bai ewocadongä inte mänincadecoo bai ingampa.

⁶ Ayæ Awënë tæ contaimpaa tæcætawë inö adobai gäwapæntibæ bai iñonte awocawænta bai inimpa. Ayæ Awënë tæ contaimpa iñömö müināni quëwënāni mēnaa go mēnaa ināni godāmæ a ongönänitapa. Mänināni iñömö tæcætawë inö öñofabæ inö tömäo awinca emönāni atabopa. ⁷ Tānocā müingä quëwengä botö adingä iñömö neöo bai emongampa. Ayæ wacā müingä quëwengä botö adingä iñömö waga mæmpo bai emongampa. Wacā müingä quëwengä botö adingä iñömö tömengä awinca waocā awinca bai emongampa. Ayæ tömangä müingä quëwengä botö adingä iñömö guingämöwæ pao pao gocā bai atabopa. ⁸ Mēa go mēa müināni quëwënāni incæ adocanque adocanque önompo æmæmpoque go adoguënepænque emænte quëwënāni inānipa. Ayæ adodāni inte tömēnāni baonga godāmæ tömanga nangui pönī awinca emonte ænömengadænguënepæ incæ awinca adobai emönānipa. Mänināni edæ itæde woyowotæ ñimpo cædāmaī inte iimaī ante ämotamini änanipa.

“Bitö Tæiyæ Waëmö Awënë imidö, bitö Tæiyæ Waëmö Awënë imidö, ante amönipa.

Wængonguī Awënë bitö adobique Tömää nē Cæbi inte

wëenëñedë do nē quëwengäimi imi ñöwobi adobi inömi inte ayæ wantæpiyæ cöwë quëwencæbiimpa.”

Ante ämotamini ante cöwë änanipa.

⁹ Awënë tæ contaimpaa nē tæ contadongä inte nē wantæpiyæ cöwë quëwengäingä ingante apænedinque mēa go mēa müināni quëwënāni iñömö iimaī ante apænedänipa. Bitö ñäo emömi imipa, ante apænedinque tömēnāni, Bitö imite waa amönipa. Mönitö bitö imi waa ate pönente apænemönipa, ante apænedänipa. ¹⁰ Mänömaī ante apæneyönāni nē aadāni nē Picænāni iñömö bæinticoatodo ganca mänimpodäni Awënë tæ contaimpaa nē tæ contadongä inte nē wantæpiyæ cöwë quëwengäingä weca ædæ wææninqe tömengä ingante, Bitö Wængonguī Awënë imidö anguënë, ante watapæ apænedinque tömēnāni poganta gä æncadinque Awënë tæ contaimpa gäänë cö cædinque iimaī ante ämotamini ante änanipa.

¹¹ “Bitö iñömö mönitö Wængonguī Awënë imidö, amönipa. Bitö badöinënö, ante pönente ingäimi inte öönæde ongönāni tönö inguipoga ongönāni tönö tömānāni inānite badongäimi imipa.

Bitö wii badömi bai tömānāni badongaināni quëwënāmaī dæ ancædönänimpa.

Mänömaī beyæ bitö eyepæ inömi iñömite, Bitö ñäo emömidö anguënë, ante mönitö bitö imite waa amönipa.

Bitö nämä tæi piñænte nē cæbi imidö, ante bitö imite amönipa,” ante ämotamini ante änanipa.

5

Wængonguī Codotodo yewæmöinta wi cempocampa

¹ Ayæ Awënë nänö aacæ tæ contaimpaa nē tæ contacā iñömö tömengä önönempo tömempo incæ yewæmöinta dadī ompointa næængä atabopa. Mäninta tipäataa yewæmöinta impa. Adotaa yæwedeta iñömö guñenca bai inte tee bædinta önompo æmæmpoque go mentaa inimpa. ² Ayæ Wængonguī anquedo adocanque nē tæi emongaingä inte yedæ aa pecä

atabopa. “Mäninta dadi ompointa wi æmpoquii, ante æcänö nö waa pöni inongä inte eyepæ inte tee bædedinta wäa wäa ænete wi æmpoquingäa,” angantapa. ³ Ayæ öönædë incæ inguipoga incæ tadömengadænga incæ cöwä ayönäni, Æcänö mäninta wi æmpoquingäa, cæncadenta inö æcänö aquingäa, ante edæ dæ angantapa. ⁴ Æcänö nö waa pöni inongä inte eyepæ inte dadi ompointa wi æmpoquingäa iñömö edæ dæ angampa. Cæncadenta inö æcänö aquingäa ante dæ angampa, ante adinque nangui pöni Ca ca wætabopa. ⁵ Ca ca wæbo adinque nê aadäni nê Picæñäni iñönäni adocanque nê Picængä incæ botö imo, “Wædämaï ie. Wæætë cöwä ae, angantapa. Adocanque onguinængä iñömö mäninta wi æmpoquingä a ongongampa. Awënë Dabii Pæingä incæ tömengä iñömö docä Oodaa pæinäni nani cabo iñonte nê nêöö bai tæi emönongä inte nê gänä cæcä ingaingä ingampa. Tömengä iñömö edæ eyepæ inte tee bædedinta onompo æmæmpoque go mentaa wi æmpodisque dadi ompointa wi æmpocæcäimpa,” angantapa.

⁶ Ayæ Wængongui Codotodo nani wænönäni nê wæningä bai ingä atabopa. Tömengä Awënë Wængongui nänö aacæ tæ contayömö tæcæguedë ongoñongä miinäni quëwëñäni mënaa go mënaa inäni tönö nê aadäni nê Picæñäni godämæ a ongönäni atabopa. Tömengä iñömö önömoncawæncoo onompo æmæmpoque go mëwäa emoncadinque awinca onompo æmæmpoque go mëmonga emongacäimpa. Edæ Wængongui Önöwoca incæ onompo æmæmpoque go mëwoga önöwocaidi bai nänö ewocadö bai manii awincacoo inänipa. Adodäni önöwocaidi inänite inguipoga da pönongä pöninge tömënäni inguipoga tömämæ gote cæwodäni inänipa. ⁷ Ayæ Wængongui Codotodo iñömö Awënë tæ contayömö pöninge nê tæ contadongä önönempe tömempe

inö dadi ompointa nänö nææninta ö ængantapa. ⁸ Tömengä mäninta ö ængä ate mëa go mëa miinäni quëwëñäni tönö nê aadäni nê Picæñäni bæinticoatodo ganca mänimpodäni Wængongui Codotodo weca ponte ædæ wæænänitapa. Iinäni tömänäni ampoqui adapa nani änö nææninque owæta oodo inte nani badöinta ogui waaqui eyede enga næænänitapa. Wængongui quinäni tömengä ingante nani apænedö iñömö manii ogui waaqui bai impa. ⁹ Tömënäni mä äninque iimaï ante ämotamini ante änänitapa.

“Bitö imite wænönäni nê wænimi inte bitö nö waa pöni inömi imipa.

Ininque bitö eyepæ inte dadi ompointa ænte tee bædedinta wäa wäa ænete wi æmpoquimi imipa.

Waadäni nani cabo waodäni nani cabo incæ wadö nani tedecabo wadö nani tedecabo incæ

wacä awënë nani cabo wacä awënë nani cabo incæ wabæca nani quëwencabo wabæca nani quëwencabo incæ waodäni inänite bitö,

Wængongui quimini bacæminimpa, ante cædinque nämä wepæ godonte ængabiimpa.

¹⁰ Bitö nempo quëwëninque tömënäni bitö tönö godongämæ aadäni bacædänimpa, ante badongabiimpa.

Mönö Wængongui ingante cæcædänimpa, ante bitö pönö cæbi ate tömënäni,

Mönö Awënë Odeye Wængongui qui, ante nê godönäni bagainäni inänipa.

Mäninäni edæ awënëidi badinque inguipoga quëwëñäni inänite aacædänimpa.”

ante ämotamini änänitapa.

¹¹ Ayæ ayömo Wængongui anquedoidi iñömö bacoo inäni inte ämotamini änäni eñëninque, Tömënäni æpodö miido ganca inänii, ante botö ædö cæte tee mampote eñenguimoo. Edæ miinäni quëwëñäni tönö nê aadäni nê Picæñäni tönö Awënë tæ contaimpa gäänë tæcæguedë

ongöñönänite Wængonguï anquedoidi iñömö yabæque godämæ gongænte ongönänitapa. ¹² Mäniñömö godämæ ongöninque tömënäni yedæ äninque iïmaï ante ämotamini änanitapa.

“Wængonguï Codotedo ingante wænönäni në wæningä inte tömengä nö waa pöni inongä inte eyepæ ingampa.

Tömengä edæ tæi piñængä ingänö anguënë.

Tömengä quincodö incæ tömancoo në éacä inte tömänö ante ëñëngä ingänö anguënë.

Tömengä tæi piñænte inte tömää nänö cæinënö cædongä ingampa.

Tömengä ingante, Bitö imite waa amönipa. Bitö ñäö emömidö anguënë, ante bitö imite watapæ apænemönipa,” änanitapa.

¹³ Ayæ Wængonguï nänö badongainäni öönädë quëwënäni incæ inguipoga quëwënäni incæ tadömengadæ quëwënäni incæ gäwapæntibädë quëwënäni incæ tömänäni adoyedë iïmaï ante ämotamini ante änanäni ëñentabopa.

“Awënë tæ containpaa në tæ contadongä ingante ayæ Wængonguï Codotedo ingante tömäna inate iïmaï amönipa.

Minatö iminate watapæ amönipa. Minatö iminate waa amönipa.

Minatö ñäö emöminadö anguënë. Minatö tæi piñæmäna iminadö anguënë.

Wantæpiyæ iñonte mäninö ante cöwë ancæmönimpa,” ante änanitapa.

¹⁴ Ante äñönäni mäa go mäa miinäni quëwënäni adobai, “Iïmaï baquinö anguënë,” ante, “Amëë,” änanitapa. Ayæ në aadäni në Picænäni iñömö ædæ wææninque watapæ änanitapa.

6

Tee bædinta önompo æmæmpoque go mentaa

¹ Ayæ Wængonguï Codotedo iñömö tee bædinta önompo æmæmpoque go mentaa incæ yewæmöinta dadi ompointa tee bædedinta tänota wi æmpoyongä atabopa. Ayæ mäa go mäa

miinäni quëwënäni incæ adocanque iñömö tömengä nänö tedepämo detæbo të bai inte botö imote, “Pöe,” ante yedæ angä ëñentabopa. ² Tæcæ ayömo cabayo näämænta ëñacä do a ongongä atabopa. Cabayo inte në tæ contacä iñömö to piyæncaimpa næængantapa. Tömengä iñömö wadäni inänite guëadö guëa cæte tæi emongä inte gänä cædongä iñongante Awënë poganta pönönäni æninque tömengä wæætë guëadö guëa cæcæte ante cabayo mongænte gocantapa.

³ Ayæ Wængonguï Codotedo wæætë tee bædedinta wataa wi æmpoyongante mäa go mäa miinäni quëwënäni incæ wacä iñömö botö imote, “Pöe,” angä ëñentabopa. ⁴ Ayæ wacä cabayo opatawæ gonga emö bai ëñacä pongantapa. Waodäni incæ wacä ingä wacä ingä wænoncædänimpa, ante cædinque Wængonguï godö angä beyænque cabayo inte në tæ contacä iñömö, Inguipoga quëwënäni piyænë cædämaï incædänimpa, ante në cæcä bacantapa. Ayæ, tömengä ingante ñænæ yaëmë bai pönönäni ængantapa.

⁵ Ayæ Wængonguï Codotedo wæætë tee bædedinta wataa wi æmpoyongante mäa go mäa miinäni quëwënäni incæ ayængä iñömö botö imote, “Pöe,” angä ëñentabopa. Tæcæ ayömo cabayo wentamö ëñacä do a ongongä atabopa. Cabayo inte në tæ contacä iñömö tee mangui önonemponæængä ingantapa. ⁶ Ayæ mäa go mäa miinäni quëwënäni weca tedepämo bai ëñëñömo, “Todigomö tönö tebadamö näni cænguimö, ante nanguï näni godonte æimö impa, ancæte ante iïmaï angä ëñentabopa. Tömäa itädë cædäni ate näni cæganca beyæ todigomö mäa diboda pöni tee mangui ganca mäninque godonte æncædänimpa. Adobai tömäa itädë cædäni ate näni cæganca beyæ tebadamö önompo æmæmpoque go adoque diboda tee mangui ganca mäninque godonte æncædänimpa. Ayæ oginguipæ ante odibomö näni ämö eyepæ pæcæimpa, ante ee aedäni. Biinömæ ante yowe eyepæ

pæcæimpa, ante ee aedäni.”

⁷ Ayæ Wængonguï Codotedo wæætë tee bædedinta wataa wi æmpoyongante mēa go mēa mīnāni quēwēnāni incæ tōmangā iñōmō botō imote, “Pöe,” angā ēñentabopa. ⁸ Tæcæ ayōmō cabayo nāmēnāa ēñacā do a ongongā atabopa. Cabayo inte nē tæ contacā iñōmō tōmengā emōwo, Nē Wænōinengā, ante pemonte emongantapa. Waodāni nāni wænte ongōñōmō awēnē tōmengā miñæ tee empo pongantapa. Wængonguï Codotedo pōnō cæcā beyænque tōmēna inguipoga quēwēnāni inānite adinque mēnaa go mēnaa iñōnānite adocanque ingante wænōinque ayæ wadāni mēnaa go mēnaa iñōnānite adocanque ingante wænōinque nanguï ināni inānite nē wænōna badatapa. Tōmēna pancadāniya inānite yaēmenca nē wænōna badatapa. Ayæ tōmēna godō cæda beyænque waodāni pancadāniya gue ænente nāni wænguimāmo pō wæncædānimpa. Ayæ tōmēna godō cæda beyænque pancadāniya quingæ wodonte nāni wænguimāmo pō wæncædānimpa. Ayæ tōmēna godō cæda beyænque pancadāniya babæidi wænōnāni beyæ wæncædānimpa.

⁹ Ayæ Wængonguï Codotedo wæætë tee bædedinta wataa wi æmpoyongante botō, Wængonguï qui, ante nāni wēmonca iya tāimoga ænōmengadæ inō waodāni onōwocaidi owodāni atabopa. Mānīnāni Wængonguï nānō angainō ante nē ēñente cædāni inte, Itota mōnō Codito inongā ingampa, ante, Nō ante impa, ante apænedāni beyæ tōmēnāni inānite wænōnāni wængaināni inānitapa. ¹⁰ Adodāni yedæ äninque iimāi änānitapa, “Awēnē Wængonguï bitō tōmānāni inānite nē Aabi inōmi imipa. Edæ tæiyæ waēmō inōmi inte biṭō nē nō ante apænebi imipa. Ininque inguipoga quēwēnāni mōnitō imōnite nē wænōnināni inānite æiquedō apænte anguimii. Ayæ mōnitō wepæ mōni gowepæ beyæ ante tōmēnāni inānite æiquedō panguimii amōnipa.”

¹¹ Mānīnāni tōmānāni inānite tōmengā doyæncoo nāmæntacoo pōnongā ænānitapa. Æñōnānite, “Wædænque ayæ ee ongōedāni,” äninque tōmengā, “Mīnitō imīnite do wænōnāni wæmīni bai wadāni mīni tōniñadāni ayæ mīnāni quēwēnāni inte mīnitō tōnō Wængonguï ingante nē cædōnāni inānite wænōncædānimpa. Ināni inānite wænonguēnēnāni inānipa, ante Wængonguï nānō änō bai tōmēnāni inānite inque nāni wænonganca ee ongōedāni,” amopa, ante angantapa.

¹² Ayæ Wængonguï Codotedo wæætë tee bædedinta wataa wi æmpoyongā atabopa. Māniñedē tæimō goinque ocæ ocæ gotimpa. Waodāni tōmēnāni guidengā wængā ate wæwente beyænque wentamoncoo mongænāni bai nænque iñontobæ adobai wentamō pōni emō batimpa. Apāicā pæibo iñedē incæ wepæ bai opatawæ emō batimpa. ¹³ Ayæ nēmoncoo oönædē inō owocoo iñōmō wææ tæ ayæ waa wææ tæ ayæ waa wææ tæ inguipoga iñōmō tæ wæænīnque igowæmō ayæ icadāmaï iñonte nanguï woboyæ pæmæñonte woga woga cædinque tæ wæænte bai adobai tæ wæænānitapa. ¹⁴ Ayæ oönæ incæ mincayonta dadi ompote bai dæ ä batimpa. Ayæ tōmanquidi tōmāa wāa tēiwæne iñontobæ wayōmō gote dæ ä bai inimpa.

¹⁵ Ayæ awēnē odeyēidi incæ ñænænāni inte nē cædōnāni incæ tontadoidi awēnēidi incæ nē nanguï éadāni incæ tæi piñænte cædāni incæ tōmēnāni guñente badānitapa. Ayæ awēnē nē godonte æningā beyænque nē cæte quēwēnāni incæ nāmanque cæte quēwēnāni incæ tōmēnāni tōmānāni guñente badānitapa. Guñente badinque tōmēnāni ānanquidi æite ontatodē iñōmō wē womōnānitapa. Ayæ onquiyaboga dicabocodē tæcæguedē go guite wē womōnānitapa. ¹⁶ Ayæ waodāni inānite aa pete bai tōmēnāni, “Onquiyaboidi ēñēdāni, dicaboidi

ēñēedāni, Awēnē tæ contaimpaa nē tæ contadongä mönitö imönite adāmaï incæcäimpa, ante cædinque mīnitö mönitonga tæ wæænte beocaedāni,” ante aa pedānitapa. Ayæ, “Wængonguï Codotedo ænguï badinque mönitö imönite pānāmaï incæcäimpa, ante cædinque tæ wæænte beocaedāni,” ante aa pedānitapa. ¹⁷ “Edæ tōmēna nāna nangui pōni ænguï baquiönæ do ba ïninqe æcānō ayæ quēwenguingāā. Edæ dæ ä inguinō anguēnē,” ante wædānitapa.

7

Wængonguï anquedo nänö nē yewæmōināni

¹ Ayæ ate Wængonguï anquedoidi mēnaa go mēnaa ongōnāni atabopa. Adocanque yædæcapæ ïnō ongōñongante wacā yæwainō ongōñongante wacā ïmatæ betamonca ïnō ongōñongante tōmangä æmatæ betamonca ïnō a ongongan-tapa. ïninqe, Woboyæ mēa go mēa ïñonte mönō a ongōnō ïnō inguipoga go pæmænāmaï, ante cædinque cædānitapa. Tōmēnāni ōmaa ïñōmō incæ gāwapæntibæ ïñōmō incæ adobai tōmāo awæncoo pæyōmō incæ woboyæ pæmænāmaï ingæimpa, ante cædānitapa. ² Wacā anquedo nænque tamōnō ïnō pongä atabopa. Tōmengä Wængonguï nē Quēwengaingä nänö yewæmōingō næænte pongä atabopa. Wængonguï anquedoidi mēnaa go mēnaa ïnāni ïñōmō inguipoga incæ gāwapæntibæ incæ wo ewente cæcædānimpa, ante cædinque Wængonguï godō cæcā beyænque tæï piñænāni badānitapa. Mānīnāni ïnānite Wængonguï anquedo ñōwo pōningä yedæ aa pecantapa. ³ “Ee ongōedāni. Edæ mīnitö inguipoga incæ gāwapæntibæ incæ awæncoo incæ ee wo ewēnāmaï ïñōmīnite mönitö Wængonguï ingante nē cædāni nāni önōnemō ïnō tōmengä nänö yewæmōi ante tāno yewæmoncæmōnimpa. Yewæmōmōni ate mīnitö māñīñedē ate wo ewente cæedāni.”

⁴ Ayæ yewæmōināni æpodānidō badānitapa, ante apæñecā ēñentabopa. Tōmānāni yewæmōināni inte tiento coadenta i coatodo müido ganca ïnānitapa. Idægoidi nāni cabo tipæmpoga go mencabodāniya ïñōnānite ïīmaï yewæmōināni badānitapa.

⁵ Wēēñēñedē Oodaa wodi pæināni nāni cabo ïñōnānite nē yewæmōināni ïñōmō tipæmpoga go mēa müido ganca ïnānitapa.

Ayæ Odobeē wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

Ayæ Gado wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

⁶ Ayæ Atedo wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

Ayæ Nempatadii wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

Ayæ Mānatee wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

⁷ Ayæ Timeönō wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

Ayæ Debii wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

Ayæ Itacado wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

⁸ Ayæ Tabodōo wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

Ayæ Ootee wodi pæināni nāni cabo ïñōnānite nē yewæmōināni wææ tipæmpoga go mēa müido ganca ïnānitapa.

Ayæ adobai Beencaminö wodi pæinani nani cabo iñonänite nē yewæmōinani wææ tipæmpoga go mēa miido ganca inānitapa.

Tæiyæñāni nāāmæntacoo mongænte a ongōninque

⁹ Ayæ ate wæætē ayōmō tæiyæñāni ināni a ongōnāni atabopa. Æpodānidō ināni, ante æcānō tee mampote anguingā. Mānināni wabæca nāni quēwencabo wabæca nāni quēwencabo inte tæiyæñāni incæ waodāni nāni cabo waodāni nāni cabo inte tæiyæñāni incæ wacā awēnē nāni cabo wacā awēnē nāni cabo inte tæiyæñāni incæ wadō nāni tedecabo wadō nāni tedecabo inte tæiyæñāni incæ mǎnōmaī inōnāni inte ongōnānitapa. Īināni iñōmō nāāmænta weocoo doyæncōo mongæñāni inte yædēmæmāa onōnempo nææninque Awēnē nānō aacæ tæ contaimpa gāānē ongōninque Wængonguī Codotedo weca a ongōnānitapa.

¹⁰ Ayæ tōmēnāni yedæ āninque iīmaī ānānitapa.

“Mōnō Wængonguī iñōmō tōmengā nānō aacæ tæ contaimpaa nē tæ contacā inongā inte

tōmengā adocā mōnō imonte, Quēwencæminimpa, ante nē Ængā inongā ingampa.

Ayæ Wængonguī Codotedo adobai mōnō imonte, Quēwencæminimpa, ante nē Ængā inongā ingampa,” ānānitapa.

¹¹ Nē aadāni nē Picæñāni tōnō mēa go mēa miināni quēwēnāni Awēnē tæ contaimpa gāānē ongōñōnänite Wængonguī anquedoidi tōmānāni iñōmō yabæ inō godāmæ ongōnānitapa. Wængonguī nānō aacæ tæ contayōmō gāānē guidōmēmæ ædæ wææninque tōmēnāni Wængonguī ingante, Bitō Wængonguī Awēnē imidō anguēnē, ante watapæ apænedānitapa. ¹² Ayæ ānānitapa.

“Amēē. Mōnō Wængonguī ingante watapæ apænemōnipa.

Ayæ tōmengā ñāō emongānō anguēnē. Tōmengā tōmānō ante eñēnongā ingānō anguēnē.

Tōmengā ingante waa adinque mōnitō tōmengā ingante waa ate pōnente apænemōnipa.

Ayæ tōmengā tæi piñængā ingānō anguēnē.

Tōmengā tæi piñængā inte tōmāā nānō cæinēnō cædongā ingampa.

Wantæpiyæ iñonte cōwē māninō ante ancæmōnipa.

Mānōmaī baquinō anguēnē, ante, Amēē,” ānānitapa.

¹³ Ayæ nē aadāni nē Picæñāni incæ adocanque botō imo āninque, “Īināni nāāmæntacoo doyæncōo nē mongæñāni iñōmō æmōnānidō inānitawo. Edæ ædōnō quēwēnāni inte pōnānitawo,” angantapa. ¹⁴ Āñongante botō tōmengā ingante, “Awēnē bitō tōmēmi do eñēmipa,” antabopa. Āñōmote tōmengā wæætē, “Mānināni nangui nāni wæwengaimāmo iinque baganca incæ ayæ miināni quēwēnāni inānipa. Edæ tōmēnāni weocoo doyæncōo, Waēmō pōni bacæimpa, ante Wængonguī Codotedo wepæñē yamongaināni inānipa,” ante nē aacā nē Picængā apænecantapa.

¹⁵ Ayæ adocā godōmenque apænecantapa.

“Mānōmaī beyæ Wængonguī nānō aacæ tæ contaimpa gāānē a ongōninque tōmēnāni

itædē incæ woyowotæ incæ Wængonguī oncō tæiyæ waēmō oncōnē tōmengā ingante cōwē cædānipa.

Īinque oncontai bai tōmēnāni wænōmēnæca wo cæcā bai cædinque mānimpaa nē tæ contadongā iñōmō

tōmēnāni inānite ante wææ aacæcāimpa.

¹⁶ Tōmēnāni cōwē gue ænēnāmaī tepæ gæwænāmaī incædānipa.

Nænque tōmēnāniya ti nāwānāmaī i iinque tōmēnāni gōnāmaī incædānipa.

Quiēmē ocoi ā beyænque tōmēnāni gonte ināmaī inguinānidō anguēnē.

17 Edæ Wængonguï Codotedo
Wængonguï nänö aacæ tæ
contayömö gäänë nē a ongongä
iñömö

tömengä iñömö mäninäni näämæntacoo
nē mongæñäni inänite nē aacä
incæcäimpa.

Tömengä edæ tömënäni inänite
quëwenguimæ tapæñömö
iñömö ænte mäocä goquinäni.

Ayæ Wængonguï tömënäni wëñapæ
näni tamonte wædi tömämæ
wadæ cæmoncæcäimpa,” an-
gantapa.

8

Tee bædedinta tömanta wi æmpocampa

1 Ayæ Wængonguï Codotedo tee
bædedinta tömanta wi æmpoyongante
öönæde iñömö mëedia ooda ganca
nówæ ongonte batimpa.

2 Ayæ anquedoidi önompo æmæmpoque
go mëa ganca inäni Wængonguï
weca nē a ongönäni inänite atabopa.
Mäninäni inänite tömengä todompeta
näni ancade önompo æmæmpoque
go mencadea ganca pædæ godongä
æñänitapa.

3 Ayæ wacä anquedo
iñömö oguï waaquï iya täincade oodo
inte näni badöincade nææninqe,
Wængonguï qui, ante näni iya
täimpa gäänë ponte a ongongan-
tapa. Mänimpa oodo inte näni
badöimpa Wængonguï nänö aacæ
tæ containpa gäänë ongönimpa.

Ayæ, Wængonguï quinäni tömengä
ingante apæneyönäni bitö oguï
waaquï tancæbiimpa, ante cædinque
adocä anquedo ingante wacä
pöninge nanguï oguï waaquï
godongä ængantapa.

4 Ænte önompo
næænte oguï waaquï iya tangä
ininqe tæmämämo Wængonguï weca
æipämoyedë Wængonguï quinäni
tömengä ingante näni apænepämo
guëa adoyömö æipämotimpa.

5 Ayæ adocä anquedo iñömö oguï waaquï
iya täincade æninqe iya täimoga
gonga ænte eyede wëninge in-
guipoga iñömö wææntodongantapa.
Wææntodongä ate detæbo tæi tæi tē

goyö yedæ pönï änimpa. Yædæ yædæ
nänimpa. Ayæ goinque gotimpa.

Todompeta näni ancade

6 Ayæ Wængonguï anquedoidi
önompo æmæmpoque go mëa ganca
inäni todompeta näni ancade önompo
æmæmpoque go mencadea ganca nē
nææinäni inte todompeta öñone gö
cædedinque we we öncæ cædänitapa.

7 Wængonguï anquedo tänocä
iñömö tömengä todompeta inte we
we öongä ate yoguica gonga tönö
wepæ adoyömö wempodente bai
inguipoga iñömö tæ tæ wæænimpa.
Tæ tæ wææ ate inguipoga iñömö
pancabaa nanguï ömæ iñömö gonte
batimpa. Awæncoo iñömö panca-
cooga incæ adobai nanguï incoo
gonte wænimpa. Gaguimæncoo
iñömö tömancoo gonte batimpa.

8 Wængonguï anquedo ayængä
iñömö tömengä todompeta inte we
we öongä ate ñænæ onquiyabo
ëmö bai gonga bæcodote bai iñonte
wææntodönäni gäwapæntibaa tæi
tæi guitimpa. Tæi tæi guii ate
gäwapæntibæ iñömö pancatibaa incæ
nanguï pönï æpæ iñömö wepæ
batimpa.

9 Ayæ gäwapæntibæ
cæcadëmæ inö quëwënäni iñömö
pancadäniya incæ nanguï inäni
wænänitapa. Ayæ ñænæ wipocoo
pancacooga incæ nanguï wo
cæwodincoo iñömö wo ewente gui-
itimpa.

10 Wængonguï anquedo ayængä
iñömö tömengä todompeta inte
we we öongä ate ñænæ nëmö
iñömö cadentato tica wodönote
bai öönæde inö owodëmö incæ
tæ wææninqe önoncooga iñömö
pancacooga incæ nanguï æpænë
iñömö tæi tæi guitimpa. Æpæ
tayömö adobai cæcadëmæ inö tæi
tæi guitimpa

11 Mäninëmö ëmowo
iñömö, Ti Nänëmö, ante näni änëmö
impa. Nëmö tæi guiyonte nan-
guï æpæ iñömö moncapæ bai ti
nämæ batimpa. Waodäni tæiyænäni
iñömö imæ ti nämæ bagaimæ bete
wænänitapa.

12 Wængonguī anquedo ayængä iñömö tömengä todompeta inte we we öongä ate nænque pancayömonga tente ba ate apäicä adobaī pancayömonga tente ba adinque nāna apäidīnō iñömö pancaa wēmō batimpa. Nēmoncoo iñömö pancadāniya incæ nangui ināni wo ewente badāni ate nāni apäidīnō iñömö pancaa wēmō batimpa. Itädē iñonte tipæmpoga go mēa ooda ganca iñö mēa go mēa ooda ganca nænque ñāö apäidāmaī inimpa. Ayæ woyowotæ iñonte tipæmpoga go mēa ooda ganca iñö mēa go mēa ooda ganca apäicä tönö nēmoncoo apäidāmaī inānitapa.

13 Ayæ ayömote guingämōwæ öönædē gāmænō pao pao godinque iīmaī ante aa pecä eñentabopa. “Inguipoga quēwēnāni nāni wæquinque. Nāni wæquinque. Nāni wæquinque impa, angantapa. Edæ Wængonguī anquedoidi mēnaa go adocanque ināni inte tömēnāni todompeta inte we we öoncæ cädāni beyænque inguipoga quēwēnāni iñömö nangui pōni wæwenguināni bacädānimpa,” ante guingämōwæ angantapa.

9

1 Wængonguī anquedo ayængä iñömö tömengä todompeta inte we we öongä ate wa nēmō öönædē inō owod-
 inque inguipoga tæ wæængainēmō ongö atabopa. Mānii nēmō ingante tadömengadænguipo ontatodē wi ænequī godonte inimpa.
 2 Wi ænequī æninque ontatodē wi ænecä ate tēemancoo ta æitimpa. Mānii tēemancoo ñænæ gongapamō tēemancoo bai inimpa. İninque iī tēemancoo tadömengadænguipo ontatodē ta æiyonte nænque tönö öönæ wentamō pōni badainpa.
 3 Tēemancodē inō ñāwāi ta pōninque inguipoga iñömö wææñōnānite wacä godö cæcä beyænque tömēnāni tæimō badinque emēñe inguipoga quēwēnāni bai tæ guidāni badānitapa.
 4 Ayæ tömēnāni inānite, Inguipoga gaguimæncōo incæ gæpæñabocōo incæ awæncōo incæ pæcōo wo

ewēnāmaī iedāni. Wæætē waodānique öönēmō inō Wængonguī nänö yewæmōi inte nē yewæmōnāmaī ingaināni inānite adinque mīnitō tömēnāni inānite godö cæmīni beyænque nantate wæcädānimpa, ante wacä angantapa. 5 Ayæ ñāwāiidi inānite edæ, Wænōedāni, änāmaī ingä inte tömengä, Mīnitō wæætē tömēnāni inānite önompo æmæmpoque apäicä ganca cæmīni beyæ nangui pōni wæwencädānimpa, angantapa. İninque emēñe tæ guī waocä nantate wæcä bai tömēnāni nangui pōni nantate wæwēnāni inānitapa.

6 Māniñedē waodāni, Æbānō cæte wænguimoo, ante ancaa cædinque wænāmaī incädānimpa. Wæinēmōnipa, ante änāni incæte ædö cæte wæmāināni.

7 Ayæ ñāwāiidi iñömö tontadoidi cabayoidi guēadō guēa cæte nē godāni bai adobaī emōnānitapa. Tömēnāni ocaboga awēñe poganta oodo inte badōninta bai wencädānitapa. Ayæ mānināni awinca iñömö waodāni awinca bai emōnānitapa. 8 Tömēnāni ocaguī iñömö onquiyængä ocaguī bai encadinque tömēnāni bagacōo iñömö nēöö бага bai engadānitapa. 9 Tömēnāni tæcætawē inō tæineta inte badōinta bai wææ mongænānitapa. Ayæ tontadoidi guēadō guēa wænoncæte ante cædinque änāni ate cabayoidi pogodo gote awoto bai wēä pōnonte nangui pōni ä bai ñāwāiidi iñömö adobaī önonguēnepæ pao pao godinque ämæ godānitapa. 10 Tömēnāni önömiñæ incæ emēñe önömiñæmpa bai emiñænānitapa. Tömēnāni nāni tæi piñæmāmo önömiñæ inō emiñænāni inte önompo æmæmpoque apäicä ganca godö cädāni beyæ waodāni nangui pōni wæwēnānitapa. 11 Mānii ñāwāiidi iñömö awēñe od-eye ingante eñente quēwēnānitapa. Māningä tömēnāni awēñe iñömö tadömengadænguipo iñömö quēwēnāni inānite nē aacä anquedo inongä inte tömengä emōwo ebedeo tededō, Abadoö, nāni äwo i ayæ, Nē Wo Æwengä, ante emongä ininque guidiego

tededö, Apodiö, ante pemönänipa.

12 Tāno nāni wæquinque do iinque batimpa. Incæte godömenque mempoga ganca nangui pönī nāni wæquinque ayæ baquinö anguēnē.

13 Wængongui anquedo ayængä iñömö tömengä todompeta inte we we öongä ate tedepāmo tēñö ēñentabopa. Ogui waqui iya täimpa oodo inte badöimpa Wængongui weca mæ ongompa. Mänimoga önömoncawæ bai mēa go mēa mæ ongöñömö māniñömö tedepāmo tēñö ēñentabopa.

14 Wængongui anquedo ayængä todompeta nē næængä ingante iima angantapa. “Nænæ öonga Eopadat-edö nāni änonga iñömö anquedoidi mēnaa go mēnaa ināni iñömö nē ñā cæyænīnāni inānite bitö ñimpo cæ,” angantapa. 15 Edæ mänināni anquedoidi mēnaa go mēnaa ināni iñömö tömēnāni mänīnepo iinque ba ate mänīi apäicä iñonte mänīönæ incæ mänīi ooda iñonte dobæ nāni cæquinque ante a ongöñönānite iima angantapa. Waodāni tömānāni iñömö mencabodāniya go adocabodānique quēwēñönāni adocabodānique inānite mīnitö wænoncæminimpa, angantapa. Ayæ ñöwo tömēnāni inānite ñimpo cæcä ate tömēnāni wænoncæte ante tao godānitapa. 16 Ayæ ton-tadoidi iñömö cabayo mongæināni ināni æpodānidö ināni, ante tee mampote dootiento miñöo ganca inānitapa. Mänimpodāni inānipa, ante ēñentabopa.

17 Botö wiimonte bai ayömo cabayoidi tönö nē mongæināni iñömö iima emönāni atabopa. Cabayo nē mongæināni iñömö tæcætawē inö tæineta nāni wææ mongæntacoo pancataa opatawæ gonga gonte bai emontapa. Pancataa wentamö emontapa. Pancataa atopode nāni ä bai wiñadæ emö bai emontapa. Cabayoidi ocabo iñömö nēöo ocabo bai encadānitapa. Tömēnāni önöne inö gonga tönö tēemä tönö atopode nāni öo waadö tadedānitapa. 18 Mänīi gonga tönö tēemä tönö atopode iñömö mēmāmoque go adopāmoque

nāni wænömāmocoo nē tadedāni inte cabayoidi iñömö waodāni tömānāni mencabodāniya go adocabodānique quēwēñönāni adocabodānique inānite wænönāni wænānitapa. 19 Mänināni cabayoidi tömēnāni önöne inte tæi piñænte wænöninque adobai tömēnāni önömiñæ inte tæi piñænte wænönānipa. Edæ tömēnāni önömiñæ iñömö tæntæ ocabo bai emiñænāni inte waodāni inānite pocænāni wænānitapa.

20 Mänimāmo wodonte nāni wængaimāmocoo beyæ ayæ wænāmai quēwēnāni inte wæwēnāni incæte tömēnāni nāni wēnæ wēnæ cægainö ante, Ancaa wæwente awædö, ante pönēnāmai ināni inte ñimpo cædāmai inānitapa. Wæætē oodo inte padata inte bodonte inte dica inte awæmpa inte tömēnāni nāni badonte cönönincoo iñömö adāmai incoo incæte ēñēnāmai incoo incæte dao dao godāmai incoo incæte tömēnāni, Mönitö wængonguidi inānipa, ante ædæ wæænte apænedinque ñimpo cædāmai inānitapa. Ayæ adobai wēnæidi inānite ædæ wææninque, Mīnitö mönitö wængonguidi imīnidö anguēnē, ante ñimpo cædāmai inte apænedānitapa. 21 Ayæ mänināni godömenque waodāni inānite piinte wænönāni inte tömēnāni mīi bete yewænāni inānipa. Nänöogængä ināmai iñongante towente cædönāni inte tömēnāni awēmö ö ænāni inānipa. Mänömai godömenque cædinque tömēnāni nāni wēnæ wēnæ cægainö ante, Ancaa wæwente awædö, ante pönēnāmai ināni inte ñimpo cædāmai inānitapa.

10

Wængongui anquedo dadi ompointa guiyanta næcængä

1 Ayæ wacä anquedo nē tæi emongä inte öönæde inö wæængä atabopa. Tömengä weocoo mongænte bai boguimancodē pöninque tömengä ocaboga tæcædæca inö daimē godāmæ owotapa. Tömengä awinca incæ nænque bai apäidinque tömengä önömēnē incæ cobacadewæ gonga

gonte emö bai emenengä ingantapa. ² Tömengä önönempo inö dadi ompointa ininta nani wi æmpodinta guiyanta næængä ingantapa. Tömengä önöwa tömëwa gäwapæntibaa cö cæwadinque tömengä dipæwa guiquënë ömaa cö cæwacantapa. ³ Mänömai cö cæwadinque tömengä neöo ii pepa bai nangui pöni yedæ aa pecantapa. Aa peyongä detæbo önompö æmæmpoque go mëa ganca wæætë tæi téninque tededänitapa. ⁴ Detæbo önompö æmæmpoque go mëa ganca inäni inömö tededäni eñëninque botö yewæmoncæ cætabopa. Tæcæ yewæmoncæ cæyömo öönæde inö tedepämo iimaï ante tedecä eñentabopa. “Inæmpa önompö æmæmpoque go mëa detæbo nani tededö æbänö ante tededäni, ante wii eñenguï i ininque bitö yewæmönämai ië,” angantapa.

⁵ Wængonguï anquedo botö adingä inömö gäwapæntibaa tönö ömaa në a ongongä inömö tömengä önompö tömempo öönæde inö pædæ æmpocantapa. ⁶ Tömengä tömempo pædæ æmpodinque, Wængonguï eñëngä botö änö ante nöingä baquino anguënë, ante iimaï angantapa. Edæ në wantæpiyæ cöwë quëwengaingä inte öönæde tömäa inguipoga tömäa gäwapæntibæ tömäa badöninque tömengä adobai öönæde owodäni tömänäni inguipoga quëwänäni tömänäni gäwapäa quingänö owodäni tömänäni inänite në badongaingä inte tömengä emöwo apænedinque, Botö apænedö nöingä baquino anguënë, ante në apænecä inömö, “Mönö ee ongöñedë do iinque batimpa, angantapa. ⁷ Edæ Wængonguï anquedo tömangä pöni inömö tömengä todompeta we we öoncæ cæyongante Wængonguï nänö cæinënö ante wë wodonte bai nänö angainö ante nöwo iinque cæcæcäimpa. Wængonguï ingante në cægainäni tömengä beyæ në apænegainäni inönänite mäninö nänö cæinënö ante do apænegaingä inte Wængonguï mäninö bai nöwo iinque

cæcæcäimpa,” angantapa.

⁸ Ayæ öönæde inö tedepämo adopämo do botö eñënö nöwo wæætë botö imote iimaï angä eñentabopa. “Wængonguï anquedo në gäwapæntibaa tönö ömaa inömö a ongongä weca godinque bitö tömengä önönempo dadi ompointa ininta nani wi æmpodinta nänö nææininta æe,” angantapa. ⁹ Angä eñëninque Wængonguï anquedo weca godinque botö tömengä ingante, Dadi ompointa guiyanta pönömi æmoe, ante añömo tömengä wæætë botö imo, “Æe. Æninque cæe. Bitö önöne da wëneyömi guinëmæ bai waëme pöni ingæimpa. Incæte yo mongænte ate cæncadë guidinque ti nä bacæimpa. Ininque cædente wæcæbiimpa,” angä eñentabopa.

¹⁰ Wængonguï anquedo önönempo dadi ompointa guiyanta æninque botö ade cæntabopa. Önöne guinëmæ bai waëme pöni i incæte yo mongænte ate cæncadë guidinque ti nä badinque cædente wætabopa. ¹¹ Ayæ botö imote angantapa. “Wacä awënë nani cabo wacä awënë nani cabo incæ wabæca nani quëwencabo wabæca nani quëwencabo incæ wadö nani tedecabo wadö nani tedecabo incæ wabæca wabæca nani awënë od-eye cabo inönänite bitö, Mäninäni inänite æbänö baquii, ante wæætë Wængonguï beyæ apænecæbiimpa,” ante angantapa.

11

Wængonguï cæbänö cæcää, ante mënaa apænedapa

¹ Wacä botö imote, Tee manguimpa impa, ante cæwipa bai pædæ pönöninque ayæ botö imote, “Goe, angantapa. Wængonguï oncö tæiyæ waëmö oncönë godinque mänincö tönö, Wængonguï qui, ante nani iya täimpa tee mäe. Ayæ wadäni adoyömö ædæ wææninque Wængonguï ingante, Bitö Wængonguï Awënë imidö anguënë, ante wat-apæ apænedäni inömö æpodänidö inänii, ante tee mampote cæe.

2 Wængongui oncö tæiyæ waëmö oncönē tee mäninque yacö boyäa iñömö tee mänämaï ie. Edæ mänincö boyäa wadäni oodeoidi inämaï inäni inänite do godonte intapa. Mäninäni edæ coadenta i doo apäicä ganca mänimpoga iñonte Wængongui nänö tæiyæ waëmö quëwëñömö incæ wo ewente cæcädänimpa. ³ Ayæ botö imotedö ante, Botö æbänö cæboo, ante nē, Nö ante impa, ante apæneda iñonate botö godö cæquimo beyænque tömëna tæi piñante badinque miido dootiento tetenta eönæ mänimpoönæ iñonte botö beyæ apænecädänimpa. Waodäni wæwente beyænque gömæ ëmoncoo mongænäni bai tömëna adobai gömæ ëmoncoo mongæninque apænecädänimpa,” ante apænecä ëñentabopa.

⁴ Wængongui æbänö cæcää, ante nē, Nö ante impa, ante apæneda iñömö tömëna iñömö Wængongui inguipoga Awënë iñongante tömengä weca odibowæ nani äwæ mēwäa ongöwæ bai inapa. Ayæ tömengä weca yædo concædi ti wodönoincade mencadea ongoncade bai mänina iñömö adobai inöna inapa. ⁵ Wadäni, Tömëna inate wënæ wënæ cæinëmopa, ante cädäni ininque tömëna wæætē nē piinte cädäni inänite gonga wo tadete bai cædinque wænöna wæncädänimpa. Edæ, Tömëna inate wënæ wënæ cæinëmönipa, ante nē cädäni tömänäni mänömaï wæncädänimpa. ⁶ Wængongui godö cæcä beyænque tömëna tæi piñænä badinque, Wængongui beyæ möna apæneyedē cöönæ cädämaï ingæimpa, ante cædinque öönädē tee mönete bai cæcädänimpa. Ayæ tæi piñænä inöna inte tömëna æyedēmē cæinëna incæ wæætē wæætē cæyönate æpæncoo tömancoo wepænque bacæimpa. Adobai inguipoga tömämæ quëwënäni inänite tömëna cæda ate quiëmē wænömämocoo incæ pö wënæ wënæ bacädänimpa.

⁷ Ayæ tömëna, Wængongui æbänö cæcää, ante iinque apæneda ate

babæcä bai mönö guiñënongå inte tadömengadænguipo inö tadinque tömëna inate guëadö guëa cædinque tæi ëmongä inte gänä cædinque wænongä wæncädänimpa. ⁸ Wænä ate tömëna baonque ñænængade nani quëwëñömö taadö iñömö öñoncädänimpa. Edæ Todömä iñömö quëwënäni wiwa cädäni bai ayæ Equitobæ quëwënäni wënæ wënæ cädäni bai mänii ñænængade nani quëwëñömö nē quëwënäni iñömö adobai wënæ wënæ cädänipa. Mänii quëwëñömö adoyömö tömëna Awënë ingante awäa timpote wænönäni wængacäimpa. ⁹ Mëönaa go adoönæque go tæcæ itädē iñonte tömëna baö ini acæte ante pöninque wacä awënë nani cabo wacä awënë nani cabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wabæca wabæca nani quëwencabo incæ waodäni nanguï inäni ponte tömëna baö acädänimpa. Ayæ, Da wënämaï ingæimpa, ante wææ cæcädänimpa. ¹⁰ Tömëna iñömö Wængongui beyæ nē apænedinä inöna inte inguipoga quëwënäni inänite nanguï äna wædinäni inte tömënäni ñöwo wæætē watapæ tocädänimpa. Ininque tömëna mänömaï wænte öñöna ate tömënäni nanguï Yæ yæ todinque wacä ingä wacä ingä, Önonque æe, ante pædæ godönäni æncädänimpa.

¹¹ Mëönaa go adoönæque go tæcæ itädē iinque go ate Wængongui edæ, Quëwencæmïna, ante tömengä nänö guëmämämo quëwenguimämo woo öongacä ate tömëna iñömö wæætē miina badinque ængæ ganticädänimpa. Ængæ gantiyöna nē adäni guiquënë ancai guiñente wæcädänimpa. ¹² Ancai guiñente ayönäni tömëna öönädē inö tedepämo yedæ ante ëñencädänimpa. “Iñömö pö æeda,” angä ëñëninque tömëna öönädē inö boguimancodē æiyöna tömëna inate nē piinte cædinäni edonque acädänimpa. ¹³ Tömëna æiyedē mäniiñedē goinque nanguï ocæ ocæ goquimpa. Tömënäni

näni quëwëñömö onconcoo bacoo iñonte pancaconga incæ nanguï onconcoo acapowate bogocæ tæ gowæænguimpa. Ado goinque goyedë waodäni tiæte müido ganca wæncædänimpa. Ayæ mïinäni quëwëñäni ancai guiñëninque, Wængongui öönæde nê quëwëmi imi inte bitö nö tæi piñænte imidö angüenë, ante wæcædänimpa.

¹⁴ Ayæ mempoga näni wæquinque do iñque batimpa. Incæte godömenque adopoque nanguï pönï näni wæquinque oo pönï bacæimpa.

Todompeta æmcëwoya

¹⁵ Wængongui anquedo tömengä iñömö tömengä todompeta we we öongä ate öönæde inö wadäni näni tedepämo yedæ tededinque iïmai änanitapa.

“Mönö Awënë Wængongui tömengä
Codito tönö
ingui-poga Tæiyæ Awënë Odeyeda
badinque
wantæpiyæ cöwë aacædaimpa,”
änänitapa.

¹⁶ Nê aadäni nê Picænäni iñömö bæinticoatodo ganca inäni mänimpodäni iñömö Wængongui weca tömënanäni awënë tæ containpaa nê tæ contadäni inte ñowo guidömëmæ ædæ wææninque Wængongui ingante, Bitö Awënë Wængongui imidö angüenë, ante watapæ apænedänitapa.

¹⁷ Ayæ iïmai apænedinque,
“Awënë Wængongui bitö adobique
Tömää nê Cædömi inte
wëenëñedë do nê quëwengäimi imi
ñowobi inömi imipa.

Bitö nämä tæi piñæmi inte ñowo ædæmö nê aabi inömi imipa, ante adinque bitö imite waa ate pönente apænemönipa.

¹⁸ Wabæca wabæca näni quëwencabo incæ tömänäni quëwëñäni ænguï badänitapa.

Ayæ bitö ænguï babi iñinque nê wængainäni inänite bitö apænte panguiönæ do batimpa.

Ayæ bitö beyæ nê apænedönäni iñömö bitö imite nê cædönäni iñönänite

tömënanäni inänite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ bitö quinäni iñönänite bitö ëmowo ante bitö imite nê ëñente cædönäni iñönänite

awënë bai inäni incæ önönänique inäni incæ tömänäni inänite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ ingui-poga quëwëñäni inänite wadäni nê wo ëwente cædönäni iñönänite bitö wo ëwente cæquiönæ do batimpa.”

¹⁹ Ayæ öönæde inö Wængongui tæiyæ waëmö oncö odemö wibænetapa. Wibæneyö Wængongui, Waodäni æbänö cæte botö tönö godongämæ waa cæte quëwencædänimpa, ante odömoncæte ante nänö yewæmongainca näni da wencaincade iñömö mänincönë mæ ongoncade atabopa. Ayömote yædæ yædæ näinimpa. Yedæ pönï änimpa. Detæbo tæi tæi tëñö yedæ pönï änimpa. Goinque gotimpa. Ayæ yoguica cöönæ bai nanguï cæte wæænimpa.

12

Onquiyængä tönö dadagöö näni änongä

¹ Wængongui, Mä pönï odömömo adinque ëñencædänimpa, ante cædinque öönæde inö waëmö pönï badongä a owo atabopa. Edæ onquiyængä iñömö nænque inte weocoo wëñate bai mongæñongä apäicämo incæ tömengä cæncædëwa ænömengadëwa inö impa. Tömengä, Awënë poganta, ante tipæmpoga go mä nëmöidi inte godämæ badöinta wencacantapa.

² Mäningä onquiyængä yædemadä ënengä iñongante wëñængä ëñacæ cæcä wæte wædinque wëñæ nantate Yæ yæ wæcantapa.

³ Iñinque Yæ yæ wæyongante öönæde inö mä pönï Wængongui nänö badöi wadö bai badöi a owo atabopa. Edæ ñænængade obe bai dadagöö näni änongä opatawæ ëñacä inte tömengä

ocabocoo önompo æmæmpoque go mencaa encacä inte mänii ocabo-cooga awënë pogantacoo önompo æmæmpoque go mentaa wencacä ingantapa. Tömengä önömoncawæ adobai önompo tipæmpoga ocabo-cooga encacä ingantapa. ⁴ Tömengä önoncaimiñænca picæ cæmiñæninque öönæde öwodäni nömöidi incæ pancadäniya incæ nangui inäni inänite wææntodongä inguipoga tæ wæænänitapa. Onquiyængä oo pöni iñongante dadagöö, Wëñængä ëñacä ate cæncæboimpa, ante tömengä weca a ongongantapa.

⁵ Onquiyængä wëñængä onguiñængä ingante mangä ininque tömengä iñömö nänö Awënë baquinque præcantapa. Tömengä iñömö tæiyæ awënë tömengä nempo quëwënäni inänite aacä bai adobai tömämæ quëwënäni inänite, Iimai cædäni, ante aacæcäimpa. Mäningä onquiyængä wëñængä ingante wacä ö ænte Wængongui weca ayæ tömengä nänö aacæ tæ contayömö mäniñömö ænte mæicä æicantapa. ⁶ Mäninö bayonte wäänä iñömö önömæca iñömö wodii gocantapa. Tömengä beyæ ante Wængongui nänö eyepæ cæyömö mäniñömö wodii gocantapa. Mäniñömö müido dootiento tetenta eönæ mänimpoönæ iñonte tömengä quëwente beyæ cængui eyepæ pönönäni cæncæcäimpa, ante Wængongui tömengä nänö owoyömö ante do badongantapa.

⁷ Mäniñedë edæ öönæde iñömö guëadö guëa cæte wænönänitapa. Wængongui anquedo Miiguedo nani angaingä iñömö tömengä wadäni anquedoidi awënë inongä ingampa. Tömengä tömënäni tönö dadagöö ingante wido cæcæte ante cæyönäni dadagöö wæætë tömengä anquedoidi tönö wæætedö wæætë guëa cædäni incæte ⁸ tömënäni ædö cæte gänä cæquinänii. Edæ ædö cæte öönæde iñömö ayæ quëwenguinänii, ante tömënäni inänite wido cædänitapa. ⁹ Tömënäni iñömö ñænængade dadagöö ingante wido

cæte wææntodönänitapa. Mäningä dadagöö iñömö wëenëñedë tæntæ ingaingä inte tömengä emowo Wënæ Tatäna mëwoga emongä ingampa. Adocä, Inguipoga quëwënäni tömännäni oda cæcædänimpa, ante në wapiticæ ænte mäocä ingampa. Tömengä ingante ayæ tömengä anquedoidi inänite inguipoga iñömö wido cæte wææntodönänitapa.

¹⁰ Ayæ ate öönæde inö tedepämo yedæ ante iimai ä ëñentabopa.

“Ñöwoönæ mönö Wængongui mönö imonte, Minitö botö æmæwo æmo beyænque quëwenguimäni, ante tömengä nänö cæönæ batimpa.

Ayæ tömengä nänö tæi piñænö ñöwoönæ ba ininque

tömengä adobai Tæiyæ Awënë Odeye ñöwoönæ bacäimpa.

Ayæ tömengä nänö apænte ængaingä mönö Codito adobai nämä tæi piñængongä inte në angä bacäimpa.

Wënæ guiquënë mönö töninädäni inänitedö ante, Wënæ wënæ cædänidö anguënë, ante wapiticæ apænete anewëngongä ingampa.

Woyowotæ incæ itæde incæ mönö Wængongui weca a ongöninque tömengä mäninäni inänitedö ante në wapiticæ anewëngongä iñongante tömengä ingante inguipoga iñömö wææntodönäni wæængantapa.

¹¹ Wængongui Codotedo wepæ tömengä nänö wænte godongaimæ beyænque tæi emönäni badinque

mönö töninädäni iñömö wënæ ingante gänä cædänitapa.

Ayæ, Wængongui æbänö cæcää, ante tömënäni nani apænedö beyænque tömënäni tæi emönäni badinque wënæ ingante gänä cædänitapa.

Wadäni tömënäni inänite Wængongui beyæ wænönæ cæyönäni tömënäni,

Mönitö guiñenāmaï wæncæmönimpa,
ante nē änāni inānitapa.

¹² Mänōmaï beyæ mīnitō öönæde
iñōmō nē quēwēmini inte wat-
apæ tocæminimpa.

Wamīni guiquēnē ingui-poga iñōmō
æpæntibæde iñōmō nē quēwēmini
inte mīni wæquinque ingæimpa.

Edæ wænæ mīnitō weca wææ pō
quēwengäimpa.

Tömengä nänö wo ewenguinö oo pōni
impa, ante eñente beyænque
äingä pōni bacampa.

Mänōmaï beyæ mīnitō guiñenguimāmo
baquinque impa.”

Mänōmaï ante yedæ angä eñentabopa.

¹³ Ayæ dadagöö, Botō imote ingui-
poga iñōmō wido cæte wææntodönāni
adi wædō, ante wædinque on-
quiyængä ingante wēñængä onguiñængä
nē māningä ingante bæi ongoncæte
ante togængantapa. ¹⁴ Incæte

Wængongui, Önomæca iñōmō bitō
beyæ botō cæyōmō pao pao
gocæbiimpa, ante cædinque ñænængade
guingämōwæ önonguēnepæ bai
tipænguēnepāa pōnō badongä en-
guēnepænte bai onquiyængä ba-
cantapa. İninqe onquiyængä,
Tæntæ botō imote bæi ongönāmaï
incæcäimpa, ante Wængongui
önömæca tömengä beyæ nänö cæyōmō
pao pao gocantapa. Mēa go
adoque tæcæ wædepo iñonte tömengä
māniñōmō quēwente beyæ nänö
cænguï eyepæ ænte cænguïñōmō
gocantapa. ¹⁵ Ayæ, Onquiyængä
ingante æpæ quingæ mangui bai bæ
ta tæi guicæcäimpa, ante cædinque
dadagöö tömengä önöne inö önö bai
æpæ towæ tadonte bai tao gode-
cantapa. ¹⁶ Dadagöö towæ tadonte
bai nänö tao godepæ quingæ pōnō
ongui-pō incæ onquiyængä beyæ
ante cædinque wi ænete cæyō ada
guiipæntapa. ¹⁷ Ada guiipæ adinque
dadagöö iñōmō onquiyængä ingante
godömenque ænguï badinque wædæ
godinque, Māningä onquiyængä
wēnāni incæ wādāni inānite guēa
cæte wænonguimo, ante gocantapa.

Tömēnāni Wængongui nänö, İmaï
cædāni, ante wææ angainö ante nē
eñente quēwēnāni inte, Itota æbānō
cæcää, ante nē apænete quēwēnāni
inönāni iñōmō māniñāni māningä on-
quiyængä wēnāni iñönānite dadagöö,
Wænoncæboimpa, ante gocantapa.

13

Mēnaa mönō guiñenōna

¹ Ayæ dadagöö æpæntibæ yæwedeca
ëmönaiya iñōmō ponte a ongongan-
tapa.

Ayæ babæcä bai nē guiñenongä
iñōmō æpæntibæde quēwente ta
pōñongä atabopa. Mönō guiñenongä
tömengä ocabocoo önompo æmæmpoque
go mencaa encacä inte tömengä
önömoncawæ önompo tipæmpoga
ocabocoga inö encacä ingantapa.
Awēnē pogantacoo tipæmpoga ganca
tömengä önömoncawāa da da wen-
cate encacantapa. Ayæ Wængongui
ëmowo incæ wīwa babæ wapiticæ
ante äniwoï tömengä ocabocoga
tömancooga inö yewæmonte en-
cacä ingantapa. ² Māningä mönō
guiñenongä botō nē adingä iñōmō
mēne bai ëmönongä incæte tömengä
önöwa oto önöwa bai ewacä inte
tömengä önöne nēöö önöne bai ënecä
atabopa. Ayæ dadagöö nāmā nänö
tæi piñænö ante mönō guiñenongä
ingante pædæ godöinque tömengä
nänö aacæ tæ containpa pædæ
godongä ænte tæ contadinque mönō
guiñönongä nē awēnē badinque,
İmaï cædāni, ante nanguï angä
bacantapa. ³ Ayæ mönō guiñenongä
adoque ocaboga ämocate wænca
cæcä bai ingaingä incæte gämæ
cæcate ingantapa.

Tömāmæ quēwēnāni mönō guiñenongä
ingante adinque ancai guiñeninque
tömānāni tömengä miñæ godānitapa.
⁴ Dadagöö godö cæcä beyænque mönō
guiñenongä iñōmō awēnē badinque
dadagöö bai nē angä do bacä impa,
ante adinque tömānāni dadagöö
ingante, Bitō Awēnē Wængongui bai
imidö anguēnē, ante apænedānitapa.
Adobai mönō guiñenongä ingante,

Bitö Awënë Wængonguï bai imidö anguënë, ante apænedänitapa töö. Mäninö ante godömenque iïmai äninque, “Æcänö mönö guiñëngä bai ingä iñömö edæ dæ angampa. Æcänö tömengä ingante guëadö guëa cædinque tæi ëmonte gänä cæquiringä.”

⁵ Dadagöö godö cæcä beyænque mönö guiñëngä iñömö nāmanque pönente änewëngä badinque Wængonguï ingantedö ante babæ wapiticæ ante änewëninque, Botö Wængonguï bai imopa cæminii, änewëngantapa. Ayæ awënë badinque në angä badingä inte mönö guiñëngä iñömö coadenta i doo apäicäa mänimpoga iñonte, iïmai cæedäni, ante aacantapa. ⁶ Ayæ tömengä mäniñedë Wængonguï ingantedö ante wënæ wënæ babæ wapiticæ ante änewëngä inte Wængonguï ëmowo ante tömengä nänö quëwëñömö ante babæ wapiticæ ante änewëngantapa. Tömënanäni öönädë në quëwënanäni inänitedö ante adobai babæ wapiticæ ante änewëngantapa. ⁷ Tömengä Wængonguï quinäni inänite guëadö guëa cæcæcäimpa, ante cædinque dadagöö godö cæcä beyænque tömengä nämä tæi piñængä badinque tömënanäni inänite tæi ëmongä inte gänä cæcantapa. Ayæ dadagöö godö cæcä beyænque mönö guiñëngä iñömö waodäni nāni cabo waodäni nāni cabo incæ wacä awënë nāni cabo wacä awënë nāni cabo incæ wadö nāni tedecabo wadö nāni tedecabo incæ wabæca nāni quëwencabo wabæca nāni quëwencabo iñönänite tömengä tömänäni awënë badinque tömënanäni inänite, iïmai cæedäni, ante në angä bacantapa.

⁸ Mänömai beyæ tömämæ quëwënanäni iñömö tömengä ingante, Bitö Awënë Wængonguï bai imidö anguënë, ante apænedäninpa. Wængonguï inguipoga nänö badöñedë, Botö Codotedo ingante do wænönäni wæncæcäimpa, ante do angacäimpa. Iingä Codotedo, Nāni quëwenguinta, ante nänö yewæmongaintaa ædänidö

ëmowo yewæmönāmai ināni iñömö tömënanäni mönö guiñëngä ingante, Bitö Awënë Wængonguï bai imidö anguënë, ante apænedäninpa.

⁹ Në ëamonca imini inte ëñëedäni.

¹⁰ “Æcämenque ingante ante apænedinque Wængonguï, Ao bæi ongonte tee mönete bai cæedäni, angä iñinque

tömengä ingante do bæi ongonte tee mönecædäninpa.

Æcämenque ingante ante apænedinque Wængonguï, Ao yaëmenca wænömöni wæncæcäimpa, angä iñinque

tömengä ingante do yaëmenca wænönäni wæncæcäimpa.”

Mänömai beyæ minitö Wængonguï quimäni iñömö wëntæye ināmai inte ee cæcæmininpa. Edæ tömengä ingante godömenque wede pönencæmininpa.

¹¹ Ayæ ate wacä babæcä bai në guiñëngä guiquënë onguipodë quëwente ta pöñongä atabopa. Codotetoidi önömoncawæ mëwäa nāni ëmoncadö bai tömengä adobai encacä ingantapa. Incæte tömengä dadagöö bai tedecantapa. ¹² Mönö guiñëngä tänocä pöningä nänö änö beyænque ayængä pöningä iñömö awënë badinque tänocä beyænque äninque, iïmai cæedäni, ante në aacä ingantapa. Tänocä pöningä mönö guiñëngä ämocate beyæ në wæncæ cæcä incæ wæætë gämæ cæcadingä iñongante ayængä pöningä iñömö tömämæ quëwënanäni inänite angä ëñëninque tömänäni tänocä pöningä ingante, Bitö Awënë Wængonguï bai imidö anguënë, ante apænedänitapa. ¹³ Mäningä mönö guiñëngä ayængä pöningä, Mä pöni cæbo adinque ëñencædäninpa, ante cædinque badongampa. Ayæ godömenque mä pöni cæcä beyænque waodäni edonque pöni ayönäni öönädë inö incæ gonga inguipoga wææ adänitapa.

¹⁴ Mönö guiñëngä tänocä pöningä nänö änö beyænque tömengä weca mä cædinque ayængä pöningä iñömö

tömämæ quëwënäni inänite oda cæte nāni goquinö ante mäocä godänitapa. Edæ tömënäni inänite äninque, Mönö guiñëongä yaëmenca guiyömö wæætë gämæ cæcate nē mīngä quëwengä nänö ëmönö bai adobai badöedäni, angä ëñente badonte concädänitapa. ¹⁵ Mönö guiñëongä ayængä pöningä iñömö eyepæ cædinque mönö guiñëongä tänocä pöningä nänö ëmönö bai nāni badöninca incæ, Tedecæcäimpa, ante cæcä ate mäninca incæ oo guëmangantapa. Tömënäni nāni badöninca ante waodäni Baa äninque, Bitö Awënë Wængongui bai imidö angüenë, ante apænedämaï inäni inänite mäninca incæ ä beyænque wænönäni wænänitapa.

¹⁶ Ayæ awënëidi bai inäni incæ önönänique incæ mäincoo ëadäni incæ mäincoo ömæpodäni incæ wacä godonte æningä beyænque nē cæte quëwënäni incæ nāmanque cæte quëwënäni incæ mäninäni tömänäni inänite tömengä nänö änö beyænque önompo tömempo inö yewæmöinäni badänitapa. Wæætë önompo tömempo inö yewæmönämaï inäni inte tömënäni önönemö inö yewæmöinäni badänitapa. ¹⁷ Tömengä nänö yewæmöi yewæmönämaï inäni guiquenë tömënäni mäincoo ædö cæte godonte ænguänäni. Ædö cæte godonte ænäni weca gote tömënäni mäincoo inï godonte ænguänäni. Ayæ mäninö ante yewæmöi iñömö mönö guiñëongä tänocä pöningä ëmowo impa. Wii tömengä ëmowo yewæmonte i bai tömengä ëmowo ante beyæ, Æpodö i, ante yewæmonte impa.

¹⁸ Mäninö ante ëñencæte ante nāni ëñenö ante eyepæ encadäni inte ëñencädänimpa. Ocai nē encacä inique, Mönö guiñëongä tänocä pöningä nänö, Æpodö i, ante ëñencæte ante cæcæcäimpa. Edæ tömengä, Æpodö i, ante waocä, Æpodö i, ante adopo impa. Tömengä nänö, Æpodö i, ante teitiento teitenta i tei impa.

14

144.000 ganca inäni nāni ämotamini äinö

¹ Ayæ botö ayömote Wængongui Codotedo änanquidi iñömö Tiöno nāni anquidi mäninö a ongongä atabopa. Tömengä weca waodäni tiento coadenta i coatodo müido ganca inäni inte Wængongui Codotedo ëmowo adobai tömengä Mæmpo Wængongui ëmowo nāni önönemö inö nē yewæmöinäni inte a ongönäni atabopa. ² Ayæ botö ëñëñömote öönæde inö tedepämo ante ñænæ tēñabo ante bai detæbo eyequei tē bai ëñëninque adobai waodäni nāni adapate nāni ampoque inte tæiyænäni ampoyönäni ante bai tedepämo tē ëñentabopa. ³ Tiento coadenta i coatodo müido ganca inäni iñömö mä äninque waa ämotamini ante änänitapa. Wængongui nänö aacæ tæ containpa gäänë ämotamini äñönäni müinäni quëwënäni mäa go mäa ganca inäni nē aadäni nē Picænäni tönö ëñënanitapa. Tiento coadenta i coatodo müido ganca inäni inguipoga quëwënäni tönö adoyömö quëwëñönäni, Godonte æmo beyænque quëwenguimäni, ante Wængongui nänö nē æninänique ii ämotamini äinö ante ëñente ancädänimpa. Wadäni guiquenë ædö cæte ëñente ænguänäni.

⁴ Iinäni iñömö Wængongui ingante ante waëmö quëwencæmönimpa, ante cædinque, Onquiyængä, ante nē towënämaï ingänäni inänipa. Iinque tömënäni Wængongui Codotedo ædönö gocä tömengä miñæ cöwë godänipa. Tömënäni waodäni tönö adoyömö quëwëñönäni Itota, Botö wepæ beyænque quëwenguimäni, ante tömënäni inänite ængacäimpa. Täno amiña bayedë tä pedinque minitö, Wængongui qui baquimpa, ante mini cönöni bai mäninäni adobai Wængongui quinäni badinque Wængongui Codotedo quinäni inänipa. ⁵ Adodäni cöwë babæ änämaï inäni inique wadäni ædö cæte tömënäni inänitedö ante, Babæ änänipa, ante

anguinänii. Tömänäni edæ cöwë wënæ wënæ cädämaï inänipa töö.

Wængonguï anquedoidi mënaa go adocanque nänï änö

⁶ Ayæ Wængonguï anquedo wacä iñömö öönæde inö pö pao pao gocä atabopa. Inguipoga në quëwënanï inänite wabæca nänï quëwëncabo wabæca nänï quëwëncabo incæ waodäni nänï cabo waodäni nänï cabo incæ wadö nänï tedecabo wadö nänï tedecabo incæ wacä awënë nänï cabo wacä awënë nänï cabo iñönänite anquedo tömänäni inänite Wængonguï wantæpiyæ cöwë nänö watapæ apænedö ante ëñencädänimpa, ante apænecæte ante pongantapa. ⁷ Mäningä Wængonguï anquedo iñömö yedæ iïmaï äninque, “Wængonguï apænte nänö anguïönæ do iinque bay-onte mäniönæ tömämini mini cægainö ante tömengä apænte ancæcäimpa. Iinque tömengä ingante guiñëninque ee aedäni. Adobaï tömengä ingante waa aedäni. Tömengä edæ öönæde incæ inguipoga incæ æpæntibæ incæ æpæ tayömö incæ tömää në badongaingä ingante mïnitö, Bitö Awënë Wængonguï imidö anguënë, ante ædæ wææninqwe watapæ apæneedäni. Mäninque ämopa,” angantapa.

⁸ Mäningä Wængonguï anquedo gocä ate wacä Wængonguï anquedo ayængä pöninge iïmaï angantapa. “Babidönia nänï äñömö do wo ewente batimpa. Babidönia nänï waëmö quëwëñömö i incæte do wo ewente ba aedäni. Mäniñömö në quëwënanï wënæ wënæ cädinänï iñömö onquiyængä në towengä bai cädinque biinömæ bete quidi quidi dowæninque towencädänimpa, ante ti nämæ godonte bai cädänipa. Tömänäni mänömaï godö cädäni beyænque wabæca nänï quëwëncabo wabæca nänï quëwëncabo wæætë wënæ wënæ cädänitapa. Mäninque ämopa,” angantapa.

⁹⁻¹⁰ Ayæ mäningä Wængonguï anquedo gocä ate wacä Wængonguï anquedo tömengä pöninge yedæ iïmaï angantapa. “Mönö guiñënongä

tänocä pöningä ingante æcänö, Bitö Awënë Wængonguï bai imidö anguënë, ante apænecäa. Ayæ tömengä nänö emönö bai nänï badöninca gäänë ædæ wææninqwe æcänö apænecäa. Wængonguï tömänäni inänite nanguï piincæcäimpa. Tömänäni önompo incæ öönemö incæ mönö guiñënongä nänö yewæmöi në yewæmöinänï adinque Wængonguï adobaï tömänäni inänite nanguï piincæcäimpa.” Äninque Wængonguï anquedo godömenque apænecantapa. “Mäninänï Wængonguï biinömæ nänö piimæ becädänimpa. Mänimænque æninque tömengä nänö piinte owætadë pe ñiñængantapa. Mänimænque në bete bai inänï iñömö nanguï pöni wæwëncädänimpa. Wængonguï tæiyæ waëmö anquedoidi weca ayæ Wængonguï Codotedo weca gonga bæcoyömö atopode nänï öö wadö gonga bæcoyömö öö wayömö mäniñömö iinänï æmæwo gonte ba bai nanguï wæwëncädänimpa,” angantapa.

¹¹ “Ayæ tömänäni gonga bæcoyömö mäniñömö wæwëñönänï nänï wæwëmämo täämä bai cöwë æicöompa. Woyowotæ incæ itädë incæ mäniänäni edæ guëmänämaï incädänimpa. Tömänäni iñömö, Mönö guiñënongä tänocä pöningä weca ædæ wææninqwe, Bitö Awënë Wængonguï bai imidö anguënë, ante në apænedäni inänipa. Ayæ tömengä nänö emönö nänï badöninca gäänë ædæ wææninqwe në apænedäni adobaï tömengä emöwo nänö yewæmöi në yewæmöinänï inte mäniänäni tömänäni wantæpiyæ mänömaï guëmänämaï inte wæwëncädänimpa. Mäninque ämopa,” angantapa.

¹² Mänömaï beyæ mïnitö Wængonguï quimini iñömö tömengä nänö, iïmaï cädäni, ante nänö wææ angainö ante ëñente cädömini inte ayæ Itota ingante godömenque wede pönëmini inte mïnitö wæntæye inämaï inte ee cæcæminimpa.

¹³ Ayæ ate botö öönæde inö tedepämo iïmaï ante ëñentabopa. “Bitö iïmaï yewæmöe,” angantapa. “Nöwo

ganca ayæ ate Awënë Itota ingante pönente nē wænāni inte tōmēnāni nāni toquinque.”

Ante añongä Wængonguī Tæiyæ Waëmō Öñowoca, “Ao ämopa, angampa. Nāni toquinque ingæimpa. Tōmēnāni nāni nanguī cægainö ñimpo cæte guēmancædānimpa. Edæ tōmēnāni nāni waa cægainö öönædē iñömō edonque pōni acæimpa,” ante angantapa.

Inguipoga quēwēnāni beyæ amiña bai baccæimpa

¹⁴ Ayæ botō ayōmo näämænta boguimā mæ owo atabopa. Adocanque Waocä eñagaingä ingä bai iñömō māniī boguimāa tæ contacā atabopa. Tōmengä ocaboga awënë poganta oodo inte badointa encacā inte tōmengä nänö önönempe yaëmē bai waingamē idāmæ engamē næængä atabopa. ¹⁵ Ayæ ate wacā anquedo Wængonguī oncō tæiyæ waëmō oncönē ta pōninque boguimāa nē tæ contacā ingante iimaī yedæ ante aa pecantapa. “Inguipoga quēwēnāni botō imote nē wede pönente waa cædōnāni iñömō nē minte pæmō bai ināni inte tōmēnāni nāni to amiña bayedē bai impa. Wadæ wadæ pinōninque nāni ö æñedē bai do bayonte bitō yaëmē bai bitō nææi ænte gote mānināni inānite wadæ wadæ pinonte bai cædinque ö æe.” ¹⁶ Angä eñēninque boguimāa nē tæ contacā gote inguipoga iñömō tōmengä yaëmē bai nänö nææi inte wadæ wadæ pinonte bai cædinque tōmānāni nē minte pæmō bai ināni inānite ö ængantapa.

¹⁷ Ayæ öönædē iñömō Wængonguī oncō tæiyæ waëmō oncönē ongonte ta pōninque wacā anquedo adobai yaëmē bai waingamē idāmæ engamē næænte pongantapa. ¹⁸ Tōmengä pongä ate Wængonguī anquedo wacā pongantapa. Wængonguī oncō tæiyæ waëmō oncönē, Wængonguī quī, ante iya tæe, ante nē änongå inte nāni iya täimoga gäänē ongōninque ta pōninque

yaëmē bai waingamē idāmæ nē engamē næængä ingante iimaī yedæ apænecantapa. “Inguipoga tōmāo nē wënæ wënæ cædāni iñömō yowecoo bai inānipa. Mānināni yowe ite bayedē bai ināni adinque bitō yaëmē bai bitō nææi ænte gote yowecoo wangö tadampote gæte bai cædinque tōmēnāni inānite cæe.”

¹⁹ Angä eñēninque Wængonguī anquedo inguipoga iñömō tōmengä yaëmē bai nänö nææi inte wangö tadampote cædinque yowecoo gædāni bai tōmengä nē wënæ wënæ cædāni inānite adobai cæcantapa. Ayæ yowepæ ante ñænængade nāni pinā pinā gawate cæincadedē yowecoo wææntodonte bai cædinque tōmengä wënæ wënæ cædāni inānite Wængonguī piinte nänö pāiñömō wido cæcantapa. ²⁰ Māniī tōmēnāni yowecoo ænte pinā pinā gawate cæincade iñömō tōmēnāni nāni quēwēñömō yabæca ongompa. Māniñömō tōmēnāni inānite pinā pinā gawate bai cædānitapa. Cæyōnāni tōmēnāni wepæ nanguī pōni gotimpa. Cabayo goto winediñömō æi ganca tōmēnāni wepæ māninganca æi godinque todee tiento quidōmetodo ganca māninganca nanguī pōni wepæ gotimpa.

15

Ticete ganca nāni wæwenguimāmo pompa

¹ Ayæ botō ayōmote Wængonguī ñowo wæætē mā pōni odömömo adinque eñencædānimpa, ante cædinque öönædē inö bamönengæ pōni badongä a owo atabopa. Wængonguī anquedoidi önompo æmæmpoque go mēnaa ināni iñömō öönædē ongōñōnānite tōmēnāni inānite, Minitō cæmini beyænque waodāni nāni wæwenguimāmocoo önompo æmæmpoque go mempoga pongæimpa, angä eñente ænte pōnānitapa. Māniī wæwēmāmocoo æmæwo ba adinque Wængonguī nänö ænguī panguimāmo eyepæ bapa.

² Ayæ æpæntibæ iñömö awocawænta emö bai adinque botö mänintibæ tönö gonga guëa wempodente bæco atabopa. Adotibæ yæwedeca waodäni mä ongönänipa. Mäninäni iñömö mönö guiñenongä ayæ pöningä ingante ante ayæ tömengä nänö emönö bai näni badöinca ante Baa äninque tömënäni tæi emonte gänä cädäni inänitapa. Adodäni tömengä emöwo ante, Æpodö i, ante Baa ante yewæmönämaï inäni atabopa. Wængonguï tömënäni inänite adapate näni ampoquï godongä ænte næænte a ongönänipa. ³ Tömënäni a ongöninge Wængonguï ingante nê cægaingä Möitee wodi ämotamini nänö angainö ante ayæ Wængonguï Codotedo ämotamini nänö againö ante iïmaï ämotamini änänipa.

“Awënê Wængonguï bitö adobique Tömää Cægäimi inte bitö mä cädö iñömö waëmö pöni inönö anguënê.

Bitö tömämæ quëwënäni Tæiyæ Awënê Odeyebi imidö anguënê. Quiëmê cædinque bitö nê nö cæbi imipa.

⁴ Awënê eñëmi, Æcämê bitö imite guiñenämaï inguingää.

Ayæ bitö emöwo ante pönente æcämê waa adämaï inguingää.

Edæ bitö adobique tæiyæ waëmö imipa.

Tömää bitö nö cædinö edonque pöni ba adinque

wabæca wabæca näni quëwencabo tömänäni bitö weca ponte ædæ wææninqe

bitö imi, Bitö Awënê Wængonguï imidö anguënê, ante ancädänimpa.”

⁵ Ayæ ate botö ayömote öönædê iñömö Wængonguï tæiyæ waëmö oncö incæ æmontaicö bai inte tömengä nänö nänënë owocö iñömö wi ænete bayö atabopa. ⁶ Wængonguï anquedoidi önompo æmæmpoque go mënaa inäni mänincönê ongonte ta pönänitapa. Tömënäni cädäni ate waodäni näni wæwenguimämo iñömö önompo æmæmpoque go mempoga pongæimpa. Tömënäni

weocoo waëmoncoo nino nani ancoo nãö bai emoncoo mongænäni inänipa. Tömënäni tæcætawê inö pacadeyænta oodo inte nani badöinta mongæënemæinäni inänipa.

⁷ Ayæ müinäni quëwënäni mënaa go mënaa iñönäni adocanque Wængonguï anquedoidi önompo æmæmpoque go mënaa inäni iñönänite owætacoo adotaque adotaque pædæ godongä ænänitapa. Mänintacoo önompo æmæmpoque go mentacoo iñömö oodo inte nani badöintacoo inte Wængonguï nê wantæpiyæ cöwê quëwengaingä ingä nänö ænguï pämämo eyede ënentapa. ⁸ Wængonguï nänö nãö apäidö beyæ ayæ tömengä nänö tæi piñæmämo beyæ tömengä tæiyæ waëmö oncönê iñömö tæmämämo eyede mä ongompa. Ayæ Wængonguï anquedoidi önompo æmæmpoque go mënaa inäni cädäni ate waodäni näni wæwenguimämo ante önompo æmæmpoque go mempoga näni wæwenguinganca iinqe baganca æcämenque incæ Wængonguï tæiyæ waëmö oncönê guidämaï incädänimpa.

16

Wængonguï nänö ænguï panguintacoo

¹ Ayæ ate Wængonguï tæiyæ waëmö oncönê inö tedepämo yedæ tê eñentabopa. Nê angä iñömö Wængonguï anquedoidi önompo æmæmpoque go mënaa inäni inänite, “Goedäni, äninque, Wængonguï owætacoo nänö ænguï panguintacoo önompo æmæmpoque go mëna ganca incoo næænte gote inguipoga iñömö gao cæedäni,” angä eñentabopa.

² Wængonguï anquedo tänocä godinque tömengä owætadê ënê incæ inguipoga gao cæcantapa. Gao cæcä ate mönö guiñenongä ayæ pöningä nänö yewæmöi nê yewæmöinäni inte tömengä nänö emönö bai näni badöinca gäänê ædæ wææninqe apænedäni iñönänite tömënäni ayaa nantai nömæi tömäo baadinque nantate wædänitapa.

³ Wængonguī anquedo ayæ nē gocä tömengä owætadē enē incæ æpæntibæ cæncadēmæ gao cæcä ate mänimæ iñömö do wænünäni wepæ bai bayonte mänintibädē quëwënäni tömänäni wænänitapa töö.

⁴ Wængonguī anquedo ayæ nē gocä tömengä owætadē enē incæ æpænē tömänonga gao cædinque æpæ tayömö tömäñömö gao cæcä ate mänimæ tömämæ wepæ batimpa. ⁵ Ayæ ate Wængonguī anquedo æpæ tömämæ beyæ nē angä inte iimaī apæneca eñentabopa.

“Mönö Tæiyæ Waëmö inömi eñëmi, bitö wëenëñedē do nē quëwengäimi imi ñöwobi adobi inömi imipa.

Mänömaī tömënäni inänite apænte ante päninque bitö nö cædinque apænte päniimi imipa.

⁶ Edæ bitö quinäni tönö bitö beyæ nē apænegaïnäni inänite wænönäni ate tömënäni nē wænäni wepæ näate bagadänimpa.

Bitö wæætē nē wænonte näate badäni näni cægaī beyæ wepæ godömi begadänimpa,” angantapa.

⁷ Ayæ Wængonguī quī, ante näni iya täimoga inö tedepämo tē eñentabopa. “Ao ämopa. Awënē Wængonguī bitö adobique Tömää Cægaīmi inte, iimaī pancæboimpa, ante bitö apænte angäinö bai cædinque tömënäni inänite päninque bitö cöwē nö cæte waa päimipa.”

⁸ Wængonguī anquedo ayæ nē gocä tömengä owætadē enē incæ nænque mæ owoyömö mäniñömö gao cæcantapa. Ayæ waodäni æmontaiya montæ gongate wæcädänimpa, ante cædinque nē godö angä beyænque nænque nanguī tī nāwä batimpa.

⁹ Mänii nanguī tī nāwante beyæ waodäni montæ gongate badäni incæte tömënäni näni wënæ wënæ cædinö ante, Ancaa wæwente awædö, ante ayæ pönënämaī inäni inte ñimpo cædämaī inte Wængonguī ingante waa adämaī inänitapa. Tömënäni, Wængonguī cæcä beyænque

mönö wæwëmämocoo pönimpa, ante wædinque Wængonguī ingante püinque tömengä emöwo ante wënæ wënæ babæ ante tedewënänitapa.

¹⁰ Wængonguī anquedo ayæ nē gocä tömengä owætadē enē incæ mönö guiñënongå tänocä pöningä nänö aacæ tæ containpaa gao cæcä ate tömengä awënē odeye inongä inte nänö aayömö mæ mämonte bai batimpa. Waodäni nantate wædinque önonguënëwa æo pocænguënëwate wædänitapa.

¹¹ Mänömaī wædäni incæte tömënäni näni wënæ wënæ cædinö ante, Ancaa wæwente awædö, ante godömenque pönënämaī inäni inte ñimpo cædämaī inänitapa. Wæætē nantai baate nantate wædinque Wængonguī öönädē quëwënongå ingante piinte badinque wënæ wënæ babæ ante tedewënänitapa.

¹² Wængonguī anquedo ayæ nē gocä tömengä owætadē enē incæ ñænæ önonga Eopadatedö näni änonga mäninonga gao cæcä ate awënē odeyeidi nænque tamönö quëwente näni ponguïnö taadö ante önö tömäo amimö batimpa.

¹³ Ayæ wënæidi wentamö näni ewocacabo mënaa go adocanque inäni iñömö weque bai inäni ta pönäni atabopa. Dadagöö önönē inö adocanque wënæ ta pongantapa. Mönö guiñënongå tänocä pöningä önönē inö wacä wënæ ta pongantapa. Ayæ Wængonguī beyæ nē apænedömo imopa, ante nē babæ apænedongä önönē inö wacä wënæ pongantapa.

¹⁴ Mäninäni wënæidi önöwocaidi inäni inte mä cædäni inänipa. Inäni iñömö tömämæ awënē odeyeidi weca añecæ godinque tömënäni inänite apænedinque, Awënē Wængonguī adocanque Tömää nē Cægaingä inte nänö apænte anguiönæ iñonte minitö godongämæ ponte guëadö guëa cæcæminimpa, ante cædänipa.

¹⁵ “Mönö Awënē nämä incæ iimaī angantapa. Aedäni. Nē awëmö ængä iñontobæ pongä bai botö adobai änämaī inte poncæboimpa. Æyedënö

ponguingä, ante nē mōnāmaī on-gongä iñōmō tōmengä wänō cōnongä bai inongä inte nänö toquinque. Edæ tōmengä, Ömaabo ināmaī incæboimpa, ante ayæ, Guiññate wädāmaī incæboimpa, ante tōmengä weo-coo tōmē weca ee mangä inongä ingampa,” angantapa.

¹⁶ Mänii wēnæidi öñowocaidi tōmāmæ awēnē odeyeidi inānite añecæ gote änāni eññinque awēnē odeyeidi iñōmō tōmēnāni tontadoidi tönō Adāmaguedoö ebedeo tededō nāni añōmō adoyōmō godongāmæ pōnānitapa.

¹⁷ Ayæ Wængonguī anquedo tōmangä nē gocä tōmengä owætadē ēnē incæ woboyæ owoyōmō māniñōmō gao cæcä ate öönädē inō Wængonguī tæiyæ waēmō oncōnē tōmengä nänö aacæ tæ contayōmō māniñōmō tedepāmo yedæ teded-inque, “Ñōwo iinque batimpa,” angantapa.

¹⁸ Ayæ ate yædæ yædæ nāinimpa. Detæbo tæi tæi tē goyō yedæ pōni ānimpā. Ayæ goinque nanguī pōni ocæ ocæ gotimpa. Waodāni ingui-poga nāni quēwenganca tōmanganca māniñōmō goinque bai wa goinque cōwē godāmaī inimpa. ¹⁹ Goinque ocæ ocæ goyonte tōmēnāni nāni ñænæ quēwēñōmō incæ tænguimæ tænguimæ godinque mēñōmonga go adoyōmonque batimpa. Ayæ wabæca nāni quēwencabo wabæca nāni quēwencabo incæ tōmāo nāni quēwēñōmō onconcoo acapowate bogocæ tæ gowæænimpā. Wængonguī adobai, Babidōnia nāni waēmō quēwēñōmō quēwēnāni wēnæ wēnæ cædānīpā, ante pōnente wædinque ænguī badinque, Mini wæwenguinque impā, ante owæta biinōmæ nänö pūimæ eyede ēnē godonte bai cædinque tōmēnāni inānite nanguī pūinque pangantapa. ²⁰ Tōmāā wāā tēiwænē iñōmō yogæ guitimpā. Ayæ onquiyabocoo adobai dæ bibitapæ batimpa. ²¹ Ayæ öönädē inō yoguica cōönæ bai waodāniya tæi tæi wæænimpā. Māninca tæi tæi

wææninca adocaque incæ wodo tiēē diboda tee mā ganca enca impā. Yoguica wēnæ wēnæ incapā, ante adinque waodāni, Māninca mōnō wēnæ wēnæ wæwēmāmo impā, ānīnque Wængonguī ingante piinte badinque wēnæ wēnæ babæ ante tedewēnānitapa.

17

Onquiyængä mǎincoo beyæ nē towente quēwēnongä

¹ Wængonguī anquedoidi önompo æmæmpoque go mēa ganca ināni önompo æmæmpoque go mēa ganca owætacoo nē næænāni iñōnānite adocanque botō weca ponte, “Pōe, angantapa. Onquiyængä mǎincoo beyæ nē towente quēwēnongä iñōmō æpæncoo yædopāa nē tæ contacä apænte nänö panguinō ante botō odōmōmo acæbiimpā. ² Inguipoga awēnē odeyeidi incæ tōmengä tönō towengadānimpā. Waodāni ingui-poga quēwēnāni incæ adobai tōmengä towēinēnō beyæ tōmengä biinōmæ bete bai quidi quidi dowænte bai pōnēnāmaī cægadānimpā,” ante apæncä eññentabopā.

³ Wængonguī Öñowoca incæ botonga pō guiiyongä botō wiimonte bai iīmaī atabopā. Wængonguī anquedo adocä iñōmō botō imote ö ænte māo öñōmæca iñōmō cōnongä ongontabopā. Māniñōmō ongōnīnque botō onquiyængä babæcä bai nē guiññēnongāa mongænte a ongongä atabopā.

Māningä mōnō guiññēnongä opatawæ eññadongä inte emōwocoo tōmengä baonga godāmæ tōmangä yewæmōi eññacä ingantapā. Māniwocoo Wængonguī ingantedō ante wēnæ wēnæ babæ wapiticæ āniwocoo inōnimpā. Māningä mōnō guiññēnongä nänö ocabocoo önompo æmæmpoque go mēa encacä inte tōmengä nänö öñōmoncawæncoo önompo tipæmpoga emoncacä ingantapā. ⁴ Onquiyængä iñōmō tōmengä weocoo awēnēidi waemoncoo nāni mongæncoo tönō opatawæ emoncoo mongængantapā.

Tömengä, Botö waëmö incæboimpa, ante oodo badöincoo tönö dicamö nāni nanguī godonte ænincoo tönö pededamö nāni ämö mänimoncoo mongænte ingantapa. Tömengä önönemö owætadē oodo inte badöintadē quimæmē baapæ bai i eyede engapæ næængantapa. Māningä onquiyængä quiēmē nänö wænæ wænæ cæpāmo nänö towente quëwënö bai mänintadē næængantapa. ⁵ Adocä onquiyængä tömengä önönemö inö ëmōwo yewæmōi ëmongä ingantapa. Māniwo wë wodonte bai i incæte iīmaī ante impa. “Babidönia nāni waëmö quëwëñömö i incæte onquiyængä nē towengä bai impa.

Waadäni nē godö towënāni wäänä bai māningä onquiyængä ingampa.

Ayæ adobai inguipoga quëwënāni wiwa nāni cæinënö ante nē cædāni wäänä bai adocä onquiyængä ingampa.”

Mänömaī tömengä önönemö inö yewæmonte ëmongantapa. ⁶ Wængonguī quinäni ingaināni tönö Itota ingante ante apænedāni beyæ nē wængaināni tömënāni wepæ bete bai māningä onquiyængä quidi quidi dowænte bai ingä botö atabopa. Tömengä ingante adinque botö ancai guiñente wætabopa.

⁷ Ancai guiñente wæyömote Wængonguī anquedo botö imote iīmaī angantapa. “Quinante ancai guiñente wæbii. Mönö guiñëñongä iñömö tömengä ocabocoo önompö æmæmpoque go mencaa encacä inte tömengä önömoncawæncoo önompö tipæmpoga ëmoncacä inongä inte onquiyængä ingante nē mongængä ingampa. Onquiyængä ingante nē mongængä mönö guiñëñongä tönö onquiyængä tömëna nāna wë wodonte ini æbānö i, ante apænebo ëñëe. ⁸ Adocä mönö guiñëñongä bitö adingä iñömö wëenëñedë quëwengaingä inte ñowo dæ angä incæte ayæ ate tadömengadænguipodë inö ææ ta poncæcäimpa. Ta

pöninge tömengä nänö æmæwo ömäe ëwenguinque ingæimpa. Wængonguī, Quëwenguīta, ante inguipoga badönāmaī iñedë nänö yewæmongaintaa inguipoga quëwënāni tömënāni ëmōwo nē yewæmönāmaī ināni iñömö tömënāni iñömö mönö guiñëñongä do quëwengaingä ñowo dæ angä incæte ayæ ate pongä adinque ancai guiñente wæcædänimpa,” ante Wængonguī anquedo apænecantapa.

⁹ Ayæ tömengä wæætë apænecantapa.

“Māninö ante ëñencæte ante ocai ëñënö nē encacä inte ëñencæcäimpa. Mönö guiñëñongä tömengä önompö æmæmpoque go mēa ocabocoo iñömö önompö æmæmpoque go mēa änanquidi bai inānipa. Māniū änanquidiboga onquiyængä tæ contacä ingampa. Māniū ocabocoo adobai önompö æmæmpoque go mēa awënë odeyeidi bai inānipa. ¹⁰ Mānimpodāni iñönānite önompö æmæmpoque awënë odeyeidi inānite wido cædānitapa. Adocanque awënë odeye iñömö ñowo aacä ingampa. Wacä awënë odeye ayæ pönāmaī ingä incæte tömengä pöninge wantæ iñö ongonde aacæcäimpa. ¹¹ Önompö æmæmpoque go mēa ganca awënë odeyeidi nāni cabo iñönānite mönö guiñëñongä adocä inongä incæte tömënāni beyæ ponguingä ingampa. Tömengä iñömö wëenëñedë nē quëwengaingä incæ ñowo dæ angä inongä inte tömengä nänö æmæwo ömäe ëwenguinque poncæcäimpa,” ante Wængonguī anquedo apænecantapa.

¹² Ayæ tömengä wæætë apænecantapa.

“Ayæ önompö tipæmpoga önömoncawæncoo bitö adimoncawæncoo iñömö önompö tipæmpoga awënë odeyeidi bai ināni incæte ayæ aadāmaī inānipa. Incæte ayæ ate tömënāni inānite änāni ate awënë odeyeidi badinque tömënāni, iīmaī cædāni, ante änāni bacædänimpa. Ayæ mönö guiñëñongä tönö tömënāni adoque ooda ganca godongämæ aacædänimpa. ¹³ Tömënāni adodö ante pönënāni inte, Mönö tæi piñænö ante guiñëñongä ingante godömö

æncæcäimpa. Ayæ awënë odeyeidi inömö inte mönö, İımaı cæedäni, ante nê ämö imö bai mönö tömengä ingante ämö nê angä bacæcäimpa.

¹⁴ “Mäninäni Wængongui Codotedo ingante guëadö guëa cæcædänimpa. Incæte tömengä inömö awënëidi tömänäni Awënë inongä ingampa. Ayæ waodäni awënë odeyeidi inönänite tömengä Tæiyæ Awënë Odeye inongä ingampa. İninqe tömengä tæi emönongä inte tömännäni inänite gänä cæcæcäimpa. Tömengä, Botö miñæ tee empo goquimini, ante waodäni inänite aa pedinque apænte nänö nê ængainäni inte tömengä miñæ cöwë ædæmö cæte tee empo godäni inänipa. Mäninäni adobaı tömengä tönö godongämæ guëadö guëa cæte wænonguinäni inte tæi emonte gänä cæcædänimpa,” ante Wængongui anquedo apænecantapa.

¹⁵ Ayæ tömengä wæætë botö imote iımaı apænecantapa. “Onquiyængä mäincoo beyæ towente quëwënongä inte æpæncoo yædopäa tæ contacä abitapa. Mänii æpæncoo inömö tæiyænäni waodäni bai inänipa. Wabæca näni quëwencabo wabæca näni quëwencabo incæ wadö näni tedecabo wadö näni tedecabo incæ waodäni tæiyænäni inänipa. Mäninäni tömänäni mänii æpæncoo bai inänipa. ¹⁶ Ayæ önompo tipæmpoga önömoncawæncoo bai awënë odeyeidi tönö mönö guiñenongä inömö tömännäni bitö nê adinäni inönäni inte onquiyængä mäincoo beyæ nê towente quëwënongä ingante pïincædänimpa. Pïininqe, Tömengä ingante æmæwo ömæ ëwengæimpa, ante cæcædänimpa. Tömengä mäincoo tömancoo ö ænänni ate ömaacä inte wæyongante tömengä baö cæninque tömengä ingante æmæwo iya tancædänimpa. ¹⁷ Wængongui, Botö angai bai inque baganca tömännäni botö pönönö ante cæcædänimpa, ante godö cæcä beyænque mäninäni awënë odeyeidi näni mimönë adodö ante pönänäni. Pönëninque tömännäni godongämæ Ao äninque,

Mönö guiñenongä aacæcäimpa, ante tömengä ingante, Mönö tæi piñænö ante godömö ænguingä, ante godönäni ængantapa.

¹⁸ “Mäningä onquiyængä bitö adingä bai Babidönia näni waëmö quëwëñömö adobaı impa. Mäninömö awënëidi inömö tömämæ awënë odeyeidi inänite nê aadäni inänipa,” ante Wængongui anquedo apænecantapa.

18

Babidönia näni quëwëñömö do wo ewente batimpa

¹ Ayæ ate Wængongui anquedo wacä inte öönædë inö wææ pongä atabopa. Tömengä tæi piñængä inte nanguı angä ingä inte nämä nänö ñäö apäite emönö inte inguipoga inömö ñäö apäicä atabopa. ² Tömengä nänö tedepämo inte iımaı yedæ aa pedinque,

“Babidönia näni añömö do wo ewente batimpa. Babidönia näni waëmö quëwëñömö i incæte do wo ewente ba aedäni. Badinque wænæidi näni owoyömö batimpa.

Wænæidi wentamö ewocadäni tömänäni mäninömö tee mönincönë bai quëwëñänipa.

Ayamöidi baacäidi tömänäni adobaı mäninömö wææ cæte bai owodänipa.

³ Wabæca näni quëwencabo wabæca näni quëwencabo incæ tömänäni babidöniaidi wiwa näni towëinönö beyæ

tömännäni biinömæ bete quidi quidi dowænte bai wædänipa.

Inguipoga awënë odeyeidi incæ babidöniaidi tönö towëñänipa.

Babidönia inömö quëwëñäni nämanque ante pönente tocæte ante mäincoo nanguı pönı ænte ëadäni beyænque

inguipoga nê godonte ænänni inömö mäincoo nanguı pönı ëadäni badänipa,”

ante Wængongui anquedo aa pecantapa.

⁴ Ayæ öönædë inö wacä tedepämo tedecä ëñentabopa.

“Botö guidëmini ëñëedäni. Minitö tömënäni weca quëwëmini incæte,

Tömënäni tönö godongämæ wënæ wënæ cädämaï incämönimpa, ante cædinque wadæ tao pödäni.

Ayæ, Wængongui tömënäni inänite päningue mönitö imönite pänämaï incæcäimpa, ante pönente wædinque wodii winonte pödäni.

⁵ Tömënäni wënæ wënæ cædimämo iñömö cabo ti gæte cönöninque bacoo pönï ongompa.

Incæte Wængongui mäninäni nani wiwa cædimämo cöwë pönente wæcampa.

⁶ Tömënäni nani pönönï bai minitö tömënäni inänite adobai godoncæminimpa.

Tömënäni nani pönö cædinö beyæ minitö wæætë adopo godö cædinque mempoga ganca godömenque godö cæmini wæcædänimpa.

Ti nämä godönäni bete bai wædänitawo.

Minitö wæætë tömënäni owætadë ti nämä adopopæ pe ñiñænte wempo cædinque,

mempoga pe ñiñænte wempo cædente bai cædinque godömenque ti nämä godömini bete wæcædänimpa, angantapa.

⁷ Edæ tömënäni nämä incæ, Mönö ñænæmö imompa, ante pönente nanguï waëmö mäincoo ëate quëwënäni iñönänite

minitö wæætë, Tömënäni ægancadö waëmö quëwënänii, ante adinque

tömënäni inänite adoganca püinte cæmini nantate wædinque tömënäni wæwente quëwëncædänimpa.

Mäninäni iñömö, ‘Awënë odeye nänöogængä bai contate ongömompa. Edæ watapæ quëwëmö imompa.

Wii owæmpoingä bai inömö inte wæwënämaï cöwë incämöimpa, ante önöwënenque pönente änewënanipa.

⁸ Mänömainö ante në änäni inte adoque itædë iñonte tömënäni nani wæwëmämo iñontobæ pö ate nanguï wæcædänimpa.

Mänïönæ tömënäni nani wænguimämo nani wæwënguimämo nani gue ænënguimämo pö wæcædänimpa töö.

Tömënäni onconcoo gonga bæcodocæimpa.

Edæ Wængongui Awënë iñömö Babidönia iñömö quëwënäni inänite në apænte ante pangä iñömö edæ tömengä tömäa cægaingä ingampa,” ante apænecantapa.

⁹ Inguipoga awënë odeyeidi incæ Babidönia quëwënäni tönö towënäni inte tömënäni adobai Babidönia quëwënäni tönö nanguï waëmö mäincoo godongämæ ænte ëate quëwënanipa. Inique Babidönia nani quëwëñömö gonga bæcododique tëëmancoo baca baca æi adinque tömënäni wæwente Ca ca wæcædänimpa. ¹⁰ Babidönia

iñömö quëwënäni nanguï pönï nani wæwënö adinque awënë odeyeidi ancai guiñëninque, Mäninäni tönö godongämæ wæwënämaï incämönimpa, ante gomonga a ongöninque wæcædänimpa.

“Babidönia mini waëmö quëwëñömö në quëwëmini mini wæquinque ingæimpa.

Mänïñömö quëwëmini mäincoo nanguï ëate inimiinte inte mini wæquinque.

Wënæ wënæ cæmini iñöminite adoque ooda iñonte Babidönia mini quëwëñömö do apænte pante wo ëwente batimpa.” ante wæcædänimpa.

¹¹ Inguipoga mäincoo ænte mante në godonte ænäni iñömö, Edæ æcänö iñömö godonguënenco godonte ænguinaa. Nöwo dæ ä, ante wæwente Ca ca wæcædänimpa. ¹² Incoo

iñömö nani godonguënenco impa. Oodo tönö padata, dica nani nanguï godonte ænincacoo tönö pededamö nani ämoncoo mæ ongoncoopa. Adobai waëmoncoo nino nani ancoo tönö awënëidi waëmoncoo nani

mongæncoo ayæ teda nāni ancoo tönö opatawæ incoo mæ ongoncoopa. Quiwæmē ogui wawænque i māniwæ mæ ongoncoopa. Edepante бага inte nāni badōnincōo tönō awænque nāni nanguī godonte æniwæ inte nāni badōnincōo mæ ongoncoopa. Yaëmenta bodonte nāni āni inte nāni badōnincōo tönō iædo nāni āni inte nāni badōnincōo tönō mānōmodo nāni anca inte nāni badōnincōo iñōmō mānincōo tōmancoo mæ ongoncoopa, ante wæcædānimpa.

¹³ Cāneda nāni antapo tönō ogui waa öni pæcaqui, ogui waqui nāni iya täimō tönō ti nā öni pæqui ayæ ogui wapæ öni pæquimæ, biinōmæ tönō oginguipæ, waëmō ædina tönō todigomō mānincōo mæ ongoncoopa. Cæningäidi tönō obegaidi cabayoidi tönō cabayo inte ñā cæte nāni wëä godō awotocoo mæ ongoncoopa. Mānincōo tōmancoo mæ ongoncoopa, ante wæcædānimpa. Ayæ adobai, Waodāni incæ nē cæte quëwencædānimpa, ante cæningäidi bai godonguënēmō intamompa, ante wæcædānimpa. ¹⁴ Mānināni Babidōnia quëwēnāni inānite iimaī ancædānimpa. “Quincamē ante beinente wæmīni incæ mānincā tōmanca mīnitō weca ñōwo dæ ancapa.

Mīni ëadincōo tönō quīnō waëmō mīni māincōo iñōmō mānincōo tōmancoo ñōwo dæ ā inincōo mīnitō

ömæpomīni inte cōwē wæætē ænāmaī incæmīnimpa,” ante ancædānimpa.

¹⁵ Tömēnāni māniñōmō quëwēnāni inānite mānincōo nāni godōnincōo beyæ nē ænināni inte nē nanguī ëadīnāni incæ Babidōnia iñōmō quëwēnāni nāni wæwēnō adincōo, Mānināni tönō godongāmæ wæwēnāmaī incæmōnimpa, ante gomonga a ongōnincōo ancaī guiñencædānimpa. Ayæ wæwente Ca ca wæcædānimpa. ¹⁶ Ayæ iimaī yedæ ancædānimpa.

“Babidōnia mīni waëmō quëwēñōmō nē quëwēmīni incæ mīni wæquinque ingæimpa.

Edæ māniñōmō quëwēmīni tōmēmīni weocoo waëmoncoo nīno nāni ancoo tönō

awēnēidi waëmoncoo nāni mongæncōo tönō opatawæncōo mānincōoque mongæmīni imīnitapa.

Mīnitō, Mönō waëmō incæmōimpa, ante oodo inte badōnincōo tönō dicamō nāni nanguī godonte ænincōo tönō pededamō nāni ämō mānimoncoo mongæmīni imīnitapa.

¹⁷ Incæte adoque ooda iñonte mānincōo mīni ëadincōo incæ edæ æmæwo ömæe ewente batimpa, ante nē ænte godōnāni edæ wæcædānimpa,” ante angantapa.

Æpæntibædo wipocoo nē tōö tōö cædōnāni tönō, Wipodē nē godāni, wipodē nē cædōnāni tönō, Wipo inte māincōo godonte ængæimpa, ante nē māo godāni tōmānāni mānināni gomonga a ongoncædānimpa.

¹⁸ Babidōnia nāni quëwēñōmō gonga bæcododincōo tēemancoo baca baca æi adincōo iimaī yedæ ancædānimpa, “Ii Babidōnia nāni waëmō quëwēñōmō bai wayōmō nāni waëmō quëwēñōmō edæ dæ ampa, ante wæcædānimpa,” ante angantapa. ¹⁹ Nē wæwēnāni inte nāni cæi bai onguipo guidimō ænte ocaboga wo ææntodonte wææ guicadincōo Ca ca wædincōo iimaī yedæ ancædānimpa,

“Babidōnia nāni waëmō quëwēñōmō nē quëwēnāni nāni wæquinque ingæimpa.

Māniñōmō æpæntibædo wipocoo nē ëadāni inte

tömēnāni nāni godōnincōo māniñōmō quëwēnāni inānite godonte ænincōo tōmānāni nanguī ëadāni badānitapa.

Ayæ adoque ooda iñonte Babidōnia nāni quëwēñōmō tōmāo æmæwo ömæe ewente batimpa, ante ancædānimpa,” angantapa.

²⁰ Māninō ante änāni ate, Tōmāmīni öönæde iñōmō quëwēmīni māniñōmō wo ewente i adincōo watapæ tocæmīnimpa.

Wængonguï quimîni adobaï
Itota nänö në da godongaïmîni tönö
Wængonguï beyæ në apænemîni tönö
mînitö tömämîni mänîñömö wo
ëwente i adinque watapæ
tocæmînimpa.

Edæ, Mînitö imînite æbänö wënæ
wënæ cædänii, ante adinque

Wængonguï tömênäni nâni quëwëñömö
quëwënâni inânite apænte
äninque pangä ate tocæmînimpa,
ante angantapa.

²¹ Ayæ Wængonguï anquedo në
tæï ëmongä iñömö dicabo nâni mö
mö equinca bai ñænængade dicabo
æninque æpæntibæ cæncadëmæ wo
guiitodöninque iïmaï angantapa.

“Mäninca æpæntibæ cæncadëmæ tæï
wo guiitodömo guï bai

Babidönia nâni waëmö quëwëñömö
wo ëwente dæ ba ate cöwë adämaï
incædänimpa.

²² İninque, Adapate nâni ampogainö
incæ ämotamîni nâni angainö
incæ

ööña bai nâni we we öongainö incæ
todompeta nâni ancadeca
nâni we we öongainö incæ
mänîñömö cöwë ëñênämaï
ingæïmpa.

Quiëmë badönâni incæ në badon-
gainâni mänîñömö cöwë dæ
ancædänimpa.

Tömênäni nâni dicabo mö mö equinca
inte cæyönâni dicabo dadi dadi
cæyedë ä bai mänîñömö cöwë
wii ëñenguïnanidö angüënë.

²³ Do nâni ti wodönoincade mänîñömö
cöwë tica ëñênämaï ingæïmpa.

Onquiyængä ingante në monguingä
mänîñömö cöwë dæ ä mönämaï
inguïnanidö angüënë.

Mänîñömö mäincoo ænte mante
në godonte ænâni iñömö in-
guipoga ñænænâni inte on-
gongadänimpa.

Ayæ idöidi yewænte bai cædinque
mänîñömö quëwënâni, Waëmö
mäincoo, ante wapiticæ
änewënâni beyænque wabæca
nâni quëwencabo wabæca nâni
quëwencabo incæ tömänâni

nâni quëwencabo oda cæte
gogadänimpa,” angantapa.

²⁴ Wængonguï beyæ në apænegaïnâni
inânite wænöninque mänîñömö
quëwënâni incæ Wængonguï quïnâni
inânite godömenque wænönâni
wængadänimpa. Edæ inguipoga
wænönâni në wængainâni tömänâni
mänîñömö wænönâni wænte bai
ingadänimpa.

19

¹ Babidönia wo ëwente ba ate
öönädë iñömö waodâni tæiyænâni
adotedæ ogæ tededâni bai ëñentabopa.
“Mönö Awënë ingante watapæ
apænecæïmpa, ante, Adedoya,
äninque,

Mönö Wængonguï mönö imonte,
Quëwencæmînimpa, ante në
Ængä inongä ingampa.

Tömengä ñäö ëmongä inongä ingampa.
Ayæ tömengä tæï piñængä
inongä ingampa.

² Edæ, Wængonguï, iïmaï pancæboïmpa,
ante nänö apænte angainö bai
cædinque tömengä cöwë nö cæte
waa pangampa.

Babidönia iñömö onquiyængä
mäincoo beyæ në towente
quëwënongå bai impa. Mänîñömö
quëwënâni në wiwa cædâni
beyænque

inguipoga quëwënâni wæætë në wiwa
cædâni badâni adinque

Wængonguï mänîñömö quëwënâni
inânite apænte ante pangan-
tapa.

Wængonguï ingante në cædinâni
inânite adodâni wænönâni
adinque tömengä wæætë
tömênâni inânite wænongä
wænänitapa,” ante änänitapa.

³ Ayæ wæætë ogæ tededinque,
“Adedoya,” änänipa.

“Mänîñömö tēemancoo cöwë baca
baca æicöompa,” ante änänitapa.

⁴ Mänîñedë Wængonguï nänö tæ
contaimpaa tæ contayongante në
aadâni në Picænâni bæinticoatodo
ganca inâni tönö miïnâni quëwënâni
mënaa go mënaa inâni iñömö ædæ
wææninque, Bitö Wængonguï Awënë

imidö anguënë, äninque “Amëë, Adedoya,” ante aa pedänitapa.
⁵ Wængonguï nänö tæ contaimpa inö tedepämo iïmaï tededinque,
 “Wængonguï ingante nē cæmīni inte tömengä ingante nē guiñente eñente cæmīni iñömö
 nē awënëidi iimīni incæ önömīnique incæ mīnitö tömämīni,
 Mönö Wængonguï ingante watapæ apæ necæimpa, ante apæ needäni,” angantapa.

Wængonguï Codotedo monguingä ææmæ

⁶ Ayæ adobaï waodäni tæiyænäni adotedæ ogæ tededäni bai eñentabopa. Ñænæ tēñabo ä bai detæbo eyequei tē bai eñentabopa.

“Adedoya,
 Mönö Wængonguï Awënë Tömää nē Cægaimi inte bitö nē Awënë badinque aabipa.

⁷ Mönö watapæ pönī entawëninque waa tocæimpa.
 Edæ tömengä ingante apænedinque mönö, Bitö ñäö emömi impa, ante angæimpa.

Edæ Wængonguï Codotedo nänö monguïnö oo bacæ cæpa cæmīni.

Onquiyängä tömengä ingante monguingä iñömö, Botö nänöogängä inguingä oo poncæcäimpa, ante nämä incæ eyepæ cæte a ongongampa.

⁸ Tömengä ingante weocoo nīno nāni ancoo waëmö näämæntacoo nänö wēñaquincoo, ante pönönāni ængä ingampa.

Wængonguï quīnāni nāni nō cægaincoo incæ nīno nāni ancoo waëmö näämæntacoo bai impa.”

⁹ Ayæ Wængonguï anquedo botö imote angantapa. “Iïmaï ante yewæmoe. ‘Wængonguï Codotedo monguingä ææmæ pö becædänimpa, ante wente ængä nē ponguīnāni nāni toquinque.’ ” Tömengä ayæ godömenque äninque, “Mäninö Wængonguï nänö nō angainö impa,” ante angantapa.

¹⁰ Ante äñongä botö tömengä önöwa inö ædæ wæænīnique tömengä ingante watapæ apæ necæte ante cæyömote tömengä wæætë, “Mänömaï cædämaï imawe, angantapa. Botö önönque bitö bai Wængonguï ingante nē cæbo imopa. Edæ bitö tönīñadāni Itota nänö apænegainö nē eñente cædāni bai botö adobaï Wængonguï ingante nē cæbo imopa cæbii. Edæ Wængonguinque ingante ædæ wæænīnique, Bitö Wængonguï Awënë imidö anguënë, ante apænee,” ante angantapa.

Itota godö odömongä beyænque Wængonguï beyæ nē apænedāni iñömö tömengä nänö apænegainö ante ewocadinque apænedänipa.

Näämænta cabayoga nē tæ contacä mongænte pongampa

¹¹ Botö ayæ ayömote öönæde wi ænete bai bayö cabayo näämænta eñacä a ongongä atabopa. Cabayo nē tæ contacä mongænte pongä iñongante, Tömengä cöwë pönëninque nē Ædæmö Cædongä inte, Nawangä impa, ante nē Apænegaingä ingampa, ante pemonte ingampa. Wënæ wënæ cædāni inänite tömengä nō apænte ante pänongä ingampa. Ayæ guëadó guëa cædinque tömengä nē nō cædongä ingampa. ¹² Tömengä awinca gonga bæcodote bai emongä inte tömengä ocaboga pogantacoo encacä ingampa. Tömengäa emöwo yewæmonte ii incæte mäniwo tömenganque nänö eñëwo impa. Wadāni ædö cæte eñenguīnāni. ¹³ Tömengä weocoo yacoo wepænë guipænente mongængampa. Tömengä emöwo iñömö, Wængonguï nänö Angainö, ante pemonte ingampa.

¹⁴ Öönæde iñömö tontadoidi tömengä miñæ tee empote godänipa. Tömënāni nīno nāni ancoo waëmö näämæntacoo mongæninque cabayoidi näämænta eñadāni yabæ tæ contate mongænte godänipa. ¹⁵ Cabayoga nē tæ contacä iñömö wabæca nāni quëwencabo wabæca nāni quëwencabo incæ waodāni inänite yaëmenca pancæte ante äninque tömengä önönë

inö yaëmë tipængaa waingamë engamë ënedinque yædæ tadete ongongantapa. Tömengä iñömö nê tæiyæ awënë tömengä nempo quëwënäni inänite aacä bai adobai tömämæ quëwënäni inänite, İmaï cæedäni, ante aacæcäimpa. Yowepæ ante yowecoo näni pînä pînä gäwate cæincadedë pînä pînä gäwate bai cædinque cabayoga nê tæ contacä Wængongui ængui nänö angainö beyænque iñömö tömënäni inänite püinte pancæcäimpa. Wængongui adocanque Tömää nê Cægäingä ingampa. ¹⁶ Cabayoga nê tæ contacä iñömö weecoo yacooga adobai tömengä önontiya ii ëmöwo yewæmonte ëñacampa. “Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. Tömengä iñömö awënëidi tömänäni Awënë inongä ingampa,” ante pemonte ingampa.

¹⁷ Ayæ wacä Wængongui anquedo nænque cæncadëmö inö a ongongä atabopa. Tömengä öönädë gämænö nê cæwodäni tömänäni inänite yedæ ante aa pedinque, “Adayömö godongämæ pöedäni. Edæ Wængongui tæiyæ ææmæ ante pö cæedäni. ¹⁸ Awënë odeyeidi incæ tontado capitäoidi incæ onguïñænäni tæi piñænäni incæ cabayoidi incæ cabayocooga inte nê tæ contate godäni incæ iinäni tömänäni wænäni ate tömënäni baö cæncæte ante pöedäni. Waodäni awënë beyænque nê cæte quëwënäni incæ nê nämä cæte quëwënäni incæ awënëidi incæ önönänique incæ tömänäni baö pö cæedäni,” ante aa pecantapa.

¹⁹ Ayæ botö ayömö mönö guiñënongä tönö inguipoga awënë odeyeidi tönö tömënäni tontadoidi tönö adoyömö godongämæ pöinque, Cabayoga nê tæ contacä ingante ayæ tömengä tontadoidi inänite mönö guëadö guëa cæcæimpa, ante cædäni atabopa. ²⁰ Incæte guëadö guëa cæyönänite tömënäni näëmæ mönö guiñënongä ingante bæi ongöinque, Wængongui beyæ nê apænebo, ante

nê babæ äningä ingante adobai bæi ongönänitapa. Nê babæ änongä iñömö mönö guiñënongä beyænque mä pönï cæcä inongäimpa. İinque mönö guiñënongä tömengä nänö yewæmöi nê yewæmöinäni iñömö tömengä nänö ëmönö bai näni badöinca gäänë ædæ wææninque nê apænedäni inte tömënäni nê babæ änongä nänö mä cædö adinque guiñente wædinque oda cædönänipa. İinque mönö guiñënongä tönö nê babæ änongä ayæ müina quëwëñönte atopode näni änantibæ gonga bai näni bæcodotibæ cæncadëmæ wido cædänitapa. ²¹ Tömëna miñæ pönäni inänite guiquënë cabayoga nê tæ contacä tömengä önönë inö yaëmenca yædæ tadete ongöinque do wænongä wænänitapa. İinque nê cæwodäni baö ade cænänique tömänäni nê wænänäni baö tömö pönï cæwënönäni inänitapa.

20

Miido wadepo iñonte cæbänö baquü

¹ Wængongui anquedo wacä iñömö tadömengadænguipo ontatodemö wi ænequï tönö ñänömencaimë ñænæmë önönempo næængä inte öönädë inö ta wæængä atabopa. ² Ta wææninque tömengä dadagöö ingante bæi ongöinque tömengä nänö müido wadepo ganca ñä cæyænte ongonguinque ante ñä cæyængantapa. Mäningä dadagöö wëenëñedë tæntæ nê ingaingä inte wënæ awënë Tatäna ingacäimpa. ³ Mäningä ingante ñä cæyæninque tadömengadænguipodë wido cædinque ontatodemö wi ænequï inte tee mönedinque tömengä dæca ontatodemö ædæmö tee moncacantapa. Waodäni wabæca näni quëwencabo ayæ wabæca näni quëwencabo iñönänite tömengä, Oda cæte gocædänimpa, ante müido wadepo ganca cædämaï incæcäimpa, ante Wængongui anquedo dadagöö ingante wido cæcantapa. Mänimpodepo iinque ba ate tömengä ingante, Wantæ

iñö ñimpo cæte goquingä, ante ñimpo cæcä gocæcäimpa.

⁴ Ayæ awënëidi tæ containpa-coo botö atabopa. Wængongui Awënë godö angä beyænque awënëidi badingue apænte ante nē änäni badinäni inte mänimpaa tæ contadäni inänitapa. Ayæ Itota ingante ante apænedingue Wængongui nänö angainö ante apænedäni beyænque tömënäni inänite wangö tamencadäni wængadänimpa. Wangö tamencadäni wængainäni nänö önöwocaidi botö ñöwo atabopa. Mäninäni iñömö mönö guiñëongä ayæ pöningä ingante adingue, Bitö Wængongui Awënë bai imidö anguënë, ante apænedämaï inte ayæ tömengä nänö emönö bai nänö badöninca gäänë ædæ wæænte apænedämaï ingadänimpa. Ayæ tömënäni nänö önönemö inö nänö önömpo inö mönö guiñëongä ayæ pöningä nänö yewæmöi yewæmönämaï ingadänimpa. Adodäni ñäni ömæmöninque adoque miido wadepo ganca Itota Codito tönö godongämæ aadänitapa.

⁵ Mäninäni täno ñäni ömæmönäni incæte wadäni guiquënë nē wængainäni incæ miido wadepo iinque go ate ñäni ömæmoncädänimpa. ⁶ Täno ñäni ömæmönäni iñömö nē tæiyæ waëmö inäni inte nänö toquinque. Edæ wadäni nē wængainäni mepoga ganca nänö wænguimämo iñonte mäninäni iñömö wænämaï incädänimpa. Wæætë, Wængongui qui, ante nē godönäni bai tömënäni adobai, Wængongui beyæ, ante ayæ, Itota Codito beyæ, ante cæcädänimpa. Ayæ miido wadepo iñonte Itota Codito tönö godongämæ aacädänimpa.

Tatäna nänö æmæwo ömæ ewenguinö ante

⁷ Tadömengadænguipodë tömengä nänö tee mönecönë ñä cæyænte quëwëongä iñongante Tatäna ingante miido wadepo iinque go ate ñi cæyænäni ta gocæcäimpa. ⁸ Ta godingue tömengä inguipoga æmatæ go æmatæ go godingue Gogobæ nänö ämæ ganca go Mäogobæ nänö

ämæ ganca gocæcäimpa. Inguipoga tömäo godingue tömengä, Wabæca nänö quëwencabo ayæ wabæca nänö quëwencabo nänö oda cæte goquimämo ante cædingue tömënäni inänite, Mönö guëadö guëa cæquinque gocæimpa, ante, Adoyömö godongämæ pödäni, ante ancæcäimpa. Æpodänidö inänii, ante tömënäni æpæ wedeca emönai bai tæiyænäni inguinänidö anguënë.

⁹ Mäninäni bogænæ tömäo godäni bai tömënäni adobai inguipoga tömäo gocädänimpa. Wængongui nänö waadete quëwëñömö tömengä quinäni quëwëñömö godämæ gocädänimpa. Goyönäni öönæde inö gonga bæcodote gao wææñonte gonte wæncädänimpa. ¹⁰ Ayæ wænæ tömënäni inänite, Oda cæte gocädänimpa, ante nē cægaingä ingante Wængongui bæi ongonte atopode nänö änontibæ gonga bai nänö bæcodotibæ cæncadëmæ wido cæcæcäimpa. Edæ mönö guiñëongä tönö, Wængongui beyæ nē apænebo, ante nē babæ äningä tönö tömëna dobæ mäninñömö wido cæte ingadäimpa. Iinque mäninäni itæde woyowotæ mäninñömö quëwente cöwë wantæpiyæ nänö wæwenguimämo ingæimpa.

Wængongui Awënë tæ containpa näämæntapa

¹¹ Ayæ awënë tæ containpa ñænæmpa näämæntapa adingue botö mänimpaa nē tæ contacä ingä adobai atabopa. Inguipoga tönö öönæ iñömö tömengä ingante ate bai cædingue wodii godingue nänö ongönñömö edæ ædömë gote dæ änimpa.

¹² Ayæ nē wængainäni tömänäni awënëidi incæ önönänique incæ mänimpa gäänë a ongönäni atabopa. A ongönñönäni mincayontacoo wataa wataa wi æmpote ongoncoopa. Ayæ mincayonta wataa Wængongui, Quëwenguinta, ante tömengä yewæmongaintaa wi æmpote acantapa. Mänii mincayontacoo iñömö, Nē wængainäni tömänäni æbänö cægainäni inänii, ante Wængongui mänintacoo nänö

yewæmongainö ante wataa wataa tömanta adinque nē wængainäni nāni cægaī ganca, ante tömēnāni inānite adoganca apænte ante pangantapa. ¹³ Ayæ æpæntibæ cæncadēmæ do wængainäni wæætē ta pönānitapa. Æmæwo wængainäni incæ ta pönānitapa. Tömēnāni nāni wænte ongöñömö nē ongongainäni inte wadæ ta pönānitapa. Ta pönāni ate, Æbänö cægainäni ināni, ante adinque Wængonguī adocanque adocanque nänö cægaī ganca, ante tömengä ingante adoganca apænte ante pangantapa.

¹⁴ Mäniñedē ganca ayæ baganca wænāmaī quēwencædanimpa, ante ayæ, Wængainäni nāni ongöñömö adobai dæ bacæimpa, ante cædinque mönö Awēnē wængainäni æmæwo nāni wængalmāmo tönö nāni wænte ongöñömö æpæntibæ gonga bai nāni bæcodotibæ cæncadēmæ wido cæcantapa. Mänintibæ mempoga ganca æmæwo nāni wænguimāmo bai impa. ¹⁵ Wængonguī, Quēwenguinta, ante nänö yewæmongaintaa adinque, Æcänö emöwo mänintaa yewæmönāmaī i, ante adinque nē yewæmönāmaī ingainäni inānite mänintibæ cæncadēmæ wido cæcantapa.

21

Inguipoga münguipo öönæ müönæ

¹ Ayæ öönæ müönæ inguipoga münguipo atabopa. Edæ öönæ picæönæ inguipoga picænguipo dæ iinque batimpa. Ayæ æpæntibæ adobai dæ änimpa. ² Ayæ godömenque botö ayömote Wængonguī nänö tæiyæ waemö quēwēñömö müi Eedotadē nāni äñömö öönädē inö ta wææ atabopa. Onquiyængä nē moncæ cæcä iñömö, Botö nänöogængä inguingä waa acæcäimpa, ante waemö weocoo nē mongængä bai i quēwēñömö adobai waemö pönö emö inte ta wææ atabopa.

³ Ayæ Awēnē tæ containpa inö tedepāmo yedæ ä eñentabopa. “Nöwo Wængonguī nänö owoquincö waodāni weca ongö iinque tömengä

tömēnāni tönö quēwenguingä ingampa. Tömēnāni tömengä guidēnāni bacædanimpa. Ayæ Wængonguī incæ, Botö tömēmo munitö Wængonguimo incæboimpa, ante tömēnāni weca ongoncæcäimpa. ⁴ Tömēnāni wēñapæ tamonte wædi tömāmæ Wængonguī wadæ cæmoncæcäimpa. Mäniñedē æmæwo mönö wænīmāmo incæ mönö wæwēnimāmo incæ Ca ca mönö wædimāmo incæ nantate mönö wædimāmo incæ tömää mänimāmo dæ angæimpa. Edæ wēñēñedē inīmāmo incæ iinque batimpa,” angantapa.

⁵ Ayæ Awēnē tæ containpaa nē tæ contacä iimaī angantapa. “Tömää inīmāmo botö ñöwo müi cæcæboimpa,” angantapa. Ayæ, “Mänömainö ante botö äñinö edæ nö pönö i iinque mäninö ante wede pönengæimpa. Mänömaī beyæ bitö iimaī ante yewæmoe,” angantapa.

⁶ Ayæ tömengä wæætē botö imote iimaī äninque, “Dobæ iinque batimpa. Botö Tänobö ingaimo inte Tömāmo inguimo imopa. Wēñēñedē tömää nē Badongaimo inte tömää nē iinque Cæbo incæboimpa. Edæ nē gæwænāni, Æpæ beinēmönipa, ante nē äñāni inānite botö æpæ tapæ quēwenguimæ önonque godömo becædanimpa. ⁷ Tæi emonte nē gänä cædāni inānite botö mänincoo botö nē godonguincoo godömo æncædanimpa. Ayæ botö incæ tömēnāni Wængonguimo incæboimpa. Tömēnāni wæætē botö wēñænāni bacædanimpa. ⁸ Wæætē guñente awædö, ante nē äñāni tönö nē pönēnāmaī ināni guiquēnē, nē wiwa cædāni tönö wacä ingante nē wænönāni guiquēnē, nē towente quēwēnāni tönö idöidi nē ināni guiquēnē, Wængonguī impa, ante nāni badöninca gäänē ædæ wææninque nē apænedāni tönö nē babæ äñāni tömānāni guiquēnē, mänināni iñönānite atopode nāni änantibæ gonga bai nāni bæcodotibæ incæ tömēnāni nāni wæcöñömö bacæimpa. Mänii nāni wænguimāmo iñömö mempoga ganca nāni æmæwo

wænguimämo impa,” angantapa.

Mü Eedotadëë quëwëñömö

⁹ Wængonguï anquedoidi önompo æmæmpoque go mäa ganca inäni önompo æmæmpoque go mäa ganca owætacoo waodäni iinque näni wæwænguimämocoo eyede engate intacoo në næænäni iñönänite adocanque botö weca pöinque, “Pöe,” angantapa. “Wængonguï Codotedo nänöogængä në baquingä në monguingä iñongante botö bitö imite odömömo acæbiimpa,” angantapa. ¹⁰ Ayæ Wængonguï Önowoca incæ botö imote bæi ongonte bæi cæyongante botö wüimonte bæi iimaï atabopa. Wængonguï anquedo botö imote ö ænte mäo onquiyaboga tæcædæca pöni cönongä ongonte ayömo Wængonguï tæiyæ waëmö nänö quëwëñömö Eedotadëë näni äñömö öönædë inö ta wææñonte tömengä botö imote odömongä atabopa.

¹¹ Mänü quëwëñömö Wængonguï ñäö emönongä bæi apäitimpa. Ayæ dica aatapeca näni anca emö bæi awocawænta bæi waëmonca inimpa. Waodäni näni nanguï godonte æninca bæi ñäö apäite bæi Eedotadëë inimpa. ¹² Mänü quëwëñömö godämæ tæimö wææ cædi ænöwæmö ongönimpa. Ayæ wææ cædi odemoncoo iñömö önompo tipæmpoga go mënemonga wææ cædinemö inimpa. Önompo tipæmpoga go mäa ganca wææ cædinemö incæ wayömö adodemonque Wængonguï anquedo adocanque a ongöñongä wayömö adodemonque Wængonguï anquedo a ongöñongante anquedoidi önompo tipæmpoga go mäa ganca ongönänitapa. Mäninemö önompo tipæmpoga go mënemonga odemoncooga idægoidi näni cabo tipæmpoga go mencabodäniya iñönänite tömënäni emöwocoo yewæmonte inimpa. Wayömö odemonga adocaboque emöwo wayömö odemonga adocaboque emöwo yewæmonte inimpa. ¹³ Nænque tamönö inö mäa go adoque odemö

inimpa. Nænque wæidö inö mäa go adoque odemö inimpa. Betamonca inö mäa go adoque odemö inimpa. Adobai æmataë inö mäa go adoque odemö inimpa. ¹⁴ Mänü quëwëñömö wænömënæca mænonte wææ cæqui, ante näni ñönönincacoo iñömö önompo tipæmpoga go mencaa inimpa. Mänincacoo önompo tipæmpoga go mencaa incæ Wængonguï Codotedo nänö da godongainäni önompo tipæmpoga go mënäa inäni tömënäni emöwo incæ adocanque emöwo wacaa adocanque emöwo wacaa yewæmonte eñacaimpa.

¹⁵ Wængonguï anquedo botö imote në apæningä iñömö tee manguimpa oodo inte badöimpa në næængä atabopa. Mänü quëwëñömö tee mancæte ante mänü wææ cædinemoncoo adobai tee mancæte ante mänü wææ cædi adobai tee mancæte ante tömengä tee manguimpa næængantapa. ¹⁶ Mänü quëwëñömö æmataë adoganca æmataë adoganca mænonte inimpa. Doyæ inö betamonca inö adoganca inimpa. Tömengä mänü quëwëñömö tee manguimpa inte tee mante doyæ inö ænöwæmö inö doo müido dootiento quidömetodo ganca inimpa. Ayæ betamonca iñömö adobai doo müido dootiento quidömetodo ganca i atabopa. ¹⁷ Wængonguï anquedo waodäni näni tee mänö bæi tee mangä ayongä mänü quëwëñömö wææ cædi tæinebo inö tetenta i coatodo mëetodo ganca inimpa.

¹⁸ Mänü wææ cædi aatapeca näni änonca inte mænönü impa. Mänü quëwëñömö guiquënë oodo inte awocawænta bæi waëmö inte mænönü impa. ¹⁹ Mänü quëwëñömö wænömënæca mænonte wææ cæqui, ante ñönönincacoo iñömö, Waëmö emongæimpa, ante tömënäni quincacoo näni nanguï godonte ænincacoo ænte mämö ñönönincacooga bewodö bewodö cædanitapa.

Tänoca ñönöninca aatapeca näni anca inimpa.

Waca ñönöninca guiquënë tapidoca näni anca inimpa.

Waca ñönöninca guiquënë aagataca
nāni anca ñinimpa.

Waca ñönöninca guiquënë etemēnaotaca
nāni anca ñinimpa.

²⁰ Waca ñönöninca guiquënë oöninteca
nāni anca ñinimpa.

Waca ñönöninca guiquënë codönadinaca
nāni anca ñinimpa.

Waca ñönöninca guiquënë coditoodi-
toca nāni anca ñinimpa.

Waca ñönöninca guiquënë bedidoca
nāni anca ñinimpa.

Waca ñönöninca guiquënë topatioca
nāni anca ñinimpa.

Waca ñönöninca guiquënë coditopa-
dataca nāni anca ñinimpa.

Waca ñönöninca guiquënë aatintoca
nāni anca ñinimpa.

Waca tömanca guiquënë amatitaca
nāni anca ñinimpa.

Mänimpoca ñinimpa.

²¹ Mänii wææ cædinemö iñömö
önompo tipæmpoga go mēnemonga
iñömö pededamö nāni ämö önompo
tipæmpoga go mēmonga inte mænonte
ñinimpa. Wææ cædinemö incæ
wææ cædinemö incæ pededamö
adomonque adomonque inte
mænöninemö ñinimpa. Mänii
quëwēñömö taadö ñænænö godö
oodo inte mænöwate taadö awocawænta
baï waëmö ñinimpa.

²² Mönö Wængongui Awënë
adocanque Tömää nè Cægaingä
tönö Wængongui Codotedo tönö
mäniiñömö cōwē ongōna ñinque
godongämæ quëwēnāni guiquënë,
Mönö Wængongui oncōnē gui-
icæimpa, ante quīnante anguinānii.
Edæ Wængongui tæiyæ waëmö
oncö mäniiñömö dæ ä atabopa.

²³ Wængongui nè ñäö baï emönongä
inte ñäö apäiquingä baï ñinongäimpa.
Ayæ Wængongui Codotedo iñömö nāni
ti wodönoincade baï i ñinque mänii
quëwēñömö iñömö nænque incæ
apäicä incæ quīnante godōmenque ñäö
apäiquii. ²⁴ Wabæca nāni quëwencabo
ayæ wabæca nāni quëwencabo ñinānite
Wængongui ængä beyænque nè
quëwēnāni inte mäninānique mänii
ñäö apäiyömö cægoncædänimpa.

Adobaï inguipoga awënë odeyeidi
waëmoncoo nāni eadincoo mäniiñömö
ænte poncædänimpa.

²⁵ Mänii quëwēñömö woyowotæ
ñināmaï ingæimpa. ñinque mäniiñömö
wææ cædinemoncoo iimö iñö iimö
iñö iñonte cōwē tee mönedāmaï
ingæimpa. ²⁶ Wabæca nāni

quëwencabo ayæ wabæca nāni
quëwencabo incæ tömēnāni waëmoncoo
nāni eadincoo mäniiñömö ænte
poncædänimpa. Mänii quëwēñömö
waa quëwēñömö impa, ante waa
ate apæncædänimpa. ²⁷ Quiēmē
wēnæ wēnæ i mäniiñömö cōwē gui-
idāmaï ingæimpa. Nē wiwa cædāni
incæ nè babæ änāni incæ mänii
quëwēñömö guiidāmaï inguinānidö
anguënë. Wæætē Wængongui
Codotedo, Quëwenguintaa, ante
nänö yewæmōintaa nè yewæmōnāni
guiquënë tömēnānique guicædänimpa.

22

¹ Ayæ Wængongui anquedo botö
imote önö quëwenguiwæ odömongä
atabopa. Mänimæ awocawænta baï
waëmömæ impa. Wængongui tönö
Wængongui Codotedo nāna aacæ tæ
contaimpa ñnö tapæmpa. ² Mäniiñömö
tadinque mänii quëwēñömö taadö
ñænænö godö tæcæguedē ñnö ta
gopæmpa. Mäninö æmæ wedeca
incæ imæ wedeca incæ awæ
quëwenguiwæ pæwæ atabopa.
Mäniwæ iñömö tömenca wacä apäicä
iñonte wacä apäicä iñonte incapa.
ñinque adoque wadepo iñedē önompo
tipæmpoga go mēa ganca mänimpoga
mäniwæ incayedē impa. Wabæca
nāni quëwencabo ayæ wabæca
nāni quëwencabo incæ mänimæca
quëwēnāni tömānāni mäniwæ
öñabocoo beyæ ganca bacædänimpa,
ante eñabocoopa. ³ Wængongui
pante nänö angainö beyænque quin-
coomē wēnæ wēnæ bagatii mäninö
mäniiñedē dæ angæimpa. Wængongui
tönö Wængongui Codotedo nāna aacæ
tæ contaimpa mänii quëwēñömö
mæ ongoncæpaimpa. Tömengä in-
gante nè cædönāni iñömö tömengä
ingante watapæ apænedinque

tömengä ingante cæcædänimpa.
⁴ Tömengä awinca acædänimpa. Ayæ tömengä emöwo tömënäni önönemö inö yewæmante incædänimpa.
⁵ Mäniñömö woyowotæ inämaï ingæimpa. Edæ mäniñömö quëwënäni beyæ Wængonguï Awënë nê ñäö emönongä inte apäiquingä inongampa. Ìnque nænque ñäö apäidö incæ tî wodönoincade ënënö incæ quinate ayæ apäiquï. Ayæ mäniñömö quëwënäni adodäni cöwë wantæpiyæ aacædänimpa.

Itota Codito oo poncæcäimpa

⁶ Ayæ Wængonguï anquedo botö imote apænedinque, “Mäninö bitö ëñenö nö pönï i ìnque mäninö ante wede pönengæimpa. Wængonguï beyæ nê apænedönäni tömengä Önöwoca ingante ewocadinque apænedänipa. Tömënäni nänï nê ewocadongä Wængonguï Awënë iñömö tömengä anquedo ingante apænedinque, Bitö botö imote nê cædönäni weca godinque, Æbänö oo pönï baquimpa, ante odömömi acædänimpa, ante da pönongä pongantapa,” ante botö imote apænecantapa.

⁷ Itota Codito, “Aedäni. Botö oo ocæ emænte ponguïmo imopa. Ìi mincayontaa Wængonguï beyæ apænedinque nänï yewæmante angainö ante nê ëñente cædäni iñömö nänï toquinque,” ante apænecantapa.

⁸ Botö Wäömo inömo imopa. Mäninö Wængonguï anquedo nänö äninö ante nê ëñenimo inte botö mänii tömengä nänö odömöninö ante nê adimo inömo imopa. Wængonguï anquedo angä ëñeninque ayæ odömongä adinque botö nê odömöningä önöwa inö ædæ wæænte tömengä ingante watapæ apænecæte ante cætabopa.

⁹ Cæyömote tömengä wæætë, “Mänömaï cædämaï imäwe, angantapa. Botö ononque bitö bai Wængonguï ingante nê cæbo imopa. Ayæ bitö tönïñadäni Wængonguï beyæ nê apænedönäni tönö iï yewæmointaa nänï angainö ante nê ëñente cædäni

tönö botö tömënäni bai adobai Wængonguï ingante nê cæbo imopa cæbii. Edæ Wængonguinque ingante ædæ wææninque, Bitö Wængonguï Awënë adobique imidö angüenë, ante apænee,” angantapa.

¹⁰ Wængonguï anquedo godömenque botö imote iïmaï angantapa. “Edæ mänömaï baquiönæ oo pönï ingæimpa cæbii. Ìi yewæmointaa Wængonguï beyæ apænedinque nänï angainö ante bitö wë wodönämaï inte do apænee. ¹¹ Nê wënæ wënæ cædönäni inänite ee abi godömenque wënæ wënæ cæcædänimpa. Tömënäni nänï pönënö wentamö bai nê entawënäni inänite ee abi godömenque nänï pönënö wentamö bai entawencædänimpa. Nê nö cædäni inänite ee abi godömenque nö cæte quëwencædänimpa. Nê tæiyæ waëmö entawënäni inänite ee abi godömenque tæiyæ waëmö entawencædänimpa.”

¹² Itota Codito, “Aedäni. Botö oo ocæ emænte ponguïmo imopa. Ocæ emænte pöninque botö tömëmo godömo nänï ænguincoo, ante næænte ponguïmo imopa. Tömänäni æbänö cædäni, ante adinque botö tömënäni nänï cægai ganca ante adoganca godömo æncædänimpa. ¹³ Botö Tånobo ingaimo inte Tömämo inguïmo imopa. Tömää badönämaï iñedë botö Do Quëwengaimo imopa. Ayæ tömää ìnque bayedë incæ botö Ayæ Pönï nê Quëwëmo incæboimpa. Wëenëñedë tömää nê Badongaimo inte tömää nê Ìnque Cæbo incæboimpa.”

¹⁴ Weocoo yamonte bai mimönë nê mënongate inäni iñömö tömënäni nänï toquinque edæ mänii quëwëñömö wææ cædinemö iñömö go guiquinäni inänipa. Go guidinque tömënäni quëwenguïwæ quëwenguinca bequinäni inänipa. ¹⁵ Wiwa cædäni guiquenë mänii quëwëñömö yabæque iñömö ongonte wæquinäni inänipa. Idöidi nê inäni, nê towente quëwënäni, wacä ingante nê wænönäni yabæque ongönänipa. Wængonguï impa, ante nänï badöninca gäänë ædæ wææninque nê apænedäni, nê babæ

änäni tönö, Babæ äinēmönipa, ante nē änäni tönö tōmēnāni tōmānāni māniī quēwēñōmō yabæque iñōmō quēwenguīnāni inānipa.

¹⁶ “Botō Itotabo ingaīmo imopa. Māninō botō angainō ante nō impa, ante botō imote godongāmæ nāni pōnencabodāni tōmānāni inānite apænecā eñencædānimpa, ante cædinque botō do botō anquedo ingante mīnitō weca da pōnōmo pongantapa. Botō docā Awēnē Dabii nānō Wæmæncoo ingaīmo inte adobaī nānō Pæīmo inōmo imopa. Botō wadaamō bai ñāō bayō apāimō bai imopa.”

¹⁷ Wængonguī Tæiyæ Waēmō Önōwoca tönō Wængonguī Codotedo nānōgængā nāni ānongā, “Pōedāni,” ānāpa. Āñōna tōmēnāni tōmēna inate nē eñēnāni inte adobaī, “Pōedāni,” ancædānimpa, āmopa. Nē gæwænte ināni tōmānāni pō becædānimpa, āmopa. Nē beinēnāni iñōnānite, Mīnitō quēwenguīmæ, ante önonque pōnonguīmæ incæ pō ænte becæmīnimpa, ante āmopa.

¹⁸ Ī yewæmōintaa Wængonguī beyæ nē apænedāni nāni angainō ante nē eñēnāni tōmānāni inānite, Ee aedāni, botō wææ āmopa. Edæ māninō nāni

angainō ante godōmenque wadō änāni inānite Wængonguī pancæcāimpa. Ī yewæmōintaa quiēmē nāni pante wæwenguincoo, ante yewæmonte adinque Wængonguī nē wadō änāni inānite mānincoo bai godōmenque pancæcāimpa. ¹⁹ Ayæ Ī yewæmōintaa Wængonguī beyæ nē apænedāni nāni angainō incæ pancadea æninque nē wēä godonte bai cædāni inānite Wængonguī quēwenguīwæ quēwenguinca godōnāmaī incæcāimpa. Tōmengā adobaī, Botō tæiyæ waēmō quēwēñōmō māniñōmō guidāmaī incæmīnimpa, ante ancæcāimpa. Māniī quēwenguīwæ ante māniī quēwēñōmō ante Ī yewæmōintaa yewæmonte impa.

²⁰ Māninō ante, Nō impa, ante nē apænecā iñōmō tōmengā iñōmō, “Ao, botō oo ocæ emænte ponguīmo imopa,” angantapa. Āñongante botō,

Mānōmaī baquīnō anguēnē, ante, Amēē, āninque, Awēnē Itota pōe, āmopa.

²¹ Awēnē Itota Wængonguī nānō guidēnāni inānite waadete godō cæcæcāimpa. Mānōmaī baquīnō anguēnē, ante botō, Amēē, ante māninque āmopa.